

پريو ايسو

را پارام

پويتر انجيل

پويتر شاستر رو نوو قرار
پارکري بولي م

انجيل رو اي ترجمو
چرچ آف پاڪستان حيدرآباد ڊائيسس
ان رومن ڪيٿلڪ حيدرآباد ڊائيسس
بيٽون را پاها ٿي ٿيل سء

پاڪستان بائبل سوسائٽي
انارڪلي، لاهور

The New Testament in Parkari

First Edition

Bible Illustrations by Horace Knowles
© The Bible Society
Swindon, England 1954, 1967, 1972

except

Illustrations on pages 593, 751, 906, and 977
© David C. Cook Foundation
Used by permission

Translated by
the Church of Pakistan, Hyderabad Diocese
and the Roman Catholic Diocese of Hyderabad

Published by
Pakistan Bible Society
Anarkali, Lahore — 54000

Karachi Office
Fatima Jinnah Road
P.O. Box 10405
Karachi — 75530

ISBN 969-25-0390-9

HONEST PRINTERS
Ghora Hospital Lahore.

Date Printed 1996
Number Printed 2000

پوټر انجيل را كتاب

پوټر	كتاب	پوټر	كتاب
854	تيمټيس رو پيرهون كت	9	متي رو لكل شاستر
871	تيمټيس رو پيزو كت	145	مرقس رو لكل شاستر
884	طيټس رو كت	232	لوقا رو لكل شاستر
892	فليمون رو كت	373	يوحنا رو لكل شاستر
897	عبرانيون رو كت	473	مك شيلون را كوم
948	يعقوب رو لكل كت	602	روميون رو كت
965 ..	پطرس رو لكل پيرهون كت	665	كرنتيون رو پيرهون كت
984	پطرس رو لكل پيزو كت	723	كرنتيون رو پيزو كت
995 ...	يوحنا رو لكل پيرهون كت	761	گلتيون رو كت
1011	يوحنا رو لكل پيزو كت	783	افسيون رو كت
1014	يوحنا رو لكل ترټمو كت	803	فليپون رو كت
1017	يهوداه رو لكل كت	818	كلسيون رو كت
1023	ذرشن	833 ..	تسلنيكيون رو پيرهون كت
		846	تسلنيكيون رو پيزو كت

هزموټي ان نقشا

- 4 ايټا ترجما را پارام هزموټي
- 5 انجيل را زمونا ري كاس واتون
- 7 يهوديون را ملك رو ان يروشلم شهر رو نقشو
- 598 مك شيلا پولوس رټي حياتي ان كوم
- 1095 پوټر انجيل را كاس وين
- 1108 پوټر انجيل را كاس مزمون ان حوالا
- 1118 زونا قرار رون كتاهون را نوم

ایٲا ترجما را پارام هزموٲئي

* اي ڪتاب وشواسيون را پويتر شاستر را نوا قرار رو ترجمو سئ. نوا قرار نئ پويتر انجيل پڻ ڪئھ. اصلي انجيل يوناني بولي ۾ لکل هئي، ان اي ترجمو اصلي يوناني بولي ٿي ڪرل سئ.

* اي ترجمو رومن ڪيٿلڪ حيدرآباد ڊائيسس ان چرچ آف پاڪستان حيدرآباد ڊائيسس پيئون را طرف ٿي ٿيل سئ.

* ايٲا ترجما ۾ اصلي مطلب هورئ نمونئ لکل سئ. اصلي مطلب ساوو ڪريا هارو يوناني بولي رو ڪيڏا رو ڍاڙو ساڏين پارڪري بولي رو ڪيڏا رو ڍاڙو ليڏل سئ، ان ڪيٽڪ ڪيٽڪ اصلي بولي ٿي ڪئينڪ وڌارئ ويڻ پڻ لکل سئ. ڪئينڪ اصلي بولي ٿي هيڪ ٿي وڌارئ مطلب ٺهري هيڪئھ. ايٲا ترجما ۾ اوئون موئين ٿي روڳو هيڪ مطلب لکل سئ.

* اصلي بولي رو پورو مطلب هزما هارو پويتر شاستر را پارام هزمايا واڙا ڪتاب پٽو ڪپئ. ان يوناني بولي پڻ شيڪوو ڪپئ.

* اصلي بولي ۾ پويتر شاستر را ٽائيل ان نمپر لکل نٿا. ٽائيل ان نمپر ايٲا ترجما ۾ تيام لکل سئ زم واتون ڳوتيام هوري ٿئ. ٽائيل ايٲا هارو پڻ لکل سئ زم وات وڌارئ هورئ نمونئ هزمايم آوئ.

* منڪ زونا وڪٽ ۾ اصلي شاستر را نقل هات ٿي لڪي لڪين ناوتا. تيام ڪيٽڪ ڪيٽڪ ڌار ڌار نقل ناوتون ڪتابون ۾ ويٺون رو ڪئينڪ قرق ٿي ڳيوھ. جيٽئ گهٽون ويٺون رو قرق ٿيوھ، ايٲا ترجما ۾ هائي ويڻ پريڪيٽ () ۾ لکل سئ. پڻ جيٽئ هاو ٿوڙون ويٺون رو قرق ٿيوھ، اوٽئ ايٲا ترجما ۾ پريڪيٽ ڏيڏل ٿئي.

* ايٲا ترجما ۾ اڳلوڪا ماپ ري جڳا ۾ همٿوڪو ماپ لکل سئ، ان اڳلوڪون پيٽيون ري جڳا ۾ همٿوڪا پيٽيا لکل سئ. ايسو را زمونا ۾ هيڪ 'ڊينار' هيڪا ڏي ري مزوري رٽ پراير هتو. تيام همٿوڪي هيڪا ڏي ري مزوري پرموٽئ هيڪ 'ڊينار' پنجاه روپيون هرڪو راکل سئ.


انجيل را زمونا ري کاس واتون

(سالون رو حساب کيٽٽڪ اندازا پرموٽه کرل سٺ)


نوٽ: پريو ايسو ٿي گهڻون سالون کيٽر هيڪڙ ديونيسيوس نومي منک ايسو رٿه زلميا را توڻا را پارام کوجنا کرين حساب کريو جي هائي وات ٿيا نٿه 532 سال ٿيا هه. تيامر اوڻا سال نٿه 532ع کين اوڻه عيسوي سن شروع کريو. همٿه تو کپر سٺه جي هايا منک رو حساب سوک سال گهٽ هتو، توڻي پڻ از هوڏي عيسوي سن هايا منک را حساب پرموٽه وٺه ريو.

سال	وات	حوالو
37ع مور	هيروديس پادشا يهوديه ملڪ مانه راز كروا مڏهه	متي 1:2
27ع مور	رومي پادشا قيصر اوگستس راز كروا مڏهه	لوقا 1:2
6ع مور	يوحنا پويتر سنون ڏيڏا واڙا رو زلم	لوقا 1:5-79
"	ايسو رو زلم	لوقا 1:2-39، متي 1:2
5ع مور	يوسف ايسو نٿه مصر ملڪ ۾ لي زائھ	متي 2:13-18
4ع مور	هيروديس پادشا رو موت	متي 2:19
"	هيروديس (انتياس) گليل مانه راز كروا مڏهه	لوقا 3:1
3ع مور	يوسف ايسو نٿه ناصرت شهر ۾ لي زائھ	متي 2:19-23
5ع	ايسو مان باپ پيڙو يروشلم شهر ۾ زائھ	لوقا 2:41-52
"	پولوس رو زلم	
11-14ع	تيريس قيصر رو رومي صوبيون مانه راز	لوقا 3:1
14ع	رومي پادشا قيصر اوگستس رو موت	
14-37ع	رومي پادشا تيريس قيصر رو راز	لوقا 3:1
26-36ع	پينطس پيلاطس رو يهوديه مانه راز	لوقا 3:1
26ع	يوحنا پويتر سنون ڏيوا مڏهه	لوقا 3:1-18
"	ايسو پويتر سنون لٽه	لوقا 3:23
"	ايسو پڳوون رو ڏيڏل كوم كروا مڏهه	لوقا 3:1-18
27ع	يوحنا جيل ۾ پورائي زائھ	لوقا 3:19-20
29ع	يوحنا پويتر سنون ڏيڏا واڙا رو موت	متي 14:1-12
30ع	ايسو رو موت، ان جيوي اُونوو	متي 27:27-32، 28:10
"	ايسو آڪاش مانه سڙي زائھ	لوقا 24:44-51

کوم 13-1:2	پوټر آتما شيلون مانه اوترئه	ع30
کوم 41-14:2	مک شيلو ايسو رو پزاوول کوم کروا مڏئه	"
کوم 1:8-57:7	استيفنس وشواس راکیا ري کري مرئه	ع35
کوم 1:8	وشواسيون مانه ظلم ٿيوا مڏئه	"
کوم 19-1:9	پولوس پريو ايسو مانه وشواس اوئئه	"
کوم 23-1:12	هيروديس (اگريا) راز کرئه	ع37-44
	هيروديس (انتياس) رو گليل مانه راز کتم تئه	ع39
کوم 2-1:12	يعقوب وشواس راکیا ري کري مرئه	ع44
کوم 17-3:12	پطرس جيل م پورائه ان سوتي زائه	"
کوم 23-20:12	هيروديس (اگريا) رو موت	"
کوم 28:14-4:13	پولوس رو پيرهئون چکر	ع46-48
کوم 29-1:15	يروشلם شهر م وشواسيون رئي پنچائيت	ع49
کوم 22:18-40:15	پولوس رو پيزو چکر	ع50-52
کوم 17:21-23:18	پولوس رو ترئمو چکر	ع53-57
کوم 10:23-27:21	پولوس يروشلم شهر م زهلائي زائه	ع57
کوم 31-30, 16:28	پولوس روم شهر م قيدي تئه	ع60
فليپيون 24:2, 19:1	پولوس قيدي سوتئه	ع62
طيطس 5:1	پولوس رو چارمو چکر	ع62-67
2 تيمتيئس 8:1	پولوس پيزي وار روم شهر م قيدي تئه	ع67
2 تيمتيئس 8-6:4	پولوس وشواس راکیا ري کري مرئه	ع68
يوحنا 19-18:21	پطرس وشواس راکیا ري کري مرئه	"
لوقا 24-20:21	رومي قوج يروشلم شهر نئه کتم کرئه	ع70
ثرشن 9:1	يوحنا پتمس بيت مانه باروتام رئه	ع90-95



70 60 50 40 30 20 10 کتابانو



مٽي را لڪل شاستر رٿي هزموتئي

شاستر لڪيا واڙو

شاستر را ايٿا ڪتاب ۾ لڪيا واڙا رو نوم ڪيٿڻ نٿي لڪل، پڻ شروع ٿي لين منڪ ام هزمٿه جي مٽي نومي ايسو رٿه مڪ شيلڻه اي ڪتاب لڪيو ه. مٽي حلفي رو ڏيڪرو هتو ان اوٿا رو پيزو نوم لاوي هتو (مرقس 14:2، لوقا 27:5). او يهودي قوم رو هتو ان ناڪو ليڏا واڙو هتو (مٽي 9:9). اوٿا وڪت ۾ يهودي قوم رون منڪون مانه رومي حڪومت رو راز هتو. تيام يهودي قوم را منڪ ناڪو ليڏا واڙون ٿي شپ ڪرتا، ڪم تو او ڌاري قوم ري حڪومت هارو ناڪو ليٿا ان آپري قوم رون منڪون مانه ظلم ڪرتا (مٽي 10:9-11، مرقس 15:2-16، لوقا 30:5). زئيون ايسو مٽي نٿه شيلو ٿيا رو ڪيڏو، تو اوٿه آپرو ڏنڌو ساڏيو پرو ان ايسو رو شيلو ٿين اوٿا وونهڙ وويو (مٽي 9:9، مرقس 14:2، لوقا 28:5). تيا ڪيڙ زئيون ايسو آپرون ٻڌون شيلون موئين ٿي ٻارون زئون نٿه مڪ شيلا ٿيا هارو سونديا، تو اوٿه مٽي نٿه پڻ مڪ شيلو سونديو (مٽي 3:10، مرقس 18:3، لوقا 15:6).

زم پزن لڪيا ۾ لڪيا واڙو آپرا پارام ”هون“ نٿي ڪيتو پڻ آپرو نوم لٿه، تم ايٿا ڪتاب ۾ زئيون مٽي آپرا پارام بولٿه ريو، تو او پڻ آپ نٿه هون نٿي ڪيتو پڻ آپ نٿه مٽي ڪٿه (مٽي 9:9، 3:10).

گهڻي ايوي واتون سٺه جي مٽي را، مرقس را، ان لوقا را لڪل شاستر ۾ هاڳي ري هاڳي سٺه. لوقا آپ لڪيو جي آپ مور گهڻي منڪي ايسو را پارام لڪيو تو (لوقا 2:1). تيام اندازو سٺه جي مٽي ان لوقا پيئي مرقس رو لڪل شاستر پڻيو تو، ڪا ترڻي زئي ايسو را پارام اڳي لڪل واتون پڻي تي، ان پسٺه آپرا لڪل شاستر ۾ ڪئينڪ اڳلوڪي لڪل واتون ان ڪئينڪ نوي واتون پڻ لڪي. پڪئي ڪپر نٿي جي مٽي اي ڪتاب ڪئون لڪيو، پڻ 50-80ع را وس ۾ لڪيو هوشي.

شاستر ڪيون منڪون هارو لڪيو

ام لاڳهه جي مٽي شاستر رو اي ڪتاب ڪاس ڪرين يهودي قوم رون منڪون هارو لڪيو، ڪم تو ايٿا ۾ گهڻي واتون لڪل سٺه جي يهوديون نٿه هورٿ نمونٿه هزميام اوٿه. يهودي منڪ شاستر را زونا قرار ٿي هزمتا جي اوئون ري قوم موئين ٿي پڳوون ڪياڪ نٿه ميلشي جيو دائود پادشا رو وستار هوشي ان پڳوون رو سونديل پڇايا واڙو هوشي، جيا نٿه ”ڪريست“ ڪٿه. مٽي ايٿا ڪتاب ري شروع ۾ ڪٿه جي ايسو پڳوون رو سونديل پڇايا واڙو ڪريست سٺه، ان يهودي قوم را ڏاڏا ابراهيم رو وستار ان دائود پادشا رو وستار پڻ سٺه (مٽي 1:1). مٽي ايسو رٿي پيڏي لڪي، جيا ٿي ٿايتي ٿهه جي ايسو ابراهيم رو وستار ان دائود پادشا رو وستار پڻ سٺه (مٽي 2:1، 6:1، 16:1). ان اوٿه شاستر را زونا قرار را گهڻا حوالا ڏيڏا، جيا ٿي ٿايتي ٿهه جي

ايسو هاس ۾ ڀڳوونَ رو سُونڊل ڀڄايا واڙو ڪريست سڻ (مثال، مٽي 1:22-23، 2:5-6، 2:15 ان ڀڙا گهڻا حوالا).

شاستر لکيا رو مطلب

مٽي شاستر رو اي ڪتاب کاس ڪرين ايتا هارو لکيو، زم آڀري يهودي قوم رون منڪون هارو ٿاڀيئي تڻ جي ايسو هاس ۾ ڀڳوونَ رو سُونڊل ڀڄايا واڙو ڪريست سڻ، جيا را پارام اڳي شاستر ۾ لکل هتو. تيام زئيون مٽي ايسو ري پيڊي رٿي وات ڪرڻ، تئيون او يهودي قوم را ڏاڏا ابراهيم ٿي لين ايسو هودِي پيڊي را نوم لکڻ. (مٽي اي شاستر يوناني ٻولي ۾ لکيو. يوناني ٻولي ۾ ويڻ ”ڏيڪرو“ پوترا هارو پڻ واپرائڻ، ان تيام پيڊيون ۾ ويڻ ”ڏيڪرا“ رو ترجمو ”وستار“ ڪرل سڻ. وستار رو مطلب ڪيٽڪ ڏيڪرو سڻ ان ڪيٽڪ پوترو سڻ.) مٽي اي وات پڻ ساوئي ڪرين ڏيڪارڻ، جي ايسو نه روڳو آڀري يهودي قوم واڙون هارو آيوه پڻ ٻڌون ڌاري قوم واڙون هارو پڻ آيوه. تيام اوڻ ايتا ڪتاب ري شروع ۾ لکيو جي ڌاري قوم را نزومي شيئا ملڪ ٿي ايسو رٿي پوزا ڪروا آيا (مٽي 1:2-12)، ان ايتا ڪتاب ري ڀڄاري ۾ لکيو جي ايسو را پارام ڪشي رٿي ڪبر پوري دنيا ۾ همپراوو ڪيڻ (مٽي 18:28-20). مٽي ايسو ري شيڪارل واتون مانھ گهڻو ڏيون ڏڻ، ان ايتا ڪتاب ۾ ايسو ري شيڪارل واتون را پونس موٽا حصا سڻ (مٽي 3:5-27، 5:42، 13:3-52، 18:3-35، 24:4-25:46).

مٽي ايتا ڪتاب ۾ پريو ايسو رٿي اي ڪيڏل وات پڻ لکئي جي ڀڳوونَ رو گهر ڪتم ٿيشي (مٽي 1:24-35). هائي ڪيڏل وات 70ع ۾ پوري ٿي، زئيون رومي قوج يروشلم شهر ۾ آوين ڀڳوونَ رو گهر ڪتم ڪريو پرو. هيا ٿي ڀڳوونَ يهودي ڌرم رو مال ساڙيا رو نمونو ڪتم ڪريو پرو، ان يهودي ڌرم رون اوئون منڪون نڻ سزا ڏيڻي، جيا ايسو نڻ ڀڳوونَ رو سُونڊل ڀڄايا واڙو ڪريست نٿا موتا. هيون نمونن ڀڳوونَ آپ ٿاڀيئي ڏيڻي جي ايسو هاس ۾ ڀڳوونَ رو سُونڊل ڀڄايا واڙو ڪريست سڻ، جيئن ٻڌون منڪون رون ڏوهون ري ماڻي هارو آڀرو جيئو ڀڳوونَ را نوم مانھ ڏيڏوه.

ايتا ڪتاب موئين اي حصا سڻ:

ايسو رٿي پيڊي، زلم ان ٻاراپڻ	1:1-2:23
يوحنا پويتر سنون ڏيڏا واڙو پريو ايسو را آيا هارو منڪون نڻ تيار ڪرڻ	3:1-12
ايسو پويتر سنون لئھ ان شيطون اوڻا نڻ ڀڳوونَ ري مرضي ٿي ڦيرووا ڪرڻ	3:11-4:13
ايسو گليل صويا موئين ڀڳوونَ رو ڪوم ڪرڻ	4:12-14:12
ايسو ڌاريون قومون رون ملڪون ۾ زائين ڀڳوونَ رو ڪوم ڪرڻ	14:13-17:21
ايسو وڙي گليل صويا موئين ڀڳوونَ رو ڪوم ڪرڻ	17:22-18:35
ايسو گليل صويا ٿي يروشلم شهر هومو زائڻ	19:1-20:34
يروشلیم شهر ۾ ايسو رو آڪري هڻو	21:1-27:66
ايسو جيوي اونئھ، ڏيڪارڏا ڏڻھ ان شيلون نڻ هيڪ کاس ڪوم پڙاوڻھ	28:1-20

ايٺا ڪتاب را شاستر ٿي پيرا حوالا:

متي 2:1 پيدائش 3:21	متي 33:5 اِستِشنا 21:23
متي 2:1 پيدائش 26:25	متي 38:5 خُروج 24:21
متي 2:1 پيدائش 26-23:35, 35:29	متي 38:5 اخبار 20:24
متي 3:1 پيدائش 30-27:38	متي 38:5 اِستِشنا 21:19
متي 6-3:1 رُوت 22-18:4	متي 43:5 اخبار 18:19
متي 5:1 يشوع 25-22:6, 24-1:2	متي 4:8 اخبار 32-1:14
متي 5:1 رُوت 17-13:4	متي 17:8 يسعياه 4:53
متي 6:1 2 سموئيل 27-2:11, 24:12	متي 20:8 8. ڊاني ايل 14-13:7
متي 11-6:1 1 توارينخ 16-10:3	متي 13:9 هوسيع 6:6
متي 11:1 2 سلاطين 16-10:24	متي 20:9 اخبار 25:15
متي 12:1 1 توارينخ 19-17:3	متي 15:10 پيدائش 28-1:19
متي 23:1 يسعياه 14:7	متي 36-35:10 ميڪاه 6:7
متي 6:2 ميڪاه 2:5	متي 10:11 ملاڪي 1:3
متي 15:2 هوسيع 1:11	متي 14:11 ملاڪي 5:4
متي 18:2 يرمياه 15:31	متي 2:12 خُروج 10-8:20
متي 23:2 يوحنا 46:1	متي 4-3:12 1 سموئيل 6-1:21
متي 23:2 زبور 6:22	متي 7:12 هوسيع 6:6
متي 23:2 زبور 9-7:69	متي 21-18:12 يسعياه 4-1:42
متي 23:2 يسعياه 3:53	متي 40-39:12 يونا 17:1
متي 3:3 يسعياه 3:40	متي 41:12 يونا 5:3
متي 4:4 اِستِشنا 3:8	متي 42:12 1 سلاطين 1:10
متي 6:4 زبور 12-11:91	متي 42:12 2 توارينخ 1:9
متي 7:4 اِستِشنا 16:6	متي 15-14:13 يسعياه 10-9:6
متي 10:4 اِستِشنا 13:6	متي 35:13 زبور 2:78
متي 16-15:4 يسعياه 2-1:9	متي 4:14 اخبار 16:18
متي 21:5 خُروج 13:20	متي 4:15 خُروج 12:20
متي 27:5 خُروج 14:20	متي 4:15 اِستِشنا 16:5
متي 31:5 اِستِشنا 1:24	متي 4:15 خُروج 17:21
متي 33:5 اخبار 12:19	متي 4:15 اخبار 9:20
متي 33:5 گنتي 2:30	متي 9-8:15 يسعياه 13:29

متي 35:23 2 تواريخ 22-20:24	متي 4:16 متي 40-39:12
متي 39:23 زبور 26:118	متي 4:16 يونا 17:1
متي 15:24 داني ايل 27:9	متي 14:16 ملاڪي 5:4
متي 15:24 داني ايل 31:11	متي 11:17 ملاڪي 6-5:4
متي 15:24 داني ايل 11:12	متي 12:17 متي 14:11
متي 29:24 يسعيا 10:13	متي 24:17 خروج 16-11:30
متي 29:24 يسعيا 4:34	متي 16:18 استشنا 15:19
متي 30:24 داني ايل 14-13:7	متي 4:19 پيدائش 27:1
متي 39-37:24 پيدائش 23-6:7	متي 5:19 پيدائش 24:2
متي 24-23:26 زبور 9:41	متي 8-7:19 استشنا 4-1:24
متي 28:26 خروج 8-6:24	متي 19-18:19 خروج 16-12:20
متي 28:26 يرميا 34-31:31	متي 19-18:19 استشنا 20-16:5
متي 31:26 زڪريا 7:13	متي 19:19 اخبار 18:19
متي 54:26 زڪريا 7:13	متي 5:21 زڪريا 9:9
متي 64:26 داني ايل 14-13:7	متي 9:21 زبور 26:118
متي 66-65:26 اخبار 16:24	متي 12:21 خروج 16-13:30
متي 10-9:27 يرميا 2-1:18	متي 13:21 يسعيا 7:56
متي 10-9:27 يرميا 8:32	متي 13:21 يرميا 11:7
متي 10-9:27 زڪريا 13-12:11	متي 16:21 زبور 2:8
متي 34:27 زبور 21:69	متي 42:21 زبور 23-22:118
متي 35:27 زبور 16:22	متي 24:22 استشنا 6-5:25
متي 35:27 زبور 18:22	متي 32:22 خروج 6:3
متي 39:27 زبور 7:22	متي 37:22 استشنا 5:6
متي 41:27 زبور 7:22	متي 39:22 اخبار 18:19
متي 43:27 زبور 8:22	متي 44:22 زبور 1:110
متي 46:27 زبور 1:22	متي 5:23 استشنا 8-6:6
متي 48:27 زبور 21:69	متي 5:23 گنتي 40-37:15
	متي 35:23 پيدائش 8:4

متي

رو لکل پرپو ايسو را پارام

پويتر شاستر



بيت لحم

ايسو رئي پيدئي، زلم ان بازايڻ

ايسو كريست رئي پيدئي

(متي 1:1-17، لوقا 3:23-38)

1 ① اي ايسو كريست ري پيدي را نوم سٺم، جيو دائود پادشا رو وستار، ان ابراهيم رو وستار پڻ سٺم.

② ابراهيم رو وستار اِضحاق هتو. اِضحاق رو وستار يعقوب هتو. يعقوب رو وستار يهوداه ان اوٺا را پائي هتا. ③ يهوداه رو وستار فارص ان زارح هتا. يهوداه اوٺون رو پاپ هتو، ان اوٺون رئي مان تمر هٿي. فارص رو وستار حصرون

هتو. حصرون رو وستار رام هتو. ④ رام رو وستار عمينداب هتو. عمينداب رو وستار نحسون هتو. نحسون رو وستار سلمون هتو. ⑤ سلمون رو وستار بوعز هتو. سلمون اوئا رو ډاډو هتو، ان اوئا رئي ډاډئي راحب هتئي. بوعز رو وستار عوبيد هتو. بوعز اوئا رو پاپ هتو، ان اوئا رئي مان روټ هتئي. عوبيد رو وستار يسي هتو. ⑥ ان يسي رو وستار دائود پادشا هتو.

دائود پادشا رو وستار سليمان هتو. دائود اوئا رو پاپ هتو، ان اوئا رئي مان اورياه رئي ډوشي هتئي. ⑦ سليمان رو وستار رجبام هتو. رجبام رو وستار ابياه هتو. ابياه رو وستار آسا هتو. ⑧ آسا رو وستار يهوسفط هتو. يهوسفط رو وستار يورام هتو. يورام رو وستار عزياه هتو. ⑨ عزياه رو وستار يوتام هتو. يوتام رو وستار آخز هتو. آخز رو وستار حزقياه هتو. ⑩ حزقياه رو وستار منسي هتو. منسي رو وستار امون هتو. امون رو وستار يوسياه هتو. ⑪ ان يوسياه رو وستار يکونيا ان اوئا را پائي هتا، جيا اوئا وکت ږ هتا زئيون اسرائيلي قوم ننه قيدي کړين بابل ملک ږ لي گيا.

⑫ اسرائيلي قوم رنه بابل ملک ږ قيدي ټين زايا کيږ، يکونيا رو وستار سيالتي ايل هتو. سيالتي ايل رو وستار زربابل هتو. ⑬ زربابل رو وستار ابیهود هتو. ابیهود رو وستار الياقيم هتو. الياقيم رو وستار عازور هتو. ⑭ عازور رو وستار صدوق هتو. صدوق رو وستار اخيم هتو. اخيم رو وستار اليهود هتو. ⑮ اليهود رو وستار اليعزر هتو. اليعزر رو وستار متان هتو. متان رو وستار يعقوب هتو. ⑯ ان يعقوب رو وستار او يوسف هتو، جيو ماريون رو آدمي هتو. ان ماريون ټي ايسو پيدا ټيو، جيا ننه پښتون رو سونډل پچايا واړو کريست کئ.

⑰ هيوته نمونه ټدي پيډي گڼين ابراهيم ټي لين دائود هوډي شوډنه پيډي ټي، دائود ټي لين بابل ملک ږ قيدي ټيا هوډي شوډنه پيډي ټي، ان بابل ملک ږ قيدي ټيا ټي لين پښتون را سونډل پچايا واړا کريست هوډي شوډنه پيډي ټي.

ايسو گريست رو زلم

(متي 18:1-25، لوقا 1:2-7)

⑱ ايسو گريست رو زلم ايوئه نمونئه ٿيو. اوثا ري مان ماريون رو هڳپڻ يوسف ٿي ٿيل هتو. پڻ اوتون رئه ويوا ڪريا ٿي مور ماريون پويتر آتما ري ڪڙا ٿي پاري پڳ ٿي گڻي. ⑲ اوثا رو آدمي يوسف پڳوون ري وات مانھ وودا وازو منڪ هتو، ان اوثا رئي مرضئي نتئي جي منڪون ۾ ماريون رئي پڌنومئي ٿئ. تيام اوتھ ماريون نئ ساڌيا رو ان ماٺ ماٺ ۾ لڪي ڏيڏا رو ڦينصلو ڪريو. ⑳ پڻ زئيون يوسف هايون سوچون ۾ هتو، تئيون ايشور رئه آڪاشي ڏوت اوثا نئ شپنا ۾ ڏيڪارو ڏيڏو، ان اوثا نئ ڪيڏو: ”او يوسف، دائود پادشا را وستار، ماريون ٿي ويوا ڪريا ٿي مت پيئا، ڪم تو جيو ٻار اوثا را پيٽ ۾ سئ، او پويتر آتما ري ڪڙا ٿي ٿيوھ. ㉑ او سوڪرو زلمشي، ان تون اوثا رو نوم ايسو راڪي، جيا رو مطلب سئ ’پريو پچاوئھ،‘ ڪم تو او آپري قوم رون منڪون نئ ڏوهون را قوضا ٿي سڏاوين پچاوشي.“

㉒ هائي ٻڌوئي ڪئين ايئا هارو ٿيو، زم ايشور رئي اي وات پورئي ٿئ، جيئي وات اوتھ آپرو نياپو ڏيڏا وازا هات ڪيڏئي ٿئي:

㉓ ”زوئو، هيڪ ڪونئاري پاري پڳ ٿيشي،

ان او سوڪرو زلمشي.

ان اوثا رو نوم عمانوئيل راڪشي.“

”عمانوئيل“ رو مطلب سئ ”پڳوون آپون پيڙو.“

㉔ زئيون يوسف اونگھ ٿي اونيو، تئيون زم ايشور رئه آڪاشي ڏوت يوسف

نئ ڪريا رو ڪيڏو تو، همروم يوسف ڪريو، ان ماريون ٿي ويوا ڪرين اوثا نئ آپرا گهر ۾ راڪئي. ㉕ پڻ زئيون هوڌي ماريون سوڪرو نه زلميو، تئيون هوڌي يوسف اوثا پيڙو نه هوتو. ان زئيون سوڪرو زلميو، تئيون اوتھ

سوڪرا رو نوم ايسو را ڪيو.

اڳوڻيا ملڪ ٿي نڙومي ايسو رڻي پوزا ڪروا اوئھ

2 ① ھيروديس پادشا را راز ۾ زئيون ايسو يھوديه صوپا را بيت لحم شهر ۾ زلميو، تو تيا ڪيتر ڪئينڪ نڙومي اڳوڻيا ملڪ ٿي اوچتا يروشلم شهر ۾ آيا. ② او آوين ام پونسوا لاگيا: ”او پاڙ ڪيٿه سئ، جيو يھوديون رو پادشا تيا ھارو پيدا ٿيوھ؟ ڪم تو امي اوئا را زلم را نيشون رو تارو اوڳتون ڏيڪيو تو، ان امي اوئا رڻي پوزا ڪروا آياھ.“

③ ھيروديس پادشا نئ زئيون ھايا وات رڻي ڪپر پڙئي، تئيون او الاهي گھڻو پريشون ٿيو، ان يروشلم شهر را ٻڌائي منڪ پڻ گھڻا پريشون ٿيا. ④ تيام اوئھ يھودي قوم رون ٻڌون موتون پوزاريون نئ ان شاستر زوڻيا واڙون نئ آپ ڪن تيڙاوين اوئون ٿي پونسو: ”شاستر پرموئھ پڳوون را سونڊل پچايا واڙا ڪريست رو زلم ڪيٿه ٿيشي؟“ ⑤ تو اوئي وڙندئي ڏيڏئي: ”يھوديه صوپا را بيت لحم شهر ۾. ڪم تو شاستر ۾ پڳوون آڀرو نياپو ڏيڏا واڙا ري ھاڻي ام لڪايو:

⑥ بيت لحم شهر، جيو يھوديه علاقا ۾ سئ،

او يھوديه رون موتون شھرون ۾ گھڻا مون واڙو سئ.

ڪم تو اوئھ ھيڪ ايوو آڳيوون پيدا ٿيشي

جيو ماري سونڊل اسرائيلي قوم رڻي ھمپار ڪرشي.“

⑦ تئيون ھيروديس پادشا ماٺ ماٺ ۾ ھايون نڙوميون نئ نويڪلائي ۾ آپ


ڪن تيڙايا، ان اوئون ٿي ڪپر پاڙئي جي او تارو ڪيڏي

ڏيڪيام آيو تو. ⑧ ان پسئ اوئون نئ ام ڪين بيت

لحم شهر ميليا پرا: ”تمي زائو، ان زائين سوڪرا نئ

نائوڪئ نمونئ ڳوتو. ان زئيون زڙئ، تو مون نئ

ڪپر ڏيا، زم ھون پڻ زائين اوئا رڻي پوزا ڪرون.“



⑨ نَزُومِي هيروديس پادشا ري واتون مونيَن رَوونا ثيا. ان زوئو، اُو تارو جيا نئه اُوئي اُوگتون ديكو تو، اُو وزي ديكام آيو. ان تارو اُوئون مور مور ويتو ريو، زئيون هُودي اُوئا جگا مانه نه پوتيو جيئنه باز هتو، ان تارو اُوئنه زائين اُوي ريو. ⑩ نَزُومِي هائي تارو وزي ديكين، الاهي گهئا كُش ثيا. ⑪ ان گهر ڀر زائين اُوئي باز نئه اُوئا ري مان ماريون كن ديكو، ان باز ري پڳي پڙين اُوئا رئي پوزا كرئي. ان اُوئي آپري پيئي كولين اُوئا نئه قيمتي دُون ديدا، جيا هيم، لوبون ان پوز نومي وڻ رو قيمتي گوند هتو. ⑫ پسئه نَزُومِي پيزو مارگ لين آپرا




ملڪ هوما رَوونا ثيا، ڪم تو پڳوون اُوئون نئه شپنا ڀر هوشيار ڪريا تا جي اُو هيروديس پادشا ڪن وزي پاسا نه زائنه.

يوسف ماريون نئه ان ايسو نئه تيڙين

مصر ملڪ ڀر پاڳي زائنه

⑬ زئيون نَزُومِي گيا پرا، تئيون ايشور رئه هيڪئه آڪاشي دُوت يوسف نئه شپنا ڀر ديكارو ديدو، ان ڪيدو: ”اُوئي! سوڪرا نئه ان اُوئا ري مان نئه تيڙين مصر ملڪ ڀر پاڳي زا، ان زئيون هُودي هُون تُون نئه نه ڪون، تئيون هُودي تم اُوئنه ريا. ڪم تو هيروديس پادشا سوڪرا نئه ڳوتين مراووا ڪرئ.“

⑭ تيا مانھ يوسف اُونين سوڪرا نئھ ان اُونئا ري مان نئھ تيڙين رات تُو رات
مِصر ملڪ هومو پاڳي ڳيو. ⑮ ان زئيون هُوڌي هيروديس پادشا نه مريو، تئيون



هُوڌي اُو اُوٽ رو اُوٽ ريو. هائي وات ايٿا هارُو ٿئي، زم ايشور رئي اي وات
پورئي ٿئھ، جئي وات اُوٽھ آپرو نياپو ڏيڌا واڙا هات ڪيڏي ٿئي:
”مِصر ملڪ ٿي مئين آپرا ڏيڪرا نئھ تيڙايو.“

هيروديس پادشا ايسو نئھ مرايا هارُو ننڪون ٻارون نئھ مراوئھ

⑯ زئيون هيروديس زويو جي نزومي اُونئا ري چالاڪي ٿي پڇي ڳياھ، تئيون اُونئا
نئھ الاهي گهڻي رينھ سڙئي. ان اُوٽھ آپرون سپايون نئھ ميلين پيئون سالون رون
ان پيئون سالون ٿي گهٽ عمر رون ٻڌون سوڪرون نئھ مرايا پرا، جيا بيت لحم
شهر ۾ ان ايٿا رئھ آهئھ پاهئھ هتا. ڪم تو اُوٽھ نزوميون ٿي ڪبر پاڙئي ٿئي جي
تارو ڪيڏي ڏيڪيام آيو تو، ان هايا پرموئھ سوڪرا ري عمر رو اندازو لڳايو.
⑰ تئيون پڳوون رو نياپو ڏيڌا واڙا يرمياه رئي اي ڪيڏل وات پورئي ٿئي:

⑱ ”رامھ شهر ۾ رڙيون هومپڙيام آي،

رويا رو ان گهڻا رُونڱا رو آواز هومپڙيام آيو.

راخيل آپرا وستار هارُو روئھ رئي،

ان اُو سونئي ريا رو نا پاڙھ،

ڪم تو اُو مري ڳياھ.“

يوسف ماريون نٺ ان ايسو نٺ تيڙين مصر ملك تي پاسو آوئھ

①9 زئيون هيروديس پاڌشا مري گيو، تئيون زوئو، ايشور رٺه آڪاشي دوت مصر ملك ۾ يوسف نٺه شينا ۾ ڏيکارڻو ڏيڏو، ②0 ان ڪيڏو: ”اُوني! سوڪرا ان اوئا ري مان نٺه تيڙين پاسو اسرائيليون را ملك ۾ را پرو. ڪم تو جيا سوڪرا نٺه مراووا ڪرتا تا، او مري گياھ.“

②1 تيا مانھ يوسف اوئين سوڪرا ان اوئا ري مان نٺه تيڙين اسرائيليون را ملك ۾ پاسو آيو رو. ②2 پڻ زئيون اوئا نٺه ڪپر پڙئي جي ارخلائوس آپرا ٻاپ هيروديس ري جگا ۾ يهوديه صوپا مانھ راز ڪريا واڙو ٿيوھ، تو يهوديه صوپا ۾ زايا ٿي پيوئو. تئيون پڳوون اوئا نٺه شينا ۾ وڙي وڌيڪ واتون هڙماوي، ان تيام او گليل را علاقا ۾ گيو پرو. ②3 ان اوئنه زائين ناصرت نومي شهر ۾ ريو. هيون نموننه پڳوون رو نياپو ڏيڏا واڙون رئي ڪيڏل وات ايسو مانھ پورئي ٿئي، جي پڳوون رو سونڊل پچايا واڙو ڪريست اٿمونيتا شهر ناصرت رو ڪيوراشي.

يوحنا پويتر سنون ڏيڏا واڙو پريو ايسو را آيا هارو منڪون نٺ تيار ڪرئھ

يوحنا پويتر سنون ڏيڏا واڙو منڪون نٺ شيڪاڙوا شروع ڪرئھ

(متي 12:1-3، مرقس 1:1-8، لوقا 1:3-18، يوحنا 1:19-28)

① تيا ڪيڙ يوحنا پويتر سنون ڏيڏا واڙو يهوديه علاقا را رڻ ۾ آوين منڪون 3 نٺه ام همپڙاوا لاگيو: ② ”آپرا ڪراپ ڪوم ساڌين توپونه ڪرو ان پڳوون ري وات مانھ وو! ڪم تو ايشور را راز رو او توئو ڏوڪڙو آيوھ زئيون ايشور ساونھ نموننه ٻڌون مانھ راز ڪرشي.“ ③ اي يوحنا او رو او منڪ سٺه جيا را



پارام پڳوون رو نياپو ڏيڏا واڙئو يسعياه ام ڪيڏوھ:
 ”رڻ موئين هڪا پوڪار پاڙيا واڙا رو آواز آوئھ:
 پريو را آيا هارو آپ نئو تيار ڪرو!
 اوئا هارو آپرا شيرڙا سڏا ناوو!“

④ يوحنا را لوگهڙا اونئون ري ذات را ناول هتا، ان اوئا ريون ڪڙيون ۾
 سونهڙا رو پتو هوندل هتو. ان اوئا رو ڪاڌو ٿيڏ ان مڌ هئي. ⑤ تئيون يروشلم
 شهر تي ان پورا يهوديه صوپا ٿي، ان يردن ڌريا رٿه آهئو پاهئو ٻڌون علاقون
 تي منڪ اوئا ڪن آوا مڏيا. ⑥ ان او آپرا ڏوه مونين يردن ڌريا ۾ اوئا تي
 پويتر سنون ليتا.

⑦ پڻ زئيون يوحنا زويو جي فريسي پالتي ان صدوقي پالتي را گهڻا منڪ
 اوئا تي پويتر سنون ليوا آوئو ريا، تئيون اوئو اوئون نئو ڪيڏو: ”او منون رون
 پليتون، تمون نئو ڪيئو ڪيڏوھ جي تمي روڳا پويتر سنون ليڏا تي پڳوون ري
 آيا واڙي سزا تي پچي هڪوھ؟ ⑧ جي پچيا هارو ڪروھ، تو ايوا ڪوم ڪرو
 جيا تي ڪبر پڙئو جي تمي هاس ۾ آپرا ڪراب ڪوم ساڏين توپونھ ڪريھ ان
 پڳوون ري وات مانھ ووھ ريا. ⑨ ام مت هڙمو جي ’امي تو ابراهيم رو وستار

سون، ڪم نئين پڇون؟ 'ابراهيم رو وستار سو، تو ڪي ٿيو؟ پڳوون تو ايئون پوئون ٿي ابراهيم رو وستار ناوي هيڪڻه. ⑩ پڻ همڻه پڳوون منڪون نئه سزا ڏيڏا مانھ سئ، زوئڻه ڪوڪ وڻ را ٿڙ مانھ ڪوئاڙو رتين اوڀو هوئ. زم جيا وڻ موئين ميوا نٿي ٿيٿا، اوئا نئه واڍئھ ان ڏيوٽام ڦڳوڙئھ پرو، تم پڳوون اوئون نئه سزا ڏيشي جيا اوئا ري وات مانھ نٿي وٿي. ⑪ هون تمون نئه روڳو پوئي ٿي پويتر سنون ڏيونھ، جيا ٿي وات ساوئي ٿئھ جي تمي اپرا ڪراپ ڪوم ساڏين توپونھ ڪريھ ان پڳوون ري وات مانھ ويوا مڏياھ. پڻ جيو مون ڪيڙ اوئھ ريو، او مون ٿي گهڻي ڪڙا واڙو سئ. هون تو ايئا رڻه لائيق پڻ نٿي جي اوئا را زوڙا اوپاڙون. او تمون نئه پويتر آتما ان ڏيوٽا ٿي پويتر سنون ڏيشي، ان پڳوون رڻي وات مونيا واڙون نئه پويتر ڪرشي پڻ نه مونيا واڙون نئه سزا ڏيشي. ⑫ زم ڪوڪ تنگڙي لين اپرا ڪڙا مانھ اوڀئھ، ان آڀرو ڏون صاڦ ڪرين گهڏوم موئين راکئھ، پڻ پوه ڏيوٽا موئين ٻاڙئھ پرو، تم او منڪون رو نيا ڪريا مانھ سئ. او پڳوون ري وات مانھ وُڍا واڙون نئه آپ ڪن راکشي، پڻ نه وُڍا واڙون نئه ايو ڏيوٽا موئين ٻاڙشي جو ڪيڏي نئين اوزھمائھ."




ايسو پويتر سنون لئه ان شيطون اوئا نئه يگهون ري مرضي تي قيرووا كرئه

ايسو پويتر سنون لئه

(متي 13:3-17، مرقس 9:1-11، لوقا 21:3-22)

⑬ تيون ايسو گليل صوپا تي يردن ذريا مانه يوحنا كن آيو، زم اوئا تي پويتر سنون لئه. ⑭ پڻ يوحنا اوئا نئه ام كين نا پاڙيو: ”تمي مون كن پويتر سنون ليوا كم آوه ريا؟ مارئه تو تمون تي پويتر سنون ليوا كهئه.“ ⑮ پڻ ايسو اوئا نئه كيدو: ”همئه پلئه همروم ٿيوا ڏئه. كم تو ام نيك سئه جي هيئه ڍاڙئه آبي پورئه نمونه يگهون ري وات مانه وون.“ پسته يوحنا ايسو رئي وات مونئي ان اوئا نئه پويتر سنون ڏيدو.



⑯ زئون ايسو پويتر سنون لي ريو، تيون جهت ۾ پوئي تي بارو نيهريو. ان اوچتو آڪاش ڪلي گيو، ان اوئه يگهون رو ميلل پويتر آتما پارياو را روپ ۾ اوترتون ان آپ مانه اوتون ڏيڪيو. ⑰ ان اوچتو آڪاش تي يگهون رو آواز ام آيو: ”اي مارو پريمي ڏيڪرو سئه، ان ايئا تي هون گهڻو ڪش سون.“


يگهون رو دشمن شيطون

ايسو نئه يگهون ري مرضي تي قيرووا كرئه

(متي 11:4-13، مرقس 12:1-13، لوقا 1:4-13)

① پسته ايسو پويتر آتما را ڪيڏا تي رڻ ۾ گيو، زم اوئه شيطون اوئا نئه يگهون ري مرضي تي قيرويا هارو آزماوئه. ② زئون اوئه ورت را ڪين

چاليهون ڏيئون هُڏي ڏي رات ڪئين نه ڪاڌو، تئين نيٺ اُٿا نئه الاهي گهٽئي پوک لاڳئي.



③ ان ڏوه ڪرايا واڙئه شيطون اُٿا نئه آوين ڪيڏو: ”جي تون پڳون رو ڏيڪرو سئه، تو ڪئه جي اي پوٽا روتي تي زائه.“ ④ پڻ ايسو نا پاڙين ڪيڏو: ”شاستر ۾ لڪل سئه، منڪ روڳو ڪاڌا تي جيوتو نئين رئه، پڻ اُٿا رئه پڳون ري ڪيڏل هر وات مانھ ويو.“

⑤ تئين شيطون ايسو نئه پويتر شهر يروشلم ۾ لي گيو، ان اُٿا نئه پڳون را گهر ري ٻڌون تي اونسِي جڳا مانھ اُپاڙيو. ⑥ ان اُٿا نئه ڪيڏو: ”جي تون پڳون رو ڏيڪرو سئه، تو ايتون آپ نئه نيسو پاڙ، ڪم تو شاستر موئين لڪل سئه:

پڳون آپرون آڪاشي ڏوتون نئه تون هارو ڪيشي، ان اُٿا نئه آپرون هاتون مانھ ليشي زم تارون پڳون نئه پتر ئي نه لاڳئه.“ ⑦ پڻ ايسو اُٿا نئه نا پاڙين ڪيڏو: ”شاستر ۾ ام پڻ لڪل سئه: ايشور آپرا پڳون نئه نه آزماو ڪپئه.“

⑧ وڙي شيطون اُٿا نئه هڪا گهٽا اونسَا ڏونگر مانھ لي گيو، ان اُٿا نئه ڏنيا را ٻڌائي ملڪ ڏيڪاڙيا ان اُٿون رئي مال ملڳت ان مون شون ڏيڪاڙيو.

⑨ ان اُٿا نئه ڪيڏو: ”جي تون ماري پڳي پڙين مارئي پوزا ڪرئه، تو هائي ٻڌوئي ڪئين هون تون نئه ڏيه.“ ⑩ تئين ايسو اُٿا نئه نا پاڙين ڪيڏو: ”او

شيطون، ايتون هڪل تڙي زا! ڪم تو شاستر ۾ لڪل سئه: ايشور آپرا پڳون رئي پوزا ڪرو، ان روڳئي اُٿا رئي شيوا ڪرو ڪپئه.“

⑪ تئيون شيطون اوتاً نئه ساڌين گيو پرو. ان زوئو، آكاشي دوتي آوين ايسو رئي شيوا كرئي.

ايسو گليل صويا موئين پگوون رو كوم كرئ

ايسو گليل صويا موئين پگوون را يارام شيكاڙوا شروع كرئ

(متي 12:4-17، مرقس 14:1-15، لوقا 14:4-15)

⑫ زئون ايسو هومپريو جي يوحنا زهلائين جيل موئين پورائي گيو، تئون او پاسو گليل صويا ۾ گيو پرو. ⑬ ان ناصرت شهر ساڌين كفرنحوم شهر ۾ زائين ريو، جيو گليل ري ڍنڍ را ڪپ مانھ زبؤلون ذات ان نفتالي ذات رون منكون را علاقا ۾ سئ.

⑭ ايسو كفرنحوم شهر ۾ ايئا هارو آيو، زم پگوون رو نياپو ڏيڏا واڙا يسعياه رئي ڪيڏل اي وات پورئي تئ:

⑮ ”زبؤلون رو علاقا، ان نفتالي رو علاقا،

سمونڊ را ڪپ رو علاقا، ان يردن ڌريا ٿي پرليا پاها رو علاقا،

گليل رو علاقا جيئئ ڌاريون قومون را منڪ رئ،

⑯ اوت را منڪ، جيا اندارا ۾ هتا،

اوتي گهڻو سوجهرو ڏيڪيو.

جيا اوتاً ملڪ ۾ موت ري پيڪ ۾ پينل هتا،

اوتون مانھ پگوون رو سوجهرو ٿيو.

⑰ اوتاً توڻا ٿي لين ايسو منڪون نئه پگوون ري واتون همپراوا شروع ڪري.

او ام ڪيتو: ”آپرا ڪراپ كوم ساڌين توپونه ڪرو ان پگوون ري وات مانھ وو!

ڪم تو ايشور را راز رو او توڻو ڏوڪڙو آيوھ زئون ايشور ساوئ نمونئ ٻڌون

مانھ راز ڪشي.“



ايسو آپرا پيرهيان شيل سونڊه

(متي 18:4-22، مرقس 16:1-20، لوقا 1:5-11)

⑱ هيك وار زئيون ايسو گليل ري ڍنڍ را ڪپ مانھ ٽين زاتوت ريو، تو اوئھ پيئون پايون نئھ ڏيکيا. هيك شمعون هتو، جيا نئھ پطرس پڻ ڪئھ، ان پيزو اوئا رو پائي اندرياس هتو. او مشي ماريا هارو ڍنڍ ۾ رچ نوڪتات ريا، ڪم تو اوئون رو ڏندو مشي ماريا رو هتو. ⑲ ان ايسو اوئون نئھ ڪيڏو: ”مارا شيل ٽين مون وونهڙ آوو! تمي مشي ماريا رو ڪوم ساڏو، ان هون تمون نئھ منڪون نئھ پچايا وارا ناويه.“ ⑳ تو جهت ۾ او آپرا رچ ساڏين ايسو را شيل ٽين اوئا وونهڙ وودا پرا.

㉑ ان اوئون آگڙ زائين ايسو وڙي پيزون پيئون پايون نئھ ڏيکيا. او زبدي را

دیکرا یعقوب ان یوحنا هتا. او ټي پيټري موئين بيهين آپرا پاپ زبدي پيټرا آپرا
توتل رچ هوندتات ریا. ان ایسو اوئون ننه آپرا شیلایا هارو تیټرایا. ② تو یکتدم
او آپري پیټري ننه ان آپرا پاپ ننه اوټنه ساډین ایسو را شیلایا تین اوټا وونهز
وودیا پرا.

ایسو گهټون منکون ننه شیکاڙه

ان هازا هورا کره

(متي 23:4-25، لوقا 17:6-19)

②۳ ایسو پورا گلیل صویا ۾ ویتوریو. او اوټنه پگبون رون منډرون ۾ منکون
ننه شیکاڙتو، ان ایشور را راز را پارام کشي رټي کبر همپراوتو، ان منکون
ننه هر نمونا ریون پیما ریون ان تکلیبون ټي هازا هورا کرتو ریو. ②۴ ان اوټا
رټي نوموش پورا سوریه ملک ۾ پښ پکټري گټي. ان منک اوټا کن ټدون
مونډون منکون ننه تیټري آيا، جیون ننه قرق قرق پیما ری هتي، ان گهټي
تکلیب ۾ هتا. اوئون موئين ټي کیونک ننه پوت سوتل هتا، کیونک ننه
گهونټي آوتټي، ان کیونک ننه اډرنګ ټیل هتو. ان ایسو اوئون ننه هازا هورا
کریا. ②۵ ان الاهي گهټا منک اوټا وونهز وودیا، جیا گلیل صویا را، دیکلس
علاقا را، یروشلم شهر ان یهودیه صویا را، ان یردن ډریا ټي پرلیا پاها را
علاقا را پښ هتا.

ایسو ډونگر مانه بیهین منکون ننه شیکاڙه

(متي 3:5-12، لوقا 20:6-23)

① 5 زئیون ایسو هائي گهټا منک دیکیا، تئیون او ډونگر مانه سټري گیو،
ان اوټنه پینو نو. ان اوټا را شیلایا اوټا کن آيا. ② ان ایسو اوئون ننه ام
شیکاڙوا مډیو:

- ③ "ياڳواڙا اُو سئ، جيا من را ڳريپ سئ،
کم تو ايشور رو راز اوتون هارو سئ.
- ④ ياڳواڙا اُو سئ، جيا ڏکون ۾ روئ،
کم تو پڳوون اوتون نئ حوصلو ڏيشي.
- ⑤ ياڳواڙا اُو سئ، جيا نرمي ٿي وئ،
کم تو پڳوون را وائڏا پرموئئ اوتون نئ ٻڌوئي کئين زڙشي.
- ⑥ ياڳواڙا اُو سئ، جيا پورا من ٿي پڳوون ري وات مانه ويوا کرئ،
کم تو پڳوون اوتون رئي اميد پورئي کرشي.
- ⑦ ياڳواڙا اُو سئ، جيا ڏٿيا کرئ،
کم تو پڳوون اوتون مانه ڏٿيا کرشي.
- ⑧ ياڳواڙا اُو سئ، جيون را من صاق سئ،
کم تو اُو پڳوون نئ ڏيکشي.
- ⑨ ياڳواڙا اُو سئ، جيا هپ رکاوئ،
کم تو پڳوون اوتون نئ اپرا ٻار کيشي.
- ⑩ ياڳواڙا اُو سئ، جيا پڳوون ري وات مانه وُڊا ري کري
منکون را پاها ٿي ڏک سهئ،
کم تو ايشور رو راز
اوتون هارو سئ.




⑪ پاڳواڙا تمی سو، زئیون ماری کری منک تمارئی پیعزتئی کرشی، تمون نئه تنگ کرشی، ان تمارا پارام هر نمونا ری کراب واتون کرشی. ⑫ تئیون تمی راضی تیا ان گهڻا کُش تیا، کم تو آکاش موئین تمارو ایوزو گهڻو سئه. کم تو منکی تمون مور پڳوون رو نیاپو ڏیتا وازون نئه پڻ همرام تنگ کریا تا.

لُون رو ان سوجھرا رو مثال جیو هاسو شیلو نٽی اُو کیا ئی کوم رو نٽی

(متي 13:5-16، مرقس 9:50، لوقا 14:34-35)

⑬ ”تمی ڏنیا رُون منکون هارُو لُون را زم سو. پڻ جی لُون آپ موڙو ٿی زائ، تو اُوئا نئه کیا ٿی هَواڏ وازو کری هیڪئھ؟ اُو کیا ئی کوم رو نٽی ریتو. تیام اُوئا نئه بارو ڦڳوڙئھ پرو، ان اُو منکون رُون پڳون هیٺ لتوڙائھ.



⑭ تمی ڏنیا رُون منکون هارُو سوجھرا را زم سو. جیو شهر ڏونگر مانھ سئه، اُو هٽائی نئین هیڪئھ. ⑮ هیوئھ نمونئھ منک ڏیوو پاڙین نونٻڙا هیٺ ڊونکین نٽی میلتا، پڻ ڏیوا نئه اُوئا ری جڳا یر ساوو میلئھ، ان اُوئا ٿی گھر موئین ٻڌون منکون نئه سوجھرو زڙئھ. ⑯ تمی زبکتا

سوجھرا را زم منکون هوما ایوئھ نمونئھ وو، زم اُو تمارا نائوڪا کوم ڏیکین تمارا آکاشی پاپ پڳوون را وکوڻ کرئھ.

ایسو شاستر ری واتون پُوری کروا آیوھ

⑰ ”تمی ام مت سوچو، جی هُون مُوسی را لکل حُکم ان پڳوون رو نیاپو ڏیتا وازون ری لکل واتون کتم کروا آیوھ. هُون تو شاستر ری واتون کتم کروا نئین، پڻ اُوئون نئه پُوری کروا آیوھ. ⑱ هُون تمون نئه هاس کونھ. زئیون هُوڏی

آڪاش ان ڌرتئي ڪٿي نه ٿي، تنهن ۾ هون هوندي شاستر رهي هڪ ئي نونئي وات پڻ ڪٿي نئين ٿي، پڻ شاستر ري ٻڌي واتون پوري ٿيڻي. (19) تيام جي ڪوئي پڳوون رون حڪمون موئين ٿي ڪوئي پڻ حڪم ٿوڙي، پلئ اُو ٻڌون ٿي نونو حڪم هون، ان هائي حڪم ٿوڙيا رو منڪون نئ شيڪاڙي، تو اُو منڪ ايشور را راز ۾ ايشور ري نظر ۾ ٻڌون ٿي گهٽ هوشي. پڻ جيو پڳوون رون حڪمون مان هون، ان اوئون مان هون ويدا رو شيڪاڙي، اُو ايشور را راز ۾ ايشور ري نظر ۾ ٻڌون ٿي موتو هوشي. (20) ڪم تو هون تمون نئ ڪاٿري ٿي ڪونه، جي تم شاستر زوڻيا وازون ان فريسي پالتي وازون ٿي وڌارن پڳوون ري وات مان نئين وو، تو تم ايشور را راز را منڪ ماڳي نئين ٿي هڪو.

ڪُون نه ڪريا را حڪم را پارام ايسو پورو مطلب هزماوڻه

(21) ”تمي تو هومپريوه، جي زونا زمونا ري منڪي پڳوون رون حڪمون ٿي ام شيڪاڙيوه جي ’ڪُون نه ڪرو، ان جيو ڪوئي ڪُون ڪرڻ، اُو ڏوهاري ٿي ان منڪ اوڻا رو ڦينصلو ڪرشي.‘ (22) پڻ هون تمون نئ ام ڪونه، هر منڪ جيو پڙا منڪ مان ريند راکڻ، اُو ڪُون نه ڪريا را حڪم پرموڻه ڏوهاري ٿي ان پڳوون اوڻا رو ڦينصلو ڪرشي. جيو ڪوئي پڙا منڪ نئ پي عقل ڪڻ، تو نيا رڻ ڏي اوڻا رو ڦينصلو ٿيڻي. ان جيو ڪوئي پڙا منڪ نئ ڳونڏو ڪڻ، تو اُو نرڳ ري پاھي ۾ هميش رهي سزا کاڌا جيوو سڻ.

(23) تيام، جي تم پڳوون را گهر ۾ زائين پڳوون را نوم مان مال سڙايا مان سو، ان اوڻه تمون نئ ياد پڙي جي تم پڙا پائي رو ڏوه ڪريوه، (24) تو مال اوڻ رو اوڻ مال ساڙيا ري جڳا مان ساڏو، ان مور ٿي زائين پڙا پائي ٿي ماقئي مونڳين منائي زائو. ان پسڻه اوين پڳوون را نوم مان مال سڙاوو.

(25) مثال، جي ڪوڪ منڪ تمون مان ڪيس ڪروا ڪرڻ، تو تمارن جلدي

۾ ٿوڻام پوڳيا مور شيرڙا مانھ اُٿا نئھ منايا رڻي ڪوشش ڪرو. نڪا تمون مانھ ڪيس ڪريا وارو تمون نئھ جج ڪن تيڙي زاشي، ان جج تمون نئھ پوليس نئھ ڏيشي، ان او تمون نئھ جيل موئين پوراوشي. (26) هُون تمون نئھ هاس ڪونه، زئون هُڏي تمي ڏنڊ رڻي پائي پائي نئين پري ڏيو، تئون هُڏي تماري زند نئين سوتئھ.

پُونڌو ڪوم نه ڪريا را حُڪم را پارام ايسئو پورو مطلب هُزماوئھ

(27) ”تمي تو هومپڙيوھ، جي منڪي پڳوون رون حُڪمون تي ام شيڪاڙيوھ جي پُونڌو ڪوم نه ڪرو.“ (28) پڻ هُون تمون نئھ ام ڪونه، هر منڪ جيو پرائي ڏوشي نئھ پُونڌي نظر تي زوئھ، اُئھ هم زويا تي آپرا من ۾ اُٿا تي پُونڌو ڪوم ڪريوھ. (29) جيا پڻ وات ري ڪري تمي ڏوھ ڪرو، هايا وات نئھ ساڏو پري. جي تماري زمڻي اونڪ ري ڪري تمي ڏوھ ڪروھ، تو اُٿا نئھ ڪاڊين آپ تي هيڪل ڦڳوڙو پري. ڪم تو پڳوون رڻھ تمون نئھ پورا ڏيل هُٽيلا نرڳ ۾ ڦڳوڙيا تي تمون هارو ٺاڻوڪو اي سئھ، جي تمي ڪوڻا تي زائو. (30) ان جي تمارا زمڻا هات ري ڪري تمي ڏوھ ڪروھ، تو اُٿا نئھ واڊين آپ تي هيڪل ڦڳوڙو پرو. ڪم تو تمارئھ پورا ڏيل هُٽيلا نرڳ ۾ زايا تي تمون هارو ٺاڻوڪو اي سئھ، جي تمي ڪوڻا تي زائو.“

ڏوشي نئھ نه ساڏيا را پارام ايسئو پورو مطلب هُزماوئھ

(متي 31:5-32، 9:19، مرقس 11:10-12، لوقا 18:16)

(31) ”ان منڪي پڳوون رون حُڪمون تي ام شيڪاڙيوھ جي جو ڪوئي آپري ڏوشي نئھ ساڏئھ، اُٿا رڻھ لڪي ڏيو.“ (32) پڻ هُون تمون نئھ ام ڪونه، جي هر منڪ جيو

آپري ڏوشي نٿه پوندڙا ڪوم را ڏوه ڪريا ووئي ساڏڻه، اُو آدمي آپري ڏوشي تي پوندڙو ڪوم ڪراوڻه. لکي ڏيڏا را ڪاڳڙ تي ڪي ٿيو؟ ڀڳوون ري نظر ۾ اُو تو هزون ٻي موڻهڻه سڻه. پارٿيو آدمي، آپري ساڏل ڏوشي رڻه گهرگهڻو ڪريا تي، آپري ڏوشي تي ان گهرگهڻو ڪريا واڙا آدمي تي پوندڙو ڪوم ڪريا رو ڏوه ڪراوڻه.

ڪوڙو هون نه ڪاڏا را حڪم را پارام ايسو پورو مطلب هزماوڻه

③③ ”پڙو تم اي پڻ هومپڙيوه، جي زونا زمونا ري منڪي ڀڳوون رون حڪمون تي ام شيڪاڙيوه جي ’ڪوڙو هون نه ڪاوو. جيا وائڏا تم ايشور رو هون ڪائين ڪروه، اُو وائڏا تمارڻه پورا ڪروو.“ ③④ پڻ هون تمون نٿه ام ڪونه، هون ماڳي مت ڪاڻو! آڪاش رو هون مت ڪاڻو، ڪم تو آڪاش ۾ ڀڳوون رڻي گهاڏي سڻه. ③⑤ ڌرتي رو هون مت ڪاڻو، ڪم تو ڌرتي زوڻه ڀڳوون را پڳ ميليا رڻي جڳا سڻه. يروشلم شهر رو هون مت ڪاڻو، ڪم تو يروشلم ٻڌون تي موتا پاڌشا ڀڳوون رو شهر سڻه. ③⑥ ان آپرا ماتا رو هون مت ڪاڻو، ڪم تو تم اي پرون مٿوڙاون موئين تي هڪا نٿه پڻ ڌورو ڪا ڪارو نٿي ڪري هڪتا. ③⑦ پڻ جي وات هاسي سڻه تو اُوڻا نٿه هاسي ڪو، ان جي وات ڪوڙي سڻه تو اُوڻا نٿه ڪوڙي ڪو. هايا تي وڌارڻه ڪيو پوندڙا شيطون را پاها رو ڪوم سڻه.“

پڌلو نه ليڏا را حڪم را پارام ايسو پورو مطلب هزماوڻه

(متي 38:5-42، لوقا 29:6-30)

③⑧ ”تم تو هومپڙيوه، جي منڪي ڀڳوون رون حڪمون تي ام شيڪاڙيوه جي ’جيرو ڏوه، تيوي سزا. اونڪ را پڌلام اونڪ، ان ڏونت را پڌلام ڏونت.“ ③⑨ پڻ

هُونِ تمونِ نئه امِ ڪونه، جيو تمونِ ٿي ڪراپِ نمُونئه وئِه، اُوئا را پڌلا ۾ اُوئا ٿي ڪراپِ نمُونئه متِ وو، پڻِ نائوڪئِه نمُونئه وو. جي ڪوئي تمونِ نئه زمڻا ڳالِ مانِه آهوتِ هئِه، تو اُوئا هومو پيزو ڳالِ پڻِ ڦيروِي ڏيو، ان پڌلو متِ ليو. (40) ان جي ڪوئي ڪياڪِ واتِ را ايوزا ۾ تمارو وڳو ليڌا هارو تمونِ مانِه ڪيس ڪروا ڪرئِه، تو اُوئا نئه آپرو توتالِ پڻِ ڪُشي ٿي ڏيو پرو. (41) ان جي ڪوئي تمونِ نئه پيڳرِ ۾ اڌ ڳائو هُوڌي پيارِ اوپڙاوه، تو اُوئا پيڙا تمِي ڳائو هُوڌي پيارِ اوپاڙينِ زائو. (42) جيو تمونِ ٿي مونڳئِه، اُوئا نئه ڏيو. ان جيو تمونِ ٿي اُوڌار ليو ڪرئِه، اُوئا نئه نا متِ پاڙو.

آپرا پائي ٿي پريم ڪريا را حُڪمِ را پارام

ايسُو پورو مطلبِ هزماوئِه

(متي 5:43-48، لوقا 6:27-28، 32-36)

(43) ”تمي تو هومپڙيوه، جي منڪي پڳوونِ رونِ حُڪمونِ ٿي امِ شيڪاڙيوه جي ’آپرا پائي ٿي پريم ڪرو، ان آپرا ڏشمڻِ ٿي پلئِه ويرِ را ڪو.‘ (44) پڻِ هُونِ تمونِ نئه امِ ڪونه، آپرونِ ڏشمڻونِ ٿي پريمِ را ڪو، ان جيا تمونِ نئه تنڳ ڪرئِه اوئونِ هارو پراٽنا ڪرو. (45) هم ڪريا ٿي ٿايتئي تيشي جي تمِي آپرا آڪاشي پاپِ پڳوونِ را ٻارِ سو، ڪمِ تو اُو پُونڌونِ ان نائوڪونِ ٻڌونِ هارو ڏي اُوڳاڙئِه، ان اُوئا ري واتِ مانِه وُڍا وازونِ ان نه وُڍا وازونِ ٻڌونِ هارو مي ورهاوئِه. (46) جي تمِي رُوڳا اوئونِ ٿي پريمِ را ڪو، جيا تمونِ ٿي پريمِ را ڪئِه، تو هايا رو تمونِ نئه ڪي ايوزو زڙشي؟ ناڪو ليڌا وازا پڻِ همرومِ نٿي ڪرتا ڪي؟ (47) ان جي تمِي رُوڳا آپرونِ پايونِ نئه نمسڪار ڪرو، تو پيزونِ ٿي تمِي ڪي گهڻو ڪريو؟ ڌاري قومونِ را منڪ جيا پڳوونِ نئه نٿي مونتا، اُو پڻِ همرومِ نٿي ڪرتا ڪي؟ (48) تيامِ تمِي هر واتِ ۾ نائوڪا ٿيو، زمِ تمارو آڪاشي پاپِ پڳوونِ هر واتِ ۾ نائوڪو سئِه.“

ايسو کيريات کريا را پارام شيڪاڙئھ

6 ① ”هوشيار ريا جي تمڻي آڀرا نائوڪا ڪوم ٻڌون رڻه روڀرو منڪون نڻه ڏيڪاڙيا هارو مت ڪريا. جي تمڻي آڀر نڻه منڪون هوما ڌرمي ڏيڪاڙيا هارو نائوڪا ڪوم ڪروه، تو تمارا آڪاشي ٻاپ ڀڳوون ٿي تمون نڻه ڪئين ايوڙو نئين زڙئھ.

② تيام زئيون تمڻي کيريات ڪروه، تئيون پڙو مت ڏيو، زم او منڪ ڪرڻھ، جيا مونيڊا را مينا پڻ اندر را ڪارا سڻھ. هيو منڪ ڀڳوون رون منڌرون ۾ ان شهر ريون شيريون ۾ ٻڌون رڻه روڀرو کيريات ڪرڻھ، زم منڪ اوئون را وڪوڻ ڪرڻھ. هون تمون نڻه هاس ئي هاس ڪونھ، منڪون رڻه اوئون را وڪوڻ ڪريا ٿي هيوون منڪون نڻه اوئون رو ايوڙو زڙيوھ، ٻيزو ڀڳوون ٿي ڪئين نئين زڙئھ.

③ پڻ تمڻي زئيون کيريات ڪرو، تو ايوي ماڻ ۾ ڪرو، جي تمارا آڀرا ڏاوا هات نڻه پڻ ڪٻر ئي نه پڙئھ جي زمڻو هات ڪي ڪرڻھ ريو، ④ زم تماري کيريات هتال هوئھ. ان تمارو ٻاپ ڀڳوون، جيو هر هتال وات نڻه زوئھ، او تمون نڻه اوئا رو ايوڙو ڏيشي.

ايسو پرائنا ڪريا را پارام شيڪاڙئھ

(متي 9:6-13، لوقا 11:2-4)

⑤ ”ان زئيون تمڻي پرائنا ڪرو، تو اوئون را زم پرائنا مت ڪرو، جيا مونيڊا را مينا پڻ اندر را ڪارا سڻھ. ڪم تو هيوون منڪون نڻه اي شونق سڻھ جي او ڀڳوون رون منڌرون ۾ ان شهر رون چونڪون مانھ اوپين پرائنا ڪرڻھ، زم ٻڌائي منڪ اوئون نڻه زوئھ. هون تمون نڻه هاس ئي هاس ڪونھ، منڪون رڻه اوئون را وڪوڻ ڪريا ٿي هيوون منڪون نڻه اوئون رو ايوڙو زڙيوھ، ٻيزو ڀڳوون ٿي ڪئين نئين زڙئھ.

⑥ ٻڌ، تم، زئيون پرائنا ڪرو، تو آيري گھري زائين ڌروازو پند ڪرين آڀرا ٻاپ

پڳوون ٿي نويڪلائي ۾ پرائنا ڪرو. ان تمارو ٻاپ پڳوون، جيو هر هٿال وات
نٿو ڏيکاري، اُو تمون نٿو اُوڻا رو ايوزو ڏيشي.

⑦ ٿمي پرائنا ڪريا ۾ گهڻي نالي واتون مت ڪرو، زم ڌاري قومون را
منڪ ڪرڻه جيا پڳوون نٿو نٿي مونتا. ڪم تو اُو ام هڙمڻه جي موٽي موٽي
پرائنائون ڪريا ٿي اُو آپري وات مناوي هيڪڻه. ⑧ تيام ٿمي اُوڻون را زم
پرائنا مت ڪرو. ڪم تو تمارا ٻاپ پڳوون نٿو تمارڻه مونڳيا مور اڳي ڪپ
سٺ، جي تمون نٿو ڪيا ڪيا رڻي ضرورت سٺ. ⑨ تيام ٿمي ايوڻه نمونڻه
پرائنا ڪرو:



او امارا ٻاپ، ٿمي جيا آڪاش ۾ سو،
تمارو نوم پويتر مونيوزائو.
⑩ تمارو راز آوڻه.

تماري مرضي زم آڪاش موڻن پوري ٿي،
تم ڌرتي مانھ پڻ پوري ٿي.

⑪ اماري آڙ رڻي روڻي آڙ امون نٿو ڏيو.
⑫ ان زم امي امارون ڏوهاريون نٿو ماڦ ڪرونه،
تم ٿمي امارا ڏوه امون نٿو ماڦ ڪرو.

⑬ ان امون نٿو آزمتا رڻه ٿوڻه پڙوا مت ڏيا،
پڻ امون نٿو پونڌائي ٿي پڇاوو.

(ڪم تو راز، ڪڙا ان وڪوڻ هميش تمارا سٺ. آمين.)

⑭ ڪم تو جي ٿمي اُوڻون منڪون نٿو ماڦ ڪرو، جيئي تمارا ڏوه ڪرياه،
تو تمارو آڪاشي ٻاپ پڳوون تمارا ڪرل ڏوه پڻ ماڦ ڪرشي. ⑮ پڻ جي ٿمي
منڪون نٿو ماڦي نٿي ڏيتا، تو تمارو آڪاشي ٻاپ پڳوون پڻ تمارون ڪرل
ڏوهون رڻي ماڦي تمون نٿو نٿين ڏي.

ايسٽو ورت راڪيا را پارام شيڪاڙئھ

①6 ”زئيون تمي ورت راڪو، تو اُوئون را زم نيموڻا ٿين ورت مت راڪو، جيا مونيا را مينا پڻ اندر را ڪارا سئ. ڪم تو هيو منڪ ورت راڪيا رڻه ٿوئڻه آپرا مونيا نٿي ڌوتا، زم ٻڌائي منڪ زوئ جي اُو ورت راڪئھ ريا. هُون تمون نئھ ھاس ئي ھاس ڪونھ، منڪون رڻه اُوئون را وڪوڻ ڪريا ٿي هيوون منڪون نئھ اُوئون رو ايوزو زڙيوھ، پيزو پڳوون ٿي ڪئين نئين زڙئھ. ①7 پڻ تمي زئيون ورت راڪو، تو آپرو مونيڊو ڌوئو، ان ماڻام تيل نوڪين مٿوئار اوزاوو، ①8 زم تمي منڪون نئھ ورت نه ڏيڪاڙو، پڻ ماڻ ۾ تمارا ٻاپ پڳوون ري نظر ۾ ورت راڪو. ان تمارو ٻاپ پڳوون، جيو هر هٿال وات نئھ زوئھ، اُو تمون نئھ اُوئا رو ايوزو ڏيشي.“

ايسٽو مال ملڳت را پارام شيڪاڙئھ

(متي 19:6-24، لوقا 12:33-34، 11:34-36، 13:16)

①9 ”تمي ايئا ڏنيا ۾ آپ هارو مال ملڳت پيڙئي مت ڪرو، جيئن ڪونهاري اُوئا نئھ ڪراپ ڪرئھ ان زنگ اُوئا نئھ ڪتم ڪرئھ، ان سور ڪاٺ هٿين اُوئا رئي سورئي ڪرئھ. ②0 پڻ تمي پڳوون ري مرضي مانھ وو، زم تمون نئھ آڪاش ۾ آڪاشي ملڳت هميش رو جيون زڙئھ، جيئن نڪو ڪونهاري اُوئا نئھ ڪراپ ڪرئھ، نڪو زنگ اُوئا نئھ ڪتم ڪرئھ، ان نڪو سور ڪاٺ هٿين اُوئا رئي سورئي ڪرئھ. ②1 ڪم تو جيئن تماري ملڳت سئ، اُوئڻه تمارو جيو پڻ هوشي.

②2 زم سوجهرا هارو ڏيوو ڪپئھ، تم منڪ نئھ سوجهرو ڏيڪيا هارو اونڪيون ڪپئھ. تيام جي تماري اونڪيون ٺيڪ سئ تو تمون نئھ ٻڌوئي ڪئين سوجهرام ڏيڪيام آئھ. ②3 پڻ جي تماري اونڪيون ڪراپ سئ، تو ٻڌوئي ڪئين اندارام هوشي. هيوئھ نمونئھ جي تمارا من ۾ پڳوون رو سوجهرو نٿي پڻ اندارو سئ، تو ڪتو گهڻو اندارو هوشي.

②④ ڪوئي پڻ منڪ پيئون ڏٺيون رڻي شيوا نٿي ڪري هيڪتو. ڪم تو اُو هيڪا ٿي پريم راکشي ان پيزا ٿي ڪئين پريم نئين راکڻ، ڪا اُو هيڪا رڻي وات مونشي ان پيزا رڻي وات ماگي نئين مونڻ. تمڀي پڳوون ان ملڳت پيئون ٿي پريم نٿي ڪري هيڪتا.

ايسو پڳوون مانھ ڀروسو راکيا را پارام شيڪاڙئھ

(متي 25:6-34، لوقا 12:22-31)

②⑤ ”تيام هون تمون نڻه ڪونه، آپري حياتي هارو ڳٽئي مت ڪرو، جي ’امي ڪي ڪاشون، ان ڪي پيشون؟‘ نڪو آپرا ڏيل هارو جي ’امي ڪي پيشون؟‘ ڪاڏا ٿي موٽي شينھ حياتي نٿي ڪي؟ ان لوڳهڙون ٿي موٽي شينھ ڏيل نٿي ڪي؟
②⑥ پڪيون نڻه زوئو! اُو نڪو پوڪڻھ، نڪو لڻھ، نڪو پليون ۾ ڏون پيڙو ڪرين راکڻھ. توڻي پڻ تمارو آڪاشي پاپ پڳوون اوئون نڻه ڪاڏو ڏئھ. تمارو مون



اوئون ٿي الاهي گهڻو نٿي ڪي؟ ②⑦ تمون موئين ايوو ڪوڻ سڻھ، جيو ڳٽئي ڪرين آپري حياتي رو هيڪ منٽ پڻ وڌاوي هيڪڻھ؟ تو پسنھ تمڀي آپري حياتي هارو ڳٽئي ڪم ڪروھ؟

②⑧ ان تمڀي لوڳهڙون را پارام ڳٽئي ڪم ڪروھ؟ زوئو جي شيم ۾ ڦولڙا ڪم ڪرين اوڳڻھ! اُو نڪو مينٽ ڪرڻھ، نڪو ڏورڙا واٽڻھ. ②⑨ پڻ هون تمون نڻه ڪاتري ٿي ڪونه جي سليمان پادشا پڻ آپرا اونچون م اونچا لوڳهڙا پيرين ايسون ڦولڙون جيوو نائوڪو نٿو ڏيڪاتو. ③⑩ زئيون پڳوون ايوو ڦولڙا زهاڙڪون موئين اوڳاڙئھ، جيا زهاڙڪا آز اوپاھ، ان هوارڀي اوئون نڻه ڏيوٽام پاڙشي پرا، تو پسنھ

تمون نٺه لوگهڙا نئين ڏٺ، ڪي؟ تمي پڳوون مانھ گهٽ يقين ڪم را ڪوھ؟
 ③۱ تيام تمي گهٽئي مت ڪرو جي امي ڪي ڪاشون، ڪي پيشون، ان ڪي پيرشون؟ ③۲ ڪم تو ٻڌي قومون جي پڳوون نٺه نٽي مونتي، او ايئون واتون ۾ آڀرو جيو لڳاڙهه. پڻ تمون هارو تمارا آڪاشي ٻاپ پڳوون نٺه ڪهر سٺه جي تمون نٺه ايئون ٻڌيون شينهنون رٿي ضرورت سٺه. ③۳ مور ٿي تمي پڳوون را راز ۾ ان پڳوون ري وات مانھ وڍا ۾ آڀرو جيو لڳاڙو، تو پسٺه پڳوون تمون نٺه اي ٻڌي شينهنون پڻ ڏيشي. ③۴ تيام گهٽئي مت ڪرو جي هاري ڪي ٿيشي، ڪم تو هواروڪي واتون هوار هارو سٺه. آڙوڪا ڏي ري تڪليهون آڙ هارو گهٽي سٺه.

ٻيزون رو ڏوه نه ڪايو پڻ آڀرا ڏوه نه زوو

(متي 6-1:7، لوقا 37:6-38، 41-42)

① ”تمي ٻيزون رو ڏوه مت ڪايو، تو پڳوون تمارو ڏوه پڻ نئين ڪاڍه. 7
 ② ڪم تو جيوي سڪتي ٿي تمي ٻيزون را ڏوه ڪاڍوه، هيوي سڪتي ٿي پڳوون تمارا ڏوه ڪاڍشي. ان جيا ماپ ٿي تمي ڏيوه، اوٺا ماپ ٿي پڳوون تمون نٺه ڏيشي.

③ تمي ڪم ٻيزون رو ڏوه ڪاڍين زوٺه آڀرا پائي ري اونڪ موئين ڪتر زوٺوه، پڻ تماري آڀري اونڪ موئين جيو لاڪڙ پڙيوه، اوٺا رو تمون نٺه ڪئين ڪيال نٽي؟ ④ زئيون تماري آڀري اونڪ موئين لاڪڙ نٽي ڏيڪتا، تو تمي ڪم ڪرين آڀرا پائي نٺه ڪيشو جي ’پائي، لٺه ٿاري اونڪ ٿي ڪتر ڪاڍون.‘
 ⑤ ڪوٽون منڪون، تمي آڀرا ڏوه ساڏين ٻيزون را ڏوه زوٺوه. تمي مونڊا را مينا پڻ اندر را ڪارا سو. پيرھين تمي او لاڪڙ ڪاڍو جيو تماري آڀري اونڪ موئين سٺه. پسٺه تمي آڀرا پائي ري اونڪ رو ڪتر ٺاٺوڪا نمونا ٿي زوئين ڪاڍي هيڪشو.

⑥ پويتر شينهنون ڪوترون نئه مت نوکو، ان موتي هوئون ڪن مت ڳوڙو، نڪا او اوئون نئه لتاڙشي پرا ان ڊوڙي آوين تمون نئه شيرشي پرا. هيونء نمونء پڳوون ري پويتر ان قيمتي واتون اوئون نئه همپڙاوو جيا همپڙوا ڪرئ.

يقين ٿي پرائنا ڪرو

(متي 7:7-12، لوقا 9:11-13)

⑦ ”مونڳو، تو پڳوون تمون نئه ڏيشي. ڳوتو، تو زڙشي. ڌر وڳاڙو، تو اوگهڙشي. ⑧ ڪم تو جيو پڻ مونڳئھ اوئا نئه ڏيوراشي، جيو ڳوتئھ اوئا نئه زڙشي، ان جيو ڌر وڳاڙئھ اوئا هارو ڌر اوگهڙشي. ⑨ تمون موئين ٿي ايوو ڪوئي منڪ سئھ ڪي، جيا ڪن اوئا رو ڏيڪرو روئي مونڳئھ، پڻ او روئي هائئھ اوئا نئه پوٽو ڏئھ؟ ⑩ ڪا اوئا ڪن ڏيڪرو مسئي مونڳئھ، پڻ او مسي هائئھ اوئا نئه هاپ ڏئھ؟ ⑪ هوئھ تمي پونڌا هوتون پڻ، آپرون ٻارون نئه نائوڪي شينهنون ڏي هيڪوھ، تو پسئھ تمارو ٻاپ پڳوون جيو آڪاش ۾ سئھ، اوئون نئه نائوڪي شينهنون ڪم نئين ڏئھ، جيا اوئا ٿي مونڳئھ؟ او ضرور اوئون نئه نائوڪي شينهنون ڏيشي. ⑫ تيام زم تمون نئه وئھ جي منڪ تمون ٿي ٻڌيون واتون ۾ نائوڪئھ نمونئھ وئھ، تم تمي ٻڌيون واتون ۾ اوئون ٿي نائوڪئھ نمونئھ وو. ڪم تو موسي رون لڪل حڪمون رو مطلب ان پڳوون رو نياپو ڏيڌا وازون را لڪل شاستر رو مطلب هائي سئھ.“

تارڻ ليڌا هارو پڳوون را ڏورا مارڳ مانھ ويو

(متي 13:7-14، لوقا 24:13)

⑬ ”تمي تارڻ را هوڙڪا ڌروازا موئين ٿي زائو. ڪم تو جيا ڌروازا موئين مٿيا ٿي ان جيا مارڳ مانھ وڍا ٿي هميش رو موت زڙئھ، او ڌروازو ويڪرو سئھ، ان او مارڳ موٽو ان هورو سئھ، ان اوئا ڌروازا موئين مٿيا وارا گهڻا سئھ. ⑭ پڻ جيا

ڌروازا موئين متيا ٿي ان جيا مارڳ مانہ وُودا ٿي ہميش رو جيون زڙئہ، هائي ڌروازو هوڙڪو سئہ، ان هائي مارڳ هوڙو ان ڏورو سئہ، ان هايا ڌروازا موئين متيا وازا ٿوڙا سئہ.

جيوو وٺ تيوو ميوو

(متي 15:7-23، لوقا 43:6-44، 25:13-27)

⑮ ”تمي اوئون منڪون ٿي هوشيار ريا، جيا ڪوڙ هاكلين آڀ نئہ پڳوون رو نياپو ڏيڏا وازا ڪئہ. او تمون ڪن آوين آڀ نئہ ايوو گريپ ڏيڪاڙشي، جيوي ريڊيون هوئہ، پڻ من ۾ او شيريا وازون نارون جيوا سئہ. ⑯ اوئون رون ڪومون ٿي تمي



اوئون نئہ اوڙڪشو. جيوو وٺ تيوو ميوو. پورڙيون موئين ڌراڪون رو ميوو ٿيشي ڪي؟ ڪا ڪيزڙون موئين انجير رو ميوو ٿيشي ڪي؟ ⑰ هيوئہ نمونئہ هر ٺاٺوڪا وٺ موئين ٺاٺوڪا ميوو ٿئہ، پڻ ڪراڀ وٺ موئين ڪراڀ ميوو ٿئہ. ⑱ ام ٿي نٿي هيڪتو جي ٺاٺوڪا وٺ موئين ڪراڀ ميوو ٿئہ، ڪا ڪراڀ وٺ موئين ٺاٺوڪا ميوو ٿئہ. ⑲ هر وٺ جيا موئين ٺاٺوڪا ميوو نٿي ٿيٽا، او وڊاشي ان ڏيوتا ۾ نڪاشي پرو. ان

هيوئہ نمونئہ پڳوون ڪراڀ منڪون نئہ ہميش رئي سزا ڏيشي. ⑳ تيام، زم وٺ ميوون ٿي اوڙڪائہ، تم تمي اوئون منڪون نئہ اوئون رون ڪومون ٿي اوڙڪشو.

㉑ جيا مون نئہ ’پريو پريو‘ ڪئہ، اوئون موئين ٿي ٻڌائي ايشور را راز ۾ نئين زائہ. پڻ روڳا او زاشي جيا مارا ٻاڀ ري مرضي مانہ وئہ، جيو آڪاش ۾ سئہ. ㉒ نيا رئہ ڏي گهڻا منڪ مون نئہ ام ڪيشي: ’پريو جي، امي تمارو نوم لين پڳوون رو نياپو نتو ڏيڏو، ڪي؟ امي تمارو نوم لين منڪون ٿي پوت نتا ڪاڊيا، ڪي؟ امي تمارو نوم لين گهڻا پرسا نتا ڏيڪاڙيا، ڪي؟ تمي امون نئہ

ايشور را راز موئين كم نتي آوا ديتا؟⁽²³⁾ تئون هون اوئون نئه صاق كيه:
'تمي مون تي كيڏي واسطو نتي راكيو. كراب منكون، تمي پگهون ري مرضي
مانه نتي وودا. مون تي هيكل تري زائو!'

بيئون گهر نايا وازون رو مثال

(متي 24:7-27، لوقا 47:6-49)

⁽²⁴⁾ "تيام، جيو ڪوئي ماري اي واتون هومپڙهه ان ايئون مانه وئه، او ايوا عقل
وازا منڪ جيوو سئه، جيئنه آپرو گهر پتر مانه نايو.⁽²⁵⁾ ان مي ورهيو، ان ڌريائون
رو پوڻي پلتيو، ان وائيرا رو ڏوقون زور تي اوئا گهر نئه لاگيو. پڻ او گهر نه
پڙيو، ڪم تو اوئا رئي پنياد پتر مانه هئي.

⁽²⁶⁾ پڻ جيو ڪوئي ماري اي واتون هومپڙهه، پڻ ايئون مانه نتي ويتو، او ايوا
پي عقل منڪ جيوو سئه، جيئنه آپرو گهر واري مانه نايو.⁽²⁷⁾ ان مي ورهيو، ان
ڌريائون رو پوڻي پلتيو، ان وائيرا رو ڏوقون زور تي اوئا گهر نئه لاگيو. تو او
گهر پوه ڏين پڙي گيو."

⁽²⁸⁾ زئيون ايسو اي واتون ڪي ريو، تئون جيا الاهي گهڻا منڪ هومپڙات
ريا، او اوئا رئه شيڪاڙيا مانه حيرون هئا.⁽²⁹⁾ ڪم تو ايسو اوئون رون
شاستر زوڻيا وازون را زم نتو شيڪاڙتو، پڻ اڪتياري راڪين مونيا جيوي واتون
شيڪاڙتوت ريو.

ايسو ڪوڊ ري پيماري تي هڪا منڪ نئه هازو هورو ڪرئه

(متي 1:8-4، مرقس 1:40-45، لوقا 12:5-16)

8 ⁽¹⁾ زئيون ايسو ڏونگر تي نيسو اوتريو، تو الاهي گهڻا منڪ اوئا وونهڙ
وودا.⁽²⁾ ان اوچتو هڪ منڪ اوئا ڪن آيو، جيا نئه ڪوڊ رئي پيماري هئي
ان هايا ري ڪري او ايتال هتو. اوئه ايسو ري پگي پڙين ڪيڏو: "سادو جي، جي

تماري مرضي هوئه، تو تمی مون نه هازو هورو ڪرين پوٽر ڪري هيڪوه.“
 ③ تيا مانھ ايسو اوئا نه سپين ڪيڏو: ”ماري مرضي سئ. تون هازو هورو
 تين اڻڙايا ٿي پوٽر ٿئ!“ ان جھت ۾ اوئا نه ڪوڍ رڻي پيماري ساڌي گڻي ان
 او اڻڙايا ٿي پوٽر ٿي گيو. ④ پئسئ ايسو اوئا نه ڪيڏو: ”اي وات ڪيا نه
 مت همپڙاوي. پڻ پگھون را گھر ۾ زائين آڀرو ڏيل اوئا پوزاري نه ڏيڪاري جيو
 اوئنه پوزا رو ڪوم ڪرتو هوئه. ان تون پگھون را نوم مانھ او شينھون سڙاوي
 جي شاستر موئين موسي ري لڪل سئ، زم ٻڌون هارو ٿاڀئي ٿئ جي تون هازو
 هورو ٿي گيوھ.“

ڌاري قوم رو قوج رو ساب ايسو مانھ يقين راکڻھ

(متي 5:8-13، لوقا 1:7-10)

⑤ زئيون ايسو ڪفرنحوم شهر موئين آيو، تئون اوئا ڪن رومي قوج رو هيڪ
 ساب آيو، ان ايسو نه منٿ ڪرين ⑥ ڪيڏو: ”ساڏو جي، مارو نوڪر اڌرنگ ري
 پيماري ري ڪري گھري پڙيوھ، ان الاهي گھڻي تڪليپ ۾ سئ.“ ⑦ تو ايسو
 اوئا نه ڪيڏو: ”هون هالين اوئا نه هازو هورو ڪريھ.“

⑧ تيا مانھ قوج رنه ساب اوئا نه ڪيڏو: ”ساڏو جي، هون ايوو منڪ نٿي
 جي تمی مارا نيچ گھر موئين آوو. پڻ تمی روگا ڪو، تو تمارا ڪيڏا ٿي مارو
 نوڪر هازو هورو ٿي زاشي. ⑨ اي مون نه ڪپر سئ، ڪم تو هون آپ پيزون را
 ڪيڏا هيٺ سون، ان مون هيٺ قوجي سئ. هون هيڪا نه زايا رو ڪون، تو او
 زاشي، ان پيزا نه آيا رو ڪون، تو او آوشي، ان مارا نوڪر نه ڪوئي پڻ ڪوم
 ڪريا رو ڪون، تو او ڪرشي.“

⑩ ايسو اي واتون هومپڙين حيرون ٿي گيو. پئسئ اوئه آپ وونھڙ وودا وازون
 نه ڪيڏو: ”هون تمون نه هاس ڪونه، ايوو يقين مئين آڀڻي اسرائيلي قوم ۾
 پڻ ڪيا ۾ نٿي ڏيڪيو. ⑪ هون تمون نه ڪاتري ٿي ڪونه جي گھڻا ڌاريا منڪ

اڳوڻيا ان آڻوڻيا پاها ٿي پوري دنيا ٿي آوشي، ان او تارڻ لين ابراهيم، اِصحاق ان يعقوب پيڙا ايشور را راز ۾ آڪاشي ڏاوت ڪاشي. ⁽¹²⁾ پڻ اسرائيلي قوم را منڪ جيون نٿه ايشور آپرا راز ۾ زايا هارو سوندياه، اوئون رٿه يقين نه راڪيا ري ڪري ايشور اوئون نٿه ٻارا راڪين اندارام ڦڳوڙشي پرا. اوڻه او روشي ان ڏونت گهرڙيا ڪرشي.

⁽¹³⁾ تئيون ايسو قوج را ساپ نٿه ڪيڏو: ”گهري زائو. زم تمي يقين ڪريوه، تم تمون هارو ٿيشي.“ ان اوڻه ئي ٿوڻه ساپ رو نوڪر هازو هورو ٿي گيو.

ايسو گهڻون منڪون نٿه هازا هورا ڪرڻه

(متي 14:8-17، مرقس 1:29-34، لوقا 4:38-41)

⁽¹⁴⁾ زئيون ايسو پطرس ري گهري گيو، تئيون اوڻه پطرس ري هاهو نٿه ڏيکئي، جي گهڻا تاو ۾ پڙئي ٿئي. ⁽¹⁵⁾ ان ايسو اوڻا را هات نٿه سڀيو، تو اوڻا رو تاو اوتري گيو، ان اوڻين او ايسو رئي شيوا ساڪري ڪروا مڏئي.

⁽¹⁶⁾ ڏي آتميا رٿه ٿوڻه، منڪ ايسو ڪن گهڻون پوت سونتل منڪون نٿه تيڙي آيا. ان اوڻه آپرا ڪيڏا ٿي منڪون ٿي پوت ڪاڍيا، ان ٻڌون موندون نٿه هازا هورا ڪريا پرا. ⁽¹⁷⁾ اي ايڻا هارو ٿيو، زم پڳوون رو نياپو ڏيڏا واڙا يسعياه رئي اي ڪيڏل وات پوري ٿي:

”اوڻه آپري پيماري مٽاري
ان آپون نٿه هازا هورا ڪريا.“

ايسو شيڪارڙه جي پورا من ٿي شيلو ٿيو

(متي 18:8-22، لوقا 9:57-62)

⁽¹⁸⁾ زئيون ايسو الاهي گهڻا منڪ آپرڻه آهڻه پاهڻه ڏيڪيا، تئيون اوڻه آپرون شيلون نٿه ڍنڍ رٿه پيڙه ڪپ هاليا رو ڪيڏو. ⁽¹⁹⁾ ان هيڪڻه شاستر زوڻيا واڙه



ايسو ڪن آوين ڪيڏو: ”گرو جي، جيئن پڻ تمي زاشو، هون تمارو شيلو ٿين تمون وونهڙ هاليه.“
 ②0 پڻ ايسو اوڻا نئه ڪيڏو: ”لونيون رئه ريا هارو ڌرڙا سئه، ان پڪيون را ماڙا سئه. پڻ مون منڪ ذات را ڏيڪرا هارو ايوئي ڪوئي جگا نئي جيئن هون آروم ڪري هيڪون.“

②1 اوئون منڪون موئين ٿي جيا ايسو را شيلا هتا، پيڙهه هيڪه زئه ايسو نئه ڪيڏو: ”ساڏو جي، مور ٿي مون نئه زاوا ڏيو. زتا ڏي مارو ٻاپ جيوتو سئه، مارئه اوڻا رئي شيوا ساڪري ڪرووه. مارا ٻاپ نئه زاکين پسهه هون آويه.“ ②2 پڻ ايسو اوڻا نئه ڪيڏو: ”جيا پگيون ري وات مان نئي وينا او آپ مرلون را زم سئه. پلئه او آپرون مرلون نئه زاکه. پڻ تون مارو شيلو ٿين مون وونهڙ او.“

ايسو واوڙ نئه پنڌ ڪرڻه

(متي 23:8-27، مرقس 4:35-41، لوقا 22:8-25)

②3 ٿيون ايسو پيڙي موئين سڙين پينو، ان اوڻا را شيلا پڻ اوڻا پيڙا سڙين روونا ٿيا. ②4 ان اوچئي الاهي گهڻي واوڙ ڍنڍ مان آئي، جيا ري ڪري موتي چولي آي ان پيڙي موئين پوڻي آوا مڏيو. پڻ ايسو اونگهال پڙيو تو. ②5 ٿيون شيلا اوڻا ڪن آوين اوڻا نئه زگاڙيو، ان ڪيڏو: ”گرو جي، امون نئه پچاوو. هوهه امي ٻوڏيا مان سون.“ ②6 تو ايسو اوئون نئه ڪيڏو: ”تمي ڪم پيڻاوهه ان گهٽ يقين را ڪوه؟“ پسهه ايسو اونين وائيرا ان چوليون نئه پنڌ ٿيا رو ڪيڏو، ان ماڻ ٿي ماڻ ٿي گهي.

②7 ٿيون او حيروني پڙي گيا، ان ام ڪيا مڏيا: ”اي ڪيو منڪ سئه، جي وائرو ان پوڻي اوڻا رو ڪيڏو مونئھ؟“

ايسو بيئون منكون ٿي گهڻا پوت ڪاڍه

(متي 28:8-34، مرقس 1:5-20، لوقا 26:8-39)

②8 زئيون ايسو ڏند را پيزا ڪپ مانھ زائين گدرينيون را علاقا موئين آيو، تئيون پونئيرا جيوون مقومون موئين ٿي ٻي منڪ نيھري آيا جيون نھ پوت سونتل هتا، ان او ايسو نھ هوما ٿيا. او پوت سونتل منڪ گهڻا ڪترا وازا هتا، ان منڪون نھ اوئا شيرڙا ٿي متوا ئي نه ڏيتا. ②9 اوئي رڙيون ڪرين ايسو نھ ڪڍو: ”پڳوون را ڏيڪرا، ٿارو امون ٿي ڪيو ڪوم سھ؟ ٿون سزا را توڻا ٿي مور امون نھ پونڌي هاري سزا ڏيو آيوھ، ڪي؟“

③0 هوه اوئون ٿي شيتي هونرون رو هيڪ موتو ولر سرتوت ريو. ③1 تيام پوتي ايسو نھ ام منٽ ڪري: ”جي ٿون امون نھ ڪاڍه پرا، تو امون نھ اوئا هونرون را ولر ۾ ميل پرا.“ ③2 تو ايسو اوئون نھ ڪڍو: ”زائو پرا!“ تيا مانھ پوت منڪون ٿي نيھرين هونرون نھ زائين سونتيا. ان اوچتو ٻڌوئي ولر ڏونگر ٿي نيسو ڊوڙي زائين ڏند ۾ پڙيو، ان ٻڌائي هونر ٻوڏين مري ڳيا.

③3 تئيون هونر ساريا وازا پاڳي ڳيا، ان شهر موئين زائين ٻڌوئي ڪئين همپڙايو جي هونرون ٿي ڪي ٿيو، ان پوت سونتل منڪون ٿي پڻ ڪي ٿيو. ③4 تئيون زوئو، شهر را ٻڌائي منڪ ايسو ڪن زايا هارو نيھري آيا، ان اوئا ڪن اوين اوئا نھ منٽ ڪري جي او اوئون را علاقا ٿي هيڪل زائھ پرو.

ايسو هڪا اڌرنڳ را مونڌا نھ هازو هورو ڪرھ

(متي 9:1-8، مرقس 1:2-12، لوقا 17:5-26)

① تئيون ايسو پيڙي موئين سترين ڏند موئين ٿي متيو ان پاسو آپرا شهر ۾ 9 آيو رو. ② ان زوئو، منڪ هڪا اڌرنڳ را مونڌا نھ زهوڙي موئين نوڪين ايسو ڪن لي آيا. زئيون ايسو اوئون منڪون رو يقين ڏيڪيو، تئيون اوئھ اڌرنڳ

را مونڌا نئه ڪيڏو: ”ڏيڪرا، هيٺ راڪ، تارا ڪرل ڏوه ماڦ سئه.“

③ تيا مانھ ڪئينڪ شاستر زوڻيا واڙي هڪا پيزا نئه ڪيڏو: ”اي منڪ آپ نئه پڳوون هرڪو ڪرين پڳوون رڻي پيعزتئي ڪرئھ ريو.“


④ ايسو اوئون را ڪيال زوڻين ڪيڏو: ”هيو ي ڪراپ واتون تم ي من ۾ ڪم سوچوھ ريا؟ ⑤ مون نئه همپزاوو جي ڪي هورو سئه؟ ام ڪيو هورو سئه جي ’اُونين وئه؟‘ ڪا ام ڪيو جي ’تارا ڪرل ڏوه ماڦ سئه؟‘ ⑥ پڻ هون تمون نئه ٿا پتئي ڏيه جي هون منڪ ذات رو ڏيڪرو سون، ان پڳوون مون نئه جڳت موئين ڏوه ماڦ ڪريا رڻي اڪتيارڻي ڏيڏئيھ.“ پسئھ ايسو اڌرنڳ واڙا نئه ڪيڏو: ”اُوني، زهوڙي اُوپاڙين گهري زا پرو!“ ⑦ ان او اُونين آپري گهري ڳيو پرو.

⑧ اوئنه جيا گهڻا منڪ هتا، هائي ڏيڪين، پڳوون ري ايئا ڪرا مانھ حيروني پڙي ڳيا، ان اوئي پڳوون را وڪوڻ ڪريا جيئنه منڪون نئه هيوئي ڪرا ڏيڏئيھ.

ناڪو ليڏا واڙو متي ايسو رو شيلو تئھ

(متي 9:9-13، مرقس 13:2-17، لوقا 27:5-32)

⑨ ايسو اوئون زاتوت ريو، تو اوئنه هڪا منڪ نئه ناڪا مانھ پينل ڏيڪيو، جيا رو نوم متي هتو. ان ايسو اوئا نئه ڪيڏو: ”مارو شيلو تين مون وونهڙ او!“ تو متي اوئيو ان ايسو رو شيلو تين اوئا وونهڙ وُڍو پرو.



⑩ تيا ڪيڙ ايسو متي ري گهري ڏاوت مانھ ڳيو. ان زوئو، اوئا ڏاوت موئين گهڻا ناڪو ليڏا واڙا ان هيو پيزا منڪ اول هتا، جيون نئه منڪ ڏوهاري هزمين شپ ڪرتا. او ايسو ان اوئا رون شيلون پيزا ڪاڏا هارو پينل هتا. ⑪ اي ڏيڪين فريسي پالتي را منڪ ايسو رون شيلون نئه ڪيا مڏيا: ”تمارو ڳرو ناڪو ليڏا واڙون ان هيوون ايڙال ڏوهاريون پيزو ڪم ڪاڻھ؟“

⑫ ايسو هائي وات هومپزين ڪيڏو: ”جيا هاڙا هورا سئه، اوئون نئه ڍاڪتر

رئي ضرورت نٿي هوندي، پڻ روڳيئون مونڏون نٿا ضرورت هوندا. ⑬ ٽي زائين پڳيون ري ڪيڏل ايتا وات مان ويا شيڪو جي 'مارئي مرضي اي نٿي جي منڪ مارا نوم مان مال ساڙڻ، پڻ مارئي مرضي اي سٺ جي منڪ ڏيا ڪرڻ. 'ڪم تو هون پيڏوهي منڪون نٿا نئين، پڻ ڏوهاري منڪون نٿا هاڻ ڏيا آيوه جي او پڳيون ٿي واسطو راکڻ.

ايسو نوي واتون شيڪاڙڻ

پڻ منڪون نٿا ڌرم ري زوني واتون وٺڻ

(متي 9:14-17، مرقس 2:18-22، لوقا 5:33-39)

⑭ پڻ يوحنا ري شيلي ايسو ڪن آوين پونسو: "امي ان فريسي پالتي را منڪ گهڻي وار ورت راکون، پڻ تمارا شيلا ڪم ورت نٿي راکتا؟"

⑮ تيون ايسو اوئون نٿا ڪيڏو: "زئون لاڏو زونيون پيو سٺ، تيون زونيا ڏکي ٿي شي ڪي؟ پڻ ايو ڏي آوشي زئون لاڏو اوئون ٿي ڌار ڪراشي پرو، تيڏي زونيا ورت راکشي. ⑯ ڪوئي پڻ منڪ نوا لوگهڙا رئي ٿيگهڙي زونا وگا ۾ نٿي هڻو. ڪم تو هم ڪريا ٿي نوا لوگهڙا رئي ٿيگهڙي سڙين هورئي ٿي شي، ان وڳو اڳي ٿي گهڻو ڦاڻي زاشي. ⑰ ان منڪ نوو ڌراڪون رو رس زونيون هنڌاريون ۾ نٿي راکتا، نڪا نوو رس پاڪين هنڌاريون نٿا ڦاڙشي پري، ان پڻ رس ايترائي زاشي ان هنڌاري ڪيا ٿي ڪوم ري نئين رڻ. پڻ منڪ نوو ڌراڪون رو رس نويون هنڌاريون ۾ راکڻ، ان پڻ رس ان هنڌاري ٻي ٿي ٿيڪ رڻ.

ايسو هيڪي سوڪري نٿا جيوتئي ڪرڻ

ان هيڪي اشيتري نٿا هارئي هورئي ڪرڻ

(متي 9:18-26، مرقس 5:21-43، لوقا 8:40-56)

⑱ ايسو هزون اوئون نٿا هائي واتون ڪيتوت ريو، تو اوڻه ٿوڻه هيڪ آڳيون

اُٺا ڪن آوين اُٺا ري پڳي پڙيو، ان ڪيڏو: ”مارئي سوڪري همڻه ڳڏاري ڳڻي. پڻ تمي هالين اُٺا مان هات ميلو، تو اُو وڙي جيوتئي ٿي زاشي.“⁽¹⁹⁾ تو ايسو اُٺين اُٺا پيڙو ڳيو ان ايسو را شيل پڻ پيڙا ڳيا.

⁽²⁰⁾ تئيون هيڪ اشيتري، جيا نئه ٻارون سالون ٿي زالوئي پيماري هئي ان هايا پيماري ري ڪري اُو ايتال هئي، ايسو وونهڙ آوين اُٺا ري ساڌر را شير نئه سڀئي. ⁽²¹⁾ ڪم تو اُو ام سوچتيت رئي: ”جي هون روڳئي ايٺا را لوڳهڙا نئه سڀي، تو هون هازئي هوري ٿي زائي.“

⁽²²⁾ ايسو وونهڙ قرين اُٺا ڏوشي نئه زوين ڪيڏو: ”ڏيڪري، هيٺ راڪ. تئين يقين ڪريو، تيام تون نڪ ٿي ڳئي.“ ان اُوئه ئي ٿوئه اُو ڏوشي هازئي هوري ٿي ڳئي.

⁽²³⁾ زئين ايسو آڳيون ري گهري پوتيو، تو اُوئه اُوئون منڪون نئه ڏيڪيا جيا سوڪري را موت مان ساز وڳاڙيا هارو ان روي هارو رواز پرموئه پيئون مان تيراول هتا. ڪئينڪ وونهڙي وڳاڙتات ريا، ان پيڙا الاهي گهڻا منڪ گهڻا زور ٿي پار لين روتات ريا. ⁽²⁴⁾ هائي ڏيڪين ايسو ڪيو مڏيو: ”ايئون هيڪل زائو، ڪم تو سوڪري مرئي نٿي، پڻ اُونگهائي رهي.“ تيا مان اُو منڪ ايسو مان ٺولي ڪروا مڏيا. ⁽²⁵⁾ پڻ زئين ايسو اُوئون گهڻون منڪون نئه گهر ٿي ٻارا ڪاڍي ريو، تئيون اُو گهر موئين ڳيو، ان اُٺا سوڪري رو هات زهالين سوڪري نئه جيوتئي ڪرين اُٺاڙئي. ⁽²⁶⁾ ان ايٺا وات رئي ڪپ اوت را پورا علاقا ۾ پڪڙي ڳئي.

ايسو بيئون اونڌون نئه ان هيڪا ڳونگا نئه

هاڙا هورا ڪرئ

⁽²⁷⁾ ايسو اُوئون زاتوت ريو، تو ٻي اونڌا منڪ اُٺا وونهڙ زور ٿي ام ڪيتا آوتات ريا: ”او دائود پاڌشا را وستار، امون مان ڏيا ڪرو!“

⁽²⁸⁾ زئين ايسو آڳيون گهر موئين ڳيو، تو اونڌا منڪ اُٺا ڪن آيا، ان ايسو

اُئون ٿي پُونسيو: ”ڪي تمون نٿه يقين سٺه جي هُون تمون نٿه هَازا هُورا ڪري هِڪونھ؟“ تو اُئي وِرنڌي ڏيڏي: ”هوئ، ساڏو جي، امون نٿه يقين سٺه.“
 (29) تئيون ايسو اُئون ريون اونڪيون نٿه سڀيو، ان ڪيڏو: ”زم تمي يقين ڪريوھ، همروم تمون ٿي تئ!“ (30) ان اُئون ري اونڪيون هَازي هُوري ٿي ڳي. ان ايسو اُئون نٿه گهڻو گهڻو ڪيڏو: ”ايئا وات رئي ڪيا نٿه ڪڀر نه پڙئ!“ (31) پڻ اُئي زائين هَايا وات رئي ڪڀر اُوت را پُورا علاقا ۾ پڪيڙي پري.

(32) زئيون هائي ٻي منڪ گهر ٿي ٻارا نيهرتات ريا، تو اُئ ٿي توئ ڪئينڪ منڪ هِڪا گُونگا نٿه ايسو ڪن تيڙي آيا، جيا نٿه پُوت سونتل هتو. (33) زئيون ايسو پُوت نٿه ڪاڍيو، تو گُونگو منڪ ٻولوا مڏيو. ان جيا گهڻا منڪ اُوت ٿهتا، اُو حيرون ٿيا ان ام ڪيا مڏيا: ”ايوي وات آئي اسرائيلي قوم ۾ اڳي ڪيڏي نٿي ٿي.“

(34) پڻ فريسي پالتي را منڪ ڪيا مڏيا: ”اُو پُوتون را مُڪ شيطون ري ڪڙا ٿي پُوتون نٿه ڪاڍئ.“

ايسو منڪون مانھ ڏيا ڪرئھ

(35) ايسو ٻڌون شهرون ان پاڙون ۾ زائين يهوديون رون پڳوون رون منڌرون ۾ شيڪاڙتو ريتو، پڳوون را راز را پارام ڪشي رئي ڪڀر همپڙاوتو ريتو، ان منڪون نٿه هر پيماري ان هر تڪليپ ٿي هَازا هُورا ڪرتو ريتو. (36) زئيون اُئ ٿي الاهي گهڻون منڪون نٿه ڏيڪيا، تو اُئا نٿه اُئون مانھ قياس آيو، ڪم تو اُو تڪليپ ۾ هتا ان اُئون رو ڪيال را ڪيا واڙو ڪوئي پڻ نٿو. اُو ايويون رديون را زم هتا، جيون رو ڪوئي ڌراڙ نه هوئ. (37) تئيون ايسو پڳوون رو وچن همپڙايا را پارام قصل لٿيا رو مثال ڏين آپرون شيلون نٿه ڪيڏو: ”قصل تو الاهي گهڻو سٺ، پڻ لٿيارا توڙا سٺ. (38) تيام قصل را ڏي نٿه وينتئي ڪرو جي لٿارا هارو لٿيارا ميلئ.“



ايسو آيرون بارون سونڊل شيلون نٺ يڳوون رو گوم ڪريا هارو ميله

(متي 1:10-15، مرقس 13:3-19، لوقا 12:6-16، 9:1-6)

10 ① پسٺه ايسو آيرون بارون سونڊل شيلون نٺه آپ ڪن تيڙاوين، اوئون نٺه اي اڪتياري ڏيڏي جي او منڪون ٿي پوت ڪاڏي ان منڪون نٺه هر پيماري ان هر تڪليپ ٿي هازا هورا ڪرڻه.

② اوئون بارون مڪ شيلون را نوم اي سٺه. پيرهئون شمعون، جيا نٺه پطرس پڻ ڪيتا، ان اوئا رو پائي اندرياس، زبدي را ڏيڪرا يعقوب ان يوحنا، ③ فلپس ان برٿلمائي، توما ان ناڪو ليڏا واڙو متي، حلفي رو ڏيڪرو يعقوب ان تدي، ④ شمعون، جيو آپرا ملڪ ري آزادي هارو وڊيا واڙو هتو، ان يهوداه اسڪريوتي، جيئنه تيا ڪيڙ ايسو نٺه زهلايو.

⑤ ايسو هايون بارون زئون نٺه اي حڪم ڏين ميليا: ”ڌاري قوم رون منڪون ڪن مت زايا، نڪو سامري قوم را ڪيا شهر ۾ زايا. ⑥ پڻ اسرائيلي قوم رون

منڪون ڪن زائو، جيا گمال ريڊيون را زم سٺ. ⑦ جيئڻ پڻ زائو، تو تمي ام همپڙاويا: 'ايشور را راز رو او توڻو ڏوڪڙو آيوه زئيون ايشور ساوڻه نمونڻه ٻڌون مانھ راز ڪشي.' ⑧ مونڏون نڻه ھازا ھورا ڪريا، مرلون نڻه جيوتا ڪريا، ڪوڍ واڙون نڻه ھازا ھورا ڪرين اڀڙايا ٿي پويتر ڪريا، ان منڪون ٿي پوت ڪاڍيا. مٿين تمون نڻه ھائي ڪوم ڪريا رڻي اڪتيارڻي امھي ڏيڏيھ، تيام تمي پڻ ھائي ڪوم پيڻھا ليڏا وگر امھي ڪريا. ⑨ تمي آپ پيڙا پيڻھا مت لي زايا، نڪو ھيم را، نڪو چونڊي را، ان نڪو پيتر را. ⑩ پنڌ ھارو نڪو زھوڙي، نڪو پيزو وگو، نڪو زوڙا، ان نڪو لاڪڙي لي زايا. ڪم تو مزور رو حق سٺ جي اوڻا نڻه ڪوم را ايوزام روڻي زڙڻه.

⑪ جيا جيا شهر ڪا پاڙا ۾ زائو، تو اوڻڻه تمي ڪوڪ ايوو منڪ ڳوتيا جيو مون واڙو ھوڻه. ان زئيون ھوڏي تمي اوڻون روونا نه ٿيو، تئيون ھوڏي اوڻا منڪ ري گھري ريا. ⑫ زئيون تمي گھر موئين زائو، تو اوڻا گھر رون منڪون نڻه ڪيا 'ھڪي ريو!' ⑬ ان جي اوڻا گھر را منڪ تمون نڻه مون ڏڻه، تو اوڻون نڻه پڳوون را پاھا ٿي ھڪ ٿڻه. پڻ جي او تمون نڻه مون نه ڏڻه، تو اوڻون نڻه ھڪ نه ٿڻه. ⑭ ان جي ڪوئي پڻ تمون نڻه آوا نه ڏڻه ڪا تماري واتون نه ھومپڙڻه، تو اوڻا گھر ڪا شهر ٿي نيھرين اوڻون ٿي واسطو توڙيا ھارو آپرون پڳون رڻي ڏوڙ پڻ ڪريا پڙي. ⑮ ھون تمون نڻه ھاس ڪونھ، جي اوڻه ڏي جيڏي پڳوون نيا ڪشي، تيڏي پڳوون اوڻا شهر رون منڪون نڻه ھاو پونڏون سدوم ان عموره شھرون ٿي پڻ گھڻي سزا ڏيشي."

ايسو مانھ وشواس راڪيا واڙون نڻه

منڪ ڏک تڪليب ڏيشي

(متي 16:10-25، مرقس 9:13-13، لوقا 12:21-19)

⑯ "زوڻو! ھون تمون ريڊيون جيوون منڪون نڻه نارون جيوون منڪون موئين ميلونھ

ريو. تيام تمی ھاپون را زم ھوشيار ریا، ان پاریوون را زم ڳریپ ٿیا. (17) منکون ٿي ھوشيار ریا. کم تو او تمون نئہ زھالین پنچائیتون رئہ حوالئہ ڪرشي، ان آپرون پڳوون رون منڌرون ۾ تمون نئہ چاڀکا ھئاوشي. (18) ماري ڪري منک تمون نئہ آڳیوونون ان پاڌشائون ھوما لي زاشي، ان ھیوئہ نمونئہ تمی اوئون نئہ ان ڌاري قوم رون منکون نئہ مارا پارام ھاڪ پرین ھمپزاوي ھیکشو. (19) پڻ زئیون او تمون نئہ زھلاوئہ، تئیون تمی اي ڳتئي مت ڪریا جي تمی کم ڪرین پولشو ڪا ڪي ڪیشو. کم تو اوئہ ئي توئہ پڳوون تمون نئہ من ۾ ھمپزاوشي جي تمارئہ ڪي ڪیو. (20) کم تو تمی آپرا پاھا ٿي نئین پولو، پڻ تمارا ڀاپ پڳوون را میلل پویتر آتما ري ڪرا ٿي پولشو.


(21) ڀائي ڀائي نئہ موت رئي سزا ڏیورایا ھارو زھلاوشي، ان ڀاپ اولاد نئہ موت رئي سزا ڏیورایا ھارو زھلاوشي. ان اولاد مان ڀاپ رئہ ڪلاف ٿیشي ان اوئون نئہ زھلاوین موت رئي سزا ڏیوراوشي. (22) تمارئہ مون مانھ وشواس راکیا ري ڪري ٻڌائي منک تمون ٿي ویر راڪشي. پڻ جیو آکر ھوڏي وشواس راکین ڏوروڻ صیر ٿي سھشي، اوئا نئہ تارڻ زڙشي. (23) زئیون منک تمون نئہ ھیکا شھر ۾ تنگ ڪرئہ، تو اوئون پیزا شھر ۾ پاڳي زایا. کم تو ھون تمون نئہ ھاس ڪونھ، زئیون ھون منک ذات رو ڏیکرو زبکتا سوجھرا ۾ وڙي پاسو آویھ، تئیون اسرائیل ملڪ رون شھرون ۾ مارا پارام ھمپزایا رو ڪوم ھزون پورو ئي نئین ٿیو ھوئہ.

(24) شیلو آپرا ڳرو ٿي موتو نٿي، نڪو ڳلوم آپرا ڌڻي ٿي موتو سئہ. (25) شیلا رئہ ایئا وات مانھ ڪش ٿیو ڪپئہ جي او آپرا ڳرو را زم ٿئہ. ان ڳلوم رئہ ایئا وات مانھ ڪش ٿیو ڪپئہ جي او آپرا ڌڻي را زم ٿئہ. ھوئہ زئیون منکي مون نئہ شیطون را پاھا رو ڪیڏو، جیو زوئہ گھر رو ڌڻي سون، تو تمون نئہ ڪي نئین ڪئہ، جیا زوئہ گھر را منک سو؟

منڪون ٿي نه پيئائو

(متي 26:10-31، لوقا 2:12-7)

②6 ”تيام تمڻي اُوئون ٿي مت پيئايا. ڪم تو جئين پڻ وات ڏونڪل سئ، اُو ساوئي ٿيشي، ان جئين پڻ وات هٽاڙل سئ، اُوئا رئي ڪهر پڙشي. ②7 جي واتون اندارا ۾ هٽاڙل سئ، اُو سوجهرا ۾ ساوي ٿيشي، ان هيونئ نمونئ جي واتون هون تمون نئ نويڪلائي ۾ ڪونھ، اُو تمڻي ٻڌون رئ روپرو همپڙاويا، ان جي ڪونون ۾ هٿيون هٿيون ڪيڏل واتون تمڻي هومپڙوه، اُو تمڻي ٻڌون نئ اوتومڻي همپڙايا. ②8 منڪون ٿي مت پيئايا، ڪم تو اُو روڳو اتو ڪري هيڪئ جي تمون نئ مارئ پرا، پڻ تمارا جيو نئ ڪم نٿي ڪري هيڪتا. پڻ پڳوون ٿي پيئائو، ڪم تو اُو تمون نئ هميش رئي سزا کاڌا هارو نرڳ موئين ڦڳورين تمارو ڏيل ان جيو



پيئون نئ ڪم ڪري هيڪئ. ②9 سڪلي تو هاو هونگهي سئ، هڪا روپيا ۾ ٻي زڙئ. توئي پڻ تمارا باپ پڳوون ري مرضي وڳر هليون موئين ٿي هيڪ ئي نٿي مرتئي. ③0 پڳوون تو تمارو اتو گهڻو ڪيال راکئ جي تمارا مائا را مٿوئاڙ پڻ ٻڌائي اُوئا را گڻل سئ. ③1 تيام مت پيئايا، ڪم تو تمارو مون سڪليون ٿي الاهي گهڻو سئ.

آپ نئ ايسو رو شيلو ڪيڏا ٿي نه پيئائو

(متي 32:10-33، لوقا 8:12-9)

③2 ”جيو منڪون رئ روپرو ڪئ جي اُو مون مانھ وشواس راکئ، تو هون پڻ مارا آڪاشي باپ پڳوون رئ روپرو همروم ڪيھ جي اُو مون مانھ وشواس راکئ.

③③ ان جيو منكون رٺه رُوپرو ڪٺه جي اُو مُون مانھ وشواس نٿي راکتو،
تو هُون پڻ مارا آڪاشي پاپ پڳوون رٺه رُوپرو همروم ڪيھ جي اُو مُون مانھ
وشواس نٿي راکتو.

منڪ ايسٽو مانھ وشواس راڪيا وازون رٺه ڪلاڦ ٿيشي

(متي 34:10-39، لوقا 51:12-53، 26:14-27)

③④ ”تمي ام مت هُرمو، جي مارا آيا ٿي ڌرتي مانھ هپ ٿيشي. مارا آيا ٿي هپ
نئين، پڻ واڌ ٿيشي. ③⑤ ڪم تو مارا آيا ٿي منڪ آپرا پاپ رٺه ڪلاڦ ٿيشي، ان
ڏيڪري آپري مان رٺه ڪلاڦ ٿيشي، ان وٺواري آپري هاھو رٺه ڪلاڦ ٿيشي.
③⑥ ان منڪ را ڏشمڻ اوٺا را آپرا گهر را پاتي هوشي.

③⑦ جيو آپرا مان پاپ ٿي وڌارٺه پريم ڪرٺه، پڻ مُون ٿي گهٽ پريم ڪرٺه،
اُو مارو شيلو هويا جيوو نٿي. ان جيو آپرا ڏيڪرا ڪا ڏيڪري ٿي وڌارٺه پريم
ڪرٺه، پڻ مُون ٿي گهٽ پريم ڪرٺه، اُو مارو شيلو هويا جيوو نٿي. ③⑧ ان جيو
زوٽه آپري هُوڙي اُوپاڙين موت هُوڙي ڏک سهين مُون وونهڙ نٿي آوتو، اُو
مارو شيلو هويا جيوو نٿي. ③⑨ جيو ڪوئي رُوڳو آپرو جيو پچاوا ڪرٺه، تو اوٺا
رو جيو گمائي زاشي، پڻ جيو ڪوئي ماري ڪري آپرو جيو ڏيڏا مانھ تيار سٺه،
تو اوٺا نٺه هميش رو جيون زڙشي.

پڳوون ايسٽو مانھ وشواس راڪيا وازون نٺه ايوزو ڏيشي

(متي 40:10-42، مرقس 9:41)

④④ ”جيو تمون نٺه ڪشي ٿي آوا ڏٺه ان قبول ڪرٺه، اُو مُون نٺه قبول ڪرٺه.
ان جيو مُون نٺه قبول ڪرٺه، اُو پڳوون نٺه قبول ڪرٺه، جيئنه مُون نٺه ميليوه.
④① جيو منڪ پڳوون رو نياپو ڏيڏا وازا نٺه ايٺا وات ري ڪري ڪشي ٿي آوا
ڏٺه، جي اُو پڳوون رو نياپو ڏيڏا وازو سٺه، تو پڳوون اوٺا منڪ نٺه ايوزو

ڏيشي، جيئو پڳوونَ رو نياپو ڏيڏا واڙا نئه زڙشي. ان جيئو منڪ پڳوونَ ري وات مانھ وُڍا واڙا نئه ايئا وات ري ڪري ڪُشي ٿي آوا ڏئھ، جي او پڳوونَ ري وات مانھ وُڍا واڙو سئھ، تو پڳوونَ اوئا منڪ نئه ايئو ايوزو ڏيشي، جيئو پڳوونَ ري وات مانھ وُڍا واڙا نئه زڙشي. (42) ان جيئو پڻ ايئون ٻڌون ٿي نونون منڪون موئين ٿي هيڪا نئه، مارو شيلو ھزمين، روڳو هيڪ ڳلاس ٿاڍو پوئي ٿي پيٿارئھ، تو ھون تمون نئه ھاس ڪونھ جي پڳوونَ اوئا نئه ھايا پلائي رو ضرور ايوزو ڏيشي.

يوحنا جيل ٿي آپرون شيلون نئه ايسو ڪن ميلئھ

(متي 1:11-6، لوقا 18:7-23)

11 ① زئيون ايسو آپرون ٻارون سونڊل شيلون نئه ھائي واتون ڪي ريو، تئيون اوت رون شھرون ۾ شيڪاريا ھارو ان ھمپڙايا ھارو اوئا ماڳ ٿي روونو ٿيو.

② زئيون پويتر سنون ڏيڏا واڙئھ يوحنا جيل موئين ايسو ڪريست رون ڪومون را پارام ھومپڙيو، تئيون اوئھ پڪ ڪريا ھارو آپرون شيلون نئه ايسو ڪن اي پونسوا ميليا: ③ ”ڪي تم پڳوونَ را سونڊل پڇايا واڙا سو جيا را آيا را پارام شاستر ۾ لڪل سئھ، ڪا امي پڙا ڪياڪ رئي وات زوئون؟“ ④ پستھ ايسو يوحنا رون ميلل شيلون نئه ڪيڏو: ”تمي زائين جئين ڪئين تم پڳوونَ ھومپڙيوھ ان ڏيڪيوھ، او يوحنا نئه ھمپڙايا، ⑤ جي اونڌا ڏيڪي ھيڪئھ ان روڻڳڙا وي ھيڪئھ، ڪوڍيا ھازا ھورا تين اپڙايا ٿي پويتر تئھ ان پوڙا ھومپڙئھ، مرل منڪ جيوتا تئھ ان ڳريھون نئه ڪُشي رئي ڪر ھمپڙاوي زائھ. ⑥ ان پاڳواڙا او سئھ جيا مون مانھ ڪئين ٿي شڪ نٿي ڪرتا، جي ھون او ھاڳي پڳوونَ رو ميلل پڇايا واڙو سون.“

ايسو منكون نئه يوحنا را پارام هزماوئھ

(متي 7:11-19، لوقا 7:24-35)

⑦ زئيون يوحنا را ميلل شيلا پاسا رونا ٿيا، تئيون ايسو ٻڌون منكون نئه يوحنا را پارام ڪيا مڏيو: ”زئيون تمي رڻ موئين يوحنا ڪن ڳيا تا، تو تمي ڪي زووا ڳيا تا؟ تمي ايوو منڪ زووا ڳيا تا ڪي، جيا را ويچار سر را زم وائيرا ٿي ڏڳتا رئه؟ ⑧ پسئه تمي ڪي زووا ڳيا تا؟ ڪيا ڪ نائوڪا لوگهڙا پيرل منڪ نئه زووا ڳيا تا، ڪي؟ نا، او جيا نائوڪا لوگهڙا پيرئه، او تو پاڌشائون رون مولاتون موئين هوئه. ⑨ پسئه تمي ڪي زووا ڳيا تا؟ ڪي هڪا پڳوون رو نياپو ڏيڏا واڙا نئه؟ هوئه پيزو. هون تمون نئه ڪاتري ٿي ڪونه جي يوحنا پڳوون رو نياپو ڏيڏا واڙو تو سئه، ان ايٺا ٿي موٽو پڻ سئه. ⑩ يوحنا او سئه جيا را پارام شاستر موئين پڳوون رئي اي ڪيڏل وات لڪل سئه: ’زو، هون آپرو نياپو ڏيڏا واڙو ٿون ٿي مور ميلونه، او ٿارا آيا مور ٿون هارو مارڳ تيار ڪرشي.’

⑪ هون تمون نئه هاس ڪونه، پوري دنيا ۾ ايوو ڪوئي منڪ پيدا نٿي ٿيو، جيو يوحنا پويتر سنون ڏيڏا واڙا ٿي موٽو سئه. توئي ايشور را راز موئين جيو ٻڌون ٿي نونو سئه، او پڻ يوحنا ٿي وڌارئه يا ڳواڙو سئه. ⑫ زئيون يوحنا پويتر سنون ڏيڏا واڙو ايشور را راز را پارام همپراوا مڏيو، اوٺا وڪت ٿي لين هزون هوڏي، ايشور را راز ٿي مقابلو وٺه ريو، ان ڪراپ منڪ ايشور را راز رئه ڪلاڦ ٿين زوري اوٺا نئه ڪتم ڪروا ڪرئه ريا. توئي پڻ ايشور رو راز زور ٿي پڪڙه ريو، ان جيا منڪ ايشور ري وات مان وڌا هارو آپري پوري ڪوشش ڪرئه ريا او ايشور را راز را منڪ ٿه ريا. ⑬ ڪم تو يوحنا را آيا هوڏي، شاستر ۾ ٻڌون پڳوون رو نياپو ڏيڏا واڙون رون لڪل ڪتابون ۾ ان موسي رون لڪل ڪتابون ۾ مور ٿي همپراول هتو جي ايشور رو راز آوشي. ⑭ ان جي تمي يقين

ڪرو، جيئن شاستر ۾ لڪل سٺه جي ايشور را راز رٿه آيا ٿي مور ايلياه آوشي،
تو هائي يوحنا را پارام لڪل سٺه. (15) هومپزيا واڙون، تمي ماري وات مانھ
ڏيون ڏيو!

(16) هون تو ڪي ڪون؟ ايٺا زمونا را منڪ ڪيا را گهوڙ سٺه؟ اي منڪ
اوئون ٻاڙون را گهوڙ سٺه، جيا شهر رون پوئون موئين رمتون پيزون ٻاڙون ٿي
ڌار پيهين ام ڪئھ:

(17) امي رميا هارو وونهڙي وگاڙي، پڻ تمي تو رميا ٿي نئين.

امي پار لين روياء، پڻ تمي روياء ٿي نئين.

اوئون ٻاڙون را زم ايٺا زمونا را منڪ ڪيئھ پاهئھ ڪش نٿي. (18) ڪم تو يوحنا
آيو ان او نڪو روٿي کاتو نڪو ڌراڪون رو رس پيتو، تيام منڪ ڪئھ: 'ايٺا
نئھ پوت سونٽل سٺه.' (19) پڻ هون منڪ ذات رو ڏيڪرو آيوھ، ان هون پيزون را
زم روٿي ڪائونھ ان ڌراڪون رو رس پيئونھ، توئي پڻ منڪ مارا پارام ڪئھ:
'ايٺا نئھ زوئو. اي لپڙو ان شراپي سٺه. اي تو اڀڙال ناڪو ليڏا واڙون ان هيون
ڏوهاريون رو دوست سٺه.' توئي پڻ جيا منڪ پڳوون رو نياپو مونئھ، او آپرون
ڪرل ڪومون ٿي ٿاڀي ڏئھ جي او نياپو پڳوون ري عقل ٿي ڏيندل نياپو سٺه."

جيون شهرون را منڪ يقين نٿي راکتا

اوئون نئھ گهڻي سزا زڙشي

(متي 20:11-24، لوقا 13:10-15)

(20) پسئھ ايسو اوئون شهرون رون منڪون رو ڏوھ ڪاڍوا مڏيو، جيون شهرون ۾
اوئھ گهڻا پرسا ڏيڪاڙيا تا، توئي پڻ منڪي آپرا ڪراپ ڪوم ساڏين توپونھ
نٿي ڪري ان پڳوون ري وات مانھ نٿا وڍا. (21) ايسو ام ڪيڏو: "ڏک سٺھ
خرازين شهر رون منڪون هارو، ان ڏک سٺھ بيت صيدا شهر رون منڪون هارو،
ڪم تو ايئون شهرون موئين پڳوون ري ڪڙا ٿي موتا ڪوم ٿياھ، توئي پڻ اوئي

آپرا کراب کوم ساڌين توپونه نه ڪري ان پڳوون ري وات مان نه وُڍا. جي هيو پرسا ڌاريون صُور ان صيدا شهرن موئين ٿيا هوٽ، تو اُوت را منک ويلا آپرا کراب کوم ساڌين توپونه ڪرٽ، ان پاڪريون ري زات ٿي ناول لوگهڙا پيرين ڌڪ موئين شيلي مان بهيٽ، ان پڳوون ري وات مان وٽ. (22) تيام هون تمون نه کاتري ٿي ڪونه، اُوئه ڏي جيڏي پڳوون نيا ڪرشي، تيڏي اُو ايئون شهرن رون منڪون نه هاو پُونڌون صُور ان صيدا شهرن ٿي گهڻي سزا ڏيشي.

(23) ان ڪفرنحوم شهر را منک، اُو ام سوچئ جي 'امي نائوڪا سون، امي آڪاش موئين پڳوون ڪن ضرور پوگشون.' پڻ پڳوون اُوئون نه مرلون را جڳت موئين هيٺ ڦڳورشي پرا. ڪم تو هايا شهر موئين پڳوون را موٽا ڪوم تيا، توئي پڻ منکي آپرا کراب کوم ساڌين توپونه نه ڪري ان پڳوون ري وات مان نه وُڍا. جي هيو پرسا هاو پُونڌا سدوم شهر موئين ٿيا هوٽ، تو اُوت را منک ويلا آپرا کراب کوم ساڌين توپونه ڪرٽ ان پڳوون ري وات مان وٽ، ان اُو شهر آز هوڏي هوٽ. (24) پڻ هون تمون نه کاتري ٿي ڪونه، جي اُوئه ڏي جيڏي پڳوون نيا ڪرشي، تيڏي پڳوون ڪفرنحوم شهر رون منڪون نه هاو پُونڌا شهر سدوم ٿي پڻ گهڻي سزا ڏيشي.

ايسو آپرون شيلون هارو پڳوون رو ٿورو مونئھ

(متي 25:11-30، لوقا 21:10-22)

(25) تيا مان اُوئه ئي ٿوئنه ايسو ڪيڏو: "او پا، آڪاش ان ڌرتي را ڏئي، هون تمارو ٿورو مونونه ڪم تو ٿمي اي واتون هڙمو ان عقل واڙون ٿي هٿاڙين را ڪيه، ان نونون منڪون ڪن ساوي ڪريه. (26) او پا، وڙي هون تمارو ٿورو مونونه ڪم تو ٿمي آپري مرضي ان ڪشي ٿي هم ڪريوه."

(27) ٿيون ايسو منڪون نه ام ڪيڏو: "پڳوون ٻڌوئي ڪئين مارا ڪيڏام

ڏيڏوه. پيزو ڪوئي پڳوونَ را ڏيڪرا نئه نٿي اوزڪتو، رُوڳو مارو ٻاپ پڳوونَ اوزڪتو. ان پيزو ڪوئي مارا ٻاپ نئه نٿي اوزڪتو، رُوڳو هُون اُوڻا رو ڏيڪرو اوزڪونه، ان اُو پڻ اوزڪتو جيون ڪن هُون ڏيڪرو مارا ٻاپ پڳوونَ نئه ساوو ڪروا ڪرونه.

②⑧ ٽمي جيا منڪون رون ناول حُڪمون مانھ وي وينَ زوڻئہ پار اُوپاڙي اُوپاڙينَ ٿاڪي گياھ، ٽمي ٻڌائي مُون ڪن آو، ان هُون تمون نئه هڪ ڏيھ. ②⑨ زم ڊڳو پنڄارئي اُوپاڙينَ آپرا ڌڻي را هاڪليا پرموڻئہ وئہ، تم ٽمي زوڻئہ مارئي پنڄارئي اُوپاڙينَ مارا ڪيڏا پرموڻئہ وو، ان مُون ٿي شيڪو، ڪم تو هُون اشراپ ان من رو گريپ سون، ان تمون نئه من ۾ هڪ زڙشي. ③⑩ ڪم تو ماري شيڪاڙل واتون نائوڪي ناول پنڄاري را زم سئہ، ان هڪا پار را زم سئہ. اُو تمون هارو نائوڪي سئہ ان تمون نئه ڌوري نئين لاڳئہ.

ايسو پويتر ڏي رو ڌڻي ٿين

آپ قينصلو ڪرئہ جي پويتر ڏي رو ڪي ڪروو

(متي 1:12-8، مرقس 2:23-28، لوقا 1:6-5)

12 ① اُوئون ڏيئون ۾ هيڪ وار ايسو پويتر ڏي رو ڪيترون موئين ٿين متوت ريو، جيون ۾ ڪڪ اوپل هئي. اُوڻا رون شيلون نئه پوک لاڳئي، ان اُو هرا پٽين کاوا مڏيا. ② پڻ فريسي پالتي ري منڪي شيلون رو اي ڪوم ڏيڪين ايسو نئه وڙگائين ڪيڏو: ”زو، تارا شيلو تو لٻارو ڪريا جيوو ڪوم ڪرئہ زيا. آڻا ڌرم پرموڻئہ پويتر ڏي رو ڪئين ڪوم نه ڪروو ڪپئہ.“

③ ٿيون ايسو اُوئون منڪون نئه ڪيڏو: ”تمون نئه ڪهر نٿي ڪي، جي هيوي پوک ري حالت ۾ آڻئہ ڌرمي ڏاڏئہ دائود ڪي ڪريو تو؟ ٽمي تو شاستر موئين اڳي پٿيوھ جي زئون دائود ان اُوڻا را منڪ پوکا هتا، ④ ٿيون اُو آپ پڳوونَ را گهر موئين گيو، ان جي روئي پڳوونَ را نوم ري هتي، اُو روئي اُوئہ ان اُوڻا ري

سائِيئي ڪاڏي. هُوَ دائود رو ان اُوڻا رون سائِيون رو اُوڻون روڻيون مانھ ڪئين حق نٿو، ڪم تو آڀا ڌرم پرموڻه رُوڳا اُو جيا پڳوون را گهر موئين پُوڙا رو ڪوم ڪرڻه، اُو ايوي روتي ڪائي هيڪڻه. تويي پڻ پوک ري حالت ۾ اُوئي هائي روتي ڪاڏي. ⑤ ان تمي شاستر ۾ اي پڻ پڻو نٿي، ڪي؟ پَوِيتَر ڏي رو پُوڙاري پڳوون را گهر ۾ مَوسِي رون لڪل حُڪمون پرموڻه پُوڙا رو ڪوم ڪرڻه. پڻ هيوڻه نمونَه ڪوم ڪريا ٿي اُو پَوِيتَر ڏي رو آروم ڪريا رو حُڪم توڙڻه. تويي پڻ اُو هم ڪريا ٿي ڏوهاري نٿي ٿيڻا. ⑥ ان هُون تمون نَه ڪاتري ٿي ڪونه جي هُون تمون هومو پڳوون را گهر ٿي پڻ موٽو سون. ⑦ شاستر ۾ پڳوون رڻي اي وات لڪل سَه: 'مارئي مرضي اي نٿي جي منگ مارا نوم مانھ مال ساڙڻه، پڻ مارئي مرضي اي سَه جي منگ ڏيا ڪرڻه.' جي تمي ايئا وات رو مطلب هُزموت، تو تمي ايئون مارون شيلون رو ڏوه نه ڪاڍوت، جيا ايئا وات ۾ پيڏوهي سَه. ⑧ ڪم تو هُون آپ منگ ذات رو ڏيڪرو ٿين پَوِيتَر ڏي رو ڏي سون.

ايسُو پَوِيتَر ڏي رو هِيڪا هُوڪال هات واڙا نَه هازو هورو ڪرڻه

(متي 14:9-12، مرقس 6:1-3، لوقا 11:6-11)

⑨ ايسُو اُوڻون زائين يهوديون را پڳوون را مندر موئين گيو. ⑩ ان اوتڻه هِيڪ منگ هتو جيا رو هات هُوڪال هتو. تيام فريسي پالتي ري منكي ايسُو ٿي پُونسيو: "ڌرم پرموڻه پَوِيتَر ڏي رو منگون نَه هازا هورا ڪروو صحيح سَه ڪا نا؟" اُوئي ام تيام پُونسيو، ڪم تو اُو ايسُو رو ڏوه ڪاڍيا رو وجهه گوتتات ريا. ⑪ پڻ ايسُو اُوڻون نَه وڙندڻي ڏيڏي: "جي تمون موئين ٿي ڪيا ڪرڻي هِيڪ ري هون ان اُو پَوِيتَر ڏي رڻي ڪاڏا موئين پڙي زائ پڙي، تو تمي اُوڻا نَه ٻارئي نئين ڪاڍو، ڪي؟ ⑫ هون منگ رو مون تو ري ٿي الاهي گهڻو سَه. تيام آڀا ڌرم پرموڻه پَوِيتَر ڏي رو منگون ٿي پلائي ڪروو صحيح سَه." ⑬ پَسَه ايسُو اُوڻا منگ نَه ڪيڏو: "تارو هات پاڌرو ڪر!" تو اُوڻه آڀرو

هات پاترو ڪريو، ان اوثا رو هات پيزا هات را زم هازو هورو ٿي ڳيو. ⑭ پڻ فريسي پالتي ري منڪي اوثون نيهرين آيت ۾ ايسو رڻه ڪلاڪ صلاح ڪرڻي جي ”اوثا نه ڪم ڪرين مراون پرو؟“

ايسو ٿايتي ڏٺو

جي او پڳوون رو سئونيل شيواڌاري سڻ

⑮ هائي وات زوئين ايسو اوثون ڳيو پرو. ان الاهي گهڻا منڪ اوثا وونهڙ وڍا. ان اوثون موئين زتا پيمار هتا، ايسو اوثون ٻڌون نه هازا هورا ڪريا. ⑯ ان اوثون نه گهڻو گهڻو ڪيڏو جي ”مارا پارام وات مت پڪيڙيا.“

⑰ هائي ايڻا هارو ٿيو، زم پڳوون رڻي اي وات پورڻي ٿي، جيئي وات اوڻه آپرو نياپو ڏيڏا واڙا يسعياه هات ڪيڏي ٿي:

⑱ ”زوڻو، اي مارو شيواڌاري سڻه جيا نه مئين سونڊيوه.

اي مارو پريمي سڻه، ان ايڻا ٿي هون گهڻو ڪش سون.

هون ايڻا نه مارو پويتر آتما ڏيه،

ان اي ٻڌيون قومون نه انصاف رڻي ڪهر ڏيشي.

⑲ اي جهيڙو جهيڙو نئين ڪرڻه، نڪو ڪاش ڪرشي،

ان نڪو شهر شهر ۾ زور ٿي آپري مشوري ڪرشي.

⑳ جيا منڪ قيهلل پن را زم ڪمزور سڻه

اوثون ٿي اي نرمي هون ويشي،

ان جيا اوزهمايا واڙي وٽ را زم پي اميد سڻه

اوثون رڻي اي هيئت وڌارشي،

زئون هوڏي اي پڳوون رڻي جيت نه ڪراوڻه

ان ٻڌون نه انصاف نه زڙڻه.

㉑ ان ٻڌي قومون ايڻا منڪ مانه پروسو را ڪشي.“

ايسو پوتون نء ڪاڍيا ٿي ٿاڀٽي ڏٺھ جي اوء شيطون نء ھرايوھ

(متي 22:12-37، مرقس 20:3-30، لوقا 14:11-23، 43:6-45)

22) تئين منڪ ايسو ڪن ھيڪا اونڌا ان ڳونڳا منڪ نء تيڙي آيا، جيا نء پوت سونتل ھتو. ان ايسو اوئا ٿي پوت ڪاڍين اوئا نء ھازو ھورو ڪريو پرو، ان او ٻولوا ان ڏيڪوا مڏيو. 23) ان جيا گھڻا منڪ اوئء ھتا، او ٻڌائي ھيروني پڙيا، ان ام ڪيو مڏيا: ”اي دائود پادشا رو وستار سء ڪي، جيا را آيا را پارام شاستر ۾ لڪل سء؟“

24) پڻ فريسي پالٽي ري منڪي ھائي ھوميرين ڪيڏو: ”جي پوتون رو مڪ شيطون ايئا منڪ نء طاقت نہ ڏئت، تو اي پوتون نء ڪاڍي نہ ھيڪئت.“
25) پڻ ايسو اوئون را ڪيال زوئين اوئون نء ڪيڏو: ”جيا راز را منڪ آيت موئين نئي ٺھتا، او راز ڪتم ٿي زائھ. ان جيا شھر ڪا گھر را منڪ آيت ۾ نئي ٺھتا، او ھونو ٿي زائھ. 26) ان جي ھون شيطون ري طاقت ٿي پوت ڪاڍئت، تو ھايا رو مطلب اي ٿئت جي شيطون را راز را منڪ آيت موئين نئي ٺھتا. تيام شيطون رو راز ڪم ڪرين ريشي؟“

27) تمي ڪوھ ريا جي ھون شيطون ري طاقت ٿي پوت ڪاڍونھ، تو پسء تمارا آپرا منڪ ڪيا ري طاقت ٿي پوت ڪاڍئھ؟ او آپ ڪيشي جي تمارئي وات ڪوڙئي سء. 28) پڻ ھون تو پڳوون ري ڪڙا ٿي پوت ڪاڍونھ، ان ھايا ٿي ٿاڀٽي ٿئھ جي پڳوون رو راز تمون ھومو ساوو ٿيوھ ان تمون مانھ سء.

29) منڪ ڪم ڪرين ڪياڪ طاقت واڙا را گھر موئين زائين اوئا ري شينھون ڪوھي ھيڪئھ، جي مور ٿي او طاقت واڙا نء نہ ٻوندئھ؟ مور ٿي طاقت واڙا نء ٻوندشي، ان پسء اوئا رو گھر ڦري ھيڪشي. ھيوئ نمونئ جي مئين شيطون نء ھرايو نہ ھوئ، تو ھون پوت ڪاڍيا ٿي منڪون نء شيطون را قوضا ٿي نہ

سڏاوي هيڪٽ.

③⑩ جيو مارئہ پاھئہ نٿي، اُو مارئہ ڪلاڦ سئہ. جيو مُون پيڙو ٿين پڳوونَ هارُو منڪون نئہ پيڙا نٿي ڪرتو، اُو منڪون نئہ پڳوونَ ٿي شيئي پڳڙاوتہ. ③⑪ تيام هُون تمون نئہ ڪاتري ٿي ڪونہ، جيو پڻ ڏوھ منڪ ڪرئہ ان جي پڻ وات منڪ پڳوونَ رئہ ڪلاڦ ڪئہ، پڳوونَ را پاها ٿي هايون ٻڌون رئي ماقئي ٿي هيڪئہ. پڻ جيو منڪ زوٽي ڪرين پڳوونَ را پويتر آتما رئہ ڪلاڦ ويتو رئہ، تو اُوئا نئہ پڳوونَ ماقئي نئين ڏئہ. ③② ان جيو پڻ مُون منڪ ذات را ڏيڪرا رئہ ڪلاڦ ڪئين وات ڪرئہ، تو پڳوونَ را پاها ٿي اُوئا رئي ماقئي ٿي هيڪئہ. پڻ جيو منڪ زوٽي ڪرين پڳوونَ را پويتر آتما رئہ ڪلاڦ ٻولئہ، تو اُوئا نئہ پڳوونَ ڪيڏي ماقئي نئين ڏئہ، نڪو ايئا حياتي ۾ ان نڪو نيا رئہ ڏي.

③③ ٽمي ڪم ڪرين ڪي هيڪوھ جي اي پُوت ڪاڊيا رو نائوڪو ڪوم شيطونَ را پاها ٿي ٿيوھ؟ جي ڪياڪ رو ڪوم نائوڪو سئہ، تو تمارئہ ام ڪيوو جي اُو منڪ پڻ نائوڪو سئہ. پڻ جي ٽمي منڪ نئہ ڪراپ ڪوھ، تو تمارئہ ام پڻ ڪيوو جي اُوئا رو ڪوم پڻ ڪراپ سئہ، ڪم تو منڪ آپرون ڪومون ٿي اورڪائہ. جيوو وڻ تيوو ميوو.

③④ او من رون پليتون، زئيون ٽمي آپ پُونڌا سو، تئيون ٽمي ڪم ڪرين نائوڪي واتون ڪري هيڪوھ؟ ڪم تو جيويون واتون ٿي من پرال سئہ، ايوي واتون منڪ ٻولشي. ③⑤ نائوڪو منڪ آپرا من موئين راکل نائوڪيون واتون موئين ٿي نائوڪي واتون ڪاڊئہ. ان پُونڌو منڪ آپرا من موئين راکل پُونڌيون واتون موئين ٿي پُونڌي واتون ڪاڊئہ. ③⑥ پڻ هُون تمون نئہ ڪاتري ٿي ڪونہ، جي نيا رئہ ڏي منڪون رئہ هر ڪراپ وات رو حساب ڏيوو پڙشي، جي اُوئي ڪري هوشي. ③⑦ ڪم تو تماريون ڪيڏل واتون ٿي تمارو ڦينصلو ٿيشي جي ٽمي پيڏوھي سو، ڪا ڏوھاري سو.

ايسو نئ منگ پرسو ڏيکاريا رو ڪئھ

(متي 38:12-42، مرقس 11:8-12، لوقا 11:29-32)

③8 ٿيا مانھ اُوئھ ٿوئھ ڪئئنگ شاستر زوٿيا واري ان فريسي پالتي ري منڪي ايسو نئ ڪيڏو: ”گرو جي، امي تمون ٿي پرسو زووا ڪرونھ، زم ٿايتي ٿئھ جي تمي پڳوون را پاھا ٿي سو ڪا نا.“

③9 ٿيا مانھ ايسو اوئون نئ ڪيڏو: ”تمي ايٺا زمونا را منڪ ڪيا پونڌا سو ان آپرا ڏئي پڳوون رئھ ھاو ڪلاڦ سو. تيام تمي ٿايتي ھاو پرسا زووا ڪروھ. پڻ تمون نئھ پڳوون پرسو نئين ڏيکارئھ، تمون نئھ روڳو ايوو نيشون ڏيکارشي، جيوو پڳوون رو نياپو ڏيڏا وارا يوناه رو نيشون. ④0 ڪم تو جيوئھ نمونئھ يوناه ترڻ ڏي موٽي مسي را پيت موئين هتو، هيوئھ نمونئھ هون منڪ ذات رو ڏيڪرو ترڻ ڏي مقوم موئين هوئھ.“

④1 پڳوون رئھ نيا ڪريا رئھ ڏي، نينوا شهر را منڪ ايٺا زمونا رون منڪون پيڙا اونشي، ان ايئون نئھ ڏوهاري ڪرشي، ڪم تو اوئي يوناه رو نياپو هومپڙين آپرا ڪراپ ڪوم ساڏين توپونھ ڪري ٿي ان پڳوون ري وات مانھ وودا تا. ان هون تمون هومو يوناه ٿي موٽو سون، توئي پڻ تمي مارو نياپو هومپڙين آپرا ڪراپ ڪوم ساڏين توپونھ نٿي ڪرتا ان پڳوون ري وات مانھ نٿي ویتا.

④2 پڳوون رئھ نيا ڪريا رئھ ڏي، ڏڪٿاڏليا ملڪ رئي روٿي ايٺا زمونا رون منڪون پيڙي اونشي ان ايئون نئھ ڏوهاري ڪرشي، ڪم تو او آپر سليمون پادشا ري عقل ري واتون هومپڙوا گهٽا شيتا هون اوئي ٿي. ان هون تمون هومو سليمون ٿي پڻ موٽو سون، توئي پڻ تمي ماري واتون هومپڙوا نٿي آوتا.“

پوت سونتل منک رو مثال

جيو آپري کراب سوچ نئين ٻڌل، اوتارئي حالت هاو کراب ٿيشي

(متي 43:12-45، لوقا 24:11-26)

④٤ ”زئون ڪياڪ منک ٿي پوت نيھري زائھ، تئون پوت هونواڙ موئين ايل اول زائين ايوي جگا ڳوتھ جيئھ او آروم ڪري هيڪئھ، پڻ اوتار نئھ ايوي جگا نئي زڙتئي. ④٤ تئون پوت ام ڪئھ: ’هون وڙي پاسو آپري گھري اوتار منک ۾ زائھ، جيئون هون نيھريو تو.‘ اوتھ پوڳين زوئھ، تو او منک اوتار نئھ وڙي سونتيا جيوو سئھ، زوئھ گھر جيو نالو هونھ جيا ۾ پوتارو ڪاڍل هونھ ان ريا هارو ٻڌوي ڪئين تيار هونھ. ④٥ تئون زائين آپ ٿي پڻ پونڌا هات پوت تيڙي اوئھ، ان ٻڌائي اوتار منک نئھ سونتين موئين رھ. نيٺ اوتار رئي حالت اڳي ٿي گھٽي کراب ٿي زائھ. هيونھ نمونھ ايٿا زمونا رون پونڌون منکون رئي حالت هيوي کراب ٿيشي.“

جيا پڳوون ري وات مانھ وئھ

او ايسونھ مان ان پايون را زم پريمي سئھ

(متي 46:12-50، مرقس 31:3-35، لوقا 19:8-21)

④٦ ايسو هزون اوئون گھٽون منکون ٿي ٻولتوت ريو، تئون اوچتا اوتار رئي مان ان پائي آيا، ان گھر ٿي ٻارا اوپين اوتار ٿي وات ڪروا ڪرتا تا. ④٧ ڪيٽڪ ايسونھ ڪيڏو: ”زوئو، تماري مان ان پائي ٻارا اوپاھ. او تمون ٿي وات ڪروا ڪرھ.“ ④٨ پڻ ايسو اوتار نئھ ڪيڏو: ”ڪوڻ مارئي مان سئھ، ان ڪوڻ مارا پائي سئھ؟“ ④٩ ان پسئھ آپرون شيلون هومو هات ٿي اشارو ڪرين ڪيڏو: ”زوئو، ماري مان ان مارون پايون جيوا تو اي سئھ. ⑤٠ ڪم تو جيا پڻ مارا آڪاشي ٻاپ پڳوون ري مرضي مانھ وئھ، او مارا پائي، ماري پين، ان ماري مان را زم سئھ.“

پيز وايا واڙا رو مثال

(متي 9-1:13، مرقس 9-1:4، لوقا 8-4:8)

13 ① اُوئِه ئي ڏي ايسو گهر ٿي نيهرين ڍنڍ را ڪپ مانھ زائين منڪون نئھ شيڪاڙيا ھارو پينو. ② ان اتا گھڻا منڪ ايسو ڪن آوين پيڙا ٿيا، جي او شيڪاڙيا ھارو پيڙي موئين سترين پينو نو، ان ٻڌائي منڪ ڍنڍ را ڪپ مانھ اُپيا ريا. ③ ان ايسو اوئون نئھ مثال ڏين گھڻي واتون ھزماووا مڏيو. اُوئھ اي مثال رئي وات پڻ ھمپڙاوي: ”ھيڪ ھاري ھتو. ان او پيز واووا گيو. ④ زئيون پيز واوتوت ريو، تو پيز را ڪئينڪ ڏوٽا شيرڙا مانھ پڙيا، ان پڪي آوين او ڪائي گيا. ⑤ ان ڪئينڪ پيز را ڏوٽا پتر واري زمي موئين پڙيا، جيئھ گھڻي ماتئي نئي. ان ماتئي گھٽ ھويا ري ڪري او جلدِي اوگيا.



⑥ پڻ زئيون ڏي اوگيو، تو اوئون نئھ تڙڪو لاگيو، ان او ھوڪائي گيا، ڪم تو اوئون ري پاڙون اونڌي نتي. ⑦ ان ڪئينڪ پيز را ڏوٽا ڪنديرون واري زمي موئين پڙيا، ان ڪنديرا موٽا ٿيا ان اوئون نئھ ڏپويا پرا. ⑧ پڻ ڪئينڪ پيز را ڏوٽا پلي زمي ۾ پڙيا، ان ايوا پلا ٿيا جي ڪيونڪ ھرون موئين ھو، ڪيونڪ ھرون موئين ھائين ان ڪيونڪ ھرون موئين ٿيھ ڏوٽا ٿيا.

⑨ ھائي ڪين ايسو ام ڪيڏو: ”ھومپڙيا واڙون، تمي باري وات مانھ ڏيون ڏيو.“

ايسو ھزماوئھ جي او مثالون ٿي ڪم شيڪاڙئھ

(متي 10:13-17، مرقس 10:4-12، لوقا 9:8-10)

⑩ سئھ شيلا ايسو ڪن آبا ان اوئا ٿي، نونسيو: ”تم، ايئون نئھ مثال ڏين ڪم

شڪاڙوھ؟“ ⑪ تو ايسو ائون نئ وڙندئي ڏيڏئي: ”ايشور را راز ري اونڌي واتون اوئ تمون شيلون نئ هزموا ڏيڏيھ، پڻ ايئون منكون نئ هزموا نئي ڏيڏي. ⑫ ڪم تو جيو منڪ وچن مونئھ، پڳوون اوئا نئ وچن هزميا رئي وڌارئ گهڻئي هيئت ڏيشي. پڻ جيو منڪ وچن نئي مونئو، جيو وچن اوئ هومپڙيوھ، او وچن هزميا رئي هيئت پڻ اوئا ڪن ٿي ڪوھراشي. ⑬ تيام هون ايئون منكون نئ مثال ڏين شڪاڙونھ، ڪم تو اي زوئھ پڻ ڏيڪتا نئي، ان هومپڙھ پڻ نڪو ڏيون ڏئھ نڪو هزمئھ. ⑭ هيوئ نمونئ پڳوون رئي اي وات ايئون مانھ پورئي تئھ، جيئي وات اوئ آپرو نياپو ڏيڏا واڙا يسعياھ ٿي ڪيورائي ٿي:

’اي هومپڙشي تو ڪري پڻ هزمشي ٿي نئين،

ان اي زوشي تو ڪري پڻ ڏيڪشي ٿي نئين.

⑮ ڪم تو ايئا قوم را منڪ پڳوون رئي وات مونوا نئي ڪرتا،

ايئي زوئھ ڪونون آڏي اونگڙي ڏين هومپڙيوھ،

ان زوئھ اونڪيون ميشين زويوھ.

جي اي هيو نه ٿئ، تو آپري اونڪيئي ڏيڪت

ان آپري ڪوني هومپڙت

ان آپرا من ٿي هزمئ

ان وڙي مون هوما ڦرئ

ان هون ايئون نئ تارڻ ڏئ.

⑯ پڻ پاڳواڙا تمي سو، ڪم تو تمي مارا ڪوم اونڪيئي ڏيڪوھ، ان ماري

واتون ڪوني هومپڙوھ. ⑰ ڪم تو هون تمون نئ هاس ڪونھ جي گهڻا پڳوون

رو نياپو ڏيڏا واڙا ان گهڻا پڳوون ري وات مانھ وڍا واڙا اي ڪوم زويا هارو

هڪيا، جيا تم ڏيڪوھ ريا، پڻ اوئي تو نه ڏيڪيا. ان او اي واتون هومپڙيا هارو

هڪيا، جي تم ھومپڙوھ ريا، پڻ اوئي تو نه هومپڙي.“

ايسٽو پيز وايا واڙا را مثال رو مطلب هزماوئھ

(متي 18:13-23، مرقس 13:4-20، لوقا 11:8-15)

⑱ "تيام تمی ڏيون ٿي هومپڙو، ان هون تمون نئه هزماويھ جي پيز وايا واڙا را مثال رو مطلب ڪي سئھ. ⑲ پيز وايا رئه توئئھ جيا ڏوٽا شيرڙا مانھ پڙيا تا، او ايون منڪون رو مثال سئھ جيا ايشور را راز را پارام وچن هومپڙھ، پڻ ھايا وچن نئه هزمتا نٿي. تو پئسئ پوندو شيطون ايون منڪون ڪن آوئھ ان اوئون را من ٿي او وچن ڪاڍي لئھ، جيو زوئئھ اوئون را من ۾ واول هتو، زم اوئون نئه وچن ويھري زائھ.

⑳ جيا ڏوٽا پتر واڙي زمي موئين پڙيا تا، او ايون منڪون رو مثال سئھ جيا وچن هومپڙھ ان جلدِي م ڪشي ٿي اوٽا وچن نئه موني لئھ. ㉑ پڻ زم مثال موئين اوئون ڏوئون ري پاڙون اونڌي نٿي، تم اوئون منڪون رو يقين پڪو نٿي. تيام توڙيڪ وار يقين راکئھ، پڻ زئون وچن مونيا ري ڪري تڪليپ آوئھ ڪا منڪ اوئون نئه تنگ ڪرئھ، تيون يڪدم او وشواس ساڏئھ پرو.

㉒ جيا ڏوٽا ڪنديرون واڙي زمي موئين پڙيا تا، او ايون منڪون رو مثال سئھ جيا وچن هومپڙھ پڻ پئسئ هٿيون هٿيون حياتي ريون گڻتيون ۾ ان مال ملڳت ري لالچ ۾ پڙي زائھ، ان وچن هومپڙيا ٿي اوئون رو يقين وڌتو نٿي. ان زم ايون ڏوئون ٿي هرا نٿا ٿيا، تم اوئون منڪون ٿي نائوڪا ڪوم نٿي ٿيٿا.

㉓ پڻ جيا ڏوٽا پلي زمي موئين پڙيا تا، او ايون منڪون رو مثال سئھ جيا وچن هومپڙھ ان اوٽا نئه هزمئھ. ان زم اوئون ڏوئون ٿي هرا پاڪيا تا، ان هر هرا موئين هو، ڪا هائيٽ ڪا ٿيھ ڏوٽا ٿيا تا، تم او منڪ وچن هومپڙيا ري ڪري گھڻا نائوڪا ڪوم ڪرئھ.

ڪٽڪ ۾ ڪارو ڪٽڙ واپا رو مثال

②4 ايسُو اُوئون نئه اي پيزئي مثال رئي وات پڻ همپزاوئي: ”ايشور رو راز ايئا را زم سئه. هيڪ منڪ هتو. اُوئه آپرا ڪيتر موئين ڪٽڪ رو نائوڪو پيز وايو. ②5 پڻ هيڪ رات، زئيون ٻڌائي منڪ اُونگهائي ڳيا تا، اُوئا منڪ رو دشمن آيو ان اُوئا ري پوڪل ڪٽڪ ۾ ڪارا ڪٽڙ رو پيز وارين ڳيو پرو. ②6 زئيون ڪٽڪ موئين هرا ٿيا، تئيون ڪپر پڙئي جي ڪارو ڪٽڙ پڻ ڪٽڪ پيزو سئه. ②7 تو ڏئي ري نوڪري اُوئا ڪن آوين ڪيڏو: ’ساب، تمي تو آپرا ڪيتر ۾ نائوڪو پيز وايو تو، نا؟ پڻ هُوئه تمارا ڪيتر ۾ ڪارو ڪٽڙ پڻ سئه. هائي ڪارو ڪٽڙ ڪيئون آيوه؟‘ ②8 تو ڏئي اُوئون نئه وڙندي ڏيڏئي: ’هائي مارا دشمن رو ڪوم سئه.‘ پسئه نوڪري اُوئا ٿي پونسيو: ’تماري مرضي ڪي سئه؟ امي زائين ڪارو ڪٽڙ اُوڪاڙين ڪاڍون پرو، ڪا نا؟‘ ②9 پڻ اُوئه ڪيڏو: ’نا. ام نه تئه جي تمارئه ڪارو ڪٽڙ اُوڪاڙتون ڪٽڪ پڻ پيزئي اُوڪڙي اُوئه. ③0 ڪارا ڪٽڙ نئه ڪٽڪ پيزو لبارا هُوڏي وڌوا ڏيو، ان لبارا رئه توئئه هون لٿيا وازون نئه ڪيھ جي لبارو ڪرتون مور ٿي ڪارو ڪٽڙ پيزو ڪرئه ان اُوئا را ڳڏا پوندين اُوئا نئه ٻاڙئه پرو، ان پسئه ڪٽڪ پيزئي ڪرين مارا گهڏوم ۾ راڪئه.‘

ٿوريا را پيز رو مثال

پڳوون را راز را منڪ الاهي گهڻا تيشي

(متي 31:13-32، مرقس 30:4-32، لوقا 18:13-19)

③1 ايسُو اُوئون نئه مثال رئي پيزئي وات پڻ همپزاوئي. اُوئه ڪيڏو: ”ايشور رو راز ٿوريا را پيز را زم سئه، جيا نئه هيڪئ منڪ لين آپرا ڪيتر موئين پوڪيو. ③2 ٿوريا رو پيز تو پازيون رون ٻڌون قسمون را پيز ٿي جهيٽڪو هُوئه، پڻ زئيون اُوڳئه، تئيون پازيون ۾ ٻڌون ٿي موٽو تئه، ان اُو زهاڙڪو تئه. ان پڪي آوين اُوئا ريون ڏاڙڪيون موئين، ماڙا ناوئه.“

مونھزل ڪاتا آتا رو مثال يڳوونَ را راز رو اثر ٻڌيل پڪڙشي

(متي 33:13، لوقا 20:13-21)

③③ ايسو اوتون نئه اي پيڙئي مثال رئي وات پڻ همپڙاوي: ”ايشور رو راز مونھزل ڪاتا آتا را زم سئه، جيا نئه هيڪي ڏوشي توڙڪوڪ لين ڊيل روتي نايا هارو اڌ من مونھزل آتا موئين پيڙويو. ان نيٺ اوٽا رو اثر ٻڌا آتا ۾ پڪڙي گيو.“

ايسو مثال دين يڳوونَ ري هٽال واتون هزماوئھ

(متي 34:13-35، مرقس 33:4-34)

③④ ايسو مثال دين هائي ٻڌي واتون اوتون ٻڌون منڪون نئه هزماوي، ان او مثالون وگر اوتون ٿي ڪئين وات نه ڪرتو. ③⑤ هيوئه نمونئه يڳوونَ رو نياپو ڏيڌا واڙا رئي ڪيڌل اي وات ايسو مانھ پورئي ٿئي:

”هون مثال دين ٻوليھ ان ايوي واتون همپڙاويھ
جي دنيا ري شروع ٿي لين هٽال هتي.“

ايسو اپرون شيلون نئه

ڪارا ڪڙ را مثال رو مطلب هزماوئھ

③⑥ ٿيون ايسو اوتون گهٽون منڪون نئه ساڌين گهري گيو. تو اوٽا را شيلا اوٽا ڪن آيا ان اوٽا ٿي پونسيو: ”امون نئه هزماوو جي ڪيتر ۾ ڪارا ڪڙ را مثال رو مطلب ڪي سئه؟“ ③⑦ تو ايسو وڙندئي ڏيڌئي: ”ٿاٽوڪو پيز وايا واڙو هون منڪ ذات رو ڏيڪرو سون. ③⑧ ڪيتر ايٿا دنيا رو مثال سئه. ٿاٽوڪو پيز اوتون منڪون رو مثال سئه جيا ايشور را راز پرموئھ وئھ. ان ڪارو ڪڙ اوتون منڪون رو مثال سئه جيا پونڌا شيطون ري مرضي پرموئھ وئھ. ③⑨ او دشمن جيئھ ڪارا ڪڙ رو

پيز وايو، او شيطون رو مثال سئ. لبارا رو ډي دنيا ري پچاڙي را توښا رو مثال سئ. ان لثيا واڙا آكاشي ډوتون رو مثال سئ. ④۰ تيام زم مثال ۾ كارو كټ پيو ڪرين ڏيوتا ۾ ٻاڙه، همروم دنيا ري پچاڙي رڻه توڻه پڻ شيطون ري مرضي مانه وودا واڙون نئ هميش رڻي سزا زڙشي. ④۱ اوڻه توڻه هون منڪ ذات رو ڏيڪرو آپرون آكاشي ډوتون نئ ميلي. ان او مارا راز موئين ٿي اوڻون ٻڌون منڪون نئ پيڙا ڪرشي، جيون ري ڪري منڪ ڏوه ۾ پڙه ان جيا پگهون رون حڪمون رڻه ڪلاف وڻه، ④۲ ان اوڻون نئ او پاهي ري پني ۾ ڦهڙشي پرا. اوڻه او روشي ان ڏونت گهرڙيا ڪرشي. ④۳ تيون پگهون ري وات مانه وودا واڙا منڪ آپرا ٻاپ پگهون را راز موئين زبڪتا سوجهرا ۾ ډي را زم ساوا ٿيشي. هومپڙيا واڙون، تمې ماري وات مانه ڏيون ڏيو!

هٽاڙل ملڳت رو ان قيمتي موتي رو مثال تارڻ ليدا هارو ٻڌوئي ڪئين ساڏيا هارو تيار ريوو

④۴ ”ايشور رو راز ڪيتر ۾ هٽاڙل ملڳت را زم سئ. او ملڳت ڪياڪ منڪ نئ زڙي. ان اوڻه منڪ ملڳت وڙي اوڻ رڻي اوڻ هٽاڙي پري. ان پسئ او هيا ملڳت مانه اتو ڪش ٿيو جي اوڻه زائين آپرو ٻڌوئي ڪئين ويسيو پرو، ان اوڻا ڪيتر نئ ويساتو ليدو رو.

④۵ ايشور رو راز وڙي ايڻا را زم سئ. هيڪ واپاري هتو، جيو نائوڪون موتيون ري گوت ۾ هتو. ④۶ اوڻا نئ هيڪ هاو قيمتي موتي زڙيو، تو اوڻه زائين آپرو ٻڌوئي ڪئين ويسيو پرو، ان او موتي ويساتو ليدو.

رچ رو مثال نيا را ډي را پارام

④۷ ”ايشور رو راز وڙي هيڪا رچ را زم سئ، جيا نئ منڪي ڍنڍ ۾ نوڪيو، ان

اُوئا ۾ هر نمونا ري مشي آوين ڦاڻي. (48) زئيون رڇ پرائي گيو، تو مشي ماري اوازي اُوئا نئه ڍنڍ را ڪپ مانھ توڻيو ان اُوڻئ پيهين مشيون نئه ڌار ڪري. نائوڪي مشي اُوئي ڇهون ۾ ميلي، پڻ ڪراپ مشي اُوئي هيڪل ڦڳوڙي پري. (49) هيوئ نمونئ ڏنيا ري پڇاڙي رئه توڻئ پڻ همروم ٿيشي. آڪاشي ڏوت ٻڌيل زاشي ان ڪراپ منڪون نئه پڳوون ري وات مانھ وُڍا واڙون منڪون ٿي ڌار ڪرشي، (50) ان اُوئون نئه پاھي ري پني ۾ ڦڳوڙشي پرا. اُوڻئ اُو روشي ان ڏونت گهرڙيا ڪرشي.

(51) تئيون ايسو اپرون شيلون ٿي پونسيو: ”ڪي تمي هائي ٻڌي واتون هڙموھ ريا؟“ تو شيلي اُوئا نئه ڪيڏو: ”هوئ، امي هڙمونھ ريا.“ (52) تو ايسو اُوئون نئه ڪيڏو: ”تيام هر منڪ جيو شاستر زوڻئ، ان جيئئ مارو شيلو ٿين ايشور را راز ري واتون شيڪيھ، اُو گهر را هڪا ڏئي را زم سئ، جيو آپرا ڪزونا موئين ٿي زوني ان نوي شينھون ٻي ئي ڪاڍئ.“

ايسو را آپرا ناصرت شهر را منڪ اُوئا نئه گهٽ زوڻئھ

(متي 53:13-58، مرقس 6:1-6، لوقا 4:16-30)

(53) زئيون ايسو هائي مثال ري واتون همپڙاوي ريو، تئيون اُوئون روونو ٿيو. (54) ان پاسو آپرا شهر ۾ آوين اوت رون منڪون نئه پڳوون را منڌر موئين شيڪاڙيا. تيا مانھ اُو حيروني پڙيا ان ڪيا مڌيا: ”ايئا نئه ايوئي عقل ان پرسا ڏيڪاڙيا رئي ڪڙا ڪيئون زڙيھ؟“ (55) اي تو واڍا رو ڏيڪرو نٿي، ڪي؟ ايئا ري مان رو نوم ماريون سئ، ان يعقوب، يوسف، شمعون، ان يهوداه ايئا را پائي سئ، نا؟ (56) ان ايئا ري ٻڌي بينون ايئئ رئھ. تو پسئ ايئا نئه اي ٻڌي واتون ڪيئون زڙيھ؟“ (57) تيام اُوئي ايسو نئه گهٽ زوڻين اُوئا مانھ يقين نه ڪريو.

پڻ ايسو اُوئون نئه ڪيڏو: ”پڳوون رو نياپو ڏيڏا واڙا رو مون روڳو آپرا شهر ۾ ان آپرا گهر ۾ نٿي هوتو.“

⑤8 تيام اُوئون رٺه يقينَ نه ڪريا ري ڪري ايسو اُوٺه گهٽا پرسا نه
ڏيڪاڙيا.

هيروديس پادشا ايسو ري ڪري ڳڻتيون موئين پڙي زائھ

(متي 1:14-12، مرقس 6:14-29، لوقا 9:7-9)

14 ① اُوئون ڏيئون ۾ گليل صوپا مانھ راز ڪريا واڙه، هيروديس پادشا،
ايسو رٺي نوموش هومپڙي. ② تو اُوٺه آپرون وزيرون نه ڪيڏو: ”هائي
منڪ يوحنا پويتر سنون ڏيڏا واڙو سٺه. پڳوون اُوٺا نه موت ٿي وڙي جيوتو
ڪريوه، ان تيام اُوٺا ۾ هائي پرسا ڏيڪاڙيا رٺي ڪڙا سٺه.“
③ هيروديس پادشا هائي وات تيام ڪيڏي، ڪم تو اُوٺه آپ يوحنا نه
زهلايو تو ان ٻنداوين جيل موئين پورايو تو. اُوٺه هائي ڪوم آپرا پائي فلپس
ري ڏوشي هيرودياس ري ڪري ڪريو تو، جيا نه اُوٺه آپرا گهر ۾ راڪئي ٿي.
④ ڪم تو يوحنا هيروديس پادشا نه گهٽي وار ڪيڏو تو جي ”پڳوون رون
حڪمون پرموٽه ٺيڪ ٿي جي تمي آپرا پائي ري ڏوشي نه آپرا گهر ۾ راڪوه.“
⑤ تيام هيروديس پادشا يوحنا نه مراووا ڪرتو تو، پڻ او آپرا راز رون منڪون
ٿي پيٽاتو تو، ڪم تو گهٽا منڪ يوحنا نه پڳوون رو نياپو ڏيڏا واڙو هڙمتا.
⑥ پڻ زئيون هيروديس پادشا را زلم رو ڏي آيو، تئيون هايا ڏوشي هيرودياس
رٺي ڏيڪرئي ڏاوتيون هومئي رمئي. سوڪري ري رمت مانھ هيروديس پادشا
اتو ڪش ٿيو، ⑦ جي اُوٺه سوڪري نه هون ڪائين وسن ڏيڏو: ”جئين ڪئين ٿون
مونگيه، او هون ٿون نه ڏيه.“ ⑧ تو سوڪري آپري مان را شيڪاڙيا پرموٽه
ڪيڏو: ”مون نه همٽه ايت رو ايت يوحنا پويتر سنون ڏيڏا واڙا رو ماتو ٿاڙ ۾
اوٽي ڏيو!“

⑨ هائي هومپڙين هيروديس پادشا نه الاهي گهٽو ڏک ٿيو. پڻ ڪم تو اُوٺه
ڏاوتيون هومو هون ڪائين وائڏو ڪريو تو، تيام اُوٺه حڪم ڏيڏو جي يوحنا رو

ماٿو سوکري نئه اوٿي ڏئه. ⑩ ان منک ميلين اُوئه يوحنا رو ماٿو جيل ۾ وڊايو پرو. ⑪ پسئه اُو منک يوحنا رو ماٿو تار ۾ ميلين لي آيو ان سوکري نئه ڏيڌو، ان سوکري اُو لين آپري مان نئه ڏيڌو. ⑫ تئون يوحنا ري شيلي آوين اُوئا رو لاش ليڌو رو ان اُوئا نئه پوريو پرو. ان پسئه زائين ايسو نئه هيا را پارام هميڙايو.

ايسو ڌاريون قومون رون ملڪون ۾ زائين يڳوون رو کوم ڪرئھ

ايسو پونس هزار ٿي وڌارء منڪون نئه روتئي ڪوراوئھ

(متي 13:14-21، مرقس 6:30-44، لوقا 9:10-17، يوحنا 1:6-14)

⑬ زئون ايسو يوحنا را موت را پارام هومپڙيو، تئون اوئون زائين پيڙي موئين سڙين هونواڙ ۾ شيلون پيڙو نوڪلائي ۾ گيو پرو. پڻ ايئا وات را پارام هومپڙين الاهي گهڻا منڪ شهرون موئين ٿي نيهرين اُوئا وونهڙ پند رونا ٿي گيا. ⑭ زئون ايسو ڍنڍ را ڪپ مانھ پيڙي ٿي اوتريو، تو اُوئه الاهي گهڻون منڪون نئه ڏيڪيا، ان اُوئا نئه اوئون مانھ قياس آيو. ان اوئون موئين جيا منڪ مونڊا هتا، اوئون نئه هازا هورا ڪريا پرا.

⑮ زئون هونز ٿئي، تو ايسو را شيلا اُوئا ڪن آيا ان ڪيڌو: ”ايتئه آبي هونواڙ ۾ سون، ان رات پڙيا واڙي سئه. ٻڌون منڪون نئه موڪل ڏيو، زم اُو پاڙون موئين زائين آپ هارو ڪاڌو ويساتو لين ڪائھ.“

⑯ پڻ ايسو شيلون نئه ڪيڌو: ”ايئون رئه زايا رئي ضرورت نٿي. ايئون نئه



ڪاڌا رو تمڙي ڏيو!“ ⑰ تو اوئي ايسو نئه ڪيڌو: ”امون ڪن روگي پونس روتي ان ٻي مشي سئه. پيڙو ڪئين نٿي.“ ⑱ تو ايسو ڪيڌو: ”هائي مون

ڪن لي آو! ”

①9 تڏيئون ايسو ٻڌون منڪون نٿه سڀر مانھ ٻيٺا رو ڪيڏو. ان اُوڻه پونس روڻي ان ٻي مڻي پري لين آڪاش هومو زويو ان اُوڻون هارو پڳوون رو ٿورو مونيو. ان پسڻه اُوڻه روڻيون نٿه پونگين شيلون نٿه ڏيڏي، ان شيلو ٻڌون منڪون نٿه ڏيڏا ڳيا. ②0 ٻڌائي ڪائين ڍاڀيا. ان زتا ٽڪرا اوڳاريا تا، اُوڻون نٿه شيلي پيڙا ڪريا ان اُوڻون را ٻارڻه ڇڏا پريا. ②1 جيڻي روڻي ڪاڏي، او اندازام ڏوشيون ان ٻارون شوا پونسڪ هزار آدمي هتا.

ايسو پوڻي مانھ وڻھ

(متي 22:14-33، مرقس 45:6-52، يوحنا 16:6-21)

②2 تيا ڪيڙ ايسو يڪدم آڀرون شيلون نٿه ڪيڏو: ”تمي ٻيڙي مانھ سڙين مون مور ڍنڍ رڻه پيڙه ڪپ زائو پرا، ان هون ايئون ٻڌون منڪون نٿه روونا ڪرونه.“ ان شيلو مونڏا روونا ٿيا. ②3 ايسو منڪون نٿه روونا ڪرين آپ نوڪلائي ۾ ڏونگر مانھ پراڻا ڪروا ڳيو. زئيون رات پڙي، تو ايسو اُوڻه هڪلو هتو.

②4 اُوڻه ٿوڻه ٻيڙي ڍنڍ را ڪپ ٿي گهڻي شيتي نيھري ڳئي ٿي، ان چوليون ٿي گهڻا لوڏا ڪاڻيٽ رڻي، ڪم تو وائيو هومو هتو. ②5 رات رو اسور رڻه ٿوڻه ايسو پوڻي مانھ ويتون اُوڻون ڪن آيو. ②6 زئيون شيلي اُوڻا نٿه پوڻي مانھ ويتون ڏيڪيو، تو گهڻا پيڻائي ڳيا، ان ڪيو مڏيا جي ”اي تو پوت سڻ.“ ان پيڪ ۾ رڙيون ڪروا مڏيا. ②7 تڏيئون ايسو يڪدم اُوڻون نٿه ڪيڏو: ”هيمت مت هارو، هون سون. تمي مت پيڻائو.“ ②8 تيا مانھ پطرس ڪيڏو: ”او پريو، جي تمي سو، تو مون نٿه تمون ڪن پوڻي مانھ وڍا رو ڪو.“ ②9 تو ايسو ڪيڏو: ”آرو!“ ان پطرس ٻيڙي ٿي اوترين پوڻي مانھ وين ايسو ڪن زاوا مڏيو. ③0 پڻ زئيون اُوڻه وائيرا رو گهڻو زور ڏيڪيو، تو او پيڻائي ڳيو، ان ٻوڏوا مڏيو. تڏيئون اُوڻه رڙيون ڪرين ڪيڏو: ”او پريو، مون نٿه پڇاوو!“ ③1 تو ايسو هٿيڪو هات

لونهو ڪرين اُوٽا نئه زهالي ليدو، ان اُوٽا نئه ڪيڏو: ”تئين گهٽ يقين ڪم راکيو؟ ان شڪ ڪم ڪريو؟“ (32) زئيون ايسو ان پطرس ٻي ئي ٻيڙي موئين سڙي ٿيا، تئين وائيو پنڌ تي گيو. (33) پسئ جيا شيلا ٻيڙي ۾ هئا، اُوئي ايسو ري پڳي پڙين اُوٽا رئي پوزا ڪري، ان ڪيڏو: ”هاس ۾ تمي پڳوون را ڏيڪرا سو.“

ايسو گليل صويا موئين گنيسرت را علاقا ۾

مونڏون نئه هازا هورا ڪرئ

(متي 14:34-36، مرقس 6:53-56)

(34) ڏند موئين مئين ايسو ان اُوٽا را شيلا گنيسرت را علاقا ۾ آيا. (35) اوت ري منڪي ايسو نئه اوڙڪين آهئ پاهئ پورا علاقا ۾ ايسو را آيا رئي وات همپڙاوي، ان منڪ ٻڌون مونڏون نئه ايسو ڪن تيڙي آيا. (36) او ايسو نئه منٺ ڪرتا تا جي او روڳو اوئون نئه آپرا لوگهڙا را شيڙا نئه سٻوا ڏئ. ان زتا منڪ سٻيا، او ٻڌائي هازا هورا تي ٿيا.

پڳوون رون حڪمون مانه ويو

ريتون روازون مانه وودا تي ضروري سئ

(متي 15:1-9، مرقس 7:1-13)

15 (1) تئين يروشلم شهر تي ڪئينڪ فريسي پالتي را منڪ ان ڪئينڪ شاستر زوٽيا وارا ايسو ڪن آيا، ان آوين ڪيڏو: (2) ”ٿارا شيلا آپئون ڏاڏون ريون ريتون روازون مانه ڪم نئي وينا؟ ڪم تو او روئي ڪاڏا تي مور ريت پرموئنه هات نئي ڏوتا.“ (3) تيا مانه ايسو اوئون منڪون نئه ڪيڏو: ”تمي آپريون ريتون روازون مانه وودا هارو پڳوون رون حڪمون نئه ڪم توڙوه؟“ (4) ڪم تو پڳوون ڪيڏوه: ’آپرا مان ٻاپ رو مون راکوو، ان جيو آپرا مان ٻاپ نئه پئنه، اُوٽا نئه موت رئي سزا ڏيوو.‘ (5) پڻ تمي منڪون نئه ام شيڪاروه:

جي ڪوئي آپرا مان ٻاڀ نٿو اي ڪٿڻ: جيئي شينھ مارئو ڦرض ڀرموئو ٿمڻ
 نٿو ڏيوو ٿو، هائي ٿو ڀڳوون نٿو منل سٿ، ⑥ ٿو او اوئون رئي مدت ڪريا ٿي
 سوئل سٿ. ⑦ هيا رو مطلب سٿ، پلئو او آپرا مان ٻاڀ رو مون نه راکٿو. هم
 شيڪاڙيا ٿي ٿمي آپريون ريتون روازون مانھ وودا هارو ڀڳوون رو حڪم ٿوڙوھ.
 ⑦ ڪوئون منڪون، ٿمي مونڊا را مينا پڻ اندر را ڪارا سو. جيئي وات ڀڳوون رو
 نياپو ڏيڏا وارو يسعياھ ڪيڏي ٿي، ڀڳوون رئي اي وات ٿمڻ مانھ پڻ هاو
 پوري اوترئو:

⑧ ايئا قومز را منڪ مونڊا ٿي ٿو مارا وڪوڻ ڪرئو،

پڻ ايئون را من ڀر مون هارو ڪئين نٿي.

⑨ او مارئي نالئي پوزا ڪرئو،

ڪم ٿو او ماريون واتون را ڀڏلا ڀر

روڳا منڪون را ناول حڪم شيڪاڙئو. ”

ايسو شيڪاڙئو جي منڪ شينھون ڪاڏا ٿي نئين

پڻ من ڀر ڪراڀ واتون راکيا ٿي ڪراڀ ٿي زائھ

(متي 10:15-20، مرقس 7:14-23)

⑩ ٿيون ايسو اوئو اوپل ٻڌون منڪون نٿو آپ ڪن تيڙاوين اوئون نٿو ڪيڏو:
 ”مارئي وات ڪون ڏين هومپڙو ان هزموا! ⑪ جي پڻ شينھون منڪ ڪائو، اوئون
 ٿي منڪ ڪراڀ نٿي ٿيڻو. پڻ جي واتون منڪ را مونڊا ٿي نيهرئو، اوئون ٿي
 منڪ ڪراڀ ٿي زائھ.“

⑫ ٿيون ايسو ري شيلي اوئا ڪن آوين پونسو: ”ڪي ٿمڻ نٿو ڪڀر سٿ،
 جي فريسي پالتي ري منڪي تماري وات هومپڙيھ، ان اوئون نٿو گهڻي ڏوري
 لاڳيھ؟“ ⑬ تيا مانھ ايسو ڪيڏو: ”هيو منڪ ڀڳوون را پاها را نٿي. او زوئو
 زهاڙڪا سٿ جيا ڀڳوون را پوڪل نٿي. جيو پڻ زهاڙڪو مارئو آڪاشي ٻاڀ ڀڳوون


نٿي پوڪيو، پڳوونَ اُوڻا نٿه ضرور اُوکاڙشي پرو. ⑭ تيام هايون نٿه ساڏو. اُو اوندَا آڳيون سٿه. اوندو اوندَا نٿه پادينَ ويشي، تو هي ئي کاڌ ۾ پڙشي.

⑮ تيا مانه پطرس اُوڻا نٿه ڪيڏو: ”منكون رٿه ڪراپ ٿيا را پارام جيئي مثال رٿي وات تمي همپڙاويئي، امون نٿه اُوڻا رو مطلب هزماوو.“ ⑯ تو ايسو ڪيڏو: ”تمي پيزون را زم هزون هُوڏي نٿي هزمتا، ڪي؟ ⑰ تمون نٿه اٿئي پڻ ڪبر نٿي پڙتئي، ڪي؟ جيئي پڻ شينھ منڪ ڪاڻھ اُو تو پيٽ موئين زائھ، ان اُوڻون نيٺ ٻارئي نيھرئھ. ⑱ پڻ جي واتون مونڊا ٿي نيھرئھ، اُو تو من ٿي آئھ. ان هائي واتون منڪون نٿه ڪراپ ڪرئھ. ⑲ ڪم تو ڪراپ ڪيال، ڪون، پوندو ڪوم، پوندائي، سورئي، ڪوڙئي هاڪ، ان ڳلا، هائي ٻڌي واتون من ٿي آئھ. ⑳ هائي اُو واتون سٿه، جي منڪون نٿه ڪراپ ڪرئھ پرا. هات ڌويا وڳر کاڌا ٿي منڪ ڪراپ نٿي ٿيٿا.“

ڌاري قوم رٿي هيڪ اشيتري ايسو مانھ يقين ڪرئھ

(متي 21:15-28، مرقس 11:27-32)

① ايسو اُوڻون زائينَ صُور ان صيدا شھرون را علاقا هومو ڳيو. ② ان اوت رٿي ڪنعاني قوم رٿي هيڪ ڏوشي ايسو ڪن آويي ان وڙي وڙين زور ٿي ڪيا



مڏئي: ”او پريو، او دائود پادشا را وستار، مون مانه ڏيا ڪرو! ماري ڏيڪري
 نه پوت سونتل سٺه ان او گهڻي تڪليپ ۾ سٺه.“ (23) پڻ ايسو اوتا ڏوشي نه
 ڪئين وڙندئي نه ڏيڏئي. تئين ايسو را شيلا اوتا ڪن آيا ان منت ڪرين ڪيا
 مڏيا: ”ايئا نه رويني ڪرو، ڪم تو اي رڙيون ڪرتئي آپون وونهڙ اوئو رئي.“
 (24) تيا مانه ايسو ڪيڏو: ”پڳوون مون نه روڳو اسرائيلي قوم رون منڪون هارو
 ميليوه، جيا گمال رديون را زم پولاڻي گياھ.“ (25) پڻ ڏوشي آوين ايسو ري
 پڳي پڙئي نئي ان ڪيڏو: ”او پريو، ماري مدت ڪرو!“ (26) پڻ ايسو اوتا رو
 آزمتو ليڏا هارو اوتا نه ڪيڏو: ”مارو ڪوم ماري آپري اسرائيلي قوم ۾ سٺه،
 ان تون ڌاري قوم رئي تين مون تي مدت ڪم مونگهڻه؟ تين اي ڪيتئي نئي
 هومپڙئي ڪي، جي ٻارون رئي روتئي لين ڪوترون نه نوکوو نئي.“ (27) پڻ
 ڏوشي ڪيڏو: ”تماري وات تو هاسئي سٺه، پريو. توئي پڻ ڏئي روتئي ري او
 ٽڪري ڪوترون نه نوڪهڻه، جي ڏئي آپ ڪائين اوڳارڻه، ان ڪوترا او اوڳارل
 ٽڪري تو ڪاهه.“ (28) تئين ايسو هايا وات مانه اوتا نه ڪيڏو: ”او ٻائي، تارو
 يقين الاهي گهڻو سٺه. جيئن تون مونگهڻه، هرورم تون هارو ته!“ ان اوئو ئي
 توئو اوتا ڏوشي رئي ڏيڪري هازئي هوري تي گهي.

ايسو ڌاريون قومون رون گهڻون مونڏون نه هازا هورا ڪرڻه

(29) اوئون روينو تين ايسو گليل ڍنڍ را ڪپ مانه گيو، ان ڏونگر مانه سڙين
 اوئو پينو نو. (30) ان الاهي گهڻا منڪ اوتا ڪن آيا، جيا آپ پيڙا پونگڙون نه،
 اونڌون نه، رُونگڙون نه، گُونگون نه، ان پيزون گهڻون مونڏون نه تيڙي آيا،
 ان اوئون نه ايسو رون پڳون ڪن نوڪيا. ان ايسو اوئون نه هازا هورا ڪريا.
 (31) تيام زئون ٻڌي منڪي زويو جي گُونگا ٻولڻه ريا، رُونگڙا هازا هورا تياھ،
 پونگڙا وئو ريا، ان اونڌا ڏيڪه ريا، تو او حيروني پڙي گيا. ان اوئي پڳوون را
 وڪوڻ ڪريا، جيا نه اسرائيلي قوم را منڪ مونتا.

ايسو چار هزار ٿي وڌارءَ منڪون نءُ روتئي گوراوئھ

(متي 32:15-39، مرقس 1:8-10)

32 ايسو آپرون شيلون نءُ آپ ڪن تيڙاوين ڪيڏو: ”مون نءُ ايتون گهڻون منڪون مانھ قياس آوئھ، ڪم تو اي ترڻيون ڏيئون ٿي مون پيڙا سئھ، ان هوءَ اوئون ڪن کاڌا رو ڪئين نٿي. ان مارئي مرضي نٿي جي اوئون نءُ يوکا رونا ڪرون، متون او شيرڙا مانھ پيهونش ٿي زائھ.“ 33 تو شيلي ايسو نءُ ڪيڏو: ”ايتئھ هونواڙ ۾ اتون گهڻون منڪون نءُ گورايا هارو روتي ڪيئون اوئشون؟“ 34 تئون ايسو اوئون ٿي پونسيو: ”تمون ڪن ڪتي روتي سئھ؟“ تو اوئي ڪيڏو: ”امون ڪن هات روتي ان ڪئينڪ مشي پڻ سئھ.“

35 تئون ايسو ٻڌون منڪون نءُ زمي مانھ ٻيٽا رو ڪيڏو. 36 ان پسئھ اوئھ او هات روتي ان مشي پري لين اوئون هارو پگھون رو ٿورو مونيٽ اوئون نءُ يونگي ان شيلون نءُ ڏيوا مڏيو. ان شيلو ٻڌون منڪون نءُ وراوين ڏيٽا ڳيا. 37 او ٻڌائي منڪ ڪائين ڍاپيا. ان جيا ٽڪرا اوڳاريا تا، اوئون نءُ شيلي پيڙا ڪريا، ان اوئون را هات ڏلا پروٽا. 38 جيئي منڪي روتئي کاڌئي، او ڏوشيون ان ٻارون شوا چار هزار آدمي هتا. 39 پسئھ ايسو ٻڌون منڪون نءُ رونا ڪرين ٻيڙي مانھ سڙيو ان مگدن را علاقا ۾ ڳيو پرو.

منڪ ايسو نءُ پرسو ڏيکاريا رو ڪئھ

(متي 1:16-4، مرقس 11:8-13، لوقا 12:54-56)

16 1 اوتئھ ڪئينڪ فريسي پالتي را ان ڪئينڪ صدوقي پالتي را منڪ ايسو ڪن آيا، ان اوئا نءُ آزمايا هارو ڪيڏو: ”امون نءُ ڪوڪ ترت پرسو ڪرين ڏيکاريا! امون نءُ ٿاپتي ڏئھ جي تون پگھون را پاها رو سئھ ڪا نا؟“ 2 تيا مانھ ايسو اوئون نءُ ڪيڏو: ”زئون ڏي آتيا رئھ توئھ آڪاش راتو

تھ، تو تمی ام ڪوھ جي موسم صاف ٿیڻی. ③ ان زئیون ھوار رو آڪاش راتو ان جھڙالو تھ، تو تمی ام ڪوھ جي آز می ورھشی. تمی آڪاش رون نیشونون ٿی موسم رٿی کپڙی ھیکوھ، تو تمی ایئا توڻا را نیشون ڪم اوڙکی نٿی ھیکتا؟ ④ تمی ایئا زمونا را منک ڪیوا پونڌا سو ان آپرا ڌڻی پڳوون رٿه ھاو ڪلاڦ سو. تیام تمی ٿاپتی ھاو پرسو زووا ڪروھ. پڻ پڳوون ٿاپتی ھاو تمون نٿه پرسو نٿن ڌیکارٿه، تمون نٿه روڳو ایوو نیشون ڌیکارٿی، جیوو پڳوون رو نیاپو ڌیدا واڙا یوناھ رو نیشون. ”ھم ڪین ایسو اوئون نٿه ساڌین گپو پرو.

ایسو مونھڙل کاتا آنا رو مثال ڌین فریسی پالٽی ان صدوقی پالٽی واڙون ری پونڌائی ٿی پاھو ڪریا رو ڪٿه

(متي 5:16-12، مرقس 8:14-21)

⑤ شیلا ایسو پیڙا پیڙی موئن سڙین ڍنڍ رٿه پیزه پاھه زائین پوگیا، پڻ روتی آپ پیڙی لی یا رٿی وات اوئون نٿه ویھری گپی ٿی. ⑥ تئیون ایسو اوئون نٿه ڪیدو: ”ھوشیار ریا. فریسی پالٽی واڙون ان صدوقی پالٽی واڙون رٿی پونڌائی، جی مونھڙل کاتا آنا جیوئی سٿه، ھایا ٿی پاھو ڪریا. ⑦ تو شیلا آیت یر وات ڪروا مڌیا: ”آپی روتی نٿی لایا، تیام ای آنا را یارام ڪٿه ریو. ⑧ پڻ ایسو اوئون رٿی وات زوئین ڪیدو: ”تمی اتو گھت یقین ڪم را ڪوھ؟ تمی آیت یر وات ڪم ڪروھ ریا جی تمون ڪن روتی نٿی؟ ⑨ ھزون ھوڌی تمی نٿی ھزمتا، ڪی؟ تمون نٿه ای وات یاد نٿی ڪی، جی مئین پونسون روتیون ٿی پونس هزار منکون نٿه ڪورایا تا، ان تمی اوڳارل ٽڪرون را ڪتا چپا پریا تا؟ ⑩ ان تمون نٿه ای وات پڻ یاد نٿی ڪی، جی مئین ھاٿون روتیون ٿی چار هزار منکون نٿه ڪورایا تا، ان تمی اوڳارل ٽڪرون را ڪتا ڏلا پریا تا؟ ⑪ تو پسئہ تمی ڪم نٿی ھزمتا جی زئیون مئین ھمئہ تمون نٿه مونھڙل کاتا آنا را یارام ڪیدوھ، تئیون مارو مطلب روتیون را یارام ڪیدا رو نتو؟ یڻ مارو مطلب ای ھتہ جہ.

تمی فریسی پالتي وازون ان صدوقي پالتي وازون ري پوندائي تي پاهو ڪريا، جي مونهرل کاتا آتا جيوي ڪراپ سئ. " (12) تيون شيل هزمي گيا جي زئون ايسو مونهرل کاتا آتا را پارام ڪيڏو، تيون اوئ روئون را پارام نئين، پڻ فریسی ان صدوقي پالتي وازون ري شيڪاڙل واتون را پارام ڪيڏو، جي اوئون ريون گلت واتون مان نه ويو.

پطرس ايسو نئ ڀڳوون رو سونڊل ڀڄايا وازو ڪريست ڪئ

(متي 13:16-20، مرقس 8:27-30، لوقا 9:18-21)

(13) تيا ڪيڙ ايسو قيصره فلپي شهر را علاقا ۾ گيو. اوئ اوئ اپرون شيلون تي پونسو: "موئ هئ مون منک ذات را ڏيڪرا را پارام ڪي ڪئ جي هون ڪوڻ سون؟" (14) شيلي ڪيڏو: "ڪوڪ ام ڪئ جي تم يوحنا پويتر سنون ڏيڏا وازا سو، ڪوڪ ام ڪئ جي تم ايلياه سو، ان پيزا وڙي ام ڪئ جي يرمياہ ڪا اگلوڪون ڀڳوون رو نياپو ڏيڏا وازون موئن تي ڪوڪ وڙي جيوتو ٿيو، ان تمی او سو." (15) پسئ ايسو وڙي اپرون شيلون تي پونسو: "پڻ تمی ڪي ڪوہ جي هون ڪوڻ سون؟" (16) تيا مانہ شمعون پطرس ڪيڏو: "تمی ڀڳوون را سونڊل ڀڄايا وازا ڪريست، جيوتا ڀڳوون را ڏيڪرا سو."

(17) تيا مانہ ايسو اوئا نئ ڪيڏو: "پاڳوازو تون سئ، شمعون بريوناہ. ڪم تو تين اي وات اپري عقل ان سوچ تي نئي هزمي، پڻ مارئ آڪاشي باپ ڀڳوون تون ڪن اي وات ساوي ڪريه. (18) ان هوئ هون تارو نوم پطرس را ڪونه، جيا رو مطلب سئ پتر. ان هون تون نئ ڪونه جي تارو وشواس پتر جيوو ڏاڍو سئ، ان زم پتر ري پنياد مانہ منک گهر ناوئ، تم ايئا ڏاڍا پتر مانہ هون مارئي منڌڙي ناويہ. ان اي منڌڙي ڪيڏي ڪتم نئين تئ، ان ايئا را منک نرگ را قوضا م نئين اوئ پڻ هميش رو جيون ليشي. (19) هون تون نئ زوئ ايشور را راز ري ڪونسي ڏين تارڻ رو مارگ ڪوليا ري اڪتيارئي ڏيه ان ماري منڌري

رئي زميواري ڏيه. ان تون ڌرتي مان هر اوت وٽ نا پاڙي هيڪيه، جيا رو پگهون نا پاڙيو هوشي، ان تون ڌرتي مان هر اوت وٽ رئي موڪل ڏي هيڪيه، جيا رئي پگهون موڪل ڏيڻي هوشي." (20) تئون ايسو شيلون نئه گهڻو گهڻو ڪيڏو: "مارا پارام ڪيا نئه مت همپرايا جي هون پگهون رو سونڊل پچايا واڙو ڪريست سون."

ايسو آب مانه آيا واڙون ڏکون ان موت را پارام مور تي همپراوئه

(متي 21:16-23، مرقس 8:31-33، لوقا 9:22)

21) اوت توتا تي لين ايسو ساوئه نمونه اپرون شيلون نئه اي وات هزماووا مڏيو: "اي ضرور تيشي جي هون يروشلم شهر ۾ زائيه، ان آڀي قوم را آگهون، موتا پوزاري، ان شاستر زوڻيا واڙا مون نئه گهڻا ڏک ڏيشي، ان منڪ مون نئه مارشي پرو، پڻ ترئمئه ڏي پگهون مون نئه وڙي جيوي اوتارشي."

22) تو پطرس ايسو نئه هيڪئه پاهئه ڪرتون هزماووا مڏيو ان اوت نئه ڪيڏو: "او پريو، پگهون ڪرئه تمون تي هم نه تئه!"

23) پڻ ايسو پاسو قرين پطرس نئه ڪيڏو: "تون شيطون را پاها تي ڪم ٻولئه ريو؟ تون مارو شيلو تين آڀرا ماڳ ۾ رئه! هم ڪيڏا تي تون مون نئه پگهون ري مرضي تي ڦيروا ڪرئه، ڪم تو تارئي هائي اوڙي سوچ پگهون را پاها تي نئي، پڻ روڳهي منڪون رئي سوچ سئه."

شيلو رئه موت هوڏي ايسو ري وات مانه ويو

(متي 24:16-28، مرقس 8:34-9:1، لوقا 9:23-27)

24) تئون ايسو اپرون شيلون نئه ڪيڏو: "جي ڪوئي مارو شيلو تين مون وونهڙ آوا ڪرئه، تو او آڀري مرضي ساڏئه ان موت هوڏي ڏک سهين زوڻئه آڀري هوڙي اوپاڙئه ان مارا مارڳ مانه وين مون وونهڙ آوئه." (25) ڪم تو جيو ڪوئي

مُون نئه ساڌين آڀرو جيو پڇاوا ڪرئ، تو نيٺ اُئا رو جيو نئين پڇئي، پڻ جيو ڪوئي ماري ڪري آڀرو جيو ڏيڏا هارو تيار سئ، تو اُئا نئه هميش رو جيون زڙشي. (26) جي ڪوئي منڪ ٻڌي ئي ڏنيا هات ڪرئ، ان اُئا نئه آڀرا جيو رو نقصون تئ، تو اُئا نئه ڪيوو ڦاڻيڏو ٿيو؟ منڪ آڀرو جيو پاسو ليڏا هارو ڪي ڏيشي؟ (27) هُون منڪ ذات رو ڏيڪرو تو مارون آڪاشي ڏوتون پيڙو مارا ٻاپ پڳوون را زبڪتا سوجهرام آيا واڙو سون، ان تئ توتئ هُون هر هيڪ منڪ نئه اُئا رون ڪرل ڪومون پرموتئ ايوڙو ڏيه. (28) پڻ هُون تمون نئه هاس ڪونه، ايئن اويل منڪون موئين ٿي ڪئينڪ ايو سئ جيا زئون هُودي مُون منڪ ذات را ڏيڪرا نئه مارا راز ۾ پاڌشا ٿين آوتون نئين ڏيڪئ، تئون هُودي نئين مرئ.

ايسو رو روپ زبڪتا سوجهرا ۾ ڀڏلئھ

(متي 13:1-17، مرقس 9:2-13، لوقا 9:28-36)

17 (1) سوئون ڏيئون ڪيڙ ايسو پطرس، يعقوب، ان اُئا را پائي يوحنا نئه آڀ پيڙا تيڙين هڪا اونس ڏونگر مانھ نوڪلائي ۾ گيو. (2) ان ايسو رو روپ اوئون رئه روڀرو ڀڏلي گيو، ان اُئا رو مونڊو ڏي را زم زبڪوا مڏيو، ان اُئا را لوگهڙا سوجهرا جيوا ڌوڙا شير ٿي گيا. (3) ان اوچتو موسيٰ ان ايلياه اوئون نئه ڏيڪاڙو ڏيڏو، ان ايسو ٿي واتون ڪرتون اوئون نئه ڏيڪيام آيا. (4) تيا مانھ پطرس ايسو نئه ڪيڏو: ”پرڀو، امي ڪتا يا ڳواڙا سون جي امي ايئن سون. جي تمارئي مرضئي هوئ، تو هُون ايئن ترڻ ڍاڙيا ناوون، هيڪ تمون هارو، هيڪ موسيٰ هارو، ان هيڪ ايلياه هارو.“

(5) هزون پطرس هم ڪيتوت ريو، تو سوجهرا واڙئ واڙئ آوين اوئون مانھ سونڀو ڪريو. ان اوچتو واڙا موئين ٿي پڳوون رو آواز ام هومپڙيام آيو: ”اي مارو پريمي ڏيڪرو سئ، ان ايئن ٿي هُون گهڻو ڪش سون. تمي ايئن ري واتون مونو.“ (6) هائي آواز هومپڙين شيلا اتا گهڻا پيئي گيا جي او مونڊا وروڻا زمي

مانه پڙيا نا. ⑦ پڻ ايسو اوئون ڪن آوين اوئون نئه سڀين ڪيڏو: ”اُونين اُويو ان پيئائو مت!“ ⑧ پسئ زئيون اُئي هومو زويو، تو روڳو ايسو اوئون نئه هيڪلو ڏيڪيام آيو، ان پيزو اوئنه ڪوئي نتو.

⑨ زئيون او ڏونگر ٿي نيسا اوترتات ريا، تو ايسو اوئون نئه گهڻو گهڻو ڪيڏو: ”جئن ڪئين تم ڏيڪيوه، ايئا را پارام تئيون هُڏي ڪيا نئه مت همپڙايا، زئيون هُڏي هون منڪ ذات رو ڏيڪرو مرلون موئين ٿي جيوي نه اُونون.“ ⑩ تو شيلي اوئا ٿي پونسيو: ”پسئ شاستر زوڻيا واڙا ڪم ڪئ جي پڳوون را سونڊل پچايا واڙا ڪريست رئه آيا مور ايلياه ضرور وڙي آوشي؟“ ⑪ تو ايسو وڙندڙي ڏيڏي: ”هم تو سئ. شاستر پرموئنه ايلياه مور ٿي آوشي ان منڪون نئه پڳوون هوما واڙين پڳوون را سونڊل پچايا واڙا ڪريست رئه آيا هارو تيار ڪشي.“ ⑫ پڻ هون تمون نئه ڪاتري ٿي ڪونه جي مارا آيا رئي تيار ٿي ڪريا واڙو، جيا نئه شاستر ۾ ايلياه ڪيڏوه، او تو آيو تو. پڻ منڪي اوئا نئه اوڙڪيو ٿي نئين جي او ڪوڻ سئ، ان زم اوئون نئه وڻيو تم اوئا ٿي وُڊا. ان هيون نمونئ منڪ مون منڪ ذات را ڏيڪرا نئه پڻ ڏڪ ڏيشي.“ ⑬ تئيون شيلا هزمي ڳيا جي ايسو اوئون نئه يوحنا پويتر سنون ڏيڏا واڙا را پارام ڪئ ريو.

ايسو هڪا سوڪرا ٿي پوت ڪايئ

(متي 14:17-21، مرقس 9:14-29، لوقا 9:37-43)

⑭ زئيون ايسو ان او ترڻ شيلا وڙي منڪون ڪن پاسا آيا، تئيون اوئون گهڻون منڪون موئين ٿي هڪ زڻو ايسو ڪن آيو ان اوئا ري پڳي پڙين ⑮ ڪيڏو: ”سادو جي، مارا ڏيڪرا مانه ڏيا ڪرو، ڪم تو اوئا نئه گهونتي آوئ، ان اوئا نئه گهڻي تڪليپ ٿئ. او گهڻي وار ڏيو تام پڙي زائو ان گهڻي وار پوڻي م پڙي زائو.“ ⑯ هون اوئا نئه تمارون شيلون ڪن تيڙي آيو تو، پڻ او اوئا نئه هازو نه ڪري هڪيا.“

(17) تيا مانھ ايسو ڪيڏو: ”تمي ايئن زمونا را منڪ يقين ڪم نٿي راکتا؟ تمي ڪم اوڙئي سوچ راکوه؟ مارئ هزون هُودِي تمون پيڙو ڪتي وار ريوو پڙشي؟ ان تمارئي ڳلت سوچ مارئ ڪتي وار سهو پڙشي؟ سوڪرا نئ ايل مون ڪن تيڙي آوو!“

(18) تئون ايسو پوت نئ ڌڙڪو ڏين نيهر يا رو ڪيڏو، تو پوت سوڪرا تي نيھري ڳيو، ان اوئا ئي توئا تي لين سوڪرو هازو هورو تي ڳيو.

(19) پسئ شيل ايسو ڪن نوڪلائي ۾ آيا ان اوئا تي پونسيو: ”امي هيا پوت نئ ڪم نه ڪاڍي هيڪيا؟“ (20) تو ايسو اوئون نئ ڪيڏو: ”تمي هيا پوت نئ ايئن هارو ڪاڍي نه هيڪيا ڪم تو تمارو يقين گهٽ سئ. ڪم تو هون تمون نئ هاس ڪونه، جي تمي پڳوون مانھ توريا را پيز زتو روڳو توڙو يقين راکوت، تو تمي ايئن ڏونگر نئ ڪي هيڪوت ’ايئون اوڪرين اول زائين اوپ!‘ ان او زائين اوٿئ اوپئ. ان ايوو ڪئين نه ٿئ جي تمي ڪري نه هيڪئ. (21) (پڻ پراٿنا ڪريا ان ورت راکيا شوا ايوو قسم رون پوتون نئ پيزئ ڪيوئ پڻ ڍارئ ڪاڍي نٿي هيڪتا.)“

ايسو وڙي گليل صويا موئين پڳوون رو ڪوم ڪرئھ

ايسو بيزي وار آيزا موت را يارام مور تي همپڙاوئھ

(متي 23:17-22، مرقس 9:30-32، لوقا 9:44-45)

(22) زئون ايسو ان اوئا را شيل گليل صويا ۾ پيڙا تيا، تئون ايسو اوئون نئ ڪيڏو: ”موٽھئ مون منڪ ذات را ڏيڪرا نئ زهلاوشي ان منڪون رئ حوالئ ڪرشي پرو. (23) ان او مون نئ مارشي پرو، پڻ ترٿمئ ڏي پڳوون مون نئ وڙي جيوي اوئاڙشي.“ اي هومپڙين شيلون نئ الاهي گهڻو ڏک ٿيو.



ايسو يڳوونَ را گهر هارو ڏون ڏيڏا را پارام هزماوئِه

②4 زئيون ايسو ان اوئا را شيلا ڪفرنحوم شهر ۾ آيا، تئيون ڏون ليڏا وارا، جيا هر سال ۾ پڳوونَ را گهر هارو هو. هو روپيون رو ڏون ليٽا، پطرس ڪن آيا ان اوئا ٿي پونسيو: ”تمارو گرو پڳوونَ را گهر هارو ڏون تو ڏئ، نا؟“ ②5 تو پطرس ڪيڏو: ”هوئِه.“ زئيون پطرس گهر ۾ ايسو ڪن آيو، تو ايسو مور ٿي اوئا ٿي پونسيو: ”شمعون، تارو ڪي ڪيال سئ؟ دنيا را پادشا ڪيون منڪون ٿي ناڪو ڪا ٽيڪس لئ؟ او آپرون منڪون ٿي لئ، ڪا ڌاريون منڪون ٿي؟“ ②6 تو پطرس ڪيڏو: ”ڌاريون منڪون ٿي.“ تيا مانه ايسو اوئا نئ ڪيڏو: ”تو پئسئ هايا رو مطلب اي سئ جي پادشا را آپرا منڪ پئها ڏيڏا ٿي آزاد سئ. تيام آبي پڻ پڳوونَ را راز را منڪ ٿين پڳوونَ را گهر هارو ڏون ڏيڏا ٿي آزاد سون.“ ②7 پڻ آبي ڏون ليڏا وارون نئ ڏک ڏيوان ٿي ڪرتا. تيام تون زا ان ڍنڍ مانه زائين ڪنڊئي نوڪ، ان جي مور ٿي مسئي ڦاٿئ، اوئا رو ڪاڀو ڪولي ان اوئا را ڪاڀا ۾ بي هو روپيون وارو هيڪ سڪو زڙشي. او سڪو لين ڏون ليڏا وارون نئ مارا ان ٿارا پاها رو ڏون ڏي پرو.“

شِیلا آیت ۾ تڪرار ڪرڻه جي ڪیا رو گهڻو مون سئ

(متي 1:18-5، مرقس 9:33-37، لوقا 9:46-48)

18 ① اُوڻه ئي ٿوڻه شِیلا ايسو ڪن آيا ان پُونسيو: ”هَوڻه ايشور را راز ۾ ڪیا رو گهڻو مون سئ؟“ ② تو ايسو هیکا نونا پاڙ نئ تيراوین اُوڻون وسا اُوپاڙيو. ③ ان ڪيڏو: ”هُون تمون نئ هاس ڪونه، زئيون هُوڏي تمی آپري مگهروري ساڏين آپري سوچ نئين پڌلو، ان ننڪون پاڙون را زم گريپ نئين ٿيو، تئيون هُوڏي تمی ايشور را راز ۾ ماڳي نئين زائي هیکو. ④ تيام جيو ڪوئي ايڻا ننڪا پاڙ جيوو گريپ سئ، اُوڻا رو ايشور را راز ۾ ٻڌون ٿي گهڻو مون سئ. ⑤ ان جيو ڪوئي مون مانھ وشواس را ڪیا ري ڪري ايوا پاڙ رو مون را ڪئھ، اُو مارو مون پڻ را ڪئھ.“

ايسو شيڪاڙڻه جي ڪم ڪرين ڏوه ٿي پاهو ڏيو

(متي 6:18-9، مرقس 9:42-48، لوقا 1:17-2)

⑥ ”ايئون نونون منڪون موئين ٿي جيا مون مانھ وشواس را ڪئھ، جي ڪوئي پڻ منڪ ايئون موئين ٿي ڪياڪ نئ ڏوه ۾ پاڙئ، تو پڳوون اُوڻا منڪ نئ اتئي گهڻي سزا ڏيشي جي اُوڻا منڪ هارو ٺاڻوڪو ام ٿئڻ جي اُوڻا رڻه هيوو ڪوم ڪريا مور اُوڻا را گڙا موئين گهرت رو پڙ ٻونڌين اُوڻا نئ سمونڊ ۾ ٻوڙت پرو. ⑦ ايڻا ڏنيا ۾ منڪون هارو ڏڪ سئ، ڪم تو ڏنيا ۾ گهڻي ايوي واتون سئ جيا ري ڪري منڪ ڏوه ۾ پڙئھ. ايوي واتون تو ضرور ٿيشي جيا ري ڪري منڪ ڏوه ڪرشي. پڻ ڏڪ اُوڻون منڪون هارو سئ، جيون ري ڪري پيزا منڪ ڏوه ڪرئھ. ⑧ جيا پڻ وات ري ڪري تمی ڏوه ڪرو، هايا وات نئ ساڏو پري. جي تمارا هات ري ڪري ڪا پڳ ري ڪري تمی ڏوه ڪروھ، تو اُوڻا نئ واڍين آپ ٿي هيڪل ڦڳوڙو پرو. ڪم تو تمارئھ بيئون هاتون ڪا بيئون پڳون هتيلا هميش

ري پاھي ۾ ڦڳوڙا يا ٿي تمون ھارو ٺاھوڪو اي سئ، جي تمي ڪونڪا ڪا مڍا ٿين ھميش رو جيون ليو. ⑨ ان جي تماري اونڪ ري ڪري تمي ڏوھ ڪروھ، تو اوٽا نئ ڪاڍين آپ ٿي ھيڪل ڦڳوڙو پري. ڪم تو تمارئ پيئون اونڪيون ھٽيلا نرگ ري پاھي ۾ ڦڳوڙا يا ٿي تمون ھارو ٺاھوڪو اي سئ، جي تمي ڪوٽا ٿين ھميش رو جيون ليو.

ڳمال ري رو مثال

(متي 10:18-14، لوقا 3:15-7)

⑩ ”ھوشيار ريا جي تمي ايئون نونون منڪون موئين ٿي ھيڪا نئ پڻ گھٽ نہ ھڙمو. ڪم تو ھون تمون نئ ڪاتري ٿي ڪونھ، جيا آڪاشي ڏوت اوئون رئي ھمپار ڪرئ، او ھميش مارا آڪاشي ٻاپ پڳوون رئ روپرو ھوئ. ⑪ (ڪم تو ھون منڪ ذات رو ڏيڪرو اوئون منڪون نئ پچاوا آيوھ، جيا پڳوون را مارگ ٿي شيتي ٿي ڳياھ).



⑫ ”تمي ڪي سوچوھ؟ جي ڪياڪ منڪ ري ھو ريون ھوئ، ان اوئون موئين ٿي ھيڪ ري ڳمائي زائ، تو ڏي اوٽا نئ نئين ڳوتئ، ڪي؟ او ضرور پيزي نوانوي ريون اوٽ ري اوٽ ڪياڪ ڌراڙ ڪن ڏونگر مانھ ساڌشي ان زائين اوٽا ڳمال ري نئ ڳوتشي.

⑬ ان ھون تمون نئ ھاس ڪونھ، جي ري اوٽا نئ زڙئ، تو او ھايا ھيڪي ري مانھ پيزون نوانوي ريون ٿي، جي نتي ڳموٽي، وڌارئ گھڻو ڪش ٿيشي. ⑭ ھيوئ نمونئ تمارا آڪاشي ٻاپ پڳوون رئي پڻ اي مرضي نٿي جي ايئون نونون منڪون موئين ٿي ھيڪ ئي اوٽا نئ ساڌين ڳمائي زائ.

جي تمارو پائي ڏوه ڪرڻ، تو اوتائين ڏوه ڪرڻ

⑮ ”جي تمارو ڪوئي پائي تمارو ڏوه ڪرڻ، تو زائين اوتائين ڏوه ڪرڻ ۽ نويڪلائي ۾ هڙماوو. جي اوتائين وات مونڱ، تو تماري ڪري تمارو پائي پڳوون ري سزا ٿي پڇي ڳيوه. ⑯ پڻ جي اوتائين وات نه مونڱ، تو هيڪ ڪا ٻي پڙا هاڪ پريا وارا منڪ آپ پڙا تيڙي زائو. هيون نمونڱ، زم شاستر ۾ لڪل سڻ، پيئون ڪا ترئون منڪون رڻي هاڪ پريا ٿي وات رڻي ٿا پيئي ٿي زائو.“

⑰ جي اوتائين پڻ تماري وات نه مونڱ، تو تم منڌري رون منڪون ڏوه وات همپڙايا. جي اوتائين رون منڪون رڻي وات ٿي نه مونڱ، تو اوتائين منڌري ٿي ٻارو ڪاڍيا پرو. زم منڪ ڌاري قوم وازون ان ناکو ليڌا وازون ٿي پڳوون رڻي وات نه مونڱ ري ڪري واسطو نٿي راکتا، تم تم هيوا منڪ ٿي واسطو مت راکو.“

ايسو اپرون شيلون ڏوه اڪتباري ڏوه

⑱ ”هون تمون ڏوه هاس ڪونه، تم ڌرتي مان هر اوتائين وات رڻي نا پاڙي هيڪشو، جيا رو پڳوون نا پاڙيو هوشي، ان تم ڌرتي مان هر اوتائين وات رڻي موڪل ڏي هيڪشو، جيا رڻي پڳوون موڪل ڏيڏي هوشي. ⑲ هون تمون ڏوه اي پڻ ڪونه، ڌرتي مان جي تمون موئين ٿي ٻي زئا ڪيڪ وات هارو هيڪ من ٿي جي پڳوون ري مرضي پرموڻه سڻ، ان اوتائين وات هارو پراڻا ڪرڻ، تو مارو آڪاشي ٻاپ پڳوون اوتون رڻي پراڻا هومپڙشي. ⑳ ڪم تو جيئن ٻي ڪا ترڻ منڪ مارا نوم ۾ پڙا ٿيا هوشي، اوتائين هون اوتون را وس ۾ هوئي.“

ماڻهي نه ڏيڌا وارا نوڪر رو مثال

㉑ ٿيون پطرس ايسو ڪن آوين پونسو: ”پريو، جي مارو پائي مارو ڏوه ڪرتو

رئه، تو مارئه اوتا نئه ڪٿي وار ماڻهي ڏيوو؟ اوهان وار مارو ڏوه ڪرئ، توهي هات وار مارئه اوتا نئه ماڻهي ڏيوو، ڪي؟” (22) تو ايسو اوتا نئه وڙندئي ڏيئي: ”هون تون نئه هات وار نئين، پڻ هات هو وار ماڻهي ڏيڏا رو ڪونه. زتي وار پڻ اوه ڏوه ڪرئ، اتي وار تارئه ماڻهي ڏيوو.

(23) تيام ايشور رو راز ايئن مثال را زم سئ. هيڪ پاڌشا هتو. اوئه آپرون نوڪرون ٿي حساب ليڏا رو ڦينصلو ڪريو. (24) زئيون حساب ڪروا مڏيو، تو اوتا ڪن هيڪ ايوو نوڪر لي آيا، جيا مانه ترڻ ارپ روپيا قرض هتو. (25) اوتا نوڪر ڪن اتا پئها نٿا جي اوه قرض پري هيڪئ. تيام پاڌشا حڪم ڏيڏو: ’ايئن نئه ٻارون ٻسون هٽيلو ويسو پرو ان ايئن رو ٻڌوئي ڪئين پڻ ويسو، ان مارو قرض پرو.‘ (26) تيام نوڪر پاڌشا ري پڳي پڙيو نو ان اوتا رئي ايم منٽ ڪري: ’مون نئه قرض پريا رو موقعو ڏيو، تو هون تمون نئه ٻڌوئي قرض پري ڏيه.‘ (27) تو اوتا نوڪر را ڏئي نئه قياس ٿيو، ان اوئه نوڪر نئه ساڏيو پرو ان اوتا رو ٻڌو قرض ماڻ ڪريو پرو.

(28) هائي نوڪر ڌرٻار ٿي ٻارو نيهريو، تو پاڌشا رو هيڪ پيزو نوڪر اوتا نئه پيزو ٿيو، جيا مانه ايئن رو پونس هزار قرض هتو، ان ايئه اوتا نئه گڙام زهالين ٿونپو ڏيڏو ان ڪيڏو: ’مون نئه مارو قرض پري ڏئه.‘ (29) تيا مانه پيزو نوڪر اوتا ري پڳي پڙيو نو ان اوتا رئي منٽ ڪرين ڪيو مڏيو: ’مون نئه قرض پريا رو موقعو ڏئه، تو هون تون نئه قرض پري ڏيه.‘ (30) پڻ پيرهين نوڪر ايئن رئي ڪئين وات نه هومپڙي، پڻ ايئن مانه ڪيس ڪرين جيل موئين پوراڻو پرو، زئيون هوڏي اوه قرض پري نه ڏئه.

(31) زئيون پاڌشا ري پيزي نوڪري زويو جي ڪي ٿيوه، تو اوئون نئه گهڻو ڏک ٿيو ان اوئي آوين ٻڌي وات آڀرا ڏئي نئه همپڙاوي. (32) تيون پاڌشا پيرهيان نوڪر نئه آپ ڪن تيڙاوين اوتا نئه ڪيڏو: ’پونڏا نوڪر، تئين مارئي منٽ ڪري، تو مئين تارو ٻڌوئي قرض ماڻ ڪريو پرو.‘ (33) زم مئين تون

مانه ڏٺا ڪري، تم ٿارڻه پڻ آڀرا ساڻي نوڪر مانه همريئم ڏٺا ڪروو تو.
 ③④ ڏٺي نئه اوڻا نوڪر مانه اٿئي گهڻئي رينه سڙئي جي اوڻه نوڪر نئه جيل ۾
 پوريا رو ان پونڌي هاري سزا ڏيڏا رو حڪم ڏيڏو، زئيون هوڌي او ٻڌو قرض
 پري نه ڏئه.

③⑤ ان هيوڻه نمونئ مارو آڪاشي ٻاپ پگهون پڻ تمون نئه سزا ڏيشي، جي
 تم آڀرا پورا من ٿي آڀرا پاڻي نئه ماڻئي نئين ڏيو.

ايسو گليل صوپا ٿي يروشلم شهر هومو زائھ

ايسو پرثيا را پارام شيڪاڙئھ

ان ڏوشي نئه نه ساڌيا را پارام هزماوئھ

(متي 12:19-12:10، مرقس 10:1-12)

19 ① زئيون ايسو هائي واتون ڪي ريو، تو او گليل صوپا ٿي روينو ٿيو
 ان يردن ڌريا رئه پيزئ پاهئ يهوديه را علاقا ۾ گيو. ② ان الاهي
 گهڻا منڪ اوڻا وونهڙ گيا، ان جيا مونڏا هتا اوڻئ اوڻه اوڻون نئه هازا هورا
 ڪريا پرا.

③ تئون ڪئينڪ فريسي پالتي را منڪ ايسو ڪن آيا ان اوڻا رو آزمتو ليڏا
 هارو اوڻا ٿي پونسو: ”ڌرم پرموئئ آڌمي ڪيا پڻ وات ري ڪري آڀري ڏوشي
 نئه ساڌي هڪئھ، ڪا نا؟“ ④ تو ايسو اوڻون نئه وڙندئي ڏيڏئي: ”تمون نئه
 شاستر موئين ٿي ايئا وات رئي ڪهر نئي ڪي؟ تمي تو ضرور پڻيو هوشي جي
 پگهون جيئئ جگت نايو، اوڻه ڏنيا ري شروع ٿي لين منڪون نئه نايا رئه توئئ
 آڌمي ان ڏوشي نايا. ⑤ ان پگهون ام ڪيڏو: ’تيام آڌمي آڀرا مان ٻاپ نئه
 ساڌشي، ان آڀري ڏوشي پيڙو ريشي، ان او ٻي ئي هڪ ٿيشي.‘ ⑥ تو پسئ
 آڌمي ان ڏوشي ٻي ئي ڌار ڌار نئي، پڻ هڪ سئ. تيام جيون نئه پگهون آپ

جوڙياھ، اُوئون نئه منڪ ڌار نه ڪرئہ!

⑦ ٿيا مانھ فريسي پالتي واڙي اُوئا ٿي پُونسيو: ”تو پستھ موسيٰ ڪم حُڪم ڏيڌو جي آدمي آپري ڏوشي نئه لکي ڏين ساڌي هيڪئھ؟“ ⑧ تو ايسو اُوئون نئه وڙندئي ڏيڌئي: ”موسيٰ تمون نئه ڏوشي ساڌيا رئي آگيا تيام ڏيڌئي، ڪم تو اُوئا نئه ڪبر هئي جي تمي ناھڏا سو ان پڳوون ري مرضي مانھ نئين وو. پڻ ڏنيا ري شروع ٿي لين پڳوون رئي مرضي نئي جي آدمي آپري ڏوشي نئه ساڌئہ. ⑨ هون تمون نئه کاتري ٿي ڪونھ، جيو ڪوئي پونڌا ڪوم را ڏوھ ڪريا ووئي آپري ڏوشي ساڌين پڙي ڏوشي ڪرئہ، پلئہ لکي ڏيڌئي هوئہ، توئي پڻ او آدمي پونڌو ڪوم ڪرئہ.“

⑩ ٿيا مانھ ايسو ري شيلي اُوئا نئه ڪيڌو: ”جي آدمي ان ڏوشي رئي هائي وات سئہ، تو پرڻو ئي نه ڪپئہ.“ ⑪ تو ايسو اُوئون نئه ڪيڌو: ”ٻڌائي منڪ ايئا پرڻا ري وات مانھ نئي وي هيڪتا. روگا او منڪ ايئا وات مانھ وي هيڪئہ، جيون نئه پڳوون پرڻا رئي هيٺ ڏئہ. ⑫ ڪم تو ڪئينڪ منڪ ايئا هارو نئي پرڻا جي او زايا زلميا ڪڏڙا هوئہ، ان ڪئينڪ منڪ ايئا هارو نئي پرڻا جي منڪي اُوئون نئه ڪڏڙا ناياه، ان ڪئينڪ منڪ ايئا هارو نئي پرڻا زم او پورا ڏيون ٿي ايشور را راز پرموئئہ وي هيڪئہ. زم پڳوون هر منڪ نئه هيٺ ڏيڏيھ جي او پرڻئہ ڪا ڪونئارو رئہ، تم هر منڪ رئہ هائي وات مونين پرڻو ڪپئہ ڪا ڪونئارو ريو ڪپئہ.“

ايسو ننڪون ٻارون نئه آشيرواڏ ڏئہ

(متي 13:19-15، مرقس 13:10-16، لوقا 15:18-17)

⑬ پستھ منڪ ايسو ڪن ننڪون ٻارون نئه تيڙي آيا، زم ايسو اُوئون مانھ هات راڪين اُوئون هارو پراٽنا ڪرئہ. پڻ شيلي اُوئون منڪون نئه وڙگائين هيڪل زايا رو ڪيڌو. ⑭ پڻ ايسو ڪيڌو: ”ٻارون نئه مون ڪن آوا ڏيو، ان اُوئون

نٺ مت روڪو، ڪم تو ايشور رو راز ايئون ٻارون جيون منڪون هارو سٺه. ”
 (15) تيون ايسو ٻارون مان هات راڪين آشيرواڏ ڏيڏو، ان پسته اوئون روينو
 ٿي ڳيو.

شائوڪار منڪ ان ايشور رو راز تارڻ ليڏا هارو ٻڌوئي ڪئين ساڏيا هارو تيار ريو

(متي 16:19-30، مرقس 17:10-31، لوقا 18:18-30)


(16) اوچتو هڪ جوڻ منڪ ايسو ڪن آيو ان پونسيو: ”ڳرو جي، مارٺ ڪيو
 نائوڪو ڪوم ڪرو، جيا ٿي مون نٺ پڳون ڪن هميش رو جيون زڙه؟“
 (17) تو ايسو اوٺا نٺ ڪيڏو: ”تم نائوڪا ڪوم را پارام مون ٿي ڪم پونسو؟
 نائوڪو روڳو پڳون سٺه. جي تم هميش رو جيون ليوا ڪرو، تو پڳون رون
 حڪمون مان وو.“

(18) تيا مان اوٺ ايسو ٿي پونسيو: ”ڪيون ڪيون حڪمون مان ويو؟“
 تو ايسو ڪيڏو: ”ڪون نه ڪرو، پونڌو ڪوم نه ڪرو، سورئي نه ڪرو،
 ڪوڙي هاڪ نه پرو، (19) آپرا مان ٻاپ رو مون راڪو، ان پزون ٿي آپ را زم
 پريم راڪو.“

(20) تيا مان جوڻ ايسو نٺ ڪيڏو: ”هايون ٻڌون حڪمون مان هون تو وونه
 ريو. هوٺ مارٺ پيزو ڪي ڪرو؟“ (21) تو ايسو اوٺا نٺ ڪيڏو: ”جي تم هر
 وات ۾ نائوڪا ٿيو ڪرو، تو تم زائين تماري ٻڌي ملڳت ويسين پيها
 ڳريهون ۾ وراو پرا، تو تمون نٺ آڪاش موئين آڪاشي ملڳت هميش رو جيون
 زڙشي، ان پسته آوين مارا شيلا ٿين مون وونهڙ آو.“ (22) زئون اوٺ جوڻ منڪ
 هائي وات هومپري، تو او گهڻو نيموڻو ٿين ڳيو پرو، ڪم تو اوٺا ڪن گهڻي
 ملڳت هئي.

(23) تيون ايسو آيون شيلون نٺ ڪيڏو: ”هون تمون نٺ هاس ڪونه، ملڳت

واڙون رڼه ايشور را راز موئين زاو وکتو دورو سئ. ②④ هون تمون نئ وڙي



کاتري ٿي ڪونه، شائوڪار منک رو پڳوون را راز
موئين زاو و ايوو دورو سئ جي هيا را مقابل ۾
اونٺ رو هوني را ناڪا هونهر و متوو هورو هوئت.

②⑤ زئيون اوئي هائي وات هومپڙي، تو شيلا گهڻا
حيروني پڙي ڳيا، ان ڪيو مڌيا: ”جي شائوڪارون
نئ تارڻ نئين زڙئ، تو پسئ ايوو ڪوڻ هوشي جيا
نئ تارڻ زڙشي؟“ ②⑥ تيا مانھ ايسو اوئون هومو

زوئين ڪيڏو: ”هائي منڪون ٿي نٿي ٿي هيڪتو، پڻ پڳوون ٿي ٻڌوئي ڪئين
ٿي هيڪئ.“

②⑦ تيا مانھ پطرس ايسو نئ ڪيڏو: ”زوئو، امي آڀرو ٻڌوئي ڪئين ساڌين
تمارا شيلا ٽين تمون وونهر آياھ. تو پسئ امون نئ ڪي زڙشي؟“ ②⑧ تو ايسو
اوئون نئ ڪيڏو: ”هون تمون نئ هاس ڪونه، تمي جيا مارا شيلا ٽين مون وونهر
آياھ، نوي دنيا ۾ زئيون هون منک ذات رو ڏيڪرو زبڪتا سوجھرا ۾ ماري مون
واڙي گهاڌي مانھ پيهيھ، تئيون تمي پڻ ٻارون گهاڌيون مانھ پيهين اسرائيلي
قوم ريون ٻارون ذاتون را ڦينصلا ڪرئو. ②⑨ ان جيئئ پڻ ماري ڪري گھر، پائي
پينون، مان ٻاپ، ٻار، ڪا آڀري زمئي ساڌئيھ، اوئا نئ ساڌل شينھون ٿي هو وار
وڌيڪ زڙشي، ان اوئا نئ هميش رو جيون پڻ زڙشي. ③⑩ گهڻا منک جيا همئئ
مورم سئ او وونهر ٿيشي، ان جيا وونهر سئ او مورم ٿيشي.“

ڌراڪون را ٻاگھ ۾ مزورون رو مثال
پڳوون آڀري ڪريا ٿي منڪون نئ تارڻ ڏئھ

① ”ڪم تو ايشور رو راز ايئا را زم سئ. هيڪ زميڌار هتو. او هوار
20 رو ويلو گھر ٿي ٻارو نيھري ڳيو زم آڀرا ڌراڪون را ٻاگھ موئين مزور

اُڀاڙئ. ② اُوئہ رَواز پرموئئہ مزورون نئہ پنجاھ رُوپيا تاريڪ ڏيڏا رئي ٻول ڪري، ان پسئہ اُوئون نئہ ٻاگھ موئين ميليا پرا. ③ نويڪ واگي اُو وڙي نيهرين شهر ۾ گيو، ان زوئہ، تو اُوئہ پيزا مزور چونڪ مانہ نورا اُڀاھ. ④ تو اُوئون نئہ ڪيڏو: 'تمي پڻ مارا ڌراڪون را ٻاگھ موئين زائين ڪوم ڪرو، ان جيئن تمارو حق هوشي، اُو هُون تمون نئہ ڏيھ.' ⑤ تو اُو پڻ مزوري مانہ گيا پرا. پسئہ اُو وڙي پورون رو ٻاريڪ واگي ان وڙي ترٿيڪ واگي گيو، ان همراہ مزور اُڀاڙيا. ⑥ هونز رو پونسِيڪ واگي اُو وڙي شهر ۾ گيو، ان پيزون مزورون نئہ نورا اُوپل ڏيڪيا. ان اُوئون ٿي پونسِيو: 'تمي ايئہ هارو ڏي نورا ڪم اُڀاھ؟' ⑦ تو اُوئي ڪيڏو: 'امون نئہ مزوري مانہ ڪيئہ نئي اُڀاڙيا، تيام.' تو اُوئہ اُوئون نئہ ڪيڏو: 'تمي پڻ زائين مارا ڌراڪون را ٻاگھ ۾ ڪوم ڪرو.'

⑧ زئيون هونز ٿي، تو ٻاگھ رئہ ڏئي آپرا مَنچي نئہ ڪيڏو: 'مزورون نئہ هاڏ ڪرين مزوري ڏئہ. مور ٿي اُوئون نئہ ڏيوا شروع ڪر جيا پڇاڙي ۾ ڪوم مانہ آيا، ان هيئہ نمونئہ نمپروار ڏين ٻڌون ٿي پڇاڙي ۾ اُوئون نئہ ڏئہ جيا ٻڌون ٿي مور ڪوم مانہ آيا.' ⑨ تو پيرهين اُو منڪ مزوري ليوا آيا جيا هونز را پونسِيڪ واگي ڪوم مانہ آيا تا، تو اُوئون نئہ پنجاھ پنجاھ رُوپيا ڏيڏا. ⑩ ٻڌون ٿي پڇاڙي ۾ اُو منڪ مزوري ليوا آيا جيا پيرهين ڪوم مانہ آيا تا. اُو ام سوچتات ريا جي 'امون نئہ پيزون ٿي وڌارئہ زڙشي.' پڻ اُوئون نئہ پڻ همراہ پنجاھ پنجاھ رُوپيا ڏيڏا. ⑪ اُوئي پئيها تو ليڏا را، پڻ زميڏار ڪن زائين اُوئا رئي گلا ڪروا مڌيا: ⑫ 'هائي منڪ جيا پڇاڙي ۾ آيا تا، هائي رُوگُو هيڪ ڪلاڪ ڪوم ڪريو، ان امي تو هارو ڏي ترڪام ڪوم ڪريوھ، توئي پڻ تمي هايون نئہ امارا زئي مزوري ڏيڏيھ.' ⑬ تئيون زميڏار اُوئون موئين ٿي هيڪا نئہ ڪيڏو: 'پائي، مئين تارو حق نئي ماريو. آبي پنجاھ رُوپيون رئي ٻول نئي ڪري، ڪي؟' ⑭ جيو تارو حق سئہ، اُو لين زا پرو. اي ماري آڀري مرضي سئہ جي جيو پڇاڙي ۾ آيو تو، اُوئا نئہ پڻ هون تارا زئي مزوري ڏيون. ⑮ مارو اي

حق نٿي ڪي، جي مارا آپرا پئيها آپري مرضي ڀرموئڻه ڪرڇ ڪرون؟ هُون ٻيرون منڪون ٿي نائوڪڻه نمونئو وونه، تيام تون ريشي ٻڙه ڪي؟”
 ①⑥ پسنه ايسو ڪيڏو: ”هيون نمونئو ايشور را راز ۾ زايا ۾، جيا همئنه وونهڙ سئو او مورم ٿيشي، ان جيا مورم سئو او وونهڙ ٿيشي.“

ايسو ترئمجي وار آپرا موت را پارام مور ٿي هميڙاوئو

(متي 20:17-19، مرقس 10:32-34، لوقا 18:31-34)

①⑦ زئيون ايسو يروشلم شهر هومو زاتوت ريو، تو شيرٽا مانه او آپرون ٻارون سونڊل شيلون نئو هيڪڻه پاهئو نويڪلائي ۾ تيڙي گيو ان اوئون نئو ڪيڏو:
 ①⑧ ”زوئو، آبي يروشلم شهر هوما هالونه ريا. ان اوئنه موئنه مون منڪ ذات را ڏيڪرا نئو زهلاوشي ان موتون پوزاريون ان شاستر زوئيا وازون رنه حواله ڪرشي، ان او مون نئو موت رئي سزا ڏيڏا رو قينصلو ڪرشي. ①⑨ ان او مون نئو ڌاري قوم وازون منڪون رنه حواله ڪرشي، جيا پگئون نئو نٿي مونت، ان او مون مانه نئولي ڪرشي، مون نئو چاٻڪا هئشي، ان مون نئو هوري مانه ساڙين مارشي پرو، پڻ ترئمئو ڏي پگئون مون نئو جيوي اوناڙشي.“

يعقوب ان يوحنا رئي مان

آپرون ڏيڪرون را مون هارو ايسو ٿي منٺ ڪرئو

(متي 20:20-28، مرقس 10:35-45)

②⑦ تئون يعقوب ان يوحنا رئي مان، زبدي رئي ڏوشي، آپرون ڏيڪرون پيڙئي ايسو ڪن آوئي ان اوئا ري پگي پڙين اوئا نئو ڪيڏو: ”مارئي تمون ٿي هيڪ وينتي سئو.“ ②① تو ايسو اوئا ٿي پونسيو: ”تون ڪي مونگئو؟“ تو اوئو ايسو نئو ڪيڏو: ”مون هارو اي ڪرو، جي زئيون تمي يادشا تين آپرا راز ۾ گهاڙي مانه پيهو، تئون مارا هيڪا ڏيڪرا نئو تمارئو زمئنه پاهئو ان پيزا ڏيڪرا نئو

تمارڻه ڏاڻه پاهڻه مون ۾ پيهاريا. " ②② ٿيا مانھ ايسو اوتا رون ڏيڪرون نڻه ڪيڏو: "تمون نڻه ڪبر نٿي جي تمي ڪي مونگوه ريا. ڪي تمي ايو ڏڪ سهي هيڪوه، جيوا ڏڪ هون سها واڙو سون؟" تو اوتي ايسو نڻه ڪيڏو: "هوڻه، امي سهي هيڪونه. " ②③ ٿيا مانھ ايسو اوئون نڻه ڪيڏو: "تمي هيوا ڏڪ تو سهشو، جيوا ڏڪ هون سهي. پڻ مارڻه زمڻه پاهڻه ڪا ڏاڻه پاهڻه پيهاريا رڻي وات مارا هات ۾ نٿي. پڻ هائي ماڳ اوئون هارو راکل سڻه، جيون هارو مارڻه باپ پگهون تيار ڪريوه."

②④ ايسو رون ٻارون سونڊل شيلون موئين ٿي پيزي ڏه شيلي زئون هائي وات هومپڙي، تو اوئون نڻه هايون پيئون پايون مانھ گهڻي رينه سڙي. ②⑤ ٿيون ايسو اوئون ٻڌون شيلون نڻه آپ ڪن تيڙاوين ڪيڏو: "تمون نڻه تو ڪبر سڻه جي ڌاريون قومون را آگيون آپرون منڪون مانھ حڪم ويوراوڻه، ان اوئون را موتا منڪ اوئون مانھ اڪتياري را ڪڻه. ②⑥ پڻ تمون موئين هم نه ٿيو ڪپڻه، پڻ جيو تمون موئين موٽو ٿيو ڪڻه، اوتا رڻه تماري شيوا ڪريا واڙو ٿيو. ②⑦ ان جيو تمون موئين آگيون ٿيو ڪڻه، اوتا رڻه زوڻه تمارو گلوم ٿيو. ②⑧ تمارڻه مارا زم پيزون رڻي شيوا ڪرو، ڪم تو هون منڪ ذات رو ڏيڪرو ايڻا هارو نٿي آيو، زم منڪ مارڻي شيوا ڪڻه. پڻ ايڻا هارو آيوه، زم هون پيزون رڻي شيوا ڪرون، ان مارو جيو پگهون را نوم مانھ ڏيون زم الاهي گهڻون منڪون نڻه اوئون رون ڪرل ڏوهون رڻي ماڻي زڙه."

ايسو پيئون اونڌون نڻه هازا هورا ڪڻه

(متي 29:20-34، مرقس 10:46-52، لوقا 18:35-43)

②⑨ زئون ايسو ان اوتا را شيلو يريخو شهر ۾ آوين اوئون رونا ٿيا، ٿيون الاهي گهڻا منڪ ايسو وونهڙ ويوا مڏيا. ③⑩ شيرڙا را پاهام ٻي اونڌا منڪ پينا تا. ان زئون اوتي هومپڙيو جي ايسو مٿه ريو، ٿيون اوتي زور ٿي هاڏ ڪرين ڪيڏو:

”او پريو، او دائود پادشا را وستار، امون مانه دٿيا ڪرو!“ ③۱ تو ٻڌي منڪي اوئون نئه هاكل ڪرين ماڻ ڪريا رو ڪيڏو، پڻ او ماڳي گهڻا زور ٿي ڪيا مڌيا: ”او پريو، او دائود پادشا را وستار، امون مانه دٿيا ڪرو!“

③۲ تيا مانه ايسو اويو ٿي ريو ان اونڌون نئه آپ ڪن تيڙاوين اوئون ٿي پونسو: ”تماري مرضي ڪي سئه؟ هون تمون هارو ڪي ڪرون؟“ ③۳ تو اوئي ايسو نئه ڪيڏو: ”او پريو، امون نئه هازا هورا ڪرو، زم امي ڏيڪي هيڪون.“ ③۴ ايسو نئه اوئون مانه قياس آيو ان او اوئون ريون اونڪيون نئه سڀيو. تو او جهت موئين وڙي ڏيڪو مڌيا، ان ايسو وونهڙ ويو مڌيا.

يروشلم شهر ۾ ايسو رو اڪري هفتو


ايسو يروشلم شهر ۾ آوئھ

ان گهڻا منڪ اوئا نئه ڀڳوون رو سونڊل پڇايا وازو مونين
اوئا را وڪوڻ ڪرئھ

(متي 11:1-21، مرقس 11:1-11، لوقا 19:28-40، يوحنا 12:12-19)

21

① زئيون ايسو ان اوئا را شيل يروشلم شهر ڏوڪڙا آيا، ان زيتون نومي ڏونگر ڪن بيت فگي پاڙا ڪن آوين پوگيا، تيون ايسو اوئون پئون شيلون نئه ام ڪين آپ ٿي مور ميليا: ② ”هومليا پاڙا موئين



زائو، ان اوئنه زائين تمي زوشو، تو هيڪ گهڏيڙي ان اوئا پيڙو وشيرو ٻونڌل هوشي. اوئون نئه سوڙين مون ڪن هاکلي آو. ③ جي ڪوڪ منڪ تمون ٿي هايا را پارام ڪئينڪ پونسئه، تو تمي اوئا نئه ڪيا جي ائون رئي پريو نئه ضرورت سئه. ان او

جهت ۾ تمون نئه لي زايا رئي موكل ڏيشي.

④ هائي ايئا هارو ٿيو، زم پڳوون رو نياپو ڏيڌا واڙا رئي اي وات

پورئي تئه:

⑤ ”صيهون ڏونگر مانھ ناول

يروشلم شهر رون منكون نئه ام ڪو:

زوئو، تمارو پادشا تمون ڪن آوئھ ريو.

او گريبي ٿي وئھ

ان گھڏيڙي را وشيرا مانھ سٿل سئھ.

⑥ پسئھ او شيلا رونا ٿيا، ان زم ايسو اوئون نئه ڪريا رو ڪيڌو تو، اوئي

همروم ڪريو. ⑦ زئيون او گھڏيڙي ان وشيرا نئه هاڪلي آيا، تئيون اوئي اوئون

مانھ آپرا ٿوئال پاتريا، ان ايسو وشيرا مانھ سٿين پينو ٿو. ⑧ ايسو نئه مون

ڏيڌا هارو الاهي گھڻي منڪي شيرٿا مانھ آپرا ٿوئال وسايا، ان پيزي منڪي وئون

ري ڏاڙڪي واڊين شيرٿا مانھ پٿراوي. ⑨ جيا الاهي گھڻا منڪ زاترو تين ايسو

مور مور ان ايسو وونھڙ وونھڙ يروشلم شهر هوما زاتات ريا، او زور ٿي ايسو

رئي جئي ام ٻولاوتات ريا:

”جئي جئي! دائود پادشا را وستار رئي جئي!

ايشور رو اشيرواڏ ايئا مانھ هوئھ،

جيو ايشور را پاها ٿي آوئھ.

جئي جئي! پرميشور رئي جئي!

⑩ زئيون ايسو يروشلم شهر ۾ آيو رو، تو پورا شهر ۾ منكون نئه جونش

سٿيو ان او ٻڌائي پونسوا مڏيا: ”اي منڪ ڪوڻ سئھ؟“ ⑪ تو جيا الاهي گھڻا

منڪ ايسو پيڙا اول هتا، او ام وڙندئي ڏيتات ريا: ”اي پڳوون رو نياپو ڏيڌا

واڙو ايسو سئھ، جيو گليل صوپا را ناصرت شهر ٿي آيوھ.“

ايسو پڳوونَ را گهر موئين ٿي واپار ڪريا وازون نٿَ ٻارا ڪاڍه

(متي 17-12:21، مرقس 15:11-19، لوقا 19-45:48، يوحنا 2-13:22)

⑫ تيا ڪيتر ايسو پڳوونَ را گهر موئين گيو. ان جيا منڪ اوتئہ پڳوونَ را نوم مانہ سڙايا هارو مال ان پڪي ويستات ريا، ان ڏونَ ۾ ڏيڏا هارو ڪاس پئها متتات ريا، اوتون ٻڌون نٿہ ٻارا ڪاڍيا پرا. ان اوتئہ پئها متيا وازون را پاتيا اوتلليا پرا ان پاريا ويسيا وازون ري سنڌلون اوتلوي پري. ⑬ ان اوتون نٿہ ڪيڏو: ”شاستر ۾ پڳوونَ رئي اي وات لڪل سئہ:

’مارو گهر پراٿنا ڪريا رو گهر ڪيوراشي.’

پڻ تمي ايئن نٿہ آڀري ڪمائي رو نمونو نايوہ ان زوتئہ ايئن نٿہ ڌاڙيلون رئي پٿارئي ناوين پناہ.

⑭ پسئہ اونڌا ان رُونڳڙا ايسو ڪن پڳوونَ را گهر ۾ آيا، ان ايسو اوتون نٿہ هازا هورا ڪريا. ⑮ زئيون موتي پوزاريئي ان شاستر زوٿيا واري زويو جي ايسو مونڌون نٿہ هازا هورا ڪريا پرا ان هم ڪرينَ پرسا ڏيڪاڙياہ، ان اي پڻ زويو جي ننڪا ٻار پڳوونَ را گهر ۾ ايسو رئي جئي زور ٿي ٻوللوئہ ريا جي ”دائود يادشا را وستار رئي جئي!“ تئون او ايسو مانہ ريشي ٻڙيا. ⑯ ان اوتئہ نٿہ وڙگائين ڪيڏو: ”هائي تون نٿي هومپڙتو ڪي، جي اي ڪي ڪئہ ريا؟“ تو ايسو اوتون نٿہ ڪيڏو: ”هوئہ، هومپڙونہ ريو. پڻ تمي شاستر رئي اي وات ڪيڏي نٿي پئي، ڪي؟“

’او پريو، تمي ننڪون ٻازون

ان ڌاوڻيون ٿي پڻ آڀرا وڪوڻ ڪراووه.“

⑰ هم ڪين ايسو موتون پوزاريون ان شاستر زوٿيا وازون نٿہ ساڌين شهر

ٿي ٻارو نيهرين بيت عنياہ پاڙا هومو گيو، ان اوتئہ زائين رات ٽڪي ريو.

ايسو انجير را وٺ نٺ هراپ ڏٺه ان يقين راڪيا را پارام شيڪارڙه

(متي 21:18-22، مرقس 11:12-14، 20-24)

⑱ پيرڙه ڏي هوار رو ويلو، زئيون ايسو پاسو يروشلم شهر هومو آوتوت ريو، تو اوتا نٺ پوک لاڳئي. ⑲ شيرڙا را پاها ۾ اوٺه انجير رو هيڪ وٺ ڏيڪيو، ان اوتا وٺ ڪن گيو. ان زوٺه، تو وٺ موئين ڪئين ميوو نٿي، روڳا پونڙا سٺ. تئيون ايسو اوتا وٺ نٺ ڪيڏو: ”تون موئين ميوو وڙي ڪيڏي نئين ٿئي!“ ان اوٺه ئي توٺه جهت ۾ انجير رو وٺ هوڪائي گيو.

⑳ اي وات ڏيڪين شيلا حيروني پڙي گيا، ان ڪيو مڌيا: ”انجير رو وٺ ڪم ڪرين جهت ۾ هوڪائي گيوه؟“ ㉑ تيا مانه ايسو اوئون نٺ ڪيڏو: ”هون تمون نٺ هاس ڪونه، جي تمي پڳوون مانه يقين ڪروه، ان ڪئين شڪ نٿي ڪرتا، تو تمي نه روڳو هم ڪري هيڪوه، زم مئين انجير را وٺ ٿي ڪريوه، پڻ تمي ايٺا ڏونگر نٺ پڻ ڪي هيڪوه: ’ايئون اوڪڙين سمونڊ ۾ زائين پڙ!‘ ان همروم ٿيشي. ㉒ ان جيا پڻ وات هارو تمي پڳوون مانه يقين راڪين پراٽنا ۾ وينتئي ڪروه، او ٻڌي واتون تمون هارو ٿيشي.“

يهودي ترم را اڳيون ايسو ري اڪتباري را پارام سوئال ڪرڻه

(متي 21:23-27، مرقس 11:27-33، لوقا 20:1-8)

㉓ ايسو پڳوون را گهر موئين زائين منڪون نٺ شيڪارڙا مڌيو. تو موتا پوزاري ان اسرائيلي قوم را اڳيون اوتا ڪن آيا ان پونسو: ”تمي ڪيا را ڪيڏا ٿي اي ڪوم ڪروه؟ ڪيئن تمون نٺه اي ڪوم ڪريا ربي اڪتباري ڏيڏيھ؟“ ㉔ تيا مانه ايسو اوئون نٺ ڪيڏو: ”هون پڻ تمون ٿي هيڪ وات پونسونه. جي تمي مارا سوئال رو جواپ ڏيشو، تو هون پڻ تمون نٺ همپڙاويھ جي هون

ڪيا ري اِڪتِياري ٿي اي ڪوم ڪرونه. (25) مارو سوئال اي سئ، يوحنا ڪيا را طرف ٿي پويتر سنون ڏيتو؟ او پڳوون را طرف ٿي پويتر سنون ڏيتو، ڪا منڪون را طرف ٿي؟

تو پسئ او آيت موئين ڪيا مڏيا: ”جي آبي ام ڪيشون: ’پڳوون را طرف ٿي،’ تو اي آپون نئ ڪيشي: ’پسئ تمي اوئا رئي وات ڪم نه مونئي؟‘ (26) پڻ جي آبي ام ڪيشون: ’منڪون را طرف ٿي،’ تو اي پيڪ سئ جي ٻڌائي گهڻا منڪ آپئ ڪلاڦ ٿين آپون ٿي ڪي ڪرشي؟ ڪم تو ٻڌائي منڪ مونئ جي يوحنا پڳوون رو نياپو ڏيڏا واڙو هتو. (27) تيام اوئي ايسو را سوئال مانھ ام ڪيڏو: ”هايا رئي امون نئ ڪهر نئي.“

تو ايسو اوئون نئ ڪيڏو: ”تو پسئ هون پڻ تمون نئ نئين همپڙاون جي هون ڪيا ري اِڪتِياري ٿي اي ڪوم ڪرونه ريو.“

بيئون ڏيڪرون رو مثال

آپ نئ ڌرمي نه ڏيڪارو پڻ پڳوون ري مرضي مانھ ويوو

(28) ٽئين ايسو موتون پوزاريون ان اسرائيلي قوم رون آڳيونون نئ ڪيڏو: ”تمي ايئا وات را پارام ڪي سوچوه؟ هيڪ منڪ هتو، جيا را ٻي ڏيڪرا هتا. اوئ هيك ڏيڪرا ڪن زائين ڪيڏو: ’ڏيڪرا، آڙ تون زائين ڌراڪون را ٻاگھ ۾ ڪوم ڪر.‘ (29) پڻ اوئ ڪيڏو: ’هون نئين زائون.‘ توئي تيا ڪيڙ اوئ آڀرو ڪيال پڌليو ان ڪوم مانھ گيو پرو. (30) ان ٻاپ وڙي ٻيڙا ڏيڪرا ڪن گيو ان اوئا نئ پڻ هاڳي ڪوم ڪريا رو ڪيڏو. تو پيڙئ ڏيڪرئ ڪيڏو: ’هوئ، ٻا.‘ پڻ او ڪوم مانھ نه گيو. (31) هوئ، هايون بيئون موئين ٿي ڪيئ آڀرا ٻاپ رئي مرضي پوري ڪري؟“ تو اوئي وڙنڌي ڏيڏي: ”پرهين ڏيڪرئ.“ تو ايسو اوئون نئ ڪيڏو: ”هون تمون نئ هاس ڪونه، مور ٿي تمي نئين، پڻ ناڪو ليڏا واڙا ان پونڌي ڏوشي پڳوون را راز موئين زاشي. (32) ڪم تو يوحنا پويتر سنون

ڏيڏا واڙو تمون ڪن ايٿا هارو آيو تو زم پڳوون ري وات مانھ وُڍا رو مارڳ
ڏيڪاڙئ، پڻ تمې اوٿا ري وات مانھ يقين نہ ڪريو. پڻ ناڪو ليڏا واڙي ان
پُونڌِيئي ڏوشيئي اوٿا ري وات مانھ يقين ڪريو ان آپرا ڪراپ ڪوم ساڏين
توبونھ ڪريھ. تويي پڻ تمې هائي زوئين آپرو ڪيال نہ پڌليو ان يوحنا ري وات
مانھ يقين نہ ڪريو."


ڳولون هازيون رو مثال ايسو آپ نڌ ڌڻي رو ڏيڪرو ڪين شيڪاڙئھ جي او پڳوون رو ڏيڪرو سئ

(متي 33:21-46، مرقس 12:1-12، لوقا 19:20-9)

③③ پسنه ايسو ڪيڏو: "تمې هيڪ پيزئي مثال رئي وات هومپرو. هيڪ زميڏار هتو.
اوتھ ڌراڪون رو ٻاگھ پوڪايو، اوٿا رتھ پيوڙيئي واڙ ڏيورائي، اوٿا موئين ڌراڪون
نئھ ڦيهليا هارو ان رس ڪاڍيا هارو هوڏئي ٿوراوي، ان اوٿا مانھ سوڪئي ڏيڏا
هارو ڏاڳڙو ٿوراوي. ان پسنه ٻاگھ موئين هاري اوپاڙين آپ ڪياڪ شيتي ملڪ
۾ گيو پرو.

③④ زئيون ڌراڪون پاڪيا را ڏي ڏوڪڙا آيا، تو ڌڻي آپرون نوڪرون نئھ
آپرو حصو هازيون ڪن ليوا ميليا. ③⑤ پڻ هاريئي اوٿا رون نوڪرون نئھ زهالين
هيڪا نئھ مار ڪاڍي، پيزا نئھ نمو ماريو پرو، ان ترٿما نئھ پوٿا هئين ماريو
پرو. ③⑥ پسنه ڌڻي اڳي ٿي پيزا گهٽا نوڪر ميليا. پڻ هاري اوئون ٿي هاڳي
نمونئھ وُڍا.

③⑦ نيٺ اوتھ آپرو ڏيڪرو ميليو، ڪم تو او سوچتو تو جي 'هاري ضرور مارا
ڏيڪرا رو مون راکشي'. ③⑧ پڻ زئيون هاريئي ڌڻي را ڏيڪرا نئھ ٻاگھ موئين
اوتون ڏيڪيو، تو اوئي آپت موئين اي صلاح ڪري: 'هائي تو ڌڻي رو ڏيڪرو
سئ. ليو، آبي هايا نئھ مارون پرو! پسنه اي ٻاگھ هايا رو نئين ٿئھ، پڻ آپڻو



ٿي زاشي. ③٩ پستہ ايٿي ڌڻي را ڏيڪرا
ننه زهالين ٻاگه ٿي ٻارو ڪاڍيو پرو ان
اوتان ننه ماريو پرو.

④٠ پستہ ايسو منڪون ٿي پونسو:
”هوئ، زئون ٻاگه رو ڌڻي آوشي، تئون

هايون هاريون ٿي ڪي ڪرشي؟“ ④١ تو اوتان ايسو ننه وڙندڻي ڏيڏي: ”او
هايون پوندون منڪون ننه پوندڻي هاري مارشي پرا، ان آپرا ٻاگه ري همپاز
هارو پيزا هاري اويارشي، جيا ميوا پاڪيا رنه توتنه اوتان ننه ميون ٿي حصو
ڏيشي.“ ④٢ تئون ايسو اوتون ننه ڪيڏو: ”هائي وات تو هاسي سئ، پڻ تمون
ننه هيا وات را مطلب رئي ڪهر نٿي ڪي؟ تمي شاستر ۾ اي وات ضرور
پئي هوشي:

’جيا پتر ننه رازي گهٽ هزمين ڦڳوريوت پرو،
او هاڳي پتر ٻڌون ٿي ضرورت وازو ٿيوه.
هائي وات ايشور را پاها ٿي ٿيھ،

ان امون هارو هائي ڪتي حيروني ان ڪشي رئي وات سئ.

④٣ تيام هون تمون ننه ڪاتري ٿي ڪونه، پڳون آپرا راز را منڪ هويا رو حق
تمون اسرائيلي قوم رون منڪون ٿي ڪوهي ليشي، ان اوتون منڪون ننه ڏيشي،
جيا پڳون را راز ننه مونين پڳون ري مرضي پرموتنه ڪوم ڪرئ. ④٤ (هائي
پتر پڳون رو سونڊل او رو او ڌڻي رو ڏيڪرو سئ. جيو ڪوئي پڳون را سونڊل

ري واتون نئين مونڻه، تو اوتا ننه ضرور سزا زڙشي، جيو اوتا پتر ٿي آڪڙين پڙشي، او اڙي اڙي ٿي زاشي. ان جيا مانھ او پتر پڙشي، اوتا ننه آتو ڪرشي پرو.)"

④5 موتا پوزاري ان فريسي پالتي را منڪ ايسو ري ڪيڏل مثال ري واتون هومپڙين هزمي گيا جي ايسو اوئون را پارام ڪڻه ريو. ④6 تيام او ايسو ننه زهالوا ڪرتا تا. پڻ او منڪون ٿي پيڻاتات ريا، ڪم تو الاهي گهڻا منڪ ايسو ننه پڳوون رو نياپو ڏيڏا واڙو هزمتات ريا.

موتي ڏاوت رو مثال پڳوون ٻڌون ننه آپرا راز موئين آيا رئي ڏاوت ڏنه

(متي 1:22-14، لوقا 14:15-24)

22 ① پسنه ايسو اوئون ننه وڙي اي پيڙي مثال رئي وات همپڙاوتي: ② "ايشور رو راز ايتا را زم سئ. هيڪ پاڌا هتو. اونه آپرا ڏيڪرا را ويوا رئي ڏاوت ڪري. ③ ان ڏاوت رنه ٿوئنه اونه آپرون نوڪرون ننه ڏاوتيون ڪن ميليا زم اوئون ننه تيڙي اونه. پڻ ڏاوٽو آووا نٿا ڪرتا. ④ تئيون اونه وڙي پيزون نوڪرون ننه ام ڪين ميليا: 'تمي زائين ڏاوتيون ننه ڪيا پرو جي مئين ڪاڏا هارو ٻڌوئي ڪئين تيار ڪرايوه. سونيل مال هلالل سئ، ان ٻڌوئي ڪئين تيار سئ. ويوا ري ڏاوت مانھ هالو.' ⑤ پڻ ڏاوتيئي هيا وات رو ڪئين ڪيال ٿي نه ڪريو، پڻ آپرا آپرا ڪوم مانھ گيا پرا، ڪئينڪ آپري بني مانھ گيا پرا، ان ڪئينڪ واپار مانھ گيا پرا. ⑥ ان پيڙي ڪئينڪ ڏاوتيئي پاڌا رون نوڪرون ننه زهالين اوئون رئي پيعزئي ڪري ان اوئون ننه ماريا پرا. ⑦ تئيون پاڌا ننه گهڻي رينه سڙي، ان اونه آپرون ڦوجيون ننه ميليا زم اوئون ڪونيون ننه مارئ پرا، ان اوئون رو شهر ٻاڙه پرو. ⑧ پسنه پاڌا آپرون نوڪرون ننه ڪيڏو: 'هونه ويوا رو ڪاڏو تيار سئ.



پڻ اُو منڪ جيون ننه مئين ڏاوت ڏيڏئي ٿئي، اُو ڏاوت مانھ آيا رنھ لائيڻ نٿا.
 ⑨ تيام ھوئہ تمی زائو، ان شھر رون چونڪون مانھ زائين زتا پڻ منڪ اوتھ
 ڏيڪو، اوتون ٻڌون ننه ويوا ري ڏاوت مانھ آيا رو ڪو. ⑩ تو نوڪر اوتون
 نيھرين شھر ريون شيريون ۾ ڳيا، ان زتون منڪون ننه اوتھي ڏيڪيا، پلھ نائوڪا
 ڪا ڪراپ، جيوا پڻ ھتا، اوتون ٻڌون ننه ڏاوت مانھ پيڙا ڪريا. ان ويوا ري ڏاوت
 رئي جئي جڳا ھتھي، اُو ڏاوتيون ٿي پرائي ڳئي.

⑪ زئيون پاڌشا ويوا ۾ اول ڏاوتيون ننه زويا ھارو اوتھ جڳا ۾ آيو، تئيون
 اوتھ زويو جي اوتھ ھيڪ ايوو منڪ ھتو جيئھ ويوا ھارو صحيح لوگھڙا نٿا
 پيريا. ⑫ تيام پاڌشا اوتھ منڪ ٿي پونسيو: 'پائي، تون ويوا را لوگھڙا پيريا وڳر
 ايئھ ڏاوت مانھ ڪم ڪرين آيوھ؟' پڻ منڪ ٻوليو ئي نئين. ⑬ تئيون پاڌشا
 شيواڌاريون ننه ڪيڏو: 'ايئا را ھاٿ پڳ ٻونڌين ايئا ننه ٻارو اندارا ۾ ڦڳوزو
 پرو. اوتھ اُو روشي ان ڏونت گھرڙيا ڪرشي.' "

⑭ تئيون ايسو ھايا مثال رو مطلب ام ھزمايو: "پڳوون گھڻون منڪون

ننه آڀرا راز ۾ آيا رڻي ڌاوت ڏهه، پڻ ٿوڙا منڪ پڳوون راز ۾ آيا هارو سونڊل سته.

منڪ ايسو ننه ڌرم ان حڪومت را چڪر ۾ ڦٽڙيا هارو ٽيڪس را پٺيها پريا را پارام سونال پونسنه

(متي 22:15-22، مرقس 12:13-17، لوقا 20:20-26)

⑮ تئيون فريسي پالتي ري منڪي اوئون زائين آڀت ۾ صلاح ڪري جي او ڪيوئه نموننه ايسو ننه اوئا ري وات ۾ ڦٽڙاوه. ⑯ ان اوئي آپري فريسي پالتي رون ڪئينڪ منڪون ننه راز ڪريا واڙا هيروڊيس را پاها رون ڪئينڪ منڪون پيڙا ايسو ڪن ميليا. اوئي زائين ايسو ننه ڪيڏو: ”گرو جي، امون ننه ڪهر سته جي تمي هاسا سو، ان تمي هاس پرموننه پڳوون رو مارگ ڏيڪاروه، ان تمي ڪيا منڪ ٿي نٿي پيڻاتا، ڪم تو تمي ڪيا رو پڻ پاھو نٿي لڻا. ⑰ تيام امون ننه هزماوو جي تمي ڪي سوچوه؟ ڌرم پرموننه رومي حڪومت را پاڌشا ننه ٽيڪس را پٺيها ڏيو ڪيئه، ڪا نا؟“

⑱ ايسو اوئون رو ڪراپ ڪيال زوئي گيو جي او مون ننه ڪا ڌرم رنه ڪلاڦ ڪا حڪومت رنه ڪلاڦ ٻوللوا ڪرئه. تيام اوئون ننه ڪيڏو: ”ڪوتون منڪون، تمي مونڊا را مينا پڻ انڌر را ڪارا سو. تمي مون ننه ڪم ڦٽڙاوا ڪروه



ريا؟ ⑲ تمي مون ننه هيڪ ايوو سڪو ڏيڪارو، جيا ٿي منڪ ٽيڪس پريه. ”تو او ايسو ڪن هيڪ چونڊي رو سڪو لي آيا. ⑳ تو ايسو اوئون ٿي پونسو: ”ايئا مانھ ڪيا رو ڦوئو سته ان ڪيا رو نوم لڪل سته؟“ ㉑ تو اوئي ڪيڏو: ”رومي حڪومت را پاڌشا رو.“

تئيون ايسو اوئون ننه ڪيڏو: ”جو پاڌشا رو سته، او پاڌشا ننه ڏيو. ان جو پڳوون رو سته، او پڳوون ننه ڏيو.“

② هائي وات هومپڙين اُو حيروني پڙي ڳيا، ان ايسو ننه ساڏين اُوئون ڳيا پرا.

منڪ ايسو ننه ڦٽاڙيا هارو مرلون را جيوِي اُونيا را پارام سوئال پونسئھ

(متي 23:22-33، مرقس 12:18-27، لوقا 20:27-40)

② اونه ئي ڏي صدوقي پالتي را ڪئينڪ منڪ ايسو ڪن آيا. هونه صدوقي پالتي را منڪ اي وات موننه جي پڳوون مرل منڪون ننه وڙي جيوِي نئين اوناڙئه. اوني ايسو ٿي سوئال پونسيا هارو ڪرين ڪيڏو: ④ ”گرو جي، موسي ام ڪيڏو تو، جي ڪوڪ منڪ اولاد ووتو مري زائنه، تو اونا اڏمي رو پائي اونا ري رنڌال ڏوشي ننه آپرا گهر ۾ راکنه، زم آپرا مرل پائي هارو اولاد ٿنه. ⑤ هونه، امون ۾ هات پائي هتا. پيرهون پائي پرڻيو ان اولاد ووتو مري ڳيو. تيام هيا حڪم پرموتنه پڙنه پائي اونا ري رنڌال ڏوشي ننه آپرا گهر ۾ راکئي. ⑥ ان پڙو پائي پڻ اولاد ووتو مري ڳيو. ان پسنه ترنما پائي ٿي پڻ همروم ٿيو. ان هيونه نموننه هات ئي پايي لروپور هاڳي ڏوشي ننه آپرا گهر ۾ راکئي ان اولاد ووتا مري ڳيا. ⑦ نيٺ هايون ٻڌون پايون ڪيڙ اُو ڏوشي پڻ مري ڳئي. ⑧ هونه زئون پڳوون مرل منڪون ننه جيوِي اوناڙشي، تو اُو ڏوشي ايئون هاتون پايون موئين ٿي ڪيا رئي ڏوشي ٿيشي؟ ڪم تو هاتي زئي اونا ننه آپرا گهر ۾ راکئي ٿئي.“ ⑨ تيا مانه ايسو ائون ننه ڪيڏو: ”تمي تو پُول سو، ڪم تو نڪو تمي شاستر هزموه، نڪو تمون ننه پڳوون ري ڪڙا رئي ڪهر سئ. ⑩ ڪم تو زئون پڳوون منڪون ننه موت ٿي جيوِي اوناڙشي، تئين آڪاش ۾ منڪ نڪو پرڻشي نڪو ڏوشي گهر ۾ راکشي، پڻ آڪاشي ڏوتون جيو هوشي.

⑩ هونه پڳوون رنه مزلون ننه جيوِي اوناڙيا را پارام تمون ننه ڪهر نٿي ڪي، جي پڳوون آپ تمون هارو شاستر ۾ ڪي ڪيڏوه؟ تمي پڳوون رئي اي

وات ضرور پئڻي هوشي: (32) 'هُون ابراهيم، اِصْحاق ان يعقوب رو پڳوون سون.' هون پڳوون مرلون رو نئي پڻ جيتون رو سٺ. تيام وات ساوئي سٺ جي او منڪ پلٽ مري ڳيا تا، پڻ توئي جيتا سٺ.

(33) زئون اوڻه اوپل گهڻي منڪي هائي وات هومپڙي، تو او ايسو رٿ شيڪاڙيا مانھ حيروني پڙي ڳيا.

پڳوون رو ڏيڏل ٻڌون ٿي موتو حڪم

(متي 34:22-40، مرقس 12:28-34، لوقا 10:25-28)

(34) زئون اوئي هومپڙيو جي ايسو صدوقي پالتي وازون نٿه جواپ ڏين ماٺ ڪراياھ، تئين فريسي پالتي را منڪ ٻڌائي پيڙا ٿين ايسو ڪن آيا، (35) ان اوئون موئين ٿي هيڪڻه زٽه، جيو شاستر زوڻيا وازو هتو، ايسو رو آزمو ليڏا هارو اوئا ٿي پونسو: (36) "گرو جي، موسي رون لڪل حڪمون موئين ٿي ٻڌون ٿي موتو حڪم ڪيو سٺ؟"

(37) تو ايسو اوئا نٿه وڙندڻي ڏيڏي: "ايشور آڀرا پڳوون هون، آڀرا پورا من ٿي، آڀرا پورا جيو ٿي، ان آڀري پوري عقل ٿي پريم ڪرو. (38) هائي حڪم ٻڌون ٿي موتو ان کاس حڪم سٺ. (39) ان هايا جيو پيزو حڪم اي پڻ سٺ، پيزون ٿي آپ را زم پريم ڪرو. (40) موسي را لڪل ٻڌائي حڪم ان پڳوون رو نياپو ڏيڏا وازون ري لڪل ٻڌي واتون، او ايئون پيئون حڪمون ۾ آوي زائھ."

ايسو شيڪاڙه جي پڳوون رو سونڊل پڇايا وازو ڪريست

داؤد پادشا ٿي الاهي گهڻو موتو سٺ

(متي 41:22-46، مرقس 12:35-37، لوقا 20:41-44)

(41) زئون فريسي پالتي را منڪ ٻڌائي پيڙا هتا، تئين ايسو اوئون ٿي پونسو: (42) "تمي پڳوون را سونڊل پڇايا وازا ڪريست را پارام ڪي هڙموھ؟ او ڪيا رو

اولاد سته؟" تو اوني ايسو ننه كيدو: "او تو دائود پادشا رو اولاد سته." (43) تو ايسو اوئون ننه كيدو: "تو پسته دائود اوئا ننه 'پريو' كم كنه؟ دائود آپ پويتر آتما ري كزا ٿي پگهون را سونيل پچايا واذا كريست را پارام شاستر م ام لکيوه:

(44) ايشور مارا پريو ننه كيدو

مارنه زمئنه پاهنه مون م پيه،

زئيون هوڌي هون تارون دشمنون ننه هراوين

تاري پگي نه لگاڙون.

(45) زئيون دائود آپ پگهون را سونيل پچايا واذا كريست ننه 'پريو' كنه، تو پسته كريست كم كرين روهو اوئا رو اولاد ٿيو؟"

(46) ان كوئي ايسو را سوئال رو جواپ ڏي نه هيكيو، نكو اوئا ڏي ٿي لين
 ڪيا ننه اي هيمنت ٿي جي او ايسو ٿي ڪئينڪ وات پونسه.

ايسو شاستر زوٿيا واڙون

ان فريسي پالتي رن منكون ٿي هوشيار ريا رو ڪنه

(متي 12:1-23، مرقس 38:12-39، لوقا 11:43، 46، 20:45-46)

23 ① پسته ايسو اوٿنه اوپل ٻڌون منڪون ان آپرون شيلون ننه پڻ كيدو:
 ② "شاستر زوٿيا واڙا ان فريسي پالتي را منڪ موسي ري جگا مانه سته، ان اوئون مانه پگهون را حڪم شيڪاڙيا رٿي زميوارئي سته. ③ تيام جيا پگهون را حڪم او تمون ننه شيڪاڙه، اوئون ٻڌون حڪمون ننه مونو ان اوئون مانه وو. پڻ اوئون رن ڪرل ڪومون پرموئنه مت وو. ڪم تو زم او شيڪاڙه، هم او آپ نتي ڪرتا. ④ او پگهون رن حڪمون ٿي وڌارنه آپرا پاها ٿي ايو ا ڏورا حڪم منڪون ننه ڏنه، جيون رو پار منڪ سهي نتي هيڪتا، پڻ آپ اوئا پار ننه هات ٿي نتي سهارتا.



⑤ جيا پڻ ڪوم اُو ڪرڻ، اُو ٻڌائي ڪوم منڪون نٿه ڏيکارڻا هارُو ڪرڻ. ڪم تو پڳوونَ شاستر ري واتون يادَ راکيا رو ڪيڏو، پڻ اُو شاستر ري لڪل واتون موٽي ڏيئي ۾ نوڪين ساوڻه نمونن آڀرا نلاڙ مانھ ٻونڌڻ، زم ٻڌائي زوڻه جي اُو ڪياو ڌرمي منڪ سڻ. ان پڳوونَ آڀرون حڪمون رڻي يادَ ڏيورايا هارُو ڦونٺڪون واڙي ساذر اوڍيا رو ڪيڏو،

پڻ اُو ايوِي ساڌرون اوڍڻه جيون را موٽا موٽا ڦونٺڪا هوڻ، زم ٻڌائي زوڻه جي اُو ڪياو ڌرمي منڪ سڻ. ⑥ اُوئون رو شونق اي سڻ، جي اُو ڌاوتون ۾ مون واڙا ماڳ ۾ پيهڻ، ان پڳوونَ رون منڌرون موئين گهاڏيون مانھ پيهڻ، ⑦ ان منڪ اُوئون ٿي بازارون ۾ نمي نمين ملڻ، ان اُوئون نٿه 'گرو جي' گرو جي 'ڪڻ.

⑧ پڻ ٽمي جيا ماري واتون مونوھ، ٽمي آپ نٿه گرو مت ڪيوراوو، ڪم تو تمارو روڳو هيڪڻه گرو هُون سون، ان ٽمي تو ٻڌائي هيڪا پيزا را پائي سو. ⑨ ان ٽمي ايٺا ڏنيا ۾ ڪيا موٽا منڪ را مون ۾ اُوٺا نٿه ٻاپ مت ڪو، ڪم تو تمارو روڳو هيڪڻه مون واڙو ٻاپ پڳوونَ سڻ، جيو آڪاش ۾ سڻ. ⑩ ان نڪو ٽمي آپ نٿه تارڻ رو مارڳ ڏيکارڻا واڙا ڪيوراوو، ڪم تو تمارو روڳو هيڪڻه تارڻ رو مارڳ ڏيکارڻا واڙو سڻ، ان اُو پڳوونَ رو سونڊل پچايا واڙو ڪريست هُون سون. ⑪ جيو تمون موئين ٿي ٻڌون ٿي موٽو سڻ، اُوٺا رڻه تماري شيوا ڪريا واڙو ٿيوو ڪپڻ. ⑫ ڪم تو جيو پڻ آپ نٿه گهڻا مون واڙو هڙمڻ، اُوٺا رو مون پڳوونَ گهٽ ڪرشي. ان جيو آپ نٿه گهٽ مون واڙو هڙمڻ، اُوٺا رو مون پڳوونَ گهڻو ڪرشي."

ايسٽو شاستر زوٽيا واڙون ان فريسي پالتي واڙون رو ٺوه ڪايئھ

(متي 13:23-36، مرقس 4:40، لوقا 11:39-52، 20:47)

⑬ ”شاستر زوٽيا واڙون ان فريسي پالتي واڙون، تمي جيا مونڊا را مينا پڻ اندر را ڪارا سو، تمارا ڪياوا هار ٿيشي! ڪم تو تمي ڳلت واتون شيڪارڙين منڪون ننه ايشور را راز ۾ زيا رو موقعون ٿي ڏيتا. تمي آپ ايشور را راز ۾ موٽه نٿي وٺتا، نڪو اوئون ننه ايشور را راز ۾ موٽه وٺو ڏيو، جيا وٺو ڪرھ.

⑭ (شاستر زوٽيا واڙون ان فريسي پالتي واڙون، تمي جيا مونڊا را مينا پڻ اندر را ڪارا سو، تمارا ڪياوا هار ٿيشي! ڪم تو تمي ڳلتي ڪرين رنڊال ڏوشيون را گهر ڦروھ، ان آپ ننه ٺاڻوڪا ڏيڪارڙيا هارو موٽي موٽي پراڻائون ڪروھ. تيام ڀڳوون تمون ننه گهٽي سزا ڏيشي.)

⑮ شاستر زوٽيا واڙون ان فريسي پالتي واڙون، تمي جيا مونڊا را مينا پڻ اندر را ڪارا سو، تمارا ڪياوا هار ٿيشي! ڪم تو تمي هڪا منڪ ننه آپرا ڌرم مانھ اوٽيا هارو سمونڊ مٽي زانوھ ان ڌرتي را ڌنگ هوڏي زانوھ، پڻ زئون او تمارا ڌرم ۾ آوھ رو، تيون اوٽا ننه تمي آپ ٿي پيو ايوو ڪراپ ڪروھ جي او تمارا زم ڀرڳ ۾ زيا جيوو ٿھ.

⑯ اونڌون آڳوونون، تمارا ڪياوا هار ٿيشي! ڪم تو تمي ام شيڪاروھ: ’جي ڪوئي ڀڳوون را گهر رو هون ڪائين وائڏو ڪرھ، تو ڪئين وات نٿي. پڻ جي ڪوئي ڀڳوون را گهر را هيم رو هون ڪائين وائڏو ڪرھ، تو اوٽا رھ او وائڏو ضرور پورو ڪروو.‘ ⑰ تمي ڪتا پوڙا ان اونڌا سو. هاين پئون ۾ ڪئي شينھ وڌيڪ سھ؟ او هيم وڌيڪ سھ، ڪا ڀڳوون رو گهر وڌيڪ سھ، جيا ري ڪري او هيم پوٽر ٿيوھ؟ ⑱ ان تمي ام پڻ شيڪاروھ: ’جي ڪوئي ڀڳوون را گهر ۾ مال ساڙيا ري جڳا رو هون ڪائين وائڏو ڪرھ، تو ڪئين وات نٿي. پڻ جي ڪوئي اوٽا جڳا مانھ ساڙل مال رو هون ڪائين وائڏو ڪرھ، تو اوٽا رھ او

وائيڌو ضرور پورو ڪرو. (19) ٽمي ڪتا اونڌا سو. هاڻيون ٻيئون ۾ ڪئي شينھ وڌيڪ سئھ؟ اُو مال وڌيڪ سئھ، ڪا مال ساڙيا رڻي جڳا وڌيڪ سئھ، جيا مانھ ساڙيا ري ڪري اُو مال پوئتر ٿيوھ؟ (20) تيام جيو منڪ مال ساڙيا ري جڳا رو ھون ڪاڻھ، اُو نہ رُوڳو مال ساڙيا ري جڳا رو ھون ڪاڻھ، پڻ اُوڻا ٻڌا مال رو پڻ ھون ڪاڻھ، جيو اُوڻا جڳا مانھ سڙاڻھ. (21) ان جيو منڪ ايٺا پڳوون را گھر رو ھون ڪاڻھ، تو نہ رُوڳو ايٺا پڳوون را گھر رو ھون ڪاڻھ، پڻ پڳوون رو پڻ ھون ڪاڻھ، جيو ايٺا گھر ۾ رڻھ. (22) ان جيو منڪ آڪاش رو ھون ڪاڻھ، تو اُو پڳوون ري گھاڏي رو پڻ ھون ڪاڻھ، ان پڳوون رو پڻ ھون ڪاڻھ، جيو اُوڻا گھاڏي مانھ ٻيٺل سئھ.

(23) شاستر زوڻيا واڙون ان فريسي پالڻي واڙون، ٽمي جيا مونڊا را مينا پڻ انڌر را ڪارا سو، تمارا ڪيا هار ٿيڻي! ڪم تو ٽمي ڦوڏنا، ورياري، ان جيرا ٿي ڏھمو حصو تو پڳوون را نوم مانھ ڏيوھ، پڻ ٽمي موسيٰ رون لڪل حڪمون ري موٽي واتون ساڏيھ پري، ان ٽمي نڪو منڪون ٿي انصاف ھون ووھ، نڪو منڪون مانھ ڏٺيا ڪروھ، ان نڪو پڳوون مانھ وشواس را ڪوھ. تمارئھ هاڻيون موٽيون واتون مانھ ويو تو، ان ايئون نونيون واتون مانھ پڻ وينا ريو تو. (24) اونڌون آڳيونون، ٽمي زوڻئھ حروم مسر نئھ ڪاڏيا هارو پيڏا رو پوڻي پڻ ساڙوھ، پڻ حروم اُونٺ نئھ ٽمي هارو اوتاري زانوھ. ٽمي نونيون واتون مانھ تو ڏيون ڏيوھ، پڻ موٽا ڏوھ همراھ ڪرتا ريوھ.

(25) شاستر زوڻيا واڙون ان فريسي پالڻي واڙون، ٽمي جيا مونڊا را مينا پڻ انڌر را ڪارا سو، تمارا ڪيا هار ٿيڻي! ڪم تو ٽمي ڳلاس ان پليٽ رو نہ رُوڳو موئينليو پاھو پڻ ٻارليو پاھو پڻ ريت ڀرموئڻھ ڏوئوھ، پڻ جيون کاڌا پيڏا ريون شينھون ٿي اُو پرل سئھ، اُو ٽمي لالچ ان ٺڳي ٿي آپ هارو ڪوھي ليوھ. (26) ٽمي فريسي پالڻي واڙا ڪتا اونڌا سو. مور ٿي ٽمي آپ من را پوئتر ٿيو ان پوئتر نمونئھ آپرا کاڌا پيڏا هارو ڪماڻو، تو پسئھ جئين ڪئين ٻارلي واتون سئھ، اُو

آڻوڪي آپ پويتر ٿي زاشي.

(27) شاستر زوڻيا وازون ان فريسي پالتي وازون، تمي جيا مونڊا را مينا پڻ اندر را کارا سو، تمارا ڪيا هاز ٿيشي! ڪم تو تمي مقومون را زم سو، جيون مانه ڌوڙو رنگ هٿل سٺه. پارا ٿي تو او نائوڪا ڏيڪاڻه، پڻ موئين مرلون رون هاڏڪون ان هر نمونا ري گهندگي ٿي پرال سٺه. (28) هيونئ نمونئ تمي منڪون ري نظر ۾ پڳوون ري وات مانه وودا وازا ڏيڪاڻوه، پڻ من را تمي روڳا ڪوتا سو ان پڳوون رون حڪمون رٿه ڪلاڦ ووه.

(29) شاستر زوڻيا وازون ان فريسي پالتي وازون، تمي جيا مونڊا را مينا پڻ اندر را کارا سو، تمارا ڪيا هاز ٿيشي! ڪم تو تمي پڳوون رو نياپو ڏيڌا وازون را قبا نوراووه، ان پڳوون ري وات مانه وودا وازون رون قبون نئ شنگاروه، (30) ان تمي اي وڏائي ڪروه: 'جي امي آپرون ٻاپ ڏاڏون رون ڏيئون ۾ هوئت، تو امي پڳوون رو نياپو ڏيڌا وازون را ڪون ڪريا ۾ اوئون پيڙا نه ٿئت.' (31) هم ڪيڏا ٿي تمي آپ ٿاپيئي ڏيوه ريا جي تمي اوئون را اولاد سو، جيئي پڳوون رو نياپو ڏيڌا وازون نئ ماريات پرا. (32) تو پسئ تمي زائين، جيو ڪون ڪريا رو ڪوم تماري ٻاپ ڏاڏي شروع ڪريو تو، او تمي قبا نوراوين پلئ پورو ڪرو!

(33) هاڻ جيوون ڪراڻ منڪون، من رون پليتون، تمي هميش ري سزا ٿي ڪم ڪرين پچي هيڪشو؟ پڳوون ضرور تمون نئ نرگ ۾ ڦڳوڙيا رو ڦينصلو ڪرشي. (34) تيام زوڻو، هون تمون ڪن پڳوون رو نياپو ڏيڌا وازون نئ، عقل وازون نئ ان شاستر زوڻيا وازون منڪون نئ ميلي، ان اوئون موئين ٿي تمي ڪيونڪ نئ نمو مارشو ان ڪيونڪ نئ هوڙي مانه ساڙين مارشو پرا، ان تمي ڪيونڪ نئ آپرون منڌرون ۾ چاڻڪا هئشو، ان هر شهر ۾ اوئون نئ لار ٿيشو. (35) تيام دنيا ۾ جيون پڳوون ري وات مانه وودا وازون را ڪون ٿيا، اوئون ٻڌون را ڪون رٿي سزا پڳوون تمون نئ ڏيشي. پڳوون ري وات مانه وودا وازا هابل ٿي لين برڪياه را ڏيڪرا زڪرياه هوڏي، جيا نئ ايئن پڳوون را گهر موئين يويتر جگا ان مال

ساڙيا ري جڳا وسا ماريوت پرو، ③⑥ هُون تمون ننه هاس ڪونه، اُوئون ٻڌون را ڪُون رُئي سزا پڳوون اِيتا همٿوڪي پيڏي رون منڪون ننه ڏيشي.

ايسُو يروُشلَم شهر مانھ اقسوس ڪرڻھ

(متي 23:37-39، لُوقا 13:34-35)

③⑦ ”يروُشلَم، او يروُشلَم، تُون ڪيوو شهر سئھ! تارا منڪ پڳوون رو نياپو ڏيڏا واڙون را ڪُوني سئھ. جيون ننه پڳوون تُون ڪن ميلئھ، اُوئون ننه اُو پوئون ٿي



مارئھ پرا. زم ڪوڪڙي آڀرون پشيون ننه آڀريون پونڪون هيٺ هٽاڙئھ، تم مئين پڻ گهڻي وار ٿارون منڪون ننه آپ ڪن تيڙاوا ڪريا. پڻ تمي جيا يروُشلَم را منڪ سو، تمي تو نه مونيا. ③⑧ هُونه زوئو، تمون ڪن جيو اي پڳوون رو گهر

سئھ، پڳوون اِيتا منڊر ننه ساڏشي پرو. ③⑨ ڪم تو هُون تمون ننه ڪاتري ٿي ڪونه، هُونه ٿي لين زئون هُوڏي هُون پڳوون را پاها ٿي راز ڪريا واڙو ٿين پاسو نه آوون ان تمي مُون ننه پاڙين ام نه ڪو جي ’ايشور رو آشيرواڏ اِيتا مانھ هونھ، جيو ايشور را پاها ٿي آونھ،’ تئين هُوڏي تمي مُون ننه وڙي پڙي وارڪو ماڳي نئين ڏيڪو.

ايسُو پڳوون رو گهر ڪنم ٿيا را پارام مور ٿي همپڙاوئھ

(متي 24:1-2، مرقس 13:1-2، لُوقا 21:5-6)

① ايسُو پڳوون را گهر ٿي نيهرين زاتوت ريو، تو اُونا را شيلا اُونا 24 ڏوڪڙا آيا ان اُونا ننه پڳوون را گهر ري ٻڌي جڳائون ڏيڪاڙوا مڏيا جي اُو ڪيوي ناٿوڪي سئھ. ② تيا مانھ ايسُو اُوئون ننه ڪيڏو: ”اي ٻڌي جڳائون

تامي زوئوھ ريا، نا؟ ھون تمون نئھ ھاس ڪونھ، اي پڳوون رو گھر ھاو ڪئم ٿي زاشي ان ايتا موئين ٿي ھيڪ ئي پٿر ھازو نئين پڇئھ.

ايسو مور ٿي ھمپڙاوئھ جي پڳوون رو گھر ڪئم ٿيا مور ڪي ٿيشي
ان ھوشيار ڪرئھ جي ھائي ٻڌوئي ڏنيا رئي پڇاڙي نئي

(متي 14-3:24، مرقس 13-3:13، لوقا 19-7:21)

③ زئون ايسو زيتون نومي ڏونگر مانھ زائين پينو، تئين شيلا نويڪلائي ۾ اوئا ڪن آيا ان ڪيڏو: ”امون نئھ ھمپڙاو، اي پڳوون رو گھر ڪئم ٿيا رئي وات ڪيڏي ٿيشي؟ ان ڪيوو نيشون ھوشي جيا ٿي ڪبر پڙئھ جي تمي مون ۾ وڙي پاسا آيا وازا سو، ان ڏنيا رئي پڇاڙي ٿيا وازي سئھ؟“ ④ تو ايسو اوئون نئھ وڙنڌي ڏيڏي: ”ھوشيار ريا، متون ڪوڪ تمون نئھ نه پولاوئھ. ⑤ ڪم تو گھڻا منڪ مارا نوم ٿي آوشي، ان ڪيشي: ’پڳوون رو سونڊل پڇايا وازو ڪريست ھون سون.‘ ان ھم ڪين او گھڻون منڪون نئھ پولاوشي. ⑥ تمي جنڳون رئي ڪاش ھومپڙشو ان جنڳون ري واتون ھومپڙشو. پڻ تمي مت پڻايا. ڪم تو ھائي واتون ضرور ٿيشي، پڻ اوئھ ٿوئھ ڏنيا رئي پڇاڙي نئين ٿئھ. ⑦ ڪم تو قوم قوم ٿي وڏشي ان ملڪ ملڪ ٿي وڏشي. ان گھڻي ماڳي ڏڪاڙ پڙشي ان زمئي ڏھشي. ⑧ پڻ ھائي ٻڌي واتون ڏنيا ري پڇاڙي رون ڏڪ تڪليپون رئي روڳئي شروعات سئھ. ⑨ تئين منڪ تمون نئھ تڪليپ ڏيورايا ھارو زھلاوشي، ان تمون نئھ مراوشي. ان مون مانھ وشواس راڪيا ري ڪري ٻڌيون قومون را منڪ تمون ٿي وير راڪشي. ⑩ ان اوئھ وڪت گھڻا منڪ جيا مون مانھ وشواس راڪئھ، او وشواس ساڏشي، ان ھيڪا پڙا نئھ زھلاوشي، ان ھيڪا پڙا ٿي وير راڪشي. ⑪ ان گھڻا ايوا منڪ آوشي، جيا ڪوڙ ھاڪلين آپ نئھ پڳوون رو نياپو ڏيڏا وازا ڪيشي، ان او گھڻون منڪون نئھ پولاوشي. ⑫ ان منڪ پڳوون رون حڪمون رئھ اتا ڪلاڦ ٿي زاشي، جي گھڻون منڪون رو آپت ۾ پريم ڪئم ٿي زاشي. ⑬ پڻ

جيو آکر هُوڊي وِشواس راکين ڏوروڻ صير ٿي سَهشي، اُوئا نئه تارڻ زڙشي.
 (14) ان پڳوونَ را راز را پارام اي کُشي رئي کبر منک پوري ڏنيا ۾ هميڙاوشي،
 زم ٻڌيون قومون رون منکون نئه هاس رئي کبر هونء. ان پسئ تيا کيڙ اينڙا ڏنيا
 رئي پڇاڙئي ٿيشي.

ايسو مور ٿي هميڙاونه جي رومي قوج يروشلم شهر نئه کنم ڪرشي

(متي 24:15-28، مرقس 13:14-23، لوقا 21:20-24)

(15) ”تيام هوشيار ريا. تمي اُو هاو ڪراپ ان پريآڌ ڪريا واڙئي شينه ايتئ
 پريت جگا ۾ اُوپل ڏيڪشو، جيا را پارام پڳوونَ رو نياپو ڏيڏا واڙئ دانِي
 ايل شاستر ۾ مور ٿي لکيو تو. جيو شاستر رئي هائي وات پئئ، اُوئا رئه
 هايا رو مطلب هڙمو! (16) زنيون تمي هايا نئه ايتئ پريت جگا ۾ ڏيکو،
 تنيون جيا ايتئ يهوديه صوپا موئين هونء، اُو ڏونگرون هوما پاڳي زائء!
 (17) جيا گهر ري ڇت مانء هونء، اُو نيسا اوترين آپري شينهون ليڏا هارو گهر
 موئين نه زائء، (18) ان جيا ٻني ۾ هونء، اُو آپرو توتال ليڏا هارو پاسا نه زائء،
 پڻ امرام پاڳي زائء! (19) پڻ اقسوس اوتون ڏوشيون مانء، جي اوتون ڏيئون
 ۾ پاري پڳ هوشي، ڪا ننڪا ٻار ڏوراوتي هوشي. (20) تمي پرائئا ڪرو جي
 تمارئ شينازا ۾ ڪا پريت ڏي را نه پاڳو پڙئ. (21) ڪم تو اوتئ وڪت ايوني
 گهڻي تڪليپ ٿيشي، جيوي ڏنيا ري شروع ٿي لين هزون هُوڊي ڪيڏي نئي
 ٿئي، ان نڪو وڙي ٿيشي. (22) ان جي پڳوونَ هايا توتئا نئه گهتاوين تڪليپ
 را ڏي توڙا نه راکيا هوئت، تو ڪوئي نه پڇئت. پڻ آپرون سونيل منکون
 ري ڪري پڳوونَ هايون ڏورون ڏيئون نئه گهت ڪرشي. (23) اوتئ توتئ جي
 ڪوڪ تمون نئه ام ڪئ جي ’زوئو، پڳوونَ رو سونيل پڇايا واڙو ڪريست
 اينڙا ماڳ سئء ڪا ’اوتئا ماڳ سئء، تو هايا وات مانء يقين مت ڪريا.

②4 ڪم تو ايو ڪوڙا منڪ آوشي جيا ڪوڙ ھاڪلين آپ ننه پڳوون رو سونڊل پڇايا وڙو ڪريست ڪا پڳوون رو نياپو ڏيڏا واڙا ڪيشي. ان او موتا نيشون ان پرسا ڏيڪاڙشي، زم ٻڌون منڪون ننه پُوللوئه. ان جي ٿي هيڪئت، تو پڳوون رون سونڊل منڪون ننه پڻ پُوللوئت. ②5 زوئو، مٿين تمون ننه مور ٿي همپڙايوھ پرو.



②6 تيام جي منڪ تمون ننه ڪئ: 'زوئو، پڳوون رو سونڊل پڇايا وڙو ڪريست رڻ ۾ سئ،' تو تمڻي اوئنه مت زايا. ان جي ڪئ: 'زوئو، او ڦلوثا گهر موئين هٿال سئ،' تو تمڻي هايا وات مانھ يقين مت ڪريا. ②7 ڪم تو زم ويزڙئي ڪوتون اڳوڻليا پاھا ٿي آڻوڻليا پاھا ھوڏي زبڪئھ، تم ھون منڪ ذات رو ڏيڪرو آپرئ آيا رئھ توئنه هٿمارو ٻڌيل ساوو ٿيھ. ②8 زم ڪيٽي ۾ ڪئھ، جيئنه ڍنڍوڪڙ ھوشي، اوئنه گهرڙدون پڻ آوين پيزي ٿيشي."

**پڳوون رو گهر ڪنم ٿيو ان پيزيون آفتون رو آوو
نيشون سئ جي ايسو پڳوون را پاھا ٿي راز ڪريا وڙو سئ**

(متي 24:29-31، مرقس 13:24-27، لوقا 21:25-28)

②9 "ان پسئ هٿمارو هايون ڏيئون ري تڪليپ ڪيڙ ڏي ڪاڙو مش ٿي زاشي، انزوڙاڙيو آپرو سوجهرو نئين ڏئھ، تارا آڪاش ٿي ڪرين پڙي زاشي، ان آڪاش موئينلي ٻڌي شينھون ڏگشي. ③0 ان تئيون آڪاش ۾ او نيشون ساوو ٿيشي، جيا ٿي ٿاڀيئي ٿيشي جي ھون منڪ ذات رو ڏيڪرو سون. ان تئھ توئنه ڏنيا ريون ٻڌيون قومون را منڪ آپرون ڏوهون مانھ ڏڪي ٿين روشي ان مون منڪ ذات را ڏيڪرا ننه گهڻي ڪرا ۾ ان گهڻا زبڪتا سوجهرا ۾ آڪاش رون واڌزون موئين آوتو ڏيڪشي، ان وات ساوئي ٿيشي جي ھون پڳوون را پاھا ٿي راز ڪريا وڙو

ٿين آيا وازو سون. (31) تئين رڻ شينگڙو گهڻا زور ٿي واڳشي، ان هون آپرون آڪاشي دوتون نٿه ميلهه، ان او پوري دنيا ۾ چارون دشون ٿي مارون سونڊل منڪون نٿه پيڙا ڪرشي.

نيسونون ٿي اوڙڪو جي ڪي ٿيا وازو سٺ

(متي 35-32:24، مرقس 13:28-31، لوقا 21:29-33)

(32) ”انجیر را وڻ رڻي مثال لين ٿمي شيڪو. زئين اوتا ريون ڏارڪيون موئين ڪوٺيڙ ٿهه ان پوڙا ٿهه، تو ٿمي آپ اوڙڪي زائوه جي اوناڙو آيا وازو سٺ. (33) هيوئه نمونئ زئين ٿمي هائي ٻڌي تڪليهون ٿيتي ڏيڪو، تو هزميا جي هائي ٿوڻو هاو ڏوڪڙو سٺ. (34) هون تمون نٿه هاس ڪونه، هائي ٻڌي تڪليهون ايئا همڻوڪي پيڊي رون منڪون ري حياتي ۾ پوري ٿيشي. (35) آڪاش ان ڌرتي تو ڪتم ٿي زاشي، پڻ ماري واتون هميش هوڏي هاسي ريشي.“

ايسو آپرئ دنيا ۾ پاسو آيا را پارام ان دنيا ري پڇاڙي را پارام هوشيار ڪرئ

(متي 44-36:24، مرقس 13:32-37، لوقا 17:26-30، 34-36)

(36) ”پڻ مون منڪ ذات را ڏيڪرا رئه پاسا دنيا ۾ آيا را پارام، ڪيا نٿه اي ڪهر نٿي جي هائي ڪيڙي ان ڪيئ توتئ ٿيشي. هايا وات رڻي نڪو آڪاشي دوتون نٿه ڪهر سٺ، ان نڪو مون پڳوون را ڏيڪرا نٿه ڪهر سٺ. پڻ روڳئي مارا ٻاپ پڳوون نٿه هايا وات رڻي ڪهر سٺ. (37) ڪم تو زم نوح رون ڏيئون ۾ ٿيو تو، همروم مون منڪ ذات را ڏيڪرا رئه آيا رون ڏيئون ۾ پڻ ٿيشي. (38) اوئون ڏيئون ۾ ٻوڏ آيا ٿي مور منڪ کاتا پيٽا ريا، ان پرتا پرتاوتا ريا، ان نيٺ او ڏي آيو زئين نوح پيڙا موئين سڙي گيو. (39) منڪي آيا واري سزا را پارام ڪئين سوچيو ئي نتو، ان پسئ پڳوون را طرف ٿي ٻوڏ آوين اوئون ٻڌون

منڪون نٿه ڪٽم ڪريا پرا. همروم ٿيشي زئيون هون منڪ ذات رو ڏيڪرو پاسو آويه. (40) اوتھ توتھ جي ٻي آدمي ٻني ۾ هوشي، تو پڳوون هيڪا نٿه اوتون لين پچاوشي، ان پيزا نٿه اوتھ ساڏشي پرو. (41) جي ٻي ڏوشي پيڙي ٻيني گهرنتي ڦيروتي هوشي، تو پڳوون هيڪي نٿه اوتون لين پچاوشي، ان پيڙي نٿه اوتھ ساڏشي پري.

(42) تيام تمى هميش تيار ريا، ڪم تو تمون نٿه ڪبر نٿي جي هون تمارو پريو ڪيڏي پاسو آويه. (43) ياڌ راکو، جي گهر را ڏئي نٿه ڪبر هوٺ جي سور ڪئون آوشي، تو او ضرور زاگتو رٿ، ان آپرا گهر موئين ڪاٺ نه لاڳوا ڏت. (44) تيام تمى پڻ تيار ريا، ڪم تو تمون نٿه ڪبر نٿي جي هون منڪ ذات رو ڏيڪرو ڪئون پاسو آويه.

ايموندار نوڪر ان پييمون نوڪر رو مثال

(متي 45:24-51، لوقا 12:41-48)

(45) ”تمي آپ سوچو جي ايوو ايموندار ان عقل واڙو نوڪر ڪوڻ سٺ، جيا نٿه ڏئي آپرون پيزون نوڪرون مانھ راکين زائھ، زم اوتون نٿه توتا مانھ ڪاڌو پيڌو ڏئھ؟ (46) پاڳواڙو او نوڪر سٺ جيا نٿه ڏئي پاسو آوين همروم ڪرتو ڏيڪنھ. (47) هون تمون نٿه هاس ڪونھ جي ڏئي اوتا نٿه آپري ٻڌي ملڳت مانھ راکشي. (48) پڻ جي او نوڪر ڪراپ هوٺھ ان من موئين ام سوچئھ: ’مارا ڏئي را آيام هزون دير سٺ،‘ (49) ان پستھ پيزون نوڪرون نٿه ماروا مڏھ، ان شراپيون پيڙو ڪائھ پيئھ، (50) تو اوتا نوڪر رو ڏئي اوتھ ئي ڏي آوشي جيا ڏي رو نوڪر ڪيال ئي نئين ڪريو هوٺھ، ان اوتھ ئي توتھ آوشي جيا توتا رئي نوڪر نٿه ڪبر ئي نئين هوٺھ، (51) ان ڏئي آوين اوتا نٿه واڍين ٽڪرا ٽڪرا ڪرشي پرو. هيو منڪ، جيا مونيڊا را مينا پڻ اندر را ڪارا سنھ، نرڳ رئي سزا ڪاشي. اوتھ او روشي ان ڏونت گهرڙيا ڪرشي.“

نھون سوکريون رو مثال

پريو ايسو رء پاسا آيا هارو هميش تيار ريوو

25 ① "مارء پاسا آيا رء توتئ پگئون رو راز ايئا را زم هوشي. ذه سوکري هتي. او آپرو آپرو بڑو ڏيوو لين لاڏا نئ تيروا نيھري. ② اوئون



موئين ٿي پونس عقل واري هتي، ان پونس هتي پي عقل. ③ جي پي عقل هتي، اوئي آپرا ڏيوو تو ليڏا، پڻ آپ پيڙو وڌارء تيل نه ليڏو. ④ پڻ جي عقل واري هتي، اوئي آپرون ڏيوون پيڙو ڪونپليون م تيل پڻ ليڏو. ⑤ لاڏا رء

آيا م ڏير ٿي گهي، تو سوکريون نئ اونگھ آوا مڏي ان او ٻڌي اونگھائي گهي. ⑥ آڏي رات رو ڪيئنڪ هاڏ پاڙيو: 'هالو زوئو، لاڏو آوئ ريو. لاڏا نئ آوڪار ڏيڏا هارو ٻارا نيھري آو!' ⑦ تئيون او سوکري اوئي پري، ان آپرا ڏيوو ٺيڪ ڪروا مڏي. ⑧ پسئ پي عقل سوکريئي عقل واريون نئ ڪيڏو: 'امون نئ تمارا تيل موئين ٿي ڪيئنڪ ڏيو، ڪم تو امارا ڏيوو اوزھمائھ ريا.' ⑨ پڻ عقل واري سوکريئي ڪيڏو: 'نا، امي تمون نئ نئين ڏيون، متون امون ڪن پڻ ڪٿي زائھ. نائوڪو اي سئ جي تمي ڏڪون مانھ زائين آپ هارو تيل ويساتو لي آو.' ⑩ پي عقل سوکري تيل ويساتو ليوا گهي، ان اتي وار م لاڏو پڻ آيو رو. ان جي پونس عقل واري سوکري تيار هتي، او لاڏا پيڙي ويوا ري ڌاوت م پاڙا موئين گهي پري، ان شيواڌاريئي دروازو پنڌ ڪريو پرو. ⑪ تيا ڪيڙ پيڙي سوکري پاسي آوي ان ڪيو مڏي: 'لاڏا، او لاڏا، امون هارو دروازو اوگھاڙيا رو ڪو.' ⑫ پڻ اوئھ ڪيڏو: 'نا. هون تمون نئ هاس ڪونھ جي هون تمون نئ اوزڪتو ئي نئي.' "

⑬ پسته ايسو شيلون ننه كيډو: "تيام تيار ريا، كم تو تمون ننه كهر نتي جي هون كيډي ان كيئه توئنه پاسو آويه."

دټي ان نوڪرون رو مثال
ايسو آپرا پرام ان آپرون شيلون را پرام شيكاژنه
(متي 14:25-30، لوقا 11:27-29)

⑭ "هوئه مارئه پاسو آيا را پرام اي مثال پڻ سته. هيڪ منڪ هتو، جيو پرڏيه زايا واڙو هتو. اوئه آپرون نوڪرون ننه آپ ڪن تيڙايا، ان اوئون ننه آپري مال ملگت مانه راڪيا. ⑮ اوئه هر هيڪ ننه اوئا ري هيئت پرموئنه پٽيها ڏيڏا. هيڪا ننه پرنه لاک روپيا ڏيڏا، پيزا ننه سو لاک روپيا ڏيڏا، ان ترئما ننه ترڻ لاک روپيا ڏيڏا. ان پسته پيزه ملڪ گيو پرو. ⑯ جيا ننه پرنه لاک روپيا زڙيا تا، اوئه هتمارو زائين اوئون پٽيهون ٿي واپار ڪريو ان پيزا پرنه لاک ڪموٽو.



⑰ همروم جيا ننه سو لاک روپيا زڙيا تا، او پيزا سو لاک ڪموٽو. ⑱ پڻ جيا ننه ترڻ لاک روپيا زڙيا تا، اوئه زائين کاڌ ڪوترين آپرا دټي را پٽيها زمي موئين پوريا پرا.

⑲ گهڻا وڪت ڪيڙ اوئون نوڪرون رو دټي پاسو آيو رو، ان اوئون ٿي حساب ليو مڏيو. ⑳ جيا نوڪر ننه پرنه لاک روپيا ڏيڏا تا، او آوين پيزا پرنه لاک

رُوپيا پڻ لي آيو ان ڪيڏو: 'ساب، تمي مُون نئه پئرئ لاک رُوپيا ڏيڏا تا. اي زوئو، ايئون ٿي هُون پيزا پئرئ لاک رُوپيا ڪموڻوه.' (21) تو اُوتَّا رئه ڌڻي اُوتَّا نئه ڪيڏو: 'شاپاش، نائوڪا ان ايمونڌار نوڪر. تُون ٿوڙون پئيهون ۾ ايمونڌار ريوه، تيام هَوتَّه هُون گهڻا پئيهه ٿارئ حوالئ ڪريه. آو، ان مُون پيزو ڪُشي ڪر.' (22) پسئ جيا نوڪر نئه سو لاک رُوپيا ڏيڏا تا، اُوتَّه پڻ آوين ڪيڏو: 'ساب، تمي مُون نئه سو لاک رُوپيا ڏيڏا تا. اي زوئو، ايئون ٿي هُون پيزا سو لاک ڪموڻوه.' (23) تو اُوتَّا رئه ڌڻي اُوتَّا نئه ڪيڏو: 'شاپاش، نائوڪا ان ايمونڌار نوڪر. تُون ٿوڙون پئيهون ۾ ايمونڌار ريوه، تيام هَوتَّه هُون گهڻا پئيهه ٿارئ حوالئ ڪريه. آو، ان مُون پيزو ڪُشي ڪر.' (24) پسئ اُو نوڪر آيو جيا نئه ترڻ لاک رُوپيا ڏيڏا تا، ان اُوتَّه ڪيڏو: 'ساب، مُون نئه ڪبر هئي جي تمي ڏورا منڪ سو. جيئنه تمي پوڪيو نٿي اُوتَّه تمي لئوه، ان جيئنه تمي وايو نٿي اُوتَّه تمي پيزو ڪروه. (25) ان تيام مُون نئه پيڪ لاڳئي، ان مئين زائين تمارا ترڻ لاک رُوپيا کاڌ ڪوترين زمي ۾ پوريا پرا. هون، اي ليو تمارا پئيهه.' (26) تيا مانھ اُوتَّا رئه ڌڻي اُوتَّا نئه ڪيڏو: 'او پُونڌا ان سُسٽ نوڪر. ليڪ سئ، تُون ام هزمئ جي جيئنه مئين نٿي پوڪيو اُوتَّه هُون لئونھ، ان جيئنه مئين نٿي وايو اُوتَّه هُون پيزو ڪرونھ. (27) تو پسئ ٿارئ مارا پئيهه وياز مانھ ڏيوو تو. تُون هم ڪرئت، تو پاسو آوين مارون آپرون پئيهون پيزو مُون نئه وياز پڻ زڙئت.'

(28) پسئ ڌڻي آپرون منڪون نئه حُڪم ڏيڏو: 'ايئا ٿي هاڻي ترڻ لاک رُوپيا ڪوهي ليو، ان اُوتَّا نئه ڏيو پرا، جيا ڪن ٿيھ لاک رُوپيا سئ. (29) ڪم تو جيا ٿي ڪئين ڦاڻيڏو سئ، تو اُوتَّا نئه وڌيڪ ڏيوراشي ان اُوتَّا ڪن گهڻو ٿيشي. پڻ جيا ٿي ڪئين ڦاڻيڏو نٿي، جنين ڪئين اُوتَّا ڪن سئ، اُو پڻ اُوتَّا ٿي ڪوهراشي. (30) هَوتَّه ايئا نڪوما نوڪر نئه ٻارو ڪاڍين اندارام ڦڳوڙو پرو. اُوتَّه اُو روشي ان ڏونت گهرڙيا ڪرشي.'

ريڊيون نٺ ٻاڪريون ٿي ڌار ڪريا رو مثال ايسو نيا را ڏي را پارام شيڪاڙهه

① "زئون هون منڪ ذات رو ڏيڪرو آپرا زهڪتا سوجهرا ۾ آويه، ان ٻڌائي آڪاشي ڏوت مون پيڙا آوشي، تئيون هون آپري زهڪتا سوجهرا واري گهاڙي مانھ بيهيھ نو. ② ان آڪاشي ڏوت ٻڌيون قومون رون منڪون نٺ مون هوما پيڙا ڪرشي، ان هون اوئون نٺ هڪا پيڙا ٿي ڌار ڪريھ، زم ڌراڙ ريڊيون نٺ ٻاڪريون ٿي ڌار ڪرھ. ③ ان زم ڌراڙ ريڊيون ان ٻاڪريون نٺ پيئون ڌئون ۾ ڌار ڌار اُپاڙھ، تم جيا منڪ مارو ڪيڏو مونھ، اوئون نٺ هون مارھ زمئھ پاهئھ مون ۾ اُپاڙھ، پڻ جيا نٺي مونتا، اوئون نٺ هون مارھ ڏاوھ پاهئھ اُپاڙھ. ④ تئيون هون پاڌشا ٿين مارھ زمئھ پاهئھ اوپل منڪون نٺ ام ڪيھ: 'وورا، تمي جيون نٺ مارھ ٻاپ آشيرواڏ ڏيڏوھ. تمي مارا ٻاپ را وائيڏا پرموئھ اوئا را راز ۾ آوو، جيو راز جڳت نيا ٿي لين تمون هارو تيار ڪرل سٺھ. ⑤ ڪم تو هون پوکو هتو، تئيون تمي مون نٺ کاڌو ڏيڏو تو. هون ترهو هتو، تئيون تمي مون نٺ پوئي پيئاريو تو. هون پرڏيشي هتو، تئيون تمي مون نٺ آپري گھري ٽڪاڙيو تو. ⑥ مارا لوگھڙا نٺا، تئيون تمي مون نٺ لوگھڙا ڏيڏا تا. هون مونڏو هتو، تئيون تمي مارئي همپاڙ ڪرئي تئي. هون جيل ۾ هتو، تئيون تمي مون ٿي ملو آيا تا. ⑦ تئيون پگھون ري وات مانھ وُڍا واڙا مون نٺ ام ڪيشي: 'پريو، ڪيڏي امي تمون نٺ پوکا ڏيڪين کاڌو ڏيڏو تو، ڪا ترها ڏيڪين پوئي پيئاريو تو؟ ⑧ ڪيڏي امي تمون نٺ پرڏيشي ڏيڪين آپري گھري ٽڪاڙيا تا، ڪا تمون ڪن لوگھڙا نه ڏيڪين تمون نٺ لوگھڙا ڏيڏا تا؟ ⑨ ڪيڏي امي تمون نٺ مونڏا ڪا جيل ۾ ڏيڪين تمون ٿي ملو آيا تا؟' ⑩ تئيون هون پاڌشا ٿين اوئون نٺ وڙنڌئي ڏيھ: 'هون تمون نٺ هاس ڪونھ، جئين ڪئين پلائي رو ڪوم تمي مارون ايئون پايون ان بينون موئين ٿي ڪيا ٿي

پڻ ڪريو، پلئه اُو ٻڌون ٿي نونو منڪ هوئ، توڻي پڻ تمي ام هڙمو جي اُو پلائي رو ڪوم تمي مُون ٿي ڪريو.

④1 تئين هُون مارئ ڏاونءِ پاهئ اُوپل منڪون نئ ام ڪيھ: 'مُون ٿي هيڪل تڙي زائو، تمي جيا پڳوون را پتل سو. تمي هميش ري پڙتي پاهي ۾ زائو پرا، جئي پاهي شيطون ان اونا را پاهارون ڏوتون هارو تيار ڪرل سئ. ④2 ڪم تو هُون پوکو هتو، پڻ تمي مُون نئ ڪاڌو نه ڏيڌو. هُون ترهو هتو، پڻ تمي مُون نئ پوڻي نه پيئاريو. ④3 هُون پرڏيشي هتو، پڻ تمي مُون نئ آڀري گهري نه ٽڪاريو. مارا لوگهڙا نئا، پڻ تمي مُون نئ لوگهڙا نه ڏيڌا. هُون مونڌو هتو ان جيل ۾ هتو، پڻ تمي مارئي همپار نه ڪري.

④4 تئين اُو پڻ مُون نئ ڪيشي: 'پريو، ڪيڏي امي تمون نئ پوکا، ترها، پرڏيشي، لوگهڙون وگر، مونڌا ڪا جيل ۾ ڏيڪيا، ان تمارئي مدت نه ڪري؟'
④5 تئين هُون اوئون نئ وڙنڌي ڏيھ: 'هُون تمون نئ هاس ڪونھ، جئين ڪئين پلائي رو ڪوم تمي ايئون منڪون موئين ٿي ڪيا ٿي نه ڪريو، پلئه اُو ٻڌون ٿي نونو منڪ هوئ، توڻي پڻ تمي ام هڙمو جي اُو پلائي رو ڪوم تمي مُون ٿي نه ڪريو.'

④6 ان پسئ اوئون منڪون نئ هميش رئي سزا زڙشي، ان پڳوون ري وات مانھ وڍا وازون منڪون نئ هميش رو جيون زڙشي."

يهودي ڌرم را آڳيون ايسو نئ مرايا هارو نا ناوئھ

(متي 1:26-5، مرقس 1:14-2، لوقا 2:22-1، يوحنا 11:45-53)

26 ① زئين ايسو هائي ٻڌي واتون همپراوي ريو، تئين اوئ آڀرون شيلون نئ ڪيڌو: ② "تمون نئ تو ڪبر سئ جي هاري نئين پرمئ پاشڪا پرپ سئ، ان موئھئ مُون منڪ ذات را ڏيڪرا نئ هوري مانھ ساڙين مرايا هارو زهلاوشي."

③ تئيون موتا پوزاري ان اسرائيلي قوم را آڳيوون ڪائيفا نومي مک پوزاري را دڙبار ۾ پيڙا ٿيا. ④ ان اُوئي آيت ۾ صلاح ڪري زم ايسو ننه ڪياڪ ٺڳي ٿي زهالنه ان مراوئه پرو. ⑤ پڻ اُو ام ڪيتات ريا: ”آپي اوتا ننه پاشڪا پرڀ مانه نئين زهالون، متون آڀئي قوم را منڪ قشري ڪرئه.“

هڪ اشينري ايسو را مون ۾ اوتا را ماٿا مانه عطر نومئه

(متي 13-6:26، مرقس 14-3:9، يوحنا 12-8:1)

⑥ ايسو بيت عنياه پاڙا موئين شمعون نومي هڪا منڪ ري گهري هتو، جيا ننه اڳي ڪوڊ رئي پيماري هئي. ⑦ ايسو کاڌا هارو پينو تو، تو هڪ اشيتري سنڳي مرمر رئي ڪونپلي لين جيا موئين الاهي مونگهو عطر هتو، ايسو ڪن آوئي ان اوتا را مون ۾ اوتا را ماٿا مانه عطر نوميو پرو. ⑧ پڻ هائي ڏيڪين ايسو رون شيلون ننه رينه سڙي ان اُوئي ڪيڏو: ”هائي عطر امهي ايترا رو ڪي ڦاڙو ٿيو؟ ⑨ ڪم تو هائي عطر گهڻون پٽيهون ۾ ويسائي هڪٿ ان اوتا را پٽيها ڳريهون ۾ وراوي هڪٿ.“



⑩ پڻ ايسو اوئون رئي وات زوئين اوئون ننه ڪيڏو: ”تمي ايتا ٻائي ننه ڪم تنگ ڪروه ريا؟ ايتنه مون هارو ٺاڻوڪو ڪوم ڪريوه. ⑪ ڳريپ تو هميش تمون ڪن هوشي، پڻ هون هميش تمون ڪن نئين هوئون. ⑫ زئون ايتنه مارا ڏيل مانه اي عطر نوميو، تو ايتنه ماري مور مون ننه مقوم موئين پوريا هارو تيار ڪريو. ⑬ هون تمون ننه هاس ڪونه، پوري دنيا ۾ جيئنه پڻ منڪ پڳوون رئي ڏيڏل اي ڪشي رئي ڪهر همپزاوشي، اوتنه ايتا ٻائي ري همپار ۾ اي وات پڻ همپزاوشي جي ايتنه ڪي ڪريوه.“

يهوداه اسكريوتي ايسو ننه زهلايا هارو نا ناوئه

(متي 14:26-16، مرقس 10:11-11، لوقا 3:22-6)


⑭ تئيون ايسو رون هارون سونيل شيلون موئين ٿي هيڪ زئو، جيا رو نوم يهوداه اسكريوتي هتو، او موتون پوزاريون ڪن گيو، ⑮ ان اوئون ننه ڪيتو: ”هون ايسو ننه تمون ڪن زهلاويه، تو تمي مون ننه ڪتا پئيهها ڏيشو؟“ تو اوئي اوئا ننه ٿيه چوندي را سڪا ڏيدا، جيا رئي قيمت سو هزار روپيا هئي. ⑯ ان اوئا توئا ٿي لين يهوداه ايسو ننه زهلايا رو وجهه گوتوا مڏيو.

ايسو پئون شيلون ننه ميلين پاشڪا پرپ رئي تيارئي ڪراوئه

(متي 17:26-19، مرقس 12:14-16، لوقا 7:22-13)

⑰ زئيون روتيون ري پرپ رو پيرهئون ڏي آيو، تئيون ايسو ري شيلي اوئا ڪن آوين پونسو: ”تمارئي ڪيوي مرضئي سئ؟ امي تمون هارو پاشڪا پرپ کاڌا رئي تيارئي ڪيئ ڪرون؟“

⑱ تو ايسو اوئون ننه ام ڪين هڪا منڪ ڪن ميليا: ”تمي شهر موئين



زائو، ان اوتا نئه ام ڪيا: 'گرو جي ام ڪئو. مارو توتو همئنه ڏوڪرو آيوه. هون تاري گهري آپرون شيلون پيڙو پاشڪا پرڀ ڪائيه.'
 (19) شيلي زم ايسو ڪيڏو تو، همروم ڪريو، ان اوتنه پاشڪا پرڀ رئي تيارئي ڪري.

ايسو ڪري وار آپرون شيلون پيڙو روتئي ڪائيه
ان مور تي همپڙاوتنه جي اوتا رو هيڪ شيلو اوتا نئه زهلاوشي

(متي 26:20-25، مرقس 14:17-21، لوقا 22:21-23، يوحنا 13:21-30)

(20) زئيون هونز ٿئي، تئيون ايسو آپرون بارون سونڊل شيلون پيڙو ڪاڏا هارو پينو.
 (21) زئيون روتئي ڪاتات ريا، تو ايسو ڪيڏو: "هون تمون نئه هاس ڪونه، تمون موئين ٿي هيڪ زٽو مون نئه زهلاوشي." (22) تو شيلا گهڻا ڏکي ٿيا ان هيڪا پيڙا ڪيڙ ايسو نئه ڪيو مڌيا: "پريو، هون تو نئي، نا؟" (23) تيا مانه ايسو ڪيڏو: "تمي جيئي مون پيڙا ڪاڏا را نونڙا ڇر روتئي را ٻٽڪا ٻوڙيا، تمون موئين ٿي هيڪ زٽو مون نئه زهلاوشي." (24) جيوئه نموننه مارا پارام شاستر ڇر اڳي لڪل سئ، هيون نموننه هون منڪ ذات رو ڏيڪرو ايٺا جڳت ٿي زائونه ريو. توتئي پڻ ڏک اوتا منڪ هارو سئ، جيو مون منڪ ذات را ڏيڪرا نئه زهلاوشي. اوتا منڪ هارو نائوڪو ام ٿئ، جي او ڪيڏي پيڏا ئي نه ٿيو هوئ." (25) تيا مانه يهوداه، جيو ايسو نئه زهلايا وڙو هتو، اوتا ٿي پونسو: "گرو جي، هون تو نئي، نا؟" تو ايسو اوتا نئه ڪيڏو: "تون نئه آپ نئه ڪهر سئ."

ايسو ڳلومي ٿي آزاد ٿيا ري پاشڪا پرڀ رو نوو مطلب شيڪارڙين
پريو پوزن رئي ريت ناوتنه

(متي 26:26-30، مرقس 14:22-26، لوقا 22:14-20، 1 ڪرنٿيون 11:23-25)

(26) زئيون او ڪاتات ريا، تو ايسو روتئي لين اوتا هارو پڳوون رو ٿورو مونين



پونگئي، ان آپرون شيلون ننه ڏين ڪيڏو: ”هون، ڪاڻو. اي مارو شير سٺه.“ (27) ان پسته ايسو ڌراڪ رس رو پيئالو لين اوتا هارو پگهون رو

ٿورو مونيون اوتون ننه ام ڪين ڏيڏو: ”تمي ٻڌائي ايتا موئين ٿي پيو. (28) ڪم تو اي مارو لوئي سٺه، جيا ٿي پگهون رو وسن پوندل سٺه. هون مارو جيو پگهون را نوم مانه ڏيه، زم مارا لوئي ٿي گهئون منڪون ننه ڏوهون رئي ماقئي زڙه. (29) هون تمون ننه ڪاتري ٿي ڪونه، هوه ٿي لين زئيون هودي هون مارا ٻاپ پگهون را راز ۾ تمون پيڙو ايوو ڌراڪ رس نه پيئون جيو هميش نوو سٺه، تنيون هودي هون اي ڌراڪون رو رس وڙي ماگي نئين پيئون.“

(30) پسته او پزن گاوين ٻارا نيهريا، ان زيتون نومي ڏونگر هوما روونا ٿيا.

ايسو مور ٿي همپزاوئھ جي پطرس اوتا رو شيلو هويا رو نا پاڙشي

(متي 26: 31-35، مرقس 14: 27-31، لوقا 22: 31-34، يوحنا 13: 36-38)

(31) تنيون ايسو آپرون شيلون ننه ڪيڏو: ”مون ٿي هيڪ ايوئي وات ٿيشي جيا ري ڪري آڙوڪي رات تمي ٻڌائي مون ننه ساڏي زاشو. ڪم تو شاستر ۾ هيا را پارام پگهون رئي اي وات لڪل سٺه: ”هون ڌراڙ ننه ماريه،

ان ڌراڙ ري رديون وينڪائي زاشي.“

(32) پڻ موت ٿي جيوي اونيا ڪيڙ هون تمون مور گليل صوپا ۾ زائيھ.

(33) ٿيا مانه پطرس اوتا ننه ڪيڏو: ”پلته پيڙا ٻڌائي تمون ٿي ٿيا واري وات

ري ڪري تمون ننه ساڏي زائه، توئي پڻ هون تمون ننه ڪيڏي نئين ساڏون.“

(34) پڻ ايسو اوتا ننه ڪيڏو: ”هون تون ننه هاس ڪونه، آڙوڪي رات ڪوڪڙا

رئه پونگ ڏيڏا مور، تون ترڻ وار مارو نا پاڙين ڪيه، جي تون مون ننه

نٿي اوڙڪتو.“

③⑤ تو پطرس اُوتا نئه ڪيڏو: ”مارئه تمون پيڙو پلئه مروو پڙئه، توئي پڻ هُون تمارو شيلو هويا رو نا ڪيڏي نئين پاڙون.“ ان پيڙي ٻڌي شيلي پڻ همروم ڪيڏو.

ايسو زينوَن نومي ٽونگر مانھ پراٽنا ڪرئھ

(متي 36:26-46، مرقس 32:14-42، لوقا 39:22-46)

③⑥ تئيون ايسو آپرون شيلون پيڙو گتسمني نومي جڳا مانھ آيو، ان اُوتھ شيلون نئه ڪيڏو: ”تمي ايئنھ بيهو، ان هُون اونئھ زائين پراٽنا ڪرونھ.“



③⑦ ايسو پطرس نئه ان زبدي رون بيئون ڏيڪرون نئه آپ پيڙا تيڙي گيو، ان اُوتھ زائين گهڻو ڏکي ان پريشون ٿيا مڏيو. ③⑧ تئيون ايسو اُوتون نئه ڪيڏو: ”هُون ايوو گهڻو ڏکي سون جي زوئھ مارو هاه ٿوئھ ريو. تمي ايئنھ ريو، ان مُون پيڙا زاگتا ريو.“ ③⑨ پسئھ اُوتون ٿي ٿوڙوڪ آگڙ زائين اُو گودا ڪوڙين مونڊا وروئو پڙيو نو ان پگهون ٿي ام پراٽنا ڪروا مڏيو: ”او ٻا، جي ٿي هيڪئھ، تو اي ڏڪ جيا تمي مُون نئه سهيا هارو ڏيڏاه، ايئون ڏڪون ٿي مُون نئه پچاوو. توئي مارئي مرضي نئين، پڻ تمارئي مرضي پوري ٿئھ.“

④⑩ پسئھ ايسو ترٿيون شيلون ڪن پاسو آيو ان زوئھ، تو اُو اُونگھال پڙياھ. تيام اُوتھ پطرس نئه زگاڙين ڪيڏو: ”تمي مُون پيڙا هيڪ ڪلاڪ پڻ زاگي نئي

هيڪتا، ڪي؟ (41) ٽمي زاڳتا ريو، ان پراڻا ڪرو جي ٽمي آزمتا موئين پورا اوترو. ٽمي مون نئه ساڏوا تو نٿي ڪرتا، توئي ٽمي منڪ ٿين هيٺا سو.

(42) پسئه ايسو وڙي پيڙي وار زائين ام پراڻا ڪروا مڏيو: ”او ها، جي اي ضروري سئه جي هون اي ڏڪ سهون، تو تمارئي مرضئي پوري ٿئي.“

(43) تئين ايسو وڙي پاسو آوين زوئه، تو شيلا اونگهال پڙياھ، ڪم تو اوئون ري اونڪيون اونگه ٿي ڳري ٿي ڳي تي.

(44) پسئه ايسو اوئون نئه ساڏين وڙي ڳيو پرو ان ترٽمي وار همريئم پراڻا ڪري.

(45) تئين او وڙي شيلون ڪن پاسو آيو ان اوئون نئه زڳاڙين ڪيڏو: ”ٽمي هزون هوڏي اونگهائوھ ريا ان آروم ڪروھ ريا، ڪي؟ زوئو، همئنه او توتو آيوھ رو، زئين موئنه مون منڪ ذات را ڏيڪرا نئه زهلاوين ڏوهاري منڪون رئه خواله ڪرشي. (46) هوئه اوئو، هالون. زوئو، مون نئه زهلايا وازو آوي پوڳيوھ.“

يهوداه اسڪريوتي ايسو نئه زهلاوئوھ

(متي 47:26-56، مرقس 43:14-50، لوقا 22:47-53، يوحنا 18:3-12)

(47) هزون ايسو ٻولتوت ريو، تو اوچتو يهوداه اوئنه آوين پوتيو، جيو ايسو رون ٻارون سونڊل شيلون موئين ٿي هيڪ هتو. ان اوئا پيڙو منڪون رو هيڪ موتو ٽولو هتو، جيون ڪن ترئونارون ان ڏونگهون هتي. او موتون پوزاريون ان اسرائيلي قوم رون آڳيونونون را پاها ٿي ميلل هتا. (48) هوئه زهلايا وازئه يهوداه ٽولا رون منڪون نئه اي نيشون همپرايو تو جي ”جيا نئه هون ٻوسڪو ليون، اوئا نئه ٽمي زهاليا.“ (49) تيام او يڪدم ايسو ڪن آيو ان ڪيڏو: ”نمسڪار، ڳرو جي!“ ان اوئا نئه ٻوسڪو ليڏو. (50) تو ايسو اوئا نئه ڪيڏو: ”پريمي پائي، تون ايو ڪوم مانھ ڪم آيوھ؟“ تئين ٽولا ري منڪي ڏوڪڙا آوين ايسو نئه زهاليو ان اوئا نئه قابو ڪريو. (51) تو جيا ايسو پيڙا هتا، اوئون موئين ٿي هيڪئه زئه يڪدم آپري

ترؤنار ڪاڏئي، ان مُڪ پُوزاري را نوڪر نٿه هڻئي، ان اُونارو ڪون واديو پرو. (52) تئيون ايسو اُونارو نٿه ڪيڏو: ”آپري ترؤنار ميڻ ۾ نوڪ. ڪم تو جيا منڪ ترؤنار ٿي ويڻه، اُو ٻڌائي ترؤنار ٿي مراشي. (53) تون نٿه اينا وات رڻي ڪهر نٿي ڪي؟ جي هون مارا ٻاپ پڳوون ٿي مڌت مونگت، تو اُو يڪڌم آڪاشي ڏوتون ري ڦوڄ را ٻارن ٽولا مارئي مڌت ڪروا ميلئت. (54) پڻ جي هون هم ڪرونٽ، تو شاستر ري اي لڪل واتون ڪم ڪرين پوري ٿئت، جي اي ٻڌوئي ڪئين مون ٿي ضرور ٿيشي.“

(55) پسئو اُوئو ٿي ٿوئو ايسو ٽولا رون منڪون نٿه ڪيڏو: ”ترؤنارون ان ڏونگون لين مون نٿه زهالوا ڪم آياھ؟ هون ڌارٿيوال سون ڪي؟ هون تو تاريخ پڳوون را گهر موئين پيهين شيڪارتوت ريو، توئي پڻ اُوئو تمي مون نٿه ڪيڏي نه زهاليو. (56) پڻ اي ٻڌوئي ڪئين اينا هارو ٿيوھ، زم پڳوون رو نياپو ڏيڏا وازون ري لڪل شاستر ري واتون پوري ٿئو.“
تئيون ٻڌائي شيلا ايسو نٿه ساڏين پاڳي ڳيا.

ايسو نٿه مُڪ پُوزاري ڪائيفا ڪن تيڙي زائھ

ان ڌرمي پنچائيت ايسو نٿه موت رڻي سزا ڏيڏا رو ڦينصلو ڪرڻه

(متي 57:26-68، مرقس 14:53-65، لوقا 22:54-55، 63-71، يوحنا 13:18-14، 24)

(57) اُو منڪ جيئي ايسو نٿه زهاليو تو، اُو ايسو نٿه مُڪ پُوزاري ڪائيفا ڪن تيڙي ڳيا، جيئو شاستر زوڻيا وازا ان اسرائيلي قوم را آڳيوون پيڙا ٿيا تا. (58) ان پطرس گهڻي شينتي ڏين مُڪ پُوزاري را مولات هوڏي ايسو وونھڙ وونھڙ ڳيو. ان پسئو اُو موئين زائين سپايون پيڙو اونگڻا مانھ پيهي ريو، زم زوئو جي ايسو ٿي ڪي ٿيشي.

(59) موٽا پُوزاري ان ڌرمي پنچائيت را ٻڌائي منڪ اينا ري ڳوت ۾ هتا، جي ڪوڪ ايسو رڻه ڪلاڦ ڪوڙئي هاڪ پرين ايسو رو ايوو ڪوئي ڏوھ ڪاڏھ جيا

ٿي اُو ايسُو ننه موت رٿي سزا ڏيوراوي هيڪڻه. ⑥0 گهڻي منڪي آوين ڪوڙئي هاڪ پرڻي، توڻي پڻ اُوئون ننه ايوڻي ڪئين وات نه زڙئي، جيا ري ڪري ايسُو رو ڏوه ڪاڍي هيڪڻه. نيٺ ٻي منڪ آيا ⑥1 ان هاڪ پرين ڪيڏو: ”امي ايٺا منڪ ننه ام ڪيتون هومپڙيو: ’هُون پڳوون را گهر ننه ڪٽم ڪري هيڪون، ان ترئون ڏيئون ۾ وڙي ايٺا ننه ٺاوي هيڪون.‘ ” ⑥2 تيا مانھ مڪ پوزاري اُوئين اُوپو ان ايسُو ننه ڪيڏو: ”اي هاڪ پرين ٿارو اي ڏوه ڪاڍه ريا، تو تون هيا را پارام ڪئين جواپ ٿئي ڏيتو، ڪي؟ ” ⑥3 پڻ ايسُو ڪئين نه ٻوليو. تو مڪ پوزاري اُوٺا ننه ڪيڏو: ”هُون تون ننه جيوتا پڳوون رو هون ڏيونه. امون ننه همپڙاو، تون پڳوون رو سونڍل پڇايا وازو ڪريست ان پڳوون رو ڏيڪرو سٺه، ڪا نا؟“

⑥4 تو ايسُو اُوٺا ننه ڪيڏو: ”زم تم ڪيڏوه، تم هون سون. پڻ هون تمون ٻڌون ننه ڪاتري ٿي ڪونه، هوئه ٿي لين تم ٻي مڪ ذات را ڏيڪرا ننه ڪڙا وازا پڳوون رنه زمئنه پاهنه مون ۾ پيئل ان آڪاش رون واڌزون ۾ اوتو ڏيڪشو، ان وات ساوڻي ٿيشي جي هون پڳوون را پاها ٿي راز ڪريا وازو سون.“

⑥5 تئين مڪ پوزاري آپ ننه ڏکي ڏيڪاڙيا هارو آپرو پيرل گهنگهو ڦاڙيو ان ڪيڏو: ”هوئه آپون ننه پيزون هاڪ پريا وازون رٿي ڪيوڻي ضرورت سٺه؟ زوٽو، تم ٻي همئنه ڪوني هومپڙيوه جي ايئه آپ ننه پڳوون هرڪو ڪين پڳوون رٿي پيغڙتي ڪريه. ⑥6 تم ڪيو قينصلو ڪروه؟“ تو پنچائيت ري منڪي ورنڌي ڏيڏي: ”اي ڏوهاري سٺه. ايٺا ننه موت رٿي سزا ڏيو ڪپه.“

⑥7 تئين اُو ايسُو را مونيڊا مانھ ٽوڪيا ان اُوٺا ننه ٺونشا هٿيا. ان ڪيٽيڪ اُوٺا ننه ٿڀڙون هٿي ⑥8 ان اُوٺا ٿي پونسو: ”او پڳوون را سونڍل پڇايا وازا ڪريست، تون پڳوون رو نياپو ڏيڏا وازو سٺه، نا؟ تو پستھ امون ننه همپڙاو ڪيئن تون ننه ڏڪ هٿيوه؟“

پطرس ايسو رو شيلو هويا رو نا پاڙڻه

(متي 26:69-75، مرقس 14:66-72، لوقا 22:55-62، يوحنا 18:15-18، 25-27)

⑥9 تته توتنه پطرس ڌرٻار ٿي ٻارو اونگڻا مانھ پڻو تو. ان هيڪي نوڪروڻي اوتا ڪن آوين ڪيدو: ”تون پڻ گليل صوپا واڙا ايسو پيڙو هتو.“ ⑦0 پڻ پطرس ٻڌون رته روپرو نا پاڙين ڪيدو: ”تون ايوئي اوڙئي وات ڪم ڪرڻه رهي؟ هون تو ٿوڙي اوتا پيڙو هتو.“

⑦1 تنيون پطرس اوئون زائين مولات را ٻارليا ڌروازا ڪن گيو. پڻ اوڻه پيڙي نوڪروڻي اوتا ننه ڏيڪيو، ان اوڻه اوپل ٻڌون منڪون ننه ڪيدو: ”اي منڪ ايسو ناصرت شهر واڙا پيڙو هتو.“ ⑦2 تو پطرس وڙي نا پاڙيو ان هون ڪائين ڪيدو: ”هون تو هايا منڪ ننه اوڙڪتو ئي نٿي.“

⑦3 ٿوڙيڪ وار ڪيڙ اوڻه اوپل منڪي پطرس ڪن آوين ڪيدو: ”اي تو هاسي وات سڻه جي تون پڻ اوئون موئينليو سڻه، ڪم تو ٿاري ٻولي ٿي



ڪهر پڙڻه رهي جي تون گليل صوپا رو سڻه.“ ⑦4 تنيون پطرس پتو مڏيو ان هون ڪائين ڪيو مڏيو: ”هون اوتا منڪ ننه نٿي اوڙڪتو.“ ان يڪدم ڪوڪڙهه ٻونگ ڏيڏي. ⑦5 ان پطرس ننه ايسو رهي ڪيڏل وات ياد آئي جي ”ڪوڪڙا رته ٻونگ ڏيڏا مور، تون ترڻ وار مارو نا پاڙيه.“ ان پطرس اوئون ٻارو نيهرين ڏوهڪي ڏوهڪي رويو.

يهودي نرم را اگيون ايسو نڙ رومي راز ڪريا واڙا پيلاطس ڪن تيڙي زائھ

(متي 27:1-2، مرقس 15:1، لوقا 23:1-2، يوحنا 18:28-32)

27 ① ھوار ٿيو، تو ٻڌي موتي پوزاريئي ان اسرائيلي قوم ري آگيون آيت ۾ ايسو نڙ ڪلاڻ صلاح ڪرڻي جي اوڻا نڙ ڪيو نڙ نمونڙ ھراوڻ ڀرو. ② پسنڻ او ايسو نڙ ٻوندين اوڻون ھارو لي ڳيا ان زائين صويا مانھ راز ڪريا واڙا پيلاطس نڙ ھوائ ڪريو.

يهوداھ اسڪريوتي پاهئي ڪائھ

(متي 27:30-3، مڪ شيلون را ڪوم 18:1-19)

③ زئيون ايسو نڙ زھلایا واڙنھ يھوداھ ڏيڪيو جي ايسو مانھ موت ري سزا رو ڦينصلو ٿيوھ، تئيون او گھڻو ڏڪي ٿيو جي اوڻھ ايسو نڙ زھلایوھ. تيام او ايسو نڙ زھلایا را ٿيھ چونڊي را سڪا پاسا ڏيڏا ھارو موتون پوزاريون ان اسرائيلي قوم رون آگيونون ڪن ڳيو، ④ ان اوڻون نڙ پئيھا ٿورين ڪيڏو: ”مئين ڏوھ ڪريوھ. مئين هيڪا پيڏوھي منڪ نڙ زھلایوھ، ان ھوڻھ ماري ڪري اوڻا نڙ موت رئي سزا زڙشي.“ پڻ اوئي ڪيڏو: ”ھايا ۾ امارو ڪي زائھ؟ تون زوڻھ ان ٿارو ڪوم زوڻھ.“ ⑤ تيا مانھ يھوداھ او پئيھا پوزاريون ڪن پڳوون را گھر ري پويتر جڳا ۾ ڦڳوڙين ڳيو ڀرو، ان آپ زائين پاهئي ڪاڏئي.

⑥ تئيون موتي پوزاريئي او پئيھا لين آيت ۾ ڪيڏو: ”ڌرم ڀرموڻھ آبي اي پئيھا پڳوون را گھر را ڪزونا ۾ نٿي راڪي هيڪتا، ڪم تو اي ڪون را پئيھا سڻھ.“ ⑦ تيام اوئي آيت ۾ صلاح ڪرين ھايون پئيھون ٿي هيڪ ڪيتر ويساتو ليڏو، جيا نڙ ڪونپار رو ڪيتر ڪيتا، زم اوڻا نڙ پرڏيشيون ھارو مقوم رئي جڳا ناوين راڪڻھ. ⑧ ھايا ري ڪري اوڻا ڪيتر نڙ آڙ ھوڏي ڪون رو ڪيتر ڪڻھ.

- ⑨ هيوئه نمونئه پگهون رو نياپو ڏيڌا واڙا يرمياه رئي ڪيڌل اي وات پوري تي:
- ”ان اوتي تيه چونڌي را سکا ليڌا،
جيا پئيها اسرائيلي قوم ري منڪي
اوتا منڪ هارو گهڻا هزميا.
⑩ ان اوتي هائي پئيها ڪونپار رو ڪيتر ليڌا هارو ڏيڌا،
زم ايشور مون نئه ڪريا رو ڪيڌو تو.“

رومي راز ڪريا واڙو پيلاطس ايسو تي پڙا پونس ڪرئ

(متي 14-11:27، مرقس 15:2-5، لوقا 23:3-5، يوحنا 18:33-38)

- ⑪ اوتئ توتئ ايسو صوپا مانھ راز ڪريا واڙا هومو اوپو تو. راز ڪريا واڙئ
اوتا تي پونسو: ”تون يهوديون رو پاڌشا سئ، ڪي؟“ تو ايسو ڪيڌو: ”زم
تمي ڪوه ريا، هون سون.“ ⑫ پڻ زئون موتي پوزاريئي ان اسرائيلي قوم ري
آگيونوي اوتا مانھ ڏوه ڏيڌا، تو ايسو ڪئين جواب نه ڏيڌو. ⑬ تيون راز ڪريا
واڙئ. پيلاطس اوتا نئه ڪيڌو: ”اي هاڪ پرين تون مانھ اتا گهڻا الزوم هئئ
ريا. تون هومپرتو نئي، ڪي؟“ ⑭ توتي پڻ ايسو ڪيا ئي الزوم را پارام اوتا
نئه ڪئين جواب نه ڏيڌو. هايا وات مانھ راز ڪريا واڙو گهڻو حيرون ٿيو.

رومي راز ڪريا واڙو پيلاطس

ايسو نئ موت رئي سزا ڏيڌا رو ڦينصلو همپزاوئ

(متي 26-15:27، مرقس 15:6-15، لوقا 23:13-25، يوحنا 18:39-16)

- ⑮ هوه هڪ رواز هتو جي سال ٿو سال پاشڪا پرې مانھ رومي راز ڪريا
واڙو يهودي قوم رو هڪ قيڌي ساڌتو، جيا نئه پڻ پرې مانھ اول زاترو سڏاوا
ڪرتا. ⑯ اوتا وڪت ۾ يهودي قوم رو هڪ مشور قيڌي هتو، جيا رو نوم برابر
هتو. ⑰ تيام، زئون يهودي قوم را منڪ پيڙا ٿيا، تيون رومي راز ڪريا واڙئ

پيلاطس اوتون ٿي پونسيو: ”تمارئي ڪيوي مرضي سٺ؟ هون تمون هارو برابر
نٺ ساڏون، ڪا ايسو نٺ ساڏون، جيا نٺ پڳوون رو سونڊل پڇايا وازو ڪريست
ڪٺ؟“ (18) اوت هه ڪيڏو، ڪم تو اوتا نٺ ڪهر هتي جي يهودي قوم را موتا
پوزاري ان آڳيوون ايسو مانه ريشي بڙهه، ان تيام اوتي ايسو نٺ زهلاوين اوتا
رٺ حواله ڪريوه.

(19) زئيون پيلاطس ڦينصلو ڪريا هارو آپري گهاڙي مانه پيئل هتو، تو اوتا
ري ڏوشي اوتا نٺ ايسو را پارام اي نياپو ڏي ميليو: ”تمي اوتا پيڏوهي منڪ
ٿي ڪئين مت ڪرو، ڪم تو رات مون نٺ اوتا را پارام هيڪ شپنو آيو، ان هايا
ري ڪري هون گهٽي گهٽيون ۾ سون.“ (20) پڻ موتي پوزاريئي ان يهودي قوم
ري آڳيووني آپري قوم رتون منڪون نٺ اي وات شيڪاڙي جي او برابر نٺ
ساڏيا رو ان ايسو نٺ موت رٿي سزا ڏيڏا رو مونگهه.

(21) تيا مانه رومي راز ڪريا واڙهه پيلاطس يهودي قوم رتون منڪون ٿي
پونسيو: ”تمارئي ڪيوي مرضي سٺ؟ هون ايئون پيئون موئين ٿي تمون هارو
ڪيا نٺ ساڏون؟“ تو اوتي ڪيڏو: ”برابا نٺ ساڏو!“ (22) تو پيلاطس اوتون ٿي
پونسيو: ”تو پسٺ هون ايسو ٿي ڪي ڪرون، جيا نٺ پڳوون رو سونڊل پڇايا
وازو ڪريست ڪٺ؟“ تو ٻڌي منڪي ڪيڏو: ”هايا نٺ هوري مانه ساڙين مارو
پرو.“ (23) تيا مانه پيلاطس ڪيڏو: ”ڪم؟ ايٺه ڪيو ڏوه ڪريوه؟“ پڻ او
ماڳي وڌارٺ زور زور ٿي ٿائي ڪرين ڪيا مڏيا: ”هايا نٺ هوري مانه ساڙين
مارو پرو!“

(24) تيام، زئيون پيلاطس زيو جي آپري وات منايا ۾ ڪئين نٿي وٽو، پڻ
ماڳي ڦشري تيا واڙي سٺه، تيون اوت ڪئينڪ پوٽي مڳاوين ٻڌون منڪون
رٺ روپرو آپرا هاڻ ڌويا ان ڪيڏو: ”ايٺا منڪ رو ڪون مون مانه نه پڙهه. تمي
زوٽو ان تمارو ڪوم زوٽه.“ (25) تيا مانه يهودي قوم ري ٻڌي منڪي ڪيڏو:
”اوتا رو ڪون امون مانه ان امارا اولاد مانه پلٽه پڙهه.“

②6 تئيون پيلاطس بربا ننه اوتون هارو ساڌيو پرو، پڻ ايسو ننه چاڀڪا هئاوين قوجيون رنه خواله ڪريو، زم اوتا ننه هوري مانه ساڙين مارنه پرو.

رومي قوجي ايسو مانه ننولي ڪرڻه .

(متي 27:27-31، مرقس 15:16-20، يوحنا 19:2-3)

②7 تئيون راز ڪريا وازا پيلاطس را قوجي ايسو ننه گهڊ موئين تيڙي ڳيا، ان قوج رو ٻڌو تولو ايسو ڪن پيڙو ڪريو. ②8 ان اوني ايسو رو گهنگهو اوتراوين راتا رنگ رو چال اوتا رون ڪون مانه اوڍاڙيو، ②9 ان ڪونتن رو تاج ڳوئين اوتا را ماتام پيرايو، ان اوتا را زمنا هات ۾ هيڪ لاکڙي زهلاوئي. ان پسنه ٻڌي اوتا ري پڳي پڙين اوتا مانه ام ننولي ڪري: ”او يهوديون را پاڌشا، نمسڪارا!“ ③0 ان اوتا مانه ٽوڪين او هائي لاکڙي اوتا تي لين اوتا ننه ماتا ۾ هئا مڏيا. ③1 زئيون قوجي ايسو مانه ننولي ڪري ريا، تئيون اوني چال اوتا تي اوترايو، ان اوتا را آپرا لوگهڙا وڙي پيرايا، ان پسنه اوتا ننه هوري مانه ساڙيا هارو ٻارو لي ڳيا.

قوجي ايسو ننه هوري مانه ساڙڻه

(متي 27:32-44، مرقس 15:21-32، لوقا 23:26-43، يوحنا 19:17-27)

③2 زئيون قوجي ايسو ننه لين شهر تي ٻارا زاتات ريا، تو اوتون ننه ڪريني شهر رو هيڪ منڪ پيڙو ٿيو، جيا رو نوم شمعون هتو. ان اوني ايٿا ننه پيڳر ۾ زهالين ايسو رئي هوري اوتراوئي. ③3 زئيون اوتا ماڳ پوڳيا جيا ننه ”گلگتا“ ڪنھ، جيا رو مطلب سٺه پوڌڪي رو ماڳ، ③4 تئيون اوني ايسو ننه پيدا هارو ايوو ڌراڪون رو رس ڏيڌو جيا ۾ ڌوڪ گهٽ ڪريا هارو نشا واري ڪارئي شينه پيڙول هئي. پڻ هائي ساڪين هونش ۾ ريا هارو اونه پيدا تي نا پاڙيو. ③5 تئيون اوني ايسو ننه هوري مانه ساڙيو، ان پکا نوڪين اوتا را لوگهڙا آبت ۾ وراوي

ليڏا. ③6 ان اوتئہ پيهين اوتہ مانہ پاهرو ڏيوا مڏيا.

③7 ان اوتئي هُوزي مانہ ايسو را ماتا اُوپر هيڪ پتئي هئي، جيا مانہ لڪل هتو جي ايسو ڪيا وات ري ڪري موت رئي سزا ڪائہ ريو. لڪل اي هتو:
 "اي يهوديون رو پاڏشا ايسو سئہ."



③8 پستہ اوتئي ايسو پيڙا پيئون ڌاڙيلون
 نئہ پڻ ڌار ڌار هُوزي مانہ ساڙيا، هيڪا
 نئہ ايسو رتہ زمئئہ پاهئہ، ان پيڙا نئہ
 ڏاوتہ پاهئہ.

③9 جيا منڪ اوتون متتات ريا، او ماتو

ڏڳاوين ايسو مانہ نئولي ڪرتات ريا، ان ام ڪين ايسو رئي پيعزتئي ڪرتات
 ريا: ④0 "تُون تو پڳوون رو گهر پونگين ترثيون ڏيئون ۾ وڙي نايا وازو هتو،
 تُون هُوتہ آپرا آپ نئہ پچاو. جي تُون پڳوون رو ڏيڪرو سئہ، تو هُوزي ٿي نيسو
 اوتري آو." ④1 ان هيوئہ نمونئہ موتا پوزاري، شاستر زوٿيا وازا ان اسرائيلي قوم
 را آڳيوون اوتہ مانہ نئولي ڪرين ام ڪيتات ريا: ④2 "ايئہ پيزون نئہ پچايا، پڻ
 آپ نئہ نتئي پچاوي هيڪتو. جي اي هاس ۾ اسرائيلي قوم رو پاڏشا سئہ، تو
 اي همئہ رو همئہ هُوزي ٿي نيسو اوتري آوتہ، ان امي ايئہ مانہ يقين ڪرون.
 ④3 ايئہ پڳوون مانہ پروسو را ڪيوھ. جي اي پڳوون نئہ وئہ، تو پڳوون ايئہ نئہ
 همئہ پچاوتہ. ڪم تو ايئہ ڪيڏو تو جي هُون پڳوون رو ڏيڪرو سون." ④4 ان
 جيا ڌاڙيل ايسو پيڙا هُوزي مانہ سڙاول هتا، اوتئي پڻ همرام ايسو نئہ ميٿا ڏيڏا.

ايسو رو موت

(متي 45:27-56، مرقس 15:33-41، لوقا 23:44-49، يوحنا 19:28-30)

④5 پپورون رو ٻارون واڳون ٿي لين ترثيون را توتہ هُودِي پورا ملڪ ۾ اندارو ٿي
 گيو. ④6 ترثيڪ واڳي ايسو گهٽا زور ٿي ڪيڏو: "ايلي، ايلي، لما شبعتنِي؟"

جيا رو مطلب سٺه "او مارا پڳوون، او مارا پڳوون، تمې مون ننه ڪم ساڏيوه پرو؟"

④7 هائي هومپڙين اوٿه اوپل منڪون موئين ٿي ڪئينڪ زئا، "ايلي" ويڻ رو مطلب ڳلت هڙمين، ام ڪيو مڌيا: "اي ايلياه ننه هاڏ ڪرڻه ريو." ④8 ان يڪدم اوئون موئين ٿي هيڪنه زئنه. ڊوڙي زائين ٿوري ري چاري جيوئي شينه ڪاٿا ڌراڪ رس ۾ پوڙئي، ان او لي آوين هيڪي لاکري ۾ پرووين ايسو ننه سونپيا هارو ڏيڏئي. ④9 پڻ پيزا ڪيتات ريا: "اوپو رنه! زوئون پلا، ايلياه اوئا ننه پچاوا اوئه، ڪا نا."

⑤0 تئين ايسو وڙي موئي رڙ ڪري، ان اوئا رو هاه نيهرې ڳيو. ⑤1 ان اوئه ئي توئنه پڳوون را گهر موئين پويتر جگا رو پڙڏو مائون لين هيٺ هوڏي پئون ٽڪرون ۾ ڦاٽي ڳيو، ان زمئي ڏهئي، ان شيپرون پنگائي ڳي. ⑤2 ان مقوم کلي ڳيا، ان پڳوون را سونڍل منڪ جيا مري ڳيا تا، اوئون موئين ٿي پڳوون گهئون



منكون ننه جيوي اوناڙيا، (53) ان او مقومون موئين ٿي نيهرين ايسو رنه جيوي اونيا ڪيڙ پوٽر شهر يروشلم ۾ ڳيا، ان گهڻون منكون ننه ڏيکارا ڏيڏا.



(54) قوجيون رو ساڀ ان او قوچي جيا اونا پيڙا ايسو مانھ پاهرو ڏيتات ريا، او زمي ننه ڏهٽي ان پيڙي واتون ٿيتي ڏيڪين گهڻا پيڻائي ڳيا، ان ام ڪيوا مڏيا: ”هاس ۾ اي پڳوون رو ڏيڪرو هتو.“

(55) اوڻه گهڻي ڏوشي پڻ هتي جي شيئا ٿي زوتيت ري. او ايسو رڻي شيوا ڪريا هارو گليل صوبا ٿي ايسو پيڙي آوي تي. (56) اوڻون موئين مريم مگدليني، يعقوب ان

يوسف رڻي مان مريم، ان زبدي رڻي ڏوشي پڻ هتي، جيا را ڏيڪرا يعقوب ان يوحنا هتا.

ايسو را لاش ننه پونئيرا. جيووا مقوم موئين راڪڻه

(متي 57:27-61، مرقس 42:15-47، لوقا 23:50-56، يوحنا 19:38-42)

(57) زئيون هونز ٿي، تئيون ارمتيه شهر رو هيڪ شائوڪار منڪ آيو، جيا رو نوم يوسف هتو. او آپ پڻ ايسو رو شيلو هتو. (58) اوڻه پيلاطس ڪن زائين ايسو رو لاش مونڱيو. ان پيلاطس اونا ننه لاش ڏيڏا رو حڪم ڏيڏو. (59) پسئو يوسف لاش ننه لين اونا ننه مونگها سوڻي صاف ڪڍڻ موئين وينتوزيو، (60) ان نوا ناوڻ پونئيرا جيووا مقوم موئين ميلو نو، جيا ننه اوڻه آپ هارو ڏونگر ۾ کوترايو تو. ان پسئو موڻي شپير ريتوين مقوم را مونڊا آڏي ڏين ڳيو پرو.

(61) اوڻه مريم مگدليني ان پيڙي مريم مقوم هومي پيئي تي.

رُومي قوجي ايسو را مقوم مانه پاهرو نئه

⑥2 اوتا جُمعا ڪيڙ پيزنه ڏي، موتا پوزاري ان فريسي پالتي را منڪ ٻڌائي پيڙا
 ٽين رُومي راز ڪريا وڙا پيلاطس ڪن آيا. ⑥3 ان اوتا نئه ڪيڏو: ”ساب، امون
 نئه ياد سئه جي زنيون هائي ڪوڙو منڪ حياتي هتو، تو اوتنه ام ڪيڏو تو جي
 ’پڳوون مُون نئه ترئمئه ڏي جيوي اوناڙشي.‘ ⑥4 تيام تمي ترنيون ڏيئون هُودِي
 اوتا را مقوم مانه پاهرو ڏيوراو، متون اوتا را شيلا آوين اوتا رو لاش سورئي
 ڪرين لي زائه، ان اماري يهودي قوم رون منڪون نئه ڪئه جي پڳوون اوتا نئه
 مرلون موئين ٿي جيوي اوناڙيوه. جي هم ٿي زائه، تو هايا پيڙا ڪوڙ ري ڪري
 پيرهان ڪوڙ ٿي وڌارئه گهڻو نقصون ٿيشي.“ ⑥5 تو پيلاطس اوتون نئه ڪيڏو:
 ”ٺيڪ سئه. هُون پاهرو ڏيڏا هارو تمون نئه قوجي ڏيونه. تمي زائين، زم تمون
 نئه وٺئه، تم پوري سڪتي ٿي مقوم مانه پاهرو ڏيوراو.“ ⑥6 تيام اوتي زائين
 مقوم را مونڊا آڏئي ڏيڏل شيپر رئه چوڌاري موهرن هڻين قوجيون نئه اوپاڙين
 مقوم مانه سڪتي ٿي پاهرو ڏيوراو.

ايسو جيوي اونهه، ڏيڪاڙا نئه ان شيلون نئه هيڪ ڪاس ڪوم پڙاونه

ايسو موت ٿي جيوي اونهه

(متي 10-1:28، مرقس 8-1:16، لوقا 12-1:24، يوحنا 10-1:20)

28 ① پويتر ڏي ڪيڙ، آچار رئه ڏي، ڏي اُوگيا رئه توڻئه، مريم مگدليني
 ان پيڙي مريم مقوم نئه زووا نيهري. ② ان زوئو، زمئي گهڻي ڏهڻي،
 ڪم تو ايشور رو هيڪ ڏوت آڪاش ٿي اوتري آيو ان مقوم مانه آوين مقوم را
 مونڊا ٿي آڏئي ڏيڏل شيپر ريڙوين هيڪئه پاهئه ميلئي ان اوتا مانه سڙين پينو

نو. ③ اُونَا رو رُوپ وِيزَري را گهوڙ زبکتوت ريو، ان اُونَا را لُوگهڙا ڌوڙا شيتَر هتا. ④ آڪاشِي ڏوت ننه ڏيکين، جيا قوچي مقوم مانھ پاهرو ڏيتات ريا، اُو پيڪ ري ڪري ڌرُڙوا مڏيا ان مرلون را زم زمي مانھ پڙيا نا. ⑤ ڏوشي اُوڻه آوين پوتي، تو هائي ٻڌوئي زوئين پيئوئي. تيام آڪاشي ڏوت اُوڻون ننه ڪيڏو: ”تمي مت پيئائو! ڪم تو مون ننه ڪبر سئھ جي تمي ايسو ننه گوتوھ ري، جيا ننه هُوڙي مانھ ساڙين ماريوت پرو. ⑥ اُو ايتھ نتي، ڪم تو زم اُوڻه مور ٿي ڪيڏو تو، تم پگهون اُونَا ننه موت ٿي جيوي اُونَاڙيوھ. آوين اينا جگا ننه زوئو، جيئھ اُونَا رو لاش راکل هتو. ⑦ ان تمي جلدِي زائين اُونَا رُون شيلون ننه همپڙاوو جي پگهون اُونَا ننه مرلون موئين ٿي جيوي اُونَاڙيوھ، ان هُوڻه اُو تمون مور گليل صوپا ۾ زاشي، ان اُوڻه تمي اُونَا ننه ڏيڪشو. ياڌ راکيا، مئين تمون ننه ٻڌي وات همپڙاوئھ پري.“

⑧ تو پسئھ ڏوشي مقوم ٿي جلدِي زائين پيڪ ۾ ان گهڻي ڪشي ٿي ايسو رُون شيلون ننه همپڙايا هارو ڍوڙي گي. ⑨ ان اوچتو ايسو اُوڻون ڏوشيون ننه پيزو ٿيو ان ڪيڏو: ”نمسڪار!“ تو اُو ايسو ڪن آوين اُونَا ري پگي لاگي، ان اُونَا رئي پوزا ڪري. ⑩ تئيون ايسو اُوڻون ننه ڪيڏو: ”مت پيئائو! تمي زائو، مارون پايون ننه همپڙاوو جي اُو ايتون گليل صوپا ۾ زائھ، ان اُوڻه اُو مون ننه ڏيڪشي.“

موتا پوزاري ان يهودي قوم را اڳيون

ايسو رءُ جيوي اُونيا رئي وات هٽاڙوا ڪرئھ

⑪ زئيون ڏوشي آڀرو شيرڙو لين ذاتيت ري، تو جيا قوچي مقوم مانھ پاهرو ڏيتات ريا، اُوڻون موئين ٿي ڪئينڪ شهر موئين آيا ان موٽون پوزاريون ننه ٻڌي واتون همپڙايو جي ڪي ڪي ٿيوھ. ⑫ تو موتي پوزاريئي يهودي قوم رُون اڳيونون پيزا ٿين آڀت ۾ صلاح ڪري، ان پسئھ قوچيون ننه گهڻي رشوت

ڏيڏئي، ⑬ ان اوتون ننه ڪيڏو: ”تمي ام ڪيا جي امون ننه تو اُونگه آوي گهي تي، ان اوتا را شيلا رات را آيا ان اوتا رو لاش سورئي ڪرين لي گيا. ⑭ ان جي هائي وات راز ڪريا وازا ڪن پوتنه، تو امي آپ اوتا ننه ڪش ڪرين وات مناوشون، ان تمون ننه ڪيا ڪر ۾ نئين پڙوا ڏيون.“

⑮ تو پسنه ڦوجيئي پئيه ليدا را، ان زم اوتون ننه شيڪاڙيو تو، همروم ڪريو. ان آز هوڏي اي ڪوڙي وات يهوديون ۾ پڪيڙل سئ، جي ايسو را شيلا اوتا رو لاش سورئي ڪرين لي گيا تا.

ايسو آپرون شيلون ننه هيڪ ڪاس ڪوم پڙاوئه

(متي 16:28-20، مرقس 15:16-18)

⑯ ايسو را اڳيارنه سونيل شيلا گليل صويا موئين اوتا ڏونگر ڪن گيا، جيئن ايسو اوتون ننه زايا رو ڪيڏو تو. ⑰ اوتنه ايسو اوتون ننه ڏيڪاڙو ڏيڏو، ان اوتا ننه ڏيڪين شيلي اوتا رهي پوزا ڪري. پڻ اوتون موئين ٿي ڪئينڪ شيلا شڪ ۾ پڻ هئا. ⑱ تو ايسو اوتون ڏوڪڙو آوين اوتون ٿي ٻوليو ان ڪيڏو: ”پگهون آڪاش مانھ ان ڌرتي مانھ ٻڌوئي ڪئين مارا ڪيڏام ڏيڏوھ. ⑲ تيام تمي ٻڌيل زائين ٻڌيون قومون رون منڪون ننه مارا شيلا ناوو. اوتون ننه پگهون ٻاپ، ڏيڪرا ان پويتر آتما را نوم ٿي پويتر سنون ڏيو، ⑳ ان اوتون ننه شيڪاڙو جي او اوتون ٻڌيون واتون مانھ وئ، جي واتون مئين تمون ننه شيڪاڙيھ. ان ياد راکو، هون هميش ڏنيا ري پڇاڙي هوڏي تمون پيرو هوئيھ.“

مرقس را لکل شاستر رڻي هزموڻي

شاستر لکيا واڙو

شاستر را اينا ڪتاب ۾ لکيا واڙا رو نوم ڪيٽه نڻي لکل، پڻ شروع ٿي لين منک ام هزمته جي مرقس اينا نه لکيوه. مرقس يهودي قوم رو هتو، اوتا رو اصلي نوم يوحنا هتو، ان او آپري مان پيڙو يروشلم شهر ۾ ريتو (مک شيلون را کوم 12:12). ڪئينک منک ام پڻ هزمته جي ماڙي مانجه جيا ڪمرا ۾ ايسو آکري وار آپرون شيلون پيڙي روڻي کاڌي (مٽي 18:26، مرقس 13:14-15، لوقا 12:22-10)، او ڪمرو مرقس را گهر رڻي اوتاگ هئي، ان جيو جوڻ اوته رات ايسو وونهڙ وودو، ان پس ايسو نه زهاليا واڙون ٿي پاڳي ڳيو، او زويام مرقس آپ هتو (مرقس 51:14-52). ايسو زه مريا ڪيڙ زئيون ايسو رو مک شيلو پطرس وشواسيون رو اڳيون ٿيو، تنيون وشواسي منک مرقس ري گهري پيڙا ٿينا (مک شيلون را کوم 12:12). تيام مرقس پطرس نه گهڻو اوڙڪتو، ان پطرس مرقس نه آپرا ڏيکرا را زم هزمته (1 پطرس 5:13). زونا وکت ٿي لين منک هزمته جي زئيون مرقس اي ڪتاب لکيو، تنيون اوته پطرس ري واتون هوميزين لکيو.

مرقس برنباس رو عزيز پڻ هتو (ڪلسيون 10:4)، ان زئيون برنباس ان پولوس يروشلم شهر رو وشواسيون نه امداد ڏين پاسا انطاڪيه شهر ۾ ڳيا، تنيون مرقس پڻ اوئون پيڙو انطاڪيه شهر ۾ ڳيو (مک شيلون را کوم 25:12). تيا ڪيڙ زئيون برنباس ان پولوس ايسو را پارام هيڙايا هارو پيرهئون چڪر ڪريو، تو مرقس (جيا رو اصلي نوم يوحنا هتو) پيڙو ڳيو (مک شيلون را کوم 5:13). پڻ چڪر را وس ۾ مرقس اوئون نه ساڏين پاسو يروشلم شهر ۾ آپري گهري ڳيو پرو (مک شيلون را کوم 13:13). تيا ڪيڙ زئيون پولوس ان برنباس پيڙو چڪر ڪريا رو ٿينصلو ڪريو، تنيون برنباس مرقس نه آپ پيڙو تيڙي زاوا ڪريو، پڻ پولوس هايا وات ۾ کڻن تو ڪم تو مرقس اڳي کوم ساڏيوت پرو. تيام برنباس مرقس نه تيڙين هيڪه پاهه چڪر ڪريو، ان پولوس سيلاس نه تيڙين پيڙه پاهه چڪر ڪريو (مک شيلون را کوم 36:15-41). تيا ڪيڙ پولوس ان مرقس آيت ۾ نه ڳيا ان زئيون پولوس روم شهر ۾ قيڙي هتو، تنيون مرقس اوتا پيڙو کوم ڪرتو (ڪلسيون 10:4، فيلمون 1:24). آکر ۾ زئيون پولوس پيڙي وار روم شهر ۾ قيڙي هتو، تنيون اوته مرقس نه مدت ڪريا هارو آپ ڪن تيڙايو (2 تيمتيئس 11:4).

اينا ڪتاب ري آکري باره آيتون (مرقس 9:16-20) ٻڌون زنون ڪتابون ۾ نئي لکل.

تيام گهڻا منڪ هزمئڻه جي زويام اي آيتون مرقس ري لڪل ٿئي پڻ تيا ڪيڙ پيزڻ ڪيڻڪ لڪي هوشي.

پڪي ڪبر ٿئي جي مرقس اي ڪتاب ڪيئون لکيو، پڻ اندازام 50-67ع ۾ لکيو.

شاستر ڪيون منڪون هارو لکيو

مرقس شاستر رو اي ڪتاب ڌاري قوم رن منڪون هارو لکيو. تيام او آبري يهودي قوم رن ريت روازون را پارام هزماونڻه (مرقس 2:7-4, 15:42)، ان آبري عبراني ٻولي رن ويئون رو ترجمو پڻ ڪرڻه (مرقس 17:3, 41:5, 34:7, 22:15). ام لاڳڻه جي مرقس اي شاستر کاس ڪرين روم شهر رن وشواسيون هارو لکيو، ڪم تو اوئون ڏيئون ۾ مرقس پولوس پيڙو ان پطرس پيڙو روم شهر ۾ هتو (2 تيمٿس 11:4, 1 پطرس 13:5).

شاستر لکيا رو مطلب

ام لاڳڻه جي مرقس شاستر رو اي ڪتاب کاس ڪرين روم شهر رن وشواسيون هارو لکيو، زم ڏورون ڏيئون ۾ اوئون رڻي هيئت وڌڻ ان او ايسو مانڻه وشواس نه ساڏڻ. اوڻا وڪ ۾ رومي حڪومت وشواسيون نه تنگ ڪرڻي، ان نيٺ، اندازام 68ع ۾، رومي حڪومت رڻ نيرو نومي پاڏشا پطرس نه ان پولوس نه ايسو مانڻه وشواس راڪيا ري ڪري موت رڻي سزا ڏيڻي. تيام ايتا ڪتاب ۾ گهڻي ماڳي لڪل سڏ جي ايسو ڪتا ڏک سهيا، ان وشواسيون رڻ پڻ ايسو را زم ڏک سهو پڙشي (مرقس 12:1-13, 34:8, 29:30, 32:34, 39:10, 45:10, 13:9-13).

مرقس پريو ايسو رن ڪرل پرسون مانڻه گهڻو ڏيون ڏنڻه جي ايسو آبري ڪڙا ٿي منڪون نه هازا هورا ڪريا، پوت ڪاڍيا، ان ٻڌائي جڳت مانڻه آبري اڪٽاري ڏيکارڻي. مرقس ايتا ڪتاب ۾ پريو ايسو رڻي اي ڪيڏل وات پڻ لکڻي جي پڳوون رو گهر ڪنم ٿيشي (مرقس 13:1-31). هائي ڪيڏل وات 70ع ۾ پورڻي ٿئي، زئون رومي فوج يروشلم شهر ۾ آوين پڳوون رو گهر ڪنم ڪريو پرو. هيا ٿي پڳوون يهودي ڌرم رو مال ساڙيا رو نمونو ڪنم ڪريو پرو، ان يهودي ڌرم رن اوئون منڪون نه سزا ڏيڻي، جيا ايسو نه پڳوون رو سونڊل پڇايا واڙو ڪريست نتا مونتا. هيون نمون پڳوون آپ ٿاڻي ڏيڻي جي ايسو هاس ۾ پڳوون رو سونڊل پڇايا واڙو ڪريست سڏ، جيئن ٻڌون منڪون رن ڏوهون ري ماڻي هارو آبرو جيو پڳوون را نوم مانڻه ڏيڏوه.

ايټا کتاب موئين اي حصا سئ:

يوحنا پويتر سنون ڏيڏا واڙو بريو ايسو را آيا هارو منكون نئ تيار كرڻه	8-1:1
ايسو پويتر سنون لڻه ان شيطون اوئا نئ پگوون ري مرضي ټي قيرواو كرڻه	13-9:1
ايسو گليل صويا موئين پگوون رو كوم كرڻه	29:6-14:1
ايسو ڌاريون قومون رون ملكون م زائين پگوون رو كوم كرڻه	29:9-30:6
ايسو وڙي گليل صويا موئين پگوون رو كوم كرڻه	50-30:9
ايسو گليل صويا ټي يروشلم شهر هومو زائڻه	52-1:10
يروشللم شهر م ايسو رو آكري هفتو	47:15-1:11
ايسو جيوي اونځه، ڏيکارا ڏڻه ان آکاش مانه سڙي زائڻه	20-1:16

نوټ: کئينک ترجمون م مرقس 1:9 رټي آيت مرقس 39:8 سئ، ان تيا کيڙ مرقس 2:9 ټي لين 50:9 هوډي هر آيت رو نمپر هيک گهټ سئ.


ايټا کتاب را شاسنر ټي پيزا حوالا:

مرقس 2:1 ملاکي 1:3	مرقس 12:9 ملاکي 6-5:4
مرقس 3:1 يسعياه 3:40	مرقس 13:9 متي 14:11
مرقس 44:1 اخبار 32-1:14	مرقس 13:9 1 سلاطين 2:19, 10
مرقس 10:2 داني ايل 14-13:7	مرقس 48:9 يسعياه 24:66
مرقس 24:2 خرُوج 10-8:20	مرقس 49:9 اخبار 13:2
مرقس 26-25:2 1 سموئيل 6-1:21	مرقس 5-4:10 استيشنا 4-1:24
مرقس 12:4 يسعياه 10-9:6	مرقس 6:10 پيدائش 27:1
مرقس 25:5 اخبار 25:15	مرقس 8-7:10 پيدائش 24:2
مرقس 15:6 ملاکي 5:4	مرقس 19:10 خرُوج 16-12:20
مرقس 18:6 اخبار 16:18	مرقس 19:10 استيشنا 20-16:5
مرقس 7-6:7 يسعياه 13:29	مرقس 9:11 زبور 26:118
مرقس 10:7 خرُوج 12:20	مرقس 10:11 2 سموئيل 12:7, 16
مرقس 10:7 استيشنا 16:5	مرقس 15:11 خرُوج 16-13:30
مرقس 10:7 خرُوج 17:21	مرقس 17:11 يسعياه 7:56
مرقس 10:7 اخبار 9:20	مرقس 17:11 يرمياه 11:7
مرقس 28:8 ملاکي 5:4	مرقس 11-10:12 زبور 23-22:118

مرقس 19:12 اِسْتِشْنَا 6-5:25	مرقس 24:14 يرمياه 31:31-34
مرقس 26:12 خُرُوج 6:3	مرقس 27:14 زكرياه 7:13
مرقس 30-29:12 اِسْتِشْنَا 5-4:6	مرقس 49:14 زكرياه 7:13
مرقس 31:12 احبار 18:19	مرقس 62:14 داني ايل 13:7-14
مرقس 36:12 زُبُور 1:110	مرقس 64:14 احبار 16:24
مرقس 14:13 داني ايل 27:9	مرقس 23:15 زُبُور 21:69
مرقس 14:13 داني ايل 31:11	مرقس 24:15 زُبُور 16:22
مرقس 14:13 داني ايل 11:12	مرقس 24:15 زُبُور 18:22
مرقس 24:13 يسعياه 10:13	مرقس 28:15 يسعياه 12:53
مرقس 25:13 يسعياه 4:34	مرقس 32-29:15 زُبُور 7:22
مرقس 26:13 داني ايل 14-13:7	مرقس 34:15 زُبُور 1:22
مرقس 21-20:14 زُبُور 9:41	مرقس 36:15 زُبُور 21:69
مرقس 24:14 خُرُوج 8-6:24	

مرقس

رو لکل پریو ایسو را پارام
پوِتر شاستر



کفرنحوم شهر

یوحنا پوِتر سنون ځیدا وازو
پریو ایسو را آیا هارو منکون نډ تیار کرئ

(متی 1:12-13، مرقس 1:8-9، لوقا 3:18-19، یوحنا 1:19-28)

1 ① پښتون را ځیکرا ایسو کریست را پارام کښي رڼي کېر ام شروع تته.
② پښتون رو نیاپو ځیدا وازا یسعیاہ را شاستر موټين پښتون رڼي کیدل
اي وات لکل سته:

”زو، هون آپرو نیاپو ځیدا وازو تون ټي مور میلونه،
او تارا آیا مور تون هارو مارگ تیار کړشي.

③ رڻ موئين هڪا پوڪار پاڙيا وازا رو آواز آوئھ:
 پرڀو را آيا هارو آپ نئھ تيار ڪرو!
 اوتا هارو آپرا شيرڙا سڌا ناووا!




④ ڀڳوون ري هايا ڪيڏل وات پرموئنه يوحنا پوئتر سنون ڏيڏا وازو آيو
 ان رڻ ۾ منڪون نئھ همپراوا مڏيو جي ”آپرا ڪراپ ڪوم ساڏين توبونه
 ڪرو ان ڀڳوون ري وات مانھ وو، ان پوئتر سنون ليو، تو ڀڳوون تمارا ڏوھ
 ماڦ ڪرشي.“ ⑤ ان پورا يهوديه صوپا ٿي ان يروشلم شهر ٿي ٻڌائي منڪ
 اوتا ڪن آوا مڏيا. ان اوتي آپرا ڏوھ مونين ڀردن ڌريا ۾ اوتا ٿي پوئتر
 سنون ليدو.

⑥ يوحنا اونون ري زات را ناوڻ لوگهڙا پيرتو ان ڪڙيون ۾ سونهڙا رو پتو
 ٻوندتو. ان او ٿيڏ ان مڏ کاتو. ⑦ ان اوئھ منڪون ۾ اي پرچار ڪريو: ”مون
 ڪيڙ هيڪ ايوو منڪ اوئھ ريو جيو مون ٿي گهڻي ڪڙا وازو سئھ. هون تو ايوو
 پڻ نٿي جي اوتا هومو نمين اوتا رون زوڙون را ڪشا ڪولون. ⑧ مئين تمون نئھ
 پوئي ٿي پوئتر سنون ڏيڏوھ، پڻ او پوئتر آتما ٿي پوئتر سنون ڏين تمون نئھ
 پوئتر ڪرشي.“

**ايسُو پَوِيتَر سنون لئه ان شيطون اوتا نئه
پڳوون ري مرضي ٿي ڦيروا ڪرئه**

ايسُو پَوِيتَر سنون لئه

(متي 17-13:3، مرقس 11-9:1، لوقا 22-21:3)



⑨ اوتون ڏيئون ۾ ايسُو گليل صوڀا را ناصرت شهر ٿي آيو، ان يردن ڌريا ۾ يوحنا ٿي پَوِيتَر سنون ليڏو.

⑩ زنيون ايسُو پَوِيتَر سنون لين پوئي ٿي ٻارو نيهزتوت ريو، تنيون يڪدم اوتھ آڪاش نئه ڪلتون ڏيڪيو ان پَوِيتَر آتما نئه پارياو را رُوپ ۾ آپ مانھ اوترتون ڏيڪيو. ⑪ ان آڪاش ٿي پڳوون رو آواز آيو: ”تون مارو پريمي ڏيڪرو سئھ. هُون تون ٿي گهڻو ڪش سون.“

پڳوون رو دشمن شيطون

ايسُو نئه پڳوون ري مرضي ٿي ڦيروا ڪرئه

(متي 11-1:4، مرقس 13-12:1، لوقا 13-1:4)

⑫ پسئھ يڪدم پَوِيتَر آتما را ڪيڏا ٿي ايسُو رڻ موئين گيو. ⑬ ان اُو چاليهون ڏيئون هُوڏي رڻ موئين ريو، ان شيطون اوتا نئه پڳوون ري مرضي ٿي ڦيروا هارو آزماوتو ريو. اُو جهنگلي زناورون وسا ريو ان آڪاشي ڏوت اوتا رئي همپاڙ ڪرتا ريا.

ایسو گلیل صویا موئین پښوون رو کوم کرځه

ایسو گلیل صویا موئین پښوون را پارام شیکاژوا شروع کرځه

(متي 12:4-17، مرقس 14:1-15، لوقا 14:4-15)

⑭ یوحنا را زهلايا کيژ، ایسو گلیل صویا ږ ګیو ان منکون نځه پښوون رڼي ډیدل کُشي رڼي کبر همپړاوا مډیو. ⑮ او ام کیتوت ریو: "توڅو پرائي ریوه. ان پښوون را راز رو او توڅو ډوکړو آیوه، زڼیون پښوون ساوڼه نمونځه ټډون مانځه راز کرشي. تیام آپرا کراب کوم ساډین توڅوڼه کرو ان پښوون ري وات مانځه وو! ان ایڅا کُشي ري کبر مانځه یقین کرو!"

ایسو آپرا پیرهیان شیل سونډیځه

(متي 18:4-22، مرقس 16:1-20، لوقا 11:5-11)

⑯ هیڅ وار زڼیون ایسو گلیل ري ډنډ را کپ مانځه ویتوت ریو، تو اوڼه شمعون ان اوڅا را پائي اندریاس نځه ډیکیا. او میوڅا هتا ان مشي ماریا هارو ډنډ ږ رچ نوکځات ریا. ⑰ تڼیون ایسو اوڅون نځه کیتو: "مارا شیل تڼ مون وونځر اوو! تمی مشي ماریا رو کوم ساډو، ان هون تمون نځه منکون نځه پچایا وازا ناویځه." ⑱ ان یکدم او آپرا رچ ساډین ایسو را شیل تڼ اوڅا وونځر وویا پرا.

⑲ ایسو توڅو آګهپرو ګیو، تو اوڼه زبډي رون ډیکرون یعقوب ان یوحنا نځه پیژي مانځه رچ هونډتون پاژیا. ⑳ ایسو تڼیون را تڼیون اوڅون نځه آپرا شیل تڼا هارو تیرایا، تو او آپرا ټاپ زبډي نځه مزورون پیژو پیژي مانځه ساډین ایسو را شیل تڼ اوڅا وونځر وویا پرا.



ايسو كفرنحوم شهر موئين هيك منك ٿي پوت ڪاڍڻ

(مرقس 1: 21-28، لوقا 4: 31-37)

②1 پسنه ايسو ان اوتا را شيلا كفرنحوم شهر موئين آيا. ان ايسو پويتر ڏي رو پڳوون را مندر موئين تئيون رو تئيون زائين شيڪاڙوا مڏيو. ②2 ان منڪ اوتا را شيڪاڙيا مانه حيرون هتا، ڪم تو او شاستر زوڻيا واڙون را زم نتو شيڪاڙتو، پڻ اڪتياري راکين مونيا جيوي واتون شيڪاڙتوت ريو.

②3 تڻه توتڻه پڳوون را مندر موئين هيك پوت سونتل منڪ هتو. ان يڪدم اوته منڪ رڙ ڪرين ڪيڏو: ②4 ”او ايسو ناصرت شهر واڙا، ٿارو امون ٿي ڪيو واسطو؟ تون امون پوتون ننه ڪتم ڪرو آيوه، ڪي؟ هون تون ننه اوڙڪونه ريو جي تون ڪوڻ سڻه. تون پڳوون رو پويتر شيواڌاري سڻه.“ ②5 پڻ ايسو پوت ننه ڌڙڪو ڏين ڪيڏو: ”ماڻ ڪر! ان اينا منڪ ٿي ٻارو نيهري زا!“ ②6 تئيون پوت

منڪ نٿه مرڙينَ موٽي رڙ ڪرينَ اُونا منڪ ٿي ٻارو ٺيهري ڳيو.
 (27) تئين ٻڌائي منڪ اٿا گهڻا حيروني پڙي ڳيا جي اُو هيڪا پيڙا نٿه ڪيا
 مڏيا: ”اي ڪي سٺه؟ اي تو نونہ ڍاڙه اڪتياري ٿي شيڪاڙه. اي تو پوتون
 نٿه حڪم پڻ ڏه، ان پوت اُونا رو ڪيڏو مونھ.“ (28) پسنه يڪدم ايسو رئي
 نوموش گليل را پورا علاقا موئين ٻڌيل پڪڙي گهي.

ايسو گهڻون منڪون نٿه ھاڙا ھورا ڪرئھ

(متي 14:8-17، مرقس 1:29-34، لوقا 4:38-41)

(29) زئيون ايسو ان اُونا را شيلا پڳوون را مندر ٿي ٺيهريا، تئين يڪدم ايسو
 شمعون ان اندرياس پيڙو اوئون ري گهري ڳيو. ان يعقوب ان يوحنا پيڙا هئا.
 (30) اوڻه شمعون رئي هاھو تاولئي پڙي ٿي. ان اوئي يڪدم ايسو نٿه ھايا را
 پارام وات ڪري. (31) ايسو اُونا ڪن آوين اُونا نٿه ھاڻ ۾ زھالين اُوپاڙي.
 يڪدم تاو اوتري ڳيو. ان او اوئون رئي شيوا ساڪري ڪروا مڏي.
 (32) زئيون ڏي آئي ڳيو، تڻه ٿوڻه منڪ ٻڌون مونڌون ان پوت سونتلون نٿه
 ايسو ڪن لي آيا. (33) ٻڌوئي شهر زهونپا مانھ آوين پيڙو ٿيو. (34) ايسو قسم
 قسم رون الاهي گهڻون مونڌون منڪون نٿه ھاڙا ھورا ڪريا. ان گهڻون منڪون
 موئين ٿي پوت پڻ ڪاڍيا، پڻ اوڻه پوتون نٿه ٻوليا رو نا پاڙيو، ڪم تو پوتون
 نٿه ڪهر هڻي جي ايسو ڪوڻ سٺه.

ايسو ڪفرنحوم شهر ٿي ٺيهرين پيڙيل شيڪاڙو ڙاھ

(مرقس 1:35-39، لوقا 4:42-44)

(35) رات رو هوار ٿيا ٿي گهڻو مور ايسو اونيون ان شهر ٿي ٺيهرين هونواڙ موئين
 ڳيو، ان اوڻه زائين پراڻا ڪري. (36) شمعون ان پيڙا جيا اُونا پيڙا هئا ايسو
 نٿه ڳوتوا ڳيا. (37) ان زئيون ايسو اوئون نٿه زڙيو، تئين اوئي ڪيڏو: ”ٻڌائي

منڪ تمون نئه ڳوٺه ريا. " (38) پڻ ايسو اوتون نئه ڪيڏو: "هالو، آبي پيزيل آها پاها رون پاڙون ان شهرن ۾ هالون، زم هون اوڻه پڻ ڀڳوون را راز رئي ڪهر همپڙاون. ڪم تو ايٺا هارو هون آيوه. " (39) تيام ايسو ٻڌا گليل صوبا ۾ زائين ڀڳوون رون منڌرون موئين منڪون نئه شيڪاڙتو ريو، ان پوتون نئه ڪاڍتو ريو.

ايسو ڪوڍ ري پيماري ٿي هڪا منڪ نڌ نيڪ ڪرڻه

(متي 8: 1-4، مرقس 1: 40-45، لوقا 5: 12-16)

(40) ايسو ڪن هڪ منڪ آيو جيا نئه ڪوڍ ري پيماري هئي ان هيا پيماري ري ڪري او ايتڙال هتو. اوڻه ايسو ري پڳي پڙين منڌ ڪرين ڪيڏو: "جي تمارئي مرضي هون، تو تمي مون نئه هازو هورو ڪرين پويتر ڪري هڪو. " (41) ايسو اوڻا مانھ ترس ڪاڏو، ان آڀرو هات وڌارين اوڻا نئه سڀيو ان ڪيڏو: "مارئي مرضي سئ. تون هازو هورو ٿين ايتڙا ٿي پويتر ٿئ! " (42) ان يڪدم اوڻا نئه ڪوڍ ري پيماري ساڏي گهي، ان او ايتڙا ٿي پويتر ٿي گيو. (43) پسئ ايسو اوڻا نئه گهڻو گهڻو هزماوين يڪدم روونو ڪريو (44) ان ڪيڏو: "اي وات ڪيا نئه مت همپڙاوي. پڻ ڀڳوون را گهر موئين زائين آڀرو ڏيل اوڻا پوزاري نئه ڏيڪاڙي، جيو اوڻه پوزا رو ڪوم ڪرتو هون. ان تون ايتڙا ٿي پويتر ٿيا هارو ڀڳوون را نوم مانھ او شينھون سڙاوي جي شاستر موئين موسي ري لڪل سئ، زم ٻڌون هارو ٿاڀيئي ٿئ جي تون هازو هورو ٿي گيوه."

(45) پڻ او منڪ اوڻ ٿي زائين ٻڌيل ايسو ري وات جيئھ تيئھ گهڻي پڪيڙوا مڏيو. وات اٿئي گهڻي پڪڙي گهي جي ايسو وڙي ڪيا پڻ شهر موئين ساوئھ ڍاڙئھ زائي نه هڪيو. ان او بارو هونواڙ ۾ ريو. توئي چارون پاهون را منڪ اوڻا ڪن آوتا ريا.

ايسو هیکا اڌرنڱ را مونڌا نٺ ھازو ھورو ڪرڻھ

(متي 1:8-9، مرقس 1:12-12، لوقا 5:17-26)

2 ① ڪئينڪ ڏيئون ڪيڙ ايسو ڪفرنحوم شهر ۾ وڙي پاسو آيو رو. ان هائي ڪهر پڙي گهي جي او گهري سٺه. ② اڃا گهڻا منڪ آوين پيڙا ٿيا جي گهر پرائي گيو ان ٻارئي ڌرواڙا ڪن اوپيا رهي پڻ گهڻي نه رهي. ايسو اوئون منڪون نٺه پگهون رو وڃن همپڙاوتوت ريو، ③ ٿيون چار منڪ هڪا اڌرنڱ را مونڌا نٺه زهوڙي موئين اوپاڙين ايسو ڪن ليا. ④ پڻ گهڻي گڙڏي هويا ري ڪري گهر موئين پينا رهي گهڻي نه زڙي. تيام او گهر مائنه سڙي ڳيا ان مات هون چت ڪولين اڌرنڱ واڙا منڪ نٺه پاڙڻا هٽيلو نيسو جيئنه ايسو پينل هتو اوڻا هومو اوتاريو. ⑤ ٿيون ايسو اوئون منڪون رو هيوو يقين ڏيڪيو، ٿيون اوڻه اڌرنڱ را مونڌا نٺه ڪيڏو: ”ڏيڪرا، ٿارا ڪرل ڏوه ماڻ سٺه.“

⑥ پڻ اوڻه ڪئينڪ شاستر زوڻيا واڙا پينل هتا. او سوچو ماڻيا: ⑦ ”اي منڪ ام ڪم ڪڻه؟ اي آپ نٺه پگهون هرڪو ڪرين پگهون رهي پيعزئي ڪرڻه ريو. پگهون شوا ڪوئي نٿي جيو ڏوه ماڻ ڪري هڪڻه.“

⑧ پڻ ايسو يڪدم اوئون رون منون را ڪيال زوڻي گيو ان اوئون نٺه ڪيڏو: ”هيوي واتون تم ڪم سوچو ريا؟ ⑨ مون نٺه همپڙاوو جي ڪي هورو سٺه؟ ايڻا مونڌا منڪ نٺه ام ڪيو هورو سٺه جي ’اوئين آپرو پاڙڻو اوپاڙين وٺه؟‘ ڪا ام ڪيو جي ’ٿارا ڪرل ڏوه ماڻ سٺه؟‘ ⑩ پڻ هون تمون نٺه ٿايت ڪري ڏيه جي هون منڪ ذات رو ڏيڪرو سون، ان پگهون مون نٺه جڳت موئين ڏوه ماڻ ڪريا رهي اڪتياري ڏيڏيڻه.“ پسٺه ايسو اڌرنڱ را مونڌا منڪ نٺه ڪيڏو: ⑪ ”هون ٿون نٺه ڪونه، اوئي، آپرو پاڙڻو اوپاڙين گهري زا پرو!“

⑫ تئيون اُو منڪ اُوئون هومو اُوئين اُوپو ان يڪدم آپرو پاٿرئو اُوپاٿرين گيو پرو. اُو ٻڌائي منڪ گهڻا حيروني پڙي گيا ان ام ڪين پگهون را وڪون ڪروا مڌيا: "ايوو عجيب ڪوم تيتون امي ڪيڏي نٿي ڏيڪيو."

ناڪو ليڏا واڙو لاوي ايسو رو شيلو تڻه

(متي 9:13-17، لوقا 27:5-32)

⑬ ايسو وڙي ڍنڍ را ڪپ مانھ گيو. تئيون منڪون رئي هيڪ موتئي گڙڏئي اونا ڪن پيڙئي ٿئي، ان ايسو اُوئون ننه شيڪاڙوا مڌيو. ⑭ ويتون ويتون ايسو حلفي را ڏيڪرا لاوي ننه ناڪا ماڻه پينو پاڙيو، ان اونا ننه ڪيڏو: "مارو شيلو تين مون وونهڙ او!" تو لاوي اُوئين ايسو رو شيلو تين اونا وونهڙ وڍيو.



⑮ تيا ڪيڙ ايسو لاوي ري گهري ڏاوت مانھ پينو تو. ان اوڻه گهڻا ناڪو ليڏا واڙا ان پيزا منڪ هتا، جيون ننه منڪ ڏوهاري هزمين اُوئون ٿي شيب ڪرتا. اُو ايسو ان اونا رن شيلون پيزا کاڌا مانھ پينل هتا، ڪم تو گهڻا منڪ ايسو ننه گهرو هزمين اونا وونهڙ ویتا. ⑯ فريسي پالتي ري شاستر زوٿيا واري زئون زويو جي ايسو اڀڙال ڏوهاريون ان ناڪو ليڏا واڙون پيزو ڪاڻھ ريو، تئيون ايسو رن شيلون ننه ام وڙگاوا مڌيا: "اي ناڪو ليڏا واڙون ان هيون اڀڙال ڏوهاريون پيزو ڪم ڪاڻھ؟"

⑰ ايسو هائي وات هومپرين شاستر زوٿيا واڙون ننه ڪيڏو: "جيا هاڙا هورا سڻه، اُوئون ننه ڍاڪتر رئي ضرورت نٿي هوئيئي، پڻ روگيئي مونڏون ننه ضرورت هوئو. هيون نموننه هون پيڏوهي منڪون ننه نئين، پڻ ڏوهاريون ننه هاڙ ڏيوا آيوھ جي اُو پگهون ٿي واسطو راکڻه."

ايسو نوي واتون شيڪارڻه پڻ منڪون نٿ ڌرم ري زوني واتون وٺه

(متي 14:9-17، مرقس 18:2-22، لوقا 33:5-39)

⑱ هونءُ يوحنا را شيلا ان فريسي پالتي را منڪ ورت راکتات ريا. ان ڪئينڪ منڪي ايسو ڪن آوين پونسيو: ”يوحنا را شيلا ان فريسي پالتي را منڪ ورت راکنه، پڻ تمارا شيلا ڪم ورت نٿي راکتا؟“ ⑲ تئين ايسو اوئون نٿ ڪيڏو: ”زئين لاڏو پيڙو سٺ، تئين زونيا ورت راکشي ڪي؟ زتي وار لاڏو اوئون پيڙو سٺ، اتي وار تي نٿي هڪتو جي زونيا ورت راکنه. ⑳ پڻ ايوا ڏي آوشي زئين لاڏو اوئون ٿي ڌار ڪراشي پرو، تيڏي زونيا ورت راکشي. ㉑ ڪوئي پڻ منڪ نوا لوگهڙا رئي ٿيگهڙي زونا وگها ۾ نٿي هٽو. جي هم ڪرشي، تو نوا لوگهڙا رئي ٿيگهڙي سڙين هوڙي ٿيشي، ان زونو وگهو وڌارءُ ڦاٽي زاشي. ㉒ ان ڪوئي پڻ منڪ نوو ڌراڪون رو رس زوينون هنڌاريون موئين نٿي راکتو. جي هم ڪرشي، تو رس پاڪين هنڌاريون نٿ ڦاڙشي پري، ان پسٺ رس ان هنڌاري ٻي ئي ڪيا ئي ڪوم ري نئين رٿه. پڻ منڪ نوو ڌراڪون رو رس نويون هنڌاريون ۾ راکنه.“

ايسو پويتر ڏي رو ڌڻي ٿين آپ ڦينصلو ڪرڻه جي پويتر ڏي رو ڪي ڪرو

(متي 12:8-14، مرقس 23:2-28، لوقا 1:5-6)

㉓ هيڪ وار ايسو پويتر ڏي رو ڪيترون موئين ٿين متوت ريو. اوئون ڪيترون ۾ ڪنڪ اوپل هٽي، ان اوٿا را شيلا هرا پتتا پتتا ويوا مڏيا. ㉔ پڻ فريسي پالتي را منڪ شيلون نٿ هم ڪرتون زوين ايسو نٿه وڙگائين ڪيو مڏيا: ”زو، ٿارا شيلا لٻارو ڪريا جيوو ڪوم ڪم ڪرڻه ريا؟ آڀا ڌرم موئين تو پويتر ڏي رو ڪئين ڪوم نه ڪرو ڪپڻه.“

②5 تئيون ايسو اوتون منكون نئه ڪيڏو: "تمون نئه ڪبر نٿي ڪي، جي هيوي پوک ري حالت ۾ آڀئنه ڌرمي ڏاڏنه دائود ڪي ڪريو تو؟ تمي تو شاستر موئين اڳي پٿيوه جي زئيون دائود ان اوتا را منڪ پوکا هئا، ②6 تئيون، ابياتر نومي مڪ پوزاري رون ڏيئون ۾، او پڳوون را گهر موئين گيو، ان جي روتي پڳوون را نوم ري هتي، او روتي اونه پوزاري ڪن لين آپ کاڌي، ان آپرون منكون نئه پڻ ڏيڏي. هونه آڀا ڌرم پرموئنه روگا او جيا پڳوون را گهر موئين پوزا رو ڪوم ڪرئ، او ايوي روتي ڪائي هڪئ، تويي پڻ پوک ري حالت ۾ دائود او روتي کاڌي." ②7 تئيون ايسو اوتون نئه وڙي ڪيڏو: "پڳوون پويتر ڏي منڪون را ڦاڻيڏا هارو را ڪيوه. منڪ پويتر ڏي هارو ناول نٿي، پڻ پويتر ڏي منڪون هارو ناول سئ. ②8 تيام هون منڪ ذات رو ڏيڪرو تين پويتر ڏي رو ڏي پڻ سون."

ايسو پويتر ڏي رو هڪا هڪال هات وازا نئه هازو هورو ڪرئ

(متي 14-9:12، مرقس 6-1:3، لوقا 11-6:6)

3 ① ايسو وڙي پڳوون را مندر موئين گيو. ان اوتنه هڪ منڪ هتو جيا رو هات هڪال هتو. ② فريسي پالتي را منڪ ام سوچين ايسو هوما تاڪي ربا تا، "جي ايسو آز پويتر ڏي رو ايئا منڪ نئه هازو هورو ڪرئ، تو امي اوتا رو اي ڏوه ڪاڏشون جي او پويتر ڏي رو ڪوم ڪرئ، ان هم ڪريا تي ڌرم توڙئ."

③ تئيون ايسو هڪال هات وازا منڪ نئه ڪيڏو: "اوت، وس موئين آوين اوپ!" ان اونه همروم ڪريو. ④ پسئ ايسو اوتون منڪون ٿي پونسيو: "آڀا ڌرم پرموئنه پويتر ڏي رو پلائي ڪروو ڪا پونڌائي ڪروو؟ جيو پچاوو ڪا ماروو؟" پڻ اوتي ڪئين وڙنڌي نه ڏيڏي. ⑤ ايسو نئه گهڻو ڏک ٿيو جي او آپري اوزي سوچ ساڌوا نٿي ڪرتا، تو اوتون هومو رينه ۾ زوئين اونه هڪال

هاٽ واڙا منڪ نٿه ڪيڏو: ”ٿارو هاٽ پاڌرو ڪر!“ تو اُوڻه آڀرو هاٽ پاڌرو ڪريو، ان اُوڻا رو هاٽ هازو هورو ٿي ڳيو.

⑥ ٿيا مانھ فريسي پالٽي ري منڪي اُوڻون نيھرين يڪڏم راز ڪريا واڙا هيروديس را پاها رون منڪون پيڙا ٿين ايسو رڻه ڪلاڦ آڀت ۾ صلاح ڪرڻي جي ايسو نٿه ڪم ڪرين مراوي هڪڻه.

ايسو گهڻون منڪون نٿه شيڪاڙڻه ان هازا هورا ڪرڻه

⑦ پسڻه ايسو آڀرون شيلون پيڙو اوت ٿي روونو ٿين ڍنڍ مانھ ڳيو. ان گليل صوڀا را الاهي گهڻا منڪ اُوڻا وونهڙ ڳيا. ان يهوديه صوڀا ٿي، ⑧ يروشلم شهر ٿي پڻ، اڊوميه علاقا ٿي، يردن ڌريا هون پرلير ٿي، ان صور ان صيدا شهرون را علاقا ٿي الاهي گهڻا منڪ ايسو رون ٻڌون پرسون را پارام هومپڙين ايسو ڪن آيا. ⑨ منڪون ري گهڻي ڳڙڙي ري ڪري ايسو آڀرون شيلون نٿه هيڪ ٻيڙي تيار را ڪيا رو ڪيڏو، زم او منڪون ٿي ڪونڌائي نه زائ. ⑩ ڪم تو اُوڻه الاهي گهڻون منڪون نٿه هازا هورا ڪريا تا، ان تيام مونڌا منڪ اُوڻا نٿه سڀيا هارو اُوڻا مانھ پڙتات ريا. ⑪ ان زئون پوت سونتل منڪ ايسو نٿه پاڙتا، تڻيون پوت اُوڻون را پنڌ ۾ آوين اُوڻون منڪون نٿه ايسو ري پڳي پاڙتا ان پوت رڙيون ڪرين ڪيتا جي ”ئون پڳوون رو ڏيڪرو سڻه.“ ⑫ پڻ ايسو اُوڻون نٿه ڌڙڪو ڏين ڪيتو: ”مون نٿه ساوو مت ڪرو، جي هون ڪوڻ سون.“

ايسو آڀرون شيلون موئين ٿي ٻارڻه مڪ شيل سونڊيڻه

(متي 10:1-4، مرقس 13:19-13، لوقا 12:6-16)

⑬ ٿيا ڪيڙ ايسو ڏونگر مانھ ڳيو ان آڀري سونڊ پرموڻه منڪون نٿه آپ ڪن تيڙايا، ان او ايسو ڪن ڳيا. ⑭ اُوڻه ٻارون نٿه سونڊيا، (جيون نٿه اُوڻه مڪ شيل پڻ ڪيڏا)، زم او اُوڻا پيڙا رڻه، ان اُوڻا را ڪيڏا پرموڻه منڪون ڪن زائين

- پڳوونَ را پارام ھمپڙاوتہ ⑮ ان اوتا ري اڪتياري ٿي پوت پڻ ڪاڍئہ.
- ⑯ ايسو رون سونڊل ٻارون شيلون را نوم اي سئہ:
شمعون، جيا رو پيزو نوم ايسو پطرس را ڪيو،
⑰ زبدي را ڏيڪرا يعقوب ان يوحنا، جيون نئہ ايسو ”بوتانرگس“ ڪيڏو،
جيا رو مطلب سئہ ”گازيا واڙا“،
⑱ اندرياس،
فلپس،
برثلماي،
متي،
توما،
حلفي رو ڏيڪرو يعقوب،
تدي،
شمعون، جيو آڀرا ملڪ ري آزادي هارو وڊيا واڙو هتو،
⑲ ان يهوداه اسڪريوتي، جيئہ تيا ڪيڙ ايسو نئہ زهلايو.

ايسو پوتون نئہ ڪاڍيا ٿي ناپنئي ڏئہ جي اوئہ شيطون نئہ هرايوھ

(متي 22:12-32، مرقس 3:20-30، لوقا 11:14-23، 12:10)

⑳ تيا ڪيڙ ايسو اوتا گهر ۾ گيو جيئہ شيلون پيزو ريتو. ان الاهي گهڻا منڪ وڙي اوتا ڪن پيزا ٿيا. منڪ اتا گهڻا هتا جي ايسو ان اوتا را شيلا روٽي پڻ ڪائي نہ هڪيا. ㉑ زئيون ايسو رون مائيترون نئہ ايئا وات رئي ڪهر پڙئي، تو او ايسو نئہ آپ ڪن راڪيا هارو اوتا نئہ هات ڪروا نيھريا، ڪم تو ڪوڪ ڪيتا تا جي ”او گونڏو ٿيوھ.“

㉒ ان شاستر زوٽيا واڙا، جيا يروشلم شهر ٿي اول هتا، او پڻ ام ڪيتا تا:
”هائي منڪ شيطون را قوضام سئہ،“ ان ”شيطون ري طاقت ٿي، جيو پوتون رو

مڪ سٺ، پوتون نٺ ڪاڍڻ. " (23) تئين ايسو اوتون نٺ آپ ڪن تيڙاوين اوتون نٺ مثالون ڏين ڪيڏو: "تم ڪم ڪوه جي هون شيطون ري طاقت ٿي پوتون نٺ ڪاڍون؟ شيطون آڀرا پڳ مانھ آپ ڪوٽاڙو هنشي ڪي؟ هم تو ٿي نٿي هڪتو. (24) جي هڪا راز را منڪ آيت موئين نٿي نھتا، تو او راز ري نٿي هڪتو. (25) ان جي هڪا گهر را منڪ آيت موئين نٿي نھتا، تو او گهر پڻ نئين ري هڪتو. (26) همروم جي شيطون آڀرا پاها رون پوتون ٿي وڌشي ان او آيت موئين نئين نھت، تو او ري نئين هڪتو پڻ ڪتم ٿيشي.

(27) ڪوئي منڪ ڪياڪ طاقت وازا را گهر موئين زائين اوتا ري شينھون ڪوهي نٿي هڪتو، زتي وار هوڏي او طاقت وازا نٺ بوندتھ نه پرو. مور ٿي او طاقت وازا نٺ بوندشي، ان پسٺه اوتا رو گهر ڦري هڪشي. هيوتھ نمونٺه جي مئين شيطون نٺهرايو نه هوٺ، تو هون اوتا را قوضا ٿي منڪون نٺه سڏاوي نه هڪتو. (28) هون تمون نٺهاس ڪونه، منڪ جيا پڻ ڏوه ڪرڻه ان پڳوون رڻه ڪلاڦ جي پڻ واتون ڪنھ، او ڪيو پڻ هوٺ، پڳوون را پاها ٿي هايون ٻڌون رڻي ماڦي ٿي هڪتو. (29) پڻ جيو منڪ پويتر آتما ري ڪزا ٿي ڪرل نائوڪو ڪوم زوٺ، توڻي پڻ زوٺي ڪرين پويتر آتما نٺه ڪراپ ڪنھ، تو اوتا نٺه پڳوون ڪيڏي ماڦي نئين ڏنھ، پڻ ايوا ڏوه ري ڪري او هميش رڻي سزا ڪاشي. (30) ايسو هم ڪيڏو، ڪم تو او پويتر آتما ري ڪزا ٿي ڪوم ڪرتو تو، پڻ منڪ ڪيتا تا: "ايٺا نٺه پوت سونتل سٺه."

جيا پڳوون ري وات مانھ وٺھ

او ايسو نٺه آڀري مان ان پايون را زم پريمي سٺ

(متي 46:12-50، مرقس 31:3-35، لوقا 19:8-21)

(31) تھ توٺھ ايسو رڻي مان ان پائي اوتھه پوگيا، ان گهر ٿي ٻارا اوپين ايسو نٺه هاڏ ڪريا رو ڪيڏو. (32) گهر موئين الاهي گھڻا منڪ ايسو ري پيوڙي پينا تا،

ان اُوئي ايسو نئه ڪيڏو: ”زوئو، تمارئي مان ان تمارا پائي ان پنون ٻارا اُوپاه
ان تمون ٿي مزو ڪرئھ.“ (33) تيا مانھ ايسو اوتون نئه ڪيڏو: ”ڪون مارئي مان
ان مارا پائي سئھ؟“ (34) ان پسئھ اوتھ آپ رئھ ٻيوڙيئي پينل منڪون هومو زوئين
ڪيڏو: ”زوئو، ماري مان ان مارون پايون جيو تو اي پڻ سئھ.“ (35) جيو پڻ پڳوون
ري مرضي مانھ وئھ، اُو مارا پائي ان پين مان را زم سئھ.“

ٻيز وايا واڙا رو مثال

(متي 13:9-14، مرقس 4:1-9، لوقا 8:4-8)

4 ① ايسو ڍنڍ را ڪپ مانھ وڙي شيڪاڙوا مڏيو. ان اتا گهڻا منڪ اوتنا ڪن
آوين پيڙا ٿيا، جي اوتون نئه شيڪاڙيا هارو ايسو پيڙي مانھ سڙي پينو.
ان ٻڌائي منڪ ڍنڍ را ڪپ مانھ اُوپا ريا. ② ان ايسو اوتون نئه گهڻي واتون
مثالون ٿي شيڪاڙوا مڏيو. اوتھ شيڪاڙتون ڪيڏو: ③ ”ڪون ڏين هومپڙو! هيڪ
هاڙي هتو. ان اُو ٻيز واووا گيو. ④ ٻيز واوتون واوتون، ٻيز را ڪئينڪ ڏوٽا
شيرڙا مانھ پڙيا، ان پڪي آوين اوتون نئه ڪائي گيا. ⑤ ان ڪئينڪ ٻيز را ڏوٽا
پٿر واڙي زمي موئين پڙيا، جيئھ گهڻي ماتئي نٿي. ان اُو شيڪا اُوگيا ڪم
تو ماتئي گهٽ هئي. ⑥ پڻ زليون ڏي اُوگيو، تو
اوتون نئه ترڪو لاگيو، ان اُو هوكائي گيا، ڪم تو
اوتون ري پاڙون اُونڌي نٿي. ⑦ ان ڪئينڪ ٻيز را
ڏوٽا ڪنڊيرون واڙي زمي موئين پڙيا، ان ڪنڊيري
اُوگين اوتون نئه ڏپوريا پرا، ان اوتون موئين نڪو
هرا ٿيا نڪو ڏوٽا ٿيا. ⑧ ان ڪئينڪ ٻيز را ڏوٽا
پلي زمي م پڙيا، ان اُو اُوگيا، وڌيا، هرا ٿيا ان
اوتون م ڏوٽا ٿيا. اُو ايو پلا ٿيا جي هيڪوڪا هرا
موئين ٿيھ ٿيھ، هائيٽ هائيٽ ان هو هو ڏوٽا ٿيا.“



⑨ تئيون ايسو وڙي ڪيڏو: ”هومپڙيا واڙون، تمي ماري وات مانھ ڏيون ڏيو.“

ايسو هڙماوڻھ جي او مثالون ٿي ڪم شيڪاڙڻھ

(متي 17-10:13، مرقس 12-10:4، لوقا 10-9:8)

⑩ زئيون ايسو نوڪلاڻي ۾ هتو، تئيون اوڻا ري ٻاري سونڊل شيلي ان پيزي شيلي جيا اوڻا پيڙا هتا، ايسو ٿي هايون مثالون را پارام پونسسيو. ⑪ تو ايسو اوڻون نئه ڪيڏو: ”پگهون را راز ري اونڌي واتون اوڻه تمون شيلون نئه هڙموا ڏيڏيه، پڻ پيزون هارو ٻڌوئي ڪئين مثال رڻه. ⑫ هيوڻه نمونئھ اي شاستر رڻي وات اوڻون مانھ پورڻي تڻھ:

’او زوشي تو ڪري پڻ پاڙشي نئين،
ان هومپڙشي تو ڪري پڻ هڙمشي نئين.
او هيوا نه ٿئت، تو پگهون هوما ڦرڻ
ان پگهون اوڻون نئه ماڦئي ڏئت.“

ايسو پيز وايا واڙا را مثال رو مطلب هڙماوڻھ

(متي 23-18:13، مرقس 20-13:4، لوقا 15-11:8)

⑬ ايسو وڙي آپرون شيلون نئه ڪيڏو: ”تمي ايڻا مثال رو مطلب هڙمتا نئي، ڪي؟ تو پسڻه تمي پيزون ٻڌون مثالون رو مطلب ڪم ڪرين هڙمشو؟ ⑭ پيز وايا واڙو او سڻه، جيو پگهون رو وچن همپڙاوڻه. ⑮ ڪئينڪ منڪ پيز رون اوڻون ڏوڻون را زم سڻه جيا پيز وايا رڻه توڻه شيرڙا مانھ پڙيا تا. زئيون هيوا منڪ وچن هومپڙه، تئيون پگهون رو دشمن شيطون يڪدم اوڻه ان اوڻون رون منون ٿي او وچن ڪاڍي لڻه، جيو پيز را زم زوڻه من ۾ واول هتو، زم اوڻون نئه وچن ويهري زائھ. ⑯ ان ڪئينڪ منڪ پيز رون اوڻون ڏوڻون را زم سڻه، جيا پڙ واڙي

زمي موئين پڙيا تا. زئيون هيو منڪ وچن هومپڙه، تئيون اُو يڪدم اُوئا نئه
 ڪشي ٿي مونئه. (17) پڻ زم مثال موئين هيوون ڏوئون ري پاڙون اُونڌي نتي، تم
 اُوئون رو يقين پڪو نٿي هوئيتو. تيام اُو ٿوڙيڪ وار هُوڏي يقين تو راڪهه، پڻ
 زئيون وچن مونيا ري ڪري تڪليل آهه ڪا منڪ اُوئون نئه تنگ ڪرئه، تئيون
 يڪدم اُو وشواس ساڏهه پرو. (18) ان پڙا ڪئينڪ منڪ پڙ رون اُوئون ڏوئون را
 زم سئه، جيا ڪنڊيرون واڙي زمي موئين پڙيا تا. زئيون هيو منڪ وچن هومپڙه،
 (19) تئيون هئيون هئيون حياتي ريون گهٽيون ۾ پڙي زاهه، مال ملڳت لار ڊوڙهه،
 ان هر قسم ري عيش عشرت رون ڪيالون ۾ ڦاٿي زاهه، ان تيام اُوئون رو يقين
 وڌو نٿي. ان زم هيوون پڙ رون ڏوئون ٿي هڙا نٿا ٿيا، تم اُوئون منڪون ٿي پڻ
 ٺاڻوڪا ڪوم نٿي ٿيئا. (20) پڻ ڪئينڪ منڪ پڙ رون اُوئون ڏوئون را زم سئه،
 جيا پلي زمي موئين پڙيا تا. هيو منڪ وچن هومپڙه ان ڪشي ٿي مونئه، ان زم
 پڙ رون هيوون ڏوئون ٿي هڙا پاڪيا تا، ان هيڪوڪا هڙا موئين ٿيه ٿيه، هائيٺ
 هائيٺ، ڪا هو هو ڏوئا ٿيا تا، تم هيو منڪ وچن مونيا ري ڪري گهڻا ٺاڻوڪا
 ڪوم ڪرئه."

ڏيوا رو مثال

پڳوون رو وچن آپرا ٿوئا مانھ ساوو ٿيشي

(مرقس 21:4-25، لوقا 16:8-18)



(21) "ڏيوو ڪيو ڪوم هارو سئه؟ ڏيوو نئه پاڙين اُوئا
 نئه ٺونڀڙا هيٺ ڪا ڪاٿلا هيٺ ميلهه، ڪي؟ نا نا،
 اُو هٽاڙيا هارو نٿي، پڻ اُوئا ري آپري جڳا ۾ ساوو
 ميليا هارو سئه. (22) ڪم تو جي ڪئين هٽاڙل سئه
 اُوئا رو مقصد اي سئه جي اُو آپرا ٿوئا مانھ ساوو
 ٿئه. ان همريئم هر وات جي هٽاڙل سئه، اُوئا رو مقصد پڻ اي سئه جي اُو آپرا

توڻا مانھ ساوئي ٿئ. ②③ ھومپڙيا وازون، تمي ماري وات مانھ ڏيون ڏيو!“
 ②④ تئيون ايسو اوئون نئ وڙي ڪيڏو: ”ماري واتون جي تمي ھومپڙوھ ريا،
 اوئون واتون مانھ ڏيون ڏيو. جيا ماپ ٿي تمي ماپين ڏيوھ، اوئا ماپ ڀرموئئ
 پڳوون تمون نئ ڏيشي، ان هيا ٿي پڻ وڌارئ ڏيشي. ②⑤ ڪم تو جيو منڪ
 وچن مونئ، پڳوون اوئا نئ وچن ھزميا رئي وڌارئ گھڻئي ھيمت ڏيشي. پڻ
 جيو منڪ وچن نئي مونئو، جيو وچن اوئ ھومپڙيوھ، او وچن ھزميا رئي ھيمت
 پڻ اوئا ڪن ٿي ڪوھراشي.“

پيز اوگيا رو مثال

پڳوون رو وچن ھمپڙايا ٿي توڻا مانھ اوئا رو اثر ٿيشي

②⑥ ايسو اي پڻ ڪيڏو: ”پڳوون رو راز ايئا مثال را زم سئ. ھيڪ منڪ ڪيتر
 موئين پيز واوئ. ②⑦ ان پسئ پلئ او منڪ رات رو اونگھائي زائ ان ڏي رو
 اوئ، پڻ پيز رات ڏي ڦوٽاڙو ڪرئ ان وڌتو زائ، ان منڪ نئ ڪبر ٿي نئي
 ھوئيئي جي ھم ڪم ڪرين ٿئ. ②⑧ زمي موئين ٿي آڻوڪو آپ ڦصل ٿئ،
 پيرھين ڏونڪري نيھرئ، پسئ ھرا ٿئ، ان پسئ ھرون موئين ڏوئا ٿئ. ②⑨ پڻ
 زئون ڦصل پاڪي زائ، تئيون يڪدم او منڪ ڏاترو لين ڦصل لئئ، ڪم تو
 لھارا رو توڻو آيوھ رو.“

ٿوريا را پيز رو مثال

پڳوون را راز را منڪ گھڻا وڌشي

(متي 31:13-32، مرقس 30:4-32، لوقا 18:13-19)

③⑩ پسئ ايسو وڙي ڪيڏو: ”آپي ڪي ڪون جي پڳوون رو راز ڪيو سئ؟ آپي
 هيا رو ڪيو مثال ڏيون؟ ③① پڳوون رو راز ٿوريا را پيز را زم سئ. زمي موئين
 پوکيا رئ توئئ او دنيا رون ٻڌون پيزون ٿي جهيٽڪو سئ. ③② پڻ پوکيا ڪيڙ او

وڌڻه ان ٻڌيون پازيون ٿي موتو ٿڻه، ان اُوتا ري ڌاڙڪي اُورِي موتي ٿڻه جي پڪي اُوتا را سونڻيا ۾ پيهڻه ان ماڙا ٺاوه.

ايسو آبرون شيلون نڌ مثالون رو مطلب هزماوڻه

(متي 34:13-35، مرقس 33:4-34)

33 ايسو منڪون ري هزم پرموڻه هيا گهڻا مثال ڏين اُوتون نڌ پگهون رو وچن همپڙاوتو. 34 اُو مثالون وگر اُوتون ٿي ڪوئي وات نه ڪرتو، پڻ نوڪلائي ۾ اُو آبرون شيلون نڌ ٻڌوئي ڪئين هزماوتو.

ايسو واوڙ نڌ پنڌ ڪرڻه

(متي 23:8-27، مرقس 35:4-41، لوقا 22:8-25)

35 اوتھ ئي ڏي هونڙ رڻه ٿوڻه ايسو آبرون شيلون نڌ ڪيڏو: ”هالو، ڍنڍ رڻه پيڙه ڪپ هالون!“ 36 تو شيلا پيڙون ٻڌون منڪون نڌ ساڏين ايسو نڌ، زم پيڙي موئين پينل هتو، همروم لي ڳيا. ان اُوتا پيڙي پيڙي پيڙي پڻ هتي. 37 تئين گهڻي واوڙ آوي، ان چولي پيڙي مانھ ايوي لاڳو مڏي، جي پيڙي پوڻي ٿي پرايا مانھ هتي. 38 هوڻه ايسو پيڙي رڻه وونهلڻه پاهڻه آبرو ماڻو ڦٽا مانھ ڏين اُونگھال هتو. پسڻه شيلي ايسو نڌ زگاڙين ڪيڏو: ”گرُو جي، آبي تو ٻوڏونھ ريا، ان تمون نڌ هيا ربي ڪئين ڦڪر ئي نٿي؟“

39 تيا مانھ ايسو اُونگھ ٿي اُوتين وائيرا نڌ ڌڙڪو ڏين پنڌ تيا رو ڪيڏو ان چوليون نڌ ڪيڏو: ”ماڻ ڪرو! ان ٿمي زانو!“ تو وائيو پڙي ڳيو، ان ماڻ ئي ماڻ ٿي ڳئي. 40 تئين ايسو اُوتون نڌ ڪيڏو: ”ٿمي پيڻاوه ڪم؟ ٿمي يقين ڪم نٿي ڪرتا؟“


41 شيلا اي ڪڙا ڏيڪين گهڻا حيروني پڙي ڳيا، ان آيت موئين ام ڪيا

مڏيا: ”اي ڪيوو منڪ سڻه، جي وائيو ان پوڻي پڻ ايڻا رو ڪيڏو مونڻه!“

ايسو هيكاً منک ٿي گهڻا پُوت ڪاڍڻ

(متي 28:34، مرقس 1:20، لوقا 8:26-39)

5 ① پسنه ايسو ان شيلڊ پيڙي موئين ڏند رڻه پيڙه ڪپ زائين گراسينيون را علاقا موئين پوگيا. ② زئيون ايسو پيڙي ٿي نيسو اوتريو، تو يڪدم هيك پُوت سونتل منک مقومون موئين ٿي نيهرين اوتا هومو آيو. ③ او منک پونيئرا جيوون مقومون موئين ريتو، ان ڪوئي اوتا ننه هونڪزون ٿي پڻ ٻوندين قابو ڪري نه هڪتو. ④ ڪم تو منکي اوتا ننه گهڻي وار هونڪزون ان پيڙيون ٿي هاڻون پڳون ۾ ٻونديو تو، پڻ اوته هونڪزون ننه توڙيت پري ان پيڙيون ننه پونگيت



پري. ان اوتا ننه ڪوئي قابو ڪري نه هڪتو. ⑤ او ڏي رات مقومون موئين ان ڏونگرون مانھ رڙيون ڪرتو ان آپ ننه پوئون ٿي لوئي زھون ڪرتو.

⑥ هائي منک ايسو ننه شيئا ٿي ڏيکين ڊوڙي آيو، ان اوتا ري پڳي پڙيو هئو. ⑦ ان زور ٿي رڙ ڪرين ڪيڏو: ”ايسو، پرميشور را ڏيڪرا، ٿارو مون ٿي ڪيو واسطو؟ هون تون ننه پڳوون رو هون ڏيونھ، مون ننه پونڌي هاڙي سزا مت ڏنھ.“

⑧ اوته هم تيام ڪيڏو، ڪم تو ايسو پُوت ننه اوتا منک ٿي نيھريا رو ڪيڏو تو.

⑨ ٽيون ايسو اوتا ٿي پونسيو: ”ٿارو نوم ڪي سئھ؟“ تو اوته ڪيڏو: ”مارو نوم پلتن سئھ، ڪم تو امي گهڻا پُوت سون.“ ⑩ ٽيون پُوت سونتل منک ايسو ربي گهڻي منٿ ڪروا مڏيو: ”امون ننه ايٺا علاقا ٿي ٻارا مت ڪاڍ.“

⑪ هوته اوته هونرون رو هيك موتو ولر هتو جيو ڏونگر مانھ سرتوت ريو. ⑫ تيام پوتي ايسو ننه اي منٿ ڪري جي ”امون ننه اوئون هونرون ۾ ميل، زم

اُوئون نئه زائين سونتون!“⁽¹³⁾ تو ايسو اُوئون نئه موكل ڏيڏئي. تئين پوت اوتا منڪ ٿي نيهرين هُئرون نئه سونتي ڳيا، ان او ولر، جيا موئين ٻيڪ هزار هُئر هئا، ڏونگر ٿي نيسو ڏوڙين ڍنڍ موئين پڙيو، ان ٻڌائي هُئر ڍنڍ موئين ٻوڏي ڳيا.
(14) تئين هُئرون را ڌراڙ پاڳي ڳيا، ان زائين اي وات شهر ۾ ان ٻاراڙي ۾ همپڙاوي. تو منڪ زووا آيا جي ڪي ٿيوه.⁽¹⁵⁾ زئين او ايسو ڪن آيا، تو اوئي پوت سونتل منڪ نئه لوگهڙا پيرل ان صحيح ڏيماڳ ۾ پينل ڏيڪيو. هائي ٻڌوئي زوين او پيڻائي ڳيا.

(16) جيئي هائي ٻڌئي وات ڏيڪئي ٿي، اوئي اول منڪون نئه همپڙايو جي پوت سونتل منڪ ٿي هم ڪم ڪرين ٿيوه، ان هُئرون ٿي ڪي ٿيوه.⁽¹⁷⁾ تئين او ايسو رئي منٽ ڪروا مڌيا جي او اُوئون را علاقا ٿي زائ ڀرو.

(18) زئين ايسو پاسو زايا هارو پيڙي موئين سرتوت ريو، تو جيا منڪ نئه اڳي پوت سونتل هئا، او ايسو نئه منٽون ڪروا لاڳيو: ”مون نئه تمون پيڙو هالوا ڏيو.“⁽¹⁹⁾ پڻ ايسو آپ پيڙو تيڙي زايا رو نا پاڙيو، ان اوتا نئه ڪيڏو: ”تون پاسو آپري گهري آپرون منڪون ڪن زا ڀرو، ان زائين اُوئون نئه همپڙاوي جي ايشور تون مانه ڏيا ڪرين تون ٿي ڪيوئي نا نائوڪئي پلائي ڪريه.“
(20) پسئه او پاسو ڳيو ان زائين آپرا ڊڪپلس علاقا موئين منڪون نئه همپڙاوا مڏيو جي ايسو مون ٿي ڪيوئي نا نائوڪئي پلائي ڪريه. ان ٻڌائي منڪ اي وات هومپڙين حيرون ٿيا.

ايسو هيڪي سوڪري نئه جيوتئي ڪرئ
ان هيڪي اشيتري نئه هازئي هورئي ڪرئ

(متي 26-18:9، مرقس 21:5-43، لوقا 8:40-56)

(21) زئين ايسو پيڙي موئين سرتين ڍنڍ رئه پيڙه ڪپ وڙي پاسو آيو رو، تو ڍنڍ را ڪپ مانه الاهي گهڻا منڪ اوتا نئه پيڙا ٿيا.⁽²²⁾ تئه توتئه پڳوون را منڌر رو

هڪ آڳيوون آيو، جيا رو نوم يائير هتو. اُو ايسو ننه ڏيڪين اوتا ري پڳي پڙيو،
 (23) ان اوتا رئي گهڻي منٽ ڪرين ڪيڏو: ”مارئي سوڪري هاو مريا مانه سئه.
 تمي هالين اوتا مانه هات ميلو، زم اُو هازئي هوريئي تئه ان پڇي زائه.“ (24) تيام
 ايسو اوتا آڳيوون پيڙو روونو ٿيو. ان الاهي گهڻا منڪ ايسو وونهڙ ويوا مڌيا،
 ان منڪ اوتا مانه پڙتات ريا.

(25) هوئه اوئون منڪون موئين هڪ اشيتري هئي، جيا ننه ٻارون سالون ٿي
 زالوئي پيماري هئي ان هايا پيماري ري ڪري اُو اڀڙال هئي. (26) اوئه گهڻون
 ڊاڪٽرون ڪن ايلز ڪراوين ايلز ۾ گهڻو ڏڪ وينيو تو، ان اوتا ڪن جئين ڪئين
 هتو، اوئه آپرا ايلز مانه ڪپاوت پرو، پڻ توئي ڪئين قائيڏو نتو ٿيو، پڻ اوتا
 رئي حالت اڳي ٿي ڪراب ٿي گهي ٿي. (27) ايسو را پارام هومپڙين اُو گهڻون
 منڪون وسا گهڻي ناوتئي ايسو وونهڙ آئي ان اوتا ري ساڌر ننه سڀئي. (28) ڪم
 تو اُو ام سوچتئي رئي: ”جي هون روگهي اوتا رون لوگهڙون ننه سڀون، تو هون
 هازئي هوريئي ٿي زائيھ.“ (29) تو يڪدم اُو هازئي هوريئي ٿي گهي، ان اوتا ننه
 آپرا ڏيل ۾ ڪبر پڙي جي هوئه هون پيماري ٿي پڇي گهيھ.

(30) ايسو ننه يڪدم ڪبر پڙي جي مون ٿي ڪڙا نيهرئيھ. تيام اوئه ڳڙڏي
 وسا پاسو ڦرين پونسو: ”مارون لوگهڙون ننه ڪوڻ سڀيوھ؟“ (31) تو اوتا را شيلا
 ڪيو مڌيا: ”تمي تو زوئوھ ريا جي منڪ ڪتا گهاتا سئه ان تمون مانه پڙھ
 ريا. توئي تمي پونسوھ ريا جي مون ننه ڪوڻ سڀيوھ؟“ (32) پڻ ايسو آپرئ آهئھ
 پاهئھ ٻڌيل لوئو واڙين منڪون هومو زيوو، جي ڪيئھ هم ڪريوھ؟

(33) هوئه اشيتري ننه ڪبر هئي جي اوتا ٿي ڪي ٿيوھ. تيام اُو پيائئي پيائئي
 ان ڏڪئي ڏڪئي آوين ايسو ري پڳي پڙي هئي، ان اوتا ننه ٻڌئي وات ڪرين
 همپڙاوي. (34) پسئھ ايسو اوتا ننه ڪيڏو: ”ڏيڪري، تئين يقين ڪريوھ، تيام
 تون ٺيڪ ٿي گهيھ. زا ان هڪي رئه! هوئه تون هايا پيماري ٿي هازئي هوريئي
 ٿي گهيھ.“

③۵ هزون ايسو ام ڪيتوت ريو، تو مندر را آڳيوون را گهر ٿي ڪئينڪ منڪ آيا ان اوئي آڳيوون ننه ڪيڏو: "تمارئي سوڪريي تو مري گهيڏو. هوئه گرو ننه تڪليب ڏيڏا رو ڪيوو ڪوم؟" ③۶ پڻ ايسو هائي وات هوميرين مندر را آڳيوون ننه ڪيڏو: "پيئائو متا روڳو پڳوون مانه يقين راکو."

③۷ تئيون ايسو پطرس، يعقوب، ان يعقوب را پائي يوحنا شوا پيزون منڪون ننه آپ پيزا هاليا رو نا پاڙيو.

③۸ زئيون او آڳيوون ري گهري آيا، تئيون ايسو زيوو جي گهڻي ٿائي ٿي رهڻي ان منڪ سوڪري را پار لين زور زور ٿي رڙيون ڪرين روئ ريا. ③۹ تو ايسو گهر موئين زائين اوئون ننه ڪيڏو: "تمي ڪم ٿائي ڪروه ريا ان روئو ريا؟ سوڪريي مري نٿي گهي، پڻ اونگهائ رهي." ④۰ تئيون او منڪ ايسو مانه نٿولي ڪروا مڏيا. پڻ ايسو ٻڌون منڪون ننه گهر ٿي بارا ڪاڍين سوڪري را مان ٻاپ ان آپ پيزا اول شيلون ننه لين اوئا ڪوني موئين گيو جيئو سوڪري هتي. ④۱ ان سوڪري رو هات زهالين اوئا ننه ڪيڏو: "تليتا قومي!" جيا رو مطلب سئ "او سوڪري، هون تون ننه ڪونه اوٽ پري!" ④۲ ان سوڪري، جي ٻارون سالون رهي هئي، يڪدم جيوت ٿي ٿي گهي ان اوئين هروا قروا مڏي. اي ڏيڪين او الاهي گهڻا حيروني پڙي گيا. ④۳ تئيون ايسو اوئون ننه گهڻو گهڻو ڪيڏو: "زويا ايئا وات رهي ڪيا ننه ڪهر نه پڙه!" ان پسئ ڪيڏو جي او سوڪري ننه ڪئينڪ کاڌا هارو ڏنه.


ايسو را آپرا ناصرت شهر را منڪ اوئا ننه گهت هزمئو

(متي 53:13-58، مرقس 1:6-6، لوقا 16:4-30)

① پسئ ايسو اوٽ ٿي ررونو ٿين آپرا شهر موئين آيو، جيئو او نونو موٽو 6 ٿيو تو. ان اوئا را شيلو پڻ اوئا پيزا آيا. ② زئيون پويتر ڏي آيو، تئيون ايسو پڳوون را مندر موئين زائين شيڪاروا مڏيو. ان گهڻا منڪ اوئا ري واتون هوميرين

حیرون ٿيا ان کيوا مڌيا: ”ايئن هيو و اتون کيئون شيڪيه؟ اي کيوني عقل سئ جئي ايئن نئ زڙيئھ؟ ان هائي کيوا پرسا سئ جيا اي آپري هائي ڏيکارئھ؟ (3) اي تو واڍو نٿي، کي؟ اي تو ماريون رو ڏيکرو سئ، ان يعقوب، يوسف،

يهوداه، ان شمعون رو پائي سئ. ايئن ري بينون پڻ ايئن آيون ڪن بينيھ. هم نٿي، کي؟” ان اوني ايسو نئ گھٽ هزمين اوتا مانھ يقين نہ راکيو.



(4) پڻ ايسو اوئون نئ ڪيڏو: ”پگھون رو نياپو ڏيڏا واڙا رو مون رُوگھو آپرا شهر ۾، آپرون عزيزون ۾، ان آپرا گھر ۾ نٿي هوئيٿو.“

(5) اوئون رئ يقين نہ ڪريا ري ڪري، ايسو اوئنم رُوگھو ٿوڙون مونڏون منڪون مانھ هات ميلين اوئون نئ هازا هورا ڪريا، پڻ ايئن شوا ڪوني پرسو ڏيکارڙي نہ هڪيو. (6) ان او حيرون هتو جي او منڪ يقين ڪم نٿي راکتا.

ايسو آپرون بارون سونيل شيلون نئ
پگھون رو ڪوم ڪريا هارو ميلئھ

(متي 15:10-15، مرقس 6:13-13، لوقا 9:1-6)

پسئ ايسو پاراڙي ۾ پارئ پارئ زائين شيڪاڙوا مڌيو. (7) ان اوئھ آپرون بارون

سُونڊل شيلون نئه آپ ڪن تيرڙيا، ان اُونئون نئه ٻي ٻي ڪرين ميليا. ان ميليا رئه توتئه اُونئون نئه پوت ڪاڍيا رئي اڪتياري ڏيڏئي، ⑧ ان اُونئون نئه ڪيڏو: ”پنڌ هارو لاکڙي شوا ڪئين مت لي زائو، نڪو روڙئي، نڪو زهوڙئي، ان نڪو ڪڙيون ۾ بونڌل ڦينتا ۾ پٺيا. ⑨ پڻ روڳا زوڙا پيرل هونء، ان پيزو وگهو پيزو نه هونء.“ ⑩ ان ايسو اُونئون نئه اي پڻ ڪيڏو: ”تمي جيا پاڙا ۾ زائين جيئنه پڻ ٿڪو، زتي وار اونا پاڙا ٿي رونا نه ٿيو، اونا ئي گهر موئين ريا. ⑪ ان جيئنه پڻ منڪ تمنون نئه اوڪار نه ڏئه ڪا تماري واتون نه هومپڙهه، تو اوت ٿي نيهرتون اُونئون ٿي واسطو توڙيا هارو آپرون پڳون رئي ڏوڙ ڪيريا پري، جيا ٿي ٿايتي تئه جي اوني تماري وات نه هومپڙي.“

⑫ پسئه او شولا رونا ٿيا، ان زائين منڪون نئه همپڙايو جي ”آپرا ڪراپ ڪوم ساڏين توبونه ڪرو ان پڳوون ري وات مانھ وو!“ ⑬ ان اوني گهڻون منڪون ٿي پوت ڪاڍيا، ان گهڻون مونڊون منڪون مانھ تيل هڻين اُونئون نئه هازا هورا ڪريا.

هیرودیس پادشا ايسو ري ڪري ڳڻتيون موئين پڙي زائھ

(متي 14:1-12، مرقس 6:14-29، لوقا 9:7-9)

⑭ هونء هيروديس پادشا ايسو را پارام هومپڙيو، ڪم تو ايسو رئي نوموش گهڻي پڪڙي ٿي. منڪ ايسو را پارام ام ڪيتا تا جي ”اي او رو او يوحنا پويتر سنون ڏيڏا واڙو سئ. پڳوون اونا نئه موت ٿي جيو تو ڪريوه، ان تيام ايئا ۾ هائي پرسا ڏيڪاريا رئي ڪڙا سئ.“ ⑮ پيزا ڪيتا تا: ”ايلياه وڙي دنيا ۾ پاسو آيوه، ان اي منڪ او سئ.“ ان وڙي پيزا ڪيتا تا: ”اي اڳلوڪون پڳوون رو نياپو ڏيڏا واڙون جيوو پڳوون رو نياپو ڏيڏا واڙو سئ.“ ⑯ هائي واتون هومپڙين هيروديس ڪيو مڏيو: ”او تو يوحنا سئ، جيا رو مئين ماڻو وڌايوت پرو. پڳوون اونا نئه وڙي جيو تو ڪريوه.“

①7 هيروديس هائي وات تيام ڪيڏي، ڪم تو اونه آپ قوچيون ننه ميلين
يُوحنا ننه زهلايو تو ان ٻنڌاوين جيل موئين پورا يو تو. اونه هائي ڪوم آڀرا پائي
فلپس ري ڏوشي هيرودياس ري ڪري ڪريو تو، جيا ننه اونه آڀرا گهر ۾ راڪڻي
ٿئي. ①8 ڪم تو يُوحنا هيروديس ڀاڏشا ننه گهڻي وار ڪيڏو تو جي ”پگهون
رون حڪمون ڀرموئنه نيڪ ٿئي جي تم آڀرا پائي ري ڏوشي ننه آڀرا گهر ۾
راڪوه.“ ①9 تيام هيرودياس يُوحنا مانه ريشي ٻڙڻي ان اونا ننه مراوا ڪرتي
ٿئي. پڻ اونا ننه مراوي نئي هڪٿي، ②0 ڪم تو هيروديس ڀاڏشا ننه ڪهر هتي
جي يُوحنا پگهون ري وات مانه وڍا وازو ان پويتر منڪ سئ، ان تيام او يُوحنا
ٿي ٻيڻا تو. هايا وات ري ڪري هيروديس ڀاڏشا يُوحنا ننه پڇاوين راڪتو.
يُوحنا ري واتون هومپرين او پلنه گونڻن ۾ پڙتو، پڻ توي او ڪشي ٿي اونا ري
واتون هومپرتو.

②1 پڻ زبون هيروديس ڀاڏشا را زلم ري تاريخ آوي، تيون اونا ري ڏوشي
هيرودياس ننه وجه زڙيو. هيروديس ڀاڏشا آڀرا زلم ڏي مانه موئي ڏاوت
ڪري، ان آڀرون وزيرون ننه، قوچ رون موئون ساڀون ننه، ان آڀرا گليل صوپا
رون موئون منڪون ننه ڏاوت مانه تيڙايا. ②2 تيون هيرودياس ري ڏيڪري
ڏاوت موئين آوين رمي، ان هيروديس ڀاڏشا ننه ان ڏاوتون ننه ڪش ڪريا.
تيام هيروديس ڀاڏشا سوڪري ننه ڪيڏو: ”جي ڪئين تون ننه وٺئ، او مون
ٿي مونڱ، ان هون تون ننه ڏيه.“ ②3 ان اونه هون ڪائين وائڏو پڻ ڪريو:
”جي ڪئين تون مون ٿي مونڱ، مارا اڌ راز هوڏي، هون تون ننه ڏيه.“ ②4 تو
سوڪري اوت ٿي نهرين آڀري مان ڪن زائين پونسيو: ”هون ڪي مونڱون؟“
تو مان ڪيڏو: ”يُوحنا پويتر سنون ڏيڏا وازا رو ماڻو مونڱ.“ ②5 تيون يڪدم
سوڪري جلدي موئين پاسي گهي ان ڀاڏشا ڪن زائين مونڱي ڪري: ”مارئي
مرضئي اي سئ، مون ننه همئنه رو همئنه يُوحنا پويتر سنون ڏيڏا وازا رو ماڻو
تاز ۾ اوڻي ڏيو!“

②6 هيروديس پاڌشا هيا وات مانھ گھڻو ڏکي ٿيو. پڻ اُوڻه ڏاوڻوڻ هومو هون کائين وائڏو ڪريو تو، تيام اُو سوڪري ننه نا پاڙوا نٿو ڪرتو. ②7 پسنه اُوڻه يڪدم ماڻو واڍيا واڙا ننه ميلين يوحنا رو ماڻو لايا رو حڪم ڏيڏو. ان اُوڻه زائين جيل موئين رو موئين يوحنا رو ماڻو واڍيو. ②8 ان ماڻو ٿاڙ ۾ لي آوين سوڪري ننه ڏيڏو، ان سوڪري آڀري مان ننه ڏيڏو پرو. ②9 اي وات هومپڙين يوحنا را شيلا آيا، ان اُوڻا رو لاش لين اُوڻا ننه مقوم موئين پوريو پرو.

ايسو ڌاريون قومون رون ملڪون ۾ زائين پڳوون رو ڪوم ڪرڻه

ايسو پونس هزار ٿي وڌارءِ منڪون ننه روئڻي ڪوراوڻه

(متي 13:14-21، مرقس 6:30-44، لوقا 9:10-17، يوحنا 6:1-13)

③0 مڪ شيلا ايسو ڪن پاسا آيا، ان جي ڪئين اُوڻي ڪريو تو ان جي ڪئين اُوڻي شيڪاڙيو تو، ايسو ننه ٻڌوئي همپڙايو. ③1 پسنه ايسو اُوڻون ننه ڪيڏو: ”تمي مون پيڙا نوڪلائي ۾ هونواڙ جڳا ۾ هالو، ان اُوڻه ٿوڙيڪ وار آروم ڪرو.“ ايسو هم تيام ڪيڏو، ڪم تو گھڻا منڪ اُوڻون ڪن آوتات ريا ان زاتات ريا ان اُوڻون ننه روئڻي کاڌا رو ٿوڻو ئي نٿو زڙتو. ③2 پسنه اُو پيڙي موئين سڙين نوڪلائي ۾ هونواڙ جڳا ۾ ڳيا پرا.

③3 پڻ گھڻي منڪي اُوڻون ننه زاتون ڏيڪيا ان اوڙڪي ڳيا جي ڪوڻ سٺه. تو اُو ٻڌون شهرون ٿي پنڌ ٿي پنڌ اُوڻا ماڳ هوما ڍوڙيا جيئنه ايسو ان اُوڻا را شيلا پيڙي موئين زاتات ريا، ان اُوڻون مور اوڻه آوي پوڳيا. ③4 زئيون ايسو پيڙي ٿي نيسو ڍنڍ را ڪپ مانھ اوتريو، تو اُوڻه الاهي گھڻون منڪون ننه ڏيڪيا، ان اُوڻا ننه اُوڻون مانھ قياس آيو، ڪم تو اُو ايويون رڍيون را زم هتا، جيون رو ڪوئي

ڌراڙ نه هونء. ان او اوئون نئه گهڻي واتون شيڪاڙوا مڏيو.

(35) زئيون ڏي گهڻو نمي گيو، تئيون ايسو را شيلا اوئا ڪن آوين ڪيا مڏيا: ”اي جڳا هونواڙ سئه، ان رات پڙيا واڙئي سئه. (36) ايئون منڪون نئه زايا رئي موڪل ڏيو، زم آهه پاهه ٻاراڙي ۾ پاڙون موئين زائين آب هارو ڪئينڪ کاڌو ويساتولئ.“

(37) تيا مانھ ايسو اوئون نئه ڪيڏو: ”تمي آب ايئون نئه کاڌا هارو ڏيو!“ تو اوئي ايسو نئه ڪيڏو: ”ايئون نئه ڪوڙايا هارو امي زائين روتي ويساتي لي آون، ڪي؟ هايا هارو تو ڏھ هزار روپيا ڪشي.“ (38) تو ايسو اوئون ٿي پونسو: ”تمون ڪن ڪتي روتي سئه؟ زائين زوئو!“ تو اوئي ڪٻر پاڙي ان ڪيڏو: ”امون ڪن پونس روتي سئه. ان ٻي شي پڻ سئه.“



(39) تئيون ايسو شيلون نئه ڪيڏو جي او ٻڌون منڪون نئه ٿوڙو ٿوڙو ڪرين اوئنه نيٺي سٻر مانھ ٻيهارئ. (40) تو منڪ هو هو ان پنجاه پنجاه را ٿوڙا ڪرين ٻيھي ريا. (41) پسئ ايسو او پونس روتي ان ٻي مشي لين آڪاش هومو زوئين اوئون هارو پڳوون رو ٿورو مونيو. ان روتيون نئه پونگين شيلون نئه ڏيتو ريو، زم او منڪون نئه ڏئ. ان همريم اوئ پيئون مشيون نئه پڻ ٻڌون نئه وراوي ڏيڏي. (42) پسئ ٻڌائي منڪ ڪائين ڌراپيا. (43) ان جيا روتيون ان مشيون را ٽڪرا منڪي اوڳاريا تا، اوئون نئه شيلي پيڙا ڪريا ان اوئون ٿي ٻارئ ڇا پروٿا. (44) هوئ جيئي روتي کاڌي، ڏوشيون ان ٻازون نئه ساڏين روڳا آدمي پونس هزار هتا.

ايسو پوئي مانھ وئھ

(متي 14:22-33، مرقس 6:45-52، يوحنا 6:16-21)

(45) تيا ڪيڙ ايسو يڪدم آپرون شيلون نئه ڪيڏو: ”تمي ٻيڙي مانھ سڙين مون مور ڍنڍ رٿه پيڙئ ڪپ بيت صيدا شهر هوما زائو پرا، ان هون ايئون ٻڌون

منڪون نٿه رَوونا ڪرونه. "ان شيلا مونڌا رَوونا ٿيا. (46) پستھ ٻڌون منڪون نٿه رَوونا ڪرين ايسو پراڻا ڪروا ڏونگر مانھ ڳيو پرو. (47) رات پڙئي، تو ٻيڙي ڏنڊ را وس ۾ هڻي، ان ايسو آپ ڏونگر مانھ هيڪلو هتو. (48) ايسو زويو جي شيلا ڏويون ٿي ٻيڙي هاڪلھ ريا ان اوئون نٿه گهڻي ڏوروڻ ٿھ رئي، ڪم تو وائيو هومو هتو.

رات رو پروڙ ٿيا مور ايسو ڏنڊ را پوڻي مانھ ويتو اوئون ڪن آوتوت ريو. ان اوئون رٿه پاهڻه ٿين آڳڙ متيا وازو هتو. (49) زئيون شيلي اوئا نٿه ڏنڊ را پوڻي مانھ ويتون پاڙيو، تو هزميا جي "پوت اوڻيوھ." ان اوئي رڙيون ڪري، (50) ڪم تو اوئي ٻڌي اوئا نٿه ڏيڪيو، ان پيڻائي ڳيا. پڻ ايسو يڪدم اوئون ٿي ٻوليو، ان اوئون نٿه ڪيڏو: "هيٺ مت هارو، هُون سون. ٽمي پيڻائو مت." (51) ٽنيون ايسو اوئون پيڙو ٻيڙي موئين سڙيو، ان وائيو ٽمي ڳيو. تو شيلا الاهي گهڻا حيروني پڙي ڳيا. (52) ڪم تو پلٽھ اوئي روئي وڌاريا رو پرسو ڏيڪيو تو، توئي پڻ نٿا هزميا جي ايسو ڪوڻ سٺھ. او آپري سوچ هُون هيا وات نٿه هزمي نه هڪيا.

ايسو گليل صوڻا موئين گنيسرت را علاقا ۾

مونڌون نٿه ھاڙا ھورا ڪرڻھ

(متي 14:34-36، مرقس 6:53-56)

(53) ڏنڊ پار ڪرين ايسو ان اوئا را شيلا گنيسرت را علاقا ۾ آيا، ان ٻيڙي نٿه رونيُوڙا ٿي ڪپ مانھ ٻونڌي. (54) زئيون او ٻيڙي ٿي نيسا اوتريا، تو اوٽ را منڪ يڪدم ايسو نٿه اوڙڪي ڳيا، (55) ان آهڻه پاهڻه پورا علاقا ۾ وات پڪيڙيا هارو ڍوڙي ڳيا. ان زم اوئي هومپڙيو جي ايسو ويتون ويتون همڻه ڦلوتا ماڳ اوڻ سٺھ، تم او مونڌون نٿه زهوڙيون ۾ اوپاڙين اوڻه ايسو ڪن زاوا مڌيا. (56) جيڻه پڻ ايسو زاتو، پلٽھ پاڙون ۾ ڪا شهرون ۾ ڪا ٻاراڙي ۾، اوڻه منڪ مونڌون نٿه رستا رون چونڪون مانھ ميلتا هئا، ان مونڌا منڪ ايسو رئي منٽ

ڪرتا جي اُو رُوڳو اُوئون نئه آڀرا لُوگهڙا را شيڙا نئه سڀوا ڏئه. ان زتا منڪ ايسُو
نئه سڀتا، اُو ٻڌائي هاڙا هورا ٿي زاتا.

ڀڳوونَ رُون حُڪمون مانھ ويو ريتون رَوازون مانھ وُويا ٿي ضروري سئ

(متي 15: 1-9، مرقس 7: 1-13)

7 ① فريسي پالتي را منڪ ان ڪئينڪ شاستر زوٿيا واڙا يروشلَم شهر ٿي
اوين ايسُو ڪن پيڙا ٿيا. ② اُوئي زويو جي ايسُو را ڪئينڪ شيلا اڀڙال را
اڀڙال روٿي ڪاڻه ريا، مطلب اُوئي آڀرا هاڻ ڌرم ري ريت پرموٿه نٿا ڌويا.
③ هُوئه فريسي پالتي را منڪ ان يهودي ڌرم را پيڙا ٻڌائي منڪ آپرون
ڏاڏون را رَواز مانھ وينَ هميش آڀرا هاڻ ريت پرموٿه ڌوئه، ان پسئ روٿي
ڪاڻه. ④ ان اُو بازار ٿي ليڊل شينھون ريت پرموٿه ڌويا وڳر نٿي ڪاتا، ان
هيون پيزون گهڻون رَوازون مانھ وئھ. مثال اُو پيٽالا، جڳ، ان پيٽر را ٺونڙا پڻ
ريت پرموٿه ڌوئه.

⑤ تيام فريسي پالتي ري منڪي ان شاستر زوٿيا واڙي ايسُو ٿي پونسيو:
”ٿارا شيلا آپتون ڏاڏون ري ريتون رَوازون مانھ ڪم نٿي وِيتا؟ ڪم اُو روٿي
کاڌا مور ڌرم ري ريت پرموٿه هاڻ نٿي ڌوتا؟“ ⑥ تو ايسُو اُوئون نئه ڪيڏو:
”ڪوئون منڪون، تمي مونڊا را مينا پڻ اندر را ڪارا سو. جيئي وات ڀڳوون رو
نياپو ڏيڏا واڙه يسعياه ڪيڏي ٿي، ڀڳوون رُئي اي وات تمون مانھ پڻ هاو
پوري اوترئھ:

’اينِا قوم را منڪ مونڊا ٿي تو مارا وڪوڻ ڪرئھ،

پڻ ايئون را من ڀر مون هارُو ڪئين نٿي.

⑦ اُو ماريي نالئي پوزا ڪرئھ،

ڪم تو اُو ماريون واتون را پڌلا ڀر

رُؤڳا منڪون را ناول حُڪم شيڪاڙئھ.

⑧ همرام تمي پڳوون را حُڪم ساڌين منڪون ري ناول ريتون رَوازون مانھ ووھ.
 ⑨ پستمه ايسو اوئون ننه وڙي ام پڻ ڪيڏو: ”واھ ڙي واھ! ڪيوئھ نائوڪئھ نمونئھ
 تمي آپرون ريتون رَوازون مانھ وُڍا هارو پڳوون را حُڪم ساڏوھ. ⑩ ڪم تو
 موسي پڳوون را پاھا ٿي ڪيڏو: ”آپرا مان ٻاپ رو مون را ڪو“ ان ’جيو آپرا مان
 ٻاپ ننه پئتم، اوئا ننه موت رُئي سزا ڏيو. ⑪ پڻ تمي منڪون ننه ام شيڪاڙوھ:
 ’جي ڪوئي آپرا مان ٻاپ ننه ام ڪئھ: ’جئي شينھ مارئھ قرض ڀرموئھ تمون
 ننه ڏيو تو، هائي تو پڳوون ننه منل سئھ، ⑫ تو پلئھ او آپرا مان ٻاپ رُئي
 مدت نه ڪرئھ. ⑬ هيوئھ ڏاڙھ تمي آپرون شيڪاڙل ريتون رَوازون ٿي پڳوون
 رو وڃن ٿوڙوھ. ان هايا جيوا تمي گھڻا ڪوم ڪروھ.“

ايسو شيڪاڙئھ جي منڪ شينھون کاڌا ٿي نئين

پڻ من ۾ ڪراپ واتون راڪيا ٿي ڪراپ ٿي زائھ

(متي 10: 15-20، مرقس 7: 14-23)

⑭ تئيون ايسو گڙڙي رون ٻڌون منڪون ننه وڙي آپ ڪن تيراوين اوئون ننه ڪيا
 مڏيو: ”تمي ٻڌائي مارئي وات ڪون ڏين هومپڙو ان هزمو! ⑮ ٻڌي شينھون
 جي منڪون ٿي ٻاري سئھ، اوئون ۾ ڪوئي شينھ ايوئي نٿي جيا ننه کاڌا ٿي
 منڪ ڪراپ ٿي زائھ. پڻ جي واتون منڪون موئين سئھ ان اوئون ٿي نيهرئھ،
 اوئون واتون ٿي منڪ ڪراپ ٿي زائھ. ⑯ (هومپڙيا وازون، تمي ماري وات مانھ
 ڏيون ڏيو!)“

⑰ زئون ايسو منڪون ري گڙڙي ننه ساڌين گھري گيو، تئيون اوئا ري شيلي
 اوئا ٿي هايا مثالي وات را پارام پونسيو. ⑱ تو ايسو اوئون ننه ڪيڏو: ”تمي
 پڻ ايو پوڙا سو ڪي، جي اي وات ئي نٿي هزمتا؟ ٻڌي شينھون جي منڪون ٿي
 ٻاري سئھ، اوئون ۾ ڪوئي شينھ ايوئي نٿي جيا ننه کاڌا ٿي منڪ ڪراپ ٿي

هڪڻه. ①٩ ڪم تو اُو شينھ منڪ را من موئين نٿي ذاتئي، پڻ اُوئا را پيٽ موئين زائھ، ان نيٺ وڙي ٻارئي نيھري زائھ.


ھم ڪيڏا ٿي ايسو شڪارڙيو جي کاڌا ري ٻڌي شينھون پويتر سئھ، ان ڪوئي ايوئي شينھ نٿي جيا نئھ کاڌا ٿي منڪ پڳوون ري نظر ۾ ڪراپ ٿي زائھ.

②٠ تئين ايسو وڙي ڪيو مڏيو: ”پڻ جي واتون منڪ موئين سئھ ان اُوئا ٿي نيھرئھ، اُوئون ٿي منڪ ڪراپ ٿئھ. ②١ ڪم تو موئينليا وڙ ٿي، منڪون را من موئين ٿي، ڪراپ ڪيال نيھرئھ، پونڌائي، سورئي، ڪون، ②٢ پونڌو ڪوم، لالچ، وير، ٺڳئي، لوقرائي، لوپ، ڳلا، اينھڪار، ان ھر نمونا رئي ڳونڌائي. ②٣ ھائي ٻڌي ڪراپ واتون منڪ موئين ٿي نيھرئھ، ان منڪ نئھ ڪراپ ڪرئھ پرو.“

ڌاري قوم رئي هيڪ ڏوشي ايسو مانھ يقين ڪرئھ

(متي 21: 15-28، مرقس 7: 24-30)

②٤ ايسو اوت ٿي روونو تين صور را علاقا ۾ ڳيو. ان اوتھ ڪياڪ گھر موئين ڳيو. اُوئا رئي مرضئي هئي جي ڪيا نئھ ڪبر نہ پڙئھ جي اُو اول سئھ، توئي پڻ اُو هٿائي نہ هڪيو. ②٥ پڻ هيڪي ڏوشي ايسو را پارام هومپڙيو، جيا ري ڏيڪري نئھ پوت سونتل هتو. تو اُو ڏوشي يڪدم ايسو ڪن آوين اُوئا ري پڳي پڙئي هئي. ②٦ ھائي ڏوشي اسرائيلي قوم رئي نٿي پڻ ڌاري قوم رئي هئي. اُو سوريه ملڪ رئي ان فينيڪي علاقا رئي هئي. اُوئھ ايسو نئھ منٿ ڪري جي اُو هالين اُوئا ري ڏيڪري ٿي پوت ڪاڏئھ. ②٧ پڻ ايسو اُوئا رو آزمو ليڏا هارو اُوئا نئھ ڪيڏو:



”مارو ڪوم ماري آپري اسرائيلي قوم ۾ سئھ، ان تون ڌاري قوم رئي تين مون ٿي مدت ڪم مونڱئھ؟ ڪيٽئي سئھ جي ٻازون رئي روئي لين ڪوترون نئھ نوڪوو ٺيڪ نٿي.“ تو پئسئھ مور ٿي

ٻاڙون نٿه ڪائين ڌراپوا ڏيوو، نا؟" (28) تيا مانھ ڏوشي اُونا نٿه ڪيڏو: "تماري وائ تو هاسئي سٺه، ساڏو جي. توهي پڻ منڪ روئي ري او ٽڪري ڪوترون نٿه نوڪڻه، جي ٻاڙ ڪائين اوڳارڻه، ان ڪوترا او اوڳارل ٽڪري تو ڪاڻه." (29) تو ايسو اُونا نٿه ڪيڏو: "تئين يقين راکين هائي وات ڪيڏي. تيام، تون هوءَ زا، ڪم تو ٿاري ڏيڪري ٿي پوت هوءَ نيھري گيوھ." (30) ان پسئ ڏوشي آڀري گھري زائين زويو، تو سوڪري ڪاٿلا مانھ هوتي پڙيھ ان پوت اُونا ٿي نيھري گيوھ.

ايسو هڪا ٻوڙا منڪ نٿه هارو هورو ڪرڻه

(31) ايسو وڙي سور را علاقا ٿي زائين صيدا شهر تين ڊڪپلس را علاقا ٿي مٿين گليل ڍنڍ ڪن آوي پوگيو. (32) ان منڪ اُونا ڪن هڪا ٻوڙا نٿه تيري آيا، جيو چتو ٻولي نه هڪتو، ان اوئي ايسو رئي منٿ ڪري جي اُونا مانھ هات ميلين اُونا نٿه هارو هورو ڪرڻه. (33) تو ايسو اُونا نٿه ڳڙڏي ٿي هڪه پاهه لي گيو، ان پسئ آڀري اونگڙي اُونا رون ڪونون ۾ نوڪي، ان تيا ڪيڙ آڀرو ٿوڪ اُونا ري جيب مانھ سٻاڙيو. (34) تئين آڪاش هومو زوين اُونه ٻوڙا مانھ قياس ڪائين ڏک ٿي نيهاڪو نوڪيو، ان اُونا ٻوڙا نٿه ڪيڏو: "افتح!" جيا رو مطلب سٺه "کلي زا!" (35) تو يڪدم اُونا را ڪون کلي گيا، ان اُونا رئي زهلال جيب پڻ کلي گئي، ان او چتو ٻولوا مڏيو. (36) تئين ايسو منڪون نٿه گهڻو گهڻو ڪيڏو جي او اي وات ڪيا نٿه نه همپڙاونه. پڻ زتو گهڻو اُونه همپڙيا رو نا پاڙيو، اتئي گهڻي منڪي زائين وات پڪيڙي. (37) هائي وات هومپڙين منڪ الاهي گهڻا حيروني پڙي گيا، ان ايسو را پارام ڪيو مڏيا: "اُونه ٻڌوئي ڪئين ٺاڻوڪو ڪريوھ. او پڳون ري ڪڙا ٿي ٻوڙون نٿه هومپڙيا رئي ان ڳونڳون نٿه ٻوليا رئي هيٺ ڏٺه."

ايسو چارک هزار منکون ننه روتئي گوراوه

(متي 15:32-39، مرقس 8:1-10)

8 ① اوتون ڏيئون ۾ وڙي پيڙي وار الاهي گهڻا منک ايسو کن اول هتا ان اوتون کن کاڌا هارو کئين نتو. تيام ايسو آپرون شيلون ننه آپ کن تيزاوين ڪيڏو: ② ”مون ننه ايتون منکون مانھ قياس آهه، ڪم تو مون پيڙا ريتون ايتون ننه آڙ ترتمو ڏي سته، ان هوه اوتون کن کاڌا رو کئين نٿي. ③ جي هون همته اوتون ننه پوکا پوکا گهري رونا ڪرون، تو او مارگ ۾ ڍوڙه پڙشي. ان اوتون موئين ٿي ڪئينڪ تو گهڻا شيئا ٿي پڻ اول سته.“ ④ تيا مانھ ايسو ري شيلي اوتا ننه ڪيڏو: ”ايتنه هونواڙ ۾ اتون گهڻون منکون ننه گوراي هارو روتي ڪيئون زڙشي؟“ ⑤ تئين ايسو اوتون ٿي پونسو: ”تمون کن ڪتي روتي سته؟“ تو اوئي ڪيڏو: ”امون کن هات روتي سته.“ ⑥ تئين ايسو ٻڌون منکون ننه پينا رو ڪيڏو. ان پسنه اوه او هات روتي پري لين اوتون هارو پگهون رو ٿورو موين پونگي، ان شيلون ننه ڏيوا مڏيو. ان شيلي ٻڌون منکون ننه وراوي ڏيڏي. ⑦ ان شيلون کن ڪئينڪ مشي پڻ هتي. تو ايسو مشيون هارو پگهون رو ٿورو موين شيلون ننه مشي پڻ ورايا رو ڪيڏو. ⑧ پسنه ٻڌائي منک کائين ڌراپيا. ان جيا ٽڪرا اوگاري تا، اوتون ننه شيلي پيڙا ڪريا. ان اوتون ٿي هات ڏلا پروتا. ⑨ هوه کاڌا وازا چارک هزار منک هتا. تئين ايسو اوتون منکون ننه رونا ڪريا. ⑩ ان آپرون شيلون پيڙو يڪدم او پيڙي مانھ سڙين دلموته را علاقا ۾ گيو پرو.

منک ايسو ننه پرسو ڏيکاريا رو ڪه

(متي 16:1-4، مرقس 8:11-13)

⑪ اوتنه فريسي پالتي را منک ايسو کن آيا ان اوتا ٿي تڪرار ڪروا مڏيا. اوئي

ايسو رو آزمتمو ليذا هارو اوتا نئه كيبدو: "امون نئه كوڪ ترت پرسو ڪرين
 ڏيڪار! امون نئه ٿا پيتي ڏئه جي تون پڳوون را پاها رو سئ." (12) تئين ايسو
 گهڻو ڏکي ٿيو ان ڪيبدو: "تم ايتا زمونا را منڪ ٿا پيتي هارو پرسو ڪم زووا
 ڪرو؟ هون تمون نئه هاس ڪونه، پڳوون ٿا پيتي هارو ايتا زمونا رون منڪون
 نئه ماڳي پرسو نئين ڏيڪارن." (13) هم ڪين ايسو اوتون نئه ساڏين وڙي پيڙي
 مانھ سڙين ڍنڍ را پيزا ڪپ هومو روونو ٿي گيو.

ايسو مونھڙل ڪاٿا آتا رو مثال ڏين فريسي پالتي رون منڪون ري
 ان راز ڪريا واڙا هيروڊيس ري پونڌائي ٿي پاھو ڪريا رو ڪئھ

(متي 12:16-17، مرقس 14:8-21)

(14) هون شيلون نئه روٽي آپ پيڙي لي آيا رئي وات ويھري گهي ٿي. ان
 پيڙي ۾ اوتون ڪن روگهي هيڪھ روٽي هئي. (15) زاتون زاتون ايسو اوتون نئه
 گهڻو گهڻو ڪيبدو: "هوشيار ريا. فريسي پالتي رون منڪون رئي ان راز ڪريا
 واڙا هيروڊيس رئي پونڌائي، جتي مونھڙل ڪاٿا آتا جيوي سئ، هيا ٿي پاھو
 ڪريا." (16) تو شيلا هڪا پيزا نئه ڪيا مڏيا: "آپون ڪن روٽي نٿي، تيام آتا
 رئي وات ڪرھ ريو." (17) پڻ ايسو اوتون رئي وات زوئين ڪيبدو: "تمي آپت
 ۾ اي وات ڪم ڪروھ ريا جي آپون ڪن روٽي نٿي؟ تمي هزون هڙي هزمتا
 نٿي، ڪي؟ تمي هاو ايو پوزا سو، ڪي؟ (18) تماري اونڪيون تو سئ، توئي تمي
 ڪم پاڙتا نٿي؟ تمارا ڪون تو سئ، توئي تمي ڪم هومپڙتا نٿي؟ تمون نئه اي
 وات ياد ئي نٿي ڪي؟ (19) زئين مئين پونس روٽي پونگين اوتون ٿي پونس هزار
 منڪون نئه ڪوراي تا، تئين تمي اوڳارل ٽڪرون ٿي ڪتا چپا پريا تا؟" تو اوئي
 ايسو نئه ڪيبدو: "ٻارھ چپا." (20) تو ايسو وڙي پونسو: "ان زئين مئين هات
 روٽيون ٿي چار هزار منڪون نئه ڪوراي تا، تئين تمي اوڳارل ٽڪرون ٿي ڪتا ڏلا
 پريا تا؟" تو اوئي ڪيبدو: "هات ڏلا." (21) تو ايسو اوتون نئه ڪيبدو: "تو پسنه

تمي هزون هُودِي ڪم نٿي هڙمتا؟

ايسو هڪا اونڌا نٿ هازو هورو ڪرڻه

22 تئين ايسو ان اوٽا را شيلابيت صيدا شهر ۾ آوي پوگيا. ايسو اوٽه ڪياڪ پاڙا ۾ هتو، تئين منڪ اوٽا ڪن هڪا اونڌا نٿه تيڙي آيا، ان اوٽا رڻي منٽ ڪرڻي جي او اونڌا نٿه سڀين هازو هورو ڪرڻه. 23 تو ايسو اونڌا رو هات زهالين اوٽا نٿه پاڙا ٿي ٻارو پاڙي گيو، ان اوٽا ري اونڪيون مانھ آڀرو ٿوڪ هڻين اوٽا مانھ آڀرا هات ميلين پونسيو: ”هوتھ ٿون نٿه ڪئينڪ ڏيڪيام آوتھ، ڪا نا؟“ 24 تو او هومو زوئين ڪيا مڏيو: ”هون منڪون نٿه تو پاڙونه ريو، پڻ زهونڪا پاڙونه. او ويتا ويتا مون نٿه زهاڙڪون را زم ڏيڪائھ.“ 25 تئين ايسو وڙي اوٽا ري اونڪيون مانھ آڀرا هات ميليا، ان پسٽه اوٽا رڻي نظر صحيح ٿي گڻي، او هازو هورو ٿيو، ان ٻڌوئي ڪئين چٽو پاڙوا مڏيو. 26 تئين ايسو اوٽا نٿه ڪيڏو: ”ٿون پاسو ايٽا پاڙا ۾ مت زائي نڪو پاڙا واڙون نٿه همپڙاوي!“ ان هم ڪين اوٽا نٿه آڀري گهري روونو ڪريو پرو.

پطرس ايسو نٿه ڀڳوون رو سونڊل پڇايا واڙو ڪريست ڪڻه

(متي 13:16-20، مرقس 8:27-30، لوقا 9:18-21)

27 تيا ڪيڙ ايسو ان اوٽا را شيلابوٽ ٿي زائين قيصره فلبي شهر را آها پاها رون پاڙون ۾ گيا. ويتون ويتون ايسو آڀرون شيلون ٿي پونسيو: ”منڪ مارا پارام ڪي ڪڻه جي هون ڪون سون؟“ 28 شيلي ڪيڏو: ”ڪوڪ ڪڻه جي تم يوحنا پويتر سنون ڏيڏا واڙا سو، ڪوڪ ڪڻه جي تم ايلاه سو، ان ڪوڪ ڪڻه جي تم اڳلوڪون ڀڳوون رو نياپو ڏيڏا واڙون موئين ٿي هڪ سو، جيو وڙي جيوتو ٿيوھ.“ 29 پسٽه ايسو وڙي پونسيو: ”پڻ تم آڀ ڪي ڪوھ جي هون ڪون سون؟“ تيا مانھ پطرس اوٽا نٿه ڪيڏو: ”تم ي ڀڳوون را سونڊل پڇايا واڙا

کریست سو." ③۰ تو ایسو اوتون نئه هوشیار کریڻ کیدو: "تمی مارا پارام کیا نئه مت همیڙایا جی هون کون سون."

ایسو آپ مانه آیا وازون ڏکون ان موت را پارام مور ٿي همیڙاونه

(متی 16:21-23، مرقس 8:31-33، لوقا 9:22)

③۱ تئین ایسو اپرون شیلون نئه شیکاڙوا مڏیو: "ای ضرور ٿیسی جی آپنی قوم را آگیون، موتا پوزاری، ان شاستر زوٿیا وازا مون منک ذات را ڏیکرا نئه گهڻا ڏک ڏیسی، ان مارا پارام قبینصلو کرشی جی هون پگهون رو سونڊل پچایا وازو ٿی پڻ کوزو سون، ان منک مون نئه مارشی پرو، پڻ ترئمئه ڏی هون وڙی جیوی اویهه."

③۲ ایسو هائی اپرا موت رٿی وات کلم کٿی کیتوت ریو، تو پطرس ایسو نئه هیکنه پاهنه کریڻ وڙگاوا مڏیو.

③۳ پڻ ایسو پاسو قرین اپرون شیلون هومو زوئین پطرس نئه وڙگائین کیدو: "تون شیطان را پاها ٿی کم هولئه ریو؟ تون مارو شیلو ٿین آپری جگا یر رئه! تارٿی هائی اوڙی سوچ پگهون را پاها ٿی نٿی، پڻ روڳی منکون رٿی سوچ سئه."

شیلا رئه موت هونڊی ایسو ری وات مانه ویوو

(متی 16:24-28، مرقس 8:34-38، لوقا 9:23-27)

③۴ تئین ایسو ٻڌون منکون نئه اپرون شیلون پیڙا تیڙاویڻ اوتون نئه کیدو: "جی کوئی مارو شیلو ٿین مون وونهڙ آوا کرئه، تو او آپری مرضی ساڌه ان موت هونڊی ڏک وینین زوئنه آپری هونڊی اوپاڙه ان مارا مارگ مانه وین مون وونهڙ آوه. ③۵ کم تو جیو کوئی مون نئه ساڌین آپرو جیو پچاوا کرئه، تو نیٺ اوتا رو جیو نٿین پچئه، پڻ جیو کوئی ماری کری ان پگهون ری ڏیڏل

ڪشي ري ڪهر ري ڪري آڀرو جيو ڏيڏا هارو تيار سئ، تو اوتا نئه هميش رو جيون زڙشي. ③⑥ ڪم تو جي ڪوئي منڪ ٻڌي ئي دنيا هات ڪرئ، ان اوتا نئه آڀرا جيو رو نقصون تئ، تو اوتا نئه ڪيوو ڦاڻيڏو ٿيو؟ ③⑦ منڪ آڀرو جيو پاسو ليڏا هارو ڪي ڏيشي؟ ③⑧ ڪم تو جيو ڪوئي ايتا پونڌا ان هاو پڳوون رئه ڪلاڦ وڍا واڙا زمونا ۾ ماري ڪري ان ماريون واتون ري ڪري مارو شيلو ڪيورايا ٿي للزي مرشي، تو زئون هون مارا ٻاپ را زبڪتا سوجهرام پويتر ڏوتون پيرو آويھ، تنيون هون منڪ ذات رو ڏيڪرو پڻ اوتا نئه مارو شيلو ڪيڏا ٿي للزي مريھ.

9 ① ان ايسو اوئون نئه اي پڻ ڪيڏو: ”هون تمون نئه هاس ڪونه، ايتئ اويل منڪون موئين ٿي ڪئينڪ ايو سئ جيا زئون هوڏي پڳوون رو راز پوري طاقت ٿي اول نئين ڏيڪئ، تنيون هوڏي نئين مرئ.“

ايسو رو روپ زبڪتا سوجهرام ۾ ڀڏلئھ

(متي 17:1-13، مرقس 9:2-13، لوقا 9:28-36)

② سوئون ڏيئون ڪيڙ ايسو آپ پيڙا پطرس، يعقوب، ان يوحنا نئه تيزين هڪا اونسا ڏونگر مانھ نويڪلائي ۾ گيو. ان ايسو رو روپ اوئون رئه روپرو ڀڏلي گيو، ③ ان اوتا را لوگهڙا ايو ڏوڙا شيت زبڪا مڌيا، جي پوري دنيا ۾ ڪوئي پڻ ايو ڏوڙا شيت ڪري نٿي هڪتو. ④ ان ايلياه ان موسي اوئون نئه ڏيڪاڙو ڏيڏو، ان او ايسو ٿي واتون ڪرتون اوئون نئه ڏيڪيام آيا. ⑤ تنيون پطرس ايسو نئه ڪيڏو: ”گرو جي، پلا پاڳ امارا جي امي ايتئ سون. هوئ امي ترڻ ڍاڙيا ناوون، هڪ تمون هارو، هڪ موسي هارو، ان هڪ ايلياه هارو.“ ⑥ اوئھ هم ڪيڏو ڪم تو او گهڻا پيڻائي گيا تا، ان اوتا نئه ڪهر نئي پڙئي جي ڪي ڪيوھ.

⑦ تنيون هيڪئ واڙئھ آوين اوئون مانھ سونئيو ڪريو. ان اوتا واڙا موئين

ٿي پڳوونَ رو آواز ام هومپڙيام آيو: ”اي مارو پريمي ڏيڪرو سٺه. ايٺا ري واتون مونو.“ ⑧ اوچتو، زئيون اُوئي آهڻه پاهڻه زويو، تو ايسو شوا آپ پيڙو پيڙا ڪيا نٿه نه پاڙيو.

⑨ زئيون او ڏونگر ٿي نيسا اوترتات ريا، تو ايسو اوتون نٿه گهڻو گهڻو ڪيڏو: ”زئيون هُوڏي هون منڪ ذات رو ڏيڪرو مرلون موئين ٿي جيوي نه اوتون، تنيون هُوڏي تمي جي ڪئين ڏيڪيوه اوتا را پارام ڪيا نٿه مت ڪيا.“ ⑩ اُوئي ايسو رئي هائي ڪيڏل وات موني ليڏئي، پڻ آپت ۾ ڪيتا ريا جي ”او هم ڪم ڪڻه جي مرلون موئين ٿي جيوي اوشي؟ هيا رو مطلب ڪي سٺه؟“ ⑪ ان او ايسو ٿي پونسوا مڏيا: ”شاستر زوتيا وازا ڪم ڪڻه جي پڳوون را سونڊل پچايا وازا ڪريست رٿه آيا مور ايلياه ضرور وڙي اوشي؟“ ⑫ تو ايسو اوتون نٿه وڙنڌئي ڏيڏئي: ”هم تو سٺه. شاستر پرموئڻه ايلياه مور ٿي اوشي ان منڪون نٿه پڳوون هوما وازين پڳوون را سونڊل پچايا وازا ڪريست رٿه آيا هارو تيار ڪرشي. تو پسڻه شاستر ۾ مون منڪ ذات را ڏيڪرا را پارام ام ڪم لڪل سٺه، جي او گهڻا ڏڪ سمشي ان منڪ اوتا نٿه ڪئين نئين هڙمڻه؟“ ⑬ هون تو تمون نٿه هاس ڪونه جي مارا آيا رئي تيارئي ڪريا وازو، جيا نٿه شاستر ۾ ايلياه ڪيڏو، او تو آيو تو. پڻ منڪون نٿه زم وٺيو، تم اوتا رٿه ڪلاڦ وُڍا، زم شاستر ۾ ايلياه را پارام اڳي لڪل هتو.“

ايسو هڪا سوڪرا ٿي پوت ڪاڏه

(متي 14: 17-21، مرقس 9: 14-29، لوقا 9: 37-43)

⑭ زئيون ايسو ان او ترڻ شيلا وڙي پيزون شيلون ڪن پاسا آيا، تنيون اُوئي پيزون شيلون ري ٻيوڙئي هڪ موٽئي گهڙڏئي ڏيڪئي. ان اُوئي شاستر زوتيا وازون نٿه شيلون ٿي تڪرار ڪرتون پاڙيا. ⑮ گهڙڏي ري ٻڌي منڪي ايسو نٿه ڏيڪين يڪڏم واه واه ڪرئي ان اوتا ڪن ڍوڙي آوين اوتا نٿه نمسڪار ڪريو. ⑯ تنيون ايسو

اُئون ٿي پُونسيو: ”تمي ايتون ٿي ڪيوي تڪرار ڪروھ ريا؟“ ⑰ تو ڳڙڏي موئين ٿي هيڪڻه زئنه وڙندڙي ڏيڏئي: ”ڳرو جي، هُون مارا ڏيڪرا ننه تمون ڪن تيڙي آيو تو، ڪم تو اُوتا ننه پُوت سونتل سئ، جيا ري ڪري او ڳونڳو سئ. ⑱ ان زئيون پڻ پُوت ايتا را پنڌ م آئو، تو پُوت ايتا ننه پاڙئ. ايتا رءِ مونڏئ ڳوڳئي آئو، اي ڏونت گهرڙيا ڪرئ، ان اي شيڪ ٿي زائ. مئين تمارون شيلون ننه ايتا ٿي پُوت ڪاڍيا ربي منٿ ڪري ٿي، پڻ او پُوت ڪاڍي نه هڪيا.“

⑲ تيا مانھ ايسو اُئون ننه ڪيڏو: ”تمي جيا ايتا زمونا را منڪ سو، تمي يقين ڪم نٿي راکتا؟ مارئ هزون ڪتي وار تمون پيڙو ريوو پڙشي؟ تماري ڳلت سوچ مارئ ڪتي وار سهو پڙشي؟ سوڪرا ننه مُون ڪن ايل تيڙي آو!“ ⑳ تو منڪ سوڪرا ننه ايسو ڪن تيڙي آيا. پُوت ايسو ننه ڏيڪين يڪدم سوڪرا ننه مرڙيو، ان او زمي مانھ پڙين چرڪون ڪاوا مڏيو ان مونڏئ ڳوڳئي آوي ربي. ㉑ تو ايسو اُوتا را ٻاپ ٿي پُونسيو: ”ڪتا وڪت ٿي ايتا ننه هم ٿئ ريو؟“ تو ٻاپ ڪيڏو: ”نونن ٿڪون هم ٿئ ريو. ㉒ ان پُوت ايتا ننه ماريا هارو گهڻي وار ڏيو تام ان پوڻي م پاڙيوھ. پڻ جي تمون ٿي ڪئينڪ ٿي هڪئ، تو امون مانھ قياس ڪرين اماري مدت ڪرو!“ ㉓ تو ايسو اُوتا ننه ڪيڏو: ”تون هم ڪم ڪئ؟“ جي تمون ٿي ڪئين ٿي هڪئ، تو. ’جيو منڪ يقين ڪرئ، اُوتا هارو ٻڌوئي ڪئين ٿي هڪئ.“ ㉔ تو سوڪرا رءِ ٻاپ يڪدم زور ٿي ڪيڏو: ”هُون يقين تو ڪرونھ، پڻ مارو يقين اڌروڪو سئ. يقين پڪو راکيا م مارئي مدت ڪرو.“

㉕ زئيون ايسو زويو جي منڪ ڍوڙي ڍوڙين پيڙا ٿئ ريا ان ڳڙڏي وڌئ ربي، تو اُوت پُوت ننه ڌڙڪو ڏين ڪيڏو: ”او ڳونڳو ان ٻوڙو ڪريا واڙا پُوت، هُون تون ننه حڪم ڏيونھ، ايتا موئين ٿي نيھري زا، ان وڙي ايتا ننه ڪيڏي مت سونتي!“ ㉖ تئيون پُوت رڙيون ڪرين سوڪرا ننه گهڻو مرڙين سوڪرا ٿي

نيھري ڳيو. ان سوڪرو مرل را زم ٿي ڳيو. تيام گهڻي منڪي ڪيڏو جي او مري ڳيوھ. ②7 پڻ ايسو سوڪرا رو هات زهالين اوناڙيو، ان سوڪرو هازو هورو ٿي ڳيو ان اُونين اُپو.

②8 زئون ايسو اوت ٿي روونو ٿين گهري ڳيو، تئين اوتا ري شيلي اوتنه نويڪلائي ۾ اوتا ٿي پونسيو: ”امي هايا پوت نه ڪم ڪاڍي نه هڪيا؟“ ②9 تو ايسو اوتون نه ڪيڏو: ”پراڻا ڪريا ان ورت راکيا شوا ايوي قسم رون پوتون نه پيڙهه ڪيو نه پڻ ڍاڙهه ڪاڍي نٿي هڪتا.“

ايسو وڙي گليل صوپا موئين پڳون رو کوم ڪرڻه

ايسو پيڙي وار آپرا موت را پارام مور ٿي هميڙاوتھ

(متي 23-22:17، مرقس 30-32، لوقا 43-45)

③0 ايسو ان اوتا را شيللا اوت ٿي روونا ٿين پنڌ ڪرتون گليل صوپا موئين ٿي متوا مڏيا. ايسو رئي مرضي هڻي جي ڪيا نه اوتا را آيا رئي ڪبر نه پڙهه. ③1 ڪم تو او پنڌ ۾ آپرون شيلون نه شيڪاڙتوت ريو ان اوتون نه ام ڪيتوت ريو: ”موتههه مون منڪ ذات را ڏيڪرا نه زهلاوشي ان منڪون رنه خوالهه ڪرشي، ان او مون نه مارشي پرو. پڻ مريا ڪيڙ ترتمنه ڏي هون وڙي جيوي اُويھ.“ ③2 پڻ شيللا هائي وات نه هزميا، ان اوتون ۾ ايسو ٿي هايا وات را پارام پونسيا رئي هيمت ٿي نٿي.

شيللا آپت ۾ تڪرار ڪرڻه جي ڪيا رو گهڻو مون سڏ

(متي 18:1-5، مرقس 33-37، لوقا 46-48)

③3 ايسو ان اوتا را شيللا ڪفرنحوم شهر ۾ آيا. گهري آوين ايسو آپرون شيلون ٿي پونسيو: ”مارگ ۾ تمي آپت ۾ ڪيا وات را پارام تڪرار ڪرتات ريا؟“

34) پڻ اُو ڪئين نه ٻوليا، ڪم تو اُو مارڳ ۾ هيڪا پيڙا ٿي تڪرار ڪرڻا ريا جي آيون ۾ ڪيا رو گهڻو مون سٺه. 35) تو ايسو پيهين آيون ٻارون سونڊل شيلون نه آپ ڪن ٿيڙايا ان اوئون نه ڪيڏو: ”جو ڪوئي ٻڌون ٿي موتو ٿيو ڪرڻه، تو اوئا رڻه ٻڌون ٿي نونو ٿيو، ان ٻڌون رڻي شيوا ڪريا واڙو ٿيو.“ 36) ان پسته اوئه هيڪ نونو ٻار لين اوئون را وس ۾ اوياڙيو، ان اوئا نه ٻاٽ ۾ لين اوئون نه ڪيڏو: 37) ”جيو ڪوئي مون مانه وشواس راڪيا ري ڪري ايون ٻارون موئين ٿي هيڪا رو مون راڪڻه، اُو مارو مون پڻ راڪڻه. ان جيو ڪوئي مارو مون راڪڻه، اُو پڳوون رو مون پڻ راڪڻه، جيئنه مون نه ميليوه.“

جو تماره ڪلاڦ نٿي اُو تماره پاهنه سٺ

(مرقس 9:38-41، لوقا 9:49-50)

38) پسته يوحنا ايسو نه ڪيڏو: ”گرو جي، امي هيڪا منڪ نه تمارا نوم ٿي پوت ڪاڏتون ڏيڪيو، ان امي اوئا نه هم ڪريا رو نا پاڙيو، ڪم تو اُو امون پيڙو تمون وونهڙ نٿي ویتو.“ 39) پڻ ايسو ڪيڏو: ”اوئا نه هونم مت روڪيا، ڪم تو ام ٿي نٿي هڪتو جي ڪوئي مارو نوم لين پڳوون ري ڪڙا ٿي هيو ڪوم ڪرڻه، ان پسته تيا ڪيڙ مارنه ڪلاڦ ٻولنه. 40) ڪم تو جيو آهڻه ڪلاڦ نٿي، اُو آهڻه پاهنه سٺه. 41) جيو ڪوئي تمون نه، مون پڳوون را سونڊل پڇايا واڙا ڪريست را منڪ هيا ري ڪري، پوئي رو هيڪ ڳلاس ٿي پيئارنه، تو هون تمون نه هاس ڪونه جي پڳوون اوئا نه ضرور ايوڙو ڏيشي.“

ايسو شيڪارڙه جي ڪم ڪرين ڏوه ڪريا ٿي پاهو ڏيو

(متي 9:6-18، 13:5-16، مرقس 9:42-50، لوقا 17:1-2، 34:35)

42) ”ان ايئون نونون منڪون موئين ٿي جيا مون مانه وشواس راڪڻه، جي ڪوئي پڻ منڪ ايئون موئين ٿي ڪياڪ نه ڏوه ۾ پاڙه، تو پڳوون اوئا منڪ نه

اتئي گهڻي سزا ڏيڻي جي اُٺا منڪ هارو ٺاڻوڪو ام ٿت جي اُٺا رڻ هيو ڪوم ڪريا مور اُٺا را گڙا موئين موتا گهرت رو پڙ ٻوندين اُٺا نڻه سمنوڊ ۾ ڦڳوڙيو هوٽ. (43) ان جيا پڻ وات ري ڪري تمڻي ڏوه ڪرو، هايا وات نڻه ساڏو پڙي. جي تمارا هات ري ڪري تمڻي ڏوه ڪروه، تو اُٺا نڻه واڍو پرو. ڪم تو تمارڻه پيئون هاتون هڻيلا نرڳ ري پاھي ۾ زايا ٿي، جيئي ڪيڏي اوزهماتئي نٿي، تمون هارو ٺاڻوڪو اي سڻه، جي تمڻي ڪونڪا ٿين هميش رو جيون ليو. (44) ڪم تو نرڳ ۾ سزا ڪيڏي ڪم نٿي ٿيئي، زوڻه اُڪرڙا ۾ جيڻه ڪيڙا هميش هوڻه ان ڏيوتا ڪيڏي اوزهماتو نٿي. (45) ان جي تمارا پڳ ري ڪري تمڻي ڏوه ڪروه، تو اُٺا نڻه واڍو پرو. ڪم تو تمارڻه پيئون پڳون هڻيلا نرڳ ۾ ڦڳوڙايا ٿي تمون هارو ٺاڻوڪو اي سڻه، جي تمڻي مڍا ٿين هميش رو جيون ليو. (46) ڪم تو نرڳ ۾ سزا ڪيڏي ڪم نٿي ٿيئي، زوڻه اُڪرڙا ۾ جيڻه ڪيڙا هميش هوڻه ان ڏيوتا ڪيڏي اوزهماتو نٿي. (47) ان جي تماري اونڪ ري ڪري تمڻي ڏوه ڪروه، تو اُٺا نڻه ڪاڍو پڙي. ڪم تو تمارڻه پيئون اونڪيون هڻيلا نرڳ ۾ ڦڳوڙايا ٿي تمون هارو ٺاڻوڪو اي سڻه، جي تمڻي ڪوٺا ٿين پڳوڙا را راز موئين زائو. (48) ڪم تو نرڳ ۾ سزا ڪيڏي ڪم نٿي ٿيئي، زوڻه اُڪرڙا ۾ جيڻه ڪيڙا هميش هوڻه ان ڏيوتا ڪيڏي اوزهماتو نٿي. (49) تيام تمڻي ڏک سميا هارو ٿيار ريو، ڪم تو زم پڳوڙا را نوم مانھ مال رو ڏونپ ساڙيا هارو ٻڌا ساڙل مال مانھ مور ٿي لوڻ نوڪڻه، تم پڳوڙا رڻي مرضي پوري ڪريا هارو ٻڌون منڪون رڻه ڏيوتا جيو ڏک وينو پڙشي.

(50) لوڻ تو ٺاڻوڪو سڻه. پڻ جي لوڻ آپ موزو ٿي زائو، تو اُٺا نڻه ڪيا ٿي هَواڏيو ڪرڻو؟ تيام تمڻي هاسا شيلا ٿين پڳوڙا رڻي مرضي پوري ڪرين لوڻ را زم هَواڏيا ٿيو، ان هيڪا پڙا ٿي هپ راکو.

ايسو گليل صويا ٿي يروشلم شهر هومو زائو

ايسو پريٿا را پارام شيڪارڙه

ان ڏوشي نٿه ساڏيا را پارام هزماوئو

(متي 12:1-19، مرقس 1:10-12، لوقا 18:16)

10 ① ايسو اوت ٿي رُونو ٿين يهوديه را علاقا ۾ ٿين يردن ڌريا رٿه پيڙه پاهه ڳيو. ان الاهي گهڻا منڪ وڙي اوتا ڪن آوين پيڙا ٿيا، ان زم اڳي شيڪارڙو ته او وڙي اوتون نٿه شيڪارڙو مڏيو.

② ٽيون فريسي پالتي ري منڪي ايسو ڪن آوين اوتا رو آزمو ليڏا هارو پونسو: ”ڌرم پرموئو آڏمي رٿه آپري ڏوشي لڪي ڏيوو ٿيڪ سٺه، ڪا نا؟“ ③ ٿيا مانه ايسو اوتون ٿي پونسو: ”موسي رو لڪل شاستر تون نٿه ڪي ڪئو؟“

④ تو اوتو ڪيڏو: ”موسي اي موڪل ڏيڏي، جي آڏمي مور ٿي لڪي ڏٺو، تو او آپري ڏوشي ساڏي هڪئو.“ ⑤ تو ايسو اوتون نٿه ڪيڏو: ”موسي تون هارو هائي حڪم تيام لڪيو، ڪم تو اوتا نٿه ڪبر هئي جي تمي ناهڏا سو ان پڳوون ري مرضي مانه نئين وو. ⑥ پڻ ڏنيا ري شروع ٿي لين پڳوون منڪون نٿه نايا رٿه ٿوئو آڏمي ان ڏوشي نايا. ⑦ زم شاستر ۾ لڪل سٺه: ’تيام آڏمي آپرا مان باپ نٿه ساڏي، ان آپري ڏوشي پيڙو ريشي، ⑧ ان او ٻي ٿي هيڪ ٿيشي.‘ تو پسئو آڏمي ان ڏوشي ٻي ٿي ڌار ڌار نٿي، پڻ هيڪ سٺه. ⑨ تيام جيون نٿه پڳوون آپ جوڙيا، اوتون نٿه منڪ ڌار نه ڪرئو!“

⑩ ٽيون او گهري ڳيا، ٽيون شيلي ايسو ٿي هايا وات را پارام وڙي پونسو. ⑪ تو ايسو اوتون نٿه ڪيڏو: ”جيو ڪوئي آپري ڏوشي ساڏين پيڙي ڏوشي ڪرئو، پلئو لڪي ڏيڏي هوئو، توئي پڻ او پرهين ڏوشي رو ڏوه ڪرئو ان

اُو پُونڌو ڪوم ڪرئ. ⑫ ان جي ڏوشي آڀرا آڌمي ننه ساڏئھ ان پيزو آڌمي ڪرئ، پلئھ اوئھ آڀرا آڌمي ٿي لڪاوي لیتو هوئ، توي پڻ اُو پُونڌو ڪوم ڪرئ.

ايسو ننڪون ٻارون نئ آشيرواڌ ڏئھ

(متي 13:19-15، مرقس 13:10-16، لوقا 15:18-17)

⑬ منڪ ايسو ڪن ننڪون ٻارون نئ تيزي آيا، زم ايسو اوئون مانھ هات ميلين آشيرواڌ ڏئ. پڻ شيلي اوئون منڪون نئ وزگائين هيڪل زايا رو ڪيڌو. ⑭ شيلون نئ هم ڪرتون ڏيڪين ايسو نئ گھڻو ڌڪ ٿيو، ان اوئھ شيلون نئ ڪيڌو: ”ٻارون نئ مون ڪن آووا ڏيو، ان اوئون نئ مت روڪو، ڪم تو پڳوون رو راز ايئون ٻارون جيوون منڪون هارو سئ. ⑮ هون تمون نئ هاس ڪنھ، جيو پڻ ٻار جيوو ٿين پڳوون رو راز قبول نٿي ڪرتو، تو اُو پڳوون را راز موئين ماڳي نئين آوي هڪئ.“ ⑯ تنيون ايسو ٻارون نئ ڪورام لين اوئون مانھ هات ميلين اوئون نئ آشيرواڌ ڏيڌو.

شاڻوڪار منڪ ان پڳوون رو راز

تارن لبتا هارو بتويي ڪئين ساڌيا هارو تيار ريوو


(متي 16:19-30، مرقس 17:10-31، لوقا 18:18-30)

⑰ ايسو وڙي آڀرا پنڌ مانھ زايا هارو اوٽ ٿي روونو ٿيتوت ريو، تو هيڪ منڪ ڍوڙي آيو ان اوٽا ري پڳي پڙين اوٽا ٿي پونسيو: ”ناٺوڪا گرو، مارئھ ڪي ڪرو، جيا ٿي مون نئ پڳوون ڪن هميش رو جيون زڙئ؟“ ⑱ تو ايسو اوٽا نئ ڪيڌو: ”تمي ڪي سوچين مون نئ ناٺوڪو ڪوھ؟ پڳوون شوا پيزو ڪوئي ناٺوڪو نٿي. ⑲ تمون نئ پڳوون رون حڪمون رئي تو اڳي ڪبر سئ، ڪون نه ڪرو، پُونڌو ڪوم نه ڪرو، سورئي نه ڪرو، ڪوڙئي هاڪ نه پرو، نڳئي نه ڪرو، ان آڀرا مان ٻاپ رو مون راکو.“

②① تو اُوته ايسو ننه ڪيڏو: ”گرو جي، هاڻيون ٻڌون حڪمون مانھ تو ھون ننڪو ٿڪو ھوتون وونھ ريو.“

②① ايسو اُوئا ننه روڙون زويو، تو اُو ايسو ننه پلو لاڳيو، ان ايسو اُوئا ننه ڪيڏو: ”ھزون تمون موئين ھيڪي وات رڻي گھتائي سئ. تمڙي زائو، تمارو جئين ڪئين سئ اُو ويسين پئيھا ڳريھون ۾ وراو پرا، تو تمون ننه آڪاش موئين آڪاشي ملڳت ھميش رو جيون زڙشي، ان پسئ آوين مارا شيلا ٿين مون وونھڙ وو.“ ②② اي وات ھومپڙين اُو منڪ گھڻو ڏکي ٿيو، ان اُو اومڏومڻو ٿين ڳيو پرو، ڪم تو اُوئا ڪن گھڻي مال ملڳت ھڻي.

②③ ٽيون ايسو آھئ پاھئ اپرون شيلون ھومو زوين اُونون ننه ڪيڏو: ”ملڳت واڙون رڻ پڳوون را راز موئين زاو ڪتو ڏورو سئ.“



②④ شيلا ايسو ري ايئا وات مانھ حيرون ٿيا، ڪم تو اُو ام ھزمتا جي منڪ پڳوون را آشيرواڏ ري ڪري شائوڪار ھوئ. تيا مانھ ايسو اُونون ننه وڙي ڪيڏو: ”مارون ڏيڪرون، پڳوون را راز موئين زاو ڪتو ڏورو سئ. ②⑤ شائوڪار منڪ رو پڳوون را راز موئين زاو ايوو ڏورو سئ، جي ھايا ڪرتون اُونڻ رو ھوئي را ناڪا ھونھرو متوو ھورو ھوئ.“

②⑥ ھائي ھومپڙين شيلا وڌارئ گھڻا حيرون ٿيا، ان ھيڪا پڙا ننه ڪيا مڏيا: ”جي شائوڪارون ننه تارڻ نئين زڙئ، تو پسئ ايوو ڪوڻ ھوشي جيا ننه تارڻ زڙشي؟“ ②⑦ تيا مانھ ايسو اُونون ھومو زوين ڪيڏو: ”ھائي منڪون ٿي ٽٽي ٿي ھڪتو، پڻ پڳوون ٿي ٿي ھڪئ. ڪم تو پڳوون ٻڌوئي ڪئين ڪري ھڪئ.“

②⑧ تيا مانھ پطرس ايسو ننه ڪيڏو: ”زوئو، امي تو ٻڌوئي ڪئين ساڏين تمارا شيلا ٿين تمون وونھڙ آياھ.“ ②⑨ تو ايسو ڪيڏو: ”ھون تمون ننه ھاس

کونه، هر منک جيئنه ماري کري ان پڳوون ري ڏيڏل کشي ري کبر ري کري گهر، ٻين پائي، مان ٻاپ، ٻار، کا زمئي ساڏيڻه، (30) اوتا ننه همئنه ايئا حياتي ۾ ساڏل شينهنون ٿي هو وار وڌيڪ گهر، پائي، پينون، مائون، ٻار ان زمئي زڙشي، پڻ هيا پيڙو منکون را پاها ٿي ڏک تڪليپ پڻ زڙشي، ان پسئ آيا واري حياتي ۾ هميش رو جيون زڙشي. (31) گهڻا منک جيا همئنه مورم سئ او لارم ٿيشي، ان جيا لارم سئ او مورم ٿيشي.

ايسو ترثمي وار آپرا موت را پارام مور ٿي همپزاوئھ

(متي 17:20-19، مرقس 32:10-34، لوقا 31:18-34)

(32) ايسو ان اوتا را شيلا آپرا پنڌ ۾ يروشلم شهر هوما زاتات ريا، ان ايسو اوئون مور مور زاتوت ريو. شيلا ايسو مانھ حيرون هتا، ان پيزا منک جيا ايسو وونهڙ ويتات ريا، او پيئاتات ريا. تئيون ايسو آپرون ٻارون سونڊل شيلون ننه وڙي هيڪنه پاهنه ڪرين اوئون ننه ڪينا مڏيو جي اوتا ٿي ڪي ڪي ٿيا وازو سئ. (33) اوئھ ام ڪيڏو: ”زوئو، آبي يروشلم شهر هوما زائونه ريا. ان اوئھ موئھه مون منک ذات را ڏيڪرا ننه زهلاوشي ان موتون پوزاريون ان شاستر زوٿيا وازون رئ. حواله ڪرشي، ان او مون ننه موت رئي سزا ڏيڏا رو ڦينصلو ڪرشي. ان او مون ننه ڌاري قوم وازون منکون رئ حواله ڪرشي، (34) ان او مون مانھ نئولي ڪرشي، مون مانھ ٽوڪشي، مون ننه هاڻڪا هئشي، ان مون ننه ماري نوڪشي. پڻ ترثمئ ڏي هون وڙي جيوي اوئھ.“

يعقوب ان يوحنا آپرا مون هارو ايسو ٿي منت ڪرئھ

(متي 20:20-28، مرقس 35:10-45)

(35) تئيون زبدي را ڏيڪرا يعقوب ان يوحنا ايسو ڪن آيا ان اوتا ننه ڪيڏو: ”گرو جي، امارئي تمون ٿي هيڪ وينتئي سئ. امون مانھ هيڪ ميرپونئي ڪرو.“ (36) تو

ايسُو اُوئون ٿي پُونسيو: ”تمي ڪي مونڳوھ؟“ (37) تو اُوئي ايسُو نٿه ڪيڏو: ”امون هارُو اي ڪرو، جي زئيون تمي پاڌشا ٿين گهاڏي مانھ مون ۾ بيهشو، تئيون امون نٿه، هڪا نٿه تمارئ زمئڻه پاهڻه ان پيزا نٿه تمارئ ڏاوتھ پاهڻه مون ۾ بيهاريا.“ (38) تيا مانھ ايسُو اُوئون نٿه ڪيڏو: ”تمون نٿه ڪبر نٿي جي تمي ڪي مونڳوھ ريا. ڪي تمي ايو ڏک سھي هڪشو، جيو ڏک هُون سھيھ؟ ڪي تمي موت هُوڏي ڏک ڏورون سھين پڳوون رئي مرضي پورئي ڪري هڪوھ، زم هُون موت هُوڏي ڏک ڏورون سھين پڳوون رئي مرضي پورئي ڪرونھ؟“ (39) تو اُوئي ايسُو نٿه ڪيڏو: ”هوئھ، امي هم ڪري هڪونھ.“ تو ايسُو اُوئون نٿه ڪيڏو: ”تمي هيو ڏک تو سھشو، جيو ڏک هُون سھيھ. ان تمي موت هُوڏي پڳوون رئي مرضي تو پورئي ڪرشو، زم هُون موت هُوڏي پڳوون رئي مرضي پورئي ڪرونھ. (40) پڻ مارئ زمئڻه پاهڻه ڪا ڏاوتھ پاهڻه بيهاريا رئي وات مارا هات ۾ نٿي. هائي ماڳ اُوئون هارُو راکل سٿه، جيون هارُو پڳوون تيار ڪريوھ.“

(41) هائي ٻڌي وات هومپڙين پيزون ڏھون سُونڊل شيلون نٿه يعقوب ان يوحنا مانھ گھڻي رينھ سڙي. (42) تئيون ايسُو اُوئون ٻڌون نٿه آپ ڪن تيڙاوين ڪيڏو: ”تمون نٿه تو ڪبر سٿه جي ڌاري قوم واڙا، جيون منڪون نٿه اُو آڳيوون هزمئھ اُو آپرون منڪون مانھ حڪم ويوراوئھ، ان اُوئون را جيا موتا منڪ سٿه اُوئون مانھ اڪتياري راکئھ. (43) پڻ تمون موئين هم نه ٿيو ڪپڻھ. پڻ جيو تمون موئين موتو ٿيو ڪرئھ، اُوئا رٿه تماري شيوا ڪريا واڙو ٿيو. (44) ان جيو تمون موئين آڳيوون ٿيو ڪرئھ، اُوئا رٿه زوئڻه ٻڌون رو ڳلوم ٿيو. (45) ڪم تو هُون منڪ ذات رو ڏيڪرو پڻ ايئا هارُو نٿي آيو، جي منڪ ماري شيوا ڪرئھ. پڻ ايئا هارُو آيوھ، جي هُون پيزون رئي شيوا ڪرون، ان مارو جيو پڳوون را نوم مانھ ڏيون زم الاهي گھڻون منڪون نٿه ڏوهون رئي ماڻي زڙئھ.“

ايسو هيك اوندڙا ققير نڌ ھازو ھورو ڪرڻھ

(متي 29: 20-34، مرقس 10: 46-52، لوقا 18: 35-43)

46 تيا ڪيڙ ايسو ان اوتا را شيلا يريخو شهر ۾ آيا. ان زئيون او ان اوتا را شيلا، ان پيزا الاهي گهڻا منڪ پڻ، يريخو شهر ٿي رونا ٿيتا ريا، تئيون اوتنه شيرڙا مانھ هڪ اوندو ققير پڻو تو. او تيمائي رو ڏيڪرو هتو، ان اوتا رو نوم برتيمائي هتو.



47 زئيون اوتھ اوندڙه ققير ھومپڙيو جي ايسو ناصرت شهر وازو مئھ ريو، تئيون او زور ٿي ڪيو مڏيو: ”او ايسو، او دائود پادشا را وستار، مون مانھ ڏٺيا ڪرو!“ 48 گهڻا منڪ اوتا ننه ھاڪل ڪرين ڪيو مڏيا: ”ماڻ ڪر!“ پڻ او ماڳي وڌارنھ زور ٿي ڪيو مڏيو: ”او دائود پادشا را وستار، مون مانھ ڏٺيا ڪرو!“

49 تيا مانھ ايسو اوپو ريو ان ڪيتو: ”ھايا ننه ايل تيڙي آوو!“ تو منڪي اوندڙا ننه امر ڪيتو: ”ھيمت راڪ! اوڻ پرو! او تون ننه ھاڏ ڏئھ ريو.“ 50 تو اوندو آپرو وساوڻ توتال هڪل ڳھوڙين ھٿمارو اوليو ان ايسو ڪن آيو. 51 تئيون ايسو اوتا ٿي پونسيو: ”ٿارئي ڪيوني مرضي سئھ؟ ھون تون ھارو

ڪي ڪرون؟" تو اونڌڻه اُٺا نڻه ڪيڏو: "ڳرو جي، مون نڻه هازو هورو ڪرو، زم هون وڙي ڏيکي هڪون." (52) پسته ايسو اُٺا نڻه ڪيڏو: "تون پلڻه زا! تئين يقين ڪريوه، تيام تون هون هازو هورو ٿه!" تو او يڪدم ڏيکوا مڏيو، ان ايسو وونهڙ ويوا مڏيو.


يروشلَم شهر ۾ ايسو رو اڪري هڻو

ايسو يروشلم شهر ۾ آوڻه

ان گهڻا منڪ اُٺا نڻه ڀڳوون رو سونڊل پڇايا وازو ڪريست مونين
اُٺا را وڪون ڪرڻه

(متي 21:1-11، مرقس 11:1-11، لوقا 19:28-40، يوحنا 12:12-19)

11 ① زئيون ايسو ان اُٺا را شيلا يروشلم شهر ڏوڪڙا آيا، ان زئيون نومي ڏونگر ڪن بيت فگي ان بيت عنياه پاڙون ڪن آوين پوگيا، تئين ايسو آپرون شيلون موئين ٿي پيئون نڻه ميليا، ② ان اوئون نڻه ڪيڏو: "تمي هومليا پاڙا موئين زائو، ان زئيون تمي اُٺا موئين زاشو، تو يڪدم اوڻه



گڏيڙا رو هيڪ وشيرو هونڊل ڏيڪشو، جيا مانه اڳي ڪيڻه سوناري نٿي ڪرڻي. اُٺا نڻه سوڙين ايڻه هاڪلي آيا. ③ جي ڪوڪ تمون نڻه پونسڻه: 'هم ڪم ڪروه ريا؟' تو تمي ام ڪيا: 'ايڻا رڻي پريو نڻه ڪاڀي سڻه. ان او جلدِي ايڻا نڻه پاسو ڏي ميلشي.'

④ تو ٻي شيلا رونا ٿيا. ان اوڻه پوگين اوڻي گڏيڙا را وشيرا نڻه بارو شيري

۾ ڌروازا ڪن ٻونڌل ڏيکيو، ان اُو وشيرا نٿه سوڙوا مڌيا. ⑤ اُوڻه اُوپل منڪون موئين ٿي ڪئينگ زڻا اُوئون ٿي پُونسوا مڌيا: ”تمي ڪي ڪروھ ريا؟ وشيرا نٿه ڪم سوڙوھ ريا؟“ ⑥ تو اُوئي ھمروم ڪيڏو، زم ايسو اُوئون نٿه ڪيڏو تو، ان پسٺه منڪي اُوئون نٿه لي زاوا ڏيڏو.

⑦ پسٺه اُو وشيرا نٿه ايسو ڪن ھاڪلي آيا، ان آپرا توڻال وشيرا مانھ پاٿريا. ان ايسو اُوڻا مانھ سڙيو. ⑧ ان ايسو نٿه آڌرمون ڏيڏا ھارو گھڻي منڪي شيرڙا مانھ آپرا توڻال وسايا، ان پيزي منڪي ڪيترون موئين ٿي وئون ري ڏاڙڪي واڍين شيرڙا مانھ وساوي. ⑨ جيا زاترو ايسو مور مور ان ايسو وونھڙ وونھڙ يروشلھ شھر ھوما زاتات ريا، اُو ايسو رئي جئي زور ٿي ام ٻولوتات ريا:

”جئي جئي! ايسو رئي جئي!

ايشور رو آشيرواڏ ايڻا مانھ ھوئ،

جيو ايشور را پاھا ٿي آوئھ.

⑩ پڳوون رو آشيرواڏ ايڻا پاڌشا مانھ ھوئ،

جيو آپڻا ڏاڏا ڏاڏو پاڌشا ري جگا ۾ راز ڪرشي.

جئي جئي! پرميشور رئي جئي!

⑪ پسٺه ايسو يروشلھ شھر موئين آيو، ان پڳوون را گھر ۾ گيو. ان ٻڌوئي

ڪئين زوئين اُو آپرون ٻارون سونڊل شيلون پيزو شھر ٿي ٻارو نيھرين بيت عنياء پاڙا ھومو گيو، ڪم تو رات پڙيا واڙي ھڻي.

ايسو انجیر را وڻ نٿ ھراپ ڏئھ ان ھم ڪرين شيڪارڻھ جي
جي ڪئين نڪومو سئ اُو پڳوون را پاھا ٿي ڪتم ٿيشي

(متي 18:21-19، مرقس 12:11-14)

⑫ پيزئھ ڏي ھوار را ايسو ان اُوڻا را شيلا بيت عنياء پاڙا ٿي پاسا يروشلھ شھر ھوما آوتات ريا، تو ايسو نٿه پوک لاڳئي. ⑬ ان اُوئھ شيئا ٿي انجیر رو ھيڪ

نيلو وڻ ڏيکيو، تو اُو اي سوچين وڻ ڪن گهيو، جي مون ايتا وڻ موئين ڪئينڪ
ميو هونء. پڻ وڻ ڪن آوين زوئو، تو اوتا موئين روڳا پونڙا ئي پونڙا سئو، ان
ميو سئو ئي نئين. هونء موئين وات اي هتي جي انجير رون ميوون رهي مڌي
نتي، توئي پڻ هائي وڻ پونڙون ٿي ام ڏيکاتو تو جي اوتا موئين ميو لاڳل
سئو. (14) تيارم ايسو وڻ نئو ڪيڏو: ”تارا ميو ڪوئي وڙي ڪيڏي نئين ڪائو!“ ان
هائي وات اوتا ري شيلي پڻ هومپڙي.

ايسو پڳوون را گهر موئين ٿي واپار ڪريا وازون نئو ٻارا ڪاڍه

(متي 12:21-17، مرقس 11:15-19، لوقا 19:45-48، يوحنا 2:13-22)

(15) تيون ايسو ان اوتا را شيلو يروشلم شهر ۾ آيا. ان ايسو پڳوون را گهر
موئين زائين اوتون منڪون نئو ٻارا ڪاڍو مڌو، جيا پڳوون را گهر موئين ليتي
ڏيتي ڪرين پڳوون را نوم مانء سڙايا هارو مال ان پڪي ويستات ريا، ان ڏون
۾ ڏيڏا هارو ڪاس پٽيها متات ريا. اوتو پٽيها متيا وازون را پاتيا اوتلايا پرا ان
پاريو ويسي وازون ري سنڌلون اوتلوي پري. (16) ان جيا منڪ شيمون لين لونبا
چڪر ٿي پچيا ري ڪري پڳوون را گهر موئين تين متا تا، اوتو هايون نئو متا
نه ڏيڏا.

(17) تيون او منڪون نئو شيڪاڙو مڌو ان اوتون نئو ڪيڏو: ”شاستر موئين

پڳوون رهي اي وات لڪل نٿي ڪي؟

’مارو گهر ٻڌيون قومون هارو پراٽنا ڪريا رو گهر ڪيوراشي.

پڻ تمي ايتا نئو آپري ڪمائي رو نمونو نايوھ ان زوئو ايتا نئو ڌاڙيلون رهي
پتارهي ناويھ.“

(18) اي وات موئي پوزاريئي ان شاستر زوٽيا وڙي هومپڙي، ان او وجهه گوتو

مڌيا جي ايسو نئو ڪم ڪرين مراوئو. او ايسو ٿي پشاتا تا، ڪم تو اوتون ري
آپري اسرائيلي قوم را ٻڌائي منڪ ايسو را شيڪاڙيا مانء حيرون هتا.

①۹ زئيون هونز ٿئي، تو ايسو ان اوتا را شيلا رات تڪيا هارو يروشلم شهر ٿي بارا نيهري ڳيا.

هُوڪڙاول انجیر را وٺ ٿي ايسو يقين را پارام شيڪاڙڻه

(متي 20:21-22، مرقس 20:11-26)

②۰ ٻيڙه ڏي هوار را ايسو ان اوتا را شيلا پاسا يروشلم شهر هوما ذاتات ريا، تو اوئي ڪالوڪو انجیر رو وٺ ڏيکيو. اُو هاو هُوڪال هتو. ②۱ پطرس ننه ڪالوڪئي وات همپري، تو اوئه ايسو ننه ڪيڏو: ”گرو جي، زوئو! اي انجیر رو وٺ جيا ننه تمي هراپ ڏيڏو تو، اي تو هُوڪائي ڳيوه.“ ②۲ تيا مانه ايسو اوئون ننه ڪيڏو: ”پڳوون مانه يقين ڪرو! ②۳ هون تمون ننه هاس ڪونه، جيو پڻ ايٿا ڏونگر ننه ڪنه: ’ايئون نيهرين سمونڊ ۾ زائين پڙ!‘ ان اوتا را من ۾ ڪئين شڪ نٿي، پڻ يقين ڪرڻه جي زم ڪيڏو تم ٿيڻي، تو اوتا هارو همروم ٿيڻي. ②۴ تيام هون تمون ننه ڪاتري ٿي ڪونه، جيا پڻ وات هارو تمي پڳوون ٿي پراٿنا ان وينتئي ڪرو، هايا را پارام يقين راڪو جي پڳوون تمارو هاڏ هومپڙيوه، تو او وات تمون هارو پوري ٿيڻي. ②۵ ان زئيون پڻ تمي پراٿنا ڪرو، تئيون جي ڪيڻه تمارو ڏوه ڪريو هون، تو اوتا ننه ماڻ ڪرو، زم تمارو آڪاشي ٻاپ پڳوون تمارون ڪرل ڏوهون رئي ماڻي تمون ننه پڻ ڏنه. ②۶ (پڻ جي تمي ماڻي نٿي ڏيتا، تو تمارو آڪاشي ٻاپ پڳوون پڻ تمارون ڪرل ڏوهون رئي ماڻي تمون ننه نئين ڏنه.)“

يهودي ٿرم را اڳيون ايسو ري اڪتياري را پارام سوئال ڪرڻه

(متي 23:21-27، مرقس 11:27-33، لوقا 20:1-8)

②۷ تئيون ايسو ان اوتا را شيلا وڙي يروشلم شهر ۾ آيا. ايسو پڳوون را گهر ۾ ويتوت ريو، تو موتا پوزاري، شاستر زوٿيا واڙا ان اسرائيلي قوم را اڳيون

ايسو ڪن آيا ②8 ان اوثا ٿي پونسوا مڏيا: ”تمي ڪيا را ڪيڏا ٿي اي ڪوم ڪروھ؟ ڪيئن تمون ننه اي ڪوم ڪريا رئي اڪتياري ڏيڏيھ؟“

②9 تيا مانھ ايسو اوئون ننه ڪيڏو: ”هون پڻ تمون ٿي هيڪ وات پونسونه. جي تمي مارا سوئال رو جواب ڏيشو، تو هون پڻ تمون ننه همپزاويھ جي هون ڪيا ري اڪتياري ٿي اي ڪوم ڪرونھ. ③0 مارو سوئال اي سئھ، يوحنا پگھون را طرف ٿي پويتر سنون ڏيتو، ڪا منڪون را طرف ٿي؟ هوئھ تمي مون ننه جواب ڏيو!“

③1 تو پسنھ او آيت موئين ڪيا مڏيا: ”جي آبي ڪيشون: پگھون را طرف ٿي، تو اي آپون ننه ڪيشي: پسنھ تمي اوثا رئي وات ڪم نه مونئي؟“ ③2 پڻ جي آبي ام ڪيشون: منڪون را طرف ٿي، تو آپون ٿي ڪي ٿيشي؟“ او آھئھ پاھئھ اوپل گھئون منڪون ٿي پيئاتات ريا، ڪم تو ٻڌائي منڪ مونتا جي يوحنا پگھون رو نياپو ڏيڏا وازو هتو. ③3 تيام اوئي ايسو را سوئال را جواب ۾ اي ڪيڏو: ”امون ننه تو ڪبر ٿئي.“

تو ايسو اوئون ننه ڪيڏو: ”تو پسنھ هون پڻ تمون ننه نئين همپزاوون جي هون ڪيا ري اڪتياري ٿي اي ڪوم ڪرونھ.“

ڳولون ھازيون رو مثال

ايسو آپ ننه ڏٺي رو ڏيڪرو ڪين آپ را پارام شيڪاڙئھ

(متي 21:33-46، مرقس 12:1-12، لوقا 20:9-19)

12 ① تيون ايسو اوئون ننه مثال ڏين ڪيا مڏيو: ”هيڪ منڪ هتو. اوئھ ڌراڪون رو ٻاگھ پوکايو. اوثا رنه پيوڙيئي اوئھ واڙ ڏيوڙاوي، اوثا موئين ڌراڪون ننه ڦيھليا هارو ان رس ڪاڍيا هارو هوڏئي ٿوراوي، ان سوڪي هارو ڏاڳڙو ٿوراوي. ان پسنھ ٻاگھ موئين هاري اوپاڙين آپ ڪياڪ شيتي ملڪ ۾ گيو پرو.



② ډراکون پاکيا رته توتنه، ډټي
آپرو حصو ليډا هارو هيکا نوکر ننه
هازيون کن ميليو. ③ پڻ هاريښي اوڻا
نوکر ننه زهالين ماريو ان ټالي هاتي
پاسو روونو کړيو.

④ تو ډټي وږي پيزا نوکر ننه هازيون کن ميليو. پڻ هاريښي اوڻا ننه پڻ
ماريو ان اوڻا را ماڻا مانه ډک هڼيا ان اوڻا رڼي پيعزتي کړي.
⑤ تو ډټي وږي ترڼا نوکر ننه ميليو. پڻ هاريښي اوڻا ننه ماريو پرو. هيوڼه
نمونه ډټي پيزا گهڻا نوکر پڻ ميليا، پڻ هاريښي کيونک ننه مار کاډي، ان
کيونک ننه نمو ماري پرا.

⑥ هوڼه ډټي کن روگو هيک زڼو ري گيو، جيو اوڻا رو آپرو پريمي ډيکرو
هتو. تو نيټ پچاږي م اوڼه آپرا ډيکرا ننه اوڼون هازيون کن ام سونچين ميليو
جي 'او ضرور مارا ډيکرا رو مون راکشي'. ⑦ پڻ زڼيون هاريښي ډټي را ډيکرا
ننه ټاگه موئين آوتون پازيو، تو اوڼي آيت موئين اي صلاح کړي: 'هائي تو
ډټي رو ډيکرو سته. ليو، آبي هيا ننه مارون پرو! پسته اي ټاگه هيا رو نئين
ته، پڻ آيتو ټي زاشي'. ⑧ پسته ايڼي ډټي را ډيکرا ننه زهالين اوڻا ننه ماريو
پرو ان اوڻا ننه ټاگه ټي بارو قهگوزيو پرو.

⑨ پسته ايسو منکون ننه کيډو: "هوڼه ټاگه رو ډټي ريو، او کي کړشي؟

اُو آپ آوشي، ان هازيون نئه مارشي پرا، ان آپرا هاگه ري همپاڙ هارُو پيزا منڪ راكشي. ⑩ تمي شاستر م اي وات ضرور پڻي هوشي: 'جيا پتر نئه رازي گهت هزمين ڦڳوڙيوت پرو، اُو هاگي پتر ٻڌون ٿي ضرورت واڙو ٿيوه. ⑪ هائي وات ايشور را پاها ٿي ٿييه،

ان امون هارُو هائي ڪٽي حيروني ان ڪشي رئي وات سئه. " ⑫ تيا مانه اسرائيلي قوم رون آڳيونون نئه رينه سڙي، ڪم تو اُو هزمي گيا جي "ايسو اي مثال رئي وات امارا پارام ڪيڏييه." ان اُو ايسو نئه زهالوا ڪرتا تا، پڻ اُو اوتئه اوپل گهڻون منڪون ٿي پڻاتات ريا. تيام اُو ايسو نئه ساڏين گيا پرا.

منڪ ايسو نئه ڌرم ان حڪومت را چڪر ۾ ڦٽڙايا هارُو ٽيڪس را پڻيها پريا را پارام سوئال پونسئھ

(متي 22:15-22، مرقس 12:13-17، لوقا 20:20-26)

⑬ ٽيون اسرائيلي قوم ري آڳيونوني فريسي پالتي رون ڪئينڪ منڪون نئه ان راز ڪريا واڙا هيروديس را پاها رون ڪئينڪ منڪون نئه ايسو ڪن ميليا، زم اُو ايسو نئه واتون موئين ڦٽڙاوه. ⑭ ان اوتئي ايسو ڪن آوين اوتئا نئه ڪيڏو: "گرو جي، امون نئه ڪهر سئه جي تمي هاسا سو، ان تمي ڪيا ئي منڪ ٿي نٿي پڻاتا، ڪم تو تمي ڪيا رو پڻ پاھو نٿي ليتا، پڻ تمي هاس پرموئنه پڳوون رو مارڳ ڏيڪاڙوه. هوئه امون نئه ڪو، ڌرم پرموئنه رومي حڪومت را پادشا نئه ٽيڪس را پڻيها ڏيوو ڪپئه، ڪا نا؟ امارئه هائي ڏيوو، ڪا نه ڏيوو؟"

⑮ ايسو زوٿي گيو جي اُو موندا را مينا پڻ انتر را ڪارا سئه، ان مون نئه ڪا ڌرم رئه ڪلاڦ ڪا حڪومت رئه ڪلاڦ ٻوللوا ڪرھ. تيام اوئون نئه ڪيڏو: "تمي مون نئه ڪم ڦٽڙاوا ڪروھ؟ سونڊي رو هيڪ سڪو لي آوين مون نئه

ڏيکارڻو. ”(16) تو اُو سونڌي رو سڪولي آيا. تئين ايسو اوتون ٿي پونسو: ”ايشا مانھ ڪيا رو ڦوٽو سٺھ ان ڪيا رو نوم لڪل سٺھ؟“ تو اوتھي ايسو نٺھ وڙندڻي ڏيڏئي: ”رومي حڪومت را پاڌشا رو.“

(17) تو ايسو اوتون نٺھ ڪيڏو: ”جو پاڌشا رو سٺھ، اُو پاڌشا نٺھ ڏيو. ان جو پڳوون رو سٺھ، اُو پڳوون نٺھ ڏيو.“

ان هاڻي هومپڙين اُو ايسو مانھ حيرون ٿيا.



منڪ ايسو نٺھ ڦٽڙايا هارو مرلون را جيوي اُنيا را پارام سوئال پونسئھ

(متي 23:22-33، مرقس 12:18-27، لوقا 20:27-40)

(18) تيا ڪيڙ صدوقي پالتي را ڪئينڪ منڪ ايسو ڪن آيا. هوئھ صدوقي پالتي واڙا ام مونئھ جي پڳوون مرل منڪون نٺھ جيوي نئين اوناڙئھ. اوتھي آوين ايسو ٿي پونسو: (19) ”گرو جي، موسي آيون هارو شاستر موئين ام لڪيوھ، جي آدمي اولاد ووتو مري زائھ، ان اوتا رئي ڏوشي حياتي هوئھ، تو اوتا آدمي رو پائي اوتا ري رنڌال ڏوشي نٺھ آبرا گھر ۾ راکئھ، زم آبرا مرل پائي هارو اولاد ٿئھ.“

(20) هوئھ، هات پائي هتا. پيرهيون پائي پرتيون ان اولاد ووتو مري گيو. (21) تو پيڙئھ پائي هايا حڪم پرموئھ اوتا ري ڏوشي نٺھ آبرا گھر ۾ راکئي، ان اُو پڻ اولاد ووتو مري گيو. ان هاڳي نمونئھ ترٿما پائي ٿي پڻ همروم ٿيو. (22) ان هيوئھ نمونئھ هات ٿي پائي هاڳي ڏوشي نٺھ آبرا گھر ۾ راکين اولاد ووتا مري گيا. نيٺ هايون ٻڌون پايون ڪيڙ اُو ڏوشي پڻ مري گئي. (23) هوئھ جيوي اُنيا رٺھ ڏي زئينون پڳوون مرل منڪون نٺھ جيوي اوناڙشي، تو ايئون هاتون پايون موئين ٿي اُو ڏوشي ڪيا رئي ٿيشي؟ ڪم تو هاتي زئي اوتا نٺھ گھر ۾ راکئي تي.“

(24) تو ايسو اوتون نٺھ ڪيڏو: ”تمارئي سوچ گلت سٺھ، ڪم تو نڪو تمي شاستر هزموه، نڪو تمون نٺھ پڳوون ري ڪڙا رئي ڪبر سٺھ. (25) ڪم تو زئينون

پڳوون منڪون ننه مرلون موئين ٿي جيوي اوناڙشي، تئين آڪاش ۾ منڪ نڪو پرئشي نڪو ڏوشي گهر ۾ راکشي، پڻ آڪاشي ڏوتون جيو هوشي.

②6 هون پڳوون رنه مرلون ننه جيوي اوناڙيا را پارام تمون ننه ڪبر نٿي ڪي، جي شاستر ۾ ڪي لڪل سئو؟ تم اي وات ضرور پئئي هوشي، جي موسي را لڪل شاستر موئين جيا ماڳ ٻڙتا زهاڙڪا رئي وات سئو، اوتنه پڳوون آپ موسي ننه ڪيتو: 'هون ابراهيم، اِصحاق ان يعقوب رو پڳوون سون.' ②7 هون پڳوون مرلون رو نٿي پڻ جيوتون رو سئو. تيام وات ساوئي سئو جي او منڪ پلئ مري ڳيا تا، توئي پڻ جيوتا سئو. تمارئي سوچ تو هاو اوڙئي سئو.

پڳوون رو ڏيندل ٻڌون ٿي موتو حڪم

(متي 22:34-40، مرقس 12:28-34، لوقا 10:25-28)

②8 اوتنه شاستر زوٿيا وازون موئين ٿي هيڪ زڻو هتو، جيئن هائي ٻڌائي سوئال جواب هومپڙيا، ان اونه زويو جي ايسو هايون منڪون ننه نائوڪا جواب ڏيڏاه. تو اونه ايسو ڪن آوين اونا ٿي پونسيو: "پڳوون رن حڪمون موئين ٿي ٻڌون ٿي موتو حڪم ڪيو سئو؟" ②9 تو ايسو اونا ننه وڙنڌي ڏيڏي: "ٻڌون ٿي موتو حڪم اي سئو، زم شاستر ۾ لڪل سئو:

'او اسرائيلي قوم رن منڪون، تم ڪون ڏين هومپڙو، ايشور تمارو پڳوون هيڪه ايشور سئو.

③0 تمارنه ايشور آپرا پڳوون هون،

آپرا پورا من ٿي، آپرا پورا جيو ٿي،

آپري پوري عقل ٿي، ان آپري پوري طاقت ٿي پريم ڪروو.

③1 ان تيا ڪيڙليو حڪم اي سئو:

'پيزون ٿي آپ را زم پريم ڪروو.'

پيزو ڪوئي حڪم ايئون پيئون ٿي موتو نٿي.

③2 تو شاستر زوئيا واژه ايسو نئه ڪيڏو: ”هیرتو، گرو جي. تمی هاس ڪوه جي روگو ایشور هيڪنه پڳوون سئه، ان اوتا شوا پيزو ڪوئي نقي. ③3 ان تمی اي پڻ هاس ڪوه جي پڳوون هون، آپرا پورا من ٿي، آپري پوري عقل ٿي، ان آپري پوري طاقت ٿي پریم ڪريا رئي وات، ان پيزون ٿي آپ را زم پریم ڪريا رئي وات، پڳوون را نوم مانه ٻڌو مال ساڙيا ٿي ان ڏون ڏيڏا ٿي گهڻي وڌارئه سئه.“

③4 ايسو زئيون زويو جي اونه ڪيو عقل ٿي وات ڪريه، تو اوتا نئه ڪيڏو: ”تمی پڳوون را راز م آيا هارو ڏوڪڙا سو.“

تيا ڪيڙ ايسو ٿي وڌيڪ واتون پونسيا رئي ڪيا نئه هيئت نه ٿي.

ايسو شيڪارڙه جي پڳوون رو سونڊل پچايا واڙو ڪريست دائود پادشا ٿي الاهي گهڻو موٽو سئ

(متي 41:22-46، مرقس 35:12-37، لوقا 41:20-44)

③5 زئيون ايسو پڳوون را گهر موئين شيڪارڙوت ريو، تو اونه منڪون ٿي پونسيو: ”شاستر زوئيا واڙا ڪم ڪرين ڪنه جي پڳوون رو سونڊل پچايا واڙو ڪريست روگو دائود پادشا رو پوترو سئه؟ ③6 ڪم تو دائود آپ پويتر آتما ري ڪڙا ٿي ڪريست نئه آپرو پريو ڪين ام لڪيو: ”ايشور مارا پريو نئه ڪيڏو:

مارئه زمئنه پاهنه مون م بيه،

زئيون هوڏي هون ٿارون ڏشمئون نئه هراوين

تاري پڳي نه لڳارون.

③7 زئيون دائود آپ پڳوون را سونڊل پچايا واڙا ڪريست نئه ’پريو‘ ڪنه، تو پسئه ڪم ڪرين ڪريست اوتا رو روگو پوترو ٿيو؟“

ان جيا الاهي گهڻا منڪ اوتنه هتا، او ايسو ري واتون ڪشي ٿي هومپڙتات ريا.

ايسو شاستر زوڻيا وازون ٿي هوشيار ريا رو ڪڻھ

(متي 12:23-12، مرقس 12:38-40، لوقا 20:45-47)


③۸ زئيون ايسو منڪون نٿه شيڪاڙتوت ريو، تو اونه ڪيڏو: ”شاستر زوڻيا وازون ٿي هوشيار ريا، ڪم تو او گهنگها پيرين منڪون هوما گهميا ڦريا رو شونق راکڻه، ان اوئون رو اي پڻ شونق سٺه، جي منڪ اوئون ٿي يازارون ۾ نمي نمين مڙه، ③۹ ان او پڳوون رون منڌرون موئين گهاڏيون مانھ پيهه، ان ڏاوتون ۾ مون وازا ماڳ ۾ پيهه. ④۰ او هاڳي سٺه جيا ٺڳي ڪرين رنڌال ڏوشيون را گهر ڦرھ، ان آپ نٿه ٺاٺوڪا ڏيڪاڙيا هارو لونبي لونبي پرائنائون ڪرھ. هايون نٿه پڳوون گهڻي سزا ڏيشي.“

رنڌال ڏوشي رو ڏون

(مرقس 12:41-44، لوقا 21:1-4)

④۱ ايسو پڳوون را گهر ۾ ڪرونا ريون پيتيون هومو پيهين زوتوت ريو جي ٻڌائي منڪ ڪيوئ نئون پيتيون موئين پيها نوڪھ ريا. گهڻا ملڳت وازا منڪ الاهي گهڻا پيها ڏون ۾ نوڪتات ريا. ④۲ تئيون هيڪ گريپ رنڌال ڏوشي آوئي ان پيتي موئين ٻي ڪوري نوڪي، جيا رو مول آت اونا سٺه. ④۳ تئيون ايسو آپرون شيلون نٿه آپ ڪن تيراوين اوئون نٿه ڪيڏو: ”هون تمون نٿه هاس ڪونه، ايشه گريپ رنڌال ڏوشي هايون ٻڌون ڏون ڏيڏا وازون منڪون ٿي وڌارنه ڏون نوڪيوھ. ④۴ ڪم تو هايي ٻڌي منڪي آپري گهڻي ملڳت موئين ٿي پڳوون را نوم مانھ روڳو ٿوڙڪوڪ حصو ڏيڏوه، پڻ ايشه رنڌال ڏوشي آپري گريپي ري حالت موئين زتو پڻ گهري هتو، ٻڌوئي ڪئين ڏون ۾ ڏيڏوه پرو.“





ايسو پڳوون رو گهر کتم تيا را پارام مور ټي همپزاوټه

(متي 2-1:24، مرقس 2-1:13، لوقا 6-5:21)

13 ① زئيون ايسو پڳوون را گهر ټي بارو آتوت ريو، تتيون اوټا رون شيلون موئين ټي هيڪه زئه اوټا نه كيډو: ”گرو جي، زوټو! پڳوون را گهر را اي پوټا ڪوڙا موٽا سټه، ان اي جڳائون ڪيوي نائوڪي سټه.“ ② تو ايسو اوټا نه كيډو: ”اي موتي جڳائون جي ٽون پاڙه ريو، ايٽون رو هيڪ ٿي پٿر هازو نئين پڄم. اي پڳوون رو گهر هاو کتم ٿي زاشي.“

ايسو مور ٽي همپزاوئھ جي پڳوونَ رو گھر ڪنم ٿيا مور ڪي ٿيشي
ان هوشيار ڪرئھ جي هائي ٻڌوئي دنيا رئي پڇاڙئي نٿي

(متي 24:3-14، مرقس 13:3-13، لوقا 19:7-21)

③ زئيون ايسو زيتونَ نومي ڏونگر مانھ زائين پڳوونَ را گھر هومو پيو تو،
تئين پطرس، يعقوب، يوحنا ان اندرياس ايڪونت ۾ اونا نٿه ڪيڏو: ④ ”امون
نٿه همپزاوو، هائي پڳوونَ رو گھر ڪنم ٿيا رئي وات ڪيڏي ٿيشي؟ ان ڪيو
نيسون هوشي جيا ٿي کبر پڙهه جي اي ٻڌوئي ڪئين ٿيا وازو سئھ؟“ ⑤ تو
ايسو اوئون نٿه ام ڪيو مڏيو: ”هوشيار ريا، متون ڪوڪ تمون نٿه نه پولاوئھ.
⑥ گھڻا منڪ مارا نوم ٿي آوشي، ان ڪيشي پڳوونَ رو سونڊل پڇايا وازو
ڪريست هون سون. ان هم ڪين، او گھڻون منڪون نٿه پولاوشي. ⑦ زئيون تمي
جنگون رئي ڪاش هومپزو ان جنگون ري واتون هومپزو، توئي پڻ پڻايا مت.
هائي واتون ضرور ٿيشي، پڻ تئھ ٿوئھ دنيا رئي پڇاڙئي نئين تئھ. ⑧ ڪم تو
قوم قوم ٿي وڌشي ان ملڪ ملڪ ٿي وڌشي. ان گھڻي ماڳي زميني ڏهشي ان
ڏڪار پڙشي. پڻ هائي واتون دنيا ري پڇاڙي رون ڏڪ تڪليلهون رئي روڳئي
شروعات سئھ.

⑨ تمي هوشيار ريا. ڪم تو منڪ تمون نٿه زهالين پنچائيتون رٿه حواله
ڪرشي، پڳوونَ رون منڊرون ۾ تمون نٿه هاپڪا هئشي، ان مارا شيلا هويا ري
ڪري او تمون نٿه آڳيونون ان پاڌشائون هوما اويارشي. هيونھ نمونھ تمي
اوئون نٿه مارا پارام هاک پرين همپزاوي هڪشو. ⑩ ان دنيا رئي پڇاڙي ٿيا
مور منڪ پڳوونَ رئي ڏيڌل ڪشي رئي کبر ٻڌيون قومون رون منڪون نٿه ضرور
همپزاوشي. ⑪ زئيون او تمون نٿه زهالين ڪورئون ۾ لي زائھ، تئين تمي مور ٿي
اي گھڻي مت ڪريا جي تمي ڪي ڪيشو. پڻ جيئي وات پڳوونَ اوئھ ئي ٿوئھ
تمون نٿه من ۾ همپزاوشي، او وات تمي ڪيا. ڪم تو تئھ ٿوئھ تمي آپرا پاها

ٿي نئين پڻ پوٽر آتما را پاها ٿي ٻولتا هوشو.

⑫ ٻائي ٻائي ننه موت رٿي سزا ڏيورايا هارو زهلاوشي، ان باپ اولاد ننه موت رٿي سزا ڏيورايا هارو زهلاوشي. ان اولاد مان باپ رٿه ڪلاڻ ٿيڻي ان اوئون ننه زهلاوين موت رٿي سزا ڏيوراوشي. ⑬ ان مون مانه وشواس راڪيا ري. ڪري ٻڌائي منڪ تمون ٿي وير راڪشي. پڻ جيو آڪر هوڏي وشواس راڪين ڏوروڻ صير ٿي سهشي، اوتا ننه تارڻ زڙشي.

ايسنو مور ٿي همپزاوئه

جي رومي قوج يروشلم شهر ننه ڪنم ڪرشي

(متي 24:15-28، مرقس 13:14-23، لوقا 21:20-24)

⑭ ”تيام هوشيار ريا. تمي او هاو ڪراپ ان پرياد ڪريا واڙي شينه، جيا را يارام شاستر ۾ لڪل سئ، اوتا جگا ۾ اوپل ڏيڪشو جيئنه اوتا رٿه نه هوو ڪپنه. جيو شاستر رٿي هائي وات پئنه، اوتا رٿه هيا رو مطلب هڙموو! زئون تمي هيا ننه ايئنه پوٽر جگا ۾ ڏيڪو، تيون جيا ايئنه يهوديه صوپا موئين هوئه، او ڏونگرون هوما پاڳي زائه! ⑮ جيا گهر ري ڇت مانه هوئه، او نيسا اوترين ڪئينڪ ليڏا هارو گهر موئين نه زائه، ⑯ ان جيا ٻني ۾ هوئه، او آپرا توتال ليوا پاسا نه زائه، پڻ امرام پاڳي زائه! ⑰ پڻ اقسوس اوئون ڏوشيون مانه، جي اوئون ڏيئون ۾ پاري پڳ هوشي، ڪا ننڪا باز ڏوراوتي هوشي. ⑱ تمي پراٿنا ڪرو جي تمارنه شيئاڙا ۾ پاڳو نه پڙهه. ⑲ ڪم تو اوئون ڏيئون ۾ ايوئي گهٽئي تڪليپ ٿيڻي، جيوئي دنيا ري شروع ٿي لين، زئون پڳوون جڳت ٿايو، هزون هوڏي ڪيڏي نٿي ٿئي، ان نڪو وڙي ٿيڻي. ⑳ ان جي ايشور هيا توتا ننه گهٽاوين تڪليپ را توڙا ڏي نه راڪيا هوئت، تو ڪوئي نه پڇئت. پڻ آپرون سونيل منڪون ري ڪري ايشور هايون ڏورون ڏيئون ننه گهٽ ڪرياه.

㉑ اوئه توتنه جي ڪوڪ تمون ننه ام ڪنه جي ’زوتو، پڳوون رو سونيل

پڇايا وازو ڪريست ايڻا ماڳ سٺه ڪا زوٽو، اُٺا ماڳ سٺه، تو هيا وات مانھ يقين مت ڪريا. (22) ڪم تو ايو ڪوڙا منڪ آوشي جيا ڪوڙ هاكلين آپ نٺه پڳوون رو سونڍل پڇايا وازو ڪريست ڪا پڳوون رو نياپو ڏيڏا وازا ڪيشي. ان اُو منڪون نٺه پُولايا هارو نيشون ان پرسا ڏيڪارشي. ان جي ٿي هڪٿ، تو پڳوون رون سونڍل منڪون نٺه پڻ پُولوٿ. (23) تيام تمي هوشيار ريا. مٿين تمون نٺه مور ٿي ٻڌوئي ڪئين همپڙايوه.

پڳوون رو گهر ڪٽم ٿيو ان پڙيون آفتون رو آوو
ٿاينٽي سٺ جي ايسو پڳوون را پاها ٿي راز ڪريا وازو سٺ

(متي 29:24-31، مرقس 24:13-27، لوقا 25:21-28)

(24) ”پڻ هيا تڪليب ڪيڙ جيو توڻو آوشي، اُٺون ڏيئون ۾ ڏي ڪارو مش ٿيشي، انزوٽاريو آپرو سوجهرو نئين ڏٺ، (25) تارا آڪاش ٿي ڪرين پڙي زاشي، ان آڪاش موٽيلي ٻڌي شينھون ڏڳشي. (26) ان ٿيون مُون منڪ ذات را ڏيڪرا نٺه منڪ گهڻي ڪرا ۾ ان گهڻا زبڪتا سوجهرا ۾ واڌرون موٽين آوتون ڏيڪشي، ان وات ساوئي ٿيشي جي هُون پڳوون را پاها ٿي راز ڪريا وازو ٿين آيا وازو سون. (27) ان ٿيون هُون آڪاشي ڏوتون نٺه ميليھ، ان هُون پوري ڏنيا ۾ چارون ڏشون ٿي مارون سونڍل منڪون نٺه پڙا ڪراويھ.“

نيشونون ٿي اوڙڪو جي ڪي ٿيا وازو سٺ

(متي 32:24-35، مرقس 28:13-31، لوقا 29:21-33)

(28) ”انجیر را وڻ رئي مثال لين تمي شيڪو. زئون اُٺا ريون ڏاڙڪيون موٽين ڪونڙ ٿئھ ان پوٽڙا ٿئھ، تو تمي آپ اوڙڪي زائوھ جي اُٺاڙو آيا وازو سٺ. (29) هيونھ نمونھ زئون تمي هائي تڪليپون ٿيتي ڏيڪو، تو هزميا جي هائي توڻو هاو ڏوڪرو سٺ. (30) هُون تمون نٺه هاس ڪونھ، هائي ٻڌي تڪليپون ايڻا همٿوڪي پيڊي رون

منڪون ري حياتي ۾ پوري ٿيڻي. ③۱ آڪاش ان ڌرتي تو ڪٽم ٿي زاشي، پڻ ماري واتون هميش هُڏي هاسي ريشي.

ايسو دنيا ۾ آپرا پاسا آيا را پارام ان دنيا ري پڇاڙي را پارام هوشيار ڪرڻه

(متي 24:36-44، مرقس 13:32-37)

③۲ ”پڻ مارا پاسا آيا را ڏي را پارام، ڪيا نٿه ڪبر نٿي جي هائي ڪيڏي ان ڪيٺه ٿوئڻه ٿيڻي. هايا وات رڻي نڪو آڪاشي ڏوتون نٿه ڪبر سٺه، ان نڪو مون پڳوون را ڏيڪرا نٿه ڪبر سٺه. پڻ رُوگڻي مارا ٻاپ پڳوون نٿه هايا وات رڻي ڪبر سٺه. ③۳ تيام هوشيار ريو ان تيار ريو. ڪم تو تمون نٿه ڪبر نٿي جي او توڻو ڪيڏي آوشي. ③۴ مارا پاسا آيا رڻي وات ايٿا مثال را زم هوشي. ڪوڪ منڪ شيتي ملڪ ۾ گيو، ان اوئڻه زايا رڻه ٿوئڻه آپرون نوڪرون موئين ٿي هر هيڪ نٿه اوٿا رو ڪوم پزاوين آپرو گهر نوڪرون ري همپاڙ ۾ ڏيڏو، ان سوڪيڏار نٿه حڪم ڏيڏو جي او زاگتو رڻه. ③۵ تيام تمي هميش تيار ريا. ڪم تو زم نوڪرون نٿه ڪبر نٿي جي گهر رو ڌڻي ڪيون پاسو آوشي، هونزو رو آوشي، ڪا ارڏي رات رو، ڪا پڙ پونڪڙيا رڻه ٿوئڻه، ڪا وڙي ڏي اوگيا رڻه ٿوئڻه، تم تمون نٿه ڪبر نٿي جي هون تمارو ڌڻي ڪيڏي پاسو آويه. ③۶ ام نه ٿڻه ڇي هون اوچتو آوين تمون نٿه تيار نه ڏيڪون، زم ڌڻي اوچتو آوين نوڪرون نٿه اونگهال ڏيڪڻه. ③۷ زم هون تمون نٿه ڪونه ريو، تم هون ٻڌون نٿه ڪونه ريو، تمي هميش تيار ريا.“

يهودي ترمر را اڳيون ايسو نٿه مرايا هارو نا ناوڻه

(متي 26:5-14، مرقس 14:2، لوقا 22:1-2، يوحنا 11:45-53)

① ٻيئون ڏيئون ڪيڙ او پرڀ آيا واڙي هٽي، جيا نٿه پاشڪا پرڀ ان روتيون رڻي پرڀ پڻ ڪڻه. ان موتا پوزاري ان شاستر زوتيا واڙا ايٿا ري

ڳوت ۾ هتا جي ڪيوئہ ڏاڙئہ ايسو نئہ ٺڳي ٿي زھللوينَ مراوئہ پرو. ② ڪم تو او ام ڪيتات ريا: ”آپي اونا نئہ پاشڪا پرپ مانھ نئين زھالون، متون آپئي قوم را منڪ ڦشرئي ڪرئہ.“

هیک اشيتريي ايسو را مون ۾ اونا را ماتا مانھ عطر نومئھ

(متي 26:13-6، مرقس 14:3-9، يوحنا 12:1-8)



③ ايسو بيت عنياه پاڙا موئين شمعون نومي منڪ ري گھري هتو، جيا نئہ اڳي ڪوڊ رئي پيماري هئي. ايسو کاڌا هارو پينو تو، تو هيڪ اشيتريي سنڳي مرمر رئي ڪونپلي لين آوئي، جيا موئين جئاماسي نومي وڻ رو هاسو ان مونگھو عطر هتو. ان اوئہ ڪونپلي ڪوليا هارو اونا رو مائلو حصو

پونگيو ان ايسو را مون ۾ اونا را ماتا مانھ عطر نوميو پرو. ④ پڻ هائي زوئين ڪئينڪ منڪون نئہ رينھ لاڳئي ان اوئي آيت ۾ ڪيڏو: ”هائي عطر ازايو ايڙيا رو ڪي قائڏو ٿيو؟ ⑤ ڪم تو هائي عطر پئرئہ هزار رويون ٿي وڌارئہ رو ويسائي هڪٽ ان اونا را پئيھا ڳريهون نئہ ڏيورائي هڪٽ.“ ان او ٻائي رئي ڳلا ڪروا مڌيا.

⑥ پڻ ايسو اوئون نئہ ڪيڏو: ”ايئا نئہ ڪئين مت ڪو! ڪم تمي ايئا نئہ تنڱ ڪروھ ريا؟ ماري ڪري جي ايئہ ڪريوھ، او گھڻو ٺاڻوڪو ڪريوھ. ⑦ ڳريپ تو هميش تمون ڪن هوشي، ان تمون نئہ زئون پڻ وئئہ اوئون نئہ تمي ڪيريات ڏي هڪوھ، پڻ هون تو هميش تمون ڪن نئين هوئون. ⑧ ايئہ ٻائي اتو ڪريوھ، زتو ايئا را وس ۾ هتو. اي عطر مارا ڏيل مانھ نوميا ٿي، ايئہ مارئہ مريا مور مون نئہ مقوم موئين پوريا رئي تيارئي ڪرئي. ⑨ هون تمون نئہ هاس ڪونھ، پوري دنيا ۾ جيئئہ پڻ منڪ پڳوون رئي ڏيڏل ڪشي رئي ڪپر همپزوشي، اوئئہ ايئا ٻائي ري همپار ۾ اي وات پڻ همپزوشي جي ايئہ ڪي ڪريوھ.“

يهوداه اسڪريوتي ايسو نڌ زهالا هارو نا ناوڻه

(متي 14:26-16، مرقس 10:14-11، لوقا 3:22-6)

⑩ تئين يهوداه اسڪريوتي، جيو ايسو رن هارون سونڊل شيلون موئين ٿي هيڪ هتو، موتون پوزاريون ڪن گيو، زم او ايسو نڌ زهالوين اوئون رڻه خواله ڪرڻه. ⑪ اي وات هومپڙين او گهڻا ڪش ٿيا، ان اوڻا نڌ پڙها ڏيڏا رو وائيڏو ڪريو. تو يهوداه وجه گوتوا مڏيو جي ڪيوڻه نمونڌه ايسو نڌ زهالوين اوئون رڻه خواله ڪرڻه.

ايسو بيئون شيلون نڌ ميلين پاشڪا پرپ رڻي تيارڻي ڪراوڻه

(متي 17:26-19، مرقس 12:14-16، لوقا 7:22-13)



⑫ زئين روتيون ري پرپ رو پيرهئون ڏي آيو، جيا ڏي مانه پاشڪا پرپ هارو گهڻا هاللتا، تئين ايسو ري شيلي اوڻا ٿي پونسيو: "تمارڻي ڪيوڻي مرضي سڻه جي امي ڪيڻه زائين تمون هارو پاشڪا پرپ کاڌا رڻي تيارڻي ڪرون؟"

⑬ تو ايسو آپرون شيلون موئين ٿي بيئون نڌه ام ڪين رونا ڪريا: "تمي شهر موئين زائو. اوڻه تمون نڌه هيڪ منڪ پيڙو ٿيشي، جيو پوڻي رو گهڙو اوپاڙين زاتو هوشي. تمي اوڻا وونهڙ وونهڙ زايا، ⑭ ان جيا گهر موئين او زائ، اوڻا گهر را ڏئي نڌه ڪيا: 'گرو جي تمون نڌه ام ڪيڏوه: او اوتاڳ ڪيڻه سڻه، جيڻه هون آپرون شيلون پيڙو پاشڪا پرپ ڪائون؟' ⑮ تو او تمون نڌه مارڻي مانه هيڪ موتو ڪمرو تيار ڪرل ڏيڪاڙشي. ان اوڻه تمي آڀڻه پرپ کاڌا رڻي تيارڻي ڪريا."



①⑥ اُو ٻي شيلڙا رَوَونا ٿيا ان يروشلم شهر ۾ گيا. ان زم ايسو ڪيڏو تو، همروم ڏيکيو، ان اوڻه اُوئي پاشڪا پرڻ کاڌا رڻي تيارڻي ڪري.

ايسو اڪري وار آپرون شيلون پيڙو روٽي ڪاهه
ان مور تي همپڙاوه جي اوڻا رو هيڪ شيلو اوڻا ننه زهلاوشي

(متي 25-20:26، مرقس 21-17:14، لوقا 23-21:22، يوحنا 30-21:13)

①⑦ زئيون هونز ٿئي، تئيون ايسو آپرون ٻارون سونڊل شيلون پيڙو اوڻا ماڳ آيو.
①⑧ زئيون او پيهين ڪاتات ريا، تو ايسو ڪيڏو: ”هون تمون ننه هاس ڪونه، تمون موئين ٿي هيڪ زڻو، جيو مون پيڙو ڪاهه ريو، مون ننه زهلاوشي.“ ①⑨ تو شيلڙا ڏکي ٿيو مڏيا ان هيڪا پيڙا لڙ ڪيو مڏيا: ”هون تون تي، نا؟“ ②⑦ تو ايسو اوڻون ننه ڪيڏو: ”جيو مون ننه زهلاوشي، او تمون ٻارون سونڊل شيلون موئين ٿي هيڪ سته، جيا مون پيڙا کاڌا را ٺونڀڙا ۾ روٽي را ٻٽڪا ٻوڙهه ريا.“ ②① ڪم تو جيوئه نموننه مارا پارام شاستر ۾ اڳي لڪل سته، هيوئه نموننه هون منڪ ذات رو ڏيڪرو تو ايٺا جڳت ٿي زائونه ريو. توئي پڻ ڏک اوڻا منڪ هارو سته، جيو مون منڪ ذات را ڏيڪرا ننه زهلاوشي. اوڻا منڪ هارو ٺاڻوڪو ام ٿئت،

جي اُو مُوڙڳو زلميو ئي نه هئوٽ.

ايسنو ڳلومي ٿي آزات ٿيا ري پاشڪا پرڀ رو نوو مطلب شيڪاڙين
پرڀو پوزن رڀي ريت ناوئھ

(متي 26:26-30، مرقس 14:22-26، لوقا 22:14-20، 1 ڪرنتيون 11:23-25)



22) زئيون پرڀ ڪاتات ريا، تو ايسو روئئي لين
اونا هارو پڳوون رو ٿورو مونيون پونگئي، ان
آپرون شيلون ننه ڏين ڪيڏو: ”هون ليو. اي مارو

شرير سئھ.“ 23) ان پسنه ڌراڪ رس رو پيئالو لين اونا هارو پڳوون رو ٿورو
مونيون اوئون ننه ڏيڏو. ان اوئي ٻڌي اونا موئين ٿي پيڏو. 24) ان ايسو اوئون ننه
ڪيڏو: ”اي مارو لوئي سئھ، جيا ٿي پڳوون رو وسن ٻوندل سئھ. هون مارو جيو
پڳوون را نوم مانھ ڏيھ، زم مارا لوئي ٿي گهئون منڪون ننه ڏوهون رڀي ماڻي
زڙئھ. 25) هون تمون ننه هاس ڪونھ، زئيون هوڏي او ڏي نه آوئھ زئيون هون
پڳوون را راز ۾ ايوو ڌراڪ رس پيھ جيو هميش نوو سئھ، تئيون هوڏي هون
ڌراڪون رو رس وڙي ماڳي نئين پيئون.“

26) تيا ڪيڙ پزن ڳاوين او ٻارا نيهرين زيتون نومي ڏونگر هوما روونا ٿيا.

ايسنو مور ٿي هميڙاوئھ جي پطرس اونا رو شيلو هويا رو نا پاڙشي

(متي 31:26-35، مرقس 14:27-31، لوقا 22:31-34، يوحنا 13:36-38)

27) تئيون ايسو آپرون شيلون ننه ڪيڏو: ”تمي ٻڌائي مون ننه ساڏي زاشو. ڪم
تو شاستر ۾ هيا را پارام پڳوون رڀي اي وات لڪل سئھ:
’هون ڌراڙ ننه ماريھ،

ان رڍيون وينڪائي زاشي‘.

28) پڻ موت ٿي جيوي اونيا ڪيڙ هون تمون مور گليل صويا ۾ زائھھ.“

②9 پڻ پطرس اُٺا نٿه ڪيڏو: ”پلٽي پيڙا ٻڌائي تمون نٿه ساڏي زائو، توڻي پڻ هون تمون نٿه ڪيڏي نئين ساڏون.“

③0 تو ايسو اُٺا نٿه ڪيڏو: ”هون تون نٿه هاس ڪونه، آڙوڪي رات ڪوڪڙا رٿه هي وار ٻونگ ڏيڏا مور، تون ترڻ وار مون نٿه ناڪاريه.“

③1 توڻي پطرس وڙي وڙين ڪيا مڏيو: ”مارٿي تمون پيڙو پلٽي مروو پڙئي، توڻي پڻ هون تمون نٿه ڪيڏي نئين ناڪارون.“ ان شيلا ٻڌائي همرا ڪيا مڏيا.

ايسو زيتون نومي ڏونگر مان ٻراڻا ڪرڻ

(متي 26:36-46، مرقس 14:32-42، لوقا 22:39-46)

③2 زيتون ايسو ان اُٺا را شيلا اُٺا ماڳ آيا جيا نٿه ”گتسمني“ ڪڻه، تو ايسو آڀرون شيلون نٿه ڪيڏو: ”تمي ايئن ٻيهو، ان هون آگهيرو زائين ٻراڻا ڪرونه.“



③3 ايسو آڀ پيڙا پطرس، يعقوب ان يوحنا نٿه آگهيرو تيڙي ڳيو، ان گهڻو ڏڪي ان پريشون ٿيا مڏيو. ③4 ان اوئون نٿه ڪيڏو: ”هون اتو گهڻو ڏڪي سون جي زوئو مارو هاھ ٿوئو ريو. تمي ايئن ريو، ان زاگتا ريو.“ ③5 پستو اوئون ٿي توڙوڪ آگهو زائين او ڳوڏا ڪوڙين اونڌن مونيئن پڙين ڀڳوون ٿي ايٿا هارو ٻراڻا ڪروا مڏيو جي، زون ٿي هڪڻه، تون ڀڳوون اُٺا نٿه آيا وازون ڏڪون را

ٿوئا ٿي پڇاڻه. ③6 ان اُو ام پراڻنا ڪرتوت ريو: ”او ٻا، تمي ٻڌوئي ڪئين ڪري هڪوھ. اي ڏک جيا تمي مُون ننه سهيا هارُو ڏيڏاه، ايئون ڏڪون ٿي مُون ننه پڇاڻو. توئي مارئي مرضئي نئين، پڻ تمارئي مرضئي پوري ٿي.“

③7 پستھ ايسو پاسو آيو ان شيلون ننه اُونگھال پاڙيا. تو اُوته شمعُون پطرس ننه ڪيڏو؟ ”او شمعُون، تُون ڪم اُونگھائھ ريو؟ تُون هيڪ ئي ڪلاڪ پڻ زاڳي نٿي هڪتو، ڪي؟ ③8 تمي ٻڌائي زاڳتا ريو، ان پراڻنا ڪرو جي تمي آزمتا موئين پورا اوترو. تمي مُون ننه ساڏوا تو نٿي ڪرتا، توئي تمي منڪ ٿين هيئا سو.“

③9 پستھ ايسو وڙي زائين هاڳي پراڻنا ڪروا مڏيو. ④0 تيا ڪيڙ پاسو اُونون شيلون ڪن آوين اُونون ننه وڙي اُونگھال پاڙيا، ڪم تو اُونون ري اونڪيون اُونگھ ٿي ڳري ٿي ڳي تي. شिला زاڳيا، تو اُونون ننه ڪبر نٿي جي ”ايسو ننه ڪي ڪون؟“

④1 تيون ايسو وڙي پراڻنا ڪرين ترٿمي وار شيلون ڪن آيو ان اُونون ننه ڪيڏو: ”تمي هزون هُوڏي اُونگھائوھ ان آروم ڪروھ ريا، ڪي؟ هُوته ٻش! توئو تو آيوھ رو. زوئو، همٿه موٽهه مُون منڪ ذات را ڏيڪرا ننه زهلاوين ڏوهاري منڪون رنه حواله ڪرشي. ④2 هُوته اُونو، آبي هالون. زوئو، مُون ننه زهلايا واڙو هاو ڏوڪڙو آيوھ رو.“

يهوداه اسڪريوتي ايسو ننه زهلاوئھ

(متي 26:47-56، مرقس 14:43-50، لوقا 22:47-53، يوحنا 18:3-12)

④3 هزون ايسو ٻولتوت ريو، تو يڪدم يهوداه آي پوڳيو، جيو ايسو رون ٻارون سُونڊل شيلون موئين ٿي هيڪ هتو. ان اُوئا پيڙو منڪون رو هيڪ موٽو توڙو هتو، جيون ڪن تروٿارون ان ڏونڳون هتي. اُو موتون پوزاريون، شاستر زوٿيا واڙون ان اسرائيلي قوم رون آڳيونون را پاها ٿي ميلل هتا. ④4 هُوته زهلايا واڙه يهوداه توڙا رون منڪون ننه اي نيشوني ڏيڏي ٿي: ”جيا ننه هُون ٻوسڪو ليھ، اُو سئھ.“

اَوٽا ننه زهاليا ان قاهو ڪرين لي زايا. " (45) تيام اوتنه يگدم ايسو ڪن آوين ڪيڏو: "گرو جي!" ان اوتنه نه بوسڪو ليدو. (46) تئيون توڙا ري منڪي ايسو ننه زهالين قاهو ڪريو. (47) تيا مانه جيا منڪ ايسو پيڙا اوپل هتا، اوتون موئين ٿي هيڪنه زتنه تروٿار ڪاڍين مڪ پوزاري را نوڪر ننه ڌڪ هنيو، ان اوتنه رو ڪون واڍيو پرو.

(48) تئيون ايسو توڙا رون منڪون ننه ڪيڏو: "تمي تروٿارون ان ڏونگيون لين مون ننه زهالو ڪم آيا؟ هون ڌاڙيوال سون، ڪي؟" (49) هون تو تاريخ پگهون را گهر موئين شيڪاڙتوت ريو ان تمون ڪن هتو، توئي پڻ تته توتنه تمي مون ننه نه زهاليو. پڻ اي ٻڌوئي ڪئين هم تيام ٿيوه، زم شاستر ري واتون پوري تته. (50) تئيون ٻڌائي شيلا ايسو ننه ساڏين پاڳي ڳيا.

(51) هون هيڪ جوڻ هتو، جيو ايسو وونهڙ آوتوت ريو. اوتنه رنه روڳهي هيڪ مونگهئي سوتي ساذر ڏيل مانه وينتوزل هتي. تئيون توڙا ري منڪي اوتنه نه زهاليو، (52) پڻ او ساذر اوت رئي اوت ساڏين ناڳو ئي ناڳو پاڳي ڳيو.

ايسو ننه مڪ پوزاري ڪائيفا ڪن تيڙي زائھ

ان ڌرمي پنچائيت ايسو ننه موت رئي سزا ڏيڏا رو قينصلو ڪرئھ

(متي 26: 57-68، مرقس 14: 53-65، لوقا 22: 54-55، 63-71، يوحنا 18: 24)

(53) تئيون او منڪ ايسو ننه مڪ پوزاري ڪن لي ڳيا. ان ٻڌائي موتا پوزاري، اسرائيلِي قوم را آڳيوون ان شاستر زوتيا وازا اوتنه پيڙا ٿيا. (54) ان پطرس گهڻي شيتي ڏين مڪ پوزاري را مولات هوڏي ايسو وونهڙ وونهڙ ڳيو. ان پسنه او موئين زائين سپايون پيڙو اونگنا مانه پيهي ريو، ان ڏيوتا مانه تاپوا مڏيو.

(55) موتا پوزاري ان ڌرمي پنچائيت را ٻڌائي ميمپر ايٿا ڳوت ۾ هتا، جي ڪوڪ ايسو رنه ڪلاڦ هاڪ پرين ايسو رو ايوو ڏوه ڪاڍنه جيا ٿي او ايسو ننه سزا ڏيوراوي هڪنه. پڻ ڪوئي ايوو ڏوه نه زڙيو. (56) ڪم تو گهڻا

منک اوتا رٺه ڪلاڦ ڪوڙئي هاڪ تو ڀرتات ريا، پڻ توئي اوتون رئي ڀرل هاڪ آيت ۾ ميڙ نٿي کاتي. (57) نيٺ ڪئينڪ منڪي اوتين ايسو رٺه ڪلاڦ اي هاڪ ڀري: (58) ”امي ايٺا نٺه ام ڪيتون هومپڙيو، هون منڪون رو ٺاول اي ڀڳوون رو منڌر ڪٽم ڪريه پرو، ان ترٿيون ڏيئون ۾ وڙي پڙو ڀڳوون رو منڌر اوڀو ڪريه پرو، جيو منڪون رو ٺاول نئين هون.“ (59) توئي پڻ اوتون ري ڀرل هاڪ ميڙ نه کاڌي.

(60) تيا مانه مڪ پوزاري پنچائيت وسا اوتين اوڀو ان ايسو ٿي پونسيو: ”ايئي هاڪ ڀرين ٿارو اي ڏوه ڪاڍيوه، ان تون هيا را پارام ڪئين نٿي ڪيا ڪرتو، ڪي؟“ (61) پڻ ايسو سونو ريو، ان ڪئين وڙندي نه ڏيئي. تو مڪ پوزاري وڙي اوتا ٿي پونسيو: ”تون ڀڳوون رو سونڍل پچايا واڙو ڪريست سٺه ان مونواڙا ڀڳوون رو ڏيڪرو سٺه، ڪا نا؟“

(62) تو ايسو ڪيڏو: ”ههون، هون سون. ان تمي مون منڪ ذات را ڏيڪرا نٺه ڪڙا واڙا ڀڳوون رٺه زمٽه پاهنه مون موئين پيٺل ڏيڪشو، ان آڪاش رون واڙون پڙو اوتون ڏيڪشو، ان وات ساوئي ٿيشي جي هون ڀڳوون را پاها ٿي راز ڪريا واڙو سون.“

(63) تيون مڪ پوزاري آپ نٺه ڏڪي ڏيڪاڙيا هارو آڀرو ڀيرل گهنگهو ڦاڙيو ان ڪيڏو: ”هون آپون نٺه پڙون هاڪ ڀريا واڙون رئي ڪيوي ضرورت سٺه؟“ (64) تمي ڪوني هومپڙيوه جي ايٺه آپ نٺه ڀڳوون هرڪو ڪين ڀڳوون رئي پيعزئي ڪريه. تمي ڪيو ڦينصلو ڪرو؟ ”تو پنچائيت ري ٻڌي ميمپري ڦينصلو ڪريو جي او ڏوهاري سٺه ان اوتا نٺه موت رئي سزا ڏيو ڪپهه.“

(65) تيون ڪئينڪ منڪ ايسو مانه ٿوڪوا مڏيا ان اوتا ري اونڪيون ٻوندين اوتا نٺه ٺونشا هئا مڏيا، ان اوتا نٺه ڪيا مڏيا: ”او ڀڳوون رو نياپو ڏيڏا واڙا، امون نٺه همپڙاو ڪيٺه تون نٺه ڏڪ هٿيوه؟“ ان سپايي پڻ اوتا نٺه وڙي وڙين ٿڀڙون هٿي.

پطرس ايسو رو شيلو هويا رو نا پاڙڻه

(متي 26:69-75، مرقس 14:66-72، لوقا 22:55-62، يوحنا 18:15-18، 25-27)

⑥6 پطرس ڏرٻار ٿي نيسو اونگهنا مانھ پينو تو، تئينون مڪ پوزاري ريون نوڪروئينون موئين ٿي هيڪ زئي آئي ⑥7 ان پطرس ننه تاپتون ڏيڪين اونا هومو زوئين ڪيڏو: ”تون پڻ هيا ناصرت شهر واڙا ايسو پيو هتو.“ ⑥8 پڻ پطرس ناڪارين ڪيڏو: ”مون ننه ڪهر ئي نٿي جي تون ايوئي اوڙي وات ڪم ڪرڻه رهي. ٿارئي وات مارا هزميام ئي نٿي آئي.“ ان پطرس اوت ٿي زائين مولات را ٻارليا ڌرواڙا ڪن گيو. (تئينون ڪوڪڙهه ٻونگ ڏيڏي.)

⑥9 پسڻه نوڪروئي اونا ننه اونا ماڳ ڏيڪين وڙي اوڻهه اوپل منڪون ننه ڪيا مڏي: ”اي اوئون موئينليو سڻه.“ ⑦0 پڻ پطرس وڙي ناڪاريو. ان ٿوڙيڪ وار ڪيڙ اوڻهه اوپل منڪ وڙي پطرس ننه ڪيا مڏيا: ”اي تو هاسي وات سڻه جي تون اوئون موئينليو سڻه، ڪم تو تون پڻ اوئون را زم گليل صوپا رو سڻه.“ ⑦1 تئينون پطرس پتو مڏيو ان هون ڪائين ڪيا مڏيو: ”هائي



منڪ جيا را پارام تمي ڪوه ريا، هون هيا ننه اوڙڪتو ئي نٿي.“ ⑦2 ان يڪدم ڪوڪڙهه پيڙي وار ٻونگ ڏيڏي. ان پطرس ننه او وات همپري جي ايسو اونا ننه ڪيڏي نٿي، جي ”ڪوڪڙا رڻه ٻي وار ٻونگ ڏيڏا مور، تون ترڻ وار مون ننه ناڪاريو.“ ان تيا مانھ او ايوو ڏي ٿيو جي او ڏوهڪي ڏوهڪي رووا مڏيو.

يهودي دَرَم را اَڳيوون

ايسو نڌ رومي راز ڪريا واڙا پيلاطس ڪن تيڙي زائھ

(متي 27: 1-2، 11-14، مرقس 15: 1-5، لوقا 23: 1-5، يوحنا 18: 28-38)

15 ① زئيون ڏي اُڳيو، تو يڪدم موتي پوزاريئي اسرائيلي قوم رون آڳيونون، شاستر زوڻيا واڙون، ان ڌرمي پنچائيت رون ٻڌون ميمپرون نڌ پيڙا ڪرين آيت ۾ صلاح ڪري. ان پسڻ اُئي ايسو نڌ ٻوندين اُئا نڌ اوت ٿي لي زائين صوپا مانھ راز ڪريا واڙا پيلاطس رڻ ڄاڻھ ڪريو پرو.

② تئيون پيلاطس ايسو ٿي پونسيو: ”تون يهوديون رو پاڌشا سڻ، ڪي؟“ تو ايسو اُئا نڌ وڙنڌي ڏيڏئي: ”زم تم ڪوھ ريا، هُون سون.“
③ موتا پوزاري ايسو مانھ گھڻا ڏوھ ڏيتا ريا. ④ تو پيلاطس ايسو ٿي وڙي پونسيو: ”تون ڪم ڪئين جواب نٿي ڏيتو؟ زو، اُو تون مانھ ڪتا گھڻا ڏوھ ڏئھ ريا.“ ⑤ توئي پڻ ايسو ڪئين جواب نه ڏيڏو. هايا وات مانھ پيلاطس حيرون ٿيو.

رومي راز ڪريا واڙو پيلاطس

ايسو نڌ موت رئي سزا ڏيڏا رو ڦينصلو هميڙاوتھ

(متي 27: 15-26، مرقس 15: 6-15، لوقا 23: 13-25، يوحنا 18: 39-16)

⑥ هونھ هر سال پاشڪا پرڀ مانھ پيلاطس يهودي قوم رون منڪون هارو ڪرين هڪا قيڏي نڌ ڍلو ڪرتو، جيا رئي پڻ اُو مونگھڻي ڪرتا. ⑦ اُوئون ڏيئون ۾ هڪ قيڏي هتو، جيا رو نوم برابر هتو. اُو اُوئون ڦشري ڪريا واڙون موئين ٿي هڪ هتو، جيئي ڦشري ۾ ڪون ڪريا تا، ان اُوئون پيڙو جيل ۾ پورل هتو. ⑧ ان الاهي گھڻا منڪ پيڙا ٿيا ان پيلاطس ٿي مونگھڻي ڪروا

مڏيا جي اُو اڳي را زم ڪياڪ ڦيڏي ننه ڍلو ڪرئ. ⑨ تيا مانھ پيلاطس اُوئون ٿي پُونسيو: ”ڪي تماري مرضي سئھ جي هُون تمون هارُو يهوديون را پاڌشا ننه ڍلو ڪرون؟“ ⑩ اُوئھ هم ڪيڏو، ڪم تو اُوئا ننه ڪبر هئي جي موتي پوزاريئي ايسُو ننه اينا هارُو زهلاوين اُوئا رنه حوالئھ ڪريوھ، ڪم تو اُو ايسُو مانھ ريشي پرتا. ⑪ پڻ موتي پوزاريئي آپري قوم رن منڪون ننه پريا تا، تيام اُوئي آپ هارُو ايسُو ننه نئين، پڻ برابا ننه ڍلو ڪريا رئي مونگئي ڪري.

⑫ تيا مانھ پيلاطس وڙي اُوئون ٿي پُونسيو: ”تو پستھ هُون اينا منڪ ٿي ڪي ڪرون، جيا ننه تم يهوديون رو پاڌشا ڪوھ؟“ ⑬ تو وڙي ٻڌي منڪي رڙيون ڪرين ڪيڏو: ”هايا ننه هُوڙي مانھ ساڙين مارو پرو.“ ⑭ تو پيلاطس اُوئون ننه ڪيا مڏيو: ”ڪم؟ ايتھ ڪيو ڏوھ ڪريوھ؟“ پڻ اُو ماڳي وڌارئھ زور زور ٿي رڙيون ڪرين ڪيا مڏيا: ”هايا ننه هُوڙي مانھ ساڙين مارو پرو!“

⑮ پيلاطس هايون گهئون منڪون ننه ڪُش ڪروا ڪرتو تو. تيام اُوئھ برابا ننه اُوئون هارُو ڪرين ڍلو ڪريو، پڻ ايسُو ننه هاپڪون ٿي مراوين قوچيون رنه حوالئھ ڪريو، زم اُوئا ننه هُوڙي مانھ ساڙين مارئھ پرو.

رُومي قوجي ايسُو مانھ ننولي ڪرئھ

(متي 27:27-31، مرقس 15:16-20، يوحنا 19:2-3)

⑯ تنيون قوجي ايسُو ننه راز ڪريا واڙا را گھيڊ موئين تيڙي گيا، ان قوز رو ٻڌو توڙو تيڙاوين پيڙو ڪريو. ⑰ تنيون اُوئي ايسُو رو گھنگھو اوتراوين وونگئي رنڱ رو چال اُوئا رن ڪُون مانھ اوڍاڙيو، ان ڪنئون رو تاج ڳولين اُوئا ننه ماڻام پيرايو. ⑱ ان اُو ام ڪي ڪين اُوئا ننه نمسڪار ڪروا مڏيا: ”او يهوديون را پاڌشا، نمسڪار!“ ⑲ ان اُو هيڪي لاکڙي ٿي اُوئا ننه ماڻا مانھ

ڌڪ هٽات رڀا، اُونا مانھ ٿوڪتات رڀا، ان اُونا ھوما پڳي پڙين نمسڪار ڪرتات رڀا.


②0 زئيون ڦوجي ايسو مانھ نٺولي ڪري رڀا، تئيون اُوني وونگٺائي رنگ رو چال اُونا نٺه اُوترايو، ان اُونا را آپرا لوگهڙا وڙي اُونا نٺه پيرايا. ان پسٺه اُونا نٺه ھوڙي مانھ ساڙيا ھارو ٻارو لي ڳيا.

ڦوجي ايسو نٺه ھوڙي مانھ ساڙئھ

(مٽي 27:32-44، مرقس 15:21-32، لوقا 23:26-43، يوحنا 19:17-27)

②1 ڦوجي ايسو نٺه لين ذاتات رڀا، تو اُئون نٺه ٻاراڙي ٿي اوتو هيڪ منڪ پيڙو ٿيو. اُو ڪريني شهر رو هتو، ان اُونا رو نوم شمعون هتو. ان اُو سڪندر ان روفس رو ٻاپ هتو. تو ڦوجيئي هايا نٺه پيڳر ۾ زهاليو ان ايسو رڙي ھوڙي اُوپڙاوي.

②2 ڦوجي ايسو نٺه اُونا ماڳ لي ڳيا جيا نٺه "گلگتا" ڪئھ، جيا رو مطلب سٺه پوڌڪي رو ماڳ. ②3 اُوتڻه پوڳين اُوني ڌوڪ گهٽ ڪريا ھارو ڌراڪون رو رس، جيا ۾ ٻوڙ رو نشو پيڙول هتو، ايسو نٺه ٿوريو. پڻ ايسو نه پيڏو. ②4 تئيون اُوني ايسو نٺه ھوڙي مانھ ساڙيو، ان پُڪا نوڪين اُونا را لوگهڙا آيت ۾ وراوي ليڏا. ②5 زئيون اُوني ايسو نٺه ھوڙي مانھ ساڙيو، تئيون ھوار رو نوون رو توڻو



هتو. 26) ان ايسو ري هُوَري مانه هيڪ پائي لاڳل هتي، جيا مانه لڪل هتو جي ايسو ڪيا وات ري ڪري موت رڻي سزا ڪانه ريو. اوتا پاتي مانه اي لڪل هتو: "اي يهوديون رو پاڌشا سته."

27) ان اوتي ايسو پيڙا پيئون ڌاڙيلون نته پڻ آپري آپري هُوَري مانه ساڙيا، هيڪا نته ايسو رنه زمئنه پاهنه، ان پيڙا نته ڏاونه پاهنه. 28) (هيونه نموننه پگهون رو نياپو ڏيڏا واڙا رڻي شاستر ۾ لڪل اي وات پوري ٿي: "منڪي اوتا نته ڏوهاريون جيوو هزميو.")

29) جيا منڪ اوتا ماڳ ٿين مٿات ريا، او ٺنولي ڪرتون ماڻو ڏڳاوين ام ڪين ايسو رڻي پيعزتي ڪرتات ريا: "واه ڙي واه! تون جيو پگهون رو گهر پونگين ترثيون ڏيئون ۾ وڙي نايا واڙو هتو. 30) هونه هُوَري ٿي نيسو اوترين تون آپرا آپ نته تو پچاو." 31) هيونه نموننه موتا پوزاري ان شاستر زوٿيا واڙا اوتا مانه ٺنولي ڪرين هيڪا پيڙا نته ام ڪيتات ريا: "ايه پيزون نته تو پچايا، پڻ آپرا آپ نته نٿي پچايو هڪو. 32) جي اي هاس ۾ پگهون رو سونڊل پچايا واڙو ڪريست سته ان اسرائيلي قوم رو پاڌشا سته، تو اي همئنه رو همئنه هُوَري ٿي نيسو اوتري آونه، تو آبي ٿايتي ڏيڪين ايئا مانه يقين ڪرون." ان جيا منڪ ايسو پيڙا پيزيون هُوَريون مانه ساڙل هتا، اوتي پڻ ايسو نته ميئا ڏيڏا.

ايسو رو موت


(متي 27:45-56، مرقس 15:33-41، لوقا 23:44-49، يوحنا 19:28-30)

33) زئيون پپورون رو ٻارون رو توڻو ٿيو، تو اوتا وڪت ٿي لين ترثيون واڳون هُوَري ٻڌا ملڪ موئين اندارو ٿي گيو. 34) ترثي واڳي ايسو گهڻا زور ٿي ڪيڏو: "الوهي، الوهي، لما شبعتي؟" جيا رو مطلب سته "او مارا پگهون، او مارا پگهون، تمي مون نته ڪم ساڏيوه پرو؟"

③⑤ هائي هومپڙين اوتته اويل منكون موئين ٿي ڪٽينڪ زئا، ”الوهي“ وين رو مطلب ڳلت هزمين، ام ڪيو مڌيا: ”زوئو، اي ايلياه ننه هاڏ ڪرئو ريو.“

③⑥ ان هيڪنه زئنه ڊوڙي زائين ٿوري ري چاري جيوئي شينه ڪاٿا ڌراڪ رس ۾ ٻوڙي ان هيڪي لاکري ۾ پرووين سونپيا هارو ايسو را موندا ڪن ڪري، ان منڪون ننه ڪيڏو: ”اوپا ريو! زوئون پلا، ايلياه اوتا ننه اوتاروا آوئو، ڪا نا.“

③⑦ تئيون ايسو موئي رڙ ڪري، ان اوتا رو هاه نيهرې ڳيو. ③⑧ ان اوتنه ئي توئنه پڳوون را گهر موئين پوٽر جگا رو پڙڏو مائون لين هيٺ هوڏي پيئون ٽڪرون ۾ ڦاٽي ڳيو.





③۹ ڦوجيون رو ساپ، جيو ايسو هومو اوپو تو، زئيون
اوتھ ايسو ننه هيونته نمونته مرتون پاڙيو، تئيون ڪيڏو:

”هاس ۾ اي منڪ پڳوون رو ڏيڪرو هتو.“

④۰ اوتھ ڪئينڪ ڏوشي پڻ هتي، جي شيتا هون ٻڌوئي

ڪئين زوتيت ري. اوتون موئين مريم مگدلين، نونا

يعقوب ان يوسيس رئي مان مريم، ان سلومي هتي.

④۱ هائي او ڏوشي هتي جي اڳي، زئيون ايسو گليل صوبا

۾ هتو، اوتا ري واتون هومپرو اوتا وونهڙ ذاتي ان اوتا

رئي شيوا ساڪري ڪرتي. ان پيزي گهڻي ڏوشي پڻ هتي جي ايسو پيزي گليل
صوبا ٿي يروشلم شهر ۾ آوي تي.

ايسو را لاش ننه پونئيرا جيوا مقوم موئين راڪڻه

(متي 57:27-61، مرقس 42:15-47، لوقا 50:23-56، يوحنا 38:19-42)

④۲ هونھ او جُمعا رو ڏي هتو، ان هونز ٿي گهي تي. چنچر پوير ڏي هتو، جيا

مانھ ڌرم پرمونته ڪئين ڪوم نٿو ڪروو. تياھ پوير ڏي رئي رات پڙيا مور

④۳ يوسف ارمتيه شهر واڙو آيو، جيو ڌرمي پنچائيت رو مونواڙو ميمپر هتو، ان

پڳوون را راز را اوتا ٿوئا رئي وات زوتوت ريو زئيون پڳوون ساونھ نمونته ٻڌون

مانھ راز ڪرشي. او هيئت ڪرين پيلاطس ڪن گيو، ان ايسو رو لاش مونگيو.

④۴ پيلاطس حيرون هتو جي ايسو اتي جلدِي م مري گيوھ، تو اوتھ ڦوجيون را

ساپ ننه تيڙاوين اوتا ٿي پونسيو جي ”ايسو رنه مريا ننه ڪتئي وار ٿي گهيھ؟“

④۵ تئيون پيلاطس ڦوجيون را ساپ ٿي ڪپر پاڙين، يوسف ننه لاش لي زيا رئي

موڪل ڏيڏئي. ④۶ پسنه يوسف هوڙ هارو مونگهو سوتي لوگهڙو ويساتو ليڏو،

ان ايسو رو لاش هوڙي ٿي نيسو اوتارين لوگهڙا موئين وينتوڙيو، ان پونئيرا جيوا

مقوم موئين ميلو هتو، جيو ڏونگر موئين ڪوڏل هتو. ان پسنه هيڪ شپير ريتوڙين

مقوم را مونڊا آڏي ڏيڏئي پڙئي.

(47) هونءَ مريم مگدلينی ان یوسیس رئي مان مريم زوتيت ري، جي ايسو رو لاش کيئنه ميليوه.

ايسو جيوي اُونئُه، ڏيکارا ڏئُه ان آڪاش مانھ سڙي زائُه

ايسو موت ٿي جيوي اُونئُه

(متي 8-1:28، مرقس 8-1:16، لوقا 12-1:24، يوحنا 10-1:20)

16 ① پوٽر ڏي وي گيو ان آچار رئي رات پڙئي. تئين رات ري مريم مگدلينی، يعقوب ري مان مريم ان سلومي کُشبو واري شينهنون ويساتي ليڏي زم مقوم مانھ زائين ايسو را لاش مانھ هئنه. ② ان آچار رنه ڏي ويلي ويلي، ڏي اُوگيا رنه توننه، اُو مقوم هومي رووني ٿي. ③ زاتون زاتون اُو آبت ۾ ڪيتيت ري جي ”آپون هارو ڪوڻ مقوم را مونڊا ٿي شيپر ريڙوشي؟“ ④ پڻ زئين مقوم مانھ آوين هومو زيو، تو ڏيڪيو جي آڏي ڏيڏل شيپر هيڪنه پاهنه ريڙول پڙئيھ. هونءَ اُو شيپر گهڻي موتي هئي. ⑤ تئين اُوئي پونئيرا جيوا مقوم موئين پيهين ڏوڙو گهنگهو پيرل هيڪا جوڻ ننه زمئنه پاهنه پينل پاڙيو، تو اُو حيروني پڙي گي. ⑥ پڻ اونه ڏوشيون ننه ڪيڏو: ”تمي حيرون مت ٿيو! تمي ايسو ناصرت شهر واڙا ننه گوتوه ري نا، جيا ننه هوزي مانھ ساڙين ماريوت پرو. پگهون اونا ننه جيوي اوناڙيوھ. اُو هونءَ ايئنه نئي. اي ماڳ زونو، جيئنه اونا رو لاش ميلل هتو. ⑦ پڻ تمي زائين اونا رون شيلون ننه ان ڪاس ڪرين پطرس ننه ام ڪيا پرو، جي اُو تمون مور گليل صوپا ۾ زاشي. اوتنه تمي اونا ننه ڏيڪشو، زم اونه تمون ننه مور ٿي ڪيڏو تو.“

⑧ تو پسنه ډوشي مقوم ٿي نيمهرين اوئون پاڳي، ڪم تو او پيڪ ۾ ڏڪتيت ري ان گهڻي حيرون هتي. ان اوئي هايا را پارام ڪيا ننه ڪئين وات نه ڪري، ڪم تو او پڻايت ري.

ايسو مريم مگداليني ننه ڏيکارو ڏهه

(متي 9:28-10، مرقس 9:16-11، يوحنا 11:20-18)

⑨ (ايسو آچار رنه ڏي ويلو موت ٿي جيوي اوئين ٻڌون مور مريم مگداليني ننه ڏيکارو ڏيڏو، جيا ٿي اوئه هات پوت ڪاڏيا تا. ⑩ تو اوئه زائين اوئون منڪون ننه ڪبر ڪري، جيا ايسو پيڙا وينا. او ايسو را موت ري ڪري پار لين روتات ريا. ⑪ پڻ زئون اوئي مريم رئي اي وات هومپڙي جي ”ايسو جيوتو سئ، ان اوئه مون ننه ڏيکارو ڏيڏوه،“ تو اوئي اوئا رئي وات نه مونئي.

ايسو پيئون شيلون ننه مارڳ ۾ ڏيکارو ڏهه

(مرقس 12:16-13، لوقا 13:24-35)

⑫ تيا ڪيڙ ايسو اوئون موئين ٿي پيئون زئون ننه پڌل روپ ۾ ڏيکارو ڏيڏو، زئون او پنڌ ڪرتون ٻاراڙي زاتات ريا. ⑬ تو اوئي پاسا آوين پيئون ننه همپڙايو. توئي پڻ اوئي اوئون رئي وات نه مونئي.

ايسو آپرون سونيل شيلون ننه ڏيکارو ڏهه

(مرقس 14:16، لوقا 36:24-43، يوحنا 19:20-23)

⑭ تيا ڪيڙ ايسو آپرون اڳيارون سونيل شيلون ننه ڏيکارو ڏيڏو، زئون او روتئي ڪاتات ريا، ان اوئون ننه وڙگوڻو جي او يقين ڪم نٿا ڪرتا ان ڪم ناهڏا ٿيا تا. ڪم تو منڪي ايسو ننه جيوي اول ڏيڪيو تو، توئي پڻ اوئون منڪون رئي وات اوئي نٿي مونئي.

ايسو آپرون شيلون ننه هيڪ کاس ڪوم پڙاوه

(متي 20:16-20، مرقس 15:16-18)

⑮ ان ايسو آپرون شيلون ننه ڪيڏو: ”تمي پوري دنيا ۾ زائين ٻڌون منڪون ننه پڳوون رهي ڏيڏل ڪشي رهي ڪهر همپڙاوا! ⑯ جيو مون مانه وشواس اوڻه ان پويتر سنون لئه، اوتا ننه تارڻ زڙشي. پڻ جيو وشواس نئين راکهه، پڳوون اوتا رو ڦينصلو ڪرين هميش رهي سزا ڏيشي.“

⑰ جيا وشواس راکهه، اوتون وسا ايوا نيشون ٿيشي. او مارا نوم ٿي پوتون ننه ڪاڏشي، پڳوون ري ڏيڏل ڪڙا ٿي نوي نوي ٻولي ٻولشي، ⑱ هاڻون ننه زهاليا ٿي ڪا جهير پيدا ٿي اوتون ننه ڪئين نقصون نئين ٿنه، ان او مونڏون مانه هات ميلين اوتون ننه هازا هورا ڪرشي.“

ايسو آڪاش ۾ اوڀڙائي زائ

(مرقس 19:16-20، لوقا 24:50-53، مک شيلون را ڪوم 9:1-11)

⑲ تيام، زئون پرپو ايسو آپرون شيلون ٿي هائي ٻڌي واتون ڪري پري، تيا ڪيڙ او پڳوون ري ڪڙا ٿي آڪاش مانه اوڀڙائي گيو، ان پڳوون رنه زمڻه پاهنه مون ۾ زائين پينو.

⑳ تيا ڪيڙ اوتي اوتون زائين ٻڌيل منڪون ننه ايسو را پارام ڪشي رهي ڪهر همپڙاوي، ان پرپو ايسو اوتون پيڙو ٿين اوتون ننه هائي ڪوم ڪريا رهي هيمنت ڏيتو ريو، ان اوتون ري هائي پرسا ڏيڪارڻن ٿايتي ڏيتو ريو جي اوتون رو همپڙاول پڳوون رو وچن هاسو سته.)

لوقا را لکل شاستر رڙي هزموڻي

شاستر لکيا واڙو

شاستر را ايتا ڪتاب موئين لکيا واڙا رو نوم نٿي لکل. پڻ وات ساوڻي سڌ جي اي ڪتاب ان ”مک شيلون را ڪوم“ نومي ڪتاب هيڪاڻي منک را لکل سڌ، ڪم تو بهي ٿي ڪتاب ٿيوفلس ٺاڙو لکل سڌ، ان ”مک شيلون را ڪوم“ نومي پيزا ڪتاب ۾ ايتا ڪتاب را پارام پڻ لکل سڌ (لوقا 1:1، مک شيلون را ڪوم 1:1).

منک شروع ٿي لين ام هزمڻه جي اي ڪتاب لوقا رو لکل سڌ. لوقا يهودي قوم رو نتو پڻ ڌاري قوم رو هتو، ان حڪيم هتو (ڪلسيون 11:14، 14). زئيون پولوس ايسو را پارام هميڙايا ٺاڙو پيزا چڪر مانه هتو، تسيون لوقا اوڻا پيزو مڪڏنيه ضويا موئين گيو (مک شيلون را ڪوم 12-10:16)، ان تيا ڪيڙ لوقا گهڻي وار پولوس پيزو ڪوم ڪرتو (فليمون 24:1). زئيون پولوس نه موت رڙي سزا زڙيا واڙي هئي، تسيون لوقا اوڻا ڪن جيل ۾ زاتو ريتو (2 تيمٿيس 11:4). لوقا اي ڪتاب اندازم 59-63ع ۾ لکيو، ڪا ٿي هيڪڻه 70-90ع ۾ لکيو هوڻ.

شاستر ڪيا منک ٺاڙو لکيو

لوقا شاستر رو اي ڪتاب ان ”مک شيلون را ڪوم“ نومي ڪتاب پڻ ٿيوفلس ٺاڙو لکيا، زم او آپ پڻ، ان زويام منڪون ڪن ايتون ڪتابون را نقل ڪراوين وراوي ڏڻ. ”ٿيوفلس“ نوم ٿي ڪهر پڙهه جي ٿيوفلس يهودي قوم رو نتو، پڻ ڌاري قوم رو هتو. وات ساوڻي سڌ جي او موتو منک هتو، ان زويام رومي حڪومت رو منک هتو، ڪم تو لوقا اوڻا نه ”مونواڙو“ ڪيڏو (لوقا 1:1). يوناني ٻولي ۾ اوڻا را نوم رو مطلب ”ڀڳوون ٿي پريم راکيا واڙو“ سڌ، ان او ايسو را پارام زوڻا ڪرتو تو.

شاستر لکيا رو مطلب

لوقا شاستر رو اي ڪتاب ايتا ٺاڙو لکيو زم ٿيوفلس نه، ان ٻڌيون قومون رون منڪون نه، ايسو را پارام صحيح ڪهر پڙه.

ايتا ڪتاب موئين لوقا هزماوڻه جي ايسو نه روڳو اسرائيلي قوم نه پڻ ٻڌيون قومون رون منڪون نه تارن ڏيڏا واڙو سڌ. تيام زئيون لوقا پيڊي رڙي وات ڪرڻه، تسيون او ايسو ٿي لين پيرهيان منک آدم هوڏي پيڊي را نوم لکڻه (لوقا 23:3-38).

لوقا ري لکل ان متي ري لکل ايسو ري پيڊي ۾ ڪئينڪ قرق سڌ (لوقا 23:3-38).

مِتي 16:1-11). يُوناني بولي م ويڻ "ڏيڪرو" پوترا هارُو پڻ واپرائهه، ان تيام پيڊيون م ويڻ "ڏيڪرا" رو ترجمو "وستار" ڪرل سڏ. وستار رو مطلب ڪيٽڪ ڏيڪرو سڏ ان ڪيٽڪ پوترو سڏ. هايا ري ڪري بيٺون پيڊيون رون نومون م ڪئنيڪ قرق سڏ. ام پڻ ٿي هڪڻه جي عيلي يوسف رو هڳو باپ نتو، پڻ اوڻ يوسف نڌ آڀرڻ ڪوڙڻ ليدو تو، ان اي پيڊي يوسف را درم باپ عيلي رِئِي سڏ. ان پيڙي وات اي پڻ ٿي هڪڻه، جي لُوقا رِئِي لڪل ايسو رِئِي پيڊي ايسو ري مان ماريون رِئِي پيڊي سڏ، ڪم تو ايسو ماريون رو ڏيڪرو هتو، پڻ يوسف رو ڏيڪرو نتو (لُوقا 30:1-35). جي هر سڏ، تو لُوقا 23:3 رو ترجمو ام پڻ ٿي هڪڻه: "منڪون ري هزم پرموئڻ ايسو يوسف رو ڏيڪرو هتو، پڻ هاس م او روڳو ماريون رو ڏيڪرو هوتون آڀرا نوڻا عيلي رو وستار هتو."

اينڌا ڪتاب موئين لڪل سڏ جي ڀڳوون ايسو نڌ پويتر آتما ڏيدو زم او ڳريون نڌ ڪشي رِئِي ڪبر ڏڻ (لُوقا 4:18)، ان گهڻي وار وات ساوئي ڏيڪارل سڏ جي ايسو ڳريون، مسڪينون ان ضرورت واڙون مانھ ڏيا ڪري. اينڌا ڪتاب موئين ڪشي را پارام پڻ گهڻي واتون لڪل سڏ، ڪاس ڪرين شروع م ايسو را زلم مانھ ڪشي ٿئي، ان پڇاڙي م ايسو را آڪاش مانھ سڙيا مانھ پڻ منڪ گهڻا ڪش ٿيا. اينڌا پورا ڪتاب م پويتر آتما مانھ، پرائڻا مانھ، ڏوشبون رڻ ايسو مانھ وشواس راڪيا مانھ، ان ڀڳوون ري ڏيڏل ماڻي مانھ گهڻو ڏيون ڏيڏل سڏ.

گهڻي ابوي واتون سڏ جي روڳي اينڌا لُوقا را ڪتاب موئين لڪل سڏ، ڪاس ڪرين ايسو را زلم ان باڙين، ان شيڪارل مثالون را پارام. مثال، آڪاشي ڏوت رڻ ڌراڙون نڌ ايسو را زلم را پارام هميڙايا رِئِي وات، ايسو رڻ ٻارون سالون ري عمر ڪيڙ ڀڳوون را گهر موئين زابا رِئِي وات، سامري رو مثال، ان ڳمال ڏيڪرا رو مثال.

لُوقا اينڌا ڪتاب م پريو ايسو رِئِي اي ڪيڏل وات پڻ لکئي جي ڀڳوون رو گهر ڪتم ٿيشي (لُوقا 5:21-33). هائي ڪيڏل وات 70ع م پورتي ٿئي، زيمون رومي قوج يروشلم شهر م آوين ڀڳوون رو گهر ڪتم ڪريو پرو. هايا ٿي ڀڳوون يهودي درم رو مال ساڙيا رو نمونو ڪتم ڪريو پرو، ان يهودي درم رون اوئون منڪون نڌ سزا ڏيڏي، جيا ايسو نڌ ڀڳوون رو سونڊل پڇايا واڙو ڪريست نتا مونتا. هيون نمونن ڀڳوون آب ٿايتي ڏيڏي جي ايسو هاس م ڀڳوون رو سونڊل پڇايا واڙو ڪريست سڏ، جيئن ٻڌون منڪون رون ڏوهون ري ماڻي هارُو آڀرو جيو ڀڳوون را نوم مانھ ڏيڏوه.

ايسو رڻ آڪاش م زابا ڪيڙ وشواسي درم پڪڙوا مڏيو، ان هائي وات لُوقا را لڪل "مڪ شيلون را ڪوم" نومي پڙا ڪتاب موئين لڪل سڏ.

ايڻا ڪتاب موئين اي حصا سئ:

لُوقا رو اي ڪتاب لکيا رو مطلب	4-1:1
يُوحنا ان ايسو رو زلم ان ٻارڻ	52:2-5:1
يُوحنا پوِتر سنون ڏيڏا واڙو پريو ايسو را آيا هارو منڪون نڌ تيار ڪرڻه	20-1:3
ايسو پوِتر سنون لڻهه ان شيطون اُٿا نڌ پڳوون ري مرضي تي ڦيروا ڪرڻه	13:4-21:3
ايسو گليل صُويا موئين پڳوون رو ڪوم ڪرڻه	50:9-14:4
ايسو گليل صُويا تي يروشلم شهر هومو زائنه	27:19-51:9
يروشلَم شهر م ايسو رو اڪري هڻتو	56:23-28:19
ايسو جيوي اُوتنه، ڏيکارا ڏٺه، ان آڪاش مانه سڙي زائنه	53-1:24

ايڻا ڪتاب را شاستر تي پيرا حوالا:

لُوقا 17:1 ملاڪي 6-5:4	لُوقا 26:4 1 سلاطين 16-8:17
لُوقا 73-75:1 پيدائش 18-16:22	لُوقا 27:4 2 سلاطين 14-1:5
لُوقا 23:2 خُروج 12, 2:13	لُوقا 14:5 احبار 32-1:14
لُوقا 24:2 احبار 8:12	لُوقا 24:5 دانِي ايل 14-13:7
لُوقا 4:3-6 يسعياه 5-3:40	لُوقا 2:6 خُروج 10-8:20
لُوقا 19:3 احبار 16:18	لُوقا 4-3:6 1 سموئيل 6-1:21
لُوقا 31:3 1 تواريخ 5-4:3	لُوقا 22:7 يسعياه 6-5:35
لُوقا 32-33:3 رُوت 22-18:4	لُوقا 22:7 يسعياه 1:61
لُوقا 33:3 پيدائش 12:46	لُوقا 27:7 ملاڪي 1:3
لُوقا 34:3 پيدائش 35:29	لُوقا 10:8 يسعياه 9:6
لُوقا 34:3 پيدائش 26:25	لُوقا 43:8 احبار 25:15
لُوقا 34:3 پيدائش 3:21	لُوقا 8:9 ملاڪي 5:4
لُوقا 34-36:3 پيدائش 26-10:11	لُوقا 19:9 ملاڪي 5:4
لُوقا 36-38:3 پيدائش 32-3:5	لُوقا 27:10 اِسْتِشْنا 5:6
لُوقا 4:4 اِسْتِشْنا 3:8	لُوقا 27:10 احبار 18:19
لُوقا 8:4 اِسْتِشْنا 13:6	لُوقا 31:10 احبار 3-1:21
لُوقا 11-10:4 زبور 12-11:91	لُوقا 32:10 گِنْتِي 11:19
لُوقا 12:4 اِسْتِشْنا 16:6	لُوقا 30-29:11 يُوناه 17:1
لُوقا 18-19:4 يسعياه 2-1:61	لُوقا 30-29:11 يُوناه 4-3:3
لُوقا 25:4 1 سلاطين 1:17	لُوقا 30-29:11 مَتِي 40-39:12

لُوقَا 20:22 خُرُوج 8-6:24	لُوقَا 31:11 1 سَلَاطِينَ 1:10
لُوقَا 20:22 يَرْمِيَاه 34-31:31	لُوقَا 31:11 2 تَوَارِيخ 1:9
لُوقَا 22-21:22 زَبُور 9:41	لُوقَا 32:11 يُونَاه 5:3
لُوقَا 37:22 يَسَعِيَاه 12:53	لُوقَا 51:11 يَبْدَاش 8:4
لُوقَا 69:22 دَانِي اِيل 14-13:7	لُوقَا 51:11 2 تَوَارِيخ 22-20:24
لُوقَا 30:23 هَوَسِيَع 8:10	لُوقَا 35:13 زَبُور 26:118
لُوقَا 33:23 زَبُور 16:22	لُوقَا 14:17 اَحْبَار 32-1:14
لُوقَا 34:23 زَبُور 18:22	لُوقَا 27-26:17 يَبْدَاش 23-6:7
لُوقَا 35:23 زَبُور 17:22	لُوقَا 29-28:17 يَبْدَاش 28-1:19
لُوقَا 36:23 زَبُور 7:22	لُوقَا 20:18 خُرُوج 16-12:20
لُوقَا 36:23 زَبُور 21:69	لُوقَا 20:18 اِسْتِشْنَا 20-16:5
لُوقَا 27:24, 44 اِسْتِشْنَا 15:18	لُوقَا 38:19 زَبُور 26:118
لُوقَا 27:24, 44 مِيكَاه 2:5	لُوقَا 46:19 يَسَعِيَاه 7:56
لُوقَا 27:24, 44 يَسَعِيَاه 12-1:53	لُوقَا 46:19 يَرْمِيَاه 11:7
لُوقَا 27:24, 44 زَبُور 18-1:22	لُوقَا 17:20 زَبُور 22:118
لُوقَا 27:24, 44 زَبُور 11-10:16	لُوقَا 28:20 اِسْتِشْنَا 6-5:25
لُوقَا 27:24, 44 دَانِي اِيل 14-13:7	لُوقَا 37:20 خُرُوج 6:3
لُوقَا 47:24 يَسَعِيَاه 6:49	لُوقَا 43-42:20 زَبُور 1:110
لُوقَا 47:24 زَبُور 31-25:22	لُوقَا 27:21 دَانِي اِيل 14-13:7

لُوقا

رو لکل پريو ايسو را پارام پويتر شاستر



① مونوازا ٿيوفلس،

1

اي ڪتاب ايسو رن ڪرل ڪومون ان شيڪاڙل واتون را پارام سٺم، جي
آپون وسا ٿي گهي. ② اي واتون آپون نٺه اُوئي منڪي پُوگاڙي، جيئي شُروع ٿي
لين ٻڌوئي ڪئين آپري اونڪيئي ڏيکيو تو، ان پسٺه پڳوون رو وچن شيڪاڙيا واڙا
ٿي گيا. گهڻي منڪي اي هاڳي واتون ڪوشش ڪرين ڏيون ٿي لکيه. ③ تيام
مٿين پڻ ٺيڪ هزميو جي هون تمون هارو اي واتون همي ڪرين لڪون، ڪم تو
مٿين شُروع ٿي لين ايئون ٻڌيون واتون رڻي پوريي ڪهر نائوڪٺه نمونٺه پاڙييه.
④ هون تيام لڪونه ريو زم تمون نٺه پڪي ڪاتريي ٿنه جي زتي واتون منڪي
تمون نٺه شيڪاڙيه، او ٻڌي هاسي سٺه.

يُوحنا ان ايسئو رو زلم ان بازاپن

يُوحنا را زلم را پارام آكاشي دُوت مور ٿي همپڙاوڻه

⑤ يهوديه ملك را هيروديس پادشا را راز موئين، هيك منك هتو جيا رو نوم زكرياه هتو. اُو پڳوون را گهر موئين پُوزا رو كوم ڪرتو، ان هارون پُوزاري ري پيڊي ٿي ابياه پُوزاري ري توڙي رو هتو. اُوئا رئي گهر واڙي پڻ هارون پُوزاري ري پيڊي ٿي هتي، ان اُوئا رو نوم اليشبع هتو. ⑥ اُو هي ئي پڳوون ري نظر موئين پڳوون ري وات مانھ وُڍا واڙا هتا، ان ناٿوڪا نمونا ٿي ايشور را ٻڌائي حڪم مونتا ان اُوئا را ڪيڏا مانھ وِيتا. ⑦ پڻ اُوئون رڻه ڪوئي اولاد نٿو، ڪم تو اليشبع وونڙئي هتي. ان هي ئي گهرڊا ٿي گيا تا.



⑧ هيك وار زكرياه آپري پُوزاريون ري توڙي را وارا پرموڻه پڳوون را گهر موئين پُوزا رو كوم ڪرتوت ريو. ⑨ پُوزاريون رئي ريت هتي جي اُو پرچي ڪاڍتا، جي ڪوڻ ايشور ري پويتر جڳا موئين زائين پڳوون را نوم مانھ لوڀون رو دُونپ ساڙشي. ايئه وارڻه زكرياه را نوم رئي پرچي نيهري. ⑩ لوڀون بازيا رڻه توڻه اسرائيلي قوم را ٻڌائي منڪ پويتر جڳا ٿي ٻارا پراٿنا ڪرتا ريا.

⑪ تنيون ايشور رڻه هيكه آكاشي دُوت لوڀون بازيا ري جڳا رڻه زمڻه ٻاهڻه اُوپين زكرياه نڻه ڏيکارو ڏيڏو. ⑫ اُوئا نڻه ڏيڪين زكرياه سڙڪ ڪاڌي ان گهڻو پيوڻو. ⑬ پڻ آكاشي دُوت اُوئا نڻه ڪيڏو: ”زكرياه، ٻيٽا مت! ڪم

تو ڀڳوون ٿارئي وينتي هومپڙيه، ان ٿاري گهر واري ايشبع ٿي ٿارڻه ڏيڪرو ٿيشي. ان تون اونا رو نوم يوحنا راڪي. (14) تون ننه ڪشي ان هڪ زڙشي، ان گهڻا منڪ اونا را زلم ٿي ڪش ٿيشي (15) ڪم تو او ايشور ري نظر موئين موٽو منڪ هوشي. او نڪو ڌراڪون رو رس نڪو ڌارو پيشي، ان زلم ٿي لين پويتر آتما رئي ڪڙا اونا موئين هوشي، ان او پورڻه نمونڻه پويتر آتما ري مرضي مانه ويشي. (16) او اسرائيلي قوم رون گهڻون منڪون ننه ايشور هوما وڙشي جيو اوئون رو ڀڳوون سڻه. (17) ان ايلياه را زم پوري طاقت ان جيو ٿي پريو را آيا مور اي تيارئي ڪرشي، جي ٻاپون ننه آپرون ٻاڙون ٿي مناوين راڪشي، ان جيا ڀڳوون ربي وات نٿي مونت، اوئون ننه هزماوين ڀڳوون ربي وات مونيا واڙا ناوشي، ان پريو ربي سونيل قوم اونا هارو تيار ڪرشي.

(18) تنيون زڪرياه آڪاشي ڏوت ننه ڪيڏو: ”مون ننه ايٿا وات ربي ڪم ڪرين پڪ ٿيشي؟ ڪم تو هون آپ ڏوڪرو سون ان ماري گهر واري پڻ ڏوڪري سڻه.“

(19) تنيون آڪاشي ڏوت اونا ننه ڪيڏو: ”هون جبرائيل نومي موٽو آڪاشي ڏوت سون، ان هون ڀڳوون ڪن اوپو هوئون. اونه مون ننه ايٿا هارو ميليوه جي هون تون ٿي واتون ڪرون ان تون ننه اي ڪشي ربي وات همپڙاوون. (20) پڻ ماري واتون جي آپرا پورا ٿوئا مانه هاسي ٿيشي، تئين اوئون مانه يقين نه ڪريو. تيام تون ڳونگو ٿي زائيه. زنيون هوڏي اي واتون پوري نئين ٿنه، تنيون هوڏي تون ٻولي نئين هيڪڻه.“

(21) هون ٻارا اوپل منڪ حيرون ٿين زڪرياه ربي وات زوتات ريا جي پويتر جڳا موئين اتني وار ڪم لڳاڙيه. (22) زنيون او ٻارو آيو تنيون منڪون ٿي ٻولي نه هيڪيو. تيا ري ڪري منڪون ننه ڪهر پڙئي جي اونا ننه پويتر جڳا موئين آڪاشي ڏوت ڏيڪارو ڏيڏوه. زڪرياه اوئون ننه هزمايا هارو اشارا ڪرتوت ريو پڻ ٻولي نتو هيڪتو.

②③ پسنه زئيون اوتا را پوزا ڪريا را ڏي پورا ٿيا، تئين او آڀري گهري پاسو
گيو پرو.

②④ توڙون گهڻون ڏيئون ڪيڙ زڪرياه رئي گهر واڙئي اليشبع پاري پڳ ٿي
گئي. ان او پونس مئينا گهر ٿي ٻارئي نه نيهريئي. او ام سوچتي ٿي جي
②⑤ ”ايئون ڏيئون موئين ايشور مون مانه ڏيا ڪرين مون ڏوڪري نه اولاد
ڏيتوه. ان هيون نموننه منڪون رن ميئون ٿي مارئي زند سڏاويھ.“

ايسو را زلم را پارام آڪاشي ڏوت مور ٿي همپزاوئھ

②⑥ زئيون اليشبع رنه پاري پڳ ٿيا ننه سمو مئينو ويتوت ريو، تئين پڳون
آپرا آڪاشي ڏوت جبرائيل ننه گليل صوپا را ناصرت شهر موئين ②⑦ هيڪي
ڪونثاري سوڪري ڪن ميلو. اوتا سوڪري رو هڳڻ هيڪا يوسف نومي منڪ
ٿي ٿيل هتو، جيو دائود يادشا ري پيڊي ٿي هتو. ان اوتا سوڪري رو نوم
ماريون هتو.

②⑧ پسنه آڪاشي ڏوت اوتا سوڪري ننه گهري آوين ڪيتو: ”نمسڪار تون
ننه، جيا مانه ڪرپا ٿيھ. ايشور تون پيڙو سھ.“

②⑨ اي واتون هومپزين ماريون گهڻي ۾ پڙي گئي ان ويچار ڪرو لاگئي جي
”ايئا رو ڪي مطلب سھ؟“

③① تئين آڪاشي ڏوت اوتا ننه ڪيتو: ”ماريون، پيئا مت! ڪم تو پڳون
تون مانه ڪرپا ڪريھ. ③① زو، تون پاري پڳ ٿيھ، ان تون ڏيڪرو زلميھ. ان
تون اوتا رو نوم ايسو راڪي. ③② او موٽو منڪ هوشي ان پرميشور رو ڏيڪرو
ڪيوراشي. ان پريو پرميشور اوتا ننه اوتا را ڏاڏا دائود رو راز ڏيشي، ③③ ان
او هميش يعقوب ري پيڊي مانه راز ڪرشي، ان اوتا رو راز ڪيڏي پڻ ڪتم
نئين ٿھ.“

③④ تيا مانه ماريون آڪاشي ڏوت ننه ڪيتو: ”هائي ڪم ڪرين ٿيشي؟ هون

تو ڪُونٿاري سون.

③۵ تئين آڪاشي ڏوت اوتا ننه وڙندڙي ڏيڏي: ”پوٽر آتما تون مانھ اوترشي، ان پرميشور رئي ڪڙا تون مانھ سونئو ڪرشي. تيام جيو ٻار تون زلميه او پوٽر ان پگھون رو ڏيڪرو ڪيورا شي. ③۶ هونھ ٿاري عزيزوئي اليشبع ننه زو. او تو ڏوڪرئي سته پڻ اوتا رنه ڏيڪرو ٿيا واڙو سته. منڪ اوتا ننه وونزئي ڪيتا، پڻ هونھ اوتا رنه پاري پگ ٿيا ننه سمو مئينو وئھ ريو. ③۷ ڪم تو ڪوئي ايوي وات نئي، جي پگھون ڪري نئي هيڪتو.“

③۸ پسٽه ماريون ڪيڏو: ”هون ايشور رئي هونئي سون. زم تمي ڪيڏوھ، تم مون تي پلنه ٿئھ.“

تئين آڪاشي ڏوت اوتا ڪن تي گيو پرو.

ماريون آپري عزيزوئي اليشبع ننه مڙوا زائھ

③۹ ڪئينڪ ڏيئون ڪيڙ ماريون سنپرين يهوديه ملڪ را ڏونگرازا علاقا را هیکا شهر موئين جلدِي م گهي. ④۰ ان زڪرياه ري گهري زائين اونه اليشبع ننه



نمسڪار ڪريو. (41) زئيون اليشبع ماريون رو نمسڪار هومپريو، تئيون اليشبع رو ٻار پيٽ موئين ڪوڏيو، ان اليشبع پويتر آتما ري ڪڙا ٿي (42) اوتومئو ڪيڏو: ”پگئون تون ننه ٻڌيون اشيٽريون ٿي گهڻو آشيرواڏ ڏيڏوه، ان اوتا ٻار ننه پڻ آشيرواڏ ڏيڏوه، جيا ننه تون زلميه. (43) مون مانھ ايوي ڏيا ڪم ڪرين ٿيھ، جي مارا پرپو رئي مان مون ڪن وين آويھ! (44) ڪم تو زو، زئيون مئين تارو نمسڪار هومپريو، تئيون ٻار مارا پيٽ موئين ڪشي ٿي ڪوڏيو. (45) ان پاگواڙي تون سٺه جيئھ ايشور مانھ يقين راکيوھ، ڪم تو جي واتون تون ننه ايشور را طرف ٿي ڪيڏل سٺ، او پوري ٿيھي.“

ماريون پگئون رو پزن گاوه

(46) پسٺه ماريون ڪيڏو:

”مارو من ايشور را وڪوڻ ڪرھ

(47) ان مارو جيو ايٺا موئين ڪش ٿيوھ

جي پگئون مون ننه پچايا واڙھ

(48) مون آپري هوني ري گريهي رو ڪيال راکيوھ.

آز ٿي لين ٻڌون زمونون را منڪ

مون ننه پاگواڙي ڪيھي،

(49) ڪم تو پگئون جي ٻڌون ٿي ڏاڍو سٺ،

اوتھ مون هارو موتا موتا ڪوم ڪريھ.

اوتا رو نوم پويتر سٺ،

(50) ان اوتا رئي ڏيا جگت را شروع ٿي لين

جگت ري پچاڙي هوڏي اوئون مانھ سٺ

جيا اوتا ري وات ننه پورا من ٿي مونھ.

(51) اوتھ آپري موئي طاقت ڏيڪاڙيھ.

جيا آپرا من موئين آپ ننه موتا هزمتا
اوتون ننه اوتنه پڳڙاياھ پرا.

52) اوتنه موتون پاڌاشائون ننه

اوتون ريون گهاڌيون ٿي نيسا اوتارياھ پرا،
ان گهريون ننه مانھ ڪرياھ پرا.

53) اوتنه پوکون ننه نائوڪيون شينھون ٿي ڍڙاياھ پرا

ان شائوڪارون ننه نالي هاڻي روونا ڪرياھ.

54) اوتنه آپري شيوا ڪريا واڙي

اسرائيلي قوم رڻي مدت ڪريھ.

55) هيون نمونھ اوتنه آپرو وسن راڪيوھ

جيو اوتنه آپتون ٻاپ ڏاڏون ٿي ٻونڌيو تو،

جي او ابراهيم ان اوتا رون اولادون مانھ

ھميش ھوڏي ڏيا ڪرشي.

56) ماريون اليسبع ڪن ترڪ مينا رڻي، ان پسنه آپري گھري پاسي

گهي پري.

يُوحنا رو زلم

57) زئيون اليسبع رنه ٻاڙ زلميا رو توڻو آيو، تنيون اوتنه ڏيڪرو زلميو. 58) اوتا


ري عزيزي ان پاڙا واڙي زئيون ھومپريو جي ايشور اوتا مانھ ڪٽي موٽي ڏيا
ڪريھ، تنيون او پڻ اوتا پيڙا ڪشي ڪروا مڏيا.

59) ٻاڙ رنه زلميا رنه آئمھ ڏي او منڪ ٻاڙ رڻي توھر ڪرايا ھارو آيا. او

ٻاڙ رو نوم ٻاپ را نوم زڪرياھ مانھ راڪو ڪرتا تا، 60) پڻ مان ڪيڏو: ”نا نا،

اوتا رو نوم يوحنا راڪوھ.“ 61) تيا مانھ اوتي اوتا ننه ڪيڏو: ”ايو نوم تماري

بيڊي موئين ڪيا رو ئي نٿي.“ 62) پسنه اوتي ٻاپ ٿي اِشارا ڪرين پونسيو:



”تمارئي ڪيوي مرضي سٺ، ايتا رو نوم ڪي راکووه؟“ (63) تئيون زڪرياه پئي مڳاوين اوتا مانھ لکيو: ”ايتا رو نوم يوحنا سٺ.“ تو ٻڌائي منڪ حيروني پڙي ڳيا.

(64) تئيون جھت موئين زڪرياه رئي چپ ڪلي ڳئي، ان او پڳوون را وڪون ڪرتون ٻولوا مڏيو. (65) جيا منڪ آهه پاهه ريتا او ٻڌائي پڳوون رئي اي ڪڙا ڏيڪين حيروني پڙي ڳيا. منڪ هائي ٻڌي واتون يهوديه ملڪ را پورا ڏونگرون واڙا علاقا موئين ڪروا مڏيا. (66) ان زتي منڪي هائي واتون هومپڙي، او ٻڌائي هايون را پارام من موئين ويچاروا مڏيا ان ڪيتات ريا جي ”اي ٻار ڪيوو نيمرشي؟“ ڪم تو ايشور آب اوتا رئي همپار ڪرتوت ريو.

زڪرياه پڳوون رو نياپو ڏٺھ

(67) پسته يوحنا رٽھ ٻاپ زڪرياه پويتر آتما ري ڪڙا ٿي ايسو را پارام پڳوون رو اي نياپو ڏيڏو:

(68) ”اسرائيلي قوم را پڳوون، ايشور را وڪون ٿه!

ڪم تو اوٽھ آپري سونڊل قوم رو ڪيال راڪين

آپون نٽھ آزاد ڪراياھ پرا.

(69) اوٽھ آپرا شيواڌاري دائود ري پيڊي موئين ٿي

آپون هارو هيڪ موتو پچايا واڙو ميليوه.

(70) هائي وات اوٽھ آپرون پويتر نياپو ڏيڏا واڙون هات

آپون نٽھ گهڻي اڳي ڪي ميلي ٿي،

(71) زم او آپون نٽھ آڻئون ڏشمئون ٿي پچاوٽھ

ان آپون نٽھ ٻڌون وير راڪيا واڙون را قوضا ٿي سڏاوٽھ.

(72) هيوٽھ نمونٽھ اوٽھ آڻئون ڏاڏون ٿي ڪرل


آپرو ڏٺيا ڪريا رو وائڏو پاڙيوه،
 ان آپرو ٻونڌل پويتر وسن پورو ڪريوه.
 ⑦③ هائي وسن اوئو آڻا ڏاڏا ابراهيم ٿي
 هون ڪائين ٻونڌيو تو،
 ⑦④ جي آپون ننه ڏشمئون را قوضا ٿي سڏاوين
 آپري شيوا پيڪ وگر ڪروا ڏيشي،
 ⑦⑤ ان آپون ننه پوري حياتي هوڏي
 آپ هوما پويتر ريو ڏيشي
 ان آپري وات مانھ ويوا ڏيشي."
 تئون زڪرياه آپرا ڏيڪرا يوحنا را پارام پگھون رو اي نياپو پڻ ڏيڏو:
 ⑦⑥ "هوئوئون، مارا ڏيڪرا،
 پرميشور رو نياپو ڏيڏا واڙو ڪيورائيه،
 ڪم توئون پريو ٿي مورم مورم وين
 اوئا هارو مارگ تيار ڪريه.
 ⑦⑦ ان تون آڻي پريو ري سونڊل قوم ننه اي ڪهر ڏيه
 جي پگھون منڪون را ڏوه ماڦ ڪرين
 اوئون ننه پچاوشي،
 ⑦⑧ ڪم تو پگھون آپون مانھ گهڻي ڏيا ڪرھ.
 تيا ري ڪري پريو آڻو ڪيال راڪين
 ڏي اوگيا را زم آپون ڪن آڪاش ٿي آوشي،
 ⑦⑨ ان اوئون ننه سوجهرو ڏيشي
 جيا اندارام موت ري پيڪ موئين پيٺاھ،
 ان آپون ننه هڪي ٿيا را مارگ مانھ
 وودا رو شيرزو ڏيڪارشم،"

⑧ هُوَ اَوْ سوكرو، يوحنا، وڌتو گيو ان الاهي هزموا مڏيو. ان زئيون هُودِي پڳيون اوتا ننه نياپو ڏيڏا هارو اسرائيلي قوم هومو ساوو ٿيا رو نه ڪيڏو، تئين هُودِي اُو رڻ موئين ريو.

ايسنو رو زلم

(متي 18:24-24، لوقا 1:2-7)

① يوحنا را زلم ڪيڙ، رومي حڪومت رڻه پادشا قيصر اوگستس پڙو ڏيورايو 2 جي اُو ملڪ جيا روم ري حڪومت هيٺ سڻه، اوتون را ٻڌائي منڪ آدمشماري ۾ آڀرا آڀرا نوم لڪاونه. ② اي پيرهئين آدمشماري هتي، جتي ڪورنيس را سوريه ملڪ مانھ راز ڪريا را وڪت ۾ ٿئي.




③ تئين ٻڌائي منڪ آڀرا آڀرا ڏاڏا را شهر موئين نوم لڪاوا گيا. ④ ان يوسف پڻ گليل علاقا را ناصرت شهر ٿي يهوديه علاقا را هيك بيت لحم نومي شهر موئين گيو، جيئنہ دائود پادشا پيدا ٿيو تو. اُو اوتا شهر موئين نوم لڪاوا گيو، ڪم تو اُو آپ دائود پادشا ري پيڊي ٿي هتو. ⑤ ان ماريون جيا رو هڳپڻ اوتا ٿي ٿيل هتو، ان جئي پاري پڳ هتي، اُو پڻ پيڙي گئي.

⑥ زئيون او بيت لحم شهر موئين هتا، تو ماريون رنه باز زلميا رو توئو آيو رو. ⑦ ان اوئه آپرو پوئيني رو ډيکرو زلميو. اوئه باز ننه پوتزون م تنگين آهورا موئين هوئاريو، کم تو اوئون هارو اوتاگ موئين ماگ نتو.

آکاشي ډوت ډراژون ننه ايسو را زلم رئي کبر ډئه

⑧ اوئا ئي علاقا موئين کئينک ريديون را ډراژ هتا، جيا شيم موئين ريتا. اورات را آپرا ولر رئي سوکئي ډيتات ريا.



⑨ تو ايشور رنه هيکنه آکاشي ډوت اوئون ننه ډيکارو ډيدو، ان ايشور رو زبکتو سوجهرو اوئون رنه آهته پاهنه چلکيو. تو او گهڻا پيښائي گيا. ⑩ پڻ آکاشي ډوت اوئون ننه کيدو: "پيښائو مت! کم تو هون تمون ننه گهڻي کشي رئي کبر همپزاوونه، جي ٻڌي اسرائيلي قوم هارو هوشي: ⑪ آز دائود را شهر موئين تمون هارو هيک پچايا وازو زلميوه، جو پگيون رو سونيدل پچايا وازو کريست ان پريو پڻ سته. ⑫ ان تمون هارو اي پکئي نيشونئي سته، جي تمي هیکا باز ننه پوتزون م تنگل ان آهورا موئين هوئل ډيکشو."

⑬ تسيون هتمارو اوئا ډوت پيزو آکاشي ډوتون رو هيک موتو توزو ډيکيام آيو. او ٻڌائي پگيون را مون م ام کيتات ريا:

⑭ "آکاش مانه پگيون را وکون ٿنه،

ان ډرتي مانه اوئون منکون ننه هک زڙنه،

جيون ٿي پڳوون کُش سٺه.

⑮ زئيون دُوت اُئون ڪن ٿي پاسا آڪاش مانھ ڳيا پرا، تو ڌراڙ آڀت موئين
 امر ڪيا مڏيا: ”هالو، بيت لحم شهر موئين هالون. اي وات جئي ٿي، ان جيا
 رئي ايشور آڀون نٺه ڪهر ڏيڏيھ اُوتا نٺه هالين زوئون.“ ⑯ پسنه او هٽيڪا
 هٽيڪا ڳيا. ان اوٿه زائين اوئي ماريون ان يوسف نٺه ڏيڪيا ان اوٿا ماڳ اوٿا
 ننڪا ٻار نٺه آهورا موئين هوتل ڏيڪيو.

⑰ اوٿا نٺه ڏيڪين، او وات جئي ٻار را پارام آڪاشي دُوت اُئون نٺه ڪيڏي
 ٿي، ڌراڙي منڪون نٺه همپزاوئي. ⑱ ڌراڙون ري واتون هومپزين ٻڌائي منڪ
 حيرون ٿي ڳيا. ⑲ پڻ ماريون اي ٻڌي واتون من موئين ياد راکين ايئون مانھ
 ويچار ڪرتي رئي.

⑳ پسنه جئين ڪئين ڌراڙي هومپزيو تو، ان آڪاشي دُوت را ڪيڏا پرموئنه
 ڏيڪيو تو، اوٿا مانھ پڳوون را وڪوڻ ان استوتئي ڪرتا او پاسا ڳيا پرا.

ٻار رو نوم ايسو ڏٺھ


㉑ ٻار زلميا رٿه آئنه ڏي، زئيون اوٿا رئي توهر ڪريا رو توٿو آيو، تئين اوٿا
 رو نوم ايسو راڪيو، ڪم تو اي نوم ٻار پيت ٿيا ٿي مور آڪاشي دُوت راڪيو تو.

ايسو نٺه پڳوون را گهر موئين تيڙي زائھ

㉒ تيا ڪيڙ او توٿو آيو، زئيون موسيٰ رون لڪل ايشور رون حڪمون پرموئنه
 يوسف ان ماريون رٿه او ريت ڪروو تو، جيا ري ڪري اشيترئي هوٿاڙا ٿي پويتر
 ٿه. پسنه اوٿه توٿه او ايسو نٺه پڳوون را نوم مانھ ڏيڏا هارو يروشلم شهر
 موئين تيڙي ڳيا، ㉓ ڪم تو ايشور رون حڪمون موئين لڪل سٺه:

”هر هيڪ پوئيني رو ڏيڪرو

ايشور را نوم مانھ ڏيوو ڪپنه.“



24) ان اُو اينا هارو پڻ ڳيا، زم ايشور رون حُڪمون پرموئنه هُونازا ٿي پوِتر ٿيا هارو هيڪ جوڙي هولون رئي ڪا هي پارويون را بهشيا پڳوون را نوم مانه سڙاونه.

25) اوئنه يروشلم شهر موئين هيڪ منڪ ريتو، جيا رو نوم شمعُون هتو. اُو پڳوون ري وات مانه وُودا واڙو ان ڌرمي منڪ هتو. اُو اُوئا ٿوئا رئي وات زوتوت ريو، زئون پڳوون را پاها ٿي اسرائيلي قوم ننه پڇايا واڙو آوشي. ان پوِتر آتما رئي ڪڙا اُوئا موئين هئي. 26) اُوئا ننه پوِتر آتما ٿي اڳي ڪهر زڙي ٿي جي زئون هُوڏي اُو ايشور را سونڊل پڇايا واڙا ڪريست ننه نئين پاڙنه، تئين هُوڏي نئين مره.

27) اوئنه ڏي پوِتر آتما را ڪيڏا ٿي شمعُون پڳوون را گهر موئين آيو. زئون ايسو را مان ٻاپ، موسي را لڪل حُڪم پرموئنه، ايسو ننه پڳوون را نوم مانه ڏيڏا هارو اوئنه تيڙي آيا، 28) اوئنه ئي ٿوئنه شمعُون آپ آوين ٻار ننه تيڙي ليڏو ان پڳوون را وڪوڻ ڪرين ڪيڏو:

29) ”او مارا ڏٿي، هوئنه آپرا وائيڏا پرموئنه

مون تمارا شيواڌاري ننه هڪ ٿي مروا ڏيو،

30) ڪم تو تمارا ميلل پڇايا واڙا ننه

هوئنه هون آپري اونڪيئي ڏيڪونه ريو.

31) اينا ننه تمي ٻڌيون قومون هومو ساوو ڪريوه،

32) زم اي ڌاريون قومون ننه تماري واتون هزميا رو سوجهر وڌه.

ان اينا ري ڪري تماري سونڊل اسرائيلي قوم رو مون ٿنه.

33) تئين ايسو را پارام اي واتون هومپڙين اُوئا را مان ٻاپ گهڻا حيرون ٿيا.

34) پسنه شمعُون اوئون هارو پڳوون ٿي آشيرواڏ مونگيو ان ٻار ري مان ماريون

ننه ڪيڏو:

”کیال را کی،

پښتون ایښا ټول نه سونډیوه
 کم تو ایښا ري کري اسرائیلي قوم را
 گهښا منک پښتي ان گهښا منک سږشي.
 اي ټول پښتون را طرف ټي هيک نیشنون پښ سئ،
 جیا نه منک نیشن مونږه ان کلاډ ټي زاشي.
 (35) ان تون نه پښ من موئين ایوو ډک تیشي
 زوښه تر وټار تارا ډوډکام لاگي گڼي هوښه.
 ایښا ټول ري کري گهښون منکون رن
 منون ري هټال واتون ساوي تیشي.”

(36) هوښه هيک ډوشي هټي جڼي پښتون رو نیاپو ډیډا واږي هټي. اوښا
 رو نوم حنا هټو ان او آشر ري ذات ټي فنوئیل ري ډيکري هټي. او گهڼي
 گهر ډي هټي ان پښا کيږ ډوگا هټات سال آپرا آدمي پيږي ري ټي (37) ان
 پسنه رنډائي گڼي ټي. همښه او چوراسي سالون ري هټي. او هميشه پښتون
 را گهر موئين ريتي، ان ډي رات ورت را کين پراښتون کرين پښتون ري
 شيوا کرتي.

(38) اوښه پښ اوښه توښه ايسو کن آوين پښتون رو ټورو مونيو. ان جیا منک
 ایښا ټول ري وات زوتات ریا، زئون پښتون يروشلم شهر رن منکون نه آزاد
 کراوشي، اوښون ټون نه ايسو را پارام همپزاوټي ري جي اي ټول منکون نه
 سډايا واږو سئ.

ايسو نه ناصرت شهر موئين تيږي اوښه

(39) زئون ايسو را مان ټاپ ايشور رن حکمون موئين کيډل ريتون پوري کري،
 تیا کيږ او گليل علاقا را آپرا ناصرت شهر موئين پاسا آيا را.

٤٠) هَوَئِه اُو سوكرو، ايسُو، وڌتو گيو ان الاهي گهڻو هُرمو ٿيتو گيو. ان پڳوون اُوئا مانھ ڪُريا ڪرتو ريو.

ايسُو ٻارون سالون ري عمر ڪيڙ پڳوون را گهر موئين زائھ

٤١) ايسُو را مان ٻاپ سال ٿو سال پاشڪا نومي پرپ مانھ يروشلم شهر موئين زاتا. ٤٢) زئيون ايسُو رو ٻارمو سال پورو ٿيو، تئين اُو ٻڌائي پرپ ري ريت پرموئھ اُوئھ گيا. ٤٣) زئيون پرپ ڪتم ٿي گئي، تو اُو آپرا گهر هوما پاسا وڙيا، پڻ اُو سوكرو ايسُو يروشلم شهر موئين ري گيو، ان اُوئا را مان ٻاپ نھ ڪئين ڪهر نٿي. ٤٤) اُوئي ام سوچيو جي ”ايسُو ايئا لڏا موئين هوشي.“ تيام هيك اڏي رو پنڌ ڪرين اُو هونز را عزيزون ان اوڙڪيندون موئين اُوئا نھ گوتوا مڌيا. ٤٥) زئيون اُو نه زڙيو، تئين ايسُو نھ گوتتا گوتتا وڙي پاسا يروشلم موئين آيا.

٤٦) ترٿمھ ڏي ايسُو اُوئون نھ پڳوون را گهر موئين زڙيو. اُو شاستر زوٿيا وازون ڪن پيئو تو، ان اُوئون ري واتون هومپڙوت ريو ان اُوئون ٿي سونال پُونستوت ريو. ٤٧) ان زتي منڪي اُوئا ري واتون هومپڙي، اُو ٻڌائي اُوئا ري عقل ان جواپون مانھ حيرون هتا. ٤٨) زئيون مان ٻاپ اُوئا نھ ڏيڪيو، تئين حيروني پڙي گيا. ان ايسُو ري مان اُوئا نھ ڪيڏو: ”ڏيڪرا، تئين امون ٿي اي ڪي ڪريوه؟ ٿون نھ گوتي گوتين، مُون نھ ان ٿارا ٻاپ نھ ٿارو گهڻو ڏڪ ٿيوھ.“

٤٩) پڻ ايسُو اُوئون نھ ڪيڏو: ”تمي مُون نھ ڪم گوتتات ريا؟ تمون نھ ڪهر نٿي ڪي، جي مارئھ آپرا ٻاپ را گهر موئين هوو ڪپئھ؟“ ٥٠) پڻ اُوئي ايئا رئي وات نه هُرمي.

٥١) پستھ ايسُو اُوئون پيڙو ٿين ناصرت شهر موئين آيو. ان اُوئھ آوين اُو آپرا مان ٻاپ را ڪيڏام ريو. اُوئا ري مان اي ٻڌي واتون آپرا من موئين ياڌ راڪي. ٥٢) ايسُو موٽو ٿيو ان هُرم موئين وڌيو، ان پڳوون ان منڪ اُوئا مانھ

راضي هتا.

يُوحنا پَوَيْتِر سَنُونِ ڏِيڏا وَاڙو پَرِيُو ايسُو را آيا هَارُو مِنكون نَن تيار كَرُئِه

يُوحنا پَوَيْتِر سَنُونِ ڏِيڏا وَاڙو
مِنكون نَن شِيڪاڙوا شَرُوع كَرُئِه

(متي 12: 1-3، مرقس 1: 1-8، لوقا 3: 1-18، يُوحنا 1: 19-28)

3 ① رُومي حُڪومت را پاڌشا تَبْرِيس قيصَر ري پاڌشائي را پَنرما سال ۾،
زَئِيون يَهُودِيه صُويا مانِه پِنطُس پِيلَاطُس راز كرتوت ريو، گليل صُويا
مانِه هيروديس راز كرتوت ريو، اِثُوريه ان ترخونيتس واڙا صُويا مانِه هيروديس
رو پائي فِلُس راز كرتوت ريو، ان ابليني صُويا مانِه لسانياس راز كرتوت
ريو، ② ان زئيون حناه ان ڪائيفا مُڪ پُوزاري هتا، تئيون اُوئون ئي ڏيئون موئين
پڳوون زڪرياه را ڏيڪرا يُوحنا نَن رن موئين آپرو نياپو ڏيڏو.
③ تيام يُوحنا يردن ڌريا رَنه آهَنه پاهَنه آوين مِنكون نَن هَمپِڙاوا مڌيو
جي ”آپرا ڪراپ ڪوم ساڏين توپونِه ڪرو ان پڳوون ري وات مانِه وو، ان پَوَيْتِر



سنون ليو، تو پڳوون تما را ڏوه ماڦ ڪرشي.

④ اي وات امرئيم ٿي، زم پڳوون رو نياپو ڏيڏا واڙا يسعياه را شاستر موئين لڪل سئ:

”رڻ موئين هڪا پوڪار پاڙيا واڙا رو آواز آئڻ:

پريو را آيا هارو آپ نئ تيار ڪرو!

اوتا هارو آپرا شيرڙا سڌا ناو!

⑤ تما را مارڳ رو هر هڪ کاڏو پرائي زاشي،

ان مارڳ رو هر هڪ ڏونگر ان ڌڙو ڍاهيا زاشي.

تما را وڙل رستا پاڌرا ٿيشي،

ان تما را کاڌراڙا مارڳ هرکا ٿيشي.

⑥ ان پڳوون رو ميلل پچايا واڙو

ٻڌون منڪون هومو ساو ٿيشي.

⑦ گهڻا منڪ يوحنا ڪن رڻ موئين پويتر سنون ليوا آوتا، ان يوحنا اوتون

نئ ام ڪيتو: ”او منون رون پليتون، تمون نئ ڪيئڻه ڪيڏوه جي تمڻي روڳا پويتر

سنون ليڏا ٿي پڳوون ري آيا واڙي سڙا ٿي پچي هڪوه؟ ⑧ جي پچيا هارو

ڪروه، تو ايو ڪوم ڪرو جيا ٿي ڪپر پڙڻه جي تمڻي هاس ڇر آپرا ڪراپ ڪوم

ساڌين توپونھ ڪريئھ ان پڳوون ري وات مانھ ووھ ريا. ام مت هڙمو جي ’امي

تو ابراهيم رو وستار سون، تيام ڪم نئين پچون؟‘ ابراهيم رو وستار سو، تو ڪي

ٿيو؟ پڳوون تو ايئون پوئون ٿي ابراهيم رو وستار ناوي هڪئھ. ⑨ پڻ همئڻه

پڳوون منڪون نئ سڙا ڏيڏا مانھ سئ، زوئڻه ڪوڪ وڻ را تڙ مانھ ڪوئاڙو

رئين اوپو هوئ. زم جيا وڻ موئين ميوا نئي ٿيئا، منڪ اوتا نئ واڏئھ ان ڏيو تام

ڦڳوڙئھ پرو، تم پڳوون اوتون نئ سڙا ڏيشي، جيا اوتا ري وات مانھ نئي وينا.

⑩ تيام او ٻڌائي منڪ يوحنا ٿي پونستا: ”تو پسئھ امارئھ ڪي ڪروو

ڪيئھ؟“ ⑪ يوحنا اوتون نئ ڪيتو: ”جيا ڪن ٻي وڳا هوئ، اوتون موئين ٿي هڪ

اَوتَا نئه ڌئه جيا ڪن نٿي. ان جيا ڪن ڪاڌو هوئو اُو پڻ همروم وراوئو.
 ⑫ اَوتَا ڪن ناڪو ليڌا واڙا پَوِيتَر سنونَ ليوا آيا، ان آوينَ اَوتَا ٿي پُونسيو:
 ”گروُ جي، امارئ ڪي ڪروو ڪپئ؟“ ⑬ يوحنا اُئون نئه ڪيڌو: ”زتو اگھ لڪل
 سئ، اتا پئڻها ليو. اَوتَا ٿي وڌيڪَ آبَ هارو مت ليو.“

⑭ ان قوجيئي پڻ اَوتَا ٿي پُونسيو: ”ان امارئ ڪي ڪروو ڪپئ؟“ يوحنا
 اُئون نئه ڪيڌو: ”ڪيا نئه پيوڙاوينَ ڪا ڪوڙ ڪرينَ پئڻها مت ليو. تمون نئه
 زتو پگهار زڙئ، اتام ڪُش ريو.“

⑮ هَوئو اِسراييلي قومَ را منڪ پگھونَ را ميلل پچايا واڙا رئي وات زوتات
 ريا. تيام ٻڌائي منڪ آپرا آپرا من موئين يوحنا را پارام سوچتات ريا جي ”اي
 پگھونَ رو سُونِڊل پچايا واڙو ڪريست سئ ڪا نا؟“ ⑯ تيا مانھ يوحنا اُئون
 نئه ڪيڌو: ”هُونَ تمون نئه روڳو پوٽي ٿي پَوِيتَر سنونَ ڏيونھ، پڻ مُون ٿي گھڻي
 ڪڙا واڙو آئھ ريو. هُونَ تو ايوو نٿي جي اَوتَا رون زوڙون را ڪشا ڪولون. اُو
 تمون نئه پَوِيتَر آتما ان ڏيوتا ٿي پَوِيتَر سنونَ ڏيشي، ان پگھونَ رئي وات مونيا
 واڙون نئه پَوِيتَر ڪرشي پڻ نه مونيا واڙون نئه سزا ڏيشي. ⑰ زم ڪوڪ تنگڙئي
 لينَ آپرا ڪڙا مانھ اُپئھ، ان آپرو ڌونَ صاف ڪرينَ گھڙوم موئين راڪئھ، پڻ
 پوه ڏيوتا موئين ٻاڙھ پرو، تم اُو منڪون رو نيا ڪريا مانھ سئ. اُو پگھونَ
 ري وات مانھ وُڍا واڙون نئه آپ ڪن راڪشي، پڻ نه وُڍا واڙون نئه ايوو ڏيوتا
 موئين ٻاڙشي جو ڪيڏي نئين اوزھمائھ.“

⑱ يوحنا پڙي گھڻي واتون پڻ هڙماوينَ اِسراييلي قومَ نئه حوصلو ڏيتو ان
 ڪُشي رئي ڪبر همپڙاتو ريو. ⑲ پڻ زئون اُوتھ گليل صوپا مانھ راز ڪريا واڙا
 هيروديس مانھ اي ڏوھ ڏيڌا، جي اُوتھ آپرا پاڻي ري ڏوشي هيرودياس نئه آپرا
 گھر موئين راڪئھ، ان پڙا گھڻائي ڪراپ ڪوم ڪرياه، ⑳ پستھ هيروديس
 آپرون ٻڌون ڏوهون ٿي موتو ڏوھ اي ڪريو، جي اُوتھ يوحنا نئه جيل موئين
 پُورايو پرو.

ايسو پويتر سنون لئه ان شيطون اوتا نه پگوون ري مرضي ٿي قيروا ڪرئه

ايسو پويتر سنون لئه

(متي 17-13:3، مرقس 9:1-11، لوقا 22-21:3)



②1 يوحنا رئه جيل موئين پورايا مور، زئيون
اسرائيلي قوم ري گهڻي منڪي پويتر سنون ليڏو
رو، ان ايسو پڻ پويتر سنون لين پراڻا ڪرتوت
ريو، تو اوئه ٿي ٿوئنه آڪاش ڪلي گيو ②2 ان
پويتر آتما پارياو رو روپ لين اوتا مانه اوتريو،
ان آڪاش موئين ٿي پگوون رو هاڏ ام هومپريام
آيو: ”تون مارو پريمي ڏيڪرو سئ. هون تون ٿي
گهڻو ڪش سون.“

ايسو ري پيڊي را نوم

(متي 17-1:1، لوقا 23-38)

②3 زئيون ايسو پگوون رو ڪيڏل ڪوم ڪروا مڏيو، ٿيون او ٿيهونڪ سالون رو
هتو. منڪون ري هزم پرموئنه ايسو يوسف رو ڏيڪرو هتو. او عيلي رو وستار
هتو، ②4 عيلي متات رو، متات لاري رو، لاري ملڪي رو، ملڪي ينا رو، ينا
يوسف رو، ②5 يوسف متتياه رو، متتياه عاموس رو، عاموس ناخوم رو، ناخوم
اسلياه رو، اسلياه نوگه رو، ②6 نوگه ماعت رو، ماعت متتياه رو، متتياه شيمعي
رو، شيمعي يوسينخ رو، يوسينخ يوداه رو، ②7 يوداه يوحنا رو، يوحنا ريسا رو،
ريسا زربابل رو، زربابل سيالتي ايل رو، سيالتي ايل نيري رو، ②8 نيري ملڪي

رو، ملڪي ادي رو، ادي قوسام رو، قوسام المودام رو، المودام غير رو، ②9 غير
 يشوع رو، يشوع اليعزر رو، اليعزر يوريم رو، يوريم متات رو، متات لوي رو،
 ③0 لوي شمعون رو، شمعون يهوداه رو، يهوداه يوسف رو، يوسف يونان رو،
 يونان الياقيم رو، ③1 الياقيم ملياه رو، ملياه مناه رو، مناه متتاه رو، متتاه ناتن
 رو، ناتن دائود رو، ③2 دائود يسي رو، يسي عوبيد رو، عوبيد بوعز رو، بوعز
 سلمون رو، سلمون نحسون رو، ③3 نحسون عمينداب رو، عمينداب ادمين رو، ادمين
 ارني رو، ارني حصرون رو، حصرون فارص رو، فارص يهوداه رو، ③4 يهوداه
 يعقوب رو، يعقوب اضاخا رو، اضاخا ابراهيم رو، ابراهيم تاره رو، تاره نخور
 رو، ③5 نخور سروج رو، سروج رعو رو، رعو فلج رو، فلج غير رو، غير سلح رو،
 ③6 سلح قينان رو، قينان ارفكسد رو، ارفكسد سم رو، سم نوح رو، نوح لمك
 رو، ③7 لمك متوسلح رو، متوسلح حنوك رو، حنوك يارد رو، يارد مهلل ايل رو،
 مهلل ايل قينان رو، ③8 قينان انوس رو، انوس سيت رو، سيت آدم رو، ڏيڪرو
 هتو، ان آدم ننه پڳوون نايو تو.

پڳوون رو دشمن شيطون ايسو ننه پڳوون ري مرضي ٿي ڦيروا ڪرڻ

(متي 1:4-11، مرقس 12:13-13، لُوقا 13-14)

4 ① پسڻه ايسو پويتر آتما ري ڪڙا ٿي پيال يردن ڌريا ٿي پاسو آيو. ان
 پويتر آتما را ڪيڏا ٿي چاليهون ڏيئون هُودِي رڻ موئين ويتو ريو، ② ان
 شيطون اُوتا ننه پڳوون ري مرضي ٿي ڦيروا هارو آزماوتو ريو. اُوتون ڏيئون
 موئين ايسو ورت راڪين ڪئين نتو ڪاڌو، ان نيٺ چاليهه ڏي اُوتا ننه الاهي
 گهٽئي پوک لاڳئي.

③ تئين شيطون اُوتا ننه ڪيڏو: ”جي تون پڳوون رو ڏيڪرو سڻ، تو ايٿا
 پوٿا ننه ڪڻه جي روئي ٿي زائڻ.“ ④ پڻ ايسو شيطون ننه نا پاڙين ڪيڏو:



”شاستر موئين لکل سئه: منک رُوگُو کاڏا
تي جيو تو نئين رئه.“

⑤ پسته شيطون ايسو نئه هيڪي
اُونسي جگا مانھ پُوگاڙيو ان اُوتا نئه
هت ٿو هت جگت را ٻڌائي ملڪ ڏيڪاڙيا،
⑥ ان ڪيڏو: ”ايئون ٻڌون ملڪون رو راز
هُون تون نئه ڏيه، ان ايئون را ٻڌائي
منک تارو مون راکشي، ڪم تو ايئون
رو راز مون نئه ڏيڏل سئه، ان جيا نئه
مارو من ڪئه، اُوتا نئه ڏيونه. ⑦ تيام
جي تون پڳي پڙين مارئي پوزا ڪرئه،
تو اي ٻڌوئي راز تارو ٿيشي.“ ⑧ پڻ
ايسو اُوتا نئه نا پاڙين ڪيڏو: ”شاستر
موئين لکل سئه: ايشور آپرا پڳون رئي
پوزا ڪروو، ان رُوگهي اُوتا رئي شيوا ڪروو ڪپئه.“

⑨ تيون شيطون ايسو نئه يروشلم شهر موئين پُوگاڙين اُوتا نئه پڳون را
گهر ري ٻڌون تي اُونسي جگا مانھ اُوپاڙين ڪيڏو: ”جي تون پڳون رو ڏيڪرو
سئه، تو آپ نئه ايئون نيسو پاڙ، ⑩ ڪم تو شاستر موئين لکل سئه: پڳون
آپرون آڪاشي ڏوتون نئه تارئي همپاڙ ڪريا رو ڪيشي، ⑪ ان اُوتا نئه آپرون
هائون مانھ ليشي، زم تارون پڳون نئه پڙئي نه لاڳئه.“ ⑫ پڻ ايسو اُوتا نئه نا
پاڙين ڪيڏو: ”پڳون اي پڻ ڪيڏوھ: ايشور آپرا پڳون نئه نه آزماوو ڪپئه.“
⑬ زيون شيطون ٻڌون نمونون را آزمتا لي ريو، تو اُوتا ايسو ڪن تي گيو پرو
ان آزمتا ليڏا را پيزا ٿوئا رئي وات زووا مڏيو.

ايسنو گليل صُويا موئين پڳوونَ رو کوم کرئھ


ايسنو گليل صُويا موئين پڳوونَ را پارام شيکاروا شروع کرئھ

(متي 12:4-17، مرقس 14:1-15، لُوقا 14:4-15)

⑭ پسنه ايسنو پويتر آتما ري کزا ٿي پرال گليل صُويا موئين پاسو آيو رو. ان پورا گليل موئين اُونا رئي کبر پکڙي گئي. ⑮ ان اوتنه ايسنو پڳوونَ رون منڌرون موئين منکون ننه شيکاروا مڏيو. ان ٻڌائي اُونا را وکوڻ کرتا تا.

ايسنو را آپرا ناصرت شهر را منک اُونا ننه شهر ٿي بارو کايئھ

(متي 13:53-58، مرقس 6:1-6، لُوقا 16:4-30)



⑯ تيا کيڙ ايسنو ناصرت شهر موئين آيو، جيئھ اُونو موٽو ٿيو تو. ان اوتنه زم اُو پويتر ڏي رو اگي زاتو ريتو، هم پڳوونَ را منڌر موئين گيو، ان شاستر پٿيا هارُو اُونين اُوپو. ⑰ ان شيواڌاري اُونا ننه پڳوونَ رو نياپو ڏيڌا واڙا يسعياه رو لکل شاستر ڏيڌو. شاستر کولين ايسنو پڳوونَ را سُونيل پچايا واڙا را پارام اي وات گوتئي، ان پٿين همپڙاويي:

⑱ ”ايشور رو پويتر آتما مُون ننه زڙيوھ،

کم تو گريهون ننه کُشي رئي کبر ڏيڌا هارُو

ايشور مُون ننه سُونديوه.

اُونه مُون ننه ميليھ

جي بوندلون ننه سوتيا رئي

ان اوندون ننه ڏيکيا رڻي کبر همپزاوون،
ڏکون موئين پڙلون ننه سڏاوون،

①۹ ان اي وات همپزاوون

جي او توتو آيوه رو

زئيون پگهون منکون مانھ ميرپوني ڪرشي.

②۰ پسٺه اوٺه شاستر پنڌ ڪرين شيواڌاري ننه پاسو ڏيتو پرو ان شيڪاڙيا هارو
بيٺو نو. پگهون را منڌر موئين ٻڌائي منک اوٺا هوما ڏيون ٿي زوئي ريا تا.
②۱ تئيون ايسو اوئون ننه ڪيو لاگيو: ”اي شاستر رڻي لکل وات تمي هومپڙيه،
اي آز تمون هومئي مون مانھ پوري ٿيھ.“

②۲ تيا مانھ ٻڌائي منک هائي هومپڙين اوٺا را وڪوڻ ڪروا مڌيا. او ايتا وات
مانھ حيرون هتا جي اي ڪيو نائوڪي واتون ڪرھ ريو. پسٺه ڪيو مڌيا: ”پڻ
اي تو يوسف رو ڏيڪرو سٺه، نا؟“

②۳ تئيون ايسو اوئون ننه ڪيڏو: ”تمي اي ڪيٽئي ضرور مون ننه ڪيشو:
'او ڍاڪتر، آڀرا آپ ننه هازو هورو ڪر.' ان اي پڻ ڪيشو: 'امي هومپڙيوه جي
ڪفرنحوم شهر موئين تئين گهڻو ڪئين ڪريوه، تو ايتنه آڀرا ڏيه موئين پڻ
هم ڪرين ڏيڪار.'“

②۴ پسٺه ايسو وڙي ڪيڏو: ”هون تمون ننه هاس ڪونه، ڪيائي پڻ پگهون
رو نياپو ڏيڏا واڙا رو آڀرا ڏيه موئين مون نٿي هوتو. ②۵ هون تمون ننه هاس ئي
هاس ڪونه، پگهون رو نياپو ڏيڏا واڙا ايلياه رون ڏيئون موئين، زئيون هاڏا ترڻ
سال مي رڻي سونت ئي نٿي پڙئي، ان پورا ملڪ موئين موتو ڏڪار پڙيو تو،
تئيون آڀري اسرائيلي قوم موئين گهڻي رنڌال ڏوشي هتي، ②۶ پڻ پگهون ايلياه
ننه اوئون ٻڌيون موئين ٿي ڪيا ڪن مدت هارو نه ميليو، پڻ روگڙ صيدا ملڪ
را صارپت شهر موئين هيڪي ڌاري قوم ري رنڌال ڏوشي ڪن اوٺا رڻي مدت
ڪريا هارو ميليو. ②۷ ان پگهون رو نياپو ڏيڏا واڙا ايلشع رون ڏيئون موئين،

آپني اسرائيلي قوم موئين گهٺائي منڪ ايو هتا جيون ننه ڪوڊ رٿي پيماري هتي، پڻ پڳوون اوئون ٻڌون موئين ٿي ڪيا ننه هازو هورو نه ڪريو، پڻ روڳو سورباني قوم را نعمان نومي منڪ ننه هازو هورو ڪريو.

②8 اي واتون هومپزين زتا منڪ پڳوون را مندر موئين هتا اوئون ٻڌون ننه گهٽي رينه سڙي. ②9 ان اوئي اولين ايسو ننه زوري زهالين شهر ٿي ٻارو ڪاڍيو، ان جيا ڏونگر مانه اوئون رو شهر هتو، اوتا ري سوتي مانه لي آيا زم اونسائي هيٺ ڳوڙهه پرو. ③0 پڻ ايسو اوئون را وس هون نيهرين آڀرو مارڳ لين گيو پرو.

ايسو ڪفرنحوم شهر موئين هڪا منڪ ٿي پوت ڪاڍه

(مرقس 1:28-21، لوقا 4:31-37)

③1 پسٺه ايسو گليل صوپا را ڪفرنحوم شهر موئين آيو. ان پويتر ڏي رو اوت رون منڪون ننه شيڪاڙوا مڏيو. ③2 ان منڪ اوتا رنه شيڪاڙيا مانه حيرون هتا ڪم تو او اڪتياري راڪين مونيا جيوي واتون ڪرتوت ريو.

③3 اوٿه پڳوون را مندر موئين هڪا منڪ هتو جيا ننه پوت سونتل هتو. اوٿه رڙ ڪرين زور ٿي ڪيتو: ③4 ”او ايسو ناصرت شهر وازا، ٿارو امون ٿي ڪيو واسطو؟ تون امون پوتون ننه ڪتم ڪرو آيوه، ڪي؟ هون تون ننه اوڙكونه ريو جي تون ڪون سٺه. تون پڳوون رو پويتر منڪ سٺه.“ ③5 پڻ ايسو پوت ننه ڌڙڪو ڏين ڪيتو: ”ماڻ ڪرا! ان ايتا منڪ ٿي ٻارو نيهرين زالا“ تئين پوت منڪ ننه ٻڌون هومو نيسو پاڙين ٻارو نيهرين گيو پڻ منڪ ننه ڪئين نقصون نه ڪريو.

③6 تيام ٻڌائي حيروني پڙين هڪا ٻيڙا ننه ڪيا مڏيا: ”ايتا را ڪيڏام ڪتو اثر سٺه! ڪم تو او آڀري اڪتياري ان ڪرا ٿي پوتون ننه نيهرين رو حڪم ڏه، ان او نيهرين زانه.“ ③7 پسٺه ايسو رٿي نوموش آها پاها را علاقا موئين ٻڌيل پڪڙي گئي.

ايسو گهڻون منڪون نٿا هازا هورا ڪرڻ

(متي 14:8-17، مرقس 1:29-34، لُوقا 4:38-41)

③8 پسنه ايسو پگهون را مندر ٿي نيهرين شمعون ري گهري گيو. اوڻه شمعون رڻي هاهو گهڻا تاو موئين پڙئي ٿئي. ان اوني ايسو ٿي اوڻا ننه نيڪ ڪريا هارو منٿ ڪرڻي. ③9 ٿيون ايسو اوڻا ڪن آوين اوپو، ان تاو ننه اوتريا رو ڪيڏو. تو تاو اوڻه ئي ٿوڻه اوتري گيو. ان جهٽ موئين اولين او ڏوشي اوڻون رڻي شيوا ساڪرڻي ڪروا مڏئي.

④0 ڏي آتميا رنه ٿوڻه ٻڌائي آپرون آپرون موندون ننه، جيون ننه نمونا نمونا ري پيماري هتي، ايسو ڪن لي آيا. ان ايسو هڪا هڪا مانه آپرا هات ميلين اوڻون ٻڌون ننه نيڪ ڪرتو ريو. ④1 ان گهڻون منڪون موئين ٿي پوت پڻ ايسو را ڪيڏا ٿي نيهرتا ريا. او نيهرتون رڙيون ڪرين ڪيتا ريا جي ”تون پگهون رو ڏيڪرو سٺه.“ پڻ ايسو اوڻون ننه ڌڙڪو ڏين ڪيڏو: ”هائي وات مت ڪو!“ ان اوڻون ننه ماڻ ڪرايا، ڪم تو پوتون ننه ڪهر هڻي جي ”اي پگهون رو سونڊل پڇايا وازو ڪريست سٺه.“

ايسو ڪفرنحوم شهر ٿي نيهرين پيزيل شيڪاڙوا زائو

(مرقس 1:35-39، لُوقا 4:42-44)


④2 زئون ڏي اوگيو ٿيون ايسو شهر ٿي نيهرين هونواڙ ۾ گيو. ان الاهي گهڻا منڪ اوڻا ننه گوتوا لاگيا. زئون ايسو اوڻون ننه زڙيو، ٿيون اوني ايسو ننه روڪو ڪريو جي ”امون ڪن ٿي مت زائو!“ ④3 پڻ اوڻه منڪون ننه ڪيڏو: ”مارنه پگهون را راز رڻي ڪهر پيزون شهرن موئين پڻ همپڙاووه، ڪم تو ايڻا هارو پگهون مون ننه ميليوه.“ ④4 ان ايسو يهوديون را ملڪ موئين پگهون رون منڌرون موئين منڪون ننه شيڪاڙو ريو.

ايسو را پيرهيان شيل

(متي 22-18:4، مرقس 16:1-20، لُوقا 11-5)

5 ① هيك وار ايسو گليل ري ڍنڍ را ڪپ مانھ اُڀو تو، ان اُونا ڪن الاهي گھڻا منڪ پڳوون رو وڃن ھومڙتات ريا، تو اُو منڪون وسا ھوڙڪائي ڳيو. ② تئيون اُونا نئ ڍنڍ را ڪپ ڪن ٻي ٻيڙي اُويل ڏيڪيام آوي، ان مشي ماريا واڙا اُئون ٻيڙيون ٿي نيسا اُوترين آڀرا رڇ ڌوتات ريا. ③ ايسو اُئون موئين ٿي هيڪي ٻيڙي موئين سڙي ڳيو. اُو ٻيڙي شمعون رئي هئي. تئيون اُونه شمعون نئ ٻيڙي ڪپ ٿي توڙڪيڪ آگهي ھاڪليا رو ڪيڏو. پسئ ايسو ٻيڙي موئين ٻيھين ٻڏون منڪون نئ وڙي شيڪاڙوا مڏيو.

④ زئيون ايسو شيڪاڙي ريو، تئيون شمعون نئ ڪيڏو: ”ٻيڙي نئ اُونڌا پوئي موئين ھاڪلي ھال، پسئ تمي مشيون ھارو آڀرا رڇ نوڪو!“ ⑤ شمعون وڙنڌي ڏيڏي: ”گرو جي، امي تو رات ٻڌي رڇ نوڪياھ، توئي هيك ئي مسئي نئي



زهالئي. پڻ جي تمڻي ڪوه رڀا، تو هُون رڇ نڪاوونھ.“ ⑥ اُوئي رڇ نوکيا، تو اتي مشي آوِيَن ڦاٽي، جي اُوئون را رڇ ڦاٽوا مڏيا. ⑦ تو جيا پيڙي پيڙي موئين پاييواز هتا، اُوئون ٿي مدت مونگيا هارُو هوزا ڪريا. ان اُو پڻ آيا، ان مشيون ٿي ٻي ئي پيڙي اتي پرائي گهي جي اُو بُوڏيا مانھ هتي.

⑧ اي ڏيڪيَن شمعُون پطرس ايسُوري پگهي پڙين ڪيڏو: ”مُون ڪن ٿي زائو پرا، پرڻو، ڪم تو هُون ڏوهاري سون ان ايوو نٿي جي تمڻي مُون ڪن ريو.“ ⑨ اُوئھ تيام ڪيڏو ڪم تو اُو ان اُوئا پيڙا جيا منڪ هتا، اتي مشي ڦاٿل ڏيڪيَن، ٻڌائي حيروني پڙي گيا تا. ⑩ ان زبدي را ڏيڪرا يعقوب ان يوحنا، جيا شمعُون پيڙا مشي مارتا، اُو پڻ حيروني پڙي گيا تا. پسئھ ايسُو شمعُون نئھ ڪيڏو: ”پيئا مت! آڙ ٿي لين تُون مشي ماريا رو ڪوم نئين ڪرئھ پڻ منڪون نئھ پڇاويھ.“

⑪ پسئھ اُوئي پيڙي ٻاري توئين ڪپ مانھ اُوپاڙي، ان ٻڌو ڪئين ساڏين ايسُو را شيلا ٿين اُوئا وونھڙ وُڍا پرا.

ايسُو ڪوڍ ري پيماري ٿي هيڪا منڪ نئھ نيڪ ڪرئھ

(متي 1:8-4، مرقس 1:40-45، لُوقا 12:5-16)

⑫ هيڪ وار ايسُو هيڪا شهر موئين هتو. اُوئا ئي ماڳ هيڪ منڪ هتو جيا نئھ ڪوڍ رئي پيماري هتئي. تيام اُو منڪ اپڙال هتو. زئيون اُوئھ ايسُو نئھ ڏيڪيو، تئين اُوئا ري پگهي پڙين منٿ ڪرين ڪيڏو: ”ساڏو جي، جي تمارئي مرضي هونھ، تو تمڻي مُون نئھ هازو هورو ڪرين پويتر ڪري هيڪوه.“ ⑬ تيا مانھ ايسُو اُوئا نئھ سپين ڪيڏو: ”مارئي مرضي سئھ. تُون هازو هورو ٿين اپڙايا ٿي پويتر ٿئھ!“ ان جهٽ ۾ ڪوڍ رئي پيماري اُوئا نئھ ساڏي گئي. ⑭ پسئھ ايسُو اُوئا نئھ گهڻو گهڻو ڪيڏو: ”اي وات ڪيا نئھ مت همپراوي. پڻ پگهون را گهر موئين زائين آڀرو ڏيل اُوئا پوزاري نئھ ڏيڪاڙي، جيو اُوئھ پوزا رو ڪوم ڪرتو

هئوئ. ان تون اڀڙايا ٿي پويتر ٿيا هارو پڳوون را نوم مانھ اُو شينھون سڙاوي جي شاستر موئين موسيٰ ري لکل سئھ، زم ٻڌون هارو هاڪ ٿئھ، جي تون هازو هورو ٿي گيوھ."

⑮ پڻ ايسو رئي وات جيئھ تيئھ گھڻي پڪڙي گهي، ان الاهي گھڻا منڪ اوئا ري واتون هومپڙيا هارو ان پيماريون ٿي نيڪ ٿيا هارو ايسو پيڙا وينا ريتا. ⑯ ان ايسو آپ هونواڙ موئين هيڪلو زائين پراڻا ڪرتو ريتو.

ايسو هڪا اڌرنڳ را مونڌا نئ هازو هورو ڪرئھ

(متي 9: 1-8، مرقس 12: 1-12، لوقا 17: 5-26)

⑰ هڪ ڏي ايسو هڪا گهر موئين منڪون نئھ شيڪاڙتوت ريو. اوئا ئي ماڳ فريسي پالتي را منڪ ان شاستر زوٽيا واڙا پڻ پينل هئا. اُو گليل ان يهوديه صوبا را هر هڪ شهر ٿي ان يروشلم شهر ٿي پڻ آيا تا. ان ايشور رئي ڪڙا مونڌون نئھ نيڪ ڪريا هارو ايسو موئين هئي. ⑱ تئيون ڪئينڪ منڪ هڪا اڌرنڳ را مونڌا نئھ زهوڙي موئين اوپاڙي آيا. اُو ڪوشش ڪرتات ريا جي اوئا مونڌا نئھ ايسو ڪن لي زائھ. ⑲ پڻ گھڻا منڪ هويا ري ڪري گهر موئين زايا هارو واڳ نه زڙيو. تيام اُو گهر مائھ سڙي گيا ان ماڻون چت را چونڪا ڪولين اوئا نئھ زهوڙي هٽيلو نيسو منڪون را وس موئين ايسو ڪن اوتاريو. ⑳ زئيون ايسو اوئون منڪون رو ايوو يقين ڏيڪيو، تئيون اوئھ اڌرنڳ واڙا نئھ ڪيڏو: "پائي، ٿارا ڪرل ڏوھ تون نئھ ماڻ سئھ."

㉑ تيا مانھ شاستر زوٽيا واڙا ان فريسي پالتي را منڪ سوچوا مڏيا: "اي وڙي آپ نئھ ڪي هزمئھ؟ آپ نئھ پڳوون هرڪو ڪرين اي پڳوون رئي پيغڙتي ڪرئھ ريو. پڳوون شوا پيزو ڪوئي نئي جيو ڏوھ ماڻ ڪري هيڪئھ."

㉒ پڻ ايسو اوئون را ڪيال زوٽي گيو ان اوئون نئھ ڪيڏو: "هيوي واتون تمي ڪم سوچوھ ريا؟ ㉓ مون نئھ همپڙاوو جي ڪي هورو سئھ؟ ايئا منڪ نئھ ام

ڪيو هورو سٺه جي 'اُونين وٺه'؟ ڪا ام ڪيو جي 'تارا ڏوه تون نٿه ماڻ سٺه'؟ ②4 پڻ هون تمون نٿه ٿاڀيئي ڏيهه جي هون منڪ ذات رو ڏيڪرو سون، ان پڳوون مون نٿه جڳت موئين ڏوه ماڻ ڪريا رڻي اڪتيرڻي ڏيڏيئي. "پسئه ايسو اڌرنگ واڙا نٿه ڪيڏو: "هون تون نٿه ڪونه، اُوني، آپري زهوڙي اُپاڙين گهري زا پرو!"

②5 تئين جهت موئين او منڪ اوئون هومو اُونين اُپو ان جيا مانھ هُوتو پڙيو تو او زهوڙي اُپاڙين، پڳوون را وڪوڻ ڪرتو آپري گهري گيو پرو. ②6 او ٻڌائي منڪ گهڻا حيروني پڙي گيا ان پڳوون را وڪوڻ ڪروا مڏيا، ان اي ڪڙا ڏيڪين حيرون تين ڪيڏو: "آز آبي عجيب ڪوم ڏيڪياھ."

ناڪو ليڏا واڙو لاوي ايسو رو شيلو تڻھ

(متي 9:13-17، مرقس 13:2-17، لُوقا 27:5-32)



②7 پسئھ ايسو اوڻا گهري ٻارو نيھريو، تو اوڻھ لاوي نوم رو هيڪ ناڪو ليڏا واڙو ناڪا ماڻھ پيو تو. ايسو اوڻا نٿه زوئين ڪيڏو: "مارو شيلو تين مون وونھڙ آو!" ②8 تو لاوي ٻڌو ڪئين ساڏين اُونيو ان ايسو رو شيلو تين اوڻا وونھڙ ويوا مڏيو.

②9 پسئھ لاوي آپري گهري ايسو هارو هيڪ موڻي ڌاوت ڪري. اوڻا ڌاوت موئين گهڻا ناڪو ليڏا واڙا هتا، ان پيزا پڻ گهڻا منڪ اوئون پيزا پينا تا. ③0 تئين فريسي پالتي را منڪ ان اوڻا پالتي را شاستر زوڻيا واڙا ايسو رون شيلون نٿه ام وڙگاوا مڏيا جي "تمي ناڪو ليڏا واڙون ان هيون اپڙال ڏوهاريون پيزا ڪم ڪاڻوھ ريا؟"

③1 تيا مانھ ايسو اوئون نٿه وڙنڏي ڏيڏي: "جيا هاڙا هورا سٺه، اوئون

نٺه ڊاڪٽر رڻي ضرورت نٿي هوندي، پڻ روڳي موندون نٺه ضرورت هون. (32) هيون نمونن هون پيدوهي منڪون نٺه نئين، پڻ ڏوهاريون نٺه هاڻ ڏيوا آيوه جي او آڀرا ڪراپ ڪوم ساڏين توبونه ڪرڻه ان پڳوون ري وات مان هون.

ايسو نوي واتون شيڪاڙهه پڻ منڪون نٺه ڌرم ري زوني واتون وٺهه

(متي 17-14:9، مرقس 22-18:2، لوقا 33:5-39)

(33) پسٺه ڪئينڪ فريسي پالتي ري منڪي وڙي ايسو نٺه ڪيڏو: ”يوحنا را شيلا تو گهڻي وار ورت راکتا رڻه ان پراڻائون ڪرڻه. ان امون فريسيون را شيلا پڻ همروم ڪرڻه. پڻ ٿارا شيلا ڪم کاتا پيٽا رڻه؟“ (34) تيون ايسو اوئون نٺه ڪيڏو: ”زئون لاڏو زونيون پيڙو سٺ، تيون تمي اوئون نٺه ورت رکاي هڪشو، ڪي؟ هم تو نئين ٿه. (35) پڻ ايو اڏي آوشي زيون لاڏو اوئون ٿي ڌار ڪراشي پرو، تيڏي اوئون ڏيون موئين زونيا ورت راکشي.“

(36) ان ايسو اوئون نٺه اي مثال رڻي وات پڻ همپڙاوي: ”ڪوئي پڻ منڪ زونا وگا هارو ڪرين نوا وگا ٿي ٿيگڙي نئين ڪرڻه. جي هم ڪرڻه، تو نو وگو ڪرائي زاشي، ان او ٿيگڙي زونا وگا پيڙي اوپشي پڻ نئين. (37) ان ڪوئي پڻ منڪ نو ڌراڪون رو رس زونيون هنڌاريون موئين نئين راکنه. جي هم ڪرڻه تو نو رس پاڪين هنڌاريون نٺه ڦاڙشي پري ان پسٺه رس ايڙائي زاشي، ان هنڌاري پڻ ڪيا ئي ڪوم ري نئين رڻه. (38) پڻ نو رس نويون هنڌاريون موئين راکو ڪپهه.

(39) پڻ وات اي سٺه. ڪوئي پڻ منڪ زونو ٺاؤل رس پين نو ٺاؤل رس پيو نٿي ڪرتو، ڪم تو ڪيشي: ’نو نئين، پڻ زونو ٺاؤڪو سٺه.‘“

ايسو پويتر ڏي رو ڌڻي ٿين آپ ڦينصلو ڪرڻه جي پويتر ڏي رو ڪي ڪروو

(متي 12:8، مرقس 23:28، لوقا 6:1-5)

6 ① هيڪ وار ايسو پويتر ڏي رو ڪيترون موئين ٿين متوت ريو، جيون موئين ڪڻڪ اوپل هڻي. ان اونا را شيلا هرا پتات ريا ان هاڻون ٿي مونهي مونهيڙين اوئون را ڏوئا ڪاتات ريا. ② ٽيون ڪڻڪ فريسي پالتي ري منڪي شيلون نئه وڙگائين ڪيڏو: ”هائي تمي لهارو ڪريا جيوو ڪوم آڙ ڪم ڪروه ريا؟ آڻا ڌرم موئين پويتر ڏي رو ڪڻين ڪوم نه ڪروو ڪپئه.“

③ ٽيون ايسو اوئون منڪون نئه وڙندي ڏيڏي: ”تمون نئه ڪهر نٿي ڪي، جي هيوي پوک ري حالت ۾ آڻئه ڌرمي ڏاڏئه دائود ڪي ڪريو تو؟ تمي تو شاستر موئين اڳي پڻيوه جي زئون دائود ان اونا را منڪ پوکا هئا، ④ ٽيون او آپ پڳوون را گهر موئين گيو، ان جي روئي پڳوون را نوم ري هتي، او روئي اوئه پوزاري ڪن لين آپ ڪاڏي، ان آپرون منڪون نئه پڻ ڏيڏي. هوئه دائود رو اوئون روٽيون مانه ڪڻين حق نتو، ڪم تو آڻا ڌرم پرموئه روگا او جيا پڳوون را گهر موئين پوزا رو ڪوم ڪرڻه، او ايوي روئي ڪائي هيڪه.“

⑤ پسئه ايسو اوئون نئه ڪيڏو: ”پڻ پويتر ڏي مانه مارو تو حق سئه، ڪم تو هون آپ منڪ ذات رو ڏيڪرو ٿين پويتر ڏي رو ڌڻي سون.“

ايسو پويتر ڏي رو هيڪا هوڪال هات واڙا نئه هازو هورو ڪرڻه

(متي 12:9-14، مرقس 3:1-6، لوقا 6:6-11)

⑥ پيزا ڪياڪ پويتر ڏي رو ايسو پڳوون را مندر موئين زائين شيڪاڙوا مڏيو. ان اونا ماڳ هيڪ منڪ هتو جيا رو زمڻو هات هوڪال هتو. ⑦ اوئه شاستر زوٽيا واڙا ان فريسي پالتي را منڪ ام سوچين ايسو هوما ٽاڪي ريا تا، ”جي ايسو

آز پَوِيتَر ڏي رو منڪ نٿه هازو هورو ڪرڻ، تو امي اُونا رو اي ڏوه ڪاڏشون جي اُو پَوِيتَر ڏي رو ڪوم ڪرڻ، ان هم ڪريا ٿي ڌرم توڙڻه.

⑧ پڻ ايسو اُئون ري من ري واتون زوڻي ڳيو، ان هُوكال هات وازا منڪ نٿه ڪيڏو: ”اُوني، وس موئين آوين اُوپ!“ تو اُو اُولين اُوتڻه آوين اُوپو. ⑨ پسنه ايسو اُئون نٿه ڪيڏو: ”هُن تمون ٿي اي پُونسونه، جي ڌرم پرموڻه پَوِيتَر ڏي رو پلاڻي ڪروو ڪا پُونڌائي ڪروو؟ جيو پچاوو ڪا ماروو؟“ ⑩ ان اُئون ٻڌون هومو زوئين اُوتڻه منڪ نٿه ڪيڏو: ”تارو هات پاڌرو ڪر!“ اُوتڻه همروم ڪريو، ان اُونا رو هات هازو هورو ٿي ڳيو.

⑪ پسنه اُئون نٿه گهڻي رينھ سڙي ان آيت موئين واتون ڪروا مڏيا جي ”آپڻه ايسو ٿي ڪي ڪروو ڪپڻه؟“

ايسو آپرون شيلون موئين ٿي ٻارڻه مُڪ شيلا سُونڊيڻه

(متي 10: 1-4، مرقس 13: 3-19، لوقا 12: 6-16)

⑫ اُئون ڏيئون موئين ايسو ڏونگر ماڻه پراڻا ڪروا ڳيو. ان رات ٻڌي پڳوون ٿي پراڻا ڪرتو ريو. ⑬ زئيون ڏي اُوڳيو، تنيون آپرون شيلون نٿه آپ ڪنڻه هاڏ ڏيڏو، ان اُئون موئين ٿي ٻارڻه زڻا سُونڊيا، ان اُئون نٿه آپرا مُڪ شيلا ڪيڏا. ⑭ اُئون را نوم اي سڻه:

شمعون، جيا رو پيزو نوم ايسو پطرس راڪيو،

اُونا رو پاڻي اندرياس،

يعقوب،

يوحنا،

فلپس،

برٿلمائي،

⑮ متي،

توما،
 حلفي رو ڏيکرو يعقوب،
 شمعون، جيا ننه آڀرا ملڪ ري آزادي هارو وڌيا وازو ڪيتا،
 ①6 يعقوب رو ڏيکرو يهوداه،
 ان يهوداه اسڪريوتي، جيئنه تيا ڪيڙ آڀرا گرو ننه زهلايو.

ايسو گهڻون منڪون ننه شيڪارڙهه ان هازا هورا ڪرڻه

(متي 23: 4-25، لوقا 6: 17-19)

①7 پسته ايسو اوئون شيلون پيزو ڏونگر ٿي نيسو اوترين هڪا پونا موئين آوين
 اوپو ريو. اوڻهه اوئا رون شيلون رو هڪ موتو توڙو هتو، ان پيزا الاهي گهڻا
 منڪ يروشلم شهر ان پورا يهوديه صوپا ٿي، ان شيئا شيئا هون صور ان صيدا
 شهرون رنه سمونڊ را ڪپ ٿي پڻ اول هتا. ①8 او ايسو ري واتون هومپروا، ان
 آڀريون پيماريون ٿي هازا ٿيا آيا تا. ان جيون ننه پوت سونتل هتا، ايسو اوئون
 ننه پڻ هازا هورا ڪرتوت ريو. ①9 ان ٻڌائي منڪ ايسو ننه سبيا هارو ڪرتات
 ريا، ڪم تو پڳوون رڻي ڪڙا اوئا هون نيهرتيت رڻي، ان ٻڌون ننه هازا هورا
 ڪرتيت رڻي.

پاڳوازون رڻي اوڙڪون

(متي 5: 3-12، لوقا 6: 20-23)

②0 پسته ايسو آڀرون شيلون هومو زوئين ڪيڏو:

"پاڳوازا تمي سو جيا گريپ سو،

ڪم تو پڳوون رو راز تمون هارو سڻه.

②1 پاڳوازا تمي سو جيا همڻه پوکا سو،

ڪم تو تمي ڍاپشو.

پاڳواڙا تمي سو جيا همئنه روئوه،

ڪم تو تمي ڪشي ٿي هاهشو.

22) پاڳواڙا تمي سو زئيون منڪ تمون ٿي وير راڪشي، تمون نئه نات ٻارا

ڪرشي، تمارئي پيغزتيي ڪرشي، ان تمون نئه پُونڌا منڪ هزمين ايٿا هارو ٻارا

ڪاڏشي پرا، جي تمي مون منڪ ذات را ڏيڪرا را شيلا سو. 23) اونه ڏي تمي

ڪش ٿيا ان ڪشي ٿي رميا، ڪم تو آڪاش موئين تمارو ايوزو گهڻو سئ. ڪم

تو زم منڪ تمارئه ڪلاڦ ويشي، همرام اوئون را ٻاپ ڏاڏا پڳوون رو نياپو ڏيڏا

وازون رئه ڪلاڦ پڻ وينا آياھ.

24) تنيون ايسو شائوڪار منڪون نئه ڪيڏو:

"پڻ ڏڪ سئ تمون هارو جيا همئنه شائوڪار سو،

ڪم تو تمي اڳي موج ڪري ليڏئيھ.

25) ڏڪ سئ تمون هارو جيا همئنه ڍاپل سو،

ڪم تو تمي پوکي مرشو.

ڏڪ سئ تمون هارو جيا همئنه ڪشي ٿي هاهوه،

ڪم تو تمي گهڻا روشو.

26) ڏڪ سئ تمون هارو، زئيون ٻڌائي منڪ تمارئي واھ واھ ڪرئ، ڪم تو

زم منڪ تمارئي واھ واھ ڪرئ، همرام اوئون را ٻاپ ڏاڏا ڪوڙون پڳوون رو

نياپو ڏيڏا وازون رئي پڻ واھ واھ ڪرتا آياھ.

ڏشمئون ٿي پريم راڪو

(متي 38:5-48، 7:12، لُوقا 6:27-36)

27) "پڻ تمي جيا مارئي وات ڏيون ٿي هومپروھ ريا، هُون تمون نئه ڪونه جي

آپرون ڏشمئون ٿي پريم راڪو. جيا منڪ تمون ٿي وير راڪئھ، اوئون ٿي پلائي

ڪرو. 28) جيا تمون نئه پئئھ، اوئون هارو آشيرواڏ مونڳو. ان جيا تمارئي پيغزتيي

ڪرڻ، اُوئون هارُو پراڻا ڪرو. ②9 ٽمي ڀڏلو مت ليو. جيو تمون نٿه هڪا ڳال مانھ ٿيڙ هڻڻ، اُوئا هومو پيزو ڳال پڻ ڦيروي ڏيو. ان جيو تمارو تُوڻال ڪوهي لئھ، اُوئا نٿه وڳو پڻ ليو ڏيو. ③0 جيو ڪوئي تمون ٿي مونڱڻ، اُوئا نٿه ڏيو. ان جيو تماري شينھون لئھ، اُوئا ٿي پاسي مت مونڱو. ③1 مارو مطلب اي سئھ، زم منڪ تمون ٿي ڪراپ نمونئھ وئھ، ٽم ٽمي اُوئون ٿي ڪراپ نمونئھ مت وو. پڻ زم تمون نٿه وئھ جي منڪ تمون ٿي وئھ، هم ٽمي اُوئون ٿي ٺاڻوڪئھ نمونئھ وو.

③2 جي ٽمي رُوڳا اُوئون ٿي پريم راکو، جيا تمون ٿي پڻ پريم راکئھ، تو ٽمي ٿورا جيوو ڪي ڪريو؟ ڪم تو ڏوهاري پڻ آپ ٿي پريم راکيا وازون ٿي پريم راکئھ. ③3 ان جي ٽمي رُوڳا اُوئون ٿي ڀلائي ڪرو، جيا تمون ٿي پڻ ڀلائي ڪرڻ، تو ٽمي ٿورا جيوو ڪي ڪريو؟ ڪم تو ڏوهاري پڻ همروم ڪرڻ. ③4 ان جي ٽمي رُوڳا اُوئون نٿه اُوڌارا ڏيو، جيا ٿي پاسا ليڏا رو آسريو هوئھ، تو ٽمي ٿورا جيوو ڪي ڪريو؟ ڪم تو ڏوهاري پڻ پيزون ڏوهاريون نٿه اُوڌارا ڏئھ زم اُو ٻڌائي پاسا لي هڪئھ.

③5 پڻ ٽمي آپرون ڏشمئون ٿي پريم راکو، اُوئون ٿي ڀلائي ڪرو، ان اُوئون نٿه اُوڌارا ڏيو، پڻ پاسا ليڏا رو آسريو مت راکو، تو تمون نٿه ايوزو گھڻو زڙشي، ان ٽمي پرميشور را ٻاڙ هوشو، ڪم تو پرميشور ٿورا نه مونيا وازون ان پُونڌون منڪون مانھ پڻ ميرپونئي ڪرڻ. ③6 زم تمارو ٻاپ پڳوون قياس ڪريا وازو سئھ، تم ٽمي پڻ قياس ڪريا وازا ٿيو.

پيزون رو ڏوھ نہ ڪايو پڻ آڀرا ڏوھ نئ زوو

(متي 1:7-5، لُوقا 37:6-42)

③7 ”ٽمي پيزون رو ڏوھ مت ڪايو، تو پڳوون تمارو ڏوھ پڻ نئين ڪاڍئھ. پيزون رئي ڳلا مت ڪرو، تو پڳوون تمارئي ڳلا پڻ نئين ڪرڻ. پيزون نٿه ماڻهي ڏيو،

تو پڳوونَ تمون ننه پڻ ماڦڻي ڏيشي. (38) پڙون ننه ڏيو، تو پڳوونَ تمون ننه پڻ ڏيشي. اُو ماڦ ٿي گهڻو ڏيشي، زوڻه ٺونڀڙا ننه ڏپووين، ڊميڙين، تار پرينَ تماري زهوڙي موئين نوڪشي. ڪم تو جيا ماڦ ٿي تمي ماڦين ڏيوه، اُوئا ماڦ پرموڻه پڳوونَ تمون ننه ڏيشي.

(39) پسڻه ايسو اُوئون ننه آڳيووني را پارام اي مثال رڻي وات همپڙاڻي: ”اونڌو اونڌا ننه مارڳ ڏيکارڙي هيڪشي، ڪي؟ جي ام ڪرڻه، تو هي ئي زڻا کاڌ موئين پڙشي. (40) شيلو آڀرا ڳرو ٿي موٽو نٿي. پڻ زڻيون ٻڌي واتون شيڪشي، تڻيون هر هيڪ شيلو ڳرو جيوو ٿي زاشي.

(41) تمي ڪم پڙون رو ڏوه ڪاڏين زوڻه آڀرا پاڻي ري اونڪ موئين ڪٽر زوڻه، پڻ تماري آڀري اونڪ موئين جيو لاڪڙ پڙيوه اُوئا رو تمون ننه ڪئين ڪيال ئي نٿي؟ (42) زڻيون تماري آڀري اونڪ موئين لاڪڙ نٿي ڏيڪتا، تو تمي ڪم ڪرين آڀرا پاڻي ننه ڪيشو جي ’پاڻي، لئه ٿاري اونڪ ٿي ڪٽر ڪاڏون.‘ ڪوٽون منڪون، تمي مونڊا را مينا پڻ انڌر را ڪارا سو. تمي آڀرا ڏوه ساڏين پڙون را ڏوه زوڻه. پيرهين تمي آڀري اونڪ ٿي لاڪڙ ڪاڏو، پسڻه تمي آڀرا پاڻي ري اونڪ رو ڪٽر ٺاڻوڪا نمونا ٿي زوئين ڪاڏي هيڪشو.

جيوو وڻ تڻيو ميوو

(متي 16:7-20، 33:12-35، لُوقا 43:6-45)

(43) ”وات اي سڻه، ڪيا پڻ ٺاڻوڪا وڻ موئين پُونڌا ميوا نٿي ٿيڻا، نڪو وڙي ڪيا پُونڌا وڻ موئين ٺاڻوڪا ميوا ٿنھ. (44) هر هيڪ وڻ آڀرون آڀرون ميوون ٿي اوڙڪاڻھ. ڪم تو ٻورڙيون موئين انجیر را ميوا ڪيڏي نٿي ٿيڻا، نڪو ڪنڊيرون موئين ڌراڪون را ميوا ٿنھ. (45) هيوڻه نمونڻه ٺاڻوڪو منڪ آڀرا من موئين راڪل ٺاڻوڪيون واتون موئين ٿي ٺاڻوڪي واتون ڪاڏنھ. ان پُونڌو منڪ آڀرا من موئين

راکل پُونڌيون واتون موئين ٿي پُونڌي واتون ڪاڍڻ. ڪم تو جيويون واتون ٿي من پرل سڻ، ايوي واتون منڪ ٻولشي.

بيئون گهر نايا واڙون رو مثال

(متي 7: 24-27، لوقا 6: 46-49)

④٦ ”تمي مون نڻه ’پرپو، پرپو‘ ڪوه، تو پسڻه ماريون واتون مانھ ڪم نٿي ویتا؟ ④٧ جيو ڪوئي پڻ مون ڪن آڻه ان ماري واتون هومپڙين ايئون مانھ وڻه، هون تمون نڻه همپڙاونھ جي او ڪيا جيوو سڻ. ④٨ او ايٿا منڪ جيوو سڻ جيئڻه آپرو گهر نايا هارو اُونڌئي پُنياد ڪوترين پتر مانھ اوپاڙئي. زئيون ڌريا رئي ٻوڏ آوئي، تو ٻوڏ رو پوئي اونا گهر نڻه زور ٿي آوين لاگيو، پڻ گهر نڻه لوڏو ئي نه آيو، ڪم تو گهر ڏاڍو ناول هتو. ④٩ پڻ جيو ماري واتون هومپڙين اُونون مانھ نٿي ويتو، او ايٿا منڪ جيوو سڻ جيئڻه پُنياد ڪوتريا وگر امروم زمي مانھ گهر نايو. زئيون ڌريا رئي ٻوڏ اونا گهر نڻه زور ٿي آوين لاگئي، تو او گهر هٿمارو پڙي گيو ان هاو ڪم ٿي گيو.“

ڌاري قوم رو قوچ رو ساب ايسو مانھ يقين راکڻه

(متي 5: 8-13، لوقا 7: 10-11)

7 ① زئيون ايسو منڪون نڻه آپري ٻڌي واتون همپڙاوي ريو، تئيون ڪفرنحوم شهر موئين آيو. ② اونا شهر موئين هيڪ ڌاري قوم رو منڪ هتو جيو رومي قوچ رو ساب هتو. اونا رو نوڪر گهڻو مونڏو هتو ان مريا واڙو هتو. قوچ رو ساب اونا نوڪر رو گهڻو مون راکتو. ③ تيام زئيون ايئڻه ايسو را پارام هومپڙيو، تئيون يهودي قوم رون موتون منڪون نڻه ايسو ڪن منٿ ڪروا ميليا، جي او آوين نوڪر رو جيو پڇاڻه. ④ او ايسو ڪن آوين ٻونئون ٻونڌين ڪيا مڌيا: ”اونا رئي مدت ڪم تو او نائوڪو منڪ سڻ. ⑤ او آپئي قوم رئي گهڻي

راڪڻه ان جيو پڳوون رو منڌر امارو سٺه، اُوڻه آپ امون نئه ٿوراوي ڏيڏوه. "
 ⑥ پسنه ايسو اُونئون پيڙو ٿين ساڀ را گهر هومو روونو ٿيو.

زئون ايسو گهر ڏوڪڙو آيو، تو قوچ رئه ساڀ آپرون دوستون هات اي ڪي
 ميليو: "ساڏو جي، تمي گهڻي تڪليب مت ڪرو! ڪم تو هون ايوو نٿي جي تمي
 مارا نيچ گهر موئين آو. ⑦ تيام مئين آپ نئه تمون ڪن آيا جيوو نه هزميو.
 پڻ تمي روڳا ڪو، تو تمارا ڪيڏا ٿي مارو نوڪر ٿيڪ ٿي زاشي. ⑧ اي مون نئه
 ڪبر سٺه، ڪم تو هون آپ پيڙون را ڪيڏا هيٺ سون، ان مون هيٺ قوچي سٺه.
 هون هيڪا نئه زايا رو ڪون، تو او زاشي، ان پيڙا نئه آيا رو ڪون، تو او آوشي،
 ان مارا نوڪر نئه ڪئينڪ ڪوم ڪريا رو ڪون، تو او ڪرشي."

⑨ ايسو اي واتون هومپڙين حيرون ٿي گيو. پسنه پاسو ڦرين اُوڻه آپ وونهڙ
 آيا واڙون گهڻون منڪون نئه ڪيڏو: "هون تمون نئه ڪاتري ٿي ڪونه، ايوو يقين
 مئين آڀني اسرائيلي قوم موئين پڻ ڪيڏي نٿي ڏيڪيو."
 ⑩ پسنه جيا منڪ ميلل هتا، اُوڻي پاسا گهري زائين زويو، تو نوڪر هازو
 هورو ٿي گيوه.

ايسو هيڪي رنڌال اشيتري را ڏيڪرا نئه جيوتو ڪرڻه



⑪ تيا ڪيڙ ايسو نائين نومي شهر گيو،
 ان اُوڻا را شيلان پيڙا گهڻا منڪ پيڙا
 هتا. ⑫ زئون ايسو شهر ري پينت را

ڌروازا ڪن پوگيو، تئيون هومو زوڻه، تو منڪ لاش اُوپاڙين آوڻه ريا. جيو جوڻ
 سوڪرو مري گيو تو، او آپري مان رو هيڪڻه ڏيڪرو هتو، ان اُوڻا رئي مان
 رنڌال هتي. ان شهر را گهڻا منڪ اُوڻا ري مان پيڙا ڪونڌي ٿين آوتات ريا.
 ⑬ زئون ايسو رنڌال اشيتري نئه ڏيڪي، تئيون ايسو نئه ڏيا آوڻي ان اُوڻا نئه
 ڪيڏو: "رو مت! سونڀي رئه!" ⑭ پسنه ناڙي ڪن ڏوڪڙو آوين اُوڻا نئه هات

آڏو ڏيڌو، تو کونڌي اُپي ريا. تئين ايسو ڪيڏو: ”او سوڪرا، هون تون نٿه ڪونه، اُئي!“ (15) تيا مانھ مرل سوڪرو جيوتو ٿي گيو، ان ائين پينو ان ٻولوا مڏيو. پسنه سوڪرو اوتا ري مان نٿه ڏيڌو پرو.

(16) تئين ٻڌائي منڪ اي ڪڙا ڏيڪين حيروني پڙي گيا، ان پگهون را وڪوڻ ام ڪروا مڏيا: ”آپون موئين پگهون رو هيڪ موٽو نياپو ڏيڏا وازو ساو وٺيوه. پگهون آڀري سونڊل قوم رو ڪيال راڪيوه.“ (17) ايسو را پارام اي وات پورا يهوديه ملڪ ان آها پاها رون پيزون ملڪون موئين ٻڌيل پڪڙي گئي.

يوحنا جيل ٿي آڀرون شيلون نٿه ايسو ڪن ميلهه

(متي 23:11-6، لوقا 18:7-23)

(18) يوحنا ري شيلي اوتا نٿه ايسو ري ٻڌي واتون همپڙوي. (19) تيام اوتھ آڀرون شيلون موئين ٿي پئون زئون نٿه تيڙاوين پڪ ڪريا هارو پڙيو ايسو ڪن اي وات پونسوا ميليا: ”ڪي تم پگهون را سونڊل پچايا وازا سو، جيا را آيا را پارام شاستر ۾ لڪل سٺه، ڪا امي پڙا ڪياڪ رئي وات زوئون؟“

(20) تئين اُئي پئي زئي ايسو ڪن آوين ڪيڏو: ”يوحنا پوٽر سنون ڏيڏا وازھ امون نٿه تمون ڪن اي وات پونسوا ميليا: ڪي تم پگهون را سونڊل پچايا وازا سو، جيا را آيا را پارام شاستر ۾ لڪل سٺه، ڪا امي پڙا ڪياڪ رئي وات زوئون؟“

(21) اوتھ توڻه ايسو گهڻون مونڏون نٿه پيماريون ان تڪليبون ٿي ٺيڪ ڪريا، ان گهڻون منڪون ٿي پوت ڪاڍيا، ان گهڻون اونڌون نٿه هازا هورا ڪريا. (22) پسنه ايسو يوحنا رون ميلل شيلون نٿه ڪيڏو: ”تمي زائين جئين ڪئين تمي ڏيڪيوه ان هومپڙيوه، او يوحنا نٿه همپڙيا، جي اونڌا ڏيڪي هيڪه، رونگڙا وي هيڪه، ڪوڍيا هازا هورا ٿين اڀڙايا ٿي پوٽر ٿه، ٻوڙا هومپڙه، مرل منڪ جيوتا ٿه ان گريهون نٿه ڪشي رئي ڪهر همپڙاوي زاهه.“ (23) ان پاگواڙا او سٺه

جيا مُون مانھ ڪئين ئي شڪ نٿي ڪرتا، جي هُون اُو هاڳي پڳوونَ رو ميلل پڇايا وازو سون.

ايسٽو منڪون نٿَ يوحنا را پارام هزماوئھ

(متي 11:7-19، لوقا 24:7-35)

②4 زئيون يوحنا را ميلل شيلا پاسا ڳيا پرا، تئيون ايسٽو ٻڌون منڪون نٿه ڪيا مڏيو: ”زئيون تمهي رڻ موئين يوحنا ڪن ڳيا تا، تو تمهي ڪي زووا ڳيا تا؟ تمهي ايوو منڪ زووا ڳيا تا ڪي، جيا را ويچار سر را زم وائيرا ٿي ڏڳتا رٿه؟ ②5 پسنه تمهي ڪي زووا ڳيا تا؟ ڪياڪ نائوڪا لوگهڙا پيرل منڪ نٿه زووا ڳيا تا، ڪي؟ نا، اُو جيا اُونچون م اُونچا لوگهڙا پيرٿه ان هڪ ان موج موئين رٿه، اُو تو يادشائون رون مولاتون موئين بيٺا هونھ. ②6 پسنه تمهي ڪي زووا ڳيا تا؟ ڪي هڪا پڳوونَ رو نياپو ڏيڏا وازا نٿه؟ هووئھ پيزو. هُون تمون نٿه ڪاتري ٿي ڪونه جي يوحنا پڳوونَ رو نياپو ڏيڏا وازو تو سٺه، ان هيا ٿي موتو پڻ سٺه. ②7 يوحنا اُو سٺه جيا را پارام شاستر موئين پڳوونَ رٿي اي ڪيڏل وات لڪل سٺه: ’زو، هُون آڀرو نياپو ڏيڏا وازو تُون ٿي مور ميلونھ، اُو ٿارا آيا مور تُون هارو مارڳ تيار ڪرشي.’

②8 هُون تمون نٿه ڪاتري ٿي ڪونه، پوري دنيا رون منڪون موئين يوحنا ٻڌون ٿي موتو سٺه. توئي پڳوونَ را راز موئين جيو ٻڌون ٿي نونو سٺه، اُو پڻ يوحنا ٿي وڌارنھ پاڳوازو سٺه.

②9 زئيون يوحنا پڳوونَ رو نياپو ڏيڏو تو، تئيون اسرائيلي قوم ري ٻڌي نوني منڪي، ان ناڪو ليڏا وازي پڻ، يوحنا ڪن پويتر سنون ليڏا ٿي پڳوونَ ري وات نٿه هاسئي مونئي تئي. ③0 پڻ موتي فريسي پالتي ري منڪي ان شاستر زوٿيا وازي يوحنا ڪن پويتر سنون نٿو ليڏو، ان هيوتھ نمونھ اُوئي پڳوونَ رٿي مرضئي آڀ هارو پوري نه ٿيا ڏيڏي.

③① پستھ ايسو ڪيتو: ”هون تو ڪي ڪون؟ ايتا زمونا را منڪ ڪيا سئھ؟
اي ڪيا را گهوڙ سئھ؟ ③② اي منڪ اوئون ٻازون را گهوڙ سئھ، جيا شهر را پونا
موئين رمتون پيزون ٻازون ٿي ڌار پيهين ام ڪئھ:

’امي رميا هارو وونهڙي وگاڙي، پڻ تمي تو رميا ٿي نئين.
امي پار لين رويا، پڻ تمي رويا ٿي نئين.’

اُئون ٻازون را زم تمي ڪيئھ پاهئھ ڪش نٿي. ③③ ڪم تو يوحنا پويتر سئون
ڏيڏا واڙو آيو ان او نڪو روٿي کاتو نڪو ڌراڪون رو رس پيتو، تيام تمي ڪوھ
جي ’ايتا نئھ پوت سونٽل سئھ.‘ ③④ پڻ هون منڪ ذات رو ڏيڪرو آيوھ، ان هون
پيزون را زم روٿي ڪائونھ ان ڌراڪون رو رس پيئونھ، توڻي پڻ تمي مارا پارام
ڪوھ: ’ايتا نئھ زوئو. اي لڙو ان شراپي سئھ. اي تو اڀڙال ناڪو ليڏا واڙون ان
هيون ڏوھاريون رو دوست سئھ.’

③⑤ توڻي پڻ زتا منڪ هاس ۾ عقل واڙا سئھ، او پگھون رو نياپو مونئھ، ان
وات ساوئي ڏيڪاڙھ جي او نياپو پگھون ري عقل ٿي ڏيڏل نياپو سئھ.”

هڪ ڏوشي آڀرا پونڌا ڪوم ساڌين ماڦي رو ٿورو مونيا هارو ايسو ڪن اوئھ

③⑥ هڪ وار فريسي پالتي رھ شمعون نومي هڪئھ منڪ ايسو نئھ آڀري گھري
کاڌا رٿي ڌاوت ڏيڏي، تو ايسو اوئا فريسي ري گھري زائين رواز پرموئھ
ڪوٺي وروئو آڏو پڙين روٿي ڪاوا مڏيو.



③⑦ اوئا ٿي شهر موئين هڪ ڏوشي ريتي جي اڳي
پونڌو ڪوم ڪرتي. زئون اوئا نئھ ڪبر پڙي جي ايسو
هڪا فريسي ري گھري ڌاوت مانھ آيوھ، تئيون او سنڳي
مرمر رٿي عطر واڙي ڪونپلي لي آئي، ③⑧ ان ايسو ري
پگھوئي اوي رٿي. او روٿي روٿي ايسو رون پگھون نئھ آڀرون هونھوڙون ٿي

پلاڙتڻيٽ رڻي ان آڀرون مٿوڙون ٿي پونهتڻيٽ رڻي، ان ڀڳون نٿه ٻوسڪا ليتڻيٽ رڻي ان اوئون مانھ عطر هٽيٽ رڻي.

③9 تيام فريسي جيئھ ايسو نٿه ڏاوت ڏيڏي ٿي، اي ڏيڪين من موئين ام سوچو مڏيو: ”جي اي منڪ ڀڳوون رو نياپو ڏيڏا وازو هوٽ، تو ايٺا ڏوشي نٿه ضرور اوڙڪت جي اي ڪيوئي ڏوشي سٺه جيئي ايٺا نٿه سٺھ رڻي، ڪم تو اي هاو ڪراڀ ڏوشي سٺه.“

④0 تو ايسو فريسي نٿه ڪيڏو: ”شمعون، مارٺ تون ٿي ڪئينڪ وات ڪروھ.“ تو فريسي ڪيڏو: ”گرو جي، پلٺھ ڪو.“

تئين ايسو هيڪ مثال ڏين ڪيڏو: ④1 ”هيڪا منڪ را ٻي قرضي هٿا. هيڪا مانھ پنجويھ هزار روپيا قرض هٿو، ان پيزا مانھ روڳا اڍائي هزار. ④2 پڻ اوئون بيئون ڪن ڪئين نٿو جي اوٺا نٿه پئيھا پاسا ڏٺ، تيام اوٺه بيئون نٿه آڀرو قرض ماڦ ڪريو پرو. هوٺه ايئون بيئون موئين ٿي ڪوٺ اوٺا رو گهٽو ٿورو مونشي؟“ ④3 شمعون اوٺا نٿه وڙنڏي ڏيڏي: ”مارا هزميام او جيا نٿه گهٽو قرض ماڦ ڪريو.“ تو ايسو اوٺا نٿه ڪيڏو: ”تئين صحيح هزميوھ.“

④4 پسنھ اوٺا ڏوشي هومو قرين ايسو وڙي شمعون نٿه ڪيڏو: ”تون ايٺا ڏوشي نٿه زوئھ ريو؟ هون ٿاري گھري آيو، ان تئين مون نٿه ڀڳ ڌويا هارو پوئي نه ڏيڏو، پڻ ايئھ ڏوشي مارا ڀڳ آڀرون هونھوڙون ٿي پلاڙياھ ان آڀرون مٿوڙون ٿي پونهياھ. ④5 تئين مون نٿه مون ڏيڏا هارو ٻوسڪو نه ليڏو، پڻ زم هون آيو، ته اي ڏوشي مارون ڀڳون نٿه ٻوسڪا ليتي رئيھ. ④6 تئين مارا ماتام تيل ئي نه نوڪيو، پڻ ايئھ ڏوشي تو مارون ڀڳون نٿه عطر هٽيوھ. ④7 ايئون واتون ري ڪري هون تون نٿه ڪاتري ٿي ڪونھ جي جيا گهٽا ڏوھ ايئھ ڏوشي ڀڳوون را ڪرياھ، او ٻڌائي ماڦ ٿي ڳياھ. اي وات ساوئي سٺھ ڪم تو ايئھ گهٽو پريم ڪريوھ. پڻ جيا را ٿوڙا ڏوھ ماڦ ٿئھ، او ٿوڙو پريم ڪرئھ.“ ④8 پسنھ ايسو ڏوشي نٿه ڪيڏو: ”ٿارا ڏوھ ماڦ ٿي ڳياھ.“

(49) تئيون جيا منک اوتا داوت موئين ايسو پيزا کاتات ريا، او من موئين سوچوا مڏيا: "اي کوڻ سٺه جو ڏوه پڻ ماڻ ڪرڻ؟"
 (50) پڻ ايسو اوتا ڏوشي نه ڪيڏو: "تئين يقين ڪريو، تيام تون ڏوهون ري سزا ٿي پڇي گهيڏ. زا ان هڪي رڻه."

ڪئينڪ اشيتري ايسو ري واتون هومپزيا هارو شيلون را ٿوڙا پيزي وٺه

8 ① تيا ڪيڙ ايسو شهر شهر ان پاڙه پاڙه پنڌ ڪرتون منڪون نه شيڪاڙتو ريو ان پگهون را راز رئي ڪهر ڏيتو ريو. ان ايسو پيزا اوتا را ٻارڻه سونڊل شيلا هتا، ② ان ڪئينڪ ڏوشي پڻ پيزي هتي جيون نه ايسو پوتون ان پيماريون ٿي سڏاوي تي. اوتون موئين مريم هتئي جيا نه مگدلينني ڪيتا ان جيا ٿي ايسو هات پوت ڪاڍيا تا، ③ يوتانه پڻ هتئي جيا رو خوزه نومي آدمي هيروديس را مولات رو موٽو منچي هتو، ان سوسناه ان پيزي پڻ گهڻي ڏوشي هتي، جي آپري ملهگت ٿي ايسو ان اوتا رون شيلون رو ڪرچ پرين شيوا ساڪري ڪرتي.

پيز وايا واڙا رو مثال

(متي 13: 9-13، مرقس 4: 1-9، لوقا 8: 4-8)



④ زئيون شهر شهر ٿي الاهي گهڻا منڪ ايسو ڪن آوين پيزا ٿيا، تئيون ايسو اوتون نه اي مثال رئي وات همپزاوئي: ⑤ "هڪ هاڙي هتو. ان او پيز واووا گيو. پيز واوتون واوتون، پيز را ڪئينڪ ڏوٽا شيرڙا مانھ پڙيا، ان منڪي ماڻه وي وين لتاڙيا پرا ان پسڻه پڪي اوتون نه ڪائي گيا. ⑥ ان ڪئينڪ پيز را ڏوٽا پٿر واڙي زمي موئين پڙيا، ان اوگيا ٿي مس تو هوڪائي

گيا، ڪم تو زمي موئين وٽ نٿي. ⑦ ان ڪئينڪ پيز را ڏوٽا ڪنڊيرون واري زمي موئين پڙيا، ان ڪنڊيرا پيز پيڙا اُوگيا ان اُوئون نٿه ڏپويا پرا. ⑧ ان ڪئينڪ پيز را ڏوٽا پلي زمي م پڙيا، ان اُوگين ايو پلا ٿيا جي هيڪوڪا هرا موئين هو هو ڏوٽا ٿيا.

اي وات ڪرين ايسو زور ٿي ڪيڏو: ”هومپڙيا واڙون، تمي ماري وات مانھ ڏيون ڏيو.“

ايسو هڙماوئھ جي اُو مثالون ٿي ڪم شيڪاڙئھ

(متي 17-10:13، مرقس 12-10:4، لوقا 10-9:8)

⑨ پسئھ ايسو ري شيلي اُوٽا ٿي پُونسيو: ”اينٽا مثال رو مطلب ڪي سئھ؟“ ⑩ تيا مانھ ايسو ڪيڏو: ”پڳوون را راز ري اُوڏي واتون اُوٽھ تمون شيلون نٿھ هڙموا ڏيڏيھ، پڻ پيزون منڪون نٿھ مارئھ مثالون ٿي همپڙاووھ، جيا ٿي اُو زوشي پڻ ڏيڪشي نئين، ان هومپڙشي پڻ هڙمشي نئين.“

ايسو پيز وايا واڙا را مثال رو مطلب هڙماوئھ

(متي 23-18:13، مرقس 20-13:4، لوقا 15-11:8)


⑪ ”هوتھ اينٽا مثال رو مطلب اي سئھ: پيز پڳوون رو وچن سئھ. ⑫ جيا ڏوٽا شيرڙا مانھ پڙيا تا، اُوئون رو مطلب ايو منڪ سئھ جيا وچن هومپڙئھ، پڻ اُوئون ڪن پڳوون رو ڏشمڻ شيطون آوين اُوئون رون منون ٿي وچن ڪاڍي لئھ، زم وچن اُوئون نٿھ ويھري زائھ ان اُو يقين نہ راکئھ ان اُوئون نٿھ تارڻ نہ زڙئھ. ⑬ جيا ڏوٽا پتر واري زمي موئين پڙيا تا، اُوئون رو مطلب ايو منڪ سئھ جيا وچن هومپڙين ڪُشي ٿي مونئھ، پڻ زم مثال موئين اُوئون ري پاڙون اُوڏي نتي، تم اُوئون رو يقين پڪو نٿي، تيام اُو ٿوڙيڪ وار يقين راکئھ، پڻ زئيون آزمتا رو ڏورو ٿوٽو اُوئھ، تئيون ڦري زائھ. ⑭ جيا ڏوٽا ڪنڊيرون واري زمي موئين

پڙيا تا، اُوئون رو مطلب ايوَا منڪ سٺه جيا وڃن هومپڙو پڻ پسنه هٿيون هٿيون
حياتي ريون گهٽيون، مال ملڳت، ان عيش عشرت موئين ڦاٽي زانه، ان اُوئون رو
يقين وڌو نٿي. ان زم اُوئون ڏوئون ٿي هرا نٿا ٿيا، ته اُوئون منڪون ٿي نائوڪا
ڪوم نٿي ٿيا. ⑮ پڻ جيا ڏوئا ڀلي زمي موئين پڙيا تا، اُوئون رو مطلب ايوَا
منڪ سٺه جيا هاسا من ٿي وڃن هومپڙو ان من موئين راکتا ره. ان زم اُوئون
ڏوئون ٿي هرا پاڪيا تا، ته اُو منڪ ڏوروڻ صير ٿي سهين پڪو يقين راکين
نائوڪا ڪوم ڪرڻه.

ڏيوا رو مثال

پڳوون را وڃن مانه يقين راکو ان پيزون نٺ هومپڙاوو

(مرقس 21:4-25، لُوقا 16:8-18)



⑯ ”ڪوئي منڪ ايوو نٿي جو ڏيوو ٻارين
اُوئا نٺه لونڙا هيٺ ڍونڪڻه ڪا ڪاٿلا
هيٺ ميلهه. پڻ هر منڪ ڏيوا نٺه اُوئا ري
جڳا ۾ ساوو ميلهه زم گهر موئين آيا
وازون هارو سوجهرو ٿنه. ⑰ ڪم تو جئين
ڪئين هٿال سٺه، اُو ساوو ٿيشي، ان هر
وات جو هٿال سٺه اُوئا رٿي ڪهر پڙشي
ان ساوئي ٿيشي. ⑱ تيام هوشيار ريا جي

تمي هاسا من ٿي پڳوون رو وڃن هومپڙو، ڪم تو جيو منڪ وڃن مونڻه،
پڳوون اُوئا نٺه وڃن هزميا رٿي وڌارڻه گهٽئي هيٺ ڏيشي. پڻ جيو منڪ وڃن
نٿي مونڻو، جيو وڃن اُوڻه هومپڙيو، اُو وڃن هزميا رٿي هيٺ پڻ اُوئا ڪن ٿي
ڪوهراشي.

جيا پڳوون ري وات مانھ وئھ اُو ايسُو نئ مان ان پايون را زم پريمي سئ

(متي 12:46-50، مرقس 3:31-35، لُوقا 19:8-21)

①٩ تئيون ايسُو رئي مان ان پائي اوتا ڪن آيا، پڻ گهڻا منڪ هويا ري ڪري اوتا هوڏي پوڳي نه هڪيا. ②٠ تيا مانھ ڪيٽيڪ ايسُو نئ ڪيڏو: ”تمارئي مان ان پائي ٻارا اُپاھ. اُو تمون ٿي مزوا ڪرھ.“ ②١ پڻ ايسُو اوتون نئ ڪيڏو: ”اي منڪ، جيا پڳوون رو وڃن هومپڙھ ان اوتا مانھ وئھ، اي ماري مان ان مارون پايون را زم سئھ.“

ايسُو واوڙ نئ پنڌ ڪرھ

(متي 23:27-28، مرقس 4:35-41، لُوقا 22:25-28)

②٢ هڪ ڏي ايسُو آپرون شيلون پيڙو پيڙي موئين سڙين اوتون نئ ڪيڏو: ”هالو، ڍنڍ رئھ اوتھ پاهئھ هالون!“ تئيون اُو پيڙي موئين زاوا مڏيا. ②٣ پيڙي رئھ ويتون ويتون ايسُو اُونگهائي ريو. پسئھ ايوئي گهاٽئي واوڙ ڍنڍ مانھ آوئي جي پيڙي پوئي ٿي پراوا لاڳئي، ان اوتون را جيو ڪترام هئا. ②٤ پسئھ اوتني ايسُو ڪن آوين اوتا نئ زڳاڙين ڪيڏو: ”گرو جي، او گرو جي، آبي ٻوڏونھ ريا!“

تيا مانھ ايسُو اُونگھ ٿي اُولين وائيرا ان پوئي ريون چوليون نئ پنڌ ٿيا رو ڪيڏو. تو اُو پنڌ ٿي گهي، ان ماڻ ٿي ماڻ ٿي گهي. ②٥ تئيون ايسُو شيلون نئ ڪيڏو: ”تمارو يقين ڪيھ؟“

شيلو اي ڪڙا ڏيڪين گهڻا حيروني پڙي گيا، ان آڀت موئين ام ڪياو مڏيا: ”اي ڪيوو منڪ سئھ، جو وائيرا ان پوئي نئ پڻ حڪم ڏئھ، ان اُو ايٿا رو ڪيڏو مونئھ!“


ايسو هيك منک ٿي گهڻا پوت ڪاڍه

(متي 28:8-34، مرقس 1:5-20، لوقا 26:8-39)

②6 پسته ايسو ان اوتا را شيلا پيڙي موئين را موئين گراسينيون را علاقا ۾ زائين پوگيا، جو گليل صويا ٿي ڏند رڻه پيڙه ڪپ سڻه. ②7 زئيون ايسو ڪپ مانھ اوتريو، تو اوت را ڍوڪڙا شهر رو هيك منک اوتا نڻه پيڙو ٿيو، جيا نڻه پوت سونتل هئا. او گهڻا وڪت ٿي نڪو لوگهڙا پيڙو، نڪو گهرون موئين ريتو، پڻ پونئيرا جيوون مقومون موئين ريتو.

②8 اي منک ايسو نڻه ڏيکين رڙ ڪرين ايسو ري پڳي پڙيو ان زور ٿي اوتا نڻه ڪيڏو: ”ايسو، پرميشور را ڏيڪرا، تارو مون ٿي ڪيوو ڪوم سڻه؟ هون تون نڻه منٽ ڪرونه، مون نڻه پوندي هاري سزا مت ڏنه.“

②9 اوڻه هم تيام ڪيڏو، ڪم تو ايسو پوت نڻه اوتا ٿي نيھريا رو



ڪيڏو تو. ڪم تو گهڙي گهڙي پوت اوتا منک را پنڌ موئين اوتو ريتو، ان موئنه اوتا نڻه هاتون پڳون م هونڪڙون پوندين قابو ڪرتا، توئي پڻ او هونڪڙون توڙو پري ان پوت اوتا نڻه هونواڙ موئين زوري لي زاتو.

③0 ٿيون ايسو اوتا منک ٿي پونسيو: ”تارو نوم ڪي سڻه؟“ تو اوڻه ڪيڏو: ”پلتن،“ ڪم تو اوتا موئين گهڻا پوت هئا. ③1 ان پوت ايسو نڻه منٽ ڪروا مڌيا: ”امون نڻه پڳوون رئي سزا کاڌا هارو نرڳ موئين مت ميل.“

③2 هوڻه اوڻه هونرون رو هيك موتو ولر هتو جو ڏونگر مانھ سرتوت ريو. تيام پوتي ايسو نڻه اي منٽ ڪري جي ”امون نڻه اوئون هونرون نڻه سونتوا ڏنه!“ ان ايسو اوئون نڻه موڪل ڏيڏي. ③3 ٿيون پوت اوتا منک ٿي نيھرين

هُوٿرون نٽه سونتي ڳيا، ان اُو ولر ڏونگر ٿي نيسو ڍوڙي آوين ڍنڍ موئين پڙيو، ان ٻڌائي هُوٿر ٻوڏي ڳيا.

(34) اي ڏيڪين هُوٿرون را ڌراڙ پاڳي ڳيا، ان اي وات شهر موئين ان ٻاراڙي موئين همپڙاوي. (35) تئيون منڪ اي وات زويا هارو آيا. ايسو ڪن آوين اوئي اُو منڪ ڏيڪيو جيا ٿي پوت نيهريا تا. اُو لوگهڙا پيرين صحيح ڏيماڳ ۾ ايسو ڪن پئو تو. اي ڏيڪين اُو پڻائي ڳيا.

(36) جيئي هائي ٻڌي وات ڏيڪي، زئيون اوئي اول منڪون نٽه همپڙايو جي پوت سونتل منڪ ڪم ڪرين هازو هورو ٿيو، (37) تئيون گراسينيون را علاقا ري ٻڌي منڪي ايسو نٽه منٿ ڪري جي ”امون ڪن ٿي زانو پرا!“ ڪم تو اوئون نٽه گهٽي پيڪ هتي.

پسئ ايسو ٻيڙي موئين سڙين پاسو زاوا مڏيو. (38) تئيون اُو منڪ جيا ٿي پوت نيهريا تا، اُو ايسو نٽه منٿون ڪروا لاڳيو: ”مون نٽه تمون پڙو هالوا ڏيو.“ پڻ ايسو پڙو هاليا رو نا پاڙيو ان اوٽا نٽه ڪيڏو: (39) ”تون پاسو آڀري گهري زا پرو، ان زائين همپڙايو جي پڳوون تون ٿي ڪيوئي نا نائوڪي پلائي ڪريه.“ پسئ اُو پاسو ڳيو ان زائين پورا شهر موئين همپڙايو جي ايسو مون ٿي ڪيوئي نا نائوڪي پلائي ڪريه.

ايسو هيڪي سوڪري نٽه جيوتئي ڪريه
ان هيڪي اشيتري نٽه هازئي هوري ڪريه

(متي 9:18-26، مرقس 5:21-43، لُوقا 8:40-56)

(40) زئيون ايسو وڙي گليل صوپا موئين پاسو آيو رو، تو ڍنڍ را ڪپ مانھ گهڻا منڪ اوٽا ٿي ڪشي ٿي مڙيا، ڪم تو ٻڌائي اوٽا رئي وات زوتات ريا. (41) اوٽه هيڪ منڪ هتو جيا رو نوم يائير هتو. اُو پڳوون را هيڪا منڌر رو آڳيوون هتو. اوٽه ايسو ڪن آوين اوٽا ري پڳي پڙين گهري هاليا رئي منٿ ڪري

④2 ڪم تو اوثا رڻي هيڪڻه ڏيڪرڻي هئي، زويام ٻارون سالون رڻي هئي،
او مريا واڙڻي هئي. تيام ايسو اوثا را گهر هومو وڍو، پڻ منڪ اوثا ماڻه
پڙتات ريا.

④3 اوئون منڪون موئين ٿي هيڪ اشيترڻي هئي، جيا ننه ٻارون سالون ٿي
زالوئي پيماري هئي ان هايا پيماري ري ڪري او اڙال هئي. اوثا ڪن جئين
ڪئين هتو، اوئه ڊاڪٽرون موئين ڪپايوت پرو، پڻ توئي ڪئين ڦاڻيڏو نتو ٿيو.
④4 او ايسو وونهڙ آوين اوثا ري ساڌر را شيڙا ننه سڀئي. تو جهت موئين او
هاڙڻي هوري ٿي گهي. ④5 تئيون ايسو پونسو: "مون ننه ڪوڻ سڀيوه؟" هر
هيڪ زڻه ڪيڏو: "هون نتي سڀيو." تئيون پطرس ڪيڏو: "گرو جي، وات اي
سئه جي منڪ گهاٽا سئه ان تمون مانھ پڙه ريا." ④6 پڻ ايسو ڪيڏو: "ڪوڪ
تو مون ننه سڀيوه، ڪم تو مون ننه تئيون ئي ڪبر پڙي گهي تئي جي ڪڙا مون
ٿي نيهره رڻي."

④7 زئيون او اشيترڻي هزمي گهي جي هون هٽائي نتي هيڪتي، تو ڏڪتي
ڏڪتي آوين ايسو ري پگي پڙي ان ٻڌون منڪون هومو ايسو ننه ڪيڏو جي
ڪيا ري ڪري هون تمون ننه سڀئي، ان ڪم ڪرين جهت موئين نيڪ ٿي گهي
پري. ④8 پسئ ايسو اوثا ننه ڪيڏو: "ڏيڪرڻي، تئين يقين ڪريو، تيام تون
نيڪ ٿي گهي. زا ان هڪي رئه!"

④9 هزون ايسو ام ڪيتوت ريو، تيا مانھ منڌر را آگيوون را گهر ٿي ڪيٽڪ
آوين آگيوون ننه ڪيڏو: "تمارڻي سوڪرڻي مري گهي. هوه گرو ننه تڪليپ
مئه ڏيو!" ⑤0 پسئ ايسو اي وات هومپڙين آگيوون ننه ڪيڏو: "پيٿائو مت!
روگو تم پگيون مانھ يقين راکو، تو تمارڻي سوڪرڻي پچي زاشي."

⑤1 زئيون ايسو آگيوون ري گهري آيو، تئيون اوئه روگو پطرس، يوحنا،
يعقوب ان سوڪري را مان ٻاپ ننه گهر موئين آوا ڏيڏا، ان پيزون ٻڌون ننه ٻارا
اوپا راکيا. ⑤2 او ٻڌائي منڪ سوڪري را پار لين روتات ريا ان وڙاپ ڪرتات

ريا. پڻ ايسو اوتون نٿه ڪيڏو: ”مت روئو! سوڪري مرئي نٿي، پڻ اونگهائي ريئھ.“ (53) ٿيا مانھ اُو منڪ ايسو مانھ نٿولي ڪروا مڏيا، ڪم تو اوتون نٿه ڪپر هٿي جي سوڪري تو مري گئيھ.

(54) پستھ ايسو اوتا سوڪري رو هاٿ زھالين ھاڏ ڏين ڪيڏو: ”او سوڪري، اوني پري!“ (55) پستھ اوتا سوڪري م وڙي جيو آيو رو، ان او جھت موئين اوني پري. ان ايسو ڪيڏو: ”سوڪري نٿه ڪئينڪ ڪاڏا رو ڏيو!“ (56) ٿيا مانھ سوڪري را مان ٻاپ حيروني پڙي ڳيا، پڻ ايسو اوتون نٿه گھڻو گھڻو ڪيڏو: ”اي وات ڪيا نٿه مت ھمپڙاويا!“

ايسو آپرون ٻارون سونڊل شيلون نٿ

ڀڳوون رو ڪوم ڪريا ھارو ميلھ

(متي 10:5-15، مرقس 7:13-13، لُوقا 9:1-6)

9 ① پستھ ايسو آپرون ٻارون سونڊل شيلون نٿه آپ ڪن تيڙيا، ان اوتون نٿه پوتون نٿه ڪاڏيا رئي ان مونڏون نٿه ھاڙا ھورا ڪريا رئي ڪڙا ان اڪتياري ڏيڏي. ② پستھ ايسو اوتون نٿه ڀڳوون را راز را پارام ھمپڙيا ھارو ان منڪون نٿه ھاڙا ھورا ڪريا ھارو ميليا، ③ ان اوتون نٿه ڪيڏو: ”پنڌ ھارو ڪئين مت لي زائو، نڪو لاڪڙي، نڪو زھوڙي، نڪو روڻي، نڪو پيھا، نڪو وڳو. ④ جيا ري گھري تمي مور ٿي زائو، زبي وار اوتا شھر ٿي رونا نه ٿيو، اوتا ئي گھر موئين ريا. ⑤ جيا شھر موئين منڪ تمون نٿه ڪشي ٿي آوا نه ڏٺ، تو اوتا شھر ٿي ٻارا ٺھرين آپرون ڀڳون رئي ڏوڙ پڻ ڪريا پري، جيا ٿي ٿاڀي نٿه جي اوني تماري وات نه ھومپڙي.“

⑥ پستھ او شيلو وڍا پرا، ان پاڙه پاڙه زائين ڪشي رئي ڪپر ھمپڙاوتا ريا ان ٻڌيل منڪون نٿه ھاڙا ھورا ڪرتا ريا.

راز ڪريا واڙو هيروديس ايسو ري ڪري ڳڻتيون موئين پڙي زائھ

(متي 14:1-12، مرقس 6:14-29، لوقا 9:7-9)

⑦ ھوئہ زئيون گليل صوپا مانھ راز ڪريا واڙو هيروديس هايون ٻڌيون واتون را پارام ھومپڙيو، تتيون او ڳڻتيون موئين پڙي ڳيو، ڪم تو ڪرڪ منڪ ايسو را پارام ام ڪيتا تا جي ”يوحنا جيوتو ٿي ڳيوھ“، ⑧ ڪوڪ ڪيتا تا: ”ايلياه وڙي ساوو ٿيوھ“، ان پڙا وڙي ڪيتا تا: ”اڳلوڪون پڳوون رو نياپو ڏيڏا واڙون موئين ٿي ڪوڪ جيوتو ٿيوھ.“ ⑨ تيا مانھ هيروديس ڪيڏو: ”يوحنا رو تو موئين ماڻو وڌايوت پرو، پسئہ اي وڙي ڪوڻ سئہ، جيا ري ايوي واتون ھون ھومپڙونھ ريو؟“ ان او ايسو ٿي مزوا ڪرتو نو.

ايسو پونس هزار ٿي وڌارئ منڪون نئہ روتئي ڪوراوئھ

(متي 14:13-21، مرقس 6:30-44، لوقا 9:10-17، يوحنا 6:1-13)

⑩ زئيون ايسو را مڪ شيلا اوڻا ڪن پاسا آيا، تتيون جئين ڪئين اوڻي ڪريو تو، ٻڌوئي ھمپڙايو. پسئہ ايسو اوڻون نئہ آپ پڙا نوڪلائي ۾ بيت صيدا شھر ھوما تيڙي ڳيو. ⑪ پڻ الاهي گھڻا منڪ، زئيون اوڻون نئہ ڪبر پڙي، تتيون ايسو وونھڙ روونا ٿيا. ايسو اوڻون ھون ڪشي ٿي مڙيو، ان اوڻون نئہ پڳوون را راز را پارام ھمپڙاوا مڏيو، ان جيا مونڏا ھتا، اوڻون نئہ ھاڙا ھورا ڪريا.

⑫ زئيون ڏي آتميا واڙو ھتو، تتيون ايسو ري ٻاري سونڊل شيلي اوڻا ڪن آوين ڪيڏو: ”ايئون ٻڌون نئہ موڪل ڏيو، زم آھئہ پاھئہ ٻاراڙي رون پاڙون موئين زائين ايئون نئہ کاڌا پيڏا رو زڙئہ ان ٽڪي رئہ. ڪم تو ايئئہ ھونواڙ موئين ڪي ٿي ھيڪئھ؟“

⑬ پڻ ايسو شيلون نئہ ڪيڏو: ”ايئون نئہ کاڌا رو تمي ڏيو!“ تيا مانھ



اُوئي ڪيڏو: ”امون ڪن رُوگي پونس روتي ان ٻي مشي سٺه. پيزو ڪئين نٿي. امي پٺيهون ٿي ايئون ٻڌون هارو ڪاڌو لي آوون، ڪي؟“ ¹⁴اُوئي هم ايٺا هارو ڪيڏو ڪم تو پونسڪ هزار رُوگا آڏمي هتا.

تئين ايسو شيلون نٿه ڪيڏو: ”ايئون نٿه پنجاه پنجاه را ٿوڙا ڪرين بيهارو!“ ¹⁵شيلي همروم ڪرين ٻڌون نٿه بيهاريا نا. ¹⁶پسٺه ايسو آپ او پونس روتي ان ٻي مشي پري لين آڪاش هومو زوئين اوئون هارو پڳوون رو ٿورو مونيو. ان اوئون نٿه پونگين شيلون نٿه ڏيتو ريو، ان شيلا منڪون نٿه ڏيتا ذاتا ريا. ¹⁷پسٺه ٻڌائي منڪ ڪائين ڍاڀيا. ان جيا ٽڪرا منڪي اوڳاريا تا، اوئون را ٻارٺه چٻا پروٺا.

پطرس ايسو نٿه پڳوون رو سُونڍل پڇايا واڙو ڪريست ڪٺه

(متي 13:16-19، مرقس 8:27-29، لُوقا 9:18-20)

¹⁸هڪ وار ايسو ان اوٺا را شيلا نوڪلائي ۾ هتا، ان ايسو هڪلو پراٽنا ڪرتوت ريو. پراٽنا ڪرين پسٺه اوئون ٿي پونسو: ”منڪ مارا پارام ڪي ڪٺه ريا جي هون ڪوڻ سون؟“ ¹⁹شيلي ڪيڏو: ”ڪوڪ ام ڪٺه ريا تم يوحنا پريتر سنون ڏيڏا واڙا سو؟ ڪوڪ ڪٺه ريا ايلياه سو، ان ڪوڪ ڪٺه ريا جي اڳلوڪون پڳوون رو نياپو ڏيڏا واڙون موئين ٿي هڪ وڙي جيوتو ٿيوه، ان تم اُو سو.“ ²⁰پسٺه ايسو وڙي پونسو: ”پڻ تم ڪي ڪوھ، هون ڪوڻ سون؟“ تيا مانھ پطرس ڪيڏو: ”تم پڳوون را سُونڍل پڇايا واڙا ڪريست سو.“

ايسو آپ مانه آيا وازون ڏکون ان موت را پيارام مور ٿي هميڙاوه

(متي 23-20:16، مرقس 33-30:8، لوقا 22-21:9)

②1 پڻ ايسو اوتون ننه گهڻو گهڻو ڪيڏو: ”اي وات ڪيا ننه مت هميڙايا.“
 ②2 ان وڙي ڪيڏو: ”اي ضرور ٿيڻي جي آڀي قوم را موتا منڪ، موتا پوزاري،
 ان شاستر زوتيا وازا مون منڪ ذات را ڏيڪرا ننه گهڻا ڏڪ ڏيڻي، ان مارا
 پيارام ڦينصلو ڪرشي جي هون پگهون رو سونيل پچايا وازو نتي پڻ ڪوڙو
 سون، ان منڪ مون ننه مارشي پرو، پڻ ترتمه ڏي پگهون مون ننه جيوي
 اوناڙشي.“

شيلو رڻ موت هوندي ايسو ري وات مانه ويو

(متي 28-24:16، مرقس 34-31:9، لوقا 27-23:9)

②3 پسئ ايسو ٻڌون ننه ڪيا مڏيو: ”جي ڪوئي مارو شيلو ٿين مون وونهڙ
 آوا ڪرڻ، تو او آڀرني مرضي ساڏنه ان موت هوندي ڏڪ سهين زوننه تاريخ
 تاريخ آڀرني هوندي اوڀاڙنه ان مارا مارگ مانه وين مون وونهڙ آوڻ. ②4 ڪم
 تو جيو ڪوئي مون ننه ساڏين آڀرو جيو پچاوا ڪرڻ، تو نيٺ اونا رو جيو
 نئين پچڻ، پڻ جيو ڪوئي ماري ڪري آڀرو جيو ڏيڏا هارو تيار سڻ، تو اونا
 ننه هميش رو جيون زڙشي. ②5 ڪم تو جي ڪوئي منڪ ٻڌي ٿي دنيا هات
 ڪرڻ، ان آڀرو جيو گهڻه پرو، ڪا اونا ننه جيو رو نقصون ٿڻ، تو اونا ننه
 ڪيو ڦاڻيڏو ٿيو؟ ②6 ڪم تو جيو ڪوئي ماري ڪري ان ماريون واتون ري
 ڪري منڪون ڪن مارو شيلو ڪيورايا ٿي لڙي مرشي، تو زئون هون آڀرا زبڪتا
 سوجها ڀر، مارا ٻاپ را زبڪتا سوجها ڀر، ان پويتر ڏوتون را زبڪتا سوجها
 ڀر پاسو دنيا ڀر آيو، تيون هون منڪ ذات رو ڏيڪرو پڻ اونا ننه مارو شيلو
 ڪيڏا ٿي لڙي مريه. ②7 پڻ هون تمون ننه هاس ڪونه، ايٿه اوڀل منڪون موئين

ٽِي ڪٽينڪ ايو سٺه جيا زئيون هُڊِي پڳوون رو راز نئين ڏيڪنه، تئيون هُڊِي نئين مرهه.

ايسو رو رُڀ زبڪتا سوجهرام ۾ پڌلئھ

(متي 17: 1-8، مرقس 9: 2-8، لُوقا 9: 28-36)

②8 ايسو رٿه اي واتون ڪريا ننه هفتو ڪڻ ٿيو، تو ايسو آپ پيڙا پطرس، يوحنا ان يعقوب ننه تيرين ڏونگر مانھ پرائنا ڪروا گيو. ②9 زئيون پرائنا ڪرتوت ريو، تئيون ايسو رٿي صورتا پڌلي گهي، ان اوتا را لوگهڙا اونڪيون ننه انزايا جيو ڌوڙا شيرت ٿي گيا. ③0 اوچتا ٻي منڪ ساوا ٿيا جيا ايسو ٿي واتون ڪرتات ريا. او موسيٰ ان ايلياه هتا، ③1 جيا زبڪتا سوجهرام ڏيڪارو ڏين ايسو را موت را پارام واتون ڪرتات ريا، جو يروشلم شهر موئين ٿيا وازو هتو.

③2 اوته توتنه پطرس ان پيڙا ٻي شيلاه گهڻي اونگه ۾ هتا. زئيون اوئون ننه هار ٿئي، تئيون اوئي ايسو رو زبڪتو سوجهرام ڏيڪيو ان او ٻي منڪ پيڙا اوڀل پڻ ڏيڪيا. ③3 پسٺه زئيون موسيٰ ان ايلياه ايسو ٿي زاوا مڏيا، تئيون پطرس ايسو ننه ڪيڏو: ”گرو جي، امي ڪتا پاڳوازا سون جي امي ايتنه سون. هوته امي ترڻ ڍاڙيا ناوون، هيڪ تمون هارو، هيڪ موسيٰ هارو، ان هيڪ ايلياه هارو.“ پڻ اوته اي وات سوچيا وگر ڪرئي تئي.

③4 هزون پطرس هم ڪيتوت ريو، تو واڏڙه آوين اوئون مانھ سونيو ڪريو. زئيون او واڏڙا ٿي ڍڪائي گيا، تئيون شيلاه پيڻائي گيا. ③5 ان واڏڙا موئين ٿي پڳوون رو آواز ام هومپڙيام آيو: ”اي مارو ڏيڪرو سٺه. مئين ايٿا ننه سونديوھ. ايٿا ري واتون مونو.“ ③6 زئيون اي آواز هومپڙيو، تئيون اوئون ننه ايسو هيڪلو ڏيڪيام آيو. پسٺه شيلي ماڻ ڪرئي، ان جي واتون ڏيڪي تي، اوئون را پارام اوئون ڏيئون ۾ ڪيا ننه ڪئين وات نه ڪرئي.

ايسو هیکا سوکرا ٿي پوت کاڍڻه

(متي 14:17-21، مرقس 9:14-27، لُوقا 9:37-43)

37 پڙيئه ڏي ايسو ان او ترڻ شيلا ڏونگر ٿي نيسا اوتريا، تو گهڻا منک ايسو نئه پيڙا ٿيا. 38 اوئون موئين ٿي هيڪڻه منک زور ٿي ڪيڏو: ”گرو جي، هون تمون نئه منٿ ڪرونه، مارا ڏيڪرا مانھ ڏيا ڪرو، ڪم تو اي مارو هيڪڻه ڏيڪرو سئ. 39 ايٿا را پنڌ ۾ پوت آوئھ، ان رڙ ڪرين ايٿا نئه پاڙئھ. اي چرڪون ڪاڻھ، مونڊئھ ڳوڻي آوئھ، ان پوت ايٿا نئه مرڙئھ ان پستھ مس مس ايٿا نئه ساڏئھ. 40 مئين تمارون شيلون نئه ايٿا پوت نئه ڪاڍيا رئي منٿ ڪري ٿي، پڻ او نه ڪاڍي هيڪيا.“

41 ٿيا مانھ ايسو منڪون نئه ڪيڏو: ”تمي جيا ايٿا زمونا را منک سو، تمي يقين ڪم نٿي راکتا؟ تمي ڪم اوڙئي سوچ راکوھ؟ مارئھ هزون ڪتي وار تمون پيڙو ريوو پڙشي ان تمارئي گلت سوچ سهو پڙشي؟“ تئيون اوئھ سوکرا را ٻاپ نئه ڪيڏو: ”ٿارا ڏيڪرا نئه ايل تيڙي آو!“

42 سوڪرو هزون اوتوت ريو، تو پوت سوکرا نئه هيٺ پاڙيو نو ان اوٿا نئه مرڙو مڏيو. پڻ ايسو پوت نئه ڌڙڪو ڏين نيھريا رو ڪيڏو، ان سوکرا نئه ھازو هورو ڪرين اوٿا را ٻاپ نئه ڏيڏو پرو. 43 پڳوون رئي ايوي ڪڙا ڏيڪين ٻڌائي منک حيروني پڙي ڳيا.

ايسو ٻيڙي وار آپرا موت را پارام مور ٿي همپڙاوئھ

(متي 22:17-23، مرقس 9:30-32، لُوقا 9:43-45)

زئيون ٻڌائي منک ايسو رون ٻڌون ڪومون مانھ حيرون ٿيٿا تا تئيون ايسو آپرون شيلون نئه ڪيڏو: 44 ”تمي اي مارئي وات من موئين راکيا، موٽھئھ مون منک ذات را ڏيڪرا نئه زھلاوشي ان منڪون رئھ خوالئھ ڪرشي پرو.“ 45 پڻ او اي

وات هُزَميا ئي نئين. وات اُوئون ٿي هتال رُئي زم اُو نه هُزمئه. ان اِينا را پارام ايسو ٿي پونسيا ٿي پيئاتات رِيا.

شِلا اَپت ۾ تڪرار ڪرڻ جي ڪيا رو گهڻو مون سئ

(متي 18:1-5، مرقس 9:33-37، لُوقا 9:46-48)

④6 پستھ شِلا اَپت موئين تڪرار ڪروا مڏيا جي ”آپون موئين ڪيا رو گهڻو مون سئ؟“ ④7 پڻ ايسو اُوئون رون منون را ڪيال اوڙڪي ڳيو، تيام هيڪ نونو پاڙ تيرين آپرا پاهام اُوپاڙيو ④8 ان شيلون نئه ڪيڏو: ”جو ڪوئي مون مانھ وشواس راڪيا ري ڪري اِينا پاڙ رو مون راکئھ، اُو مارو مون پڻ راکئھ. ان جو ڪوئي مارو مون راکئھ، اُو پڳوون رو مون پڻ راکئھ، جيئنه مون نئه ميليوه. ڪم تو جيو تمون موئين ٿي ٻڌون ٿي نونو سئ اوتا رو مون گهڻو سئ.“

جو تمارئ ڪلاڦ نٿي اُو تمارئ پاهئ سئ

(مرقس 9:38-40، لُوقا 9:49-50)

④9 پستھ يوحنا ايسو نئه ڪيڏو: ”ڳرو جي، امي هِڪا منڪ نئه تمارا نوم ٿي پوت ڪاڍتون ڏيڪيو، ان امي اوتا نئه هم ڪريا رو نا پاڙيو، ڪم تو اُو امون پيرو تمون وونهڙ نٿي ويتو.“ ⑤0 پڻ ايسو اوتا نئه ڪيڏو: ”اوتا نئه هوءَ مت روڪيا، ڪم تو جو تمارئ ڪلاڦ نٿي، اُو تمارئ پاهئ سئ.“

ايسو گليل صوڀا ٿي يروشلم شهر هومو زائھ

ايسو يروشلم شهر هومو زاوا مڏئھ

⑤1 زئيون ايسو رءَ آڪاش مانھ اُوپڙايا رو توڻو ڏوڪڙو آيو، تئيون اوتھ يروشلم هومو زايا رو پڪو ڦينصلو ڪريو، ⑤2 ان اوتھ آپ ٿي مورم منڪون نئه مليا. اُو

منڪ رَوونا ٿين ايسو رڻه ٽڪيا رڻي تيار ٿي ڪروا سامري قوم را هڪا ڌاريون را پاڙام آيا. (53) پڻ اوت ري منڪي ايسو ننه ٽڪوا نه ڏيڏو، ڪم تو او آپري يهودي قوم را دوم يروشلم هومو زاتوت ريو. (54) اي ڏيڪين ايسو ري شيلي يعقوب ان يوحنا اوتا ننه ڪيڏو: ”پرپو، جي تمار ٿي مرضي هون، تو امي تمارا ڪيڏا ٿي آڪاش ٿي ڏيوتا پاڙين ايئون منڪون ننه پاڙشون پرا (زم ايليپاه ڪريو تو).“ (55) پڻ ايسو اوئون ننه ڪيڏو: ”هم مت ڪو! (تمي ام هزموه جي امي پگهون رڻي وات ڪرونه ريا، پڻ تمي شيطون رڻي وات ڪروه ريا. ڪم تو هون منڪ ذات رو ڏيڪرو منڪون ننه ڪتم ڪروا نئين، پڻ پچاوا آيوه.“ (56) پسنه ايسو ان شيللا پيزا پاڙا هوما رَوونا ٿي ڪيا.

ايسو شيڪارڙه جي پورا من ٿي شيلو ٿيو


(متي 19: 8-22، لُوقا 9: 57-62)

(57) ايسو ان اوتا را شيللا آپرو شيرڙو لين زاتات ريا، تو هڪه منڪ ايسو ننه ڪيڏو: ”جيئنه پڻ تمي زاشو، هون تمارو شيلو ٿين تمون وونهڙ هاليه.“ (58) پڻ ايسو اوتا ننه ڪيڏو: ”لونڪيون رڻه ريا هارو ڌڙا سڻ، ان پڪيون را مازا سڻ، پڻ مون منڪ ذات را ڏيڪرا هارو ايوي ڪوئي جگا نٿي جيئنه هون آروم ڪري هڪون.“

(59) ايسو هڪا پيزا منڪ ننه ڪيڏو: ”مارو شيلو ٿين مون وونهڙ آو!“ پڻ اوئنه ڪيڏو: ”سادو جي، مور ٿي مون ننه زايا رڻي موڪل ڏيو. زتا ڏي مارو ٻاپ جيوتو سڻ، مارڻه اوتا رڻي شيوا ساڪري ڪرووه. مارا ٻاپ ننه زاكين پسنه هون آويه.“ (60) پڻ ايسو اوتا ننه ڪيڏو: ”جيا پگهون ري وات مانھ نٿي وينا او آپ مرلون را زم سڻ. پلنه او آپرون مرلون ننه زاكڻه. پڻ تون هالين منڪون ننه پگهون را راز رڻي ڪهر همپراو.“

(61) پيزنه پڻ هڪه منڪ ايسو ننه ڪيڏو: ”سادو جي، هون شيلو ٿين تمون

وونھڙ ھاليھ، پڻ مور ٿي مُون نئھ موڪل ڏيو جي گھري زائين ٻڌون ٿي مڙين موڪل لي آوون.“ ⑥2 پڻ ايسُو اُونا نئھ ڪيڏو: ”جيُو هڙ را مُونيا نئھ ھاٿ ۾ زھالھ ان وڙين وونھڙ زوئھ، اُو پڳوون را راز ھارُو نڪومو سئھ.“



ايسُو ستر شيلون نئھ پڳوون رو ڪوم ڪريا ھارُو ميلئھ

10 ① تيا ڪيڙ پريُو ايسُو پيڙا ستر شيلا آڀرا ڪوم ھارُو سُونديا ان اُوئھ آڀ ٿي مور اُوئون نئھ ٻي ٻي زئا هر اُونا شھر ان پاڙا ھوما ميليا جيئھ آڀرئھ زاوو تو.

② اُوئھ ميليا رئھ توئئھ اُوئون نئھ ام مثال ڏين پڳوون رو وچن ھمپڙا را يارام ھڙمايا: ”قصل تو الاهي گھڻو سئھ، پڻ لئيارا توڙا سئھ. تيام قصل را ڌڻي نئھ وينتئي ڪرو جي لٻارا ھارُو لئيارا ميلئھ. ③ تمي زائو! ھون تمون ريڊيون جيوون منڪون نئھ نارون جيوون منڪون موئين ميلونھ ريو. ④ تمي مَصِيَّتُون ٿي پچيا ھارُو آڀ پيڙو ڪئين مت ليا، نڪو ٻُئُو، نڪو زھوڙي، نڪو زوڙا. ان تمي شيرڙا مانھ ڪيا ٿي مڙيا ۾ ڪوئي مت ٿيا. ⑤ جيا جيا گھر موئين تمي زائو، مور ٿي اُونا گھر رون منڪون نئھ ڪيا: ’ھڪي ريو!‘ ⑥ جي اُوئھ ڪوڪ ھڪ ليڏا رئھ لائيق منڪ ھوشي، تو اُونا نئھ پڳوون ھڪ ڏيشي. پڻ جي منڪ لائيق نئين ھوئھ، تو اُونا نئھ نئين زڙئھ. ⑦ پستھ اُونا ئي گھر موئين ٿڪي ريا، ان

جئین تمون نئه کاڌا پڊتا رو ڌئه اُو کایا ان پیسا، کم تو کوم کریا واڙا نئه آپرئي مزورئي لڊتا رو حق سئم. گهر ئو گهر مت ٽکيا.

⑧ ان جیا جیا شهر موئین تمی زائو ان اوت را منک کُشي ٿي تمون نئه آووا ڌئه، تو جئین کئین کاڌا رو ڌئه، اُو کایا. ⑨ اوت شهر موئین جیا مونڌا هوئه، اوتون نئه هاڙا هورا کریا، ان اوت رون منکون نئه کیا: 'پڳوون رو راز تمون هومو ساوو ٿيوه، ان اوتو ڏوڪڙو آيوه زئيون پڳوون ساوئه نمونئه ٻڌون مانه راز کرشي.'

⑩ پڻ جیا جیا شهر موئین تمی زائو ان منک تمون نئه آووا نه ڌئه، تو گهرون ٿي نیهرين اوت ريون شیريون موئین اوپین ام کیا: ⑪ 'امي تمارا شهر رئي جي ڏوڙ امارون پڳون نئه سونٿيه، اُو پڻ کيرين زائونه ریا، زم ٿاپتي ٿي ٿي جي تمی پڳوون رئي وات نه مونئي. توئي پڻ تمی ام هزمیا جي پڳوون را راز رو اُو توتو ڏوڪڙو آيوه زئيون پڳوون ساوئه نمونئه ٻڌون مانه راز کرشي.' ⑫ هون تمون نئه کاتري ٿي کونه، جي اوت ڏي جيڏي پڳوون نیا کرشي، تیڏي پڳوون اوتا شهر رون منکون نئه هاو پونڌا شهر سدوم ٿي پڻ گهڻي سزا ڏیسي."

جيون شهرون را منک يقين نئي راکتا، اوتون نئه گهڻي سزا زڙشي

(متي 20:11-24، لُوقا 13:10-16)

⑬ ٽيون ايسو کڍتو: "ڏک سئه خرازين شهر رون منکون هارو، ان ڏک سئه بيت صيدا شهر رون منکون هارو، کم تو ايئون شهرون موئین پڳوون ري کڙا ٿي موٽا کوم ٿيا، توئي پڻ اوتی آڀرا کراب کوم ساڏين توبونه نه کرئي ان پڳوون ري وات مانه نه وُڍا. جي هیوا پرسا ڌاريا صور ان صيدا شهرون موئین ٿيا هوٽ، تو اوت را منک ويلا آڀرا کراب کوم ساڏين توبونه کرٽ، ان ٻاکريون ري زات ٿي ناول لوگهڙا پيرين ڏک موئین شيلي مانه بيهٽ، ان پڳوون ري وات مانه وٽ. ⑭ تيام اوت ڏي جيڏي پڳوون نیا کرشي، تیڏي اُو ايئون

شھرون رون منڪون نٿه ھاو ڀُونڌون صُور ان صيدا شھرون ٿي گھڻي سزا ڏيشي.
 (15) ان ڪفرنخوم شھر را منڪ، اُو ام سوچڻھ جي 'امي ناٿوڪا سون، امي
 آڪاش موئين پڳوون ڪن پوڳي ڳياھ.' پڻ پڳوون اُوئون نٿه مرلون را جڳت
 موئين هيٺ ڳڙشي پرا.

(16) پسڻه ايسو شيلون نٿه وڙي ڪيڏو: "جيا تماري وات مونھ، اُو ماري
 وات پڻ مونھ. ان جيا تماري وات نٿي مونتا، اُو ماري وات پڻ نٿي مونتا. ان جيا
 ماري وات نٿي مونتا، اُو پڳوون رڻي وات نٿي مونتا، جيئن مُون نٿه ميليھ."
 پسڻه اُو ستر شيلا ڪوم مانھ ڳيا پرا.

ستر شيلا پاسا وڙي آوڻھ

(17) زئيون ستر شيلا پاسا ايسو ڪن آيا، اُوئي ڪُش ٿين ايسو نٿه ڪيڏو: "تمارا نوم
 ٿي پُوت پڻ امارو ڪيڏو مونين نيھري زائھ." (18) ايسو اُوئون نٿه ڪيڏو: "مُون نٿه
 وات ساوئي ڏيڪيام آوتيت رڻي جي ڏشمن شيطون آڪاش ٿي ويڙي را گھوڙ
 پڙل سڻھ ان اُوئا رڻي طاقت گھٽ ٿئھ رڻي.



(19) زوڻو، مئين تمون نٿه اي اڪتياري ڏيڏيھ،
 جي تمي ھاڀون ان ويسوئون نٿه لتاڙو پرا، ان
 هر وات ۾ آڀري طاقت ڏشمن شيطون ري طاقت ٿي مانھ راکين وو. ان ڪئين
 تمون نٿه نقصون نئين ڏئھ. (20) توڻي پڻ ھايا وات مانھ ڪُش مت ٿيو جي پُوت
 تمارو ڪيڏو مونھ، پڻ ايئا وات مانھ ڪُش ٿيو جي تمارا نوم آڪاش موئين
 لڪل سڻھ، جي تمي هميش ھارو پڳوون ڪن ريشو."

ايسو آپرون شيلون ھارو پڳوون رو ٿورو مونھ

(متي 25:11، 27-25:13، 17-16:13، لوقا 21:10-24)

(21) اُوڻھ ٿي ٿوڻھ ايسو پويتر آتما ري ڪري گھڻو ڪُش ٿيو، ان پراٿنا ۾ پڳوون

نٺه ڪيڏو: ”او ٻا، آڪاش ان ڌرتي را ڌڻي، هُون تمارو ٿورو مونونھ ڪم تو تمي اي واتون هڙمُو ان عقل واڙون ٿي هٿاڙين راکيھ، ان نونون منڪون ڪن ساوي ڪريھ. او ٻا، وڙي هُون تمارو ٿورو مونونھ ڪم تو تمي آپري مرضي ان ڪُشي ٿي هم ڪريوھ.“

②② ان پستھ منڪون نٺه ڪيڏو: ”پڳوون ٻڌوئي ڪئين مارا ڪيڏام ڏيڏوھ. پيزو ڪوئي نٿي اوڙڪتو جي هُون پڳوون رو ڏيڪرو سون، رُوگو مارو ٻاپ پڳوون اوڙڪڻھ. ان پيزو ڪوئي نٿي اوڙڪتو جي مارو ٻاپ پڳوون سٺھ، رُوگو هُون اُونا رو ڏيڪرو اوڙڪونھ، ان اُو پڻ اوڙڪڻھ جيون ڪن هُون ڏيڪرو مارا ٻاپ پڳوون نٺه ساو ڪروا ڪرونھ.“

②③ پستھ ايسُو شيلون هومو قرين رُوگو اُوئون نٺه ڪيڏو: ”پاڳواڙا سو تمي، جي اي ٻڌوئي ڪئين اونڪيئي ڏيڪوھ ريا، ②④ ڪم تو هُون تمون نٺه ڪاتري ٿي ڪونھ جي گهڻا پڳوون رو نياپو ڏيڏا واڙا ان گهڻا پاڌشا اي ڪوم زويا هارُو هڪيا، جي تمي زوئوھ ريا، پڻ اُوئي نه ڏيڪيا. ان اُو اي واتون هومپڙيا هارُو هڪيا، جي تمي هومپڙوھ ريا، پڻ اُوئي نه هومپڙي.“

ناٿوڪا سامري رو مثال

ٻڌون منڪون ٿي پايون را زم پريم ڪروو

②⑤ تيا ڪيڙ هيڪڻه شاستر زوٿيا واڙه اُونين ايسُو رو آزمتو ليڏا هارُو پُونسيو: ”گرو جي، مارڻه ڪي ڪروو، جيا ٿي مُون نٺه هميش رو جيون زڙه ان هُون پڳوون ڪن ريون؟“

②⑥ پڻ ايسُو اُونا ٿي پُونسيو: ”شاستر موئين ڪي لڪل سٺه؟ تمي پٺيا ٿي ڪي هڙموھ؟“

②⑦ تو اُوڻه وڙندڻي ڏيڏڻي: ”هُون اي هڙمونھ، جي هميش رو جيون ليڏا هارُو ام لڪل سٺه: ايشور آپرا پڳوون هُون، آپرا پورا من ٿي، آپرا پورا جيو ٿي، آپري

پوري طاقت ٿي، ان آڀري پوري عقل ٿي پريم ڪرو، ان آڀرا پائي ٿي آپ را زم پريم ڪرو.

(28) تيا مانھ ايسو اوتا ننه ڪيڏو: ”تمي صحيح ڪيڏوھ. ھم ڪريا، تو تمون ننه ھميش رو جيون زڙشي.“

(29) پڻ اوتھ شرم پڳنھ آڀري پيعزتي ٿي پچيا ھارو وڙي ايسو ننه ڪيڏو: ”ھون تو اي پونسونھ ريو، جي ايتا حڪم ۾ پائي روگا آبي يھودي سون، ڪا نيچ قوم را پيزا منڪ پڻ آڀنا پائي سئھ؟“

(30) تيا مانھ ايسو ڪيڏو: ”آپني يھودي قوم رو ھيڪ منڪ ھتو. او يروشلم شھر ٿي يريخو شھر ھومو زاتوت ريو، تو ڌاڙيل اوتا ننه شيرڙا مانھ ڦري آيا. ان اوتا ڪن جئين ڪئين ھتو، ٻڌوئي لوئين اوتا ننه گھڻو ماريو، ان مريا جيوو ساڌين پاڳي ڳيا.“

(31) تيا ڪيڙ قسمت ٿي پڳوون را گھر رو ھيڪ پوزاري اوتا ھاڳي شيرڙا مانھ ٿين مٽيو. زئون پوزاري اوتا ننه ڏيڪيو، تو ام ھزميو جي ٿي ھيڪھ مرل سئھ، ان ايتا پيڪ ۾ متون لاش ننه سبين اڀرائي زائھ ان ڌرم رو حڪم توڙئھ، او پاھو ڏين مٽي ڳيو.

(32) ھيوئھ نمونئھ پڳوون را گھر رو ھيڪ شيواڌاري اوتا ماڳ آيو، ان اوتا ننه ڏيڪين، لاش ننه سبيا ٿي اڀڙايا پڳو، او پڻ پاھو ڏين مٽي ڳيو.

(33) پسئھ سامري قوم رو ھيڪ ڌاريو منڪ پنڌ ڪرتون اوتا ڪن آوين پوڳيو. زئون اوتا ننه ڏيڪيو، تئيون اوتا ننه قياس ٿيو. (34) تيام اوتا ڪن آوين اوتا رون ڦٽون مانھ تيل ان ڌراڪون رو رس ھڻين پاتا ٻونڌيا. ان آڀرا گھڙيڙا مانھ اوباڙين ھيڪي ھوئل موئين لي ڳيو، ان اوتا رئي ھمپاڙ ڪڙي. (35) پڙئھ ڏي اوتھ ڪئين ڏيئون رو ڪرچ ھوئل واڙا ننه ڏين ڪيڏو: ’ايتا رئي ھمپاڙ ڪرتا ريا. ان جي وڌيڪ ڪرچ ٿئھ، تو ھون آپ پاسو آوين ڏيھ.‘

(36) پسئھ ايسو اوتا شاستر زوٽيا واڙا ٿي پونسيو: ”ھوئھ تمارو ڪي ڪيال

سٺ، جيا منڪ نٿو ڌاڙيلي ماريو تو، اُٺا رو ايئون ترٿيون موئين ٿي ڪوڻ پائي ٿيو؟” (37) تيا مانھ شاستر زوڻيا واڙھ ڪيڏو: ”اُو جيئھ اُٺا مانھ ڏٺا ڪري.“
تئين ايسو ڪيڏو: ”تمي پڻ زائين ھروم ڪريا.“

ايسو مارتا ان مريم ري گھري زائھ

(38) ايسو ان اُٺا را شيلا شيرڙو لين زاتات ريا، تو ايسو هڪا پاڙا موئين آيو. اُٺا پاڙا موئين هڪ ٻائي هئي، جيا رو نوم مارتا هتو. ان اُٺو ايسو نٿو گھري آوڪار ڏين اُٺا رڻي مزمونئي ڪري. (39) اُٺا ٻائي رڻي هڪ ٻين پڻ هئي جيا رو نوم مريم هتو. اُو ايسو ڪن ٻيھين اُٺا ري واتون ھومپڙتيت رڻي. (40) پڻ مارتا شيوا ڪريا رڻي گڻتتي ڪرتون ڪوم موئين لوھ هئي. تيام آوين ايسو نٿو ڪيڏو: ”پرڻو، ڪي تمون نٿو ايٺا وات رو ڪئين ڪيال نٿي ٿيتو، جي ماري ٻين مون نٿو ڪوم موئين هڪلئي ساڏيھ پرڻي؟ هوئو ايٺا نٿو مارڻي مدت ڪريا رو ڪو.“ (41) پڻ پرڻو ايسو اُٺا نٿو پريم ٿي ڪيڏو: ”مارتا، تون گھڻيون واتون ريون گڻتيون ان تڪليپ موئين سٺ. (42) پڻ روگڻي هڪ وات ضروري سٺ، جي ماريون واتون مانھ ڏيون ڏيوو. ان مريم هائي ناٽوڪئي وات سونڊي ليڏيھ، جي ڪيڏي ايٺا ٿي نئين ڪوھرائھ.“

ايسو شيلون نٿو پرائنا ڪروا شيڪاڙھ

(متي 13-9:6، 11-7:7، لُوقا 13-1:11)

11 ① هڪ وار ايسو هڪا ماڳ پرائنا ڪرتوت ريو. زئين پرائنا ڪري ريو، تئين شيلون موئين ٿي هڪڻه زئھ ڪيڏو: ”پرڻو، زم يوحنا آپرون شيلون نٿو پرائنا ڪروا شيڪاڙيا تا، هم امون نٿو پڻ پرائنا ڪروا شيڪاڙو.“
② تو ايسو شيلون نٿو ڪيڏو: ”زئين تمي پڳوون ٿي پرائنا ڪرو، تئين ام ڪيا:



او ٻا، تمارو نوم پوئتر مونيُو زائِه.
تمارو راز آوئِه.

③ امارئي روز رئي روتئي
روز امون نئِه ڏيو.

④ امارا ڏوه امون نئِه ماڻ ڪرو،
ڪم تو امي آپ پڻ امارون ٻڌون
ڏوهاريون نئِه ماڻئي ڏيونه.
ان امون نئِه آزمتون موئين

پورا اوتريا رئي هيمنت ڏيو.

⑤ پسئِه ايسو شيلون نئِه ڪيڏو: ”جي تمارو هيڪ دوست هوئِه، ان آڏي رات
رو تمي اونا ري گهري زائين ڪو: ’پائي، او پائي، مون نئِه ترئين روتيون رو
آتو اُڏارو ڏئِه، ⑥ ڪم تو مون ڪن هيڪ ميزمون شيئا ٿي آيوه، ان ماري گهري
کاڌا رو ڪئين نئي جي اونا نئِه ڏيون. ⑦ تو تمارو دوست گهر موئين ٿي ام
ڪيشي ڪي؟ ’مون نئِه تنگ مت ڪر! همئنه تو ڌر پنڌ پڙيوه. امي ٻڌائي هوتا
پڙيا. هون اُئين تون نئِه ڪئين نئي ڏي هيڪتو. ⑧ هم تو نئين ڪئِه. هون
تمون نئِه کاتري ٿي ڪونه، جي دوستي ري ڪري تمارو دوست ڪئي نه اُئنه،
توئي پڻ آپري پيعزتي ٿي پچيا هارو تمون نئِه ضرور اتو آتو ڏيشي، زتا رئي
تمون نئِه ڪپ هوشي.

⑨ تيام هون تمون نئِه ڪونه، مونگو تو پگهون تمون نئِه ڏيشي، گوتو تو
زڙشي، ڌر وگاڙو تو اُوگهڙشي، ⑩ ڪم تو جيو پڻ مونگهه اونا نئِه ڏيتو زاشي،
جيو گوتنه اونا نئِه زڙشي، ان جيو ڌر وگاڙهه اونا هارو ڌر اُوگهڙشي.

⑪ تمون موئين ٿي ايوو ڪوئي ٻاپ سئِه ڪي؟ (جيا ڪن ڏيڪرو روتئي
مونگهه، پڻ ٻاپ روتئي هائنه پوئو ڏئِه؟) ڪا ڏيڪرو مسئي مونگهه، پڻ ٻاپ
مسي هائنه هاپ ڏئِه؟ ⑫ ڪا ڏيڪرو اينڊو مونگهه، پڻ ٻاپ اونا نئِه ويسو ڏئِه؟

⑬ هُونَه تمي پُونڌا هوتون پڻ، آپرون ٻارون ننه ٺاڻوڪي شينهنون ڏي هيڪوه. تو پستنه پڳوون تمارو آڪاشي ٻاپ اوتون ننه پويتر آتما ڪم نئين ڏنه، جيا اوتا ٿي مونڱهه؟ پڳوون ضرور اوتون ننه پويتر آتما ڏيشي.

ايسو پوتون نه ڪاڍيا ٿي ٿاڀيئي ڏنه جي اوه شيطون نه هرايوه


(متي 12:22-30، مرقس 3:20-27، لوقا 11:14-23)

⑭ هيڪ وار ايسو هيڪا ايو منڪ ٿي پوت ڪاڍتوت ريو، جيا ننه پوت گونڳو ڪريوت پرو. زئون پوت نيهرې ڳيو، تو گونڳو منڪ وڙي ٻولوا مڏيو. تيام گهڻا منڪ حيرون ٿي ڳيا. ⑮ پڻ اوتون موئين ٿي ڪئينڪ منڪي ڪيڏو: ”اي منڪ پوتون را مڪ شيطون ري طاقت ٿي پوت ڪاڍه.“ ⑯ ان پيزي منڪي اوتا ننه آزمايا هارو ڪيڏو: ”امون ننه پرسو ڏيڪاڙو!“ او پرسو زووا ڪرتات ريا زم ٿاڀيئي ٿنه جي ايسو پڳوون را طرف ٿي ڪوم ڪرڻه ڪا نا.

⑰ پڻ ايسو اوتون را ڪيال زوئين ڪيڏو: ”جيا راز را منڪ آت موئين نٿي نهٿا، او راز ڪنه ٿي زائو، ان گهر گهر ٿي وڌه.“ ⑱ هيون نموننه جي شيطون را راز را منڪ آت موئين نٿي نهٿا، تو اوتا رو راز ڪم ڪرين ريشي؟ تيام تمي ڪم ڪرين ڪي هيڪوه جي هون پوتون رنه مڪ شيطون ري طاقت ٿي پوتون ننه ڪاڍونه.

⑲ تمي ڪوه ريا جي هون شيطون ري طاقت ٿي پوت ڪاڍونه، تو پستنه تمارا آٻا منڪ ڪيا ري طاقت ٿي پوت ڪاڍه؟ او آپ ڪيشي جي تماري وات ڪوڙي سته. ⑳ پڻ هون تو پڳوون ري ڪڙا ٿي پوت ڪاڍونه، ان هائي ٿاڀيئي سته جي پڳوون رو راز تمون هومو ساوو ٿيوه ان تمون مانه سته.

㉑ مثال، زئون هون هيڪ طاقت وازو منڪ آٻا ٻڌائي هٿيار لين آٻا گهر مانه ٻاهرو ڏهه، تيون هون جيئن ڪئين اوتا رو سته، او اوتا ٿي نئين ڪوهرائي هيڪه. ㉒ پڻ زئون اوتا ٿي گهڻي طاقت وازو اوتا مانه آوين جيتسه، تيون



اي اوتا ڪن او هٿيار ڪوهي لئه، جيون مانھ
اوتا رو پروسو هتو، ان ٻڌوئي ڪئين جي
اوتھ اڳي آپرا قوضام ليدو تو، اي آپرون
منڪون نٿه وراوي ڏنھ. هيوتھ نمونته جي
مئين شيطون نٿه هرايو نه هوت، تو هون
پوت ڪاڍيا ٿي منڪون نٿه اوتا را قوضا
ٿي نه سڏاوي هيڪت.

23) جيو مارنه پاهنه نٿي، او مارنه ڪلاڻ
سٿه. جيو مون پيڙو ٿين پڳوون هارو منڪون
نٿه پيڙا نٿي ڪرتو، او منڪون نٿه پڳوون
ٿي شيئي پڳڙاوتھ.

پوت سونتل منڪ رو مثال

جيو آپري ڪراپ سوچ نئين ڀڏلئ، اوتا رٿي حالت هاو ڪراپ ٿيشي

(متي 43:12-45، لوقا 24:11-26)

24) ”زئون ڪياڪ منڪ ٿي پوت نيھري زائھ، تئيون پوت هونواڙ موئين ايل اول
زائين ايويي جڳا ڳوتھ جيئھ او آروم ڪري هيڪنھ. جي نه زڙنھ، تو پوت ام
ڪنھ: ’هون وڙي پاسو آپري گھري اوتا منڪ ۾ زائينھ، جيئون هون نيھريو تو.
25) اوئھ پوڳين زوئھ، تو او منڪ اوتا رنھ وڙي سونتيا جيوو سٿه، زوئھ گھر
جيا ۾ پونارو ڪاڍل هوئھ ان ريا هارو ٻڌوئي ڪئين تيار هوئھ. 26) تئيون زائين آپ
ٿي پڻ پونڊا هات پوت تيڙي اوئھ، ان ٻڌائي اوتا منڪ نٿه سونتين اوتا موئين
رئھ. نيٺ اوتا رٿي حالت اڳي ٿي گھڻي ڪراپ ٿي زائھ.“

پڳوون را وچن مانه وُودا وَازا گهڻا پاڳوازا سٺ

27) زنيون ايسو اي واتون ڪرتوت ريو، تئيون منڪون ري ڪلڪ موئين ٿي هيڪي ڏوشي اوتومئا هاڏ ٿي ڪيڏو: ”پاڳواڙي سٺه تماري مان، جيئنه تمون ننه زلمياھ، ان ڏوراياھ.“ 28) تيا مانھ ايسو اوتا ننه ڪيڏو: ”اي تو ليڪ سٺه، پڻ گهڻا پاڳوازا او سٺه جيا پڳوون رو وچن ھومپڙھ ان اوتا مانھ وٺھ.“

منڪ ايسو نٺ پرسو ڏيڪاڙيا رو ڪٺھ

(متي 38:12-42، لوقا 29:11-32)

29) زنيون ايسو رٽھ آھنھ پاهنھ گهڻا منڪ پيڙا ٿيتات ريا، تئيون ايسو اوتون ننه ڪيا مڏيو: ”ايئا زمونا را منڪ ڪيا پونڌا سٺه، ڪم تو او ٿاڀتي ھارو پرسا زوا ڪرھ. پڻ پڳوون ٿاڀتي ھارو ايئون منڪون ننه پرسو نئين ڏيڪاڙه، ايئون ننه روڳو ايون نيشون ڏيڪاڙشي، جيوو پڳوون رو نياپو ڏيڏا وَازا يوناه رو نيشون. 30) زم يوناه نينوا شھر رون منڪون ھارو پڳوون را پاھا رو هيڪ نيشون ٿيو تو، تم ھون منڪ ذات رو ڏيڪرو ايئا زمونا رون منڪون ھارو هيڪ نيشون ٿيھ.

31) پڳوون رٽھ نيا ڪريا رٽھ ڏي، ڏڪناڌليا ملڪ رٽي روٽي ايئا زمونا رون منڪون پيڙي اوتشي ان ايئون ننه ڏوھاري ڪرشي، ڪم تو او آپ سليمون پادشا ري عقل ري واتون ھومپڙوا گهڻا شيئا ھون اوٽي ٿي. ان ھون تمون ھومو سليمون ٿي پڻ موٽو سون، توئي پڻ تمي ماري واتون ھومپڙوا نٿي آوتا.

32) پڳوون رٽھ نيا ڪريا رٽھ ڏي، نينوا شھر را منڪ ايئا زمونا رون منڪون پيڙا اوتشي، ان ايئون ننه ڏوھاري ڪرشي، ڪم تو اوٽي يوناه رو نياپو ھومپڙين آپرا ڪراپ ڪوم ساڏين توپونھ ڪرئي ٿي ان پڳوون ري وات مانھ وُودا تا. ان ھون تمون ھومو يوناه ٿي موٽو سون، توئي پڻ تمي مارو نياپو ھومپڙين آپرا ڪراپ ڪوم ساڏين توپونھ نٿي ڪرتا ان پڳوون ري وات مانھ نٿي وِيتا.“

ايسو ري واتون ڏيون ٿي هومپڙو جيا ٿي من موئين پڳوون رو سوجهرو ٿهه

(متي 15:5، 22:6-23، لوقا 33:11-36)



③③ ”ڪوئي پڻ منڪ ڏيوو ٻاڙين اوثا ننه هٽارين ڪا نونڙا هيٺ
ڏونڪين نٿي ميلتو، پڻ اوثا ري جڳا موئين ساوو ميلهه، زم
گهر موئين آيا واڙون ننه سوجهرو زڙهه. ③④ زم سوجهرا هارو
ڏيوو ڪپهه، تم سوجهرا ننه زويا هارو اونڪيون ڪپهه. جي تماري
اونڪيون ٺيڪ سته، تو تمون ننه ٻڌوئي ڪئين سوجهرا ري ڪري
ڏيڪيام آوشي. پڻ جي تماري اونڪيون ڪراپ سته، تو ٻڌوئي ڪئين
انڌارام سته. ③⑤ تيام ڪيال راڪو جي آڀرا من موئين پڳوون رو سوجهرو هوه، ان
انڌارو نه هوه. ③⑥ هيوه نمونته، جي تمارا پورا من موئين پڳوون رو سوجهرو
هوه، ان ڪيا ئي ماڳ انڌارو نه هوه، تو تمارا پورا من موئين ايوو سوجهرو
ٿيشي، جيوو ٻڙو ڏيوو سوجهرو ڏيتو هوه.“

ايسو فريسيون ان شاستر زوٿيا واڙون رو ڏوه ڪايهه

(متي 23:1-36، مرقس 12:38-40، لوقا 11:37-54)

③⑦ زئون ايسو ٻولي ريو، تو فريسي پالتي رته هيڪه منڪ آڀري گهري روٿي
کاڌا رٿي ڏاوت ڏيڏي، ان ايسو اوثا ري گهري روٿي کاوا پينو. ③⑧ پڻ فريسي
پالتي واڙو اي وات ڏيڪين حيرون ٿي گيو جي ايسو کاڌا ٿي مور آڀرا هات ڌرم
ري ريت ڀرموٿه ڪم نه ڌويا.

③⑨ تو ڀرڻو ايسو اوثا ننه ڪيڏو: ”تمي فريسي پالتي را منڪ ڳلاس ان پليت
رو نه روڳو موئينليو ٻاهو پڻ ٻارليو ٻاهو پڻ ريت ڀرموٿه ڏوٿو، پڻ تمارو آڀرو
موئينليو ٻاهو لالچ ان پونڌائي ٿي ڀرال سته. ④⑩ تمي تو هاو ڳونڌا منڪ سو. او

نايا واڙو، جيئن ٻارليو پاھو نايوھ، اُوئھ موئينليو پاھو نئي نايو ڪي؟ (41) ٽمي موئينليا پاھا را پارام سوچو، ان جيو کاڌو پيڏو تمارون ڳلاسون ان پليٽون موئين سئھ، اُو گريھون نئھ ڏيو، تو ٽمي پُورئھ نمونئھ پويتر ٿي زاشو.

(42) فريسي پالتي واڙون، تمارا ڪيا هاز ٿيشي! ڪم تو ٽمي ڦوڏنا، هُئا، ان هر هڪ ايوِي ننڪي پاڙي را ڦصل ٿي ڏهڻو حصو تو پڳوون را نوم مانھ ڏيوھ، پڻ نڪو ٽمي منڪون ٿي انصاف هُون ووھ، نڪو ٽمي پڳوون ٿي پريم ڪروھ. تمارئھ اي ڪروو تو، ان اُو نوني واتون پڻ ڪرتا ريوو تو.

(43) فريسي پالتي واڙون، تمارا ڪيا هاز ٿيشي! ڪم تو تمارو شونق اي سئھ، جي پڳوون رون منڌرون موئين ٽمي ٻڌون ٿي نانوكي جڳا مانھ بيهوھ، ان شھرون موئين منڪ تمون نئھ عزت ٿي مڙھ.

(44) تمارا ڪيا هاز ٿيشي! ڪم تو ٽمي ڏوڙال مقومون را زم سو، جيا مانھ منڪ وئھ. جي منڪون نئھ ڪٻر هوئ ٿي تمون موئين ڪٽي پونڌائي سئھ، تو تمون ٿي پاھو ڪرئ.

(45) پسئھ شاستر زوٿيا واڙون موئين ٿي هيڪئھ زئئھ ايسو نئھ ڪيڏو: ”گرو جي، تماريون واتون ٿي امارئي پڻ پيغزئي ٿئھ رئي.“

(46) تيا مانھ ايسو ڪيڏو: ”شاستر زوٿيا واڙون، تمارا پڻ ڪيا هاز ٿيشي! ڪم تو ٽمي پڳوون رون حڪمون ٿي وڌارئھ پيڙا گھڻا حڪم آڀرا پاھا ٿي ناوين اُونون رو پار منڪون مانھ نوڪوھ، جيا نئھ اُو سھي نئي هيڪتا، پڻ ٽمي آپ هائي پار اُوپاڙيام هات ٿي نئي سٻاڙتا.

(47) تمارا ڪيا هاز ٿيشي! ڪم تو ٽمي پڳوون رو نياپو ڏيڏا واڙون را ڦها نوراووه، جيون نئھ تماري ٻاپ ڏاڏي ماريات پرا. (48) ايئا ٿي ٽمي هاڪ پروھ ريا جي تماري ٻاپ ڏاڏي ليڪ ڪريو تو، ڪم تو تماري ڏاڏي اُونون نئھ ماريات پرا، ان ٽمي اُونون را ڦها نوراوين آڀرون ڏاڏون رو ڪوم پورو ڪراووه ريا.

(49) تيام پڳوون آڀري عقل ٿي ام ڪيڏو:

هُون مارو نياپو ڏيڏا واڙون ان سُونڊل آڳيوونون نٿه
اُئون ڪن ميلهه،

ان ائون موئين ٿي اُو ڪيونڪ نٿه مارشي پرا
ان ڪيونڪ نٿه تنگ ڪرشي.

⑤0 تيام ڏنيا ري شروع ٿي لين جيون پڳوون رو نياپو ڏيڏا واڙون را کون تياھ،
اُئون ٻڌون را کون رهي سزا پڳوون اينا زمونا رن منڪون نٿه ڏيشي. ⑤1 هُون
تمون نٿه ڪاتري ٿي ڪونه جي هابل ٿي لين زڪرياه هُودي، جيا نٿه پڳوون را
گهر موئين مال ساڙيا ري جڳا ان پويتر جڳا وسا ماريوت پرو، اُئون ٻڌون را
کون رهي سزا پڳوون اينا همٿوڪي پيڊي رن منڪون نٿه ڏيشي.

⑤2 تمون شاستر زوٿيا واڙون را ڪيا هار ٿيشي! ڪم تو تمي پڳوون ري
واتون هزميا رو حق ڪوهي ليڏو، توئي پڻ تمي آپ هزموا نه ڪريو، نڪو جيا
هزموا ڪرتات ريا اُئون نٿه هزموا ڏيڏا.

⑤3 ايسو هم ڪين اُئون رُونو ٿيتوت ريو، تو اُونا ئي توئا ٿي لين شاستر
زوٿيا واڙا ان فريسي پالتي را منڪ اُونا ٿي گهڻو وير راڪوا مڏيا ان گهڻيون
واتون را پارام پونسوا مڏيا، ⑤4 ڪم تو اي وجهه ڳوتتات زيا، جي ايسو ڪوئي
ايوئي وات ڪنه، جيا ٿي اُونا رو ڏوه ڪاڍي هيڪنه.

ايسو مونھڙل ڪاتا آتا رو مثال ڏين

فريسي پالتي رن منڪون ري پُونڌائي ٿي پاھو ڪريا رو ڪنه

(متي 26:10-27، لوقا 12:1-3)

① اتا ۾ هزاري منڪ پيڙا ٿيا، جي هڪا پيڙا مانھ پڙتات ريا. تئين
12 ايسو ڪاس ڪرين آپرون شيلون نٿه ڪيا لاڳيو: ”فريسيون موئين هٿال
پُونڌائي ٿي پاھو ڪريا، ڪم تو اُو مونڊا را مينا پڻ اندر را ڪارا سٿه. اُئون
رهي پُونڌائي مونھڙل ڪاتا آتا را زم ڏيڪيام نٿي آوئي پڻ اينا رو ڪراپ اثر

ٻڌيل پڪڙي زائھ.

② جنئين ڪئين ڊونڪل سٺ، اُو ساوو ٿيڻي، ان جيئن پڻ وات هٽاڙل سٺ، اُوٺا رڻي ڪٻر پڙشي. ③ تيام جي واتون تمي انڌارام ڪيڏي هوشي، اُو سوجهرام همپڙاشي. ان جي واتون تمي پنڌ ڪمرا موئين منڪون رون ڪونون ۾ هڻيون هڻيون ڪيڏي هوشي، اُو ٻڌون نٺ اوتومڻي همپڙاوي زاشي.

منڪون ٿي نه ٻيٿا

(متي 10:28-31، لُوقا 12:4-7)

④ ”مارون پريمي پايون، هُون تمون نٺ ڪاتري ٿي ڪونه، منڪون ٿي مت ٻيٿا، ڪم تو اُو رُوڳو اتو ڪري هيڪڻه جي تمون نٺ مارڻه پرا، پڻ پيزو ڪئين نٿي ڪري هيڪتا. ⑤ پڻ هُون تمون نٺ گهڻو گهڻو ڪونه جي پڳوون ٿي ٻيٿا، ڪم تو مٿڪ تمون نٺ پلٽه مارڻه پرا، توڻي پڻ تمون نٺ هميش رڻي سزا ڪاڏا هارُو نرڳ موئين ڳڳوڙهه ڪا نا، اي تو پڳوون را هات ۾ سٺ. ماري وات مان ڏيون ڏيا، تمي رُوڳا پڳوون ٿي ٻيٿا.



⑥ سڪلي تو هاو هونگهي سٺ، ٻيئون رُوپيون ۾ پونس زڙه، پڻ اُونون موئين ٿي هيڪي نٺ پڻ پڳوون نٿي ويهارتو. ⑦ پڳوون تو تمارو اتو گهڻو ڪيال راڪڻه جي تمارا ماڻا را مٿوڻاڙ پڻ ٻڌائي اُوٺا را گڻل سٺ. تيام مت ٻيٿا، ڪم تو تمارو مون پڪيون ٿي الاهي گهڻو وڌيڪ سٺ.

آپ نٺ ايسُو رو شيلو ڪيڏا ٿي نه ٻيٿا

(متي 10:32-33، 12:32، 19:10-20، لُوقا 12:8-12)

⑧ ”هُون تمون نٺ ڪاتري ٿي ڪونه، جيو منڪون رڻه رُوپرو ڪڻه جي اُو مون مانھ وشواس راڪڻه، تو هُون پڻ منڪ ذات رو ڏيڪرو پڳوون رون آڪاشي

ڏوتون رٿه رُوپرو همروم ڪيھ جي اُو مُون مانھ وِشواس راکڻھ.

⑨ ان جيو منڪون رٿه رُوپرو ڪڻھ جي اُو مُون مانھ وِشواس نٿي راکڻو، تو هُون پڻ پڳوون رون آڪاشي ڏوتون رٿه رُوپرو همروم ڪيھ جي اُو مُون مانھ وِشواس نٿي راکڻو.

⑩ جيو مُون منڪ ذات را ڏيڪرا رٿه ڪِلاڦ ڪڻين وات ڪرڻ، تو اُوئا نٿه پڳوون را پاها ٿي ماڦي زڙي هيڪڻھ، پڻ جيو منڪ زوڻي ڪرين پڳوون را پويتر آتما رٿه ڪِلاڦ ويتو رٿه، تو اُوئا نٿه پڳوون ماڦي نئين ڏئ.

⑪ زئيون منڪ تمون نٿه پڳوون رون منڌرون موئين پنچائيتون ڪن، آڳيونون ڪن، ڪا ڪورئون هوما تيڙي زائ، تو تمي گهڻي مت ڪريا، جي ڪم ڪرين ٻولشون ڪا ڪي ڪيشون، ⑫ ڪم تو اُوئھ ئي ٿوئڻ پويتر آتما اُو ٻڌي واتون تمارا من موئين اوئشي جي تمارڻه ڪيوو هوشي.

پي عقل ملڳت واڙا رو مثال ملڳت مانھ پروسو نه راکو

⑬ ٽيون اوئون گهڻون منڪون موئين ٿي هيڪڻه زئڻه ايسو نٿه ڪيڏو: ”او گرو جي، مارو ٻاپ گڏاري گيوھ. مارا پائي نٿه ڪو جي امارا ٻاپ ري ملڳت ٿي مارو حصو مُون نٿه وراوي ڏئ.“ ⑭ پڻ ايسو اُوئا نٿه ڪيڏو: ”پائي، ڪيئڻه مُون نٿه تمارو ڦينصلو ڪريا واڙو ان حصو ورايا واڙو سونديوه؟ اي تو مارو ڪوم نٿي.“

⑮ پسڻه ايسو اوئون ٻڌون نٿه ڪيڏو: ”هوشيار ريا! هر نمونا ري لالچ ٿي پاھو ڪريا، ڪم تو گهڻو مال ان ملڳت ڪياڪ ري حياتي نٿه ٿيڪ نٿي راکڻي.“

⑯ پسڻه ايسو اوئون نٿه اي مثال رئي وات همپواڻي: ”هڪ شائوڪار زميڏار هتو. هڪ سال اُوئا رئي پوک گهڻي ٿي، ⑰ تو اُو آڀرا من موئين سوچوا مڏيو جي ’هوتھ هُون ڪي ڪرون؟ مُون ڪن اتو ئي وڳ نٿي جيئڻه هُون مارو ڏون پيڙو ڪرين راکون.“ ⑱ نيٺ اُوئھ ڪيال ڪريو: ’هُون ام ڪريھ، مارا گهڏوم پنگاوين

هُونَ موتا نَوَراوِيه، ان اُونُونِ موئينِ مارئي ڪٽڪ ان ٻڌو ڏون پيڙو ڪرين راکيه. (19) پسنه هُون ام ڪيه: 'هُون تو ڪتو پا ڳواڙو سون. مُون ڪن اتو ڏون سته جي الاهي گهڻا سال وِشي. تيام هُون ڪئين ڪوم نئين ڪرون. ڪاڻيه، پيڻيه، ان موج ڪريه.' (20) پڻ پڳوون اُونَا ننه ڪيڏو: 'مورڪ منڪ، آڙوڪي رات موئين ٿارو هاه نيهرِي زاشي، ان اُو جيا را پارام تئين سوچيوه، اُو ڪيا رو ٿيشي؟' (21) پسنه ايسُو ايٺا وات رو مطلب ام هُزمايو: "جو منڪ آپ هارُو ملڳت پيڙئي ڪرڻه ان پڳوون را نوم مانه ڪُشي ٿي نٿي ڏيتو، تو اُو هايا منڪ جيوو پي عقل سته."

پڳوون مانه پروسو راکو

(متي 6:25-34، لوقا 12:22-31)

(22) پسنه ايسُو آپرون شيلون ننه ڪيڏو: "تيام تو هُون تمون ننه ڪونه آپري حياتي هارُو گهڻي مت ڪرو، جي 'امي ڪي ڪاشون؟' نڪو آپرا ڏيل هارُو، جي 'امي ڪي پيرشون؟' (23) ڪم تو کاڌا ٿي موئي شينه حياتي سته، ان لوگهڙون ٿي موئي شينه ڏيل سته.

(24) هاڏون ننه زوٽو! اُو نڪو پوڪنه، نڪو لئنه، نڪو اُونُون ري ڪوڙي ان پلي هوڻه، توڻي پڻ پڳوون اُونُون ننه کاڌو ڏنه. تمارو تو پڪيون ٿي الاهي گهڻو مون سته.

(25) تمون موئين ايوو ڪُون سته جيو گهڻي ڪرين آپري حياتي رو هيڪ منٽ پڻ وڌاوي هيڪنه؟ (26) جي تمون ٿي هائي ننڪئي وات پڻ نٿي ٿي هيڪئي، تو پسنه پيڙيون واتون هارُو گهڻي ڪم ڪروه؟

(27) ڦولڙون ننه زوٽو! اُو نڪو ڏورڙا واتنه، نڪو لوگهڙو ناوڻه، پڻ هُون تمون ننه ڪاتري ٿي ڪونه، جي سليمون پاڌشا پڻ آپرا اُونچون م اُونچا لوگهڙا پيرين ايشون ڦولڙون جيوو ناوڪو نٿو ڏيڪاتو. (28) زئيون پڳوون ايوو ڦولڙا زهاڙڪون موئين اُوڳاڙنه، جيا زهاڙڪا آز اُوپاه، ان هَواري اُونُون ننه ڏيو تام بازشي پرا،

تو پسته تمون نه لُگهڙا نئين ڏنه، ڪي؟ تم پڳوون مانه اتو گهٽ يقين ڪم راکوه؟

②۹ تيام تمې کاڌا پيدا ۾ آڀرو جيو مت لڳاڙيا، نڪو ايشا را پارام گهٽي ڪريا. ③۰ ڪم تو جگت ري ٻڌي قومون، جي پڳوون نه ٿي موني، او ايئون واتون ۾ آڀرو جيو لڳاڙهه، پڻ تمون هارو تمارا ٻاپ پڳوون نه ڪبر سته جي تمون نه ايئون شينهنون رهي ضرورت سته. ③۱ تيام تمې پڳوون ري مرضي مانه وين پڳوون را راز ۾ آڀرو جيو لڳاڙو، تو پسته پڳوون تمون نه اي ٻڌي شينهنون پڻ ڏيشي.

آڪاشي ملڳت رو مثال آڪاش ۾ پڳوون ڪن هميش رو هڪ

(متي 19:6-21، لُوقا 12:32-34)

③۲ "مارئي نونئي ٿولي، تمې مت پيايا، ڪم تو پڳوون تمارو ٻاپ تمون نه ڪشي ٿي آڀرا راز موئين راکنه. ③۳ تمې آڀري شينهنون ويسين پياها پڳوون را نوم مانه ڏيو. هم ڪريا ٿي، تمون نه آڪاش موئين آڪاشي ملڳت هميش رو جيون زڙشي. او ٻئونون را زم ڪيڙي نئين ٿوئنه، ان ملڳت را زم ڪيڙي نئين ڪئنه. اوئنه نڪو سور ڏوڪڙو آوئه، نڪو ڪونهاري ڪراپ ڪرئه. ③۴ تمې آڀري ملڳت پڳوون را نوم مانه ڏيو، ڪم تو جيئنه تماري ملڳت سته، اوئنه تمارو جيو پڻ هوشي."

سجڳ نوڪرون رو مثال ايسنو رءُ پاسو آيا هارو تيار ريوو

③۵ "زم نوڪر آڀرا ڏئي رهي واٽ زوتون شيوا ڪريا هارو تيار رئه، ان آڀري پتي ٻڙي راکنه، تم تمې مارا ڪيڏا مانه وين مارا پاسا آيا رهي واٽ زوتا ريو.

③⑥ ٽمي اُونئون سڄاڳ نوڪرون جيوا ٿيو، جيا آپرا ڌڻي رڻي وات زوتا هوئ، ان زئيون ڌڻي ويوا ٿي پاسو آوين ڌر وڳاڙئ، تو جلڌي م اونا هارو ڌر اُوگهاڙئ. ③⑦ پاڳواڙا اُو نوڪر سئ، جيون نئ اُونئون رو ڌڻي آوين سڄاڳ ڏيڪئ. هُون تمون نئ هاس ڪونھ جي ڌڻي آپ شيوا هارو ٿيار ٿين اُونئون نئ کاڌا هارو پيهارشي ان اُونئون ڪن آوين اُونئون رڻي شيوا ساڪرڻي ڪرشي. ③⑧ جي ڌڻي آڏي رات رو ڪا اونا ڪيڙ آئ، ان نوڪرون نئ سڄاڳ ڏيڪئ، تو اُو نوڪر ڪتا پاڳواڙا سئ.

③⑨ پڻ ياد راکو، جي گهر را ڌڻي نئ ڪهر هوئ جي سور ڪئيون آوشي، تو اُو ضرور زاڳتو رئ، ان آپرا گهر موئين ڪاٺ نه لاڳوا ڏئ. ④① تيام ٽمي پڻ ٿيار ريا، ڪم تو تمون نئ ڪهر نٿي جي هُون منڪ ذات رو ڏيڪرو ڪئيون پاسو آويه.

ايمونڌار نوڪر ان پيئمون نوڪر رو مثال

(متي 24:45-51، لوقا 12:41-48)

④① تئيون پطرس ايسو ٿي پونسسيو: ”پرڻو، اي مثال رڻي وات ٽمي امون مانھ ڪوھ ريا، ڪا پيزون ٻڌون مانھ پڻ ڪوھ ريا؟“ ④② پرڻو ايسو اونا نئ وڙي مثال ڏين ڪيڏو: ”ٽمي آپ سوچو جي ايوو ايمونڌار ان عقل واڙو نوڪر ڪوڻ سئ، جيا نئ ڌڻي گهر رو موٽو نوڪر ڪرين آپرون پيزون نوڪرون مانھ راکين زائ، زم اُونئون نئ ٿوئا مانھ کاڌو پيڏو ڏئ؟“ ④③ پاڳواڙو اُو نوڪر سئ جيا نئ ڌڻي پاسو آوين همروم ڪرتو ڏيڪئ. ④④ هُون تمون نئ هاس ڪونھ جي ڌڻي اونا نئ آپري ٻڌي ملڳت مانھ راکشي.

④⑤ پڻ جي اُو نوڪر من موئين ام سوچئ: ’مارا ڌڻي را آيام هزون ڌير سئ،‘ ان پسئ اُو نوڪرون ان ٻونيون نئ ماروا مڏئ، ان ڪائي پين مست ٿي زائ، ④⑥ تو اونا نوڪر رو ڌڻي اونه ئي ڏي آوشي جيا ڏي رو نوڪر ڪيال ئي نئين

ڪريو هونءَ، ان اونه ئي ٿوئڻه آوشي جيا ٿوئا رڻي نوڪر ننه ڪهر ئي نئين هونءَ، ان آوين اونا ننه وادين ٽڪرا ٽڪرا ڪرشي پرو. هيونءَ نمونءَ، جيا منڪ مارا شيلا ٿين مارو ڪيڏو نٿي مونت، اوتون ننه ايوي سزا زڙشي، جيوئي پڳوون ننه نه مونيا وازون ننه زڙشي.

(47) اُو نوڪر جيا ننه آپرا ڌڻي ري مرضي رڻي ڪهر هٿي، پڻ اُو تيار نه ريو نڪو آپرا ڌڻي ري مرضي مانءِ وُڍو، تو اونا ننه گهڻي مار زڙشي. (48) پڻ اُو نوڪر جيا ننه ڌڻي ري مرضي رڻي ڪهر نٿي، ان سزا زڙيا جيوو ڪوم ڪريو، تو اونا ننه ٿوڙي مار زڙشي. جيا ننه پڳوون گهڻو ڏيڏوه، اونا ٿي گهڻو ليڏا رو حق سڻ. ان جيا ننه پڳوون گهڻي زميواري ڏيڏي، اونا رڻه وڌارنه گهڻي ايمونڌاري ٿي ويو.

ايسو را ڪوم رو اثر پاهي را زم ٻڌيل پڪڙشي

(متي 10: 34-36، لُوقا 12: 49-53)

(49) ”هُون ڌرتي مانءِ پاهي ٻاڙو آيوه. ڪيوئي ٺاڻوڪي وات ٿڌ جي اي اڳي لاڳل هونءَ. (50) پڻ مارءِ موت هُڏي پڳوون رڻي مرضي پُورئي ڪرووه، ان زبُون هُڏي اي پُورئي نئين ٿڻه، تڏيُون هُڏي هُون گهڻون ڏڪون موئين سون.

(51) ڪي تمي ام هڙموه، جي مارا آيا ٿي ڌرتي مانءِ هڀ ٿيشي؟ هُون تمون ننه ڪاتري ٿي ڪونه جي هڀ نئين، پڻ آڀت موئين واڌ ٿيشي. (52) ڪم تو آڙ ٿي لين جي هڪا گهر موئين پونس پاتي هونءَ، تو ماري ڪري اوتون موئين ٿي ترڻ پيئون ٿي ان ٻي ترئون ٿي ڌار هوشي. (53) ٻاپ ڏيڪرا ٿي ڌار ان ڏيڪرو ٻاپ ٿي، مان ڏيڪري ٿي ڌار ان ڏيڪري مان ٿي، هاڻو وُٿواري ٿي ڌار ان وُٿواري هاڻو ٿي ڌار ٿيشي.“

مٿون رو ان کيس رو مثال
 آيا واري سزا رو توڻو اوڙڪو ان جلدِي پڳوون ٿي منومثا ڪروو
 (متي 2:16-3، 5:25-26، لوقا 54:12-59)



⑤4 پسنه ايسو ٻڌون منڪون ننه ڪيڏو:
 ”زئيون تمهي آڻوڻا ٿي واڏڙا اوڀرتا
 ڏيڪوه، تئيون تمهي هٿ ۾ ام ڪوه جي
 مي آوشي. ان همروم ٿنه. ⑤5 ان زئيون
 ڏڪاڏليو وائيو وئو، تئيون تمهي ام ڪوه
 جي لو لاڳشي. ان همروم ٿنه. ⑤6 ڪوٽون

منڪون، تمهي ڌرتي ان آڪاش رو نمونو زوئين ڪهر پاڙي هيڪوه جي ڪي ٿيشي،
 تو پسنه تمهي ايٺا ٿوڻا ننه ڪم نٿي اوڙڪتا؟ ⑤7 ان تمهي آڻوڪا آپ ڪم نٿي
 هڙمتا جي سزا را ٿوڻا ٿي مور تمارنه پڳوون ٿي ماڻهي مونگهو ان اوڻا ري وات
 مانھ ويو؟

⑤8 مثال. جي ڪوڪ منڪ تمون مانھ ڪيس ڪروا ڪرئ، تو اوڻه ٿي ٿوڻه
 ٿوڻام پوڳيا مور شيرڙا مانھ اوڻا ٿي منومثا ڪريا رڻي ڪوشش ڪروو. نڪا
 صوبيدار تمون ننه ڪورٽ موئين ٿيڙي زاشي ان وڙي جج تمون ننه پوليس موئين
 ڏيشي، ان وڙي پوليس تمون ننه جيل موئين پورشي پرا. ⑤9 هون تمون ننه ڪاتري
 ٿي ڪونه، زئيون هوڏي ڏنڊ رڻي پائي پائي نئين پري ڏيو، تئيون هوڏي تماري
 زند نئين سوئنه.

ڪراب ڪوم ساڻو نڪا پڳوون هميش را موت رڻي سزا ڏيشي

① اوڻه ٿوڻه ڪئينڪ منڪي ايسو ڪن آوين گليل صوپا رون منڪون
 رڻي وات همپڙاوي، جيا زئيون يهوديه صوپا ۾ آوين پڳوون را گهر

موئين پڳوونَ را نوم مانه مال سڙاوتات ريا، تسيون يهوديه صوپا مانه راز
ڪريا وائڻه پيلاطس اوتون ننه مرايات پرا.

② تيا مانه ايسو اوتون ننه ڪيڏو: ”تامي ڪي هزموه؟ او گليل را منڪ
پيزون ٻڌون گليليون ٿي گهڻا ڏوهاري هتا، ڪي؟ تيام اوتون ٿي ايوو ظلم ٿيو؟
③ هم نٿي. او تمون جيوا منڪ هتا. پڻ هون تمون ننه ڪاتري ٿي ڪونه، جي
تامي آپرا ڪراپ ڪوم ساڏين توپونه نئين ڪرو ان پڳوونَ ري وات مانه نئين
وو، تو پسته تمي پڻ ٻڌائي ڪتم ٿي زاشو.

④ ڪا اوتون اڍارون منڪون رٿي وات ليو، جيون مانه سلوٿام نومي پاڙا
موئين گهڏ رٿي سوتئي پڙئي تئي، ان او ڦيهلائين مري ڳيا تا. او پيزون ٻڌون
يروشل شهر موئين ريا وازون ٿي گهڻا پونڌا هتا، ڪي؟ ⑤ هم نٿي. او تمون
جيوا منڪ هتا. پڻ هون تمون ننه ڪاتري ٿي ڪونه، جي تمي آپرا ڪراپ ڪوم
ساڏين توپونه نئين ڪرو ان پڳوونَ ري وات مانه نئين وو، تو تمي پڻ ٻڌائي
ڪتم ٿي زاشو.“

ميوانه ڏيڏا وازا وڻ رو مثال پڳوونَ ري سزا ان صير را پيارام

⑥ تيا مانه ايسو اي مثال رٿي وات همپزاوئي: ”هڪا منڪ رو ڌراڪون رو ٻاڳه
هتو. اوتا موئين هڪ انجير رو وڻ پوڪل هتو. هڪ ڏي ڌڻي اوتا وڻ موئين ميو
ڳوتو آيو، پڻ ڪئين نه زڙيو. ⑦ تيام اوتنه ماري ننه ڪيڏو: ’هون ترئين سالون
ٿي لين ايتا وڻ موئين ميو ڳوتونه ريو، پڻ هزون هڏي ڪئين نٿي زڙيو. تيام
ايتا ننه وڏي پرو، ڪم تو امهي زمئي روڪين اويوه. ⑧ تيا مانه ماري اوتا ننه
ڪيڏو: ’ساب، ايتا ننه هزون هڪ پيزو سال اويو ريو ڏيو. هون ايتا رنه چوڌاري
چلهو ڪوترين مال رو پوڻ نوڪيه. ⑨ پسته جي ميو ٿيا، تو ٺيڪ سته. نڪا پسته
تامي پلئه وڌايا پرو.“

ايسو پويتر ڏي رو گهڪي ڏوشي نٺ هارئي ڪرڻه

⑩ هيڪ وار پويتر ڏي رو ايسو پگهون را مندر موئين منڪون نٺ شيڪاڙتوت ريو. ⑪ اونا ماڳ هيڪ ڏوشي هتيي جيا نٺ اڍارون سالون ٿي پوت سونتل هتو. پوت ري ڪري اونا نٺ ايويي تڪليپ هتيي جي او گهڪي ٿي گهي تيي ان ماڳي سڏي نٺي ٿي هيڪتيي.

⑫ ايسو زئون اونا نٺ ڏيڪي، تيون اونا نٺ آپ ڪن هاڙ ڪرين ڪيتو: ”ٻائي، ٿارئي اينا تڪليپ ٿي زند سوتي گهي.“ ⑬ پسٺه ايسو اونا مانھ هات ميليا، ان او جهت موئين هاو سڏي ٿين اوپي، ان پگهون را وڪوڻ ڪروا مڏي. ⑭ پڻ مندر را آگهون نٺ اينا وات مانھ رينھ لاگهي جي ايسو مونڏي ڏوشي نٺ هارئي هوريي ڪرين پويتر ڏي رو ڪوم ڪريوھ. تيام او منڪون نٺ ڪيو مڏيو: ”هقتا موئين ٿي سو تاريڪون سٺه جيون مانھ ڌرم پرموئنه ڪوم ڪروو ٺيڪ سٺه. اوتون ڏيون مانھ آو ان پلٺه هازا هورا ٿيو! پڻ پويتر ڏي مانھ هازا ٿيو مت آو!“

⑮ تيا مانھ پريو ايسو ڪيتو: ”ڪوتون منڪون، تمي پيزون نٺه جيا وات رو نا پاڙوھ، او تمي آپ ڪروھ ريا. پويتر ڏي را تمي آپرا ڍگا ڪا گهڏيڙا وٺوڻ ٿي سوڙين پوڻي پيٿاروا نٺي لي زاتا، ڪي؟ ⑯ هوئھ اي ڏوشي تو ابراهيم رو وستار سٺه، جيا نٺه پگهون رٺه دشمن شيطون اڍارون سالون ٿي پوندين تڪليپ موئين راکهي تيي. تو اينا نٺه پويتر ڏي رو سڏاوو ٺيڪ نٺو، ڪي؟“

⑰ پسٺه ايسو رٺي اي وات هومپرين، جيا ايسو رٺه ڪلاڻ هتا، او ٻڌائي للزي مريا. پڻ پيزا ٻڌائي منڪ ڪش ٿيتات ريا ڪم تو ايسو ايو نائوڪون م نائوڪا ڪوم ڪرتوت ريو.

تُورِيا را پِيز رو مثال پِگُوونَ را راز را منک الاهی گهڻا ٿيڻي

(مٽي 13:31-32، مرقس 4:30-32، لُوقا 13:18-19)

⑱ پستھ ايسُو وڙي منڪون نٿه شيڪاڙوا مڏيو، ان ڪيڏو: ”هَئِئِه هُون تمون نٿه هَمِيڙاوونءَ جي پِگُوونَ رو راز ڪيوو سٺه. ⑲ اُو تُورِيا را جهيٽا پِيز را زم سٺه، جيا نٿه هيڪڻه منڪ لينَ آپرا هاگه موئين پوڪيو. اُو گهڻو وڌين زهاڙڪو ٿيو، ان اُوئا ريون ڏاڙڪيون موئين پڪيئي ماڙا ٿيا.“

مونھڙل ڪاٿا آتا رو مثال پِگُوونَ را راز رو اثر بڌيل پڪڙشي

(مٽي 13:33، لُوقا 13:20-21)

⑳ ايسُو وڙي ڪيڏو: ”پِگُوونَ رو راز ايوو پڻ سٺه. ㉑ اُو مونھڙل ڪاٿا آتا را زم سٺه، جيا نٿه هيڪي ڏوشي ٿوڙڪوڪ لينَ ڊيل روٽي ٿيا هارُو اڌ مڻ مونھڙل آتا موئين پيڙيو. ان نيٺ اُوئا رو اثر ٻڌا آتا ۾ پڪڙي گيو.“

هَوڙڪا دروازا رو مثال تارڻ ليڏا هارُو پِگُوونَ را ٿورا مارڳ مانھ ويو

(مٽي 7:13-14، 21-23، لُوقا 13:22-30)

㉒ ايسُو شهرون ان پاڙون موئين ٿيتو، منڪون نٿه شيڪاڙتو يروشلم شهر هومو زاتوت ريو.

㉓ ڪيئنڪ منڪ اُوئا ٿي پُونسيو: ”سادُو جي، هاو ٿوڙون منڪون نٿه تارڻ زڙشي، ڪي؟“ تو ايسُو منڪون نٿه ڪيڏو: ㉔ ”تارڻ را هَوڙڪا دروازا ٿي پِگُوونَ را راز موئين زايا رٿي پُورا من ٿي ڪوشش ڪرو، ڪم تو هُون تمون نٿه ڪاتري

ٿي ڪونه، گهٽائي منڪ پڳوونَ را راز موئين زاولا ڪرشي پڻ موئين نئين زائي هيڪنه. (25) ايوو توتو آوشي زئون زوئنه گهر رو ڏئي اولين دروازو پنڌ ڪرشي پرو، ان تمي ٻارا اُويين در وڳاڙوا مڏشو ان ڪيشو: 'او گهر را ڏئي، امون هارو در اُوگهاڙو.' پڻ اُو تمون ننه ڪيشي: 'هُون تمون ننه نٿي اوڙکتو تمي ڪيئون آياھ.' (26) تنيون تمي ڪيشو: 'امي تمارنه روپرو ڪاڏو پيڏو تو، ان تمي امارا پاڙا موئين واتون شيڪاڙي تي.' (27) پڻ اُو تمون ننه وڙي ڪيشي: 'هُون تمون ننه اوڙکتو ئي نٿي تمي ڪيئون آياھ. پُونڌون منڪون، تمي ماريون اونڪيون ٿي تري زانو!'

(28) زئون تمي ابراهيم، اِضحاق ان يعقوب، ان ٻڌون پڳوونَ رو نياپو ڏيڏا وازون ننه پڳوونَ را راز موئين ڏيڪشو، ان آپ ننه ٻارا اُوپاڙل ڏيڪشو، تنيون اوتنه تمي روشو ان ڏونت گهرڙيا ڪرشو. (29) ان پورا جڳت ٿي ڌاريون قومون را منڪ آوشي، ان پڳوونَ را راز موئين آڪاشي ڌاوت ڪاشي. (30) زوئو، جيا همئنه وونهڙ سئه اُو مورم ٿيشي، ان جيا مورم سئه اُو وونهڙ ٿيشي.

ايسو يروشلم شهر مانھ اقسوس ڪرئھ

(متي 23:37-39، لوقا 13:31-35)

(31) اوتھ ئي توتنه فريسي پالتي ري ڪئينڪ منڪي آوين ايسو ننه ڪيڏو: "ايئون نيهرين پيزيل زانو پرا، ڪم تو ايت رو راز ڪريا وازو هيروديس تمون ننه مراوا ڪرئھ."

(32) ايسو اوتون ننه ڪيڏو: "تمي زائين اوتا چالاک منڪ ننه ام ڪو: 'آز ان هَوارِي هُون منڪون ٿي پوت ڪاڏتو ريه ان منڪون ننه هاڙا هورا ڪرتو ريه ان ترئمئنه ڏي آپرو ڪوم پورو ڪريھ.' (33) توتئي پڻ آز، هَوارِي ان پرئمئنه مارئنه يروشلم شهر هومو پنڌ ڪرتو ريووه، ڪم تو اي ليڪ نٿي جي ڪوڪ پڳوونَ رو نياپو ڏيڏا وازو يروشلم ٿي پيزيل ڪيئنڪ مرئه.



③4 يروشلם، يروشلם، تون كيوو
شهر سئ! تارا منك پگيون رو نياپو
ڏيڏا وازون را ڪوني سئ. جيا پگيون
تون ڪن ميلئ، اونون نئ او پوئون ٿي
مارئ پرا. زم ڪوڪڙي آپرون بشيون
نئ آپري پونڪون هيٺ هٽائڙ، تم مئين

پڻ گهڻي وار تارون منڪون نئ آپ ڪن تيرآوا ڪريا، پڻ او نه مونيا. ③5 هونئ
زوئو، تمون ڪن يروشلם ۾ جيو پگيون رو گهر سئ، پگيون اونا مندر نئ
سادشي پرو. هون تمون نئ ڪاتري ٿي ڪنھ، زئون هوندي هون پگيون را پاها
ٿي راز ڪريا وازو ٿين پاسو نه آوون ان تمي مون نئ پاڙين ام نه ڪو جي
'ايشور رو اشيرواڏ ايٿا مانھ هونئ، جيو ايشور را پاها ٿي آونھ،' تيون هوندي
تمي مون نئ وڙي ماڳي نئين ڏيڪو."

ايسو پويتر ڏي رو هيڪا هوندي را مونڏا نئ هازو هورو ڪرئھ

14 ① هيڪ وار ايسو پويتر ڏي رو فريسي پالتي را هيڪا آگيون ري گهري
ڏاوت مانھ روئي ڪاوا گيو تو. اوئئ منڪ اونا هوما تاڪي ريا تا.
② اونا ماڳ هيڪ منڪ ايسو هومو اوپو تو جيا نئ هوندي رئي پيمارئي هئي.
③ تيا مانھ ايسو شاستر زوتيا وازون ان فريسي پالتي وازون نئ پونسيو: "ڌرم
پرموئئ پويتر ڏي رو منڪ نئ هازو هورو ڪروو ليڪ سئ ڪا نا؟" ④ پڻ او
ٻڌائي ماٿ ريا. تيام ايسو اونا منڪ مانھ هاٿ ميلين اونا نئ هازو هورو ڪريو
پرو ان اونا نئ ررونو ڪريو.

⑤ پسئ ايسو اونون نئ ڪيڏو: "جي تمون موئين ٿي ڪياڪ رو ڏيڪرو ڪا
ڊڳو ويري موئين پڙي زائ، جي پويتر ڏي هونئ، توئي پڻ تمي هٿ موئين اونا.
نئ ويري موئين ٿي بارو نئين ڪاڍو ڪي؟"

⑥ او اينا وات رو کئين جواب نه ڏي هيکيا.

ډاوتون را مثال

منکون هومو آپرو مون نه وڌاروو پڻ گريبي ٿي ويو.

⑦ زنيون ايسو اي زيوو جي ډاوتو مون واري جڳايون مان ه پيهو ڪرڻ ريا، تنهن ايسو اوئون نه هڪ مثال ڏين ڪيڏو: ⑧ ”زنيون ڪوڪ تمون نه ويو ري ډاوت مان تيرائون، تو تمي مون واري جڳا مان مت پيهيا. ٿي هيڪڻه جي تمون ٿي وڌيڪ مون وارا نه ډاوت ڏيڏل هون. ⑨ پسڻه او جيئڻه تمون پيئون نه ويو رڻي ډاوت ڏيڏي هون، او تمون نه آوين ام ڪڻه: ’ايئون اولي زانو. اينا منک نه پيهو ڏيو!‘ تو پسڻه ڪتا لازي مريڻ تماره ٻڌون ٿي نيسي جڳا مان ه پيهو پڙشي. ⑩ پڻ زنيون تمي ډاوت موئين تيراول هون، تو زائين ٻڌون ٿي نيسي جڳا مان ه پيهو، زم زنيون ډاوت ڏيڏا وارو آهن، او تمون نه ڪڻه: ’پائي، تمي اونسو آوين پيهو.‘ پسڻه ٻڌون ډاوتيون هومو تمارو ڪتو گهڻو مون ٿيشي. ⑪ ڪم تو جيو آپرا آپ نه گهڻا مون وارو هزمڻه، اونا رو مون پگهون گهٽ ڪرشي. ان جيو آپرا آپ نه گهٽ مون وارو هزمڻه، اونا رو مون پگهون گهڻو ڪرشي.“

⑫ پسڻه ايسو اونا منک نه ڪيڏو جيئڻه اونا نه ډاوت ڏيڏي ٿي: ”زنيون تمي ډاوت ڏيو، تو آپرون دوستون، پايون، عزيزون ان ڏوڪڙون پينل شائوڪارون نه ډاوت مت ڏيا، متون او تمارا پڌلام تماري پڻ ډاوت ڪرڻ، ان تماري ډاوت رو ايوزو تمون نه پري ڏڻه. ⑬ پڻ تمي زنيون ډاوت ڪرو، تنهن تمي گريبون نه، رُونگڙون نه، ميون نه ان اونڌون نه تيراوو، ⑭ تو پگهون تمون نه آشيرواڌ ڏيشي، ڪم تو اوئون ڪن ڪئين نٿي جيا ٿي تماري ډاوت رو ايوزو ڏڻه، پڻ پگهون زنيون منکون نه جيوي اوناڙشي، تنهن او آپ تماري پلائي رو ايوزو ڏيشي، جيا پگهون ري وات مان وڌا وارا سو.“

موٽِي ڏاوتَ رو مثال پڳوونَ ٻڌون نٿَ آپرا راز موئين آيا رِي ڏاوتَ ڏنھ

(متي 1: 22-10، لُوقا 14: 24)

⑮ تنيون ڏاوتيون موئين ٿي هيڪڻه زڻه اي وات هومپڙين ايسو نٿه ڪيڏو: ”پاڳواڙو اُو سٺه جيو پڳوونَ را آڪاشي راز موئين اُٿا رِي ڏاوتَ ڪاشي.“

⑯ پسنه ايسو اُٿا نٿه ڪيڏو: ”هڪ منڪ هتو. اُوڻه موٽِي ڏاوتَ ڪرِي ان گهڻون منڪون نٿه ڏاوتَ ڏيڏي. ⑰ ڪاڏا رڻه ٿوڻه اُوڻه آپرا نوڪر نٿه ڏاوتيون ڪن روٽِي ڪاڏا رو ام ڪيا ميلو: ’هالو. همڻه ٻڌوئي ڪاڏو تيار سٺه. ⑱ پڻ اُو ٻڌائي هڪا پڙا وونهي پونهونا ڪروا مڏيا. هيڪڻه اُٿا نٿه ڪيڏو: ’مئين ٻنهي ليڏيڻه ان مارڻه زووا زاو، تيام هُون نٿي آوي هيڪڻو. مُون نٿه پڙو وڌاڙيا. ⑲ پڙه ڪيڏو: ’مئين پونس هونيتڙا ليڏاه ان اُوڻون نٿه آزماووا زائونھ ريو، تيام هُون نٿي آوي هيڪڻو. مُون نٿه پڙو وڌاڙيا. ⑳ هيڪڻه پڙه وڙي ڪيڏو: ’هُون تازو پرتل سون، تيام هُون نٿي آوي هيڪڻو.‘

㉑ نوڪر پاسو آوين اي ٻڌي واتون آپرا ڏي نٿه همپڙاوي. پسنه گهر را ڏي نٿه اُوڻون مانھ گهڻي رينھ سڙي، ان اُوڻه نوڪر نٿه ڪيڏو: ’جلدي زا، شهر ريون نونيون موٽيون شيريون موئين زائين گريپون نٿه، رُونگڙون نٿه، اونڌون نٿه ان ميون نٿه ايتنه ڏاوتَ مانھ تيڙي آو.‘

㉒ پسنه نوڪر پاسو آوين ڪيڏو: ’ساڀ، زم تمي ڪيڏو تو، هم مئين ڪريوه. توڻي پڻ هزون واڳ سٺه. ㉓ تيا مانھ ڏي نوڪر نٿه ڪيڏو: ’گهاڙوڻون ان پاراڙي رون شيرڙون مانھ زا، ان منڪون نٿه مڻتون ڪرين تيڙي آو، زم مارو گهر پراڻي زائھ.‘

②④ تيا ڪيڙ ايسو منڪون نٿه ڪيڏو: ”هوءَ هون تمون نٿه ڪاتري ٿي ڪونه،
 او جيون نٿه اڳي ڌاوت ڏيڏي ٿي، اوئون موئين ٿي ڪوئي پڻ منڪ مارئي
 ڌاوت نئين ڪانه.“

ايسو رو شيلو ٿيا هارو مور ٿي سوچ ويچار ڪرو

(متي 37:10-38، لوقا 25:14-33)

②⑤ هيڪ وار زئون الاهي گهڻا منڪ ايسو وونهڙ وونهڙ آوات ريا، تو ايسو
 اوئون هومو ڦرين ڪيڏو: ②⑥ ”جي ڪوئي مون ڪن مارو شيلو ٿيا آوڻ، پڻ آڀرا
 مان ٻاپ ٿي، ٻار ٻسون ٿي، ڀايون ٻينون ٿي، ان آڀرا جيو ٿي پڻ گهڻو پريم
 ڪرڻ، ان مون ٿي گهٽ پريم ڪرڻ، تو او مارو شيلو نٿي ٿي هيڪتو. ②⑦ جيو
 ڪوئي موت هوندي ڏک سهين زوڻهه آڀري هوندي نٿي اوڀاڙتو ان مارا مارڳ
 مانه وين مون وونهڙ نٿي آوتو، او مارو شيلو نٿي ٿي هيڪتو.“

②⑧ مثال، جي تمون موئين ٿي ڪوڪ موٽو گهر ٿوراوا ڪرڻ، تو مور ٿي
 اوڻا را ڪرڇ رو اندازو نٿي لڳاوتو ڪي، جي اوڻا ڪن گهر ٿورايا هارو پيها
 سٺه ڪا نا؟ ②⑨ ام نه ٿه جي پنياد نڪاوڻه پڻ گهر پورو نه ٿوراوي هيڪنه ان
 زويا وازا ڏيڪين اوڻا مائنه ام ٺٺولي ڪرڻ: ③⑩ ’ايه منڪ گهر ٿوراوا شروع
 ڪريو، پڻ پورو نه ٿوراوي هيڪيو.“

③① وڙي پيزو مثال، جي هيڪ پاڌشا لڙائي ۾ پيزا پاڌشا ٿي وڊيا هارو زائ،
 تو مور ٿي اي وات نٿي سوچتو ڪي، جي آڀري ڏه هزار قوچ اوڻا هوملي ويه
 هزار قوچ ٿي ڪتي زاشي ڪا نا؟ ③② جي نئين ڪٽه، تو زئون پيزو پاڌشا هزون
 شيني هوشي، تو آڀرون منڪون نٿه ميلين اوڻا ٿي منيا ري واتون پونسشي.

③③ هيون نموننه تمون موئين ٿي جيو ڪوئي آڀرو ٻڌوئي ڪئين ساڌيا هارو
 تيار نٿي، تو او مارو شيلو نٿي ٿي هيڪتو.“

هَواڏ ووثا لُون رو مثال جيو هاسو شيلو نتي اُو ڪيا ئي ڪوم رو نتي

(متي 13:5، مرقس 50:9، لوقا 34:14-35)

③4 "هُون تمون نئه مثال ڏيونه. لُون تو نائوڪو سئه. پڻ جي لُون آپ موڙو ٿي زائ، تو اوثا نئه ڪيا ٿي هَواڏ واڙو ڪري هيڪئھ؟ ③5 اُو ڪيا ئي ڪوم رو نتي. نڪو آپرا ڪوم جيوو سئه، نڪو ٻني موئين نوڪيا جيوو سئه، نڪو پوڻ ٿايا جيوو سئه. منڪ اوثا نئه ٻارو ڦڳوڙئھ پرو. هيوئھ نمونئھ اڌروڪا من رو شيلو ڪيا ئي ڪوم رو نتي. هومپڙيا واڙون، تمي ماري وات مانھ ڏيون ڏيو."

ڳمال ري رو مثال ايسو ڏوهاڙيون نئه ڀڄاوا آيوھ

(متي 14:12-18، لوقا 7-1:15)

① هيڪ وار ٻڌائي ناڪو ليڏا واڙا ان هيو منڪ جيون ٿي پڙا منڪ شپ 15 راکتا، اُو ايسو ڪن واتون هومپڙوا آوات ريا. ② تيام فريسي پالتي را منڪ ان شاستر زوٿيا واڙا پڻ آپت موئين ايسو ري ڳلا ڪروا مڏيا جي "اي منڪ ڪراپ منڪون نئه آوا ڏئھ ان اوئون پڙو ڪائھ."

③ تئيون ايسو اوئون نئه اي مثال ري وات همپڙاوي: ④ "جي تمون موئين ٿي ڪياڪ ري هو ريون هوئ، ان ريون موئين ٿي هيڪ ري ڳمائي زائ، تو ڏئي اوثا نئه نئين ڳوتئھ، ڪي؟ اُو ضرور پڙي نوانوي ريون نئه ڪياڪ ڌراڙ ڪن شيم موئين ساڌين، زئيون هوڏي اوثا نئه نئين زڙئھ، تئيون هوڏي اوثا هيڪي نئه ڳوتتو ريشي. ⑤ پسئھ زئيون اوثا ري نئه ڳوتي ليشي تو ڪش ٿين آپرون ڪوون مانھ اُپاڙشي. ⑥ ان زئيون گهري آوين پوڳشي، تئيون ٻڌون دوستون ان پاڙا واڙون نئه تڙاوين ڪيشي: 'مون پڙا ڪشي ڪرو، ڪم تو جي ماري ري



گهمائي گهڻي ٿئي، اُو زڙيهه رهي.

⑦ هونءُ هونءُ تمون ننه ڪاتري ٿي ڪونه، هيونءُ نمونءُ زئون هيڪ ڏوهاري آڀرا ڪراپ ڪوم ساڏينءُ توبونه ڪرڻه ان پڳون رِي وات مانءُ وڻه، تنيون آڪاش موئين ايوئي ڪشي ٿنءُ، جيوئي نوانوي ايون منڪون هارو نٿي ٿيئي، جيا آڀ ننه پيڏوهي هزمءُ ان آڀ هارو ڪراپ ڪوم ساڏيا رهي ڪئين ضرورت نٿي هزمءُ.

گمال چونڊي را سِڪا رو مثال ڏوهاري رءُ توبونه ڪريا ٿي پڳون گهڻو ڪش ٿنءُ

⑧ ”وڙي پيزو مثال اي سڻه: جي هيڪي ڏوشي ڪن ڏه چونڊي را سِڪا هونءُ، ان اوئون موئين ٿي هيڪ گهمائي زانءُ، تو اوئا ننه نئين گوتءُ، ڪي؟ اُو ضرور ڏيوو ٻارين گهر موئين پوئارو ڪاڏشي ان زئون هونءُ اُو نئين زڙه، تنيون هونءُ ڏيون ٿي گوتئي ريشي. ⑨ پسءُ زئون زڙشي، تنيون آڀريون گيڏلون ان پاڙا واريون ننه تيڙاوين ڪيشي: ’مون پيڙي ڪشي ڪرو، ڪم تو جيو مارو چونڊي رو سِڪو گهمائي گيو تو، اُو زڙيوه رو.

⑩ هونءُ هونءُ تمون ننه ڪاتري ٿي ڪونه، زئون هيڪ ڏوهاري آڀرا ڪراپ

ڪوم ساڌينَ توبونھ ڪرئھ ان پڳوونَ ري وات مانھ وئھ، تو هيونھ نمونھ پڳوونَ
آپرون آڪاشي دوتون پيڙو ڪش ٿئھ.

ڳمال ڏيڪرا رو مثال زم پڳوونَ توبونھ ڪريا واڙا ٺوھاري ٿي پريم ڪرئھ تم آڀئھ پڻ ڪرو

⑪ پسنھ ايسو ام پڻ ڪيڏو: ”هڪ منڪ هتو، جيا را ٻي ڏيڪرا هتا. ⑫ هڪ
ڏي نونھ ڏيڪرئھ آپرا ٻاپ نھ ڪيڏو: ’ها، ملڳت رو زتو حصو تمارا مريا ڪيڙ
مارو ٿيسي، او مون نھ همئھ ڏيو رو! ان ٻاپ آپري ملڳت بيئون ڏيڪرون نھ
وراوين ڏيڏئي پري.

⑬ توڙون ڏيئون ڪيڙ نونو ڏيڪرو آپرو ٻڌوئي ڪئين ويسين پئيها لين
ڪياڪ شيئي پيڙا ملڪ موئين ڳيو پرو. اوئھ ازايو ڪرچ ڪرين آپري ٻڌئي
ملڳت اوڏارئي پري.

⑭ زئيون ٻڌوئي ڪئين ڪتم ڪريو پرو، تئين اوئا ملڪ موئين گھڻو ڌڪار
پڙيو، ان او پوکي مروا مڏيو. ⑮ پسنھ اوٽ را هڪا منڪ رو موٽاڳ ٿين ريو.
اوئھ منڪ اوئا نھ ڌراڙ اوڀاڙين آپري ٻني موئين هوئر ساروا ميليو. ⑯ ان اوئا
نھ اتني گھڻي پوک لاڳئي جي هوئر جيو کاڌو کاتا، اوئا ٿي آپرو پيت پريا
هارو اوئا رو جيو ڪرتوت ريو. پڻ ڪيئھ اوئا نھ ڪئين کاڌو نه ڏيڏو.

⑰ زئيون اوئا نھ عقل آوئي، تئين اوئھ سوچيو: ’مارا ٻاپ را تو ڪتائي
مزور سئھ جيون نھ کاڌو گھڻو زڙئھ، ان هون ايئھ پوکي مروئھ ريو. ⑱ هوئھ
هون آپرا ٻاپ ڪن زايئھ پرو، ان اوئا نھ ڪيھ: ها، مئين پڳوون رو ان تمارو
ڏوھ ڪريوھ. ⑲ هوئھ هون ايون نئي جي تمي مون نھ آپرو ڏيڪرو هڙمو. هوئھ
تمارون مزورون را زم مون نھ مزور اوڀاڙو. ⑳ ام ڪيال ڪرين اوئين او آپرا
ٻاپ ڪن پاسو آوا مڏيو.

پڻ اُو هزون شيتي هتو، تو ٻاپ اُٺا نٿه آوتون ڏيکيو. آڀرا ڏيکرا نٿه ڏيکين ٻاپ نٿه قياس ٿيو ان اُٺا نٿه ڏوڙي آوين ٻاٽ نوکڻي ان اُٺا نٿه ٻوسڪا لڏيا. 21) ٽئين ڏيکڻه اُٺا نٿه ڪڍڻو: 'ٻا، مٿين پڳون رو ان تمارو ڏوه ڪريوه. هون هون ايوو نٿي جي تمي مون نٿه آڀرو ڏيکرو هڙمو.' 22) پڻ ٻاپ آڀرون نوڪرون نٿه ڪڍڻو: 'جلدي موئين ٺاڻوڪون م ٺاڻوڪا لوگهڙا لي آوين ايٺا نٿه پيراو. ان ايٺا نٿه هاٿ موئين مڏي ان پڳون موئين زوڙا پيراو. 23) ان جيو ٻاهرُو سونڊل سٺه، اُٺا نٿه هلالو. آڀي ڪاٺين ڪشي ڪرون! 24) ڪم تو اي مارو ڏيکرو، مٿين ايٺا نٿه مرل هڙميو تو، پڻ هون وڙي جيو تو آيوه رو. گمائي گيو تو ان وڙي زڙيوه رو.' پسته او ڪشي ڪروا مڏيا.

25) پڻ اُٺه ٿوئنه موٽو ڏيکرو ٻني موئين هتو. زئين او ٻني ٿي پاسو آوين گهر ڏوڪڙو پوگيو، تو ساز وگاڙيا ان رميا رو آواز هومڙيام آيو. 26) ٽئين اُٺه هڪا نوڪر نٿه هاڙ ڪرين پونسبو: 'گهري ڪيا رئي ڪشي تڻه رئي؟' 27) تيا مانه نوڪر اُٺا نٿه همڙايو جي 'تمارو پائي پاسو آيوه. ان تماره ٻاپ سونڊل ٻاهرُو هلاليوه، ڪم تو تمارو پائي هازو هورو پاسو آيوه رو.'

28) ٽئين موٽو ڏيکرو رينهوتو ان گهري نه گيو. تيام اُٺا رو ٻاپ ٻارو آيو ان آوين اُٺا نٿه هڙمايو. 29) پڻ اُٺه آڀرا ٻاپ نٿه ڪڍڻو: 'زوٽو، اتا سال مٿين تماري شيوا ساڪري ڪريه، ان ڪڍي تمارا ڪڍڻا ٿي ٻارو نٿي گيو. پڻ مون نٿه تمي ڪڍي هڪ ٻاڪريو ٿي نه ڏيڏو، جي آڀرون دوستون پيڙي ڪشي ڪرون. 30) پڻ هاڻي تمارو لاڏڪيو ڏيکرو ريو، جيئنه تمارو ٻڌوئي ڪئين پونڌيون ڏوشيون مانه اوڏاڙيوه پرو، ان هون پاسو آيوه، تو ايٺا هارو تمي سونڊل ٻاهرُو هلاليوه.' 31) تيا مانه ٻاپ اُٺا نٿه ڪڍڻو: 'ڏيکرا، ٿون تو اڳي مون پيڙو سٺه. ان جئين ڪئين مون ڪن سٺه او ٻڌوئي ٿارو سٺه. 32) ٿارنه تو ڪشي ڪرو تو ان ڪش هوو تو ڪم تو اي ٿارو پائي، آڀي ايٺا نٿه مرل هڙميو تو، پڻ هون وڙي جيو تو آيوه رو. گمائي گيو تو ان وڙي زڙيوه رو.'

هوشياري ٿي ڪوم ڪاڍيا وازا منڇي رو مثال

16

① پسنه ايسو آپرون شيلون ننه ڪيو مڏيو: "هڪ شائوڪار منڪ هتو. اوتا رو هڪ منڇي هتو. هڪ ڏي شائوڪار ننه منڪي ڪيڏو: 'منڇي ٺڳئي ڪرين تماري ملڳت ڪانه ريو.' ② پسنه اوته منڇي ننه آپ ڪن تيرايون ڪيڏو: 'منڪ تاري ڳلا ڪرڻ ريا. تون ايوي ٺڳئي مون ٿي ڪم ڪرڻ ريو؟ آپرو ٻڌو حساب ڪتاب ڪري ڏنهن، پسنه تون زان، ڪم تو هوته هون تون ننه منڇي نئين راڪي هڪون.'

③ تئيون منڇي من موئين سوچيو: 'هوته هون ڪي ڪرون؟ ڪم تو مارو ساڀ مون ننه نوڪري ٿي ڪاڍڻ ريو. ڪوڏاز رو ڪوم مون ٿي نئين ٿنهن، ان مونڳيا ٿي لزي مروهن. ④ ٺيڪ سته، هوته مون ننه ڪيال آيو جي مارته ڪي ڪرو زم زئون همته مون ننه نوڪري ٿي ڪاڍشي، تئيون منڪ مون ننه آپري گهري آوا ڏنهن. ⑤ تئيون پسنه منڇي آپرا ساڀ رون قرضيون ننه هيڪوڪو هيڪوڪو ڪرين تيرايا. اوته هيڪا ٿي پونسيو: 'ساڀ رو قرض تون مانهن ڪتو سته؟' ⑥ تو اوته ڪيڏو: 'هو من تيل.' منڇي ڪيڏو: 'پيهه. هون اي پرچي لهن. آپري پرچي

مانهن پنجاه من لڪ.' ⑦ وڙي پيزا ٿي پونسيو: 'تون مانهن ڪتو قرض سته؟' تو اوته ڪيڏو: 'پونس هو من ڪنڪ.' منڇي ڪيڏو: 'هون اي پرچي لهن. آپري پرچي مانهن چار هو من لڪ.'



⑧ پسنه ساڀ پئيمون منڇي را ايٺا وات مانهن وڪوڻ ڪريا جي اوته ڪيو هوشياري ٿي ڪوم ڪريوه. ڪم تو جيا منڪ دنيا ري ڪراڀ سوچ پرموٽه وٺه، او منڪون ٿي آپرو ڪوم ڪاڍيا ۾ اتا هوشياري سته، زتا پڳوون را منڪ منڪون ٿي ٺاٺوڪته نمونته وودا ۾ هوشياري نٿي.

⑨ تيام هُون تمون نئه ڪونه، اِڻا ڪراپ ڏنڀا ري ملڳت ٿي تمڀ پڙون رڻي مدت ڪرتا رڀا. هيونئ نمونئ تمڀ آڀ هارو دوست ٺاوشو، ان مڀا ڪيڙ زڻيون هائي ملڳت نئين هونئ، تو تمون نئه آڪاش م آوڪار زڙشي.

⑩ جيو ٿوڙام ايمونڌار سئ، او گهڻام پڻ ايمونڌار هوشي. ان جيو ٿوڙام پڻيمون سئ، او گهڻام پڻ پڻيمون هوشي. ⑪ تيام جي تمڀ اِڻا ڪراپ ڏنڀا ري ڪوڙي ملڳت مونڀن ايمونڌار نئين هونئ، تو پڳوون تمون نئه آڀرڻي هاسڻي ملڳت ڪم ڪرين ڏيشي؟ ⑫ ان جي تمڀ اڻئون شينهنون مونڀن ايمونڌار نئين هونئ، جي امونت را زم تمارئ حوالئ ڪرل سئ، تو پسئ پڳوون هميش هارو تمون نئه آڪاشي هڪ ڪم ڪرين ڏيشي؟

⑬ ڪوئي پڻ نوڪر پڻون ڏٺيون رڻي شيوا نئي ڪري هيڪتو. ڪم تو او هيڪا ٿي پريم راکشي، ان پڙا ٿي ڪڻن پريم نئين راکئ، ڪا او هيڪا رڻي وات مونشي ان پڙا رڻي وات ماڳي نئين مونئ. تمڀ پڳوون ان ملڳت پڻون ٿي پريم نئي ڪري هيڪتا.

ايسو فريسيون رو ڏوه ڪاڏئ

جي او پونهونا ناوين پڳوون را حڪم ٿوڙئ

(متي 13:11-13، 32-31:5، مرقس 11:10-12، لوقا 14:16-18)

⑭ اي ٻڌي واتون هومپڙين فريسي پالڻي ري منڪي، جيا ملڳت رڻي لالچ راکتا، ايسو مانئ نٺولي ڪري. ⑮ تو ايسو اوئون نئه ڪيڏو: ”تمڀ ايو منڪ سو جيا مال ملڳت نئه پڳوون رو آشپرواڏ ڪين منڪون هوما آڀ نئه ٺاؤڪا ڏيڪاڙوه، پڻ پڳوون نئه تمارون منون رڻي ڪبر سئ. منڪ پلئ تماري ملڳت نئه گهڻو مون ڏئ، پڻ پڳوون تماري لالچ نئه هار پونڌڻي هزمئ.

⑯ موسي رون لڪل حڪمون رو ان پڳوون رو نياپو ڏيڏا وازون ري لڪل واتون رو نمونو يوحنا را وڪت هوڏي هتو. پڻ يوحنا را وڪت ٿي لين پڳوون را راز

رئي کُشي رئي کبر همپژاڻه رئي، ان ٻڌائي منک ڀڳوونَ را راز موئين زايا رئي گهڻي کوشش ڪرڻه ريا. (17) پڻ مت سوچو جي تم ڀڳوونَ را حُڪم ساڌين ڀڳوونَ را راز موئين زائي هيڪوه. آڪاش ان ڌرتئي ڪيڏيڪ تو کتم ٿيسي، پڻ ڀڳوونَ رون حُڪمون رئي هر هيڪ وات هميش هاسي ريشي.

(18) تم ڀڳوونَ رو حُڪم ساڌين ڪم شيڪاڙوه جي ڏوشي لکي ڏين پيڙي ڏوشي ڪروو ڪئين وات نٿي؟ جيو آپري ڏوشي ننه ساڌين پيڙي ڏوشي ڪرڻه، پلڻه اونه آپري ڏوشي لکي ڏيڏي هوڻه، توئي پڻ اُو آدمي اونا پيڙي ڏوشي ٿي پوندو ڪوم ڪرڻه. ان جيو اونا ساڌل ڏوشي ننه آپرا گهر ۾ راکڻه، اُو آدمي پڻ پوندو ڪوم ڪرڻه.

شائوڪار ان گريپ منک رو مثال



(19) پسڻه ايسو ڪيڏو: ”هيڪ شائوڪار منک هتو. اُو پاڌشا رون لوگهڙون جيوا اونچون م اونچا لوگهڙا پيرتو ان تاريڪ نائوڪا کاڌا کاتو ان آروم ان هڪ هون ريتو. (20) ان هيڪ گريپ منک هتو

جيا رو نوم لعزر هتو. اونا ننه شائوڪار را گهر را ڌروازا مانه ساڌيوت پرو. اونا را ٻڌا ڏيل مانه گونڀڙا هتا، (21) ان اُو شائوڪار ري اُوگارل ٽڪريون ٿي آپرو پيٽ پريا هارو هڪتو. ان ڪوترا آوين اونا را گونڀڙا ساتتا.

(22) هيڪ ڏي گريپ منک مري گيو، ان آڪاشي ڏوتي اونا ننه اُوپاڙين ابراهيم ڪن مون موئين بيهاريو. ان شائوڪار منک پڻ مري گيو، ان اونا ننه پوريو پرو. (23) اوتنه مرلون را جڳت موئين شائوڪار منک پوندِي هاري هتو، تئين اونسو زوڻه تو شيئا هون ابراهيم ڏيڪيام آيو، ان اونا ڪن لعزر پيڻل هتو. (24) پسڻه اونه هاڏ ڪرين ڪيڏو: ’او ڏاڏا ابراهيم، مون مانه ڏيا ڪرو. مون ڪن لعزر ننه ميلو، زم اونگڙي پوئي م توڙيڪ ٻوڙين ماري جيپ ننه سٻاڙين ترهه

مٽائڻ، ڪم تو هون ايئنه پاهي ري تڪليپ ۾ سون.

(25) پڻ ابراهيم اوتا ننه ڪيڏو: 'ڏيڪرا، ياڌ ڪر، ٿاري حياتي ۾ ٿاري حالت نائوڪئي هتئي، پڻ لعزر رئي حالت ڪراپ هتئي. هونئ اي ايئنه هڪ ۾ سٺ، ان تون تڪليپ ۾ سٺ. (26) پيڙئي وات اي سٺ، آهون وسا پڳوون هيڪ موٽئي ان اونڌي کاڌ راڪيئ. تيام جي ايئون ڪوڪ تمون ڪن آوا ڪرئ، تو نئين زائي هيڪئ، ان نڪو وڙي تمون موئين ٿي ڪوڪ امون ڪن آوي هيڪئ.'

(27) پسئ شائوڪار منڪ ڪيڏو: 'ٿيو، ڏاڏا. پڻ وڙي هون تمون ننه مينٽ ڪرونه، لعزر ننه مارا ٻاپ ري گهري ميلو، (28) ڪم تو مارا پونس پائي سٺ. لعزر اوئون ڪن زائين ايٺ ري حالت رئي هاڪ پرئ. ام نه ٿئ جي او پڻ ايئنه ايٺا پونڌا هار ۾ آئئ.'

(29) تيا مانه ابراهيم ڪيڏو: 'موسيٰ رو لڪل ان پڳوون رو نياپو ڏيڏا واڙون رو لڪل شاستر اوئون ڪن سٺ. پلئ اوئون رئي وات مونئ.'

(30) پسئ شائوڪار منڪ ابراهيم ننه ڪيڏو: 'هم نئين ٿئ، ڏاڏا ابراهيم، پڻ جي مرلون موئين ٿي ڪوڪ اوئون ڪن زاشي، تو او آڀرا ڪراپ ڪوم ساڏين توپونھ ڪرشي ان پڳوون ري وات مانھ ويشي.'

(31) پڻ ابراهيم ڪيڏو: 'جي او موسيٰ ان پڳوون رو نياپو ڏيڏا واڙون رئي وات نئين مونئ، تو مرلون موئين ٿي ڪوڪ جيوي اوئشي، توئي پڻ اوتا رئي وات نئين مونئ.'

ڏوه ڪريا را پارام

(متي 6:18، 7، 21-22، مرقس 9:42، لوقا 1:17-4)

17 (1) پسئ ايسو آڀرون شيلون ننه ڪيڏو: "ايوي واتون تو ضرور ٿيشي جيا ري ڪري منڪ ڏوه ڪرشي. پڻ ڏڪ اوئون منڪون هارو سٺ جيون ري ڪري منڪ ڏوه ۾ پڙئ. (2) جي ڪوئي پڻ منڪ ايئون نونون منڪون موئين

ٽي ڪياڪ نٿو ڏوه ۾ پاڙڻ، تو ڀڳوون اونا منڪ نٿو اٿئي گهڻي سزا ڏيشي جي اونا منڪ هارو نائوڪو ام ٿٽ جي اونا رٿه هيوو ڪوم ڪريا مور اونا را گڙا موئين گهرن تي رو پڙ ٻوندين اونا نٿو سمونڊ ۾ ڦڳوڙيو هوٽ. ③ تيام هوشيار ريا جي ايوو ڪوئي ڪوم تمون ٽي نه ٿن.

جي تمارو ڪوئي پائي تمارو ڏوه ڪرڻ، تو اونا نٿو هزماوو، ان جي او آڀرا ڏوه ٽي توڻو ڪرڻ، تو اونا نٿو ماڻي ڏيو. ④ جي او هڪا ڏي ۾ پلڻه ڪتي وار پڻ تمارو ڏوه ڪرڻ، ان هر وار تمون ڪن آوين ڪن: 'مئين ٿارو ڏوه ڪريو. مون نٿو ماڻي ڏن،' تو اونا نٿو ماڻي ڏيتا ريو.

يقين راکيا را پيارام

⑤ تئين مڪ شيلي پريو ايسو نٿو ڪيڏو: "تم امارو يقين وڌارو!" ⑥ تو پريو ايسو اوئون نٿو ڪيڏو: "جي تم ڀڳوون مانھ ٿوريا را پيز زتو روڳو ٿوڙڪوڪ يقين راکوت، تو تم ايتا ٿوڙ را وڻ نٿو ڪي هڪوت: 'ايتون اوکڙين سمونڊ موئين زائين ڪت! ان او تمارو ڪيڏو مونٽ."

ڏي ان ڳلوم رو مثال

آپنا ڏي ڀڳوون رو ڪوم پورو ڪروو آڀڻو قرض سڻ

⑦ "جي تمون موئين ٽي ڪياڪ رو ڪوڪ ڳلوم هوڻ جو هڙ هاڪلڻه ڪا ريڊيون سارڻه، زئين او هونز رو ٻني ٽي پاسو آوڻه، تو تم اونا نٿو ام ڪيشو ڪي؟ 'وو را، همڻه ڪاٿلا مانھ ٻيهين روئي ڪاٿو! ام تو ڪوئي نئين ڪن. ⑧ پڻ ڳلوم نٿو ام ڪيشي: 'مارئي روئي تيار ڪر. زئين هوڏي هون ڪاٿي پين نه ڍاپون، تئين هوڏي مانھ رو مانھ اوپين مارئي شيوا ساڪري ڪر. ان پسڻه ٿون پلڻه زائين ڪاٿي پي.' ⑨ زئين ڳلوم ڏي رو ڪيڏل ڪوم پورو ڪريو، تو ڏي مانھ اوڻه ڪئين ٿورو نٿي ڪريو. ⑩ هيوڻه نمونڻه تم پڻ زئين ڀڳوون را

کيڏل کوم پورا ڪري ريو، تو تمي ڪيا: 'امي تو روڳا ڳلومون را زم سون. جئين کوم اماره ڪروو تو، او تو امي ڪريوه پرو.'

ايسو ڏهون ڪويون ننه ھاڙا ھورا ڪرڻھ

⑪ هيڪ وار، زئيون ايسو يروشلم هومو زاتوت ريو، تو او گليل ان سامريه علاقون را ڏنگ مانھ متوت ريو. ⑫ اوتنه او هيڪا پاڙا موئين زايا وازو هتو، تئيون ڏھ منڪ اوتا ننه پيڙا تيا، جيا ڪوڊ ري پيماري ري ڪري اڻڙال هتا. تيام اوئي شيئا ٿي اويين ⑬ ايسو ننه زور ٿي ڪيڏو: "او ڳرو ايسو جي، امون مانھ ڏٺا ڪرو!" ⑭ ايسو اوئون ننه ڏيڪين ڪيڏو: "زائو، ان آڀرا ڏيل ڀڳوون را گهر رون پوزاريون ننه ڏيڪاڙيا، زم او تمارا ھاڙا ھورا ٿيا رٿي ھاڪ پرڻه."

تئيون او روونا تيا، ان ويتون ويتون ڪوڊ ري پيماري ٿي ھاڙا ھورا تين اڻڙايا ٿي پويتر ٿي ڳيا. ⑮ اوئون موئين ٿي هيڪه زنه، زئيون زيوو جي "هون ھاڙو هورو ٿي ڳيوھ،" تئيون زور ٿي ڀڳوون را وڪوڻ ڪرتو پاسو ايسو ڪن آيو. ⑯ او ايسو ري پڳي آوين پڙيو نو، ان اوتا رو ٿورو مونيو. هوته او منڪ سامري قوم رو هتو.

⑰ تيا مانھ ايسو منڪون ننه ڪيڏو: "ڏھ ئي زئا اڻڙايا ٿي پويتر نٿي تيا، ڪي؟ تو پسنه ياقبي نو ڪيه؟ ⑱ روڳو اي ڌاري قوم رو منڪ ڀڳوون را وڪوڻ ڪروا پاسو آيوھ. پيڙا ڪم نٿي آيا؟"

⑲ پسنه ايسو اوتا منڪ ننه ڪيڏو: "اوين زو پرو. تئين يقين ڪريو، تيام تون پڇي ڳيوھ."

ڀڳوون را راز ان منڪ ذات را ڏيڪرا را آيا را پارام

(متي 23:24، 28-37، 41، لوقا 17:20-37)

⑳ هيڪ ڏي فريسي پالتي ري ڪئينڪ منڪي ايسو ٿي پونسيو: "ڀڳوون رو راز

ڪيڏي آوشي؟ ”تيا مانھ ايسو اُئون نٿ ڪيڏو: ”پڳوون راز ري ڪوئي ايوي نيشوني نٿي جيون ٿي اُئا را آيا رئي ڪهر پڙه. (21) ان منڪ ام نئين ڪئ جي اينا ماڳ پڳوون منڪون مانھ راز ڪرئ ريو، ڪا اُئا ماڳ پڳوون منڪون مانھ راز ڪرئ ريو، ڪم توھاس ۾ پڳوون منڪون رون منون موئين راز ڪرئ ان پڳوون رو راز تمون وسا سئ.

(22) پستھ ايسو شيلون نٿ ڪيڏو: ”ايوا ڏورا ڏي آوشي، زئون تمي مارئ راز ڪريا را ٿوئا هارو هڪشو، جيڏي هون منڪ ذات رو ڏيڪرو پڳوون را پاها ٿي راز ڪروا آويه. ان تمي ڪيشو جي هايا ٿوئا را روڳا هڪا ئي ڏي نٿ پاڙون توئي ٿيڪ. پڻ تمي پاڙي نئين هڪو. (23) منڪ تمون نٿ ڪيشي: ’زوئو، پڳوون را پاها ٿي راز ڪريا واڙو اينا ماڳ سئ ڪا ’زوئو، اُئا ماڳ سئ. پڻ تمي مت زايا نڪو اُئون وونهڙ ويا. (24) ڪم تو زم ويزڙئي ڪوتون آڪاش را هڪا ڌنگ ٿي پيزا ڌنگ هڏي ڌرتي مانھ زبڪئ، تم هون منڪ ذات رو ڏيڪرو آپرئ آيا رئ ٿوئئ هٿمارو ٻڌيل ساوو ٿيئ. (25) پڻ مور ٿي اي ضرور ٿيشي جي اينا زمونا را منڪ مون نٿ گهٽا ڌڪ ڏيشي، ان مارا پارام ڦينصلو ڪرشي جي هون پڳوون رو سونيل پچايا واڙو نٿي پڻ ڪوڙو سون.

(26) زم نوح رون ڏيئون م ٿيو تو، تم منڪ ذات را ڏيڪرا رئ آيا رون ڏيئون م پڻ ٿيشي. (27) اُئون ڏيئون م منڪ کاتا پيتا ريا، ان ويوا ڪرتا ريا، ان نيٺ او ڏي آيو زئون نوح پٿر موئين سڙي گيو، ان پڳوون را طرف ٿي ٻوڏ آوين اُئون ٻڌون منڪون نٿ ڪتم ڪريا پرا. (28) زم لوط رون ڏيئون م ٿيو تو، همروم پڻ ٿيشي. او منڪ کاتا پيتا، واپار ڪرتا، پوک ڪرتا ان گهر ناوتا ريا. (29) پڻ جيڏي لوط سدوم شهر ٿي ٻارو نيھري گيو، اُئو ڏي پڳوون را طرف ٿي آڪاش هون پاھي ان گھنڌڪ ٿي ٻرتا پوٽا پڙيا ان اوت رون ٻڌون منڪون نٿ ڪتم ڪريا پرا. (30) همروم پڳوون رئي وات مونيا واڙا پچي زاشي، پڻ پيزا ٻڌائي نئين پچئ، جيڏي پڳوون مون منڪ ذات را ڏيڪرا نٿ ٻڌون هومو ساوو ڪرشي.

③۱ اُوڻه ٿوڻه، جي ڪوڪ منڪ ڇٽ مانھ ھوڻ، ان اُوڻا رو شيمون گھر موئين ھوڻ، تو اُو شيمون ليوا نہ اوترڻ. ھيوڻ نمونڻه جي ڪوڪ ٻني موئين ھوڻ، تو اُو آڀرو شيمون ليوا پاسو گھري نہ زائھ. ③۲ ياڌ راکيا جي لوط ري ڏوشي ٿي ڪي ٿيو تو. ③۳ جيو ايڻا ڏنيا رڻي لالچ راکين آڀرڻي حياتي ھڪي راکو ڪرڻ، تو نيٺ اُوڻا نڻه ھميش رو موت زڙشي. پڻ جيو لالچ ساڌين موت ھوڏي پڳوون ري وات مانھ وڻ، تو اُوڻا نڻه ھميش رو جيون زڙشي.

③۴ ھون تمون نڻه ڪاتري ٿي ڪونھ، اُوڻه ٿوڻه جي ٻي منڪ رات را ھيڪا ڪاڻلا مانھ ھوتل ھوشي، تو پڳوون ھيڪا نڻه اُوڻون لين پڇاوشي ان پيزا نڻه اُوڻه ساڌشي پرو. ③۵ جي ٻي ڏوشي پيزي ٻيني گھرنٽي ڦيروتي ھوشي، تو پڳوون ھيڪي نڻه اُوڻون لين پڇاوشي، ان پيزي نڻه اُوڻه ساڌشي پري. ③۶ (جي ٻي زڻا ٻني موئين ھوشي، تو پڳوون ھيڪا نڻه اُوڻون لين پڇاوشي ان پيزا نڻه اُوڻه ساڌشي.)



③۷ تيا مانھ شيلي ايسو ٿي پونسيو: ”پريو، اي واتون ڪيا ماڳ ٿيشي؟“ تو ايسو ڪيڏو: ”جيئن پونڌائي ھوشي، اُوڻه سزا زڙشي. جيئن ڍنڍوڪڙ ھوشي، اُوڻه گھڙڏون پڻ آوين پيزي ٿيشي.“

ڪوٽا جج رو مثال

18 ① پسڻه ايسو شيلون نڻه ھر ٿوڻه پراڻا ڪريا ھارو ان ھيمت نہ ھاريا ھارو اي مثال رڻي وات ھمپڙاڻي: ② ”ھيڪا شھر موئين ھيڪ جج ھتو. اُو نڪو پڳوون ٿي پڻاتو، ان نڪو منڪون رڻي پروا ڪرتو. ③ اُوڻا ئي شھر موئين ھيڪ رنڌال ڏوشي ريتي. اُو گھڙي گھڙي آوين جج نڻه ڪيتي: ’ھيڪ منڪ مارو حق ڪائي گيوھ. مارو حق مون نڻه لي ڏيو.‘ ④ جج گھڻا وڪ ھوڏي تو اُوڻا رڻي ڪئين نہ ھومپڙي، پڻ نيٺ اُو سوچو ماڏيو جي ’مون نڻه نڪو پڳوون رڻي پيڪ

سټه نكو منكون رڼي پروا. ⑤ تونې پڼ اي روندڼي روند موند ننه اتو تنگ كړه، جي هون اوئا رو حق لي ځي. نكا او گهڙي گهڙي آوين موند ننه كك كشي. ” ⑥ پسته پريو ايسو كيډو: ”هومپزو جي كوټو جج كي كنه ريو. ⑦ تو پسته پگوون آپرون سونډل منكون ننه اوئون رو آپرو حق نئين ځه، كي، جيا ځي رات اوئا ټي مدت مونگنه ريا؟ پگوون اوئون رڼي مدت كريام ځير كشي، كي؟ ⑧ هون تمون ننه كاتري ټي كونه، او جلدې ډر اوئون رو حق ځي، ايئا وات ډر كئين شك نټي. پڼ شك رڼي وات اي سټه جي زنيون هون منك ذات رو ځيځرو آځي، تنيون جگت ډر ايو ايقين راكيا واڙا منك هوشي، كا نئين هوته. ”

فريسي پالتي واڙا ان ناكو ليډا واڙا رو مثال

⑨ پسته ايسو اي مثال رڼي وات كئينك ايوون منكون ننه همپزاوڼي جيا آپ مانه پروسو راكين آپ ننه پگوون را پيځوڼي هزمتا ان پيزون ټډون ننه گهټ هزمين شپ راکتا.

⑩ ”هي منك پگوون را گهر موئين پراتنا كروا گيا. هيك فريسي پالتي رو منك هتو، ان پيزو ناكو ليډا واڙو. ⑪ فريسي منك ډار ټين هومو اوپو ان ام پراتنا كروا مډيو: ’او پگوون، هون ټارو ټورو مونونه جي هون پيزون ټډون منكون جيوو نټي، جيا نځي كړه، پييمون سټه، ان پوندو كوم كړه، ان نكو وڙي هايا ناكو ليډا واڙا جيوو سون. ⑫ هون هقتا ډر هي ځي ورت راكونه، ان كمائي ريوون ټډيون شينهنون ټي ځهو حصو ټارا نوم مانه ځيونه. ’

⑬ پڼ ناكو ليډا واڙو پيزون ټي شيټي اوپو ريو. اوته آپ ننه پگوون هومو زويا جيوو نه هزمين آكاش هومو ټي نه زويو، پڼ آپرون كرل ځوهون ري كري ځكي ټين هيټام ډينكون ليتون ليتون كيډو: ’او پگوون، موند ځوهاري مانه ځيا كرو! ”

⑭ پسته ايسو كيډو: ”هون تمون ننه كاتري ټي كونه، جي او فريسي منك

نئين، پڻ اي پيزو منڪ پڳوون ٿي آپرون ڏوهون رئي ماقئي لين پاسو گهري ڳيو پرو. ڪم تو جيو آپ ننه موٽو هزمئ، پڳوون اوتا ننه گهٽ ڪرشي. ان جيو آپ ننه گهٽ هزمئ، پڳوون اوتا ننه موٽو ڪرشي.

ايسو ننڪون بازون ننه آشيرواڌ ڏئه

(متي 13:19-15، مرقس 10:13-16، لُوقا 15:18-17)

⑮ هيڪ وار منڪ ايسو ڪن ننڪون بازون ننه تيڙي آيا، زم ايسو اوئون مانھ ھاٿ راڪين آشيرواڌ ڏئه. پڻ زئيون شيلي اوئون ننه ڏيڪيا، تئيون او منڪون ننه وڙگائين هيڪل زيا رو ڪيو مڏيا. ⑯ پڻ ايسو بازون ننه آپ ڪن تيڙيا، ان شيلون ننه ڪيڏو: ”بازون ننه مون ڪن آوا ڏيو، ان اوئون ننه مت روڪو، ڪم تو پڳوون رو راز ايئون بازون جيوون منڪون هارو سئ. ⑰ هون تمون ننه هاس ڪونه، جيو پڻ باز جيوو تين پڳوون رو راز قبول نٿي ڪرتو، تو او پڳوون را راز موئين ماڳي نئين آوي هيڪئ.“

شاڻوڪار منڪ ان پڳوون رو راز

تارڻ لپڌا هارو ٻڌوئي ڪئين ساڌيا هارو تيار ريوو

(متي 16:19-30، مرقس 10:17-31، لُوقا 18:30-30)

⑱ هيڪ ڏي يهوديون رنه هيڪئ آڳيوون ايسو ٿي پونسو: ”ٺاڻوڪا ڳرو، مارئ ڪي ڪرو، جيا ٿي مون ننه پڳوون ڪن هميش رو جيون زڙئ؟“ ⑲ ايسو اوتا ننه ڪيڏو: ”تمي ڪي سوچين مون ننه ٺاڻوڪو ڪوھ؟ پڳوون شوا پيزو ڪوئي ٺاڻوڪو نٿي. ⑳ تمون ننه پڳوون رون حڪمون رئي تو اڳي ڪبر سئ، جي پوندو ڪوم نه ڪرو، ڪون نه ڪرو، سورئي نه ڪرو، ڪوڙئي هاڪ نه پروو، ان آپرا مان ٻاپ رو مون راڪو.“

㉑ تو اوئ ڪيڏو: ”هايون ٻڌون حڪمون مانھ تو هون ننڪو ٿڪو هوتون

وونھ ريو.

22) اي ھومپڙين ايسو اوتا نٺه ڪيڏو: "هزون تمون موئين هيڪ وات ريل سٺه. تمارو جئين ڪئين سٺه او ويسين پٺيها گريپون ۾ وراوو پرا، تو تمون نٺه آڪاش موئين آڪاشي ملڳت هميش رو جيون زڙشي، ان پسٺه آوين مارا شيلا ٿين مون وونھڙ آو." 23) زئيون اوٺه اي وات ھومپڙي، تو او گھڻو نيموٽو ٿيو، ڪم تو او الاهي شائوڪار منڪ هتو.



24) زئيون ايسو اوتا منڪ نٺه نيموٽو ڏيڪيو، تئين ڪيڏو: "ملڳت واڙون رٺه پڳوون را راز موئين زاوو ڪتو ڏورو سٺه." 25) ڪم تو شائوڪار منڪ رو پڳوون را راز موئين زاوو ايوو ڏورو سٺه، جي هيا را مقابلو ۾ اونٺ رو هوئي را ناڪا هونھرو متوو هورو هوٺ.

26) تئين ھومپڙيا واڙي پونسيو: "جي شائوڪارون نٺه تارن نئين زڙٺه، تو پسٺه ايوو ڪون هوشي جيا نٺه تارن زڙشي؟" 27) ايسو اوئون نٺه ڪيڏو: "جيا ڪوم منڪون ٿي نٿي ٿي هيڪتا، او پڳوون ٿي ٿي هيڪه."

28) پطرس ڪيڏو: "زوٽو، امي تو آڀرو ٻڌوئي ڪئين ساڏين تمارا شيلا ٿين تمون وونھڙ آياھ." 29) تيا مانھ ايسو اوئون نٺه ڪيڏو: "هون تمون نٺه هاس ڪونھ، جيئھ پڳوون را راز هارو آڀرو گھر، آڀري ڏوشي نٺه، پايون بينون نٺه، مان ٻاپ نٺه، ڪا ٻارون نٺه ساڏياھ، 30) تو اوتا هر هيڪ نٺه ايٺا حياتي ۾ ساڏل شينھون ٿي گھڻو وڌيڪ زڙشي، ان آيا واڙي حياتي ۾ هميش رو جيون زڙشي."

ايسو ترٿمي وار آڀرا موت را پارام مور ٿي همپڙاوٺھ

(متي 17:20-19، مرقس 10:32-34، لوقا 18:31-34)

31) پسٺه ايسو آڀرون ٻارون سونڊل شيلون نٺه هيڪه پاهٺه تيڙي گيو ان اوئون

ننه ڪيڏو: ”زوڻو، آبي يروشلم شهر هوما هالونه ريا. ان اوڻه جي واتون پڳوون رو نياپو ڏيڏا واڙا مون منڪ ذات را ڏيڪرا را پارام اڳي لڪي گيا، او ٻڌي پوري ٿيڻي. (32) ڪم تو منڪ مون ننه زهلاوشي ان ڌاري قوم واڙون مٺڪون رنه خواله ڪرشي، جيا پڳوون ننه نٿي مونت، ان او مون مانه نٿولي ڪرشي، مارئي پيڙتئي ڪرشي، ان مون مانه ٿوڪشي. (33) او مون ننه چاڳا هڻشي ان پسته مون ننه مارشي پرو. پڻ ترٻه ڏي هون وڙي جيوي اوليه.“

(34) پڻ شيلا اوڻون موئين ٿي هيڪ ئي وات نه هزميا. اي واتون اوڻون را هزميام نه آوي، ان اوڻون ننه ڪئين ڪهر نه پڙئي جي ايسو ڪي ڪه ريو.

ايسو اونڌا فقير ننه هازو هورو ڪرڻه

(متي 29:20-34، مرقس 10:46-52، لوقا 18:35-43)

(35) زئيون ايسو پنڌ ڪرتون يريخو شهر ڏوڪڙو آوين پوڳيو، تو اوڻه شيرڙا مانه هيڪ اونڌو منڪ پينو مونگتوت ريو. (36) زئيون اوڻه هومپڙيو جي گهڻا



منک مٽھ ریا، تئین اونڌڻه پُونسیو: ”کي ٿھ ريو؟“ (37) تو منکي اُونا نٽھ ھمپڙايو جي ”ايسُو ناصرت شھر وازو آوئھ ريو.“ (38) تئین اُونھ زور ٿي ڪيڏو: ”او ايسُو، دائود پاڌشا را وستار، مُون مانھ ڏٺيا ڪرو!“ (39) پڻ جيا منک مور ۾ زاتات ریا، اُئي اُونا نٽھ ھاڪل ڪرين ڪيڏو: ”ماڻ ڪرا!“ پڻ اُو ماڳي زور ٿي ڪيو مڏيو: ”او دائود پاڌشا را وستار، مُون مانھ ڏٺيا ڪرو.“

(40) تيا مانھ ايسُو اُوپو ريو ان منکون نٽھ ڪيڏو: ”ھايا نٽھ مُون ڪن تيڙي آو!“ زئین اونڌا نٽھ ڏوڪڙو تيڙي آيا، تو ايسُو اُونا ٿي پُونسیو: (41) ”ٿاربي مرضي ڪي سٺ، جي هُون تُون هارو ڪي ڪرون؟“ تو اُونھ ڪيڏو: ”ساڏو جي، مُون نٽھ هازو هورو ڪرو، زم هُون وڙي ڏيکي هيڪون.“ (42) تو ايسُو اُونا نٽھ ڪيڏو: ”تُون هازو هورو ٿه! تئين يقين ڪريو، تيام تُون پڇي ڳيوھ.“

(43) اُو جهٽ موئين وڙي ڏيکيا مڏيو، ان پڳوون را وڪوڻ ڪرتو ايسُو وونھڙ ويوا مڏيو. زئین اسرائيلي قوم ري منکي اي ڏيکيو، تئین اُئي ٻڌي پڳوون رو ٿورو مونيو.

ايسُو زڪائي ري گھري زائھ

19 ① پستھ ايسُو يريخو شھر موئين آوين شھر موئين ٿي زاتوت ريو. ② اُونھ هيڪ منک هتو جيا رو نوم زڪائي هتو. اُو ناڪو ليڏا وازون رو نيڪيتار ان شائوڪار منک هتو. ③ اُو ايسُو نٽھ زويا رئي ڪوشش ڪرتوت ريو جي اُو ڪيوو سٺ. پڻ گھڻون منکون ري رش ري ڪري، اُو ايسُو نٽھ ڏيکي نه هيڪيو، ڪم تو آپ قد رو چوتو هتو. ④ تيام اُو ٿوڙوڪ مور ۾ ڊوڙين ايسُو نٽھ زويا هارو انجیر را هيڪا وڻ مانھ سڙين پينو، ڪم تو ايسُو اُونا شيرڙا مانھ تين مٽيا وازو هتو.

⑤ ايسُو زئین اُونا ماڳ پوڳيو، تئین اُونسو زوئين اُونا نٽھ ڪيڏو: ”او زڪائي، هوڻه نيسا اوتري آو، ڪم تو آز مارٽھ تماري گھري ٽڪوھ.“

- ⑥ اُو هٽمارو نيسو اوتري آيو، ان ايسو ننه ڪشي ٿي آڀري گهري تيزي ڳيو.
- ⑦ اي ڏيکين ٻڌائي منڪ ايسو رئي ڳلا ڪرين ڪيو مڌيا: "اي موٽا ڏوهاري ري گهري رات تڪيا هارو ڳيوه." ⑧ پڻ زڪائي اُوپين ڀريو ايسو ننه ڪيڏو: "ساڏو جي، هونو هون آڀري ملڳت رو اڌ حصو ڳريهون ننه وراوي ڏيونه، ان جي مٿين ڪياڪ ٿي ٺڳئي ڪري هوشي، تو هون اوٽا ننه چئو پري ڏيهه."
- ⑨ پسئو ايسو زڪائي را پارام ڪيڏو: "آز ايٿا گهر را منڪ پڳوون ري سزا ٿي پڇي ڳياھ. ڪم تو اي پڻ ابراهيم رو وستار سئو، ان هونو آڀرا ڏاڏا ابراهيم را زم وشواس راکئو. ⑩ ان هون منڪ ذات رو ڏيڪرو، جيا پڳوون ٿي شيتي ٿي ڳيا، اوئون ننه پاسا تيزي آووا ان پڇاوا آيوه."

پاسو آيا وازا يادشا رو مثال

ايسو آپ را پارام شيڪارڙه

(متي 14:25-30، لوقا 11:27-28)

- ⑪ زئيون منڪ اي واتون هومپڙتات ريا، تئيون ايسو اوئون ننه اي مثال رئي وات پڻ همپڙاوي، ڪم تو او يروشلم شهر موئين پوڳيا وازو هتو، ان منڪ ام هزمتات ريا جي ايسو پڳوون را پاها ٿي يادشا ٿين همئنه گهڙيڪ راز ڪرشي.
- ⑫ ايسو اوئون رئي ڳلت سوچ همئي ڪريا هارو ام ڪيڏو: "هيك موٽو منڪ هتو. او شيتي ملڪ هومو موٽا يادشا ڪن روونو ٿيو، زم موٽو يادشا اوٽا ننه پڻ يادشا ناوئو، ان پسئو او پاسو آوين آڀرا ملڪ مانھ راز ڪرئو. ⑬ زايا مور اوئو آڀرون نوڪرون موئين ٿي ڏهون زئون ننه تيزاوين اوئون ننه پونس پونس هزار روپيا ڏيڏا ان ڪيڏو: 'زئيون هوڏي هون پاسو نه آوون، تئيون هوڏي ايئون ٿي واپار ڪريا.' ⑭ پڻ جيا منڪ اوٽا ملڪ موئين ريتا، او اوٽا منڪ ٿي وير راکتا. تيام اوئي آڀرون منڪون ننه اوٽا وونهي موٽا يادشا ننه ڪي ميليو: 'اماري مرضي نٿي جي اي منڪ امون مانھ راز ڪرئو.'

⑮ زئيون موٽو منڪ ڀاڏشا ٿين پاسو آيو، تئين اوئون نوڪرون ننه تيڙايا، جيون ننه اوئه پٺيها ڏيڏا تا، زم او هر هيڪ ٿي کهر پاڙئ جي واپار ڪريا ٿي ڪتو ڦاڻيڏو ٿيوه. ⑯ پيرهيون آيو ان ڪيڏو: 'ساب، تمارون ڏيڏل پونسون هزارون ٿي پيزا پنجاه هزار رُوپيا ڪموٽوھ.' ⑰ تو ڀاڏشا اوئا ننه ڪيڏو: 'شاپاش، تون ناٽوڪو نوڪر سئ. هوئ هون تون ننه ڏهون شهرون رو راز ڏيونھ، ڪم تو تون ٿوڙام ايمونڌار ريوھ.' ⑱ پيزو نوڪر آيو ان ڪيڏو: 'ساب، تمارون ڏيڏل پونسون هزارون ٿي پيزا پنجويه هزار رُوپيا ڪموٽوھ.' ⑲ تو ڀاڏشا اوئا ننه پڻ ڪيڏو: 'هون تون ننه پونسون شهرون رو راز ڏيونھ.' ⑳ هيڪ پيزو نوڪر پڻ آيو ان ڪيڏو: 'ساب، تمارا ڏيڏل پونس هزار رُوپيا اي ريا. اي مئين رُومال موئين بوندين راڪيا تا، ㉑ ڪم تو هون تمون ٿي پيٽو جي تمي ڏورا منڪ سو. جيو تمي پيزو نٿي ڪريو او تمي اوڀاڙوھ، ان جيو تمي نٿي پوڪيو او تمي لٽوھ.' ㉒ تيا مانھ ڀاڏشا اوئا ننه ڪيڏو: 'پونڌا نوڪر، ٿاري آڀري وات ٿي هون ٿارو ڏوھ ڪاڍونھ. ٺيڪ سئ، تون ام هڙمئھ جي هون ڏورو منڪ سون، ان جيو مئين پيزو نٿي ڪريو او هون اوڀاڙونھ، ان جيو مئين نٿي پوڪيو او هون لٽونھ. ㉓ تو پسئ تئين مارا پٺيها وياز مانھ ڪم نه ڏيڏا؟ تون هم ڪرئت، تو پاسو آوين گهٽ ۾ گهٽ مون ننه وياز تو زڙئت.'

㉔ پسئ ڀاڏشا آپرون سپايون ننه ڪيڏو: 'ايئا ٿي هائي پونس هزار ڪوهي ليو، ان اوئا ننه ڏيو پرا، جيا ڪن پنجاه هزار رُوپيا سئ.' ㉕ تو اوئي ڪيڏو: 'ساب، اوئا ڪن تو اڳي پنجاه هزار رُوپيا سئ.' ㉖ پڻ ڀاڏشا ڪيڏو: 'هون تمون ننه ڪاتري ٿي ڪونھ، جيا ٿي ڪئينڪ ڦاڻيڏو سئ، تو اوئا ننه وڌيڪ ڏيوراشي. ان جيا ٿي ڪئين ڦاڻيڏو نٿي، جنين ڪئين اوئا ڪن سئ، او پڻ اوئا ٿي ڪوهراشي. ㉗ پڻ مارا ڏشمن جيون رئي مرضي نٿي جي هون اوئون مانھ راز ڪرون، اوئون ننه ايئنه تيڙي آوو، ان مارئ روڀرو اوئون ننه مارو پرا.' "


يَرُوشلم شهر ۾ ايسو رو اڪري هفتو

ايسو يَرُوشلم شهر ڏوڪڙو آوئھ

ان گھڻا منڪ اُئا نھ ڀڳوون رو سئونيل ڀڄايا وازو ڪريست مونين
اُئا را وڪون ڪرئھ

(متي 21:1-11، مرقس 11:1-11، لُوقا 19:28-40، يوحنا 12:12-19)

②8 پسنه ايسو اي واتون ڪرين يَرُوشلم شهر هومو مور ٿين وُڍو. ②9 زئيون
او زيتون نومي ڏونگر ڪن بيت فگي ان بيت عنياه پاڙون ڏوڪڙو آيو، تئين
بيئون شيلون نھ ام ڪين مور ٿي ميليا: ③0 ”هومليا پاڙا موئين زائو، ان زئيون



تمي اُئا موئين پوگشو، تو اُوتنه گھڙيا
رو هيڪ وشيرو ٻوندل ڏيڪشو، جيا مانھ
اگي ڪيئنه سونارئي نئي ڪري. اُئا
نھ سوڙين ايئنه هاڪلي آيا. ③1 جي
ڪوئي تمون ٿي پونسنه: ’تمي ايئا نھ
ڪم سوڙوھ ريا؟‘ تو تمي ڪيا جي ’ايئا
رئي پريو نھ ضرورت سھ.“

③2 پسنه او شيلا شيرزو لين گيا، ان

زم ايسو اوئون نھ ڪيڏو تو، همروم ڏيڪيو. ③3 زئيون وشيرا نھ سوڙتات ريا،
تو اُئا ري ڏيئي پونسيو: ”تمي وشيرا نھ ڪم سوڙوھ ريا؟“ ③4 اُئي ڪيڏو:
”ايئا رئي پريو نھ ضرورت سھ.“

③5 پسنه او وشيرا نھ ايسو ڪن هاڪلي آيا، ان آپرا توڻال وشيرا مانھ
پاڙين ايسو نھ اُئا مانھ ساڙيو. ③6 پسنه ايسو گھڙيا مانھ روونو ٿيو،
ان زاتون زاتون، ايسو نھ مون ڏيڏا هارو منڪ اُئا مور شيرڙا مانھ آپرا

توڻال وساوتات ريا. (37) زئيون ايسو اونا ماڳ ڏوڪڙو پوڳيو جيئن زيتون نومي ڏونگر ٿي شيرزو نيسو اوترئ، تئيون ايسو را جيا گهڻا شيلا اوتئ هتا، او ٻڌائي گهڻا ڪش ٿيا. ان جيا ڪوم پڳوون ري ڪڙا ٿي ايسو ڪريا تا ان اوئي ڏيڪيا تا، اوئون ٻڌون هارو او زور ٿي ايسو ري ڪري پڳوون را وڪوڻ ام ڪروا مڌيا:

(38) "ايشور رو آشيرواڏ ايئا پاڌشا مانھ هوئ،

جيو ايشور را پاها ٿي آوئ.

آڪاش موئين هڪ تئ

ان پرميشور را وڪوڻ تئ.

(39) تيا مانھ اوئون منڪون موئين ٿي فريسي پالتي ري ڪئينڪ منڪي ايسو نئ ڪيڏو: "او گرو، تمارون شيلون نئ هم ڪيڏا رو نا پاڙو!" (40) پڻ ايسو اوئون نئ جواپ ڏين ڪيڏو: "هون تمون نئ ڪاتري ٿي ڪونھ، جي اي ماڻ ڪري گيا، تو پوڻا پڻ زور ٿي مارئي جي ٻوللوا مڌشي، جي هون پڳوون را پاها ٿي راز ڪريا واڙو سون."

ايسو يروشلم شهر هارو روئھ ڪم تو اوت ري منڪي نه اوڙڪيو
جي او پڳوون رو سونيل پڇايا واڙو سئ

(41) زئيون ايسو يروشلم ڏوڪڙو آيو، تئيون شهر نئ ڏيڪين اونا هارو گهڻو رويو (42) ان ڪيڏو: "او يروشلم، ٿارا منڪ جي روڳو آڙ ئي اوڙڪت جي آڀرو هڪ ليڏا هارو ڪي ڪروو، تو ئيڪ ٿئ. پڻ هزون هوڏي هائي وات اوئون ٿي هٿال سئ. (43) جي اوڙڪت، تو ئيڪ ٿئ، ڪم تو ايو ڏي اوئون مانھ آوشي، جيڏي اوئون را ڏشمڻ يروشلم شهر ڪوهيا هارو شهر رئ چوڌاري موٽي پينت ناوشي پري، ان شهر رئ چوڌاري ڦري آوشي. (44) او شهر نئ پونگشي پرو، ان منڪون نئ شهر موئين را موئين مارشي پرا، ان يروشلم شهر را پتر ئي هازا نئين

رئه، کم تو اوت ري منکي ايئا توثا نئه نه اوزکيو، زئيون پڳوون اوتون نئه پچاووا آيو.

ايسو پڳوون را گهر موئين ٿي واپار ڪريا وازون نئه بارا ڪاڍه

(متي 17-12:21، مرقس 15:11-19، لوقا 45:19-48، يوحنا 2:13-22)

④5 تيا ڪيڙ ايسو يروشلم شهر موئين زائين پڳوون را گهر موئين گيو. ان جيا منک پڳوون را گهر موئين پڳوون را نوم مانه سڙايا هارو مال ويستات ريا، اوتون نئه بارا ڪاڍوا مڏيو ④6 ان ڪيدو: "شاستر موئين پڳوون رئي اي وات لکل سئه:

'مارو گهر پراٿنا ڪريا هارو هوشي'

پن ٽمي ايئا نئه آپري ڪمائي رو نمونو نايوه ان زوئيه ايئا نئه ڌاڙيلون رئي پٿاري ٺاوين پيٺاه.

④7 پسئه ايسو پڳوون را گهر موئين تاريخ منڪون نئه شيڪاڙوا لاڳيو. پن موتا پوزاري، شاستر زوٿيا واڙا ان اسرائيلي قوم را موتا منک ايسو نئه مراووا ڪرتات ريا. ④8 پن اوتون نئه ڪبر نئي پڙئي جي "ڪم ڪرين ايئا نئه مراوون؟" ڪم تو اوتون ري آپري اسرائيلي قوم را ٻڌائي نونا منک ايسو ري واتون ڪون ڏين هومپڙتا.

يهودي ڌرم را آڳيوون ايسو ري اڪتباري را پارام سوئال پونسئه

(متي 27-23:21، مرقس 27:11-33، لوقا 20:1-8)

20 ① اوتون ئي ڏيئون موئين هيڪ وار زئيون ايسو پڳوون را گهر موئين اسرائيلي قوم رن منڪون نئه شيڪاڙوت ريو ان ڪشي رئي ڪبر همپڙوتوت ريو، تو موتا پوزاري، شاستر زوٿيا واڙا ان اسرائيلي قوم را آڳيوون پيڙا ٿين ايسو ڪن آيا ② ان پونسئو: "ٽمي ڪيا را ڪيڏا ٿي اي ڪوم ڪروه؟

ڪيئن ته مون نه اي ڪوم ڪريا رڻي اڪتيارڻي ڏيڏيھ؟

③ ٿيا مانھ ايسو اوئون نه ڪيڏو: ”هون پڻ تمون ٿي هيڪ وات پونسونه. تمي مون نه اي همپزاو ④ جي يوحنا پڳوون را طرف ٿي پويتر سنون ڏيتو، ڪا منڪون را طرف ٿي؟“

⑤ تو پسته او آيت موئين ڪيا مڏيا: ”جي آبي ام ڪيشون: پڳوون را طرف ٿي، تو اي آيون نه ڪيشي: پسته تمي اوئا رڻي وات ڪم نه مونئي؟“ ⑥ ان جي آبي ام ڪيشون: منڪون را طرف ٿي، تو آپئي ٻڌي قوم آيون نه پوئا هڻن مارشي پرا. ڪم تو ايئون نه پڪي ڪاتري سته جي يوحنا پڳوون رو نياپو ڏيڏا واڙو هتو. ⑦ پسته اوئي ڪيڏو: ”امون نه ڪهر نٿي جي يوحنا ڪيا را طرف ٿي پويتر سنون ڏيتو.“

⑧ ٿيا مانھ ايسو اوئون نه ڪيڏو: ”تو پسته هون پڻ تمون نه نئين همپزاوون جي هون ڪيا را ڪيڏا ٿي اي ڪوم ڪرونه ريو.“


ڳولون هاريون رو مثال

ايسو آپ نه ڏئي رو ڏيڪرو ڪين آپ را پارام شيڪاڙه

(متي 33:21-46، مرقس 12:1-12، لوقا 9:20-19)

⑨ پسته ايسو وڙي منڪون هومو ڦرين اي مثال رڻي وات همپزاو مڏيو: ”هيڪ زميدار هتو. اوئه ڌراڪون رو ٻاڳه پوکايو تو. پسته ٻاڳه موئين هاري اوپاڙين آپ گهڻون سالون هارو ڪياڪ شيئي ملڪ ۾ گيو پرو.

⑩ ڙيون ڌراڪون پاڪيا را ڏي آيا، تو ڏئي آپرا هيڪا نوڪر نه آپرو حصو هاريون ڪن ليوا ميليو. پڻ هاريئي اوئا نه ماريو ان نالي هاڻي پاسو ميليو پرو. ⑪ پسته ڏئي هيڪ پزو نوڪر ميليو. پڻ ايئي اوئا نه پڻ مارين اوئا رڻي پيعڙئي ڪرين اوئا نه نالي هاڻي پاسو ميليو پرو. ⑫ پسته ڏئي وڙي ترئمو نوڪر ميليو. پڻ ايئي اوئا نه پڻ ماري مارين لويڙاو ڪرين ٿيلا ڏين ٻاڳه ٿي



ٻارو ڪاڍيو پرو.

⑬ تئين ٻاڳه رڻه ڌڻي سوچيو:

’هون هون ڪي ڪرون؟ ٺيڪ سٺه. هون
آپرا پريمي ڏيڪرا ننه ميلي. هاري
ضرور اينارو مون راکشي.‘ ⑭ پڻ زئون

هاري ڌڻي را ڏيڪرا ننه ٻاڳه موئين آتون ڏيڪيو، تو آيت موئين اي صلاح
ڪروا مڌيا: ’هائي تو ڌڻي رو ڏيڪرو سٺه. ليو، آبي هيا ننه مارون پرو! پسته
اي ٻاڳه هيا رو نئين ٿه، پڻ آڻو ٿي زاشي.‘ ⑮ پسته اي ڌڻي را ڏيڪرا ننه
ٻاڳه ٿي ٻارو ڪاڍين ماريو پرو.

پسته ايسو منڪون ننه ڪيڏو: ”هون ٻاڳه رو ڌڻي ريو، او هاريون ٿي ڪي
ڪرشي؟ ⑯ او آپ آوشي، ان ايئون هاريون ننه مارشي پرا، ان آپرا ٻاڳه ري
هميار هارو پيزا منڪ راکشي.“

اي هومپڙين منڪي ڪيڏو: ”ام نه ٿه!“ ڪم تو او اوڙڪي ڳيا جي ايسو اي
مثال اوئون مانه ڪيڏي. ⑰ پڻ ايسو اوئون هومو زوين ڪيڏو: ”جي هم ٿيا
رو نه هوٽ، تو پسته اي شاستر رڻي وات ڪيوو مطلب ڏيڪارڻه؟

’جيا پتر ننه رازي گهٽ هزمين ڦڳوڙيو تو پرو،
او هاڳي پتر ٻڌون ٿي ضرورت وڙو ٿيوه.‘

هائي پتر ڳوون رو سونڊل او رو او ڌڻي رو ڏيڪرو سٺه. جيو ڪوئي ڳوون را
سونڊل ري واتون نئين مونته، تو اوئا ننه ضرور سزا زڙشي. ⑱ جيو اوئا پتر ٿي

آڪڙين پڙشي، اُو اڙئي اڙئي ٿي زاشي. ان جيا مانھ اُو پٿر پڙشي، اُوئا نٺھ آتو آتو ڪرشي پرو.

①9 اُوئھ ئي توتھ شاستر زوٽيا واڙي ان موتي پوزاريئي ايسو نٺھ زھالوا ڪريو، ڪم تو اُو هڙمي ڳيا جي ”ايسو اي مثال رئي وات امارا پارام ڪيڏيھ،“ پڻ اُو آپري قوم رون منڪون ٿي پيڻاتات ريا ڪم تو گھڻا منڪ ايسو رٺھ پاھڻھ هتا.

منڪ ايسو نٺھ ڌرم ان حڪومت را چڪر ۾ ڦٽڙايا ھارو ٽيڪس را پئيھا پريا را پارام سوئال پونسٽھ

(متي 22:15-22، مرقس 13:17-17، لوقا 20:20-26)

②0 تيا ڪيڙ شاستر زوٽيا واڙي ان موتي پوزاريئي ايسو نٺھ اونڪ ۾ راڪيو ان جونچوس ايسو وونھي ميليا، زم ڌرمي منڪ ٿين ايسو نٺھ آپري وات موئين ڦٽڙاوتھ، ان پسٺھ صوپا مانھ راز ڪريا واڙا ڪن زھلاوين روم ري حڪومت را قوضام سزا ڏيورايا ھارو ڏتھ پرو.

②1 ھم سوچين جونچوسي ايسو نٺھ ڪيڏو: ”ڳرو جي، امون نٺھ تو ڪبر سٺھ جي جئين ڪئين تمي ڪوھ ان شيڪاڙوھ، اُو ٻڌوئي ڪئين ٺيڪ سٺھ، ان تمي ڪيا رو پڻ پاھو نٿي ليتا، پڻ تمي ھاس پرموتھ پڳوون رو مارڳ ڏيڪاڙوھ. ②2 ھوئھ ڌرم پرموتھ امارتھ رومي حڪومت را پاڌشا نٺھ ٽيڪس را پئيھا ڏيوو ڪپٺھ، ڪا نا؟“

②3 ايسو اوئون رئي چالاڪي هڙمي ڳيو جي اُو مون نٺھ ڪا ڌرم رٺھ ڪلاڦ ڪا حڪومت رٺھ ڪلاڦ ٻولڙوا ڪرئھ. تيام اوئون نٺھ ڪيڏو:



②4 ”چونڌي رو سڪو مون نٺھ ڏيڪاڙو. ايئا مانھ ڪيا رو قوٽو سٺھ ان ڪيا رو نوم لڪل سٺھ؟“ تو اوئي ڪيڏو: ”رومي حڪومت را پاڌشا رو.“

②5 تيا مانھ ايسُو اُوئون نئھ ڪيڏو: ”جو پاڌشا رو سئھ، اُو پاڌشا نئھ ڏيو.
ان جو پڳوون رو سئھ، اُو پڳوون نئھ ڏيو.“
②6 جونچوس آڀري قوم رون منڪون ھوما ايسُو نئھ آڀري وات موئين نہ
قتراوي ھيڪيا، پڻ اينا را جواب مانھ حيرون ٿين ماڻ ڪري ڳيا.

منڪ ايسُو نئھ قترايا ھارُو مرلون را جيوي اُنيا را پارام سوئال پونسئھ (متي 23:22-33، مرقس 12:18-27، لُوقا 20:27-40)

②7 پسنھ صدوقي پالتي را ڪئينڪ منڪ ايسُو ڪن آيا. ھوئھ صدوقي پالتي
وازا اي وات نئي مونتا جي پڳوون مرل منڪون نئھ وڙي جيوي اوناڙشي. اُوئي
ايسُو تي پونسيو: ②8 ”گرو جي، موسي آڀون ھارُو شاستر موئين ام لڪيوھ:
جي پرتاول اڌمي اولاد ووتو مري زائھ، تو اونا رو پائي اونا ري رنڌال ڏوشي
نئھ آڀرا گھر ۾ راکئھ، زم آڀرا مرل پائي ھارُو اولاد ٿئھ. ②9 ھوئھ، ھات پائي
ھتا. پيرھيون پائي پرتيو ان اولاد ووتو مري ڳيو. ③0 تو پيزئھ پائي ھايا حڪم
پرموتئھ اونا ري ڏوشي نئھ آڀرا گھر ۾ راکئي، ان اُو پڻ اولاد ووتو مري
ڳيو. ③1 ترئما پائي تي پڻ ھمروم ٿيو. ان ھيوئھ نمونئھ ھات تي پائي ھاڳي
ڏوشي نئھ آڀرا گھر ۾ راکين اولاد ووتا مري ڳيا. ③2 نيٺ اُو ڏوشي پڻ مري
ڳئي. ③3 ھوئھ زئيون پڳوون مرل منڪون نئھ جيوي اوناڙشي، تو ايئون ھاتون
پايون موئين تي اُو ڏوشي ڪيا رئي ٿيشي؟ ڪم تو ھاتي زئي اونا نئھ گھر ۾
راڪئي تئي.“

③4 تيا مانھ ايسُو اُوئون نئھ ڪيڏو: ”اينا ڏيا ۾ منڪ پرتئھ ان ڏوشي گھر
۾ راکئھ، ③5 پڻ ڃيا منڪ پڳوون مرلون موئين تي جيوي اوناڙين آڪاش موئين
ريا جيوا ھزمئھ، اُو اوتئھ آڪاش موئين نڪو پرتشي نڪو ڏوشي گھر ۾ راکشي،
③6 ڪم تو آڪاشي ڏوتون جيوا ٿين اُو ڪيڏي نئين مرئھ، ان اُو پڳوون را باز

هوشي، ڪم تو پڳوونَ اُوئون نئه مرلون موئين ٿي جيوتا ڪرشي.
 (37) هونءَ پڳوونَ رئه مرلون نئه جيوي اوناڙيا رئي وات موسيٰ آپ ساوئي
 همپزاوئي ٿئي. شاستر موئين جيا ماڳ ٻڙتا زهاڙڪا را پارام لڪل سئه، اوتا ماڳ
 موسيٰ ايشور نئه 'ابراهيم، اِضحاق ان يعقوب رو پڳوون' ڪئھ. (38) ايئا ٿي وات
 ساوئي سئه جي اُو منڪ پلئه مري ڳيا تا، توئي پڻ جيوتا سئه. پڳوونَ تو مرلون
 رو نٿي پڻ جيوتون رو سئه، ڪم تو اُو ٻڌائي پڳوونَ ٿي واسطو راڪيا ري ڪري
 جيوتا سئه.

(39) اي هومپڙين ڪئينڪ شاستر زوٽيا واري ڪيڏو: "ڳرو جي، تمي نيك
 ڪيڏوھ." (40) ڪم تو اُوئون رئي هيئت نه رئي جي اُو وڌيڪ واتون ايسو ٿي
 پونسئھ.

ايسو شينڪارڙھ جي پڳوونَ رو سونڊل پڇايا وازو ڪريست دائود يادشا ٿي الاهي گهڻو موٽو سئ

(متي 41:22-46، مرقس 35:12-37، لُوقا 41:20-44)

(41) تئين ايسو اُوئون ٿي پونسئو: "منڪ ڪم ڪرين ڪئھ جي پڳوونَ رو سونڊل
 پڇايا وازو ڪريست روڳو دائود يادشا رو پوترو سئه؟" (42) ڪم تو دائود آپ آپرا
 پزنون را ڪتاب زبور موئين ڪريست نئه آپرو پرپو ڪين ام لکيو:
 'ايشور مارا پرپو نئه ڪيڏو:

مارئھ زمئئھ پاھئھ مون ۾ پيھ،

(43) زئيون هوڏي هون ٿارون دشمنون نئه هراوين

تاري پڳي نه لڳاڙون.

(44) زئيون دائود آپ پڳوونَ را سونڊل پڇايا وازا ڪريست نئه 'پرپو' ڪئھ، تو
 پسئھ ڪريست ڪم ڪرين اوتا رو روڳو پوترو ٿيو؟"

ايسو شاستر زوڻيا واژون ٿي هوشيار ريا رو ڪڻه

(متي 1:23-36، مرقس 12:38-40، لوقا 20:45-47)

④5 تئيون اسرائيلي قوم رن ٻڌون منڪون رنه روپرو، ايسو آپرون شيلون نه ڪيڏو: ④6 "شاستر زوڻيا واژون ٿي هوشيار ريا، ڪم تو او گهنگها پيرين منڪون هوما قريا رو شونق راڪنه، ان اوئون رو اي پڻ شونق سته، جي منڪ اوئون ٿي يازارون ۾ نمي نمين مڙه، ان او پگهون رن منڌرون موئين گهاڏيون مانه پيهنه، ان ڏاوتون ۾ مون واڙا ماڳ ۾ پيهنه. ④7 او هاڳي سته جيا ٺڳي ڪرين رنڌال ڏوشيون را گهر ڦرھ، ان آپ نه نائوڪا ڏيڪاڙيا هارو موتي موتي پراتنائون ڪرھ. هايون نه پگهون گهڻي سزا ڏيشي."

رنڌال ڏوشي رو ڏون

(مرقس 12:41-44، لوقا 21:1-4)

21 ① تئيون ايسو هومو زويو، تو ڪئينڪ ملڳت واڙا منڪ پگهون را گهر را ڪزونا ريون پيتيون موئين آپرو آپرو ڏون نوڪتات ريا. ② ان



ايسو هيڪي گريپ رنڌال ڏوشي نه پڻ پيتي موئين بي ڪوري نوڪتون ڏيڪي. ③ تئيون ايسو شيلون نه ڪيڏو: "هون تمون نه هاس ڪونه، ايتھ گريپ رنڌال

ڏوشي هايون ٻڌون منڪون ٿي گهڻو ڏون ڏيڏوه. ④ ڪم تو هايي ٻڌي منڪي آپري گهڻي ملڳت موئين ٿي پگهون را نوم مانه روڳو ٿوڙڪوڪ حصو ڏيڏوه، پڻ ايتھ رنڌال ڏوشي آپري گريبي ري حالت موئين زتو پڻ گهري هتو، ٻڌوني ڪئين ڏون ۾ ڏيڏوه پرو."

ايسو پڳوونَ رو گهر کتم ٿيا را پارام مور ٿي همپزاوئھ

(متي 2-1:24، مرقس 2-1:13، لُوقا 6-5:21)

⑤ شيلون موئين ٿي ڪئينڪ زئا پڳوونَ را گهر را پارام واتون ڪرتات ريا جي "اي ڪيوون نائوڪون پوئون ان پڳوونَ را نوم مانھ ڏيڏل شينھون ٿي شنگارل سئھ." تيا مانھ ايسو ڪيڏو: ⑥ "جئين تمي همئئھ ڏيڪوھ ريا، ڪوڪ وڪٽ ايوو آوشي زئيون ايئا موئين ٿي هيڪ ئي پتر ھازو نئين پڇئھ، ان اي پڳوونَ رو گهر ھاو کتم ٿي زاشي."

ايسو مور ٿي همپزاوئھ جي پڳوونَ رو گهر کتم ٿيا مور ڪي ٿيشي ان ھوشيار ڪرئھ جي ھاڻي ٻڌوئي ڏنيا رئي پڇاڙئي نٿي

(متي 14-3:24، مرقس 13-3:13، لُوقا 19-7:21)

⑦ تئيون شيلي ايسو ٿي پونسيو: "گرو جي، اي پڳوونَ رو گهر کتم ٿيا رئي وات ڪيڏي ٿيشي؟ ان ڪيوو نيشون ٿيشي جيا ٿي ڪپر پڙئھ جي اي وات ٿيا واڙئي سئھ؟" ⑧ تو ايسو ڪيڏو: "ھوشيار ريا، متون تمي پولاڻي نہ زائو. ڪم تو گھڻا منڪ مارا نوم ٿي آوشي، ان ڪيشي 'پڳوونَ رو سونڊل پڇايا واڙو ڪريست ھون سون' ان وڙي ڪيشي 'پڇاڙي واڙو توڻو آوي پوگيوھ.' پڻ متون تمي اوئون ري واتون مونين اوئون وونھڙ زائو. ⑨ زئيون تمي جنگون ان جھيڙون را پارام ھومپڙو، تئيون مت پڻايا، ڪم تو مور ٿي ھاڻي واتون ضرور ٿيشي، پڻ ڏنيا رئي پڇاڙئي جھت موئين نئين ٿئھ."

⑩ پئسئھ ايسو اوئون نئھ ڪيڏو: "قوم قوم ٿي وڌشي ان ملڪ ملڪ ٿي وڌشي. ⑪ زمئي جيئھ تئئھ گھڻي ڏبشي، ان گھڻي ماڳي موتي پيماري پڪڙشي ان ڏڪار پڙشي. آڪاش موئين پئئونڪئي واتون ان موتا نيشون ساوا ٿيشي."

⑫ پڻ اي ٻڌي واتون ٿيا ٿي مور، منڪ تمون ننه زهالشي، ان تمون ننه تنگ ڪرشي. اُو تمون ننه پڳوون رون منڌرون ريون پنچائيتون موئين ڏيشي، ان جيلون موئين پوراوشي، ان تمون ننه پاڌشائون ان راز ڪريا وازون ڪن تيڙي زاشي، ڪم تو تمي مارا شيلا سو. ⑬ اونا رو اي نقو ٿيشي، جي تمون ننه مارئي هاڪ پريا رو موقعو زڙشي. ⑭ تيام آڀرا من موئين اي وات پڪئي راکو جي تمي جواب ڏيڏا هارو مور ٿي ڪئين گهٽئي نئين ڪرو، ⑮ ڪم تو هون آپ تمون ننه ايوي هوليائي رئي هيئت ان عقل ڏيه، جي تمارا ڪوئي پڻ ڏشمن تمارو مقابلو نئين ڪري هيڪنه، نڪو تماري وات ننه ڪوڙئي ڪي هيڪشي.

⑯ تمارا آڀرا مان ٻاپ پڻ، پائي پين، عزيز ان دوست پڻ تمون ننه زهلاوشي، ان تمون موئين ٿي ڪيونڪ ننه مراوشي پرا. ⑰ ان مون مانه وشواس راکيا ري ڪري ٻڌائي منڪ تمون ٿي وير راکشي. ⑱ توئي پڻ تمي ماڳي ڪتم نئين ٿيو. ⑲ ٻڌوئي ڪئين سهيا ٿي تمون ننه تارن زڙشي.

ايسو مور ٿي همپزاوئه جي رومي قوج يروشلم شهر ننه ڪتم ڪرشي

(متي 24:15-21، مرقس 13:14-19، لوقا 21:20-24)

⑳ ”زئون تمي ڏيڪو جي يروشلم شهر رنه چوڌاري قوج ڦري آوين پيهه رئي، تئين ام هزميا جي يروشلم ڪتم ٿيا وازو سته. ㉑ تئين جيا ايئنه يهوديه صوپا موئين هوئه، اُو ڏونگرون هوما پاڳي زائه. جيا يروشلم شهر موئين هوئه، اُو ٻارا نيهري زائه، ان جيا ٻاراڙي م هوئه، اُو شهر موئين نه آئه. ㉒ ڪم تو هائي توئو پڳوون رنه ڏوهاريون ننه سزا ڏيڏا رو توئو هوشي، زئون شاستر م لڪل ٻڌي واتون پوري ٿيشي. ㉓ اقسوس ائون ڏوشيون مانه جي ائون ڏيئون م پاري پڳ هوشي، ڪا ننڪا ٻار ڏوراوتي هوشي، ڪم تو يهوديه ملڪ مانه موئي مصيبت آوشي، ان ايئنا اسرائيلي قوم مانه پڳوون رئي سزا آوشي. ㉔ ايئون

موئين ٿي ڪيونڪ ننه تروٺار ٿي مارشي پرا، ان ڪيونڪ ننه پيزون ٻڌون ملڪون موئين قيڙي ٺاوين لي زاشي. ان يروشلم شهر ننه ڌاري قومون لتارشي، زئيون هوڏي اوئون را راز رو توڻو ڪتم نه ٿنه.

پڳوون رو گهر ڪنم ٿيو ان پيزيون آقنون رءُ آوو
ٺاينئي سءُ جي ايسو پڳوون را پاها ٿي راز ڪريا واڙو سءُ

(متي 24:29-31، مرقس 13:24-27، لُوقا 21:25-28)

25 ”ان پسئ تيا ڪيڙ آڪاش موئين ڏي، انزوٺاريا ان تارون ٿي نيشون ساوا ٿيشي، ان ڌرتي مانھ قومون را منڪ سمنوڊ ريون چوليون رئي ڪاش هومپزين گهتيون م ان ڦڪرون م پڙشي، 26 ان منڪ اينا پيڪ ري ڪري موزھائي زاشي جي ڌرتي ننه ڪي ٿيشي، ڪم تو آڪاش موئينلي ٻڌي شينھون ڏگهي هوشي. 27 ان تنيون منڪ مون منڪ ذات را ڏيڪرا ننه واڌرا موئين گهتي ڪڙا ٿي ان گهٽا زبڪتا سوجھرا ٿي آوتون ڏيڪشي، ان وات ساوئي ٿيشي جي هون پڳوون را پاها ٿي راز ڪريا واڙو ٿين آيا واڙو سون. 28 زئيون اي واتون ٿيو مڏم، تنيون ممي اوئين ڪشي ٿي وات زويا، ڪم تو او توڻو ڏوڪڙو اوئھ ريو، زئيون تمون ننه پورئھ نمونئھ تارن زڙشي.“

نيشونون ٿي اوڙڪو جي ڪي تيا واڙو سءُ

(متي 24:32-35، مرقس 13:28-31، لُوقا 21:29-33)

29 پسئ ايسو اوئون ننه اي مثال ڏين ڪيڏو: ”انجير را وڻ ننه ان پيزون ٻڌون وڻون ننه زوئو. 30 زئيون اوئون موئين پونڙا ٿنه، ممي آپ اوڙڪي زائوھ جي اوناڙو آيا واڙو سئ. 31 هيونئھ نمونئھ زئيون ممي هائي تڪليپون ٿيتي ڏيڪو، تو هزميا جي پڳوون را راز رو او توڻو ڏوڪڙو سئ زئيون پڳوون ساوئھ نمونئھ ٻڌون مانھ راز ڪرشي. 32 هون تمون ننه هاس ڪونھ، هائي ٻڌي تڪليپون اينا

همٿوڪي پيڊي رون منڪون ري حياتي ۾ پوري ٿيشي. (33) آڪاش ان ڌرتي تو
ڪٽم ٿي زاشي، پڻ ماري واتون هميش ھوڏي ھاسي ريشي.

ايسو آبرا پاسا آيا را پارام ان دنيا ري پڇاڙي را پارام ھوشيار ڪرڻھ

(34) ”پڻ ھوشيار ريا جي تمي کاڌا پيڏا ان ڌارو ۾ ان حياتي ريون گھڻيون ۾ پڙي
نہ زائو، متون مارا پاسا آيا رو ڏي تمون مانھ اوچتو آوي پڙئ، (35) ان زم پکي
گھٽ موئين ڦاٿئھ تم تمي پڻ ڦاٿي زائو. ڪم تو اوئھ ڏي ھون پوري دنيا رون
ٻڌون منڪون ڪن پاسو آويھ. (36) ھر ٿوئھ تيار ريا ان پراٿنا ڪرتا ريا جي تمون
نئھ ايوئي ھيمت زڙئھ زم اي ٻڌي ٿيا وازي واتون سھين تمي پڇي زائو، ان نيا
رئھ ڏي مون منڪ ذات را ڏيڪرا ھوما تمي ڪاتري ٿي اويي ھيڪو.“
(37) اوئون ڏيئون موئين ايسو تاريڪ ڏي رو پڳوون را گھر موئين منڪون
نئھ شيڪاڙتو، ان رات رو شھر ٿي نيھرين زيتون نومي ڏونگر مانھ ٽڪي ريتو.
(38) ان اسرائيلي قوم را ٻڌائي منڪ ھوار را ويلا اوئين پڳوون را گھر موئين
ايسو ري واتون ھومپڙوا آوتا.



زيتون نومي ڏونگر

يهودي ٿرم را اڳيون ايسو نٺ مريا هارو نا ناوٺه

(متي 5:1-26، مرقس 2:1-14، لوقا 2:1-22، يوحنا 45:11-53)

22

① هونٺ يهودي قوم رٺي روتيون رٺي پرڀ ڏوڪڙي آوٺي، جيا نٺ پاشڪا پرڀ ڪٺ. ② ان موٽا پوزاري ان شاستر زوٺيا واڙا ايٺا وات ري ڳوت ۾ هٿا جي "ڪيوا نمونا ٿي ايسو نٺ مراون پرو؟" او ايسو نٺ ساوٺه ڍاڙهٺه مراووا نٺا ڪرتا ڪم تو او آڀري قوم رون منڪون ٿي پيٺاتات ريا.

يهوداه اسڪريوتي ايسو نٺ زهلايا هارو نا ناوٺه

(متي 16:14-26، مرقس 11:10-14، لوقا 3:22-6)

③ تٺيون پڳوون رٺه ڏشمڻ شيطون ايسو رٺه ڪلاڻ ڪيال يهوداه اسڪريوتي را من ۾ نوڪيو، جيو ايسو رون ٻارون سونڊل شيلون موٺين ٿي هيڪ هٿو، ان اوٺه شيطون رٺي وات موني ليڏي. ④ پسنٺه يهوداه زائين موٽون پوزاريون ان پڳوون را گهر رون سپايون رون ساٻون ٿي واتون ڪري جي او ڪم ڪرين ايسو نٺ زهلاوين اوٺون رٺه حوالٺه ڪرٺ. ⑤ تيا مانه او منڪ گهٽا ڪش ٿيا، ان اوٺا نٺه پٺيها پاسيا. ⑥ يهوداه ايٺا وات نٺه قبول ڪري ان وجهه ڳوتوا مڏيو جي زئيون گهٽا منڪ ايسو پيڙا نه هوٺه، تٺيون ايسو نٺ زهلاوين اوٺون رٺه حوالٺه ڪرٺ.

ايسو بيٺون شيلون نٺ ميلين پاشڪا پرڀ رٺي تيارٺي ڪراوٺه

(متي 19:17-26، مرقس 12:14-16، لوقا 7:22-13)

⑦ زئيون روتيون ري پرڀ رو او ڏي آيو، جيا مانه ڌرم پرموٺه پاشڪا پرڀ هارو گهٽا هلالو تو، ⑧ تٺيون ايسو پطرس ان يوحنا نٺه ام ڪين ميليا: "تمي زائين آيون هارو پاشڪا پرڀ رٺي تيارٺي ڪرو، تو آڀي ڪائون." ⑨ تو اوٺي ڪيڏو: "تمارٺي ڪيوي مرضي سٺه جي امي ڪيٺه تيارٺي ڪرون؟"

⑩ ٽيا مانھ ايسو اوتون نٽھ ڪيڏو: ”زوئو، شهر موئين زاتون تمون نٽھ هيڪ منڪ پيڙو ٿيڻي، جيو پوئي رو گهڙو اُپاڙين زاتو هوشي. اُٺا وونهي زيا، ان جيا گهر موئين اُو زائ، تم پڻ اُٺا گهر موئين زيا ⑪ ان گهر را ڏي نٽھ ڪيا: ’گرو جي تمون نٽھ ام ڪيڏو، اُو اوتاڳ ڪيٽھ سٺ، جيٽھ هُون آپرون شيلون پيڙو پاشڪا پرپ رئي روئي ڪائون؟‘ ⑫ تو اُو تمون نٽھ ماڙي مانھ هيڪ موٽو ڪمرو تيار ڪرل ڏيڪاڙشي. اوتھ ڪاڏا رئي تيارئي ڪريا.“

⑬ اُو هي شيلو وُڍا پرا، ان زم ايسو ڪيڏو تو، همروم ڏيڪيو، ان اوتھ اوتئي پاشڪا پرپ رئي تيارئي ڪري.



ايسو اڪري وار آپرون شيلون پيڙو روئي ڪائھ
ان ڳلومي ٿي آزاد ٿيا ري پاشڪا پرپ رو نوو مطلب شيڪاڙين
پريو پوزن رئي ريت ناوئھ

(متي 20:26-30، مرقس 14:22-26، لوقا 14:22-23، 1 ڪرنتين 11:23-25)

⑭ زئيون پرپ رئي رات ٿئي، تو ايسو آپرون مڪ شيلون پيڙو ڪاڏا هارو پينو
⑮ ان اوتون نٽھ ڪيڏو: ”مارو جيو گهڻو ڪرتوت ريو جي هُون ڏڪ سهيا ٿي

مور تمون پيڙئي اي پاشڪا پرپ رڻي روئڻي ڪاٺون، ①⑥ ڪم تو هون تمون ننه ڪاتري ٿي ڪونه، زئيون هُودِي اينا پرپ رو پڇايا رو مطلب پورو نه ٿنه، ان هون پڳوون را راز موئين پڳوون رون منڪون پيڙو تارڻ ري ڪشي ۾ اي پرپ نه ڪاٺون، تئيون هُودِي هون اي پرپ وڙي نئين ڪاٺون.



①⑦ پسڻه ايسو ڌراڪ رس رو پيئالو لين اينا

هارو پڳوون رو ٿورو موين ڪيڏو: ”تمي ليو ان

ٻڌائي اينا موئين ٿي پيو. ①⑧ ڪم تو هون تمون ننه ڪاتري ٿي ڪونه، زئيون هُودِي پڳوون را راز رو او توئون نئين آوڻه، زئيون پڳوون ساوڻه نمونڻه ٻڌون مانه راز ڪرشي، تئيون هُودِي هون ڌراڪون رو رس وڙي ماڳي نئين پيئون.

①⑨ پسڻه روئڻي لين اونا هارو پڳوون رو ٿورو موين پونگهي، ان اوئون ننه

ام ڪين ڏيڏي: ”اي مارو شير سڻه، جيو هون تمون هارو پڳوون را نوم مانه ڏيونه. ماري همپار ۾ ام ڪرتا ريا.“

②① همروم کاڌا ڪيڙ ايسو ڌراڪ رس رو پيئالو لين اوئون ننه ام ڪين ڏيڏو:

”اي پيئالو مارا لويي ٿي ٻونڌل پڳوون رو نوو وسن سڻه، جيو لويي هون تمون هارو پڳوون را نوم مانه ويوراويه.“

②① پڻ زوئو، مون ننه زهلايا واڙو مون پيڙو روئڻي کاڌا هارو پيئو، ②② ڪم

تو جيوڻه نمونڻه پڳوون اڳي ڦينصلو ڪريو تو، هيوڻه نمونڻه هون منڪ ذات رو ڏيڪرو اينا جڳت ٿي زائونه ريو. توئي پڻ ڏک سڻه اونا منڪ هارو جيو مون ننه زهلاوشي.

②③ تيا مانه شيلا آيت موئين ڪيا مڏيا جي ”آپون موئين ايوو ڪوڻ هوشي

جيو هيوو ڪوم ڪرشي؟“

مڪ شيلون رو آيت موئين تڪرار تڻه جي مون واڙو ڪوڻ سڻ

②④ پسڻه شيلا آيت موئين اينا را پارام پڻ تڪرار ڪروا مڏيا جي ”آپون موئين

ٿي ڪيا نٿه گهڻو مون زڙو ڪپڻ؟” (25) ٿيا مانھ ايسو اوتون نٿه ڪيڏو: ”ڌاريون قومون را پاڌشا آپرون منڪون مانھ حڪم ويوراوڻھ، ان اوتون مانھ راز ڪريا وازا آپ نٿه ڀلائي ڪريا وازا ڪيوراوڻھ. (26) پڻ ٿمي اوتون را زم مت ڪريا، ڪم تو تمون موئين موتا نٿه نونا را زم ٿيوو ڪپڻھ، ان آگيوون نٿه شيوا ڪريا وازا را زم ٿيوو ڪپڻھ. (27) منڪون رڻھ ليڪڻھ موتو ڪوڻ سڻھ؟ او جيو ڪاوا ٻيھڻھ، ڪا او جيو شيوا ڪرڻھ؟ منڪ اوتا نٿه موتو هڙمڻھ، جيو ڪاوا ٻيھڻھ. پڻ آپون م هم نٿي، هون تو شيوا ڪريا وازو ٿين تمون وسا سون.

(28) ٿمي او سو جيا مون مانھ اول ٻڌي ڏوروڻ ان آزمتون م مون نٿه ساڏيو نئين، پڻ مون پيڙا ريا. (29) زم مارڻھ ٻاپ پڳوون مون نٿه راز ڪريا رو حق ڏيڏوھ، تم هون پڻ تمون نٿه راز ڪريا رو حق ڏيونھ، (30) ان ٿمي مارا راز موئين مون پيڙا ٻيھين ڪاشو ان پيشو، ان گهاڏيون مانھ ٻيھين اسرائيلي قوم ريون ٻارون ذاتون مانھ اڪتياري راکين ڦينصلا ڪرڻو.

ايسو مور ٿي هميڙاوڻھ جي پطرس اوتا رو شيلو هويا رو نا پاڙشي

(متي 26:31-35، مرقس 14:27-31، لوقا 22:31-34، يوحنا 13:36-38)

(31) پسڻ ايسو شمعون پطرس نٿه ڪيڏو: ”شمعون، مارئي وات هوميڙ، شيطون تمون ٻڌون نٿه آزمايا رئي موڪل ليڏيڻھ جي تمون نٿه مون ٿي ڌار ڪريا هارو ام تنگ ڪرڻھ، زم منڪ پوه نٿه ڪڻڪ ٿي ڌار ڪريا هارو اوڏڻھ. (32) پڻ مئين تون هارو پراڻا ڪريڻھ جي تون آپرو مون مانھ يقين نه ساڏڻھ. تون تو ڏوھ ڪريھ، پڻ زليون تون آپرو ڏوھ پاسين پاسو وڙڻھ، تئين تون آپرون ڌرمي پايون نٿه پڪو يقين راکيا رئي هيئت ڏي.“

(33) تو پطرس ڪيڏو: ”پرپو، هون تمون پيڙو جيل موئين زايا هارو ان مريا هارو پڻ ٿيار سون.“

(34) پڻ ايسو اوتا نٿه ڪيڏو: ”پطرس، هون تون نٿه ڪاتري ٿي ڪونھ، آڙوڪي

رات ۾ ڪوڪڙا رڻه ٻونگ ڏيڏا مور، ٿون ترڻ وار مارو نا پاڙيه جي ٿون مون
ننه نٿي اوزڪتو.

ايسو آيا وازا ڪترا را پارام همپزلوئه

35) تئيون ايسو شيلون ٿي پونسيو: ”اونه ٿوئنه، زئون مئين تمون ننه پئيه،
زهوڙي، ان زوڙا ليڏا وگر پگهون رو ڪوم ڪروا ميليا تا، تئيون تمون ننه ڪيا
ئي شينه رئي ڪپ پڙئي ٿي، ڪا نا؟“ تو اوني ڪيڏو: ”ڪيا ئي شينه رئي
نئين.“

36) تئيون ايسو اونون ننه ڪيڏو: ”پڻ هوئه ايوو ڏورا ڏي آياھ را جي جيا
ڪن پئيه سته او پيڙا لئه، ان جيا ڪن زهوڙي سته او پڻ پيڙي لئه، ان جيا ڪن
تروٺار نٿي، او تروٺار ليڏا هارو آڀرو توال پڻ ويسه. 37) ڪم تو هون تمون ننه
ڪاتري ٿي ڪونه، شاستر رئي لڪل اي وات مون مانھ ضرور پوري ٿيشي جي
’منڪي’ اونا ننه ڏوهاريون جيوو هزميو. ڪم تو جئين ڪئين مارا پارام شاستر
۾ لڪل سته، او همئنه پورو ٿه ريو.“

38) تيا مانھ شيلي ڪيڏو: ”پرپو، اي زوئو، امون ڪن ٻي تروٺارون سته.“ تو
ايسو ڪيڏو: ”پش پش، ٿيو هوئه!“

ايسو زيتون نومي ڏونگر مانھ پراٽنا ڪرئھ

(متي 46-36:26، مرقس 14-32:42، لوقا 22-39:46)

39) پسٺه ايسو گهر ٿي نيهرين زم اگهي زاتو همروم زيتون نومي ڏونگر مانھ
گيو. ان شيلو پڻ اونا پيڙا گيا. 40) اونا ماڳ پوگين اونه شيلون ننه ڪيڏو: ”پراٽنا
ڪرو، جي تمي آزمتا موئين پورا اوترو.“ 41) پسٺه آپ اونون ٿي توڙوڪ شيتي
زائين گودا ڪوڙين ام پراٽنا ڪروا مڏيو: 42) ”او ٻا، جي تمون ننه ليڪ لاڳهه،
تو اي ڌڪ جيا تمي مون ننه سهيا هارو ڏيڏاھ، ايئون ڌڪون ٿي مون ننه پچاوو.“



توئي مارئي مرضئي نئين، پڻ تمارئي مرضئي پوري ٿي. " (43) تئين هيڪڻه
 دُوت آڪاش ٿي آوين ايسو ننه ڏيکارو ڏيڏو ان اوتا ننه هيٺ ڏيڏي. (44) پسئ
 ايسو گهڻو ڏي ٿيو ان اڳي ٿي گهڻا هونها ۾ پورا من ٿي پراتنا ڪروا مڏيو،
 ان اوتا رو پگهر لويي رون ٽيڪون را گهوڙ زمي مانھ پڙتوت ريو.
 (45) زئين پراتنا ڪرين اوليو، تئين پاسو شيلون ڪن آوين زوئھ، تو ڏڪ ري
 ڪري اونگھ اوئون مانھ وڙي گهي ٿي. (46) ايسو اوئون ننه ڪيڏو: "تمي ڪم
 هوتا پڙياھ؟ اُونو، ان پراتنا ڪرو جي تمي آزمتا موئين پورا اوترو."

يهوداه اسڪريوني ايسو ننه زهلاوئھ

(متي 47:26، مرقس 43:14-50، لوقا 47:22-53، يوحنا 3:18-11)

(47) هزون ايسو ٻولتوت ريو، تو اوچتئي هيڪ موتئي تولئي آوي پوگهي. ان او
 شيلو جيا رو نوم يهوداه هتو، جيو ٻارون سونڊل شيلون موئين ٿي هتو، او پڻ
 تولي مور اوتوت ريو، ان ٻوسڪو ليڏا هارو ايسو ڪن ڏوڪڙو آيو. (48) پڻ ايسو
 اوتا ننه ڪيڏو: "يهوداه، تون مون منڪ ذات را ڏيڪرا ننه ٻوسڪو لين زهلاوئھ،
 ڪي؟"

(49) ايسو پيڙا جيا شيلا هتا، زئين اوئي هزميو جي ڪي ٿيا واڙو سئ، تو

پُونسيو: "پرڻو، امي ترؤنار لين وڊون، ڪي؟" (50) ان شيلون موئين ٿي هيڪڻه زڻه مڪ پوزاري را نوڪر ننه ڌڪ هڻيو ان اوڻا رو زمڻو ڪون وڍيو پرو.

(51) تيا مانھ ايسو ڪيڏو: "پش، ٺيو، هوڻه پيزو ڪئين مت ڪرو!" ان پسنه ڪون ننه سبين اوڻا ننه هازو هورو ڪريو پرو.

(52) پسنه موتا پوزاري، پڳوون را گهر رون سپايون را ساپ، ان اسرائيلي قوم را آڳيون، جيا ايسو ننه زهالوا آيا تا، اوئون ننه ايسو ڪيڏو: "تمي ترؤنارون ان ڏونگون لين مون مانھ ڪم سڙي آياھ؟ هون ڌاڙيوال سون ڪي؟" (53) هون تو تاريڪ پڳوون را گهر موئين تمون پيزو هوتو، پڻ اوڻه تمي مارو نوم ئي نتو ليڏو. پڻ همڻه تمارو توڻو سڻه، ان اندارا وازو اوڙو راز سڻه.

پطرس ايسو رو شيلو هويا رو نا پاڙهه

(متي 58-57:26، 69-75، مرقس 14:53-54، 66-72، لُوقا 22:54-62، يوحنا 18:15-18، 25-27)

(54) پسنه هائي منڪ ايسو ننه زهالين مڪ پوزاري را گهر موئين تيڙي آيا، ان پطرس ڪئينڪ شيئي ڏين اوئون وونهي آوتوت ريو. (55) زئيون منڪ اونگڻا مانھ ڏيوتا ڪرين تاپوا پينا، تو پطرس پڻ اوئون پيزو آوين پينو. (56) تئين هيڪي نوڪروڻي اوڻا ننه ڏيوتا را سوجهرام پينل ڏيڪيو، ان اوڻا هومو زوئين ڪيڏو: "اي منڪ پڻ اوڻا پيزو هتو." (57) پڻ پطرس انڪار ڪرين ڪيڏو: "پائي، هون تو اوڻا ننه اوڙڪتو ئي نٿي."

(58) ٿوڙيڪ وار ڪيڙ پيزه ڪيئنڪ اوڻا ننه ڏيڪين ڪيڏو: "ئون پڻ اوئون موئينليو سڻه." پڻ پطرس ڪيڏو: "پائي، او تو هون نٿي."

(59) ڪلاڪ ڪن ڪيڙ هيڪه پيزه منڪ پڪ ٿي ڪيڏو: "هاس ۾ اي منڪ پڻ اوڻا پيزو هتو، ڪم تو اي پڻ گليل صويا رو سڻه." (60) پڻ پطرس ڪيڏو: "پائي، ئون هيويي اوڙي وات ڪم ڪرڻه ريو؟ هون توڙو اوڻا پيزو هتو." او هزون ٻولتوت ريو، تو اوڻه ئي توڻه ڪوڪڙه بونگ ڏيڏي، (61) ان پرڻو ايسو



لمئو واڙين پطرس هومو زويو. تيا مانھ پطرس
نئھ پريو ايسو رڻي ڪيڏل وات ياد آوئي جي
”آڙوڪي رات ۾ ڪوڪڙا رڻھ ٻونگ ڏيڏا مور،
ترڻ وار ٿون مارو انڪار ڪريھ جي ٿون مون نئھ
نٿي اورڪتو.“⁽⁶²⁾ ان پطرس اوئون ٻارو ٺيهرين
ڏوهڪي ڏوهڪي رويو.

ايسو نئھ مارئھ ان اوئا مانھ نٿولي ڪرئھ

(متي 67:26-68، مرقس 14:65، لُوقا 22:63-65)

⁽⁶³⁾ تئھ ٿوئئھ جيا منڪ ايسو مانھ ٻاهرو ڏيتات ريا، او اوئا نئھ مارتات ريا ان
نٿولي ڪرتات ريا، ⁽⁶⁴⁾ ان اوئا ري اونڪيون ٻوندين اوئا ٿي پونستات ريا: ”او
پگھون رو نياپو ڏيڏا وازا، امون نئھ همپڙاو ڪيئئھ ٿون نئھ ڌڪ هڻيوھ؟“⁽⁶⁵⁾ ان
ٻيڙي پڻ گھڻي واتون ڪيڏا ٿي ايسو رڻي پيغڙتئي ڪرتات ريا.

ترمي پنچائيت ايسو نئھ موت رڻي سزا ڏيڏا رو ڦينصلو ڪرئھ

(متي 26:59-66، مرقس 14:55-64، لُوقا 22:66-71)

⁽⁶⁶⁾ هزون ڏي اوگيو ئي مس هتو، تو موئا پوزاري ان شاستر زوٿيا وازا اسرائيلي
قوم ري پنچائيت ۾ پيڙا ٿيا، ان آڀري پنچائيت موئين ايسو نئھ تيڙايو. ⁽⁶⁷⁾ پستھ
پنچائيت ري منڪي ايسو ٿي پونسيو: ”جي ٿون پگھون رو سونڊل پچايا وازو
ڪريست سئھ، تو امون نئھ همپڙاو.“

پڻ ايسو اوئون نئھ ڪيڏو: ”جي هون تمون نئھ همپڙاويھ، تو تمي ماري وات
مانھ يقين نئين ڪرو، ⁽⁶⁸⁾ ان جي هون تمون ٿي ايٿا را پارام پونسيه، تو تمي
ورنڌئي نئين ڏيو. ⁽⁶⁹⁾ پڻ هون ٿي لين هون منڪ ذات رو ڏيڪرو ڪڙا وازا پگھون
رڻھ زمئئھ ٻاهڻھ مون موئين ٻيلل هوئيھ.“

⑦⑩ تو اُوئي ٻڌي پُونسيو: ”تو پسته تون پڳوونَ رو ڏيڪرو سٺ، ڪي؟“
 ايسو اوتون ننه ڪيڏو: ”زم تم ڪوھ ريا، هُون سون.“
 ⑦⑪ پسته اُوئي آيت موئين ڪيڏو: ”هونه آيون ننه ايٺا ٿي وڌيڪ پيڙي
 ڪيوني هاڪ ڪپنه؟ ڪم تو آيون ٻڌون هومو اونه آپ ننه پڳوونَ رو ڏيڪرو
 ڪيڏو، ان هم آپ ننه پڳوونَ هرڪو ڪرين ڏوھ آپ مانھ ليدوھ.“

يهودي ٿرم را اڳيون

ايسو ننه رومي راز ڪريا وازا پيلاطس ڪن تيڙي زائھ

(متي 27:1-2، 11-14، مرقس 15:1-5، لوقا 23:1-5، يوحنا 18:28-38)

23 ① تيا ڪيڙ پنچائيت را ٻڌائي منڪ اُوئين اُپا ان ايسو ننه صوپا مانھ
 راز ڪريا وازا پيلاطس ڪن تيڙي ڳيا. ② اوتنه اُو ايسو مانھ اي ڏوھ
 ڏيو مڏيا: ”امي ايٺا منڪ موئين اي ڏوھ ڏيڪياھ، جي اي منڪ اماري قوم
 رون منڪون ننه حڪومت رنه ڪلاڦ ڦيروئھ، روم ملڪ را پاڌشا ننه ٽيڪس ڏيڏا
 ٿي نا پاڙئھ، ان آپ ننه پڳوونَ رو سونڊل ڪريست ڪين آپ ننه پاڌشا ڪئھ.“
 ③ تو پيلاطس ايسو ٿي پُونسيو: ”تون يهوديون رو پاڌشا سٺ، ڪي؟“ تيا
 مانھ ايسو اوتا ننه ڪيڏو: ”زم تم ڪوھ ريا، هُون سون.“
 ④ تئين پيلاطس موتون پوزاريون ان اوتون ٻڌون منڪون ننه همپڙايو: ”مون
 ننه ايٺا منڪ ۾ ڪئين ڏوھ ڏيڪيام نٿي آوتو.“
 ⑤ پڻ اُو زور ٿي ڪيو مڏيا: ”اي گليل صوپا ٿي لين ٻڌائي يهوديه ملڪ
 موئين، ايٺا شهر موئين پڻ، آپري واتون شيڪاڙين امارون منڪون ٿي حڪومت
 رنه ڪلاڦ ڦسري ڪراوا ڪرئھ.“

⑥ هائي وات هومپڙين پيلاطس پُونسيو جي ”اي منڪ گليل صوپا رو سٺ،
 ڪي؟“ ⑦ زئين اوتا ننه ڪهر پڙي جي ايسو گليل رو سٺ، ان راز ڪريا وازا
 هيروڊيس ري حد رو سٺ، تو ايسو ننه هيروڊيس ڪن ميليو، ڪم تو اوتون ڏيئون

۾ هيروديس پڻ يروشلم شهر موئين آول هتو.

گليل صنويا مانھ راز ڪريا واڙو هيروديس

ايسو ٿي پڙا پونس ڪرڻھ

⑧ هيروديس ايسو نٺه ڏيڪين گهڻو راڄي ٿيو، ڪم تو اوڻه ايسو را پارام اڳي هومپڙيو تو، تيام گهڻا وڪت ٿي اوڻا نٺه زووا ڪرتو تو، ان ايڻا هارو هڪتو تو جي ايسو رو ڪوڪ پرسو زوڻه. ⑨ او ايسو ٿي گهڻي واتون پونسٽو ريو، پڻ ايسو ڪئين وڙنڌي نه ڏيڏي. ⑩ موٽا پوزاري ان شاستر زوڻيا وازا جيا اوڻه اوپا تا، او گهڻا ڪلاڦ ٻولين ايسو مانھ ڏوه ڏيتات ريا.

⑪ ٽئين هيروديس آپرون سپايون پيڙو ايسو نٺه گهٽ هزمين اوڻا مانھ ٺٺولي ڪري. ان پسٺه ايسو نٺه اونچام اونچو لوگهڙو اوڍاڙين وڙي پاسو پيلاطس هومو ميليو پرو.

⑫ اوڻه ٺي ڏي هيروديس ان پيلاطس ٻي هڪا پيڙا ٿي منائين دوست ٿي ڳيا. تيا مور او هڪا پيڙا ٿي وير راکتا.

رومي راز ڪريا واڙو پيلاطس

ايسو نٺه موت رٿي سزا ڏيندا رو ڦينصلو همپڙاوڻھ

(متي 26-15:27، مرقس 15:6-15، لوقا 23:13-25، يوحنا 18:39-16:19)

⑬ پسٺه پيلاطس موٽون پوزاريون، آڳيونون، ان اسرائيلي قوم رون ٻڌون منڪون نٺه آپ ڪن پيڙا ڪريا ⑭ ان اوڻون نٺه ڪيڏو: ”تمي ايڻا منڪ مانھ اي ڏوه ڏين مون ڪن تيڙي آيا جي اي تماري اسرائيلي قوم رون منڪون نٺه حڪومت رٺه ڪلاڦ ڦيروڻھ. زوڻو، مٿين تمارٺه رويرو ايڻا رٿي جونچ ڪرڻھ، ان مٿين ايڻا ۾ ايوو ڪئين ڏوه نٿي ڏيڪيو زم تمي ڪوه ريا. ⑮ ان نڪو وڙي هيروديس نٺه ڪئين ڏوه ڏيڪيام آيوھ، ڪم تو اوڻه ايڻا نٺه امون ڪن پاسو ميليوه. هوڻه وات

ساوئي سٺ، ايٺه ايوو ڪئين ڏوه نٿي ڪريو، جي ايٺا نٺه موت رٿي سزا ڏيوو ڪپڻه. (16) تيام هُون ايٺا نٺه هڙمايا هارُو ڇاڀڪا هٿاوين ساڏونه پرو. (17) (اُوٺه تيام ڪيڏو، ڪم تو روزاڙ پرموٽه سال ٿو سال پاشڪا پرڀ مانھ يھوديون رو هيڪ قيڏي ساڏوو تو.)

(18) پڻ اُو ٻڌائي منڪ ايسُو را پارام پيلاطس نٺه زور ٿي ڪيو مڏيا: ”هايا نٺه مارو پرو، ان امون هارُو برابر نٺه ساڏو پرو!“ (19) هُوٺه برابر يروشلم شهر موئين حڪومت رٺه ڪلاڻ ڦشرئي ڪرايا ري ڪري ان کُون ڪريا ري ڪري جيل موئين پورل هتو.

(20) پيلاطس رٿي مرضي هٿي جي اُو ايسُو نٺه ساڏه پرو، تيام اُوٺه وڙي منڪون نٺه هڙمايا. (21) پڻ اُو زور ٿي ڪيتا ريا: ”هُوڙي مانھ ساڙين مارو پرو، هيا نٺه هُوڙي مانھ ساڙين مارو پرو.“

(22) تيا مانھ پيلاطس ترڻي وار وڙي اُوٺون نٺه ڪيڏو: ”ڪم؟ ايٺه ڪيوو ڏوه ڪريوھ؟ مٿين ايٺا موئين ايوو ڪئين ڏوه نٿي ڏيڪيو، جيا ري ڪري ايٺا نٺه موت رٿي سزا آوٺه. تيام هُون ايٺا نٺه ڇاڀڪا هٿاوين ساڏونه پرو.“ (23) پڻ اُو ماڳي زور ٿي گهڻو گهڻو ڪيو مڏيا: ”هايا نٺه هُوڙي مانھ ساڙين مارو پرو!“ ان اُو زور ڪرين آپري وات مناوي ڳيا.

(24) پسنه پيلاطس زم منڪي ڪيڏو تم ڦينصلو ڪريو. (25) اُو منڪ جيو ڦشرئي ڪرايا ري ڪري ان کُون ڪريا ري ڪري جيل موئين پورل هتو، جيا نٺه منڪ سڏاوا ڪرتات ريا، اُوٺا نٺه پيلاطس ساڏيو پرو، پڻ ايسُو نٺه اُوٺون ري مرضي مانھ ماريا هارُو ڏيڏو پرو.

ڦوجي ايسُو نٺه هُوڙي مانھ ساڙه

(متي 32:27-44، مرقس 21:15-32، لوقا 23:26-43، يوحنا 17:19-27)

(26) ڦوجي زئيون ايسُو نٺه لين زاتات ريا، تو اُوٺون نٺه ٻاراڙي ٿي آتو هيڪ

منڪ پيڙو ٿيو. اُو ڪريني شهر رو هتو ان اُوٺا رو نوم شمعون هتو. ان قوجيئي اُوٺا نٿه پيگر ۾ زهالين ايسو رٿي هُوڙي اُوڀڙاوي زم اُو ايسو وونهڙ اُوڀاڙين وٺه.

(27) ايسو وونهڙ اسرائيلِي قوم را الاهي گهڻا منڪ زاتات ريا، ان گهڻي ڏوشي پڻ زاتيت ري، جي ڏک ۾ هيٺام ڊينڪون ليتيت ري ان ايسو هارو روتيت ري. (28) تئيون ايسو اُوٺون ڏوشيون هومو ڦرين ڪيڏو: ”او يروشلم ريون ٻايون، مون هارو مت روٺو، پڻ آپ هارو روٺو ان آپرون ٻاڙون هارو روٺو. (29) ڪم تو ايو ڏورا ڏي آوٺه ريا زئيون منڪ آپرا اولاد مانھ ظلم ڳيتو پاڙين ڪيشي: ’پاڳواڙي اُو ڏوشي سٺه جي وونزڻي سٺه، جيئي ڪيڏي ٻار نٿي زلميا، نڪو وڙي اُوٺون نٿه ڏوراياھ. (30) اُوٺه توڻه منڪ ڪيشي: ’ڏونگر امون مانھ پڙي آوٺه، تو ليڪ’ ان وڙي ’ڌڙا امون نٿه پورٺه پرا، تو ليڪ، (31) ڪم تو جي نيلا وڻ ٿي ام ڪرٺه ريا، تو هُوڪا ٿي ڪي نئين ٿڻه؟“

(32) ان ايسو پيڙا پيئون پيڙون منڪون نٿه موت رٿي سزا ڏيڏا هارو لي زاتات ريا، جيا ڏوهاري هتا.

(33) زئيون اُوٺا ماڳ پوڳيا جيا نٿه ”پوڏڪئي“ ڪنھ، تئيون اُوٺه ايسو نٿه ان پيئون ڏوهاريون نٿه آپري آپري هُوڙي مانھ ساڙيا، هيڪا نٿه ايسو رٺه زمٽه پاهڻه ان پيڙا نٿه ڏاوتھ پاهڻه. (34) ان ايسو آپ نٿه ماريا واڙون هارو ان ماريا واڙون هارو پڳوون ٿي ام پراٿنا ڪرتوت ريو: ”ٻا، ايئون منڪون نٿه ماڻ ڪرو، ڪم تو ايئون نٿه ڪهر نٿي جي اي ڪي ڪرٺه ريا.“

پسٺه قوجيئي ايسو را لوگهڙا ورايا هارو پُڪا نوڪيا. (35) ان اسرائيلِي قوم را منڪ اُوپا زوتات ريا، ان اُوٺون را آڳيوون پڻ ام ايسو مانھ ٺولي ڪرتات ريا: ”اي تو پيڙون نٿه پچاوتو تو. هُوٺه جي پچايا واڙو ڪريست سٺه، جيا نٿه پڳوون سونڊيوھ، تو آپ نٿه پچاوتھ، نا؟“ (36) ان قوجيئي پڻ اُوٺا نٿه ميٿا ڏيڏا. اُو ايسو ڪن آوين اُوٺا نٿه ڪاٿو ڌراڪون رو رس ٿورين (37) ڪيڏو: ”جي تون يهوديون



رو پاڌشا سٺه، تو آپ ننه پڇاؤ. " (38) ان هُوڙي مانه ايسو را ماٿا اُوپر هيڪ پٽي پڻ لاڳل هئي، جيا مانه لڪل هتو جي ايسو ڪيا وات ري ڪري موت رٿي سزا ڪانه ريو. اُوٺا پٽي مانه لڪل هتو:

"اي يهوديون رو پاڌشا سٺه."

(39) جيا ڏوهاري ايسو پيڙا هُوڙي مانه سڙاڙل هتا، اُوٺون موٽين ٿي هيڪڻه زڻه ايسو رٿي پيڇڙي ڪرين ام ميو ڏيڏو: "تُون تو پڳوون رو سونڍل پڇايا وازو ڪريست نٿي، ڪي؟ تو پسنه آپ ننه ان امون ننه پڻ پڇاؤ" (40) تيا مانه پيڙه ڏوهاري اُوٺا ننه وڙگين ڪيڏو:

"تُون پڳوون ٿي پڻاتو ٿي نٿي ڪي، زئيون تُون ننه پڻ هاڳي سزا زڙه رٿي؟ (41) آپڻي سزا تو حقي سٺه، ڪم تو جيا ڏوه آبي ڪرياه، اُوٺا را ايوزام سزا زڙه رٿي. پڻ ايشه تو ماڳي ڪئين ڏوه نٿي ڪريو. " (42) پسنه وڙي ايسو ننه ڪيڏو: "او ايسو، زئيون تمي پاڌشا ٿين آو، تئيون مون ننه ياڌ ڪريا. " (43) تو ايسو اُوٺا ننه ڪيڏو: "هُون تُون ننه هاس ڪونه، آڙ ٿي تُون مون پيڙو آڪاشي هڪ موٽين هوڻيه."

ايسو رو موت

(متي 27:45-56، مرقس 15:33-41، لوقا 23:44-49، يوحنا 19:28-30)

(44) تئيون پهرون رو ٻارونڪ رو ٿوٿو هتو. ان اُوٺا وڪت ٿي لين ترٿيون را ٿوٺا هُوڙي ٻڌا ملڪ موٽين انڌارو ٿي گيو، (45) ڪم تو ڏي رو سوجهرو نٿو ٿيتو. ان



پسئ پڳوون را گهر موئين پريتير جگا رو پڙډو وسا ټي څاټين ټي ټکرا ټي گڼو.
 (46) ان ايسو زور ټي پڳوون ننه کيدو: "او ٻا، هون آږو جيو تمارون هاتون م
 ډيونه." ام کيدو ان اونا رو هاه نيهرې گڼو.

(47) اي ٻڌي واتون ډيکين قوحيون ره ساب پڳوون را وکوڻ کرين کيدو:
 "هاس م، اي منک پيدوهي هتو." (48) ان او گهڻا منک جيا هائي ٻڌوئي کئين
 زووا آيا تا، او ٻڌائي ٻڌوئي کئين ډيکين ډکون م هيڻام ډينکون ليتا پاسا وڙيا.
 (49) پڻ ايسو را ٻڌائي اوڙکيندا ان او ډوشي جي گليل صويا ټي پيڙي آوي ټي،
 او شينتا هون اوپين اي ٻڌوئي کئين زوتيت ري.

ايسو را لاش ننه پونئيرا جيوا مقوم موئين راگنه

(متي 27:57-61، مرقس 15:42-47، لوقا 23:50-56، يوحنا 19:38-42)

(50) هونه هيک منک هتو جيا رو نوم يوسف هتو، جيو ډرمي پنچائيت رو

ميمپر هتو. اُو نائوڪو منڪ ان پڳوون ري وات مانھ وُڍا واڙو هتو، ⑤1 ان جيو ڦينصلو ڌرمي پنچائيت ڪريو تو ان جيو ڪوم اُوئي ڪريو تو، اُوئا ڀر اُو راڄي نتو. اُو اڳي يهوديون را شهر ارميتيه رو هتو، ان پڳوون را راز را اُوئا توئا رئي وات زوتوت ريو، زئون پڳوون ساوئ نئونئ ٻڌون مانھ راز ڪشي.

⑤2 اُوئ پيلاطس ڪن زائين ايسو رو لاش مونگيو. ⑤3 پستھ اُوئ لاش نئھ هُوري ٿي اوتارين مونگها سوتي ڪڍ موئين وينتوزيو ان پونئيرا جيو مقام موئين ميلو نو، جيا موئين اڳي ڪيا نئھ نتو راکيو. ⑤4 اُو جُمعا رو ڏي هتو، ان پويتر ڏي رئي رات پڙيا واڙي هتئي.

⑤5 هُوه اُو ڏوشي جي گليل صوپا ٿي ايسو پيڙي آي تي، اُو لاش وونهڙ وونهڙ گي، ان زويو جي مقام ڪيا ماڳ سئھ ان ايسو رو لاش ڪم ڪرين ميلوھ. ⑤6 ان پستھ اُوئي پاسي گهري زائين لاش هارو ڪشبو واڙي شينھون ان عطر تيار ڪيا.

چنچر رئھ ڏي اُوئي ڏوشيئي شاستر ڀر لڪل پڳوون را حڪم پرموتھ آروم ڪريو، جي پويتر ڏي رو ڪئين ڪوم نہ ڪرو.

ايسو جيوي اُونئھ، ڏيڪاڙا ڏئھ ان آڪاش مانھ سڙي زائھ

ايسو موت ٿي جيوي اُونئھ

(متي 10:1-28، مرقس 8:1-16، لُوقا 12:1-24، يوحنا 10:1-12)

① آچار رئھ ڏي هوار ري ويلي اُو ڏوشي مقام مانھ آي، ان ڪشبو 24 واڙي شينھون جي اُوئي تيار ڪري تي، اُو پيڙي لي آي. ② ان آوين زوئھ، تو پونئيرا جيو مقام را مونڊا ٿي پوئا را ڍڪ نئھ هيڪل ريٽول ڏيڪيو.

③ زئيون مقوم موئين زائين زويو، تو پريو ايسو رو لاش هتو ئي نئين. ④ هزون او اينا وات مانه حيرون هتي، تو اوچتا هي منك دوزا شيترا ان زبكتا لوگهڙا پيرل آوين اويا. ⑤ تئيون دوشي گهڻي پيڻائي گهي، ان زمي هرکي نمي گهي. پڻ اوني دوشيون ننه ڪيڏو: ”جيو جيوتو سته، اوتا ننه مرلون موئين ڪم گوتوه ري؟ ⑥ او ايتنه نتي، پڻ پگهون اوتا ننه جيوي اوناڙيوه. ياد ڪرو زئيون او گليل موئين هتو، تئيون تمون ننه ڪي ڪيڏو تو. ⑦ اوتنه تو ام ڪيڏو تو جي اي ضرور ٿيڻي جي موئهنه مون منڪ ذات را ڏيڪرا ننه زهلاوشي ان دوهاري منڪون رنه حواله ڪرشي، ان او مون ننه هوري مانه ساڙين مارشي پرو. پڻ ترئمته ڏي هون جيوي اوييه.“

⑧ پسنه دوشيون ننه ايسو رئي وات ياد آئي، ⑨ ان اوني مقوم ٿي پاسي زائين اي ٻڌي واتون اگيارون سونڊل شيلون ننه ان پيزون ٻڌون شيلون ننه همپڙاي. ⑩ جي دوشي مک شيلون ننه اي واتون همپڙاوتيت ري، او اي هتي، مريم مگدلييني، يونانه، يعقوب رئي مان مريم، ان اوئون پيڙي پيڙي دوشي. ⑪ پڻ شيلون رنه ليکنه اي واتون وڃل جيوي سته، ان اوني دوشيون ري واتون نه موني.

⑫ پڻ پطرس اونيون ان مقوم هومو ڊوڙيو. اوتنه آوين نيسو نمين مقوم موئين زوئو، تو روگا لاش ننه وينتوزيا وارا پاتا پڙيا، ان پيزو ڪئين نتي. جي ٿيو تو، اوتا مانه حيرون ٿيتو، او پاسو گهري گيو پرو.

ايسو بيئون شيلون ننه شيرزا مانه ڏيڪارو ڏنه

(مرقس 12:16-13، لوقا 13:24-35)

⑬ تيا ڪيڙ اوتنه ئي ڏي شيلون موئين ٿي هي زتا امائوس نومي پاڙا هوما زاتات ريا، جيو يروشلم شهر ٿي هاڏا ترٽڪ گائو شيتي سته. ⑭ ويتون ويتون ايئون ٻڌيون ٿيل واتون را پارام آيت ۾ واتون ڪرتا زاتات ريا. ⑮ او ٻولتات ريا ان

واتون ڪرتات ريا، تو ايسو آپ آوين اوتون پيڙو ويوا مڏيو. ①6 پڻ اُو ايسو ننه اوڙڪي نه هڪيا.

①7 تئين ايسو اوتون ٿي پونسيو: ”تمي ويتا ويتا آپت موئين ڪيوي واتون ڪروھ ريا؟“ تيا مانھ اُو نيموئا تين اُپا ريا. ①8 اوتون موئين ٿي هڪنھ زئنه، جيا رو نوم ڪليئوپاس هتو، ايسو ننه ڪيڏو: ”يروشلما اُوّل زاتروئون موئين ٿي هڪ تون ايوو زاترو سئھ ڪي، جيا ننه اي ڪهر نٿي جي آڙ ڪال يروشلم شھر موئين ڪيوي واتون تئھ ري؟“

①9 تيا مانھ ايسو اوتون ٿي پونسيو: ”ڪيوي واتون؟“ تو اُوئي اوتا ننه همپڙايو: ”ايسو ناصرت شھر واڙا ري واتون، جيو پڳوون ري نظر ۾ ان آڀڻي قوم رون ٻڌون منڪون ري نظر ۾ آڀرون ڪومون ان آڀريون واتون ٿي طاقت واڙو پڳوون رو نياپو ڏيڏا واڙو هتو. ②0 آڀڻي موٽي پوزاريئي ان آڳيووني اوتا ننه موت ري سزا هارو زهلايو ان اوتا ننه هُوڙي مانھ سڙاوين مرايو پرو. ②1 امارئي تو اي اُميد هئي جي اي اُو رو اُو سئھ جيو آڀڻي اسرائيلي قوم ننه آڙا ڪراوشي. پڻ هونھ ڪي ٿيشي، ڪم تو ايئون واتون ننه آڙ ترئمو ڏي سئھ. ②2 توئي پڻ هڪ پيڙي وات اي سئھ. امون موئين ٿي ڪئينڪ ڏوشيئي امون ننه حيروني م نوڪيا پرا. اُو هوار ري ويلي مقوم مانھ گهي تي، ②3 پڻ مقوم موئين اوتا رو لاش نه ڏيڪيو. اُوئي پاسي آوين ڪيڏو جي اوتون ننه آڪاشي ڏوتي ڏيڪاڙو ڏين ڪيڏو جي اُو جيوتو سئھ. ②4 اماري تولي را ڪئينڪ منڪ مقوم مانھ گيا، ان زم ڏوشيئي ڪيڏو تو، همروم ڏيڪيو، پڻ ايسو ننه اُوئي نه پازيو.“

②5 پسنھ ايسو اوتون ننه ڪيڏو: ”تمي تو هارو پوزا سو. پڳوون رو نياپو ڏيڏا واڙون ريون واتون مانھ تمازنه يقين راکوو تو. اتئي ڏير ڪم ڪروھ ريا؟ ②6 ام ضرور نتو ٿيوو، ڪي؟ جي پڳوون رو سونيل پڇايا واڙو ڪريست ڏک سھين مرئھ، ان پسنھ آڪاش موئين زائين آڀرو مون لئھ.“ ②7 پسنھ ايسو موسلي

ان ٻڌون ڀڳوونَ رو نياپو ڏيڏا واڙون رون ڪتابون ٿي لين، پورا شاستر ٿي، آپ را پارام لڪل ٻڌي واتون اوئون ننه هزماوي.

28) زئيون اوتا پاڙا ڏوڪڙا آيا، جيئن شيلون رنه زاو تو، تو ايسو ايوئه نموننه وڍو زوئننه هزون آگڙ زاووه. 29) پڻ او اوتا ننه گهڻا مٿيا ان ڪيڏو: "امون ڪن ٿڪي رنه، ڪم تو هونز ٿي گهيڻه، ان ڏي آتميا واڙو سئنه." تئيون او اوئون پيڙو ٿڪيا هارو اوئون ري گهري گيو. 30) زئيون ايسو اوئون پيڙو ڪاڏا هارو پيئو، تئيون روئي پري لين اوتا هارو ڀڳوون رو ٿورو مونيئو، ان پسنه روئي پونگين اوئون ننه ڏيڏي. 31) تئيون ڀڳوون اوئون ننه اوڙڪيا رئي هيئت ڏيڏي، ان اوئي ايسو ننه اوڙڪي ليدو. پڻ ايسو هٿ ۾ اوئون ري نظرون ٿي الوپ ٿي گيو. 32) پسنه اوئي هڪا پيڙا ننه ڪيڏو: "زئيون او شيرڙا مانھ آيون ٿي واتون ڪرتوت ريو، ان شاستر ري واتون ساوي ڪرين هزماوتوت ريو، تئيون آيون ننه ڪٽئي ڪشي ٿيڻي رئي، نا؟"

33) اوئه ئي ٿوئنه او ٻي زئا اوليا ان پاسا يروشلم هوما گيا پرا. اوئنه پوگيا، تو اگيارنه سونڊل شيلا ان پيڙا شيلا پڻ آيت موئين پيڙا ٿين 34) ڪيتات ريا: "هاسئي وات سئنه. پريو ايسو جيوي اونيوه، ان شمعون ننه ڏيڪارو ڏيڏوه." 35) تيا مانھ ايئي ٻئي شيلي اوئون ننه ٻڌي وات همپڙاوي جي شيرڙا مانھ ٿئي تي، ان اي وات پڻ همپڙاوي جي اوئي روئي پونگيا رنه ٿوئنه ايسو ننه اوڙڪيو تو.

ايسو شيلون ننه ڏيڪارو ڏئھ

(مرقس 14:16، لوقا 24:36-43، يوحنا 19:20-23)

36) زئيون او ٻي شيلا هائي واتون ڪيتات ريا، تو اوچتو ايسو آپ آوين اوئون را وس ۾ اوپو، ان اوئون ننه ڪيڏو: "هڪي ريو!" 37) او ماگي گهڻا پيڻائي گيا ان امر هزميا جي "اي پوت ڏيڪارو ڏئھ ريو." 38) پڻ ايسو اوئون ننه ڪيڏو:

”تمي ڪم مُوزهوئاھ؟ تمارون منون موئين ڪم شڪ تئھ ريو؟“ (39) مارون هاڻون نٽه زوئو، ان پڳون نٽه زوئو، جي هُون ايسُو سون. مُون نٽه سڀين زوئو، ڪم تو پُوت موئين نڪو مونھ نڪو هاڏڪا هوئھ، پڻ تمي زوئوھ ريا جي مُون موئين مونھ ان هاڏڪا سئھ.“ (40) ام ڪين ايسُو آپرا هات ان پڳ ڏيڪاڙيا. (41) شيلا هزون هُوڌي ڪُشي ان حيروني ري ڪري شڪ ڪرتات ريا، تيام ايسُو اوئون ٿي پُونسيو: ”ايئنه تمون ڪن ڪئين کاڏا رو سئھ؟“ (42) تو اوئي ايسُو نٽه شيڪل مسي رو ٽڪرو ڏيتو، (43) ان ايئنه لين اوئون رنه روپرو کاڏو.

ايسُو پَوِيتر آتما ميليا را پارام ان پوري ڏنيا ۾ آپرا پارام همپڙيا رو ڪئھ، ان پسئ آڪاش ۾ اوپڙائي زائھ

(مرقس 16:19-20، لُوقا 24:44-53، مڪ شيلون را ڪوم 1:4-11)

(44) تيا ڪيڙ ايسُو مڪ شيلون نٽه ڪيڏو: ”اي واتون جي همئنه ٿي گيھ، اُو هاگي واتون سئھ جيا را پارام مئين تمون نٽه اگي ڪيڏو تو، زئيون هُون تمون پيڙو هتو. مئين تمون نٽه اگي ڪيڏو تو جي شاستر ري ٻڌي واتون جي مُوسي رون لڪل ڪتابون موئين، پڳوون رو نياپو ڏيڏا وازون رون ڪتابون موئين، ان پزنون را ڪتاب زبور موئين مارا پارام لڪل سئھ، اُو ٻڌي واتون ضرور پوري ٿيشي.“

(45) تنيون ايسُو اوئون را ڌيماڳ ڪوليا زم اُو شاستر نٽه هزمي هيڪنه، (46) ان اوئون نٽه ڪيڏو: ”شاستر موئين ام لڪل سئھ جي پڳوون رو سُونڊل پڇايا وازو ڪريست ڏک ويئين مرشي ان ترئمئھ ڏي مرلون موئين ٿي جيوي اوئشي، (47) ان يروشلم ٿي لين ٻڌيون قومون نٽه منڪ اي همپڙاوشي: ’آپرا ڪراپ ڪوم ساڌين توپونه ڪرو ان پڳوون ري وات مانھ وو، ان پڳوون را سُونڊل پڇايا واڙا ڪريست ري ڪري پڳوون تمارا ڏوھ تمون نٽه ماڦ ڪرشي.‘ (48) هُوئھ ايئون واتون رُئي هاڪ پريا واڙا ان همپڙايا واڙا تمي سو. (49) زوئو، هُون تمون

ڪن پوٽر آتما نٿه مڃي ڇا رو مارڻه ٻاڻ ڀڳوون وائڻو ڪريو تو. زئيون هُڏي تمون نٿه آڪاش ٿي هايا رڻي ڪڙا نه زڙڻه، تڏيئون هُڏي ايڻه ايڻا شهر موٽين ريا.

⑤0 پڻه ايسو اُئون شيلون نٿه شهر ٿي ٻارا بيت عنياه پاڙا ڪن تيڙي ڳيو، ان اُڻه آڀرا هاڻ اُنسا ڪرين اُئون نٿه آشيرواڏ ڏيڻو. ⑤1 زئيون آشيرواڏ ڏيتو ريو، تو اُئون ٿي ڌار ٿي ڳيو ان ڀڳوون اُڻا نٿه آڪاش مانھ اُڀاڙي لڏو.

⑤2 تڏيئون اُ ايسو رڻي پوزا ڪرين گهڻا ڪش ٿين پاسا يروشلم شهر موٽين ڳيا. ⑤3 ان اُڻه هميش ڀڳوون را گهر موٽين هوتا ان ڀڳوون را وڪوڻ ڪرتا ريتا.

يُوحنا را لکل شاستر رئي هزموئي

شاستر لکيا واڙو

شاستر را ايفا ڪتاب ۾ لکيا واڙا رو نوم ڪيئن نٿي لکل، پڻ شروع ٿي لين منک ام هزمئھ جي يُوحنا نومي ايسو رڻ مُک شيلئ ايفا نئ لکيوھ. يُوحنا يھودي قُوم رو هئو. اُو زبدي رو ڏيکرو ان يعقوب رو ڀائي هئو، ان شمعون پطرس رو دوست ان ڀائيواڙ هئو. اُو ايسو رون پيرهيون شيلون موئين ٿي پڻ هيڪ هئو (لوقا 5:10-11). تيا ڪيڙ زئيون ايسو آپرون ٻڌون شيلون موئين ٿي ٻارون زئون نئ مُک شيل تيا هارُو سونديا، تو اُوئ يُوحنا نئ پڻ مُک شيلو سونديو (متي 2:10، مرقس 17:3، لوقا 14:6).

زم شاعريي لکيا ۾ لکيا واڙو نڪو آپ نئ ”هُون“ ڪئھ، نڪو آپرو نوم لئھ، پڻ آپرو پيزو نوم راکئھ، تم ايفا ڪتاب ۾ يُوحنا پڻ آپرو نوم نٿي ليتو، پڻ آپ نئ ”ايسو رو پريمي شيلو“ ڪئھ (يُوحنا 13:23، 19:26، 20:2، 21:7، 21:20)، ڪا آپ نئ رُوگو ”شيلو“ ڪا ”پيزو شيلو“ ڪئھ (يُوحنا 1:35-40، 18:15، 20:2، 21:20). ڪتاب ري پڇاڙي ۾ لکل سئ جي اي ”پيزو شيلو“ ان ”ايسو رو پريمي شيلو“ اُو رو اُو سئ جيئن اي ڪتاب لکيو (يُوحنا 24:21). ايفا ڪتاب ۾ زئيون اي نوم يُوحنا اُوئھ، تو ايسو را شيلو يُوحنا را پيارام نٿي، پڻ گھڻو ڪرين يُوحنا پويتر سنون ڏيڏا واڙا را پيارام سئ، جيئن ايسو را پيارام هاڪ ڀري ٿي. شمعون پطرس رو ٻاپ ترئمو يُوحنا نومي منک سئ (يُوحنا 15:17-17).

يُوحنا آپ ايفا ڪتاب ۾ لکل واتون اونڪيئي پاڙي (يُوحنا 19:35، 21:24)، تيام اُو پڪي ڪاتري ٿي ايئون واتون را پيارام هاڪ ڀريئھ.

ام لاڳئھ جي ڪتاب رو آڪري حصو (يُوحنا 1:21-25). ڪتاب پورو ٿيا ڪيڙ لکيام آيو، ان زويام پيزون رو لکل سئ. ان وات ساوئي ڏيکيام اُوئھ جي ڪتاب ري آڪري هي آيتون 24:21-25 پيزا منک ري لکل سئ، ڪم تو اُو منک يُوحنا را پيارام آپري هاڪ ڀريئھ جي اُو هاسو سئ.

پڪي ڪبر نٿي جي يُوحنا اي ڪتاب ڪيئون لکيو، پڻ اندازام 50-85ع را وس ۾ لکيو هوشي.

شاستر ڪيون منڪون هارُو لکيو

يُوحنا شاستر رو اي ڪتاب اُوئون ٻڌون منڪون هارُو لکيوھ جيا ايسو را پيارام هاسئي ڪبر پاڙوا ڪرئھ، ان زوئوا ڪرئھ جي ايسو هاس ۾ ڀڳوون رو سونديل پڇايا واڙو ڪريست ان ڀڳوون رو ڏيکرو سئ. يُوحنا اي شاستر نه رُوگو آپري يھودي قُوم واڙون هارُو پڻ ٻڌون ڌاري قُوم

واژون هارُو پڻ لکيوه. تيام اُو آپري عبراني ٻولي رُون ويئون رو مطلب هُزماوئِه (يُوحنا 1:38, 1:41, 1:42, 9:7, 20:16) ان يهُوديون را ريت رَواز را پارام پڻ هُزماوئِه (يُوحنا 2:6, 4:9, 19:40).

شاستر لکيا رو مطلب

يُوحنا آپ لکئِه جي اُوئ شاستر رو اي ڪتاب ڪم لکيو (يُوحنا 20:31). ”پڻ مئين هائي واتون تيام لکيه زم تمي يقين ڪرو جي ايسو پڳوون رو سُونڊل پڇايا واژو ڪريست ان پڳوون رو ڏيڪرو سئ، ان اُوئا مانِه وشواس راڪيا ٿي تمون نئ اُوئا رئ هيلئ هميش رو جيون رَزئ.“ اِئڻا ڪتاب م 2:1-12:50 م ايسو را ڏيڪاڙل پرسا لکل سئ ان اُوئون پرسون رو مطلب پڻ ساوو ڪرل سئ. تيا ڪيٽ 13:1-17:26 م ايسو آپرون شيلون نئ آپرا موت را پارام ان پوئتر آتما رئ آيا را پارام هُزماوئِه ان اُوئون رئي هيئت وڌائئِه. اِئڻا ڪتاب م ايسو پوئي، روتي، سوجھرا، رييون ان ڌڙا، ان ڌراڪون ري ويل را مثال ڏين آپرا پارام، پوئتر آتما را پارام، ان هميش را جيون را پارام شيڪاڙئِه.

اِئڻا ڪتاب موئين اي حصا سئ:

ايسو را پارام مورليا وين	18-1:1
يُوحنا پوئتر سنون ڏيڏا واژو ان ايسو را پيرهيان شيلا	19-1:51
ايسو پڳوون رو ڏيڏل ڪوم ڪرئِه	2-1:12-50
ايسو آڪري وار شيلون پيزو روتي ڪائئ، زهلائئِه	13-1:19-42
هُوڙي مانِه مرئِه ان مقوم موئين پوراڻئِه	
ايسو جيوي اُونئِه ان ڏيڪاڙا ڏئِه	20-1:31
آڪري واتون	21-1:25

نوٽ: ڪئينڪ ترجمون م يُوحنا 6:51 رئي آيت يُوحنا 6:51 ان 52 پيئون آيتون م وراول سئ، ان تيا ڪيٽ يُوحنا 6:52 ٿي لين 71 هُوڙي هر آيت رو نمبر هيڪ وڌائئ سئ.


اِئڻا ڪتاب را شاستر ٿي پيزا حوالا:

يُوحنا 1:21 2 سلاطين 2:11	يُوحنا 1:29 اخبار 16:3, 24
يُوحنا 1:21 ملاڪي 4:5-6	يُوحنا 1:29 يسعياه 53:7-12
يُوحنا 1:21 اِسْتِشْنا 18:15	يُوحنا 1:45 اِسْتِشْنا 18:15
يُوحنا 1:23 يسعياه 40:3	يُوحنا 1:45 يسعياه 53:1-12
يُوحنا 1:29 پيدائش 22:8-13	يُوحنا 1:45 داني ايل 7:13-14
يُوحنا 1:29 خُروج 12:3-13	يُوحنا 1:45 ميڪاه 5:2

يُوحنا 51:1	پيدائش 12:28	يُوحنا 33:10	احبار 16:24
يُوحنا 51:1	داني ايل 13:7-14	يُوحنا 34:10	زبور 6:82
يُوحنا 14:2	خروج 16-13:30	يُوحنا 13:12	زبور 26:118
يُوحنا 17:2	زبور 9:69	يُوحنا 15:12	زكرياه 9:9
يُوحنا 22:2	زبور 10:16	يُوحنا 34:12	زبور 4:110
يُوحنا 15-14:3	گنتي 9-8:21	يُوحنا 34:12	يسعياه 7:9
يُوحنا 10:5	خروج 10-8:20	يُوحنا 34:12	داني ايل 13:7-14
يُوحنا 14:6	استيشنا 15:18	يُوحنا 38:12	يسعياه 1:53
يُوحنا 31:6	خروج 4:16	يُوحنا 40:12	يسعياه 10:6
يُوحنا 31:6	خروج 35-13:16	يُوحنا 18:13	زبور 9:41
يُوحنا 31:6	نحمياه 15:9	يُوحنا 25:15	زبور 19:35
يُوحنا 31:6	زبور 25-24:78	يُوحنا 25:15	زبور 4:69
يُوحنا 45:6	يسعياه 13:54	يُوحنا 12:17	زبور 9:41
يُوحنا 53:6	خروج 8-3:12	يُوحنا 32:18	يُوحنا 14:3
يُوحنا 53:6	احبار 11:17	يُوحنا 32:18	يُوحنا 28:8
يُوحنا 53:6	استيشنا 27:12	يُوحنا 32:18	يُوحنا 33-32:12
يُوحنا 22:7	احبار 3:12	يُوحنا 7:19	احبار 16:24
يُوحنا 22:7	پيدائش 14-10:17	يُوحنا 18:19	زبور 16:22
يُوحنا 40:7	استيشنا 15:18	يُوحنا 24:19	زبور 18:22
يُوحنا 42:7	ميگاه 2:5	يُوحنا 28:19	زبور 15:22
يُوحنا 51:7	استيشنا 20-18:16	يُوحنا 29:19	زبور 21:69
يُوحنا 51:7	استيشنا 19-15:19	يُوحنا 31:19	استيشنا 23-22:21
يُوحنا 5:8	احبار 10:20	يُوحنا 36:19	خروج 46:12
يُوحنا 5:8	استيشنا 22:22	يُوحنا 36:19	گنتي 12:9
يُوحنا 6:8	يُوحنا 31:18	يُوحنا 36:19	زبور 20:34
يُوحنا 17:8	استيشنا 15:19	يُوحنا 37:19	زكرياه 10:12
يُوحنا 58:8	خروج 14:3	يُوحنا 9:20	زبور 11-10:16
يُوحنا 59:8	احبار 16:24	يُوحنا 9:20	يسعياه 11-10:53
يُوحنا 35:9	داني ايل 14-13:7	يُوحنا 20:21	يُوحنا 25:13

يُوحنا

رو لکل پرپو ايسو را پارام
پويتر شاستر



ايسو پڳوون رو وچن سئ جيا ټي پڳوون ري واتون ساوي تته

① شروع ډر جگت نهيا مور وچن هتو.

ان وچن پڳوون پيزو هتو.

ان پڳوون ان وچن هيک را هيک هتا.

② وچن شروع ټي لين پڳوون پيزو هتو.

③ پڳوون ټډوئي کښن اوټا وچن را هپلا ټي ناهيو.

1

ان ايوو ڪئين نٿي ٺهيو جي اُٺا وڃن ووڻو ٺهيو هونءِ.

④ اُو وڃن جيون ڏيڏا وازو هتو.

ان اُو جيون ڏيڏا وازو ٿين

منڪون هارو سوجهرو هتو.


⑤ زم اندارا ۾ سوجهرو زبڪڻه،

تم ڏنيا ۾ اُو وڃن سوجهرو ٿين

منڪون نٿه پڳوون رو سوجهرو ڏهه.

ان اندارا ري هر پوندائي مانھ

اُٺا سوجهرا رڻي جيت ٿينھ.



⑥ پڳوون هيڪا منڪ نٿه ميليو جيا رو نوم يُوحنا هتو. ⑦ اي منڪ اُٺا

سوجهرا را پارام هاڪ پروا آيو، زم اُٺا رٿه هاڪ پريا ري ڪري ٻڌائي منڪ

وِشواس اوڻهه. ⑧ يُوحنا آپ اُو سوجهرو نتو، پڻ اُٺا سوجهرا را پارام هاڪ پروا

آيو تو.

⑨ اُو هاسو سوجهرو جي ٻڌون منڪون نٿه سوجهرو ڏهه، اُو ڏنيا ۾ آيا

وازو هتو.

⑩ اُو ڏنيا ۾ هتو،

ان ڏنيا اُٺا ٿي ٺهڻي ٿي،

توڻي پڻ ڏنيا ري منڪي اُٺا نٿه نه اوڙڪيو.

⑪ اُو آپرون ۾ آيو،

پڻ آپري منڪي اُٺا نٿه هونڪاريو نئين.

⑫ توڻي پڻ زتي منڪي اُٺا نٿه هونڪاريو،

ان اُٺا مانھ وِشواس اوڻيو،

اوڻون منڪون نٿه اُٺه پڳوون را ٻار ٿيا رو حق ڏيڏو.

⑬ اُو پڳوون را ٻار ام نه ٿيا زم منڪون را ٻار مان ٻاپ هُون ٿهه.

اُو نڪو پيئون موٽهون ري مرضي ٿي ٿيا،
 نڪو آڏمي را ڦينصلا ٿي ٿيا.
 پڻ پڳوون اُوئون نٿه آڀ ٿي واسطو رکاوين آڀرا ٻار ٿايا.
 ⑭ ان وچن منڪ ٿيو ان آڀون وسا ريو.
 ان امي ڏيڪيو جي اُو هاس ۾ ڪيوو سٺه،
 جي اُو پڳوون رو مون واڙو هيڪڻه ڏيڪرو سٺه
 جيو پڳوون را پاها ٿي ميلل سٺه
 ان ڪرپا ان هاس ٿي پرال سٺه.

⑮ يُوحنا اُوٺا را پارام هاڪ پرڻي ان ڪيڏو: ”اي منڪ اُو سٺه جيا را پارام
 مٿين ام ڪيڏو تو، جيو مون ڪيڙ آيا واڙو سٺه. اُو مون ٿي موٽو سٺه ڪم تو اُو
 مون مور هتو.“ ⑯ ڪم تو اُوٺا ري پرڀوري ٿي آڀون ٻڌون نٿه ڪرپا ئي ڪرپا
 زڙيه. ⑰ ڪم تو پڳوون را حڪم آڀون نٿه موسي ٿي زڙيا پڻ ڪرپا ان هاس
 آڀون نٿه رُوڳو ايسو ڪريست ٿي زڙيوه. ⑱ پڳوون نٿه ڪيڻه ئي ڪيڏي نٿي
 ڏيڪيو، پڻ پڳوون رو هيڪڻه ڏيڪرو جيو پڳوون رٿه ڪوڙڻه پيئوه، اُوٺا رٿه
 هيٺه پڳوون ساوو ٿيوه.

يُوحنا پَوِيتر سنون ڏيڏا واڙو ان ايسو را پيرهيان شيلا

يُوحنا آڀرا پارام هاڪ پرڻه

(متي 12:1-3، مرقس 8:1-3، لوقا 18:1-3، يُوحنا 19:1-28)

⑲ زئيون يهودي ڌرم ري آڳيووني يروشلم شهر ٿي پڳوون را گهر رون
 پوزاريون ان شيواڌاريون نٿه يُوحنا ڪن اي پونسوا ميليا، جي ”تمي ڪوڻ سو؟“
 ٿيون يُوحنا اي هاڪ پرڻي. ⑳ يُوحنا وات نٿه هٽاڙي نئين، پڻ ساوئي وات ڪرڻي



جي ”هُون پڳوونَ رو سُونڊل پڇايا واڙو
 ڪريست نٿي.“ ⁽²¹⁾ تئيون اُوئي پُونسيو:
 ”پسٽه تمي ڪُون سو؟ ڪي تمي ايلياه
 سو؟“ اُوته ڪيڏو: ”نا، هُون نٿي.“ اُوئي
 پُونسيو: ”تو ڪي تمي پڳوونَ رو نياپو
 ڏيڏا واڙا سو، جيا را آيا را پارام شاستر
 ۾ لڪل سٺه؟“ تو اُوته ڪيڏو: ”نا.“
⁽²²⁾ تيام اُوئي يوحنا ننه پُونسيو: ”تو

تمي سو ڪُون؟ امون ننه ڪو زم امي امارون ميليا واڙون ننه ڪي هڪون. تمي
 آپرا پارام ڪي ڪوه؟“ ⁽²³⁾ تو اُوته ڪيڏو: ”هُون اُو منڪ سون جو رڻ ۾ پوڪار
 پاڙهه، جي پريو را آيا هارو آپ ننه تيار ڪرو، زم پڳوونَ رو نياپو ڏيڏا واڙه
 يسعياه ڪيڏو تو.“



⁽²⁴⁾ هُونه ميلل منڪون موئين ٿي ڪئينڪ فريسي پالٽي را منڪ هتا. ⁽²⁵⁾ اُوئي
 يوحنا ٿي ام پُونسيو: ”جي تمي نڪو پڳوونَ را سُونڊل پڇايا واڙا ڪريست سو،
 نڪو ايلياه، نڪو پڳوونَ رو نياپو ڏيڏا واڙا سو، تو پسٽه تمي پويتر سنون ڪم

ڏيوھ ریا؟" ②۶ يُوحنا اُٿون نٿه وڙندڙي ڏيڏي: "هُون تو رُوگو پوڻي ٿي پوٽر سنون ڏيونھ، پڻ تمون وسا هيڪ ايوو منڪ اوڀل سٺه جيا نٿه تمڻي نٿي اوڙڪتا. ②۷ هائي اُو رو اُو سٺه جيو مُون ڪيڙ آوئھ ريو. هُون تو اُٿا هومو ڪئين نٿي، ايوو پڻ نٿي جي اُٿا رون زوڙون را ڪشا ڪولون." ②۸ اي ٻڌوڻي ڪئين يردن ڌريا رٿه پرلئھ ڪپ بيت عنياه گوم ڪن ٿيو، جيئنھ يُوحنا منڪون نٿه پوٽر سنون ڏيتو.

يُوحنا ايسو را پارام ھاڪ پرئھ

②۹ پڙئھ ڏي يُوحنا ايسو نٿه آپ هومو اُٿون پاڙيو، تو ڪيڏو: "زوئو، هائي پڳوون رو سُونڊل منڪ سٺه جيو پڳوون را نوم مانھ ساڙل گهيٽا را زم آڀرو جيو پڳوون را نوم مانھ ڏيشي، ان ڏنيا رون منڪون را ڏوھ مٽاڙشي. ③۰ هائي اُو رو اُو سٺه جيا را پارام مٿين ڪيڏو تو: 'اُو مُون ڪيڙ آيا واڙو سٺه پڻ اُو مُون ٿي موٽو سٺه، ڪم تو اُو مُون مور هتو.' ③۱ توڻي پڻ مٿين آپ اُٿا نٿه اڳي نٿو اوڙڪيو جي اُو پڳوون رو سُونڊل پڇايا واڙو سٺه، پڻ هُون ايتا هارو آيوھ ان پوڻي ٿي پوٽر سنون ڏيونھ جي اُو اسرائيلي قوم هومو ساوو ٿئھ." ③۲ تئين يُوحنا ايسو را پارام ھاڪ پرئي جي "زئين هُون اُٿا نٿه پوٽر سنون



ڏي ريو، تئين مٿين پوٽر آتما نٿه پارياو را رُوپ ۾ اُٿا مانھ آڪاش ٿي اُوترتون ڏيڪيو ان پوٽر آتما اُٿا مانھ ريو. ③۳ تيا مور اُٿا نٿه مٿين نٿو اوڙڪيو، پڻ پڳوون جيئنھ مُون نٿه پوڻي ٿي پوٽر سنون ڏيو ميليوھ، اُوئھ مُون نٿه ڪيڏو تو، تُون جيا مانھ پوٽر آتما نٿه اُوترتون ان ريتون ڏيڪئھ، هائي اُو رو اُو سٺه جيو پوٽر آتما ٿي پوٽر سنون ڏيشي. ③۴ ان هَوئھ مٿين آپ اونڪيئي ڏيڪيوھ ان

هاڪ ڀروڻه ريو جي اي ڀڳوون رو ڏيڪرو سٺه.

ايسو را پيرهيان شيلا

35) پڙهه ڏي وڙي يُوحنا ان اوتا را هي شيلا اوتنه اُپيا تا. 36) ان يُوحنا ايسو ننه پاهنه ٿين مٿون پاڙيو ان اوتا ننه زوئين ڪيڏو: ”زوئو، هائي ڀڳوون رو سونڊل منڪ سٺه جيو ڀڳوون را نوم مانه ساڙل گهيتا را زم آڀرو جيو ڀڳوون را نوم مانه ڏيشي.“ 37) يُوحنا را هي شيلا اوتا رهي هائي وات هومپڙين ايسو را شيلا ٿيا هارو ايسو وونهڙ ويوا مڏيا. 38) ايسو لوئو واڙين اوتون ننه آپ وونهڙ اوتا پاڙين ڪيڏو: ”تمي مون وونهڙ ڪم آوه زيا؟“ اوئي وڙندي ڏيڏئي: ”ربي“ مطلب ڳرو جي، ”تمي ڪيئن ريو؟“ 39) تئيون ايسو اوتون ننه ڪيڏو: ”هالين زوئو.“ تيام او پڙا ڳيا ان زيو جي ايسو ڪيئن رهي ان اوتون ڪن ٿڪي ريا، ڪم تو هونز رو چارونڪ رو توئو هتو.

40) او هي زئا جي يُوحنا رهي وات هومپڙين ايسو وونهڙ ڳيا تا، اوتون موئين ٿي هيڪ اندرياس هتو، جيو شمعون پطرس رو پائي هتو. 41) اوتنه يڪدم آڀرا پائي شمعون ننه ڳوتين هات ڪريو ان اوتا ننه ڪيڏو: ”امون ننه مسيح زڙيوه.“ مطلب ڀڳوون رو سونڊل پڇايا واڙو ڪريست زڙيوه. 42) ان او شمعون ننه ايسو ڪن تيڙي آيو. ايسو اوتا ننه زوئين ڪيڏو: ”ئون يُوحنا رو ڏيڪرو شمعون سٺه. آڙ ٿي لين ٿارو نوم ڪيڏا هوشي.“ جيا ننه يوناني ٻولي ۾ پطرس ڪئو، مطلب پٿر.

ايسو فلپس ان نقائيل ننه آڀرا شيلا ٿيا رو ڪئو

43) پڙهه ڏي ايسو گليل صوبا موئين زايا رو ڳينصلو ڪريو، ان اوتنه فلپس ننه ڳوتين هات ڪريو ان اوتا ننه ڪيڏو: ”مارو شيلو ٿين مون وونهڙ آو.“ 44) هوئو فلپس گليل صوبا را بيت صيدا شهر رو هتو، جيا شهر ٿي اندرياس ان پطرس پڻ اول هتا. 45) فلپس نقائيل ننه ڳوتين هات ڪريو ان اوتا ننه ڪيڏو: ”امون

نټه پښتون رو سونډل پچايا واړو زړيوه، جيا را پارام موسي را شاستر موئين ان پښتون رو نياپو ډيډا واړون را شاستر موئين اځي لکل سته. او يوسف رو ډيکرو ايسو سته، جيو ناصرت شهر رو سته. (46) تيون نثانيئل کيدو: "ناصرت شهر موئين ټي پښ کئين نائوکو نيهري هکنه کي؟" تو فلپس اوتا نته کيدو: "تون آپ هالين زو." (47) زيون ايسو نثانيئل نته آپ کن اوتون پارو تيون اوتا را پارام کيدو: "زوئو، هائي هاسو اسرائيلي سته، جيا پر لځرائي نځي نتي." (48) تيون نثانيئل ايسو نته کيدو: "تمې مون نته کم کرين اوړکو؟" ايسو اوتا نته وړندتي ډيډي: "هون زوئونه جي فلپس ره تون نته تيڙايا مور، تون انجیر را وځ هيټ هتو." (49) تيون نثانيئل ايسو نته کيدو: "ځرو جي، تمې پښتون را ډيکرا سو، تمې اسرائيلي قوم را پاډشا سو." (50) تيا مانه ايسو اوتا نته کيدو: "مئين کيدوه جي مئين تون نته انجیر را وځ هيټ ډيکيوه، تيام تون مون مانه وشواس اوئنه، کي؟ تون ايټا ټي پښ موئي واتون پارېه." (51) ان ايسو اوتا نته وډارنه کيدو: "هون تمون ټون نته هاس ئي هاس کونه، جي تمې آکاش کُلل ډيکشو ان پښتون رو آکاشي ډوتون نته مون منک ذات را ډيکرا ري کري پښتون ان منکون وسا او زاو کرتون پارشو."

ايسو پښتون رو ډيډل کوم کړه

قانا شهر موئين ويا مانه ايسو پيرهيون پرسو ډيکارته

2 ① ترتمه ډي گليل صوپا را قانا نومي شهر موئين هيک ويا هتو، ان ايسو رڼي مان اوئنه هتي. ② ان ايسو نته ان اوتا رو شيلون نته پښ ويا رڼي داوت هتي. ③ اوئنه ډراکون رو رس کتي ځيو تو. تيون ايسو ري مان اوتا نته کيدو: "ايئون کن ډراکون رو رس کتي ځيوه." ④ تيا مانه ايسو اپري مان نته کيدو: "مان، هائي تون مون نته کم کنه؟ مارته ساوو ټيا رو توئو هزون

هُودِي نه آيو. ⑤ تئيون اُوتا ري مان ويوا ۾ شيوا ڪريا وازون نئه ڪيڏو: ”جي ڪئين اُو تمون نئه ڪريا رو ڪئه اُو ڪرو.“

⑥ هُئنه اُوتنه يهُودي ڌرم ري ريت ڀرموئنه هات ڌويا هارُو سو ناڌون پڙي تي، جي پوئون ري ناوُل هتي. هر هيڪ ناڌ موئين پيڪ مڻ پوئي هماتو. ⑦ ايسُو شيواڌاريون نئه ڪيڏو: ”ناڌون موئين پوئي پرو پرو.“ تو اُوتي ناڌون نئه پوئي ٿي تهوتار پري پري. ⑧ تئيون ايسُو شيواڌاريون نئه ڪيڏو: ”هُئنه ايئون موئين ٿي پرين ويوا رو انتظوم ڪريا وازا نئه ڏيو.“ ان اُوتي امروم ڪريو. ⑨ زئيون انتظومي اُو پيڏو، تو پوئي ڌراڪون رو رس ٿيل هتو. انتظومي نئه ڪئين ڪهر نتئي جي اي ڌراڪون رو رس ڪيٽ ٿي آيوه، پڻ شيواڌاريون نئه، جيئي پوئي پريو تو، پُورئي ڪهر هتئي. تئيون انتظومي لاڏا نئه تيڙاوين ⑩ اُوتا نئه ڪيڏو: ”ٻڌائي منڪ ناوُڪو ڌراڪ رس مورمه پيئارُه، ان زئيون ٻڌائي پين ڪُش ٿه، تئيون رُوگُو جيوو تيوو ڌراڪ رس ڏه. پڻ تمي اي ٻڌون ٿي ناوُڪو ڌراڪ رس هزون هُودي راڪي ساڏيوه.“

⑪ ايسُو اي پيرهئون پرسو گليل صُوپا را قانا شهر موئين ڏيڪاڙيو، ان ايٺا نيشون ٿي اُوتنه وات ساوئي ڪرين ڏيڪاڙي جي اُو هاس ۾ پڳوون رو ڏيڪرو سته. ان اُوتا ري شيلي اُوتا مانه وشواس اوڻيو.

⑫ تيا ڪيڙ ايسُو آپري مان، آپرون پايون ان آپرون شيلون پيڙو ڪفرنحوم شهر موئين گيو. ان اُوتنه اُو ڪمينڪ ڏي ريا.

ايسُو پڳوون را گهر موئين ٿي واپار ڪريا وازون نئه ٻارا ڪايئُه

(متي 12:21-13، مرقس 15:11-17، لوقا 45:19-46، يُوحنا 2:13-22)


⑬ زئيون يهُودي ڌرم رئي پاشڪا نومي پرڀ ڏوڪڙي آوئي، تئيون ايسُو يروشلم شهر موئين پرڀ مانه گيو. ⑭ اُوتنه پڳوون را گهر ۾ اُوتنه واپاري پاڙيا جي ڳاڻو مال، رڍو مال ان پارو پڳوون را نوم مانه سڙايا هارُو ويستات ريا، ان

پئيه متيا واڙا پڻ پينل پاڙيا، جيا ڏون ۾ ڏيڏا هارو کاس پئيه متتات ريا. (15) تيام ايسو رونيوڙون رو هابڪو ناوين ائون ٻڌون واپاريون ننه رڍا مال ان گائو مال هتيلا پگيون را گهر ٿي پارا ڪاڍيا، ان پئيه متيا وازون رو ريزو اوڏاڙيو. پرو ان پائيا اوڏلايا پرا. (16) پارويا ويسيا وازون ننه اونه ڪيڏو: "ايئون ننه ايت ٿي هيڪل لي زائو. مارا ٻاپ را گهر ننه پڙئي مت ناوو!" (17) تئيون ايسو رون شيلون ننه شاستر رو اي ليڪ همپريو:

"تمارا گهر رو پريم، او ايشور، مارا من ۾ اتو پڙه

جي نيٺ مون ننه بازي نوڪشي."

(18) تئيون يهودي ڌرم ري آگيون ايسو ٿي پونسو: "ئون امون ننه ڪيو پرسو ڏيڪاڙهه جيا ٿي ٿاڀي ٿه جي ئون ننه هم ڪريا رو حق سئو؟" (19) تو ايسو ائون ننه وڙڏي ڏيڏي: "تمي ايئا مندر ننه ڪتم ڪرو پرو، ان هون ترئون ڏيئون ۾ وڙي ايئا ننه اوپو ڪريه پرو." (20) تيام آگيون ڪيڏو: "ايئا مندر ننه ناوتون چيتاليه ورهه ٿيا، ان ئون ترئون ڏيئون ۾ ايئا ننه وڙي اوپو ڪريه پرو ڪي؟"



(21) پڻ ايسو پگيون را گهر را پارام نئين، پڻ آڀرا شرير را پارام ڪيتوت ريو، جي اوتا رو شرير پگيون رو مندر سئو. (22) تيام زئون تيا ڪيڙ ايسو مرلون موئين ٿي جيوي اوليو، تئيون اوتا رون شيلون ننه ياد آيو جي ايسو آڀرا جيوي

اُونيا را پارام هم ڪيڏو تو، ان اُوئي شاستر ري وات مانھ ان ايسو ري ھايا ڪيڏل وات مانھ يقين راکيو.

ايسو منگون را پارام ٻڌوئي ڪئين زوڻھ

②3 زئيون ايسو پاشڪا پرڀ رڻه ٿوڻه يروشلم شهر ۾ زاتروئون وسا هتو، تتيون گهڻي منڪي ايسو را ڪرل ڪوم ان ڏيڪاڙل پرسا زوئين اونا مانھ يقين اوڻيو، جي ايسو پڳوون رو سونڊل پڇايا وازو ڪريست سڻه. ②4 پڻ ايسو رو اوئون منگون مانھ پروسو نتو. تيام ايسو اوئون ننه ساوڻه ڍاڙه نه ڪيڏو جي آپ ڪوڻ سڻه، ڪم تو اونا ننه ٻڌون منگون را پارام ڪبر هڻي. ②5 ايسو ننه اينا رڻي ڪئين ضرورت نٿي جي ڪوڪ اونا ننه ڪياڪ منڪ را پارام وٽاڙه، ڪم تو او آپ زوڻتو تو جي هر هيڪ منڪ را من موئين ڪي سڻه.



ايسو ان نيڪڊيمس

3 ① هوڻه فريسي پالتي رو هيڪ منڪ هتو جيا رو نوم نيڪڊيمس هتو. او يهودي ڌرم رو هيڪ آڳوون هتو. ② او رات رو ايسو ڪن آيو ان ڪيڏو: ”ڳرو جي، امون ننه ڪبر سڻه جي تمي پڳوون را پاها ٿي ميلل شيڪاڙيا وازا


سو، ڪم تو جيوڙا پڙسا ٿي ڏيکارڻو رڳو، اڃا پڙسا ڪوئي ڏيکارڻي نه هڪٿ جي ڀڳوون اُٿا رڻه پيلهه نه هوٿ.

③ ايسو اُٿا رو آيا رو مطلب زوئين اُٿا ننه ڪيڏو: ”هُون تمون ننه هاس ئي هاس ڪونه، ڪوئي منڪ ڀڳوون را راز موئين تئين هُڏي آوي نٿي هڪٿو، زئين هُڏي او ڀڳوون را پاها ٿي وڙي نه زلمهه.“ ④ نيڪڊيمس اُٿا ننه ڪيڏو: ”هُون تو ڏوڪرو سون. مارئي مان ڪم ڪرين مُون ننه وڙي زلمي هڪٿ؟ منڪ وڙي پڙي وارڪو مان را پيٽ موئين ٿي زلمائي هڪٿ ڪي؟“

⑤ تيا مانه ايسو اُٿا ننه ڪيڏو: ”هُون تمون ننه هاس ئي هاس ڪونه، ڪوئي منڪ ڀڳوون را راز موئين آوي نٿي هڪٿو، زئين هُڏي پوئي ٿي پوٽر سنون لين ان پوٽر آتما ٿي نوو ٿين نه زلمهه.“ ⑥ زئين ڪوڪ منڪون را پاها ٿي مان ٿي زلمهه تو اُٿا ننه رُوگي اي حياتي زڙهه، پڻ زئين ڀڳوون را پاها ٿي پوٽر آتما ٿي زلمهه تو اُٿا ننه ڀڳوون ٿي واسطو راکيا وازو جيون زڙهه. ⑦ ٿي ماري اينا ڪيڏل وات ٿي حيرون مت ٿيو جي تمون ٻڌون رڻه ڀڳوون را پاها ٿي وڙي زلم ليوو ڪپهه. ⑧ واٽيرو، جبال وٽهه، اول واهه. اُٿا رو شوشات تو هومپڙيام آهه پڻ ڪهر نٿي پڙئي جي ڪيٿ ٿي آهه ريو ان ڪيال زاهه ريو. پوٽر آتما پڻ همروم سهه. او آڀري مرضي پرموئنه منڪون ننه نوو جيون ڏهه. پوٽر آتما وگر نوو جيون نئين زڙهه.“ ⑨ تئين نيڪڊيمس پونسيسو: ”هائي واتون ڪم ڪرين ٿي هڪٿ؟“

⑩ تو ايسو اُٿا ننه ڪيڏو: ”ٿي تو اسرائيلي قوم را شيڪارڙيا وازا سو، ان تمون ننه هائون واتون را پارام ڪهر ئي نٿي؟ ⑪ هُون تمون ننه هاس ئي هاس ڪونه: امي او واتون ڪرونه جيون را پارام امون ننه ڪهر سهه، ان اوئون واتون ربي هاڪ پرونه جيون ننه امي اونڪيئي ڏيڪيه، پڻ ٿي منڪ امارئي پرل هاڪ نٿي مونتا. ⑫ مئين ڏنيا ري شينهنون را مثال ڏين تمون منڪون ٿي ايت ري واتون ڪري، پڻ ٿي ماري واتون نٿي مونتا، تو پسنه ڪم ڪرين ٿي مونشو جي

هُون آكاش ان پڳوون ري واتون ڪرون؟ ⑬ ڪوئي منڪ آڪاش ۾ پڳوون ڪن ڪيڏي نٿي ڳڀو. رُوڳڻي مُون نٿو اُوٽ رڻي ڪُهر سٺ، ڪم تو هُون منڪ ذات رو ڏيڪرو سون، ان آڪاش ٿي آول سون. ⑭ جيوئه نمونئه رڻ موئين موسيٰ منڪون نٿو پڇايا هارو پيتو رو هاپ لاکڙي مانھ ساڙين اونسو ڪريو تو، هيون نمونئه موٽهئ مُون منڪ ذات را ڏيڪرا نٿو پڻ ضرور اونسو ساڙشي، ⑮ زم هر هيڪ منڪ جيو مُون مانھ وشواس راڪئ، اُوٽا نٿو هميش رو جيون زڙئ.



⑯ وات اي سٺ: پڳوون ڏنيا رُون منڪون ٿي ايوو پريم ڪريو جي اُوٽه آڀرو ڏيڪرو ڏيڏو، جيو اُوٽا رو هيڪئ ڏيڪرو هتو، زم جي ڪوئي اُوٽا مانھ وشواس راڪئ اُو هميش ري سزا ٿي پڇي زائ، ان اُوٽا نٿو هميش رو جيون زڙئ. ⑰ ڪم تو پڳوون آڀرا ڏيڪرا نٿو ايٽا ڏنيا ۾ ايٽا هارو نه ميليو جي اُو ڏنيا رُون منڪون نٿو سزا ڏيڏا رو ڦينصلو ڪرئ، پڻ ايٽا هارو ميليوه جي اُوٽا ري ڪري ڏنيا را منڪ پڇي زائ.

⑱ جيو ايسو مانھ وشواس راڪئ، اُوٽا مانھ سزا رو ڦينصلو نٿي ٿيتو. پڻ جيو ايسو مانھ وشواس نٿي راڪتو، اُوٽا مانھ سزا رو ڦينصلو اڳي ٿيل سٺ، ڪم تو اُوٽه پڳوون را هيڪاه ڏيڪرا مانھ وشواس نه اوٿيو. ⑲ ان اي سزا رو ڦينصلو تيام ٿئ، ڪم تو ايسو سوجهرو ٿين ڏنيا ۾ آيو پڻ منڪون نٿو اندارو سوجهرا ٿي گهڻو وٿيو، ڪم تو اوئون را ڪوم ڪراپ هتا. ⑳ جيو ڪوئي ڪراپ ڪوم ڪرئ اُوٽا نٿو سوجهرو هاو نٿي وٿو، ان اُو سوجهرا ڪن نٿي آوتو متون اُوٽا را ڪراپ ڪوم ساوا نه ٿئ. ㉑ پڻ جيو منڪ هاسيون واتون مانھ وئ، اُو سوجهرا ڪن آوئ زم وات ساوئي ٿئ جي اُوٽا را ڪوم پڳوون ري مرضي پرمونئ ڪرل سٺ.

يُوحنا ايسُو را پارام وڙي ھاڪ پڙھ

22) تيا ڪيڙ ايسُو ان اُوتا را شيلا يهوديه صُوپا را ٻاراڙي را علاقا ۾ ڳيا، ان اُوتھ ايسُو اُوتون پيڙو ريو مڏيو ان منڪون نھ پويتر سنون ڏيوراوا مڏيو.

23) اُوتا وڪت ۾ يوحنا پڻ منڪون نھ پويتر سنون ڏيتوت ريو. اُو پيڙا ماڳ شاليم شهر ٿي ڏوڪڙو عينون نومي ماڳ ۾ هتو، ڪم تو اُوتھ ڳهڻو پوئي هتو، ان منڪ اُوتا ڪن آوين اُوتا ٿي پويتر سنون ليتات ريا. 24) اي ٻڌوئي ڪئين يوحنا رڻه جيل موئين پُورايَا مور ٿيو.

25) تيام يوحنا رون شيلون ان ڪياڪ يهودي منڪ وسا آيت ۾ پحث ٿئي، جي ڪيا ڪن پويتر سنون ليُوو ڪپڻه. 26) تيا مانھ شيلي يوحنا ڪن آوين ڪيڏو: ”ڳرو جي، اُو منڪ جي ڀرڊن ڌريا ٿي پرلير تمون پيڙو هتو جيا را پارام تمي ھاڪ پڙي ٿي، اُو هُوتھ منڪون نھ پويتر سنون ڏيوراوڻه ريو، ان ٻڌائي منڪ اُوتا ڪن زائھ ريا.“

27) تئين يوحنا ڪيڏو: ”ٻڌوئي ڪئين پڳوون ري هاڻي سڻه. جي پڳوون رڻي مرضي نه هُوت تو منڪ اُوتا هوما نه تڻاڻت. 28) تمون نھ ڪپر سڻه جي مئين ام ڪيڏو تو: ’هُون پڳوون رو سُونڍل پڇايا وڙو ڪريست ٿي.‘ پڻ پڳوون مُون نھ اُوتا مور ميليُوھ، جي هُون منڪون نھ اُوتا هوما ميلون. 29) مِثال، لاڏئي تو لاڏا رڻي سڻه. وسويو لاڏا رڻي وات زوڻه، ان زئين هومپڙه جي لاڏو آيوھ رو، تئين اُو ڪُش ٿئھ. هُوتھ هُون وسويا را زم ڳهڻو ڪُش سون ڪم تو جيا رڻي وات هُون زوتوت ريو اُو آيوھ رو، ان منڪ اُوتا ڪن زائھ ريا. 30) اُوتا رو مُون وڌو ڪپڻه، ان مارو مُون ڳهٽ ٿيوو ڪپڻه.“

ايسُو پڳوون را پاها ٿي آوَل سڻ

31) ايسُو جو پڳوون را پاها ٿي آڪاش ٿي آوَل سڻه اُو ٻڌون مانھ سڻه. يوحنا

جو دُنيا ٿي آوَل سَئِه اُو رُوڳو منڪ سَئِه ان منڪ ٿين واتون ڪرئِه. پڻ ايسُو جو آڪاش ٿي آوَل سَئِه اُو ٻڌون مانِه سَئِه. (32) اُوئِه جي ڪئين ڏيکيوه ان هومپڙيوه اُوئون واتون را پارام هاڪ پرين منڪون نئِه همپڙاوئِه، پڻ منڪ اُوئا ري واتون نٿي مونتا. (33) توڻي پڻ جيئنه ڪيئنه اُوئا ري واتون موني، اُوئِه ٿاڀيئي ڏيڏي جي پڳوون هاسو سَئِه. (34) ڪم تو ايسُو، جيا نئِه پڳوون ميليوه، اُو پڳوون ري واتون ڪرئِه. پڳوون اُوئا نئِه پويتر آتما ٿي پرپور ڪريوه، تيام اُو پڳوون ري واتون ڪرئِه. (35) پڳوون ٻاپ آڀرا ڏيڪرا ٿي پريم ڪرئِه ان اُوئِه ٻڌوئي ڪئين اُوئا را هات ۾ ڏيڏوه. (36) جو پڳوون را ڏيڪرا مانِه وشواس راکئِه اُوئا نئِه هميش رو جيون زڙل سَئِه، پڻ جو پڳوون را ڏيڪرا رو ڪيڏو نٿي مونتو اُوئا نئِه هميش رو جيون موزڳوئي نئين زڙئِه، پڻ پڳوون رئي سزا اُوئا مانِه هوشي.

ايسُو سامري قوم ري هيڪي اشيئري نئِه پوڻي رو مثال ڏين پويتر آتما را پارام هزماوئِه

4 ① فريسي پالتي ري منڪي هومپڙيو جي ايسُو يُوحنا ٿي وڌارئِه شيلا ڪرئِه ريو، ان اُوئا ٿي وڌارئِه منڪون نئِه پويتر سنون ڏئِه ريو. ② هاس ۾ ايسُو آپ منڪون نئِه پويتر سنون نٿو ڏيتو پڻ آڀرون شيلون ٿي ڏيوراوتو تو. ③ زئون پرپو ايسُو نئِه ڪهر پڙئي جي فريسي پالتي ري منڪي اي هومپڙيوه، تئيون اُو يهوديه صوپو ساڌين وڙي گليل صوپا هومو روونو ٿيو. ④ اُوئِه زايا هارو اُوئا رئِه سامريه علاقا ۾ ٿين مٽو تو.



⑤ تيام ويتون ويتون اُو سامريه را سُوخار نومي شهر ڪن آي پوگيو. هائي شهر اُوئا زمي ٿي ڏوڪڙو سَئِه جئي يعقوب آڀرا ڏيڪرا يوسف نئِه ڏيڏي ٿي. ⑥ اُوئِه يعقوب رئي نوراوَل ويرئي هئي. تيام ايسُو پنڌ ٿي ٿاڪين ويرِي مانِه

بيئو هئو. تئيون پهورون رو ٻارونڪ رو ٿوئو هئو.

⑦ تئو توتئو سامري قوم رئي هيڪ ڏوشي اوتا ويري مانھ پوئي پروا آئي، تو ايسو اوتا نئو ڪيڏو: ”ٻائي، مون نئو پوئي پيٿار.“ ⑧ ايسو را شيلو اوتئو توتئو شيمون ليوا شهر موئين گيا تا. ⑨ سامري قوم ري ڏوشي ايسو نئو ڪيڏو: ”تم يهودي سو، تم ي مون سامري قوم ري ڏوشي ٿي پوئي ڪم مونگوه ريا؟“ هئو يهودي قوم سامري قوم ٿي شپ راکئو. ⑩ تيا مانھ ايسو اوتا نئو ورنڌي ڏيئي: ”جي تون نئو ايتا وات رئي ڪبر هوت جي پگهون منڪون نئو ڪي ڏيا ڪرئ، ان اي پڻ ڪبر هوت جي هون تون ٿي پوئي مونگيا وازو ڪون سون، تو تون مون ٿي مونگت ان هون تون نئو جيوڙيا وازو پوئي ڏت.“ ⑪ تو ڏوشي اوتا نئو ڪيڏو: ”ساب، تمون ڪن پوئي ڪاڍيا هارو ڪوي نونڙو نئي ان ويرئي اونڌي سئو، تو پسئو تم ڪي ٿي آرو جيوڙيا وازو پوئي پرشو؟ ⑫ تم آرو آڀر آڀر نئو آڀر ڏاڏا يعقوب ٿي موٽا هزموه ڪي؟ اوتئو امون نئو اي ويرئي ڏيئي ٿي. او آڀر ايتا موئين ٿي پيتو، ان اوتا را ڏيڪرا ان اوتا رو مال پڻ ايتا موئين ٿي پيتو.“ ⑬ تيا مانھ ايسو اوتا نئو ڪيڏو: ”جو ڪوي اي پوئي پيئو اوتا نئو وري ترهئو لاگشي. ⑭ پڻ جو مارو ڏيڏل پوئي پيئو، تو اوتا نئو هميش هودي ترهئو ڪيڏي نئين لاگئو، پڻ مارو ڏيڏل پوئي اوتا موئين پتار را پوئي را زم نيهرتو ريشي، جيا ٿي اوتا نئو هميش رو جيون زڙشي.“

⑮ تئيون ڏوشي اوتا نئو ڪيڏو: ”ساب، هائي پوئي تم ي مون نئو ڏيو، زم مون نئو ترهئو نه لاگئو ان مارئو ايتئو پوئي پروا وري نه آوو پڙئو.“ ⑯ تو ايسو اوتا نئو ڪيڏو: ”زا ان آڀر آدمي نئو ايتئو تيڙي آو.“ ⑰ تيا مانھ ڏوشي اوتا نئو ڪيڏو: ”مارو آدمي سئو ئي نئين.“ تو ايسو اوتا نئو ڪيڏو: ”تون ئيڪ ڪئو رئي جي ٿارو آدمي سئو ئي نئين، ⑱ ڪم تو تئين پونس آدمي ڪرياه ان همئو جيا پيڙي تون رئو رئي او ٿارو آدمي نئي. تئين هاس ڪيڏو.“




⑲ ڏوشي اُٺا نٺه ڪيڏو: ”ساڏو جي، هَٽه هُن اوڙڪي گهيٺ جي ٽمي پڳوون رو نياپو ڏيڏا وازا سو، نڪا تمون نٺه هايا وات رڻي ڪبر نه پڙت. ⑳ هَٽه اماري سامري قوم را ڏاڏا هايا ڏونگر مانھ پُوزا ڪرتا پڻ ٽمي يهودي ڪوھ ريا جي پُوزا ڪريا رڻي صحيح جڳا يروشلم شهر موئين سٺه. هَٽه ٽمي مُون نٺه ڪو، ڪيٺه پُوزا ڪروو ڪپڻه؟“ ㉑ تو ايسو اُٺا نٺه ڪيڏو: ”ٻائي، ڏوم ٻوم رڻي وات ساڏ! مارڻي وات مون، اُو تُوڻو آوڻه ريو زئيون ٽمي نڪو هايا ڏونگر مانھ زائين نڪو يروشلم شهر موئين زائين پڳوون ٻاپ رڻي پُوزا ڪرڻو. ㉒ ٽمي سامري قوم وازا پڳوون رڻي پُوزا تو ڪروھ، پڻ اُٺا را پارام زوڻتا ٿي نٿي. پڻ امي يهودي تو پڳوون را پارام زوڻونھ جيا رڻي امي پُوزا ڪرونھ، ڪم تو پڳوون رو سُونڍل پڇايا وازو يهودي قوم موئين ٿي آيا وازو سٺه. ㉓ توڻي ايُوو تُوڻو آوڻه ريو پڻ هاو آوي پوگيوھ زئيون ھاسا پوزاري پڳوون ٻاپ رڻي پُوزا پوٽر آتما ري ڪڙا ٿي ان ھاسا من ٿي ڪرشي، ڪم تو پڳوون ٻاپ نٺه ايوو پوزاري وڻڻه. ㉔ پڳوون وائيرا را زم آتما سٺه. ان جيا منڪ اُٺا رڻي پُوزا ڪرڻه، اُوئون رڻه پوٽر آتما ٿي ان ھاسا من ٿي اُٺا رڻي پُوزا ڪروو ڪپڻه.“

㉕ تئيون ڏوشي اُٺا نٺه ڪيڏو: ”مُون نٺه تو ڪبر سٺه جي پڳوون رو سُونڍل

پڇايا وڙو مسيح آوڻه ريو، جيا نئه ڪريست ڪئڻ. زئيون او آوشي تئيون او
آپون نئه ٻڌوئي ڪئين همڀڙاوشي. "26 پسته ايسو اوئا نئه ڪيڏو: "هُون جي تون
ٿي ٻولونھ ريو، هُون او رو او سون."

27 اوڻه ٿوڻه ايسو را شيل پاسا آيا را ان او حيرون هتا جي ايسو ڏوشي ٿي
واتون ڪرڻه ريو. توڻي پڻ ڪيڻه ٿي ايسو ٿي نه پونسيو جي تمڻي اوئا ٿي ڪم
واتون ڪرڻه ريا ان تمارو اوئا ٿي ڪيو ڪوم سئ. 28 تئيون ڏوشي آڀرو گهڙو
ساڌين پاسي شهر ۾ گهي پري ان اوڻه زائين منڪون نئه ڪيڏو: 29 "هالو
هالين هڪا ايوا منڪ نئه زوڻو، جيڻه جي ڪئين مئين ڪريو او ٻڌوئي مون نئه



همڀڙايوھ پرو. هائي منڪ ضرور پگھون
رو سونڊل پڇايا وڙو ڪريست هوشي،
نا؟ 30 تيام منڪ شهر ٿي ٺيهرين ايسو
ڪن آوا مڏيا.

ايسو پاڪل قصل رو مثال ڏين ھزماوڻھ

جي همڻه منڪ وشواس اوڻيا هارو تيار سئ ان شيڪاڙيا رو توڻو سئ

31 تته ٿوڻه ايسو را شيل ايسو نئه منڻ ڪرتات ريا: "گرو جي، روڻي ڪائي
ليو." 32 پڻ ايسو اوڻون نئه ڪيڏو: "مون ڪن حياتي رو ايوو هيلو سئ، جيا
رئي تمون نئه ڪهر ٿي." 33 تيام شيل هڪا پڙا نئه ڪيو مڏيا: "گرو جي هارو
ڪوڪ کاڌا رو ڪئينڪ لايو تو، ڪي؟" 34 پڻ ايسو اوڻون نئه ڪيڏو: "ماري
حياتي کاڌا پڙا مانھ نه. پڻ ماري حياتي رو هيلو اي سئ جي هُون پگھون
ري مرضي مانھ وون جيڻه مون نئه ميليھ، ان اوئا رو ڏيڏل ڪوم پورو ڪرون.
35 تمون موئين اي ڪيڻي ٿي ڪي: 'هزون آڏا پڙيا سئ مئينا چار لبارا نئه.'
پڻ هون تمون نئه ڪونه ريو جي همڻه اونڪيون اوگهاڙين ڪيترون نئه
زوڻو، جي پوک پاڪيھ پري ان همڻه لبارا رو توڻو سئ. 36 اي او توڻو سئ

زئيون لئيارا آپري مزورئي لئه، ان ڏون پيڙو ڪرئ، زم ويا وازو ان لئيا وازو
 بي ئي پيڙا ڪش ٿئ. مطلب، همئنه منڪون نئه شيڪارڙيا رو ان هميش رو جيون
 ليڏا هارو پيڙا ڪريا رو ٿوئو سئ. (37) اي ڪيٽيئي هاسئي سئ جي 'هيك منڪ
 واوئ، پڻ پيڙو منڪ لئئ. (38) مئين تمون نئه او لئو ميلياھ، جيام تمي اگي
 ڪئين ڪوم نه ڪريو. پيڙي منڪي ڪوم ڪريو، ان تمي اوئون را ڪرل ڪوم
 رو ڦاڏيو ليوھ ريا."

(39) اوئا شهر ري گهڻي سامري قوم وازي يقين ڪريو جي ايسو پگھون رو
 سونڊل پڇايا وازو ڪريست سئ. ڪم تو اوئ ڏوشي اوئون نئه هاک پرين ايسو
 را پارام ڪيڏو تو: "مئين جي ڪئين ڪريو، اوئ منڪ ٻڌوئي مون نئه همپڙايوھ
 پرو." (40) تيام زئيون سامري قوم را منڪ ايسو ڪن آيا، تئيون اوئي ايسو نئه
 آپ ڪن ريا رئي منٿ ڪري، ان ايسو اوئون ڪن ٻي ڏي ريو. (41) ان پيڙي گهڻي
 منڪي ايسو ري واتون هومپڙين اوئا مانھ وشواس اوئيو. (42) او اوئا ڏوشي نئه
 ڪيو مڏيا: "هوئ امي ٿاري ڪيڏل وات ري ڪري نئين پڻ ايئا ري ڪري وشواس
 راکونه، ڪم تو امي آپ اوئا ري واتون هومپڙيھ، ان امون نئه ڪبر سئ جي او
 هاس ۾ ڏنيا رون منڪون نئه تارڻ ڏيڏا وازو سئ."

ايسو هيك سرڪاري منڪ را ڏيڪرا نئ هازو هورو ڪرئ

(43) سامريه علاقا ۾ ٻي ڏي رين ايسو گليل صوپا هومو روونو ٿيو. (44) هوئ
 ايسو آپ اگي ڪيڏو تو: "پگھون رو نياپو ڏيڏا وازو رو آپرا ڏيھ ۾ مون نئي
 ٿيتو." (45) تيام زئيون او آپرا گليل صوپا موئين پاسو آيو، تو اوٿ را منڪ اوئا
 ٿي ڪشي ٿي مڙيا، پڻ روڳا اوپرليا من ٿي. ڪم تو او پڻ يروشلم شهر موئين
 پاشڪا پرپ مانھ ڳيا تا، ان اوئي ٻڌوئي ڪئين پاڙيو تو جي ايسو اوئنه پرپ
 مانھ ڪيو پرسا ڏيڪارڙيا تا.

(46) ايسو گليل صوپا را قانا شهر موئين وڙي آيو جيئنه اوئ پوئي ٿي ڌراڪون

رو رس نايو تو. هَوَئِه سرڪار رو هيڪ ساپ هتو جيا رو ڏيڪرو ڪفرنحوم شهر ۾ مونڌو هتو. (47) زئيون اَوَئِه هومپزيو جي ايسو يهوديه صوپو ساڏين ايئته گليل صوپا موئين آيوه رو، تئيون ايسو ڪن آوين اَوَئِه نئه منٿ ڪري: ”ميريونئي ڪرين هالو، ان مارا ڏيڪرا نئه هازو هورو ڪرو.“ اَوَئِه ام ڪيڌو ڪم تو اَوَئِه رو ڏيڪرو مريا مانه هتو. (48) تيام ايسو اَوَئِه نئه ڪيڌو: ”تمي منڪ پرسا ان نيشون زويا وگر مون مانه وشواس نئين راکو.“ (49) توئي پڻ حڪومت رئه ساپ ايسو نئه ڪيڌو: ”ساڏو جي، هالو، نڪا مارو سوڪرو مري زاشي.“ (50) پسئه ايسو اَوَئِه نئه ڪيڌو: ”تمي آپري گهري زائو. تمارو ڏيڪرو هَوَئِه نئين مرئه.“ ساپ ايسو ري ايٿا ڪيڏل وات مانه يقين راکيو ان آپرا گهر هومو روونو ٿيو.

(51) اَوَئِه ساپ پاسو آپري گهري زاتو تو، تئيون اَوَئِه را نوڪر رستا ۾ نياپو لين آتون اَوَئِه نئه پيڙا ٿيا ان ڪيڌو: ”تمارو سوڪرو مريا ٿي پچي ڳيوه.“ (52) تيام ساپ نوڪرون ٿي پونسو: ”سوڪرو ڪيئه ٿوئنه نيڪ ٿي ڳيو؟“ تو اَوَئِه ڪيڌو: ”ڪال پورون رو هيڪ واڳي، اَوَئِه رو تاو اوتري ڳيو تو.“ (53) تئيون ٻاپ هزمي ڳيو جي سوڪرو اَوَئِه ٿي هاڳي ٿوئنه نيڪ ٿي ڳيو تو، جيئه ٿوئنه ايسو اَوَئِه نئه ام ڪيڌو تو: ”تمارو ڏيڪرو هَوَئِه نئين مرئه.“ ان اَوَئِه ساپ ايسو مانه وشواس اوٿيو ان اَوَئِه ري گهر ري ٻڌي منڪي پڻ وشواس اوٿيو.

(54) هيوئه نمونئه ايسو يهوديه صوپو ساڏين گليل صوپا موئين آوين وڙي پيڙي وار پرسو ڏيڪاڙيو، ان هم نيشون ڏيڌو جي اَوَ ڪوڻ سئه.

پويتر ڏي رو ايسو هڪا رُونڳڙا نئه هازو ڪرئه

5 ① تيا ڪيڙ يهوديون رئي هيڪ پرڀ آوئي، تيام ايسو يروشلم شهر ۾ پرڀ مانه ڳيو. ② هَوَئِه يروشلم ۾ ريڊيون واڙا دروازا ڪن هيڪ تڙاو سئه، جيا نئه عبراني ٻولي ۾ بيت حسدا ڪئھ. اَوَئِه تڙاو رئه پيوڙي پونس پڪا ڍاڙيا

سٺه. ③ ڏاڙيون هيٺ الاهي گهڻا اونڌا، پونگڙا، رُونگڙا ان هيو ا پيمار منڪ پڙيا تا. (اُو تڙا وِ پوڻي ڏگيا رڻي وات زوتا تا، ④ ڪم تو ڪيڏيڪ ڪيڏيڪ ايشور را پاها ٿي آڪاشي دُوت آوتو ان پوڻي نئه ڏگاوتو. جيو پوڻي ڏگيا رئه توتئه ٻڌون مور موئين اُوترتو، اُوتا نئه ڪيوئي پڻ پيمارئي هوئيئي اُو هازو هورو ٿي زاتو.)

⑤ اوتئه هڪ منڪ هتو، جيو انٽيه سالون ٿي پيمار پڙيو تو. ⑥ ايسو اوتئه آوين هايا منڪ نئه پڙيو پاڙيو، ان اي زوئين جي اُو گهڻا وڪت ٿي ايوِي حالت ۾ سٺه، اُوتا نئه پُونسيو: ”ڪي تمي هازا هورا ٿيا ڪرو؟“ ⑦ تئين اوتئه ايسو نئه ڪيڏو: ”ساب، مُون ڪن ڪوئي ايوو منڪ نئي، جيو مُون نئه پوڻي ڏگيا رئه توتئه هازو هورو ٿيا هارو تڙا وِ موئين اُوتارئه. مارئه اوتئه پوگيا مور پيزو ڪوڪ نيسو اُوتري زائھ.“ ⑧ ايسو اُوتا نئه ڪيڏو: ”اُونين اُوپو، آپرو پاٿرئو اُوپاڙو ان وو.“ ⑨ ان جهٽ ۾ اُو منڪ هازو هورو ٿيو، ان آپرو پاٿرئو اُوپاڙين ويوا مڏيو.

جيڏي هائي وات ٿئي، اُو ڏي پوِتر ڏي هتو. ⑩ تيام يهودي ڌرم را آگهيون هازا ٿيل منڪ نئه ڪيا مڏيا: ”آز پوِتر ڏي سٺه، ان ڌرم پرموتئه ٿارئه پاٿرئو آز نه لي زاوو، ڪم تو پوِتر ڏي رو ڪئين ڪوم نه ڪرو.“ ⑪ پڻ هازئه ٿيل منڪ اُوتون نئه جواب ڏيڏو: ”اُو جيئنه مُون نئه هازو هورو ڪريوه، اوتئه مُون نئه ڪيڏوه جي آپرو پاٿرئو اُوپاڙو ان وو.“ ⑫ تو آگهيوني هازا ٿيل منڪ ٿي پُونسيو: ”اُو منڪ ڪيو سٺه، جيئنه تُون نئه پاٿرئو اُوپاڙيا رو ان وُڍا رو ڪيڏوه؟“ ⑬ پڻ هازا ٿيل منڪ نئه ايٿا رڻي ڪئين ڪهر نئي جي اُو ڪيو سٺه، ڪم تو اُوتا ماڳ گهڻا منڪ هتا ان تيام ايسو اوت ٿي گيوت پرو.

⑭ تيا ڪيڙ ايسو هازا ٿيل منڪ نئه پگهون را گهر موئين پيڙو ٿيو، ان اُوتا نئه ڪيڏو: ”زوئو، هَوئه تمي هازا هورا ٿي گياھ. تمي هَوئه وڙي ڪراپ ڪوم مت ڪريا، نڪا پگهون را پاها ٿي تمون نئه سزا زڙشي، ان تمارئي حالت

موروكي حالت ٿي وڌارڻه ڪراپ ٿيڻي.

⑮ تئين هازو ٿيل منڪ گپو پرو ان زائين يهودي ڌرم رون آگپونون نئه ڪيڏو: ”او منڪ ايسو سئه، جيئنه مون نئه هازو هورو ڪريوه.“

⑯ تيام يهودي ڌرم را آگپون ايسو نئه تنگ ڪروا مڌيا ڪم تو او هيو ڪوم پويتر ڏي رو ڪرتوت ريو. ⑰ پڻ ايسو اوئون نئه اي جواب ڏيڏو: ”روز روز مارو ٻاپ پگهون هزون هودي ڪوم ڪرتو رئه، ان هون پڻ ڪوم ڪرتو ريونه.“

⑱ تيام يهودي ڌرم را آگپون ايسو نئه نمو ماريا رئي وڌارڻه ڪوشش ڪروا مڌيا، ڪم تو او نه روگو پويتر ڏي مانه ڪوم ڪرين اوئون ري نظر ۾ ڌرم نتو پاڙتو، پڻ پگهون نئه آپرو ٻاپ ڪين آپ نئه پگهون هرڪو پڻ ڪرتوت ريو.

پگهون ٻڌوئي ڪئين آپرا ڏيڪرا ايسو ري هاڻي ڏيڏوه

⑲ تيا مانه ايسو يهودي ڌرم رون آگپونون نئه ڪيڏو: ”هون تمون نئه هاس ئي هاس ڪونه: ڏيڪرو آپرا پاها ٿي ڪئين نٿي ڪري هڪتو. او روگو او ڪري هڪتو جو آپرا ٻاپ نئه ڪرتو پاڙهه. ايونه نموننه زم مارو ٻاپ پگهون ڪرڻ هون ڏيڪرو پڻ امروم ڪرونه. ⑳ ڪم تو پگهون ٻاپ مون ڏيڪرا ٿي پريم راکهه، ان جي ڪئين او آپ ڪرڻه او ٻڌوئي مون نئه ڏيڪارڻه. او هايا ٿي پڻ موتا ڪوم مون نئه ڪريا هارو ڏيڪارڻي، جيون نئه تمي منڪ زوئين حيرون ٿي زاشو. ㉑ ڪم تو زم پگهون ٻاپ مرلون نئه جيوي اوناڙهه ان جيون ڏهه، تم هون ڏيڪرو جيون نئه ڏيو ڪرونه اوئون نئه حياتي ان جيون ڏيونه. ㉒ پگهون ٻاپ ڪيا رو نيا نٿي ڪرتو، پڻ اوئه مون ڏيڪرا مانه نيا ڪيا رو ٻڌوئي ڪوم ساڏيوه، ㉓ زم ٻڌائي منڪ مون ڏيڪرا نئه ايون مون ڏهه جيون مون او پگهون ٻاپ نئه ڏهه. جيو مارو مون نٿي راکتو، او مارا ٻاپ رو مون نٿي راکتو جيئنه مون نئه ميليوه.

④ هون تمون نئه هاس ئي هاس ڪونه: جيو منڪ مارو وچن موننه ان پگهون

مانه وشواس راڪڻه جيئڻه مُون نئه ميليوه، اُونا نئه هميش رو جيون زڙل سئ، ان اُونا مانه هميش را موت ري سزا رو ڦينصلو نئين ٿئ. اُو تو هميش را موت ٿي پڇي گيوه، ان اُونا نئه هميش رو جيون زڙيوه.

②5 هُون تَمون نئه هاس ئي هاس ڪونه: اُو توتو آوئ ريو پڻ هاو آوي پوگيوه، زئون مرل منڪ مُون پگيون را ڏيڪرا رو هاڏ هومپڙشي ان جيا ماري واتون مونئ اُو جيوتا ٿيشي. ②6 ڪم تو پگيون پاپ مُون ڏيڪرا نئه اي حق ڏيڏوه جي زم اُونا ٿي جيون زڙئ ته مُون ٿي پڻ جيون زڙئ. ②7 ان اُونه مُون نئه نيا ڪريا رو حق ڏيڏوه ڪم تو هُون اُو هاڳي منڪ ذات رو ڏيڪرو سون جيا نئه اُونه راز ڪريا هارو سونديوه.

②8 هايا وات مانه تمي حيرون مت ٿيو، ڪم تو ايوو توتو آوشي زئون مرل منڪ ٻڌائي مقومون موئين مارو هاڏ هومپڙشي، ②9 ان ٻڌائي جيوتا ٿيشي ان مقومون موئين ٿي نيهرِي آوشي. جيئي ناٿوڪا ڪوم ڪريا هوشي، اُو هميش رو جيون ليڏا هارو جيوي اُونشي. ان جيئي ڪراپ ڪوم ڪريا هوشي، اُو نيا پرموئئ هميش ري سزا هارو جيوي اُونشي.

پگيون گهڻون نمونون ٿي ٿايتي ڏئ

جي ايسو اُونا رو ڏيڪرو سئ

③0 ”هُون آپرا پاها ٿي ڪئين ٿي هڪتو. زم پگيون مُون نئه نيا ڪريا رو ڪئ، ته هُون اُونا را ڪيڏا پرموئئ نيا ڪرونه. ان هُون انصاف ٿي ڦينصلا ڪرونه، ڪم تو هُون مارئي مرضي نئين پڻ پگيون رئي مرضي پوري ڪروا ڪرونه، جيئڻه مُون نئه ميليوه.

③1 جي رُوگو هُون آپرا پارام هاڪ پرونت، تو ڪئين ٿايتي نه ٿئ جي مارئي هاڪ هاسئي سئ ڪا نا. ③2 پڻ پيزو ڪوڪ سئ جي مارا پارام هاڪ پرئ، ان مُون نئه ڪبر سئ جي اُونا رئي پرل هاڪ مارا پارام ٿايتي سئ.

③③ ٽمي تو يُوحنا ڪن منڪون نٿه پُونسوا ميليا ان اُوٿه مارا پارام هاسئي هاڪ پريئي. ③④ مُون نٿه منڪون ري پرل هاڪ رئي ڪئين ڪاڀي نٿي، توئي پڻ هُون يُوحنا ري پرل هاڪ رئي وات ڪرونه، زم ٽمي اُوٿا رئي پرل هاڪ مونين مُون مانه وشواس اوٿو ان پڳوونَ ري سزا ٿي پڇي زائو. ③⑤ يُوحنا ٻڙتا ڏيو را زم هتو ان منڪون نٿه سوجهرو ڏيتو، ان ٽمي ٿوڙيڪ وار هُوڏي اُوٿا را ڏيڏل سوجهرا ۾ ڪُش هتا.

③⑥ پڻ مارا پارام هيڪ ٻيڙي هاڪ سٿه جي يُوحنا ري هاڪ ٿي پڻ موٽي سٿه. اُو اي سٿه: جيا ڪوم پڳوونَ ٻاپ مُون نٿه پُورا ڪريا هارو ڏيڏاه، اُو هاڳي ڪوم هُون ڪرونه ريو، ان اُو ڪوم آپ مارا پارام هاڪ پريئ، ڪم تو ايئون ڪومون ٿي ٿايتي ٿهه جي پڳوونَ ٻاپ مُون نٿه ميليوه.

③⑦ ان پڳوونَ ٻاپ پڻ جيئنه مُون نٿه ميليوه، اُوٿه آپ مارا پارام هاڪ پريئ. ٽمي اُوٿا رو آواز ڪيڏي نٿي هومپڙيو، نڪو اُوٿا رو روپ ڏيڪيوه، ③⑧ ان

نڪو ٽمي اُوٿا رو وچن من موئين راکوه، ڪم تو ٽمي مارئي وات نٿي مونتا جيا نٿه اُوٿه ميليوه.

③⑨ ٽمي شاستر ري نوني نوني واتون ڏيون ڏين

پٿوه، ڪم تو ٽمي هزموه جي شاستر ٿي تمون

نٿه هميش رو جيونَ زڙشي. ان اُو هاڳي شاستر

مارا پارام هاڪ پريئ جي هميش رو جيونَ مُون

ڪن سٿه، ④⑩ توئي پڻ ٽمي هميش رو جيونَ ليڏا


هارو مُون ڪن اُوٿا ٿي نٿي.

④① هُون منڪون ٿي آڀرا وڪوڻ ڪراووا نٿي ڪرتو، ④② پڻ هُون تمارا پارام

زوٽونه جي ٽمي من موئين پڳوونَ ٿي پريم نٿي راکتا. ④③ هُون مارا ٻاپ پڳوونَ


را پاها ٿي اُوٿا رو مونَ وڌاريا هارو آيوه، توئي پڻ ٽمي مارئي وات نٿي مونتا.

پڻ جي پيزو ڪوڪ آڀرا پاها ٿي آڀرو مونَ وڌاريا هارو آوٿه، تو اُوٿا رئي وات



٤٤) ٽمي ضرور مونشو. ٽمي رُوڳا هيڪا پيڙا ٿي وڪوڻ ڪراووا ڪروھ، پڻ ايوو ڪئين ڪريا رڻي ڪوشش نٿي ڪرتا جيا ٿي هيڪڻھ پڳوون تمون نٿھ وڪوڻھ. تو پستھ ٽمي ڪم ڪرين پڳوون رڻي وات موني هڪشو؟

٤٥) ٽمي ام مت سوچو جي هُون پڳوون ٻاپ ڪن تمارو ڏوھ ڪاڍيھ. جيو تمارو ڏوھ ڪاڍشي، اُو مُوسيٰ آپ هوشي، جيا مانھ ٽمي آسريو راکوھ. ٤٦) مُوسيٰ تمارو اي ڏوھ ڪاڍشي جي ٽمي اُوڻا رڻي لڪل وات نہ مونئي، ڪم تو جي ٽمي مُوسيٰ رڻي لڪل وات مونوت، تو مارئي وات پڻ مونوت، جيا را پارام اُوڻھ لکيوھ. ٤٧) پڻ ٽمي مُوسيٰ ري لڪل واتون نہ مونتا، تو پستھ ماري واتون ڪم ڪرين مونشو؟



ايسو پونس هزار ٿي وٽارءُ منڪون نءُ روتئي ڪوراوئھ

(متي 21-13:14، مرقس 30:6-44، لوقا 9:10-17، يُوحنا 1:6-15)

6 ٽيا ڪيڙ ايسو گليل ري ڍنڍ رءُ پرلته پاهنه ڳيو، جيا نئه تيرياس رڻي ڍنڍ پڻ ڪئھ. ٢) ان الاهي گهڻا منڪ ايسو وونهڙ ويتا ريتا، ڪم تو اُوئي ايسو را پرسا پاڙيا تا جي اُو مونڊون نئه هاڙا هورا ڪرئھ. ٣) ايسو ڏونگر مانھ

سٽرينَ آپرون شيلون پيڙو پيڻو هئو. ④ هَوَئِه يَهُودِي ڌرم رَئي پاشڪا پرَپ آيا وارَئي هَتَئي.

⑤ پَسَئِه ايسُو هومو زويو، تو الاهي گهڻون منڪون نئه آپ ڪن آوتون پاڙيا. تيام اُوئِه فِلپُس ٿي پُونسيو: ”هايون منڪون نئه ڪُورايا هارُو آبي روتي ڪيٺ ٿي ويساتي ليشون؟“ ⑥ اُوئِه فِلپُس رو آڙمتو ليڏا هارُو هم پُونسيو جي اُو ڪي ڪئو، ڪم تو ايسُو نئه اڳي ڪهر هَتَئي جي هُون ڪي ڪريو. ⑦ تو فِلپُس اُوئا نئه وڙندَئي ڏيڏَئي: ”ڏه هزار رُوپيون ري روتي هوئَت توتِي پڻ هايون ٻڌون نئه پوري نه ٿئَت، جي هر هيڪ نئه ٻٽڪو ٻٽڪو اُوئِه.“

⑧ تئيون ايسُو رون شيلون موئين ٿي هيڪئِه، شمعُون پطرس رئه پائي اندرياس، ايسُو نئه ڪيڏو: ⑨ ”ايئِه



هيڪ سوڪرو سئِه جيا ڪن پونس زوون ري روتي ان ٻي مشي سئِه، پڻ اتون گهڻون منڪون هارُو هايَا ٿي ڪي

ٿيشي؟“ ⑩ پَسَئِه ايسُو ڪيڏو: ”منڪون نئه کاڌا هارُو پيهارو.“ هَوَئِه اُوئا ماڳ گهڻي سهر هَتَئي، تيام اُو سهر مانھ پينا هئا. اُوئِه پونسڪ هزار رُوڳا آڏمي هئا. ⑪ تئيون ايسُو اُو روتي ليڏي، ان اُوئون هارُو پڳوون رو ٿورو موين پينل منڪون نئه ورايا هارُو شيلون نئه ڏيڏي. ان همروم ٿورو موين مشي پڻ ڏيڏي. منڪون نئه زتو وٺيو، اتو ڏيڏو.

⑫ زئيون منڪ ڪائين ڌراپيا، تئيون ايسُو آپرون شيلون نئه ڪيڏو: ”اُوڳارل ٽڪرا پيڙا ڪرو، زم ڪئين ازايو نه زائِه.“ ⑬ تيام شيلي روتيون را ٽڪرا پيڙا ڪريا جي کاڌا واري اُوڳاريا تا، ان اُوئون پونسون زوون ري روتيون رون اُوڳارل ٽڪرون ٿي شيلي ٻارئِه ڇپا پريا.

⑭ تيام منڪ ايسُو رو اي ڏيڪاڙل پرسو پاڙين ام ڪيوا مڌيا: ”اي تو هاس ۾ اُو رو اُو پڳوون رو نياپو ڏيڏا وازو سئِه جيو شاستر پرموئِه ڏنيا موئين آيا

وازو سئ. " ⑮ ايسو اي وات زوتتو تو جي منک اوتا ننه زوري زهالين آپرو
پادشا ناوا ڪرڻ ريا، تيام ڏونگر مانھ پيزيل ڪيٽڪ هيڪلو گيو پرو.

ايسو پوڻي مانھ وٺھ

(متي 14:22-33، مرقس 6:45-52، يُوحنا 6:16-21)

⑯ زئيون هونز ٿئي، تئيون ايسو را شيلا ڏونگر ٿي نيسا اوترين ڍنڍ مانھ ڳيا.
⑰ ان اوتھ پيڙي مانھ سترين پاسا ڍنڍ رٽھ پيڙھ پاهئھ ڪفرنحوم شھر ھوما
زاوا مڏيا. ھوئھ رات پڙي ڳئي تئي ان ايسو ھزون ھوڏي اوتون ڪن پاسو نٽو
آيو. ⑱ تھ توتھ گھڻو وائيو واتوت ريو ان ڍنڍ رو پوڻي گھڻو اوتل پاتل
ٿيتوت ريو. ⑲ زئيون اوتھ پيڙي ڏيون ٿي ڏوڍ ڪا ھي ڳاڻو ھاڪلي، تئيون
اوتھ ايسو نھ ڍنڍ را پوڻي مانھ ويتون پيڙي ڏوڪڙو آپ وونھڙ اوتون پاڙيو،
ان او گھڻا پيڻائي ڳيا. ⑳ پڻ ايسو اوتون نھ ڪيڏو: "تمي پيڻائو مت، اي ھون
سون." ㉑ تيام اوتھ ايسو نھ ڪشي ٿي پيڙي ۾ بيهاريو. تئيون يڪدم پيڙي
پيڙھ ڪپ پوڳي ڳئي جيئھ اوتون رٽھ زاوو تو.

منک ايسو نھ ڳوتھ

㉒ پيڙھ ڏي جيا گھڻا منک گليل ڍنڍ رٽھ پرلھ پاهئھ ري ڳيا تا، او ھزمي
ڳيا جي ڪالي ايئھ روڳئي هيڪ پيڙي ھئي ان ايسو آپرون شيلون پيڙو اوتا
پيڙي موئين نٽو سڙيو، پڻ شيلا روڳا هيڪلا ڳيا تا. ㉓ تئيون ڪئينڪ پيڙي
تبرياس شھر ٿي اوتا ماڳ ڏوڪڙي آوي، جيئھ پريو ايسو روتيون ھارو ٿورو
مونيو تو ان منکي روتي ڪاڏي تي. ㉔ زئيون ٻڌي منکي زويو جي ايئھ نڪو
ايسو سئھ نڪو اوتا را شيلا، تئيون او ھايون پيڙيون موئين سترين ايسو ري ڳوت
۾ ڪفرنحوم شھر ھوما روونا ٿيا.

ايسو روٽي رو مثال ڏين هزماوئھ جي رُوڳو اُو هميش رو جيون ڏيڏا وارو سئ

(25) زئيون ڍنڍ پار ڪرين منڪي ايسو نئھ ڪفرنخوم شهر ۾ ڳوٺي ليدو، تئيون اُوئي ايسو نئھ پونسيو: ”ڳرو جي، تم ايتھ ڪئين آياھ؟“

(26) تيا مانھ ايسو اوئون نئھ ڪيڏو: ”هُون تمون نئھ هاس ئي هاس ڪونھ: تمي مُون نئھ ايتا هارو نئي ڳوتتا جي تمي مارون ڏيڪاڙل پرسون رو مطلب هزمياھ، پڻ مُون نئھ ايتا هارو ڳوتوھ ريا جي تمي روٽي ڪائين ڌراپيات پرا. (27) آپري پوري ڪوشش ايو ڪاڏا هارو مت ڪرو جي ڀڳري زائھ، پڻ ايو ڪاڏا هارو آپري پوري ڪوشش ڪرو جي هميش نيڪ رئھ، ان جيا ٿي هميش رو جيون زڙئھ. هائي ڪاڏو هُون منڪ ذات رو ڏيڪرو تمون نئھ ڏيھ، ڪم تو ڀڳوون ڀاپ مُون نئھ ايتا ڪوم هارو سونڊيوھ.“

(28) تئيون اُوئي ايسو ٿي پونسيو: ”هائي ڪاڏو ليڏا هارو امارئھ ڀڳوون ري مرضي پرموتھ ڪي ڪرو؟“

(29) تو ايسو وڙنڌي ڏيڏي: ”ڀڳوون ربي مرضي اي سئھ، جي تمي مُون اوترا ڙا ميلل منڪ مانھ وشواس راکو.“

(30) تيام اُوئي ايسو ٿي پونسيو: ”ثايتي هارو تمي ڪيو پرسو ڏيڪاڙوھ، جيا نئھ زوئين امي تمون مانھ وشواس اوئون؟ تمي ڪيو ڪوم ڪرشو؟ (31) مُوسي را وڪت ۾ آپتي ڀاپ ڏاڏي رڻ ۾ پرسا ٿي اول منا نومي روٽي ڪاڏي تي، زم شاستر ۾ لڪل سئھ:

’اوتھ ڪاڏا هارو اوئون نئھ آڪاش ٿي روٽي ڏيڏي.

هوتھ مُوسي تو آڪاش ٿي روٽي ڏيڏي تي، تو پسئھ تمي ڪيو پرسو ڏيڪاڙشو؟“

(32) تيام ايسو اوئون نئھ ڪيڏو: ”هُون تمون نئھ هاس ئي هاس ڪونھ: مُوسي

تمون نئه آڪاش ٿي هاسئي روٽئي نتئي ڏيڏئي. پڻ مارو ٻاپ سئه جي تمون نئه آڪاش ٿي هاسئي روٽئي ڏئه، (33) ڪم تو پڳوون رئي ڏيڏل روٽئي او سئه جيئي آڪاش ٿي اول سئه ان دنيا رون منڪون نئه جيواڙئه.

(34) تو اوئي ايسو نئه ڪيڏو: "ساڏو جي، هائي روٽئي امون نئه هميش ڏيتا ريو."

(35) تئيون ايسو اوئون نئه ڪيڏو: "جيواڙيا واڙئي روٽئي هون سون. ايئا حياتي رئي روٽئي کاڌا ٿي منڪون نئه ڪيوو ڦاڻيڏو؟ او وڙي پوکا ان ترها ٿئه. پڻ جيو مون ڪن اوئه ان مون مانه وشواس راکئه، هون اوئا نئه هميش رو جيون ڏيه. (36) پڻ زم مئين تمون نئه اڳي ڪيڏوه، تمي مون نئه ڏيڪيوه تويي پڻ مون مانه وشواس نئي راکتا. (37) زتا منڪ مارو ٻاپ مون نئه ڏئه، او ٻڌائي مون ڪن آوشي. ان جيا مون ڪن اوئه، اوئون نئه هون ڪيڏي آپ ٿي ڌار نئين ڪرون. (38) ڪم تو هون آڪاش ٿي ايئا هارو آيوه جي مارئي مرضي نئين، پڻ پڳوون رئي مرضي پوري ڪرون جيئن مون نئه ميليوه. (39) مون نئه ميليا واڙا رئي مرضي اي سئه، جي زتا منڪ اوئه مون نئه ڏيڏاه، اوئون موئين ٿي هڪا نئه پڻ ڌار نه پڙوا ڏيون، پڻ پڇاڙي ۾ نيا رئه ڏي اوئون نئه وڙي جيوي اوئاڙون. (40) ڪم تو مارا ٻاپ رئي مرضي اي سئه، جي زتا منڪ مون ڏيڪرا نئه اوڙڪهه ان مون مانه وشواس اوئه، اوئون نئه هميش رو جيون زڙه ان هون پڇاڙي ۾ نيا رئه ڏي اوئون نئه وڙي جيوي اوئاڙون."

(41) تيام يهودي ڌرم را منڪ ايسو مانه ٻرڙوا لاڳيا ڪم تو اوئه ڪيڏو تو: "آڪاش ٿي اول روٽئي هون سون." (42) او ڪيو مڏيا: "هائي منڪ يوسف رو ڏيڪرو ايسو نتئي ڪي؟ آبي اوئا رون مائيترون نئه اوڙكونه ريا. تو پسئه او ڪم ڪرين ڪه جي هون آڪاش ٿي اول سون؟"

(43) تيا مانه ايسو اوئون نئه ڪيڏو: "آپت ۾ مارئي ڳلا مت ڪرو. (44) ڪوئي منڪ پڳوون ري مرضي وڳر مون ڪن آوي نئي هڪتو. مارو ٻاپ پڳوون جيئن

مُون نئه ميليوه، اُو منكون نئه مُون كن آيا رئي مرضيي دئه، ان هُون پچاڙي ۾ نيا رئه ڏي اُوئون نئه وڙي جيوي اوناڙيه. (45) پڳوون رو نياپو ڏيڌا واڙون را لکل شاستر موئين ام لکل سئه:

‘هڏائي منک پڳوون ٿي شيڪشي.’

زتا منک پڳوون ٻاپ ري واتون هوميرين اونا ٿي شيڪشه، اُو هڏائي مُون كن آوئه. (46) ام نئي جي ڪئڪ پڳوون ٻاپ نئه ڏيڪيوه. پڻ رُوڳو هُون جي پڳوون ٻاپ را پاها ٿي اول سون، مئين پڳوون ٻاپ نئه ڏيڪيوه. (47) هُون تمون نئه هاس ٿي هاس ڪونه: جو مُون مانھ وشواس راکشه، اونا نئه هميش رو جيون زڙل سئه. (48) جيوڙيا واڙي روئي هُون سون. (49) اُو منا نومي روئي جيا نئه تماري ٻاپ ڏاڏي رڻ ۾ کاڌي ٿي، اُو جيوڙيا واڙي نئي. ڪم تو اُوئي منا کاڌي ٿي توئي پڻ اُو هڏائي مري ڳيا. (50) پڻ آڪاش ٿي اول روئي اي سئه، جيا نئه ڪائين منكون نئه هميش رو جيون زڙه. (51) آڪاش ٿي اول جيون ڏيڌا واڙي روئي هُون آپ سون. جو ڪوئي اي روئي ڪانه اُو هميش هُوڏي جيو تو ريشي. اي روئي جيا ٿي هميش رو جيون زڙه، اي مارو آڀرو ڏيل سئه، ڪم تو هُون آڀرو جيو پڳوون را نوم مانھ ڏيه زم ڏنيا رون منكون نئه جيون زڙه.

(52) تيا مانھ يهودي ڌرم واڙا آڀت ۾ ام تڪرار ڪروا مڏيا: ”اي منک آڀون نئه ڪم ڪرين آڀرو مونھ ڪوراوي هڪه؟“

ايسو آڀرو مونھ ڪاتا رو ان آڀرو لوئي پيڌا رو مثال ڏين هڙماوئه
جي اونا رئه پڳوون را نوم مانھ آڀرو جيو ڏيڌا ٿي
منكون نئه هميش رو جيون زڙشي

(53) تيام ايسو اُوئون نئه ڪيڏو: ”زئون تم پڳوون را نوم مانھ مال سڙاووه، تيون تماره اونا رو مونھ ضرور ڪاوو، پڻ اونا رو لوئي پيڌا رو نا پاڙل سئه،

ڪم تو لوئي ۾ جيون سٺه. هون هون آڀرو جيو پڳوون را نوم مانه ڏيه، ان ضروري سٺه جي تمي مون مانه وشواس راڪو زم مارا مونه ٿي ان مارا لوئي ٿي تمون نٺه جيون زڙه. هون تمون نٺه هاس ٿي هاس ڪونه: زئون هون تمي مون منڪ ذات را ڏيڪرا مانه وشواس راڪين مارو مونه نٿي کاتا ان مارو لوئي نٿي پيتا، جيو هون پڳوون را نوم مانه ڏيه، تيون هون تمي مون نٺه هميش رو جيون نئين زڙه. (54) جو ڪوئي مون مانه وشواس راڪين مارو مونه ڪانه ان مارو لوئي پيٺه، اونا نٺه هميش رو جيون زڙه سٺه، ان پڇاڙي ۾ نيا رٿه ڏي هون اونا نٺه جيوي اوناڙيه. (55) ڪم تو ڪاڏا پيدا ٿي منڪ رڳا حياتي رٿه، پڻ مارٿه آڀرو جيو پڳوون را نوم مانه ڏيڏا ري ڪري مارا مونه ان لوئي ٿي منڪون نٺه هميش رو جيون زڙه. (56) جو ڪوئي مون مانه وشواس راڪين مارو مونه ڪانه ان مارو لوئي پيٺه، او مون پيڙو رٿه ان هون اونا پيڙو ريونه. (57) جيوئه نمونٽه جيون ڏيڏا واڙه هاپ مون نٺه ميليوه ان هون هاپ ري ڪري جيوئه سون، هيويه نمونٽه جيو مون مانه وشواس راڪه او پڻ ماري ڪري جيوئه ريشي. (58) هائي سٺه آڪاش ٿي اول روئي. او ايوي روئي نٿي جيا نٺه هاپ ڏاڏي ڪاڏي تي ان توئي پڻ مري گيا تا. جيو مون مانه وشواس راڪين هائي روئي ڪانه، اونا نٺه هميش رو جيون زڙشي.

(59) ايسو هائي ٻڌي واتون ڪيڏي زئون او ڪفرنحوم شهر موئين پڳوون را مندر موئين شيڪاڙتوت ريو.

شيلون مانه آزمٽو اوئھ جي ڪون پڪو وشواس راڪه

(60) ايسو ري اي واتون هومپڙين ايسو رون شيلون موئين ٿي گهڻي زئي ڪيڏو: "اي واتون مونيام هاو ڏوري سٺه. ايئون نٺه ڪون مونشي؟"

(61) پڻ ايسو آڀرا من ۾ اي زوئين جي اونا را شيلا اونا را پارام ٻرڙه ريا، اوئون نٺه ڪيڏو: "ايئون واتون ٿي تمارو وشواس ڏگي گيوه ڪي؟" (62) پڻ جي

تامي مُون منڪ ذات را ڏيڪرا نئه آڪاش مانھ سڙتون پاڙو جيئنه هُون مورمئه هتو، تو پسنه ڪم زوڻوھ! (63) جيوڙيا واڙو پوِتر آتما سئم. پوِتر آتما وڳر جيون ليڏا هارو منڪ ڪئين نٿي ڪري هڪتا. جي واتون مئين تمون ٿي ڪريھ، اُونون نئه مونيائ ٿي تمون نئه پوِتر آتما زڙشي ان جيون زڙشي. (64) پڻ تمون موئين ٿي ڪئينڪ سئم جي ماري واتون مانھ يقين نٿي راکتا.

ايسو هم ڪيڏو ڪم تو شروع ٿي لين اُونا نئه ڪهر هٿي جي ڪوڻ ڪوڻ مُون مانھ وشواس نٿي راکتا، ان اُو ڪوڻ سئم جيو مُون نئه زهلاوشي.

(65) پسنه ايسو وڙي ڪيڏو: ”تيام مئين تمون نئه اڳي ڪيڏو تو جي ڪوئي منڪ مُون ڪن آي نٿي هڪتو، زئون هُوڏي پڳوون ٻاپ اُونا نئه هم ڪريا رئي متئي نه ڏئه.“

(66) تيا ٿوڻا ٿي لين هايا وات ري ڪري ايسورون شيلون موئين ٿي گهڻي زڙي ايسو رئي ڪيڙ ساڏئي. (67) تيام ايسو آپرون ٻارون سُونڊل شيلون ٿي پونسيو: ”تمي پڻ مارئي ڪيڙ ساڏا ڪروھ ڪي؟“

(68) شمعون پطرس اُونا نئه وڙندي ڏيڏئي: ”پريو، امي پيزا ڪيا ڪن زائون؟ رُوڳا تمي سو جيا ري واتون موين هميش رو جيون زڙئه. (69) ان امي تمون مانھ وشواس اوڻيوھ ان امون نئه ڪاتري ٿيھ جي تمي پڳوون را پوِتر شيواڌاري سو.“

(70) تيا مانھ ايسو اُونون نئه ڪيڏو: ”مئين آپ تمون ٻارون زئون نئه مارا شيلا ٿيا هارو سُونڊياھ، نا؟ توئي پڻ تمون موئين ٿي هيڪ سئم جيو شيطون را پاها رو سئم.“

(71) ايسو اي وات شمعون اسڪريوتي را ڏيڪرا يهوداه را پارام ڪيتوت ريو، جيو ٻارون سُونڊل شيلون موئين ٿي هيڪ هتو، توئي پڻ تيا ڪيڙ اُوئه ايسو نئه زهلايو.

ايسُو پڳوونَ ري مرضي وڳر آپ ننه منگون هومو ساوو نئي ڪرتو

7 ① تيا ڪيڙ ايسُو گليل صُوپا موئين پنڌ ڪرتو ريو. اُو يهوديه صُوپا موئين زايا ٿي پاھو ڪرتوت ريو، ڪم تو اوت را يهودي ڌرم را آڳيوون اوتا ننه نمو ماروا ڪرتات ريا.

② هونہ يهودي ڌرم ري پرپ ڏوڪڙي آويي جيا ننه ڏاڙيون ري پرپ ڪئھ. ③ تيام ايسُو ري پايي اوتا ننه ڪيڏو: "ايئنه تون ننه ڪئين نئين وٽه. اي تر ساڏين تون يهوديه صُوپا موئين پرپ مانھ زا، زم اوئنه اُو ٻڌائي منڪ جيا ٿارا شيلا سئھ، ٿارا ڪوم ان پرسا زوئي هڪئھ. ④ منڪ جي مشور ٿيوا ڪرئھ، اُو آپرا ڪوم هٿاڙين نئين ڪرئھ. تون هيوا ڪوم ڪرئھ ريو، تو آپرا آپ ننه ٻڌي ڏنيا هومو ساوو ڪر." ⑤ ايسُو ري پايي هم ڪيڏو ڪم تو اُو پڻ هزون اوتا مانھ وشواس نتا راکتا.

⑥ تيام ايسُو اوئون ننه ڪيڏو: "مارو ساوو ٿيا رو توڻو هزون نئي آيو. تمي پلئھ زائو. تمون هارو توڻا ري ڪئين وات نئي، ⑦ ڪم تو ڏنيا را منڪ تمون ٿي وير راڪي نئي هڪتا. پڻ مون ٿي اُو وير راڪئھ ڪم تو هون اوئون را پارام هاک پرين همپڙاوتو ريونھ جي اوئون را ڪوم پونڌا سئھ. ⑧ تمي آپ پلئھ پرپ مانھ يروشلم شهر موئين زائو، هون همئھ ايٿا پرپ مانھ اوئنه نئين هالون، ڪم تو مارو ساوو ٿيا رو توڻو هزون نه آيو." ⑨ هائي وات ڪين ايسُو گليل صُوپا موئين ريو.

ايسُو ڏاڙيون ري پرپ مانھ منگون ننه شيڪاڙيا هارو يروشلم زائھ

⑩ زئيون ايسُو را پائي پرپ مانھ يروشلم شهر موئين ڳيا، تيا ڪيڙ ايسُو آپ پڻ



اَوڻه ڳيو. پڻ اُو ساوڻه ڍاڙه نه ڳيو،
زم منڪون نڻه ڪبر نه پڙڻه.

⑪ تيام يهودي ڌرم را آڳيوون
ايسو نڻه پرپ مانھ ڳوتتات ریا ان
آپت ۾ ڪيتات ریا: ”اُو ڪيھ سڻه؟“
⑫ زاتروئون موئين پڻ گھڻا منڪ ايسو
را پارام سوني واتون ڪرتات ریا.
ڪئينڪ ڪيتات ریا: ”اُو ناٿوڪو منڪ
سڻه.“ پڻ پيزا ڪيتات ریا: ”نا نا، ام
نٿي. اُو منڪون نڻه شيترين اوڙڻه پاهڻه
ڦيروڻه.“ ⑬ پڻ ڪوئي منڪ ايسو را
پارام ٻڌون رڻه رُوپرو نٿو ٻولتو، ڪم تو

اُو ٻڌائي آپرون يهودي ڌرم رون آڳيونون ٿي پڻاتات ریا.

⑭ زئيون پرپ را هڻتا را ترٿڪ ڏي وڃي ڳيا تڻيون ايسو پڳوون را گھر
موئين ڳيو ان شيڪاڙوا مڏيو. ⑮ تيام يهودي ڌرم را آڳيوون حيرون هتا ان ڪيو
مڏيا: ”اي منڪ ڳرو ڪن شيڪيا وڳر ڪم ڪرين شاستر ري واتون زوڻه؟“

⑯ تيا مانھ ايسو اوئون نڻه ڪيڏو: ”جي واتون هون شيڪاڙونه ريو، اُو ماري
آپري واتون نٿي، پڻ اوڻا ري سڻه جيڻه مون نڻه ميليھ. ⑰ جي ڪوئي منڪ
پڳوون ري مرضي مانھ ويوا ڪرڻه، تو اوڻا نڻه ماري شيڪاڙل واتون را پارام
ڪبر پڙشي، جي اُو پڳوون را پاها ٿي سڻه، ڪا هون رُوڳو آپرا پاها ٿي ڪونه
ريو. ⑱ جو منڪ آپرا پاها ٿي ٻولڻه، اُو آپرو مون وڌاروا ڪرڻه. پڻ جيو منڪ
آپ نڻه مليا واڙا رو مون وڌاروا ڪرڻه، اُو منڪ هاسو سڻه ان اوڻا موئين ڪئين
ڪوڙ نٿي هوڻيتو. ⑲ موسي تمون نڻه پڳوون را حڪم ڏيڏا، نا؟ توڻي پڻ تمون
موئين ٿي ڪوئي پڳوون رون حڪمون مانھ نٿي وڃي. تو پڻ سڻه ٿي مون مانھ

ايئون حُڪمون نئه توڙيا رو ڏوه ڏين ڪم مون نئه نمو ماروا ڪروھ؟
 ②0 تيا مانھ ٻڌي منڪي ڪيڏو: ”تمي ڳونڌا ٿياھ. تمون نئه ڪون نمو ماروا ڪرئھ؟ ڪم ام ڪوھ؟ تمون نئه پوت سونتيوھ ڪي؟“
 ②1 پڻ ايسو اوتون نئه ڪيڏو: ”مئين هڪا منڪ نئه ھازو ھورو ڪرين پويتر ڏي رو ڪوم ڪريو، ان تمي ٻڌائي ھيرون سو جي مئين ڪيو اوڙو ڪوم ڪريوھ.
 ②2 پڻ ايئا ھارو موسيٰ تمون نئه توھر ڪرايا رو حُڪم ڏيڏو زم وات ساوئي ٿئھ جي ڪئنيڪ ڪوم ايوو سئھ جيا پويتر ڏي را ڪروو ضروري سئھ. ھائي توھر ڪرايا رئي وات موسيٰ ٿي نئين پڻ تمارون ٻاپ ڏاڏون ٿي شروع ٿيھ. ان تمي پويتر ڏي را پڻ سوڪرون رئي توھر ڪراوھ. ②3 زئيون تمي موسيٰ رون لڪل حُڪمون نئه نه توڙيا ھارو پويتر ڏي رئي سوڪرون رئي توھر ڪرتا ريوھ، تو پستھ تمي مون مانھ ايئا ھارو ڪم ريشي ٻڙوھ جي مئين پويتر ڏي رو هڪا منڪ رو پورو ڏيل ھازو ھورو ڪريوھ؟ ②4 تمي سوچيا وڳر مارا پارام ڦينصلو مت ڪرو، پڻ ھاس پرموئھ ڦينصلو ڪرو.“

گھڻون منڪون نئه ڪبر پڙئھ

جي ايسو پڳوون رو سونيل پڇايا وڙو ڪريست سئھ

②5 پستھ يروشلم شھر رون ريواشيون موئين ٿي ڪئنيڪ زئا ڪيو مڌيا: ”اي منڪ او رو او نٿي ڪي، جيا نئه آڻا آڳيون نمو ماروا ڪرئھ ريا؟ ②6 زوئو، اي ٻڌون رئه روپرو ٻولئھ ريو، پڻ او ايئا رو نوم ئي نٿي ليتا. آڻي ڌرم ري آڳيون آيت ۾ اي ڦينصلو ڪريو ھوشي ڪي، جي اي منڪ ھاس ۾ پڳوون رو سونيل پڇايا وڙو ڪريست سئھ! ②7 پڻ ھم ڪم ڪرين ٿي شي؟ ڪم تو آڻون نئه ڪبر سئھ جي اي منڪ ڪيٽ رو سئھ. پڻ زئيون پڳوون رو سونيل پڇايا وڙو ڪريست آوشي، تئين ڪيا نئه ئي ڪبر نئين ھوئھ جي او ڪيٽ ٿي آيوھ.“
 ②8 تيا مانھ ايسو پڳوون را گھر موئين شيڪاڙتون اوتومئو ڪيڏو: ”تمون

نٺه ڪهر تو سٺه جي مارو نوم ڪي سٺه ان مارو شهر ڪيو سٺه. پڻ هُون آڀرا پاها ٿي نٽي آيو، پڻ جيئڻه مُون نٺه ميليوه اُو هاسو پڳوون سٺه. تمي اُوئا نٺه نٽي اوڙڪتا، (29) پڻ هُون اُوئا نٺه اوڙڪونه ريو، ڪم تو هُون اُوئا را پاها ٿي آول سون ان اُوئه مُون نٺه ميليوه.

(30) تيام منڪ اُوئا نٺه زهاليا رٿي ڪوشش ڪروا مڌيا، پڻ ڪوئي اُوئا نٺه هات ئي نه سٻاڙي هڪيو، ڪم تو اُوئا رو زهاليا رو توڻو هزون نٽو آيو. (31) پڻ اُوئون ٻڌون منڪون موئين ٿي گهڻي منڪي ايسو مانه وشواس اوڻيو ان اُوام ڪيتات ريا: ”زئيون ڪريست اوشي اُو اينا منڪ ٿي وڌارڻه پرسا ڏيڪاڙشي ڪي؟ ائينه منڪ اتا گهڻا پرسا ڏيڪاڙيا، اي ضرور پڳوون رو سونڍل پڇايا وازو ڪريست سٺه.“

يهودي ڌرم را آڳيوون ايسو نٺه زهاليا هارو آڀرا سپائي ميلئه

(32) زئيون فريسي پالٽي ري منڪي هومپريو جي منڪون م سونئي اي وات وٺه رٿي جي ايسو پڳوون رو سونڍل پڇايا وازو ڪريست سٺه، تئيون اُوئي ان موٽي پوزاريئي آپرون سپايون نٺه ميليا جي اُو ايسو نٺه زهالي آوئه. (33) تيا ري ڪري ايسو ڪيڏو: ”هزون ٿوڙيڪ وار هُوڏي هُون تمون پيڙو سون، ان تيا ڪيڙ هُون اُوئا ڪن زائيه جيئڻه مُون نٺه ميليوه. (34) تمي مُون نٺه گوتشو پڻ هُون تمون نٺه نئين زڙون. جيئڻه هُون هويئھ اُوئڻه تمي آوي نٽي هڪتا.“ (35) تيام يهودي ڌرم ري آڳيووني هڪا پيزا نٺه ڪيڏو: ”اي منڪ ڪيال پاڳي زاشي جي امي اينا نٺه گوتي نئين هڪون؟ ڪي اي اُوئون يهوديون ڪن زاشي جي ڌاري قومون موئين پيٺاھ؟ ان اُوئڻه زائين ڌاري قوم رون منڪون نٺه شيڪاڙشي؟ (36) اي ڪي ڪنھ ريو: ’تمي مُون نٺه گوتشو پڻ هُون تمون نٺه نئين زڙون‘ ان ’جيئڻه هُون هويئھ اُوئڻه تمي آوي نٽي هڪتا.‘ اينا رو ڪيڏا رو مطلب ڪي سٺه؟“

ايسُو پوٽي رو مثال ڏين پوٽر آتما را پارام شيڪارڙه

(37) ڏاڙيون ري پرڀ را پڇاڙي واڙا ان ٻڌون ٿي موتا ڏي مانھ ايسُو اُونين اُوپر
ان زور ٿي ڪيڏو:

”جي ڪيا ننه ترهه لاڳئي هونھ

تو اُو مون ڪن آوين پيئھ.

(38) ان جيو مون مانھ وشواس را ڪنھ،

زم شاستر موئين لڪل سئھ،

جيون ڏيڏا واڙا پوٽي ري نڌي

اُوٿا را من موئين ٿي ڦوٽي پڙشي.

(39) اي پوٽي واڙي وات ايسُو پوٽر آتما را پارام ڪيڏي، جيو ايسُو مانھ

وشواس اوٿيا واڙون ننه تيا ڪيڙ زڙيا واڙو هتو. هزون پوٽر آتما ميلل نٿو، ڪم
تو پڳوون ايسُو ننه هزون آڪاش ۾ آڀرا مون ۾ نٿو ليدو.

(40) زئيون ٻڌي منڪي ايسُو ري اي واتون هومپڙي، تو اُوئون موئين ٿي ڪئينڪ

ڪيو مڏيا: ”اي منڪ هاس ۾ اُو پڳوون رو نياپو ڏيڏا واڙو سئھ جيا را آيا
را پارام شاستر موئين لڪل سئھ.“ (41) ان پڙا ڪيتات ريا: ”اي پڳوون رو

سُونڊل پڇايا واڙو ڪريست سئھ.“ پڻ پڙي ناڪارين ڪيڏو: ”پڳوون رو سُونڊل
پڇايا واڙو ڪريست گليل صوپا ٿي ڪم ڪرين اوشي؟“ (42) ڪم تو شاستر ۾

ام لڪل سئھ نا، جي پڳوون رو سُونڊل پڇايا واڙو ڪريست داؤد پاڌشا ري
پيڙي رو هوشي ان بيت لحم شهر موئين زلمشي جيئنه داؤد پاڌشا نونو موتو

ٿيو تو.“ (43) تيام ايسُو ري ڪري ٻڌون منڪون موئين آڀت موئين ڦوٽ پڙي،
ڪئينڪ ايسُو رنه پاهنه ٿيا ان ڪئينڪ ايسُو رنه ڪلاڦ ٿيا. (44) اُوئون موئين

ٿي ڪئينڪ ايسُو ننه زهالوا ڪرتات ريا، توئي ڪيئنه پڻ اُوٿا ننه هات ئي
نه سڀاريو.

سپائي ايسو نڌ زهاليا وڳر يهودي ترم رون اڳيونون ڪن پاسا اوڻه

(45) تيام پڳوونَ را گهر را سپائي موٽون پوزاريون ان فريسي پالتي رون منڪون ڪن پاسا آيا. اوتي سپايون ٿي پونسو: "تمي اوڻا نڌ ڪم زهالي نه آيا؟"

(46) تو سپايي جواب ڏيڻو: "ڪوئي منڪ ام ڪيڏي نه ٻوليو زم هائي منڪ ٻولڻه." (47) تيا مانه فريسي پالتي ري منڪي ريشي ٻرين ڪيڏو: "اوڻه ڪوڙي واتون ڪرين تمون نڌ پڻ شيترياه ڪي؟" (48) ترم رون اڳيونون موئين ٿي ڪا امون فريسي پالتي واڙون موئين ٿي ڪيڻڪ اوڻا مانه وشواس اوڻيوه، ڪي؟ ڪيڻڪ ٿي نئين. (49) روڳا هائي ابوجه شينشاري منڪ اوڻا ري واتون مونڻه. هايون نڌ شاستر رئي ڪيوئي ڪهر؟ هائي تو پڳوونَ را پتل سڻه." (50) تيا مانه نيڪڊيمس جيو مور ۾ ايسو ڪن آيو تو، ان جيو آپ فريسي پالتي رو هيڪ اڳيون هتو، اوڻه آپرون پالتي واڙون نڌ ڪيڏو: (51) "آپڻا شاستر موئين لڪل حڪمون پرموڻه آبي امرام ڪياڪ مانه سزا ڏيڏا رو ڦينصلو ڪري هڪونه ڪي؟ زئون هوڏي آبي اوڻا رئي وات نه هومپزون ان ڪهر نه پاڙون جي اوڻه ڏوه ڪريوه ڪا نا، تنيون هوڏي آپون نڌ ڦينصلو ڪريا رو ڪئين حق نٿي." (52) تيا مانه اوتي نيڪڊيمس نڌ ڪيڏو: "تون اوڻا رو ٻاهو ڪم لڻه؟ تون پڻ اوڻا را زم گليل صوپا رو سڻه ڪي؟ هاوڙ شاستر موئين زو، تو تون نڌ ڪهر پڙشي جي گليل صوپا موئين ٿي پڳوونَ رو نياپو ڏيڏا واڙو ڪوئي نٿي آيو نڪو آوشي."

(53) تيا ڪيڙ ٻڌائي منڪ آپري آپري گهري ڳيا پرا. ① پڻ ايسو زيتون 8 نومي ڏونگر مانه ڳيو ان اوڻه ٽڪي ريو.

پونڌو ڪوم ڪريا واڙي ڏوشي نڌ ايسو ماڦتي نڌه

(2) پيڙه ڏي، ڏي اوڳيا رڻه توڻه ايسو وڙي پڳوونَ را گهر موئين پاسو آيو.

اوتته اسرائيلي قوم را ٻڌائي منڪ اوتا ڪن آوا مڌيا، ان ايسو پيهين اوتون ننه شيڪاروا مڌيو.



③ تئين شاستر زوتيا وازا ان فريسي پالتي را منڪ هيڪي ڏوشي ننه ايسو ڪن تيڙي آيا، جيا ننه پوندو ڪوم ڪرتون زهائي تي. اوتي ڏوشي ننه ٻڌون را وس ۾ اوياري ④ ان ايسو ننه ڪيڏو: ”گرو جي، اي ڏوشي پوندو ڪوم ڪرتون زهلوتيه. ⑤ هوته موسي رون لڪل حڪمون موئين موسي آيون ننه ايويون ڏشيون ننه پوتا هئين نمو ماريا رو ڪيڏوه. تيام تمهي همپراو جي تمهي آپ ڪي ڪوه؟“

⑥ اوتي هم ڪيڏو زم او ايسو ننه ڌرم رته ڪلاڦ ڪا رومي قانون رته ڪلاڦ ٻولوين ڦٽراوته، ان ام اوتون ننه ڪوڪ وات زڙته جيا مانه او ايسو رو ڏوه ڪاڍي هڪه.

پن ايسو نيسو نمين آپري اونگڙي تي زمي مانه لڪوا مڌيو. ⑦ پن او ايسو تي پونستا ريا، تو ايسو ائين اوپو ان اوتون ننه ڪيڏو: ”تمون موئين تي جيئته ڪوئي ڏوه نه ڪريو هوته، او ٻڌون مور ايتا ڏوشي ننه پوڻو هئته.“ ⑧ ان ايسو وڙي نيسو نمين زمي مانه لڪوا مڌيو.

⑨ اي وات هومپرين ٻڌائي منڪ ڏوڪرون تي لين هيڪا پيزا وونهڙ هيڪوڪو هيڪوڪو تين اوت تي ڪهڪي ڳيا. نيٺ روڳو ايسو اوتته هيڪلو ريو ان ڏوشي اوتا هومئي اويي تي. ⑩ تئين ايسو ائين اوپو ان ڏوشي ننه ڪيڏو: ”ٻائي، اي ٻڌائي ڪيال ڳيا؟ ڪي تون مانه سزا ڏيڏا رو ڦينصلو ڪيئته ئي نه ڏيڏو؟“ ⑪ تئين ڏوشي ڪيڏو: ”جي، ڪيئته ئي نئين.“

پسته ايسو اوتا ننه ڪيڏو: ”ان مارو ڦينصلو پن ام سته. هون پن ٿارا ڪرل ڏوه رئي سزا تون ننه نئي ڏيتو پن ماڻي ڏيونه. هوته زا، ان آڙ تي لين وڙي ڪيڏي ڏوه مت ڪري.“

ايسو ڏنيا هارو سوجهرو ٿين منڪون ننه هاس رو مارڳ ڏيڪارڙهه

⑫ زئيون ايسو وڙي منڪون ننه شيڪارڙا مڏيو، تئيون اوئه ڪيڏو: ”هون ڏنيا رون منڪون هارو سوجهرو سون. جيو ماري واتون مانھ وئھ او ڪيڏي اندارا ۾ نئين وئھ، پڻ اوئا ننه او سوجهرو زڙشي جيا ٿي هميش رو جيون زڙهه.“ ⑬ تيام فريسي پالتي ري منڪي اوئا ننه ڪيڏو: ”تون پلنه ام ڪئھ، پڻ زئيون پيزا ٿارئي هاڪ پريا وازا نٿي، تو ٿارا ڪيڏا ٿي ڪئين ٿاڀيٽي نٿي جي ٿارئي وات هاسئي سئھ.“ ⑭ پڻ ايسو اوئون ننه اي جواب ڏيڏو: ”هون پلنه هيڪلو آپرا پارام هاڪ پرونه، توئي پڻ مون ڪن ٿاڀيٽي سئھ جي مارئي پرل هاڪ هاسئي سئھ، ڪم تو مون ننه ڪبر سئھ جي هون ڪيٽ ٿي آيوھ، ان ڪيال زائونھ ريو. تمون ننه هايا رئي ڪبر هوٽ، تو تمون ننه پڻ ٿاڀيٽي ٿئٽ. پڻ تمون ننه تو ڪبر ئي نٿي جي هون ڪيٽ ٿي آيوھ، ان ڪيال زائونھ ريو. ⑮ تمي روڳا منڪون ري سوچ پرموئنه ڦينصلا ڪروھ، پڻ هون آپ آپرا پاها ٿي ڪيا رو ڦينصلو نٿي ڪرتو. ⑯ پڻ زئيون هون نيا ڪرونھ، تئيون مارا ڦينصلا هاسا سئھ، ڪم تو هون هيڪلو نيا نٿي ڪرتو. پڻ هون ان او جيئنه مون ننه ميليھ، امي ٻي ئي پيزا ٿين نيا ڪرونھ. ⑰ تمارا آپرا شاستر موئين پڻ موسيٰ رون لڪل حڪمون موئين اي لڪل سئھ جي ’پيئون منڪون ري پرل هاڪ ٿي هاس رئي ٿاڀيٽي ٿئھ.‘ ⑱ هوئھ هيڪ هون سون، جيو آپرا پارام هاڪ پرونه، ان پيزو مارئي هاڪ پريا وازو مارو ٻاپ سئھ، جيئنه مون ننه ميليھ.“

⑲ تيام او ايسو ٿي پونسوا مڏيا: ”ٿارو ٻاپ ڪيھ؟“ تو ايسو اوئون ننه وڙندئي ڏيڏئي: ”تمي نڪو مون ننه اوڙڪوھ، نڪو مارا ٻاپ ننه اوڙڪوھ. جي تمي مون ننه اوڙڪوت، تو مارا ٻاپ ننه پڻ اوڙڪوت.“

⑳ ايسو هائي واتون پڳوون را گهر موئين شيڪارڙتون اوئا ماڳ ڪيڏي،

جيئڻه ڏون هارو پيئي راکل هتي. توهي پڻ اوتا نئه ڪيئڻه ئي نه زهاليو، ڪم تو هزون اوتا رو زهلايا رو توڻو نتو آيو.

ايسو آبرا هوزي مانھ مريا را پارام ان آڪاش موئين پڳون ڪن زايا را پارام ڪڻھ

(21) ايسو وڙي يهودي ڌرم رون آڳيونون نئه ڪيڏو: ”هون زائونھ پرو، ان تمي مون نئه ڳوتشو. پڻ تمون نئه ڏوهون رئي ماڻي نئين زڙڻه، ان تمي امرام مري زاشو. جيئڻه هون زائونھ، اوتڻه تمي آوي نئي هڪتا.“

(22) تيام آڳيون آيت ۾ هڪا پيزا نئه ڪيا مڏيا: ”اي آڳهات ڪرشي، ڪي؟ اي ڪم ام ڪڻھ؟“ جيئڻه هون زائونھ، اوتڻه تمي آوي نئي هڪتا. اي وات ڪيڏا رو ڪي مطلب سڻھ؟“

(23) پڻ ايسو اوتون نئه ڪيتو ريو: ”تمي ايئا ڏنيا را سو، پڻ هون آڪاش رو سون. تمي ڏنيا ري سوچ پرموئڻه ووھ، پڻ هون ڏنيا ري سوچ پرموئڻه نئي ويتو. (24) مئين تمون نئه همئڻه ڪيڏو تو جي تمون نئه ماڻي نئين زڙڻه ان تمي همرام مري زاشو. جي تمي ماري پرل ھاڪ پرموئڻه يقين نئين ڪرو جي هاس ۾ هون ڪوڻ سون، تو پڪي وات سڻه جي تمي ماڻي ليڏا وڳر مري زاشو.“

(25) تيام او ايسو ٿي پونسوا مڏيا: ”تون ڪوڻ سڻھ؟“ تو ايسو اوتون نئه ڪيڏو: ”شروع ٿي لين هون تمون نئه همپزاوونھ ريو جي هون ڪوڻ سون، ان توهي تمي پونسوه ريا؟“ (26) مون ڪن گهڻي ايوي واتون سڻه جيون را پارام هون تمون ٿي ٻولي هڪونھ، ان جيون ري ڪري هون تمارو نيا ڪرين تمون نئه ڏوهاري ڪري هڪونھ. پڻ هون روڳي اوتا ري واتون ڪرونھ جيئڻه مون نئه ميليھو. او هاسو سڻه، ان جي واتون مئين اوتا ٿي هومپزيھ، روڳي هائي واتون هون ڏنيا رون منڪون نئه ڪونھ.“

(27) هوڻه او منڪ نئا هڙمتا جي ايسو پڳون رو ڏيڪرو سڻه ان او آبرا پاپ

پڳوونَ را پارام ٻولئو ريو. ②8 تيام ايسو ڪيڏو: ”زئيون تمڻي مون منڪ ذات را ڏيڪرا نٿو اونسو ساڙشو، تئيون تمون نٿو ڪٻر پڙشي جي هاس ۾ هون ڪون سون. ان تمون نٿو ايٿا رڻي پڻ ڪٻر پڙشي جي هون آپرا پاها ٿي ڪئين نٿي ڪرتو، پڻ جي واتون مارئو ٻاپ پڳوونَ مون نٿو شيڪاڙي، اُو هون ڪرونه. ②9 مارو ٻاپ جيئو مون نٿو ميلي، اُو مون پيڙو سٺو. اُو مون نٿو هيڪلو نه ساڏيو، ڪم تو هون اُو ڪوم هميش ڪرتو ريونه جيا اوتا نٿو وٺو.“

③0 زئيون ايسو هائي واتون ڪرتوت ريو، تئيون گهڻي يهودي منڪي يقين ڪريو جي اُو پڳوونَ رو ڏيڪرو سٺو.

جيا هاسا من ٿي ايسو مانه وشواس راکڻه اُو ڏوهون را قوضا ٿي سوني زائو

③1 تيام ايسو اوئون يهوديون نٿو ام ڪيڏو، جيئي اوتا ري واتون مانه يقين ڪريو تو: ”جي تمڻي ماري واتون مانه وٽا ريو، تو تمڻي هاس ۾ مارا شيلا سو.“

③2 ان هيئو نمونو تمون نٿو هاس رڻي ڪٻر پڙشي، ان هاس مانه وڍا ٿي تمڻي گُلمڻي ٿي آزاد ٿيشو.“

③3 تيا مانه اوئي ايسو نٿو ڪيڏو: ”امي تو ابراهيم را اولاد سون، ان امي ڪيڏي گُلمڻي ٿي ٿيا. تو پستو تمڻي ڪم ڪو ريا جي تمڻي آزاد ٿيشو؟“

③4 تيا مانه ايسو اوئون نٿو ڪيڏو: ”هون تمون نٿو هاس ٿي هاس ڪونه: جي ڪوئي ڏوھ ڪرئ، اُو زوئو ڏوهون رو گُلمڻي ٿين ڏوهون را قوضا سٺو.“

③5 هوئو گُلمڻي ڏيئي را گهر رو پاتي نٿي، تيام اوتا رو ڏيئي را گهر مانه ڪئين حق نٿي. پڻ ڏيئي را ڏيڪرا رو آپرا ٻاپ را گهر مانه پورو حق سٺو ان اُو هميش هُڏي آپرا ٻاپ ري گهري رٿو. ③6 تيام، جي هون پڳوونَ رو ڏيڪرو ٿين تمون نٿو ڏوهون ري گُلمڻي ٿي آزاد ڪرين پڳوونَ را گهر موئين ريا رو حق ڏيونه، تو پستو تمڻي هاس ۾ آزاد ٿيشو. ③7 مون نٿو ڪٻر سٺو جي تمڻي ابراهيم را

اولاد سو. توئي پڻ تمڻي مُون نئه نمُو ماريَا هَارُو ڪروھ، ڪم تو تمڻي ماري واتون نٿي مونتا. (38) جي ڪئين مئين آڀرا ٻاپ ڪن ڏيکيوھ، اُوڻا را پارام هُون تمون نئه همڀراوونھ. پڻ اُوڻا را ايوزا ۾ تمڻي ابراهيم جيوو ڪوم نئين، پڻ جيا را تمڻي اولاد سو، اُوڻا رو ڪيڏل ڪوم ڪروھ.

(39) پڻ اُوئي ايسُو نئه اي جواب ڏيڻو: ”امي تو ابراهيم را اولاد سون.“ تو ايسُو اُوئون نئه ڪيڏو: ”جي تمڻي ابراهيم را هاسا اولاد هوئوت، تو تمڻي ابراهيم جيوو ڪوم ڪروت. (40) مئين تمون نئه اُو هاسي واتون همڀراويھ جي مئين پڳوون ٿي هومڀري، پڻ تمڻي مُون نئه نمُو ماريَا رئي ڪوشش ڪروھ ريا. ابراهيم تو هيو ڪوم نتو ڪريو. (41) تمڻي ابراهيم جيوو نئين، پڻ جيا را تمڻي اولاد سو، اُوڻا جيوو ڪوم تمڻي ڪروھ.“

تو اُوئي ايسُو نئه ڪيڏو: ”امي تو حروم را اولاد نٿي، ان امي پڙا ڪيا رو ڪيڏو نٿي مونتا، رُوڳو امارا ٻاپ پڳوون رو ڪيڏو مونونھ.“ (42) تو ايسُو اُوئون نئه ڪيڏو: ”جي پڳوون تمارو ٻاپ هوئت تو تمڻي مُون ٿي پريم را ڪوت، ڪم تو هُون پڳوون ٿي ٿيوھ، ان پڳوون ڪن ٿي آيوھ. هُون آپري مرضي ٿي نٿي آيو پڻ پڳوون مُون نئه ميليھ. (43) تمڻي ماري واتون ڪم نٿي هڙمتا؟ تمڻي تيام نٿي هڙمتا ڪم تو تمڻي آپ ماري واتون هڙمتا جيوو نٿي. (44) تمارو ٻاپ پڳوون رو دشمن شيطون سئھ. تمڻي اُوڻا را اولاد سو، ان تمڻي آڀرا ٻاپ شيطون رئي مرضي ڪشي ٿي پوري ڪروھ. اُو شروع ٿي لين ڪُون ڪرايا وازو سئھ ان هاس را پاها رو نٿي، ڪم تو اُوڻا موئين هاس سئھ ئي نئين. زئون اُو ڪوڙ ٻولئھ، تئين اُو پورا شونق ٿي ڪوڙ ٻولئھ، ڪم تو اُو آپ ڪوڙو سئھ ان ڪوڙ رئي مان ٿين رُوڳو ڪوڙ ئي ڪوڙ ٻولئھ. (45) پڻ هُون هاس ٻولونھ، تيام تمڻي مارئي وات نٿي مونتا. (46) تمون موئين ٿي ڪوڻ مارو ڏوھ ڪاڏئھ؟ زئون هُون هاس ٻولونھ ريو، تو پسئھ تمڻي مارئي وات ڪم نٿي مونتا؟ (47) جيو پڳوون را پاها رو سئھ اُو پڳوون ري واتون مونئھ. تمڻي تيام نٿي مونتا ڪم تو تمڻي پڳوون را پاها را نٿي.“

ايسو آپ نٺ ابراهيم ٿي موٽو ڪين شيڪاڙڻه
جي او پڳوون را زم هميش ٿي سٺ

(48) ٿيا مانھ يھودي منڪي ايسو نٺ ڪيڏو: ”امي ليڪ نٿي ڪيتا ڪي؟ تون نيچ سامري قوم رو سٺھ ان تون نٺ پوت سونٽل سٺھ.“

(49) تو ايسو جواب ڏيڏو: ”مون نٺ پوت سونٽل نٿي، هون تو مارا ٻاپ رو مون را ڪونه. پڻ تمي مارو مون نئين پڻ مارئي پيغزتي ڪروه. (50) هون تو آڀرا وڪوڻ ڪراووا نٿي ڪرتو، پڻ پيزو هيڪ سٺھ جي مارا وڪوڻ ڪراووا ڪرڻھ، ان او منڪون رو نيا ڪريا واڙو سٺھ. (51) هون تمون نٺ هاس ئي هاس ڪونه: جي ڪوئي ماري واتون مانھ وٺھ، تو او هميش هوڏي نئين مرڻھ.“

(52) ٿيا مانھ يھوديئي اوٺا نٺ ڪيڏو: ”هوٺھ امون نٺ پڪئي ڪاترئي ٿيھ جي تون نٺ پوت سونٽل سٺھ. ابراهيم تو مري گيو ان پڳوون رو نياپو ڏيڏا واڙا پڻ مري گيا. پڻ تون ڪٺ ريو: ’جي ڪوئي ماري واتون مانھ وٺھ، تو او هميش هوڏي نئين مرڻھ.‘ (53) تون آپ نٺ امارا ڏاڏا ابراهيم ٿي موٽو هڙمٺھ ڪي؟ او تو مري گيو ان پڳوون رو نياپو ڏيڏا واڙا پڻ مري گيا. تون آڀرا آپ نٺھ ڪي هڙمٺھ؟“

(54) ايسو اوٺون نٺ وڙنڌي ڏيڏي: ”جي هون آپ آڀرا وڪوڻ ڪراوٺ، تو مارا وڪوڻ ڪئين نه ٿٺت، پڻ جيو مارا وڪوڻ ڪراوٺھ او مارو ٻاپ پڳوون سٺھ. تمي تو پلٽھ ام ڪوه ريا جي ’امي پڳوون رو ڪيڏو مونونھ،‘ (55) پڻ تمي تو اوٺا نٺھ اوڙڪتا ئي نٿي. پڻ هون اوٺا نٺھ اوڙڪونه. جي هون ام ڪونت: ’هون پڳوون نٺھ نٿي اوڙڪتو،‘ تو هون تمون جيوو ڪوڙو ٿٺت. پڻ هون اوٺا نٺھ اوڙڪونه ان اوٺا رو ڪيڏو مونونھ. (56) تمارو ڏاڏو ابراهيم ايٺا وات مانھ ڪش ٿيو جي او مارا ڏنيا ۾ آيا رو ڏي پاڙشي. ان اوٺھ پاڙيو ان ڪش ٿيو.“

(57) تيام يھوديئي ايسو نٺ ڪيڏو: ”تون هزون پنجاه سالون رو ئي نٿي، ان

تئين ابراهيم ننه ڏيکيوھ ڪي؟" ⑤8 تو ايسو اُونئون ننه ڪيڏو: "هُون تمون ننه هاس ئي هاس ڪونه: ابراهيم را پيدا ٿيا ٿي مور شروع ٿي لين هُون سون."
 ⑤9 تيام اي وات هومپڙين جي ايسو آپ ننه پڳوون هرڪو ڪرڻ، اُونئي ايسو ننه نمو ماريا هارو پوئا اُوپاڙيا، پڻ ايسو هتائين پڳوون را گهر ٿي نيھري ڳيو.

ايسو هيڪا زايا زلميا اونڌا ننه هارو هورو ڪرڻه



① ايسو زاتوت ريو تو اُونئا ننه هيڪ منڪ ڏيڪيام
 9 آيو جي زايو زلميو اونڌو هتو. ② تئين شيلي ايسو
 ٿي پونسيو: "ڳرو جي، اي منڪ ڪيا را ڏوه ري ڪري
 اونڌو زلميو؟ اُونئا را آپرا ڏوه ري ڪري ڪا اُونئا را مان
 ٻاپ را ڏوه ري ڪري؟" ③ تو ايسو وڙنڌي ڏيڏي:
 "نڪو آپرا ڏوه ري ڪري، نڪو مان ٻاپ را ڏوه ري
 ڪري اي اونڌو زلميو. پڻ اي منڪ تيام اونڌو زلميو زم

ايشا رنه هارو هورو ٿيا ٿي پڳوون را ڪوم ساوا ڏيڪانه. ④ زئين هُوڌي ڏي
 سته تئين هُوڌي آپنه اُونئا را ڪوم ڪروو ڪپنه جيئنه مُون ننه ميليوه. پڻ رات
 پڙيا واڙي سته زئين ڪوئي منڪ ڪوم نئين ڪري هڪنه. ⑤ زئين هُوڌي هُون
 ڏنيا ۾ سون تئين هُوڌي هُون ڏنيا هارو سوجهرو سون."

⑥ هم ڪين ايسو زمي مانھ ٿوڪيو ان ٿوڪ ۾ مائتي پلاڙين اونڌا ري
 اونڪيون مانھ سوپڙي. ⑦ پسنه ايسو اونڌا ننه ڪيڏو: "تُون زا، ان زائين
 سلوٿام نومي تراو موئين اونڪيون ڏو." هونه سلوٿام رو مطلب سته ميلل.

تيام اونڌو ڳيو ان زائين اونڪيون ڏوئي، ان هارو هورو ٿين ڏيڪتو ڏيڪتو
 پاسو آيو رو. ⑧ هونه هائي هارو ٿيل منڪ اڳي پنتو. تيام اُونئا را پاڙوشي ان
 اُون منڪ جيئي اُونئا ننه پنتون پاڙيو تو، اُون ڪيو مڏيا: "اي اُون هاڳي منڪ نئي
 ڪي؟ جيو اڳي پيهين پنتو." ⑨ ڪوڪ ڪيتات ريا جي "هونه، اي اُون رو اُون

سٺه "ان ڪوڪ ڪيتات ريا "نا نا، اُٺا جيوو پيزو ڪوڪ سٺه." پڻ اُو منڪ آپ ڪيتو ريو جي "هُون اُو رو اُو سون." ⑩ تيام منڪي اُٺا ٿي پُونسيو: "تو پسنه ٿاري اونڪيون ڪم ڪرين ھازي ٿي ڳيھ؟" ⑪ تو اُٺه وڙندڙي ڏيٺي: "اُو منڪ جيا نٺه ايسو ڪئھ، اُٺه ماڻهي پلاڙين ماري اونڪيون مانھ سوڙئي ان مون نٺه ڪيڏو جي سلوٽام نومي تراو مانھ زائين اونڪيون ڏو. تيام هُون ڳيو، اونڪيون ڏوئي ان هُون زووا مڏيو." ⑫ تيون اُٺي ھازا ٿيل منڪ نٺه پُونسيو: "اُو منڪ ڪيھ؟" تو اُٺه ڪيڏو: "ڪو، ڪبر نئين."

فريسي پالتي را منڪ اونڌا را ھازا ٿيا را پارام ڪبر پاڙئھ

⑬ تيون جيو اڳي اونڌو هتو، منڪ اُٺا نٺه فريسي پالتي واڙون ڪن تيڙي ڳيا. ⑭ هُٺه اُو ڏي جيا مانھ ايسو ماڻهي پلاڙئي تي ان اونڌا ري اونڪيون ھازي ڪري تي اُو پويتر ڏي هتو، جيا مانھ يھودي ڌرم پرموئنه ڪوئي پڻ ڪوم نٺو ڪروو. ⑮ تيام فريسي پالتي ري منڪي پڻ اُٺا منڪ ٿي پُونسيو: "تُون ڪم ڪرين زووا مڏيو؟" تو اُٺه اُٺون نٺه ڪيڏو: "اُٺه منڪ ماريون اونڪيون مانھ ماڻهي سوڙئي، ان مئين زائين اونڪيون ڏوئي ان همئنه ڏيکي هڪونه، پش." ⑯ تيام فريسي پالتي را ڪئينڪ منڪ ايسو را پارام ڪيو مڏيا: "اُو منڪ پڳوون را پاها ٿي نٿي آيو، ڪم تو پويتر ڏي رو ڪوم ڪرين پڳوون رو حُڪم توڙئھ." پڻ اُٺون موئين ٿي ڪئينڪ پيزي ڪيڏو: "جي اُو منڪ ڏوهاري هوئ توهيا پرسا ڪم ڪرين ڏيڪاڙي هڪئ؟" هم اُٺون موئين ڦوٽ پڙئي. ⑰ تيام اُٺي وڙي پيزي وار ھازا ٿيل منڪ ٿي پُونسيو: "اُٺه ٿاري اونڪيون اُوگھاڙي. هُٺه تُون آپ اُٺا را پارام ڪي ڪئھ؟" اُٺه ڪيڏو: "اُو پڳوون رو نياپو ڏيڏا واڙو سٺه."

⑱ پڻ يھودي ڌرم ري آڳيون هنجي نٺو مونيو جي ھائي منڪ اڳي اونڌو هتو ان وڙي ڏيکوا مڏيوھ، تيام اُٺي ھازا ٿيل منڪ را مان ٻاپ نٺه آپ ڪن

١٩) اُوئي منڪ را مان ٻاپ ٿي پُونسيو: ”ڪي اي تمارو ڏيڪرو سئ، جيا را پارام تمي ڪوه ريا، جي زايو زلميو اونڌو هتو؟ تو پسنه همئنه ڪم ڪرين ڏيڪي هڪئ؟“

٢٠) تيام اُوئا رنه مان ٻاپ ورنڌئي ڏيڏئي: ”امي تو اوڙڪونه ريا جي اي امارو ڏيڪرو سئ، ان اي اونڌو زلميو تو. ٢١) پڻ همئنه ڪم ڪرين ڏيڪي هڪئ ان ڪيئنه ايئا ري اونڪيون اُوگهاڙي، امون ننه هايا را پارام ڪئين ڪبر نٿي. تمي آپ ايئا ٿي پُونسو. اي موٽو سئ ان اي آپ اپرا پارام همپڙاوي هڪئ.“

٢٢) اُوئا رنه مان ٻاپ هم ڪيڏو ڪم تو اُو يهودي ڌرم رون آڳيونون ٿي پيئتا تا، ڪم تو آڳيونوني آپت موئين اڳي اي ڦينصلو ڪريو تو، ”جي ڪوئي منڪ ايسو ننه پڳوون رو سونڍل پچاينا واڙو ڪريست ڪيشي، تو اُوئا ننه نات ٻارو ڪرئون.“ ٢٣) هايا وات ري ڪري اُوئا رنه مان ٻاپ ڪيڏو تو جي ”اي موٽو سئ. ايئا ٿي پُونسو.“

٢٤) تيام فريسي پالٽي واڙي وڙي پيڙي وار اُوئا منڪ ننه آپ ڪن آيا رو ڪيڏو، جيو اڳي اونڌو هتو، ان اُوئا ننه ڪيڏو: ”پڳوون رو هون ڪائين هون تون هاس ٻول، امون ننه تو ڪبر سئ جي اُو منڪ ڏوهاري سئ.“ ٢٥) تيام هازنه ٿيل منڪ جواب ڏيڏو: ”مون ننه ايئا رئي ڪئين ڪبر ئي نٿي جي اُو ڏوهاري سئ ڪا نا. مون ننه روڳئي ايئا وات رئي ڪبر سئ جي هون هتو اونڌو، ان همئنه هون زوئي هڪونه.“ ٢٦) تيام فريسيئي اُوئا ٿي پُونسيو: ”اُوئه تون ننه ڪي ڪريو؟ اُوئه ڪم ڪرين ٿاري اونڪيون اُوگهاڙي؟“ ٢٧) تو اُوئه ورنڌئي ڏيڏئي: ”مئين تمون ننه اڳي ڪيڏو تو، پڻ تمي ماري وات ننه ڪون ئي نه ڏيڏو. تمي ڪم وڙي هومپڙوا ڪروه ريا؟ تمي پڻ اُوئا را شيلا ٿيوا ڪروه ڪي؟“ ٢٨) تيا مانه فريسيئي ايئا ننه پڙاتا ڏين ڪيڏو: ”تون تو اُوئا رو شيلو سئ، امي تو موسي ري لڪل واتون مانه وونه.“ ٢٩) امون ننه ڪبر سئ جي پڳوون موسي ٿي واتون ڪري تي، پڻ اُوئا منڪ را پارام امون ننه ڪبر ئي نٿي جي اُو ڪيڏ ٿي آيوه.“

③⑩ تو هازنه ٿيل منڪ اُوئون ننه جَوَاب ڏيڏو: ”واھ، اي تو حيروني رٿي وات سٺه. اُوڻه ماري اونڪيون اُوگهاڙي ان توڻي تمون ننه کبر ٿي نٿي جي اُو ڪيٽ ٿي آيوھ! ③⑪ امون شينشاريون ننه تو کبر سٺه جي پڳوون ڏوهاري منڪ رو هاڏ نٿي هومپڙو. پڻ پڳوون اُوئا رو هاڏ هومپڙهه جي پڳوون رو مون راکڻه ان اُوئا ري مرضي مانھ وڻه. ③② ڏنيا را شروع ٿي لين اي وات ڪيڏي هومپڙيام نٿي اُوڻي جي ڪڻڪ ڪياڪ زايا زلميا اونڌا ري اونڪيون اُوگهاڙي هونھ. ③③ هونھ جي اُو منڪ پڳوون را پاها ٿي آول نه هونٽ، تو اُو ڪڻن نه ڪري هڪٽ. ③④ تيا مانھ فريسيئي اُوئا ننه ڪيڏو: ”ئون تو زايو زلميو ڏوهاري سٺه، ان ئون امون ننه شيڪاروا ڪرڻه ڪي؟“ پسنه فريسيئي اُوئا منڪ ننه ڌرم ٿي ڪاڍين نات ٻارو ڪريو پرو.

ايسو فريسيون رو اي نوه ڪاڍه جي اُو هاس ٿي اونڪيون ميشين وڻه

③⑤ زئيون ايسو ننه کبر پڙهي جي اُوئا منڪ ننه نات ٿي ٻارو ڪاڍيوھ پرو، تو ايسو اُوئا ننه ڳوتين هات ڪريو ان اُوئا ٿي پونسيو: ”ڪي ئون منڪ ذات را ڏيڪرا مانھ وشواس راکڻه؟“ ③⑥ تو اُوڻه وڙندڻي ڏيڏي: ”ساڏو جي، مون ننه ڪو اُو ڪون سٺه، زم هون اُوئا مانھ وشواس اوڻي هڪون. ③⑦ تو ايسو اُوئا ننه ڪيڏو: ”تئين اُوئا ننه ڏيڪيوھ، اُو هون سون جي ئون ٿي ٻولونھ ريو.“ ③⑧ تو اُوڻه ڪيڏو: ”پرڻو، هون تمون مانھ وشواس راکونھ.“ ان اُوڻه ايسو ري پڳي پڙين اُوئا رٿي پوزا ڪرڻي. ③⑨ تو ايسو ڪيڏو: ”هون نيا ڪريا هارو ايٿا ڏنيا ۾ آيوھ، زم اونڌا منڪ ڏيڪي هڪه، پڻ جيا ڏيڪي پاڙين هاس ننه نٿي مونٽا، اُو اونڌون را زم رڻه.“

④① فريسي پالتي را ڪڻڪ منڪ ايسو ڪن اُپا تا. ايسو رٿي اي وات هومپڙين اُوڻي ڪيڏو: ”امي پڻ اونڌا سون ڪي؟“ ④① تو ايسو اُوئون ننه ڪيڏو:

”جي ٽمي هاس ۾ اونڌا هوٽو ان ڏيکي نه هڪوت، تو اي تمارو ڏوه نه ٿئ
جي ٽمي هاس نه نٿي مونت. پڻ ٽمي تو ڪوه ريا جي امي اونڌا نٿي، توئي
هاس ٿي ٽمي اونڪيون ميسين ووه ريا. تيام ٽمي ڏوهاري سو.“



ايسو ناٿوڪا ڌراڙ رو مثال ڏين شيڪاڙڻه

جي او وشواسي منڌڙي رو پڇايا وڙو ان همپاڙ ڪريا وڙو سڻ

10 ① ”هُون تمون نه هاس ئي هاس ڪونه: جيو ڪوئي رڍيون را واڙا
موئين زهونپا ٿي نٿي پيهتو، پڻ پيزا ڪياڪ پاها ٿي مانھ سڙين موئين
پيهڻ، تو او منڪ سور ان ڌاڙيل سڻ. ② جيو زهونپا ٿي موئين زائڻ، او رڍيون
رو ڌراڙ سڻ. ③ اوئا هارو سوڪيڏار زهونپو اوگهاڙڻه، ان رڍيون اوئا رو هاڏ
هومپڙه. او آپري رڍيون نه نوم لين هاڏ ڏڻه ان اوئون نه ٻاري لي زائڻ.

④ زئيون اُو آپري ٻڌي رڊيون ٻاري ڪاڏيھ تئيون اُو آپ رڊيون مور مور وئھ ان رڊيون اُوئا لار لار وئھ، ڪم تو رڊيون اُوئا رو ھاڏ اوڙڪئھ. ⑤ پڻ رڊيون ائيندا منڪ وونھڙ مُوڙگي نئين وئھ پڻ اُوئا ٿي پڙڪشي ان پاڳي زاشي، ڪم تو اُو ائيندا رو ھاڏ نٿي اوڙڪتي.

⑥ ايسو ھاڻي مثال اُوئون نئھ ھمپڙايو پڻ اُوئي ھزميو ئي نئين جي ايسو را ڪيڏا رو مطلب ڪي سئھ.

⑦ تيام ايسو وڙي ڪيڏو: ”هُون تمون نئھ ھاس ئي ھاس ڪونھ: رڊيون ھارو زھونپو هُون سون. ⑧ زتا ڪوڙا منڪ مُون مور آڳيوون ٿين آياھ، اُو ٻڌائي سورون ان ڌاڙيالون جيو سئھ، پڻ زم رڊيون سور رو ھاڏ نٿي ھومپڙتي، تم ماري منڪي اُوئون آڳيوونون ري ڪوڙي واتون نہ موني. ⑨ هُون آپ زھونپو سون. زم رڊيون زھونپا ٿي واڙا موئين زائھ ان ڪترا ٿي پچي زائھ، ان موئين ٻارو اَو زاو ڪرئھ ان اُوئون نئھ سارو زڙئھ، تم جيو منڪ مُون مانھ وشواس راکئھ، اُو پڳوون ري سزا ٿي پچي زاشي ان اُوئا نئھ تارڻ زڙشي. ⑩ سور رُوڳو ايئا ھارو اُوئھ زم سورئي ڪرئھ، مارئھ ان ڪتم ڪرئھ. پڻ هُون تو ايئا ھارو آيوھ، زم منڪون نئھ ايئا حياتي ۾ ھڪ زڙئھ ان تيا ڪيڙ ھميش رو جيون پڻ زڙئھ.

⑪ هُون نائوڪا ڌراڙ جيوو سون. نائوڪو ڌراڙ رڊيون نئھ پڇايا ھارو آپرو جيو ڏئھ. ⑫ جيو منڪ سرومئي لين رڊيون سارئھ ان آپ رڊيون رو ڌڻي نٿي، اُو زئيون نار نئھ آوتو ڏيڪئھ تئيون اُو رڊيون نئھ ساڏين پاڳي زائھ. ان پسئھ نار ڪئينڪ رڊيون نئھ ڦٽئھ ان پڙيون ٻڌيون نئھ وينڪي نوڪئھ. ⑬ سرومئي واڙو منڪ تيام پاڳئھ ڪم تو اُو رُوڳو آپرو ڦائيدو سوچئھ، ان رڊيون رئي ڪئين پروا نٿي ڪرتو.

⑭ هُون نائوڪا ڌراڙ جيوو سون. ڌراڙ آپريون رڊيون نئھ اوڙڪئھ ان رڊيون اُوئا نئھ اوڙڪئھ. ھيوئھ نمونئھ هُون مارون آپرون منڪون نئھ اوڙڪونھ، ان مارا منڪ مُون نئھ اوڙڪئھ، ⑮ زم پڳوون مارو ٻاپ مُون نئھ اوڙڪئھ ان هُون مارا

پاپ پڳوون ننه اوڅکونه. ان زم ډراڙ آپريون ريديون هارو آپرو جيو ډنه، تم هون مارو جيو منکون ننه پچايا هارو ډيونه. (16) ان ماري پيزي ريديون پڻ سته جي اينا واڙا ري نتي. مارنه اوئون ننه پڻ ضرور تيراووه. او پڻ مارو هاڏ هومپڙشي ان پسنه هيک ولهر ان هيک ډراڙ تيشي.

(17) اينا وات ري کري پڳوون مارو پاپ مون ٿي پريم کرهه جي هون مارو جيو ډيونه، ان هيونه نمونه هون وڙي جيو تو ٿيه. (18) کوئي مارو جيو مون ٿي نتي کوتهو، پڻ هون آپري مرضي ٿي مارو جيو ډيونه. مون ننه آپرو جيو ډيڏا ربي اکتیاري سته، ان مون ننه وڙي جيو تو ٿيا ربي اکتیاري پڻ سته. هم کريا رو حکم مارنه پاپ مون ننه ډيڏوه.

(19) هايون واتون ري کري يهوديون موئين وڙي قوت پڙي. (20) اوئون موئين ٿي گهڻا منک کيتات ریا: "اينا ننه پوت سونتيوه ان اي گونڊو ٿين وائيڙي واتون کرهه ريو. تمی اينا ري واتون کم هومپڙوه ریا؟" (21) پڻ پيزا منک کيتات ریا: "اينا ننه تو پوت سونتل نتي. پوت سونتل منک هيوي واتون کم کرين کري هکڻه؟ ان اينه تو اونڌا ري اونکيون اوگهاڙي. پوت ري کڙا ٿي کوئي هم کري هکڻه کي؟"

يهودي ڌرم را اڳيوون وڙي ايسو ننه نمو ماروا کرهه

(22) ټيون ډيون ربي پرپ اوئي، جيا ننه يروشلم شهر ۾ پڳوون را گهر ننه وڙي پويتر کريا ري ياد ۾ مناوتا. او شيئاڙا را ڏي هتا. (23) ان ايسو پڳوون را گهر موئين سليمون نومي ډاڙيا هيٺ ويتوت ريو. (24) تيام يهودي ڌرم را اڳيوون اوئا ري چوڌاري قري آوين کيا مڏيا: "تون کتي وار امارو هاڏ اڌر را کيه؟ جي تون پڳوون رو سونيل پچايا واڙو کريست سته، تو امون ننه چتو چتو کڻه پرو." (25) ايسو اوئون ننه وڙنڌي ډيڏي: "مئين تمون ننه اڳي کيڏو تو، پڻ تمی مارئي وات نتي مونتا. جيا کوم هون مارا پاپ را کيڏا ٿي کرونه، او آپ

٢٦) پڻ ٽمي هاڻي وات نٿي مونت ڪم تو ٽمي مارون منڪون موٽينيا نٿي. ٢٧) زم ريون آڀرا ڌراڙ رو هاڏ اوڙڪڻه ان اوتا رو مونڻه، تم مارا منڪ ماري واتون مونڻه. ان هون اوئون ننه اوڙڪونھ، ان او مون وونھڙ وڻه. ٢٨) هون اوئون ننه هميش رو جيون ڏيونھ، اوئون رو هميش رو موت ڪيڏي نئين ٿئھ. او ماري همپاڙ ۾ ريشي، ان ڪوئي اوئون ننه مون ٿي ڪوهشي نئين. ٢٩) مارو ٻاپ جيئھ اوئون ننه ماري همپاڙ ۾ ڏيڏاھ، او ٻڌون ٿي موٽو سئھ، ان ٻاپ ري همپاڙ ٿي ڪوئي اوئون ننه ڪوهي نٿي هڪتو. ٣٠) هون ان مارو ٻاپ ڀڳوون هيڪ را هيڪ سون.

٣١) تئين يهودي ڌرم ري آڳيووني ايسو ننه نمو ماريا هارو وڙي پوٽا اُٻاڙيا. ٣٢) تيا مانھ ايسو اوئون ننه ڪيڏو: ”مئين تمون ننه ٻاپ را پاها ٿي گهڻا ٺاٺوڪا ڪوم ڪرين ڏيڪاڙياھ. هايون موئين ٿي ڪيا ڪوم ري ڪري ٽمي مون ننه پوٽا هئين ماروا ڪروھ؟“ ٣٣) آڳيووني اوتا ننه وڙندي ڏيڏي: ”ڪياڪ ٺاٺوڪا ڪوم ري ڪري نئين، پڻ ايٺا وات ري ڪري امي تون ننه پوٽا هئين ماروا ڪرونھ جي تئين ڀڳوون رئي پيعزتئي ڪريھ ڪم تو تون منڪ تين آڀ ننه ڀڳوون هرڪو ڪرھ.“

٣٤) ايسو اوئون ننه جواب ڏيڏو: ”تمارا شاستر موئين ڀڳوون رئي ڪيڏل اي وات لڪل نٿي ڪي؟“

’مئين ڪيڏو جي ٽمي آڳيوون مون ڀڳوون را زم سو.’

٣٥) ايئنھ شاستر ۾ ڀڳوون آڀ اوئون منڪون ننه ام ڪنھ، جيون ننه اوئھ نياپو ڏين آڀرا ڪوم مانھ راڪيا تا، جي او ڀڳوون جيوا سئھ. ان شاستر تو هميش هاسو سئھ. ٣٦) هوئھ مون ننه ڀڳوون ٻاپ آڀري شيوا هارو سونديوھ ان ڏنيا ۾ ميليھو. تو پسئھ زئين مئين ڪيڏوھ جي هون ڀڳوون رو ڏيڪرو سون، تو ٽمي ڪم ڪوھ ريا جي هون ڀڳوون رئي پيعزتئي ڪرونھ؟ ٣٧) جي هون مارا ٻاپ را ڪيڏل ڪوم نه ڪرتو هوئون، تو پلئھ مارئي وات مت مونو. ٣٨) ان پلئھ مارا

ڪيڏا ري ڪري مارئي وات مت مونو. پڻ زئيون هُون پڳوونَ را ڪيڏل ڪوم ڪرونه ريو، تو گهٽ ۾ گهٽ مارون ڪومون ننه زوئينَ مارئي وات مونو، زم تمون ننه ڪهر پڙهه ان هميش ڪهر هوئه جي مارو همد پڳوونَ ٻاپ ٿي سته ان پڳوونَ ٻاپ رو همد مُون ٿي سته.

(39) تيام اُوئي وڙي ايسو ننه زهالوا ڪريو، پڻ اُو اوتون رون هاتون ٿي نيهري گيو.

(40) تئين ايسو يردن ڌريا پار ڪرين اوتا ماڳ گيو جيئنه شروع ۾ يوحنا پويتر سنون ڏيتو. ان ايسو اوئيه زائين ريو. (41) ان اوتا ڪن گهٽا منڪ آيا، ان اُو آيت ۾ ڪيا مڏيا: ”يوحنا تو ڪوئي پرسو نتو ڏيڪاريو، پڻ جي واتون يوحنا ايئا منڪ را پارام ڪيڏي تي، اُو ٻڌي هاسي سته.“ (42) ان اوئيه گهٽي منڪي ايسو مانه وشواس اوئيو.

ايسو را دوست لعزر رو موت

11 ① هوه هيك لعزر نومي منڪ هتو، جيو موندو هتو. اُو يهوديه صوپا را بيت عنياه گوم رو هتو، جيئنه ٻائي مريم ان اوتا رئي پين مارٿا ريتي. ② هائي مريم اُو رئي اُو سته جيئنه تيا ڪيڙ پريو ايسو رون پگون مانه عطر نوميو ان آپرون مٿوڙون ٿي اوتون ننه پونهيا، ان هائي لعزر نومي منڪ جيو موندو هتو مريم رو ٻائي هتو.

③ تيام ٻئي پيني ايسو ننه اي نياپو ڏي ميليو: ”پريو، تمارو دوست موندو سته.“ ④ زئيون ايسو ننه هائي نياپو زڙيو، تو اوئيه ڪيڏو: ”ايئا پيماري رو نتيجو موت نئين ٿنه، پڻ اي پيماري تيام اوئيه جي پڳوونَ را وڪوڻ ٿنه، ان ايئا پيماري ري ڪري مُون پڳوونَ را ڏيڪرا رو مون ساوو ٿنه.“

⑤ هوه ايسو مارٿا ان اوتا ري پين ٿي ان لعزر ٿي گهٽو پريم ڪرتو. ⑥ توئي پڻ زئيون اوتا ننه ڪهر پڙي جي لعزر موندو سته، تئين اُو پيزا ٻي ڏي



بيت عنياہ

اوت رو اوت ريو. ⑦ ان پسئ تيا ڪيڙ اوتئ اپرون شيلون نئ ڪيڏو: ”هالو، هوئ آبي يهوديه صوپا موئين وڙي پاسا هالون.“ ⑧ شيلي اوتئ نئ ڪيڏو: ”گرو جي، ڪال رئ ڏي اوت را منڪ تمون نئ پوئون ٿي ماروا ڪرتات ريا، تو پسئ تمي اوتئ همئئ ڪم زائوه ريا؟“

⑨ ايسو وڙندڙي ڏيڏئي: ”ڏي ۾ سوجهرا را ٻارئ ڪلاڪ سئ نا؟ جي ڪوئي ڏي رو وئ اُو نئين آڪڙئ، ڪم تو اُو سوجهرا ۾ پاڙشي. ⑩ پڻ جي ڪوئي رات رو اندارا ۾ وئ اُو آڪڙين پڙشي، ڪم تو اوتئ ڪن سوجهرو سئ ئي نئين. هيونئ نمونئ مارو موت رو توئو هزون نه آيو، ان زئيون هوڏي هون دنيا ۾ سون، تئين هوڏي مارئ پڳوون رو ڪوم ڪرووه.“ ⑪ تيا ڪيڙ ايسو شيلون نئ وڌارئ ڪيڏو: ”آپئو دوست لعزر اُونگهائي گيوه، پڻ هون اوتئ نئ زڳاڙيا هارو زائونھ ريو.“ ⑫ تيام شيلي اوتئ نئ ڪيڏو: ”پريو، جي اُو اُونگهائي گيوه، تو پسئ اُو ئيڪ ٿي زاشي.“

⑬ هوئ ايسو زئيون ڪيڏو جي لعزر اُونگهائي گيوه، تو اوتئ رو مطلب هتو

جي اُو مري ڳيوه. پڻ شيلي هُزميو جي اُو رُوڳو اُونگه را پارام ٻولڻه ريو. (14) تيام ايسُو اُوئون نئه چتو ڪيڏو: ”لعزر تو مري ڳيوه. (15) ان تمون هارُو ڪرين هُون ڪُش سون جي هُون اُوئنه نٿو، ڪم تو هَوئنه تمارو يقين وڌارنه پڪو ٿيشي. پڻ هَوئنه هالو، اُوئا ڪن هالون.“ (16) تيام توما جيا نئه ٻيللاڙيو پڻ ڪيتا، اُوئنه پيزون شيلون نئه ڪيڏو: ”هالو، آبي پڻ هالون زم ايسُو پيڙا مرائون.“

ايسُو جيوي اوناڙيا واڙو ان هميش رو جيون ڏيڏا واڙو سئ

(17) زئيون ايسُو بيت عنياه گوم ڏوڪڙو پوڳيو، تئيون اُوئا نئه ڪهر پڙئي جي لعزر رو لاش مقوم موئين پوريا نئه چار ڏي ٿي ڳياھ. (18) هَوئنه بيت عنياه گوم يروشلم شهر ٿي ڏوڪڙو هتو، لڳ ڀڳ هڪا ڳاڻو رو پنڌ هتو. (19) ان يهوڊي قوم را گهڻا منڪ يروشلم ٿي مارڻا ان مريم ڪن اُوئون را پائي ري لوڪاسار هارُو آيا تا.

(20) زئيون مارڻا هومپڙيو جي ايسُو آوئنه ريو، تو اُو گوم ٿي ٻارئي نيهرين اُوئا نئه مزوا گهڻي، پڻ مريم گهري ٻيئي رئي. (21) تئيون مارڻا ايسُو نئه ڪيڏو: ”پريو جي، جي تم ايتنه هوئوت، تو مارو پائي نه مرئ. (22) توئي پڻ هنجي مُون نئه ڪاتري سئ جي جئين ڪئين تم پڳوون ٿي مونڱوه، اُو پڳوون تمون هارُو ڪشي.“ (23) ايسُو اُوئا نئه ڪيڏو: ”ٿارو پائي وڙي جيو تو ٿيشي.“ (24) تو مارڻا اُوئا نئه ڪيڏو: ”مُون نئه ايئا رئي ڪهر سئ جي اُو وڙي جيو تو ٿيشي زئيون ڏنيا ري پڇاڙي را ڏي مانھ پڳوون ٻڌون منڪون نئه جيوي اوناڙشي.“ (25) تئيون ايسُو ڪيڏو: ”جيوي اوناڙيا واڙو ان جيون ڏيڏا واڙو هُون سون. جيو مُون مانھ وشواس راکڻه، اُو پلئنه مري زائنه، توئي پڻ اُو جيو تو ريشي.“ (26) هر هيڪ منڪ جيو جيو تو سئ ان مُون مانھ وشواس راکڻه اُو هميش هارُو ڪيڏي نئين مرئ، پڻ اُوئا نئه هميش رو جيون زڙشي. ڪي تُون ايئا وات مانھ يقين ڪرئ؟“ (27) تئيون مارڻا ڪيڏو: ”هوئنه پريو، هُون وشواس راکونه جي تم

پڳوونَ را سُونڍل پڇايا واڙا ڪريست سو، ان پڳوونَ را ڏيڪرا سو، جيا را دُنيا
۾ آيا را پارام شاستر ۾ اڳي لڪل سته.

ايسو منڪون ننه ٿيل ڏڪون ري ڪري روئھ

②8 هم ڪينَ مارٽا ايسو ڪن ٿي گهڻي پري ان آري گهري زائينَ آري بينَ مريم
ننه سونئي ماٿ اي وات ڪرينَ تيڙاوي جي: ”گرو جي ايئنه آيا، ان تون ننه
هاڏ ڪرئ ريا.“ ②9 مريم اي هومپڙين هٽمارئي اُونين ايسو ڪن گهڻي. ③0 ايسو
هزون گوم موئين نٿو آيو، پڻ اوت رو اوت اُپو تو جيئنه مارٽا اونا ٿي مڙي
تئي. ③1 تيام اُو يهودي منڪ جي مريم ري گهري لوڪاسار هارو آيا تا، زئون
اوني زيوو جي مريم هٽمارئي اُونين گهڻي پري، تيون اُو پڻ اونا لار لار گيا،
ڪم تو اُو سوچتا تا جي مريم لعزر را مقوم مانھ پار لينَ روبا هارو زائھ رئي.
③2 زئون مريم ايسو ڪن آوي، تيون ايسو ننه زوينَ اونا ري پڳي پڙي
هنئي ان اونا ننه ڪيڏو: ”پريو جي، تم ايئنه هوٽ، تو مارو پائي نه مرئ.“
③3 زئون ايسو اونا ننه روتئي ڏيڪي ان اونا پيڙا اول يهوديون ننه روتون ڏيڪيا،
تو ايسو ننه من ۾ گهڻو ڏڪ ٿيو. ③4 ان اونه پونسو: ”اُو مقوم ڪيھ سته جيئنه
تم اونا ننه راڪيوھ؟“ تو اوني ايسو ننه ڪيڏو: ”سادو جي، تم ايپ هالينَ
زوئو.“ ③5 تيون ايسو رويو پرو. ③6 تيام يهوديني ڪيڏو: ”زوئو، اي اونا ٿي
ڪتو گهڻو پريم راڪتو!“ ③7 پڻ ائون موئين ٿي ڪئينڪ منڪي ڪيڏو: ”ايئنه
اونا اونڌا ري اونڪيون اُوگهاري تي، تو پسنه ايئا ننه مريا ٿي ڪم نه پڇايو؟“

ايسو لعزر ننه جيوتو ڪرئھ

③8 تيام ايسو من ۾ وڙي گهڻو ڏڪي ٿيو ان اونا مقوم مانھ آيو. هوئھ مقوم
پونئيرا جيوتو هتو، ان اونا را مونڊا مانھ موئي شيپر آڏي ڏيڏل هئي. ③9 تيام
ايسو ڪيڏو: ”شيپر ننه هيڪنه پاهنه ڪرو.“ تو مرل منڪ ري بينَ مارٽا، جئي

اوتنه اول هتئي، ايسو ننه ڪيڏو: ”پرڀو، هونءِ اوتنا رو لاش تو گهندائي وڙيو هوشي، ڪم تو آڙ چارمو ڏي سٺه.“ (40) پڻ ايسو اوتنا ننه ڪيڏو: ”مٿين تون ننه ام نٿو ڪيڏو ڪي؟ جي تون وشواس راکيه، تو تون پڳهون رئي ڪڙا پاڙيه.“ (41) پسٺه منڪي اوتنا شيپر ننه پاهنه ڪرئي پرئي. تئين ايسو آڪاش هومو زوئين پڳهون ٿي ام پراٽنا ڪرئي: ”او ها، هون تمارو ٿورو مونونه جي تمي مارو هاڏ هومپڙيوه.“ (42) مون ننه تو ڪبر سٺه جي تمي هميش مارئي هومپڙوه. پڻ هون آهنه پاهنه اوڀل ايئون گهئون منڪون هارو هم ڪونه ريو، زم او يقين ڪرڻه جي تمي مون ننه ميليوه.“

(43) هم ڪين ايسو اوتومئو ڪيڏو: ”او لعزر، بارو نيهرې آو!“ (44) تيا مانءِ او منڪ جيو مري گيو تو، او جيوتو ٿين مقوم ٿي بارو نيهرې آيو. اوتنا رن هاتون پڳون مانءِ هوڙ ننه قابو راکيا هارو پاٽا ٻونڌل هتا، ان اوتنا را ماتا مانءِ لوگهڙو وينتوڙل هتو. تيام ايسو منڪون ننه ڪيڏو: ”ايٺا ننه سوڙو پرو.“

يهوديون رئي ڌرمي پنچائيت ايسو ننه نمو ماري رو ڦينصلو ڪرڻه

(متي 5-1:26، مرقس 2-1:14، لوقا 2-1:22، يُوحنا 45:11-53)

(45) تيام جيا يهودي منڪ مريم ڪن لوڪاسار هارو اول هتا، ان جيئي زويو جي ايسو ڪي ڪريوه، اوئون موئين ٿي گهڻي منڪي هايا وات ري ڪري ايسو مانءِ وشواس اوٿيو. (46) پڻ اوئون موئين ٿي ڪئينڪ منڪ فريسي پالتي رن منڪون ڪن گيا، ان اوئون ننه ٻڌئي وات ڪرئي جي ايسو ڪي ڪريوه.

(47) تيام يهودي قوم ري موٽي پوزاريئي ان فريسي پالتي ري منڪي آڀرئي ڌرمي پنچائيت پيڙئي ڪرئي ان ڪيڏو: ”هونءِ آڀي ڪي ڪرشن؟ ڪم تو هائي منڪ گهڻا پرسا ڏيڪاڙڻه ريو.“ (48) جي آڀي اوتنا ننه همروم ويوا ڏيون، تو ٻڌائي منڪ اوتنا مانءِ وشواس اوٿشي. ان پسٺه آڀون مانءِ جيئي رومي حڪومت سٺه، او

آپريئي قوز ميلين نه رُوڳو پڳوون رو گهر کتم ڪرشي پڻ آڀئي قوم ننه پڻ کتم ڪرشي پري. (49) تئين ڌرمي پنچائيت موئين ٿي هيڪه ڪائيفا نومي منڪ جيو اوتا وڪت ۾ مُڪ پوزاري هتو، اونه اوتون ننه ڪيتو: ”نمي هاو ڪئين نٿي هزمتا. (50) تمون ننه اٽڪئي ڪهر ئي نٿي پڙتئي ڪي؟ آڀتو ڦاڻيڏو تو ايئا ۾ سئه جي آڀئي يهودي قوم هارو هيڪ منڪ مري زانه زم پوري قوم پچي زانه.“

(51) هونه زئين اونه هائي وات ڪيڏي ٿي، تئين اوتا رو ڪيال اي هتو جي او آپرا پاها ٿي هائي صلاح ڏه ريو. پڻ هاس ۾ اوتا وڪت رو مُڪ پوزاري هوتون اونه پڳوون را پاها ٿي نياپو ڏيڏو تو، جي ايسو يهودي قوم ننه پچايا هارو آڀرو جيو ڏيشي. (52) ان ايسو نه رُوڳو يهودي قوم هارو پڻ ٻڌيون قومون رون منڪون هارو آڀرو جيو ڏيڏو، زم جيا ڌار ڌار منڪ پڳوون آپرا ٻار ٿيا هارو سونديا تا، اوتون ٻڌون ننه ايسو هيڪا توڙام پيرا ڪره.

(53) تيام مُڪ پوزاري را ڪيڏا پرموتنه اوتا توتا ٿي لين يهوديون ري ڌرمي پنچائيت ايسو ننه نمو ماريا هارو نا نيا. (54) هايا وات ري ڪري ايسو تيا ڪيڙ آڀرون يهودي منڪون وسا ساونه ڍاڙهه نتو ويتو. پڻ اوت ٿي نيهرين اوتا علاقا ۾ گيو جيو رڻ ڏوڪڙو سئه، ان افرائيم نومي شهر ۾ زائين آڀرون شيلون پيرو ريو مڏيو.

(55) تئين يهودي ڌرم ربي پاشڪا نومي پرڻ ڏوڪڙي آئي. ان ٻاراڙي را گهڻا منڪ پرڻ مور يروشلم شهر موئين گيا، زم پرڻ منيا هارو پويتر ٿيا ربي سونت لئه. (56) او منڪ ايسو ربي وات زوين ايل اول لوتا واڙتا تا، ان پڳوون را گهر ۾ اوپين هيڪا پيرا ننه ڪيتات ريا: ”تمارو ڪي ڪيال سئه؟ هونه او پرڻ مانھ آوشي ڪا نئين آونه؟“

(57) هونه موتي پوزاريئي ان فريسي پالتي ري منڪي اي حڪم ڪاڍيو تو، جي ڪياڪ منڪ ننه ايئا وات ربي ڪهر هونه جي ايسو ڪيه سئه، تو اوتا ره اوتون ننه ڪهر ڏيوو، زم او ايسو نه زهالي هڪه.

مريم ايسو را مون ۾ اونا رن پڳون مانه عطر هڻه

(متي 13:26-13، مرقس 14:3-9، يُوحنا 1:12-8)

12 ① پسته ايسو، پاشڪا نومي پرپ مانه زايا هارو، پرپ ٿي سوئون ڏيئون مور بيت عنياه گوم موئين آيو، جيئن لعزر نومي منڪ ريتو جيا نئه ايسو جيوتو ڪريو تو. ② تيام اوڻه اونا گوم ري منڪي ايسو را مون ۾ ڌاوت ڏيڏي. ڌاوت ۾ مارٽا شيوا ساڪري ڪرڻي رئي، ان لعزر پيزون ڌاوتون پيزو هتو، جيا ايسو پيزا روڻي کاڌا هارو رواز پرموڻه ڪوئي وروڻا آڏا هوتل هتا. ③ تيون مريم آڌ شير جڻاماسي نومي وڻ رو هاسو ان مونگهو عطر لين ايسو نئه مون ڏيڏا هارو اونا ري پڳوڻي زائين اونا رن پڳون مانه نوميو پرو، ان آپرون موٽارون ٿي اونا رن پڳون نئه پونهيا. عطر رئي ڪشيو ٻڌا گهر ۾ پڪڙي گهي.



④ پڻ يهوداه اسڪريوتي جيو ايسو رن شيلون موئين ٿي هيڪ هتو ان جيئن تيا ڪيڙ ايسو نئه زهلايو، اونه ڪيڏو: ⑤ ”هائي عطر ڪم نه ويسو ان اونا را پيها گريهون نئه ڪم وراوي نه ڏيڏا؟ هائي عطر ويسٽ تو پئرئه هزار روپيا زڙت.“ ⑥ اونه هم تيام نتو ڪيڏو جي او گريهون رو ڪيال راکتو، پڻ تيام ڪيڏو تو ڪم تو او آپ سور هتو، ان جيا پيها منڪ ايسو ان شيلون نئه ڏون ۾ ڏيتا، او پيها اونا رنه خواله ٻئون ۾ هوڻي، ان او هايون پيهاون موئين ٿي آپ هارو سور ٿي ڪرتو.

⑦ تيون ايسو يهوداه نئه ڪيڏو: ”ايئا ٻائي رئي ڳلا مت ڪر! ايئا رنه اي عطر هنڱريام پڳون رئي مرضي هئي، زم مارئه مريا مور اي مون نئه مقوم موئين پوريا ري ٿياري ۾ مون مانه نومئه. ⑧ گريپ تو هميش تمون ڪن هوشي، پڻ هون هميش تمون ڪن نئين هوئون.“

موٽا پُوزاري لعز نٿه مراووا ڪرڻه

⑨ الاهي گهڻون يهوديون نٿه ڪبر پڙهي جي ايسو بيت عنياه گوم ۾ سٺه، ان اُو اوتنه آيا. اُو نه رُوڳو ايسو ري ڪري آيا، پڻ لعز نٿه پڻ زووا آيا، جيا نٿه ايسو جيوتو ڪريو تو. ⑩ تيام موٽي پُوزاريئي آيت ۾ ڦينصلو ڪريو جي اُو لعز نٿه پڻ مراوڻه، ⑪ ڪم تو اُوئا ري ڪري گهڻا يهودي اُوئون نٿه ساڏين ايسو وونهڙ ويتات ريا ان يقين ڪرتات ريا جي اُو پڳوون رو سُونڊل پڇايا واڙو ڪريست سٺه.

ايسو يروشلم شهر موئين اوڻه

ان گهڻا منڪ اُوئا نٿه پڳوون رو سُونڊل پڇايا واڙو ڪريست مونين اُوئا را وڪون ڪرڻه

(متي 11:1-11، مرقس 11:1-11، لوقا 19:28-40، يُوحنا 12:12-19)

⑫ پيڙه ڏي اُو گهڻا منڪ جيا زاترو ٿين پرڀ منايا هارو يروشلم شهر موئين آيا تا، زئيون اُوئي هومپريو جي ايسو ايٿه اوڻه ريو، ⑬ تئيون اُوئي ايسو را مون ۾ ڪزيون ري ڏاڙڪي ليڏي ان اُوئا رو آوڪار ڪريا هارو شهر ٿي ٻارا نيهريا. اُو ايسو رهي جئي ام بوللوتات ريا:

”جئي جئي! ايسو رهي جئي!

ايشور رو ايشيرواڏ ايٿا مانه هوڻه


جيو ايشور را پاها ٿي اوڻه!

اسرائيلي قوم را پاڏشا رهي جئي هوڻه!”

⑭ ايسو هيڪ گڏيڙي رو وشيرو هات ڪريو تو، ان اُوئا مانه سڙين آوتوت

ريو، زم شاستر موئين لڪل سٺه:

⑮ ”پيٿائو مت، يروشلم رون منڪون!



زوئو، تمارو پاڌشا آوئھ ريو.

گڏيڙي را وشيرا مانھ سڙين آوئھ ريو.

①6 اُوئھ توئئھ ايسو را شيللا اي واتون نہ

ھڙميا، جي ايسو ھم ڪريا ٿي آپ نہ پڳوون

رو سُونڊل پڇايا واڙو ڪريست ڏيڪاڙئھ ريو. پڻ

پسئھ تيا ڪيڙ، زئيون پڳوون ايسو نہ آڪاش

۾ آپرا مون ۾ ليڌو، تئيون اوئون نہ ھمپريو جي ھائي واتون پڳوون را سُونڊل

پڇايا واڙا را پارام اڳي شاستر ۾ لڪل ھتي، ان ھائي ٻڌي امريم ايسو مانھ

پوري ٿي گبي.

①7 ھوئھ جيا گھڻا منڪ ايسو پيڙا ھتا زئيون اُوئھ لعزر نہ مقوم ٿي نيھريا

ھارو ھاڏ ڪريو تو ان اوئا نہ جيوتو ڪريو تو، او ٻڌائي منڪ ھايا وات رئي

ھاڪ پرين ھمپراوتا ريا، ①8 ان تيا ري ڪري ھائي زاتروئون رو موٽو توڙو ايسو

رو آوڪار ڪريا ھارو نيھريو، ڪم تو اوئي ھومپريو تو جي ايسو ھائي پرسو

ڏيڪاڙيوھ. ①9 تيام فريسي پالتي ري منڪي آيت ۾ ڪيڏو: ”وات ساوئي سئھ

جي آپون نہ ڪئين ٿي وٽو. زوئو، ٻڌائي منڪ اوئا وونھڙ وونھڙ ويوا مڏياھ!“

ايسو ڪڻڪ را ڏوٿا رو مثال ڏين ڌاري قوم واڙون نہ شيڪاڙئھ

جي او ٻڌون منڪون نہ پڇايا ھارو آپرو جيوت ڏيشي

②0 جيا زاترو يروشلم شھر موئين پڳوون رئي پوزا ڪروا پرپ مانھ اول ھتا، او

روگا يھودي نتا پڻ اوئون موئين ٿي ڪئينڪ ڌاري قوم واڙا پڻ ھتا. ②1 تيام او

ڌاري قوم واڙا منڪ فلپس ڪن آيا، جيو گليل صوپا را بيت صيدا شھر رو ھتو،

ان اوئا رئي منٽ ڪرين ڪيڏو: ”ساب، امي ايسو ٿي مڙوا ڪرونھ. ميرپونئي

ڪرين امون نہ ايسو ٿي مڙاو.“ ②2 تيام فلپس اندرياس ڪن زائين ڪيڏو، ان

پسئھ فلپس ان اندرياس ٻئي زئي ايسو ڪن زائين وات ڪري.

②③ تئيون ايسو اوتون ننه ڪيڏو: ”او توتو هوئه آيوه رو، زئون مون منڪ ذات را ڏيڪرا رو مون ساوو ٿيڻي. ②④ هون تمون ننه هاس ئي هاس ڪونه: زئون هوڏي ڪڻڪ رو ڏوتو زمي موئين پڙين زوتنه مري نٿي زاتو، تئيون هوڏي او روگو هيڪ هيڪلو ڏوتو رهن. پڻ جي مري زائنه، تو اوتا ٿي گهڻا پيرا ڏوتا ٿهن. هيون نموننه مارنه پڻ مرووه زم گهڻون منڪون ننه هميش رو جيون زرنه. ②⑤ جيو آپرا جيو ٿي پريم ڪرهن، تو نيٺ اوتا رو جيو گمائي زاشي. پڻ جيو ايئا دنيا ۾ آپرا جيو ري ڪراپ ممتائون ننه مارهن، تو اوتا رو جيو پجي زاشي ان اوتا ننه هميش رو جيون زڙشي. ②⑥ جي ڪوئي مارئي شيوا ڪرهن، تو اوتا رنه مارا مارگ مانه وين مون وونهڙ آوو. ان جيئنه هون هوئيه، اوتنه مارو شيواڏاري پڻ هوشي. جي ڪوئي مارئي شيوا ڪرهن، تو مارو ٻاپ پگهون اوتا رو مون راڪشي.“

ايسو آپرا هوڙي مانه مريا را پارام همپزاوئهن

②⑦ ”هوئه مارو من آيا وازون ڏڪون ٿي پيئانه، پڻ هون ڪي ڪون؟ هون پگهون ٿي اي منٽ ڪرون ڪي؟ او ٻا، مون ننه آيا وازا ڏڪون را توتا ٿي پچاوو. نا، هم تو نئين ڪرون، ڪم تو ايئا توتا هارو تو هون آيوه. ②⑧ او ٻا، تمي مارا موت ٿي آپرا وڪون ڪراو!“

تئيون آڪاش ٿي پگهون رو آواز آيو: ”تاري حياتي ٿي مارا وڪون ٿيا، ان وڙي ٿارا موت ٿي پڻ مارا وڪون ٿيڻي.“

②⑨ جيا گهڻا منڪ اوتنه اوپل هتا اوئي هائي آواز هومپڙين ڪيڏو: ”گاز ٿيوه.“ پڻ پيري منڪي ڪيڏو: ”هڪئنه آڪاشي ڏوت هايا ٿي وات ڪريهن.“

③⑩ تيا مانه ايسو ڪيڏو: ”هائي آواز مون هارو نئين، پڻ تمون هارو ٿيوه.“

③① همئنه او توتو سته زئون پگهون دنيا رون منڪون رو ڦينصلو ڪرين ڏوهون ربي سزا ڏيڻي، همئنه ايئا دنيا رو مڪ شيطون آپرا راز ٿي ڪيڏاڻي. ③② ان

زئيون هُون اُونسو سَرائين اِينا دُنيا ٿِي زائيه پِرو، تئيون هُون ٻڌون منڪون نئه آپ هوما توڻي ليه.

(33) ايسُو هائي وات آپرا موت را نمونا را پارام ڪيڏي ٿي. اوتا رو مطلب هتو جي اُو هُوڙي مانھ سَرائين مري زاشي.

(34) تيا مانھ ٻڌي منڪي اوتا نئه ڪيڏو: ”امي شاستر موئين ٿي هومپڙيوھ جي پڳوون رو سُونڍل پڇايا واڙو ڪريست هميش هُوڙي جيو تو ريشي. ان امي تو ام هزمونھ ريا جي منڪ ذات رو ٺيڪرو ان پڇايا واڙو ڪريست هيڪ رو هيڪ سئ. تو پسنه تمي ڪم ڪرين ڪوھ ريا، جي هُون منڪ ذات رو ڏيڪرو اُونسو سَرائين اِينا دُنيا ٿِي زائيه پِرو؟ جي منڪ ذات را ڏيڪرا رو مطلب ڪريست نٿي، تو هايا رو ڪي مطلب سئ؟“

(35) تيام ايسُو اوئون نئه ڪيڏو: ”هزون ٿوڙيڪ وار هُوڙي هُون سوجهرو ٿين تمون ڪن سون. زئيون هُوڙي هُون تمون ڪن سون، تئيون هُوڙي مارا سوجهرام آڳڙ ويتا ريو، متون اندارو تمون مانھ آوي پڙئ. جيو اندارا ۾ وئھ اوتا نئه ڪبر نٿي هوئيئي جي ڪيال زائھ ريو. (36) همئھ هُون تمون ڪن سوجهرو سون، تو تمي مون سوجهرا مانھ يقين راکو، زم تمي سوجهرا ۾ وُڍا واڙا ٿيو.“

گھڻا بهُڍي هاس ٿي اونڪيون ميسئھ

ان ايسُو مانھ وشواس نٿي اوئتا

ايسُو اي ٻڌي واتون ڪين اوت ٿي گيو پِرو، ان اوئون ٿي هتائي گيو. (37) ايسُو اوئون رئه رُوپرو اتا گھڻا پرسا ڏيڪارين ٿا پئي ڏيڏي جي اُو ڪوڻ سئ، توڻي پڻ اوئي ايسُو مانھ وشواس نه اوئيو. (38) هم تيام ٿيو زم پڳوون رو نياپو ڏيڏا واڙا يسعياه رئي وات اوئون مانھ هاسئي ٿئ:

”او ايشور، امارا ڏيڏل نياپا مانھ ڪيئھ يقين ڪريوھ؟“

ان پڙو رئي ڏيڪارل ڪڙا ڪيئھ اوڙڪيھ؟“

③9 اُو منڪ پڳوونَ رُئ ڪِلَافَ ضِيدي هُويا ري ڪري ايسُو مانھ وشواس اوڻي نہ هڪيا، ڪم تو يسعياھ اي پڻ ڪيڏو:

④0 ”پڳوونَ اوڻون نئھ اوڻون ري آپري مرضي مانھ ساڏينَ

اوڻون نئھ اونڌون را زم ٿيا ڏيڏاھ

ان اوڻون نئھ ضِيدي ٿيا ڏيڏاھ

نڪا اُو آپريون اونڪيون ٿي ڏيڪت

ان آپرا من ٿي هُزمت

ان وڙين پڳوونَ ري وات مانھ وٽ

ان پڳوونَ اوڻون نئھ پڇاوت.

④1 پڳوونَ يسعياھ هومئي اڳي وات ساوئي ڪري ٿي جي پريو ايسُو ڪتو

مون ان وڪوڻ رُئ لائيق سئھ. تيام يسعياھ هائي واتون ڪيڏي زم وات ساوئي تئھ جي يهوڊي ايسُو مانھ وشواس ڪم نئين اوئھ.

④2 توڻي پڻ يهوڊيون ري ڌرمي پنچائيت ري گهڻي منڪي ايسُو مانھ يقينَ

ڪريو جي اُو پڳوونَ رو سُونڍل پڇايا واڙو ڪريست سئھ. پڻ اُو فريسي پالتي

رون منڪون ٿي پڻاتا تا. تيام اوڻي آپرو وشواس نہ پاسيو، متون فريسي پالتي

واڙا اوڻون نئھ ڌرم ٿي ڪاڏين نات ٻارا ڪرئھ. ④3 اوڻي پڳوونَ ٿي زڙل مون نئھ

گهٽ هُزميو ان منڪون ٿي زڙل مون نئھ وڌارئھ هُزميو.

ايسُو ري واتون نہ مونيا واڙا آپ مانھ سزا لئھ

④4 تئين ايسُو اوتومئا هاڏ ٿي ڪيڏو: ”جيو مون مانھ وشواس راکئھ، اُو نہ

رُوڳو مون مانھ وشواس راکئھ، پڻ پڳوونَ مانھ پڻ وشواس راکئھ جيئھ مون

نئھ ميليھ. ④5 ان جيو مون نئھ ڏيڪئھ، اُو پڳوونَ نئھ ڏيڪئھ، جيئھ مون نئھ

ميليھ. ④6 هُون سوجھرو تين ڏنبا ۾ آيوھ، زم جيو ڪوئي مون مانھ وشواس

راڪئھ، اُو اندارا ۾ نئين رئھ. ④7 جي ڪوئي ماري واتون هومپڙئھ، پڻ اوڻون مانھ

ويتو نٿي، تو هُون آپ اُوئا نئه سزا ڏيڌا رو ڦينصلو نٿي ڪرتو. ڪم تو هُون ڏنيا رُون منڪون نئه سزا ڏيڌا رو ڦينصلو ڪريا هارُو نئين، پڻ ڏنيا رُون منڪون نئه پڇايا هارُو آيوه. (48) توڻي پڻ جيو مُون نئه نٿي هونڪارتو ان ماري واتون نٿي مونتو، اُوئا مانھ سزا رو ڦينصلو ضرور ٿيشي. ڪم تو جيو وڃن مئين همپڙايوه، اُوئا وڃن نئه نه مونيا ري ڪري، ڏنيا ري پڇاڙي ۾ نيا رئه ڏي اُوئا مانھ سزا رو ڦينصلو ٿيشي. (49) ڪم تو هُون آپرا پاها ٿي نٿي ٻوليو، پڻ مارئہ ٻاپ پڳوون جيئہ مُون نئه ميليھ، اُوئہ مُون نئه حُڪم ڏيڏوھ جي مارئہ ڪي ڪيو ان ڪي همپڙاوو. (50) ان مُون نئه ڪٻر سئہ جي مارئہ پڳوون رو اي حُڪم مونيا ٿي منڪون نئه هميش رو جيون زڙئہ. تيام جي ڪئين هُون ڪونھ، هُون همروم ڪونھ، زم مارئہ ٻاپ مُون نئه ڪيڏوھ.

ايسُو آڪري وار شيلون پيڙو روٽي ڪانه، زهلاڻه هُوَڙي مانھ مرئہ ان مقوم موئين پورائھ

ايسُو آپرون شيلون را پڳ تويا ٿي شيڪارڙھ
جي پورا پريم ٿي هڪا پيڙا رئي شيوا ڪرو



13 ① ايسُو نئه پاشڪا پرڀ مور ڪٻر
هٽئي جي هَوئہ اُو توتو آيوھ رو، زئيون
هُون اي ڏنيا ساڏين آپرا ٻاپ پڳوون ڪن زائئھ.

ايسُو هميش آپرون منڪون ٿي پريم ڪرتو آيو جيا ايڻا ڏنيا ۾ هتا، ان هَوئہ اُوئہ
آپرون منڪون ٿي اتو گهڻو پريم ڪريو جيا ٿي وڌارئہ پريم سئہ ئي نئين.

② ايسُو ان اُوئا را شيلا پيڙا ٿين هونز رو پرڀ رو پوزن زماتات ريا. شيطون
اڳي شمعُون اِسڪريوتي را ڏيڪرا يهوداه را من ۾ اي ڪيال نوڪيو تو جي اُو
ايسُو نئه زهلاوئہ. ③ ايسُو نئه ڪٻر هٽئي جي اُوئا رئه ٻاپ پڳوون ٻڌوئي ڪئين

اُوتَا را ڪيڏا ۾ راڪيوھ، ان اُو پڳھون ڪن ٿي آيوھ ان پڳھون ڪن زايا وازو سئ. ④ تيام اُوئھ ڪاڏا ٿي اُونين آڀرو ماڻليو پيرل گھنگھو اُوتاريو، ان پستھ تُوڻال لين ڪڙيون مانھ ٻونڌيو. ⑤ ان تيا ڪيڙ پوڻي نونڀڙا ۾ نومين اُو آڀرون شيلون را پڳ ڏووا مڏيو، ان ڪڙي ٻونڌل تُوڻال ٿي اُوئون را پڳ پونھوا مڏيو. ⑥ زئيون نمپروار ايسو شمعون پطرس ڪن آيو، تئيون پطرس اُوتَا نئھ ڪيڏو: ”پرڀو، تمي مارا پڳ ڏوشو ڪي؟“ ⑦ تيا مانھ ايسو اُوتَا نئھ ڪيڏو: ”اي جي هُون ڪرونھ ريو اُو ٿارا هزميا ۾ همئھ نٿي آوتو، پڻ تيا ڪيڙ تُون نئھ هزميا آوشي.“ ⑧ پڻ پطرس اُوتَا نئھ ڪيڏو: ”تمون نئھ هُون مارا پڳ ڪيڏي نئين ڏووا ڏيون.“ تيا مانھ ايسو اُوتَا نئھ ڪيڏو: ”جي هُون ٿارا پڳ نه ڏوئون، تو ٿارو مُون ٿي ڪئين واسطو نئين هوئ.“ ⑨ تئيون شمعون پطرس اُوتَا. نئھ ڪيڏو: ”پرڀو، نه رُوڳا مارا پڳ ڏوئو، پڻ مارا هات ان مارو موندو پڻ ڏوئو!“ ⑩ پڻ ايسو اُوتَا نئھ ڪيڏو: ”جيو اڳي جهليل سئ اُوتَا رئھ رُوڳو پڳون نئھ ڏويا رئي ضرورت سئ، پيزو ٻڌوئي صاف سئ. ان تمي تو صاف من را سو، پڻ ٻڌائي نئين.“ ⑪ ايسو نئھ ڪبر هئي جي اُوتَا نئھ زهلايا وازو ڪوڻ سئ، تيام اُوئھ ڪيڏو جي تمي ٻڌائي صاف من را نٿي.

⑫ پستھ زئيون ايسو ٻڌون شيلون را پڳ ڏوئي ريو ان وڙي آڀرو گھنگھو پيرين ڪاڏا هارُو پينو هئو، تئيون شيلون نئھ ڪيڏو: ”ڪي تمي هزموھ ريا جي مئين تمون ٿي ڪي ڪريوھ؟“ ⑬ تمي مُون نئھ گرو ان پرڀو ڪوھ، ان تمي ٺيڪ ڪوھ ڪم تو اُو هُون سون. ⑭ تيام زئيون مئين تمارو پرڀو ان گرو ٿين تمارا پڳ ڏوياھ، تو هيوئھ نمونئھ تمارئھ پڻ هيڪا پيزا رئي شيوا ساڪري ڪروو ڪپئ. ⑮ ڪم تو مئين تمون نئھ هيڪ نمونو ڏيڏوھ، زم جيوئھ نمونئھ مئين تمارئي شيوا ڪريھ هيوئھ نمونئھ تمارئھ پڻ ڪروو. ⑯ هُون تمون نئھ هاس ئي هاس ڪونھ: گُلوم آڀرا ڏئي ٿي موٽو نٿي، نڪو ميلل منڪ آڀرا ميليا وازا ٿي موٽو سئ. ⑰ تمي جي هائي واتون هزموھ ان هايون مانھ وينا ريوھ، تو تمي

پاڳوازا سو.

⑱ هُونَ تمون ٻڌون را پارام نٿي ڪيتو. مُون نٿه ڪُهر سٺه جي مٿين ڪيون منڪون نٿه سُوندياھ، توڻي پڻ مٿين تمون ٻڌون نٿه سُوندياھ زم اي شاستر رٿي وات پُورڻي ٿئ:

‘جيو مُون پيڙئي روتڻي ڪاڻھ اُو مارو ويڙي ٿيوھ.’

⑲ هُونَ تمون نٿه مور ٿي هاڻي وات همپزاوونھ ريو، زم زئون هم ٿئ تئون تمڻي يقين ڪرو، جي هُونَ هاس ۾ ڪُون سون. ⑳ هُونَ تمون نٿه هاس ٿي هاس ڪونھ: جيو مارون ميلل منڪون نٿه هونڪارھ، اُو مُون نٿه هونڪارھ، ان جيو مُون نٿه هونڪارھ، اُو پڳوون نٿه هونڪارھ جيئھ مُون نٿه مليوھ.

ايسو مور ٿي همپزاوونھ جي اونا رو هيڪ شيلو اونا نٿه زهلاوشي

(متي 25-20:26، مرقس 14:17-21، لوقا 22:21-23، يُوحنا 13:21-30)

㉑ هاڻي واتون ڪيڏا ڪيڙ ايسو من ۾ گهڻو ڏکي ٿيو، ان آڀرا من رٿي وات ساوڻي ڪرين ڪيڏو: ”هُونَ تمون نٿه هاس ٿي هاس ڪونھ، تمون موئين ٿي هيڪ زڻو مُون نٿه زهلاوشي.“ ㉒ تيا مانھ شيلو ٻڌائي هيڪا پيزا هوما زووا مڏيا، ڪم تو اوتون نٿه ڪئين ٿي ڪُهر نٿي جي ايسو ڪيا شيلو را پارام ٻولھ ريو.

㉓ هوڻه شيلون موئين ٿي هيڪ زڻو، جيو ايسو رو پريمي شيلو هتو، اُو ايسو رٿه پاھڻه پيڻو تو. ㉔ تيام شمعون پطرس هايا شيلو نٿه اشارو ڏيڏو جي اُو ايسو ٿي پونسٽه جي اُو ڪيا شيلو را پارام ڪئھ ريو. ㉕ تيام هاڻه شيلو ايسو را ڪون ۾ ڪين همروم ايسو ٿي پونسيو: ”پڙو، اُو شيلو ڪيو سٺ؟“ ㉖ تئون ايسو اونا نٿه وڙندڻي ڏيڏي: ”هُونَ جيا نٿه ٻٽڪو ٻوڙين ڏيھ، هاڻي اُو شيلو سٺ.“ تيام ايسو روڻي رو ٻٽڪو ٻوڙين شمعون اسڪريوتي را ڏيڪرا يهوداه نٿه ڏيڏو پرو. ㉗ يهوداه اُو ٻٽڪو ليڏو رو، ان تئون شيطون اونا را من ۾ گهر ڪري ڳيو. تيام ايسو اونا نٿه ڪيڏو: ”جي ٿارٺه ڪروو هوڻه، اُو تون جلدي ڪر.“

②8 پڻ پيڙا ٻڌائي جيا کاڌا مانھ پيڙا هتا، اُوئون موئين ٿي ڪيا نٿ پڻ کهر نٿي جي ايسو اُوئا نٿ ڪيو ڪوم ڪريا را پارام ڪئو ريو. ②9 ڪوڪ سوچتات ريا جي ايسو اُوئا نٿ ام ڪئو ريو جي ”اُو شيمون ويساتو لٿ جي آپون نٿ پرڀ هارو ڪئو“ ڪا ”ڪئينڪ پٺيها پڳوون را نوم مانھ ڳريهون نٿ وراوي ڏئ، “ ڪم تو پٺيهون رو پٽوئو يهوداه ڪن هتو. ③0 تئين يهوداه روئي رو پٽو لئن جهٽ ۾ اوٿ ٿي ٻارو نيھري گيو. تئ ٿوئئ رات هئي.

ايسو آپرون شيلون نٿ نوو حڪم ڏئھ

③1 تيام، زئين يهوداه گيو پرو، تئين ايسو ڪيڏو: ”هوءَ مون منڪ ذات را ڏيڪرا رو مون ساوو ٿيوھ، ان ماري ڪري پڳوون رو مون پڻ ساوو ٿيوھ. ③2 پڳوون رو مون ماري ڪري ساوو ٿيوھ، تيام هوءَ پڳوون آپرا پاها ٿي مارو مون ساوو ڪشي ان او مارو مون جلدِي ۾ ساوو ڪشي. ③3 مارون پريمي ڏيڪرون، هزون هون ٿوڙيڪ وار تمون پيڙو سون. تيا ڪيڙ تمي مون نٿ ڳوتشو، ان زم مئين اڳي يهودي ڌرم رون آڳيوونون نٿ ڪيڏو تو، تم هون همئئ همروم تمون نٿ ڪونھ جي جيئئ هون زائونھ ريو اوئئ تمي آوي نٿي هڪتا. ③4 هون تمون نٿ هيڪ نوو حڪم ڏيونھ جي تمي هيڪا پيڙا ٿي پريم ڪرو. زم مئين تمون ٿي پريم ڪريوھ، تم تمي پڻ هيڪا پيڙا ٿي پريم ڪرو. ③5 جي تمي آپت ۾ پريم راکوھ، تو ايٿا ٿي ٻڌون منڪون نٿ کهر پڙشي جي تمي مارا شيلو سو.“

ايسو مور ٿي همپزلوئھ جي پطرس اوئا نٿ ناڪارشي

(متي 31:26-35، مرقس 14:27-31، لوقا 22:31-34، يُوحنا 13:36-38)

③6 تئين شمعون پطرس ايسو نٿ ڪيڏو: ”پرڻو، تمي ڪيئئ زائوھ ريا؟“ ايسو اوئا نٿ وڙندئي ڏيڏئي: ”جيئئ هون زائونھ ريو، اوئئ تون همئئ مون وونھڙ

آوي نٿي هڪتو. پڻ تيا ڪيڙ تون مون وونهڙ آويه. " (37) تو پطرس اُٿا ننه ڪيڏو: "پرڻو، همڻه هون تمون وونهڙ ڪم آوي نٿي هڪتو؟ هون تمون هارو آڀرو جيو ڏيڏا هارو تيار سون. " (38) ايسو اُٿا ننه ڪيڏو: "تو تون آڀرو جيو مون هارو ڏيڏا هارو تيار سئ، پلا؟ پڻ هون تون ننه هاس ئي هاس ڪونه: آڙ رات ڪوڪڙا رڻه بونگ ڏيڏا مور تون ترڻ وار مون ننه ناڪاريه."

پڳوون ري گهري زايا را مارڳ رو مثال

پڳوون ڪن آڪاش ۾ زايا هارو ايسو مانه وشواس راڪو

14 ① "تمي آپرا من ۾ ڏکي مت ٿيو. پڳوون مانه يقين راڪو ان مون مانه پڻ يقين راڪو. ② مارا ٻاپ پڳوون ري گهري ريا هارو گهڻو ماڳ سئ. جي هم نه هوڻ تو هون تمون ننه ضرور ڪئ، ڪم تو هون تماره اُٿه آيا هارو تيار ٿي ڪرو زائونه ريو. ③ ان زئون اُٿه زائين هون تمون هارو تيار ٿي ڪري ريه، تئيون هون وڙي پاسو آويه ان تمون ننه آپ پيڙا تيڙي زائيه، زم جيئنه هون هوڻيه اُٿه تمي پڻ هوڻو. ④ ان جيئنه هون زائونه ريو، اُٿ را مارڳ رئي تمون ننه ڪهر سئ."

⑤ توما اُٿا ننه ڪيڏو: "پرڻو، امون ننه ڪهر ئي نٿي جي تمي ڪيئنه زائوه ريا. تو پسئنه امون ننه ڪم ڪرين اُٿه زايا را مارڳ رئي ڪهر هوشي؟" ⑥ ايسو اُٿا ننه ڪيڏو: "مارڳ هون سون، هاس هون سون، ان جيون ڏيڏا واڙو هون سون. مارا مارڳ مانه وُڊا شوا ڪوئي پڳوون ٻاپ ڪن نٿي آوي هڪتو. ⑦ زون تمي مون ننه اوڙڪوت جي هاس ۾ هون ڪوڻ سون، تون تمي مارا ٻاپ ننه پڻ اوڙڪوت. پڻ هوڻه تمي اوڙڪي زاشو جي هون ڪوڻ سون، ان اُٿا توڻا ٿي لين تمي مارا ٻاپ ننه پڻ اوڙڪشو، ان او تمون ڪن ساوو هوشي." ⑧ فليپس اُٿا ننه ڪيڏو: "پرڻو، امون ننه پڳوون ٻاپ رو ڏرشن ڪراوو، تو هائي امون هارو گهڻو ئي سئ." ⑨ ايسو اُٿا ننه ڪيڏو: "هون تمون پيڙو اتا گهڻا ڏي ريوه، توئي پڻ

فِلِپُس، تُون مُون نئه هاوَر نئي اوزكتو كي؟ جيئته مُون نئه ڏيكيوه اونه مارا ٻاپ پڳوون نئه پڻ ڏيكيوه ان پڳوون ٻاپ اوتا ڪن ساوو سئه. تو پسته تُون ڪم ڪنه ريو جي امون نئه پڳوون ٻاپ رو ڏرشن ڪراو؟⁽¹⁰⁾ تُون اي وات نئي مونته ڪي، جي هُون ان مارو ٻاپ پڳوون هيڪ را هيڪ سون؟ جي واتون هُون تمون ٿي ڪرونه، اُو واتون هُون آپرا پاها ٿي نئي ڪرتو. پڻ مارو ٻاپ پڳوون جيو مُون موئين ره، اُو مُون ٿي آپرا ڪوم ڪراوه.⁽¹¹⁾ ماري وات مانھ يقين ڪرو جي هُون ان ٻاپ هيڪ را هيڪ سون. جي تمي مارا ڪيڏا ٿي هائي وات نئي مونته تو گهٽ ۾ گهٽ مارون ڪرل ڪومون نئه زوئين ماري وات رو يقين ڪرو.⁽¹²⁾ هُون تمون نئه هاس ئي هاس ڪونه: جيو مُون مانھ وشواس راکنه، جيو ڪوم هُون ڪرونه، تيو ڪوم اُو پڻ ڪرشي. ان اُو هايا ٿي موتا ڪوم پڻ ڪرشي، ڪم تو هُون آپرا ٻاپ ڪن زائونه ريو،⁽¹³⁾ ان جيا هارو تمي ماري مرضي اوزڪين ان مارو نوم لين پراٿنا ڪرشو اُو هُون ڪريه، زم پڳوون ٻاپ رو مُون مُون ڏيڪرا ري ڪري ساوو ٿم.⁽¹⁴⁾ جيا ڪيا هارو تمي ماري مرضي اوزڪين ان مارو نوم لين پراٿنا ڪرشو، اُو هُون ضرور ڪريه.

ايسُو پويتر آتما ميليا را پارام همپزلوئه



⁽¹⁵⁾ ”جي تمي مُون ٿي پريم راکوه، تو تمي مارون حڪمون مانھ ویشو.⁽¹⁶⁾ ان هُون مارا ٻاپ پڳوون ڪن تماري پارت ڪريه، ان اُو تمون ڪن ماري جڳا مانھ پيزو هيڪ مدت ڪريا واڙو ميلشي، جيو هميش هوڏي تمون پيزو ريشي.⁽¹⁷⁾ اُو مدت ڪريا

واڙو پويتر آتما سئه، جيو هاس رئي ڪبر ڏه. ڪراب ڏنيا را منڪ هايا نئه هونڪاري نئي هڪتا، ڪم تو اُو نڪو هايا نئه پاڙه نڪو هايا نئه اوزڪه. پڻ تمي هايا نئه اوزڪوه ڪم تو اُو تماره پيلنه سئه ان تمارون منون ۾ گهر

ڪرينَ ريشي. ⑱ هُونَ تمون نئه سوريون ٻارون را زم هيڪلا نئين ساڏون، هُونَ تمون ڪن پاسو آويه. ⑲ ٿوڙيڪ وار ڪيڙ ڏنيا را منڪ مُون نئه وڙي نئين پيارئه، پڻ تمي مُون نئه پيارشو. ان ڪم تو هُونَ جيو تو سون، تيام تمون نئه پڻ جيون زڙشي. ⑳ اُوئه ٿوئئه تمون نئه ڪٻر پڙشي جي هُونَ ان مارو ٻاپ پڳيون هيڪ را هيڪ سون ان ڌار نٿي، ان تمي مُون ٿي ڌار نٿي، ان هُونَ تمون ٿي ڌار نٿي.

㉑ مُون ٿي پريم ڪريا رئي ٿا پئي اي سئه جي منڪ مارا حُڪم مونئه ان اوئون مانه وئ. ان جيو مُون ٿي پريم ڪرئ اونا ٿي مارو ٻاپ پريم ڪشي ان هُونَ پڻ اونا ٿي پريم ڪريه، ان هُونَ اونا ڪن ساو وئ.

㉒ يهوداه اسڪريوتي نئين پڻ پيڙئه يهوداه نومي شيلئه ايسو نئه ڪيڏو: ”پريو، هائي ڪم ڪرينَ ٿيشي جي تمي امون ڪن آپ نئه ساوا ڪرشو پڻ ڏنيا رون منڪون ڪن آپ نئه ساوا نئين ڪرو؟“

㉓ ايسو اونا نئه وڙندي ڏيڏي: ”جي ڪوئي مُون ٿي پريم راکئ، اُو ماري ڪيڏل واتون مانه وئشي، ان مارو ٻاپ اونا ٿي پريم راکشي ان امي اونا ڪن آوشون ان اونا را من ۾ گهر ڪرشون. ㉔ پڻ جيو مُون ٿي پريم نٿي ڪرتو، اُو ماري واتون مانه نٿي ويتو. ان جي واتون تمي مُون ٿي هومپريه، اُو واتون مارا ٻاها ٿي نئين، پڻ مارا ٻاپ را ٻاها ٿي سئه جيئئه مُون نئه ميليوه.

㉕ هوءَ هُونَ تمون ڪن ٿي زائونه ريو، ان مئين آڀرا زايا مور هائي واتون تمون ٿي ڪريه. ㉖ پڻ پويتر آتما، جيو تماري مدت ڪريا واڙو سئه جيا نئه پڳيون ٻاپ ماري ڪري ميلشي، اُو تمون نئه ٻڌي واتون شيڪاڙشي، ان جي ٻڌي واتون مئين تمون نئه همپراويه، اُو ٻڌي واتون تمون نئه ياد ڪراوشي.

㉗ هوءَ هُونَ زائونه ريو ان تمي هڪي ريو. هُونَ تمون نئه من ۾ مارو هڪ ڏيونه. زم ڏنيا را منڪ امهي هڪي ريا رو ڪئ، هم هُونَ نٿي ڪيتو، پڻ هُونَ هاس ۾ تمون نئه هڪ ڏيونه. تمي من ۾ ڏکي مت ٿيو نڪو پيئائو! ㉘ تمي ماري

ڪيڏل واتون همٿه هومپڙيه جي هُون زائونھ ريو ان وڙي پاسو تمون ڪن آويه. جي تمي مُون ٿي پريم ڪروت، تو تمي ڪُش ٿيوت جي هُون مارا ٻاپ ڪن زائونھ ريو، ڪم تو مارو ٻاپ مُون ٿي موتو سٺه ان اُونڻا ڪن زاوو مُون هارو ڪُشي ان مُون رُئي وات سٺه. (29) مٿين تمون نٺه هائي وات همٿه مور ٿي همپڙاويھ زم زئيون وات ٿيشي، تئيون تمي يقين ڪرو، جي هُون هاس ۾ ڪوڻ سون.

(30) هُون هُون تمون ٿي وڌارن گهڻي واتون نئين ڪرون، ڪم تو ايٺا ڏنيا رو مُڪ شيطنون آوھ ريو. اُونڻا رو مُون مانھ ڪئين زور نٿي. (31) پڻ جي ڪئين هُون ڪرونھ، اُو هُون تيام ڪرونھ زم ڏنيا رون منڪون نٺه ڪپر پڙنھ جي هُون مارا ٻاپ ٿي پريم ڪرونھ ان زم مارنھ ٻاپ مُون نٺه ڪريا رو ڪيڏوھ همروم هُون ڪرونھ. هُونه اُونو، ايٺ ٿي هالون.

ايسو ٽراڪون ري ويل رو مثال ڏين شيڪاڙنھ

جي رُوڳو اُونڻا ٿي واسطو راڪيا ري ڪري هميش رو جيون زڙنھ

15 (1) ”هُون ٽراڪون رُئي هاسي ويل سون، ان مارو ٻاپ پڳوون ماري سٺه. (2) ماري هر هيڪ ٽارڪي جيا موئين ميوا نٿي ٿيٺا، پڳوون اُونڻا نٺه وڏي پري. ان هر هيڪ ٽارڪي جيا موئين ميوا ٿنھ، پڳوون اُونڻا نٺه سونگاڙين صاف ڪرھ، زم اُونڻا موئين وڌارنھ ميوا ٿنھ. (3) تمي اڳي صاف من را سو، ڪم تو تمي ماري ڪيڏل واتون مونيھ. (4) هُونه، زم مازو واسطو تمون ٿي سٺه



ان هُون تمون ٿي ڌار نٿي، تم تمي مُون ٿي واسطو راڪتا ريو ان مُون ٿي ڌار مت ٿيا. ڪوئي ٽارڪي ويل ٿي ڌار ٿين آڻوڪي آپ ميوا ڏي نٿي هڪٿي، پڻ رُوڳي زئيون ويل ۾ لاڳل سٺه تئيون اُونڻا موئين ميوا

ٿڌ. هيونءَ نمونءَ جي تمارو واسطو مون ٿي نئين هونءَ، تو تمون ٿي ڪئين نائوڪا ڪوم نئين ٿئ.

⑤ هون ويل سون ان تمي تازڪي سو. زم ويل ري ڪري تازڪي موئين گهڻا ميوا ٿئ، تم جيو منڪ مون ٿي واسطو راکڻه ان هون اونا ٿي واسطو راکونءَ، اونا منڪ ٿي گهڻا نائوڪا ڪوم ٿئ. ڪم تو مون وگر تمي ڪئين نئي ڪري هڪتا. ⑥ جي ڪوئي مون ٿي واسطو نئي راکتو، او ايوي تازڪي را زم سئ جيا نئ وادين ڦڳوڙئ پري ان او هوڪائي زائئ. هيوي تازڪي ٻڌي پيڙي ڪرائين ڏيوتا موئين ڦڳوڙائ ان او پڙي زائ.

⑦ جي تمي مون ٿي واسطو راکتا ريو ان ماري واتون مونتا ريو، تو تمي جي وٽئ او مونگو ان او تمون هارو ٿيشي. ⑧ مارا ٻاپ رو مون ايئا وات ۾ ساوو ٿئ جي تمون ٿي نائوڪا ڪوم ٿئ، ان هيونءَ نمونءَ تمي ڏيڪاڙوه جي تمي مارا شيللا سو. ⑨ زم مارئ ٻاپ مون ٿي پريم ڪريوه، تم مئين تمون ٿي پريم ڪريوه. هونءَ تمي مارا پريم ۾ ٻنڌال ريو. ⑩ جي تمي مارون حڪمون مانءِ وو، تو تمي مارا پريم موئين ٻنڌال ريشو، زم هون مارا ٻاپ رون حڪمون مانءِ ووڊوه ان اونا را پريم موئين ٻنڌال ريونءِ. ⑪ مئين تمون نئ هائي واتون همپڙاويءِ زم تمي مون ٿي واسطو راکيا ري ڪري ڪش هوشو، ان تماري ڪشي رو ڪوئي ڌنگ نئين هونءِ.

⑫ مارو ڏيڌل حڪم اي سئ، زم مئين تمون ٿي پريم ڪريوه، تم تمي هڪا پيڙا ٿي پريم ڪرو. ⑬ ايئا ٿي گهڻو پريم سئ ئي نئين جي ڪوڪ آپرون پريميون هارو آپرو جيو ڏئ. ⑭ جي تمي مارا ڪيڏا مانءِ وو، تو تمي مارا پريمي سو. ⑮ اڳي مئين تمون مانءِ گُلمون رو مثال ڏيڏو، پڻ هونءَ هون تمون نئ گُلمو نئي ڪيتو، ڪم تو گُلمو نئ آپرا ڏئي را ڪوم را پارام ڪئين ڪبر نئي هوئيٿي. پڻ ههڻئ مئين تمون نئ آپرا پريمي ڪيڏا، ڪم تو جي واتون مئين مارا ٻاپ ٿي هوپڙيه اوئون ٻڌيون واتون ربي ڪبر مئين تمون نئ ڏيڏيه.

①⑥ ام نٿي جي تمڻي مَن نٿو سُونڊيوه. نا نا، مٿين تمون نٿو سُونڊياھ، ان تمون نٿو ايتا ھارو راکياھ جي زم ويل ري ٿاڙکيون موٽين ٿاڻوڪا ميا ٿنھ، تہ تمڻي زائين ايو ٿاڻوڪا ڪوم ڪرو، جيون رو اثر رنھ. ان جي ڪئين تمڻي مارئي مرضي اوزکين ان مارو نوم لين پڳوون ھاپ ٿي مونگشو، او تمون نٿو ڏيشي. ①⑦ ھون تمون نٿو اي حڪم ڏيونھ جي تمڻي ھيڪا پيزا ٿي پريم ڪرو.

دُنيا را منک ايسو ان اوٿا رون شيلون ٿي وير راکئھ

①⑧ ”جي دُنيا را منک تمون ٿي وير راکئھ، تو ياڌ راکو جي تمون ٿي مور اوٿي مَن ٿي وير راکيوھ. ①⑨ جي تمڻي ايتا ڪراپ دُنيا را منک هوٽو، تو دُنيا را منک تمون نٿو آڀرا ھزمين تمون ٿي پريم ڪرئ. پڻ تمڻي ايتا دُنيا را نٿي، ڪم تو مٿين تمون نٿو ايتا دُنيا موٽين ٿي آڀرا منک نايا ھارو سُونڊي ليڏاھ. ان تيام دُنيا تمون ٿي وير راکئھ. ②⑦ مارو ڏيڏل مثال ياڌ راکو جي ڳلوم آڀرا ڏئي ٿي موٽو نٿي. زم منکي مَن نٿو تنگ ڪريوھ، تہ او تمون نٿو پڻ تنگ ڪرشي. جي اوٿي مارئي وات مونڻي تو تماري وات پڻ مونشي. ②① او ماري ڪري تمون نٿو تنگ ڪرشي ان تماري وات نئين مونڻ، ڪم تو او پڳوون نٿو نٿي اوزکنا جيئھ مَن نٿو ميليوھ.

②② جي ھون نہ اوٿن ان اوٿن نٿو نہ ھزماوٽ، تو اوٿن را ڏوھ اوٿن مانھ نہ پڙئ. پڻ ھوئھ ڏوھون ري سزا ٿي پچيا رو اوٿن رو ڪئين پونھونو نٿي. ②③ جيو مَن ٿي وير راکئھ، او مارا ھاپ پڳوون ٿي پڻ وير راکئھ. ②④ جي مٿين اوٿن وسا ايو ٿاڻوڪا ڪوم نہ ڪريا هوٽ جيو پيزنھ ڪيئھ ٿي نٿي ڪريا، تو اوٿن را ڏوھ اوٿن مانھ نہ پڙئ. پڻ ھوئھ اوٿي ھائي مارا ڪوم زوياھ، ان توڻي پڻ اوٿي مَن ٿي ان مارا ھاپ پڳوون ٿي وير راکيوھ. ②⑤ پڻ ھم تيام ٿيو زم اوٿن را شاستر رڻي لکل اي وات پوري ٿنھ:

’اوٿي مَن ٿي امھي وير راکيو.’

26) زئيون مدت ڪريا وازو آوشي جيا نئه هُون تمون ڪن پڳوون ٻاپ را پاها ٿي ميليه، مطلب پويتر آتما جيو هاس رئي ڪبر ڏيڏا وازو سئه ان جيو پڳوون ٻاپ ڪن ٿي آئه، اُو مارئي هاڪ پرشي. 27) ان تمي پڻ مارئي هاڪ پرين مارا پارام همپزيا ڪم تو تمي شروع ٿي لين مون پيڙا رياه.

16 ① مئين تمون نئه هائي واتون ايئا هارو ڪيڏيه، زم تمي وشواس نه ساڏو. ② اُو تمون نئه نات ٻارا ڪرشي، ان ايوو ٿوڻو پڻ آئه ريو زئيون منڪ تمون نئه مارشي پرا ان ام هزمشي جي امي پڳوون رئي شيوا ڪرونه ريا. ③ اُو هائي ٻڌوئي ڪئين ڪرشي ڪم تو اُوئي نڪو پڳوون ٻاپ نئه اوڙڪيوه نڪو مون نئه اوڙڪيوه.

④ پڻ مئين تمون ٿي هائي واتون ايئا هارو ڪريه زم زئيون هايون واتون رو ٿوڻو آئه، تئيون تمون نئه همپريه جي مئين تمون ٿي هائي واتون اڳي ڪري تي.

پويتر آتما هاس را پارام پورئي ڪبر ڏئه

”مئين شروع ۾ هائي واتون تمون ٿي نتي ڪري، ڪم تو هُون تمون پيڙو هتو. ⑤ پڻ هونه هُون پڳوون ٻاپ ڪن زائونه ريو جيئنه مون نئه ميليوه، توئي تمون موئين ٿي ڪوئي مارا پارام نتي پونستو جي هُون ڪيال زائونه ريو. ⑥ پڻ زئيون مئين تمون نئه هائي واتون ڪري، تئيون تمي مارئي وات نئين پڻ آپري وات سوچين من ۾ گهڻا ڏکي ٿيا. ⑦ پڻ هُون تمون نئه هاسئي وات ڪونه جي مارا زايام تمارو قائيدو سئه. ڪم تو جي هُون نئين زائون، تو مدت ڪريا وازو پويتر آتما تمون ڪن نئين آئه. پڻ جي هُون زائون، تو هُون اُوئا نئه تمون ڪن ميليه. ⑧ ان اُو آوين دنيا رون منڪون نئه وات ساوئي ڏيکارشي جي ڏوه ڪي سئه، انصاف ڪي سئه، ان پڳوون رو ڦينصلو ڪي سئه، ان هيونه نمونئه اُونون را ڏوه ساوا ڪرشي. ⑨ اُو ڏوه رئي اي وات ساوئي ڪرشي جي دنيا را منڪ پڳوون

را ڏوهاري سٺه. ڪم تو هيا رڻي ٿاڀڻي اي سٺه جي اُو مُون مانھ وشواس نٿي راڪتا. ⑩ اُو اِنصاف رڻي اي وات ساوڻي ڪرشي جي پڳوون مُون نٺه پيڏوهي ڪرين مُون ٿي اِنصاف ڪريوھ. ڪم تو هيا رڻي ٿاڀڻي اي سٺه جي هُون پڳوون ٻاڻ ڪن زائونھ ريو ان پسنه تمي مُون نٺه نئين پاڙو. ⑪ ان اُو پڳوون را ڦينصلا رڻي اي وات ساوڻي ڪرشي جي پڳوون نيا ڪرھ. ڪم تو هيا رڻي ٿاڀڻي اي سٺه جي ايٺا دُنيا را مُڪ شيطون نٺه سزا ڏيڏا رو ڦينصلو ٿيوھ.

⑫ گهڻي پيزي واتون سٺه جي مارڻه تمون ٿي ڪروھ، پڻ همڻه تمي هائي واتون هونھي نٿي هڪتا. ⑬ پڻ زئيون پويتر آتما آوشي، جيو هاس رڻي ڪٻر ڏيڏا واڙو سٺه، اُو تمارڻي آڳيوونڻي ڪرين ٻڏي هاسي واتون ڏيڪاڙشي. ڪم تو اُو آپرا پاها ٿي نئين ٻولڻه پڻ جي ڪڻين اُو پڳوون ٿي هومپڙھ اُو واتون ڪيشي، ان مُون ٿي ٿيا واڙي واتون را پارام تمون نٺه هڙماوشي. ⑭ اُو مارو مون ساوو ڪرشي ڪم تو اُو ماري واتون مُون ٿي لين تمون نٺه هڙماوشي. ⑮ پڳوون ٻاڻ رو ٻڌوڻي ڪڻين مارو سٺه، تيام مڻين ڪيڏوھ جي پويتر آتما ماري واتون مُون ٿي لين تمون نٺه هڙماوشي.

⑯ ٿوڙيڪ وار ڪيڙ تمي مُون نٺه نئين پاڙو، پڻ پسنه وڙي ٿوڙيڪ وار ڪيڙ تمي مُون نٺه پاڙشو.

ايسنو شيلون نٺه همپڙاوڻه

جي اوئون هارو همڻه نو ڏک سٺه پڻ پسنه اُو ڪش ٿيشي

⑰ تيا مانھ شيلون موئين ٿي ڪڻينڪ زڻي هڪا پيزا نٺه ڪيڏو: ”اُو آپون نٺه ڪي ڪڻه ريو؟“ ٿوڙيڪ وار ڪيڙ تمي مُون نٺه نئين پاڙو ان پسنه وڙي ٿوڙيڪ وار ڪيڙ تمي مُون نٺه پاڙشو ان ’ڪم تو هُون پڳوون ٻاڻ ڪن زائونھ ريو،‘ هيا رو ڪي مطلب سٺه؟“ ⑱ تيام اُو آپت ۾ پونستا ريا: ”ٿوڙيڪ وار رو مطلب ڪي سٺه؟ آپون نٺه ڪٻر نٿي جي اُو ڪي ڪيا ڪرھ.“

⑲ ايسو ننه ڪپر هٿي جي شيلا اُٿا ٿي سوئال پُونسوا ڪرڻه ريا. تيام اُٿون ننه ڪيڏو: ”تمي هڪا پيزا ٿي ايٿا وات را پارام پُونسوه ريا نا، جي مٿين ام ڪم ڪيڏوه؟“ ٿوڙيڪ وار ڪيڙ تمي مُون ننه نئين پاڙو ان پسنه وڙي ٿوڙيڪ وار ڪيڙ تمي مُون ننه پاڙشو. ⑳ هُون تمون ننه هاس ئي هاس ڪونه: تمي روشوان وڙاپ ڪرشو، پڻ ڏنيا را منڪ ڪُش ٿيشي. تمون ننه ڏک تو ٿيشي پڻ تمارو ڏک ڪُشي ۾ پڌلشي. ㉑ مثال، زئيون ڏوشي ٻار زڻيا واڙي هوه، زئيون اُو هونهو ڪرڻه ڪم تو اُٿا رو ٻار زڻيا رو ٿوڻو آيوه ريو. پڻ زئيون ٻار زلمه ڀرو، تنيون اُٿا ننه تڪيل ويهري زائو، ڪم تو اُو اتيي ڪُش هوه جي ڏنيا ۾ هڪ نوو ٻار زلميوه. ㉒ هيوه نمونه تمون ننه پڻ همئه ڏک سئ. پڻ هُون تمون ننه وڙي پيڙو ٿيه ان تمي ڪُش ٿيسو، ان اُو تماري ڪُشي تمون ٿي ڪوئي نئين ڪوهه. ㉓ تيڏي تماره مُون ٿي ڪئين سوئال پُونسيا رئي ضرورت نئين هوه. هُون تمون ننه هاس ئي هاس ڪونه: جي ڪئين تمي پڳوون ٻاپ ٿي مونڱشو، اُو ماري ڪري تمون ننه ڏيشي. ㉔ هزون هُوڏي تمي مارو نوم لين پڳوون ٿي ڪئين نئي مونڱيو. مونڱو تو تمون ننه زڙشي، ان هيوه نمونه تماري ڪُشي رو ڪوئي ڏنگ نئين هوه.

ايسو آڀرو جيو پڳوون را نوم مانه ڏين ڏنيا ري هر پُونڌائي مانه جيت ڪريه

㉕ ”هائي واتون مٿين تمون ننه مثالون ٿي همپڙاويه. پڻ اُو ٿوڻو آوه ريو، زئيون هُون تمون ٿي مثالون ۾ نئين ٻولون، پڻ تمون ننه پڳوون ٻاپ را پارام چئي وات همپڙاويه. ㉖ تيڏي تمي مارو نوم لين پڳوون ٿي مونڱشو. مارو مطلب اي نئي جي ماره تمارا پارام پڳوون ٿي منٿ ڪروو ڪپه، ان پسنه اُو تمون ننه ڏيشي. ㉗ ماره پڳوون ننه منايا رئي ضرورت نئي. پڳوون ٻاپ آپ تمون ٿي پريم ڪرڻه، ڪم تو تمي مُون ٿي پريم ڪريوه ان يقين ڪريوه جي هُون

پڳوونَ ڪن ٿي آيوه. ②8 هُون مارا ٻاپ پڳوونَ ڪن ٿي آوين دُنيا ۾ آيوه. ان هُون هُون وڙي دُنيا ننه ساڏين پاسو مارا ٻاپ پڳوونَ ڪن زائونھ ريو.

②9 تيا مانھ اُونا ري شيلي ڪيڏو: ”زوئو، هُونه تمي ساونھ ڍاڙنھ ڪوه ريا ان مثالون ٿي نٿي ٻولتا. ③0 هُونه امون ننه ڪٻر سئھ جي تمي ٻڌوئي ڪئين زوئوھ، ان تمون ننه اي ضرورت پڻ نٿي جي منڪ تمون ٿي سوئال پُونسئھ، ڪم تو تمون ننه اڳي سوئال رئي ڪٻر سئھ. تيام امي يقين ڪرونھ جي تمي پڳوونَ را پاھا ٿي آياھ.“

③1 تيا مانھ ايسو ائون ننه ڪيڏو: ”تمي هُونه پڪو وشواس راکوه ڪي؟ ③2 مارئي وات هومپڙو، ايوو توئو آونھ ريو پڻ هاڙ آوي پوگيوھ زئون تمي ٻڌائي مون ننه هيڪلو ساڏين هر هيڪل اُپرئھ اُپرئھ مون پاڳي زاشو. توئي پڻ هُون هيڪلو نٿي، ڪم تو مارو ٻاپ پڳوونَ مون پيڙو سئھ. ③3 مئين هائي واتون تمون ننه همپڙاويھ، زم مون ٿي واسطو راکيا ري ڪري تمون ننه من ۾ هڪ تئھ. اينا دُنيا ۾ تمون ننه ڏک تڪليپ سئھ. پڻ هيئت راکتا ريو، ڪم تو مئين دُنيا ري هر پونڌائي مانھ جيت ڪريھ ان هُونه ماري ڪري تمي پڻ هم ڪري هڪھ.“

ايسو اپرون شيلون هارو پڳوون ٿي پراڻا ڪرئھ

17 ① زئون ايسو هائي واتون ڪري ريو، ٽئين اُونه اونسو آڪاش هومو زوئين پڳوونَ ننه ڪيڏو: ”او ٻا، هُونه او توئو آيوھ رو. مون تمارا ڏيڪرا رو مون ساوو ڪرو، زم هُون تمارو ڏيڪرو تمارو مون پڻ ساوو ڪرون. ② ڪم تو تمي مون ننه ٻڌون منڪون مانھ اي اڪتياري ڏيڏيھ، جي زتا منڪ تمي مون ننه ڏيڏاھ، ائون ٻڌون ننه هُون هميش رو جيون ڏيون. ③ ان هميش رو جيون اي سئھ، جي منڪ تمون هيڪاھ هاسا پڳوونَ ننه اوڙڪئھ، ان مون ايسو ڪريست ننه اوڙڪئھ جيا ننه تمي ميليھ، ان اپون ٿي واسطو راکتا رئھ. ④ جيو ڪوم تمي مون ننه ڪريا هارو ڏيڏو تو، مئين او ڪوم پورو ڪرين اينا ڌرتي

مانه تمارو مون ساوو ڪريوه. ⑤ ان هون ٻا، مون نه آپ ڪن راکيا ٿي ايوو مون ڏيو، جيوو مارو مون هتو زئون هون جڳت نهيا ٿي مور تمون پيو هتو. ⑥ ڏنيا موئين ٿي جيا منڪ تمي مون نه ڏيڏاه، ائون هومئي مئين وات ساوئي ڪرين ڏيڪارڙيه جي تمي ڪيو سو. ا تمارا منڪ هتا ان تمي ائون نه مون نه ڏيڏاه، ان اوني تماري واتون موني. ⑦ هون ائون نه ڪبر پڙيه جي جي ڪئين تمي مون نه ڏيڏوه، ا تمارا پاها ٿي زڙل سئ. ⑧ ڪم تو جي واتون تمي مون نه همپڙاويه، ا واتون مئين ائون نه همپڙاويه، ان اوني هائي واتون موني، ان ائون نه پڪي ڪاتري ٿيه جي هون تمون ڪن ٿي آيوه، ان اوني يقين ڪريوه جي تمي مون نه ميليوه.

⑨ هون ائون هارو تمون ٿي وينتي ڪرونه. اي وينتي هون ڏنيا رون منڪون هارو نئين، پڻ ائون منڪون هارو ڪرونه ريو جيا تمي مون نه ڏيڏاه، ڪم تو ا تمارا منڪ سئ. ⑩ جي ڪئين مارو سئ ا تمارو سئ، ان جي ڪئين تمارو سئ ا مارو سئ. ان مارو مون ائون منڪون ري ڪري ساوو ٿيوه. ⑪ هون هون اي ڏنيا ساڏين تمون ڪن آونه ريو، پڻ ا و اڻا ڏنيا ۾ ريشي. او پوتر ٻا، ائون نه تماري آڀري ڪڙا ٿي همپڙين راکو، ڪم تو تمي آپ پريو سو ان تمي مون نه پڻ پريو ڪيو رايو، زم ا هڪ من ٿه زم آبي هڪ من سون. ⑫ زئون هوڏي هون ائون پيو هتو، تيون هوڏي هون تمارا ڪيڏا پرموئنه پريو ٿين تماري ڏيڏل ڪڙا ٿي ائون رئي همپڙ ڪرتو ريو، ان مئين ائون نه پچاوين راکيا. ائون موئين ٿي ڪيئنه ٿي وشواس نٿي ساڏيو، شوا ا و ا هڪا رنه جيو هميش را موت رئي سزا کاڌا جيوو سئ. ان هيون نموننه شاستر ري واتون پوري ٿيه. ⑬ همئنه هون تمون ڪن آونه ريو، پڻ زئون هون ڏنيا ۾ سون تو هون هائي واتون آڀرون منڪون ٿي ڪرونه، زم مارا پاها ٿي ائون نه من ۾ پوري ڪشي زڙ. ⑭ مئين ائون نه تماري واتون همپڙاويه، ان ڏنيا ري منڪي ائون ٿي وير راکيوه ڪم تو ا و ا ڏنيا را نٿي، زم هون پڻ اڻا ڏنيا رو نٿي. ⑮ مارئي وينتي اي نٿي جي تمي

اُوئون نئه دُنيا ٿي ڌار راڪين پڇاوو. پڻ مارئي وينتئي اي سئه جي تمڻي اُوئون نئه شيطون ري پوندائي ٿي پڇاوين راکو. ①۶ اُو اينا دُنيا را نٿي، زم هُون پڻ اينا دُنيا رو نٿي. ①۷ اُوئون نئه هاسا وڃن ٿي تمارئي شيوا ڪريا هارُو پويتر ڪرو. تمارو وڃن، اُو هاسو وڃن سئه. ①۸ زم تمڻي مُون نئه دُنيا ۾ ميليوه، تم مئين پڻ اُوئون نئه دُنيا ۾ ميلياه. ①۹ ان اُوئون هارُو هُون آپ نئه تماري شيوا ۾ پويتر راڪين آپرا آپ نئه تمارا نوم مانه ڏيونه، زم اُو پڻ هاس ۾ تماري شيوا هارُو پويتر ٿئه.

②۰ هُون رُوگو اُوئون هارُو وينتئي نٿي ڪرتو، پڻ اُوئون ٻڌون منڪون هارُو پڻ وينتئي ڪرونه جيا اُوئون ري ڪيڏل واتون ري ڪري مُون مانه وشواس راکشي. ②۱ مارئي وينتئي اي سئه، جي اُو ٻڌائي هيڪ من ٿئه. زم تمارو، او ٻا، مُون ٿي واسطو سئه ان مارو تمون ٿي واسطو سئه، تم اُوئون رو آپون ٿي واسطو هوئه، زم دُنيا را منڪ يقين ڪرئه جي تمڻي مُون نئه ميليوه. ②۲ جيوو مُون تمڻي مُون نئه ڏيڏوه، ايوو مُون مئين پڻ اُوئون نئه ڏيڏوه، زم اُو هيڪ ٿئه جيوئه نمونئه آبي هيڪ سون. ②۳ ان مارو واسطو اُوئون ٿي هوئه، ان تمارو واسطو مُون ٿي هوئه، زم پورئه نمونئه اُو هيڪ ٿي زائ. ان هيون نمونئه دُنيا رُون منڪون نئه ڪٻر پڙشي جي تمڻي مُون نئه ميليوه، ان تمڻي مُون مانه وشواس راکيا واڙون ٿي ايوو پريم ڪريوه جيوو مُون ٿي ڪريوه.

②۴ او ٻا، مارئي مرضئي اي سئه جي جيا منڪ تمڻي مُون نئه ڏيڏاه، جيئنه هُون هوئون، اُو ٻڌائي پڻ مُون پيڙا اوئنه هوئه، زم اُو مارو اُو مُون پاڙنه، جيوو مُون تمڻي مُون نئه ڏيڏوه ڪم تو جڳت ٺهيا مور تمڻي مُون ٿي پريم ڪريوه. ②۵ او پيڏوهي ان پويتر ٻاپ، دُنيا ري منڪي تمون نئه نه اوڙڪيا، پڻ مئين تمون نئه اوڙڪيا، ان ايني ماري شيلي پڻ اوڙڪيوه جي تمڻي مُون نئه ميليوه. ②۶ ان مئين اُوئون هومئي وات ساوئي ڪرين ڏيڪاڙئيه جي تمڻي ڪيا سو، ان هُون هم ڪرتو ري، زم تمارو اُو پريم، جيو پريم تمڻي مُون ٿي ڪريوه، اُوئون رُون منون موئين گهر ڪرئه، ان هُون آپ پڻ اُوئون رُون منون موئين گهر ڪرون.

يهوداه اسڪريوتي ايسو نڌ زهلاوڻه

(متي 26: 47-56، مرقس 14: 43-50، لوقا 22: 47-53، يُوحنا 18: 1-11)

18 ① زئيون ايسو هائي پراڻا ڪري ريو، تئيون او آهرون شيلون پيڙو اوڻ ٿي رَوونو ٿين ڦيرون نڌي رڻه پرلڻه پاهڻه ڳيو. اوڻڻه هيڪ هاڳه هتو، ان ايسو ان اوڻا را شيلا اوڻا هاڳه ڇر ڳيا.



② هونڻه يهوداه جيو ايسو نڻه زهلايا واڙو هتو، اوڻا نڻه پڻ هايا ماڳ رڻي ڪهر هڻي، ڪم تو ايسو گهڻي وار آهرون شيلون پيڙو اوڻڻه زاتو. ③ تيام يهوداه رومي قوز رو هيڪ توڙو ان موئون پوزاريون ان فريسي پالتي واڙون را پاهه ٿي سپائي آب پيڙا لين اوڻڻه هاڳه ڇر آيو. اوڻون ڪن ٻڙتا مٿا ان پتي هتي ان هٿيار پڻ هتا.

④ ايسو نڻه ٻڌي ڪهر هڻي جي آب ٿي ڪي ٿيا واڙو سڻه، تيام اوڻڻه اوڻون هومو آڳهو زائين اوڻون ٿي پونسو: ”تمي ڪيا نڻه ڳوتوه ريا؟“ ⑤ اوڻي وڙنڌي ڏيڏي: ”امي ايسو ناصرت شهر واڙا نڻه ڳوتوه ريا.“ تو ايسو اوڻون نڻه ڪيڏو: ”او هون سون.“ هونڻه يهوداه، جيو ايسو نڻه زهلايا واڙو هتو، او پڻ اوڻون پيڙو اوڻڻه اوڻل هتو. ⑥ تيام، زئيون ايسو اوڻون هومو هونڪاريو جي او

هُون سون، تو اُو پاسا هُتيا ان پوئين پڙيا هئا.

⑦ تيام ايسُو اُوئون نئه وڙي پُونسيو: ”تمي ڪيا نئه ڳوتوه ريا؟“ تو اُوئي ڪيڏو: ”ايسُو ناصرت شهر وازا نئه.“ ⑧ تيا مانھ ايسُو ڪيڏو: ”مئين تمون نئه اڳي ڪيڏوه جي اُو هُون سون. تيام جي تمي مُون نئه ڳوتوه ريا، تو ايتون نئه زاوا ڏيو.“ ⑨ هاڻي ام ٿيو زم ايسُو رُئي اڳي ڪيڏل وات پُورِي ٿنه جي ”جيا منڪ تمي مُون نئه ڏيڏاه، مئين اُوئون ٻڌون نئه پڇاوين راکياھ.“

⑩ تنيون شمعُون پطرس، جيا ڪن تروُٺار هتئي، آپري تروُٺار ڪاڍين مُڪ پُوزاري را نوڪر نئه ڏڪ هنيو، ان اُوٺا رو زمڻو ڪون واڍيو پرو. اُوٺا نوڪر رو نوم ملخس هتو. ⑪ تيام ايسُو پطرس نئه ڪيڏو: ”آپري تروُٺار پاسي ميڻ ۾ نوڪ! جيو ڏڪ مارئ ٻاپ پڳوون مُون نئه سهيا هارُو ڏيڏوه، اُو هُون نه سهون ڪي؟“

ايسُو نئه حناه نومي مُڪ پُوزاري هومو اُوپاڙئھ

⑫ تيام رومي قوز رئه توڙئھ ان اُوئون رئه موئنه ساب ان يهوديون ري سپايي ايسُو نئه زهاليو ان اُوٺا نئه ٻونڌيو. ⑬ ان پسئھ اُوٺا نئه پيرھين حناه نومي اڳلُڪا مُڪ پُوزاري ڪن لي ڳيا، ڪم تو اُو همڻوڪا مُڪ پُوزاري ڪائيفا رو هاهرو هتو. ⑭ ڪائيفا مُڪ پُوزاري اُو رو اُو هاڳي منڪ هتو جيئنه يهودي آڳيونون نئه اي ڏش ڏيڏو تو جي ”آپئو ڦائيندو اينا ۾ سئھ جي آپئي يهودي قوم هارُو هيڪ منڪ مري زائھ.“

پطرس پيرھين وار ايسُو نئه ناکارئھ

(متي 26:69-70، مرقس 14:66-68، لوقا 22:54-57، يُوحنا 18:15-18)

⑮ شمعُون پطرس ان هيڪ پيزو شيلو ايسُو وونھڙ وونھڙ ڳيا. هُوئھ پيزو شيلو حناه مُڪ پُوزاري رو اوڙڪيندو هتو، ان اُو ايسُو وونھڙ مُڪ پُوزاري را ڌرٻار

موئين ڳيو. ①6 پڻ پطرس ٻارليا ڌروازا ڪن ٻارو ري ڳيو. تيام پيزو شيلو جيو مُڪ پُوزاري رو اوڙڪيندو هتو، وڙي ڌرٻار ٿي ٻارو ٺيهرين اُونا نوڪروڻي ٿي وات ڪرڻي جڻي ٻارليا ڌروازا مانھ سوڪئي ڏيتي ٿي، ان پطرس نھ موئين تيراڻيو.

①7 تيام سوڪئي ڏيڏا واري نوڪروڻي پطرس نھ ڪيڏو: ”تُون اُونا رون شيلون موئينليو نٿي نا؟“ تو پطرس ڪيڏو: ”نا، هُون نٿي.“ ①8 هُونه نوڪر ان سڀائي ڪينئازا ٻارين اُونڱڻام اُوپين تاپتات ريا، ڪم تو ٿاڍ واتڻيت رڻي. ان پطرس پڻ اُونون پيزو اُوپين تاپتوت ريو.

حناء مڪ پُوزاري ايسو ٿي پڙا پونس ڪرڻھ

①9 تڻه توتڻه مڪ پُوزاري ايسو ٿي اُونا رون شيلون ان شيڪارل واتون را پارام پڙا پونس ڪرڻي. ②0 تو ايسو اُونا نھ ڪيڏو: ”مئين ٻڌون رڻه رُوپرو واتون ڪريھ. مئين پڳوون رون منڌرون موئين ان پڳوون را گهر موئين هميش شيڪاريوھ، جيئن ٻڌائي يهودي پڙا تڻھ، ان مئين ڪوئي وات هٽارين نٿي ڪرڻي. ②1 تيام تمي مُون ٿي ڪم پونسوھ ريا؟ اُونون ٿي پونسو، جيئي ماري واتون هومپڙيھ، جي مئين ڪيوي واتون ڪريھ. اُونون نھ تو ماريون ڪيڏل واتون رڻي پورڻي ڪبر سڻھ.“

②2 ايسو هم ڪيڏو، تنيون سڀايون موئين ٿي هيڪڻه زڻھ، جيو ايسو ڏوڪڙو اُوپل هتو، ايسو نھ ٿپڙ هڻي ان ڪيڏو: ”تُون مڪ پُوزاري نھ هيوو جَوَاب ڪم ڏئھ؟“ ②3 تو ايسو اُونا نھ وڙندڻي ڏيڏي: ”جي مئين ڳلت وات ڪرڻي هونھ، تو ٽاپت ڪرين همپڙا جي ڳلت وات ڪي سڻھ؟ پڻ جي مئين صحيح وات ڪرڻيھ، تو مُون نھ ڪم مارڻھ؟“ ②4 تنيون حناه ايسو نھ ڪائيفا نومي مڪ پُوزاري ڪن ٻوندل رو ٻوندل ميليو پرو.

پطرس وڙي ٻي وار ايسو نٺ ٺاڪارڻ

(متي 26: 71-75، مرقس 14: 69-72، لوقا 22: 58-62، يُوحنا 18: 25-27)

②5 هونءَ تڻه تونڻه شمعون پطرس اوڻه پيزون منڪون پيزو اوڀين تاپتوت ريو. تيام اوڻي پطرس ٿي پونسو: ”تون پڻ اوڻا رون شيلون موئينليو هيڪ نٽي



ڪي؟“ تو پطرس ناڪارين ڪيڏو: ”نا، هون اوڻا رو شيلو نٽي.“ ②6 تڻيون مڪ پوزاري رون نوڪرون موئين ٿي هيڪ زڻو، جيو اوڻا منڪ رو عزيز هتو جيا رو ڪون پطرس واڍيوت پرو، اوڻه ڪيڏو: ”مئين تون نٺه اوڻا پيزو ٻاگه ۾ نتو ڏيڪيو ڪي؟“ ②7 تيام پطرس وڙي ناڪاريو، ان جهٽ ۾ ڪوڪڙهه ٻونگ ڏيڏي.

ايسو نٺ رومي حڪومت را راز ڪريا واڙا پيلاطس ڪن تيڙي زائھ

(متي 27: 1-2، 11-14، مرقس 15: 1-5، لوقا 23: 1-5، يُوحنا 18: 28-38)

②8 هوار را ويلا يهودي ايسو نٺه ڪائيفا نومي مڪ پوزاري را گهر ٿي رومي راز ڪريا واڙا را گهڍ موئين تيڙي ڳيا. پڻ يهودي آپ گهڍ ۾ نه پينا، متون ڌاري قوم واڙا ري گهري زايا ٿي اڀڙائي زائھ، ان پاشڪا پرڀ نه مناوي هڪه. ②9 تيام راز ڪريا واڙو پيلاطس ٻارو نيهرين يهوديون ڪن آيو ان اوڻون ٿي پونسو: ”تمي ايڻا منڪ مانھ ڪيوو ڏوه ڏيوھ؟“

③0 اوڻي وڙندڙي ڏيڏي: ”جي اي ڏوهاري نه هوڻ، تو امي ايڻا نٺه تمون ڪن نه زهالي آوڻ.“

③1 تيام پيلاطس اوڻون نٺه ڪيڏو: ”تمي آپ ايڻا نٺه لي زائو ان تمارا آڀرا ڌرم پرموڻه ايڻا رو ڦينصلو ڪرو.“ پڻ يهودي اوڻا نٺه ڪيڏو: ”رومي قانون

پرموئنه امي ڪيا نئه ئي موت رئي سزا نئي ڏي هڪتا.

(32) هيونءَ نمونءَ يهوديئي ايسو رو ڦينصلو رومي حڪومت ٿي ڪرايو ان ايسو يهوديون ري ڏيڏل موت ري سزا را نمونا پرموئنه نئين، پڻ رومي حڪومت را نمونا پرموئنه هوزي مانءَ مريو، زم ايسو رئي اشارا ۾ اڳي ڪيڏل اي وات پورئي تئه جي او هوزي مانءَ سزائين مرشي.

(33) تيام پيلاطس پاسو آپرا ڏرهار موئين گيو پرو، ان ايسو نئه آپ ڪن تيزاوين ايئا ٿي پونسيو: "تون يهوديون رو پاڌشا سئه ڪي؟" (34) تو ايسو اوئا نئه وڙندئي ڏيئي: "ڪي تمي آپ مون نئه پاڌشا هزمين پونسو ه ريا، ڪا پيزي منڪي مارا پارام تمون نئه همپزايوه؟" (35) تيا مانءَ پيلاطس جواب ڏيڏو: "هون يهودي سون ڪي؟ تاري آپري قوم ان موئي پوزاريئي تون نئه زهلاوين مارئه خواله ڪريوه. تئين ايوو ڪي ڏوه ڪريوه؟" (36) ايسو وڙندئي ڏيئي: "مارو راز ايئا ڏنيا را پاها رو نٿي. جي مارو راز ايئا ڏنيا را پاها رو راز هوٽ، تو مارا شيواڌاري ضرور مون هارو وڌت زم هون يهوديون ري هاڻي نه زهلائون. پڻ هاس ۾ مارو راز ايٿ را پاها رو نٿي."

(37) تيام پيلاطس اوئا نئه ڪيڏو: "تو پسته تون پاڌشا تو سئه." تيا مانءَ ايسو اوئا نئه ڪيڏو: "تمي مون نئه پاڌشا ڪوه ريا، ان هون پاڌشا تو سون. پڻ هون ايئا هارو زلميوه ان ايئا هارو ڏنيا ۾ آيوه جي هون هاس را پارام هاڪ پرين همپزاوون. ان مارو راز ام وئ، جيو ڪوئي هاس را پاها رو سئه، او مارئي وات مونءَ." (38) پيلاطس اوئا نئه ڪيڏو: "تو هاس ڪي سئه؟"

پيلاطس ايسو مانءَ موت رئي سزا ڏيڏا رو ڦينصلو ڪرئ

(متي 15:27-31، مرقس 6:15-20، لوقا 23:13-25، يُوحنا 18:38-19:16)

هم ڪين پيلاطس وڙي ڏرهار ٿي نيهرين يهوديون نئه ڪيڏو: "مون نئه اوئا موئين ڪئين ڏوه ڏيڪيام نئي آوتو." (39) هونءَ تمون ۾ هيڪ رواز سئه جي هون

پاشڪا پرې مانھ تمون ھارو ھيڪا قيڌي ننه ڍلو ڪرونھ. تيام، ڪي تماري مرضي اي سٺه جي ھون تمون ھارو يھوديون را پاڌشا ننه ڍلو ڪرون؟" (40) پڻ يھوديئي زور ٿي وڙي جواب ڏيتو: "ھايا منڪ ننه نئين پڻ برابا ننه ساڏو پرو. ھوئہ برابا ھيڪ ڌاڙيل ھتو.

19 ① تيام پيلاطس ايسو ننه لي زائين ھاڀڪون ٿي مرايو. ② ان قوزيئي ڪونٽون رو تاج گونين ايسو را ماڻام پيرايو، ان وونگڻائي رنگ رو پاڌشا را جيوو چال ڪوون مانھ اوڍاڙيو، ③ ان نئولي ڪرين ايسو ھوما آوي آوين ڪيتا ريا: "او يھوديون را پاڌشا، نمسڪارا!" ان اوئا ننه ٿيڙون ھئي.

④ تيا ڪيڙ پيلاطس وڙي ٻارو نيھريو ان يھوديون ننه ڪيڌو: "زوئو، ھون ھايا ننه تمون ڪن ٻارو تيڙاوونھ، زم تمون ننه ڪبر پڙئہ جي مئين اوئا موئين ڪئين ڏوھ نہ پاڙيو، ان ھون نئي موتو جي ھيوو منڪ آپ ننه پاڌشا ناوا ڪرئہ." ⑤ تيام ايسو ڪونٽون رو تاج ان وونگڻائي رنگ رو چال پيرل ٻارو نيھريو. تئيون پيلاطس يھوديون ننه ڪيڌو: "زوئو، ھاڻي منڪ اي اوپوھ."

⑥ تيام موتي پوزاريئي ان پگوون را گھر ري سپايي اوئا ننه زوين زور ٿي ڪيڌو: "ھوڙي مانھ ساڙين مارو پرو، ھايا ننه ھوڙي مانھ ساڙين مارو پرو. تو پيلاطس اوئون ننه ڪيڌو: "تمي زوئو ان تمارو ڪوم زوئئہ، تمي آپ ايئا ننه لي زائين ھوڙي مانھ ساڙين مارو پرو. ڪم تو ھون آپ ايئا موئين ڪئين ڏوھ نئي پاڙتو." ⑦ تيا مانھ يھوديئي اوئا ننه جواب ڏيتو: "امارا ڌرم رو ھيڪ حڪم سٺہ ان اوئا حڪم پرموئہ ھايا ننه موت رئي سزا ڏيوو ڪپئہ، ڪم تو ھايتہ منڪ آپ ننه پگوون رو ڏيڪرو ڪيڌوھ ان آپ ننه پگوون ھرڪو ڪريوھ."

⑧ پيلاطس زئين ھاڻي وات ھومپڙي، تو اگي ٿي الاهي گھڻو پيئوئو، ⑨ ان وڙي ايسو ننه پاسو گھڊ موئين تيڙي زائين پونسيو: "تون ڪيٺ رو سٺہ؟" پڻ ايسو اوئا ننه ڪئين وڙندي نہ ڏيڏي. ⑩ تيام پيلاطس اوئا ننه ڪيڌو: "تون مون ٿي ڪم نئي ٻولتو؟ تون ننه ايئا وات رئي ڪبر نئي ڪي؟ تون ننه ساڏو ڪا


تُون نئه هُوڙي مانھ سڙاوينَ مراوَو هائي ٻڌوئي ماري اِڪتياري ۾ سئھ. " (11) تُو ايسُو اُوئا نئه وڙنڌي ڏيڏئي: "جي تمون نئه هائي اِڪتياري پڳوون را پاها ٿي ڏيڏل نه هوئ، تو تمارو مُون مانھ ڪئين اِڪتیار نه هوئ. تيام اُو جيئنه مُون نئه تمارئ حوالئ ڪريوھ، اُو تمون ٿي وڌارئ ڏوهاري سئھ."

(12) تيا ڪيڙ پيلاطس ايسُو نئه ساڏيا رئي وڌارئ ڪوشش ڪروا مڏيو، پڻ يھوديئي زور ٿي ام ڪيڏو: "جي تمي هايا منڪ نئه ڍلو ڪرشو، تو تمي رومي حڪومت را پاڌشا را ڏشمڻ ٿيشو. ڪم تو جي ڪوئي آپ نئه پاڌشا ناوئھ، اُو روم را پاڌشا رئه ڪلاڦ وئھ ريو." (13) تيام پيلاطس هائي وات هومپڙين ايسُو نئه ٻارو تيڙايو ان شيپرون را اونگئا نومي جڳا مانھ، جيا نئه عبراني ٻولي ۾ 'گبتا' ڪئھ، ڦينصلا ري گهاڏي مانھ پيئو. (14) هوئھ پاشڪا پرڀ را هڻتا رو جُمعا رو ڏي هتو، ان پپورون را ٻارئڪ ٿيا تا. تئيون پيلاطس يھوديون نئه ڪيڏو: "زئو، تمارو پاڌشا اي ريو." (15) پڻ يھوديئي زور زور ٿي ڪيڏو: "هايا نئه مارو پرو، هايا نئه مارو پرو، هُوڙي مانھ ساڙينَ نمُو مارو پرو." تو پيلاطس اُوئون نئه ڪيڏو: "هُون تمارا پاڌشا نئه هُوڙي مانھ سڙاوينَ مراوون ڪي؟" تو موتي پوزاريئي وڙنڌي ڏيڏئي: "روم را پاڌشا شوا امارو ڪوئي پاڌشا نئي." (16) تيام نيٺ پيلاطس يھوديون ري مرضي ڀرموئھ ڦينصلو ڪريو جي ايسُو نئه هُوڙي مانھ ساڙينَ مراوئھ پرو.

ايسُو نئه هُوڙي مانھ ساڙئھ

(متي 27:32-44، مرقس 15:21-32، لوقا 23:26-43، يُوحنا 19:16-27)

تيام ڦوڙي ايسُو نئه لي ڳيا. (17) ان ايسُو آڀريي هُوڙي آپ اُوٻاڙين پوڏڪي نومي ماڳ مانھ ڳيو، جيا نئه عبراني ٻولي ۾ "گلگتا" ڪئھ. (18) اُوئھ اُوئي ايسُو نئه هُوڙي مانھ ساڙيو، ان پيزون پيئون منڪون نئه اُوئا پيڙا هُوڙي مانھ ساڙيا. هيڪا رئي هُوڙي زمئنه پاهئھ ان پيڙا رئي ڏاوئھ پاهئھ ان ايسُو رئي



هُوَڙِي وَس ۾ هَتِي. ①۹ پيلاطس هيڪي پاڻي مانھ لڪايو جي ايسُو ڪيا وات ري ڪري موت رڻي سزا ڪاڻھ ريو، ان پاڻي ايسُو ري هُوَڙي مانھ لڳراوڻي. پاڻي مانھ اي لڪل هتو:

”ايسُو ناصرت شهر واڙو، يهوديون رو پاڌشا“

②۰ تيام يهودي قوم ري گهڻي منڪي هائي پاڻي پڻي، ڪم تو جيا ماڳ ايسُو نڻه هُوَڙي مانھ ساڙيو تو، اُو ماڳ يروشلم شهر ٿي ڏوڪڙو هتو، ان هائي وات ترڻيون ٻوليون ۾ لڪل هتي، عبراني ٻولي ۾، لاطيني ٻولي ۾، ان يوناني ٻولي ۾. ②۱ تڏيون يهودي قوم ري موتي پوزاريئي پيلاطس نڻه ڪيڏو: ”تمارڻه يهوديون رو پاڌشا نٿو لڪاوو پڻ تمارڻه ام لڪاوو تو جي اُوڻه آپ نڻه يهوديون رو پاڌشا ڪيڏوھ.“ ②۲ پڻ پيلاطس اُوڻون نڻه جواب ڏيڏو: ”جي وات مڻين لڪاوڻي، اُو وات همڙيم لڪل ريشي.“

②۳ تڏيون قوزيئي ايسُو نڻه هُوَڙي مانھ ساڙيو تو، تڏيون اُوڻي اُوڻا را لُوگهڙا ليڏا را ان چاري رڻي هيڪ هيڪ لُوگهڙو وراوي ليڏو، پڻ نونو گهنگهو ري گيو.

هَوَئِه اُو گهنڱهو هوندا ووڻو هتو ان يڪو وٽل هتو. (24) تيام اُوئي هيڪا پيزا نئه ڪيڏو: "ايئا نئه آبي ڦاڙون نئين، پڻ ايئا هارُو آبي پُڪو نوڪون." هائي وات هم تيام ٿئي زم شاستر رئي اي وات پُورئي ٿئ:

"اُوئي مارا لوگهڙا آيت ۾ ورايا ان مارا پيرڻ هارُو پُڪو نوڪيو."

تئين قوزيئي همروم ڪريو.

(25) تئ ته ٿوئنه ايسو ري هُوڙي ڪن اُوئا رئي مان، اُوئا رئي ماضي، ڪلپاس رئي ڏوشي مريم، ان مريم مگدلينبي اوپل هتي. (26) تيام ايسو آپري مان نئه ان آپرا پريمي شيلان نئه ڏوڪڙو اوپل زوئين مان نئه ڪيڏو: "مان، زو. هَوَئِه هائي ٿارو ڏيڪرو سئ." (27) ان پسنه اُوئا شيلان نئه ڪيڏو: "زو، هَوَئِه هائي ٿارئي مان سئ." ان تيا ٿوئا ٿي لين اُوئه شيلنه اُوئا نئه آپري گهري تيڙي زائين اُوئا رئي همپار ڪري.

ايسو رو موت

(متي 27:45-56، مرقس 15:33-41، لوقا 23:44-49، يُوحنا 19:28-30)

(28) تيا ڪيڙ ايسو اي زوئين جي هَوَئِه اُوئا رو پڳوون رو ڏيڌل ڪوم پورو ٿيو، تو ڪيڏو: "مون نئه ترهه لاڳيئ." ان هيون نموننه شاستر رئي وات پُورئي ٿئي. (29) اُوئنه قوزيون ڪن ڪاٿا ڌراڪ رس ٿي پرل هيڪ نونڙو هتو. تيام قوزيئي ٿوري ري زازي جيوي شينه اُوئا موئين پلاڙين زوفا ري لاکڙي مانھ ڦٽراوين ايسو را مونڊا ڪن ڪري. (30) پسنه ايسو زئون ڌراڪ رس سونپيو تئين ڪيڏو: "مارو ڪوم پورو ٿيو." ان ماڻو نماوين آپرو جيو ڏيڏو پرو.

قوزي ايسو رو پاھو ويندڙھ

(31) هَوَئِه جُمعا رو ڏي هتو ان يهوديون رئي مرضي نئي جي چنچر ري رات هُوڙي منڪ هُوڙيون مانھ ٽينگاڙل رئ، ڪم تو چنچر هڻتا رو پوٽر ڏي هتو

ان آزوڪو چنچر گهڻو موٽو ڏي هتو ڪم تو پاشڪا پرڀ را هڻتا رو پويتر ڏي پڻ هتو. تيام اُوئي راز ڪريا واڙا پيلاطس ٿي مونگئي ڪرئي جي قوزي هُوڙي مانه ٽينگڙل منڪون را پڳ پونگه زم او جلدِي مري زائنه، ان پسنه لاشون ننه هُوڙيون ٿي اوتارنه. (32) تيام قوزي آيا را ان پيرهيان منڪ را پڳ پونگيا پرا، جيا ننه ايسو رنه پاهنه پيزي هُوڙي مانه ساڙيو تو، ان پسنه پيزا منڪ را پڳ پونگيا پرا. (33) پڻ زئيون ايسو ڪن آيا، تئيون زويو جي او اڳي مري گيوه. تيام اوٽا را پڳ نه پونگيا، (34) پڻ قوزيون موئين ٿي هيڪنه زئنه پالا ٿي ايسو رو پاهو وينديو، ان جهٽ ۾ لوئي ان پوئي نيهريو.



(35) مئين آپ اونگيئي زويوه، ان هُون هايا را پارام هاڪ پرونه ان مارئي پرل هاڪ هاسي سئنه. مُون ننه ڪهر سئنه جي هُون هاس ڪونه ريو، ان هُون ايٽا هارو هاڪ پرونه ريو زم تمي پڻ ايئون واتون مانه يقين ڪرين ايسو مانه وشواس اوٽو. (36) ڪم تو هائي ٻڌي واتون تيام ٿي، زم شاستر ري واتون پوري ٿنه. زم شاستر ۾ لڪل سئنه:

”اوٽا رو ڪوئي هاڏڪو نئين پنگاهه.“

(37) ان وڙي شاستر موئين اي پڻ لڪل سئنه:

”جيا ننه اُوئي وينديو، اوٽا مائه او تاڪي ريشي.“

ايسو را لاش ننه پونئيرا جيوا مقوم موئين راکنه

(متي 27:57-61، مرقس 15:42-47، لوقا 23:50-56، يُوحنا 19:38-42)

(38) تيا ڪيڙ يوسف جيو ارمتيه شهر رو هتو، اوٽه پيلاطس ٿي مينٽ ڪرئي جي او ايسو رو لاش لي زاوا ڏنه. هوٽه يوسف ايسو مانه سونو وشواس

راکتو. اُوئِه هائي وات ساوئي نٽئي ڪرئي ڪم تو اُو آپري يهودي قوم رن آڳيونون ٿي پڻاتوت ريو. پيلاطس اُوئا نئه ايسو رو لاش لي زايا رئي موڪل ڏيڏئي. تيام يوسف ايسو رو لاش ليڏا هارو ڳيو. ③٩ ان نيڪڊيمس پڻ آيو جيو اڳي رات رو ايسو ڪن آيو تو. اُو آپ پيڙو لاش هارو هيڪ مڻ ڪڻ ڪشيُو واري شينهنون رو مشالو لي آيو، جيا موئين ٻوڙ ان ڪونئر پيڙول هتا. ④٠ تئيون اُوئي پئي زئي ايسو رو لاش ليڏو ان آپري يهودي قوم ري ريت رَواز پرموئنه لاش نئه ڪشيُو واڙا مشالا پيڙو لوگهڙون موئين وينتيو. ④١ هَوئه جيا ماڳ ايسو نئه هُوڙي مانه ساڙيو تو، اُوئا ماڳ هيڪ ٻاڳه هتو، ان اُوئا ٻاڳه موئين هيڪ تازو پونئيرا جيوو مقوم هتو، جيا موئين هزون ڪيا را لاش نئه نتو راڪيو. ④٢ جُمعا رئي هونز ٿي ڳئي ٿئي، ان يهوديون را پويتر ڏي رئي رات پڙيا واري هتئي، جيا ٻر ڌرم پرموئنه اُوئون رئه ڪئين ڪوم نتو ڪروو. تيام اُوئي ايسو رو لاش اُوئا مقوم موئين راڪيو، ڪم تو اُو مقوم ڏوڪڙو هتو.

ايسو جيوِي اُونئِه ان ڏيڪاڙا ڏئِه

ايسو جيوِي اُونئِه

(متي 28:1-8، مرقس 16:1-8، لوقا 24:1-12، يُوحنا 20:1-10)

20 ① ترئمته ڏي آچار رئي ويلئي، زئيون هزون انڌارو هتو، مريم مگدلينِي ايسو را مقوم مانه اُوئي، ان اُوئه زويو جي جيئي شپير پونئيرا جيوو مقوم را مونڊا مانه آڏئي ڏيڏل هتئي، اُو همئنه هيڪل ڪرل سئه. ② تيام اُو شمعُون پطرس ان اُوئا پيڙا شيلو ڪن، جيو ايسو رو پريمي شيلو هتو، ڊوڙين ڳئي، ان اُوئون نئه ڪيڏو: ”پرڻو را لاش نئه مقوم موئين ٿي اُوپاڙي ڳياھ، ان امون نئه ڪبر نٿي جي اُوئا را لاش نئه ڪيھ ميليوها!“

③ تيام پطرس ان پيزو شيلو اوت ٿي مقوم هوما رونا ٿيا. ④ او ٻي ئي پيزا ڊوڙا مڏيا، پڻ پيزو شيلو پطرس ٿي تڪو ڊوڙو ان مقوم مانھ پيرھين پوڳي آيو. ⑤ اونه نيسو نمين مقوم موئين زويو، تو روڳا لاش را لوگهڙا پڙياھ. پڻ او مقوم موئين نه گيو. ⑥ تئين شمعون پطرس پڻ وونهڙ وونهڙ ڊوڙين اوتھ آوي پوڳيو، ان مقوم موئين پينو. ان اونه لاش رون لوگهڙون ننه پڙل ڏيکيا. ⑦ ان اوتا رومال ننه پڻ ڏيکيو، جيو ايسو را ماتا مانھ وينتوزل هتو. او لوگهڙون پيزو پڙل نتو پڻ هڪا ماڳ ڌار وينتوزل پڙيو تو. ⑧ تئين پيزو شيلو جيو پيرھين مقوم مانھ آيو تو، او پڻ موئين گيو. ان اونه ٻڌوئي ڪئين زويو ان يقين ڪريو جي ايسو جيوي اونيھ. ⑨ شاستر موئين ايوي واتون اڳي لڪل هتي جيا ٿي ٿاڀتي ٿھ جي ايسو ضرور مرلون موئين ٿي جيوي اوشي، پڻ او هزون هوڏي شاستر ري هائي واتون نٿا هڙمتا. ⑩ پسته شيلا پاسا آپري گهري گيا پرا.

ايسو مريم مگداليني ننه ڏيکارو ڏنھ

(متي 9:28-10، مرقس 16:9-11، يُوحنا 11:20-18)

⑪ پڻ مريم پونئيرا جيوا مقوم ٿي ٻاري اويئي روتيت رئي. روتي روتي اونه نمين مقوم موئين زويو، ⑫ تو اوتا ننه ٻي آڪاشي ڏوت ڌوڙا لوگهڙا پيرل ڏيڪيام آيا. او مقوم موئين لاش هارو ناول ٿلا مانھ پينل هتا، جيا مانھ ايسو رو لاش اڳي ميلل هتو، هڪ مٿوئي ان هڪ پڳوئيئي. ⑬ آڪاشي ڏوتي مريم ننه ڪيڏو: ”ٻائي، تون ڪم روئھ رئي؟“ تو مريم ڪيڏو: ”مارا پڙو را لاش ننه اوپاڙي گياھ، ان مون ننه ڪهر نٿي جي اوتا ننه ڪيھ راکيوھ.“

⑭ هم ڪين او پاسي ڦري ان ايسو ننه آپ ڪن اوپل ڏيکيو، پڻ اونه نه اوڙڪيو جي اي ايسو سته. ⑮ ايسو مريم ٿي پونسيو: ”ٻائي، تون ڪم روئھ رئي؟ تون ڪيا ننه ڳوتھ رئي؟“ مريم ام هڙمي جي اي ٻاگھ رو ماري سته،

تو ڪيڏو: ”ساب، جي تمڻي لاش اُڀاڙي ڳيا هئو، تو مون نٿ ڪو جي تمڻي اُٿا نٿ ڪيڏو راکيو، ان هُون اُٿا نٿ لي زائيو.“⁽¹⁶⁾ تو ايسُو اُٿا نٿ ڪيڏو: ”مريم.“ تيا مانھ اُٿو ايسُو هومڻي ڦرين آڀري عبراني ٻولي ۾ ڪيڏو: ”رَبُوني،“ جيا رو مطلب سنه ڳرو جي. ان هم ڪين اُٿا ري پڳي لاڳئي.⁽¹⁷⁾ تو ايسُو اُٿا نٿ ڪيڏو: ”مون نٿ زهالين مت راک، ڪم تو هُون هزون هُڏي مارا ٻاپ ڪن آڪاش ۾ پاسو نٿي ڳيو. پڻ تُون مارون ڀايون ڪن زا ان اُٿون نٿ ام ڪي، جي هُون مارا ٻاپ ڪن ان تمارا ٻاپ ڪن پاسو زائونھ ريو، جيو مارو پڳوون سنھ ان تمارو پڳوون پڻ سنھ.“⁽¹⁸⁾ تو پسنھ مریم مگدلينی شيلون ڪن زائين ڪيڏو جي: ”مٿين پريو نٿ ڏيکيو.“ ان اُٿون نٿ اُو واتون همڙاي جي ايسُو اُٿا نٿ ڪيڏي تي.

ايسُو آڀرون شيلون نٿ ڏيکارو ڏٺو

(مرقس 16:14، لوقا 24:36-49، يُوحنا 19:20-23)

⁽¹⁹⁾ اُٿو هاڳي ڏي آچار را هونز را، شيلا هیکا گهر ۾ دروازا موئين ٿي پنڌ ڪرين پيڙا هتا، ڪم تو اُو آڀري يهودي قوم رون منڪون ٿي پڻاتا تا. تنيون ايسُو آوين اُٿون وسا اُڀو، ان اُٿون نٿ ڪيڏو: ”تمڻي هڪي ريو.“⁽²⁰⁾ ان هم ڪين اُٿون نٿ آڀرا هات ان آڀرو پاھو ڏيکارو. تيام پريو نٿ ڏيڪين شيلا الاهي ڪُش ٿيا.⁽²¹⁾ تنيون ايسُو اُٿون نٿ وڙي ڪيڏو: ”تمڻي هڪي ريو! زم پڳوون ٻاپ مون نٿ ميليھ، تم هُون پڻ تمون نٿ ميلونھ.“⁽²²⁾ ان هم ڪين اُٿون مانھ ڦونڪيو ان ڪيڏو: ”تمڻي پويتر آتما ليو.“⁽²³⁾ جيون منڪون نٿ تمڻي پڳوون را پاها ٿي ڏوهون رئي ماقئي ڏيوھ، تو پڳوون را پاها ٿي اُٿون نٿ ماقئي زڙل هوشي. ان جيون منڪون نٿ تمڻي پڳوون را پاها ٿي ڏوهون رئي ماقئي نٿي ڏيتا، تو پڳوون را پاها ٿي اُٿون نٿ ماقئي زڙل نئين هئو.

ايسُو توما نٺ ٻيزون شيلون پيڙو ڏيکارڻو ڏٺھ

②4 ھوئہ توما، جيا نٺہ ٻيلارڙيو پڻ ڪيٽا، ان ايسُو رون ٻارون سُونڊل شيلون موئين ٿي ھيڪ ھتو، اُو ايسُو رٺہ آيا رٺہ توئٺہ شيلون پيڙو نتو. ②5 تيام ٻيڙا شيلا اُوئا نٺہ ڪيوا لاڳيا جي ”امي ڀرڻو نٺہ ڏيکيوھ.“ پڻ توما اُوئون نٺہ ڪيڏو: ”زئيون ھوڏي ھون ميڪون را نيشون اُوئا رون ھاڻون ۾ نہ ڏيڪون، ان ميڪون رون ڦتون موئين اُونگڙئي نہ نوڪون، ان اُوئا را پاھا واڙا ڦت موئين ھاڻ نہ نوڪون، تئيون ھوڏي ھون موزگوني يقين نئين ڪرون.“

②6 ھيڪا ھڦتا ڪيڙ ايسُو را شيلا وڙي گھر موئين ھتا، ان توما پڻ اُوئون پيڙو ھتو. دروازا موئين ٿي پنڌ ھتا، توئي پڻ ايسُو آوين اُوئون وسا اُوڀو ان ڪيڏو: ”تمي ھڪي ريو.“ ②7 تئيون ايسُو توما نٺہ ڪيڏو: ”ايئٺہ اُونگڙئي سٻاڙين تون مارا ھاڻ زو، ان مارا پاھا را ڦت موئين آڀرو ھاڻ نوڪ. شڪ مت ڪر پڻ يقين ڪر.“ ②8 تيا مانھ توما اُوئا نٺہ ڪيڏو: ”تمي مارا ڀرڻو ان مارا ڀڳوون سو!“ ②9 تو ايسُو اُوئا نٺہ ڪيڏو: ”تئين مون نٺہ ڏيکيوھ، ان تيام وشواس اوٿيوھ. پاڳواڙا اُو سٺہ جيئي مون نٺہ نٿي ڏيکيو، توئي پڻ مون مانھ وشواس اوٿئھ.“

يُوحنا رو اي ڪتاب لکيا رو مطلب

③0 ھوئہ ايسُو آڀرون شيلون رٺہ روڀرو ٻيڙا گھڻا ڀرسا. ان نيشون ڏيکارڙيا، جيا را پارام ايٺا ڪتاب ۾ نٿي لکل. ③1 پڻ مئين ھاڻي واتون تيام لکيھ زم تمي يقين ڪرو جي ايسُو ڀڳوون رو سُونڊل ڀڄايا واڙو ڪريست ان ڀڳوون رو ڏيڪرو سٺہ، ان اُوئا مانھ وشواس راڪيا ٿي تمون نٺہ اُوئا رٺہ ھيلئہ ھميش رو جيون زڙئہ.

اگرې وائون

ايسو گليل ډنډ کڼ آپرون شيلون ننه ډيکارو دته

21 ① تيا کيژ گليل ډنډ را کپ مانه ايسو آپرون شيلون ننه وژي ډيکارو ډيډو. وات ام ټي.

② شمعون پطرس، توما جيا ننه پيلازيو کيتا، نثانيئل جيو گليل صوپا را قانا شهر رو هتو، زبدي را ډيکرا ان ټي پيزا شيلو ټډائي پيزا هتا. ③ تو شمعون پطرس اوئون ننه کيډو: "هون مشي ماروا زائونه ريو." تو اوئي کيډو: "امي پڻ تون پيزا هالونه." تو پسنه اوټ ټي زائين ټيږي موئين سترين مشي ماروا گيا. پڻ اوئه زات اوئون ننه کئين هات نه آيو.

④ پروژ ره توئه ايسو ډنډ را کپ مانه آوين اويو. پڻ شيلون ننه کږ نتي جي او ايسو سته. ⑤ تيام ايسو اوئون ننه هاډ ډين کيډو: "او پايون، تمې کئين مشي نه ماري کي؟" تو اوئي ورنډي ډيډي: "نا. هيک ئي نه ماري." ⑥ تو ايسو اوئون ننه کيډو: "ټيږي ره زمته پاهنه رچ نوکو، تو تمون ننه مشي زږشي." تيام اوئي اوئه پاهنه رچ نوکيو، ان اتي مشي رچ م آوين ځاتي، جي او رچ ننه ټيږي موئين توئي نه هکيا. ⑦ تيام ايسو ره پريمي شيلنه پطرس ننه کيډو: "هائي پريو سته!" تيام شمعون پطرس اي وات هومپزين جي پريو سته، جهټ م آپرو گهنگهو پيري سندرو بوندي پوټي موئين نينکڙو ماريو. کم تو مشي ماريا ره توئه اوئا ره روگي توئا ربي پوت کرل هتي. ⑧ پڻ پيزا شيلو مشيون ټي پرال رچ ټيږي وونهز توئا توئا ټيږي هاکلين کپ مانه آيا، کم تو او کپ ټي روگا هوک وکون شيني هتا.

⑨ زنيون او کپ مانه آوين پوگيا، تنيون اوئي زويو جي کيننازون رو ډيوتا

ٺه ريو، جيا مانھ مسئي شڪاھ رئي، ان روتئي پڻ پڙيھ. ⑩ تو ايسو اوتون نھ ڪيڏو: ”جي مشي تمھي ھمئھ ماريھ، اوتون موئين ٿي ڪئينڪ لي آو.“

⑪ تيا مانھ شمعون پطرس پيڙي مانھ سڙين ڇڙ ڙھاليو ان پوئي موئين رو موئين ڪپ مانھ توئي آيو. ڇڙ ھيڪ ھو ٿيونجاھ موتيون مشيون ٿي پرال ھتو. اتي گھڻي مشي ھتي، توئي پڻ ڇڙ نٿو ڦاٿيو. ⑫ تيون ايسو اوتون نھ ڪيڏو: ”و را، نيروٿي ڪرو.“ ايسو رون شيلون موئين ٿي ڪيا نھ ئي اي وات پونسيا رئي ھيمت نہ ٿئي جي ”تمھي ڪون سو؟“ ڪم تو اوتون نھ ڪبر ھٿي جي پريو سھ.

⑬ تيون ايسو آوين روتئي لين اوتون نھ وراوي ڏيڏي، ان ھمريھ مسئي پڻ وراوي ڏيڏي.

⑭ مارلون موئين ٿي جيوي اونيا ڪيڙ ھائي ترٿمي وار ھتو زئون ايسو آپرون شيلون نھ ڏيڪارو ڏيڏو.

ايسو پطرس نھ وشواسيون نھ ھمپازيا رو ڪئھ

⑮ زئون اوتي نيروٿي ڪري ليڏي، تيون ايسو شمعون پطرس نھ ڪيڏو: ”يوحنا را ڏيڪرا شمعون، ڪي تون مون ٿي ھاس ۾ ايئون ٻڌون ٿي وڌارھ پريم ڪرھ؟“ تو اوتھ ڪيڏو: ”ھوئھ پريو، تمون نھ ڪبر سھ جي ھون تمون ٿي پريم ڪرونھ.“ تيا مانھ ايسو ڪيڏو: ”زم ڌراڙ گھيٽريون نھ سارھ، تم تون مارون منڪون رئي وشواس راکيا ۾ ھيمت وڌار.“

⑯ تيون ايسو وڙي پيڙي وار اوتا ٿي پونسيو: ”يوحنا را ڏيڪرا شمعون، ڪي تون ھاس ۾ مون ٿي پريم ڪرھ؟“ تو اوتھ ڪيڏو: ”ھوئھ پريو، تمون نھ ڪبر سھ جي ھون تمون ٿي پريم ڪرونھ.“ تيا مانھ ايسو اوتا نھ ڪيڏو: ”زم ڌراڙ رڊيون نھ ھمپازھ، تم تون مارون منڪون رئي ھمپاز ڪر.“

⑰ تيون ايسو ترٿمي وار اوتا ٿي پونسيو: ”يوحنا را ڏيڪرا شمعون، ڪي تون مون ٿي پريم ڪرھ؟“ پطرس نھ ڏک ٿيو جي ايسو ترٿمي وار ھم پونسيو

”ڪي تون مون ٿي پريم ڪرڻ؟“ تو اُٿه ايسو نٿه ڪيڏو: ”پرڀو، تم ٻڌوئي ڪئين زوڻو، تمون نٿه تو کپڻ سٺه جي هُون تمون ٿي پريم ڪرونه.“ تيا مانھ ايسو اُٿا نٿه ڪيڏو: ”زم ڌراڙ ريڊيون نٿه سارڻ، تم تون مارون منڪون رڻي همپار ڪر.“ (18) هُون تون نٿه هاس ئي هاس ڪونه: زڻيون تون جوڻ هتو، تڻيون تون پيٽ ٻوندين جيئنه تارو من ڪرتو، اُٿه تون زاتو. پڻ زڻيون تون ڏوڪرو ٿيھ، تو تون آڀرا هات پونهرا ڪريھ، ان پيزو ڪوڪ تون نٿه ٻونڌشي، ان جيئنه زايا هارو تارو من نئين ڪنه، اُٿه تون نٿه زوري لي زاشي.“ (19) هائي وات ڪيڏا ٿي ايسو پطرس را موت رو اشارو ڏيڏو جي اُو هُوڙي مانھ مريا ٿي پڳوون رو مون ساوو ڪرشي. تڻيون هائي وات ڪين ايسو پطرس نٿه ڪيڏو: ”تون مارا مارڳ مانھ وين مون وونهڙ آو!“

پطرس ايسو ٿي يوحنا را موت را پارام پُونسيه

(20) تڻيون پطرس لوڻو وارين زيو جي اُو شيلو وونهڙ آوڻه ريو جيو ايسو رو پريمي هتو، ان جيئنه پرڀ رو پوزن زميا رڻه توتنه ايسو را ڪون ۾ ڪين ام پُونسيو تو: ”پرڀو، جيو شيلو تمون نٿه زهلاوشي، اُو ڪيو سٺه؟“ (21) تيام پطرس هايا شيلو نٿه ڏيڪين ايسو ٿي پُونسيو: ”پرڀو، هايا ٿي ڪي ٿيشي؟“ (22) تو ايسو اُٿا نٿه ڪيڏو: ”جي مارئي مرضي ام هوڻه جي اُو مارا پاسا آيا هُوڙي جيو تو رڻه، تو ايڻا ۾ تارو ڪي؟ تون تو روڳو مارا مارڳ مانھ وين مون وونهڙ آو.“

(23) تيام اي وات وشواسي پايون ۾ پڪڙي گهي جي اُو شيلو نئين مرڻه. پڻ ايسو پطرس نٿه ام نتو ڪيڏو جي اُو شيلو نئين مرڻه، پڻ اُٿه روڳو ام ڪيڏو تو: ”جي مارئي مرضي ام هوڻه جي اُو مارا پاسا آيا هُوڙي جيو تو رڻه، تو ايڻا ۾ تارو ڪي؟“

اُٺا وڪت را منڪ

اي ڪتاب لکيا وڙا يوحنا را پارام آڀرئي هاڪ پرئھ

②4 ھاڻي شيلو اُو رو اُو سئھ جيو ايئون ٻڌيون واتون نئھ اونڪيئي ڏيکين هاڪ پرئھ ان جيئھ اي ٻڌي واتون لکيھ. ان امون نئھ ڪٻر سئھ جي اُٺا رئي پرل هاڪ ھاسئي سئھ.

②5 ايسو پيڙا گھڻا ڪوم ان گھڻي واتون ڪري، جي ايٺا ڪتاب ۾ لکل نٿي. جي ايسو را هر هيڪ ڪوم ان وات را پارام لکٽ، تو اتا گھڻا ڪتاب ٿٽ جي مارئھ ليکئھ پوري ڏنيا ۾ اُٺون نئھ ميليا ھارو ماڳ نہ ھوئ.

مک شيلون رون کومون رئي هزموتئي

کتاب لکيا واڙو

ايتا ڪتاب موئين لکيا واڙا رو نوم نئي لکل، پڻ وات ساوئي سڌ جي اي ڪتاب ان ”لوقا رو لکل شاستر“ نومي ڪتاب هيڪائي منک را لکل سڌ، ڪم تو ٻي ئي ڪتاب ٿيوفلس را نوم مانھ لکل سڌ، ان ايتا ڪتاب م پيرھيان ”لوقا رو لکل شاستر“ نومي ڪتاب را پارام پڻ لکل سڌ (لوقا 1:1، مک شيلون را ڪوم 1:1).

منک شروع ٿي لين ام هزمتهه جي اي ڪتاب لوقا رو لکل سڌ. لوقا پولوس پيڙو ڪوم ڪرتو (فليمون 24:1)، توئي پڻ ايتا ڪتاب م لوقا رو نوم پولوس رون پيڙون ساڻيون پيڙو ڪيئھ لکل نئي. پڻ جيئھ لوقا پولوس پيڙو هتو، اوتھ اوتھ اُپرو نوم نئي لکيو پڻ ”امي“ لکيوھ (مک شيلون را ڪوم 17-10-16، 15-5-20، 18-1-21، 16-28-1).

لوقا يھودي قوم رو نتو پڻ ڌاري قوم رو هتو، ان حڪيم هتو (ڪلسيون 11:4، 14). زئيون پولوس ايسو را پارام هميڙايا هارو پيڙا چڪر مانھ هتو، تئيون لوقا اوتا پيڙو مڪڏيڻ صوپا موئين گيو (مک شيلون را ڪوم 12-10-16)، ان تيا ڪيڙ پڻ او گهڻي وار پولوس پيڙو ڪوم ڪرتو. زئيون پولوس نھ موت رئي سزا رڙيا واڙي هئي، تئيون لوقا اوتا ڪن جيل م زاتو ريتو (2 تيمٿيئس 11:4).

لوقا اي ڪتاب اندازام 63ع م لکيو، ڪا ٿي هيڪهه تيا ڪيڙ پڻ لکيو هو.

ڪتاب ڪيا منک هارو لکيو

لوقا اي ڪتاب ان ”لوقا رو لکل شاستر“ نومي ڪتاب پڻ ٿيوفلس هارو لکيا، زم او آپ پئھ ان زويام ايئون ڪتابون را نقل منڪون ڪن ڪراوين وراوي ڏھ.

”ٿيوفلس“ نوم ٿي ڪبر پڙهه جي ٿيوفلس يھودي قوم رو نتو، پڻ ڌاري قوم رو هتو. وات ساوئي سڌ جي او موتو منک هتو، ان زويام رومي حڪومت رو منک هتو، ڪم تو لوقا اوتا نھ ”موتواڙو“ ڪيڏو (لوقا 1:1). يوناني بولي م اوتا را نوم رو مطلب ”ڀڳوون ٿي پريم راکيا واڙو“ سڌ، ان او ايسو را پارام زوٽوا ڪرتو تو.

ڪتاب لکيا رو مطلب

لوقا اي ڪتاب ايتا هارو لکيو زم ٿيوفلس نھ، ان پيڙون ٻڌون نھ، صحيح ڪبر پڙھ، جي ايسو را ڪيڏا پرموتھ پويتر آتما ڪيوھ نمونھ آيو، منڪي پويتر آتما ري ڪڙا ٿي ڪيوھ نمونھ

ايسُو را پارام همپزياو، ان وشواسي ڌرم ڪيوڻ نمونئ پکڙيو (مک شيلون را کوم 8:1).
 ايتا ڪتاب م لوقا ن روڳي تاريخي واتون ڪرڻه، پڻ وات ساوئي ڪرڻه جي وشواسي
 ڌرم پويتر شاستر پرموتئ هاسو سئ، اي قانون رڻه ڪلاڦ نئي، ان پڳوون آپ پويتر آتما نئي
 ايتا نئ پکڙيا هارُو منڪون نئ هيئت ڏئھ. ايتا ڪتاب موئين هيڪ نمونو پڻ ڏيکارل سئ جي
 وشواسيون رڻه ڪيوڻ نمونئ ويو ان ڏک سهوو.

ايتا ڪتاب موئين اي حصا سئ:


مک شيلون نئ پڙاول کوم را پارام مورليا وين	11-1:1
يروشلیم شهر م وشواسي ڌرم پکڙڻه	60:7-12:1
يهوديه ملڪ ان سامريه علاقا م وشواسي ڌرم پکڙڻه	25:12-1:8
پولوس رو ايسُو را پارام همپزيا هارُو پيرهيون چڪر	35:15-1:13
پولوس رو ايسُو را پارام همپزيا هارُو پيزو چڪر	22:18-36:15
پولوس رو ايسُو را پارام همپزيا هارُو ترڻمو چڪر	16:21-23:18
پولوس يروشلم شهر م زهلائي زائھ	32:26-17:21
پولوس قيدي ٿيڻ دنيا را ٻڌون ٿي موٽا روم شهر موئين زائھ	31:28-1:27
ان اوتئ ايسُو را پارام همپزاوئھ	

ايتا ڪتاب را شاستر ٿي پيزا حوالا:

کوم 20:1 زبور 25:69	کوم 26-25:4 زبور 2-1:2
کوم 20:1 زبور 8:109	کوم 3:7 پيدائش 1:12
کوم 21-17:2 يو ايل 32-28:2	کوم 5:7 پيدائش 7:12
کوم 28-25:2 زبور 11-8:16	کوم 7-6:7 پيدائش 14-13:15
کوم 30:2 2 سموئيل 13-12:7	کوم 8:7 پيدائش 14-9:17
کوم 30:2 زبور 11:132	کوم 9:7 پيدائش 36-12:37
کوم 35-34:2 زبور 1:110	کوم 15-10:7 پيدائش 7:46-1:39
کوم 18:3 زبور 18-1:22	کوم 16-15:7 پيدائش 14:50-29:49
کوم 18:3 يسعياھ 12-1:53	کوم 16-15:7 پيدائش 26-24:50
کوم 23-22:3 استشنا 15:18, 19	کوم 16-15:7 يشوع 32:24
کوم 24:3 2 سموئيل 16, 12:7	کوم 19-17:7 خروچ 22-6:1
کوم 25:3 پيدائش 18:22	کوم 29-20:7 خروچ 15-1:2
کوم 25:3 پيدائش 4:26	کوم 34-30:7 خروچ 10-1:3
کوم 11:4 زبور 22:118	کوم 37:7 استشنا 15:18

كوم 34:13 يسعياه 3:55	كوم 38:7 خُرُوج 17:20-1:19
كوم 35:13 زُبُور 10:16	كوم 41-39:7 خُرُوج 6-1:32
كوم 36:13 1 سلاطين 10:2	كوم 43-42:7 عامُوس 27-25:5
كوم 41:13 حَبَقُوق 5:1	كوم 44:7 خُرُوج 11:31-8:25
كوم 47:13 يسعياه 6:49	كوم 44:7 خُرُوج 38:40-4:35
كوم 1:15 احبار 3:12	كوم 45:7 يَشُوع 23:11-1:1
كوم 7:15 كوم 48-1:10	كوم 46:7 2 سموئيل 7-1:7
كوم 18-16:15 عامُوس 12-11:9	كوم 47:7 1 سلاطين 38-1:6
كوم 20:15 خُرُوج 5-3:20	كوم 50-49:7 يسعياه 2-1:66
كوم 20:15 خُرُوج 14:20	كوم 56:7 دانِي ايل 14-13:7
كوم 20:15 احبار 12:17	كوم 33-32:8 يسعياه 8-7:53
كوم 20:15 اِسْتِشْنا 24-23:12	كوم 14:10 احبار 47-1:11
كوم 8:18 1 كُرْتِثيون 14:1	كوم 14:10 اِسْتِشْنا 19-3:14
كوم 4-3:19 مَتِي 12-1:3	كوم 34:10 اِسْتِشْنا 17:10
كوم 4-3:19 مرقس 8-1:1	كوم 43:10 يسعياه 11:53, 16:28
كوم 4-3:19 لُوقا 17-1:3	كوم 43:10 يرمياه 34:31
كوم 4-3:19 يُوَحْنا 27-26:1	كوم 43:10 يُو ايل 32:2
كوم 21-18:20 كوم 21-19:18	كوم 16:11 كوم 5:1
كوم 21-18:20 كوم 1:20-1:19	كوم 22:13 1 سموئيل 14:13
كوم 35:20 لُوقا 21:12	كوم 22:13 1 سموئيل 13-1:16
كوم 8:21 كوم 5:6	كوم 23:13 يسعياه 16-1:11
كوم 16-4:22 كوم 19-1:9	كوم 24:13 مَتِي 6-1:3
كوم 20-19:22 كوم 3:8-54:7	كوم 24:13 مرقس 5-1:1
كوم 3:23 اِسْتِشْنا 2-1:25	كوم 24:13 لُوقا 6-1:3
كوم 5:23 خُرُوج 28:22	كوم 25:13 يُوَحْنا 28-19:1
كوم 11-9:26 كوم 3:8	كوم 27:13 يسعياه 12-1:53
كوم 18-12:26 كوم 6-1:9	كوم 31-27:13 مَتِي 20:28-57:26
كوم 23-22:26 اِسْتِشْنا 15:18	كوم 31-27:13 مرقس 20:16-53:14
كوم 23-22:26 يسعياه 12-1:53	كوم 31-27:13 لُوقا 51:24-66:22
كوم 23-22:26 يسعياه 6:49	كوم 31-27:13 يُوَحْنا 22:21-19:18
كوم 27-26:28 يسعياه 10-9:6	كوم 29:13 زُبُور 18-6:22
	كوم 33:13 زُبُور 7:2

مُک شيلون را کوم



① پريمي ٿيولس،

1 مٿين آپرا پيرهيان ڪتاب موٽين اُونئون ٻڌون ڪومون ان واتون را پارام لکيوھ جي ايسو شروع ٿي لين ڪرتو ريو ان شيڪاڙتو ريو، زئيون هُڏي پڳوون اُونئا ننه آڪاش مانھ نہ اوپاڙيو.

② آپرنه آڪاش ۾ اوپڙايا مور ايسو آپرون سُونڊل مُک شيلون ننه پَوِيتَر آتما را ڪيڏا ٿي حُڪم ڏيڏا. ③ اُونه ڏک ۾ مريا ڪيڙ آپ ننه گهڻيون ٿاڀتيون ٿي اُونئون ڪن وڙي جيو تو ڏيڪاڙيو، ان چاليهون ڏينون هُڏي اُونئون ننه ڏيڪاڙا ڏيتو ريو ان پڳوون را راز را پارام واتون شيڪاڙتو ريو.

ايسو آڪاش ۾ اوپڙايا ٿي مور پَوِيتَر آتما ميليا را پارام
ان پوري دنيا ۾ آپرا پارام همپڙايا رو ڪڻھ

④ هيڪ وار ايسو مُک شيلون ڪن آيو ان اُونئون ننه اي حُڪم ڏيڏو جي ”تمي يروشلم شهر ٿي مت زايا، پڻ پڳوون ٻاپ را پَوِيتَر آتما ميليا را اُونئا وائيڏا رنه پورا ٿيا رئي وات زوتا ريا، جيا را پارام مٿين اڳي تمون ننه ڪيڏو تو، ⑤ ڪم تو يوحنا پوئي ٿي پَوِيتَر سنون ڏيتو، پڻ ٿوڙون ڏينون ڪيڙ تمون ننه پَوِيتَر آتما

ټي پوټر سنون زږشي. "⑥ تيام ټډائي پيڙا تين مک شيلي ايسو ټي پونسو:
 "پريو، کي اي او توو سئ، زئيون تمې ډاري قوم رو راز کتم کرين، آپ
 پاډشا تين آټي اسرائيلي قوم مائه راز کړشو؟" ⑦ تو ايسو اوئون ننه کيدو:
 "جيا توئا ان زمونا پگبون ټاپ آپرا کيدام راکيا، اوئون را پارام زوئوو تمارو
 کوم نټي. ⑧ پښ زئيون پوټر آتما تمون ننه زږشي، تئيون تمون ننه کړا زږشي،
 ان تمې يروشلم شهر ږ، پورا يهوديه ملک ږ، سامريه علاقا ږ ان ډرتي را
 ډنگ هوډي مارا پارام هاگ پرين همپړاوشو!"

⑨ زئيون ايسو هم کي ريو، تئيون پگبون اوئون رنه روپرو اوئا ننه آکاش
 مانه اوپاري ليدو، ان واډرته اوئون ريون نظرون ټي اوئا ننه هتاريو پرو. ⑩ ايسو
 رنه زايا رنه توئته، زئيون مک شيله هیک ډار آکاش هوما تاكي ريا تا، تئيون
 اوچتا ټي ډوزون لوگهڙون وازا آدمي اوئون کن اوپل ډيکيام آيا ⑪ ان کيرا
 مډيا: "او گليل رون منکون، تمې کم اوپين آکاش هوما زوئوه ريا؟ هائي
 ايسو، جيو آکاش مانه اوپري گيو، زم تمې هيا ننه آکاش مانه زاتون
 ډيکيو، همروم وزي پاسو آوشي."

يروشلیم شهر ږ وشواسي ډرم پکڙته

يهوداه ري جگا ږ منياه ننه مک شيلو سونيدنه

⑫ پسئ مک شيله زيتون را ډونگر ټي پاسا يروشلم شهر هوما زوونا تيا. او
 ډونگر شهر ټي اډک گائو شيتي سئ. ⑬ شهر موئين پوگين او اوئا ماږي موئين
 سږي گيا جيتته او ټډائي ريتا. او اي هتا: پطرس، يوحنا، يعقوب ان اندرياس،
 فلپس ان توما، برثلماي ان متي، حلفي رو ډيکرو يعقوب ان شمعون جيا ننه
 آپرا ملک ري آزادي هارو وډيا وازو کيتا، ان يعقوب رو ډيکرو يهوداه. ⑭ اي
 ټډائي ان او ډوشي جيتي ايسو مانه وشواس راکیو تو، ان ايسو رئي مان ماريون

ان ايسو را پائي پښ، هيک من ټين هميش پراټنا کرتا ریا.

⑮ اوتون ئي ډيتون موئين، پطرس وشواسي پايون وسا وات کريا هارو اونين اوپو. اوتنه هيک هو ان ويهک زتا پيزا ټيل هتا. پطرس اوتون نه امر کيدو: ⑯ "پايون ان بنون، جي شاستر ربي وات دائود پويتر آتما ري کزا ٿي يهوداه را پارام مور ٿي کيدئي ٿئي، اوتا ره ضرور پوري ٿيوو تو. يهوداه ايسو نه زهاليا وازون نه شيرزو ڏيکاريو تو. ⑰ او امون مُک شيلون موئين ٿي هيک هتو، ان اماري اينا شيوا موئين حصو ليدو تو."

⑱ هوته يهوداه هيا کون رون پٺيهون ٿي هيک کيتر ويساتو ليدو تو. اوتنه او نيسو پڙي گيو، اوتا رو پيت ڦاٽي گيو ان ٻڌائي اونترا ٻارا نيهری آيا. ⑲ يروشلم شهر رون ٻڌون منکون نه اينا وات ربي کهر پڙي گئي، تيام اوئي هيا کيتر نه آپري ٻولي موئين "هقل دما" کيدو، جيا رو مطلب سه "کون رو کيتر."

⑳ پسته پطرس کيدو: "دائود را پزنون را شاستر زبور موئين يهوداه را پارام لکل سه جي
'اوتا رو گهر هونو ٿي زانه،
ان اوتا موئين ریا وازو کوئي نه هوته!'

ان اي پڻ لکل سه جي

'اوتا ري جگا موئين پيزو کوک شيوا کره!'

㉑ تيام، جيا آدمي اتو وکت امون پيزا ریا تا، زتو وکت پريو ايسو امون پيزو ريو، ㉒ مطلب يوحنا ره پويتر سنون ڏيدا را توتا ٿي لين ايسو ره آپون کن ٿي آکاش مانه اوپڙايا هوڌي، اوتون موئين ٿي هيک زتو را کوو کپنه، جيو امون مُک شيلون پيزو ايسو ره جيوي اوليا ربي هاڪ پرته."

㉓ تيون وشواسيئي پتون زتون نه اوپڙايا. هیکا رو نوم يوسف هتو، جيا نه برسبا کيتا، ان يوسف پڻ کيتا. ان پيزا رو نوم متياه هتو. ㉔ تيون اوئي

ام پراٽنا ڪرئي: ”او ڀرڻو، تمهي ٻڌون منڪون رن منون ٻي واتون زوڻوھ. اي وات ساوئي ڪرو جي ايئون ٻيئون موئين ٿي تمهي ڪيا نٿو سونديوه،⁽²⁵⁾ جي او مُک شيلو ٿين اينا شيوا ري جڳا موئين آوڻ، جيا نٿو يهوداه ساڏين آوڻ ۽ گيوھ ڀرو، جيئڻ ۽ او زيا رڻ لائق هتو.“

⁽²⁶⁾ پستھ اوئي ٻيئون ري ڀرڻي ڪاڍي ان متياه را نوم رڻي ڀرڻي نيهري. ان او ٻيرون اڳيارون مُک شيلون ڀيڙو گهڻو.

وشواسيون نڌ پوئتر آتما زڙھ



2 ⁽¹⁾ زئون پينتيڪوسٽ نومي ڀرڻ رو ڏي آيو، تيون ٻڌائي وشواسي هيڪي جڳا ۾ پيڙا هتا. ⁽²⁾ اوچتو آڪاش ٿي هيڪ موٽو اواز هومپڙام آيو، زم زور ٿي واڙ آوڻي هون، ان جيا گهر موئين او پينل هتا، او اواز ٿي گونزي وڙيو. ⁽³⁾ ان اوئون نٿو زوڻ ڏيوٽا رن زهراون جيوي جيون ڏيڪيام آوي،

جي هيڪ هيڪ ڌار ٿين اوئون موئين ٿي هر هيڪ مانھ آوين آوي. ⁽⁴⁾ ان او ٻڌائي پوئتر آتما ٿي پرائي گيا، ان او ڦرڦر ڦرڦر ٻولي ٻولوا مڏيا، زم پوئتر آتما اوئون نٿو ٻوليا رڻي ڪڙا ڏيڏي تي.

⁽⁵⁾ هون آوڻ ۽ يروشلم شهر موئين يهودي منڪ ريتا جيا پگئون رو گهڻو مون راکتا، ان دنيا را هر هيڪ ملڪ ٿي اول هتا. ⁽⁶⁾ زئون اوئي اي اواز هومپڙيو، تيون گهڻا منڪ اوڻ ۽ آوين پيڙا ٿيا. او حيروني م پڙي گيا، ڪم تو جي واتون وشواسي ڪرتات ريا، او واتون هر هيڪ منڪ آڀري آڀري ٻولي موئين هومپڙوت ريو. ⁽⁷⁾ او حيرون ٿين عجب ٿي ڪيا مڏيا: ”زوڻو، اي تو ٻوليا وڙا ٻڌائي گليل صوپا را نٿي ڪي؟ ⁽⁸⁾ پستھ ڪم ڪرين آڀون موئين ٿي هر هيڪ آڀرا آڀرا ملڪ رڻي ٻولي هومپڙه ريو؟ ⁽⁹⁾ آڀون موئين ٿي ڪئينڪ پارٿي قوم را، ڪئينڪ



مادي قوم را ان کئینک عیلامی قوم را ملک موئین ریا وازا، ان کئینک مسویتامیه ملک را ریا وازا، یهودیه ان کپدکیه صوپون را، پُنطُس ان آسیه صوپون را، ⑩ فروگیه ان پمفولیه علاقون را، مصر ملک را ان لیبیا ملک را اوئا علاقا را منک جیو کُرینی شهر کن سئه، ان روم شهر را زاترو پئن سئه. ⑪ آپون موئین یهودی سئه ان داری قوم وازا پئن سئه جیا آپئا دَرم موئین آیا، کَرتی نومی بیت را ان عرب ملک را منک پئن سئه. تویی پئن آپی آپری آپری بولی موئین هایون ٲی پگهون رون موئون موئون کومون را پارام هومپزون ریا.

⑫ تیا مانه بدائی منک حیرون ٲین مُجهائی گیا، ان هیکا پیزا ٲی پونسوا مدیا: "اینا رو مطلب کی سئه؟" ⑬ پئن پیزا منک وشواسیون مانه نئولی کرین کیوا مدیا: "ای تو تازو پکڑاول ذراکون رو رس پین نشام سئه."

پطرس منکون نئه پوینتر آتما ان ایسو را پارام شیکاژئه

⑭ پسته پطرس پیزون اگیارون مُک شیلون پیزو اوئین اوپو ان زور ٲی منکون نئه کیدو:

"یهودی پایون ان بدون یروشلم شهر موئین ریا وازون، مارئی وات کون



ڏين هومپڙو! (15) تمي هڙموه ريا جي امي نشام سون، پڻ هم نٿي. هزون هوار رو
 نوون رو توڻو مس ٿيوه. هيو توڻا مانه ڪم ڪرين منڪ نشام هوشي؟ (16) پڻ
 اي وات او سٺه جيا را پارام پڳوون آپرو نياپو ڏيڏا واڙا يوئيل ٿي ڪيورايو
 تو جي

(17) پڳوون ام ڪڻه ريو:

پڇاڙي واڙون ڏيئون موئين ام ٿيشي.
 هون آپرو پويتر آتما منڪون مانه ميليھ،
 ان تمارا ڏيڪرا ان ڏيڪري مارو نياپو ڏيشي،
 ان تمارا جوڻ منڪ مارا طرف ٿي ڏيڪاڙا ڏيڪشي،
 ان تمارون گهرڊون منڪون نٺه مارا طرف ٿي شپنا آوشي،
 (18) ان جيا مارئي شيوا ڪڻه،

آڏمي ڪا ڏوشي هون،
 اوئون مانه پڻ اوئون ڏيئون موئين
 هون آپرو پويتر آتما ميليھ،
 ان او مارو نياپو ڏيشي.

①۹ ان آکاش مانه هُون پَرسا ڏيکارِيه،

ان ڌرتي مانه نيشون ڏيکارِيه،

لوئي، ڏيوتا ان ڏونهارا را ڳوتا.

②۰ ڏي ڪازو مش ٿي زاشي

ان انزوئاڙيو لويي جيوو راتو سوڙ ٿي زاشي.

ان پسته پريو رو موتام موتو ان مون واڙو ڏي آوشي.

②۱ ان تئيون جو ڪوئي پريو رو نوم ليشي

او ٻڌائي پچي زاشي.

②۲ اسرائيلي پاڻيون، ماري اي واتون ڏيون ٿي هومپڙو. ايسو ناصرت شهر

واڙو ايوو منڪ هتو جيا ري هاڻي پڳوون تمون وسا موتا ڪوم، پَرسا ان

نيشون ڏيکارِيا، زم تمون ننه پڻ ڪبر سته. هيونته نمونته پڳوون ايسونته آپرو

سونيل منڪ ڏيکارِيو. ②۳ زم پڳوون اڳي پڪو ڦينصلو ڪريو تو ان زم اوئا

ننه اڳي ڪبر هئي، تم پڳوون ايئا ننه تماري هاڻي زهلايو، ان پسته تم

پڳوون ننه نه مونيا واڙون منڪون ري هاڻي ايئا ننه هوري مانه سڙاوين مرايو

پرو. ②۴ پڻ پڳوون ايئا ننه مريا ڪيڙ موت را قوضا ٿي سڏاوين وڙي جيوي

اوناڙيو، ڪم تو ام ٿي نتو هيڪتو جي ايسو موت را قابوم رته. ②۵ هاڻي وات

ساوئي سته ڪم تو دائود شاستر موئين آپرا پارام نئين پڻ ايسو را پارام

ام ڪيڏوه:

’هون ايشور ننه هميش آپ هومو ڏيڪتو ريو،

ڪم تو او مارا زمئا پاهاڻ سته،

زم مون ننه تڪليپ نه ٿته.

②۶ تيام هون من موئين ڪش ٿيو،

ان ايشور را وڪوڻ ڪريا،

ان هونته مارو پروسو ايشور مانه ريشي.

(27) ڪم تو ٽمي، او پڳوون،

مارا جيو ننه مرلون را جڳت موئين موئين ساڏو،

نڪو مون تمارا پويتر شيواڌاري ننه مقوم موئين هڙوا ڏيو.

(28) ٽمي مون ننه او شيرڙا ڏيڪاڙياھ

جيون مانھ وُڍا ٿي جيون زڙھ،

ان ٽمي مون پيڙا هويا ٿي مون ننه ڪشي ٿي پرشو.

(29) پسئھ پطرس وڙي ڪيڏو: "مارون پايون، هائي شاستر رئي وات آڻا ڏاڏا

دائود را پارام نئي، پڻ ايسو را پارام سئھ. ڪم تو هون وات ساوئي ڪرين

تمون ننه آڻا ڏاڏا دائود را پارام همپڙاوونھ، جي او مري گيو تو ان اوئا ننه

پوريوت پرو، ان اوئا رو مقوم آڙ هوڏي آڻون ڪن سئھ. (30) پڻ دائود پڳوون رو

نياپو ڏيڏا واڙو هتو، ان اوئا ننه ڪبر هئي جي پڳوون اوئا ٿي هون ڪائين اي

وايڏو ڪريو تو جي 'هون ٿارا اولاد موئين ٿي هڪا منڪ ننه ٿارا زم راز ڏيھ.'

(31) دائود ننه پڳوون را طرف ٿي اڳي ڪبر هئي جي پڳوون رو سونڊل پڇايا

واڙو ڪريست موت ٿي جيوي اُنشي. تيام اوئھ پڳوون رو نياپو ڏين ڪريست را

جيوي اوئا را پارام مور ٿي همپڙايو جي نڪو پڳوون اوئا ننه مرلون را جڳت

موئين ساڏشي، نڪو او مقوم موئين هڙشي.

(32) ايٿا ايسو ننه پڳوون موت ٿي جيوي اوئاڙيو، جيا رئي امي ٻڌائي هاڪ

پريا واڙا سون. (33) تيام پڳوون ايٿا ننه آڻرئھ زمئئھ پاهئھ آڪاش موئين بيهارين

مون ڏيڏو، ان ايئھ وايڏا پرموئھ آڻرا ٻاپ پڳوون ٿي پويتر آتما ليڏو، ان امون

مانھ مليوھ. ايسو رئھ پويتر آتما مليا ٿي اي وات ٿيھ، جئي ٽمي ڏيڪوھ ان

هو مپڙوھ ريا.

(34) ايسو رئھ آڪاش مانھ سڙيا را پارام دائود اڳي شاستر ۾ لڪيوھ. شاستر

رئي اي وات دائود را پارام نئي، ڪم تو دائود آڻ آڪاش مانھ ڪيڏي نتو

سڙيو. پڻ دائود ايسو ننه آڻرو پڙو ڪين ايسو رئھ آڪاش مانھ سڙيا را پارام

ام لکيوھ:

ايشور مارا پريو نئ ڪيڏو

مارئ زمئڻ پاهڻه مون ۾ پيھ،

(35) زئيون هُودِي هُون ٿارون ڏشمئون نئ هراوين

ٿاري پگي نه لڳاڙون.

(36) تيام، اسرائيلي قوم رن منڪون، تم ٻڌائي پڪي ڪاتري ٿي هزمي ليو جي

اي ايسو، جيا نئ تم ٿي هُوزي مانھ ساڙين مرايوت پرو، ايٿا نئ پگيون پريو ان
آپرو سونڊل پڇايا واڙو ڪريست پڻ ٿايوھ.

(37) زئيون منڪي اي وات هومپڙي، تو اُئون نئ الاهي گهڻو ڏک ٿيو. تئيون

اُئي پطرس ان پزون مڪ شيلون ٿي پونسيو: ”پايون، امي هُئ ڪي ڪرون؟“

(38) تو پطرس اُئون نئ ڪيڏو: ”آپرا ڪراپ ڪوم ساڏين توپونھ ڪرو ان

پگيون ري وات مانھ وو، ان تم ٻڌائي آپرون ڏوهون ري ماڻي هارو ايسو

ڪريست را نوم ٿي پويتر سنون ليو، تو پسئ پگيون تمون نئ پويتر آتما ڏيشي.

(39) ڪم تو اي پويتر آتما ميليا رو وائڏو تمون هارو، تمارون اولادون هارو، ان

ٻڌون شيئي ريا واڙون هارو پڻ سئ. اُئون ٻڌون هارو سئ جيون رو واسطو ايشور

آپڻو پگيون آپ ٿي رکاوشي.

(40) پطرس پيزي گهڻي واتون هزماوين ڪيتو ريو ان اُئون نئ منٿ ڪرتو

ريو جي ”اي سزا جئي پگيون ايٿا زمونا رن ڪراپ منڪون نئ ڏيشي، تم ٿي

پگيون ري وات مانھ وين ايٿا سزا ٿي آپ نئ پڇاوو.“

(41) زتي منڪي اُونا رئي وات مونڻي، اُئي پويتر سنون ليڏو، ان اُئ ٿي ڏي

ترٿڪ هزار منڪ وشواسي ٿي گيا، ان وشواسيون رو توڙو گهڻو وڌيو. (42) ان اُو

هميش مڪ شيلون ٿي واتون شيڪتا، پائي ٿين هپ ۾ ريتا، پريو پوزن ليتا، ان

پراٿنا ڪرتا ريتا.

وشواسيون رو پيڙا ٿين ريا رو نمونو

43) مُک شيلون ري هاڻي پڳوون گهڻا پرسا ان نيشون ڏيکارڻو، ان ٻڌائي منک اي کڙا ڏيکين حيرون ٿيتا ريتا. 44) جيا وشواسي ٿيا تا، اُو ٻڌائي پيڙا ريتا ان آيت موئين ام سوچتا جي ”جڻين کئين مارو سئ، اُو آپون ٻڌون هارو سئ.“ 45) اُو آپري ملڳت ان شينهنون ويسين هر هيڪ نئ اوتا ري ضرورت پرموئئ رواوي ڏيتا. 46) اُو تاريڪ پڳوون را گهر موئين هيڪ من ٿين پيڙا ٿيتا، ان گهر ٿو گهر پريو پوزن ليتا ان هاسا من ان کشي ٿي پيڙا ٿين روئي کاتا. 47) اُو پڳوون را وکون ڪرتا ريتا، ان اسرائيلي قوم را پيڙا منک اوئون رو مون را کتا. ان پريو تارڻ ليتا وازون نئ تاريڪ وشواسي منڌري موئين تيراوين پيڙا ڪرتو ريو.

هيڪ رُونڳڙو ايسو را نوم ٿي هازو هورو ٿئھ

3 ① هيڪ ڏي پطرس ان يوحنا پپورون را ترڻي واڳي پراڻا رٿ توتئ پڳوون را گهر موئين زاتات ريا، ② تو منک هيڪا رُونڳڙا نئ اُوپاڙين اوتات ريا.



اُو منک زابو زلميو رُونڳڙو هتو. اوتا نئ تاريڪ پڳوون را گهر را اوتا دروازا ڪن پيهارتا، جيا نئ کوپصورت دروازو ڪئ، زم اوئئ پيهين پڳوون را گهر موئين آيا وازون ٿي پئها مونڳئ.

③ زئيون اوئ پطرس ان يوحنا نئ پڳوون را گهر موئين زاتون ڏيکيا، تو اوئون ٿي پئها مونڳيا.

④ تو پطرس ان يوحنا اوتا نئ ڏيون ٿي زيوو، ان پطرس ڪيڏو: ”امون هومو زو!“ ⑤ رُونڳڙئ ام هزميو جي ”ايئون ٿي ڪئينڪ زڙشي،“ تيام اوئون هومو ڏيون ڏيڏو. ⑥ ان پطرس ڪيڏو: ”مون ڪن پئها نٿي، پڻ جي مدت هون ڪري هيڪونھ، اُو هون ڪريھ. ايسو ڪريست ناصرت شهر وازا را نوم ٿي اوئين وئ!“

⑦ پسنه پطرس اوثا رو زمڻو هاڻ زهالين اوثا ننه اوناڙيو، ان جهٽ موئين اوثا رون پڳون موئين وشيت آوئي رئي، ⑧ ان اُونينگرو مارين اُونين اُوپو، ان ويوا مڏيو، ان پسنه ويتو، نينڪڙا مارتو ان پڳوون را وڪوڻ ڪرتو اوثون پيڙو پڳوون را گهر موئين گيو.

⑨ اسرائيلي قوم ري ٻڌي منڪي اوثا ننه ويتون ان پڳوون را وڪوڻ ڪرتون ڏيڪيو. ⑩ زئون اوثا ننه اوڙڪيو جي اي اُو رو اُو سئ جيو پڳوون را گهر را ڪوپصورت دروازا مانھ پيهين پنتو، تو ٻڌائي منڪ حيرون ٿي گيا ان مڄهائي گيا جي ”اي ڪم ڪرين ھازو ھورو ٿي گيوھ؟“

پطرس پڳوون را گهر موئين ايسو را پارام شيڪاڙئھ

⑪ جيو رُونگڙو منڪ ھازو ھورو ٿي گيو تو، اُو پطرس ان يوحنا ننه زهالين اُوپو تو. تئين اسرائيلي قوم را ٻڌائي منڪ حيرون ٿين سليمون نومي ڍاڙيا موئين اوثون ڪن ڍوڙي آيا. ⑫ پطرس اي ڏيڪين اسرائيلي قوم رون منڪون ننه ڪيڏو: ”اسرائيلي پايون، تم ايٺا منڪ مانھ ڪم حيرون ٿيوھ ريا؟ ان امون ھوما ڪم تاڪي رياھ زوئنه امي اماري آپري طاقت ٿي ڪا ڌرم پاڙيا ٿي ايٺا ننه ھازو ھورو ڪريو ھوئھ؟ پڻ وات تو ھم نٿي. ⑬ پڳوون جيا ننه ابراهيم، اِضحاق ان يعقوب مونتا، پڳوون جيا ننه آڀا پيڙا ٻاپ ڏاڏا پڻ مونتا، اُوئھ آپرا شيواڌاري ايسو ننه گھڻو مون ڏيڏو. پڻ اوثا ننه تمي زهلايو پرو، ان زئون راز ڪريا واڙئھ پيلاطس اوثا ننه ساڏيا رو ڦينصلو ڪريو تو، تئين تمي پيلاطس ڪن اوثا ننه زوري ڪوڙو ڪريو. ⑭ اوثا پوئتر ان پيڏوھي منڪ ننه تمي ڪوڙو ڪريو، ان تمي ھيڪا ڪوني منڪ ننه آپ ھارو ساڏيا رو ڪيڏو. ⑮ ھميش رو جيون ڏيڏا واڙا ننه تمي مرايوت پرو، پڻ پڳوون اوثا ننه مرلون موئين ٿي جيوي اوناڙيوھ. امي آپ اونڪيئي پاڙين ايٺا وات رئي ھاڪ پريا واڙا سون. ⑯ ھوئھ اي منڪ جيا ننه تمي زوئھ ريا ان اوڙڪوھ ريا، اي ايسو مانھ يقين راڪيا ٿي ھازو ھورو

ٿيوھ. اُٺا را نوم ٿي ايٺا نٺه وشيت آوئيھ، ان اُٺا مانھ يقينَ را ڪيا ٿي اي تمون
ٻڌون ھومو ھازو ھورو اُٺوھ.

⑰ ھوئہ پايون، مُون نٺه ڪٻر سٺه جي زئيون تمي اي ٻڌو ڪئين ايسو ٿي
ڪريو، تئيون تمون نٺه ڪٻر نٽئي جي ايسو پڳوون رو سُونڍل پڇايا وازو ڪريست
سٺه، ان نڪو وڙي تمارون آڳيونون نٺه ڪٻر ھٽئي. ⑱ ان ھم جي واتون پڳوون
آپرون ٻڌون نياپو ڏيڏا وازون ٿي اڳي ڪيڏي تي، جي اُٺا رو سُونڍل پڇايا وازو
ڪريست ڏڪ سھين مرشي، ھيوئہ نمونئہ پڳوون اُو ٻڌي واتون پوري ڪري.

⑲ تيام تمي آپرا ڪراپ ڪوم ساڏين توبونھ ڪرو ان پڳوون ري وات مانھ
پاسا ڦرو، تو تمارا ڏوھ ماڦ ٿيشي. ⑳ ان ھيوئہ نمونئہ ايشور را طرف ٿي ايوا
ڏي آوشي جيون موئين تمون نٺه وڙي من موئين ھڪ زڙشي. ان پسئہ ايشور
ايسو نٺه ميلشي، جيا نٺه اُوئہ تمون ھارو پڇايا وازو ڪريست اڳي سُونڍيوھ.
㉑ پڻ ھمئئہ ايسو رٺہ آڪاش موئين ريوو ڪئھ، زئيون ھوڏي اُو ٿوئو نہ اُوئہ
زئيون پڳوون ٻڌيون شينھون نٺه وڙي نوي ڪرشي. ھايا را پارام پڳوون آپرون
پويتر نياپو ڏيڏا وازون ٿي شروع ٿي لين ڪيڏو تو.

㉒ تيام تمي ايسو مانھ وشواس اوٿو، ڪم تو ايسو اُو رو اُو سٺه جيا را
پارام موسي آپ ڪيڏو تو جي 'پريو پرميشور تماري قوم موئين ٿي تمون ھارو
ھيڪ مُون جيوو پڳوون رو نياپو ڏيڏا وازو ميلشي. جئين ڪئين اُو تمون نٺه ڪئھ،
اُو ٻڌي واتون تمي مونيا. ㉓ تئيون جيو منڪ اُٺا پڳوون رو نياپو ڏيڏا وازا رئي
وات نئين مونئہ، اُٺا نٺه پڳوون ري سُونڍل قوم ٿي ٻارو ڪاڏين ڪم ڪرشي
پرو. ㉔ ان سيموئيل ٿي لين وونھلي پزي ٻڌي پڳوون رو نياپو ڏيڏا وازي ايئون
ھمئوڪون ڏيئون را پارام ھمپرايو.

㉕ ايسو مانھ وشواس اوٿو، ڪم تو اي وائيڏو تمون ھارو سٺه، جيا را پارام
پڳوون رو نياپو ڏيڏا وازي ڪيڏو تو، ان جيا را پارام پڳوون آڻون ڏاڏون ٿي
وسن بوندين ابراهيم نٺه ڪيڏو تو، جي 'ٿارا اولاد ٿي دنيا رون ٻڌون منڪون نٺه

آشيرواڌ زڙشي. 26) تيام پڳوون آڀرا شيواڌاري ايسو نئه سوندين پيزون ٿي مور تمون يهوديون ڪن ميليو، زم او تمون موئين ٿي هر هيڪ نئه تماريون پونڌايون ٿي پڌلويين آشيرواڌ ڏئه.

پطرس ان يوحنا نئه ڌرمي پنچائيت ڪن لي زائھ

4 ① هزون پطرس ان يوحنا اسرائيلي قوم رون منڪون نئه اي واتون ڪيتات ريا، تو پوزاري، پڳوون را گهر رون سپايون رو ساڀ، ان صدوقي پالٽي را منڪ پڻ اوئون ڪن آيا. ② اوئون نئه هايون پيئون مانھ گهڻي رينھ سڙي ڪم تو او اسرائيلي قوم رون منڪون نئه شيڪاڙتات ريا ان همپڙواتات ريا جي ايسو مرلون موئين ٿي جيوي اوئيھ، جيا ٿي منڪون رئه مريا ڪيڙ وڙي جيوي اوئيا رئي ٿا پٽي ٿيٽي رئي. ③ تيام اوئي پيئون مُڪ شيلون نئه زھالين پيزا ڏي هڙي ٿوئا موئين راڪيا، ڪم تو هونز ٿي گهي ٿي. ④ پڻ وچن هومپڙيا وازون موئين ٿي گهڻي منڪي ايسو مانھ يقين اوئيو. ان وشواسي منڪ اتا ٿي گيا جي پونسڪ هزار روڳا آڏمي هتا.

⑤ پيزه ڏي اوئيه يروشلم شهر موئين يهوديون را آڳيون، موئا منڪ ان شاستر زوئيا وازا ڌرمي پنچائيت موئين پيزا ٿيا. ⑥ پنچائيت موئين حناه، جيو مُڪ پوزاري هتو، ڪائيفا، يوحنا، سڪندر، ان پيزا زتا مُڪ پوزاري را گهر را هتا، ٻڌائي پيزا ٿيا. ⑦ اوئي پطرس ان يوحنا نئه پنچائيت هوما اوپاڙين پونسو: ”تمي هائي ڪوم ڪيا ري ڪڙا ان ڪيا ري اڪتياري ٿي ڪريو تو؟“

⑧ تئيون پطرس پويتر آتما ري ڪڙا ٿي اوئون نئه ڪيڏو: ”اسرائيلي قوم رون آڳيونون ان موئون منڪون، ⑨ جي آڙ تمي امون ٿي ايئا وات رئي پونسا ڪروھ ريا جي امي هڪا رُونڳڙا ٿي پلائي ڪرئي ٿي، ان اي ڪم ڪرين هازو هورو ٿي گيوھ، ⑩ تو تمون ٻڌون نئه ان اسرائيلي قوم رون ٻڌون منڪون نئه ڪبر هوو ڪپنه، جي ناصرت شهر وازا ايسو ڪريست ري اڪتياري ٿي، جيا نئه

تمي هُوزِي مانھ سڙاوينَ مرايوت پرو، پڻ پڳوونَ اُونا ننه مرلون موئين ٿي جيوي اُوناڙيوھ، اُونا ري اِڪتِياري ٿي اي منڪ تمون هومو ھازو ھورو اُپيوھ.

⑪ ھائي ايسو اُو رو اُو سئھ جيا را پارام پتر ڪينَ شاستر موئين لڪل سئھ:

‘جيا پتر نئھ رازي گھٽ ھزمينَ ڦڳوڙيوت پرو،

اُو ھاڳي پتر ٻڌون ٿي ضرورت وازو ٿيوھ.’

تمي آڳيووني ايسو نئھ ڪئين نئو ھزميو، پڻ اُو ٻڌون ٿي ضرورت وازو ٿيوھ.

⑫ پيزو ڪوئي پڻ ايوو نٿي جيا ٿي تارڻ زڙئھ، ڪم تو پوري دُنيا موئين پڳوونَ

ايسو شوا پيزا ڪيا نئھ نه سُونديو، جيا ري ڪري آبي منڪ پچي زائون.

⑬ زئيون اُوئي پطرس ان يوحنا رئي ٻوليا رئي ھيمت ڏيڪئي، ان اُوئون نئھ

ڪٻر پڙئي جي ”اي منڪ ائپٽل ان ڄٽ سئھ،“ ٿيون اُو حيرون ٿي ڳيا ان اوڙڪي

ڳيا جي ”اي منڪ ايسو پيزا ھوتا.“ ⑭ ان مُڪ شيلون رئھ ڪِلاڦ اُو ڪئين پڻ

ڪي نه ھيڪيا، ڪم تو مُڪ شيلون پيزو اُو منڪ اُوئون رئھ روپرو ھازو ھورو

اُپيو تو. ⑮ تيام اُوئي اُوئون نئھ پنچائيت ٿي ٻارا ميلين آيت موئين ام صلاح

ڪرئي جي ⑯ ”آبي ايئون منڪون ٿي ڪي ڪرون؟ ڪم تو يروشلم شھر رون

ٻڌون منڪون نئھ ڪٻر سئھ جي ايئون ري ھاڻي ھيڪ موٽو پرسو ٿيوھ. آبي ايئا

وات رو انڪار نٿي ڪري ھيڪتا. ⑰ پڻ آبي ايئون نئھ پيوڙاوينَ ڪيشون جي

ايسو را پارام ڪيا پڻ منڪ ٿي وات مت ڪريا، متون اي وات آبي اسرائيلِي

قُوم موئين وڌارئھ نه پڪڙئھ.

⑱ پسئھ اُوئي پطرس ان يوحنا نئھ پاسا تيزاوينَ ڪيڏو: ”تمي ايسو را پارام

ڪيا نئھ ماڳي مت ھمپڙايا نڪو شيڪاڙيا.“ ⑲ پڻ پطرس ان يوحنا اُوئون نئھ

جواب ڏيڏو: ”تمي آپ قينصلو ڪرو، جي پڳوونَ ري نظر م ڪي صحيح سئھ؟

تمارئي وات مونو؟ ڪا پڳوونَ رئي وات مونو؟ ⑳ ڪم تو جئين ڪئين امي

ڏيڪيوھ ان ھومپڙيوھ، اُو امارئھ ضرور ھمپڙاوو ڪئھ. ㉑ پسئھ پنچائيت ري

منڪي وڙي اُوئون نئھ وڌيڪ پيوڙاوينَ ساڏيا پرا. آپري قُوم رون منڪون ري ڪري

اُونون ننه کئین سزا ډیډا رو وجه نه زږیو کم تو ټډائي منک هیا وات ري
کري پڭوون را وکون کرتات ریا. ②۲ هُونه اُو منک جیا ننه مُک شيلي پڭوون
را طرف ټي هازو هورو کرین نیشون ډیکارږیو تو، اونا رُئي عُمر چالیهون سالون
ټي پڼ گهښي هتبي.

وشواسي منک وچن همپزایا ري هیمت هارو پراښا کرښه

②۳ زنیون پطرس ان یوحنا ننه ساډیا پرا، تئیون اُو آپرون وشواسي منکون کن
گیا ان جئین کئین موئي پوزاریئي ان آگیووني کیدو تو، اُو اُونون ننه همپزایو.
②۴ اي هومپزین وشواسي منک هیک من تین پڭوون ټي پراښا کروا مډیا:
”او پڭوون، امون ټډون را ډښي، آکاش، ډرتبي، سُمونډ ان جئین کئین اُونون
موئین سته تمی نایوه. ②۵ تمی پویرتر آتما ټي امارا ډاډا داوُد هُون، جیو تمارو
شیواډاري هتو، ام کیورایو تو جي

’ډاري قومون ننه رینه کم سڙي؟

ان منکي ازایا کیال کم کریا؟

②۶ ایشور رنه کلاډ

ان اونا را سونډیل پچایا واڙا کریست رنه کلاډ

ډنیا را پاډشا وډیا هارو سنپیرین آیا،

ان آگیوون آوین پیرا ټیا.

②۷ اي وات ایښه ایښا شهر موئین هاسي ټییه، کم توراز کریا واڙا هیروډیس

ان پینطس پپلاطس، ډاري قوم واڙا، ان اسرائيلي قوم را منک پڼ ایښه تمارا

پویرتر شیواډاري ايسو رنه کلاډ پیرا ټیا تا، جیا ننه تمی پچایا واڙو کریست

سوندیو تو. ②۸ هیونه نموننه زم تمی آپري کزا ان مرضي ټي اگي قینصلو

کریو تو جي ام ټیشي، همروم اوني ټډوني کئین پورو کریو.

②۹ هُونه، ایشور، اُو منک امون ننه پیوژاوښه ریا. تمی ایښا وات رو کیال

راکينَ امون تمارون شيواڌاريون نئه ايوئي هيئت ڏيو جي امي پيڪ وڳر هيئت
 ٿي تمارو وڃن همپڙاون. (30) ان آهڙي هاڙا هورا ڪريا رئي ڪڙا ڏيڪڙو، زم
 تمارا پويتر شيواڌاري ايسو را نوم ٿي نيشون ان پرسا تئه!
 (31) زئيون او پراڻا ڪري ريا، تو جئي جڳا مانھ پيڙا ٿيا تا، او ڏڳي گهي،
 ان او ٻڌائي منڪ پويتر آتما ٿي پرائي گيا، ان پڳوون رو وڃن پيڪ وڳر
 همپڙاوو مڌيا.

وشواسي منڪ آهري شينھون آيت موئين وراوين ڏئه

(32) وشواسي منڌڙي را منڪ هيڪ من ٿين هپ موئين ريتا. اوئون موئين ٿي
 ڪوئي پڻ آهري شينھ نئه آهڙي نه هڙمتو، پڻ ٻڌائي منڪ آهري شينھون هيڪا
 پيڙا نئه وراوين ڏيتا. (33) ان مک شيلا گهڻي ڪڙا ڏيڪڙين پريو ايسو رنه موت
 ٿي جيوي اويا رئي هاڪ پرتا ريتا، ان پڳوون اوئون ٻڌون مانھ گهڻي ڪڙا
 ڪرتو ريتو. (34) اوئون موئين ٿي ڪوئي پڻ نتو جيا نئه ڪياڪ شينھ رئي ڪپ
 هٽي، ڪم تو جيا زمي ڪا گهرون را ڏئي هتا، او آهري ملڳت موئين ٿي ڪئينڪ
 ويسين ويسل شينھون را پٽيها لين (35) مک شيلون نئه آوين ڏيتا. ان پسئ مک
 شيلا هر هيڪ نئه اوئا ري ضرورت پرموئنه وراوين ڏيتا.

(36) اوئون موئين ٿي يوسف نومي هيڪ منڪ هتو. اوئا رو پيڙو نوم مک
 شيلي برنباس راڪيو تو، جيا رو مطلب سئ ”حوصلو ڏيڏا واڙو.“ او لاوي ذات
 رو هتو، ان اوئا رو زلم ڪپڙس پيٽ مانھ ٿيو تو. (37) اوئا ڪن هيڪ ڪيتر هتو،
 جيا نئه اوئه ويسين ڪيتر را ٻڌائي پٽيها مک شيلون نئه آوين ورايا هارو ڏيڏا.

حنياھ ان سفيره نئه ڪوڙ ڪريا ري پڳوون سزا ڏئه

5 ① پڻ اوئون وشواسيون موئين ٿي پيڙو هيڪ منڪ هتو، جيا رو نوم حنياه
 ان ڏوشي رو نوم سفيره هتو. اوئه آهڙي ڪئينڪ زمئي ويسئي، ② ان پسئ

زمي رون پٺيهون موئين ٿي ڪئينڪ پٺيها آپ هارو هٿاڙين ميليا، جيا رٿي
 اوتا ري ڏوشي ننه پڻ ڪهر هٿي. ان اوڻه
 پيزا پٺيها لي آوين مڪ شيلون ننه ايوڻه
 نموننه ڏيڏا، زوڻه زمي را ٻڌائي پٺيها
 ڏيتو هوڻه.



③ تيون پطرس ڪيڏو: ”حنيا، تئين شيطون ننه ٿارا من موئين ايوو ڪيال
 ڪم نوڪوا ڏيڏو، جي تئين پوٽر آتما ٿي ڪوڙ ڪريوه، ان زمي رون پٺيهون
 موئين ٿي ڪئينڪ آپ هارو راڪياھ؟ ④ او زمي زئون تون ڪن هٿي، تيون
 ٿارئي نٿي ڪي؟ ان ويسيا ڪيڙ پٺيها ٿارا هات موئين نٿا ڪي؟ پسنه تئين
 من موئين ايوو ڪيال ڪم ڪريو؟ تئين روڳو منڪون ٿي نئين، پڻ پڳوون ٿي پڻ
 ڪوڙ ڪريوه.“

⑤ اي واتون هومپڙين حنياه اوڻه ٿي ٿوڻه پڦ ڏين پڙيو نو ان مري گيو.
 ان زتون منڪون ننه ايٿا وات رٿي ڪهر پڙئي، او ٻڌائي پيٿاوا مڏيا.
 ⑥ پسنه جوڻ منڪي اوئين اوتا را لاش ننه ڪڍڻ اوڏاڙيو ان اوتا ننه لي زائين
 پوريو پرو.

⑦ ترٿيونڪ ڪلاڪون ڪيڙ حنياه رٿي ڏوشي اوڻه اوڻي، پڻ اوتا ننه ڪئين
 ڪهر نٿي جي اوتا را آڏمي ٿي ڪي ٿيوه. ⑧ پسنه پطرس اوتا ٿي پونسبو:
 ”مون ننه همپڙاو، زتا پٺيها مون ننه ڏيڏا، اتام تم زمي ويسيه ڪي؟“
 تو اوڻه ڪيڏو: ”هوڻه، اتام ويسيه.“ ⑨ تيون پطرس اوتا ننه ڪيڏو: ”تم
 آيت موئين ايشور را پوٽر آتما ننه آزمايا رو ڪم ڦينصلو ڪريوه؟ زو، ٿارا
 آڏمي ننه پوريا واڙا ڪونڌي هوڻه ڌروازا مانھ آوين پوگياھ، ان او ٿارا ڪونڌي
 پڻ ٿيشي.“

⑩ اوڻه ٿي ٿوڻه او ڏوشي پڻ پطرس ڪن پڦ ڏين پڙئي ٿي ان مري گئي.
 تيون ڪونڌي موئين آوين زوڻه، تو ڏوشي مرل پڙيھ. ان اوتا ننه پڻ لي زائين

اوثا را آڏمي ڪن پوري پري.

⑪ پسته وشواسي منڌري رن ٻڌون منڪون ننه ان پيزون ٻڌون ننه، جيئي اي وات هومپري، گهڻي پڪ لاڳي.

مڪ شيلون منڪون ننه هازا هورا ڪرين پرسا ڏيکارڻه

⑫ مُک شيلون ري هاڻي اسرائيلي قوم موئين ٿي گهڻا منڪ هازا هورا ٿيٽا جيا ٿي نيشون ان پرسا ساوا ٿيٽا. ان ٻڌائي وشواسي هيڪ من ٿين پگهون را گهر را سليمون نومي ڌاريا موئين پيڙا ٿيٽا. ⑬ جيا وشواسي نٿا، پڪ ري ڪري اوئون موئين ٿي ڪوئي پڻ وشواسيون ڪن نٿو زاتو. توئي پڻ اسرائيلي منڪ اوئون را وڪوڻ ڪرتا. ⑭ ان ڪتائي آڏمي ان ڏوشي پريو ايسو مانه يقين راکين وشواسي منڌري موئين پيڙا ٿيٽا ريتا.

⑮ مُک شيلون رن ايون ڪومون ري ڪري، منڪ مونڌون ننه ٻارا لي آوين شيرڙون رنه پاهنه ڪاتلون ان گوڏڙيون مانه هوارتا، زم زئون پطرس اوئون مٿه، تو اوئا رو سونئو مونڌون مانه پڙه ان او هازا هورا ٿه. ⑯ ان يروشلم شهر را آها پاها رن پاڙون ٿي پڻ ڪتائي منڪ مونڌون ان پوت سونتل منڪون ننه لي آوتا، ان او ٻڌائي مُک شيلون ري هاڻي هازا هورا ٿي زاتا.

مڪ شيلون ننه ٽرمي پنچائيت را منڪ تنگ ڪرڻه

⑰ پسته مُک پوزاري ان اوثا را ٻڌائي ساڻي، جيا اوت ري صدوقي پالتي را هتا، مُک شيلون مانه ريشي ٻڙيا. ⑱ ان مُک شيلون ننه زهلون ٿوئا موئين پورايا پرا. ⑲ پڻ اوئه ٿي رات ايشور رنه هيڪه آڪاشي ڏوت ٿوئا را دروازا ڪوليا پرا، ان اوئون ننه ٿوئا ٿي ٻارا ڪاڊين ڪيڏو: ⑳ ”زائو، ان پگهون را گهر موئين زائين تمي اوئنه اوپين اسرائيلي قوم رن منڪون ننه ايٿا نوا جيون را پارام ٻڌي واتون همپراويا.“

21) مُک شيلآ آکاشي دُوت رُئي وات مونين دُي اُگيا رُئ توتئ پگئون را گهر موئين گيا ان اوتئ منکون نئ شيکاروا مڊيا. اوتئ ئي توتئ مُک پوزاري ان اوتا ري سائيشي آوين اسرائيلِي قوم رون ٻڌون موئون منکون نئ ڌرمي پنچائيت پيڙئي ڪريا هارو تيرآيا، ان آپرون سپايون نئ توتام ميليا، زم او مُک شيلون نئ تيرئي اوتئ. 22) پڻ زئيون سپايي اوتئ زائين زويو، تو مُک شيلآ توتا موئين هتا ئي نئين. تو او پنچائيت ڪن پاسا آيا را، ان اوتون نئ همپڙايو جي 23) ”زئيون امي اوتئ توتام پوگيا، تو جيل نائوڪا نمونا ئي پنڌ ڪرل ڏيڪيو، ان سپائي ڌروazon مانھ اُپا پاهرو ڏيتات ريا. پڻ زئيون امي ڌروازا ڪوليا، تو امون نئ جيل موئين اوتون موئين ئي ڪوئي ڏيڪيام نه آيو.“ 24) اي وات هومپڙين پگئون را گهر رون سپايون رو ساب ان موتا پوزاري حيرون ٿيوا مڊيا جي ”هوئ ڪي ٿيشي؟“ 25) اتي وار ۾ ڪيئنڪ آوين همپڙايو جي ”او منڪ جيون نئ تمي توتا موئين پورايا تا، او پگئون را گهر موئين اوپين آئيئي قوم رون منکون نئ شيکارئنه ريا.“

26) تئيون ساب آپرون سپايون پيڙو زائين مُک شيلون نئ پاسا پنچائيت موئين تيرئي آيو. اوتون نئ زوري نه زهاليا، ڪم تو او آپري قوم رون منکون ئي پيڻاتات ريا، جي ”متون امون نئ پوئا نه هئنه.“ 27) پستئ مُک شيلون نئ لي آوين پنچائيت هوما اُپاڙيا. تئيون مُک پوزاري اوتون نئ ڪيڏو: 28) ”امي تمون نئ گهڻو گهڻو ڪيڏو تو جي ايسو رو نوم لين تمي منکون نئ مت شيکاريا. پڻ زوتو، تمي آپريي وات منکون نئ شيکارين پورا يروشلم شهر موئين پڪيڙيه پري. ان تمي اوتا منڪ ايسو رو کون امون مانھ ڏيو ڪروه.“

29) تيا مانھ پطرس ٻڌون مُک شيلون را طرف ٿي ڪيڏو: ”امارئ منکون رو نئين، پڻ پگئون رو ڪيڏو مونو ڪپئ. 30) پگئون جيا نئ آڀا ٻاپ ڏاڏا موتا، اوتئ ايسو نئ موت ٿي جيوي اوتاڙيوھ، جيا نئ تمي هوزي مانھ سڙاوين مرايوت پرو. 31) اوتا نئ پگئون آگيوون ان تارن ڏيڏا واڙو ناوين آپرئ زمئئ پاهئ آکاش ۾ پيهارين گهڻو مون ڏيڏوھ، زم اسرائيلِي قوم نئ توپونھ ڪريا

رو موقعو زږته ان او آپرا کراب کوم ساډين پڳوون ري وات مانه وئ، ان اوئون ننه ډوهون رڼي ماڅني زږته. (32) امي ايئون واتون رڼي څاک پرين همپڙايا وازا سون. ان پوټر آتما پڻ ايئون واتون رڼي څاک پرته، کم تو پڳوون اي پوټر آتما اوئون منکون ننه ډيډوه جيا اوئا رو کيډو مونته.

(33) زښيون پنچائيت ري منکي ځائي واتون څومپڙي، تتيون اوئون ننه اتڼي رينه سڙي جي او مُک شيلون ننه نمو ماروا کرتا تا. (34) پڻ اوئنه گملي ايل نومي فريسي پالتي رو هيک منک هتو. او شاستر زوڻيا وازو هتو، ان اسرائيلي قوم رون ٻڌون منکون موئين اوئا رو مون هتو. او پنچائيت موئين اولين اوپو ان مُک شيلون ننه ټوڙيک وار څارو ٻارا لي زيا رو کيډو. (35) پسنه اوئنه پنچائيت رون منکون ننه کيډو: ”اسرائيلي پايون، تم ډيون ٿي سوچو جي ايئون منکون ٿي کي کروو کپنه. (36) کم تو کئينک وکت اڳي ٿيوداس نومي هيک منک حکومت رنه کلاڦ ٿيو تو، ان او پڻ آپ ننه کاس منک کيتو. ان چارک هو آدمي اوئا پيڙا ملي گيا تا. پسنه او آپ مراني گيو، ان اوئا وونهڙ وودا وازا ٻڌائي ايل اول پاڳي گيا، ان نيٺ اوئون ٿي کئين نه ٿيو. (37) تيا کيڙ آدمشماري رون ڏيئون موئين يهوداه نومي گليل صوپا رو هيک منک حکومت رنه کلاڦ ٿيو تو. اوئنه آهني قوم رون کتون ٿي منکون ننه آپرته پاهنه کريا تا. پسنه او پڻ مراني گيو، ان اوئا وونهڙ وودا وازا جيل تيل پاڳين ڌار ٿي گيا.

(38) تيام مارو کيال اي سئ، جي ايئون منکون رنه کلاڦ کئين مت کرو، ان ساڏو پرا. کم تو جي ايئون رو مطلب ان کوم منکون را طرف ٿي هوشي، تو آڦوکو کتم ٿي زاشي. (39) پڻ جي پڳوون را طرف ٿي هوشي، تو پسنه تم ڀي اينا ننه روکي نئين هيکو. ام نه ٿنه جي تم ڀي پڳوون رنه کلاڦ کوم کريا وازا ٿيو!

پنچائيت گملي ايل رڼي وات مونځي. (40) اوئي مُک شيلون ننه وڙي پنچائيت موئين تيڙاوين چاڀکا هڻايا ان اوئون ننه اي حُکم ڏيډو جي ”ايسو رو نوم لين

وڙي ڪيا ٿي وات مت ڪريا. "ان پسنه اُوئون ننه ساڏيا پرا.

(41) مُڪ شيلو اينا وات مانھ ڪُش ٿيتا پنچائيت ٿي ٻارا نيھريا، جي "پڳوون" امون ننه ايوو مون ڏيڏوه، جي امارئي پيعزتي ايسو را نوم ري ڪري ٿيھ. (42) اُو تاريخ پڳوون را گهر موئين ان گهر ٿو گهر منڪون ننه هميش شيڪار ٿا ان اي ڪشي رئي ڪهر همپڙوتا ريتا جي ايسو پڳوون رو سونيل پچايا واڙو ڪريست سته.

وشواسي منڪ هاتون زئون ننه اِمڌا ورايا هارو سونيه

6 (1) اُوئون ڏيئون موئين، زئون الاهي گهڻا منڪ وشواسي ٿيتا ريا، تيون يهودي قوم رن وشواسيون موئين ٿي يوناني ٻولي ڪريا واڙا عبراني ٻولي ڪريا واڙون رئي اينا وات مانھ ڳلا ڪرو مڏيا، جي "زئون تاريخ اِمڌا وراوه، تو امون موئين جي رنڌال ڏوشي سته، اُوئون ننه گهٽ اِمڌا ڏهه. (2) تيام ٻاري مُڪ شيلي ٻڌون وشواسيون ننه آپ ڪن تيڙاوين ڪيڏو: "اي وات امون هارو ٺاڻوڪئي نئي، جي پڳوون رو وچن همپڙايا رو ساڏين امي روگهي ڪاڏا پيدا رئي شيوا ڪرتا ريون. (3) تيام، پايون ان پنون، تمون موئين ٿي هات اڏمي سونيو، جيا رو تمي مون راکتا هوڻو، ان جيا پويتر آتما ٿي پرال ان عقل واڙا هوته. ان امي اُوئون ننه اينا ڪوم مانھ ساڏشون. (4) پڻ امي تو پراڻا ڪرتا ان پڳوون رو وچن همپڙوتا ريشون."

(5) اي وات ٻڌون وشواسيون ننه وٽي. ان اُوئي اي منڪ سونديا: استيفنس جيو پڪو يقين راکتو ان پويتر آتما ٿي پرال هتو، فلپس، پرخرس، نيكانور، تيمون، پرمناس، ان نيڪلائوس جيو انطاڪيه شهر رو ڌاري قوم واڙو هتو ان اڳي يهودي ڌرم موئين آيو. تو. (6) هائي منڪ اُوئي مُڪ شيلون هوما اُوپاڙيا، ان مُڪ شيلي اُوئون هارو پراڻا ڪري، ان اُوئون مانھ هات ميلين اُوئون هارو آشيرواڏ مونڱيو ان اينا ڪوم مانھ راکيا.

⑦ ان ڀڳوونَ رو وڃن پڪڙتو ريو، ان يروشلم شهر موئين وِشواسِي منڌڙِي گهڻِي وڌتِي رهي، ان ڀڳوونَ را گهر رون پُوزاريون موئين ٿِي پڻ الاهي گهڻا منڪ وِشواس اوتئا ريا.

اِسْتِيفَنَسَ نَه زهالينَ ڌرمي پنچائيت ڪن لي زائِه

⑧ اِسْتِيفَنَسَ ڀڳوونَ ري ڪُرپا ان ڪڙا ٿِي پرائينَ اِسْرائِيلِي قُوم رون منڪون موئين موئا موئا پرسا ان نيشونَ ڏيکارُتو ريو. ⑨ پڻ ڪئينڪ منڪ اوتئا رنه ڪِلاڦ ٿِي گيا. اُو ٻڌائي ڀڳوونَ را هڪا منڌر را هتا، جيا ننه ”آزاد ٿيل ڳلومون رو منڌر“ ڪئو. اوتئا منڌر موئين ڪُرپي ان اِسڪندريه شهرن را، ان ڪِليڪه ان آسيه صُوپون را يهُودِي منڪ آوينَ پيڙا ٿيئا. اُو منڪ اِسْتِيفَنَسَ ٿِي بحث ڪروا مڌيا. ⑩ پڻ اِسْتِيفَنَسَ ننه پُويتَر آتما ايوڻي عقل ڏيڏي جي اُو منڪ ايتا ريون واتون رو مُقابلو ڪري نه هڪيا.

⑪ تئيون اُوڻي ڪئينڪ منڪون ننه رِشوتَ ڏينَ شيڪاڙيا جي اُو ام ڪئو: ”امي ايتا منڪ ننه مُوسي رون لڪل حُڪمون رنه ڪِلاڦ ان ڀڳوونَ رنه ڪِلاڦ واتون ڪرتون هومپڙيوه.“ ⑫ پسنه اُوڻي هيوئه نموننه اِسْرائِيلِي قُوم رون منڪون، آڳيونون ان شاستر زوڻيا واڙون ننه اوتئا رنه ڪِلاڦ پريا. اُو منڪ اِسْتِيفَنَسَ ڪن آيا ان اوتئا ننه زهالينَ ڌرمي پنچائيت موئين تيڙي آيا.

⑬ اوتنه منڪون ننه ڪُورُڻي هاڪ پريا هارُو تيڙي آيا. اُوڻي منڪي هاڪ پرينَ ڪيڏو جي ”اي منڪ ڀڳوونَ را پُويتَر گهر رنه ڪِلاڦ ان مُوسي رون لڪل حُڪمون رنه ڪِلاڦ هميش ٻولتو رنه.“ ⑭ ڪم تو امي ايتا ننه ام ڪيتون هومپڙيوه جي ايسُو ناصرت شهر واڙو ايتا ڀڳوونَ را گهر ننه ڪتم ڪرشي پرو، ان جي ريت رِواز مُوسي ٿِي آپون ننه زڙل سته، اوتون ننه ڀڏلوشي پرا. ⑮ جيا منڪ پنچائيت موئين پينا تا، اُوڻي اِسْتِيفَنَسَ هومو ڏيون ٿِي زيو، تو اوتئا رو مونڊو آڪاشي ڏوت را مونڊا جيوو سوجهرا واڙو ڏيڪيام آيو.

استيفنس ڌرمي پنچائيت رو ٺوه ڪايتھ جي اوتِي ايسنو نھ مرايو

7 ① پسنھ مڪ پوزاري استيفنس ٿي پونسيو جي ”هائي واتون هاسي سئھ،
ڪا نا؟“

② تيا مانھ استيفنس ڪيڏو: ”اسرائيلي پايون ان آڳيونون، مارئي وات
ھومپڙو. پڳوون، جيو سوجھرا جيوو سئھ، آڀئا ڏاڏا ابراهيم نئھ ڏيڪاڙو ڏيڏو،
زئون حاران شھر موئين لڏي زايا مور او مسو پتاميه ملڪ موئين ريتو. ③ ان
پڳوون اوئا نئھ ڪيڏو: ’تون آڀرا مائيترا ان آڀرو ملڪ ساڏين اوئا ملڪ موئين
زا، جيو هون تون نئھ ڏيڪاڙيھ.‘ ④ تيام او ڪسديون رو ملڪ ساڏين حاران
شھر موئين آوين ريو. زئون اوئا رو ٻاپ گڏاري ڳيو، تيون پڳوون اوئا نئھ
ايئا ملڪ موئين تيڙي آيو، جيئھ تمي آڙ ڏي هُودِي ريوھ ريا. ⑤ اوئھ ٿوئھ
پڳوون ابراهيم نئھ ايئا ملڪ موئين لڳرائي زمئي نئي ڏيڏي. پڻ پڳوون اوئا
ٿي اي وائيڏو ڪريو جي ’هون اي ملڪ تون نئھ ان ٿارا اولاد نئھ ڏيھ،‘ پڻ
اوئھ ٿوئھ ابراهيم رو ڪئين اولاد پڻ نئھ. ⑥ پڳوون اوئا نئھ ام پڻ ڪيڏو جي
’ٿارو اولاد هيڪا ڌاريا ملڪ موئين زائين ريشي، جيئھ او چار هو ورھئھ ڳلوم
ٿين ريشي ان منڪ اوئون ٿي ظلم ڪرشي. ⑦ پڻ جيا قوم را او ڳلوم ٿين
ريشي، هون هايا قوم نئھ سزا ڏيھ. ان تيا ڪيڙ اوئون نيھرين او ايئا ماڳ
آوين مارئي پوزا ڪرشي.‘ ⑧ پسنھ پڳوون ابراهيم ٿي هائي وسن ٻوندين وسن
رو نيشون توھر ڪريا رو راڪيو. تيام وسن ٻرموئھ ابراهيم رو ڏيڪرو اِضحاق
ٿيو، ان ابراهيم آڀرا ڏيڪرا اِضحاق رئي زلميا رئھ ائمھ ڏي توھر ڪري. ان
هيوئھ نمونئھ اِضحاق رو ڏيڪرو يعقوب ٿيو، ان اِضحاق اوئا رئي توھر ڪري،
ان يعقوب را ٻارئھ ڏيڪرا ٿيا ان يعقوب اوئون ري توھرون ڪري، جيا آڀئي قوم
را ٻارئھ ڏاڏا ڪيوروئا.

⑨ تيا کيڙ آهڻي قوم را ڏاڏا آهرا پائي يوسف مانھ ريشي ٻڙيا ان اوتا نھ واپاريون ڪن ويسيو پرو، جيئي مصر ملڪ موئين لي زائين اوتا نھ ڳلوم ڪريو پرو. پڻ پڳوون اوتا پيڙو هتو، ⑩ ان اوتا نھ ٻڌيون مصيبتون ٿي سڏايو، ان اوتا نھ ايوي عقل ڏيڏي جي او مصر ملڪ را پادشا ڪن مون وازو ٿي ڳيو. پادشا يوسف نھ مصر ملڪ مانھ موٽو وزير ڪرين راڪيو ان آهرو پورو مولات اوتا ري همپار موئين ڏيڏو.

⑪ تيا کيڙ ٻڌا مصر ان ڪنعان ملڪون موئين ڏڪار پڙيو، جيا ري ڪري گهڻي تڪليپ ٿي، ان آهتون ڏاڏون نھ ڪئين پڻ کاڌو نتو زڙتو. ⑫ پڻ زئيون يعقوب همپريو جي مصر ملڪ موئين ڏون سئ، تئين اوتھ آهرون ڏيڪرون، آهتون ڏاڏون نھ، پيرهين وار مصر ملڪ موئين ڏون ليوا ميليا. ⑬ زئيون پيڙي وار ڏون ليوا ڳيا، تئين يوسف آپ نھ آهرون پايون ڪن اوڙڪايو، ان مصر ملڪ را پادشا نھ يوسف ري اڪائي را پارام ڪهر پڙي. ⑭ تئين يوسف آهرا ٻاپ يعقوب ان ٻڌون عزيزون نھ آپ ڪن تيڙايا، جيا پنجهتر زئا هتا. ⑮ پسئ يعقوب مصر ملڪ موئين لڏي ڳيو، ان اوتھ او ان آهنا ڏاڏا گذاري ڳيا. ⑯ ان اوتون را لاش اوتون ايٿا ملڪ ۾ لي آوين سڪه شهر موئين اوتا پونئرا جيوا مقوم موئين راڪيا، جيو ابراهيم همور نومي منڪ رون ڏيڪرون ڪن چونڌي ڏين ويساتو ليڏو تو. ⑰ زئيون او توتو ڏوڪرو آيو جي پڳوون آهرو ابراهيم ٿي ڪرل وائڏو پورو ڪرئ، تئين آهڻي قوم را منڪ اوتھ مصر ملڪ ۾ گهڻا وڌي ڳيا تا. ⑱ اوتون ڏيئون ۾ مصر ملڪ مانھ هيڪ پيڙو پادشا راز ڪروا مڏيو، جيا نھ يوسف را پارام ڪئين ڪهر نئي. ⑲ او پادشا آهڻي قوم رون منڪون ٿي ايوي چالاڪي ان ڪراپ نمونا ٿي وڍو جي آهتون ڏاڏون نھ آهرا ننڪا ٻار ڳوڙو پڙيا، زم او مري زائ.

⑳ اوتا وڪت موئين موسي رو زلم ٿيو. او الاهي روپازو هتو. اوتا نھ ترڻ مئينا مائيتري گهري راڪيو. ㉑ تيا کيڙ زئيون اوتا نھ ٻارو ميليو نو، تو

پادشا ري ډيکري اوتا ننه لين آپرو ډيکرو کرين پاڙيو. ②۲ اوتې موسي ننه مصریون رو ټډو علم شيکارځيو، ان او نائوکي واتون ان نائوکا کوم کريا م هوشيار هتو.

②۳ زئيون موسي چاليهون سالون رو ټيو، تتيون اوتې آپرون اسرائيلي پايون رتي حالت زويا رو کيال کريو. ②۴ موسي زائين زوتو مصر رو هيک منک هيکا اسرائيلي ننه مارته ريو، تيام موسي اسرائيلي رتي مدت کړتي ان پتلو ليذا هارو مصري ننه ماريو پرو. ②۵ موسي سوچتو تو مارا پائي ام هزمشي جي پگهون ماري هاتي اوتون ننه گلومي ټي آزاده کراوشي، پڻ او هم نه هزميا. ②۶ پزته ډي موسي پيئون اسرائيليون ننه آيت موئين جهگړو کرتون ډيکيا. ايتې اوتون ننه منيا رتي کوشش کړتي ان کيدو: 'پايون، تمې تو پائي سو. آيت موئين کم وډوه ريا؟' ②۷ پڻ جيو آپرا اسرائيلي پائي ننه مارتوت ريو، اوتې موسي ننه نيلو ډين کيدو: 'تون ننه کيښته امون مانه آگيوون ان قينصلو کريا وازو راکيوه؟' ②۸ زم تئين کال اوتا مصري منک ننه ماريو پرو، هم مون ننه پڻ ماروا کړه، کي؟' ②۹ هاتي وات هومپزين موسي مصر ملک ساډين پاگي گيو، ان مديان ملک موئين زائين پرځيښي تين ريو ان اوتې ايتا را پي ډيکرا ټيا.

③۰ چاليهون سالون کيږ، سينا نومي ډونگر کن رڼ موئين هيکته آکاشي ډوت هيکا ټرتا زهارکا موئين زهارا را زم موسي ننه ډيکارو ډيدو. ③۱ موسي اي پرسو ډيکين حيرون ټي گيو ان زويا هارو ډوکړو زاوا مډيو. تتيون اوتا ننه ايشور رو اواز ام هومپزيام آيو: ③۲ 'هون تارون ډاډون رو پگهون سون، ابراهيم، اضرحق، ان يعقوب رو پگهون سون.' تتيون موسي ډکوا مډيو، ان اوتا رتي آگړ زائين زويا رتي هيمنت نه رتي. ③۳ تتيون ايشور اوتا ننه کيدو: 'آپرا زوږا اوتار پرا، کم تو جيښته تون اوپوه او پوتير جگا سته. ③۴ مئين زويوه جي مصر ملک موئين ماري سونډل قوم مانه کيوو ظلم ته ريو، ان مئين اوتون ري رڙيون

هوښيږه، ان اوتون ننه پچاووا آيوه. تيام هوته هون تون ننه مصر ملک موئين وږي پاسو ميلونه.

(35) او رو او موسي، جيا رڼي وات اپښي قوم ري ډاډي نتيي مونځي ان کيدو تو: 'تون ننه کيښته آگيوون ان ځينصلو کريا وازو راکيوه،' اوتا هاځي ننه پگهون آگيوون ان آزاده کريا وازو ناوين ميليو، ان اوتا رڼي مدت کريا هارو اوتا آکاشي دوت ننه پيږو ميليو، جيښته اوتا ننه پرتا زهارکا موئين ډيکارو ډيدو تو. (36) ايشه موسي پرسا ان نيشون ډيکارتون اسرائيلي قوم ننه آزاده کراوين مصر ملک ټي ټاري کاډي، ان قلزم نومي سمونډ وسا اوتون ننه متاريا، ان چاليهون سالون هوډي رڼ موئين اوتون رڼي آگيوونځي کړي.

(37) اي او رو او موسي سته جيښته اپون اسرائيليون ننه ام کيدو تو جي 'پگهون تماري قوم موئين ټي تمون هارو هيک مون جيوو پگهون رو نياپو ډيدا وازو ميلشي.' (38) اي او رو او سته جي پوري اسرائيلي قوم پيږو رڼ موئين هتو. اي وسلو منک ټين اوتا آکاشي دوت پيږو هتو، جيښته ايتا ټي سينا نومي ډونگر مانده واتون کري، ان اپتون ډاډون پيږو پڻ هتو. ايتا موسي ننه پگهون را پاها ټي جيون رو مارگ ډيکاريا وازا حکم زړيا، زم او اپون هوډي پوگاڙه.

(39) پڻ اپښي ډاډي موسي رو کيدو مونوا نه کريو، ان اوتا ننه ساډيو پرو، ان اوتون را من موئين مصر ملک رو کيال آيو. (40) تيام اوڼي هارون ننه کيدو: 'اپون هارو مورتې ټوراو، زم اپښي آگيوونځي کړه. کم تو اي موسي، جيو اپون ننه مصر ټي ټارا کاډي آيو تو، اوتا ننه کهر نئين کي ټيوه؟' (41) اوتون ټي ډيښون موئين اوڼي هيک مورتښي ناوځي، جڼي واسرا جيوڼي هتڼي، ان اوتا مورتې را نوم مانده مال سزاووا مډيا، ان اپرون هاتون ټي ناوځ مورتې مانده کښځي کړوا مډيا. (42) تيام پگهون اوتون ننه ساډيا پرا، ان اوتون ننه آکاش رون تارون رڼي پوزا کړوا ډيدڼي. هايا را پارام پگهون رڼي اي وات پگهون رو نياپو ډيدا وازون را شاستر ډ لکل سته:

’او اسرائيليون،

تمي چاليهون سالون هُودِي رڻ موئين جيو مال سڙايو،
 اُو مُون هارُو ٿوڙي سڙايو تو.

(43) تمي تو مولڪ نومي ڏيوڻونا رو تنهُو

ان رفان نومي ڏيوڻونا رڻي تارا رڻي مورتِي آپ پيڙِي ليدِي،
 جيون ڏيوڻونون ري مورتِي تمِي پُوڙا ڪريا هارُو ناوي تي.
 هُون هُون تمون ننه بابل ملڪ ٿي پرلير
 پيڙون ڪن قيڏي ڪراوين ميلِيه پرا.

(44) هُونه پڳوون رو تنهُو، جيا ٿي پڳوون پيڙا ريا رڻي هاڪ پرتو، اُو آڻون
 ڏاڏون ڪن رڻ موئين هتو. اُو امروم ٺاڙل هتو زم پڳوون مُوسي ننه ڪيڏو تو ان
 نمُونو ڏيکارِيو تو. (45) تيا ڪيڙ اُو تنهُو آڻون ڏاڏون ننه اُوڻون رون موڻون ٿي
 زڙيو، ان اُو هايا تنهُو ننه لين يشوع پيڙا ايڻه آيا، زئيون اُوڻي ايڻ ريون ڌاريون
 قُومون را ملڪ مانِه قُوضو ڪريو، جيون ننه پڳوون هراوين آڻون ڏاڏون هوما
 ڪاڍيا پرا. هائي تنهُو اُوڻون ڪن دائود پاڏشا را وڪت هُودِي ريو. (46) دائود ننه
 پڳوون رڻي ڪُريا زڙي، ان اُوڻه پڳوون ٿي وينتِي ڪرڻي جي اُو اسرائيلي قُوم
 هارُو پڳوون رو هيڪ پڪو گهر ٺُوراوڻه. (47) پڻ نيٺ سليمان پاڏشا اسرائيلي
 قُوم هارُو پڳوون رو گهر ٺُورايو.

(48) پڻ پرميشور تو منڪون رون ٺاڙل منڌرون موئين نٿي ريتو، زم پڳوون رو
 نياپو ڏيڏا واڙه شاستر موئين لڪيوه:

(49) ’يشور ام ڪئھ:

آڪاش مارڻي گهاڏِي سئھ،
 ان ڌرتِي مارا پڳ ميليا رڻي جڳا سئھ.
 تمِي مُون هارُو ڪيو گهر ناوشو؟
 مارئھ آروم ڪريا رڻي جڳا ڪيھ؟

⑤0 اي ٻڌي شينهنون مٿين نٿي ٺاوي، ڪي؟ ”

⑤1 پسنه استيفنس وڙي ڪيڏو: ”تمي تو ضڏي منڪ سو. پڳوون را حڪم پرموئنه تماري توهر تو ڪرل سته، پڻ تمي نڪو پڳوون رڻي وات من موئين راکوه، نڪو ڪون ڏين هومپڙوه. تمي هميش پوٽر آتما رنه ڪلاڻ ڪوم ڪروه. زم تمارا ڏاڏا ڪرتا، هم تمي پڻ ڪروه. ⑤2 او ڪيو پڳوون رو نياپو ڏيڏا وازو سته، جيا ننه تماري ڏاڏي تنگ نه ڪريو هوئه؟ اوئي پڳوون رو نياپو ڏيڏا وازون ننه پڻ ماريات پرا، جيئي پڳوون را پيڏوهي شيواڌاري رنه آيا رڻي مور ٿي ڪهر ڏيڏي تڻي. ان همئنه تمي وڙي اوئا پيڏوهي شيواڌاري ايسو ننه زهلاوين ڌاريون رنه خواله ڪريو ان ماريو پرو. ⑤3 تمي او سو، جيون ننه پڳوون آڪاشي ڏوتون هات آپرا حڪم ڏيڏا تا، توئي پڻ تمي اوئون حڪمون مانه نه وڍيا.“

استيفنس نه ايسو رڻي هاڪ پريا ري ڪري مارنه پرو

⑤4 زئون ڌرمي پنچائيت ري منڪي استيفنس ري هائي واتون هومپڙي، تڻيون اوئون ننه اوئا مانه گهڻي رينه سڙي ان او ڏونت گهرڙيا ڪروا مڏيا. ⑤5 پڻ استيفنس پوٽر آتما ٿي پرائين آڪاش هومو زوني ريو تو ان پڳوون اوئا ننه زبڪتا سوجهرا موئين ڌرشن ڏيڏو، ان اوئه ايسو ننه پڳوون رنه زمئنه پاهنه مون موئين اوپل ڏيڪيو. ⑤6 تيا مانه استيفنس ڪيڏو: ”همئنه مون ننه آڪاش ڪلل ڏيڪائو ريو، ان منڪ ذات رو ڏيڪرو پڳوون رنه زمئنه پاهنه مون موئين اوپل سته.“ ⑤7 پڻ اوئي منڪي زور ٿي ڪاش ڪرين آپرون ڪونون آڏا هات ڏين پنڌ ڪريا پرا، ان ٻڌائي پيڙا ٿين استيفنس مانه وڙي آيا. ⑤8 ان اوئا ننه شهر ٿي ٻارو ڊيهڙين لي گيا ان اوئا ننه پوئا هڻين نمو ماروا مڏيا. جي منڪي اوئا رنه ڪلاڻ هاڪ پري تڻي، اوئي پوئا هڻيا هارو ڪرين آپرا ٽوٽال هيڪه پاهنه سائول نومي هيڪا جوڻ منڪ ڪن مليا. ⑤9 زئون او استيفنس ننه پوئا هڻتات ريا، تڻيون استيفنس ام پراٿا ڪرتوت ريو جي ”او پڙو ايسو، تمي مارو جيو قبول ڪرو.“ ⑥0 تڻيون

اُوته ځوډا کوژین زور ټي کیدو: "او پرېو، اي ډوه ايئون مانه مت نوکيا!" اُوته هم کیدو، ان اونا رو هاه نيهري گيو.




① ان سائول اونا ننه ماريا مانه راضي هتو. 8

يهوديه ملک ان سامريه علاقا مړ وشواسي ترم پکژته

سائول وشواسيون ننه تنگ کړوا مډه

اونا ډي ټي لين وشواسي منډري مانه، جې يروشلم شهر موئين هتې، گهڼو ظلم ټيوا مډيو. مُک شيلون شوا پېزا ېډائي وشواسي يروشلم ټي پاگېن يهوديه ان سامريه علاقتون موئين ايل اول گيا پرا.

② کينک منک، جيا هاسا من ټي پگړون ننه مونت، اوتي استيفنس رو لاش لين اونا ننه پوريو پرو، ان اونا را پار لين گهڼا روي.



③ پښ سائول وشواسي منډري ننه کتم کړيا رڼي کوشش کړوا مډيو. او هر گهر موئين زائين وشواسي آدميون ان ډوشيون ننه پارا ډيهڼين جيل موئين پوراوتو.

فلپس سامريه علاقا موئين ايسو را پارام واتون همپړاوته

④ هونه او وشواسي جيا يروشلم شهر ټي پاگيا تا، او ايل اول ويتون ايسو را پارام کشي رڼي کهر همپړاوتا ريا. ⑤ ان فلپس سامريه علاقا را کاس شهر موئين زائين، اوټ رون منکون ننه همپړايو جې ايسو او هاگي پگړون رو سونيل پچايا وازو کريست سته. ⑥ زتيون اوټ ري ېډي منکي فلپس ري واتون هومپړي




ان اوتا را ڪوم ڏيکيا، جي او منڪون ننه هازا هورا ڪريا ٿي ڪيا نيشون ڏيکارڻ، تنهن او هيڪ من ٿين اوتا ريون واتون مانھ ڏيون ڏيا مڏيا. ⑦ ڪم تو فلپس ري هاڻي گهڻون منڪون ٿي پوت رڙيون ڪرين نيهرتات ريا، ان گهڻا اڌرنگ وازا ان رُونگڙا منڪ هازا هورا ٿيڻات ريا. ⑧ ان اوتا شهر موئين گهڻي ڪشي ٿي.

جاڻو ڪريا وازو شمعون

⑨ اوتا شهر موئين شمعون نومي هيڪ منڪ هتو، جيو ڪئينڪ وڪت ٿي لين جاڏو رو ڪوم ڪرتو ان اوت ري سامري قوم رن منڪون ننه جاڏو ڏيکارين حيرون ڪرتو، ان آپ ننه موٽو ڪيتو. ⑩ امير ان گريپ ٻڌائي اوتا ري وات مانھ ڏيون ڏيتا، ان ڪيتا: ”اي منڪ پڳوون رو اوتار سئ، جيا اوتار ننه گهڻي ڪڙا وازو ڪئھ.“ ⑪ او تيام اوتا ري وات مانھ ڏيون ڏيتا ڪم تو اوتھ گهڻا وڪت ٿي اوئون ننه آپرا جاڏو ٿي حيرون ڪرين راڪيا تا. ⑫ پڻ زئون اوئي فلپس ريون

واتون مانه يقين ڪريو، جيو پڳوونَ را راز ان ايسو ڪريست را پارام ڪشي ربي کبر همپڙاوتو، تئين ٻڌائي منڪ، آڌمي ان ڏوشي، پويتر سنون ليوا مڌيا. ⑬ شمعون آب پڻ ايسو مانه وشواس اوڻيو ان پويتر سنون لين فلپس پيڙو ريو. ان نيشون ان موٽا موٽا کوم ڏيڪين حيرون ٿيو.



⑭ زئون يروشلم شهر موئين مُک شيلون نٿه کبر پڙئي جي سامري قوم ري منڪي پڳوونَ را وچن مانه وشواس اوڻيو، تو پطرس ان يوحنا نٿه اوئون ڪن ميليا. ⑮ اوئي زائين سامري قوم رون منڪون هارو پراٿنا ڪري زم اوئون نٿه پويتر آتما زڙه، ⑯ ڪم تو اوئون موئين ٿي هزون هُودِي ڪيا نٿه پويتر آتما نتو زڙيو، پڻ اوئي روڳو پريو ايسو را نوم

مانه پويتر سنون ليدو تو. ⑰ پسته پطرس ان يوحنا اوئون مانه هات ميليا، ان اوئون نٿه پويتر آتما زڙيو.

⑱ زئون جادو ڪريا وائڻه شمعون ڏيڪيو جي مُک شيلون رٿه مائڻه هات ميليا ٿي پويتر آتما زڙه، تو اوئون ڪن پٺيها اوئين ڪيڏو: ⑲ ”مون نٿه پڻ اي ڪڙا ڏيو، زم جيا مانه هون هات ميلون، اوئا نٿه پويتر آتما زڙه.“

⑳ پڻ پطرس اوئا نٿه ڪيڏو: ”تارا پٺيها لئه ان تري زا! پڳوونَ ڪرڻه تون هميش ري سزام پڙه، ڪم تو پويتر آتما جي پڳوونَ امهي ڏه، تئين ام هزميو جي او تون پٺيهاون ٿي لي هيڪڻه. ㉑ پويتر آتما ڏيوو نڪو تارو ڪوم سٺه، نڪو ايٿام تارو حصو سٺه، ڪم تو پڳوونَ ڪن تارو ڏل صاف نٿي. ㉒ تيام اي ڪراپ ڪيال ساڌ ان ايشور ٿي پراٿنا ڪر. مون تارا ايٿا ڪراپ ڪيال ربي ماڻهي


زڙڻ، ②③ ڪم تو هون زوئونھ ريو جي تون لالچ را ڪين من موئين ريشي ٻڙڻ، ان ڏوھ موئين ڦاٿل سٺ.

②④ تو شمعون ڪيڏو: ”تمي مون هارو ايشور ٿي پراڻا ڪرو، زم جيئي وات تمي ڪيڏيڻھ، او مون مانھ نہ آوڻھ.“

②⑤ پستھ پطرس ان يوحنا ايشور رو وچن هاڪ پرين همپڙايو، ان تيا ڪيڙ پاسا يروشلم شهر موئين گيا پرا، ان زاتون زاتون سامري قوم رون گهڻون پاڙون موئين ايسو را پارام ڪشي رڻي ڪهر همپڙاوتا گيا.

فلپس ان اٿوپيا ملڪ رو وزير

②⑥ ايشور رڻھ هيڪڻھ ڏوت فلپس نڻھ ڪيڏو: ”تون سنپرين ڏڪڻاڏلھ پاهڻھ اوڻا گهاڙو مانھ زا، جيو يروشلم شهر ٿي غزه شهر هومو زائھ.“ او گهاڙو هونواڙ موئين سٺھ. ②⑦ تيام فلپس اول هومو گيو. اوڻھ اٿوپيا ملڪ رو هيڪ منڪ زاتوت ريو، جيو اٿوپيا ملڪ ري روڻي ڪنداڪي رو وزير هتو، ان اوڻا را پورا ڪزونا مانھ هتو، ان او ڪڏڙو هتو. او يروشلم شهر موئين پگھون رڻي پوزا ڪروا



آيو تو ②⑧ ان همڻھ آڀري گهوڙا گاڏي مانھ بيهين پاسو زاتوت ريو، ان پگھون رو نياپو ڏيڏا واڙا يسعياه را لڪل شاستر ٿي پڻتوت ريو.

②⑨ تئيون پوٽر آتما فلپس نڻھ ڪيڏو: ”گاڏي ڏوڪڙو زائين وڻھ!“ ③⑩ ان فلپس ڏوڙي زائين هومپڙيو جي وزير پگھون رو نياپو ڏيڏا واڙا يسعياه را لڪل شاستر ٿي پڻتھ ريو. تو اوڻھ پونسيو: ”تمي جي پڻوھ ريا، او هزموھ ڪا نا؟“ ③① وزير ڪيڏو: ”هون ڪم ڪرين هزمي هيڪونھ، زئيون ڪوئي مون نڻھ هزميا واڙو نٿي؟“ پستھ اوڻھ فلپس نڻھ منٿ ڪرين آپ ڪن بيهاريو.

③۲ جڏي شاستر رڻي وات اُو پڻتوت ريو، اُو اي هڻي:

"زم ري ننه هلاليا هارو لي زانه،

هم اوتا ننه ماريا هارو لي گيا.

زم گهيتو اُون ڪتريا وازون ڪن ٻولتو نڻي

هم اُو پڻ ڪئين نه ٻوليو.

③۳ اوتا رڻي پيعزتئي ٿئي

ان اوتا رو انصاف نه ٿيو.

هونه ڪون اوتا را اولاد را پارام همپزاوشي؟

ڪم تو ايئا دنيا ۾ اوتا رڻي حياتي ڪوهرائي گهيه.

③۴ پسنه وزير فلپس ننه منڻ ڪرين ڪيڏو: "مون ننه هزماوو جي پگهون رو

نياپو ڏيڏا وازو اي وات ڪيا را پارام ڪه ريو؟ آپ را پارام ڪا پيزا ڪياڪ

را پارام؟" ③۵ تئين فلپس ايئا شاستر ري وات ٿي شروع ڪرين اوتا ننه ايسو

را پارام ڪشي رڻي ڪهر همپزاوئي.

③۶ شيرزا مانھ ويتون ويتون ڪياڪ پوڻي واري جگا ڪن پوگيا. تو وزير

ڪيڏو: "زوڻو، اي پوڻي پڙيوھ. هونه پيزئي ڪئي وات سٺه، جي هون پوئتر

سنون نه ليون؟" ③۷ (تو فلپس اوتا ننه ڪيڏو: "جي تم پورا من ٿي وشواس

اوڻوھ، تو پوئتر سنون لي هيڪوھ." تو وزير ڪيڏو: "هون يقين راکونه جي

ايسو ڪريست پگهون رو ڏيڪرو سٺه." ③۸ پسنه وزير گاڏي ننه اُوپاڙيا رو

ڪيڏو، ان فلپس ان وزير ٻي ٿي زئا پوڻي موئين گيا، ان فلپس اوتا ننه پوئتر

سنون ڏيڏو. ③۹ زئين پوڻي ٿي ٻارا نيهريا، تو ايشور رٿه پوئتر آتما فلپس ننه

اوچتو اوڻون لين پيزيل ساڏيو. ان وزير اوتا ننه وري نه ڏيڪيو، پڻ ڪش ٿيتو

آپرو مارگ لين گيو پرو.

④۰ پڻ فلپس آپ ننه اشدود شهر موئين ڏيڪيو، تو قيصريه شهر موئين زاتون

شيرزا مانھ ٻڌون شهرون موئين ڪشي رڻي ڪهر همپزاوئو گيو.

سائول وشواسي تته



9 ① زئيون هائي واتون تيتيت ري،
تئيون سائول هزون هُودِي پريو ايسو

مانه وشواس راكيا واژون مانه ريشي بزين اوتون ننه نمو ماريا ري واتون كرتو تو. او مُک پوزاري كن گيو، ② ان اوتا ئي دمشق شهر موئين پگيون رون مندرن رون آگيونون هارو اجازت نوما را كاگز مونگي ليذا، زم ايسو را مارگ مانه وودا واژا منك اوتا ننه زژنه، او آدمي كا دوشي هونه، تو اوتون ننه زهللويين سزا ديذا هارو پاسا يروشلم شهر موئين لي آونه.



③ سائول زئيون دمشق شهر دوكزو پوگيو، تو اوچتو آكاش ئي سوجهره اوتا رنه چوداري چلكيو، ④ ان او زمي مانه پريو نو، ان آونه امراواز هومپريو: "سائول، او سائول، تون مون ننه كم تنگ كرئه؟" ⑤ تو سائول پونسيو: "پريو، تمي كوئ سو؟" تو اواز آيو: "هون ايسو سون، جيا ننه تون تنگ كرئه. ⑥ پئ هونه

تون اوت، ان شهر موئين زا. ان جئين تارنه كروو، او تون ننه اوتنه همپراوشي." ⑦ جيا منك سائول پيزا زاتات ريا، او ماث كرين اوي تا، كم تو اواز هومپرات ريا، پئ كيا ننه نتا ديكتا. ⑧ پسته سائول زمي ئي اونيوي، ان آپري اونكيون اوگهاري، پئ او اوندو ئي گيو تو ان كئين ديكي نتو هيكتو. تيام منك اوتا ننه دمشق شهر موئين پاين تيژي گيا. ⑨ سائول ترن دي اوندو ريو، ان آونه نكو كاڌو نكو پيتو.

⑩ آوتنه دمشق شهر موئين هيڪ وشواسي هتو جيا رو نوم حنياه هتو. اوتا ننه پريو ايسو شينا را زم ديكاڌو زين هاڌا ديڌو: "او حنياه!" تو آونه كيڌو: "جي، پريو." ⑪ پريو اوتا ننه كيڌو: "اوتا پكا مانه زا، جيا ننه سڌو پكو كئه، ان آوتنه يهوداه ري گهري زائين ترسُس شهر را سائول نومي منك رئي

پُونسا ڪرين اُونا ٿي مڙ. ڪم تو اُو همٿه پراڻا ڪرڻه ريو، ⁽¹²⁾ ان اُوڻه شپنا را زم هيڪا حننياه نومي منڪ ننه ڏيڪيوه، جيئنه گهر موئين آوين اُونا مانه هات ميليا، زم اُو وڙي ڏيڪي هيڪه. ⁽¹³⁾ حننياه ڪيڏو: ”اُو پرڻو، مئين هايا منڪ را پارام گهڻون منڪون ٿي هومپڙيوه جي يروشلم شهر موئين اُوڻه امون جيوون تمارون سُونڍل منڪون ٿي ڪتو ظلم ڪريوه. ⁽¹⁴⁾ ان موئون پوزاريون ٿي اُونا ننه اِڪتيارئي ڏيڏل سئه، جي ايئنه زتا منڪ تمارو نوم لئه، اُوئون ٻڌون ننه زهلاوئه. ⁽¹⁵⁾ پڻ پرڻو اُونا ننه ڪيڏو: ”تون زا، ڪم تو اي منڪ مارو ڪاس سُونڍل شيواڌاري سئه، جيو ڌاري قومون، پاڌشائون، ان اسرائيلي قوم هومو مارو نوم ساوو ڪرشي. ⁽¹⁶⁾ ان هُون آپ اُونا ننه ڏيڪاڙيه جي اُونا رنه مُون هارو ڪتو ڏڪ سهو پڙشي.“


⁽¹⁷⁾ پسئه حننياه اُوڻه گهر گيو، ان آپرا هات سائول مانه ميلين ڪيڏو: ”پائي سائول، پرڻو مُون ننه ميليوه، پرڻو ايسو جيئنه ٿارا آيا رنه ٿوئنه تون ننه شيرڙا مانه ڏيڪاڙو ڏيڏو تو. اُوڻه مُون ننه ايئا هارو ميليوه، زم تون وڙي ڏيڪي هيڪه، ان پويتر آتما ٿي پراڻي زائه. ⁽¹⁸⁾ ان جلدي م سائول ريون اونڪيون ٿي قوترون جيوي شينهنون نيسي پڙي گي، ان اُو وڙي ڏيڪو مڏيو، ان اُوڻه اُوئين پويتر سنون ليڏو. ⁽¹⁹⁾ پسئه روئي ڪاڏئي ان اُونا ننه وڙي وشيت زڙئي.“

سائول دمشق شهر موئين ايسو را پارام همپڙاوڻه

سائول ڪئينڪ ڏي دمشق شهر رون وشواسيون پيڙو ريو. ⁽²⁰⁾ ان جلدي م پڳوون رون منڌرون موئين ايسو را پارام همپڙاوڻا مڏيو، جي اُو پڳوون رو ڏيڪرو سئه. ⁽²¹⁾ هومپڙيا وارا ٻڌائي منڪ گهڻي حيروني ٿي ڪيتا: ”اي اُو رو اُو منڪ نئي، ڪي، جيئنه يروشلم شهر موئين هائي نوم ليڏا واڙون ننه ڪنه ڪرياهه پرا؟ ان ايئنه پڻ ايئا هارو آيو تو جي اُوئون ننه زهلاوين موئون پوزاريون ڪن لي زائه.“ ⁽²²⁾ پڻ سائول ننه ٻوليا رئي وڌيڪ هيئت زڙئي، ان ايئا وات ننه ايوي ساوئي

ڪرين هزماوئي جي ايسو ڪم ڪرين پڳوون رو سونڊل پڇايا واڙو ڪريست سٺ، جي دمشق را يهودي اونا رو مقابلو نه ڪري هڪيا.

②③ گهڻون ڏيئون ڪيڙ يهودي قوم ري ڪئينڪ منڪي سائول نٽه نمو ماري رو ڦينصلو ڪريو، ②④ پڻ اينا وات رئي سائول نٽه ڪهر پڙي گهڻي. او منڪ سائول نٽه ڪتم ڪريا هارو ڏي رات شهر رون ڌروazon مانھ هوتا. ②⑤ پڻ هڪ رات سائول ري ڪرل وشواسيئي اونا نٽه ڏلا موئين پيهارين شهر را ڪوت ري پينٽ ٿي نيسو اوتاريو پرو.




سائول يروشلم شهر موئين پاسو ڙاڻه

②⑥ زئيون سائول يروشلم شهر موئين پاسو گيو، تنيون اوته وشواسيون ري توڙي ۾ پڙيا رئي ڪوشش ڪري، پڻ ٻڌائي اونا ٿي پيڻاتا تا ڪم تو اوئون نٽه يقين نٽو آتو جي هاس ۾ ايسو مانھ وشواس راکڻه. ②⑦ پڻ برنباس سائول نٽه آپ پيڙو لين مڪ شيلون ڪن تيڙي گيو، ان اوئون نٽه هزميا جي پريو ايسو ڪم ڪرين سائول نٽه شيرڙا مانھ ڏيڪارو ڏيڏو ان اينا ٿي واتون ڪري، ان سائول

کيوي هيمنت ٿي دمشق شهر موئين ايسو را پارام واتون همپزاوي. ②۸ پسته تيا
کيتر سائول يروشلم شهر موئين اوئون پيزو ٻڌيل ويتو ريتو، ان گهڻي هيمنت ٿي
پريو را پارام همپزاوتو.

②۹ سائول يوناني ٻولي ڪريا وازون يهوديون ٿي واتون ان بحث ڪرتو. پڻ
او منک اوئا ننه نمو ماريا رٿي ڪوشش ڪرتا تا. ③۰ زئيون وشواسي پايون ننه
هايا وات رٿي ڪهر پڙئي، تو اوئا ننه قيصره شهر موئين تيڙي گيا ان ترسس
شهر هومو روونو ڪريو پرو.



ترسس شهر

③۱ تيام پورا يهوديه، گليل ان سامريه صوپون موئين وشواسي منڌري ننه
هڪ زڙيو، ان پويتر آتما ري مدت ٿي وشواسيون رٿي هيمنت وڌيئي رٿي، ان
او پريو رو مون راکين اوئا ريون واتون مانھ ويتا ريا، ان گهڻا منک وشواسي
ٿيتا گيا.

پطرس لڏه شهر موئين هڪا منک ننه ھازو ھورو ڪرڻھ

③۲ پطرس ٻڌون علاقون رون وشواسيون ٿي مڙتو مڙتو، لڏه شهر رون وشواسيون
ڪن آوين پوگيو. ③۳ اوئنه اوئه اينياس نومي هڪا اڌرنگ را مونڌا ننه ڏيکيو،

جيو آئون سالون ٿي کاتلا مانھ پڙيو تو. (34) پطرس اُٿا نئھ ڪيڏو: ”اينياس، ايسو ڪريست تون نئھ ھازو ھورو ڪرئھ. اُٿي، ان آھري ڳوڏڙي واڙ.“ ان اُو جلدِي ۾ اُٿين اُٿيو. (35) تئين لڏھ شھر ري ان شارون علاقا ري منڪي اُٿا نئھ ڏيکين پريو ايسو مانھ وشواس اُٿيو.



پطرس يافا شھر موئين ھيڪي ڏوشي نئھ جيوتِي ڪرئھ

(36) يافا شھر موئين ھيڪ وشواسي ڏوشي ھئي، جيا رو نوم تبيتا ھتو، جيا رو مطلب سئھ ھرئي. اُو گھڻا ٺاٺوڪا کوم ڪرتي ان پڳوون را نوم مانھ ڪيريات پڻ ڪرتي. (37) زئين پطرس لڏھ شھر موئين ھتو، تئين اُو ڏوشي مونڏي تين مري گئي. ان اُٿا نئھ جھيلاڙين ماڙي مانھ راڪي.



(38) لڏھ شھر يافا شھر ٿي ڏوڪڙو

سئھ. تيام يافا رون وشواسيون نئھ ڪبر پڙي گئي جي پطرس لڏھ موئين سئھ.

اُٿي ٻي منڪ ميليا ان اُٿون ھات پطرس نئھ ام ڪي ميليو جي ”ميريوني ڪرين، امون ڪن جلدِي آو.“ (39) تيا مانھ پطرس اُٿون منڪون پيڙو وُڍو پرو. زئين اُو اُٿئھ پوڳيو، تو اُٿا نئھ ماڙي مانھ تيڙي ڳيا. اُٿئھ ٻڌي رنڌال

اشیتري روتي روتي اوتا کن آوین اویي، ان جیا لوگهژا تیتا اوتون پیژئي رین شیویا تا، او دیکاروا لاگي. (40) تئین پطرس بدون منکون ننه بارا کایا ان گودا کوژین پراثنا کرئي. پسنه لاش هومو تین کیدو: "تیتا، اویي!" ان اوتنه جیوتئي تین اونکیون اوگهژي پري، ان پطرس ننه دیکین اوتین پیئي. (41) پطرس اوتا ننه هات موئین زهالین اوناژئي، ان پسنه رندال اشیتريون ننه ان پیزون وشواسیون ننه هاژ کرین جیوتئي کرل دوشي اوتون ننه دیتئي پري.

(42) اي وات پورا یافا شهر موئین پکزي گي، ان گهئي منکي پريو ايسو مانه وشواس اوئيو. (43) پطرس گهئا ذي یافا موئین شمعون نومي هیکا منک ري گهري ريو، جیو سونېزا رو کوم کرتو.

پطرس ان رومي ساب گرنیلئس




10 (1) قیصریه شهر موئین گرنیلئس نومي هیک داري قوم رو منک هتو. او روم ملک ري قوج رو هیک ساب هتو، ان قوج موئین اوتا توژا رو هتو، جیا ننه اتلي رو توژو کئ. (2) او ان اوتا را گهر را بدائي پاتي درمي هتا ان روگا پگبون مانه یقین راکتا. او ساب اسرائيلي قوم ننه گهئتي کیریات دیتو، ان هر وکت پگبون ئي پراثنا کرتو. (3) هیک ذي، پپورون رنه توتنه ترئیک واگي، پگبون رنه هیکه آکاشي دوت اوتا ننه ساونه نمونه دیکارو دین

اوتا کن آوین کیدو: "گرنیلئس." (4) اوتنه دوت ننه دیون ئي زویو، تو پيئائي گپو، ان کیدو: "تمی کیوئه کوم آیا، پریو؟" تو دوت اوتا ننه کیدو: "تاري پراثناون ان تاري کیریات پگبون کن پوگئیه ان اوتنه تارو هاژ هومپزیوه. (5) هوئه یافا شهر موئین منکون ننه میلین هیکا شمعون نومي منک ننه آپ کن تیژاوي لئه، جیا ننه پطرس پن کئ. (6) او سونېزا رو کوم کریا واژا شمعون

نومي منک ري گهري ميمونَ سته، جيا رو گهر سموندي را کپ مانه سته.

⑦ زئيون آکاشي دُوت گپو پرو، جيئنه اُوتا ٿي واتون ڪري تي، تئيون اُوته آپرون نوڪرون موئين ٿي پئئون نئه تيڙايا، ان جيا قوچي آپ ڪن اُوپا تا، اُوتون موئين ٿي هڪا قوچي نئه پڻ تيڙايو جيو پڳوونَ مانه يقينَ راکتو. ⑧ ڪُرنيليُس اُوتون نئه ٻڌي واتون هزماوي ان پسته يافا شهر هوما ميليا پرا.



⑨ پڙئه ڏي زئيون اُو منک شيرڙا مانه هتا ان يافا شهر دُوڪڙا هتا، تو پطرس پپورون رئه توتئه گهر ري چت مانه پراڻا ڪروا گپو. ⑩ اُوتا نئه پوک لاڳئي ان اُوتا رو جيو روئي ڪاوا ڪرتو تو. زئيون کاڌو تيار ٿيتو ريو، تو اُوتا نئه شپنا را زم ڪئينڪ ڏيڪيام آيو. ⑪ اُوته آکاش کُلل ڏيڪيو ان هڪ موئي ساذر جيوي شينه چارون کُوتون ٿي نيسي زمي مانه اُوترتون ڏيڪئي، ⑫ جيا موئين هر نمونا را زناور ان پڪي هتا. ⑬ ان اُوتا نئه هڪ اواز هومپڙيام آيو: ”او پطرس، اُوي. ايئون نئه هلالين ڪا!“

⑭ پڻ پطرس ڪيڏو: ”هُون ماڳي نئين ڪائون، پڙيو. مئين تو ايوي شينه ڪيڏي نئي ڪاڏئي، جي ڌرم پرموتئه پُونڌئي ان ڪراپ هوئه.“

⑮ پسنه وڙي پيڙي وار ام اواز آيو: ”جيا نئه پڳوون پويتر ڪريوه، اوتا نئه تون پوندو مت هزم.“ ⑯ ترڻ وار همروم ٿيو، ان پسنه او ساڌر آڪاش موئين اوپڙي گهي.

⑰ زئيون پطرس مڃهائين سوچتو ريو جي ”ايئا وات رو مطلب ڪي سئه، جيئي پڳوون مون نئه ڏيکارڻيه؟“ تو اونه ئي توتئه جيون منڪون نئه ڪرنيليس ميليا تا، او شمعون رو گهر گوتين ڌروازا مانه آوين اوياء، ⑱ ان هاڌ ڪرين پونسوا مڌيا جي ”شمعون جيا نئه پطرس پڻ ڪئه، اويئنه رئه، ڪا نا؟“

⑲ زئيون پطرس ايئا پڳوون ري ڏيکارڻ وات را پارام سوچتو ريو، تو پويتر آتما اوتا نئه ڪيڌو: ”زو، ترڻ منڪ ٿارئي پونسوا ڪرئه ريا. ⑳ هونه اوين نيسو زاء، ان اوتون پيڙو ڪتڪو ڪريا ووٽو زاء پرو، ڪم تو مئين اوتون نئه ميليا ه.“ ㉑ پطرس نيسو اوترين اوتون منڪون نئه ڪيڌو: ”جيا رئي تمي پونسوا ڪروه ريا، او هون سون. تمي ڪيونه ڪوم آياه؟“

㉒ تو اوتي ڪيڌو: ”امون نئه ڪرنيليس نومي رومي قوچ رئه هيڪئه ساب ميليا ه. اوناٽوڪو منڪ سئه، ان هيك پڳوون رو مون راکئه. پوري يهودي قوم موئين اوتا رو گهڻو مون سئه. پڳوون رئه هيڪئه پويتر ڏوت اوتا نئه ڏيکارو ڏين ڪيڌوه جي او تمون نئه آپ ڪن گهري تيزاوين تمون ٿي واتون هومپڙه.“ ㉓ تيام پطرس اوتون نئه گهري تيڙي زائين آپ ڪن ٽڪاريا.



پيڙه ڏي پطرس اوتون پيڙو ٿين يافا شهر ٿي رزونو ٿيو، ان اوٽ را ڪئينڪ وشواسي پائي پڻ پيڙا گيا. ㉔ وڙي پيڙه

ڏي قيصريه شهر موئين آوين پوگيا. اوتئه ڪرنيليس آپرون عزيزون ان ڪاس دوستون نئه پيڙا ڪرين اوتون رئي وات زوتوت ريو. ㉕ پطرس زئيون گهر موئين اوتوت ريو، تو ڪرنيليس اوتا نئه آوڪار ڏين اوتا ري پڳي پڙيو نو. ㉖ پڻ پطرس اوتا نئه اوناڙين ڪيڌو: ”اوين اوياء، هون پڻ تمون جيوو منڪ سون.“

②7 پستھ پطرس اُٿا ٿي واتون ڪرتو گهر موئين ڳيو، ان گهڻون منڪون نٿه پيڙا ٿيل ڏيکين ②8 اُٿون نٿه ڪيڏو: ”تمون نٿه تو کبر سٺه جي ماري يهودي قُوم را منڪ تمون جيوون ڌاري قُوم رون منڪون ٿي شپ ڪرڻه، ان تمون ٿي واسطو راڪو ان تمون ڪن زاو امارا يهودي ڌرم رڻه هاو ڪلاڻ سٺه. پڻ پڳوون مُون نٿه اي وات ساوئي ڪرين ڏيڪاڙيڻه جي ڪيائي پڻ قُوم را منڪ نٿه ڪراپ ان پُونڌو نه هزمون. ②9 تيام زئيون مُون نٿه تيڙايو، تو هُون اڙايا رو ڪيال ساڌين نا پاڙيا وگر سڌو وُڍو آيو. هُونه هُون پُونسونه جي تمي مُون نٿه ڪيا وات هارو تيڙايوه؟“

③0 تو ڪرنيلس ڪيڏو: ”آز چار ڏي ٿيا، هُون آپرا گهر موئين ايڻه ٿوڻه پپورون رو ترڻي واڳي پراڻا ڪرتوت ريو، تو اوچتو سوجها جيو لوگهڙا پيرل هيڪ منڪ مُون ڪن هومو آوين اُپو، ③1 ان ڪيڏو: ’ڪرنيلس، پڳوون ٿارو هاڏ هومپڙيوه ان ٿارڻي ڪيريات اُٿا ڪن پوڳيڻه. ③2 تيام ڪياڪ نٿه يافا شهر موئين ميل، ان شمعُون جيا نٿه پطرس پڻ ڪڻه، آپ ڪن تيڙاوي لڻه. اُو سونپڙا رو ڪوم ڪريا واڙا شمعُون ري گهري ميمون سٺه، جيا رو گهر سمونڊ را ڪپ مانه سٺه. ③3 تيام اُوڻه ٿي ٿوڻه مئين تمون ڪن منڪ ميليا، ان تمي ٺاڻوڪو ڪريو جي آيا را. هُونه امي ٻڌائي پڳوون هوما پيڙا ٿيا زم اُو ٻڌي واتون هومپڙون، جي ايشور تمون نٿه همپڙايا رو ڪيڏوه.“

پطرس ڪرنيلس نٿه ايسو را پارام همپڙاوڻه

③4 پستھ پطرس ام ڪيا مڏيو: ”هُونه مُون نٿه کبر پڙيڻه جي هاس ۾ پڳوون ڪيا رو پاهو نٿي ليتو، ③5 پڻ جو منڪ پڳوون رو مُون راڪڻه ان اُٿا ري وات مانه وڻه، اُو پلڻه ڪيائي پڻ قُوم رو هون، پڳوون اُٿا ٿي ڪُش سٺه. ③6 اي اُو رو اُو نياپو سٺه، جيو پڳوون امون اسرائيلي قُوم رون منڪون نٿه ڏيڏو تو، زئيون اُوڻه اي ڪشي رڻي کبر همپڙاوڻي جي ايسو ڪريست پڳوون ان منڪون

وسا منومئا ڪراوئڻ، ان اي ٻڌون رو پڙيو سئڻ.

(37) تمون نئڻ ڪبر سئڻ جي زئيون يوحنا پويتر سنون ليڏا رو همپڙايو، تو پستڻ تيا ڪيڙ گليل صوپا ٿي لين پورا يهوديه ملڪ موئين ڪي ٿيو. (38) پڳوون ايسو ناصرت شهر وازا نئڻ سونديو ان اوئا نئڻ پويتر آتما ان ڪڙا ڏيڏئي. او ايل اول ويتون پلائي ڪرتو ان جيا شيطون را قوضام تڪليب موئين هتا، اوئون ٻڌون نئڻ هازا هورا ڪرتو ريو، ڪم تو پڳوون اوئا پيڙو هتو. (39) امي اوئا را ٻڌائي ڪوم اونڪيئي ڏيڪيا، جيا اوئڻ يهوديون را ملڪ ان يروشلم شهر موئين پڻ ڪريا. اوئي يهوديئي اوئا نئڻ هوري مانھ سڙاوين مرايوت پرو. (40) پڻ پڳوون اوئا نئڻ ترئمڻ ڏي موت ٿي جيوي اوئاڙيو، ان اوئا نئڻ منڪون هومو ساو ڪريو. (41) پڻ ايسو اماري پوري اسرائيلي قوم نئڻ ڏيڪاڙو نه ڏيتو، روگا امون نئڻ ڏيڪاڙا ڏيڏا، جيون نئڻ پڳوون ايسو رڻ جيوي اوئا رئي هاڪ پريا هارو مور ٿي سونديا تا. ايسو رڻ ملون موئين ٿي جيوي اوئا ڪيڙ، امي اوئا پيڙو کاڌو پيتو. (42) ان اوئڻ امون نئڻ حڪم ڏيتو جي امي آپري اسرائيلي قوم رون منڪون نئڻ هاڪ پرين همپڙاوون جي ايسو او رو او سئڻ جيا نئڻ پڳوون جيوتون ان ملون رو نيا ڪريا هارو سونديوھ. (43) ايئا ايسو رئي پڳوون رو نياپو ڏيڏا وازا ٻڌائي هاڪ پريه جي جيو پڻ اوئا مانھ وشواس راکئڻ، اوئا نئڻ ايسو را نوم ٿي ڏوهون رئي ماڻهي زڙشي.

پڳوون ڌاري قوم واڙون نئڻ پويتر آتما ڏئڻ

(44) پطرس هزون ٻولتوت ريو، تو پويتر آتما اوئون ٻڌون منڪون مانھ اوتريو، جيا اوئا ري واتون هومپڙات ريا. (45) ان پطرس پيڙا جيا يهودي قوم را وشواسي منڪ آيا تا، او ٻڌائي حيرون ٿيا جي ڌاري قوم رون منڪون نئڻ پڻ پڳوون پويتر آتما ڏيڏوھ، (46) ڪم تو اوئون نئڻ ڪڙا ٿي زڙل ٻولي ڪرتون ان پڳوون را وڪوڻ ڪرتون ڏيڪيا. تئيون پطرس يهودي قوم رون وشواسيون نئڻ ڪيڏو: (47) ”ايئون

ننه آڀا زم پوٽر آتما زڙيوه. هوءَ ايئون ننه ڪوڻ روڪي هيڪڙهه، جي پوٽر سنون نه لئه؟" (48) پسته پطرس اوئون ڌاري قوم وازون ننه ڪيڏو جي او ايسو ڪريست را نوم مانه پوٽر سنون لئه. زئون اوئي پوٽر سنون ليڏو، تئيون اوئي پطرس ننه منڻ ڪرين ڪئينڪ ڏي آپ ڪن را ڪيو.

پطرس آپري يهودي قوم روم وشواسيون ننه ٻڌي واتون همپڙاوڻه



11 ① مک شيلي ان پورا يهوديه ملڪ ري وشواسي پايي هومپڙيو جي ڌاري قوم ري منڪي پڳوون رو وچن هومپڙين ايسو مانه وشواس اوڻيوه. ② زئون پطرس يروشلم شهر موئين آيو،

تو اوت را وشواسي جيا ٻڌائي يهودي قوم را هتا ان جيون رئي توهر موسي را لڪل حڪم پرموڻه ٿيل هئي، او پطرس ننه ام وزگوا مڌيا: ③ "تمي ڌاري قوم روم منڪون ڪن ڪم ڳيا، جيون رئي توهر نئي ڪرل؟ ان اوئون پيڙي روتئي ڪم کاڌئي؟"

④ تئيون پطرس شروع ٿي لين او ٻڌي وات ام هڙماوئي: ⑤ "هون يافا شهر موئين پراڻا ڪرتوت ريو، ان شينا را زم پڳوون مون ننه ڪئينڪ ڏيکاريو. مئين هيڪ موٽي سادر جيوي شينه چارون کوئون ٿي آڪاش هون نيسي اوترتون ڏيڪي، ان او مون هومئي آوي. ⑥ اوتا موئين زئون مئين ڏيون ٿي زيو، توهر نمونا را زناور، پاڙل ان جهنگلي زناور، ان پڪي ڏيڪيام آيا. ⑦ ان مئين اي اواز پڻ هومپڙيو: 'او پطرس، اوئي. ايئون ننه هلالين ڪا! ⑧ تو مئين ڪيڏو: 'هون ماڳي نئين ڪاٺون، پريو، ڪم تو مئين ڪيڏي ايوي شينه نئي کاڌي جي ڌرم پرموڻه پوندئي ان ڪراب هوئه. ⑨ تو پيڙي وار آڪاش ٿي اواز آيو: 'جيا ننه پڳوون پوٽر ڪريوه، اوتا ننه تون پوندو مت هزم. ⑩ ترڻ وار همروم ٿيو، ان پسته او ٻڌي شينهون آڪاش موئين اوپڙي ڳي.

⑪ اُوته ئي توتنه ترڻ منڪ اوتا گهر ڪن آوين اُويا، جيئن هون هتو. اُو قيصريه شهر ٿي مون ڪن ميلل هتا. ⑫ پويتر آتما مون ننه ڪيڏو: 'تون ڪٿڪا ووڻو اوتون پيڙو زا پرو.' پسته اي سو وشواسي پائي پڻ مون پيڙا هاليا، ان امي اوتا منڪ ري گهري ڳيا. ⑬ اُوته منڪ امون ننه همپرايو جي اُوته آڪاشي دوت ننه آپرا گهر موئين اُوپل ڏيڪيو، جيئن اوتا ننه ڪيڏو: 'يافا شهر موئين منڪ ميلين شمعون جيا ننه پطرس پڻ ڪنه تيڙاوي لته. ⑭ اُو تون ننه ايوي واتون همپراوشي جيا ٿي تون ان تارو ٻڌو گهر پڳوون ري سزا ٿي پڇي زاشو ان تمون ننه تارڻ زڙشي.

⑮ زئيون هون هائي واتون همپراوا مڏيو، تو پويتر آتما اوتون مانھ پڻ اوتريو، زم شروع ۾ آپون مانھ اوتريو تو. ⑯ ان مون ننه پريو ايسو ربي ڪيڏل اُو وات همپري جي 'يوحنا پوڻي ٿي پويتر سنون ڏيتو، پڻ تمون ننه پويتر آتما ٿي پويتر سنون زڙشي. ⑰ هون، پڳوون اوتون ننه پڻ پويتر آتما ڏيڏو زم آپون ننه پڻ ڏيڏو تو، زئيون آبي پريو ايسو ڪريست مانھ وشواس اوڻيو تو. تو پسته هون ڪوڻ هتو جي پڳوون ننه روڪي هيڪون؟"

⑱ اُو اي هومپرين ماڻ ڪري ڳيا ان ام ڪين پڳوون را وڪوڻ ڪروا لاڳيا جي "هون پڳوون ڌاري قوم رن منڪون ننه پڻ توپونه ڪريا رو موقعو ڏيڏوه، زم اُو آپرا ڪراپ ڪوم ساڏين پڳوون ري وات مانھ وٺه، ان اوتون ننه هميش رو جيون زڙته."

انطاڪيه شهر ربي وشواسي منڌڙي

⑲ هون اُو وشواسي جيا يروشلم شهر ٿي پاڳي ڳيا تا زئيون استيفنس ري ڪري وشواسيون مانھ ظلم ٿيا لاڳيو تو، اُو ايل اول زائين ڪوڪ فينيڪي علاقا، ڪوڪ ڪپرس پٽ، ان ڪوڪ انطاڪيه شهر هوڏي پوڳي ڳيا. اُو زاتون زاتون آپري يهودي قوم واڙون ننه ايسو را پارام همپراوتا، پڻ پيزون ننه ڪئين



نه هميڙاوتا. ②0 پڻ اُوئون موئين ٿي ڪئينڪ ڪُپُرس پيت واڙا ان ڪئينڪ ڪُريني شهر واڙا هتا، جيا انطاڪيه شهر موئين آوين ڌاري قُوم رون منڪون نئه پڻ پُرو ايسو رئي ڪشي رئي ڪهر هميڙاوتا. ②1 پڳوون اُوئون پيڙو هتو، ان گهڻي منڪي يقين راکين پُرو ايسو مانھ وشواس اوڻيو.

②2 اُوئون منڪون رئي ڪهر يروشلم شهر ري وشواسي منڌري رون منڪون نئه پڙئي، ان اُوئي برنباس نئه انطاڪيه شهر موئين اُوئون ڪن ميلو. ②3 برنباس اوڻئه پوڳين زئون ڏيڪيو جي پڳوون اوڻ رون منڪون مانھ ڪيوني ڪُريا ڪريھ، تئيون گهڻو ڪش ٿيو، ان اُوئون ٻڌون نئه حوصلو ڏيڏو جي اُو پورا من ٿي پُرو ري وات مانھ وِيتا رئه. ②4 برنباس ٺاڻوڪو منڪ هتو ان پويتر آتما ٿي پرال ان وشواس موئين پڪو هتو. ان گهڻا منڪ پُرو ايسو مانھ وشواس اوڻين وشواسي منڌري موئين آيا.

②5 پسئ برنباس ساڻول نئه گوتوا ترسُس شهر گيو پرو. ②6 ان اوڻا نئه گوتين اوڻا نئه پاسو انطاڪيه شهر موئين تيڙي آيو. اُو ٻي پورو هيڪ سال وشواسي منڌري ۾ پيڙا ٿيڻا ريا ان گهڻون منڪون نئه شيڪارڙتا ريا. وشواسيون نئه مسيحي ڪيڏا رئي وات انطاڪيه شهر موئين شروع ٿئي.



27) اُوئي ڏيئي ڪئينڪ پڳوون رو
نياپو ڏيڏا واڙا يروشلم شهر ٿي
انطاڪيه شهر موئين آيا. 28) اُوئون
موئين ٿي هيڪ زٽو، جيا رو نوم اگبس
هتو، اُوئين اُوپو ان اُوئه پويتر آتما را
ڪيڏا ٿي همپرايو جي "زتا ملڪ روم

ري حڪومت هيٺ سٺه، اُوئون ٻڌون ملڪون موئين گهڻو ڏڪار پڙشي. "او ڏڪار
روم را پادشا ڪلوديس را راز موئين پڙيو. 29) تيام وشواسيئي اي ڦينصلو
ڪريو جي آپري آپري هيٺ پرموئنه ڦوڙئي ڪرين يهوديه ملڪ موئين ريا
واڙون وشواسي پايون هارو اِمڌا ميلنه. 30) ان اُوئي همروم ڪريو، ان پسته
برنباس ان سائول ري هاڻي يروشلم شهر موئين وشواسي منڌري رون آڳيوونون
ڪن اِمڌا ميلئي.


وشواسيون مانھ وڙي ظلم ٿئھ

12 ① اُوئا وڪت موئين هيروديس پادشا وشواسي منڌري رون ڪئينڪ منڪون
ننه تنگ ڪروا شروع ڪريا، ② ان يوحنا را پائي يعقوب ننه موت رئي
سزا ڏين تروٽار ٿي مرايو پرو. ③ زئيون اُوئه زويو جي يهودي قوم را منڪ ايٺا
وات مانھ ڪُش ٿياھ، تو اُوئه پطرس ننه پڻ زهلايو. او پاشڪا پرپ رو هفتو هتو،
جيا ننه روتيون رئي پرپ ڪئھ. ④ تيام، هيروديس پادشا پطرس ننه زهلاوين
اُوئا ننه جيل موئين پورايو، ان چار چار ڦوجيون را چار ٽولا لين وارا وارا ٿي اُوئا
مانھ پاهرو ڏيوراو، زم پاشڪا پرپ را هفتا ڪيڙ او پطرس ننه جيل ٿي ڪاڊين
اسرائيلي قوم هومو اُوئا ننه موت رئي سزا ڏيڏا رو ڦينصلو ڪرئ.

⑤ جيل موئين پطرس مانھ پاهرو ويتوت ريو، پڻ وشواسي منڌري را منڪ
پورا من ٿي اُوئا هارو پڳوون ٿي پراٽنا ڪرتات ريا.

آکاشي دُوت پطرس نڌ جيل ٿي بارو ڪاڍه

⑥ زئيون هيروديس پاڌشا پطرس نڌ منڪون هومو اوڻيا واڙو هتو، تو اُوڻه ئي رات پطرس بيئون قوچيون وسا هٽڪڙي لاڳل اُونگهال پڙيو تو. هيڪ هاٿ هيڪا قوچي را هاٿ پيڙو ٻونڌل هتو، ان پيڙو هاٿ پيڙا قوچي را هاٿ پيڙو ٻونڌل هتو. ان پيڙا قوچي جيل رون ڌروazon مانھ پاهرو ڏيتا ريا.



⑦ اوچتو ايشور رو هيڪ آکاشي دُوت آوين اُپيو، ان اُوڻا ڪمرا موئين سوجهرو ٿيو. اُوڻه پطرس نڌ ڪوام زهالين زڳاڙيو، ان ڪيڏو: ”جلدي اُوڻ!“ ان هٽڪڙي اُوڻا رون هاٿون ٿي آڦوڪي کلي

گهي. ⑧ پسڻه آکاشي دُوت اُوڻا نڌ ڪيڏو: ”تیار تڻه ان آڀرا زوڙا پير!“ تو اُوڻه همروم ڪريو. پسڻه دُوت اُوڻا نڌ وڙي ڪيڏو: ”آڀرو تونال اوڍين مُون وونهڙ هال!“ ⑨ تو پطرس اُوڻا ڪمرا ٿي نيهرين دُوت وونهڙ وُڍو پرو، پڻ اُوڻا نڌ ڪهر ئي نه پڙئي جي جئين ڪئين دُوت را طرف ٿي تڻه ريو اُو هاس ۾ تڻه ريو. اُو سوچتو تو جي ”آکاشي دُوت شينا را زم ڏيڪاڙو ڏنھ ريو.“ ⑩ اُو پيرهئين ان پيڙئي سوڪئي مٽي گيا ان جيل را موتا لوهي دروازا مانھ آوين پوگيا، جيو شهر هومو کُله. اُو دروازو آڦوڪو کلي گيو. پسڻه اُو اُوڻون نيهرين هيڪ شيرئي مٽي گيا، ان تئيون اوچتو دُوت اُوڻا ڪن ٿي گيو پرو.

⑪ تئيون پطرس نڌ ڪهر پڙي گهي جي اي شينو نٿي، ان اُوڻه ڪيڏو: ”هَوڻه مُون نڌ ڪهر سڻه جي هاس ۾ ايشور آڀرو دُوت ميلين مُون نڌ هيروديس پاڌشا را قَوضا ٿي سڏايوه، ان مُون نڌ اُوڻا موت ٿي پچايوه، جيا رئي اُميد يهودي قوم ري منڪي راڪئي تئي.“

⑫ زئيون پطرس ايٺا وات نٿه هڙمي ڳيو، تو اُو يوحنا ري مان مريم ري گهري ڳيو، جيا يوحنا نٿه مرقس پڻ ڪئھ. اُوئھ گھڻا منڪ پيڙا ٿين پطرس هارو پراڻا ڪرتات ريا. ⑬ زئيون پطرس ٻارليو دروازو وڳاڙيو، تو رُڌي نومي هيڪ نوڪروٿئي دروازا مانھ آئي. ⑭ اُو پطرس رو ھاڏ اوڙڪين اتي ڪُش ٿئي جي اُوئا نٿه دروازو ڪوليا رئي وات ويھري ڳئي، ان ڊوڙي زائين گھر موئين ھمپڙايو جي ”پطرس دروازا مانھ اُپوھ.“ ⑮ پڻ اُوئي نوڪروٿي نٿه ڪيڏو: ”ئون تو ڳونڌئي سئھ.“ توئي اُو گھڻا زور ٿي ڪيٿيٿ رئي جي وات ھاسئي سئھ. پڻ اُوئي ڪيڏو: ”نا، نا، پطرس رئي ھمپڙ ڪريا وازو ڏوت ھوشي.“

⑯ پڻ پطرس ھزون ھوڏي دروازو وڳاڙتوت ريو. نيٺ اُوئي دروازو اُوگھاڙيو، ان پطرس نٿه ڏيڪين ھيرون ٿي ڳيا. ⑰ پطرس اُوئون نٿه ھاٿ را اِشارا ٿي ڪيڏو جي ماٺ ڪرئھ ان اُوئون نٿه ھمپڙايو جي پڙو اُوئا نٿه ڪم ڪرين جيل ٿي ٻارو ڪاڍيوھ. تيا ڪيڙ ڪيڏو: ”يعقوب ان ٻيڙون وشواسي پايون نٿه اي واتون ھمپڙاويا پري!“ ان پستھ پطرس اُوئون نيھرين ٻيڙيل ڳيو پڙو.

⑱ ھوار ٿيو، تو ڦوڄي پيڪ موئين ايل اول ڊوڙوا مڌيا جي ”پطرس نٿه ڪي ٿيوھ؟“ ⑲ زئيون ھيروڊيس پاڌشا پطرس نٿه تيڙايو، تو اُو نه زڙيو. پستھ اُوئھ پاھرو ڏيڏا وازون ٿي پونس ڪرين اُوئون نٿه موت رئي سزا ڏيڏا هارو لي زايا رو ڪيڏو.

ھيروڊيس پاڌشا رو موت

تيا ڪيڙ ھيروڊيس پاڌشا يھوديون را علاقا ٿي نيھرين قيصر ھ شهر موئين زائين ڪئينڪ وڪت ريو.

⑳ ھوئھ ھيروڊيس پاڌشا صُور ان صيدا شھرون رون منڪون ٿي گھڻو رينھال ھتو. اُو ٻڌائي پيڙا ٿين پاڌشا ڪن آيا. مور ٿي اُوئي ھيڪا بلسٽس نومي منڪ نٿه آپرئھ پاھئھ ڪريو، جيو پاڌشا را مولات مانھ ھتو، ان پستھ اُوئي پاڌشا نٿه

مناووا کریو، کم تو اوتون رو ملک کاڌو ویساتو لیڌا هارو پادشا را ملک رو موٽاڳ هتو.

②1 هیرو دیس پادشا را بوندل ڏي مانھ او آپرا پاڌشائون را اونچا لوگهٽا پیرین ڦینصلا ري گهاڌي مانھ پینو، ان اوتون ٻڌون هومو تقریر کروا مڌیو. ②2 تئیون ٻڌائي منک هیرو دیس پادشا را امر نعره هتو لاڳیا جي ”اي منک نٿي، ڏیو ٻولھ ریو!“ ②3 اوتھ ئي توتھ ایشور رٿه هیڪنه آکاشي ڏوت اوتا نٿه پیمار کریو پرو، کم تو اوتھ آپ نٿه ڀڳوون جیوو هزمین منکون نٿه آپرا هیوا وکوٽ کروا ڏیڌا. اوتا را پیت موئین کیڙا پڙیا، ان او مري گیو.


②4 ایشور رو وچن پکڙتو گیو ان گهٽا منک وشواسي ٿیتا گیا. ②5 برنباس ان سائول، اِمڌا ڏیڌا رو کوم پورو کرین، یروشلم شهر ٿي پاسا انطاکیه شهر موئین آیا، ان یوحنا نٿه پیڙو تیڙي آیا، جیا نٿه مرقس پڻ ڪٺه.


پولوس رو ايسو را پارام همپڙایا هارو پیرهئون چکر

پوٽر آتما برنباس ان سائول نٿه آپرا کوم مانھ سونڊین میله

13 ① انطاکیه شهر ري وشواسي منڌري موئین ڀڳوون رو نیاپو ڏیڌا واڙا ان شیکاڙیا واڙا اي هتا: برنباس، شمعون جیا نٿه کاڙو کیتا، لوکیس کُرنی شهر واڙو، مناهیم جیو صویا مانھ راز کریا واڙا هیرو دیس پیڙو موٽو ٿیو تو، ان سائول. ② زئیون او پریو رٿي شیوا ڪرتات ریا ان ورت راکتات ریا، تو پوٽر آتما اوتون نٿه کیڌو: ”مون هارو برنباس ان سائول نٿه ایٿا کوم مانھ راکو، جیا هارو مئین اوتون نٿه سونڊیاھ.“ ③ تئیون اوئي ورت راکٽي ان پراٿنا ڪرئي، ان پستھ اوتون مانھ هات میلین اوتون هارو آشیرواڌ مونگیو ان اوتون نٿه پریو ايسو را پارام همپڙایا هارو روونا کریا پرا.

پولوس رو پیرھئون چکر





برنباس ان سائول کپرس بیت موئين هیکا جانو کریا وازا ننه یگوون را پاها تي سزا دئه

④ پسته برنباس ان سائول، پویتر آتما را کیدا تي زائین سموند را کپ مانه سلوکیه شهر موئين گيا، ان اوئون پیژا موئين سزین کپرس بیت هوما زوونا تيا.

⑤ کپرس بیت را سلمیس شهر موئين پوگین یهودیون رون مندرن موئين زائین یگوون رو وچن همپزاوا لاگیا. یوحنا مرقس اوئون پیژو مدت کریا هارو هتو.

⑥ اوئون بیت رنه پیژنه کپ متین پافس شهر موئين پوگیا. اوئنه اوئون ننه هیک یهودی قوم رو منک پیژو تيو جیو جادو رو کوم کرتو ان کوژ کرین آپ ننه یگوون رو نیاپو دیدا وازو کیوراوتو. اوئا رو نوم بریسوع هتو، ⑦ ان او بیت مانه راز کریا وازا رو دوست هتو.

راز کریا وازا رو نوم سرگیس پولوس هتو ان او عقل وازو منک هتو. اوئنه برنباس ان سائول ننه آپ کن تیژایا، زم اوئون تي یگوون رو وچن هومپژنه.

⑧ پښ جادو کریا وازو، جیا ننه الیماس پښ کیتا، اوئون رنه کلاق تيو. الیماس نوم رو مطلب سه جادو کریا وازو. او کوشش کرتو تو جی راز کریا وازو ایسو مانه وشواس نه اوئنه. ⑨ تئین سائول، جیا رو پیژو نوم پولوس هتو، پویتر آتما تي پرائین جادو کریا وازا هومو دیون تي زوئین کیدو: ⑩ "تارا من موئين روگيئي نگیي ان چالاکیي سه. تون شیطون رو منک سه، ان هر نائوکا کوم رو دشمن سه. تون ایشور ری هاسی واتون همیش کوژي کیتو ریه، کي؟

⑪ هَوْنه ايشور تون ننه سزا دئه. تون اوندو ٿي زائيه، ان ڪئينڪ وڪت هَوْدِي ڪئين نئين ڏيڪنه. "ان جهت موئين جادو ڪريا وازا ريون اونڪيون ۾ دُنڌڪار ان انداري آوي گهي. او ايل اول هاتون ٿي قونقا ماروا مڏيو، زم اوتا ننه پادين تيڙي زايا وازو زڙه.

⑫ تئين بيت مانھ راز ڪريا وازنه اي ڏيڪين وشواس اوٿيو، ڪم تو او پڙو ايسو را پارام شيڪاڙل واتون مانھ حيرون هتو.

گلتيه صويا را انطاڪيه شهر موئين پولوس شيڪاڙه جي ايسو پچايا وازو ڪريست سئ

⑬ پسنه پولوس ان اوتا را ساڻي پافس شهر ٿي پيڙا مانھ سڙين سمونڊ رنه پيڙه ڪپ اوترين پمفوليه صويا را پرگه شهر موئين آيا. اوتنه يوجنا مرقس اوئون ننه ساڏين اوئون پاسو يروشلم شهر گيو پرو. ⑭ پن او پرگه شهر ٿي



نيهرين پسديه علاقا را انطاڪيه شهر موئين پوگيا، ان پويتر ڏي را يهوديون را مندر موئين زائين پنا. ⑮ زئين مندر ۾ منڪي موسي رون لڪل حڪمون ان

پگيون رو نياپو ڏيڏا وازون را لڪل شاستر ٿي واتون پئين همپڙوي، تئين مندر ري آگيون پولي پولوس ان برنباس ننه ام ڪي ميليو: "جي تم آپتون منڪون ننه حوصلو ڏيڏا هارو ڪئينڪ وات همپڙاوا ڪرو، تو پلنه همپڙاوو."


⑯ پسنه پولوس اوئين هات ٿي اشارو ڪرين ڪيڏو: "او اسرائيلي منڪون، ان ڌاري قوم وازون، تم جي پگيون مانھ يقين راکوه، ڌيون ٿي هومپڙو! ⑰ آپتي اسرائيلي قوم رنه پگيون آپتون ڏاڏون ننه سونڊيا. ان زئين آپتي قوم مصر ملڪ موئين پرڏيشي هتي، تو ايئا ننه هيڪ موٽي قوم ناوٽي، ان آپري گهڻي ڪڙا ٿي ايئا ننه آزاد ڪراوين اوئون ٻارئي ڪاڍي. ⑱ ان چاليهونڪ

سالون هُوڊي رڻ موئين اُوئون ري ٻڌي واتون سهتو ريو. (19) ان ڪنعان ملڪ موئين اُوٽ ريون هات قومون ننه ڪٽه ڪرين اُوئون رو ملڪ آڀڻي قوم ننه آڀرا وائڏا پرموئنه ڏيڏو. (20) هائي ٻڌي واتون ٿيتون هُوڊي هاڏا چارڪ هو سال ٿي ڳيا.

تيا ڪيڙ ڀڳوون رو نياپو ڏيڏا واڙا سيموئيل را وڪت هُوڊي ڀڳوون ڦينصلو ڪريا واڙا آڳيوون راڪيا. (21) پسڻه سيموئيل را وڪت موئين آڀڻي قوم ري منڪي آپ هارو پاڌشا مونڳيو، ان ڀڳوون سائول ننه سُونڊيو، جيو بنيامين ري ذات ٿي ڦيس رو ڏيڪرو هتو، ان اُوئون مانھ چاليهون سالون هارو پاڌشا راڪيو. (22) تيا ڪيڙ ڀڳوون سائول ننه پاڌشائي ٿي نيسو اوتاريو ان اُوئون هارو داؤد ننه پاڌشا نايو، جيا را پارام ڀڳوون آپ ڪيڏو تو: 'يسي رو ڏيڪرو داؤد ايو منڪ سڻه جي مُون ننه گهڻو ناٿوڪو لاڳهه. اُو مارئي ٻڌي مرضي پوري ڪري.' (23) اوتا ري پيڊي ٿي ڀڳوون آڀرا وائڏا پرموئنه ايسو ننه پچايا واڙو ناوين اسرائيلي قوم ڪن ميلو. (24) ايتا را آيا ٿي مور يوحنا پوري اسرائيلي قوم ننه همپڙايو جي اُو آڀرا ڪراپ ڪوم ساڏين توبونه ڪرڻه ان ڀڳوون ري وات مانھ وڻه، ان پويتر سنون لڻه. (25) زئيون يوحنا آڀرو ڪوم پورو ڪريا واڙو هتو، تو اُو ڪيو مڏيو جي 'تمي مُون ننه ڪي هزموه؟ هُون اُو پچايا واڙو نٿي جيا رئي تمي وات زوئوه ريا. پڻ زوئو، اُو مُون ڪيڙ آيا واڙو سڻه، جيا رون زوڙون را ڪشا ڪوليا جيو پڻ هُون نٿي.'

(26) او پايون، ابراهيم رون پوترون، ان ڀڳوون مانھ يقين راڪيا واڙون ڌاري قوم رون منڪون، هائي پچايا را پارام نياپو ڀڳوون آڀون ننه ڏيڏوه. (27) وات ام سڻه، يروشلم شهر ري منڪي ان اُوئون ري آڳيووني ايسو ننه نه اوڙڪيو جي اُو ڀڳوون رو سونڊل پچايا واڙو ڪريست سڻه، ان نڪو ڀڳوون رو نياپو ڏيڏا واڙون ري واتون هزمي، جي هر پويتر ڏي مانھ همپڙاوڻه. تيام اوئي ايسو ننه موت رئي سزا ڏيوراوين هائي شاستر ري واتون پوري ڪري. (28) اُوئون ڪن

ايسو ننه موت رڻي سزا ڏيورايا جيويي ڪئين وات نٿي، توڻي پڻ اُوڻي راز ڪريا وازا پيلاطس ٿي اُوڻا ننه نمو ماريا رڻي منٿ ڪري. (29) زئيون جئين ڪئين ايسو را پارام شاستر موئين لڪل هتو، اُو اُوڻي پورو ڪريو،



تو اُوڻا ننه هُوڙي ٿي اوتارين پونئيرا جيوا مقوم موئين راڪيو.

(30) پڻ پڳوون اُوڻا ننه مرلون موئين ٿي جيوي اوناڙيو، (31) ان

اُو گهڻون ڏيئون هُوڙي اُوڻون ننه ڏيکارا ڏيتو ريو، جيا اُوڻا

پيڙا گليل صوبا ٿي يروشلم شهر موئين آيا تا. ان همئنه اُو

منڪ آڀئي اسرائيلي قوم هوما اُوڻا رڻي هاڪ پريا وازا سئ. (32) ان امي هايا

آپتون ڏاڏون ٿي ڪرل پڳوون را وائڏا را پارام تمون ننه اي ڪشي رڻي ڪهر

همپراوونھ (33) جي پڳوون ايسو ننه جيوي اوناڙيوھ، ان هيون نمونھ آپون هارو،

جيا اُوڻون را اولاد سون، هائي وائڏو پورو ڪريوھ.

پڳوون اڳي ڪيڏو تو جي اُو آپرا ڏيڪرا ننه جيوي اوناڙشي، زم پزنون را

شاستر زبور را پيڙا پزن ۾ لڪل سئ:

’تون مارو ڏيڪرو سئ.

آز مئين وات ساوڻي ڪرين ڏيڪارئيھ جي هون ٿارو ٻاپ سون.

(34) ان پڳوون اي پڻ ڪيڏو تو جي ايسو ننه مرلون موئين ٿي جيوي اوناڙيا ٿي

آپون ننه آشپرواڏ زڙشي، زم شاستر ۾ لڪل سئ:

’هون آپرا دائود ٿي ڪرل وائڏا تمون هارو پورا ڪريھ،

ان آپرا وائڏا ڪرل پويتر ان هاسا آشپرواڏ تمون ننه ڏيھ.

(35) ان دائود پڻ هاڳي وات ڪري تئي جي پڳوون ايسو ننه جيوي اوناڙشي ان

اُوڻا رو لاش مقوم موئين هڙوا نئين ڏئ، زم شاستر را هيڪا پيڙا پزن ۾ لڪل سئ:

’تمي آپرا پويتر شيواڌاري ننه مقوم موئين هڙوا نئين ڏيو.

(36) هونھ وات ساوڻي سئ جي دائود آپرا پارام نئين، پڻ ايسو را پارام هم

ڪيڏو، ڪم تو دائود آپرا وڪت موئين پڳوون ري مرضي مانھ وين مري ڳيو،

ان آپرون ٻاپ ڏاڏون پيڙو ٿيو، ان او مقوم موئين هڙي گيو. (37) پڻ ايسو جيا ننه پگهون موت ٿي جيوي اوناڙيوه، او تو نه هڙيو.

(38) تيام، پايون، تمي هزمي ليو جي ايسو ري ڪري تمون ننه ڏوهون ري ماقبي رئي ڪبر زڙهه، (39) ان هر او منڪ جيو ايسو مانه وشواس راکهه، اونا ننه ٻتون ڏوهون رئي ماقبي زڙهه، جيون ڏوهون رئي موسيٰ رون لڪل حڪمون مانه وودا ٿي ماقبي نئي زڙي هيڪتي. (40) تيام هوشيار ٿيو. اينا وات مانه تمي نئولي مت ڪريا، پڻ اينا مانه يقين راکو. ام نه ٿنه جي پگهون رئي اي وات، جي پگهون رو نياپو ڏيڏا وازون را شاستر موئين لڪل سئ، تمون مانه هاسي ٿنه!

(41) نئولي ڪريا وازون، زوئو، حيرون ٿيو، ان مري زائو!

ڪم تو هون تمارا ٿي وڪت موئين هيڪ ايوو ڪوم ڪرونه،

جيا را پارام جي منڪ تمون ننه همپزاوشي،

توئي پڻ تمي يقين نئين ڪرو.

(42) پولوس هم ڪين برنباس پيڙو پگهون را مندر ٿي ٻارو نيهريو، ان اوئه ٿوئه منڪي اوئون ٿي منٿ ڪري جي ”آزوکا پويتر ڏي مانه پڻ امون ننه هيوي واتون همپزاويا.“ (43) زئون پگهتي ڪم ٿئي، تو گهئا يهودي ان ڌاري قوم وازا پڻ جيا پگهون مانه يقين راکين يهودي ڌرم موئين آيا تا، پولوس ان برنباس وونهز وودا. اوئي هايون منڪون ٿي واتون ڪري ان هيٺ راکيا رو ڪيڏو جي ”پگهون تمون مانه ڪريا ڪريه، تو اينا مانه يقين راکتا ريو.“

انطاڪي شهر ٿي پولوس ان برنباس ننه ٻارا ڪاڏهه

(44) پيڙا پويتر ڏي مانه اندازام پورا شهر را منڪ ايشور رو وچن هومپزا پيڙا

ٿيا. (45) ٿيون يهودي اتون گهئون منڪون ننه ڏيڪين گهئا ريشي پڙيا، ان پولوس

ريون واتون رنه ڪلاڻ ان اونا ٿي پونڌو ٻولوا مڌيا. (46) پڻ پولوس ان برنباس

هيمنت ٿي ڪيا مڏيا: ”اي وات ضروري هئتي جي امي مور ٿي تمون يهوديون
ننه پڳيون رو وڃن همپڙا وون. پڻ تمي ايٿا ننه نٿي مونت، ان آپ ننه هميش رو
جيون ليڏا جيوا نٿي ٺاوتا، تو هوننه تمون ننه ساڏين امي ڌاريون قومون ڪن
زائوننه. (47) ڪم تو ايشور امون ننه هر هيڪ ننه اي حڪم ڏيڏوه:

’مئين تون ننه ڌاريون قومون هارو سوجهرو ڪرين راکيهو،

زم پوري ڏنيا رون منڪون ننه ٿاري ڪري تارڻ زرڻه.“

(48) هائي وات همپڙين ڌاري قوم را منڪ گهڻا ڪش ٿيا، ان ايشور را وڃن
را وڪوڻ ڪروا لاڳيا. ان زتون ننه پڳيون هميش رو جيون ليڏا هارو سونديا تا،
او ايسو مانه وشواس لي آيا.

(49) اوٿا ٻڌا علاقا موئين ايشور رو وڃن پڪڙتو ريو. (50) پڻ يهوديئي اوٿا
شهر ريون مون واريون اشيٽريون ننه، جي پڳيون مانه يقين راکتي، ان شهر
رون آڳيوونون ننه پڻ ڪلاڦ پريا، ان اوئي پولوس ان برنباس ننه تنگ ڪراوين
اوٿا علاقا ٿي ٻارا ڪڍايا پرا. (51) تنيون پولوس ان برنباس اوٿون ٿي واسطو

ڪتم ڪرين آپرون پڳون رئي ڏوڙ اوٿون
هومئي ڪيرئي ان اڪنيئم شهر هوما وودا
پرا. (52) پڻ اوٿ را انطاڪيه شهر را
وشواسي گهڻا ڪش ريتا ان پويتر آتما
ٿي پرا ل ريتا.



اڪنيئم شهر موئين منڪ پولوس ان برنباس ننه ماري نوڪوا ڪرڻه

14 (1) اڪنيئم شهر موئين پڻ همروم ٿيو. پولوس ان برنباس يهوديون را
مندر موئين ڳيا ان ايوي واتون همپڙاي جي يهودي قوم را ان پزيون
ڌاريون قومون را پڻ گهڻا منڪ وشواسي ٿي ڳيا. (2) پڻ جيئي يهوديئي وشواس
نه اوٿيو، اوئي ڌاري قوم وازون ننه جونش ڏيوراوين وشواسيون رنه ڪلاڦ ڪريا.

③ پولوس ان برنباس اوتته گهڻو وڪت ریا ان هیمت ٿی پریو ايسو را پارام واتون همپڙاوتا ریا. ان پریو اوتون ري هاڻي منڪون ننه هازا هورا ڪرين نيشون ان پرسا ڏيکاريا، ان هیوئه نمونئه اوتھ ٿاپتي ڏيڏي جي اوتا ري ڪرپا رو وچن هاسو سئ. ④ شهر رن منڪون ري بي پالتي ٿي گهي، ڪئينڪ يهوديون رنه پاهنه ٿيا، ان ڪئينڪ مُک شیلون رنه پاهنه ٿيا.

⑤ تئيون ڌاري قوم ري منڪي ان يهوديئي آپرون آگيئونون پيڙا تين پولوس ان برنباس رئي پيعزتي ڪريا رو ان پوٽا هٿين نمو ماریا رو ڦينصلو ڪريو.

⑥ زئيون پولوس ان برنباس ننه هيا وات رئي کهر پڙي گهي، تو او اوتون پاگين لڪائيه علاقا موئين گيا. اوتته لستره ان دربي شهرون موئين ان آهه پاهنه زاتا، ⑦ ان ايسو را پارام ڪشي رئي کهر همپڙاوتا ریا.



لستره شهر موئين پولوس ننه ماریا هارو پوٽا هٿه

⑧ لستره شهر موئين هڪ منڪ هتو، جيو زايو زلميو رُونگڙو هتو، ان ڪيڏي نتو وويدو. ⑨ او پينو پولوس ري واتون هومپڙوت ريو. پولوس اوتا ننه ڏيون ٿي زويو، تو اوتا ننه کهر پڙي جي ايٿا منڪ موئين هازو هورو ٿيا رو يقين سئ، ⑩ ان اوتھ زور ٿي رُونگڙا ننه ڪيڏو: ”آپرون پگون مانھ سڌو تين اوپ!“ تو رُونگڙو نينڪڙو مارين اوئيو، ان ويوا مڏيو.

⑪ ٻڌي منڪي پولوس رو اي کوم ڏيڪين آپري لڪائيه ٻولي موئين زور ٿي ڪيڏو: ”منڪون را روپ موئين آپون ڪن ڏيو آياھ را.“ ⑫ اوتھي منڪي برنباس ننه آپرون ڏيون رو آگيون هزمين زيوس ڪيڏو، ان پولوس ننه نياپو ڏيڏا واڙو ڏيو هزمين هرميس ڪيڏو، ڪم تو پولوس برنباس ٿي وڌارن ٻولتوت ريو. ⑬ پسئ او پوزاري جيو زيوس ڏيو ري پوزا رو کوم ڪرتو، جيا ڏيو



رو مندر شهر ٿي ٻارو هتو، اُو آکا ڊڳا
ان ڦولڙون را هار شهر را دروازا مانه
لي آوين منڪون پيڙو مڪ شيلون را نوم
مانه ساڙوا ڪرتو تو.

⑭ زئيون مڪ شيلي پولوس ان
برنباس ايٺا وات را پارام هومپڙيو، تو
اوتون ننه ايوو ڏک ٿيو جي اوتئي آپرا
لوگهڙا ڦاڙيا ان منڪون وسا ڊوڙي زائين

زور زور ٿي ڪيو مڏيا جي ⑮ ”پايون، اي تمي ڪي ڪروھ ريا؟ امي ڏيو نٿي،
پڻ تمون جيو منڪ سون. ان امي اي ڪشي ربي ڪبر تمون ننه تيام همپڙاونھ
ريا، زم تمي ڏيون ننه پوزيا ري اي ڪوڙي واتون ساڏين جيوتا پگھون مانھ
وشواس اوٿو، جيئنه آڪاش، زمئي، سمونڊ ان جئين ڪئين ايئون موئين سئھ،
ٻڌوئي ڪئين نايوھ. ⑯ پگھون اگھوڪون زمونون موئين ڌاريون قومون ننه آپرا
آپرا شيرڙا مانھ ويوا ڏيتي. ⑰ توئي پڻ اُو هميش ٿي آپرا پارام ھاڪ پرتو
رئھ، ڪم تو اُو منڪون ٿي پلائي ڪرئھ، آپون ھارو آڪاش ٿي مي ورھاوئھ،
آپئي پوک ھارو مڏون ڏئھ، ان آپون ننه کاڌا ٿي ڊپڙاوين من موئين ڪشي
ڏئھ.“ ⑱ اي واتون ڪين اوتئي مس مس منڪون ننه آپرا نوم مانھ مال سڙايا
ٿي روڪيا.

⑲ پسئھ ڪئينڪ يھودي انطاڪيھ ان اڪنيم شھرون ٿي آيا، ان منڪون ننه
آپرئھ پاھئھ ڪرين پولوس ننه پوٽا هئين ماريو ان مرل ھزمين اوتئا ننه ڊيھڙين
شھر ٿي ٻارو لي زائين ڍلو ڪريو. ⑳ پڻ زئيون وشواسي آوين اوتئا رئھ چوڌاري
اوپا، تو اُو اوتيو ان پاسو شھر موئين گيو. پيڙھ ڏي پولوس ان برنباس اوتون
دربي شھر ھوما گيا پرا.

پولوس ان برنباس دربی شهر ٿي پاسا آبرا انطاکیه شهر ۾ زائھ

②۱ پولوس ان برنباس دربی شهر موئن کُشی رُی کبر همپزاوئی ان گهٿا منک
وشواسی ٿي گیا. پسٺه او لُستره، اِکُنیم



ان انطاکیه شهرن موئن وڙي پاسا
آیا را، ②۲ ان شهر شهر موئن ٿیتون او

وشواسیون نٺه هیمت ڏیتا، ان حوصلو

ڏیتا جي "وشواس ۾ پکا ريو"، ان اي شیکاڙتا جي "آپون نٺه ڀڳوون را راز

موئن زایا هارو گهٿي تکلپون سهو پڙشي." ②۳ ان اوئي هر هیڪ وشواسی

مندڙي موئن اوئون هارو کینک آڳیوون راکیا، ان ورت راکین وشواسیون هارو

پراتنا کڙي ان اوئون نٺه پرپو ري همپاز موئن ڏیتا، جیا مانھ اوئي وشواس

اوئو تو.

②۴ پسٺه پولوس ان برنباس اوئا پسیدیہ علاقا ٿي نیهرین پمفولیہ علاقا موئن



آیا. ②۵ ان اوئا علاقا را پرگه شهر موئن

ڀڳوون رو وچن همپزاوین سمونڊ را کپ

مانھ اتلیہ شهر موئن آیا. ②۶ اوئون

پیڙا مانھ سڙین آبرا انطاکیه شهر هوما

پاسا رَوونا ٿیا، جیٺه وشواسیئي اوئون نٺه ڀڳوون ري همپاز موئن ڏیتا تا،

زم ڀڳوون اوئون نٺه اي کوم کریا رُی کُریا ڏٺه، جیو کوم او همٺه پورو

کڙین آیاھ.

②۷ اوٺه پوگین اوئي وشواسیون نٺه پیڙا کریا، ان اوئون نٺه همپزایو جي

ڀڳوون اوئون ٿي کیوا کیوا کوم کرایاھ، ان ڌاریون قومون هارو وشواس

اوٺیا رو ڌر اوگھاڙیوھ. ②۸ ان اوٺه او گهٿا ڏي وشواسیون پیڙا ریا.

يرُوشلم موئين ڌاري قُوم وازون هارُو وشواسي پنچائيت پيڙئي تته

15 ① پسنه يهُودي قُوم را ڪئينڪ وشواسي يهُوديه صُوپا ٿي انطاڪيه شهر موئين آيا، ان ڌاري قُوم رون وشواسي پايون نئه ام شيڪاڙوا لاڳيا: ”جي مُوسي رون لڪل حُڪمون پرموئنه تمارئي توهر نئين تته، تو تمون نئه تارن زڙي نئين هيڪنه.“ ② تتيون پولُوس ان برنباس اُوئون منڪون ٿي هايا وات مانه گهڻا وڙڳوئا ان اُوئون ٿي گهڻي پحت ٿي. تيام وشواسي منڌڙي ري منڪي آپ موئين ٿي پولُوس، برنباس ان پيزا ڪئينڪ منڪ سُونديا، زم ايئا وات هارُو يرُوشلم شهر موئين زائين مڪ شيلون ان اوت ري منڌڙي رون آڳيوونون ڪن ڦينصلو ڪراوئه.

③ پسنه انطاڪيه شهر ري وشواسي منڌڙي ري منڪي اُوئون نئه رَوونا ڪريا، ان اُو فينيڪي ان سامريه علاقون ٿي متتون اوت رون وشواسي پايون نئه ڌاريون قُومون رئه وشواس اوڻيا را پارام همپڙاوتا، ان اُو ٻڌائي هومپڙين گهڻا ڪُش ٿيتا. ④ زتيون يرُوشلم شهر موئين پُوڳيا، تو وشواسي منڌڙي را منڪ، مڪ شيلا ان پيزا آڳيوون اُوئون ٿي ڪُشي هُون مڙيا. پسنه پولُوس ان برنباس اُوئون نئه همپڙايو جي پڳوون اُوئون ٿي ڪيا ڪيا ڪوم ڪرايا. ⑤ پڻ فريسي پالتي ٿي جيا منڪ وشواسي ٿيا تا، اُوئون موئين ٿي ڪئينڪ منڪ اُوئين ڪيا مڌيا جي ”اُو ڌاري قُوم وازا جي وشواسي ٿي ڳياها، اُوئون رئه توهر ڪراوو ڪپنه ان اُوئون نئه مُوسي رون لڪل حُڪمون مانه وُڍا رو ڪيوو ڪپنه.“

⑥ پسنه مڪ شيلا ان وشواسي منڌڙي را آڳيوون ايئا وات مانه ڦينصلو ڪريا هارُو پيزا ٿيا. ⑦ گهڻي پحت ڪيڙ، شمعُون پطرس اُوئين اُوئون نئه ڪيڌو: ”پريمي پايون، تمون نئه ڪهر سئه گهڻا ڏي ٿيا پڳوون آپون موئين ٿي مُون نئه سُونديو تو زم هُون ڌاري قُوم رون منڪون نئه ايسُو را پارام همپڙاوون، ان

مُون ٿي ڪُشي رڻي ڪهر هومپڙين ڌاري ڦوم ري منڪي وشواس اوڻيو تو. ⑧ ان پڳوون، جيو منڪون رون منون نئه اوڙڪنه، اوئون نئه آڀا زم پوٽر آتما ڏيڏا ٿي اوئون نئه قبول ڪريا رڻي هاڪ پرڻي. ⑨ اوئون را وشواس ري ڪري پڳوون اوئون را من پوٽر ڪرين آپون يهوديون ان اوئون ڌاري ڦوم واڙون وسا ڪئين قرق نه راڪيو. ⑩ هوئه تمڻي ايئا وات ۾ پڳوون نئه ڪم آزماوه ريا؟ تمڻي موسيٰ رون لڪل ٻڌون حڪمون مانھ وُڍا رو ڪين وشواسيون مانھ ايوو پار ڪم نوڪوا ڪروه ريا، جيا نئه نڪو آڀا ٻاپ ڏاڏا اوپاڙي هيڪيا تا ان نڪو آڀي اوپاڙي هيڪتا تا؟ ⑪ آڀو يقين اي سئ، جي موسيٰ رون لڪل حڪمون مانھ وُڍا ٿي نئين، پڻ پريو ايسو ري ڪريا ٿي، آپون نئه، ڌاري ڦوم واڙون را زم، تارڻ زڙهه.

⑫ پسئ ٻڌائي منڪ ماڻ ڪري گيا، ان پولوس ان برنباس ري واتون هومپڙوا مڏيا، جي پڳوون اوئون ري هاڻي ڌاريون ڦومون موئين ڪيا ڪيا نيشون ان پرسا ڏيڪاڙيا.

⑬ زئيون او واتون ڪري ريا، تو يعقوب ڪيا مڏيو: ”پايون، مارڻي وات هومپڙو! ⑭ شمعون همئنه همپڙايو جي پڳوون مور ٿي ڪم ڪرين ڌاريون ڦومون مانھ ڏيون ڏيڏو زم اوئون موئين ٿي آڀرا سونڊل منڪ ٺاوه. ⑮ اي وات پڳوون رو نياپو ڏيڏا واري اڳي ڪيڏي ٿي، زم شاستر موئين لڪل سئ:

⑯ ايشور ام ڪه ريو:

آيا وازا وڪت ۾ هون وڙي پاسو آويه،

ان دائود ري پڙل پيڊي نئه وڙي همڻي ڪريه،

ان اوئا را پريآ ٿيل راز نئه

هون همو ڪرين ڏاڍو راڪيه،

⑰ زم پيڙا ٻڌائي منڪ،

ٻڌيون ڌاريون ڦومون را منڪ

جیا مارا منک کیورائھ،
اُو مُون کن آوئھ.

(18) ایشور هم کئھ ريو

جيئھ شروعات ٿي لين هائي واتون ساوي کريھ.

(19) تيام، پايون، مارو کيال اي سئھ، ڌاريون قومون ٿي جيا منک پڳوون
مانھ وشواس اوئھ، آبي اوئون نئھ موسي رون لکل ٻڌون حُڪمون مانھ وُڍا
رئي تڪليب نہ ڏيون. (20) پڻ اوئون نئھ ام لکين ميلون جي اُو اي حُڪم مونئھ، جيا



ٿي آبي يهودي اوئون ڌاري قوم وازون
ٿي واسطو راڪي هيڪون. اُو ڏيوٿونون
را نوم مانھ سڙاؤل مال نہ کائھ، پُونڌو
ڪوم نہ ڪرئھ، جيو مال ٽونپو ڏين مارل
هوئھ اُو نہ کائھ پڻ هلالل مال کائھ،
ان لوئي نہ کائھ. (21) هايون حُڪمون را
پارام ڌاري قوم وازون نئھ اڳي کبر
هوشي، ڪم تو زونا وڪت ٿي لين موسي
را لکل حُڪم هر شهر موئين همپراوئھ،
ان پڳوون رون منڌرون موئين هر پويتر
ڏي مانھ پئين همپراوئھ.

يروشلیم شهر را يهودي قوم را وشواسي
ڌاري قوم رون وشواسيون نئھ کت لکئھ

(22) پسئھ هائي وات موين مک شيلي، آڳيون، ان وشواسي منڌري ري ٻڌي
منکي اي قينصلو ڪريو جي ”آپون موئين ٿي ڪئينڪ منک سونديون جيا پولوس
ان برنباس پيرا انطاڪيه شهر زائھ.“ ان اوئي ٻي منک سونديا، جيون نئھ وشواسي

مونَ ڏيتا، هيڪ يهوداه جيا نئه برسبا پڻ ڪيتا، ان پيزو سيلاس. ②3 اُوئي اُوئون هات ام لڪينَ ڏي ميليو:



”امي مُڪ شيلان منڌڙي را آڳيوون، تمارا وشواسي پائي، تمون ڌاري قُوم رون وشواسي پايون ان پينون نئه نمسڪار ڪونه، جيا انطاڪيه شهر ان پُورا سوريه ان ڪليڪه صُوپا موئين ريوه.

②4 امي هومپزيوه جي امون ايت رون يهودي وشواسيون موئين ٿي ڪئينڪ منڪ تمون ڪن آيا، ان آپريون واتون ٿي تمون نئه ڳنڻتيون م نوڪياھ ان تمون نئه من موئين ڏڪ ڏيڏوه. امي اُوئون نئه نتا ميليا.

②5 تيام امي ٻڌي هيڪ من ٿين اي ڦينصلو ڪريو، جي ڪئينڪ سُونيل منڪون نئه آپئون پريمي پايون برنباس ان پولوس پيڙا تمون ڪن ميلون. برنباس ان پولوس ايوا منڪ سئه، ②6 جيئي آپرا جيو آڀا پريو ايسو ڪريست را نوم مانھ ڏيڏا هارو تيار راکياھ. ②7 تيام امي يهوداه ان سيلاس نئه ميلونھ ريا، جي اُو تمون نئه اماري لڪل واتون رُوپرو همپزاوئه.

②8 پويتر آتما ان امون نئه ٿيڪ لاڳيوھ جي تمون مانھ ايئون ضروري واتون شوا پيزو ڪئين پار نه نوڪون. ②9 تمي ڏيوئونا را نوم مانھ سڙاول مال مت ڪايا. لوئي مت ڪايا. جيو مال هلالل نه هوئه، پڻ ٿونپو ڏين مارل هوئه اُوئا نئه پڻ مت ڪايا. ان پُونڌو ڪوم مت ڪريا.

جي تمي هايون واتون ٿي آپ نئه پچاوين راکشو، تو تمي ٺاؤڪو ڪرشو. نمستي.”

③0 پسئه اُو رَوونا ٿيا ان انطاڪيه شهر موئين زائين پوگيا. ان اُوئنه پوگين ٻڌون وشواسيون نئه پيڙا ڪرين اُوئون نئه ڪت ڏيڏو پرو. ③1 ڪت پئين اُوئون نئه حونصلو ٿيو جي اُوئون رئه موسي رون لڪل ٻڌون حڪمون مانھ ويو ضروري نٿي، ان اُو گهڻا ڪُش ٿيا. ③2 يهوداه ان سيلاس، جيا آپ پڳوون رو

نياپو ڏيڏا وازا هتا، وشواسي پايون ننه گهڻي واتون هزماوين حوصلو ڏيڏو ان اوئون رو يقين پڪو ڪرايو. (33) اُو ڪئينڪ ڏي اوتنه ريا ان پسنه وشواسيئي اوئون ننه هڪي ريا رو ڪين رونا ڪريا، زم اُو پاسا يروشلم شهر ۾ آپرون منڪون ڪن زائنه جيئي اوئون ننه مليا تا. (34) پڻ سيلاس ننه اوتنه ريوو نائوڪو لاڳيو.


(35) پڻ پولوس ان برنباس انطاڪيه شهر موئين ريا، ان اُو ان پيزا گهڻا منڪ ايشور رو وچن شيڪاڙتا ان ڪشي رڻي ڪهر همپراوتا.

پولوس رو ايسنو را پارام همپزيا هارو پيزو چڪر

پولوس ان برنباس ڌار ڌار کوم ڪروا لاڳهه

(36) ڪئينڪ ڏيئون ڪيڙ پولوس برنباس ننه ڪيڏو: "جيون جيون شهرون موئين آبي ايشور رو وچن همپزياو تو، هالو، اوت رون وشواسي پايون ڪن هالين زوئون جي ڪم ڪرڻ ريا؟" (37) برنباس رڻي مرضي هڻي جي مرقس ننه پيزو تيڙي زائنه، جيا رو نوم اڳي يوحنا هتو. (38) پڻ پولوس ڪيڏو جي "جيو منڪ پمفوليه موئين آيون ننه ساڏين آيون رو، ان کوم مانه پيزو نتو هاليو، اوتا ننه ڪم ڪرين تيڙي هالون؟" (39) ايئا وات مانه ٻي آيت موئين اتا گهڻا وڙگوڻا جي اُو ڌار ڌار کوم ڪريا هارو ڌار ٿي ڳيا. برنباس مرقس ننه تيڙين پيڙا مانه سڙين ڪپرس پيٽ هومو روونو ٿي ڳيو. (40) پڻ پولوس سيلاس ننه آپ پيزو تيڙي زايا هارو سونڊيو. وشواسي پايي پولوس ننه ايشور ري همپياز موئين ڏيڏو ان پسنه اُو روونو ٿيو. (41) سوريه ان ڪليڪه علاقون ٿي متون اُو وشواسي منڌريون رون منڪون ننه وشواس موئين پڪا ڪرتو ڳيو.

پولوس رو پیزو چکر



ٽيمٽيس پولوس ان سيلاس پيڙو زائھ

16 ① پولوس ذربي شهر موئين گيو ان اوئون لستره شهر موئين زائين پوگيو. اوئھ هڪ وشواسي منڪ هتو، جيا رو نوم ٽيمٽيس هتو. اوئا ربي مان يهودي قوم ٿي هئي ان او وشواسي هئي، پڻ اوئا رو ٻاپ ڌاري قوم رو هتو. ② لستره ان اڪنيم شهرون را وشواسي ٽيمٽيس رو مون راکتا. ③ پولوس ربي مرضي هئي جي اوئا نھ آپ پيڙو ٿيڙي زائھ. تيام اوئھ يهوديون را ريت روز پرموئھ ٽيمٽيس ربي توهر ڪراوي، زم يهوديون نھ ڪراپ نه لاڳئھ، ڪم تو اوئا علاقا رون ٻڌون يهوديون نھ ڪر هئي جي اوئا رو ٻاپ ڌاري قوم رو هتو. ④ او شهرون موئين زاتون، جيا حڪم يروشلم موئين مڪ شيلي ان وشواسي منڌري ري آگيووني قينصلو ڪرين ڏيڏا تا، اوٽ رون وشواسيون نھ همپزواتا گيا ان اوئون مانھ وودا رو ڪيتا گيا. ⑤ هيونھ نمونھ وشواسي منڌري تاريخ وشواس ۾ پڪي ٿي ان وڌتي گي.

تروئاس شهر موئين پگئون پولوس نھ شينو ڏيکارڻھ

⑥ پولوس ان اوئا را ساٿي فروگيه ان گلتيه علاقا ٿي مٽي گيا، ڪم تو پويتر آتما اوئون نھ آسيه صويا موئين پگئون رو وچن همپزايا ٿي نا پاڙيو تو. ⑦ زئون او موسيه علاقا ڪن آيا، ٿيون اوئي ڪوشش ڪري جي بتونيه صويا موئين زائھ، پڻ ايسو رھ پويتر آتما اوئون نھ نه زاوا ڏيڏا. ⑧ ٿيون او موسيه علاقا ٿي مٿين سمونڊ را ڪپ مانھ تروئاس شهر موئين پوگيا. ⑨ اوئھ اوئھ رات پگئون پولوس نھ شينا را زم ڏيکاريو، جي مڪڏيه صويا رو هڪ منڪ اوپو ام منٽ ڪرين ڪئھ ريو جي ”سمونڊ پار ڪرين مڪڏيه موئين آوين اماري مدت ڪر.“ ⑩ زئون پولوس پگئون ربي هائي ڏيکارل وات ڏيکئي، تو امي جلدي م مڪڏيه صويا موئين زايا هارو سنپريا، ڪم تو امي هزمي گيا

جي پڳوون اُونئون ننه ڪشي رهي ڪهر همپڙيا هارو امون ننه تيراياء.

فِلِپي شهر موئين لڏي نومي ڏوشي وشواسي تڻه



11 تيام تروئاس شهر ٿي پيڙا مانھ سڙين


امي سڏا سمنڙاڪي ڀت موئين آيا. ان

پيڙه ڏي اُونئون وڙي نياپلس شهر موئين

آيا. 12 اوتنه پيڙا ٿي نيسا اوترين امي

مڪڏنيھ صويا را فِلِپي شهر موئين آيا، جيو اوتا علاقا رو ڪاس شهر سٺم، ان

رُوم ملڪ رون منڪون رو شهر پڻ سٺم. امي ڪئينڪ ڏي اوتا شهر موئين ريا.



13 پوٽر ڏي را امي شهر ٿي ٻارا نيهرين ڏريا را ڪپ مانھ ڳيا، جيئنه امي

ام ھرميو جي يھوديون رنه پراٽنا ڪريا رهي جڳا هوشي. ان اوتنه بيهين

جي ڏوشي پراٽنا ڪروا پيڙي ٿيتي، اُونئون ٿي پرڻو ايسو را پارام واتون

ڪروا مڏيا.

14 اُونئون موئين ٿي هيڪ ڏوشي هٽي جيا رو نوم لڏيه هتو. او توتاتيره شهر

ٿي اوتنه لڏي آئي تئي، ان وونگڻائي رنگ رون قيمتي لوگهڙون رو واپار ڪرتئي.

او يھودي قوم رهي نٽي توئي پڻ پڳوون مانھ يقين راکتئي. ايشور اوتا ننه



هزميا رڻي هيمنت ڏيڏئي، ان اُوڻه
پولوس ري واتون هومپڙين موني
ليڏي. ⑮ زئيون اُوڻه اشيترِي ان
اُوڻا را گهر ري ٻڌي منڪي پويتر
سنون ليڏو، تئيون اُوڻه امون ننه
منڻ ڪرين ڪيڏو: ”جي تم

مُون ننه پريو مانه هاسو يقين راکيا واڙئي هزمين موني، تو ميرپونئي ڪرين
ماري گهري هالين ريو.“ ان اُوڻه زوري امون ننه آڀري گهري تيڙي زائين راکيا.

فليپي شهر موئين پولوس ان سيلاس ننه جيل موئين پورئھ پرا

⑯ هيڪ ڏي، زئيون امي اُوڻا هاڳي پراڻا ڪريا ري جڳا هوما زاتات ريا، تئيون
امون ننه هيڪ ڳلوم سوڪري پيڙئي ٿئي، جيا ننه ايوو پوت سونتل هتو، جي
منڪون رو پاڳ همپڙاوي هيڪتو. او سوڪري منڪون ننه اُوڻون ري قسمت رو
حال همپڙاوين آڀرون ڏئيون ننه گهڻائي پٽيها ڪمائين ڏيئي. ⑰ او پولوس ان
امون وونهڙ آوين زور ٿي ام ڪيئي رڻي: ”اي منڪ پريو پرميشور را شيواڌاري
سٺه، جيا تمون ننه تارڻ رو مارڳ ڏيڪاڙه.“ ⑱ او گهڻون ڏيئون هُڏي همريئم
ڪرتئي رڻي. تيام پولوس گهڻو ڪڪ ٿيو ان اُوڻه پوت ننه ڪيڏو: ”هُون تون
ننه ايسو ڪريست را نوم ٿي ڪونه جي ايڻا سوڪري ٿي نيھري زا!“ ان اُوڻه
ئي ٿوڻه پوت سوڪري ٿي نيھري ڳيو.

⑲ زئيون ڳلوم سوڪري ري ڏيئي زيوو جي اُوڻون رڻي ڪمائي ڪتم ٿي
ڳيھ، تو اُوڻي پولوس ان سيلاس ننه زهالين ڪورث موئين شهر رون آڳيونون
ڪن ڏيھڙين لي ڳيا، ⑳ ان اُوڻون ننه هوما اُڀاڙين شهر رون رومي آڳيونون
ننه ڪيڏو: ”ساڀون، اي منڪ يھوڏي سٺه. اي آڀا شهر موئين قشري ڪراوڻه
ريا، ㉑ ان منڪون ننه ايوو ريتون شيڪاڙه ريا، جي آڀي رومي منڪ آڀا قانون

پرموئنه نڪو اُوئون مانھ وي هيڪونه نڪو اُوئون ننه ڦهول ڪري هيڪونه.“
 (22) تئيون شهر ري ٻڌي منڪي پڻ پولوس ان سيلاس رنه ڪلاف ٿين سوڪري رون
 ڌيون رو ٻاهو ليدو.

پسئ شهر ري آڳيون هي حڪم ڏيڏو جي پولوس ان سيلاس را لوگهڙا زوري
 اوتراوين اُوئون ننه نيترون ٿي مارئ. (23) اُوئون ننه گهڻا ماريا ڪيڙ، جيل موئين
 پوريا پرا، ان جيلر ننه حڪم ڏيڏو: ”ايئون مانھ ڌيون ٿي ٻاهرو ڏي!“ (24) ايوو
 حڪم هومپڙين جيلر اُوئون ننه جيل را موئينليا ڪمرا
 موئين پوريا، ان اُوئون را پڳ پيئون لاکڙون هونھرا
 نوڪين راکيا، زم او پاڳي نه هيڪئ.



(25) آڌي رات را پولوس ان سيلاس پرائنا ڪرتات ريا ان پزن ڳاوين ڀڳوون
 را وڪوڻ ڪرتات ريا، ان جيل را پڙا قيڏي هومپڙتات ريا. (26) تئيون اوچتئي
 زمئي ايوي ڏهئي جي جيل ري ڀنيادون ڏڳي ڳي. هتمارا جيل را ٻڌائي دروازا
 آڻوڪا اوگهڙي ڳيا، ان ٻڌون ري هڪڙي ان جيا جيا ٿي ٻونڌل هتا، او ڪلي ڳي.
 (27) تئيون جيلر زاڳي ڳيو، ان زوئھ، تو جيل را ٻڌائي دروازا ڪل پڙياھ. اوئ
 ام هزميو جي جيلي پاڳي ڳياھ، تيام ترؤنار ڪاڊين آپ ننه ماروا ڪرتو تو.
 (28) پڻ پولوس زور ٿي ڪيڏو: ”آپ ننه مت مارو! امي ٻڌائي ايئن سون.“

(29) جيلر پتي مڳاوين يڪدم ڊوڙين موئين ڳيو، ان ڏڪتو ڏڪتو پولوس ان
 سيلاس ري پڳي پڙيو نو. (30) پسئ اُوئون ننه ٻارا لي زائين ڪيڏو: ”سابون،
 مارئ ڪي ڪروو ڪئن، زم هون ڀڳوون ري سزا ٿي پڇي هيڪون؟“

(31) تيا مانھ اوئي ڪيڏو: ”پڙو ايسو مانھ وشواس اوئو، تو تمي ان تمارئي
 ٻڌئي اڪائي پڇي زاشو.“ (32) پسئ اوئي جيلر ننه ان اوئا را گهر رون ٻڌون
 منڪون ننه ايشور رو وچن همپڙايو. (33) تئيون اوئ ٿوئنه رات ٿو رات جيلر اُوئون
 ننه تيڙي زائين اُوئون را ڦٽ ڌويا، ان پسئ اوئ ٿي ٿوئنه اوئ ان اوئا ري اڪائي
 ري ٻڌي منڪي پويتر سنون ليدو. (34) پسئ پولوس ان سيلاس ننه ماڻه آڀري

گهري ٿيڙي زائين اُوئون نئه روئي گوراوئي. جيلر ان اونا ربي ٻڌي اڪائي پڳون مانھ وشواس اوئين گهڻا ڪش ٿيا.

(35) هوار ٿيو، تو شهر ري آڳيونني آڀرون سپايون نئه جيلر هوما ام ڪين ميليا جي هايون منڪون نئه ساڏهه پرا. (36) تيام جيلر پولوس نئه ڪيڏو: ”شهر ري آڳيونني ڪي ميليوه جي تمون پيئون نئه ساڏون پرا. تيام تمي هوه زائو پرا ان هڪي ريو!“

(37) پڻ پولوس سپايون نئه ڪيڏو: ”امي روم را منڪ سون. توئي پڻ اوئي امارو ڦينصلو نه ڪريو جي امي ڏوهاري سون ڪا نا، پڻ امرام امون نئه ٻڌون منڪون هوما ماريا، ان جيل موئين پوريا. تيام هوه امون نئه ماٺ ماٺ ۾ ڪم ساڏهه ريا؟ هم نئين ٿي هيڪه. پلئه او آپ اوين امون نئه جيل ٿي ٻارا ڪاڏهه!“ (38) زئون سپايي اي نياپو شهر رون آڳيونونون نئه ڏيڏو، ان اُوئون نئه ڪهر پڙي جي پولوس ان سيلاس روم را منڪ سئه، تيون او گهڻا پيڻاوا لاڳيا. (39) تيام اوئي پولوس ان سيلاس ڪن آپ زائين اُوئون ٿي ماڻهي مونگهي، ان اُوئون نئه جيل ٿي ٻارا ڪاڏين منئون ڪرين ڪيڏو جي ”ميريوني ڪرين ايڻا شهر ٿي زائو پرا.“ (40) تو پولوس ان سيلاس جيل ٿي نيهرين لڏيه نومي اشيتري ري گهري ڳيا، ان اوئيه اوئي وشواسي پايون ٿي مزين اُوئون نئه حوصلو ڏيڏو ان پسئه اوئون رونا ٿيا.

ٿسلنيڪي شهر موئين يهودي پولوس ان سيلاس نئه زهالوا ڪرئه



17 (1) پولوس ان سيلاس امفيلس ان اپلوني شهرن موئين ٿين ٿسلنيڪي شهر موئين آيا، جيئيه يهوديون رو هيڪ مندر هتو. (2) پولوس

اڳي را زم پڳون را مندر موئين يهوديون ڪن ڳيو، ان ترئون هفتون هوڏي



هر پوٽر ڏي مانھ اُو شاستر موئين ٿي شيڪاڙتو، ③ ان شاستر ري واتون ڪولين ٿا پٽي ڏيتو جي ”ام ٿيو ضروري هتو، جي پڳوون رو سونڊل پڇايا وازو ڪريست ڏک سهين مره، ان مرلون موئين ٿي جيوي اوئنه. ان ايسو، جيا رئي هون تمون ننه ڪهر ڏيونه ريو، او رو او پڳوون رو سونڊل پڇايا وازو ڪريست سته.“

④ يهوديون موئين ٿي ڪيٽڪ اوئا ري واتون موني، ان پولوس ان سيلاس پيڙا ٿي ڳيا. ان هيونه نموننه الاهي گهڻا ڌاري قوم وازا جيئي پڳوون مانھ يقين اوٿيو تو، ان گهڻي موٽون گهرون ري ڏوشي اوئون پيڙي ٿي ڳي.

⑤ پڻ يهوديون ننه پولوس ان سيلاس مانھ رينه سڙي، ان جيا نڪوما منڪ شهر موئين اوپل هتا، اوئون موئين ٿي ڪيٽڪ ڪراپ منڪ پيڙا ڪرين هيڪ موٽو توڙو نايو، ان پورا شهر موئين ڦسڙي ڪراوا مڏيا. اوئي ياسون نومي منڪ را گهر مانھ حملو ڪريو، زم اوئون پولوس ان سيلاس ننه زوري ٻارا ڪاڍين منڪون ڪن لي آونه. ⑥ زئيون اوئنه او نه زڙيا، تئيون ياسون ان ڪيٽڪ وشواسي پايون ننه زهالين شهر رون آڳيوونون ڪن لي آيا ان زور ٿي ڪيٽو: ”جي منڪي ٻڌي دنيا ۾ ڳڙڙ ڪريه، او ايئنه پڻ آياھ. ⑦ اوئون ننه ياسون آپري گهري تڪاڙياھ. او ٻڌائي روم را پاڌشا رون حڪمون رنه ڪلاڦ وئھ، ان ام ڪئھ جي پيڙو ڪوڪ پاڌشا سته جيا رو نوم ايسو سته.“

⑧ زئيون ٻڌي منڪي ان شهر ري آڳيووني هائي واتون هومپڙي، تو او گهڻا پريشون ٿيا. ⑨ پسئ آڳيووني ياسون ان پيزون وشواسيون مانھ ڏنڊ نوکين پٽيھا لين ساڏيا پرا.

بيريہ شهر موئين گهڻا يهودي وشواسي ٿئھ



⑩ اوئھ ٿي رات وشواسي پايي پولوس ان سيلاس نئھ جلدي بيره شهر هوما روونا ڪريا پرا. زئيون او اوئھ پوگيا، تو يهوديون را مندر موئين گيا. ⑪ اوٽ

را يهودي تسليڪي شهر رون يهوديون ٿي گهڻا ناوڪا هتا، ان اوئي گهڻا شونق ٿي پولوس ري واتون هومپڙي، ان تاريخ شاستر پٿين زوتا جي اي واتون شاستر پرموئھ سئھ ڪا نا. ⑫ تيام اوئون موئين ٿي گهڻي منڪي وشواس اوئيو. ان ڌاري قومون موئين ٿي پڻ گهڻي مون واري ڏوشي ان آڌمي وشواسي ٿي گيا. ⑬ پڻ زئيون تسليڪي شهر رون يهوديون نئھ ڪبر پڙئي جي پولوس بيره موئين پڳوون رو وچن همپڙاوئھ ريو، تئيون اوئي اوئھ پڻ آوين منڪون نئھ جونش ڏيوراوين پولوس رئھ ڪلاڻ چوريا. ⑭ پسئ وشواسي پايي جلدي ۾ پولوس نئھ سمونڊ را ڪپ هومو روونو ڪريو، ان اوئون موئين ٿي ڪئينڪ منڪ اوئا نئھ ساڏوا گيا. پڻ سيلاس ان تيمٽيس بيره شهر موئين ريا. ⑮ جيا منڪ پولوس نئھ ساڏوا گيا، او پولوس پيڙا موئين سترين اٿيني شهر هوڏي گيا. پسئھ او پولوس رو اي نياپو لين پاسا بيره هوما روونا ٿيا جي "سيلاس ان تيمٽيس زتو جلدي ٿي هيڪئھ مون ڪن اوئھ را."

اٿيني شهر موئين پولوس آڳيونون نئھ وچن همپڙاوئھ

⑯ زئيون پولوس اٿيني شهر موئين سيلاس ان تيمٽيس رئي وات زوتوت ريو،



تئين اوتا نئه گهڻو ڏک ٿيو، ڪم تو اونه ڏيکيو جي پورا شهر موئين گهڻي مورتِي سته. ⑰ تيام او پگهون را مندر موئين يهوديون نئه ان پگهون مانه يقين راکيا وازون ڌاري قوم وازون نئه وچن همپزاوتو. ان شهر را وس ۾ جيو پڪو ميدون هتو، اوڻه پڻ زائين امهي اول منڪون نئه تاريڪ وچن همپزاوتو.

⑱ اوڻه ڪئينڪ علم وازا منڪ هتا، جيا اپڪوري پالتي ان ستوئيڪي پالتي را هتا. او پولوس رو مقابلو ڪروا مڌيا. ڪوڪ ڪيتات ريا جي ”اي جت منڪ آپ نئه ڪي هزمه؟ اي ڪيوي واتون ڪرئ ريو؟“ ان پيزا وڙي ڪيتات ريا ”اي ڌاري قومون رون ڏيوئونون رئي ڪهر ڏيدا وازو ڏيڪاهه،“ ڪم تو پولوس ايسو را پارام ان جيوي اونيا را پارام ڪشي رئي ڪهر ڏيتوت ريو، ان اوئي ام هزميو جي ”ايسو“ ان ”جيوي اونوو“ ڏيوئونون را نوم سته.

⑲ پسته او پولوس نئه تيزين شهر ري پنچائيت ڪن گيا، جيا نئه اريوپگس ڪهه. ان اوتا ٿي ام پونسو: ”امون نئه همپزاوو، جي اي نوي واتون تمي شيڪاڙوه ريا، اي ڪيوي واتون سته؟“ ⑳ ڪم تو تمي ڪئينڪ ايوي واتون ڪروه ريا جي امون نئه عجيب لاگهه. تيام امي ڪهر پاڙوا ڪرونه جي ايئون واتون رو مطلب ڪي سته.

㉑ هوئه ائيني شهر را ٻڌائي منڪ ان پيزا پرڏيشي منڪ جيا اوڻه رهه، اوئون نئه پيزي ڪيا وات رو شونق ٿئي، پڻ او روگا نوي نوي واتون هومپڙهه ان همپزاوهه.

②٢ تئین پوئوس شهر ري پنچائیت هومو اُوئین اُوپو ان کيوا مڊيو: ”او اٿينی شهر رون منکون، هُون ڏيکونه ريو جي تمی هر وات موئین ڌرم پاڙوه، ②٣ کم تو هُون ویتون تمارون ڏيوئونون رون منڌرون ان آستونون نئه زوتوت ريو، تو هیک آستونو ڏيکيام آيو جيئنه پٿر مانه لکل هتو: ’اڻ اوڙکل ڏيو هارو.’ تيام اُو جيا رئي تمی اوڙکيا وگر پوزا کروه، اُوئا را پارام هُون تمون نئه کبر ڏيونه ريو. ②٤ اُو پڳوون سئه، جيئنه اي ٻڌئي ڏنيا ان جئين شينهنون ايئا موئین سئه، اُو ناويه. اُو آکاش ان ڌرتي رو ڌئي سئه، تيام اُو منکون رون ناوَل منڌرون موئین نٿي ريتو، ②٥ ان اُوئا نئه کيائي پڻ شينه رئي ضرورت نٿي، جئي منک اُوئا نئه ڏين اُوئا رئي شيوا کرئه، کم تو اُو آب ٻڌون نئه حياتي، هاهان ٻڌو کئين ڏئه. ②٦ اُوئه هیکا منک ٿي ٻڌي قومون پيدا کري، زم اُو ٻڌي ڏنيا ۾ رئه. اُوئه اُوئون رئه ریا هارو کاس ٿوئا ان علاقون را ڌنگ اڳي ٿي قينصلو کرين راکيا. ②٧ پڳوون منکون نئه ايئا هارو ناياه جي اُو پڳوون ٿي واسطو راکيا رئي کوشش کرئه، مون اُو زوئنه قونقا مارين اُوئا را پارام کبر پاڙئه، ان اُوئا نئه اوڙکين اُوئا ٿي واسطو راکئه. پڻ هاس ۾ پڳوون آپون ٿي شيتي نٿي ان هر هیک ٿي ڏوڪڙو سئه، ②٨ کم تو ’اُوئا ري کڙا ٿي آبي جيوئا سون، ان وونه ریا ان ريونه. ’زم تماري کئينک شاعري کيدوه جي ’آبي پڻ پڳوون را اولاد سون.

②٩ زئيون آبي پڳوون را اولاد سون، تو آپون نئه ام نه هڙموو کپنه جي پڳوون کياک سون، چونڌي کا پٿر ري مورتی را زم سئه، جيا نئه منک آپرا هونر ان سوچ ٿي ناوئه. ③٠ اڳلوکا زمونا ۾ زئيون منکون نئه پڳوون رئي کبر نٿي، تو پڳوون اُوئون نئه اُوئون رون ڏوهون رئي سزا نه ڏيڏئي. پڻ هوءَ پڳوون پوري ڏنيا رون ٻڌون منکون نئه همپڙاوه ريو جي اُو آپرا کراپ کوم ساڏين توپونه کرئه ان پڳوون ري وات مانه وئ. ③١ کم تو اُوئه هیک ڏي ٻونڌين راکيوه جيا مانه اُو پوري ڏنيا رون منکون رو نيا آپرا سونڊل منک ري هاڻي

انصاف ٿي ڪراوشي. ان اُونا منڪ ننه مرلون موئين ٿي جيوي اُوناڙين پڳوون
ٻڌون منڪون ننه هيا وات رٿي ٿا پٽي ڏيڏي.

③۲ ڙيون منڪي مرلون موئين ٿي جيوي اُونا را پارام هومپڙيو، تو ڪوڪ
پولوس مانه نٿولي ڪروا مڌيا. پڻ ڪئينڪ منڪي ڪيڏو: ”هايا وات را پارام
امي وڙي تمون ٿي هومپڙشون.“

③۳ پسنه پولوس پنچائيت ٿي گيو پرو. ③۴ پڻ ڪئينڪ زئي اُونا پيڙا ٿين
ايسو مانه وشواس اوڻيو. اوئون موئين ٿي شهر ري پنچائيت رو هيڪ ميمپر هتو،
جيا رو نوم ديونسيس هتو. ان اوئون پيڙي دمرس نومي هيڪ اشيتري هتي، ان
پيڙا پڻ منڪ هتا، جيئي وشواس اوڻيو.

ڪرنتس شهر موئين پولوس ٿوي سال ايسو را پارام شيڪاڙتو رٿه

18 ① تيا ڪيڙ پولوس اٿيني شهر ٿي روونو ٿين ڪرنتس شهر موئين
آيو. ② اوڻه اُونا ننه



اڪوله نومي هيڪ يهودي پيڙو
ٿيو، جيا رٿي پيڏائيش پُنطس
صوپا رٿي هتي. او آپري ڏوشي
پيڙو، جيا رو نوم پرسڪله هتو،
اٽلي را روم شهر ٿي نوو اول
هتو، ڪم تو روم رٿه پاڏشا
ڪلوديس حڪم ڏيڏو تو جي
ٻڌائي يهودي روم شهر ٿي لڏي
زائنه. پولوس اوئون ري گهري
گيو، ③ ان اوئون ڪن رين پيڙو
ڪوم ڪروا مڌيو، ڪم تو اوئون

رو ڌنڌو پولوس را زم تنبو نايا رو هتو. ④ ان هر پوٽر ڏي مانھ پولوس پڳوون را مندر موئين زائين شيڪاڙتو، ان ڪوشش ڪرتو جي يهودي ان يوناني قوم واڙا پڻ هائي واتون موين ايسو مانھ وشواس اوئھ.

⑤ زئيون سيلاس ان تيمٽيس مڪڏنيھ صويا ٿي آيا، تو پولوس تنبو نايا رو ڪوم ساڏين پورو تونو پڳوون رو وچن همپزاووا لاڳيو. او يهوديون نھ ايتا وات رٿي ٿا پيئي ڏين ڪيتو جي ايسو پڳوون رو سونيل پڇايا واڙو ڪريست سھ. ⑥ پسئھ زئيون يهودي پولوس رھ ڪلاف ٿي ڳيا ان گھٽ وڌ بولوا مڏيا، تئيون اوئون ٿي واسطو توڙيا هارو اوئھ آپرا لوگھڙا اوئون هوما ڪيرين ڪيڏو: ”هونھ جي تمي پڳوون ري سزا ٿي نہ پڇو، تو اي تمارو آپرو ڏوھ سھ. مئين آپرو ڪوم پورو ڪريوھ، مارو ڏوھ نٿي. آڙ ٿي لين هون ڌاريون قومون ڪن زائيه.“ ⑦ پسئھ پولوس يهوديون را مندر نھ ساڏين هڪا ڌاري قوم واڙا ري گھري شيڪاڙوا ڳيو. اوئا رو نوم ططس يوستس هتو ان او پڳوون مانھ وشواس راڪتو. اوئا رو گھر يهوديون را مندر را پاهام هتو. ⑧ يهوديون را مندر رھ آڳيون، جيا رو نوم ڪرپس هتو، اوئھ ان اوئا ري ٻڌي اڪائي پريو ايسو مانھ وشواس اوئيو. ان ڪرنتس شهر را گھٽا منڪ وچن هومپزين وشواسي ٿيٽا ان پوٽر سنون ليتا. ⑨ هڪ رات پريو شپنا را زم پولوس نھ ڏيڪاڙو ڏين ڪيڏو: ”پيٽا مت! همپزاوتو رھ ان ماٺ ڪرين مت پيهي، ⑩ ڪم تو هون تون پيڙو سون. تيام ڪوئي پڻ منڪ حملو ڪرين تون نھ نقصون نئين ڏئھ، ڪم تو ايتا شهر موئين مارا گھٽا منڪ سھ.“ ⑪ تيام پولوس ڏوڍ سال اوئھ ريو ان منڪون نھ پڳوون رو وچن شيڪاڙتو ريو.

⑫ زئيون اوئا يونان صويا مانھ روم را طرف ٿي گليو نومي منڪ رو راز هتو، تئيون يهودي آيت موئين پيڙا ٿين پولوس مانھ سڙي آيا ان اوئا نھ زهالين صويا مانھ راز ڪريا واڙا ڪن ڪورٺ ۾ تيڙي ڳيا. ⑬ اوئي ڪيڏو: ”اي منڪ پيڙون منڪون نھ پڳوون رٿي ايوا نمونا ٿي شيوا ڪروا شيڪاڙھ، جي تمارا روم

را قانون رڼه کلاڅ سته.

⑭ زښون پولوس پوليا واڙو هتو، تښون صوپا مانه راز کريا واڙه يهوديون نه کيدو: "او يهودي قوم رون منکون، جي اښه کښک قانون رڼه کلاڅ کوم کا موښي پوندائي کړي هوت، تو هون تماري وات صير ٿي هومپڙت. ⑮ پڻ اي واتون روگي تمارا ډرم رون ويښون، نومون ان حکمون را پارام سته، تيام تمې زوځو ان تمارو کوم زوځته. هون ايښون واتون رو ځينصلو نښين کرون." ⑯ ام کين اوڼه يهوديون نه کورث ٿي پارا کاڍيا. ⑰ پسنه شهر ري ٻڌي يوناني منکي پيڙا ٿين يهوديون را مندر را آگيوون نه زهاليو، جيا رو نوم سوسٽنيس هتو، ان اوڻا نه کورث هومو گهڻو ماريو. پڻ راز کريا واڙه اښا وات مانه کښن ډيون نه ډيدو.

پولوس اپرا انطاكيه شهر موئين پاسو زاهه

⑱ تيا کيڙ پولوس اوڼه کړنځس شهر موئين گهڻا ډي ريو. پسنه وشواسي پايون ٿي موکل لين پاسو سوريه صوپا هومو سمونډ را شيرزا ٿي زوونو ٿيو.



ان پرسکله نومي ډوشي ان اوتا رو اڏمي اکوله پڻ پيڙا گيا. زئيون سمونډ را کپ مانه کنځريه شهر موئين آيا، تو پولوس اوته اپرا متواتر کتريا پرا، کم تو اوته پگهون را نوم مانه پاسني پاسني تئي. ①٩ پسته اوئون پيڙا مانه سترين افسس شهر موئين زائين پوگيا.

او ٻي موته افسس شهر موئين ريا. پولوس اوته پگهون را مندر موئين زائين يهوديون نه شيکاروا مڊيو. ②٠ يهوديني پولوس تي منت کړي جي او کينک وڌيک ډي اوئون کن رټ، پڻ اوته نا پاڙيو، ②١ ان موکلاوين کيدو: ”جي پگهون ربي مرضي تئي، تو هون وڙي تمون کن آويه.“ پسته او افسس شهر تي پيڙا مانه سترين روونو تي گيو.

②٢ سمونډ پار کرين پولوس قيصره شهر موئين پوگي آيو. اوئون او يروشلم شهر موئين زائين وشواسي منډري رون منکون تي مڙيو ان پسته اپرا انطاكيه شهر موئين پاسو آيو رو.


پولوس رو ايسو را پارام همپڙايا هارو ترثمو چکر

②٣ پولوس کينک وکت انطاكيه شهر موئين ريو، ان پسته وڙي روونو تيو. ان او گلتيه ان فروگيه رون علاقون موئين تيتو شهر نو شهر ٻڌون وشواسيون نه هيمت ڏيتو گيو.

اپلوس نومي منک ايسو را پارام شيکارته

②٤ اوئون ډيئون موئين اپلوس نومي يهودي قوم رو هيک منک افسس شهر موئين آيو. اوتا ربي پيدائش اسکندريه شهر ربي هتي. او ٻوليا رو هوشيار هتو ان شاستر ري گهتي واتون زوتو. ②٥ او پريو ايسو را ڏيکارل مارگ را

پولوس رو ترثمو چکر



پارام شيڪل هتو، ان اُو ايسو ري واتون صحيح نمونہ گهڻا جونش ان شونق ٿي همپزاوتو ان شيڪاڙتو. پڻ اُوئا نئہ رُوگو يوحنا را ڏيڏل پويتر سنون را پارام ڪبر هتي، پڻ ايسو را شيڪاڙل پويتر سنون را پارام اُوئا نئہ ڪئين ڪبر نٿي. ②6 اُو پگهون را مندر موئين پيڪ وگر ٻولوا مڏيو. زئون پرسڪله ان اُوئا رنہ آدمي اڪولہ اُوئا ري واتون هومپزي، تيون اُوئا نئہ آپري گهري تيڙي گيا ان پگهون را مارڳ را پارام پورئي وات هزماوئي.

②7 زئون اڀلوس رو يونان صوپا هومو زايا رو ڪيال ٿيو، تو وشواسي پايي اُوئا نئہ حوصلو ڏيڏو ان اوت رون وشواسيون نئہ اُوئا هات ڪت ڏي ميليو جي اُو اڀلوس ٿي نائوڪا نمونا ٿي مڙنہ. اڀلوس اوتنہ گيو، ان اُوئا را زايا ٿي اوت رون وشواسيون نئہ گهڻو قائيدو ٿيو، جيئي پگهون ري ڪرپا ٿي ايسو مانہ وشواس اوٿيو تو. ②8 ڪم تو اُو ٻڌون منڪون رنہ رُوپرو گهڻا جونش ٿي يهوديون ري واتون ڪوڙي ڪرتو ان شاستر ٿي ٿاڀتي ڏين هزماوتو جي ايسو اُو رو اُو پگهون رو سونڊل پچايا واڙو ڪريست سئہ.

افسس شهر موئين پولوس بيئون سالون ٿي وڌارءُ ايسو را پارام شيڪاڙه

19 ① زئون اڀلوس ڪرنٽس شهر موئين هتو، تيون پولوس ٻاراڙي رو شيرڙو لين افسس شهر موئين آوين پوگيو. اوتنہ ڪئينڪ وشواسي اُوئا نئہ پيڙا ٿيا. ② پولوس اوتون ٿي پونسو: ”زئون تمي وشواس اوٿيو، تيون تمون نئہ پويتر آتما زڙيو ڪا نا؟“ اُوئي ڪيڏو: ”امي هزون پويتر آتما رو نوم ئي نٿي هومپزيو.“ ③ تيون پولوس پونسو: ”پسئہ تمي ڪيو پويتر سنون ليڏوه؟“ اُوئي ڪيڏو: ”اُو پويتر سنون جيا را پارام يوحنا شيڪاڙيو تو.“ ④ ٿيا مانہ پولوس ڪيڏو: ”يوحنا را ڏيڏل پويتر سنون رو مطلب اي هتو، جي منڪ آپرا ڪراب ڪوم ساڏين توبونه ڪرئہ ان پگهون ري وات مانہ وئہ. ان پويتر سنون

ڏيڏا رڻه توتڻه اُو اسرائيلي قوم رُون منڪون نڻه ام ڪيتو جي 'جيو منڪ مُون ڪيڙ آوشي، اونا مانھ وشواس اوڻيا. 'هوتڻه اُو منڪ ايسو سڻه."

⑤ اُوئي اي هومپڙين پريو ايسو را نوم مانھ پويتر سنون ليڏو. ⑥ پستھ پولوس اوتون مانھ آپرا هات ميليا، تو پويتر آتما اوتون مانھ اوتريو ان اُو ڪڙا ٿي زڙل ٻولي ڪروا مڌيا ان پگھون رو نياپو ڏيو مڌيا. ⑦ اُو ٻڌائي ٻارڻڪ زنا هتا.

⑧ پولوس ترٿيون مٿيون هُودِي پگھون را مندر موئين زاتو ريتو، ان گهڻي هيئت ٿي يهوديون نڻه پگھون را راز را پارام هرماوتو ان ايئون واتون نڻه مناووا ڪرتو. ⑨ پڻ زيون اوتون موئين ٿي ڪئينڪ منڪي ضد ڪرين ايسو مانھ وشواس اوڻيا ٿي نا پاڙيو ان ٻڌون منڪون رڻه رُوپرو پريو ايسو را ڏيڪاڙل مارڳ رڻي ڳلا ڪروا لاڳيا، تڻيون پولوس اوتون نڻه ماڳي ساڏيا پرا، ان وشواسيون نڻه پڙا تيڙين يهوديون را مندر ٿي گيو پرو. ان پستھ اُو ڌاري قوم را ترنس نومي منڪ ري موتي جڳا موئين تاريخ شيڪاڙوا مڌيو. ⑩ ٻيئون سالون هُودِي اُو همروم شيڪاڙو ريو، ان هيوتڻه نمونڻه آسيم صوپا ري ٻڌي منڪي، يهوديني ان ڌاري قوم واري پڻ، پريو ايسو رو وچن هومپڙيو.

افسس شهر موئين ايسو رڻي ڀوتون مانھ ڪڙا ڏيڪاڻھ ان گهڻا جاڻو ڪريا واڙا وشواسي تڻھ

⑪ پگھون پولوس ري هاڻي ڪاس ڪاس پرسا ڏيڪاڙتو. ⑫ ان جيون رومالون ٿي پولوس آپرو مونيڊو پونهتو، ان جيا توتال ڪوم ڪريا هارو ٻوندتو، منڪ اُو پڻ لين مونڌون ڪن زاتا، ان اُو پيماريون ٿي هاڙا هورا ٿيتا، ان جيون نڻه پوت سونتل هوتا، اوتون ٿي پوت پڻ نيهرتا.

⑬ پڻ ڪئينڪ يهودي قوم را پوپا هتا، جيا ايل اول ويتا ريتا. اُوئي پڻ پريو ايسو را نوم ٿي منڪون ٿي پوت ڪاڏيا رڻي ڪوشش ڪرڻي. اُو ڀوتون نڻه ام

ڪيتا: ”ايسو را نوم ٿي ٺيهري زا، جيا را پارام پولوس همپزاوئھ.“ ⑭ ائون موئين ٿي هات پائي هتا، جيا سڪيا نومي يهوديون را موتا پوزاري را ڏيڪرا هتا. او پڻ هيڪ وار همروم ڪرتات ريا، ⑮ تو پوت ائون نئھ ڪيڏو: ”ايسو نئھ تو هون اوزكونھ، ان پولوس را پارام مون نئھ ڪبر سئھ، پڻ تمي ڪوڻ سو؟“ ⑯ پسئھ پوت سونتل منڪ ٺينڪزو مارين ائون مانھ پڙيو، ان اونا موئين ايوي طاق هتي جي ائون ٻڌون نئھ هرايا پرا، ان اونا ڳا ان ڏڪڙل ٿين اونا گهر ٿي بارا پاڳي ڳيا.

⑰ ايئا وات ربي افسس شهر رون ٻڌون يهوديون ان ڌاري قوم رون منڪون نئھ ڪبر پڙئي. او ٻڌائي گھڻا پيئاوا مڌيا، ان پريو ايسو را نوم رو گھڻو مون را ڪوا مڌيا. ⑱ ان جيئي وشواس اوٿيو تو، ائون موئين ٿي گھڻي منڪي اپرا ڪراپ ڪوم ٻڌون هوما ياسيا. ⑲ ان گھڻي منڪي جيا اڳي جاڏو ان ڪارو علم ڪرتا، اپرا هيو علم را ڪتاب پيڙا ڪرين ٻڌون رنھ روپرو ٻاڙيا پرا. زئون ائون ڪتابون ري قيمت رو حساب ڪريو، تو اڏائي لڪ روپيا ٿيو. ⑳ هيوئھ نمونئھ پڳوون ري ڪڙا ٿي پريو رو وچن پڪڙتو ريو ان گھڻا منڪ وشواسي ٿيئا ڳيا.



افسس شهر موئين قشري تئھ

㉑ ايئون واتون ڪيڙ پولوس پويتر آتما را ڪيڏا ٿي ڦينصلو ڪريو، ان ڪيڏو جي ”هون مڪڏنيھ ان يونان صوپون موئين ٿين يروشلم شهر موئين زائيھ. ان پسئھ اوئھ زيا ڪيڙ مارنھ روم شهر پڻ زاو پڙشي.“ ㉒ تيام اوئھ اپرون مدت ڪريا وازون موئين ٿي بيئون زئون ٽيمٽيس ان اراستس نئھ مڪڏنيھ صوپا هوما ميليا، پڻ آپ ڪئينڪ وڪت آسيھ صوپا موئين ريو.

㉓ اوئي ڏيئي افسس شهر موئين پريو ايسو را ڏيڪاڙل مارڳ ري ڪري

گهڻي گهڻي ٿئي. ②4 اوتڻه ديميتريُس نومي هيڪ هونارو هتو. اُو ارتمس نومي ڏيوي را مندر را رُوپ مانه چوندي را ننڪا مندر نوراوتو. اوتا را هايا کوم ري ڪري ڪاريگرون ننه گهڻو ڦاڻيڏو ٿيتو. ②5 اوتڻه آپرون ڪاريگرون ان پيزون ٻڌون ننه جيا هيون ڏنڌو ڪرتا، پيڙا ڪريا، ان ڪيڏو: ”او پايون، تمون ننه ڪهر سڻه جي ايڻا کوم ري ڪري آپون ننه ٺاڻوڪي روزي زڙه. ②6 تمي آپ ڏيڪوه ان هومپزوه ريا جي، نه رُوڳو ايڻه افسس شهر موئين پڻ اندازام پورا آسيه صويا موئين، ايڻه پولوس منڪون ننه ايوڻه نموننه شيڪاڙيا، جي گهڻا منڪ ڦري ڳياھ ان آڻڻو ڌرم ساڏيوھ پرو. پولوس ڪنھ ريو جي هاڻون ٿي ناول ڏيوڻون موئين ڪڍن ڪڙا ٿئي. ②7 هوڻه ايڻا ٿي نه رُوڳو اي ڪترو سڻه جي آڻڻا کوم رو مون نئين رڻه، پڻ آڻڻي موتي ارتمس ڏيوي را مندر ننه منڪ ڪڍن نئين هڙمڻه، ان اي ڏيوي جيا رڻي پوزا آسيه ان پورا جڳت را منڪ ڪرڻه، ايڻا رو مون ڪتم ٿي زاشي.“



②8 اي واتون هومپزين اوتون منڪون ننه گهڻي رينه سڙي. ان زور ٿي ام جني ٻولڙوا مڏيا: ”آڻڻي افسس ري ڏيوي ارتمس رڻي جڻي هوڻه!“ ②9 پورا شهر موئين گهڻي ٿي گهڻي. منڪي پولوس رون پيئون ساڻيون ننه زهاليا، جيون را نوم گائس ان ارسترخس هتا، جيا مڪڏيه صويا را هتا. ان اوتون ننه ڦاڻو زهالين شهر را ميڏون هوما ٻڌائي پيڙا ٿين هٿيڪا هٿيڪا لي ڳيا. ③0 پولوس منڪون ڪن زاوا ڪرتو تو، پڻ وشواسيئي اوتا ننه زاوا نه ڏيڏو. ③1 اوت ري آسيه صويا ري پنچائيت را ڪڍنڪ ميمپر، جيا پولوس را دوست هتا، اوت ٻڻ منٿ ڪرين پولوس ننه نياپو ڏي ميليو جي شهر را ميڏون موئين منڪون ڪن نه زائڻه.

③۲ اُوئِه تُوئنه شهر را ميدونَ موئين منک رُوگي کاش کرتات ریا. کوک هيک وات کرتا تا، تو پيزا وزي پيزئي وات، کم تو گهئون منکون ننه اي پڻ کبر نتئي جي کم آوينَ پيزا ٿياھ. ③۳ پسئہ يھوديئي سِکندر نومي منک ننه ٻڌون ھومو اُپياڙيو، تيام کئينک منکي ھزميو جي سِکندر ري کري پيزا ٿياھ. تنيون سِکندر ھاٿ ٿي اِشارو کرينَ منکون ننه ھزمايا رئي کوشش کري جي امي يھوديئي تمارو اي ڏوھ نٿي کريو. ③۴ زئيون اُوئون ننه کبر پڙئي جي اي اماري نات رو منک نٿي پڻ يھودي سئہ، تو ٻڌائي پيزا ٿينَ پئونک کلاکون ھوڏي زور ھون آپري ڏيوِي رئي جئي ام ٻوللوتا ریا:

”آپئي افسُس ري ڏيوِي ارتمس رئي جئي ھوئہ!“

③۵ نيٺ شهر ري پنچائيت رنہ چيرمينَ منکون ننه ماٺ کراوينَ ڪيڏو: ”افسُس رون منکون، پوري ڏنيا رون ٻڌون منکون ننه کبر سئہ جي آڻو افسُس شهر موٽي ارتمس ڏيوِي را منڊر ان اُوئا ري مورتِي رئي ھمپاڙ ڪريا واڙو سئہ، جئي آکاش ٿي پڙئي ٿئي. ③۶ ايئون واتون رو ڪوئي پڻ انڪار نٿي کري هيڪتو. تيام تم ھوئہ ماٺ ڪرو، ان سوچيا وگر کئين مت ڪرو. ③۷ کم تو جيون منکون ننه تم ڏهالينَ لي آياھ، اي نڪو منڊر ننه ڦريا واڙا سئہ، ان نڪو آپئي ڏيوِي رئي ڳلا ڪريا واڙا سئہ. ③۸ ھوئہ ديميتريس ان جيا ڪاريگر اُوئا پيزا سئہ، جي اُوئون ڪن کيس ڪريا جيوي وات ھوئہ، تو ڪورئون ڪُلل سئہ، ان جج ٻيٺاھ. اُو پلئہ کيس ڪرئہ. ③۹ پڻ جي تمارئي پيزئي کوک وات سئہ، تو اُوئا رو ڦينصلو قانونَ ڀرموئنه آڻا شهر ري پنچائيت م ٿيشي. ④۰ آڙ جئي وات ايٺا شهر موئين ٿيھ، ايٺا رو اي ڪترو سئہ، جي رومي حڪومت آڀون مانھ ڦشري ڪريا رو ڏوھ ڏيشي، کم تو آڀي ڪئين ٿاڀئي نٿي ڏي هيڪتا جي اتا منک کم پيزا ٿيا.“ ④۱ ھم ڪين اُوئہ ٻڌون منکون ننه زايا رئي موکل ڏيڏئي.

پولوس وڙي مڪڏنيہ ان يونان صوبيون موئين زائہ

20 ① زئيون منڪون موئين ڳوڙ ڪٽم ٿي ڳيو، تئيون پولوس وشواسيون نٿه پيڙا ڪريا، ان اوئون نٿه حوصلو ڏيڌو. پستہ اوئون ٿي موڪلاوين مڪڏنيہ صوبا موئين ڳيو پرو. ② اوئا علاقا موئين متون اوئہ گهڻي واتون همپزاوين اوٽ رون وشواسيون نٿه حوصلو ڏيڌو. تيا ڪيڙ او يونان صوبا موئين ڳيو پرو. ③ اوئہ او ترڻ مئينا رين پاسو سوريہ صوبا هومو پيڙا مانہ سڙين زايا واڙو هتو. پڻ اوئا نٿه ڪبر پڙئي جي ڪئينڪ يهوديئي اوئا رٿه ڪلاڦ ڪراپ منصوبو نايوہ. تيام اوئہ وڙي مڪڏنيہ صوبا موئين تين پاسو زايا رو ڦينصلو ڪريو. ④ ڪئينڪ منڪ پولوس پيڙا ڳيا. او اي هتا: پُرس رو ڏيڪرو سوپترس جيو بيريه شهر رو هتو، ارسترخس ان سيڪندس جيا تسليڪي شهر را هتا، گائس جيو دربي شهر رو هتو، تخڪس ان ترفمس جيا آسيہ صوبا را هتا، ان تيمئيس. ⑤ اي منڪ امون مور زائين تروئاس شهر موئين امارئي وات زووا مڏيا. ⑥ امي فلبي شهر موئين زائين اوئہ روتيون رئي پرڀ ڪري، ان پستہ اوئون پيڙا مانہ سڙين روونا ٿيا. پونسون ڏيئون ڪيڙ امي تروئاس شهر موئين زائين پوڳيا، ان اوئون ٿي مڙين اوئہ امي هات ڏي ريا.


تروئاس شهر موئين پولوس هڪا سوڪرا نٿه جيوتو ڪرئہ

⑦ آچار رئي رات امي ان پيڙا وشواسي پريو پوزن لڏا هارو پيڙا هتا. ان پولوس آڏي رات هوڏي منڪون نٿه شيڪاڙتو ريو، ڪم تو هوار رو او زايا واڙو هتو. ⑧ جيا ماڙي مانہ امي پيڙا ٿيا تا، اوئہ گهڻا ڏيوا ٻڙتات ريا. ⑨ اوئا ماڳ يوئخس نومي هڪ جوڻ سوڪرو هتو. او ڌري موئين پينو پولوس ري واتون هومپزتوت ريو، ان اوئا نٿه اونگه آوا مڏئي. زئيون پولوس گهڻي وار هوڏي

شیکاڙتو ريو، تو نيٺ سوکرا نئه اُونگه آوي گهي، ان اُو ترٿما ماڙ ٿي نيسو پڙي گيو. منکي آوين اُوئا نئه زويو، تو مرل پڙيو تو. ⑩ پستنه پولوس ماڙي ٿي نيسو آيو، ان سوکرا نئه ٻاٺ نوکين منکون نئه کيڏو: ”ڦڪر مت ڪرو. اي زوئو، وڙي جيوتو ٿي گيوه.“

⑪ تنيون پولوس وڙي ماڙي مانھ زائين ٻڌون پيڙو پڙيو پوزن ليڏو ان روٽي کاذبي، ان پستنه اُو گهڻي وار هوار هُودِي وشواسيون ٿي واتون ڪرتو ريو. ان پڙ پونڪڙيا رئه توڻه اُو اوئون رُونو ٿيو. ⑫ اُوٺ را منک اُوئا جوڻ سوکرا نئه هازو هورو گهري تيڙي گيا، ان پولوس را ڏيڌل حوصللا ٿي گهڻا کُش ٿيا.

پولوس تروئاس شهر ٿي يروشلم هومو زاوا مڏه



⑬ امي ٻيڙا مانھ سترين مور ٿي اسُس شهر هوما رَوونا ٿيا، زم اوئون پولوس نئه آپ پيڙو ٻيڙا مانھ ساڙون. پولوس هائي ڦينصلو تيام ڪريو ڪم تو اُو آپ پنڌ آيا وازو هتو. ⑭ زنيون اُو اسُس شهر موئين امون نئه پيڙو ٿيو، تنيون اُوئا نئه

ٻيڙا موئين ساڙين امي مٽليني شهر موئين گيا. ⑮ پيڙه ڏي امي اوئون ٻيڙا موئين زائين خيس نومي ٻيٺ مانھ آوين پوگيا. اوئون پيڙه ڏي سامس نومي ٻيٺ مانھ پوگيا، ان پستنه اوئون وڙي پيڙه ڏي ميليتس شهر موئين آيا. ⑯ امي افسس شهر موئين نه گيا، ڪم تو پولوس ڦينصلو ڪريو تو جي افسس شهر نئه پاھو ڏيون، زم اوڻه آسيه صوپا موئين گهڻي وار نه لاڳنه. هائي تڪڙا ايتا هارو ڪرتو تو زم، جي ٿي هيڪنه، تو پينتيڪوست پرڀ يروشلم شهر موئين مناوي هيڪنه.

پولوس قيتي تيا ٿي مور

افسس شهر ري منڌري رون اڳيونون ٿي مڙه

⑰ پولوس افسس شهر ٿي اوت ري وشواسي منڌري رون اڳيونون نٿه آپ ڪن ميليتس شهر موئين تيزايا. ⑱ زئون اوتا ڪن آيا، تئون پولوس اوتون نٿه ڪيڌو: ”تمون نٿه ڪهر سٺه جي هون آسيه صويا موئين پوگين پيرهياڻ ڏي ٿي لين هر وڪت تمون پيو ڪم ڪرين ريو. ⑲ يهودي منڪون رون ڪراپ منصوپون ري ڪري هون گهڻو ڏکي ٿيو، ان مون مانھ گهڻا آزمتا آيا، توئي پڻ هون روتون روتون من ري پوري گريبي ٿي پريو رئي شيوا ڪرتو ريو. ⑳ تمون نٿه اي پڻ ڪهر سٺه جي هون تمون نٿه ڪئين پڻ وات همپزيا ٿي نه پيوڻو جئي تمارا قائدا رئي هوئ. مئين تمون نٿه ٻڌون رٿه رويرو ان گهري گهري زائين پڻ شيڪاريا، ㉑ ان يهوديون ان ڌاري قوم رون منڪون نٿه هزميا جي او آڀرا ڪراپ ڪوم ساڌين توبونه ڪرٿه ان پگيون ري وات مانھ وٺ، ان آڀا پريو ايسو مانھ وشواس اوٿم.

㉒ هوئ هون پويتر آتما را ڪيڌا ٿي يروشلم شهر زائونه ريو، پڻ ڪهر نئين اوٿم مون ٿي ڪي ٿيشي. ㉓ مون نٿه روگئي اتئي ڪهر سٺه جي پويتر آتما مون نٿه هر شهر موئين هوشيار ڪرٿه جي منڪ مون نٿه جيل موئين پوراوشي ان مون نٿه گهڻا ڏک ٿيشي. ㉔ پڻ مون نٿه آڀرا جيرو رئي گنتئي نٿي، نڪو مون هارو اي قيمتي سٺه. پڻ مون هارو ٻڌون ٿي موٽي وات اي سٺه، جي جيو ڪوم ان شيوا پريو ايسو مون نٿه ڪريا هارو ڏيڏيه، او هون پوري ڪرون. ان او ڪوم اي سٺه جي پگيون ري ڪريا را پارام ڪشي رئي ڪهر همپزاوون.

㉕ هوئ مون نٿه ڪاتري سٺه جي تمي ٻڌائي، جيون نٿه مئين پگيون را راز ري واتون ايل اول زائين همپزاويه، او وزي مارو مونديو نئين ڏيڪه. ㉖ تيام هون تماره رويرو آڀري اي هاڪ پرونه، جي پگيون تمون نٿه هميش رئي

سزا ڏئ، تو ايتام مارو ڏوه نٿي، (27) ڪم تو مٿين پيڪ ٿي ماڻ نٿي ڪرڻي پڻ پڳوون رڻي ٻڌڻي مرضي تمون نٿه همپڙاويئھ.

(28) تمڻي آڀرو ان ٻڌي وشواسي منڌڙي رو ڪيال راکو، جيا مانھ پويتر آتما تمون نٿه همپڙيا واڙا راکياھ. زم ڌراڙ آڀرا ڌڻ رڻي همپڙ ڪرڻھ، تم تمڻي پڳوون ري منڌڙي رڻي همپڙ ڪرتا ريا، جيئي پڳوون آڀرا ڏيڪرا را موت ٿي آڀ ھارو ناويئھ. (29) مٺون نٿه ڪٻر سٺه جي



مارا زايا ڪيڙ ايو پونڌا منڪ آوشي جيا ڪيا رو ئي ڪئين قياس نئين ڪرڻھ ان زم نار ڌڻ موئين نقصون ڪرڻھ، ھم

اوشواسي منڌڙي نٿه ٻڳاڙشي. (30) تمون موئين ٿي پڻ ڪوڪ منڪ ايو اٿيشي، جيا وشواسيون نٿه آڀ ھوما توڻيا ھارو آڏي اوپتي واتون ڪرشي. (31) تيام تمڻي ھوشيار ريا، ان ياد راکيا جي مٿين ترڪ سال ڏي رات گھڻا ڏک سھين ھر ھيڪ نٿه ھميش ھڙماوتو ريو.

(32) ھوئھ ھون تمون نٿه پڳوون ري همپڙ موئين ڏيونھ، ان تمون نٿه منڻ ڪرونھ جي تمڻي پڳوون ري ڪرپا رو وچن مونتا ريو. ايٺا وچن نٿه مونيا ٿي تمون نٿه حوصلو زڙشي ان تمارو يقين پڪو ٿيشي، ان تمون نٿه آڪاش موئين او ھڪ زڙشي جيو پڳوون آڀرون ٻڌون سونڊل منڪون نٿه ڏيشي. (33) مٿين ڪيا منڪ ري شينھ رڻي لالچ نٿي راکئي، نه سون رڻي، نه چونڌي رڻي، نڪو لوگھڙون رڻي. (34) تمون نٿه ڪٻر سٺه جي مٿين آڀرون ھاڻون ٿي ڪوم ڪرين آڀرڻي ان آڀرون ساڻيون رڻي پورت ڪرئھ. (35) جيئن ڪئين مٿين ڪريوھ، اونا ٿي مٿين تمون نٿه نمونو ڏيڏوھ جي ھيوئھ نمونئھ مينت ٿي روزڻي ڪمائين ضرورت واڙون رڻي مڌت ڪروو ڪپئھ، ان پرڻو ايسو رڻي اي ڪيڏل وات ياد راکو ڪپئھ جي 'پاڳواڙو او سٺه جيو لالچ نٿي راکتو ان پيزون نٿه ڏئھ.' "


(36) زئيون پولوس ھاڻي واتون ڪي ريو، تئيون ٻڌون پيڙو ڳوڏا ڪوڙين پراٽنا

ڪري. ③۷ اُو ٻڌائي ڏوهڪي ڏوهڪي رويَا ان پولوس ننه ٻاٽ نوکين ٻوسڪا لڏيا. ③۸ اُوئون ٻڌون ننه ايٺا وات رو ٻڌون ٿي گهڻو ڏک ٿيو، جي اُوڻه ڪيڏو تو: ”تمي وڙي مارو مونيو نئين ڏيکو.“ پسئو اُو پولوس ٻيڙا ٿين اُوڻا ننه ٻيڙا مانه ساڏوا ڳيا.

پولوس بيڪ وڳر يروشلم شهر موئين زائھ

21 ①امي اُوئون ٿي موڪلاوين رَوونا ٿيا ان ٻيڙا مانه سڙين سڌا ڪوس نومي ٻيٽ مانھ آيا. ٻيڙه ڏي اُوئون رُدس نومي ٻيٽ مانھ آيا، ان اُوئون وڙي پتره شهر موئين زائين اوتريا. ②اُوڻه امون ننه فينيڪي علاقا هومو زايا وازو ٻيڙو زڙيو، تو امي اُوڻا ٻيڙا موئين سڙين رَوونا ٿي ڳيا. ③آڳڙ زائين زئيون ڪپُرس ٻيٽ امون ننه ڏيڪيام آيو، تئيون اُوڻا رُڻه ڏکڻاڏيئھ پاهڻه ٿين سوريه صوپا هوما مٽي ڳيا. تيا ڪيڙ امي صُور شهر موئين پوڳين ٻيڙا ٿي نيسا اوتريا، ڪم تو اُوڻه ڪئينڪ واپار رو شيمون اوتاروو تو.

④اُوڻه امي وشواسيون ننه ڳوتي لڏيا، ان اُوئون ڪن هات ڏي ريا. اُوڻ رُون وشواسيون ننه پوٽر آتما ڪٻر ڏيڏئي جي پولوس ننه يروشلم شهر موئين ڏک ٿيشي، تيام اُوڻي پولوس ننه منٿ ڪري جي اول هومو نه زائھ. ⑤پڻ



زئيون امارئہ اوئون زايا رو توئون ٿيو، تو امي رونا ٿيا. ان او ٻاري ٻسي امون
پيڙا ٿين شهر ٿي ٻارا امون ننه ساڏوا آيا. امي ٻڌي پيڙي سمونڊ را ڪپ مانھ
گهوڏا ڪوڙين پراٽنا ڪري، ⑥ ان پسته هيڪا پيڙا ٿي موڪلاوين امي پيڙا مانھ
سڙيا، ان او پاسا گهري ڳيا پرا.

⑦ پسته امي صور شهر ٿي پيڙا موئين وڙي رونا ٿيا ان پتلپيس شهر موئين
پوڳيا. اوئنه امي وشواسي پايون ٿي مڙيا ان اوئون ڪن هيڪ رات تڪي ريا.
⑧ پيڙه ڏي امي اوئون رونا ٿيا ان قيصره شهر موئين زائين پوڳيا. اوئنه امي
فلپس ري گهري زائين تڪيا، جيو ايسو را پارام ڪشي ري ڪهر همپزيا وازو
هيڪ هتو، ان اوئون هاتون زئون موئينليو هتو، جيون ننه يروشلم شهر موئين
امداد ورايا هارو سونڊيا تا. ⑨ ايٺا ري چار ڪوناري ڏيڪري هتي، ان او چار
ئي پڳوون رو نياپو ڏيڏا واري هتي.

⑩ زئيون امي اوئنه گهڻا ڏي ريا، تو يهوديه علاقا ٿي هيڪ پڳوون رو
نياپو ڏيڏا وازو آيو، جيا رو نوم اگبس هتو. ⑪ اوئنه امون ڪن آوين پولوس رو
او لوگهڙو ليدو، جيو پولوس ڪريون م بوندتو، ان اوئنه آپرا هات پڳ اوئا ٿي
بوندن ڪيڏو: ”پويتر آتما ام ڪئھ: جيا رو اي لوگهڙو سئھ، اوئا ننه يروشلم
موئين يهودي ام بونڌشي ان ڌاري قوم وازون ڪن زهلاوشي.“ ⑫ زئيون امي
هائي وات هومپڙي، تو امي ان اوٽ ري منڪي پولوس ننه منٿ ڪرين ڪيڏو
جي يروشلم موئين نه زائھ. ⑬ پڻ پولوس ڪيڏو: ”تم اي ڪي ڪروھ ريا؟
ڪم روئوھ ريا ان مون ننه ڏڪي ڪرين مارئي هيمنت گهٽ ڪروھ ريا؟ هون تو
يروشللم موئين پريو ايسو را نوم مانھ نه روڳو بنڌايا هارو، پڻ آپرو جيو ڏيڏا
هارو پڻ تيار سون.“

⑭ زئيون اوئنه امارئي وات نه مونئي، تو امي ام ڪين ماٺ ٿي ڳيا جي ”زم
پريو ري مرضي هوئھ، هم تئھ!“

⑮ تيا ڪيڙ امي سنپرين يروشلم شهر هوما ڳيا. ⑯ ان ڪينڪ قيصره

شهر را وشواسي پڻ امون پيڙا هاليا. اُو امون ننه هيڪا مناسونَ نومي منڪ ري گهري تيڙي گيا، جيا ڪن امارئہ ريوو تو. اُو ڪپُرس بيت رو هتو، ان زُونو وشواسي هتو.

پولوس يروشلم شهر ۾ زهلائي زائھ

پولوس يروشلم شهر ۾ يعقوب تي مڙھ

⑰ زئيون امي يروشلم شهر موئين پوگيا، تو اوت را وشواسي پائي ڪشي ٿي امون ٿي مڙيا. ⑱ پيڙه ڏي پولوس امون پيڙو ٿين يعقوب ٿي مڙوا هاليو. اوتنه وشواسي منڌڙي را ٻڌائي آڳيوون پيڙا هتا. ⑲ پولوس اوتون ٿي مڙين هر هيڪ وات همپڙاويي جي پڳوون اوتا را ڪوم ٿي ڌاريون قومون موئين ڪراويي ٿي. ⑳ زئيون اوتي هاڻي واتون هومپڙي، تو پڳوون را وڪوڻ ڪروا لاگيا. ان پسته اوتي پولوس ننه ڪيڏو: ”تمون ننه ڪبر سته، پائي، جي يهوديون موئين ٿي هزاري منڪ وشواسي ٿي گيا، ان اُو ٻڌائي موسي رون لڪل حڪمون مانھ گهڻا جونش ٿي وھ ريا. ㉑ پڻ تمارا پارام اوتي ام هومپڙيوھ جي تم ڌاريون قومون موئين ريا واڙون ٻڌون يهوديون ننه موسي رون لڪل حڪمون ننه ساڌيا رو شيڪاڙوھ، ان تم ڪوھ جي اُو آپرون سوڪرون رئي توھر نه ڪراوئ، ان يهودي ڌرم رون رواڙون مانھ نه وئ. ㉒ هوئھ آبي ڪي ڪرشن؟ ڪم تو اوتون ننه تمارا آيا رئي ضرور ڪبر پڙشي. ㉓ تيام هوئھ زم امي ڪونھ هم ڪرو. امون ڪن ايوا چار منڪ سته، جيئي پڳوون را نوم مانھ پاسني پاسي تي. ㉔ هوئھ تم ٿي اوتون پيڙا ٿين سونت ليڏا رئي ريت ڪرو، ان زئيون اُو آپرا مٿوئڙ ڪتراوين پڳوون را نوم مانھ مال سڙاوتھ، تو تم ٿي اوتون رو ڪرچ پري ڏيا. هيوتھ نمونئھ ٻڌون منڪون ننه ڪبر پڙشي جي زم تمارا پارام واتون هومپڙي، اُو ڪوڙي سته، ان تم ٿي آپ پڻ يهودي ٿين موسي رون لڪل حڪمون مانھ ووھ. ㉕ پڻ ڌاري قوم

واڙا جيئي ايسو مانھ وِشواس اوڻيوھ، اُوئون ھارو امي اڳي ڦينصلو ڪرين لکي
ميليو تو جي اُوئون رٿه رُوڳو ڏيوئونون را نوم مانھ ساڙل مونھ نہ ڪاوو، لوئي
نہ ڪاوو، ان ايوا مال رو مونھ نہ ڪاوو. جيو ٿونپو ڏين مارل ھوئہ، پڻ ھلالل مال
ڪاوو، ان پُونڌو کوم نہ ڪروو.

②6 پستہ پيزئہ ڏي پولوس اُوئون چارون منڪون نئہ تيڙين اُوئون پيزو سونت
ليڏا رٿي ريت ڪرين پڳوون را گھر موئين گيو. ان اوت رن پوزاريون ٿي ڏي
پونڌيو، جي زئيون اُوئون را سونت ليڏا را ڏي پورا ٿيشي، اوتا ڏي مانھ اُوئون
چارون زئون ۾ ھر هيڪ رٿه پڳوون را نوم مانھ پوزاريون ٿي مال سڙاوو.


پولوس نئہ پڳوون را گھر ٿي بارو ڪاڍين زھلاوئہ

②7 زئيون سونت ليڏا را ھات ڏي پورا ٿيا واڙا ھتا، تو آسيہ صوپا ري ڪئينڪ
يھودي منڪي پولوس نئہ پڳوون را گھر ۾ موئينليئہ وڙ ڏيڪيو. اُوئي ٻڌون
منڪون نئہ پولوس رٿه ڪلاڦ ڪرين اوتا نئہ زھاليو. ②8 اُوئي زور زور ٿي ڪيڌو:
”او اسرائيلي پاڻيون، امارئي مدت ڪرو! اي او منڪ سئہ جيو ٻڌيل زائين ٻڌون
منڪون نئہ آپئي قوم، موسي رن لڪل حڪمون، ان پڳوون را گھر رٿه ڪلاڦ
شيڪارڙھ. ان ھمئئہ ايئہ ڪئينڪ ڌاري قوم رن منڪون نئہ ايئہ پڳوون را گھر
۾ موئينليئہ وڙ تيڙي آوين ايئا پويتر جڳا نئہ اپڙاوئہ پريي.“

②9 ھائي وات اُوئي ايئا ھارو ڪري جي اُوئي افسس شھر را ھيڪا ڌاري
قوم را منڪ نئہ پولوس پيزو شھر موئين ڏيڪيو تو، جيا رو نوم ترفمس ھتو،
ان اُوئي امر ھزميو جي پولوس يھودي ڌرم رو حڪم توڙين ھايا ڌاري قوم را
منڪ نئہ پڳوون را گھر ۾ موئينليئہ وڙ تيڙي آيوھ.

③0 پورا شھر موئين گھڻي ڦشري ٿي گهي، ان اسرائيلي قوم را منڪ ڍوڙي
آوين پيزا ٿيا، ان پولوس نئہ زھالين ڊيھڙين پڳوون را گھر ٿي بارو ڪاڍيو، ان
ھٽيڪا اوتا را ڌروازا پنڌ ڪريا پرا.

(31) اُو پولوس نئه نمُو ماريا رئي ڪوشش ڪرتات ريا، تو ڪيئنڪ اُوت ري رومي قوج را موٽا ساپ نئه ڪهر ڏيڏئي جي پورا يروشلم موئين قشريئي تئه رئي. (32) اُو جلدِي ۾ آپرون ساپون ان قوجيون نئه پيڙا لين قشريئي ڪريا وازون ڪن ڊوڙي آيو. منڪي زئيون موٽا ساپ نئه قوجيون پيڙو آوتون ڏيڪيو، تو پولوس نئه مارو پند ڪريو. (33) تئيون موٽه ساپ آوين پولوس نئه زهاليو، ان اُوتا نئه هي هٽڪڙي هٿيا رو حڪم ڏيڏو. ان پسئ اُو منڪون ٿي پونسوا مڏيو جي ”اي ڪوڻ سئ، ان ايئا رو ڪيوو ڏوه سئ؟“ (34) اُوئه توتئه منڪ گهٽئي



ٿائي ڪروا لاڳيا. هيڪ منڪ هيڪ وات ڪرتو تو، تو پيڙو وڙي پيڙي وات. اتئي ڪاش هٽئي جي موٽو ساپ اصلي وات رئي ڪهر پاڙي نتو هيڪتو. تيام اُوئه حڪم ڏيڏو جي پولوس نئه قوجيون را گهڏ موئين لي زائه. (35) زئيون پولوس گهڏ ري ساڙي ڪن پوگيو، تو منڪي پولوس نئه ماريا هارو اتو زور لڳاڙيو، جي قوجيون رئه اُوتا نئه پچايا هارو اُوپاڙو پڙيو، (36) ڪم تو منڪ وونهي زور ٿي ڪيتا آوتات ريا جي ”ايئا نئه مارو پرو!“

پولوس يهوديون نئه آپ را پارام ڪئه

(37) زئيون رومي قوجي پولوس نئه گهڏ موئين لي زايا وازا هتا، تئيون پولوس قوج را موٽا ساپ ٿي يوناني ٻولي ۾ پونسو: ”ڪي هون ڪيئنڪ وات ڪي هيڪون؟“

تو ساپ ڪيڏو: ”تُون نئه يُوناني ٻولي آهه، ڪي؟“ (38) پسته تُون اُو مصر ملڪ رو منڪ نتي ڪي، جيئنه ڪئينڪ ڏي اڳي رومي حڪومت رئه ڪلاڻ ڦشرئي ڪراوئي تئي، ان چار هزار وڊيا واڙا منڪ آپ پيڙا لين رڻ موئين گيوت پرو؟“

(39) پولوس ڪيڏو: ”نا ساپ، هُون تو يهودي سون. هُون ڪلڪيه صُويا را موٽا شهر ترسُس رو سون. مارئي وينتئي اي سئه، جي ميرپونئي ڪرين مُون نئه آپري اسرائيلي قوم رون منڪون ٿي ٻوليا رئي موڪل ڏيو.“

(40) زئيون ساپ موڪل ڏيڏئي، تئيون پولوس ساڙي مانه اُوپين هات را اشارا ٿي منڪون نئه ماڻ ٿيا رو ڪيڏو. زئيون ٻڌائي ماڻ ڪري ڳيا، تئيون پولوس عبراني ٻولي موئين ام ڪيا مڏيو:

22 ① ”او اسرائيلي پاڻون ان قوم رون آڳيونون، مارئي وات هومپڙو! هوه هُون آپ را پارام تمون نئه ڪئينڪ ڪونه.“ ② زئيون اُوئي پولوس نئه اُوئون ري آپري عبراني ٻولي موئين ٻولتون هومپڙيو، تو وڌارئه ماڻ ڪري ڳيا. تئيون پولوس وڙي ڪيڏو:

③ ”هُون يهودي سون. مارئي پيڏائيش ڪلڪيه صُويا را ترسُس شهر رئي سئه. ايتئه يروشلم شهر موئين هُون نونو موٽو ٿيو، ان گملي ايل ڳرو رو شيلو ٿين اُوئا ٿي موسي رون لڪل حڪمون رئي هر وات شيڪئي، جيا حڪم پڳوون آڻئون ٻاپ ڏاڏون نئه ڏيڏا تا. هُون پڳوون رئي شيوا ايووا جونش ٿي ڪرتو، زم تم ٻڌائي همئه ڪروه. ④ مئين ايسو را ايئا ڏيڪاڙل مارڳ مانه وُڊا واڙون مانه ايوو ظلم ڪريو، جي آدميون ان ڏوشيون نئه زهلاوين جيل موئين پُورايا، ان ڪيونڪ نئه مرايا پرا. ⑤ مُڪ پوزاري ان ٻڌئي ڌرمي پنچائيت مارئي هاڪ پري هيڪهه جي هُون هاس ڪونه ريو. هُون اُوئون ٿي يهودي پاڻون هارو اجازت نوما را ڪاڳر لين دمشق شهر هومو ڳيو، زم اوت رون وشواسيون نئه زهلاوين پاسو يروشلم شهر موئين سزا ڏيورايا هارو لي آوون.“

پولوس همپزاوئھ جي او ڪم ڪرين وشواسي ٿيو

⑥ ”زنيون هون پنڌ ڪرتو دمشق شهر ڏوڪڙو پوگيو، تنيون پپورون رڻه توتنه اوچتو آڪاش ٿي مارڻه چوڌاري گهڻو سوجهرو چلڪيو. ⑦ هون زمي مانھ پڙيو ٿو، ان هيڪ اواز مون ننه ام همپزيام آيو: ’سائول، او سائول، تون مون ننه ڪم تنگ ڪرڻه؟‘ ⑧ تيا مانھ مئين ڪيڏو: ’پريو، تمي ڪوڻ سو؟‘ تو اوڻه مون ننه ڪيڏو: ’هون ايسو ناصرت شهر وازو سون، جيا ننه تون تنگ ڪرڻه.‘ ⑨ جيا منڪ مون پيڙا هتا، اوئي سوجهرو تو ڏيڪيو تو، پڻ جيو مون ٿي ٻولتو تو، اوڻا ري واتون نتي همپزي. ⑩ تنيون مئين پونسيو: ’او پريو، مارڻه هوڻه ڪي ڪروو؟‘ تو پريو مون ننه ڪيڏو: ’اوئي، دمشق موئين زان! اوڻه تون ننه ٻڌو ڪئين همپزاوشي، جيو ٿارا ڪريا هارو پگوون راڪيوھ.‘ ⑪ او سوجهرو ايوو زبڪيو تو، جي هون اونڌو ٿي گيو تو، ان مارا ساڻي مون ننه هات موئين زهالين پاڏين دمشق شهر موئين تيڙي آيا.

⑫ اوڻه دمشق شهر موئين حنياه نومي هيڪ منڪ هتو، جيو موسلي رون لڪل پگوون رون حڪمون مانھ وودا وازو ڌرمي منڪ هتو، ان اوڻ رون ٻڌون يهوديون موئين اوڻا رو مون هتو. ⑬ او مون ڪن آيو ان ڏوڪڙو اوپين ڪيڏو: ’پاڻي سائول، وڙي ڏيڪا! اوڻه ئي توتنه هون وڙي ڏيڪو مڏيو ان اوڻا هومو زويو. ⑭ پسڻه اوڻه ڪيڏو: ’آپتون ٻاپ ڏاڏون رڻه پگوون تون ننه ايڻا هارو اگي سونديوه زم تون ننه ڪبر پڙڻه جي اوڻا رڻي مرضي ڪي سڻ، ان تون اوڻا را پيڏوهي شيواڌاري ايسو ننه ڏيڪڻه، ان واتون ڪرتون همپزي. ⑮ ڪم تو تون اوڻا رڻي هاڪ پريا وازو ٿيھ، ان جئين ڪئين تئين ڏيڪيوھ ان همپزيوه، او تون ٻڌون منڪون هومو همپزاويھ. ⑯ هوڻه تون ڏير ڪم ڪرڻه ريو؟ اوئي، پريو رو نوم لين پويتر سنون لڻه، زم ٿارا ڏوه ماڦ ٿي زانھ.‘

پولوس هزماوئھ

جي او ڌاري قوم وازون ڪن ايسنو رئي هاڪ ڪم پرئھ

17 "تيا ڪيڙ هون پاسو ايتئھ يروشلم شھر موئين آيو. هيڪ وار هون پڳوون را گھر موئين پرائنا ڪرتوت ريو، تو مون نئھ شپنا را زم پريو ڏيڪارو ڏيڏو. 18 اونه مون نئھ ڪيڏو: 'جلدي ڪر! يروشلم ٿي نيھري زا! ڪم تو جي واتون تون مارا پارام هاڪ پرين همپزاويھ، ايت را منڪ اوئون نئھ نئين مونئھ.' 19 تيا مانھ مئين ڪيڏو: 'او پريو، اي منڪ مارئي هاڪ ڪم نئين مونئھ؟ اوئون ٻڌون نئھ ڪبر سئھ جي، جيا تمون مانھ وشواس راکتا، اوئون نئھ هون جيئون تيتون پڳوون رون منڌرون ٿي زھلاوين جيل موئين پوراوتو ان مراوتو. 20 اوئون نئھ ڪبر سئھ جي زئيون او تمارئي هاڪ پريا واڙا استيفنس نئھ مارتات ريا، تو هون آپ اوئھ اوپل هتو، ان هايا وات مانھ ڪش هتو، ان اوئا رو ڪون ڪريا وازون رون توتالون رئي همپاز ڪرتوت ريو. 21 پڻ پريو مون نئھ ڪيڏو: 'ايتون زا پرو، ڪم تو هون تون نئھ شيتي ڌاريون قومون موئين ميلونھ.' "

22 اتي وار هوڏي يهودي پولوس رئي وات هومپزتا ريا، پڻ هايا وات مانھ او زور ٿي ڪيا مڏيا: "ايتا منڪ نئھ مارو پرو، ڪم تو ايو منڪ نئھ دنيا موئين نه ريوو ڪئھ." 23 او ڳوڙ ڪرتات ريا، آپرا توتال اونس اونس ڪرتات ريا، ان رينھ ٿي ڏوڙ اوڏارتات ريا. 24 تتيون قوچ رئھ مونئھ ساب حڪم ڏيڏو جي "ايتا نئھ گھيڊ موئين لي زائو، ان قٽڪا هئين اوئا ٿي هاسئي ڪراوو!" هيونھ نمونئھ او ڪبر پاڙوا ڪرتو تو جي پولوس رو ڪيوو ڏوھ سئھ، جيا ري ڪري يهودي اتو ڳوڙ ڪرئھ ريا.

25 زئيون اوئا نئھ ڇاڀڪا هئا هارو ٻونڌيو، تتيون پولوس ڏوڪڙا اوپل قوچ را هيڪا ساب ٿي پونسيو: "روم را قانون پرمونئھ تمي هيڪا رومي منڪ نئھ ڦينصلو ڪريا وڳر ڇاڀڪا هئي هيڪوھ، ڪي؟" 26 قوچ رو ساب اي هومپزين

سِدو موتا ساپ کن گپو ان کيدو: "تمی ای کي کروه ریا؟ ای منک تو روم ملک رو سئ." ②۷ تیا مانه موتو ساپ پولوس کن گپو ان کيدو: "هاسي وات همپژاو، تون روم رو سئ کي؟" تو پولوس کيدو: "هوئ." ②۸ تو موتئ ساپ کيدو: "مئين الاهي گهئا پئها دين رومي تيا رو حق ليدوه." پڻ پولوس کيدو: "هون تو زلم ٿي لين روم رو سون."

②۹ پسئ جيا قوجي پولوس نئ چاڀکا هتيا وازا هتا، او جلدی م پولوس نئ ساڏين هيکل گيا پرا. ان موتو ساپ پڻ گهئو پئوئو، کم تو اوئا نئ کهر پڙئي جي پولوس روم رو سئ، ان اوئ قانون رئ کلاف اوئا نئ هتکري هئاوي تي.

پولوس نئ ترمي پنچائيت هومو تيڙاوئ

③۰ پيزئ ڏي قوج رئ موتئ ساپ موتون پوزاريون ان ترمي پنچائيت رون ٻڌون ميمپرون نئ پنچائيت موئين پيزا تيا رو کيدو، کم تو او پکئي کهر پاڙوا کرتو تو، جي يهودي پولوس مانه کيوو ڏوه ڏئ ریا. تئيون اوئ پولوس نئ گهڏ ٿي بارو کاڍيو ان اوئا نئ لين پنچائيت هومو اوپاڙيو.

23 ① پولوس پنچائيت هومو ڏيون ٿي زوين کيدو: "اسرائيلي پاڻيون، هون آز هوڏي هاسا من ٿي پگهون رئي شيوا کرونه ريو." ② تيا مانه مُک پوزاري، جيا رو نوم حنياه هتو، پولوس کن اوپل منکون نئ حُکم ڏيتو جي پولوس نئ ٿپڙ هئئ. ③ تئيون پولوس اوئا نئ کيدو: "کوڙا منک، پگهون تون نئ سزا ڏيشي. تون مارو قينصلو پگهون رون حُکمون پرموتئ کريا هارو پئنه، پڻ تون تو پگهون رو حُکم توڙين قينصلو کريا وگر مون نئ ماریا رو کئ ريو."

④ تيا مانه جيا منک پولوس ڏوڪڙا اوپا تا، اوئي پولوس نئ کيدو: "تون پگهون را مُک پوزاري ٿي زم تم کم بولئ ريو؟"

⑤ تو پولوس ڪيڏو: ”پايون، مون نٿه ڪهر نٿي جي اي مڪ پوزاري سٺه. جي ڪهر هوٽ تو هون هم نه ڪٿ، ڪم تو شاستر موئين لڪل سٺه: آڀري قوم را آڳيون رئي ڳلا نه ڪرو.“

⑥ هوڻه پولوس نٿه ڪهر هٿي جي پنچائيت موئين هي پالتي سٺه، هيڪ فريسي پالتي ان پيزي صدوقي پالتي. تيام اوڻه پنچائيت نٿه زور ٿي ڪيڏو: ”اسرائيلي پايون، هون فريسي پالتي رو سون، ان مارا پاپ ڏاڏا فريسي هئا. اي ڪيس مون مانه تيام ٿه ريو، ڪم تو هون اينا وات مانه يقين راکونه جي پڳون مرلون نٿه وڙي جيوي اوناڙشي.“

⑦ زئون اوڻه هائي وات ڪيڏي، تيون فريسي پالتي را منڪ ان صدوقي پالتي را منڪ آيت موئين وڙگاوا مڏيا، ان پنچائيت پئون پالتيون م ٿي ڳئي. ⑧ ڪم تو صدوقي پالتي واڙا ام ڪه جي مرل وڙي جيوي نئين اوڻه، آڪاشي ڏوت نٿي هوتا، ان مريا ڪيڙ منڪ رو جيو ڪم ٿي زائ. پڻ فريسي پالتي واڙا اينا وات مانه يقين راکه جي پڳون مرل منڪون نٿه وڙي جيوي اوناڙشي، آڪاشي ڏوت سٺه، ان مريا ڪيڙ منڪ رو جيو ڪم نٿي ٿيو. ⑨ ڳوڙ وڌو ڳيو، ان نيٺ ڪئينڪ شاستر زوڻيا واڙا، جيا فريسي پالتي را هئا، اولين اويا ان گهڻا زور ٿي ڪيڏو جي ”امي اينا منڪ موئين ڪئين ڏوه نٿي ڏيڪتا. اي تو ٿي هيڪه جي ڪياڪ مرل منڪ ره جيو ڪا ڪيٽڪ آڪاشي ڏوت اونا ٿي واتون ڪري هوشي. تو پسٺه ڪيو ڏوه ٿيو؟“

⑩ زئون جهيڙو گهڻو وڌي ڳيو، تو قوچ رو موٽو ساڀ پياوا مڏيو جي متون منڪ پولوس نٿه مارڻه نه پرو. تيام اوڻه حڪم ڏيڏو جي قوچي گهڏي آوين پولوس نٿه پنچائيت موئين ٿي ڪاڍين پاسو گهڏي موئين لي زائ.

⑪ اوڻه ئي رات پريو ايسو پولوس ڪن آوين ڪيڏو: ”هيٺ راک، زم تئين ايتڻه يروشلم شهر موئين مارئي هاڪ پريه، هم روم شهر موئين پڻ تون مارئي هاڪ ضرور پريه.“

يهُودي پولوس نئه نمُو ماريَا رو هُون کائِه

⑫ پڙئه ڏي هَوار را کئينک يهُودي آوين پڙا ٿيا ان اُوئي آبت موئين اي کراپ منصُوپو ٺايو. اُوئي آپرا جيوَ رو هُون کائين وائيدو کريو جي ”زئيون هُودي پولوس نئه نمُو نئين مارون، تئيون هُودي آبي نڪو کاشون نڪو پيشون.“

⑬ هائي منصُوپو ٺايا وارا منک چاليهون ٿي گهڻا هئا. ⑭ پسئه اُوئي ٻڌي پڙا ٿين موتون پوزاريون ان آپري قوم رون آڳيونون ڪن زائين ڪيڏو: ”امي پڙا ٿين آپرا جيوَ رو هُون کاڏوه جي زئيون هُودي پولوس نئه نمُو نئين مارون، تئيون هُودي کئين نئين کائون پيئون. ⑮ تيام هَوه تمي ان تمارئي پنچائيت، اي پونهونو ڪرين قوج را موتا ساڀ نئه وينتئي ڪرو جي پولوس نئه وڌيڪ واتون پُونسيا هَارو تمون ڪن پنچائيت ڪن ميلئه. امي اُوئا رئي وات زوشون، ان اُوئا رئه تمون هُودي پُوگيا مور امي اُوئا نئه مارشون پرو.“

⑯ پولوس را پوئيزا نئه هايا منصُوپا رئي کهر پڙئي، تو اُوئه جون زائين پولوس نئه گهڊ موئين آوين همپڙايو. ⑰ تئيون پولوس قوج رون ساڀون موئين ٿي هڪا نئه هاڏ ڪرين ڪيڏو: ”ايئا سوکرا نئه موتا ساڀ ڪن تيڙي زائو، ڪم تو ايئا رئه موتا ساڀ ٿي کئينک وات ڪرووه.“ ⑱ تو ساڀ سوکرا نئه موتا ساڀ ڪن تيڙي گيو ان اُوئيه زائين ڪيڏو: ”پولوس قيڏي مُون نئه هاڏ ڪرين وينتئي ڪري جي ايئا سوکرا نئه تمون ڪن تيڙي آون، ڪم تو اي تمون ٿي کئينک وات ڪروا ڪرئه.“

⑲ موتو ساڀ اُوئا سوکرا نئه هاڏ موئين زهالين نوڪلائي موئين هڪئه پاھئه تيڙي گيو ان پُونسيو: ”تُون مُون ٿي ڪي وات ڪروا ڪرئه؟“ ⑳ تئيون سوکريه ڪيڏو: ”يهُوديئي آبت موئين تمون ٿي اي وينتئي ڪريا رو ڦينصلو ڪريوه جي هَواري تمي پولوس نئه ڌرمي پنچائيت موئين تيڙي آو، زم اُوئا را پارام وڌيڪ صحيح کهر پاڙئه. ㉑ پڻ تمي اُوئون رئي وات مت مونيا، ڪم تو

اُئون را چاليهون ٿي وڌيڪ منڪ شيرڙا مانھ ھٽائين پناھ. اُئي آڀرا جيو رو ھون ام ڪاڌو جي زئيون ھوڏي اُو پولوس نھ نمونين مارھ، تئين ھوڏي نڪو ڪاشي نڪو پيشي. اُو ھمئھ سنڀرين پناھ، ان اُو روڳا تمارا ڦينصلا رئي وات زوئھ ريا.

②② تئين موئھ ساڀ اُئا نھ گھڻو گھڻو ڪيڏو: ”اي واتون جي تئين مون نھ ھمڀراويھ، اي پيزا ڪيا نھ مت ھمڀراوي.“ پئھ اُئھ سوڪرا نھ زايا رئي موڪل ڏيئي.

پولوس نھ صنويا مانھ راز ڪريا واڙا فيلڪس ڪن ميلئھ

②③ تيا ڪيڙ ڦوڇ رھ موئھ ساڀ پئون نونون ساڀون نھ آڀ ڪن تيرايا ان ڪيڏو: ”بي ھو ڦوڇي، پيزا ستر ڦوڇي گھوڙون مانھ سڙيا واڙا، ان بي ھو ڦوڇي پالا لين وڊيا واڙا، تيار ڪرو، ان تمڙي آڙ رات را نوي واڳي قيصر يھ شھر ھوما زائو. ②④ ان گھوڙا پڻ لي زائو، زم پولوس نھ گھوڙا مانھ ساڙين راز ڪريا واڙا فيلڪس ڪن ھازو ھورو پوڳاڙو.“ ②⑤ پئھ موئھ ساڀ اُئون ھات ام ڪت لڪين ڏي ميلو:

②⑥ ”جناب راز ڪريا واڙا فيلڪس ساڀ، تمڙي ھڪي ريو!

اي ڪت ھون ڪلودئس لوسياس لڪونھ ريو.

②⑦ ايئا منڪ نھ يھوڊئي زھاليو تو ان ھاو ماريا مانھ ھتا، پڻ ھون ڦوڇيون نھ لين اُئھ پوڳي گيو ان يھوڊيون ٿي پڇايوھ، ڪم تو مون نھ ڪبر پڙي گئي تي جي اي رومي سئھ. ②⑧ ھون ايئا نھ يھوڊيون ري پنچائيت موئين تيڙي گيو، زم ڪبر پاڙي ھيڪون جي يھوڊي ايئا رو ڪيو ڏوھ ڪاڏھ. ②⑨ پئھ مون نھ ڪبر پڙي جي يھوڊئي آڀرا ڌرم ريون واتون ري ڪري ايئا مانھ الزوم ھٽيوھ، پڻ ايئا مانھ ايوو ڪئين الزوم نھ ھٽيو جيا ري ڪري ايئا نھ موت ڪا جيل رئي سزا ڏيو ڪئھ. ③⑩ زئيون مون نھ ڪبر پڙي جي ايئا منڪ رھ ڪلاف

ڪراپ منصوبو ٿيو، تئين جلدِي م تمون هومو روونو ڪريو، ان جيا منڪ ايٿا مانھ الزوم هئڻھ ريا، اوتون نئھ پڻ مئين ڪيڏوھ جي اوتمون ڪن آوين ايٿا رڻھ ڪلاڦ ڪيس ڪرڻھ.

① پسنھ ڦوڄي حڪم پرموئڻھ رات نون رات پولوس نئھ انتيترس شهر هُڊي لي ڳيا. ② پيزنھ ڏي پنڌ اول ڦوڄي گھڊ هوما پاسا ڳيا پرا، ان گهوڙون واڙا ڦوڄي پولوس نئھ آڳڙ تيڙي ڳيا. ③ زئينون او پولوس نئھ قيصره شهر موئين لين پوڳيا، تو اوتني صوپا مانھ راز ڪريا واڙا نئھ ڪت ڏيڏو، ان پولوس نئھ پڻ اوتن رڻھ خوالئھ ڪريو. ④ اوتھ ڪت پئين پولوس ٿي پونسيو: ”تون ڪيا صوپا رو سئھ؟“ زئينون اوتن نئھ ڪهر پڙئي جي پولوس ڪليڪه صوپا رو سئھ، جيا صوپا رون منڪون مانھ اوتن نئھ ڦينصلو ڪريا ربي اڪتيربي هئي، ⑤ تو ڪيڏو: ”هون تارو پيون تئين ليھ، زئينون جيا منڪ تارنھ ڪلاڦ سئھ، او پڻ آوشي.“ پسنھ اوتھ حڪم ڏيڏو جي پولوس نئھ ڦوڄيون را پاهرا هيٺ آپرا گھڊ موئين راکئھ، جيو اڳي هيروديس پاڏشا رو مولات هتو.

صوپا مانھ راز ڪريا واڙا ڪن يهودي پولوس مانھ ڪيس ڪرڻھ

24 ① پونسون ڏيئون ڪيڙ مڪ پوزاري حننياه يروشلم شهر ٿي قيصره شهر موئين آيو. او آپ پيزا اسرائيلي قوم را ڪئينڪ آڳيوون ان هڪا ترطلس نومي وڪيل نئھ پڻ تيڙي آيو. اوتنھ آوين اوتني صوپا مانھ راز ڪريا واڙا فيلڪس ڪن پولوس رڻھ ڪلاڦ واتون همپڙاوي.

② زئينون پولوس نئھ ڪورث موئين تيڙاوي، تو ترطلس اوتن مانھ ڏوھ ڏيوا لاڳيو: ”مونوازا فيلڪس، امي تماري ڪري گھڻا هڪ موئين ريونھ ڪم تو تمڻي ايوي هوشيارڻي ٿي راز ڪروھ ريا جي ايٿا صوپا موئين گھڻي ترقي ٿيھ. ③ امي هر نمونئھ ان هر جڳا مانھ تمارو گھڻو ٿورو مونونھ. ④ هون تمون نئھ گھڻي تڪليپ نئي ڏيوا ڪرتو، پڻ روڳڻي ٿوڙيڪ وينئي ڪرونھ، ميريوني

ڪرين اماري ٻي ترڻ واتون صير ٿي هومپڙو. ⑤امي ڏيکيوه جي اي منڪ ڪترا وازو سٺه. اي پوري دنيا موئين زائين ٻڌون يهوديون موئين قشري ڪراوڻه، ڪم تو اي ايسو ناصرت شهر وازا ري پالتي رو آگيوون سٺه. ⑥ان اينه اي پڻ ڪوشش ڪريه، جي پگيون را گهر ننه اڀراوڻه، پڻ امي ايئن ننه زهاليو رو: (امارو ڪيال هتو جي ايئن رو ڦينصلو امارا ڌرم پرموئنه ڪرون، ⑦پڻ ڦوج رو موٽو ساڀ لوسيپاس آيو ان ايئن ننه امون ٿي زوري لي گيو، ⑧ان ايئن رنه ڪلاڦ ڦرياد ڪريا وازون ننه ڪيڏو جي تمون ڪن آوڻه.) جيا ڏوهون را امي ايئن مانه الزوم هئون ريا، اوئون رئي زئون تمي آپ جونچ ڪرشو، تنيون تمي پوري ڪهر پاڙي هيڪشو.

⑨پسٺه يهوديني پڻ هايا الزوم موئين وڪيل رو پاهو ليدو ان ڪيو مڏيا جي ”هائي واتون هاسي سٺه.“

پولوس راز ڪريا وازا فيلڪس ننه آپرا پارام ڪنه

⑩پسٺه راز ڪريا وازنه پولوس ننه ٻوليا رو اشارو ڪريو. تنيون پولوس ڪيڏو:

”ساڀ، مون ننه ڪهر سٺه جي گهئون سالون ٿي تمي ايئن اسرائيلي قوم را ڦينصلا ڪرو ريا، تيام هون ڪشي ٿي تمون ننه مارا پارام همپڙاوونه. ⑪هزون ٻارنه ڏي مس ٿيا هون يروشلم موئين پگيون رئي پوزا ڪروا گيو تو، ان تمي پڻ هايا وات رئي ڪهر پاڙي هيڪوه. ⑫اوڻه ايئي مون ننه نڪو پگيون را گهر موئين ڪيا ٿي مقابلو ڪرتون ڪا منڪون ننه پيڙا ڪرين گڙڙ ڪرتون ڏيڪيو، نڪو پگيون رون منڌرون موئين ان نڪو شهر موئين هم ڪرتون ڏيڪيو. ⑬اي جيون واتون را مون مانه الزوم هئنه ريا، اوئون رئي ايئون ڪن ڪئين ٿا پتيئي نئي. ⑭پڻ هيڪ اي وات هون مونونه ريو جي هون آپرا ٻاپ ڏاڏون را پگيون رئي شيوا ايسو را ڏيڪاڙل مارڳ پرموئنه ڪرونه، جيا ننه اي گلت پالتي ڪنه،

ان هُون مُوسيٰ رون لڪل حُڪمون ريون ان پڳوونَ رو نياپو ڏيڏا واڙون ريون ٻڌيون لڪل واتون مانھ يقينَ راکونه. (15) مُون ننه پڳوونَ ٿي هاڳي آسريو سئھ جيوو ايئون ننه سئھ، جي پڳوونَ آپري وات مانھ وُڍا واڙون منڪون ننه ان نہ وُڍا واڙون منڪون ننه پڻ مريا ڪيڙ هيڪ ڏي جيوِي اُوناڙشي. (16) تيام هُون هميش اي ڪوشش ڪرونھ جي هُون نڪو پڳوونَ رو نڪو منڪون رو ڏوھ ڪرون ان مارو من صاڦ رنه.

(17) هُون گهئون سالون ڪيڙ يروشلَم موئين گپو تو، جي اوتنه زائين آپري قُوم موئين پڳوونَ را نوم مانھ ڪيريات ڪرون ان اوتا را نوم مانھ مال سڙاوين. (18) زئيون اوتني مُون ننه پڳوونَ را گهر موئين ڏيڪيو، تئيون هُون سونت لين هائي ڪوم ڪرتوت ريو، ان اوتنه نڪو مُون پيڙا گهڻا منڪ هتا نڪو ڪئين گڙهڙ تيتيت رئي. (19) مُون ننه جيئي اوتنه ڏيڪيو، اُو آسيه صُوپا را ڪئينڪ يهوڊي هتا. جي اوتون ڪن مارنه ڪلاڦ ڪئين وات سئھ، تو اوتون رنه ايتنه تمون هومو آوين مُون مانھ الزوم هئوو تو. (20) اُو تو نئي آيا، تو پسته هئو اي منڪ پلنه همپزاوئه جي زئيون هُون ايئون ري پنچائيت هومو اُوپو تو، تئيون ايئي مُون موئين ڪيوو ڏوھ ڏيڪيو. (21) ايئي رُوڳو مارو اي ڏوھ ڪاڍيو جي مئين ايئون هومو اُوپين زور ٿي ڪيڏو تو جي 'آز اي ڪيس مُون مانھ تمون هومو تيام تئھ ريو، ڪم تو مارو ايئا وات مانھ يقينَ سئھ جي پڳوونَ مرلون ننه وڙي جيوِي اُوناڙشي.'

(22) پسته راز ڪريا واڙنه فيلڪس، جيا ننه ايسو را ڏيڪاڙل مارڳ را پارام گهڻئي ڪهر هتئي، ڪيس ننه روڪيو پرو ان اوتون ننه ڪيڏو: "زئيون قُوج رو موٽو ساڀ لُوسياس اوشي، تئيون هُون تمارا ڪيس رو ڦينصلو ڪريھ." (23) پسته اوتنه قُوج را نونا ساڀ ننه ڪيڏو جي اُو پولوس مانھ ٻاهر وڌيڙاوتنه، پڻ اوتا ٿي نرمي هُون وئھ ان اوتا رون آپرون منڪون ننه اوتا رئي شيوا ڪريا ٿي نہ روڪئھ.

پولوس راز ڪريا واڙا فيلڪس ان اوئا ري ڏوشي نٿ ايسنو را پارام همپزاوئھ

②4 ڪئنيڪ ڏيئون ڪيڙ فيلڪس آپري دروسلہ نومي ڏوشي پيڙو آيو، جيئي يهودي قوم رئي هئي، ان پولوس نٿ تپڙاوين اوئا ٿي ايسنو ڪريست مانھ وشواس راڪيا را پارام واتون ھومپڙوا مڏيو. ②5 زئيون پولوس اوئا نٿ پڳوون ري وات مانھ وُڍا را پارام، آپري مرضي نٿ قابو م راڪيا را پارام، ان پڳوون ري آيا واري سزا را پارام ھزمايو، تئيون فيلڪس نٿ گھڻئي پيڪ لاڳئي ان پولوس نٿ ڪيڏو: ”ھمئڻھ زا پرو. وڙي زئيون مون نٿ توڻو زڙيو، ھون تون نٿ تپڙاوي لھ.“ ②6 اوئا نٿ اي اُميد پڻ هئي جي پولوس ڪئنيڪ رشوت ڏيشي. تيام او گھڙي گھڙي تپڙاوين اوئا ٿي واتون ڪرتو.

②7 پيئون سالون ڪيڙ فيلڪس ري جڳا مانھ پُرڪيس فيسٽس صوپا مانھ راز ڪروا آيو. فيلڪس يهوديون نٿ ڪُش ڪروا ڪرتو تو، تيام او پولوس نٿ پاهرام ساڏين گيو پرو.

پولوس روم را پادشا ڪن آپرو قينصلو ڪرايا ھارو تونھ ڏئھ

25 ① زئيون نوا راز ڪريا واڙا فيسٽس نٿ ايٿا صوپا موئين آيا نٿ ترڻ ڏي ٿيا، تئيون او قيصريه شهر تي يروشلم موئين گيو. ② اوئڻھ موئي پوزاريئي ان يهودي قوم ري آڳيووني پولوس رٿ ڪلاڻ فيسٽس ڪن واتون ڪري، ان اوئا ٿي ام وينتئي ڪرئي جي ③ ”مي ميروني ڪرين پولوس نٿ ايٿڻ يروشلم موئين تپڙاوو.“ ڪم تو اوئي اي ڪراپ منصوپو ٺايو تو جي پولوس نٿ ڪيٿڪ شيرڙا مانھ مراوئھ پرو. ④ پڻ فيسٽس ڪيڏو جي ”پولوس قيصريه موئين قيڏي سٺ، ان ھون آپ توڙونڪ ڏيئون ڪيڙ اول زايا وازو سون. ⑤ تيام تمون موئين جيا ڪاس منڪ سٺ، او مون پيڙا ھالڻھ، ان جي اوئھ منڪ ڪئنيڪ

ڏوه ڪريو هوشي، تو پلئه اوتا مانه الزوم هئنه.

⑥ فيسٽس اوتنه رُوگا آت ڪا ڏه ڏي ريو، ان پسئه قيصريه موئين گهيو پرو. پينته ڏي قينصلا ري گهاڙي مانه پيهين اونه حُڪم ڏيتو جي پولوس ننه ڪورٽ موئين لي آئه. ⑦ زئيون پولوس آيو، تو جيا يهودي يروشلم ٿي آيا تا، اُو اوتا رنه چوڌاري ڦري آيا ان اوتا مانه گهڻا موتا ڏوه ڏيو لاڳيا، پڻ اوتون رئي ڪئين ٿاڀي ننه ڏي هڪيا. ⑧ پولوس آڀرا پارام ڪيڏو جي ”مئين يهوديون را ڌرم رنه، پگهون را گهر رنه، ڪا روم را پادشا رنه ڪلاڦ ڪئين پڻ ڏوه نٿي ڪريو.“

⑨ تويي پڻ فيسٽس يهوديون ننه ڪُش ڪريا هارو پولوس ٿي پونسو: ”تون يروشلم موئين هاليه ڪا نا، زم اوتنه مون هومو ايئون واتون رو قينصلو تهن؟“ ⑩ پڻ پولوس ڪيڏو: ”هون همئنه رومي حڪومت ري ڪورٽ موئين اوپوه، ان مارو قينصلو ايئنه هوو ڪپنه. تمون ننه ٻڌئي ڪهر سئنه جي مئين يهوديون رو ڪئين ڏوه نٿي ڪريو. ⑪ جي هون ڏوهاري سون ان مئين موت ري سزا ڪاڏا جيوو ڪئين ڪوم ڪريو، تو هون مريا هارو تيار سون. پڻ جي اي الزوم جيا مون مانه هئنه ريا ٻڌائي ڪوڙا سئنه، تو ڪيا پڻ منگ رو اي حق نٿي جي اُو مون ننه ايئون رنه خواله ڪرئنه. تيام هون روم را پادشا ننه ڏونه ڏيونه، جي اُو مارو قينصلو ڪرئنه.“

⑫ تئين فيسٽس آڀرون صلاح ڏيڏا وازون ٿي صلاح ڪرين ڪيڏو: ”نيڪ سئنه. تئين روم را پادشا ڪن ڏونه ڏيڏيئهن. هون تون روم را پادشا ڪن زايئهن.“

فيسٽس پولوس ننه نونا پادشا اگريا ٿي ملاوئهن

⑬ ڪئين ڏيئون ڪيڙ اگريا پادشا ان اوتا رئي پين پريڪي قيصريه شهر موئين فيسٽس ٿي مزو آيا. ⑭ زئيون اُو ڪئين ڏي ريا، تئين فيسٽس اگريا پادشا ننه پولوس را ڪيس را پارام همپرايو جي ”هڪ منگ سئنه جيا ننه راز ڪريا

واڙو فيلڪس قيڌ موئين ساڏين گيهو پرو. (15) زئيون هون يروشلم موئين هتو، تو ايٿا منڪ رته. ڪلاڦ موٽي پوزاريئي ان يهودي قوم ري آگيونني مون ٿي واتون ڪري، ان منٽ ڪرئي جي هون ايٿا ننه سزا ڏيڏا رو ڦينصلو ڪرون. (16) پڻ مئين اوئون ننه ڪيڏو جي 'رؤم را قانون پرموئنه زئيون هؤڌي ڪياڪ منڪ ننه ڏوه ڏيڏا واڙون رته رويرو آڀرا پارام همپزيا رو موقعو نه زڙته، تئيون هؤڌي اوٿا ننه سزا نه ڏيو،' (17) تيام، زئيون او ايٿه آوين پيڙا ٿيا، تو مئين ڪئين ڌير نه ڪرئي، ان پيڙه ڏي مئين ڦينصلا ري گهاڏي مانه بيهين حڪم ڏيڏو جي اوٿا منڪ ننه تيڙي آوئه. (18) زئيون اوٿا رته ڪلاڦ منڪ اوئين اويا، تئيون اوئي ايوو ڪئين ڪراپ ڏوه نه ڏيڏو جيون رو مون ننه شڪ هتو، (19) پڻ اوئي روگو آڀرا ڌرم ريون ڪئينڪ واتون ري ڪري ان هيڪا ايسو نومي منڪ ري ڪري اوٿا مانه ڏوه ڏيڏو، جيو مري گيو تو، پڻ پولوس ڪئھ ريو جي او جيو تو سئھ. (20) مون ننه اي وات هزميام نه آوئي جي ڪم ڪرين ايئون واتون رئي صحيح جونج ڪرون، تيام مئين اوٿا ٿي پونسيو جي 'تون يروشلم موئين زايا هارو ڪش سئھ ڪا نا، زم اوٿه ايئون واتون رو ڦينصلو ٿئھ؟' (21) پڻ زئيون پولوس اي ڏونه ڏيڏي جي اوٿا رو ڦينصلو روم را پاڌشا ڪن ٿه ان اتي وار هؤڌي او پلئھ قيڌي رته، تئيون مئين حڪم ڏيڏو جي 'زئيون هؤڌي هون ايٿا ننه روم را پاڌشا ڪن نه ميلون، تئيون هؤڌي ايٿا ننه قيڌي راکو.'

(22) تئيون اگريا پاڌشا فيسٽس ننه ڪيڏو: "مارئي مرضي سئھ جي هون آڀ اوٿا ري واتون هومپزون." تو فيسٽس ڪيڏو: "پلئھ، تمي هؤاري اوٿا ري واتون هومپزيا."

(23) پيڙه ڏي اگريا پاڌشا ان اوٿا رئي بين برنيڪي گهٿا مون ان شون ٿي ڌريار موئين آيا. اوئون پيڙا قوج را موٽا ساڀ ان شهر را ڪاس منڪ هتا. زئيون فيسٽس حڪم ڏيڏو، تو پولوس ننه ڌريار موئين اوٿيو. (24) پسئھ فيسٽس ڪيو لاگيو: "اگريا پاڌشا ان ايٿه اول ٻڌون منڪون، تمون هومو اي او منڪ سئھ

جيا را پارام ٻڌي يهوديئي، يروشلم موئين ان ايتئہ قيصريہ موئين پڻ، مُون نئہ منٺ ڪرئي ان زور ٿي ڪيڏو جي 'ايئا منڪ رئہ جيوتو نہ ريوو ڪپئہ. ايئا نئہ موت رئي سزا ڏيو.' ②5 پڻ مئين ڪٻر پاڙيئہ جي ايئہ ايوو ڪئين ڏوھ نٿي ڪريو جيا ري ڪري ايئا نئہ موت رئي سزا ڏيون. پڻ ايئہ آپ ڏونھ ڏيڏئي جي ايئا رو ڦينصلو روم را پاڌشا ڪن ٿئہ، تيام مئين ايئا نئہ ميليا رو ڦينصلو ڪريوھ. ②6 پڻ ايئا را پارام مُون ڪن ڪئين پڪئي وات نٿي جي روم را پاڌشا نئہ لکين ڏي ميلون. تيام مئين ايئا نئہ تمون ٻڌون ھومو، ان ڪاس ڪرين، اگريا پاڌشا، تمون ھومو اوٿيوھ، زم تمي ايئا ڪيس رئي جونچ ڪرو، تو ھون ڪئينڪ لڪي ھيڪون. ②7 ڪم تو اي وات مُون نئہ ٺاٽوڪئي نٿي لاڳتئي جي ھون ھيڪا قيڌي نئہ ميلون، پڻ جيا الزوم اوٺا مانھ ھٿل سئہ، او صاف نہ لڪون."

پولوس اگريا پاڌشا ھومو آپرا پارام ھمپزاوئہ

26 ① تئيون اگريا پاڌشا پولوس نئہ ڪيڏو: "تُون نئہ موڪل سئہ. تُون پلئہ آپرا پارام ڪئينڪ ڪئہ." تو پولوس ھاٿ ٿي اشارو ڪرين آپ را پارام ام ڪيڏو:

② "اگريا پاڌشا جي، ھون آپ نئہ پاڳوازو ھزمونھ جي ايئون ٻڌيون واتون را پارام، جيون را ڏوھ يھودي مُون مانھ ڏئہ ريا، ھون آز تمون ھومو آپري وات ھمپزاوون، ③ ڪم تو تمي يھوديون ريون ٻڌيون ريتون روازن ان ڌرم ريون واتون ٿي گھڻا واقوب سو. تيام مارئي تمون نئہ وينتئي سئہ جي مارئي وات صير ٿي ھومپزو.

④ ٻڌون يھوديون نئہ ڪٻر سئہ جي ھون ننڪو ٿڪو مور ٿي آپرا ملڪ موئين ان پسئہ يروشلم شھر موئين ڪم ڪرين ريو. ⑤ اوئون نئہ شروع ٿي لين مارئي پوري ڪٻر سئہ، ان جي او ھاڪ پروا ڪرئہ تو او آپ ھاڪ پري ھيڪئہ، جي ڪم ڪرين ھون فريسي پالتي را نمونا پرموئہ ويتو، جئي آپڻا ڌرم رئي ٻڌون

ٿي پڪڙي پالڻي سئ. ⑥ ان همٿه اي کيس مُون مانھ تيام ٿيوھ، ڪم تو مُون نئھ پڳوونَ را اُونا وائڏا رو آسريو سئھ جيو اُوئھ آپتون پاپ ڏاڏون ٿي ڪريو تو، جي اُو مرلون نئھ جيوي اُونارڻشي. ⑦ اي اُو هاڳي وائڏو سئھ جيا رئھ پورو ٿيا رئي وات آپتي قوم رون ٻارون ذاتون را منڪ زوئھ ريا، ان ڏي رات پورا من ٿي پڳوونَ رئي شيوا ڪرئھ ريا. ان هائي پروسو راکيا ري ڪري، او پاڏشا، يهودي مُون مانھ الزوم هئھ ريا. ⑧ تم يهودي ايئا وات مانھ ڪم يقين ٿئي راکتا جي پڳوونَ مرلون نئھ جيوي اُونارڻي هيڪھ؟

⑨ اڳي هُون آپ سوچتو جي مُون نئھ ايسو ناصرت شهر واڙا رو نوم ليڏا واڙون رئھ ڪلاڦ گهڻو ڪئين ڪروو ڪپئ. ⑩ يروشلم شهر موئين مئين همروم ڪريو، ان موتون پوزاريون ٿي اجازت نوما لين هيون گهڻون پڳوونَ رون سُونڊل منڪون نئھ جيلون موئين پوريا، ان زئين ڪئين اُوئون نئھ موت رئي سزا ڏيڏا رو ڦينصلو ٿيو، تو هُون هميش هايا ڦينصلا را حق ۾ هتو. ⑪ ان مئين پڳوونَ رون ٻڌون منڌرون موئين گهڻي وار وشواسيون نئھ ماريا رئي سزا ڏيوراوين ايسو مانھ وشواس سڏاوا ڪريو. مُون نئھ اُوئون مانھ اتئي رينھ سڙتي، جي مئين نه روڳو يروشلم شهر موئين پڻ پيزون شهرون موئين پڻ زائين وشواسيون نئھ تنگ ڪريا.

پولوس آپرئ وشواسي ٿيا را پارام همپزاوئھ

⑫ ”هايون واتون هارو هيڪ وار هُون موتون پوزاريون ٿي اجازت نوما لين اُوئون را حڪم ڀرموئھ دمشق شهر هومو زاتوت ريو. ⑬ ٻپورون رئھ توئھ، پاڏشا جي، مئين شيرڙا مانھ آڪاش ٿي ايوو سوجهرو ڏيڪيو، جيا موئين ڏي ٿي پڻ گهڻي روشني هئي. اُو مارئھ ان مارون ساڻيون رئھ چوڌاري چلڪيو. ⑭ امي ٻڌائي زمي مانھ پڙيا نا، تو مئين هيڪ اواز آپري عبراني ٻولي موئين هومپڙيو: ’سائول، او سائول، تُون مُون نئھ ڪم تنگ ڪرئھ؟ تُون آپرو ماتو ڪم ڦوڙئھ؟

ڏٺي زئيون ڊڳا نٿه هوتي ٿي هاڪلڻه، تو ڊڳا رڻه لتون هٽيا ٿي اُوڻا نٿه ڪي
 ڦاٽڻو ٿيشي؟ (15) تو مٿين پُونسيو: 'پريو، تمي ڪوڻ سو؟' تيا مانھ پريو ڪيڏو:
 'هُون ايسو سون، جيا نٿه تون تنگ ڪرڻه. (16) پڻ هون اُوڻين اُوپ. مٿين تون
 نٿه ايٺا هارو ڏيکارو ڏيڏوه جي هون تون نٿه آڀري شيوا ڪريا واڙو راکون
 زم جئين ڪئين تئين مارا پارام ڏيڪيوھ ان جئين ڪئين هون تون نٿه ڏيکارڻه،
 تون اي واتون هاڪ پرين منڪون نٿه همپڙاون. (17) تاري اسرائيلي قوم ان ڌاري
 قومون، جيون ڪن هون تون نٿه ميلونھ، اُو تون نٿه ماروا ڪرشي، پڻ هون تون
 نٿه پڇاويھ. (18) تارڻه مارا پارام همپڙاوين اُوڻون را من موئين سوجهرو ڏيوو،
 اُوڻون نٿه اندارا ٿي ڪاڍين سوجهرا موئين اوڻوو، ان شيطون را قَوضا ٿي سڏاوين
 پڳوون هوما اوڻوو، زم مون مانھ وشواس اوڻيا ٿي اُوڻون نٿه ڏوهون رڻي ماڦي
 زڙه ان اُو پڳوون رون سونڍل منڪون پيڙا اوڻه."

پولوس ايسو رڻي هاڪ پريا را پارام همپڙاونھ

(19) "تيام، اگريا پاڌشا جي، مٿين پريو ايسو رڻي وات پورا من ٿي مونئي،
 جيئن مَن نٿه آڪاش ٿي ڏيکارو ڏيڏو تو. (20) ان مور ٿي مٿين دمشق شهر
 موئين، پسنه يروشلم شهر موئين، پسنه پورا يهوديه ملڪ موئين، ان پسنه
 ڌاريون قومون موئين زائين همپڙايو جي 'آپرا ڪراپ کوم ساڏين توبونھ ڪرو
 ان پڳوون هوما آوو، ان ايوا کوم ڪرو جيا ٿي ڪبر پڙهه جي تمڻي هاس ۾
 آپرا ڪراپ کوم ساڏياھ پرا ان پڳوون ري وات مانھ ووھ ريا. (21) ٻڌي وات
 هائي سڻه، جيا ري ڪري يهوديني مَن نٿه پڳوون را گهر موئين زهاليو ان
 ماريا رڻي ڪوشش ڪري. (22) پڻ پڳوون ري مدت ٿي هون آڙ ڏي هُوڏي هازو
 هورو سون ان نونون موتون ٻڌون نٿه هاڪ پرين همپڙاونھ. جيون واتون را
 پارام پڳوون رو نياپو ڏيڏا واري ان موسي اگي ڪيڏو تو جي ضرور ٿيشي،
 هون روڳي اُو واتون همپڙاونھ (23) جي پڳوون رو سونڍل پڇايا واڙو ڪريست

ڏک سھين مريوھ، ان ٻڌون مور موت ٿي جيوي اُونيوھ، ان اسرائيلي قوم ان ڌاري قومون رون منڪون نٿه ايتا وات رو سوجھرو ڏيتوھ جي پڳوون ھميش رو جيون ڏئھ.

②4 زئيون پولوس آپ را پارام اگريا پادشا نٿه ھم ڪيتوت ريو، تئيون فيستس زور ٿي ڪيڏو: ”پولوس، تون تو ڳونڏو ٿي ڳيوھ. ٿارٿه گھڻٿه علم تون نٿه ھاو ڳونڏو ڪريوھ پرو.“

②5 پڻ پولوس ڪيڏو: ”فيستس ساب، ھون تو ڳونڏو نٿي. ھون ھاسي ان عقل ري واتون ڪرونھ ريو. ②6 اي پادشا جيا ٿي ھون پيڪ وڳر ٻولونھ ريو، اي ايئون واتون را پارام ھزمئھ. مون نٿه يقين سٿه جي ايتا نٿه ھايون ٻڌيون واتون رئي ڪبر سٿه، ڪم تو جئين ڪئين ايسو ٿي ٿيو، اُو ھيڪٿه پاهٿه نئين، پڻ منڪون رٿه روپرو ٿيو.“ ②7 پسٿه وڙي پولوس پادشا نٿه ڪيڏو: ”اگريا پادشا، تمي پڳوون رو نياپو ڏيڏا وازون ري واتون مونوھ، ڪا نا؟ مون نٿه ڪبر سٿه تمي مونوھ.“

②8 تئيون اگريا پادشا پولوس نٿه ڪيڏو: ”تون ٿوڙا وڪت موئين مون نٿه وشواسي ڪريھ پرو، ڪي؟“

②9 تو پولوس ڪيڏو: ”پلٽھ ٿوڙا ڪا گھڻا وڪت ڄ، پڻ مارئي تو پڳوون ٿي اي پراٿنا سٿه، جي نه روڳو تمي پڻ پيڙا ٻڌائي جيا آڙ ھاري واتون ھومپڙھ ريا، مون جيوا وشواسي ٿئھ، پڻ قيڏي نه ٿئھ.“

③0 پسٿه اگريا پادشا، راز ڪريا وازو فيستس، پادشا رئي پين پريڪي، ان پيڙا جيا اوئون پيڙا پينل ھتا، اُو ٻڌائي اوئين اُويا. ③1 زئيون اُو ٻارا نيھريا، تو اُو ھيڪا پيڙا نٿه ڪيا مڏيا جي ”ھائٿه منڪ ايوو ڪئين ڏوھ نٿي ڪريو جيا ري ڪري ھايا نٿه جيل ڪا موت رئي سزا ڏيوو ڪپٿھ.“ ③2 پسٿه اگريا پادشا فيستس نٿه ڪيڏو: ”ھائي منڪ جي روم را پادشا نٿه ڏونھ نه ڏٺت، تو ھايا نٿه ساڏي ھيڪٿت.“


پولوس قیتي ٿينَ دنيا را ٻڌون ٿي موتا روم شهر موئين زانه ان اوڻه ايسو را پارام همپزاوڻه

فيسٽس پولوس نه روم را پادشا ڪن ميله


27 ① زئون صوپا مانھ راز ڪريا واڙهه فيسٽس ڦينصلو ڪريو جي روم
را پادشا ڪن زايا هارو امي پيڙا مانھ سڙين اٿلي ملڪ هوما زائون،
تئين اوني پولوس ان پيزون ڪئينڪ جيلون نه رومي قوج را هڪا نونا ساپ
رڻه خواله ڪريا، جيا رو نوم يوليس هتو، ان او قوج را اوڻا ٽولا رو هتو جيا نه
"پادشا رو ٽولو" ڪه. ② امي ادرمٽيم شهر را هڪا پيڙا مانھ سڙين روونا
ٿيا، جيو آسيه صوپا را ڪپ واڙون شهرون هومو زايا هارو تيار هتو. امون پيڙو
ارسترخس هتو، جيو مڪدنيه صوپا را ٿسلنيڪي شهر رو هتو.



پولوس قیّی تین روم شهر هومو زائده



③ پېژنه ډي امي صيدا شهر موئين پوگيا. اوته قوچ رنه ساب يوليس پولوس مانه اي ميرپونځي كرين پولوس ننه موكل ډيډي جي او پلنه پيڙا ٿي اوترين آپرون دوستون كن زانه ان جي كئين كپنه تولنه. ④ امي اوٿون وڙي پيڙا موئين روونا ٿين كپرس پيٽ رو پاهو لين اوٿا را اوٿ ډر وودا، كم تو امون ننه هومو وائرو ويتوت ريو. ⑤ پسنه امي كليكيه ان پمفوليه صوپون را كپ كن آگڙ زائين لوكيه صوپا را موره شهر موئين پوگيا، ان اوته اوٿا پيڙا ٿي نيسا اوتريا. ⑥ اوته قوچ رنه ساب هيك پيزو پيڙو ڳوتي ليدو، جيو اسڪندريه شهر رو هتو ان اٽلي ملك هومو زايا واڙو هتو. تئين اوته امون ننه اوٿا پيڙا مانه ساڙيا. ⑦ وائرو امون هومو ويتوت ريو، تيا ري كري پيڙو هٿيون هٿيون زاتوت ريو، ان مس مس كئينك ڏيئون كيڙ امي كنڊس شهر كن آوي پوگيا. اوٿون امي گهٽا وائرا ري كري آگڙ وڌي نه هيكيا، تيام امي پيزو پاهو ڏيډو ان كريتې پيٽ ري سلموني نومي جگا مانه پوگين پيٽ را اوٿ ډر ويوا مڌيا. ⑧ گهٽي ډوروڻ ٿي پيٽ رو پاهو ڏين اوٿا ماڳ پوگيا جيا ننه ”پيڙا اوياريا ربي كوپصورت جگا“ كڻه، جيو لسيه نومي شهر ډوڪڙو سته.



⑨ امون ننه پنډ ډر گهٽا ډي لاگيا تا، ان هونه پيڙا موئين آگڙ زيام گهٽو كترو هتو، كم تو منومٿا واڙي پرې رو ورت رو ډي متي گپو تو ان شيئاڙا را ڏورا ډي آيا واڙا هتا. تيام پولوس پيڙا رون منكون ننه اي ڏش ڏيډو: ⑩ ”پايون،

جي آبي آڳڙ وُڍا، تو مارا زويام گهڻو ڪترو ٿيڻي. نه رُوڳو واپار را شيمونَ ان پيڙا رو نقصونَ ٿيڻي، پڻ آپون موئين ٿي پڻ منڪ مري زاشي. "⑪ پڻ قوج رڻه ساپ پولوس ري واتون نه موني، ان پيڙا نڻه هاڪليا وَاڙا ان پيڙا را ڌڻي ري آڳڙ زايا ري واتون موني. ⑫ اُوڻه ايوي نائوڪئي جگا نتيي جيڻه شيڙام پيڙو اُوپاڙين همپاڙي هيڪڻه، تيام گهڻي منڪي صلاح ڏيڏي جي "ايشون هالون پرا. جي ٿي هيڪڻه، تو فينڪس شهر موئين زائين اُوڻه شيڙام ريشون. "هَوڻه فينڪس شهر ڪن ڪريتي پيڻ رو پيڙا اُوپاڙيا رو ماڳ سڻه، جيا ري گهڻي ڏڪڻ ان آڻوڻا ري ڪنڍ ان اوتر ان آڻوڻا ري ڪنڍ هومي سڻه.

سمونڊ مانھ موٽي واور آوڻھ

⑬ زئيون ڏڪڻ رو وائيو هتيون هتيون ويوا مڏيو، تنيون اُوڻي هزميو جي اُوڻون رو آڳڙ زايا رو مطلب هَوڻه پورو ٿيڻي. تيام اُو پيڙا نڻه هاڪلين ڪريتي پيڻ را ڪپ ڏوڪڙا ٿين وُڍا. ⑭ پڻ ٿوڙيڪ وار ڪيڙ پيڻ را پاها ٿي اوتر ان اڳوڻا رڻي واور زور ٿي آوڻي. ⑮ واور پيڙا نڻه ايوي زور ٿي لاڳتيت رڻي جي پيڙو هومڻه وائيرڻه وي نه هيڪيو. تيام پيڙا نڻه هاڪلوو ساڏيو، ان پيڙو جيا ڀامي هتا وائيرا ٿي نيلاٽو زاتو تو. ⑯ نيلاٽون نيلاٽون پيڙو ڪوده نومي هيڪا نونا پيڻ را اوڻ موئين آيو رو، ان تنيون جي پيڙي پيڙا وونهڙ ٻونڌل هتيي، اُوڻا نڻه امي گهڻي



کوشش ٿي پوئي ٿي اُونسِي پيڙا موئين توڻي ليڏي. ⑰ زئيون پيڙي ننه همئي ڪرين راکهي، تئيون پيڙا واري موتون رسون ٿي پيڙا ننه ٻوندين ڏاڍو ڪريو، زم او نه پنگائ. اُونون ننه اي پيڪ پڻ هئي جي متون ٺيلائين پيڙو آفريڪا ملڪ را ڪپ ڪن پوئي هيٺ ڪياڪ ڌڙا ننه نه لاڳهه. تيام پيڙا مانه ٻوندل موتو لوڳهڙو اوتاري ليدو زم وائيو اوتا ننه تڪو نه ئيلنه، ان پسنه پيڙو وائيرا ان چوليون ٿي همروم ئيلاتو زاتو ريو.

⑱ زئيون واوڙ گهڻي ويتي ٿي، تئيون پيڙه ڏي اُوئي پيڙا ٿي واپار رو شيمون ڦڳوڙو شروع ڪريو، ⑲ ان وڙي ترئمئه ڏي اُوئي آپ پيڙا رو شيمون پڻ سمونڊ موئين ڦڳوڙو پرو. ⑳ گهڻون ڏيئون هوڏي امون ننه ڏي، چنڊ، ان تارا ڏيڪيام نه آيا. واوڙ ايوئي گهڻي ويتي رهي، جي نيٺ امارو پچيا رو آسريو پڻ ڪتم ٿي گيو.

㉑ زئيون منڪي گهڻا ڏي ڪئين نه کاڌو، تئيون پولوس اُونون وسا اُوپين ڪيڏو: ”پايون، جي تم مارئي وات مونين ڪريتي ٻيٽ ٿي نه وُڍا هوٽ، تو اي نقصون ان تڪليپ اپون ننه نه ٿئ. ㉒ هوئه هُون تمون ننه ڪونه جي تم هيئت راکو، ڪم تو تم ٻڌائي پچي زاشو، رُوڳو پيڙو ڪتم ٿي زاشي. ㉓ اي مُون ننه ڪهر سئه ڪم تو پڳوون جيا رو هُون منڪ سون ان جيا رهي شيوا هُون ڪرونه، اوتا رو آڪاشي ڏوت رات مُون ڪن آوين اُوپو ㉔ ان ڪيڏو: ’پولوس، تُون پيڻا مت! پڳوون رهي مرضي سئه جي تُون روم را پاڌشا ڪن اُوپين هاڪ پريه. ان زو، پڳوون تُون مانه اي ميرپونئي پڻ ڪريه جي جيا منڪ تُون پيڙا پيڙا موئين سئه، اُو ٻڌائي پچي زاشي. ㉕ تيام، پايون، هيئت راکو، ڪم تو مارو پڳوون مانه پورو يقين سئه جي زم آڪاشي ڏوت مُون ننه ڪيڏو همروم تيشي. ㉖ پڻ پيڙو ڪياڪ ٻيٽ ننه لاڳهي ان هيئه نمونئه آبي ٻيٽ مانه زائين پچي زاشون.“ ㉗ امون ننه پيڙا مانه روم نومي سمونڊ موئين ايل اول ئيلاتون ٻي هڻتا ٿي گيا، تو آڏي رات رئه توتئه پيڙا واڙون ننه شڪ ٿيو جي امي زمي را ڪياڪ

ڪپ ڏوڪڙا ٿيڻا زائونھ ريا. (28) تئين اُوئي لونبا رسا ٿي پوئي رو تاڳ ليڌو، تو هيڪ هو ويھ ڦٽ ٿيو، ان ٿوڙوڪ مورم زائين پيڙي وار تاڳ ليڌو، تو نوي ڦٽ ٿيو. (29) تيام اُوئون ننه پيڪ ٿئي جي متون ڪياڪ پٿر وازا ڪپ ننه نه لاڳون. تيا ري ڪري اُوئي پيڙا ننه روڪيا هارو پيڙا را وونھليا پاها ٿي رسون ٿي ٻوندل چار موٽا ڪُنڊا سُمونڊ موئين ڦڳوڙيا، ان پراٿنا ڪري جي ڏي جلدِي اُوڳنه. (30) پيڙا وازا پيڙا ٿي پاڳوا ڪرتا تا، تيام اُوئي پيڙا مانھ راکل پيڙي ننه سُمونڊ موئين اوتارِي پري، ان اي پونھونو ڪرين ڪيڏو جي پيڙا ننه ڦاھو ڪريا هارو پيڙا را مورليا پاها ٿي پڻ موٽا ڪُنڊا اوتارون. (31) تيا مانھ پولوس ڦوج را ساب ان ڦوجيون ننه ڪيڏو: ”جي اي منڪ پيڙا مانھ نئين رنه، تو تمي نئين پچي هيڪو.“ (32) تيام جيون رسون ٿي پيڙا وازي منڪي پيڙي ننه اوتارِي ٿئي، ڦوجِيئي اُوئون رسون ننه واڍيا پرا، ان نالي پيڙي ننه زاوا ڏيڏئي.

(33) زئين هوار ٿيا وازو هتو، تو پولوس ٻڌون ننه ڪئينڪ کاڌا رهي منٺ ڪرين ڪيڏو: ”آز ٻي هفتا ٿياھ، تمي واوڙ پنڌ ٿيا رهي واٽ زونھو ريا، ان اتي وار هُوڏي تمي ڪئين نئي کاڌو. (34) تيام هون تمون ننه وينتي ڪرونھ جي ميرپونئي ڪرين ڪئينڪ کاڌو، ڪم تو اِڻا ٿي تمون ننه پچيا رهي وشيت زڙشي، ڪم تو تمون ننه ڪئين نقصون نئين ٿنه.“ (35) زئين پولوس هم ڪي ريو، تئين روئي لين ٻڌون هومو روئي هارو پڳوون رو ٿورو مونيو، ان روئي پونگين کاڌا لاڳيو. (36) ان پسٺه پيزون ٻڌون ننه پڻ حونصلو زڙيو، ان اُوئي پڻ ڪئينڪ کاڌو. (37) امي پيڙا مانھ ٻڌائي ٿين ٻي هو چاهتر منڪ هتا. (38) زئين اُو ڪائين ڌراپيا، تو اُوئي پيڙا ٿي پار هلڪو ڪريا هارو ٻڌي ڪنڪ سُمونڊ موئين ڦڳوڙي پري.

پيڙو پنگائي زانه


(39) زئين هوار ٿيو، تو پيڙا وازون ننه ڪپ اوڙڪيام نه آيو، پڻ اُوئي زويو جي اوٿه هيڪ موٽو گهيڙ سٺه جيا رو ڪپ هرڪو سٺه، تيام اُوئي ڦينصلو ڪريو جي

ٻيڙا نٿه اُٿا گهيڙ مانھ ھاڪلي زايا رڻي ڪوشش ڪرون. (40) ٻسئھ اُٿي رسا سوڙين موتون ڪنڍون نٿه سُمونڊ موئين ڍلا ڪريا، ان اُٿھ ئي ٿوئھ ٻيڙا نٿه ايل اول واڙيا وارا ٻي لاکڙا، جيا پوئِي ٿي اُونسا ٻونڊيا تا، اُو سوڙيا پرا. ان ٻسئھ ٻيڙا رو مورليو لوگهڙو هومئھ وائيرئھ ٻونڊين ٻيڙا نٿه گهيڙ هومو ھاڪليو. (41) پڻ ٻيڙو اڳڙ ويتون سُمونڊ هيٺ هڪا ڌڙا نٿه آوين لاڳيو، تو اُٿا رو مورليو پاھو ڦاٿي ڳيو ان وونھليو پاھو چولي لاڳيا ري ڪري پنڳاوا مڏيو.

(42) ڦوجيئي آيت موئين صلاح ڪري جي جيليون نٿه مارئھ پرا، متون اُٿون موئين ٿي ڪوڪ ترين ڀاڳي نه زائھ. (43) پڻ ڦوج رو ساب پولوس نٿه پڇاواو ڪرتو تو، تيام اُٿھ ڦوجيون نٿه نا پاڙيو، ان حُڪم ڏيتو جي جيا منڪ تري هڪتا هئھ، اُو مور ٿي سُمونڊ موئين پڙئھ، ان ڪپ مانھ زائين پُوڳئھ، (44) پڻ ٻيڙا پائون مانھ ان ٻيڙا ريون تريتون شينھون مانھ سڙين تري زائھ. ان هيئھ نمونئھ ٻڌائي ھاڙا هورا زمي مانھ پُوڳين پڇي ڳيا.

مِلتي بيت موئين پولوس گهڻون منڪون نٿ ھاڙا هورا ڪرئھ

28 ① زئيون امي ھاڙا هورا ڪپ مانھ پُوڳيا، تئيون امون نٿه ڪٻر پڙئي جي اُٿا بيت رو نوم مِلتي سئھ. ② اُٿ ري منڪي امون مانھ گهڻي ميرپونئي ڪري. اُٿھ ٿوئھ مي ورھتوت ريو ان ٿاڍ هئي، تيام اُٿي ڏيوتا ڪريو ان امون ٻڌون نٿه تپاڙيا ھارو تيڙي ڳيا. ③ پولوس اينڌيون رڻي ٻات پري آيو، ان ڏيوتا موئين نوڪتوت ريو، تو اُٿھ ٿوئھ اينڌيون ٿي هڪ پرڙ ٽاپ ري ڪري ٺيھرئي ان پولوس نٿه ھاٿ موئين سونتي ڳئي. ④ زئيون اُٿ ري منڪي



ڏيکيو جي پولوس نٿه پرڙ سونتل سئھ، تئيون هڪا ٻيڙا نٿه ڪيا مڏيا: ”اي منڪ ھاس ۾ کوني سئھ. اي سُمونڊ ٿي پڇين ٺيھرئوھ، پڻ پڌلو ليڏا واڙي ڏيوي ايٿا نٿه جيوتو ريو“

نه ڏيڏو. "⑤ پڻ پولوس هاڻ نه چندين اُٿا پرڙ نه ڏيوتا موئين ڦڳوڙي پري، ان اُٿا نه ڪئين نقصون نه ٿيو. ⑥ اُو منڪ اي واٽ زوتات ريا جي پولوس نه هوزي سڙشي ڪا اوچتو پڙي زاشي ان مري زاشي. پڻ زئون اُوئي گهڻو وڪٽ واٽ زوئي، ان ڏيڪيو جي ايٿا نه ڪئين نٿي ٿيتو، تئين ام سوچوا مڏيا جي "اي ڪوڪ ڏيو سٺه."

⑦ اُوڻه ڏوڪڙي ٻيٽ مانھ راز ڪريا واڙا پُليُس نومي منڪ ربي زمئي هئي. اُوڻه امون نه آپري گهري ڪشي ٿي تيڙاوين ترڻ ڏي اماري ٺاڻوڪي مزموني ڪرين راکيا. ⑧ اُوئي ڏيئي پُليُس را ٻاپ نه تاو اوتو ان گهڻا دست پڻ هتا، ان اُو ڪاتلا مانھ پڙيو تو. پولوس اُٿا ڪن گيو ان اُٿا هارو پڳون ٿي پراڻا ڪري. پسٺه آڀرا هاڻ اُٿا مانھ ميلين اُٿا نه هازو هورو ڪريو پرو. ⑨ زئون ايٿا واٽ ربي ڪهر پڙي، تئين پيزا جيا پڻ منڪ ٻيٽ مانھ مونڊا هتا، اُو پولوس ڪن آوا لاڳيا، ان پولوس اُوڻون نه هازا هورا ڪرتو. ⑩ اُوئي امارو گهڻيون واٽون ٿي مون راکيو، ان زئون امي اُوڻون پيزا پيڙا مانھ زيا واڙا هتا، تو جيئن ڪئين امون نه پنڌ هارو ڪپتو تو، اُو اُوئي امون نه ڏيڏو ان پيڙا موئين ميلو.

مِلَتي ٻيٽ ٿي پولوس اِٽلي ملڪ را روم شهر هومو زائھ

⑪ ترڻ مينا امي اُوڻه مِلَتي ٻيٽ مانھ ريا، ان پسٺه هڪا پيڙا مانھ سڙين روونا ٿيا جيو پورو شيئاڙو ٻيٽ مانھ اُوپل هتو. اُو پيڙو اِسڪندريه شهر رو هتو، ان اُٿا رو نيشون ان نوم "جاڙا ڏيو" هتو. ⑫ پسٺه امي پيزا ٻيٽ مانھ آوين سُرڪوسه شهر موئين آوين پوگيا، ان اُوڻه ترڻ ڏي ريا. ⑬ اُوڻون وڙي امي پيڙا مانھ روونا ٿين اِٽلي ملڪ را ريگيم شهر موئين پوگيا. پيزه ڏي ڏڪاڏليا پاها رو وائيو ويوا مڏيو، ان تيام ٻيئون ڏيئون موئين پيڙو اِٽلي را پُٽيلي شهر موئين پوگي گيو. ⑭ اُوڻه پيڙا ٿي زائين اوتريا، تو ڪئينڪ وشواسي پائي امون نه

پیرا ٿيا، ان اُوئي امون ننه آپ ڪن هيڪ هٿتو ريا رئي منٽ ڪري، ان امي ريا. هيوئه نمونئه امي روم شهر هوما گيا.



15) زئيون روم رون وشواسي پايون ننه امارا آيا رئي گهر پڙئي، تو او شهر ٿي نيهرين، ڪئينڪ اڀس بازار ان ڪئينڪ ترڻ هوتل نومي شهرن هودي امون ٿي مڙوا آيا. زئيون پولوس اوئون ننه ڏيڪيا، تو پگهون رو تورو مونيون ان اوئا ننه حوصلو زڙيو.

روم شهر موئين پولوس آزادي ٿي ايسو را پارام همپزاوئه

16) زئيون امي روم شهر موئين پوگيا، تو پولوس ننه قوج ٿي اي موڪل زڙئي جي او جيل موئين نئين پڻ ڪيٽڪ گهر موئين ره ان روگو هيڪ قوجي اوئا مانھ پاهرو ڏيڏا وازو پيزو ره.

17) ترٿيون ڏيئون ڪيڙ پولوس اوٽ رون يهوديون رون آگيونون ننه آپ ڪن پيزا ڪرايا. زئيون او آوين پيزا ٿيا، تو پولوس اوئون ننه ڪيڏو: ”مارون پايون، مئين آڻي اسرائيلي قوم ان آڻون ٻاپ ڏاڏون ريون ريتون ره ڪلاڪ ڪئين نٿي ڪريو. توئي پڻ يهوديئي مون ننه يروشلم موئين زهالين روميون ره خواله

ڪريو. ⑱ ايئي روميئي مارئي جونچ ڪري، ان اُونئون رئي مرضئي هئي جي مُون ننه ساڏهه پرو، ڪم تو مئين ايوو ڪئين ڏوه نٿو ڪريو جيا ري ڪري مُون ننه موت رئي سزا زڙهه. ⑲ پڻ زليون يهوديئي هايا ڦينصلا ننه نه مونيو، تئين مئين روم را پاڏشا ننه ڦينصلو ڪريا رئي ڏونه ڏيڏئي. مئين اينا هارو ڏونه نه ڏيڏئي جي آڀري قوم مانھ الزوم هئون، پڻ مجبور ٿين مارنه ڏونه ڏيوئي پڙئي. ⑳ هايا وات ري ڪري مئين تمون ننه تيترايا زم تمون ٿي مزون ان واتون ڪرون. مُون ننه اي هٿڪڙي اينا هارو لاڳل سئ، ڪم تو مارو يقين پگھون را سونڊل پچايا واڙا ڪريست مانھ سئ، جيا رو آسريو ٻڌي اسرائيلي قوم ننه سئ.

㉑ اُوئي پولوس ننه ڪيڏو: ”آپنا ملڪ يهوديه ٿي امون ننه ٿارا پارام ڪئين چئيئي ٿي زڙئي، نڪو آڀتون اسرائيلي پايون موئين ٿي ڪيٺڪ آوين امون ننه ٿارا پارام ڪئين ڪراپ وات همپڙاويھ نڪو ٿارئي ڳلا ڪريھ. ㉒ پڻ امي ٿاري واتون زوڻوا ڪرونه، ڪم تو ٿاري اينا ڪريست ري پالتي را پارام امون ننه اتئي ڪهر سئ جي ٻڌيل منڪ اينا رنه ڪلاڦ ٻولھه ريا.“

㉓ تيام اُوئي پولوس ٿي ڏي ٻونڌيو، ان اُوئه ڏي گھڻا منڪ پولوس ڪن آوين پيڙا ٿيا، جيئنه او ريتو. پولوس هوار ٿي لين هونز هونڌي اُونئون ننه پگھون را راز را پارام هڙماوتو ريو، ان موسي رون لڪل حڪمون ان پگھون رو نياپو ڏيڏا واڙون را لڪل شاستر ٿي ٿايتئي ڏين هڙمايا جي ايسو پگھون رو سونڊل پچايا واڙو ڪريست سئ.

㉔ اُونئون يهوديون رون آڳيوونون موئين ٿي ڪئينڪ منڪ اي واتون مونيا، ㉕ پڻ پيڙي منڪي ائون واتون مانھ يقين نه ڪريو. او آڀت موئين نه ٿيا ان وڏا پرا زليون پولوس هيڪ اي وات ڪيڏئي:

”اي وات تمون مانھ هاسئي ٿيھ، جيئي وات پويتر آتما پگھون رو نياپو ڏيڏا واڙا يسعياه هات تمارون ٻاپ ڏاڏون ننه ڪيڏئي ٿي جي

②6 'تُون زائين اِیْثا اِسرائِیلی قُوم نئه ام کئه:

تمی هومیژتا ریشو پښ هزمشو نئین.

تمی زوتا ریشو پښ ډیکشو نئین.

②7 کم تو اِیْثا قُوم رُون منکون را من ضِدي ټي گِیاه،

اِیْثي آپرا کون پند کریاه پرا،

ان آپري اونکیون میسیه پري.

اُو هیوا نه ټئت، تو آپریون اونکیون ټي ډیکئت،

آپرون کونون ټي هومیژت،

آپرا من ټي هزمئت،

ان پِگوون هوما ټرئت،

ان پِگوون اُوئون نئه پچاوت.

②8 تمی تو شاستر ري هایا وات پرموئنه اِیسو مانه وشواس نټي اوئيو. تیام

تمی هزمو ان یاد راکو جي اي تارڻ رو نیاپو پِگوون ډاري قُوم واژون نئه پښ
ډیدوه، ان اُو تو هومیژشي."

②9 (پولوس زئبون هائي واتون كي ريو، تئبون یهودي هیكا بیزا ټي

وژگائين گِیا پرا.)


③0 پولوس اُوئنه رُوم شهر یم پُورا هی سال آپرا مسواژ مانه لیډل گهر موئین

ریو، ان جیا اُوئا ټي مزوا آوتا، اُوئون نئه آوکار ډیتو، ③1 ان پُوري آزادي ان

هیمت ټي پِگوون را راز را پارام همپزاوتو ان پریو اِیسو کریست را پارام

شیکارتو ريو.

مک شیللا پولوس رئي حياتئي ان کوم



پولوس رئي حياتئي

پولوس يهودي قوم رو هتو. حيا قوم نڌ اسرائيلې ان عبراني پښ كښه. اگي پولوس رو نوم سائول هتو، جيو اوډا ري ابري عبراني بولي رو نوم هتو (مك شيلون را كوم 9:13). او اندازام دغ م پيدا ٿيو. كم تو استيفنس را موت رډ توتډ او هزون جوڅ هتو (مك شيلون را كوم 58:7)، پښ تيا كيڙ زئون فليمون را نوم رو كت لکيو، تښون او ډوكرو هتو (فليمون 9:1).

او ننکو ټکو يهودي ډرم ربون بډيون وانون مانډه ويتو ان يهودي ډرم ري بډون ټي سکت فريسي پالتي رو منک هتو. تيام شروع م او وشواسيون رډ هاو کلاډ هتو، کم تو او ايسو نډ پگوون رو سونډل پچايا واڙو کريست تنو هزمتو (فليپون 5:3-6). زئون يهودي قوم ري ډرمي پنچايت را منک استيفنس نومي وشواسي نډ بوډا هښن نمو مارتات رډا، تښون پولوس اوډ

اوبل هتو ان اوتا رو کون کرايا م کس هتو (مک شيلون را کوم 57:7-1:8). تيا کيژ پولوس آپ يروشلم شهر رون وشواسيون نئ تنگ کړوا مډيو. او اوتون نئ زهالين جيل م پوراوتو، ان تيام گهڻا وشواسي يروشلم شهر ساډين ياگي گيا (مک شيلون را کوم 3:8-4).

تعيون پولوس اپرا ډرم را مک پوزاري ټي کاځر لين وشواسيون نئ زهاليا هارو دمشق نومي شهر هومو روونو ټيو. زنيون پولوس دمشق ډوکړو پوگيو، تعيون ايسو اوتا نئ ډيکارو ډيدو، ان اوتا نئ اپرو مک شيلو راکين کيدو جي او نه روگو يهوديون نئ پڻ ډاريون قومون رون منکون نئ پڻ همپړاوئ جي ايسو پگيون رو ډيکرو ان پگيون رو سونډل پچايا واژو کريست سئ. تعيون پولوس آپ وشواسي ټيو، ان اوتا توتا ټي لين ايسو رئي شيوا کړوا مډيو (مک شيلون را کوم 1:9-20). زنيون پولوس اپرو ملک ساډين ډاريون قومون نئ ايسو را پارام همپړايا هارو گيو، تعيون اوت اپرا عبراني نوم سائول ري جگا م اپرو نوم پولوس راکيو، جيو نوم ډاريون قومون موئين ويتو (مک شيلون را کوم 9:13)

پولوس را لکل کت

پولوس ايسو کريست رو مک شيلو هتو، ان اوتا رو قرض هتو جي او ټډون وشواسيون نئ صحيح وانون مانه پوراوئ. تيام اوت وشواسيون نئ هزمايا هارو گهڻا کت لکيا. شاستر را نوا قرار م پولوس را لکل تيرئ کت پيزا کرل سئ. ايئون موئين ټي هيک کت هیکا صويا رون وشواسيون نئ لکل سئ، جيو گلتيون را نوم مانه سئ. ات کت ډار ډار شهر رون وشواسيون نئ لکل سئ، ان او کت اي سئ: روميون، کورنثيون را نوم مانه بي کت، افسيون، فلپيون، کلسيون، ان تسليونيکيون را نوم مانه بي کت. ترڅ کت وشواسي منډري رون اگيونون نئ لکل سئ، تيمټيس را نوم مانه بي کت، ان طيطس را نوم مانه کت. ان هيک کت روگو هیکا وشواسي فليمون را نوم مانه لکل سئ.

ايسو را پارام همپړايا هارو پولوس را چکر

پولوس ايسو را پارام همپړايا هارو چار مونا چکر کړيا. او گهڻو کرين پنډ ټي پنډ کا پيزا مانه سزين ويتو، کم تو اوتا وکت م پسون ان ريل گاډي نتي. هر چکر مانه پولوس اپرون ساتيون پيزو شيتي شيتي نوون علاقون م گيو.

پولوس پيرهون چکر اندازام 46-48ع م کړيو. پيرهيان چکر را پارام "مک شيلون را کوم" نومي کتاب 4:13-28:14 م لکل سئ.

پولوس پيزو چکر اندازام 50-52ع م کړيو. پيزا چکر را پارام "مک شيلون را کوم" نومي کتاب 15:40-22:18 م لکل سئ.

پولوس ترثمو چکر اندازام 53-57ع م کړيو. ترثما چکر را پارام "مک شيلون را کوم" نومي کتاب 18:23-17:21 م لکل سئ.

تيا ڪيڙ زئپون پولوس ترثما چڪر ٿي پاسو آوين يروشلم شهر موئين گيو، تئيون اوتا ري آيري يهودي قوم ري منڪي اوتا مانھ ڪوڙو الزوم هئين ڪيس ڪريو. پولوس گھڻون سالون هودِي ڦينصلو تيا وگر رومي حڪومت رو ڦيڙي ريو، پيرھين آيرا يهوديه صوبا م ان تيا ڪيڙ روم شهر م (مڪ شيلون را ڪوم 21:27-28:31). روم شهر م او آيرا گھر م پاهرام ڦيڙي هتو ان آپ ڪن اول منڪون نه ايسو را پارام شيڪارٽو (مڪ شيلون را ڪوم 28:16، 28:30-31). زونا وڪت ٿي لين وات وٺھ رئي جي نيٺ روم شهر رٿ يادشا، اندازام 62ع م، اوتا رو ڦينصلو ڪريو ان اوتا نه پيڻوهي ڪرين آزاد ڪريو.

ام لاڳتھ جي تيا ڪيڙ، اندازام 62-67ع م، پولوس وڙي زائين چارمو چڪر ڪريو. چارما چڪر را پارام "مڪ شيلون را ڪوم" نومي ڪتاب م نٿي لکل پڻ پولوس رون لکل ڪتون ٿي ايٿا را پارام ڪئينڪ ڪبر پڙتھ. اندازا م اوٺ ام چڪر ڪريو، 62-64ع م اسپين ملڪ (روميون 15:24، 28)، 64-65ع م ڪريتي بيت (طيٽس 1:5)، 65ع م ميليتس شهر (1 تيمٿيس 4:20)، 66ع م ڪلسي شهر (فليمون 1:22)، افسس شهر (1 تيمٿيس 3:1)، ان فليبي شهر (فليپيون 2:23-24، 1 تيمٿيس 3:1)، 66-67ع م نيڪٽلس شهر (طيٽس 3:12)، ان 67ع م وڙي پاسو روم شهر م آيو رو.

پولوس رو موت

تيا ڪيڙ پولوس پيڙي وار روم شهر م ڦيڙي ٿيو، پڻ آڙوڪو او ڏوهاري را زم هٽڪڙي لاڳل جيل م پورل هتو (2 تيمٿيس 9:2). شاستر م لکل نٿي پڻ زونا وڪت ٿي وات وٺھ رئي جي ايسو را پارام شيڪارٽا ري ڪري، اندازام 68ع م، روم شهر رٿ نيرو نومي يادشا پولوس نه موت رئي سزا ڏيڏئي (2 تيمٿيس 4:6-8).

پولوس را زمونا ري کاس وانون

(سالون رو حساب ڪيٽڪ اندازا پرموٽ ڪرل سٺ)

سال	وات	حوالو
5ع	پولوس رو زلم	
35ع	اِسٽيفنس وشواس راڪيا ري ڪري مرائھ	ڪوم 7:57-8:1
"	پولوس وشواسيون نه تنگ ڪروا مڏتھ	ڪوم 8:3
"	پولوس پريو ايسو مانھ وشواس اوٽھ	ڪوم 9:1-19
35-38ع	پولوس عرب ملڪ زائھ	گلتيون 1:17
38ع	پولوس دمشق شهر ٿي پاڳي زائھ	ڪوم 9:23-25
"	پولوس بي هٽا يروشلم شهر م رتھ	گلتيون 1:18-19، ڪوم 9:26-29
"	پولوس آبرا ترسس شهر م پاڳي زائھ	ڪوم 9:30

گلتیون 21:1	پولوس سوریه ان کیکه یر کوم کرئه	ع38-43
کوم 26-25:11	پولوس انطاکیه شهر یر کوم کرئه	ع43
کوم 25:12, 30-27:11	پولوس امتاذ دیوا یروشلم شهر یر زائه	ع43-44
کوم 23-20:12	هیرودیس پادشا رو موت	ع44
کوم 28:14-4:13	پولوس رو پیرهیون چکر	ع46-48
کوم 29:1-15:2, گلتیون 10-1:2	یروشلم شهر یر وشواسیون ری پنچائیت	ع49
	پولوس گلتیون نه کت لکئه	
کوم 22:18-40:15	پولوس رو پیزو چکر	ع50-52
	پولوس تسلیکیون نه پیرهیون کت لکئه	ع51
	پولوس تسلیکیون نه پیزو کت لکئه	ع51-52
کوم 22:18	پولوس انطاکیه شهر یر پاسو آوئه	ع52
کوم 17:21-23:18	پولوس رو ترثمو چکر	ع53-57
کوم 1:20-1:19	پولوس افسس شهر یر رئه	ع53-55
	پولوس کُرنتیون نه پیرهیون کت لکئه	ع55
	پولوس کُرنتیون نه پیزو کت لکئه	"
	پولوس رومیون نه کت لکئه	ع57
کوم 10:23-27:21	پولوس یروشلم شهر یر زهلائی زائه	"
کوم 32:26-23:23	پولوس قیصریه شهر یر قیذی تین رئه	ع57-59
کوم 16:28-1:27	پولوس روم شهر هومو زائه	ع59
کوم 31-16:28	پولوس روم شهر یر قیذی تین رئه	ع59-62
	پولوس افسیون نه کت لکئه	ع60
	پولوس کلسیون نه کت لکئه	"
	پولوس فلیمون نه کت لکئه	"
	پولوس فلیبون نه کت لکئه	ع61
	پولوس قید تی سوتئه	ع62
طیطس 5:1	پولوس رو چارمو چکر	ع62-67
	پولوس طیطس نه کت لکئه	ع65
	پولوس تیمتیس نه پیرهیون کت لکئه	ع66
2 تیمتیس 8:1	پولوس پیزی وار روم شهر یر قیذی تئه	ع67
	پولوس تیمتیس نه پیزو کت لکئه	ع67-68
2 تیمتیس 8-6:4	پولوس وشواس راکیا ری کری مرائه	ع68

رُوميون را نوم مانه لکل کت رُئي هزموتئي

کت لکيا واژو

اي کت پولوس لکيو (رُوميون 1:1). ام لاڳتھ جي زئيون پولوس ايسو را پارام همپزايا هارو ترئمو چکر کرتوت رهو، ان يونان صوبا را کرتش شهر هودي پوگين پاسو يروشلم شهر مويين زايا واژو هتو، تئيون اندازام 57ع م اوڻه اي کت لکيو (رُوميون 15:25-26، مک شيلون را کوم 20:2-3).

کت کيون منکون هارو لکيو

پولوس اي کت رُوم شهر رون وشواسي منکون هارو لکيو (رُوميون 7:1). رُوم شهر رون منکون نه رُومي کيتا. رُوم ايتلي ملڪ رو ٻڌون ٿي موتو شهر هتو، ان همئنه پڻ سڏ. اوڻا زمونا م رُوم رو پادشا نه روڳو پورا ايتلي مانه راز کرتو، پڻ آهڻه پاهڻه ٻڌون ملڪون مانه پڻ راز کرتو، ان اوڻون نه رُوم را صوبا نايا تا. تيام رُوم شهر پوري دنيا رو ٻڌون ٿي موتو شهر هتو. رُوم را منک ڏيوون ان ڏيوئونون رُئي پوزا کرتا، ان رُوم را پادشا رُئي پوزا پڻ کرتا. رُوم شهر م ڌار ڌار قومون را منک ريتا، تيام اوڻ ري وشواسي منڌري م نه روڳا رُومي قوم را منک هتا، پڻ گهڻا پيزيون قومون را منک هتا، ان کئينڪ يهودي قوم را منک پڻ وشواسي هتا. کيئڪ لکل نئي جي رُوم شهر م وشواسي منڌري کم کرين ٿئي، پڻ ٿي هيڪهه جي ايسو کريست را جيوي اونيا کير جيا منک رُوم شهر ٿي پينتيڪوست پرپ مانه يروشلم شهر م آيا تا ان جيئي پطرس ري واتون هوميزي ٿي، اوڻي منڪي ايسو مانه وشواس اوڻين پاسا رُوم شهر م زائين وشواسي منڌري ناوڻي هوشي (مک شيلون را کوم 10:2، 1:2-41). ٿي هيڪهه جي پولوس کا پيرڻه کيئڪ ايتا کت را نقل کرين پيزون علاقون رون وشواسيون نه پڻ ڏي ميليا (2 پطرس 15:3).

کت لکيا رو مطلب

کت لکيا ٿي مور پولوس رُوم شهر م کيڏي نتو گيو، توڻي پڻ اوڻ رون وشواسيون رُوم گهڻو کيال راکتو. تيام پولوس اي کت لکيو زم او رُوم شهر رون وشواسيون نه آيرا اوڻون ڏن آيا را پارام همپزاوڻ (رُوميون 10:1-15، 15:23-29)، يهودي قوم واژون ان ڌاريون قومون واژون وشواسيون رڻه آيت م هپ رکاوڻ (رُوميون 9:2-11، 10:11-13، 15:5-9)، ان کاس کرين اوڻون نه شيڪاڙڻه جي منک اپري کوشش ٿي ڌرم ريون واتون مانه وودا ٿي تارڻ نئي لي هيڪتا

ڪم تو ٻڌائي منڪ ڏوھ ڪرڻھ، پڻ جيا منڪ ايسو مانھ وِشواس راکھھ، ڀڳوون اوتون نھ
ماڻھي ڏين ڏوھون ري سزا ٿي آزاد ڪرڻھ ان اوتون نھ تارڻ ڏئھ (رُوميون 16:1-39:8). پولوس
اي پڻ هُرمائھ جي يھودي قوم ري گھڻي منڪي ايسو مانھ وِشواس ڪم نئي اويو (رُوميون
1:1-36:11)، ان اي پڻ شيڪارڙھ جي وِشواسيون رڻ ڪيوڻ نمونھ ويو (رُوميون 1:12-13:15).

ايٺا ڪتاب را شاستر ٿي پيزا حوالا:

رُوميون 1:1 ڪوم 19-1:9	رُوميون 12:5 پيدائش 19-1:3
رُوميون 3-2:1 2 سموئيل 13-12:17	رُوميون 7:7 خرُوج 17:20
رُوميون 3-2:1 يسعياھ 14:7، 10-1:11	رُوميون 7:7 استشنا 21:5
رُوميون 3-2:1 يو ايل 32:2	رُوميون 20:8 پيدائش 19-17:3
رُوميون 17:1 حبقوق 4:2	رُوميون 21:8 پيدائش 15:3
رُوميون 6:2 زبور 12:62	رُوميون 36:8 زبور 22:44
رُوميون 6:2 امثال 12:24	رُوميون 7:9 پيدائش 12:21
رُوميون 24:2 يسعياھ 5:52	رُوميون 9:9 پيدائش 10:18، 14
رُوميون 24:2 حزقي ايل 22:36	رُوميون 12:9 پيدائش 23:25
رُوميون 25:2 پيدائش 14-9:17	رُوميون 13:9 ملاڪي 3-2:1
رُوميون 4:3 زبور 4:51	رُوميون 15:9 خرُوج 19:33
رُوميون 12-10:3 زبور 3-1:14	رُوميون 17:9 خرُوج 16:19
رُوميون 12-10:3 زبور 3-1:53	رُوميون 20:9 يسعياھ 16:29
رُوميون 12-10:3 واعظ 20:7	رُوميون 20:9 يسعياھ 9:45
رُوميون 13:3 زبور 9:5	رُوميون 25:9 هوسيع 23:2
رُوميون 13:3 زبور 3:140	رُوميون 26:9 هوسيع 10:1
رُوميون 14:3 زبور 7:10	رُوميون 27-28:9 يسعياھ 23-22:10
رُوميون 15-17:3 يسعياھ 8-7:59	رُوميون 29:9 يسعياھ 9:1
رُوميون 18:3 زبور 1:36	رُوميون 33:9 يسعياھ 14:8
رُوميون 3:4 پيدائش 6:15	رُوميون 33:9 يسعياھ 16:28
رُوميون 8-7:4 زبور 2-1:32	رُوميون 5:10 احبار 5:18
رُوميون 11-10:4 پيدائش 6:15	رُوميون 6:10 استشنا 12:30
رُوميون 11-10:4 پيدائش 14-9:17	رُوميون 7:10 استشنا 13:30
رُوميون 17:4 پيدائش 5:17	رُوميون 8:10 استشنا 14:30
رُوميون 18:4 پيدائش 5:15	رُوميون 11:10 يسعياھ 16:28
رُوميون 22:4 پيدائش 6:15	رُوميون 13:10 يو ايل 32:2

رُومِیون 11:14 یسعیاه 23:45	رُومِیون 15:10 یسعیاه 7:52
رُومِیون 20:14 مرقس 18:7-19	رُومِیون 16:10 یسعیاه 1:53
رُومِیون 3:15 زبور 9:69	رُومِیون 18:10 زبور 4:19
رُومِیون 9:15 2 سموئیل 50:22	رُومِیون 19:10 اِسْتِشْنا 21:32
رُومِیون 9:15 زبور 49:18	رُومِیون 20:10 یسعیاه 1:65
رُومِیون 10:15 اِسْتِشْنا 43:32	رُومِیون 21:10 یسعیاه 2:65
رُومِیون 11:15 زبور 1:117	رُومِیون 3:11 1 سلاطین 10:19, 14
رُومِیون 12:15 یسعیاه 10:11	رُومِیون 4:11 1 سلاطین 18:19
رُومِیون 21:15 یسعیاه 15:52	رُومِیون 8:11 اِسْتِشْنا 4:29
رُومِیون 25:15-26 1 کُرَنْتِیون 4-1:16	رُومِیون 8:11 یسعیاه 10:29
رُومِیون 25:15-26 2 کُرَنْتِیون 15:9-1:8	رُومِیون 9:11-10 زبور 23-22:69
رُومِیون 25:15-26 گلتیون 10:2	رُومِیون 11:26-27 یسعیاه 21-20:59
رُومِیون 3:16 کوم 3-1:18	رُومِیون 11:26-27 یسعیاه 9:27
رُومِیون 3:16 کوم 26-18:18	رُومِیون 11:26-27 یرمیاہ 34-33:31
رُومِیون 3:16 1 کُرَنْتِیون 19:16	رُومِیون 11:34 یسعیاه 13:40
رُومِیون 20:16 پیدایش 15:3	رُومِیون 11:35 اِیوُب 11:41
رُومِیون 21:16 کوم 3-1:16	رُومِیون 12:19 اِسْتِشْنا 35:32
رُومِیون 21:16 کوم 5:18	رُومِیون 12:20 امثال 22-21:25
رُومِیون 21:16 1 کُرَنْتِیون 17:4	رُومِیون 13:9 خُرُوج 15-13:20, 17
رُومِیون 23:16 1 کُرَنْتِیون 14:1	رُومِیون 13:9 اِسْتِشْنا 19-17:5, 21
رُومِیون 25:16 یسعیاه 10-1:11	رُومِیون 13:9 احبار 18:19
رُومِیون 25:16 مِیکاه 5-2:5	رُومِیون 14:2 احبار 47-1:11
رُومِیون 25:16 یو ایل 32:2	رُومِیون 14:5 احبار 44-1:23

رُوميون

را نوم مانھ پولوس رو لکل کت



1 ① هُون لکيا وازو پولوس سون، جيو ايسو کريست رو شيواڌاري سون. پگهون مون ننه مک شيلو سونديوه ان آپريي ڏيدل کشي رڻي کبر همپڙايا هارو را کيوه. ② ايئا کشي ري کبر را پارام پگهون اگي آپرو نياپو ڏيدا وازون ٿي پويتر شاستر ۾ وائيدو کريو تو. ③ اي وائيدو پگهون آپرا ڏيکرا را پارام کريو تو، جيو منک ٿيا ري کري دائود پاڌشا ري پيڊي ٿي هتو، ④ ان پويتر آتما ري کري مرلون موئين ٿي جيوي اونيا ٿي کڙا وازو پگهون رو ڏيکرو ساوو ٿيو، مطلب آپنو پريو ايسو کريست. ⑤ اوتا ٿي امون ننه مک شيلو ٿيا رڻي هيمت زڙييه، زم امي اوتا رڻي شيوا کرتون ٻڌيون قومون رون منکون ننه ايسو مانھ وشواس رکاوون، زم او پگهون رو کيڏو موننه. ⑥ اوئون منکون موئين ٿي تمی پڻ سو، جيا پگهون را سونيل ان ايسو کريست را منک سو.

⑦ رُوم شهر رُون ٻڌون پريمي وشواسي پايون ان پينون، تمڀي جيون ٿي پڳوونَ پريم ڪرڻه ان جيون نڻه پڳوونَ آڀرا منڪ ٺايا هارُو سُوندياه، آڀڻو ٻاپ پڳوونَ ان پڙيو ايسُو ڪريست تمون مانھ ڪڙپا ڪرڻه ان تمون نڻه هڪي راکڻه!

پولوس رُوم شهر رُون وشواسيون هارُو پڳوونَ رو ٿورو مونڻه
ان اوڻون ڪن زاوا ڪرڻه

⑧ ٻڌون ٿي مور هُون تمون ٻڌون هارُو ايسُو ڪريست را هيللا ٿي مارا پڳوونَ رو ٿورو مونڻه، ڪم تو پوري ڏنيا ۾ منڪون ۾ اي وات وڻه رڻي جي تمڀي ايسُو مانھ وشواس راکوه. ⑨ پڳوونَ، جيا رڻي شيوا هُون اوڻا را ڏيڪرا ايسُو رڻي ڪُشي رڻي ڪٻر همڀڙايا ٿي پورا من ٿي ڪرونه، او مارو شائيد سڻه جي هُون پراڻا رڻه ٿوڻه هميش تمون هارُو پراڻا ڪرونه. ⑩ هُون پراڻا ۾ اي وينڻي ڪرونه جي ڪيوڻه پڻ نمونڻه پڳوونَ آڀري مرضي ڀرمونڻه مُون نڻه تمون ڪن آيا رو موقعو ڏڻه. ⑪ ڪم تو مُون نڻه تمون ٿي مڙيا رڻي گهڻي سِڪ سڻه، زم هُون تماري وشواس راکيا ۾ هيئت وڌاوون ان تمارو وشواس وڌارڻه پڪو ٿي زائڻه. ⑫ مارو مطلب اي سڻه جي مارڻه تمون ڪن آيا ٿي هڪا پڙا را وشواس ري ڪري نه رُوڳو تمون نڻه پڻ مُون نڻه پڻ حوصلو زڙڻه. ⑬ پايون ان پينون، مارڻي اُميد سڻه جي تمڀي مارڻي وات هڙمي زاشو. وات اي سڻه جي مڻين گهڻي وار تمون ڪن آيا رو ڪيال ڪريو، زم مارو وشواس رکايا رو مطلب تمون ۾ پڻ پورو ٿڻه، جيوڻه نمونڻه پڙيون ڌاري قومون ۾ پورو ٿيوه، پڻ هزون هُوڌي هُون آوي نه هڪيو.

⑭ مارو اي قرض سڻه جي هُون پڻلون نڻه ان اڻڻلون نڻه، عقل وازون نڻه ان پي عقلون نڻه، ٻڌون نڻه ايسُو را پارام همڀڙاوون. ⑮ تيام مُون نڻه گهڻو شونق سڻه، جي هُون ايسُو را پارام ڪُشي رڻي ڪٻر تمون نڻه پڻ همڀڙاوون، جيا رُوم شهر موڻين سو.

ايسو را پارام كُشي ري كبر ۾ ڀڳوون رُئي طاقت سٺ

①6 هُون ايسو را پارام كُشي رُئي كبر هميڙايا ۾ للزي نٿي مرتو ڪم تو ايتا ۾ ڀڳوون رُئي طاقت سٺه جيا ٿي هر اُو منڪ جيو وشواس راکنه، مور ٿي يهودي قوم واڙا ان پسنه ڌاري قوم واڙا، اوئون ٻڌون نه تارن زڙه. ①7 ڪم تو ايتا كُشي ري كبر ۾ وات ساوئي ڏيڪيام آوه جي ڀڳوون ڪيا ري ڪري منڪون نه تارن ڏهه. منڪون ره روڳو وشواس راکيا ري ڪري ڀڳوون اوئون نه ماقئي ڏين ڏوهون ري سزا ٿي آزاده ڪرين تارن ڏهه. زم شاستر ۾ پڻ لکل سته:

"جيو منڪ ڀڳوون ري وات مانده وه
اوتاه نه وشواس راکيا ري ڪري جيون زڙشي."

ڀڳوون ڏوهاريون نه سزا ڏهه

①8 وات ساوئي سته جي ڀڳوون ري سزا ٿي پچيا هارو وشواس راکو ضروري سته، ڪم تو جيا منڪ هاس نه نٿي مونتا ان ڀڳوون ري وات مانده نٿي ویتا، ڀڳوون اوئون نه هر ڪراپ وات ري ڪري ايتا دنيا ۾ ساوئه نمونته سزا ڏهه، ڪم تو اُو ڀڳوون ره ڪلاڻ وه ان اوتاه ري وات مانده نٿي ویتا. ①9 ڀڳوون اوئون نه تيام سزا ڏهه، ڪم تو جئين ڪئين منڪون ره ڀڳوون را پارام زوٽو ڪپه، اُو واتون اوئون نه ساوي ڏيڪيام آوه. هائي واتون ڀڳوون آپ اوئون ڪن ساوي ڪريه، ②0 ڪم تو پلئه ڀڳوون آپ ڏيڪيام نٿي اوتو، پڻ جڳت نه نايا ٿي لين ڀڳوون ريون پيدا ڪرل شينهنون نه زوئين، سوچيا ٿي منڪ اي كبر ساوئه نمونته پاڙي هيڪنه، جي ڀڳوون شروع ٿي لين هميش هوڏي ڪڙا واڙو سته ان اُو ٻڌون مانده سته. تيام منڪ ڏوه ڪريا رو ڪئين پونهونو نٿي ڪري هيڪتا، جيا ري ڪري اوئون نه سزا نه زڙه. ②1 اوئون نه ڀڳوون رُئي كبر سته، توئي اوئي ڀڳوون را وڪوڻ نه ڪريا نڪو اوتاه رو ٿورو مونيو، پڻ اڙيون ڪيالون

۾ پڙين پُولاڻي ڳيا، ان اُئون را من موئين ڪئين سوجهرو نه ريو ان اُو ڪئين نٿي هزمتا. ②۲ اُو آپ نئه عقل واڙا هزمين پي عقل ٿي ڳيا. ②۳ ان هميش هُودِي ريا واڙا مون واڙا پڳوون رئي پُوزا ساڏين اُوتا ري جڳا ۾ منڪون، پڪيون، زناوَرُون ان هاڀون ري مُورتي پُوزو لاڳيا، جيا ٻڌائي مريا واڙا سئ.

②۴ تيام پڳوون اُئون منڪون نئه اُئون ري مرضي مانھ ساڏيا پرا، زم اُو آپرون ڪراپ ڪيالون پرموئنه پُونڌائي ڪرئ، ان آپت ۾ پُونڌو ڪوم ڪرين هڪا پيزا رئي پيعزئي ڪرئ. ②۵ اُوئي پڳوون نئه ساڏيو پرو، جيو هاسو سئ، ان اُوتا ري جڳا ۾ ڪوڙ نئه مونيُو. اُوئي ناول شينهون رئي پُوزا ان شيوا ڪري، پڻ نايا واڙا نئه ساڏيو پرو، جيا را وڪوڻ هميش هُودِي ٿيتا رئ. آمين.

②۶ تيام پڳوون اُئون نئه اُئون ري مرضي مانھ پيعزتي را پُونڌا ڪوم ۾ ساڏيا پرا. اُئون ري ڏوشي پڻ صحيح نمُونو ساڏين ڏوشي ڏوشيون ٿي پُونڌو ڪوم ڪروا مڏي. ②۷ ان هيون نمُونه اڏميئي پڻ صحيح نمُونو ساڏين ڏوشيون هارُو نئين پڻ اڏميون هارُو پُونڌي نظر راڪئي، ان اڏميئي اڏميون ٿي پُونڌو ڪوم ڪريو. ان هيون نمُونه هيوي پُونڌي حالت ۾ پڙين اُوئي آپري ڳلت سوچ رو نتيجو لوڙيو.

②۸ ان جيوئه نمُونه منڪي پڳوون را پارام هزميا ٿي پاھو ڏيڏو، هيون نمُونه پڳوون پڻ اُئون نئه اُئون رُون پُونڌون ڪيالون مانھ ساڏيا پرا، زم اُو ڪراپ ڪوم ڪرتا رئ. ②۹ اُئون را من هر نمُونا ريون ڪراپ واتون، پُونڌائي، لالچ ان وير ٿي پراڻ سئ. اُو رُوڳا ريشي ٻڙئ، ڪُون ڪرئ، وڙڳاھ، ٺڳي ڪرئ، ان ڪراپ ڪيال راڪئ. اُو چُڳلئي هئئ، ③۰ ڳلا ڪرئ، پڳوون رئ ڪِلاڦ سئ، پيزون رو مون نٿي راڪتا، مگھرو سئ، ان وڌائي ڪرئ. اُو نوون نوون طريقون ٿي ڪراپ ڪوم ڪرئ، مان ٻاپ رو ڪيڏو نٿي مونتا، ③۱ عقل نٿي راڪتا، آپرو وائڏو پورو نٿي ڪرتا، ڪيا ٿي پريم نٿي ڪرتا ان ڪيا مانھ ڏيا نٿي ڪرتا. ③۲ اُئون نئه پڳوون را ڦينصلا رئي ڪبر سئ جيا منڪ

هيو ڪوم ڪرڻ، اُو موت رڻي سزا ڪاڏا رڻ لائق سڻ، توڻي پڻ نه رُوڳو اُو آپ هيو ڪوم ڪرڻ، پڻ جيا پڙا منڪ هيو ڪوم ڪرڻ، اُوئون نڻه اُو ناڻوڪا هڙمڻه.


پڳوونَ اِنصاف ٿي ڦينصلو ڪرينَ سزا ڏڻه

2 ① تيام تمڻي جيا پڙون رو ڏوه ڪاڍوه، تمڻي ڪوڻي پڻ هوڻو، تمڻي ڪڻين پونهونو نڻي ڪري هيڪتا جيا ري ڪري پڳوونَ تمون نڻه سزا نه ڏڻه. ڪم تو جيا وات ٿي تمڻي پڙون رو ڏوه ڪاڍوه، تمڻي هايا هاڳي وات ٿي آپ نڻه ڏوهاري ڪروه. ڪم تو تمڻي جيا ڏوه ڪاڍوه، تمڻي آپ اُو ڏوه ڪروه رڻا.

② آپون نڻه تو ڪهر سڻه جي پڳوونَ اِنصاف ٿي ڦينصلو ڪرڻ، ان اُوئا رو ڦينصلو صحيح سڻه جي هيو ڪراپ ڪوم ڪريا واڙون نڻه اُو سزا ڏڻه. ③ تو پسنه تمڻي جيا ڪراپ ڪوم ڪريا واڙون رو ڏوه ڪاڍوه ان آپ ڪراپ ڪوم ڪروه، تمڻي ڪي هڙموه؟ تمڻي پڳوونَ ري سزا ٿي پڇي زاشو ڪي؟ ④ پڳوونَ تمون مانه گهڻي ميرپونڻي ڪرڻ، اُوڻه تمون نڻه تمارون ڪرل ڏوهون رڻي سزا نڻي ڏيڏي پڻ تمون هارو صير ڪرڻ. پڻ تمڻي هايون واتون نڻه ڪڻين نڻي هڙمتا ڪي؟ تمون نڻه اڻا وات رڻي ڪهر نڻي ڪي؟ پڳوونَ ميرپونڻي اڻا هارو ڪرڻ، زم تمڻي آپرا ڪراپ ڪوم ساڏين توپونه ڪرو ان اُوئا ري وات مانه وو.

⑤ پڻ تمڻي صڏي سو ان آپرا ڪراپ ڪوم ساڏين توپونه نڻي ڪرتا ان پڳوونَ ري وات مانه نڻي وڻا. تيام تمڻي نڻا رڻه ڏي آپ هارو سزا ڪاڏا رڻي مُصِيپ پڻا ڪروه رڻا، جيئ ڏي پڳوونَ ڪراپ منڪون نڻه سزا ڏيشي ان آپرو اِنصاف ٿي ڪرل ڦينصلو ساوو ڪرشي. ⑥ پڳوونَ هر منڪ نڻه اُوئا رون ڪرل ڪومون پرموڻه ايوڙو ڏيشي. ⑦ جيا منڪ ڏوروڻ سهين صير ٿي ناڻوڪا ڪوم ڪرڻ، زم اُوئون نڻه مون ان عزت زڙڻه ان اُو هميش هُوڏي جيوڻا رڻه، پڳوونَ اُوئون نڻه هميش رو جيون ڏيشي. ⑧ پڻ جيا منڪ رُوڳا آپرا ڦاڻڻا هارو ڪرڻ ان

هاس مانه نټي ویتا پښ ڪوڙيون واتون مانه وين ڪراپ ڪوم ڪرئ، پڳوون اوئون ننه رينه ٿي سزا ڏيشي. ⑨ هر هيڪ ڪراپ ڪوم ڪريا واڙا ننه گهڻو ڏک ان تڪليل زڙشي، مور ٿي يهوديون ننه ان پسنه ڌاري قوم واڙون ننه. ⑩ پڻ هر هيڪ نائوڪا ڪوم ڪريا واڙا ننه مون، عزت ان هڪ زڙشي، مور ٿي يهوديون ننه ان پسنه ڌاري قوم واڙون ننه. ⑪ ڪم تو پڳوون ڪيا رو پڻ پاهو نٿي لیتو.



⑫ جيو ڪوئي پڳوون رو ڏوه ڪرئ، او هميش رٿي سزا ڪاشي. زتي ڌاري قوم واڙي موسي را لڪل پڳوون را حڪم زوٿيا وگر پڳوون رو ڏوه ڪريوه، اوئون رو ڦينصلو موسي رون لڪل حڪمون پرموئنه نئين هوئه، توئي پڳوون رو ڏوه ڪريا ري ڪري او هميش رٿي سزا ڪاشي. ان زتي يهودي قوم واڙي موسي را لڪل پڳوون را حڪم زوٿتون پڳوون رو ڏوه ڪريوه، اوئون

رو ڦينصلو موسي رون لڪل حڪمون پرموئنه ٿيشي، ان هم او پڻ هاڳي نموننه هميش رٿي سزا ڪاشي. ⑬ ڪم تو موسي را لڪل پڳوون را حڪم هومپڙيا ٿي منڪ پڳوون هوما پيڏوهي نٿي ٿيتا، پڻ اوئون حڪمون مانه وودا ٿي منڪ پيڏوهي ٿنه ان هم پڳوون ري سزا ٿي پڇي زاشي. ⑭ ان هيوئه نموننه ڌاري قوم واڙا، جيون ننه موسي رون لڪل پڳوون رون حڪمون رٿي ڪبر نٿي، زنيون او اپرا ڪيال ٿي ايوا ڪوم ڪرئ جيو ڪوم موسي رون لڪل حڪمون ۾ ڪيڏل سٺه، تو پلنه اوئون ڪن موسي را لڪل حڪم نٿي، توئي پڻ او اپرا ڪيال ٿي پڳوون رون حڪمون مانه وئ. ⑮ هيوون منڪون ٿي اي وات ساوئي ٿنه جي جيا ڪوم موسي رون لڪل پڳوون رون حڪمون پرموئنه ڪروو ڪپنه، او زوئنه اوئون را من ۾ اڳي لڪل سٺه. ان پڳوون ري ڏيڏل هايا هزم پرموئنه اوئون ننه ڪبر

سٺه جي ڪي ڪروو ڪراپ سٺه ان ڪي ڪروو نائوڪو سٺه، ان آپرون ڪيالون ٿي اوڙڪي هيڪڙه جي اُوئي ڪراپ ڪوم ڪريوه، ڪا نٿي ڪريو. (16) هائي ٻڌي واتون ماري همپڙاول ايسو ري ڪشي ري ڪپر پرموٽه تيڏي ساوي ٿيشي، جيڏي پڳوون منڪون رون منون ۾ هٿال واتون پرموٽه ايسو ڪريست ٿي منڪون رو نيا ڪراوشي.

پڳوون يهودي قوم رون ٺوهاريون نٺ پڻ سزا ٺهه

(17) هوٽه ٽمي جيا يهودي سو، جي ٽمي موسي رون لڪل حڪمون مانھ پروسو راکوه ان ايٺا وات مانھ وڌائي ڪروه جي پڳوون اماري قوم نٺه سونديٺه؛ (18) جي شاستر ٿي شيڪين ٽمون نٺه پڳوون ري مرضي رٿي ڪپر سٺه ان ٽمي هزموه جي ڪيوي واتون نائوڪي سٺه، (19) ٽمون نٺه پڪئي ڪاتري سٺه جي ٽمي اونڌون نٺه شيرڙو ڏيڪاڙيا واڙا سو، ان اندارا ۾ سوجهرو ڏيڏا واڙا سو، (20) پي عقلون نٺه هزميا واڙا ان ٻاڙون نٺه شيڪاڙيا واڙا سو، ڪم تو ٽمون ڪن شاستر ۾ گبون ان هاس ري ٻڌي واتون لڪل سٺه، (21) تو پسته ٽمي جيا پيزون نٺه شيڪاڙوه، ٽمي آپ تماريون شيڪاڙل واتون مانھ ڪم نٿي وٺا؟ ٽمي ام ڪوه جي سورٿي نه ڪروو، پڻ ٽمي آپ سورٿي نٿي ڪرتا، ڪي؟ (22) ٽمي ام ڪوه جي پونڌو ڪوم نه ڪروو، پڻ ٽمي آپ پونڌو ڪوم نٿي ڪرتا، ڪي؟ ٽمي مورتئي پوزا هاو ڪراپ هزموه، پڻ ٽمي آپ پڳوون رو مون نه راکين پڳوون رٿي پيعزتي نٿي ڪرتا، ڪي؟ (23) ٽمي اي وڌائي ڪروه جي امي پڳوون را حڪم مونونھ، پڻ پڳوون را حڪم ٽوڙين ٽمي پڳوون رٿي پيعزتي نٿي ڪرتا، ڪي؟ (24) زم شاستر ۾ لڪل سٺه:

"تماري ڪري ڌاري قوم واڙا پڳوون رٺه ڪلاڦ ٻولئھ."

(25) ٽمي يهودي سو ان تمارئي توهر ڪرل سٺه. هوٽه توهر ڪرايا رو ڦاڻيڏو تو سٺه، جي ٽمي موسي رون لڪل پڳوون رون حڪمون مانھ ووھ. پڻ جي ٽمي

هايون حُڪمون مانھ نٿي وِيتا، تو توهَر ڪرايا رو ڪئين ڦائڻڊو نٿي، زوئڻه تماري توهَر ٿيل ئي نٿي. ②6 هيونُه نمُونه ڌاري ڦوم واڙا جيون رهي توهَر ڪراول نٿي، جي اُو پڳوون ري وات مانھ وئھ زم مُوسي رُون لڪل حُڪمون ۾ ڪيڏل سئھ، تو پلئھ اُونون رهي توهَر نٿي ٿيل، پڻ پڳوون اُونون نئھ ضرور توهَر ٿيل را زم آڀرا منڪ هُزمشي. ②7 هيوَا ڌاري ڦوم واڙا، جيون رهي توهَر ڪرل نٿي توئي پڻ اُو آڀرا ڪيال پرموئھ پڳوون رُون حُڪمون مانھ وئھ، اُو منڪ تمون يهُوديون نئھ ڏوهاري ڪرشي، ڪم تو تمون ڪن پڳوون را حُڪم شاستر ۾ مُوسي را لڪل سئھ ان تماري توهَر ڪرل سئھ، توئي پڻ تمي پڳوون رُون حُڪمون مانھ نٿي وِيتا.

②8 وات اي سئھ، يهُودي رو هاسو مطلب سئھ، پڳوون رو سُونڍل منڪ. اُو ايُو منڪ نٿي جيو ذات ري ڪري يهُودي ٿيوھ ان جيو زويا ٿي اوڙڪاشي جي يهُودي سئھ. ان هاس ۾ پڳوون رو منڪ هويا رهي جئي ٿاڀٽي سئھ، اُو توهَر نٿي جئي ڏيل ۾ ڪرل سئھ ان ڏيڪيام آئھ. ②9 پڻ جيو هاس ۾ يهُودي سئھ، مطلب جيو هاس ۾ پڳوون رو سُونڍل منڪ سئھ، اُو ايُو منڪ سئھ جيو من ۾ پڳوون مانھ وشواس راڪئھ. ان هاس ۾ پڳوون رو منڪ هويا رهي جئي ٿاڀٽي سئھ، اُو ڏيل رهي وات نٿي پڻ من رهي وات سئھ، لڪل حُڪمون مانھ وُڍا رهي وات نٿي، پڻ پَوِتر آتما ري مرضي مانھ وُڍا رهي وات سئھ. هيون منڪون را وڪوڻ منڪون ٿي نئين پڻ پڳوون ٿي ٿئھ.

3 ① تو پستھ سوئال اي سئھ. يهُودي هويا رو ڪي ڦائڻڊو سئھ؟ ان توهَر ڪرايا رو ڪي ڦائڻڊو سئھ؟ ② ڦائڻڊو تو هر وات ۾ گهڻو سئھ. پيرهيون ڦائڻڊو اي سئھ جي پڳوون آڀرو وچن شاستر را رُوپ ۾ يهُوديون رئھ حوالئھ ڪريو.

③ ڪئينڪ يهُودي پڳوون را وچن مانھ نه وُڍا، تو ڪي ٿيوھ؟ اُونون رئھ پڳوون ري وات مانھ نه وُڍا ري ڪري، پڳوون آڀري وات مانھ نئين وئھ، ڪي؟ ④ نا نا، پڳوون آڀري وات مانھ ضرور ويشي. ام هُزمو جي پڳوون هاسو سئھ،

پلئو ٻڌائي منڪ ڪوڙا هونءِ. هايا را پارام دائود، ڀڳوون هومو آڀرو ڪرل ڏوه
 مونين، شاستر ۾ ام لکيو جي
 ”تيام وات ساوئي سئو
 جي تمڻي آڀريون واتون ۾ هاسا سو،
 ان تمڻي انصاف ٿي ڦينصلا ڪروھ.“

⑤ هونءِ، زئيون آڀئو ڏوه ڪريا ري ڪري وات وڌارو ساوئي تئھ جي
 ڀڳوون انصاف ڪريا واڙو سئو، تو پسنه آڀئو ڪي هزمو ڪپئو؟ ڪوڪ تو ام
 سوچشي ”جي امارو ڏوه ڪريا ٿي ڀڳوون رو مون وڌو، تو پسنه ڀڳوون امون
 نئو سزا ڪم ڏئو؟“ آڀئو ام هزمو ڪي، جي زئيون ڀڳوون آڀون نئو ڏوهون رئي
 سزا ڏئو، تو ڀڳوون نا انصاف ٿي ڪرئو؟ نا نا، هائي واتون منڪون ري ڳلت سوچ
 ڀرموئو سئو. ⑥ وات هم نٿي. جي ڏوهاريون نئو سزا ڏيو نا انصاف ٿي هونءِ،
 تو ڀڳوون ڪم ڪرين ڏنيا رو نيا ڪرئو؟ ⑦ توڻي پڻ ٿي هيڪئو جي ڪوڪ
 ام ڪئو جي ”مارو ڪوڙيون واتون مانھ وڍا ٿي وات وڌارو ساوئي تئھ جي
 ڀڳوون هاسو سئو، ان هيون نمونئو ڀڳوون رو مون وڌي ڳيوھ. تو پسنه ڀڳوون
 مون نئو ڪم ڏوهاري ڪرئو؟“ ⑧ جي هم ڪئو، هائي تو روڳو پونهونو ٿئو
 جي ”آڀي پلئو ڪراڀ ڪوم ڪرون، زم ناٿوڪو نتيجو نيهرئو.“ ڪئينڪ منڪ
 اماري ڳلا ڪرين امون مانھ اي الزوم هئو جي امي آڀ هم شيڪارونھ. پڻ
 امي تو هم نٿي ڪيتا. جيا منڪ هم ڳلا ڪرئو، او ڀڳوون رئي سزا کاڌا جيو
 سئو، ان ڀڳوون اوئون نئو ضرور سزا ڏيشي.

ڏنيا را ٻڌائي منڪ ڀڳوون را ڏوهاري سئو

⑨ تو پسنه آڀون يهوديون رئو ڪي هزمو ڪپئو؟ ڪي آڀي يهودي ڌاري قوم
 واڙون ٿي ناٿوڪا سون؟ نا نا، ماڳي نئين. امي تو اڳي ڪيڏوھ جي يهودي ان
 ڌاري قوم واڙا ٻڌائي ڏوهون ۾ ڦاٿل سئو. ⑩ اي هاڳي وات شاستر ۾ پڻ لڪل

سٺه جي

”ٻڌائي منڪ ڏوهاري سٺه، ڪوئي پيڏوهي نٿي.

ڪوئي منڪ هڙمو نٿي.

⑪ ڪوئي پڳوون ري وات مانھ ويوا نٿي ڪرتو.

⑫ ٻڌي پڳوون نٺه ساڏيوھ پرو.

ٻڌائي هيڪ جيوا ٿين نڪوما ٿي گپياھ.

ڪوئي نٿي جيو ميرپونئي ڪرڻ، هيڪ ئي نٿي.

⑬ ”زم ڪُلل مقوم موئين ٿي گهنڌ آوڻ،

تم اوئون را مونڊا ٿي روڳي ڪراپ واتون نيهرڻ،

ان او ڪوڙ هاڪلين لڳئي ڪرڻ.

”اوئون را ويڻ ھاپون را جھير جيوا ڪراپ سٺه.

⑭ ”او روڳا منڪون نٺه پٽھ ان وير راڪين ٻولڻھ.

⑮ ”او ڪون ڪريا ھارو تڪا ڊوڙھ.

⑯ جيٽھ او زائھ، اوٽھ ڏڪ ان تڪليپ پڪيڙھ.

⑰ ان اوئون نٺه هڪ رکيا رئي ڪهر ئي نٿي.

⑱ ”اوئون نٺه پڳوون رئي ڪئين پيڪ نٿي.

⑲ ھوٽھ آپون نٺه ڪهر سٺه جي زتي واتون شاستر لڪل سٺه، او يھوديون

ھارو لڪل سٺه جيا شاستر رون موسي رون لڪل حڪمون مانھ وُڍا واڙا سٺه. تيا

ري ڪري ڪوئي پڻ منڪ اي پونھونو نٿي ڪري هيڪتو جي ھون پيڏوهي سون،

ان تيام ڏنيا را ٻڌائي منڪ پڳوون را ڏوهاري ٿين سزا کاڌا جيوا سٺه. ⑳ ڪم

تو ايوو ڪوئي نٿي جيو ڏوھ ڪريا وڳر پورڻھ نمونئھ موسي رون لڪل حڪمون

مانھ وڻھ، تيام موسي رون لڪل حڪمون مانھ وُڍا را نمونا ٿي ڪوئي پڳوون

ري سزا ٿي نئين پڄڻھ. ڪم تو موسي رون لڪل حڪمون ٿي آپون نٺه پورئي ڪهر

پڙڻھ جي آبي ٻڌائي منڪ ڏوهاري سون.

ايسُو مانه وشواس راكيا ري كري پڳوون منكون نئ ڏوهون رئي ماقئي ڏئھ

②1 پڻ هونءِ وات ساوئي ٿيھ جي پڳوون منكون نئ موسيٰ رون لڪل حُڪمون مانھ وُڍا وڳر ڏوهون ري سزا ٿي ڪيون نمونئ آزادا ڪرئھ. هايا وات را پارام موسيٰ ان پڳوون رو نياپو ڏيڏا واري شاستر ۾ اڳي لڪيو تو. هائي وات اي سئھ جي ②2 پڳوون ايسُو ڪريست مانھ وشواس راكيا ري ڪري منكون نئ ماقئي ڏين ڏوهون ري سزا ٿي آزادا ڪرئھ. پڳوون اوئون ٻڌون نئ پڇاوهن جيا ايسُو مانھ وشواس راڪئھ، يھوديون نئ ان ڌاري قوم واڙون نئ ٻڌون نئ، ڪم تو اوئون ۾ ڪئين قرق نٿي. ②3 ڪم تو ٻڌي ڏوه ڪريوه، ان پڳوون رو ڏيڏل مون ليڏا جيوا نه ٿيا. ②4 پڻ پڳوون ايسُو ڪريست نئ ميليا ٿي ٻڌون نئ ڏوهون را قَوضا ٿي آزادا ڪراياھ ان اوئون نئ آپري ڪرپا ٿي امهي ماقئي ڏين ڏوهون ري سزا ٿي آزادا ڪرئھ. ②5 پڳوون ايسُو نئ ايٺا ڪوم هارو راکيو جي او منڪون رون ڏوهون ري ماقئي هارو آپرو جيو پڳوون را نوم مانھ ڏئھ، ان هيونءِ نمونئ پڳوون اوئون ٻڌون منڪون نئ ڏوهون رئي ماقئي ڏئھ، جيا ايسُو مانھ وشواس راڪئھ. پڳوون هم ڪريو زم وات ساوئي ٿئھ جي او انصاف ڪريا واڙو سئھ، ڪم تو اڳي اوئھ صير ڪرين منڪون نئ اوئون رون ڪرل ڏوهون رئي سزا نٿي ڏيڏئي. ②6 پڳوون ڏوهاريون ٿي هائي صير ايٺا هارو ڪريو، زم همئھ ايٺا زمونا ۾ وات ساوئي ڪرئھ جي او انصاف ڪرئھ، ان ايسُو مانھ وشواس راكيا واڙون نئ ماقئي ڏين ڏوهون ري سزا ٿي آزادا ڪرئھ.

②7 تيام هونءِ آڀي يھودي قوم رئي اي وڏائي ڪيل گئي، جي امي موسيٰ رون لڪل حُڪمون مانھ وُڍا واڙا سون؟ آڀئي هائي وڏائي تو ڪتم ٿي گئيھ. ڪم تو وات اي نٿي جي آڀي موسيٰ رون لڪل حُڪمون مانھ وونھ ڪا نا، پڻ وات اي سئھ جي آڀي وشواس راڪونھ ڪا نا. ②8 ڪم تو امي اي هزمونھ جي

مُوسِي رُون لَڪل حُڪمون مانھ وُڊا وڳر وِشواس راکيا ري ڪري پڳوونَ منڪون نئھ ماقئي ڏين ڏوهون ري سزا ٿي آڙا ڪرئھ. (29) جي مُوسِي رُون لَڪل حُڪمون مانھ وُڊا ٿي پڇئت، تو ڌاري قُوم واڙا ڪم ڪرين پڇي هيڪٽ؟ تمِي ڪي هُزموھ؟ پڳوونَ رُوڳو يهُوديون رو سئھ ڪي؟ ان ڌاري قُوم واڙون رو نتي ڪي؟ ايٺا م ڪئين شڪ نتي، اُو تو ڌاري قُوم واڙون رو پڻ پڳوونَ سئھ، (30) ڪم تو پڳوونَ هيڪٽھ سئھ، ان اُو توهر ڪرل يهُوديون نئھ ان توهر نه ڪرل ڌاري قُوم واڙون نئھ پڻ هاڳي نمونئھ وِشواس راکيا ري ڪري ماقئي ڏيشي ان ڏوهون ري سزا ٿي آڙا ڪرشي.

(31) تو پسنئھ امارو هم ڪيڏا رو مطلب ڪي سئھ؟ زئيون امي ڪونھ جي رُوڳو وِشواس راکيا ٿي تارڻ زڙشي، تئيون امي شاستر م لَڪل پڳوونَ را حُڪم ڪتم ڪرونھ ريا، ڪي؟ نا نا، هم نتي. امي تو شاستر م لَڪل پڳوونَ ريون واتون مانھ وونھ ريا.

ابراھيم رءُ وِشواس راکيا رو مثال

4 ① هُوئھ آپون نئھ شاستر موئين ٿي ابراهيم را پارام ڪيوئي ڪهر پڙئھ، جيو قُوم پرمونئھ آپون يهُوديون رو ڏاڏو سئھ. ابراهيم ڪيا ري ڪري ڏوهون ري سزا ٿي آڙا ٿيو؟ ② ڪم تو وات ساوئي سئھ، جي ابراهيم آپرون ڪرل ڪومون ري ڪري ڏوهون ري سزا ٿي آڙا ٿيو هوئت، تو اُوئا رو حق ٿئت جي اُو پيڏوهي ٿيا را پارام وڏائي ڪرئھ. پڻ پڳوونَ هُمو ابراهيم رءُ وڏائي ڪريا رو ڪئين حق نتي. ③ ڪم تو شاستر م ام لَڪل سئھ جي

”ابراهيم پڳوونَ مانھ پُورا يقين ٿي وِشواس راکيو،

ان تيام پڳوونَ اُوئا نئھ آپري وات مانھ وُڊا واڙو ڪيڏو.“

④ هُوئھ، زئيون ڪوڪ منڪ ڪوم ڪرئھ، تو اُوئا رو حق سئھ جي اُو ڪوم را ايوزا م مزورئي لئھ. ام نتي جي ڏئي اُوئا مانھ ڏٺيا ڪرين اُوئا نئھ مزورئي ليڏا

جيئو ڪئھ. هيئوئہ نمُونئہ، جي ابراهيم آڀرون ڪرل ڪومون ري ڪري ڀڳوون ري وات مانھ وُڍا واڙو ٿئٽ، تو ام لڪل هوئٽ جي او آڀرون ڪرل ڪومون را ايوزا ۾ ڀڳوون ري وات مانھ وُڍا واڙو ٿيو. پڻ ام لڪل سئھ، جي ڀڳوون اوئا رئھ وشواس راڪيا ري ڪري اوئا نئھ آڀري وات مانھ وُڍا واڙو ڪيڏو. هايا ٿي وات ساوئي سئھ جي ابراهيم ڪرل ڪومون را ايوزا ۾ ڀڳوون ري وات مانھ وُڍا واڙو نہ ٿيو. ⑤ هايا رو مطلب اي سئھ، منڪ آڀرون ڪرل ڪومون را ايوزام ڀڳوون ري وات مانھ وُڍا واڙا نٿي ٿيئا. پڻ زئيون ڏوهاري منڪ وشواس راڪئھ، تئيون ڀڳوون اوئون نئھ ماڦئي ڏين ڏوهون ري سزا ٿي آزاد ڪرئھ، ان وشواس راڪيا ري ڪري اوئون نئھ آڀري وات مانھ وُڍا واڙا ڪئھ.

⑥ دائود پڻ هائي هاڳي وات ڪرئھ جي او منڪ ڪتا ڀاڳواڙا سئھ، جيا پلئھ آڀرون ڪرل ڪومون ري ڪري پيڏوهي نٿي، توئي پڻ ڀڳوون اوئون نئھ آڀري وات مانھ وُڍا واڙا ڪئھ ان ماڦئي ڏين ڏوهون ري سزا ٿي آزاد ڪرئھ. دائود شاستر ۾ ام لکيو:

⑦ ”ڀاڳواڙا او سئھ

جيون نئھ ڀڳوون را حڪم توڙيا رئي ماڦئي زڙئھ،
ان جيون را ڏوھ ڀڳوون ماڦ ڪرياه.

⑧ ڀاڳواڙا او سئھ

جيون نئھ ايشور سزا نٿي ڏيتو،

پڻ اوئون نئھ ماڦئي ڏين ڏوهون ري سزا ٿي آزاد ڪرئھ.“

⑨ هوئھ سوئال اي پيڏا تئھ جي اي ماڦئي زڙيا رو ڀاڳ روڳو توهر ڪرل يهوديون هارو سئھ، ڪا توهر نہ ڪرل ڌاري قوم واڙون هارو پڻ سئھ؟ امي تو ڪونھ ريا جي ڀڳوون ابراهيم نئھ وشواس راڪيا ري ڪري آڀري وات مانھ وُڍا واڙو ڪيڏو. ⑩ پڻ وات اي سئھ، ڀڳوون اوئا نئھ ڪئيون آڀري وات مانھ وُڍا واڙو ڪيڏو؟ زئيون اوئا رئي توهر ٿيل هئي، ڪا زئيون ٿيل نٿي؟ ڀڳوون ابراهيم نئھ تئيون

آپري وات مانھ وُڊا واڙو ڪيڏو، زئيون اُٿا رُئي تهر ٿيل نٿي، ان تيا ڪيڙ اُٿا رُئي تهر ٿي. ⑪ ان پڳوون اُٿا ننه ايتا هارو تهر ڪريا رو ڪيڏو زم تهر را نيشون ٿي ايتا رُئي ٿا پٽي ٿن، جي پڳوون تهر ڪريا وڳر وشواس را ڪيا ري ڪري اُٿا ننه ماڻهي ڏين آپري وات مانھ وُڊا واڙو ڪيڏو. هيون نمونھ ابراهيم اُٿون ٻڌون وشواس را ڪيا واڙون رو ڏاڏو ٿيو، جيا ڌاري قوم ٿي سئھ ان جيون رُئي تهر نٿي ٿيل، زم پڳوون اُٿون ننه پڻ آپري وات مانھ وُڊا واڙا ڪئھ ان ماڻهي ڏين ڏوهون ري سزا ٿي آزاده ڪرئ. ⑫ ان اُو آپون تهر ڪراول يهوديون رو ڏاڏو پڻ سئھ، جيون رُئي نه روڳهي تهر ٿيل سئھ، پڻ جيا ايوو وشواس پڻ را ڪونھ جيوو آيئھ ڏاڏئھ ابراهيم را ڪيو تو، زئيون اُٿا رُئي تهر ٿيل نٿي.

پڳوون روڳو يهوديون هارو نئين، پڻ هر قوم رُون وشواس را ڪيا واڙون هارو ابراهيم ٿي وائيدو ڪريو تو

⑬ وات اي سئھ، زئيون پڳوون ابراهيم ٿي وائيدو ڪريو تو، جي اُو پوري ڏنيا ابراهيم ان اُٿا را اولاد رنه حواله ڪرشي، تيون پڳوون اُو وائيدو ايتا وات ري ڪري نتو ڪريو جي ابراهيم حڪمون مانھ ویتو. پڻ پڳوون ايتا ري ڪري وائيدو ڪريو تو، ڪم تو ابراهيم وشواس را ڪتو. ان تيام پڳوون ابراهيم ننه آپري وات مانھ وُڊا واڙو ڪيڏو ان ماڻهي ڏين ڏوهون ري سزا ٿي آزاده ڪريو. ⑭ ڪم تو جي تارڻ روڳو اُٿون منڪون ننه زڙت جيا حڪمون مانھ وئھ، تو وشواس را ڪيا رو ڪئين ڦاڻيدو نه ٿئ، ان پڳوون رو وائيدو ڪيا ئي ڪوم رو نه رئت. ⑮ پڻ هاس م ام سئھ، حڪمون ري ڪري ڪيا منڪ ننه تارڻ نٿي زڙتو، پڻ روڳهي سزا زڙئھ، ڪم تو ٻڌائي منڪ حڪم توڙئھ. جي حڪم نه هوئ، تو هائي حڪم توڙيا ٿي منڪ ڏوهاري نه ٿئ.

⑯ تيام ٻڌي وات وشواس را ڪيا مانھ سئھ، زم پڳوون، موسي رُون لڪل حڪمون مانھ وُڊا را ايوزا م نئين، پڻ منڪون مانھ ڪُريا ڪرين آپرو ڪرل

وائيڌو ابراهيم را ٻڌا اولاد هارو پورو ڪرڻ. ڀڳوون آڀرو وائيڌو ٻڌون وشواس راڪيا وازون هارو پورو ڪرڻ، نه رڳو يهودي قوم وازون هارو جيا موسيٰ رون لڪل حڪمون مان ه وڻه ان پيڊي پرموڻه ابراهيم رو اولاد سڻ، پڻ ڌاري قوم وازون هارو پڻ، جيا ابراهيم را زم وشواس راڪڻه ان هايا وات پرموڻه ابراهيم رو اولاد سڻ. ڪم تو ابراهيم آڀون ٻڌون وشواس راڪيا وازون رو ڏاڏو سڻ، آڀي ڪيا ئي پڻ قوم ٿي هوڻ. (17) اي هاڳي وات شاستر ۾ لڪل سڻ جيئن ڀڳوون ابراهيم نڻه ڪيڏو:

”مڻن ٿون نڻه ايڻا هارو سونڊيوه
زم ٿون گهڻيون قومون رو ڏاڏو ٿڻ.“

تيام ڀڳوون ري نظر ۾ ابراهيم ٻڌون وشواس راڪيا وازون رو ڏاڏو سڻ، ڪم تو اڻه ڀڳوون مان ه وشواس اوڻيو جيو مرلون نڻه جيوتا ڪرڻ، ان آڀرا ڪيڏا ٿي شينهنون نڻه پيڏا ڪرڻ.

(18) ابراهيم رڻه اولاد ٿيا رڻي ڪڻن اُميد نٿي، توڻي پڻ اڻه ڀڳوون را وائيڏا مان ه يقين ڪرين وشواس راڪيو. هيوڻه نمونڻه او گهڻيون قومون رو ڏاڏو ٿيو، زم ڀڳوون اڻا نڻه ڪيڏو تو جي ”ٿارو اولاد الاهي گهڻو ٿيڻي.“ (19) ابراهيم نڻه پورڻي ڪبر هٿي جي او ٻي موڻهڻه ايوا نٿا جيا ٿي اولاد ٿڻه پڻ مرلون را زم هٿا، ڪم تو او هوڪ ورهون رو هٿو، ان او ام هزمتو جي اڻا زئي ڏيل رڻي طاقت هوڻه ڪٽم ٿي گهڻي، ان اڻا رڻي ڏوشي ساره وونزڻي هٿي ان ڏوڪرڻي پڻ ٿي گهڻي ٿي. توڻي پڻ اڻه هيمنت نه هارڻي ان وشواس راڪتو ريو. (20) اڻه نڪو پروسو ساڏيو نڪو ڀڳوون را وائيڏا مان ه شڪ ڪريو، پڻ وشواس راڪيا ري ڪري اڻا نڻه هيمنت زڙي، ان اڻه ڀڳوون را وڪوڻ ڪريا. (21) ڪم تو اڻا نڻه پڪو يقين هٿو جي جيو وائيڏو ڀڳوون ڪريو، او پورو پڻ ڪري هيڪڻه.

(22) هايا ري ڪري ”ڀڳوون اڻا نڻه آڀري وات مان ه وڏا وازو ڪيڏو.“

(23) هوڻه شاستر رڻي اي لڪل وات جي ”وشواس راڪيا ري ڪري ڀڳوون اڻا

ننه آپري وات مانھ وُڊا واڙو ڪيڏو، "اُو رُوگو ابراهيم هارُو لڪل نٿي، ②4 پڻ
 آپون ٻڌون هارُو لڪل سٺه، جيون ننه پڳوون آپري وات مانھ وُڊا واڙا ڪيشي.
 پڳوون آپون ننه پڻ آپري وات مانھ وُڊا واڙا ڪيشي ڪم تو آبي اُوئا مانھ
 وشواس راکونه، جيئنھ آڀا پڙيو ايسو ننه مرلون موئين ٿي جيوي اوناڙيوھ.
 ②5 ايسو آپتون ڏوهون ري ڪري آڀرو جيو ڏيڏو، ان پڳوون اُوئا ننه جيوي اوناڙيو
 زم آبي پڳوون ري وات مانھ وُڊا واڙا ٿيون، آپون ننه ماڻهي زڙنه، ان آبي
 ڏوهون ري سزا ٿي آزاد ٿيون.

پڳوون ان وشواس راکيا واڙون وسا منومئا ٿئھ

5 ① هونھ پڳوون آپون ننه ايسو مانھ وشواس راکيا ري ڪري ماڻهي ڏين
 ڏوهون ري سزا ٿي آزاد ڪرياه، ان تيام آبي آڀا پڙيو ايسو ڪريست ري
 ڪري پڳوون ٿي هڻ راکونه. ② ان ايسو ري ڪري آپون ننه وشواس راکيا ٿي
 اي موقعو پڻ زڙيوھ جي پڳوون آپون مانھ ڪُريا ڪرئ ان آبي اُوئا ٿي واسطو
 راکون، زم همئنھ پڳوون ٿي واسطو راکونه ريا. ان آبي من ۾ ڪُش ٿيونھ ڪم
 تو آڻو پروسو سٺه جي پڳوون آپون ننه آڪاش ۾ مون ڏيشي. ③ آبي نه رُوگا
 هايا آڪاشي وات مانھ ڪُش ٿيونھ، پڻ ايئا حياتي ريون تڪليهن ۾ پڻ من
 ۾ ڪُش ٿيونھ، ڪم تو آپون ننه ڪبر سٺه جي تڪليهن سميا ٿي آبي شيڪونه
 جي ڏورون ڪيونھ نمونھ صير هُون سهو، ④ ان ڏورون صير هُون سميا ٿي
 آبي پڳوون ننه ڪُش ڪرونھ، ان پڳوون ننه ڪُش ڪريا ٿي آڻو پڳوون مانھ
 پڪو پروسو ٿي زائھ. ⑤ ان اي آڻو پروسو جي پڳوون آپون ننه آڪاش ۾ مون
 ڏيشي، اي پروسو نالو نٿي جيا ري ڪري آبي لڙي مرشون. آپون ڪن ٿاڻي
 سٺه جي آڻو پروسو نالو نٿي، ڪم تو پڳوون آپون ننه پوٽر آتما ڏيڏا ٿي اتو
 پريم ڪريوھ جي اوئھ آڀا من ۾ آڀرو ٻڌوئي پريم ڏيڏو.
 ⑥ وات اي سٺه، اڳي آبي پڳوون رنه ڪلاڦ ويتا ان آپ ننه پڳوون ري سزا

ٿي پڇايا هارُو ڪئين نٿا ڪري هيڪتا، توڻي پڻ ايسُو ڪريست پورا ٿوئا مانھ آيون ڏوهاريون نٿه پڇايا هارُو آڀرو جيو ڏيڏو. ⑦ هونءَ پيڏوهي منڪ نٿه پڇايا هارُو ڪوڪ گهڻي مُشڪل ٿي آڀرو جيو ڏيشي، توڻي پڻ ٿي هيڪنه جي ڪياڪ ٿاڻوڪا منڪ ري جڳا ۾ ڪوڪ مريا هارُو تيار ٿنه. ⑧ پڻ پڳوون آيون نموننه وات ساوئي ڏيڪاڙئي جي او آيون ٿي ڪتو گهڻو پريم راکهه، جي زليون آڀي هزون ڏوهاري هتا تئين پڳوون رنه سونڍل پڇايا واڙنه ايسُو ڪريست آيون نٿه پڇايا هارُو آڀرو جيو ڏيڏو.

⑨ ايسُو رنه آڀرو جيو ڏيڏا ٿي پڳوون آيون نٿه ماڻهي ڏين ڏوهون ري سزا ٿي آڙا ڪرياه، تيام لازمي سٺه جي نيا رنه ڏي آڀي ايسُو ري ڪري پڳوون ري سزا ٿي ضرور پڇي زاشون. ⑩ زليون آڀي پڳوون رنه ڪلاڻ هتا، تئين پڳوون را ڏيڪرا را موت ٿي پڳوون ان آيون ۾ منومثا ٿيا. تيام لازمي سٺه جي هونءَ منومثا ٿيا ڪيڙ ايسُو رنه جيوتو ٿيا ري ڪري پڳوون آيون نٿه ضرور پڇاوشي. ⑪ آڀي نه روڳو سزا ٿي پڇي زاشون، پڻ آڀي آڀا پريو ايسُو ڪريست ري ڪري پڳوون را وڪوڻ پڻ ڪرونه، ڪم تو اوئا ري ڪري پڳوون ان آيون ۾ همئنه منومثا ٿياھ.

پيرهيان آدمي آدم ري ڪري منڪون نٿه موت زڙهه

پڻ ايسُو ري ڪري هميش رو جيون زڙهه

⑫ تيام، جيوتو نموننه هيڪا منڪ آدم ري ڪري ڏنيا ۾ ڏوه شروع ٿيو، ان ڏوه ڪريا ري ڪري موت ٿيو، هيوتو نموننه پڻ موت ٻڌون منڪون ۾ پڪڙي ڳيوھ، ڪم تو ٻڌي ڏوه ڪريوھ. ⑬ موسيٰ رون لڪل حڪمون ٿي اڳي پڻ ڏنيا ۾ منڪ ڏوه ڪرتا، پلنه لڪل حڪمون وڳر ڪئين ٿاڀتي نٿي جي ڪي ڏوه سٺه، ان ڪي ڏوه نٿي. ⑭ توڻي پڻ پيرهيان منڪ آدم را وڪت ٿي لين موسيٰ را وڪت هوڏي موت ٻڌون منڪون نٿه آڀرا قوضام لين اوئون مانھ آڀرو راز ڪريو، پلنه اوئي

آدم را زم زوئي ڪرين پڳوونَ رو حُڪم نه ٿوڙيو، پڻ پڳوونَ را حُڪم زوٽيا وڳر ڏوه ڪريو هئو.

آدم ٿي پڳوونَ را وائڏا پرموئو آيا واڙا ايسو را پارام هيڪ مِثال زڙو. ⑮ پڻ آدم رڻه پڳوونَ رو حُڪم ٿوڙيا مِ ان ايسو رڻه ڪُريا مِ هاوُ قرق سڻه. هيڪا منڪ آدم رڻه پڳوونَ رو حُڪم ٿوڙيا ري ڪري گهڻون منڪون نڻه موت زڙيو، پڻ هايا ٿي موتي وات اي سڻه جي هيڪا منڪ ايسو ڪريست رڻه ڪُريا ڪريا ري ڪري پڳوونَ گهڻون منڪون مانھ الاهي گهڻي ڪُريا ڪري ان ڏوهون رڻي ماڻي ڏيڏي. ⑯ ان هيڪا منڪ آدم رڻه ڏوه ڪريا را نتيجا مِ ان پڳوونَ رڻه ماڻي ڏيڏا را نتيجا مِ هاوُ قرق سڻه. آدم رڻه ڏوه ڪريا مِ اي وات سڻه، جي منڪ رُوڳو هيڪ وار پڳوونَ رو حُڪم ٿوڙيو، تيام پڳوونَ موت رڻي سزا ڏيڏا رو ڦينصلو ڪريو. پڻ پڳوونَ رڻه ماڻي ڏيڏا مِ اي وات سڻه، جي منڪي گهڻي وار پڳوونَ را حُڪم ٿوڙيا، توئي پڻ پڳوونَ اوئون مانھ ڪُريا ڪري ان امهي ماڻي ڏين ڏوهون ري سزا ٿي آزاد ڪريا. ⑰ هيڪا منڪ آدم رڻه هيڪ وار حُڪم ٿوڙيا ري ڪري، موت منڪون نڻه آپرا قوَضام لين اوئون مانھ راز ڪريو. پڻ هايا ٿي موتي وات اي سڻه، جي هيڪا منڪ ايسو ڪريست ري ڪري، او منڪ جيون مانھ پڳوونَ آپري گهڻي ڪُريا ڪرڻھ ان امهي ماڻي ڏين ڏوهون ري سزا ٿي آزاد ڪرڻھ، او منڪ آپ هميش رو جيون لين راز ڪشي.

⑱ تيام، جيون نمونھ آدم رڻه هيڪ وار پڳوونَ رو حُڪم ٿوڙيا ري ڪري ٻڌون منڪون نڻه موت رڻي سزا ڏيڏا رو ڦينصلو ٿيو، هيون نمونھ ايسو ڪريست رڻه هيڪ وار پڳوونَ را نوم مانھ آپرو جيو ڏيڏا ري ڪري ٻڌون منڪون نڻه موقعو زڙيو جي اوئون نڻه ماڻي زڙو، ڏوهون ري سزا ٿي آزاد ٿن، ان هميش رو جيون لڻه. ⑲ ڪم تو جيون نمونھ هيڪا منڪ آدم رڻه پڳوونَ رو ڪيڏو نه مونيا ري ڪري گهڻا منڪ ڏوهاري ٿيا، هيون نمونھ هيڪا منڪ ايسو ڪريست


رئه پڳوون رو ڪيڏو مونيا ري ڪري گهڻا منڪ پڳوون ري وات مانھ وُڍا وازا
تيشي ان پڳوون اوئون نئه ڏوهون رئي ماقئي ڏيشي.

② پڳوون موسيٰ هات آڀرا حڪم ڏيڏا، زم وات ساوئي تئه جي پڳوون
را حڪم توڙيا ٿي منڪ ڪتو گهڻو ڏوه ڪرئو ريا. پڻ زم منڪي گهڻا ڏوه
ڪريا، تم پڳوون اوئون مانھ وڌيڪ گهڻي ڪُريا ڪري، ② زم جيون ڍاڙئ
منڪ ڏوهون را راز هيٺ ٿيا ان ڏوه ڪريا ري ڪري موت را قَوضام ڦاڻيا،
هيون ڍاڙئ پڳوون اوئون مانھ ڪُريا ڪرين آڀرا راز م لي آون ان آڻا پڙو
ايسو ڪريست ري ڪري منڪون نئه ماقئي ڏين ڏوهون ري سزا ٿي آزاد ڪرئ ان
هميش رو جيون ڏئ.

ڏوهون را قَوضا ٿي سئونين وڙي ڏوه نه ڪروو

6 ① هوئه آبي ڪي ڪرون؟ آبي ڏوه ڪرتا ريشون ڪي، زم پڳوون آڀون
مانھ گهڻي ڪُريا ڪرئ؟ ② نا نا، هم ماڳي نه ڪروو. آڻئي ڏوه ڪريا
واڙي حياتي تو ڪتم ٿي گهيھ. هوئه آبي اڳي را زم ڪم ڪرين ڏوه ڪرتا
ريشون؟ ③ تمون نئه اينا وات رئي ڪهر نئي ڪي؟ زئون آبي ايسو ڪريست ٿي
واسطو را ڪيا هارو پويتر سنون ليڏو، تئيون آبي ٻڌائي پويتر سنون ليڏا ٿي ايسو
ٿي واسطو را ڪيا ري ڪري زوئنه اوئا پيڙا مريا. ④ تيام زئون آبي ايسو پيڙا
مريا هارو پويتر سنون ليڏو، تئيون پوئي هيٺ هوتون آبي زوئنه اوئا پيڙا مقوم
م پوروئا، زم جيون ڍاڙئ ايسو ڪريست پڳوون ٻاپ ري مون واري ڪڙا ٿي
مرلون موئين ٿي جيوي اوئيو، هيون ڍاڙئ آڀون نئه پڻ نوو جيون زڙئ ان آبي
اينا حياتي م نوا نمونا ٿي وون.

⑤ ايسو ٿي واسطو را ڪيا ري ڪري آبي زوئنه اوئا پيڙا مريا ان آڀون مانھ
اوئا را موت رو اثر ٿيوھ، تيام اوئا رئه جيوي اوئيا رو اثر پڻ آڀون مانھ ضرور
تيشي. ⑥ آڀون نئه تو ڪهر سئ جي آبي زوئنه ايسو پيڙا هوڙي مانھ مري گياھ



ان آڀئي اڳلُڪئي حياتي ڪٽم ٿي ڳڻي، زم آڀون ايٺا دنيا
رون منڪون ٿي ڏوهون رو قَوْضو ڪٽم ٿي زانه، ان آڀي ڏوهون
ري ڳلومي ٿي سُوئين وڙي ڏوه نه ڪرون. ⑦ ڪم تو جيو
هيون نمونته زوئنه ايسو پيڙو مريوه، ڀڳوون اونا ننه ماڻهي
ڏين ڏوهون ٿي آزاد ڪريوه.

⑧ آڀي تو ايسو ڪريست پيڙا زوئنه مري ڳيا، تيام آڀو يقين سٺه جي
آڀي اونا پيڙا جيوئا پڻ ريشون. ⑨ ڪم تو آڀون ننه ڪڀر سٺه جي ايسو ڪريست
مرلون موئين ٿي جيوي اوليوه ان هون وڙي ڪيڏي نئين مره. او موت را قَوْضا
ٿي سُوئل سٺه. ⑩ ڪم تو زئون ايسو مريو، اونه هيڪ وار مريا ٿي منڪون
مانه ڏوهون رو قَوْضو ڪٽم ڪريو. ان همته زئون جيوئا سٺه، او ڀڳوون ري
مريض مانه وڍا هارو جيوئا سٺه.

⑪ هيون نمونته تم ٿي پڻ آڀرا پارام ام هڙمو جي تم ٿي زوئنه مري ڳيا تا
ان ڏوهون را قَوْضا ٿي سُوئل سو، ان هون ايٺا هارو جيوئا سو جي تسي ايسو
ڪريست ٿي واسطو راڪين ڀڳوون ري مريض مانه وو. ⑫ تيام ايٺا ڪٽم تيا
واڙي حياتي ۾ تم ٿي ڏوهون را قَوْضا ۾ رين ڏوه ڪريا رون ڪراپ ڪيالون مانه
مت وو. ⑬ تم ٿي ڪراپ ڪوم ڪريا هارو آڀ ننه تيار راڪين ڏوه مت ڪرو. پڻ
نائوڪا ڪوم ڪريا هارو آڀ ننه تيار راڪين ڀڳوون ري شيوا ڪرو، ڪم تو
تمون ننه ڪڀر سٺه جي تم ٿي مرلون را زم هتا پڻ هون جيوئا سو. ⑭ هون تم ٿي
آزاد سو ان ڏوهون را قَوْضام نئين هوئو. ڪم تو تم ٿي موسيٰ رون لڪل حڪمون
هيٺ نٿي، پڻ تمون مانه ڀڳوون ري ڪڙپا سٺه.

ڏوهون را قَوْضا ٿي سُوئين ڀڳوون ري شيوا ڪرو

⑮ هايا رو مطلب ڪي سٺه؟ زئون آڀي موسيٰ رون لڪل حڪمون هيٺ نٿي، پڻ
ڀڳوون ري ڪڙپا آڀون مانه سٺه، تو آڀي پلنه ڏوه ڪرتا ريون، ڪي؟ نا نا،

ماڳي نئين. ①6 تمون نئه اي ڪهر نٿي ڪي؟ جيا رو پڻ ڪيڏو مونيا هارو تمي ڳلوم را زم آپ نئه تيار راکوه، اوتا را تمي ڳلوم سو جيا رو ڪيڏو تمي مونوه. ڪا تمي ڏوهون را ڳلوم ٿين ڏوه ڪرتا ريوه جيا رو نتيجو هميش رو موت سئ، ڪا تمي ڀڳوون را شيواڌاري ٿين ڀڳوون رو ڪيڏو مونتا ريوه جيا ٿي ڀڳوون تمون نئه ماقئي ڏين ڏوهون ري سزا ٿي آزاد ڪرشي. ①7 اڳي تمي ڏوهون را ڳلوم هتا، پڻ ڀڳوون رو شڪر سئ جي تمي پورا من ٿي وشواس را پارام شيڪارل واتون موني، ①8 ان هونءِ تمي ڏوهون را قوضا ٿي آزاد ٿين ڀڳوون ري وات مانءِ وودا هارو ڀڳوون را شيواڌاري ٿياھ.

①9 هون تمون نئه منڪون رو مثال ڏيونه ريو، ڪم تو تمي منڪ سو ان ڀڳوون ري واتون تمارا هزميام ڏوري سئ. ڳلوم آپرا ڏئي رو ڪيڏو مونيا هارو آپ نئه تيار راکئھ، ان آپرا ڏئي رئي شيوا ڪرئھ. هايا مثال پرموئنه زم اڳي تمي پوندائي را ڳلوم ٿين پوندائي ڪريا هارو ان ڀڳوون را حڪم توڙيا هارو آپ نئه تيار راکتا ان ڀڳوون رءِ ڪلاڦ ويتا، تم هونءِ تمي ڀڳوون را شيواڌاري ٿين ڀڳوون ري وات مانءِ وودا هارو آپ نئه تيار راکو ان پوٽر نمونءِ وو.

②0 زئيون تمي ڏوهون را ڳلوم هتا، تئيون تمي ڏوه ڪرتا، ان ڀڳوون ري وات مانءِ وودا ٿي آزاد هتا. ②1 تيڏي هايا وات ٿي تمون نئه ڪي قائيڏو ٿيو؟ تمي ايوا ڪراپ ڪوم ڪرتا جيا ٿي تمي همئنه لازي مروھ، ڪم تو هايون ڪومون رو نتيجو هميش رو موت سئ. ②2 پڻ هونءِ تمي ڏوهون را قوضا ٿي آزاد ٿياھ ان ڀڳوون را شيواڌاري ٿين اوتا رو ڪيڏو مونيا وازا ٿي ڳياھ. ان هونءِ ايئا ٿي قائيڏو اي سئ جي تمي پوٽر ٿيا هارو نائوڪا ڪوم ڪروھ، ان ايئا رو نتيجو اي سئ جي تمون نئه هميش رو جيون زڙشي. ②3 ڪم تو ڏوه ڪريا رو نتيجو موت سئ، پڻ جيا آپرا پريو ايسو ڪريست مانءِ وشواس راکئھ، ڀڳوون اوئون مانءِ ڪريا ڪرين اوئون نئه هميش رو جيون ڏئھ.

پولوس آڏمي ان ڏوشي رو مثال ڏين هزماوئھ
جي ايسو را موت ري ڪري آبي موسي رون لڪل حڪمون ٿي
آزاد سون زم آبي ايسو رو ڪيتو مونون

7 ① پايون ان پينون، تمون نئھ تو حڪمون رئي ڪهر سئھ، تيام تمون نئھ ضرور
ڪهر هوشي جي حڪم روگو تئيون هوڏي منڪون مانھ وئھ، زئيون هوڏي او
جيوٽا سئھ. ② مثال، موسي رون لڪل حڪمون پرموئھ ڏوشي رئھ پوري حياتي
آپرا آڏمي پيڙي ريوو. پڻ جي آڏمي مري زائھ، تو ڏوشي آڏمي پيڙي ريا
را حڪم ٿي آزاد سئھ. ③ تيام، جي ڏوشي آپرا آڏمي رئھ جيوٽو هوتون پيزو
گهر ڪرئھ، تو حڪمون پرموئھ پوندو ڪوم ڪرئھ. پڻ جي آڏمي مري زائھ،
تو ڏوشي هيا حڪم ٿي آزاد سئھ، ان پلئھ پيزو گهر ڪرئھ، تو او پوندو ڪوم
نٿي ڪرئي.

④ مارون پايون ان پينون، تماري وات پڻ همريئھ سئھ جي موت ري
ڪري تمي موسي رون لڪل حڪمون ٿي آزاد ٿياھ. ايسو ڪريست را موت
ري ڪري تمي زوئھ اوئا پيڙا مري گيا تا ڪم تو تمي ايسو را ڏيل را
زم سو. ان تيا ري ڪري تمي موسي رون لڪل حڪمون ٿي آزاد ٿي گياھ،
زم اوئون ري جگا ۾ ايسو ڪريست تمارو ڏئي ٿئھ، جيا نئھ پگھون مرلون
موئين ٿي جيوي اوناڙيو، زم آبي پگھون را شيواڌاري ٿين نائوڪا ڪوم
ڪرون. ⑤ زئيون آبي آپرون ڪراپ ڪيالون را قوضام هتا، تئيون زئي موسي
رون لڪل حڪمون ٿي ڏوهون را پارام ڪهر هئي، اتو ڏوھ ڪريا رو وڌيڪ
شونق ٿيتو. هيا رو اثر اي ٿيو جي آبي ايو ڪراپ ڪوم ڪرتا جيا رو
نتيجو هميش رو موت سئھ. ⑥ پڻ هوئھ آبي موسي رون لڪل حڪمون ٿي
آزاد سون. اگي آبي اوئون حڪمون موئين ڦاٿل هتا، پڻ هوئھ آبي زوئھ
مري گيا تا ان اوئون ٿي سوتل سون، زم آبي لڪل حڪمون را زونا نمونا

ٿي نئين، پڻ پويتر آتما ري مرضي مانھ وُڍا را نوا نمونا ٿي پڳوون رئي
شيوا ڪرون.

مُوسي رن لڪل حُڪمون رو ان ٺوهون رو آپت ۾ ڪيو واسطو سٺ

⑦ پسنه ڪي آبي ام ڪون، جي مُوسي را لڪل حُڪم آيون ننه ڏوه ۾ پاڙئھ؟
نا نا، هم نٿي. پڻ وات اي سٺ، جي پڳوون مُوسي ھاٿ حُڪم نه ڏت، تو مُون
ننه ڏوهون رئي ڪبر نه پڙت. جي حُڪمون ۾ لڪل نه هوٽ جي ”لالچ نه ڪرو،“
تو مُون ننه لالچ رئي ڪبر نه پڙت جي ڏوه سٺ. ⑧ تيام ھايا حُڪم ري ڪري
ڏوه ڪريا رو وجه پيدا ٿيو، ان ڏوه ڪرايا واري چڪ رو زور وڌي گيو، ان ڏوه
ڪريا هومو تٿائين مُون موئين هر نمونا رئي لالچ پيدا ٿئي. ڪم تو مُوسي رن
لڪل حُڪمون وگر ڏوه ڪرايا رئي چڪ مرل را زم سٺ ان منڪون ۾ ڏوه ڪريا
رو شونق پيدا نٿي ٿيتو. ⑨ شروع ۾ مُون ننه پڻ مُوسي رن لڪل حُڪمون رئي
ڪبر نٿي ان هون امرور ويتو تو. پڻ زنيون مُون ننه ھايا حُڪم رئي ڪبر پڙئي،
تئين مُون موئين ڏوه ڪريا رو شونق پيدا ٿيو، ⑩ ان هون هميش را موت را
قَوَضام ٿيو. ھاڻي حُڪم ڏيڏا ٿي پڳوون رو مقصد هتو جي اُونا مانھ وُڍا ٿي
مُون ننه هميش رو جيون زڙئ، پڻ ھايا ھاڳي حُڪم ٿي مُون ھارو هميش رو
موت پيدا ٿيو. ⑪ ڪم تو ھايا حُڪم ري ڪري ڏوه ڪريا رو وجه پيدا ٿيو، ان
ڏوه ڪريا هومو تٿائين هون شيترائي گيو، ان مارئ ھاڻي حُڪم توڙيا ري ڪري
ڏوه ڪرايا واري چڪ مُون ننه هميش را موت ري سزا ۾ نوڪيو پرو. ⑫ ھايا ٿي
وات ساوئي سٺ جي مُوسي را لڪل حُڪم پويتر سٺ، ان ھاڻي پڳوون رو حُڪم
پڻ پويتر، انصاف واڙو ان ٺاڻوڪو سٺ.

⑬ پسنه ھايا رو مطلب ڪي سٺ؟ پڳوون را حُڪم ٺاڻوڪا سٺ، توئي پڻ
اُوئي مُون ننه هميش را موت ۾ نوڪيو پرو؟ نا نا، هم نٿي. ھاس ۾ وات اي

سٺ، ڏوه نٺه ساو ڪريا هارو، ڏوه ڪرايا واري چڪ زوڻه پڳوون را نائوڪا
حُڪم لين آڀرا ڪراڀ ڪوم ۾ واپرايا ان هم مُون مانھ هميش را موت رئي سزا
ٿئي. هيون نمونن پڳوون را هيا حُڪم ٿي وات ساوئي ٿي ڳڻيھ جي ڏوه ڪتو
ڪراڀ سٺ.

⑭ آڀون نٺه تو ڪبر سٺه جي مُوسي را لڪل حُڪم پڳوون را ڏيڏل سٺه ان
پويتر سٺه. پڻ هُون آڀ منڪ سون ان ٻڌون منڪون را زم ڪراڀ ڪيال راکونه،
ڪم تو هُون ڏوهون را قَوَضام قاتل سون زم ڳلوم آڀرا ڌڻي را قَوَضام قاتل
هونھ. ⑮ مارو وُڍا رو نمونو هُون آڀ نٽي هزمتو جي هُون ڪم هيون نمونن
وونھ. ڪم تو جيا ڪوم هُون ڪروا ڪرونھ، اُو مُون ٿي نٽي ٿيتا. پڻ هُون ايو
ڪوم ڪرونھ، جيون نٺه هُون هاو ڪراڀ هزمنھ. ⑯ هُون مونونھ ريو جي مُوسي
را لڪل پڳوون را حُڪم نائوڪا سٺه، ڪم تو مارئي مرضي نٽي جي هُون
اوتون حُڪمون نٺه توڙين ڪراڀ ڪوم ڪرونھ، توئي پڻ مُون ٿي ڪراڀ ڪوم
ٿي زائھ. ⑰ تيام وات ساوئي سٺه جي هُون آڀري مرضي ڀرموننھ ڪراڀ ڪوم
نٽي ڪرتو، پڻ ڏوه ڪرايا واري چڪ جيا رو مُون مانھ قَوَضو سٺه، اُو مُون
ٿي ڪراڀ ڪوم ڪراونھ. ⑱ مُون نٺه تو ڪبر سٺه جي هُون پڻ منڪ سون ان
مُون ۾ نائوڪي واتون نٽي. ڪم تو مارئي مرضي سٺه جي هُون نائوڪا ڪوم
ڪرون، پڻ مُون ٿي نائوڪا ڪوم نٽي ٿيتا. ⑲ جيا نائوڪا ڪوم ڪريا رئي
مارئي مرضي سٺه، اُو هُون نٽي ڪرتو. ان جيا ڪراڀ ڪوم ڪريا رئي مارئي
مريض نٽي، اُو هُون ڪرونھ. ⑳ زئون هُون ايو ڪوم ڪرونھ جيا مارنھ ڪريا
رئي مرضي نٽي، تو اي وات ساوئي سٺه جي هُون آڀري مرضي ڀرموننھ ڪراڀ
ڪوم نٽي ڪرتو، پڻ ڏوه ڪرايا واري چڪ جي مُون ۾ سٺه، اُو مُون ٿي ڪراڀ
ڪوم ڪراونھ.

㉑ مٿين آڀري حياتي ۾ زويوھ جي هُون زوڻه ڪياڪ را حُڪم هيٺ سون،
ڪم تو پلنھ مارئي نائوڪا ڪوم ڪريا رئي مرضي سٺه، توئي پڻ مُون ٿي

کراپ کوم تته. ② هُون من ډر کُشي ټي پڳوون رُون حُکمون مانِه ويوا کرونه، ③ پڻ مارو ڏيل زوئته پيزا کياک را حُکم هيٺ سته. مارو من پڳوون رُون حُکمون مانِه ويوا کړه، پڻ مارو ڏيل زوئته ډوهون را حُکم هيٺ وټه، ان اي ډوه کرايا واڙي چک جئي مارا ڏيل ډر سته مارا من رته کلاف مُقابلو کړين مُون نته آپرا قَوَضام راکته.

④ هُون گتو نپاڳو سون! ايټا ډوه کريا را چکر ټي، جيا ري کري مُون نته هميش رو موت زږشي، مُون نته کوڻ پچاوشي؟ ⑤ پڳوون رو شکر سته. او آپتا پريو ايسو کريست رته هيلته مُون نته پچاوشي. تيام ٻڌي وات اي سته، هُون من ټي پڳوون رُون حُکمون مانِه وين پڳوون ربي شيوا کرونه، پڻ منک تين هُون ډوهون را قَوَضام قاتل سون ان مُون ټي ډوه تته.

پوټر آتما ري مرضي مانِه وُډيا ټي آپون نته هميش رو جيون زږته

8 ① تيام هوته جيا ايسو کريست مانِه وشواس راکته، اوئون نته پڳوون سزا ډيډا رو ځينصلو نئين کړه. ② کم تو هوته تمې پوټر آتما ري مرضي مانِه وُډيا وَازا سو ان ايسو کريست ري کري تمون نته هميش رو جيون زږيوه. تيام تمې تارڼ ليډا هارو موسي رُون لکل حُکمون مانِه وُډيا وَازا ډرم ټي سوتل سو، جيا ټي تمې ډوهون ډر قاتي گيا تا ان هميش را موت را قَوَضام هتا. ③ تارڼ ډيډا رو کوم موسي رُون لکل حُکمون ټي نه ټي هيکيو، کم تو منک آپرون کراپ کيالون ري کري اوئون حُکمون مانِه وي نه هيکيا ان تيام اوئون حُکمون رو مقصد پورو نه ټيو. پڻ هوته او تارڼ ډيډا رو کوم پڳوون آپ کريو. اوته آپرو ډيکرو ايسو ډوهون را قَوَضام قاتل منکون را زم منک ناوين ميليو، زم او منکون نته ډوهون را قَوَضام ټي سډاوته. زنيون ايسو منک تين منکون رُون ډوهون

ري ڪري آڀرو جيو ڏيڌو، تئين پڳوون منڪون رن ڏوهون رڻي موت رڻي سزا ايسو نئه ڏيڌي ان ڏوهون را قَوضا نئه ڪتم ڪريو پرو. ④ هائي پڳوون ايئا هارو ڪريو، زم آڀي جيا آڀرون ڪراڀ ڪيالون پرموئنه نئين، پڻ پويتر آتما ري مرضي پرموئنه وونه، آڀون ٿي آڀرون حُڪمون رو مقصد پورو ڪراوئه ان آڀي پڳوون ري وات مانھ وون. ⑤ جيا منڪ آڀرون ڪراڀ ڪيالون پرموئنه وئه، اُو رُوڳا ڪراڀ واتون را پارام سوچئه، پڻ جيا پويتر آتما ري مرضي پرموئنه وئه، اُو پويتر آتما ريون ڏيڌل ٺاڻوڪيون واتون را پارام سوچئه. ⑥ ڪم تو زئين منڪ آڀرون ڪراڀ ڪيالون پرموئنه سوچئه، اُوئون نئه هميش رو موت زڙشي، پڻ زئين منڪ پويتر آتما ري مرضي پرموئنه سوچئه، اُوئون نئه هميش رو جيون ان شونتئي زڙشي. ⑦ هايا ٿي وات ساوئي سئه جي منڪون رڻي ڪراڀ سوچ پڳوون رئه ڪلاڦ سئه، ڪم تو اُو نڪو پڳوون رن حُڪمون هيٺ وئه، ان نڪو وي هيڪئه. ⑧ جيا آڀرون ڪراڀ ڪيالون پرموئنه وئه، اُو پڳوون نئه ڪُش نٿي ڪري هيڪتا.

⑨ پڻ تم آڀرون ڪراڀ ڪيالون پرموئنه وُڍا واڙا نٿي، پڻ پويتر آتما ري مرضي مانھ وُڍا واڙا سو، ڪم تو پڳوون ٿي زڙل پويتر آتما تمون موئين رئه. جيا منڪ موئين ايسو ڪريست رو ڏيڌل پويتر آتما نٿي، اُو منڪ ايسو ڪريست رو نٿي. ⑩ پڻ ايسو ڪريست تمون موئين سئه، تيام پلئه تمارو ڏيل ڏوهون ري ڪري موت را قَوضام سئه، توئي پڻ پويتر آتما تمون نئه جيون ڏئه ڪم تو پڳوون تمون نئه ماڻهي ڏين ڏوهون ري سزا ٿي آزاده ڪرياه. ⑪ پڳوون ايسو نئه مرلون موئين ٿي جيوي اوناڙيوه، ان پڳوون رو ڏيڌل پويتر آتما تمون موئين رئه. تيام پڳوون جيئنه ايسو ڪريست نئه مرلون موئين ٿي جيوي اوناڙيوه، اُو تمون موئين ريا واڙا پويتر آتما ري ڪڙا ٿي، تمون نئه پڻ مريا ڪيڙ ضرور جيوتا ڪشي.

⑫ تيام، مارون پايون ان بينون، آڀون مانھ اي قرض سئه، جي آڀي پويتر

آتما ري مرضي مانه وون. آپون مانه اي قرض نتي جي آبي آپون ڪراپ ڪيالون پرموئنه وون. (13) ڪم تو جي تمڻي آپون ڪراپ ڪيالون پرموئنه وون، تو تمون نه هميش رو موت زڙشي. پڻ جي تمڻي پويتر آتما ري ڪڙا ٿي او ڪوم ڪتم ڪرو پرا، جيا آپون ڪراپ ڪيالون ري ڪري ٿه، تو تمون نه هميش رو جيون زڙشي. (14) زتا منڪ پويتر آتما ري مرضي مانه وئ، او پڳوون را ٻاڙ سئ. (15) ڪم تو پويتر آتما جيو تمون نه زڙيوه، او ايوو نتي جيا ري ڪري تمڻي وڙي موسي رون لڪل حڪمون ري ڳلومي ۾ پڙين پيڪ ۾ ريو. پڻ پويتر آتما ايوو سئ جيا ٿي تمون نه ڪبر پڙهه جي پڳوون تمون نه آپرا ٻاڙ نايه. تيام آبي پويتر آتما ري ڪري پڳوون نه ڪونه ”او ٻا، امارا ٻاپ.“ (16) پويتر آتما آپ آپون نه من ۾ يقين ڏهه جي آبي پڳوون را ٻاڙ سون. (17) هوئ زئون آبي پڳوون را ٻاڙ سون، تو لازمي سئ جي آپو وارثون را زم پڳوون را ٻاڙ هويا رو حق سئ، ان آپون نه پڳوون رو وائڏو ڪرل هڪ زڙشي. آپون نه پڳوون را ٻاڙ ٿين او هاڳي حق زڙيوه جيو پڳوون را ڏيڪرا ايسو ڪريست نه زڙيوه، ڪم تو آبي ايسو را زم ڏڪ سهونه، تيام پڳوون آپون نه ايسو را زم اوئا پيڙا آڪاش موئين مون ۾ راکشي.

پڳوون آپون نه آڪاش ۾ ڪيو مون ڏيشي

(18) هون اي هڙمونه، جي جيا ڏڪ آبي همئنه ايئا حياتي ۾ سهونه ريا، اي ڏڪ آيا واڙا مون را مقابلا ۾ ڪئين نتي، جيو مون همئنه تو ساوو نتي، پڻ پسته آڪاش ۾ آپون نه زڙشي. (19) ڪم تو پڳوون رئي ناول پوري دنيا گهڻا شونق ٿي اوئا توئا رئي وات زوئ رئي، زئون پڳوون رون ٻاڙون رو مون ساوو تيشي. (20) ڪم تو پوري دنيا ڏڪون را قوضام سئ. دنيا رئي هائي مرضي نتي جي او ڏڪون را قوضام پڙهه. پڻ زئون دنيا ري شروع ۾ پڳوون پيرهون بيئون منڪون نه ڏوهون رئي سزا ڏيڏي، تيون هيا رو نتيجو اي ٿيو جي پوري دنيا ڏڪون

را قَوْضام پڙئي. پڻ اُوڻه تُوڻه پڳوونَ وائڻدو پڻ ڪريو، زم ڏنيا اُميدَ راکڻه. ②۱ پڳوونَ رو وائڻدو اي سڻه، جي ڏنيا ري ٻڌي ٺاڙل شينهنون پڻ، جي ٻڳڙيا ان ڪڻم ٿيا ري حالت ۾ ڦاٿل سڻه، ايوي حالت ٿي آزاڌ ٿيڻي، ان زم آڀي پڳوونَ را ٻاڙ پوري آزادي ٿي پڳوونَ را مونَ ۾ هڪ ۾ ريشون، تم ڏنيا ري ٻڌي شينهنون پڳوونَ نوي ٺاوشي.

②۲ آڀون نڻه تو ڪٻر سڻه جي پوري ڏنيا ري ٻڌي شينهنون هزون هُڏي ڏڪون ان تڪليلهون ۾ سڻه، زم پارِي پڳ ڏوشي ٻاڙ زلميا رڻه تُوڻه ٻاڙ زلميا هُڏي ڏڪون ان تڪليلهون ۾ هوڻه. ②۳ ان نه رُوڳڻي ڏنيا ڏڪون ۾ سڻه، پڻ آڀي، جيون نڻه پَوِيتَر آتما زڙيا ٿي مور ٿي ڪڙينڪ ڪٻر پڙيڻه جي آڀون نڻه ڪيو هڪ زڙشي، آڀي پڻ ڏڪون ٿي من ۾ نيهاڪا نوڪينَ اُوڻا ٿوڻا رڻي واٽ گهڻا شونق ٿي زوڻوه ريا، زئيون پڳوونَ آڀون نڻه آڀرا ٻاڙ هويا رو پورو حق ڏيڻي، ان آڀون نڻه ڏڪون را قَوْضا ٿي سڏاوينَ هڪ ۾ راکشي. ②۴ زئيون پڳوونَ آڀون نڻه پڇايا، تئيون آڀي هاڻي هڪ ليڏا رو پروسو راکيو. هوڻه پروسو هميش اُوڻا واٽ مانه هوڻه، جڻي هزون هُڏي ڏيڪيام نه آوڻي هوڻه. ڪم تو زئيون واٽ ڏيڪيام آوڻه، تئيون پروسو راکيا رڻي ضرورت نٿي. ②۵ پڻ آڀي ايوي واٽ مانه پروسو راکونه، جڻي هزون هُڏي ڏيڪيام نٿي آوڻي، تيام آڀي ڏوروڻ صير ٿي سهينَ اُوڻا رڻي واٽ زوڻوه.

②۶ هيوڻه نمونڻه پَوِيتَر آتما پڻ آڀي هيوي حالت ۾ آڀڻي مدت ڪرڻه. ڪم تو آڀون نڻه ڪٻر نٿي جي ڪيا هارُو ان ڪم ڪرينَ آڀڻه پراڻا ڪروو ڪپڻه، پڻ زئيون آڀي من ري واٽون ڪي نٿي هيڪتا ان رُوڳا ڏڪون ۾ نيهاڪا نوڪونه، تئيون پَوِيتَر آتما آڀ آڀا من ري واٽون لينَ آڀون هارُو پراڻا ڪرڻه. ②۷ ان پڳوونَ، جيو منڪون رون منون ري واٽون زوڻه، اُوڻا نڻه ڪٻر سڻه جي پَوِيتَر آتما ڪيا هارُو پراڻا ڪرڻه ريو، ڪم تو پَوِيتَر آتما پڳوونَ ري مرضي پرموڻه پڳوونَ رون سُونڍل منڪون هارُو پراڻا ڪرڻه.

②8 ان آپون نئه اي پڻ ڪهر سئھ جي ڏنيا ۾ جئين پڻ تئھ، ڀڳوون اُوٽا ٿي آڀرو مقصد پورو ڪراوين اُوئون منڪون هارو ڀلائي پيدا ڪرئھ، جيا ڀڳوون ٿي پريم ڪرئھ ان جيون رو ڀڳوون آڀرا مقصد هارو آپ ٿي واسطو رکايوھ. ②9 ڪم تو جيون منڪون نئھ ڀڳوون جڳت نايا ٿي مور آپ هارو سونديا، اُوئون هارو اُوئھ مور ٿي پڪو ڦينصلو پڻ ڪريو جي اُوئون نئھ آڀرا ڏيڪرا ايسو را زم ناوشي، زم پوئيني را ڏيڪرا ايسو را گھڻا پائي ان پينون تئھ. ③0 ان جيون منڪون هارو ڀڳوون پڪو ڦينصلو ڪريو، اُوئون رو اُوئھ آپ ٿي پڻ واسطو رکايو. ان جيون رو اُوئھ آپ ٿي واسطو رکايو، اُوئون نئھ اُوئھ ماقئي ڏين ڏوهون ري سزا ٿي پڻ آزاڏ ڪريا. ان جيون نئھ اُوئھ ماقئي ڏين ڏوهون ري سزا ٿي آزاڏ ڪريا، اُوئون نئھ اُوئھ گھڻو مون پڻ ڏيتو.

ڀڳوون رو پريم آپون ٿي ڪيڏي ڪٿم نئين تئھ

③1 تيام هايون ٻڌيون واتون را پارام آبي ڪي ڪون؟ جي ڀڳوون آڀئئھ پاھئھ سئھ، تو آڀئھ ڪلاڦ ڪوڻ ٿي هيڪشي؟ ③2 آپون هارو ڪرين ڀڳوون آڀرو ڏيڪرو پڻ ڏيڏا هارو تيار ٿيو، ان آپون ٻڌون نئھ پڇايا هارو اُوٽا نئھ ماريا هارو ڏيڏو. زئيون اُوئھ آڀرو ڏيڪرو آپون هارو ڏيڏو، تو پستھ او آپون نئھ پيزو ٻڌوئي ڪئين ڪم نئين ڏئھ؟ ③3 ڀڳوون رون سونڊل منڪون نئھ ڪوڻ ڏوهاري ڪرشي؟ ڀڳوون آپ اُوئون نئھ ماقئي ڏين ڏوهون ري سزا ٿي آزاڏ ڪرياھ. ③4 پستھ ڪوڻ ڀڳوون رون سونڊل منڪون نئھ سزا ڏيڏا رو ڦينصلو ڪرشي؟ ڪي ايسو ڪريست ايوو ڦينصلو ڪرشي؟ نا نا، او ايوو ڦينصلو ماڳي نئين ڪرئھ. او تو آپ آپون هارو مري گيو تو، ان موت ٿي جيوي اونيوه، ان همئھ ڀڳوون رٽھ زمئھ پاھئھ مون ۾ پينوه ڀڳوون نئھ آڀئي پارت ڪرئھ ريو. ③5 آپون نئھ ايسو ڪريست را پريم ٿي ڪوڻ ڌار ڪري هيڪئھ؟ پلئھ آپون نئھ ڏک تڪليب اُوئھ، ڪا منڪ آپون نئھ تنگ ڪرئھ، ڪا پوکي مرون، ڪا اتا گريپ هوئون جي

لُوهڙا ئي نه زڙئ، ڪا آڀون ننه ڪترو هوئ، ڪا منڪ آڀڻو ڪُون ڪرئ، توئي پڻ آڀون ننه پُورئي ڪاتريئ سئ جي ايسو ڪريست آڀون ٿي پريم ڪرئ. (36) هائي ٻڌي واتون آڀون پڳوون رون شيواڌاريون ٿي تو ضرور ٿيشي، ڪم تو شاستر ۾ لڪل سئ:

”تمارئي شيوا ڪريا ري ڪري

امي هر وڪت موت را ڪترام هوئونھ.

زم ريڊيون ننه هلاليا جيوي هزمئھ،

تم منڪ امون ننه نمو ماريا جيوا هزمئھ.“

(37) توئي پڻ هايون ٻڌون ڏڪون ۾ آڀي هيمنت نٿي هارئا، پڻ ايسو ري ڪري، جيئئھ آڀون ٿي پريم ڪريوھ، آڀي هايون مانھ جيتونھ. (38) ڪم تو مون ننه پڪئي ڪاتريئ سئ جي نڪو موت نڪو حياتي، نڪو پڳوون را پاها را آڪاشي ڏوت نڪو شيطون را پاها را پوت، نڪو همٿوڪي واتون نڪو آيا واري واتون، نڪو ڪوئي پڻ طاقت، (39) نڪو آڪاش نڪو پٽاڙ، ان نڪو پيڙي ڪوئي پڻ شينھ، پوري ڏنيا ۾ ايوو ڪئين نٿي جي آڀون ننه پڳوون را پريم ٿي ڌار ڪري هيڪئھ، جيو پريم آڀا پريو ايسو ڪريست ري ڪري آڀون ننه زڙئھ.

پڳوون آپري سئونيل اسرائيلي قوم ٿي ڪرل وائيڏا

ڪم ڪرين پورا ڪرشي

9 ① هُون ايسو ڪريست ٿي واسطو راڪين تمون ننه هاس ڪونه ريو، هُون ڪوڙ نٿي ڪرتو، ان پويتر آتما ري ڪري مون ننه من ۾ ڪبر سئ جي مارئي وات هاسي سئ، ② مون ننه مارون اسرائيلي پايون هارو گهڻو ڏک سئ، ان مارا من ۾ اوئون هارو هميش ڏک رھ. ③ هُون ماري آپري قوم رون منڪون هارو اتئي گهڻي ڪرونھ جي هُون آپ پلئھ پڳوون رو پتل ٿيون ان ايسو ڪريست ٿي ڌار ٿيون، جي مارئھ هم ڪريا ٿي مارا اسرائيلي پائي پڳوون ري سزا ٿي

پڇي زانت. ④ اُو منڪ اسرائيلي قُوم را سئ، جيون نئ پڳوون آڀرئي قُوم ناوين سُونديا. اُوئون نئ پڳوون زبڪتا سوجھرا م ڏيکارا ڏيڏا، اُوئون ٿي اُوئ آڀرا وسن بونڊيا، اُوئون نئ آڀرا حُڪم ڏيڏا، اُوئون نئ آڀرئي پُوزا ڪريا رو نمُونو شيڪاڙيو، ان اُوئون ٿي آڀرا وائڏا ڪريا. ⑤ پڳوون مانھ وشواس را ڪيا واڙا ڪاس منڪ پڻ اُوئا اسرائيلي قُوم را ڏاڏا هئا، ان اُوئا قُوم ٿي پيڊي پرموئئ پڳوون رو سُونڊل پڇايا واڙو ايسو ڪريست پڻ سئ. پڳوون جيو ٻڌون مانھ سئ، اُوئا را وڪوڻ هميش هُودِي ٿيئا رئ! آمين.

⑥ هُوئ زئيون هُون ام ڪونھ جي اسرائيلي قُوم را گھڻا منڪ پڳوون ري سزا ٿي نٿي پڇيا، تئيون هُون ام نٿي ڪيتو جي پڳوون را اسرائيليون ٿي ڪرل وائڏا پُورا نه ٿيا. وات اي سئ، زتا منڪ اسرائيلي قُوم م پيدا ٿئ، اُو ٻڌائي آڀ نئ اسرائيلي ڪيُورايا جيوا نٿي، ان پڳوون ري نظر م ايوا منڪ پڳوون را سُونڊل منڪ پڻ نٿي. ⑦ ان نڪو ابراهيم ري پيڊي ٿي هُويا ري ڪري، اُو پڳوون ري نظر م ابراهيم را اولاد سئ. پڻ پڳوون ابراهيم رون بيئون ڏيڪرون موئين ٿي هڪا نئ سُونڊين ابراهيم نئ ام ڪيڏو:

”رُوڳو اُو اولاد ٿارو اولاد ڪيُوراشي،
جيو ٿارا ڏيڪرا اِضحاق ٿي ٿيشي.“

⑧ هايا رو مطلب اي سئ، جيو اولاد رُوڳو ابراهيم ري پيڊي ٿي سئ، اُو پڳوون رو سُونڊل ابراهيم رو اولاد نٿي. پڻ جيو اولاد پڳوون را وائڏا پرموئئ ٿيو، اُو پڳوون ري نظر م هاس م ابراهيم رو اولاد سئ. ⑨ ڪم تو پڳوون اُوئا را ڏيڪرا اِضحاق را پارام ابراهيم ٿي اي وائڏو ڪريو تو جي
”هُون اڳتي ايئي ڏيئي آويھ،

ان ٿاري ڏوشي ساره رئ ڏيڪرو ٿيشي.“

⑩ ان پڳوون نه رُوڳو ابراهيم رون ڏيڪرون موئين ٿي هڪا اِضحاق نئ سُونڊيو، پڻ اِضحاق رون ڏيڪرون موئين ٿي پڻ هڪا نئ سُونڊيو. زئيون آڀئا ڏاڏا اِضحاق

رئي ڏوشي ربقه پاري پڳ هٽي، تئين اونا را پيت مئين ٻي جاڙا ڏيڪرا هئا. هون ٻي ئي ڏيڪرا اِضحاڪ را هئا، ⁽¹¹⁾ ان هزون او سوڪرا پيدا ٿي نٿا ٿيا، ان نڪو اوني ڪراپ ڪوم ڪريو نڪو ٺاٺوڪو ڪوم ڪريو. توئي پڻ اونه توتنه پڳوون ٻيئون مئين ٿي هڪا ننه سونديو. هايا ٿي اي وات ساوئي سٺه جي پڳوون روڳو آپري مرضي پرموتنه منڪون ننه سونديئ، ⁽¹²⁾ ان منڪون رون ڪرل ڪومون پرموتنه نئين. تيام پڳوون ربقه ننه ڪيڏو جي

"ننو سوڪرو موتا رئي نئين،

پڻ موتو سوڪرو نونا رئي شيوا ڪرشي."

⁽¹³⁾ پڳوون آپري مرضي پرموتنه هايون ٻيئون سوڪرون مئين ٿي روڳو هڪا يعقوب ننه سونديو، زم شاستر ۾ لڪل سٺه:

"مئين عيسو ٿي وڌارنه يعقوب ٿي پريم ڪريوه."

⁽¹⁴⁾ هون زئين پڳوون آپري مرضي مان هڪا ننه سونديئ ان پيزا ننه ساڏه، تو پسته آبي ڪي ڪون؟ پڳوون اِنصاف ٿي نٿي ويتو، ڪي؟ نا نا، هم نٿي. پڳوون هر هڪ منڪ ٿي اِنصاف هون وئ، پڻ آپري مرضي پرموتنه او منڪون مان ڏيا پڻ ڪرئ. ⁽¹⁵⁾ تيام پڳوون موسيٰ ننه ڪيڏو:

"جيا مان هون ڏيا ڪروا ڪرونه،

اونا مان هون ڏيا ڪرونه.

ان جيا مان قياس ڪروا ڪرونه،

اونا مان قياس ڪرونه."

⁽¹⁶⁾ هايا ٿي وات ساوئي سٺه جي منڪ آپري ڪوشش ڪا مينت ٿي آپ ننه سونديا جيا نٿي ڪرتا، پڻ پڳوون آپري مرضي پرموتنه منڪون مان ڏيا ڪرين ڪيونڪ ننه سونديئ. ⁽¹⁷⁾ ڪم تو شاستر ۾ پڳوون موسيٰ هات مصر ملڪ را پاڏشا ننه ام پڻ ڪيڏو:

"مئين تون ننه پاڏشا ايٺا هارو ٺايوه،

زم ٿارڻه مارئي وات نه مونيا ري ڪري
هُون آپري ڪڙا ساوئي ڪرون
ان مارو نوم پوري دنيا ۾ پڪڙڻه.

⑱ تيام وات ساوئي سٺه جي پڳوون آپري مرضي پرموڻه ڪيونڪ مانھ ڏيا
ڪرڻھ ان آڀرا منڪ ٺايا هارو سونڊيڻھ، ان آپري مرضي پرموڻه ڪيونڪ نيھ
امرام آپرڻه ڪلاڦ ويوا ڏئھ.

پڳوون منڪون مانھ ڏيا ڪرين سزا ڏيڏا مور گهڻو صير ڪرڻھ

⑲ تيام تمون موئين ٿي ڪوڪ ام ضرور ڪيشي: ”جي پڳوون آپري مرضي
پرموڻه منڪون نيھ آپرڻه ڪلاڦ ويوا ڏئھ، تو پستھ او ڪم اوئون رو هم ڪريا
ٿي ڏوھ ڪاڍئھ؟ جي هائي پڳوون ري مرضي سٺھ، تو منڪ پيزڻه نمونئھ وي
نٿي هيڪتا.“ ⑳ پاڻي، تون ڪنھ ريو جي پڳوون رو ڪئين حق نٿي جي او منڪون
را ڏوھ ڪاڍئھ. پڻ وات اي سٺھ، تون آپ نيھ ڪي هڙمئھ، جي تون منڪ ٿين
پڳوون رو ڏوھ ڪاڍئھ؟ ٺاول شينھ ٺايا واڙا نيھ ام ڪيشي ڪي؟ ”تئين مون
نيھ ايوي ڪم ٺاويئھ؟“ ㉑ ٺايا واڙا رو آپريون ٺاول شينھون مانھ ڪئين حق
نٿي ڪي؟ ڪونپار رو اي حق نٿي ڪي، جي او هاڳي ماڻي ٿي هيڪ قيمتي ان
مونواڙو ٺونپڙو ٺاويئھ، ان پيزو جيوو تيوو اٽمونيتو ٺونپڙو ٺاويئھ؟ اوئا رو تو پورو
حق سٺھ. ㉒ هيوئھ نمونئھ پڳوون رو منڪون مانھ پورو حق سٺھ.



پڳوونَ رُئي مرضِي هَتِي جِي اُو اي واتون ساوي كرينَ ڏيکارڻ، جِي اُو
 ڪڙا وازو سٺه ان ڏوهون رُئي سزا ڏنڻ. تُوئي پڻ اُوئون منڪون هارُو اُوڻه الاهي
 صير ڪريو، جيا سزا کاڌا رڻه ان هميش را موت رڻه لائيق هتا. هايا ٿي پڳوونَ
 ڪيو ڏوه ڪريو؟ (23) ان پڳوونَ رُئي اي ڪبر ڏيڏا رُئي مرضِي پڻ هَتِي، جِي
 اُو اُوئون منڪون نڻه ڪتو مونَ ڏنڻ، جيون مانڊ اُو آپري ڏنڻا ڪرڻه ان جيون
 نڻه اُوڻه مونَ ڏيڏا هارُو تيار ڪريا تا. (24) تيام پڳوونَ اُوئون منڪون نڻه سُونڊيا.
 هم ڪريا ٿي پڳوونَ ڪيو ڏوه ڪريو؟ هيوڻه نمونڻه پڳوونَ نه رُوڳو يهوديون
 موئين ٿي، پڻ پيزيون ڌاريون قُومون موئين ٿي پڻ، آپون مانڊ ڏنڻا ڪرينَ آپون
 نڻه آپرا منڪ نايا هارُو سُونڊيا.

(25) ڌاري قُوم وازون نڻه سُونڊيا را پارام شاستر را هوسيع را لکل ڪتاب ۾
 پڳوونَ رُئي اي ڪيڏل وات لکل سٺه:

”جيا ماري سُونڊل قُوم را منڪ نٿي،
 اُوئون نڻه هُون مارا سُونڊل منڪ ڪيڏ.
 ان جيا ماري پريمي قُوم را نٿي،
 اُوئون نڻه هُون مارا پريمي منڪ ڪيڏ.“

(26) ان اي پڻ لکل سٺه:

”جيون را پارام هُون همڻه ڪونه ريو
 ’تمي ماري سُونڊل قُوم را نٿي،‘

اُوڻا ري جڳا ۾ اُو جيوتا پڳوونَ را ٻاڙ ڪيو راسي.“

(27) پڻ اسرائيلي قُوم را پارام پڳوونَ رو نياپو ڏيڏا وازڻه يسعياه ام صاف ڪيڏو:

”اسرائيلي قُوم را منڪ سُمونڊ را ڪپ مانڊ واري زتا هوشي،

تُوئي پڻ اُوئون موئين ٿي هاو توڙا منڪ پچي زاشي.

(28) ڪم تو ايشور جلدِي ۾ ڏنڻا رون منڪون نڻه

اُوئون رون ڏوهون رُئي پورئي سزا ڏيشي.“

②۹ ان يسعياه اگي پڻ همروم ڪيڏو تو:
 ”جي پريو پرميشور آڀئي قوم ٿي ڪئينڪ اولاد نه پڇاوت،
 تو او آڀئي اسرائيلي قوم ننه سزا ڏين هاو ڪتم ڪرت،
 زم اوئه سدوم ان عموره رون ڪراپ شهرون ننه ڪتم ڪريات پرا.“

ڏوهون ري سزا ٿي پڇيا هارو اسرائيلي قوم رون منڪون رءُ پڻ
 ايسو مانه وشواس راڪو ڪپئ

③۰ پسئ هوءَ آبي ڪي ڪون؟ ڌاري قوم واڙي پڳوون ري وات مانه وُڍا
 رئي ڪوشش نه ڪري، توي پڻ او پڳوون ري سزا ٿي پڇي گياھ؟ هوئه،
 هائي وات هاسئي سئ. او تيام پڇي گياھ ڪم تو اوئي ايسو مانه وشواس
 اوئيو، ان پڳوون اوئون ننه ماڻئي ڏين ڏوهون ري سزا ٿي آزاد ڪرياه. ③۱ پڻ
 اسرائيلي قوم واڙي موسي رون لڪل حڪمون مانه وُڍا ٿي پيڏوهي ٿيا رئي
 گهٽئي ڪوشش ڪري، توي پڻ اوئون حڪمون مانه وي نه هيڪيا ان ڏوهاري
 ٿين پڳوون ري سزا ٿي نه پڇيا. ③۲ ڪم نه پڇيا؟ ڪم تو اوئي وشواس نه
 راڪيو، پڻ ام هزميو جي او آپ آڀري ڪوشش ٿي پيڏوهي ٿي هيڪئ. هيوءَ
 نمونئ او زوئئ آڪڙايا واڙا پتر ٿي آڪڙين پڙي گيا. ③۳ هائي پتر ايسو رو مثال
 سئ، ان هايا پتر را مثال ٿي پڳوون ايسو را پارام شاستر ۾ ام ڪيڏو:
 ”زوئو، هون صيهون نومي يروشلم را ڏونگر مانه
 هيڪ پتر ميلونھ.

او آڪڙايا واڙو پتر سئ، جيا ٿي منڪ آڪڙين پڙي زاشي.
 پڻ جيو ڪوي اوئا مانه وشواس راڪئھ،
 او هايا ري ڪري ڪيڏي لاسار نئين ٿئ.“

① پايون ان پينون، مارا من رئي انچا اي سئ، ان هون پڳوون ٿي اينا
 هارو وينتي ڪرونھ، جي ماري اسرائيلي قوم ننه تارڻ زڙئ ان او آپرون

ڏوهون ري سزا ٿي پڇي زائنه. ② ڪم تو هُون اُونون رُئي هاڪ ڀرونه جي اُونون ننه پڳوون ري مرضي مانھ وُڍا رو گهڻو شونق سئھ، پڻ اُو هُزمتا نٿي جي ڪيوئھ نمُونئھ پڳوون ري مرضي مانھ ويو. ③ ڪم تو اُونون نئھ ايئا وات رُئي ڪبر نٿي جي پڳوون منڪون نئھ ماڻهي ڏين ڏوهون ري سزا ٿي آزاد ڪرئھ. اُو آپري ڪوشش ٿي آپ نئھ پيڏوهي ڪروا ان ڏوهون ري سزا ٿي پڇاوا ڪرئھ. ان تيام اُوئي پڳوون را ڏيڏل نمونا مانھ وُڍا ٿي نا پاڙيو، مطلب اُوئي ايسو مانھ وشواس نه اوڻيو زم پڳوون اُونون نئھ ماڻهي ڏين ڏوهون ري سزا ٿي آزاد ڪرئھ. ④ وات اي سئھ، ايسو ڪريست پڳوون رون حُڪمون مانھ پُورئھ نمُونئھ وُڍو، ان اُوئا مانھ شاستر ري ٻڌي واتون پُوري ٿي. ان هيئوئھ نمُونئھ زتا منڪ ايسو مانھ وشواس راکئھ، اُونون ٻڌون نئھ پڳوون ماڻهي ڏين ڏوهون ري سزا ٿي آزاد ڪرشي.

ايسو مانھ وشواس راکيا ٿي ٻڌيون قومون رون منڪون نئھ تارڻ زڙشي

⑤ هَئوئھ مَوسلي آپ اڳي شاستر ۾ لکيو جي پڳوون رون حُڪمون مانھ وُڍا ٿي منڪ رُوڳو تئيون ڏوهون ري سزا ٿي پڇي هيڪئٽ، زئيون ماڳي ڏوه نه ڪرئ. اُوئھ ام لکيو:

”جيو منڪ ايئون حُڪمون مانھ پُورئھ نمُونئھ وئھ،

اُوئا نئھ حُڪمون مانھ وُڍا ري ڪري جيئون زڙشي.“

⑥ پڻ وشواس راکيا رُئي وات ام سئھ. منڪون رُئھ رُوڳو ايسو مانھ وشواس راکو، تو پڳوون اُونون نئھ ماڻهي ڏين ڏوهون ري سزا ٿي آزاد ڪرشي. ان هايا وات را پارام مَوسلي ام لکيو:

”تمي من ۾ ام مت سوچو جي

هائي وات مارا وس رُئي نٿي،

ڪُون هايا وات هارُو آڪاش ۾ زائي هيڪڻه؟“

هايا وات هارُو تماره آڪاش ۾ زايا رو ڪئين ڪوم نٿي. تم ڪي هڙموه؟
تماره آڪاش ۾ زائين ايسُو ڪريست ننه ڏنيا ۾ تيزي آوُو ڪي؟ ايسُو تو اڳي
آڪاش ٿي ڏنيا ۾ آيو تو. ⑦ ان نڪو زم شاستر ۾ لڪل سئھ ام سوچو:

”ڪُون هايا وات هارُو مرلون را جڳت ۾ زائي هيڪڻه؟“

هايا وات هارُو تماره مرلون را جڳت ۾ زايا رو ڪئين ڪوم نٿي. تم ڪي
سوچوه؟ تماره مرلون را جڳت ۾ زائين ايسُو ڪريست ننه مرلون موئين ٿي ٻارو
ڪاڍو ڪي؟ ايسُو تو اڳي مرلون موئين ٿي جيوي اُونيوه. ⑧ پڻ هائي وات
هاو تمارا وس رئي سئھ، زم شاستر ۾ لڪل سئھ:

”هائي وات هاو تمون ڏوڪڙي سئھ.

هائي تم ٻي مونڊا ٿي ڪي هيڪوه،

ان تمون ننه من ۾ هايا رئي ڪبر سئھ.“

هَوئ هائي وات جيا را پارام شاستر ۾ لڪل سئھ، اُو ايسُو مانھ وشواس راڪيا
رئي وات سئھ، جيا را پارام امي منڪون ننه همپزاوونھ. ⑨ ان اُو وات اي سئھ،
جي تم ٻي مونڊا ٿي منڪون هوما ام ڪو جي ”ايسُو پريو سئھ،“ ان آڀرا من
۾ وشواس راڪو جي پڳوون ايسُو ننه مرلون موئين ٿي جيوي اُوناڙيوه، تو تم ٻي
پڳوون ري سزا ٿي پڇي زاشو ان تمون ننه تارڻ زڙشي. ⑩ ڪم تو زئون منڪ
آڀرا پورا من ٿي ايسُو مانھ وشواس راڪئھ ان آڀرا مونڊا ٿي ڪئھ جي ”ايسُو
پريو سئھ،“ تتيون پڳوون اُوئا ننه ماڻهي ڏين ڏوهون ري سزا ٿي آزاد ڪرشي،
ان اُوئا ننه تارڻ ڏيشي. ⑪ ڪم تو شاستر ۾ لڪل سئھ:

”جيو ڪوئي اُوئا مانھ وشواس راڪئھ

اُو هايا ري ڪري ڪيڏي لاسار نئين ٿئھ.“

⑫ ٻڌون هارُو اي هاڳي نمونو سئھ، جي ايسُو مانھ وشواس راڪيا ٿي تارڻ
زڙشي. هايا وات ۾ ڪئين قرق نٿي پڙتو، پلئھ يهودي هئھ ڪا ڌاري قوم واڙا

هوئو. ڪم تو هيڪ پريو ايسو ٻڌون مانھ سئ، ان زتا منڪ اوئا رو نوم لين
پچيا هارو مدت مونگھ، او پورا من ٿي اوئون ٻڌون نئ پچاوشي. ⑬ ڪم تو
شاستر ۾ لڪل سئ:

”جيو ڪوئي پريو رو نوم لين پچايا هارو مدت مونگھي،
پريو اوئا نئ پچاوشي.“

⑭ پڻ جي منڪي پريو ايسو مانھ وشواس نٿي اوٿيو، تو ڪم ڪرين پچيا
هارو اوئا ٿي مدت مونگھي؟ ان جي اوئي پريو ايسو را پارام نٿي هومپڙيو،
تو ڪم ڪرين اوئا مانھ وشواس اوٿي؟ ان جي ڪوئي پريو ايسو را پارام
منڪون نئ همپڙاو تو نٿي، تو ڪم ڪرين اوئا را پارام هومپڙي؟ ⑮ ان جي
پگھون منڪون نئ نٿي ميلتو، تو منڪ ڪم ڪرين پريو ايسو را پارام منڪون نئ
همپڙاوشي؟ هائي ٻڌي وات هاسئي سئ. پڻ پگھون اسرائيلي قوم ڪن همپڙايا،
وازا تو ميليا تا، ڪم تو شاستر ۾ لڪل سئ:

”ڪيوئي نائوڪي وات سئ زئون منڪ آپون ڪن آوين
نائوڪيون واتون را پارام ڪشي رئي ڪبر همپڙاوئ.“

⑯ ايئا ٿي وات ساوئي سئ جي اسرائيلي قوم ڪشي رئي ڪبر هومپڙي، پڻ
اوئون موئين ٿي ٻڌي منڪي ڪشي ري ڪبر مانھ يقين نه ڪريو. هايا را پارام
پگھون رو نياپو ڏيڏا واڙئ يسعياه آپ شاستر ۾ ام ڪيڏو:
”او ايشور، امارا ڏيڏل نياپا مانھ ڪيئنه يقين ڪريو؟“

⑰ تيام وات ساوئي سئ جي نياپو هومپڙيا وگر منڪ وشواس نٿي اوٿي هيڪتا،
ان او نياپو ايسو ڪريست را پارام سئ.

⑱ پڻ هون اي پونسونه، ڪي اسرائيلي هائي نياپو نٿي هومپڙيو؟ نا نا،
هايي تو ضرور هومپڙيو، ڪم تو شاستر ۾ لڪل سئ:

”اوئون رو نياپو پوري دنيا ۾ پڪڙي گيوھ،
ان اوئون ري واتون ڌرتي را ڌنگ هوڏي زائين پوگيوھ.“

①9 پڻ هُون اي پُونسونه، ڪي اسرائيليئي هاڻي نيا پو نٿي هُزميو؟ اُوئي تو ضرور هُزميوه. پيرهيڻ مَوسِي را لڪل شاستر ۾ پڳوونَ اسرائيلون نٿه ام ڪڻه:

”جيا منڪ ڪيا ڪاس قُوم را نٿي،

اُوئون نٿه هُون ايوآ آشيرواڌ ڏيه

جي تمِي اُوئون مانه ريشي بَرشو.

ان جيا قُوم را منڪ ڪڻن نٿي هُزمتا،

اُوئون مانه هُون ايوئي ميرپونئي ڪريه

جي تمِي اُوئون مانه رينه را ڪشو.”

②0 ان پستَه يسعياه را لڪل شاستر ۾ پڳوونَ ڌاري قُوم واڙون را پارام ساوئَه

نمُونَه ڪڻه جي

”جيا مُون نٿه ڳوتتا ئي نتا،

اُوئون نٿه هُون زڙيو.

ان جيا مارا پارام پُونسا ئي نتا ڪرتا،

اُوئون ڪن هُون ساوو ٿيو.”

②1 پڻ اسرائيلي قُوم را پارام پڳوونَ ام ڪڻه:

”هُون هر توتئَه اُوئون رو آپ ٿي واسطو رکايا هارو تيار سون

پڻ اُو قُوم صِدي سئَه ان مارو ڪيدو نٿي مونتئي.”

اسرائيلي قُوم موئين هميش ڪڻنڪ منڪ هوئَه

جيا پڪو وشواس راکئَه

11 ① تيام هُون اي پُونسونه، پڳوونَ آڀري سُونڊل قُوم نٿه ساڏيئَه پري ڪي؟ نا نا، ڪم تو هُون آڀ اسرائيلِي قُوم رو سون، ابراهيم را اولاد ٿي

ان بنيامين ري ذات ٿي سون. ② پڳوونَ آڀري اُوئا قُوم نٿه نه ساڏيئَه جيا نٿه اُوئَه جڳت ٿايا ٿي مور سُونڌي ٿئي. تمون نٿه ڪهر نٿي ڪي، جي هايا را پارام

ايلياه واڙي وات ۾ شاستر ۾ ڪي لڪل سٺه؟ ايلياه ڀڳوون ڪن آپري اسرائيلي قوم رٿه ڪلاڦ ام ٻولئھ:

③ ”او ايشور، اُوئي تمارو نياپو ڏيڏا واڙون نٿه ماريھ پرا،
اُوئي تمارا نوم مانھ مال ساڙيا ري جڳائون پونگيھ پري،
ان هُون هيڪ تمارو پُوزاري زائين پڇيوھ.

ان هَوئھ اُو ڪائي پين مُون لار پڻ ٿياھ.“
④ پڻ ڀڳوون ايلياه نٿه ڪي ڪيڏو؟ اُوئھ ام ڪيڏو:

”مئين آپ هارو هات هزار منڪ پڇاوين راکياھ،

جيئي بعل نومي ڏيو رئي پُوزا ڪيڏي نٿي ڪري.“

⑤ تيام هيوئھ نمونئھ، ايٺا زمونا ۾ پڻ، ڀڳوون اسرائيلي قوم مانھ ڪُرپا ڪريھ، ان اُوئون موئين ٿي آپرا منڪ نايا هارو ڪئينڪ سُوندين راکياھ.

⑥ ڀڳوون آپري ڪُرپا ري ڪري اُوئون نٿه سُوندياھ. ايٺا ٿي وات ساوئي سٺه جي اُوئي ايوا ڪوم نٿا ڪريا جيا را ايوزا ۾ ڀڳوون اُوئون نٿه سُوندياھ. جي ڀڳوون ڪومون را ايوزا ۾ منڪون نٿه سُونديا هونٿ، تو هايا نٿه ڪم ڪرين ڪُرپا ڪٿت؟

⑦ مارو ڪيڏا رو مطلب اي سٺه. ڀڳوون رو ڏيڏل تارڻ جيا نٿه ليڏا هارو اسرائيلي قوم ڪوشش ڪرھ رئي، اُو تارڻ ٻڌي قوم نٿه نٿي زڙيو. پڻ قوم موئين ٿي اُوئون منڪون نٿه تارڻ زڙيوھ، جيون نٿه ڀڳوون سُوندياھ. قوم را پيزا ٻڌائي منڪ ڀڳوون رئي وات نه مونيا جيوا ٿي گياھ. ⑧ همروم ٿيو، زم شاستر ۾ لڪل سٺه:

”ڀڳوون زوئٽھ اُوئون نٿه اُونگهڙايا پرا،

جيا ري ڪري اُو زوتا پڻ ڏيڪتا نٿا،

ان هومپڙتا پڻ مونتا نٿا.

ان آز هُوڏي همروم سٺه.“

⑨ داؤد پڻ اوتون را پارام شاستر ۾ ام ڪڻه:
 ”ڪراب منصوبا نايا هارو اُو ٻڌائي پيڙا ڪڻه.
 جيا پيڙون هارو ڪاڏ ڪوترهه، اُو پلئه آپ موئين پڙه!
 زم پڪي ان زناور گهٽ ان رچ موئين ڦاڻهه،
 ان زم منڪ پتر ٿي آڪرين پڙه،
 تم پلئه اُو آپرا منصوبا رو ايوزو پره!
 ⑩ اوتون ري اونڪيون ۾ ڏنڌ ٿنه، زم ڏيڪي نه هيڪه!
 ان اُو هميش ڏڪون را پار هيٺ رهه!“

⑪ تيام هون اي پونسونه، زئون اسرائيلي قوم را منڪ پتر ٿي آڪرين پڙي
 گيا، مطلب ايسو مانه وشواس نه اوڻيا ٿي پڳوون رو ڏوه ڪريو، تنيون اوڻي
 ايوو ڏوه ڪريو ڪي، جيا ري ڪري اوتون نه هوه تارڻ ٿي زڙي هيڪتو؟ نا
 نا، هم نٿي. اسرائيلي قوم واڙي ايسو مانه وشواس نه اوڻيو، پڻ هيا ڏوه ري
 ڪري ڌاري قوم واڙون نه تارڻ رو نياپو زڙيو، ان اوتون موئين ٿي منڪي ايسو
 مانه وشواس اوڻيو ان اوتون نه تارڻ زڙيو. پڳوون رو مقصد اي هتو جي ڌاري
 قوم واڙون نه تارڻ زڙيا ري ڪري اُو اسرائيلي قوم واڙون نه ريشي باڙشي
 زم اُو پڻ ايسو مانه وشواس اوڻهه ان اوتون نه پڻ تارڻ زڙه. ⑫ هيوه نمونه
 اسرائيلي قوم ره ڏوه ڪريا ري ڪري پوري دنيا رو ڦاڻڍو ٿيو. اسرائيلون رو
 تو نقصون ٿيو، پڻ هيا ٿي ڌاري قومون رو ڦاڻڍو ٿيو. تيام دنيا رو ڪتو گهڻو
 ڦاڻڍو ٿيشي، زئون اسرائيلي قوم را پڳوون را ٻڌائي سونڊل منڪ ايسو مانه
 وشواس اوڻشي.

زيئون را وڻ رو مثال
 اسرائيلون ان ڌاري قومون را پارام

⑬ هوه تمي جيا ڌاري قوم را سو، مارنه تمون ٿي ڪينڪ واتون ڪرووه.

پښتون موندنه ايتا هارو مک شيلو سونديوه، زم هون تمون ډاري قوم واژون
 ننه ايسو را پارام همپړاوون. ان هون ماري ايتا شيوا رڼي گهڻي نوموش کرونه،
 ⑭ زم هون کم ڼي کړين تمون ډاري قوم واژون ننه تارن زړيا ري کري مارون
 آپرون اسرائيلي پاڼون ننه ريشي ټاژون ان اوئون موئين ټي کيوند ننه پښتون
 ري سزا ټي پچاوون. ⑮ زڼيون پښتون اسرائيلي قوم رون منکون ننه آپرا سونډل
 منک نه را کيا ان اوئون ري جگا ډ ډاريون قومون رون منکون ننه آپرا سونډل
 منک نيا، تڼيون پښتون وسا ان پوري دنيا رون منکون وسا منومثا ټيا. تيام
 زڼيون پښتون اسرائيلي قوم رون منکون ننه وږي آپرون سونډل منکون پيڙا
 کرشي، تڼيون کڼي کڼي رڼي وات تيشي؟ او هميش را موت ټي پچي زاشي
 ان اوئون ننه هميش رو جيون زړشي.

⑯ هون تمون ننه مثال ديونه. زڼيون قصل رڼي پيرهيڼ روڼي پښتون را
 نوم مانده ساژنه، هيا ټي ټو قصل پوټر ټي زانه. ان جي وڼ ري پاڼون
 پوټر سته، تو تاري پڼ پوټر سته. هونه اسرائيلي قوم هیکا پوکل زیتون را
 وڼ جيوئي سته، ان اسرائيلي قوم را ډاډا جيا شروع ډ پښتون مانده وشواس
 راکتا، او هيا وڼ ريون پوټر پاڼون جيو سته. ⑰ پوکل وڼ ري کڼي تاري
 پښتانه ډار ټي گي، مطلب اسرائيلي قوم را کڼي منک پښتون رون سونډل

منکون ټي ډار ټيا، ان تڼيون پښتون
 تمون ډاري قوم واژون ننه آپرون سونډل
 منکون پيڙا کريا، زوڼه اوڼه جهنگلي
 زیتون ريون تاريون را قلم اصلي زیتون
 را وڼ ډ هيا هونه. ان هونه تمې پڼ
 زوڼه هاگي وڼ ريون پاڼون ټي طاقت
 ليوه، مطلب تمون ننه او آشپرواډ زړه
 جيون را پارام پښتون اسرائيلي قوم رون



ڏاڏون ٿي وائيڏا ڪريا. ⑱ تيام تمڻي ڌاري قُوم واڙا اي وڏائي مت ڪرو جي امڻي هايون ڌار ٿيل ٿاڙيون يهُوديون ٿي وڌيڪ سون. جي تمڻي وڏائي ڪروا ڪروھ، تو اي وات ياد راکو جي تمڻي رُوڳا قلم واري ٿاڙي سو. جي قلم واري ٿاڙي نه هوئ، توڻي پڻ پاڊون ٺيڪ ريشي. پڻ جي پاڊون نه هوئ، تو قلم واري ٿاڙي پڻ نئين رٿ.

⑲ تمڻي تو ام ڪيشو جي هائي ٿاڙي ايئا هارو پنگائين ڌار ٿي، زم تمڻي ڌاري قُوم واڙا وڻ پيڙا ملي زائو. ⑳ هائي وات تو هاسئي سئ. پڻ او ايئا هارو پنگائين ڌار ٿي، ڪم تو اوئي ايسو مانھ وشواس نه اوڻيو، ان تمڻي اوئون ري جڳا ۾ رُوڳا ايئا هارو سو ڪم تو تمڻي وشواس راکوھ. تيام تمارئ هيا وات مانھ وڏائي نه ڪرو، پڻ پيئاو ڪپئ متون تمڻي پڻ وشواس ساڏين پڙي نه زائو. ㉑ ڪم تو پڳوون يهُوديون نئ پڻ ڪاڊيا پرا، جيا اصلي ٿاڙيون را زم هتا، تو پسئ او تمون نئ ڪم نئين ڪاڏئ؟

㉒ هيا ٿي زوئو، پڳوون ميرپونئي ڪريا واڙو سئ، ان سڪتي ٿي سزا ڏيڏا واڙو سئ. او يهُودي جيا ڏوھ ڪرين پڙي گيا، اوئون نئ پڳوون سڪتي ٿي سزا ڏيڏئي. پڻ تمون ڌاري قُوم واڙون مانھ اوئ ميرپونئي ڪري. ان زئيون هُودي تمڻي اوئا ري ميرپوني رو ٿورو مومين اوئا ري مرضي مانھ وينا ريشو، تئيون هُودي او تمون مانھ ميرپونئي ڪرتو ريشي. پڻ جي تمڻي اوئا ري مرضي مانھ نئين وو، تو او تمون نئ واڍل ٿاڙيون را زم ڌار ڪرشي پرا. ㉓ ان او يهُودي قُوم واڙا پڻ، جي او ضد ساڏين ايسو مانھ وشواس اوئئ، اوئون نئ پڻ هٿل قلمون را زم پڳوون آپرون سونڍل منڪون پيڙا ڪرشي. ڪم تو پڳوون اوئون نئ وڙي آپرون سونڍل منڪون پيڙا ڪري هيڪئھ. ㉔ تمڻي ڌاري قُوم واڙا جهنگلي زيتون را وڻ ريون ٿاڙيون را زم سو. توڻي پڻ زئيون پڳوون تمون نئ آپرون سونڍل منڪون پيڙا ڪريا، تئيون اوئ زوئئ جهنگلي وڻ ٿي ٿاڙي واڍين پوڪل زيتون را وڻ ۾ قلم هٿيا. هوئ يهُودي پوڪل وڻ ريون ٿاڙيون را زم سئ. پسئ زم ٿاڙي

آپرا اصلي وٺ ۾ هورئہ نمونئہ لاڳي هيڪئھ، تم پڳوونَ هورئہ نمونئہ يهوديون
نئہ آپرون سُونڍل منڪون پيڙا وڙي ڪري هيڪشي.

پڳوونَ ٻڌيون قومون رُون منڪون مانھ ڏٺيا ڪرئھ

②5 پايون ان ٻينون، مٿين تمون نئہ هائي مثال ايٺا هارُو ڏيڏوھ، ڪم تو مارئي
مرضئي سئہ جي تمون نئہ ايٺا اُونڌي وات رئي ڪٻر پڙئہ، زم تمي آپ نئہ موتا
نہ هُزمو. اُو اُونڌي وات اي سئہ جي اسرائيلي قوم را گھڻا منڪ پڳوونَ رئہ
ڪِلاَق ضدي ٿي گيا، پڻ زئيون ڌاري قوم وازون موئين ٿي پڳوونَ را سُونڍل
منڪ ٻڌائي پڳوونَ را راز موئين آول هوشي، تئيون اسرائيلي قوم را منڪ آپري
ضد ساڏشي. ②6 ان هيوتہ نمونئہ اسرائيلي قوم را ٻڌائي سُونڍل منڪ پڳوونَ
ري سزا ٿي پڇي زاشي. همروم تيشي، زم پڳوونَ شاستر ۾ ڪيڏو:

”اسرائيلي قوم موئين ٿي پڇايا وازو آوشي.

اُو يعقوب ري پيڊي نئہ مارئہ ڪِلاَق وُڍا ٿي سڏاوين

ماري مرضي مانھ ويوراوشي.

②7 مارو اي وسن اوئون ٿي ٻونڌل سئہ،

ان هُون وسن پرموتئہ اوئون نئہ ڏوهون رئي ماڦئي ڏيھ.

②8 وات ام سئہ. اسرائيلي قوم وازا تمون ڌاري قوم وازون را قائيڏا هارُو
ايسُو را پارام ڪشي رئي ڪٻر نہ مونئي، ان تيا ري ڪري اُو پڳوونَ را ڏشمڻ
تياھ. توئي پڻ پڳوونَ اوئون رُون ڏاڏون ٿي ڪرل وسن پرموتئہ اوئون نئہ
سُونڍيا، ان تيا ري ڪري پڳوونَ اوئون ٿي پريم ڪرئھ. ②9 ڪم تو زئيون
پڳوونَ آپري ڪُريا پرموتئہ وائيڏو ڪرئھ ان منڪون نئہ سُونڍئھ، تئيون اُو
آپرو ڦينصلو نٿي پڌلتو. ③0 اڳي تمي ڌاري قوم وازا پڳوونَ رو ڪيڏو نہ
مونتا، پڻ همئئہ زئيون يهودي پڳوونَ رو ڪيڏو نٿي مونتا، تئيون پڳوونَ تمون
مانھ ڏٺيا ڪرئھ. ③1 ان هيوتہ نمونئہ يهودي پڻ همئئہ پڳوونَ رو ڪيڏو نٿي

مونتا، پڻ ڀڳوونَ تمون ڌاري قُوم واڙون مانھ ڏٺيا ڪريھ، زم يھودي پڻ مونئھ ان اُوئون مانھ پڻ ڀڳوونَ رئي ڏٺيا ٿئھ. ③② ڪم تو ڀڳوونَ ٻڌون منڪون نئھ آڀرو ڪيڏو نہ مونيا را ڏوھ ۾ ڦاٿو ڏيڏاھ، زم اُو ٻڌون منڪون مانھ ڏٺيا ڪرئھ.

ٻولوس ڀڳوونَ رو ٿورو مونئھ

③③ ڀڳوونَ رئي عقل ان هزم ڪٿي گهٽي سئھ! اُوئا را منصُويا هزميا ٿي ٻارا سئھ، ان اُوئا را وُڍا را نمونا زوٿيا ٿي ٻارا سئھ. زم شاستر ۾ لڪل سئھ:

③④ ”ايشور را من رئي ڪيا نئھ ڪٻر سئھ؟

ڪُون اُوئا نئھ صلاح ڏي هيڪئھ؟“

③⑤ ”ڪيئھ اُوئا نئھ ڪئين نٿي ڏيڏو

جيا رو ايوزو اُو پري ڏئھ.“

③⑥ ڪم تو ڀڳوونَ ٻڌي شينھون پيڏا ڪريھ، اُو ٻڌيون شينھون رئي همياڙ ڪرئھ، ان ٻڌي شينھون اُوئا ري شيوا هارو سئھ. اُوئا را وڪون هميش هُڏي ٿيئا رئھ! آمين.

ٻوري حياتي ڀڳوونَ رئي شيوا ڪروو

12 ① پايون ان بينون، ڀڳوونَ تمون مانھ هائي گهٽي ميرپونئي ڪريھ. تيام هُون تمون نئھ مينٽ ڪرونھ جي تمي زوئئھ آپ نئھ ڀڳوونَ را نوم مانھ ساڙين اينا حياتي ۾ ڀڳوونَ ري مرضي مانھ وِٽا ريو زم پويتر رين تمي ڀڳوونَ نئھ ڪُش ڪرو. هائي اُو شيوا سئھ جي ڀڳوونَ تمون ٿي ڪراوا ڪرئھ. ② تمي پيزون منڪون را زم ڏنيا را ڪراپ نمونا ڀرموئئھ مت وو، پڻ ڀڳوونَ نئھ تمارا من ڀڏلاووا ڏيو ان نوا نمونا ڀرموئئھ وو. هيئھ نمونئھ ڀڳوونَ ري مرضي مانھ وُڍا ٿي تمون نئھ ڪٻر پڙي زاشي جي ڀڳوونَ رئي مرضي ڪيوي سئھ،

جي اُو ڪٿي نائوڪيئي سئ، اُونا مانھ وُڊا ٿي پڳوون ڪُش ٿئھ، ان ھر وات ۾ ھاو ٿيڪ سئ.

③ پڳوون مُون مانھ ڪُريا ڪرين مُڪ شيلو نايوھ ان ھاڻي ڪوم ڪريا رئي هيٺ ڏيڏيھ، تيام هُون تمون موئين ٿي هر هيڪ نئ ڪونه جي ٽمي آپ نئ موٽا مت هُزمو، پڻ عقل پرموئئھ آپرا پارام ام سوچو زم سوچو ڪپئ، ڪم تو وشواس راڪيا پرموئئھ جيوا ڪوم ڪريا رئي هيٺ آپون موئين ٿي هر هيڪ ڪن سئ، اُو هيٺ پڳوون آپون نئ ڏيڏيھ. ④ جيئھ نمونئھ آپئا هيڪا ڏيل را گھڻا اُوزيا سئ ان هر هيڪ اُوزيا رو آپرو آپرو ڪوم سئ، ⑤ هيئھ نمونئھ آپي گھڻا منڪ ايسو ڪريست ٿي واسطو راڪيا ري ڪري هيڪي وشواسي منڌري موئين پيزا ٿين هيڪا ڏيل را زم سون، ان آپت ۾ هيڪا ڏيل رون اُوزيون را زم سون. ⑥ پڳوون آپون مانھ ڪُريا ڪريھ ان آپري ڪُريا پرموئئھ آپون موئين ٿي هر هيڪ نئ ڦرق ڦرق ڪوم ڪريا رئي هيٺ ڏيڏيھ. جي تمون نئ پڳوون رو نياپو ڏيڏا رئي هيٺ ڏيڏل سئ، تو اُو نياپو همپزاوو جيا را پارام تمون نئ يقين سئ جي پڳوون را پاها ٿي سئ. ⑦ جي تمون نئ شيوا ڪريا رئي هيٺ ڏيڏل سئ، تو منڪون رئي شيوا ڪرتا ريو. جي تمون نئ شيڪاڙيا رئي هيٺ ڏيڏل سئ، تو منڪون نئ شيڪاڙتا ريو. ⑧ جي تمون نئ حوصلو ڏيڏا رئي هيٺ ڏيڏل سئ، تو منڪون نئ حوصلو ڏيڏا ريو. جي تمون نئ گريهون رئي مدت ڪريا رئي هيٺ ڏيڏل سئ، تو پورا من ٿي اوئون رئي مدت ڪرو. جي تمون نئ آگيوونئي ڪريا رئي هيٺ ڏيڏل سئ، تو پوري ڪوشش ٿي آگيوونئي ڪرو. جي تمون نئ ضرورت واڙون رئي مدت ڪريا رئي هيٺ ڏيڏل سئ، تو ڪشي ٿي اوئون رئي مدت ڪرو. ⑨ ٽمي هاسو پريم راڪو. پُونڌائي ٿي شيتي پاڳو، ان نائوڪيون واتون مانھ ڪُشي ٿي ويتا ريو. ⑩ هيڪا پيزا ٿي پايون را زم گھڻو پريم راڪو. پيزون نئ آپ ٿي وڌيڪ مون ڏيو. ⑪ هر وات ۾ سُسٽي نئين پڻ ڪوشش ڪرو. پَوِتر آتما ري مرضي مانھ پورا شونق ٿي

وو. پريُو ايسُو رئي شيوا ڪرنا ريو. ⑫ پڳوونَ رون ڪرل وائيدون مانھ پروسو راکينَ من ۾ ڪُش ٿيو. تڪليپون ۾ ڏوروڻ صير ٿي سھو. هميش پراٿنا ڪرنا ريو. ⑬ پڳوونَ رون سُونڍل منڪون رئي ضرورت ۾ مدت ڪرو. ميزمونون رئي شيوا ڪرو.

⑭ جيا تمون نئہ تنڳ ڪرئھ، اُوئون نئہ مت پتو، پڻ اُوئون ھارُو پڳوونَ ٿي آشيرواڏ مونڳو. ⑮ جيا ڪُش سئھ، اُوئون پيڙا ڪُش ٿيو. جيا روئھ، اُوئون پيڙا روئو. ⑯ آيت ۾ هيڪ من ٿين ريو. آپ نئہ موتا مت ھڙمو، پڻ ڳريپون ٿي پريم ھون وو. آپ نئہ عقل واڙا ھڙمين مڱھرو ر مت ٿيو.

⑰ جيو تمون ٿي پُونڌائي ڪرئھ، اُوئا ٿي تمي پُونڌائي مت ڪرو. ايوا ڪوم ڪرو جيا ٻڌون نئہ نائوڪا لاڳئھ. ⑱ تمي آپرا پاھا ٿي ٻڌون منڪون ٿي ھپ ۾ ريا رئي پوري ڪوشش ڪرو، زم مون ٻڌون منڪون رو ان تمارو آيت ۾ ھپ رئھ. ⑲ پريمي پايون ان پينون، ڀڏلو ماڳي مت ليو، پڻ سزا ڏيڌا رئي وات پڳوونَ مانھ ساڏو، ڪم تو شاستر ۾ لڪل سئھ:

”ايشور ام ڪئھ: ڀڏلو ليڏا واڙو ھون سون.
ھون آپ ڏوھون را ايوزام منڪون نئہ سزا ڏيھ.“
⑳ پڻ تمي ام ڪرو زم شاستر ۾ لڪل سئھ:

”جي تمارو ڏشمڻ پُوکو ھوئھ، تو اُوئا نئہ روئي ڪوراو.
جي اُو ترھو ھوئھ، تو اُوئا نئہ پوئي پيئارو.
تمارئھ ھم ڪريا ٿي اُو لازي مرشي،
ان مون آپري ڏشمئي ساڏئھ.“

㉑ تمي پُونڌائي را ڀڏلام پُونڌائي مت ڪرو، ان ھيوئھ نمونئھ پُونڌائي نئہ آپ مانھ جيتوا مت ڏيو. پڻ تمي پُونڌائي را ايوزا ۾ ڀلائي ڪرو، ان ھيوئھ نمونئھ تمي پُونڌائي مانھ جيتي زاشو.

وشواسيون رٺ حڪومت را ڪيڏا پرموٽه ويو



13 ① هر هڪ منڪ رٺ حڪومت را ڪيڏا پرموٽه ويو. ڪم تو هر حڪومت پڳوون را طرف ٿي سٺ، ان زتا پڻ منڪ حڪومت ۾ سٺ، پڳوون اُوئون نٺ منڪون مانھ را ڪياھ. ② تيام جيو حڪومت رٺ ڪلاڦ وٺ، اُو پڳوون ري مرضي رٺ ڪلاڦ وٺ. ان جيا منڪ

پڳوون ري مرضي رٺ ڪلاڦ وٺ، اُوئون نٺ اُوئا رٺي سزا زڙشي. ③ جيا نائوڪا ڪوم ڪرٺ، اُوئون رٺ راز ڪريا واڙون ٿي نه پٺاوو ڪپٺ. پڻ اُوئون منڪون رٺ پٺاوو ڪپٺ، جيا ڪراپ ڪوم ڪرٺ. جي تمي حڪومت ٿي پٺاوا نٿي ڪرتا، تو نائوڪا ڪوم ڪرو، ان حڪومت تمارا وڪوڻ ڪرشي. ④ ڪم تو حڪومت پڳوون رٺي شيوا ڪريا واڙي سٺ، زم تماري پلائي ٿئ. پڻ جي تمي ڪراپ ڪوم ڪرو، تو پست حڪومت ٿي پٺاوا، ڪم تو حڪومت رٺي طاقت امهي نٿي، پڻ اُوئا نٺ موت رٺي سزا ڏيڏا رو حق سٺ. اُو پڳوون رٺي شيوا ڪريا واڙي ٿين پڳوون را طرف ٿي ڀڏلو لٺ ان ڪراپ ڪوم ڪريا واڙون نٺ سزا ڏئ. ⑤ تيام تماره حڪومت را ڪيڏا مانھ ويو لازمي سٺ، ڪم تو هم ڪريا ٿي تمي نه رُوگو پڳوون ري سزا ٿي پڇي زاشو، پڻ تمارو من صاف ريشي.

⑥ تيام تمي حڪومت نٺ ٽيڪس را پٺيها پڻ پروھ، ڪم تو حڪومت را منڪ پڳوون رٺي شيوا ڪريا واڙا ٿين تماري پلائي هارو راز ڪريا رٺي زميوارئي پوري ڪرٺ. ⑦ هر منڪ نٺ اُوئا رو حق ڏيو. جيا نٺ ٽيڪس ڏيو، اُوئا نٺ ٽيڪس ڏيو. جيا نٺ ناڪو ڏيو، اُوئا نٺ ناڪو ڏيو. جيا رٺي عزت راڪوو، اُوئا رٺي عزت راڪو. ان جيا رو مون راڪوو، اُوئا رو مون راڪو.

ٻڌون ٿي موتو قرض اي سٺ جي هڪا پڙا ٿي پريم راڳو

⑧ ٻڌون منڪون نٿه اُئون رو حق ڏين آڀرو قرض پورو ڪرو. پڻ تمارو هڪ قرض سٺهه جيا نٿه پورو ڪريا رو ڪوئي ڏنگ نٿي، پڻ تمارهه هميشه ڪروو ڪپڻهه. اُو قرض اي سٺهه جي تمهي هڪا پڙا ٿي پريم راڳو. ڪم تو جيو پڙون ٿي پريم راڳهه، اُوڻهه پڳوون را ڏيڏل ٻڌائي حڪم پورا ڪرياهه. ⑨ پڳوون را ٻڌائي حڪم جي پونڌو ڪوم نه ڪروو، ڪُون نه ڪروو، سورڻي نه ڪروو، لالچ نه راڳو، ان پڙا زتا پڻ حڪم سٺهه، اُو ٻڌائي حڪم ايڻا هيڪي وات ۾ آوي زانهه جي ”پڙون منڪون ٿي آڀرا زم پريم راڳو.“ ⑩ جيو پڙون منڪون ٿي پريم راڳهه، اُو اُئون ٿي ڪراپ نمونته نئين وڻهه. تيام پريم راڳيا ٿي آڀي پڳوون را ٻڌائي حڪم پورا ڪرونهه.

⑪ همٿوڪا توتا نٿه اوڙڪين همروم پريم راڳتا ريو. هَوڻهه اُونگهايا رو نئين، پڻ سڄاڳ ٿيا رو توتو سٺهه، ڪم تو آڀڻهه وشواس اوڻيا را توتا ٿي لين آڀون نٿه تارڻ زڙيا رو توتو همٿهه ڏي ٿو ڏي ڏوڪڙو اُوڻهه ريو. ⑫ اي ڪراپ زمونو رات را زم ڪتم ٿيا واڙو سٺهه، ان ايسو رڻه وڙي آيا رو توتو ڏي اُوڳيا را زم ڏوڪڙو سٺهه. تيام آڀي اندارا را ڪراپ ڪوم ساڏون، ان شيطون ٿي مَقابلو ڪريا هارو هٿيارون را زم پڳوون ٿي هيمنت ليون، زم سوڄهرا ۾ وين نائوڪا ڪوم ڪرون. ⑬ آڀي ايوڻهه نائوڪهه نمونته وون، زم ڏي را ويو ڪپڻهه. عيش عشرت نه ڪرون، نڪو ڌارو پڻ مست ٿيون. پونڌو ڪوم نه ڪرون، نڪو لوڦرائي ڪرون. جهيڙو جهيڙو نه ڪرون، نڪو ڪيا مانهه ريشي پڙون. ⑭ زم منڪ ڪراپ لوڳهڙا اوتارين نائوڪا لوڳهڙا پيرڻهه، تم تمهي هيو ڪراپ ڪوم ساڏين پريو ايسو ڪريست ٿي واسطو راڳين اوتا را نائوڪا نمونا مانهه وو. ان آڀرون ڪراپ ڪيالون را پارام مت سوڄو جي ڪم ڪرين اُئون مانهه وون.

شڪ واريون واتون ۾ پيزون رو ٺوه نه ڪايوو

14

① جيا منڪ رو وشواس ريون واتون مانھ پڪو يقين نٿي، اُٺا نٺه وشواسي منڌڙي ۾ ڪشي ٿي قبول ڪرو، ان اُٺا ٿي اُٺون واتون را پارام پحت مت ڪرو جيون را پارام اُو شڪ ڪرئھ. ② مثال، جيو منڪ پڪو وشواس راکئھ، اُٺا نٺه يقين هوشي جي ڪوئي پڻ ڪاڌو ڪاڌا ٿي پڳوون رو ڏوه نٿي ٿيتو، ان اُو هر قسم رو ڪاڌو ڪاشي. پڻ جيا منڪ نٺه هيا وات رو يقين گھٽ سئھ، اُو مونھ نئين ڪائھ پڻ روڳي پازي ڪاشي. ③ جيو مونھ ڪائھ، اُٺا رٺھ مونھ نه ڪاڌا واڙا نٺھ گھٽ نه هڙموو. ان جيو مونھ نٿي ڪاتو، اُٺا رٺھ مونھ ڪاڌا واڙا نٺھ مونھ ڪاڌا ري ڪري ڏوهاري نه هڙموو، ڪم تو پڳوون پيئون نٺھ آپرا منڪ ڪرين قبول ڪرياه. ④ تمي آپ نٺھ ڪي هڙموه جي تمي پيزا ڪياڪ را نوڪر رو ڏوه ڪايو؟ ڏوه ڪاڍيا رو حق اُٺا را آپرا ڏيئي نٺھ سئھ، ان ڏيئي رٺي آپرئي مرضي سئھ جي اُو نوڪر نٺھ راکئھ ڪا ساڏئھ. هَوئھ آپون وشواسيون رو ڏيئي پريو ايسو سئھ، ان اُو آپرون شيواڌاريون نٺھ ضرور راکشي، ڪم تو اُو آپرون منڪون نٺھ آپ ڪن راکيا جيو ڪري هيڪئھ.

⑤ پيزئي وات اي سئھ، ڪوڪ منڪ ام هڙمئھ جي ڪئينڪ ڏي پيزون ڏيئون ٿي پويتر سئھ، ان پيزا منڪ ٻڌون ڏيئون. نٺھ هيڪ جيو هڙمئھ. هيويون واتون را پارام هر هيڪ منڪ رٺھ پڪي ڪاتري ٿي آپ را پارام آپرو ڦينصلو ڪروو. ⑥ جيو منڪ ڪيونڪ ڏيئون نٺھ پيزون ٿي پويتر راکئھ، اُو پريو ايسو رو مون راکين هم ڪرئھ. ان جيو منڪ مونھ ڪائھ، اُو پريو ايسو رو مون راکين مونھ ڪائھ، ڪم تو اُو مونھ هارو پڳوون رو ٿورو موين ڪائھ. ان جيو منڪ مونھ نٿي ڪاتو، اُو پڻ پريو ايسو رو مون راکين مونھ نٿي ڪاتو، ان اُو پڳوون رو ٿورو موين پازي ڪائھ. ⑦ ڪم تو پلئھ جيوتا ريون ڪا مري زائون، آپون موئين

ٿي ڪيا رو مقصد اي نٿي جي آڀرئي مرضي پُورئي ڪرون. ⑧ ڪم تو جي آڀي جيوتا ريون، تو آڀي پريو ايسو رئي مرضي پُورئي ڪروا ڪرونه. ان جي آڀي مري زائون، توئي آڀي پريو ايسو رئي مرضي پُورئي ڪروا ڪرونه. تيام پلئه آڀي جيوتا ريون، ڪا مري زائون، توئي پڻ آڀي پريو ايسو را منڪ سون. ⑨ ايسو ڪريست ايٿا هارو مري گيو ان وڙي جيوتو ٿيو، زم او مرلون ان جيوتون رو پريو ٿين راز ڪرئه. ⑩ هونءِ تمي آڀا وشواسي پائي را پارام اي ڦينصلو ڪم ڪروه جي او ڏوهاري سئ؟ ڪا تمي آڀا وشواسي پائي نئه آپ ٿي گهت ڪم هڙموه؟ ڪم تو آڀي ٻڌائي نيا هارو پگهون هوما اوپشون. ⑪ زم شاستر ۾ لکل سئ:

"ايشور ام ڪئھ: هون آڀرو هون ڪائين ڪونه

هر هيڪ منڪ ماري پگي پڙشي،

ان هر هيڪ منڪ مارا وڪوڻ ڪرشي."

⑫ هيونءِ نمونءِ آڀون موئين ٿي هر هيڪ آڀرون آڀرون ڪومون رو حساب پگهون ڪن ڏيشي.

ايونءِ نمونءِ نه ويوو جيا ٿي ڪوئي وشواسي پائي ڏوه ڪرئ

⑬ تيام آڀي هڪا پيزا نئه ڏوهاري نه هڙمون. پڻ تمي پيزون را پارام ڦينصلو ڪريا ري جگا ۾ آپ را پارام اي ڦينصلو ڪرو جي هون ايونءِ نمونءِ نئين وون جيا ري ڪري مارو وشواسي پائي وشواس مانھ شڪ ڪرئ ڪا ڏوه ۾ پڙئ. ⑭ مون نئه ڪبر سئ ان پريو ايسو ٿي واسطو راڪيا ري ڪري مون نئه پڪئي ڪاتري سئ جي ڪوئي پڻ ايو ڪاڌو نٿي جيا نئه ڪاڌا ٿي منڪ پگهون رو ڏوه ڪرئ. پڻ جي ڪوڪ ام هڙمئھ جي ڦلوئي شينھ ڪاڌا ٿي منڪ پگهون رو ڏوه ڪرئ، تو اونا رئ او شينھ نه ڪاوو. ڪم تو جيو هم هڙمئھ، ان توئي پڻ ڪائھ، او پگهون رو ڏوه ڪرئ. ⑮ جي تمارئھ ڪئيڪ

شينھ ڪاڏا ٿي تمارا وشواسي پائي نٿ ڏک ٿئھ، تو اُو شينھ مت ڪاڻو. جي
 تمڻي ايوي شينھ ڪاڻوھ، تو تمڻي پريم ٿي نٿي وڻتا. تمڻي آڀرا ڪاڏا ري ڪري
 اُوئا منڪ رو وشواس ڪراپ مت ڪرو، جيا نٿ پڇايا هارو ايسو ڪريست آڀرو
 جيو ڏيتو. (16) هم ڪريا ٿي پيزون منڪون نٿ اي موقعو مت ڏيو جي اُو نائوڪا
 وشواسي ڌرم نٿ پوندو ڪئھ. (17) ڪم تو پڳوون را راز مانھ وُڍا رو مطلب
 اي نٿي جي آڀي آڀري مرضي پرموئھ ڪئين پڻ شينھ ڪاڻون پيئون، پڻ ايئا
 رو مطلب اي سٺھ، جي آڀي پڳوون ري وات مانھ وون، پڳوون ان منڪون ٿي
 هپ ۾ ريون، ان پويتر آتما ري ڪري من ۾ ڪُش ٿيون. (18) جيو هيوئھ نمونھ
 ايسو ڪريست رٿي شيوا ڪرئھ، پڳوون اُوئا ٿي ڪُش ٿئھ، ان منڪ اُوئا رو
 مون راکھ.

(19) تيام ليو، آڀي ايوئھ نمونھ وُڍا رٿي ڪوشش ڪرون، جيا ٿي آڀون ۾ هپ
 رٿھ ان هڪا پيزا رو وشواس راڪيا رٿي هيئت وڌتھ. (20) تمڻي ڪاڏا هارو پڳوون
 رو ڪوم ڪراپ مت ڪرو. پڳوون ري مرضي پرموئھ منڪ ٻڌي شينھون ڪاڻي
 هڪئھ. پڻ اي نائوڪي وات نٿي جي هڪا منڪ رٿھ ڪئينڪ شينھ ڪاڏا ٿي
 اُو پيزا منڪ نٿ ڏوھ ۾ پاڙئھ. (21) جي تمارئھ مونھ ڪاڏا ٿي، ڪا ڌراڪ رس
 پيدا ٿي، ڪا ايوو ڪوئي پڻ ڪوم ڪريا ٿي، تمارو وشواسي پائي ڏوھ ڪرئھ،
 تو نائوڪي وات اي سٺھ جي تمڻي هم مت ڪرو.

(22) هايون واتون را پارام جيو ڦينصلو تمڻي يقين ٿي ڪريوھ، اُو تمڻي آڀرا
 من ۾ راڪو. هائي تماري ان پڳوون رٿي وات سٺھ، پيزون نٿ ڪيڏا رو ڪئين
 ڪوم نٿي. پاڳواڙو اُو سٺھ جيو روڳو ايوو ڪوم ڪرئھ جيا نٿ اُو نائوڪو
 هزمئھ، ان هيوئھ نمونھ آڀ نٿ پڳوون رو ڏوهاري نٿي ڪرتو. (23) پڻ جيو
 منڪ شڪ ڪرئھ جي زويام اي شينھ ڪاڏا ٿي پڳوون رو ڏوھ ٿئھ، ان
 توئي پڻ ڪاڻھ، اُو منڪ آڀ نٿ پڳوون رو ڏوهاري ڪرئھ، ڪم تو اُو آڀرا
 يقين پرموئھ نٿي وڻتو. ڪوئي پڻ ڪوم هوئھ، جي منڪ نٿ يقين نٿي جي

اي ڪوم پڳوونَ ري نظر ۾ ٺيڪ سئ، ان توڻي پڻ ڪرئ، تو او پڳوونَ رو ڏوه ڪرئ، ڪم تو جيو ڪوم وشواس ڀرموئڻه يقين ٿي نٿي ٿيتو، او ڏوه سئ.

ايوئ نمونئ ويو زم ٻيزون نئ وشواس راڪيا رئي هيئت زڙئ

15 ① تيام آبي جيا پڪو وشواس راڪونه، آڀئڻه اوئون ري وشواس ري ڪمزوري صير ٿي سهو ڪيئ، ان اوئون رئي وشواس راڪيا رئي هيئت وڌاو، جيا وشواس راڪيا ۾ ڪمزور سئ، ان آڀئڻه آپري مرضي مان نه ويو. ② آپون موئين ٿي هر هيڪ ايوئ نمونئ وئ جيوئ نمونئ ٻيزون نئ نائوڪو لاڳئ، زم اوئون نئ وشواس راڪيا ۾ قائيدو تئ ان اوئون رئي وشواس راڪيا رئي هيئت وڌئ. ③ ڪم تو ايسو آپ آپري مرضي مان نه وويدو، پڻ پڳوونَ ري مرضي مان ويدا هارو ٻڌوئي ڪئين صير ٿي سهيو، زم شاستر ۾ لڪل سئ:

”جيئي منڪي تمارئي پيعزئي ڪري،

اوئي مارئي پڻ پيعزئي ڪري.“

④ هون شاستر رئي وات تمون نئ همپراونھ ريو، ڪم تو زتي واتون اڳي شاستر ۾ لڪل سئ، او ٻڌي آڀا شيڪيا هارو لڪل سئ، زم شاستر ٿي آپون نئ ڏوروڻ سهيا رو صير ان حوصلو زڙئ، ان هيوئ نمونئ صير ان حوصلو ٿي آبي پڳوونَ را وائيدا ڪرل هڪ مانھ پروسو راڪون.

⑤ پڳوونَ، جيو ڏوروڻ سهيا رو صير ان حوصلو ڏئ، او تمون نئ هيئت ڏئ زم تمي ايسو ڪريست را ڏيڪارل نمونا ڀرموئڻه آيت ۾ هپ ٿي ريو، ⑥ ان هيڪ من ٿين ٻڌائي پيڙا آڀا پريو ايسو ڪريست را ٻاپ پڳوونَ را وڪوڻ ڪرو.

پريو ايسو ٻڌيون قومون هارو آيو تيام ٻڌون رڻ هپ ۾ ريوو

⑦ تيام، زم ايسو ڪريست آيون نڻه ڦهول ڪرياه، تم تمڻي هڪا پڙا نڻه ڦهول ڪرو، زم پڳوون را وڪوڻ ٿڻه. ⑧ ڪم تو هون تمون نڻه يقين ٿي ڪونه جي ايسو ڪريست پڳوون ري واتون هاسي ڏيڪاڙيا هارو يهوديون رڻي شيوا ڪريا واڙو ٿيو، زم او يهوديون رون ڏاڏون ٿي پڳوون را ڪرل وائڏا پورا ڪرڻه، ⑨ ان ڌاري قومون را منڪ پڳوون ري ڪرل ڪريا ري ڪري پڳوون را وڪوڻ ڪرڻه. هايا وات را پارام شاستر ۾ دائود رڻي اي وات لڪل سڻه:

”تيا ري ڪري هون ڌاري قوم رون منڪون ڪن
تمارا وڪوڻ ڪريه ان تمارا پڙن ڳاڙيه.“

⑩ ان شاستر ۾ ام پڻ لڪل سڻه:

”او ڌاري قومون رون منڪون،

پڳوون ري سونڊل قوم پڙا ڪش ٿيو.“

⑪ ان وڙي ام پڻ لڪل سڻه:

”ڌاري قومون رون منڪون، ايشور را وڪوڻ ڪرو.

هر قوم را منڪ اوڻا را وڪوڻ ڪرڻه!“

⑫ ان پڳوون رو نياپو ڏيڏا واڙڻه يسعياه پڻ ايسو ڪريست را پارام ام ڪيڏو:

”يسي ري پيڊي ٿي هڪ ايوو منڪ پيڏا ٿيشي،

جيو ڌاري قومون مانھ راز ڪروا آوشي،

ان اوڻا مانھ ڌاري قومون را منڪ پروسو راڪشي.“

⑬ پڳوون، جيا مانھ آپڻو پروسو سڻه، او تمارڻه وشواس راڪيا ۾ تمارا من

پوري ڪشي ان هڪ ٿي پرڻه، زم پويتر آتما ري ڏيڏل هيمنت ٿي تمڻي هميش

پڪو پروسو راڪتا ريو.

ڌاري قُوم وَاژون نٺَ ايسُو را پارام هَمپِڙايا هَارُو پِڳوونَ پُولوس نٺَ سُونڊيو تو

⑭ مارون پايون ان پينون، مُون نٺَ پڪڙي ڪاٿڙي سٺ، جي تمِي آڀ گهٽا
نائوڪا منڪ سو، تمون نٺَ وشواس رڻي ٻڌڻي ڪبر سٺ، ان تمِي آڀ هِڪا پِڙا
نٺَ هَڙماوي هِڪوھ. ⑮ توڻي پڻ تمون نٺَ ياڌ ڏيورايا هَارُو، مٿين ڪيونڪ
واتون را پارام ساوٺه نمونٺه ايٺا ڪت ۾ لکيوھ، ڪم تو پِڳوونَ مُون مانھ ڪُڙپا
ڪرين مُون نٺَ اي هيمنت ڏيڏيھ جي هُون ايسُو ڪريست رو شيواڌاري ٿين ڌاري
قُوم وَاژون هَارُو شيوا ڪرون. ⑯ زم پُوزاري پِڳوونَ را گهر موٽين مال ان ڏُونپ
پِڳوونَ را نوم مانھ ساڙين پِڳوونَ رڻي شيوا ڪرھ، تم هُون پِڳوونَ رڻي ڪُشي
رڻي ڪبر هَمپِڙايا ٿي پِڳوونَ رڻي شيوا ڪرونھ، زم ماري شيوا ري ڪري ڌاري
قُوم واڙا پَوِتر آتما ري ڪڙا ٿي پَوِتر ٿين آڀ نٺَ پِڳوونَ ري شيوا هَارُو ڏٺ،
ان پِڳوونَ اُونون نٺَ قُبول ڪرھ.

⑰ تيام هُون ايسُو ڪريست رو شيواڌاري ٿين ماري پِڳوونَ ري هايا شيوا
را پارام ڪُشي ٿي هَمپِڙاوونھ. ⑱ هُون آڀرڻي وڌائي ڪرين ام نئين ڪون جي
مٿين ڪيو ڪوم ڪراياھ، ڪم تو مٿين آڀري طاقت ٿي ڪئين نٿي ڪريو. پڻ
هُون پُوري هيمنت ٿي ايٺا وات را پارام هَمپِڙاوونھ جي ايسُو ڪريست مُون ٿي
ڪيو ڪوم ڪراياھ، زم ڌاري قُوم واڙا پِڳوونَ رڻي وات مونٺه. ايسُو ڪريست
مُون نٺَ ايوي پُليا رڻي ان ڪوم ڪريا رڻي هيمنت ڏيڏيھ ⑲ جي مٿين پِڳوونَ
ري ڪڙا ٿي منڪون نٺَ هاڙا هُورا ڪريا ٿي پرسا ڏيڪاڙين پَوِتر آتما ري ڪڙا
ٿي اتو ڪوم ڪريوھ، جي يروشلم شهر ٿي اِلرُڪم صُوپا هُودِي زاتون زاتون
شيرڙا مانھ ٻڌون ملڪون ۾ ايسُو ڪريست را پارام ڪُشي رڻي ڪبر پُورٺه نمونٺه
هَمپِڙاويھ. ⑳ هيونٺه نمونٺه مٿين گهٽا شونق ٿي ڪوشش ڪريھ جي هُون هائي
ڪُشي رڻي ڪبر اُوٺه هَمپِڙاوون، جيئنه اڳي ايسُو ڪريست را پارام ڪيئنه ڪئين

نتو همپڙايو، زم هُون پيزون را ڪرل ڪوم رو ڦاڻيڏو نه ليون. ②1 تيام هُون ايسُو را پارام اوتنه همپڙايا هارُو گپوه، جيئنه اڳي ڪيئنه ئي نتو همپڙايو، زم شاستر رئي اي وات پوريئي ٿنه جي
 ”جيون ننه اوتنا را پارام ڪيئنه نه همپڙايو، اُو ڏيڪشي.
 ان جيئي نه هومپڙيو، اُو هزمشي.“

پولوس همپڙاوتنه جي اوتنه روم شهر ۾ آيا را پارام ڦينصلو ڪريوه

②2 تيام مارنه هائي ڪوم ڪريا ري ڪري هُون گهڻي وار تمون ڪن آيا روڪائي گپو. ②3 پڻ هوننه هايون علاقون ۾ ڪوئي ايوئي جڳا نقي رئي جيئنه مارنه ايسُو را پارام همپڙايا رئي ضرورت سئنه. ان گهڻون سالون ٿي مون ننه اي سڪ سئنه جي هُون تمون ڪن آون. ②4 تيام مارو ڪيال سئنه جي زئيون هُون اسپين ملڪ زائيه، تنيون هُون تمون ٿي مڙيا هارُو تمون ڪن ٿيتو زائيه. مارئي اميد سئنه جي هُون توڙيڪ وار تمون پيزو رين ڪش ٿيون، ان پسئنه تيا ڪيڙ تماري ڪرل مدت ٿي هُون آڳڙ اسپين زائون.

②5 پڻ همئنه هُون يروشلم شهر موئين زائونه ريو، زم جيا امداد را پئيه اوت رون وشواسيون هارُو مارنه حواله ڪرل سئنه، اُو پئيه هُون اوتون ننه ڏيون. ②6 ڪم تو مڪڏنيه ان يونان صوپون ري وشواسيئي اي ڦينصلو ڪريو تو جي اُو يروشلم شهر رون پڳوون رون سونڊل منڪون موئين ٿي گريهون ننه امداد ڏنه. ②7 هائي ڌاري قوم واري آپري مرضي ٿي يهوديون رئي مدت ڪريا رو ڦينصلو ڪريو. پڻ اوتون مانه يهوديون رئي مدت ڪريا رو قرض پڻ سئنه. ڪم تو زتي واتون پڳوون يهودي قوم رون منڪون ننه آپ را پارام شيڪاڙي تي ان زتو آشيرواد اوتون ننه ڏيڏو تو، اُو ٻڌوئي ڪئين يهودي قوم رون وشواسيون ري ڪري ڌاري قوم واڙون ننه پڻ زڙيوه. تيام ڌاري قومون رون وشواسيون رو اي قرض سئنه جي جئين پڻ پڳوون اوتون ننه ايئا

دُنيا ۾ ڏيڻو، اُوئون شينهنون موئين ٿي اُو يهوديون رُئي مڌت ڪرڻ. (28) تيام هُون هائي ڪوم پُورو ڪريه، ان ڌاري قُوم واڙون رڻه اِمڌاڌا ڏيڻا ٿي يهودي قُوم رون وشواسيون نڻه ٿا پڻي ڏيه جي ڌاري قُوم واڙا پڪو وشواس راکڻه. (29) ان پسنه تيا ڪيڙ هُون تمون ڪن ٿين اِسپين ملڪ زائيه. مُون نڻه ڪهر سڻه جي زئون هُون تمون ڪن آويه، تئين آيون نڻه ايسو ڪريست ٿي ٻڌائي آشيرواڏ زڙشي.

(30) هُوڻه، پايون ان بينون، آڀنا پريو ايسو ڪريست ٿي واسطو راکيا ري ڪري ان پويتر آتما را ڏيڏل پريم ري ڪري، هُون تمون نڻه منڌ ڪرونه جي تمي مُون پيڙا پورا من ٿي مُون هارو پگهون ٿي پراڻا ڪرتا ريو. (31) اي پراڻا ڪرو جي زئون هُون يهوديه صُوپا را يروشلم شهر ۾ زائون، تو هُون اُوڻا صُوپا رون يهوديون ٿي پڇي زائون، جيا پگهون رُئي وات نه مونين ايسو مانه وشواس نٿي راکتا. ان اي پڻ پراڻا ڪرو جي يروشلم شهر ۾ جيا يهودي قُوم را وشواسي سڻه، اُو اي ڌاري قُوم واڙون رُئي ڏيڏل اِمڌاڌا قهول ڪرڻه، جڻي هُون اُوئون نڻه ڏيو زائونه ريو. (32) هيون نڻه جي پگهون رُئي مرضي هون ان ٻڌي واتون همريم ٿڻه، تو هُون ڪش ٿين تمون ڪن آوون، ان توڙيڪ وار تمون پيڙو هڪ ۾ ريه.

(33) هُوڻه پگهون جيو هڪ ڏيڏا. واڙو سڻه، اُو تمون ٻڌون پيڙو هون. آمين.

پولوس روم شهر رون وشواسيون نڻه نمسڪار ڪڻه

16 (1) هُون تمون نڻه آڀني وشواسي بين فيبي رُئي پارت ڪرونه، جڻي ڪنخريه شهر ري وشواسي منڌري رُئي شيواڌاري سڻه، (2) جي تمي ايڻا نڻه پريو ايسو ري ڪري ڪشي ٿي ملو، زم پگهون رون سونڊل منڪون رڻه ڪرو ڪپڻه، ان ايڻا نڻه جيا رُئي پڻ ضرورت هون، تمي ايڻا رُئي مڌت ڪريا، ڪم تو ايڻه آپ گهڻون منڪون رُئي مڌت ڪريه ان مارئي پڻ مڌت ڪريه.

③ مارا طرُق ٿِي ٻائي پُرسڪِلِه ان اُوئا را آڏمي اڪولِه نئِه نمسڪار ڪيا، جيا ايسُو ڪريست ري شيوا ۾ مارا زم ڪوم ڪرئِه ان اڳي مُون پيڙا ڪوم ڪرتا. ④ هاڻي مارو جيو پڇايا هارُو آڀرو جيو ڪترام نوڪيو تو، ان ايئا وات ري ڪري نه رُوڳو هُون هاڻي رو ٿورو مونونِه، پڻ ڌاريون قُومون ري ٻڌي وشواسي منڌڙي هاڻي رو ٿورو مونئِه. ⑤ ان جئي وشواسي منڌڙي هاڻي ري گهري پيڙي ٿئِه، اُوئا رُون منڪون نئِه پڻ نمسڪار ڪيا.

مارا پريمي ٻائي اڀيئس نئِه نمسڪار ڪيا، جيو آسيه صُوپا رو پيرهيُون منڪ سئِه جيئِه ايسُو ڪريست مانِه وشواس اوٿيو. ⑥ ٻائي مريم نئِه نمسڪار ڪيا، جيئِه تمون هارُو الاهي گهڻي مينت ڪريئِه. ⑦ اندر ٿيڪس ان يُونياس نئِه نمسڪار ڪيا. اُو ماري آڀري يهودي قُوم را سئِه، ان مُون پيڙا قيڌي هتا. اُو مُڪ شيلون ۾ مشور سئِه، ان مُون ٿِي پڻ مور ايسُو ڪريست مانِه وشواس اوٿيو. ⑧ امپلياٽس نئِه نمسڪار ڪيا، جيو پريُو ايسُو ٿِي واسطو راکيا ري ڪري مارو پريمي ٻائي سئِه. ⑨ اُربانس نئِه نمسڪار ڪيا، جيو امارا زم ايسُو ڪريست رئي شيوا ڪرئِه، ان مارا پريمي ٻائي استخس نئِه پڻ نمسڪار ڪيا. ⑩ اڀليس نئِه نمسڪار ڪيا، جيئِه ايسُو ڪريست ري ڪري ڏوروڻ سهين ٿاڻي ڏيڏيئِه جي اُو پڪو وشواس راکئِه. ارسٽوبولس رُون گهر واڙون نئِه نمسڪار ڪيا. ⑪ هيروديون نئِه نمسڪار ڪيا، جيو مارو يهودي ٻائي سئِه. جيا نرڪس ري اڪائي را منڪ پريُو ايسُو مانِه وشواس راکئِه، اُوئون نئِه نمسڪار ڪيا. ⑫ ٻائي تروفينه ان ٻائي تروفوسه نئِه نمسڪار ڪيا، جي پريُو ايسُو ري شيوا ۾ مينت ڪرئِه. ماري پريمي وشواسي پين پريس نئِه نمسڪار ڪيا، جيئِه پريُو ايسُو ري شيوا ۾ گهڻي مينت ڪريئِه. ⑬ روفس نئِه نمسڪار ڪيا، جيو پريُو ايسُو رو سونڊل منڪ سئِه، ان اُوئا ري مان نئِه پڻ نمسڪار ڪيا، جئي مُون هارُو مان را زم سئِه. ⑭ اسڪرٽس، فلگون، هرميس، پترباس، هرماس، ان اُوئون پيڙا جيا پيڙا وشواسي ٻائي ان پنون سئِه، اُوئون ٻڌون نئِه نمسڪار ڪيا. ⑮ فلگس

ان ٻائي يُوليه نئه، نيريُوس ان اُوئا ري پين نئه، ان اَلَمپاس ان اُوئا پيڙا پڳوونَ رُون ٻڌون سُونڍل منڪون نئه نمسڪار ڪيا.

①6 ٽمي هڪا پيڙا ٿي پَوِتر نمونئه پريم ٿي ملو. ايسو ڪريست ري ٻڌي وشواسي منڌڙي تمون نئه نمسڪار ڪئھ ري.

اڪري واتون

①7 هَوئه، پايون ان پينون، هُون تمون ٿي منٿ ڪرونه، جي ٽمي اُوئون منڪون را پارام هوشيار ريو، جيا ايوي ڪوڙي واتون شيڪاڙئھ جي تمارئه شيڪل وشواس ريون هاسيون واتون رئه ڪلاڦ سئه. هيونئه نمونئه اُو منڪون نئه پُولوين هڪا پيڙا ٿي ڌار ڪرئھ ان اُوئون نئه ڏوھ ۾ پاڙئھ. هايون ٿي شيتي ريو. ①8 ڪم تو هيو منڪ اپئا پريو ايسو ڪريست رئي شيوا نئي ڪرتا، پڻ رُوگو آڀرا پيٽ هارو ڪرئھ. اُو نائوڪي نائوڪي واتون ڪرين اُوئون منڪون ٿي لڳئي ڪرئھ، جيون را من صاف سئه ان لڳي واڙي واتون نئي اوڙڪتا. ①9 هايون ٿي شيتي ريو، ڪم تو ٻڌون منڪون نئه ڪهر سئه جي ٽمي پڳوون رئي وات مونين ايسو مانھ وشواس راڪوه. تيام هُون تمون ٿي گهڻو ڪش سون. پڻ مارئي مرضئي اي سئه جي ٽمي نائوڪيون واتون مانھ هوشيار ٿي وو، پڻ ڪراپ واتون را پارام ڪئين مت شيڪو ان اُوئون مانھ ماڳي مت وو. ②0 زم منڪ هاپ نئه ڦيهلين مارئھ پرو، تم پڳوون، جيو هپ رکايا واڙو سئه، اپئا ڏشمڻ شيطون نئه جلدِي ۾ ڪتم ڪرشي پرو، ان اُوئا مانھ تمارئي جيت ٿيشي.

آپئو پريو ايسو ڪريست تمون مانھ ڪرپا ڪرئھ!

②1 تيمٽيس جيو مون پيڙو پڳوون رئي شيوا ڪرئھ، ان مارا يهودي پاڻي لُوڪيس، ياسون ان سوسِطرس تمون نئه نمسڪار ڪئھ.

②2 هُون تريتيس، جيا ٿي پولوس اي ڪت لڪايوه، مارا طرف ٿي تمون وشواسي پايون ان پينون نئه نمسڪار ڪونه.

②③ گايُس تمون نئه نمسڪار ڪئھ، جيا ري گھري ھون پولوس ميزمون سون، ان جيو وشواسي منڌڙي رون ٻڌون منڪون نئه هميش ڪشي ٿي آپري گھري اوڪار ڏئھ.

اراستس تمون نئه نمسڪار ڪئھ، جيو ايتئھ شھر رو ڪزونچي سئھ، ان پاڻي ڪوئارٽس پڻ تمون نئه نمسڪار ڪئھ.

②④ (آپتو پريو ايسو ڪريست تمون مانھ ڪرپا ڪرئھ! آمين.)

پولوس پڳوون را وڪون ڪرئھ

②⑤ پڳوون را وڪون ٿئھ! او آپري ڪڙا ٿي تمون نئه وشواس ۾ پڪا ڪري هيڪئھ. او نه رُوگو يھودي قوم واڙون نئھ، پڻ ڌاري قوم واڙون نئھ پڻ، ايسو مانھ وشواس را ڪيا ري ڪري ماڻهي ڏين تارڻ ڏيشي. اي وات ايسو ڪريست را پارام ڪشي ري ڪبر پرموئئھ سئھ، جيئي ھون ٻڌون منڪون نئه هميڙا وئھ. اي اونڌي وات پڳوون جڳت نايا ٿي لين هٿاڙين را ڪئي ٿي، پڻ همئئھ پڳوون اي وات ساوئي ڪريئھ. ②⑥ جي واتون پڳوون رو نياپو ڏيڏا واري شاستر ۾ مور ٿي لڪي ٿي جي ام ٿيشي، او واتون همئئھ ايسو ري ڪري پوري ٿيھ ان شاستر ٿي ساوئھ نمونئھ هزميام اوئھ. پڳوون جيو شروع ٿي لين هميش هوڏي سئھ، اوئا را حڪم پرموئئھ هيا وات رئي ڪبر پڙئيھ، زم ٻڌيون قومون را منڪ پڳوون رئي وات مونين ايسو مانھ وشواس اوئھ. ②⑦ پڳوون، جيو هيڪئھ عقل واڙو سئھ، اوئا را وڪون ايسو ڪريست ري ڪري هميش هوڏي ٿيئا رئھ! آمين.

کُرنٽيون را نوم مانھ لکل پيرھيان کت رئي ھزموئي

کت لکيا واڙو

اي کت پولوس لکيو، ان کت لکيا رٺ توتھ سوستنيس اوتھ پيرو ھتو (1 کُرنٽيون 1:1). پولوس اي کت آيرا ترٺما چکر مانھ لکيو، زئيون او کُرنٽس شھر موئين ايسو را پارام ھمپايا ھارو گيو تو (مک شيلون را کوم 18:1-18)، ان پسٺ افسس شھر موئين گيو (مک شيلون را کوم 19:1-20:1). پولوس اي کت افسس شھر ۾ اندازام 55ع ۾ سال را شروع ۾ کيو (1 کُرنٽيون 8:16).

کت کيون منکون ھارو لکيو

پولوس اي کت کُرنٽس شھر رون وشواسي منکون ھارو لکيو (1 کُرنٽيون 2:1). کُرنٽس شھر رون منکون نٺ کُرنٽي کيتا. کُرنٽس يونان ملڪ رو زونو شھر ھتو، جيا نٺ رومي قوج آرين يونگيوت پرو ان پسٺ ھو سالون کيڙ روم رون قوجيون ان منکون ھارو وڙي نايو. رومي حڪومت يونان ملڪ نٺ آبرو ھيڪ صوبو نايو. کُرنٽس شھر واپار ڪريا ھارو نائوڪي جگا مانھ ھتو ان يونان صوبا رو ٻڌون ٿي موتو شھر ھتو. اوتھ روميون پيرا گھڻا يوناني قوم را منک ان ڪيٺيڪ يھودي قوم را منک پڻ ريتا. کُرنٽس شھر يونڊا کوم ۾ مشور ھتو. ان اوتھ ھيڪ افروڊيتي نومي ڏيو رو منڊر ھتو، جيٽھ منک ڏيو رئي پوزا ڪريا ۾ پوندو کوم ڪرتا. زئيون پولوس اوتھ ايسو را پارام ھمپايو، تئيون گھڻا منک وشواسي ٿيا (مک شيلون را کوم 8:18).

کت لکيا رو مطلب

پولوس اي کت لکيو ڪم تو اوتھ ھومپزيو جي کُرنٽس ري وشواسي منڊري ۾ گھڻي پالتي ٿي گيھ ان پوندو کوم پڻ ٿئھ ريو. اوت ري وشواسيئي پولوس نٺ کت پڻ لکيو تو، ان پولوس اوئون رون لکل سوائلون را جواب ڏيو ڪرتو تو. تيار اوتھ اي کت لکيو زم اوت را وشواسي منک پالتي رو کيال ساڌڻ ان روگو ايسو مانھ پروسو راکٺ، پوندو کوم ساڌڻ ان پوندو کوم ڪريا واڙون نٺ نات پارا ڪرڻ، ڏيو ڏيوئونون رئي پوزا ساڌڻ، ان وشواسي منڊري ۾ پريم ان ھپ ٿي پگيئي ڪرڻ. آکر ۾ پولوس اوئون نٺ جيوي اوني را پارام شيڪارڙھ ان بروشلر شھر رون وشواسيون ھارو امداد ڏيندا را پارام ڪئھ.

ايئا كِتاب را شاستر تي بيزا حوالا:

1 کُرنِتيون 1:1 کوم 19-1:9	1 کُرنِتيون 11-10:7 . مِتي 9-3:19
1 کُرنِتيون 14:1 کوم 8:18	1 کُرنِتيون 11-10:7 . مرقس 12-2:10
1 کُرنِتيون 14:1 رُوميون 23:16	1 کُرنِتيون 11-10:7 . لُوقا 18:16
1 کُرنِتيون 16:1 1 کُرنِتيون 18-15:16	1 کُرنِتيون 1:9 کوم 6-3:9, 15
1 کُرنِتيون 17:1 کوم 15:9	1 کُرنِتيون 1:9 کوم 8-1:18
1 کُرنِتيون 19:1 يسعياه 14:29	1 کُرنِتيون 9:9 اِستِشنا 4:25
1 کُرنِتيون 31:1 یرمياہ 24:9	1 کُرنِتيون 13:9 اخبار 36-28:7
1 کُرنِتيون 1:2 کوم 18-1:18	1 کُرنِتيون 13:9 گِنتي 19-8:18
1 کُرنِتيون 9:2 يسعياه 4:64	1 کُرنِتيون 14:9 مِتي 10:10
1 کُرنِتيون 16:2 يسعياه 13:40	1 کُرنِتيون 14:9 لُوقا 7:10
1 کُرنِتيون 6:3 کوم 18-1:18	1 کُرنِتيون 21:9 يُوحنّا 34:13
1 کُرنِتيون 6:3 کوم 18-27:19	1 کُرنِتيون 1:10 خُروج 22-21:13
1 کُرنِتيون 19:3 اَيُوب 13:5	1 کُرنِتيون 1:10 گِنتي 23-15:9
1 کُرنِتيون 20:3 زبور 11:94	1 کُرنِتيون 1:10 خُروج 29-21:14
1 کُرنِتيون 17:4 کوم 3-1:16	1 کُرنِتيون 2:10 خُروج 31:14
1 کُرنِتيون 17:4 کوم 5:18	1 کُرنِتيون 3:10 خُروج 35-2:16
1 کُرنِتيون 17:4 کوم 22:19	1 کُرنِتيون 4:10 خُروج 7-1:17
1 کُرنِتيون 1:5 اخبار 8:18	1 کُرنِتيون 4:10 گِنتي 11-2:20
1 کُرنِتيون 1:5 اِستِشنا 30:22	1 کُرنِتيون 4:10 يُوحنّا 14:4
1 کُرنِتيون 1:5 اِستِشنا 20:27	1 کُرنِتيون 5:10 گِنتي 35-28:14
1 کُرنِتيون 7:5 يسعياه 7:53	1 کُرنِتيون 7:10 خُروج 6:32
1 کُرنِتيون 8-7:5 خُروج 20-1:12	1 کُرنِتيون 8:10 گِنتي 9-1:25
1 کُرنِتيون 13:5 اِستِشنا 7:17	1 کُرنِتيون 9:10 گِنتي 6-4:21
1 کُرنِتيون 13:5 اِستِشنا 19:19	1 کُرنِتيون 10:10 گِنتي 49-41:16
1 کُرنِتيون 13:5 اِستِشنا 21:21	1 کُرنِتيون 16:10 مِتي 28-26:26
1 کُرنِتيون 13:5 اِستِشنا 21:22	1 کُرنِتيون 16:10 مرقس 24-22:14
1 کُرنِتيون 13:5 اِستِشنا 24:22	1 کُرنِتيون 16:10 لُوقا 20-19:22
1 کُرنِتيون 13:5 اِستِشنا 7:24	1 کُرنِتيون 18:10 اِستِشنا 27:12
1 کُرنِتيون 16:6 پيدائش 24:2	1 کُرنِتيون 20:10 اِستِشنا 17-16:32
1 کُرنِتيون 11-10:7 . مِتي 32:5	1 کُرنِتيون 26:10 زبور 1:24

1 کُرنِتيون 7:15 کوم 9-4:1	1 کُرنِتيون 7:11 پيدائش 27:1
1 کُرنِتيون 8:15 کوم 6-3:9	1 کُرنِتيون 8:11 پيدائش 22:2
1 کُرنِتيون 9:15 کوم 3:8	1 کُرنِتيون 9:11 پيدائش 18:2
1 کُرنِتيون 9:15 کوم 2-1:9	1 کُرنِتيون 25-23:11 مٽي 28-26:26
1 کُرنِتيون 21:15 پيدائش 19-17:3	1 کُرنِتيون 25-23:11 مرقس 24-22:14
1 کُرنِتيون 25:15 زبور 1:110	1 کُرنِتيون 25-23:11 لُوقا 20-19:2
1 کُرنِتيون 27:15 زبور 6:8	1 کُرنِتيون 21:14 يسعياہ 12-11:28
1 کُرنِتيون 32:15 کوم 1:20-23:19	1 کُرنِتيون 3:15 يسعياہ 12-1:53
1 کُرنِتيون 32:15 کوم 19-17:20	1 کُرنِتيون 3:15 مٽي 50:27
1 کُرنِتيون 32:15 يسعياہ 13:22	1 کُرنِتيون 3:15 مرقس 37:15
1 کُرنِتيون 45:15 پيدائش 7:2	1 کُرنِتيون 3:15 لُوقا 46:23
1 کُرنِتيون 54:15 يسعياہ 8:25	1 کُرنِتيون 3:15 يوحنا 30:19
1 کُرنِتيون 55:15 هوسيع 14:13	1 کُرنِتيون 4:15 زبور 11-10:16
1 کُرنِتيون 7-5:16 کوم 3-1:20	1 کُرنِتيون 4:15 مٽي 7:28-57:27
1 کُرنِتيون 8:16 کوم 1:20-1:19	1 کُرنِتيون 4:15 مرقس 8:16-42:15
1 کُرنِتيون 10:16 1 کُرنِتيون 17:4	1 کُرنِتيون 4:15 لُوقا 12:24-50:23
1 کُرنِتيون 12:16 کوم 1:19-24:18	1 کُرنِتيون 4:15 يوحنا 9:20-38:19
1 کُرنِتيون 15:16, 17 1 کُرنِتيون 16:1	1 کُرنِتيون 5:15 لُوقا 34:24
1 کُرنِتيون 19:16 کوم 3-1:18	1 کُرنِتيون 5:15 لُوقا 43-36:24
1 کُرنِتيون 19:16 کوم 26, 19:18	1 کُرنِتيون 5:15 يوحنا 23-19:20
	1 کُرنِتيون 7:15 لُوقا 51-44:24

ڪُرنٿيون

را نوم مانھ پولوس رو لكل

پيرھيون ڪت



1 ① هُون لکيا وازو پولوس سون، جيا ننه پڳوون آپري مرضي پرموئنه ايسو ڪريست رو هيڪ مڪ شيلو سونديوھ. اي ڪت مارا پاھا ٿي ان آڻا وشواسي پاڻي سوسٽنيس را پاھا ٿي لكل سئھ.

2 ② ڪُرنٿس شهر ري پڳوون ري وشواسي منڌري رون پريمي پايون ان بينون، تمي جيا ايسو ڪريست ٿي واسطو راڪيا ٿي پڳوون را سونديل منڪ ٿياھ. پڳوون تمارو آپ ٿي واسطو راڪيوھ زم تمي اوئون ٻڌون پيڙا اوئا را سونديل منڪ ٿيو، جيا هر جڳا آڻا پريو ايسو ڪريست رو نوم لئھ، جيو اوئون رو ان آڻو پڻ پريو سئھ.

③ آڻڻو ٻاپ پڳوون ان پريو ايسو ڪريست تمون مانھ ڪرپا ڪرڻ ان تمون
نڻھ هڪي راکڻه!

ٻولوس ڪرنڻس شهر رون وشواسيون هارو پڳوون رو ٿورو مونڻه

④ هون هميش تمون هارو پڳوون رو ٿورو مونڻو ريونھ، ڪم تو اوڻھ تمارڻھ
ايسو ڪريست ٿي واسطو راکيا ٿي تمون مانھ ڪرپا ڪريڻھ. ⑤ ڪم تو ايسو
ٿي واسطو راکيا ري ڪري تمي هر وات ۾ گھڻا پاڳواڙا ٿياھ، ان تمون نڻھ ٻڌي
واتون شيڪاڙيا رڻي ان هزميا رڻي هيئت زڙڻيھ، ⑥ ڪم تو تمي ايسو ڪريست
را پارام هاک پرل واتون مونيه ان تمارو وشواس پڪو ٿيوھ. ⑦ تيام تمون نڻھ
پڳوون رڻي ڏيڏل هر نمونا رڻي ڪڙا زڙڻيھ، ان تمي اوڻا توڻا رڻي وات ڪشي ٿي
زوڻوھ، زئيون آڻڻو پريو ايسو ڪريست وڙي پاسو آوين ساوو ٿيشي. ⑧ ايسو
آپ تمون نڻھ هيئت ڏيشي جيا ٿي تمي حياتي ري پڇاڙي هوڏي پڪو وشواس
راڪشو، ان آڻڻا پريو ايسو ڪريست را آيا رڻھ ڏي تمون مانھ ڪيا وات رو الزوم
نئين لاڳڻھ. ⑨ پڳوون آڻڻا وائڏا رو هاسو سڻھ. اوڻھ تمارو آپ ٿي تيام واسطو
رکايوھ زم تمي اوڻا را ڏيڪرا آڻڻا پريو ايسو ڪريست پيڙا ٿين هپ ۾ ريو، ان
او آڻڻو مقصد ضرور پورو ڪري.


وشواسي منڌري ۾ جهيڙو جهڳڙو ڪروو پڻ هيڪ من ٿين ريوو

⑩ هوڻھ، پايون ان پينون، هون تمون ٿي آڻڻا پريو ايسو ڪريست مانھ وشواس
راڪيا ري ڪري منڌ ڪرونھ جي تمي هيڪي وات مانھ وو ان ڌار پالتي مت
ناوو. تمي ٻڌائي پيڙا ٿين هيڪ من ٿين ريو ان آڻڻ ۾ هپ راکو. ⑪ ڪم تو،
مارون پريمي پايون ان پينون، ٻائي خلوئي را گهر ري منڪي مون نڻھ ساوڻھ
نمونڻھ همپڙايوھ جي تمون موئين جهيڙا جهڳڙا ٿئھ ريا. ⑫ مارو ڪيڏا رو مطلب

اي سٺه جي ٽمي هر هيڪ آپ نٿه ڌار ڌار پالڻي را ڪوه. ڪوڪ ام ڪٺه جي ”هون پولوس ري پالڻي رو سون،“ ڪوڪ ام ڪٺه جي ”هون تو اڀلوس ري پالڻي رو سون،“ ڪوڪ ام ڪٺه جي ”هون پطرس ري پالڻي رو سون،“ ان ڪوڪ ام پڻ ڪٺه جي ”هون ايسو ڪريست ري پالڻي رو سون.“⁽¹³⁾ هائي ٽمي ڪي ڪروه ريا؟ ايسو ڪريست پوري وشواسي منڌري رو نٿي، ڪي؟ رُوگو هيڪي پالڻي رو سٺه، ڪي؟ ان هون پولوس تمون نٿه تارڻ ڏيڏا هارو هوري مانه مريوه، ڪي؟ ڪا ٽمي مارا شيلا ٿيا هارو پويتر سنون ليڏو، ڪي؟

⁽¹⁴⁾ هون ايٺا وات ري ڪري پڳوون رو ٿورو مونونه جي ڪرسپس ان گائيس شوا مٿين تمون موٽين ٿي ڪيا نٿه پڻ پويتر سنون نٿو ڏيڏو.⁽¹⁵⁾ تيام تمون موٽين ٿي ڪوئي ڪي نٿي هيڪتو جي مٿين تمون نٿه آڀرا شيلا نايا هارو پويتر سنون ڏيڏوه.⁽¹⁶⁾ هوٽه، مٿين ستفناس ري اڪائي نٿه پڻ پويتر سنون ڏيڏو تو، پڻ مارا زويام مٿين هايون شوا پيزا ڪيا نٿه پڻ پويتر سنون نٿي ڏيڏو.⁽¹⁷⁾ ڪم تو ايسو ڪريست مون نٿه پويتر سنون ڏيڏا هارو نٿين، پڻ ايسو را پارام ڪشي رئي ڪهر همپزيا هارو مڪ شيلو ناوين ميليوه. مارو ڪوم اي نٿي جي هون آڀري عقل پرموٽه ايوي واتون ڪرون جي منڪون نٿه ناٿوڪي لاڳهه. پڻ مارو ڪوم اي سٺه جي هون ساوٽه نمونته ايسو رٿه هوري مانه مريا را پارام همپزاوون، متون ايسو رٿه هوري مانه مريا ٿي ڪئين قائيڏو نه ٿه.

آڀري عقل ان طاقت مانه نٿين، پڻ پريو ايسو مانه پروسو راڪو



⁽¹⁸⁾ ايسو رٿه هوري مانه مريا رئي وات، اوئون منڪون نٿه عقل ووٽي وات لاڳهه جيا هميش رئي سزا کاڌا واڙا سٺه. پڻ آڀي جيا تارڻ ليڏا واڙا سون، آڀون ڪن هيا ٿي پڳوون رئي طاقت ساوئي ٿه.⁽¹⁹⁾ ڪم تو شاستر ۾ پڳوون رئي اي وات لڪل سٺه:

”هُن اي وات ساوئي ڏيکارڻ،

جيون نٿه منڪ عقل وازا ڪن، اُوئون ۾ ڪئين عقل نٿي،

ان جيون نٿه منڪ هُرمو ڪن، اُوئون ۾ ڪئين هُرم نٿي.“

②0 پڳوون ري نظر ۾ عقل وازو منڪ ڪي سٺ؟ پٺل منڪ ڪي سٺ؟ ڏنيا ۾ جيا منڪ نائوڪي نائوڪي تقريرون ڪرڻ، اُو پڳوون ري نظر ۾ ڪي سٺ؟ اُو تو ڪئين نٿي. پڳوون وات ساوئي ڏيکارڻ جي ڏنيا رُون منڪون رُئي جئي عقل سٺ، اُو ڪئين نٿي.

②1 ڪم تو پڳوون آپري عقل پرموڻه ام ڪريو، جي ڏنيا را منڪ اُوئون ري آپري عقل ٿي پڳوون نٿه نه اوڙڪي هيڪڻه. تيام پڳوون آپري مرضي ٿي اي ڦينصلو ڪريو جي اُو ايسو را پارام نياپو ڏيڏا ٿي، جيو ڏنيا رُون منڪون نٿه عقل ووڻو لاڳڻه، اُوئون منڪون نٿه تارڻ ڏيشي جيا نياپو مونين ايسو مانه وشواس راکڻه. ②2 يهودي قوم وازا ٿايتي هارو پرسا زووا ڪرڻ، ان ڌاري قوم وازا ايوي واتون هومپروا ڪرڻ جي اُوئون ري عقل پرموڻه اُوئون نٿه صحيح لاڳڻه. ②3 پڻ امي منڪون نٿه اي همپرواونه جي پڳوون رو سونڊل پڇايا وازو ايسو ڪريست هُوري مانه مريو. اي وات يهوديون نٿه ايوي ڪراپ لاڳڻه جي هايا ري ڪري اُو اوڙڪي نٿي هيڪڻا جي اي وات هاسئي سٺ، ان ڌاري قوم وازون نٿه اي وات عقل ووڻي لاڳڻه. ②4 پڻ اُو منڪ جيون رو پڳوون آپ ٿي واسطو رکايوه، اُو پلڻه يهودي قوم را هوڻه ڪا ڌاري قوم را، اُوئون ڪن پڳوون را سونڊل پڇايا وازا ايسو ڪريست رڻه هُوري مانه مريا ٿي پڳوون رُئي طاقت ان پڳوون رُئي عقل ساوئي ٿه. ②5 ڪم تو پڳوون رو هائي ڪوم جيو منڪون را هُرميام عقل وڳر ڪرل سٺ، اُو ڪوم پڳوون ايوي عقل ٿي ڪريوه، جئي منڪون ري عقل ٿي الاهي گهڻي وڌارڻه سٺ. ان پڳوون رو هائي ڪوم جيو منڪون را هُرميام ڪمزوري ٿي ڪرل سٺ، اُو ڪوم پڳوون ايوي طاقت ٿي ڪريوه، جئي منڪون ري طاقت ٿي الاهي گهڻي

وڌارڻه سٺه.

②6 پايون ان پينون، تمهي ياد ڪرو! زئيون ڀڳوون تمارو آپ ٿي واسطو رکايوه، اونه توتنه تمهي ڪيوا هتا؟ منڪون ري نظر ۾ تمون موئين ٿي گهڻا منڪ عقل واڙا نٿا، گهڻا طاقت واڙا نٿا، گهڻا اونچي اڪائي را نٿا. ②7 پڻ ڀڳوون اوتون منڪون ننه آپ ٿي واسطو راکيا هارو سونديا، جيا دنيا ري نظر ۾ عقل وٺا سٺه، زم عقل واڙون ننه لازي مارڻه. ان ڀڳوون اوتون منڪون ننه سونديا، جيا دنيا ري نظر ۾ ڪمزور سٺه، زم طاقت واڙون ننه لازي مارڻه. ②8 ان ڀڳوون اوتون منڪون ننه سونديا، جيا دنيا ري نظر ۾ نيچ سٺه ان جيون ننه منڪ گهٽ هڙمڻه، جيون ننه منڪ ڪئين نٿي هڙمڻا، زم وات ساوئي ٿنه جي جيا ننه دنيا موتو هڙمڻه، او ڀڳوون ري نظر ۾ ڪئين نٿي. ②9 تيام ڪوئي پڻ منڪ ڀڳوون هومو وڏائي نٿي ڪري هيڪتو. ③0 هوڻه ڀڳوون تمارو ايسو ڪريست ٿي واسطو رکايوه، جيئنه ڀڳوون را طرف ٿي آوين آپون ڪن ڀڳوون رڻي عقل ساوئي ڪرڻي. پريو ايسو آپون ننه ڀڳوون ري وات مانھ ويوراوڻه، آپون ننه پويتر ڪرڻه، ان آپون ننه ڏوهون را قوضا ٿي آزاد ڪراوڻه. ③1 تيام، زم شاستر ۾ لڪل سٺه:

”آپرئي وڏائي مت ڪرو،
پڻ پريو را وڪوڻ ڪرو.“

بتون ٿي موٽئي وات اي سٺ

ايسو ڪريست آپون ننه ڀڄايا هارو هوڙي مانھ مريوه

2 ① تيام، پايون ان پينون، زئيون هون تمون ڪن آيو تو، تئيون مئين آوين موتون موتون ويئون ان آپري عقل ٿي ڏوري ڏوري واتون نٿي ڪري، پڻ تمون ننه ساوڻه نموننه ڀڳوون رڻي اونڌي وات همپزاوئي ٿي. ② ڪم تو مئين ڦينصلو ڪريو تو جي هون تمون ننه روڳي هيڪي وات را پارام همپزاوون، ايسو

ڪريست را پارام ان کاس ڪرين اُوتا را هُوري مانه مريا را پارام. ③ زئيون هُون تمون ڪن آيو، تئيون مئين سوچيو جي مُون ۾ اي ڪوم ڪريا رئي هيئت نئي، ان مُون ننه اي پيڪ هئي جي پڳوون رو اي ڪيڏل ڪوم ڪم ڪرين پورو ڪرون. ④ ان زئيون مئين تمون ننه پڳوون رو وچن هميڙايو، تئيون مئين آبرئي وات منايا هارو آبري عقل ٿي نائوڪي نائوڪي واتون نه ڪري، پڻ پويتر آتما ري ڪڙا ٿي تمون ننه پڪئي ڪاترئي ٿي جي ماري ڪيڏل واتون هاسي سئ. ⑤ مئين هم ڪريو زم تمي منڪون ري عقل ري ڪري نئين، پڻ پڳوون ري ڪڙا ري ڪري وشواس راکو.

پڳوون آبري عقل رئي اُونڌي وات پويتر آتما ٿي ساوئي ڪريه

⑥ توئي پڻ امي اوئون منڪون ڪن عقل واري واتون ڪرونه، جيا پڪو وشواس راکئھ. پڻ اي عقل ايٺا ڏنيا رئي عقل نئي ان نڪو ايٺا ڏنيا رون آڳيونون ري عقل جيوي سئ، جيون رو راز ڪتم ٿيا واڙو سئ. ⑦ نا نا، امي تو پڳوون ري عقل رئي وات ڪرونه، مطلب پڳوون رئي اُونڌي وات جيئي اوئ پيڏ ۾ راکئي ٿي، پڳوون رو او منصويو جيو اوئ جڳت نايا ٿي مور نايو تو، جيا ٿي آپون ننه آڪاش ۾ مون زڙشي. ⑧ هايا عقل ري وات را پارام ايٺا ڏنيا رون آڳيونون مويئن ٿي ڪيا ننه ڪبر نئي. ڪم تو جي اوئون ننه هايا رئي ڪبر هوئ، تو او مونواڙا پريو ايسو ننه هُوري مانه نه مراوئ. ⑨ پڻ اوئون ننه هايا وات رئي ڪئين ڪبر نئي، زم شاستر ۾ لڪل سئ:

”جي واتون ڪيئنه اونڪيئي نئي ڏيڪي،

ان ڪيئنه ڪوني نئي هومپري،

ان نڪو اوئون را پارام ڪيئنه سوچيو،

او واتون پڳوون اوئون منڪون هارو تيار ڪري

جيا اوئا ٿي پريم راکئھ.“

⑩ پڻ آپون ڪن ڀڳوون هائي وات پوٽر آتما ري ڪڙا ٿي ساوئي ڪريهه. ڪم تو پوٽر آتما ٻڌوئي ڪئين زوڻهه، ان ڀڳوون را من ري اُونڌي واتون پڻ زوڻهه. ⑪ منڪون موئين ايوو ڪوڻ سٺه جيو پيڙا را من رئي ڪهر پاڙي هيڪهه؟ رُوڳو اُوڻا منڪ ننه آپرا من ريون واتون رئي ڪهر سٺه. هيوڻه نموننه ڪوئي منڪ ڀڳوون ريون واتون رئي ڪهر نٿي پاڙي هيڪتو، پڻ رُوڳو ڀڳوون را پوٽر آتما ننه هايون واتون رئي ڪهر سٺه. ⑫ آپون وشواسيون ننه ڏنيا رو رنگ نٿي لاڳيو، پڻ آپون ننه ڀڳوون را پاها ٿي پوٽر آتما زڙيوه، زم آپون ننه ڪهر هوڻه جي ڀڳوون آپري ڪرپا ٿي آپون ننه ڪي ڪي ڏيڏوه. ⑬ ان امي هائي هاڳي واتون همپزاوون. امي منڪون ري عقل ٿي شيڪاڙل نمونا پرموڻه نٿي همپزاوتا. پڻ پوٽر آتما را شيڪاڙل نمونا پرموڻه پوٽر آتما ري مرضي مانه وُڍا وازون ننه پوٽر آتما ري واتون هڙماوون.

⑭ جيا منڪ را ڪيال ڏنيا ري سوچ پرموڻه سٺه، اُو ڀڳوون را ڏيڏل پوٽر آتما ري واتون نٿي مونتو، ڪم تو هائي واتون اُوڻا ننه عقل ووڻي لاڳهه. ان اُو هايون ننه هڙمي نٿي هيڪتو، ڪم تو هائي واتون رُوڳي پوٽر آتما ري ڪڙا ٿي اوڙڪائي هيڪهه جي اُو ڪيوي سٺه. ⑮ پڻ جيو منڪ پوٽر آتما ري مرضي مانه وڻه، اُو هائي ٻڌي واتون اوڙڪي هيڪهه جي اُو ڪيوي سٺه. پڻ ڪوئي ڏنيا رئي سوچ راکيا وازو منڪ اوڙڪي نٿي هيڪتو جي پوٽر آتما ري مرضي مانه وُڍا وازو منڪ ڪيوو سٺه. ⑯ ڏنيا رئي سوچ راکيا وازا منڪ ڀڳوون ري واتون هڙمي نٿي هيڪتا، زم شاستر ۾ لڪل سٺه:

”پريو را من رئي ڪيا ننه ڪهر سٺه؟
ڪوڻ اُوڻا ننه صلاح ڏي هيڪهه؟“

پڻ آبي وشواسي هيوي واتون هڙمي هيڪونه، ڪم تو آڀڻي سوچ پريو ايسو ڪريست ري سوچ پرموڻه سٺه.

مڪ شيلا پالتي را اڳيون نٿي پڻ ڀڳوون را شيواڌاري سٺ

3 ① تيام، پايون ان پينون، شروع ۾ مئين تمون ٿي ايوئه نمونئہ واتون نٿي ڪري، زم پويتر آتما ري مرضي مانھ وُڍا واڙون ٿي واتون ڪروو ڪپئہ، نڪا ماري واتون تمارا ھزميام نہ آوئ. پڻ مئين تمون ٿي ايوئه نمونئہ واتون ڪري تي، زم اوئون منڪون ٿي واتون ڪروو پڙئہ جيا ڏنيا را نمونا پرموئئہ وئہ. ڪم تو تيڏي تمي نوا وشواسي ٿيا تا، ان ايسو ڪريست ٿي واسطو راڪيا ۾ ننڪون ٻاڙون را زم هئا. ② زم مان ننڪا ٻاڙ نئہ روٽئي نٿي ڪوراوتئي پڻ روڳو اوئا نئہ ڏوراوئہ، تم مئين تمون نئہ وشواس ري ڏوري واتون نئين پڻ روڳي ھوري واتون شيڪاڙي، ڪم تو تمي تيڏي ڏوري واتون ھزميا جيوا نٿا. پڻ تمي تو ھزون ھوڏي ڏوري واتون ھزميا جيوا نٿي، ③ ڪم تو تمي ھزون ھوڏي آپرون ڪراپ ڪيالون پرموئئہ وئہ. تمي تو ھيڪا پيزا مانھ ريشي ٻڙوھ، ان آيت ۾ جھيڙو جھڳڙو ڪروھ. ھايا ٿي ٿايتئي نٿي ڪي، جي تمي پيزون منڪون را زم ڪراپ ڪيال راڪوھ ان ڏنيا را نمونا مانھ وئہ؟ ④ زئيون تمون موئين ٿي ڪوڪ ام ڪئھ جي ”ھون پولوس ري پالتي رو سون،“ ان پيزا ام ڪئھ جي ”ھون تو اپلوس ري پالتي رو سون،“ تئيون ھايا ٿي وات ساوئي سئہ جي تمي ڏنيا رون منڪون را نمونا مانھ وئہ.

⑤ اپلوس تو ڪي سئہ؟ ھون پولوس ڪي سون؟ امي روڳا ڀڳوون را شيواڌاري سون، جيون ري واتون ھومپڙيا ٿي تمي ايسو مانھ وشواس اوٿيوھ. امي روڳو آپرو آپرو ڪوم ڪرونھ، زم ايشور امون موئين ٿي ھر ھيڪ نئہ ڪريا ھارو ڏيڏو. ⑥ مثال، ھيڪ منڪ قصل پوڪئھ، پيزو منڪ قصل نئہ پوئي پيئارئہ، پڻ قصل اوڳاڙيا واڙو ڀڳوون آپ سئہ. ھيوئہ نمونئہ مئين شروع ۾ تمون نئہ ايسو را پارام ھمپڙايو، تيا ڪيڙ اپلوس تمون نئہ وشواس راڪيا رو

حونصلو ڏيڏو، پڻ جيو تمون نٿه وِشواس راڪيا رڻي هيٺ ڏيتو ريو، اُو ڀڳوون آپ سٺه. ⑦ تيام وات ساوڻي سٺه جي پلٽه ڪوڪ همڀڙايا واڙو هوئ ڪا ڪوڪ حونصلو ڏيڏا واڙو هوئ، توڻي ڀڳوون هوما اُو ڪئين نٿي، پڻ ٻڌي وات ڀڳوون مانھ سٺه، ڪم تو اُو وِشواس راڪيا رڻي هيٺ ڏئھ. ⑧ قصل پوڪيا واڙو ان پوڻي پڻاريا واڙو ٻي ئي هيڪ جيوا سٺه. اُوئون ٻيئون موئين ٿي هر هيڪ نٿه آڀري آڀري مينٽ پرموئنه آڀرو آڀرو ايوزو زڙشي. هيوئ نمونئ هُون همڀڙايا واڙو ان اڀلوس حونصلو ڏيڏا واڙو ٻي ئي هيڪ جيوا سون، ان امون ٻيئون موئين ٿي هر هيڪ نٿه آڀري آڀري مينٽ پرموئنه آڀرو آڀرو ايوزو زڙشي. ⑨ ڪم تو امي ٻي ئي ڀڳوون پڙا ڀڳوون رو ڪوم ڪريا واڙا سون. امي ڀڳوون رون هاريون را زم سون، ان تمڻي ڀڳوون ري ٻني را زم سو جيام امي ڪوم ڪرونھ.

ان هيوئ نمونئ تمڻي ڀڳوون را گهر را زم پڻ سو. ⑩ ڀڳوون آڀري ڪُريا ٿي مُون نٿه اي هيٺ ڏيڏي جي هُون منڪون نٿه ايسو را پارام همڀڙاون. مئين ڀڳوون ري ڏيڏل هيٺ ٿي تمون ڪن ڪاريگر رازا را زم وِشواسي منڌڙي رڻي پُنياد نوڪيئھ، ان ٻيزو منڪ هوئ تمون وِشواسيون نٿه شيڪاڙئھ ريو، زم ڪوڪ نوڪل پُنياد مانھ گهر سٺھ. جيا منڪ وِشواسيون نٿه شيڪاڙيا ٿي ڀڳوون رو گهر ناوئھ، اُوئون موئين ٿي هر هيڪ رٿه هوشيار ريوو جي اُو آپ ڪيوئ نمونئ ڪوم ڪرئھ. ⑪ ڪم تو وِشواسي منڌڙي رڻي روڳڻي هيڪ پُنياد سٺه، جيئي ڀڳوون را پاها ٿي نوڪل سٺه. ٻيڙي ڪوئي پُنياد ٿي نٿي هيڪٿي. ان اُو پُنياد ايسو ڪريست سٺه جيا مانھ وِشواس راڪو ڪپئھ. ⑫ زم پُنياد مانھ منڪ هيم، چونڌي ڪا قيمتي پٿرون ٿي پڪو گهر ناوي هيڪئھ، ڪا لاکڙيون، پونٺ ڪا ڪونھ ٿي ڪچو گهر ناوي هيڪئھ، تم ايسو ڪريست مانھ وِشواس راڪين ڪوڪ منڪ ناوڪئ نمونئ وِشواس را پارام شيڪاڙئھ، ان ڪوڪ ناوڪئ نمونئ نٿي شيڪاڙتا. ⑬ پڻ هر هيڪ منڪ رو

ڪوم ساوو ٿيشي جي اُوڻه ڪيوو ڪوم ڪريوه، ڪم تو نيا رڻه ڏي زوڻه
 ٻاهي لاڳشي جيا ٿي هر منڪ رو ڪوم ساوو ٿيشي. زم ٻاهي ۾ پڪا گهر
 ڀڄي زائڻ، ان ڪڇا گهر ٻڙي زائڻ، ته نيا رڻه ڏي وات ساوڻي ٿيشي جي
 هر هيڪ منڪ ڪيوو ڪوم ڪريوه. (14) جي ڪيڻهه ايسو مانه وشواس راڪين
 ايوو ڪوم ڪريو هوڻ، جيو نيا رڻه ڏي صحيح زيشي، تو اُوڻا منڪ نه
 انصاف زڙشي. (15) پڻ جي ڪيڻهه ايسو مانه وشواس راڪين ايوو ڪوم ڪريو
 هوڻ، جيو نيا رڻه ڏي ڀڳوون ري نظر ۾ صحيح نئين هوڻ، تو اُوڻا منڪ نه
 انصاف نئين زڙه. توڻي پڻ اُو آپ ڀڳوون ري سزا ٿي ڀڄي زاشي، زم ٻاهي
 ۾ ڪياڪ رو ٻڌوڻي ڪئين ٻڙي زائڻ، پڻ اُو آپ ٻاهي موئين ٿي نالي هاڻي
 ڀڄي زائڻ.

(16) تمون نه اي ڪهر نٿي ڪي؟ تماري وشواسي منڌڙي ڀڳوون رو گهر سڻه
 ان ڀڳوون رو منڌر سڻه، ان ڀڳوون رو پوٽر آتما تمون موئين رڻه. (17) جي ڪوڪ
 منڪ وشواسي منڌڙي نه ڪتم ڪرڻ، جيئي ڀڳوون رو منڌر سڻه، تو ڀڳوون اُوڻا
 منڪ نه هميش رو موت ڏين ڪتم ڪرشي. ڪم تو ڀڳوون رو منڌر پوٽر سڻه،
 ان اُو منڌر تمي سو.

(18) ڪوئي منڪ آپري ڪوڙي ٺاؤل وات مانه آپ ڀولائي نه زائڻ! تمون موئين
 ٿي جي ڪوئي آپ نه ايڻا ڏنيا ري سوچ ڀرموڻه عقل وازو هڙمڻه، تو اُوڻا رڻه
 ڀڳوون ري واتون مونيا ٿي هاس ۾ عقل وازو ٿيوو ڪپڻه، پلڻه ڀڳوون ري واتون
 مونيا ري ڪري ڏنيا را منڪ اُوڻا نه پي عقل هڙمڻه. (19) ڪم تو جيا وات نه
 ڏنيا را منڪ عقل هڙمڻه، ڀڳوون ري نظر ۾ اُو عقل ووڻي وات سڻه. ڪم تو
 شاستر ۾ لڪل سڻه:

”جيا منڪ آپرا آپ نه عقل وازا هڙمڻه،

ڀڳوون اوئون نه اوئون ري آپري چالاڪي ۾ ڦٽراوڻه،

زم شڪاري پڪيون نه گهٽ ۾ ڦٽراوڻه.“

②۰ ان شاستر ۾ اي پڻ لڪل سٺه:

”جيا منڪ آپرا آپ ننه عقل واڙا هڙمڻه،

ايشور اوئون را ڪيال زوئڻه،

جي اوئون را ڪيال ٻڌائي نالا سٺه.“

②۱ تيام تمي آپ ننه ڪياڪ منڪ ري پالتي رو ڪين منڪون ري ڪري وڌائي

مت ڪرو! وشواسيون ۾ اي پالتي رڻي وات ماڳي نه هوو ڪپڻه، ڪم تو تمي

هڪ سو ان ٻڌوئي ڪئين تمون ٻڌون رو سٺه. ②۲ پلڻه هون پوئوس هوئون، اپلوس

هوڻه، ڪا پطرس هوڻه، امي ڌار ڌار پالتي را نتي پڻ هڪ سون، ان تمون ٻڌون را

سون. پلڻه ڏنيا هوڻه، حياتي ڪا موت هوڻه، همڻوڪي واتون ڪا آيا واري واتون

هوڻه، ٻڌوئي ڪئين تمون ٻڌون رو سٺه، ②۳ ڪم تو تمي ٻڌائي ايسو ڪريست را

سو، ان ايسو ڪريست پڳوون رو سٺه.

منڪ شيلا ايسو ڪريست را شيواڌاري سٺه

تيام اوئون تي اوپروٽ نه ٿيوو

① تيام تمارڻه ام هڙموو ڪپڻه جي امي شيڪاڙيا واڙا روڳا ايسو ڪريست

4 را شيواڌاري سون، جيون رڻه حواله پڳوون اي ڪوم ڪريوه، جي امي

اوڻا ري اونڌي واتون همپڙاوون. ② هوڻه شيواڌاريون مانه ٻڌون تي موتو

قرض اي سٺه جي او آپرا ڌڻي رڻي شيوا ڪريا ۾ ايمونڌار رڻه. ③ مون هارو

موتڻي وات نتي جي تمي مارا پارام ڪي سوچوه، ڪا ڪياڪ ڪورڻ ۾ منڪ

مارو ڪيوو ڦينصلو ڪرڻه. هون تو آپرا پارام پڻ ڦينصلو نتي ڪرتو جي هون

ڪيوو سون. ④ ڪم تو مارو من صاف سٺه، توڻي پڻ ايتا تي ڪئين ٿايتي

نتي ٿيتي جي هون هاس ۾ پيڏوهي سون. پڻ مارو ڦينصلو ڪريا وازو مارو

ڌڻي سٺه، پريو ايسو. ⑤ تيام تمي نيا را توڻا تي مور منڪون رو ڦينصلو

مت ڪرو، جي ڦلوڻو منڪ نائوڪو سٺه، ان ڦلوڻو منڪ نائوڪو نتي. پڻ

زئيون نيا رڼه ډي پريو ايسو آوشي، او آپ منكون رو قينصلو كړشي. او هتال واتون سوجهره ټي ساوي كړشي، ان منكون رون منزن را كيال پڻ ساوا كړشي. ان تئيون پگهون آپ هر هيك منك را اوڼا را آپرا كوم پرموئنه وكوڼ كړشي.

⑥ پايون ان پينون، مئين هائي واتون مارو ان اپلوس رو مثال دين تمون ننه هزماويه، زم تمې امارا مثال ټي ايڻا كيتيې مانه ووږيا رو شيكو جي "زم شاستر ډر لکل سته، اوڼا پرموئنه وو." تمې مگهروړ ټين ډار ډار پالتي ناوين هيك منك رو مون مت وډاوو ان پيزا رو مون گهت مت كرو. ⑦ تمون ډر ان پيزون منكون ډر كي قرق سته جيا ري كړي تمې مگهروړ ټيو؟ جئين كئين تمون ننه زړيوه، او پگهون رو ډيډل نټي، كي؟ زئيون تمارو ټوئي كئين پگهون ټي زړيوه، تو تمې آپ ننه موتا هزمين كم وډائي كروه؟

⑧ واه ږي واه، كرتيون، واه! تمې ټون ټي مور آكاش ډر پوگي گيا، كي؟ تمې اگي موج ډر پينا، كي؟ تمون ننه اگي آكاشي ملگت زړيوه، كي؟ امون مك شيلون ننه ايتنه دنيا ډر ساډين، تمې آپ يادشا ټين آكاش ډر راز كروه ريا، كي؟ كيوي نائوكي وات ټت جي تمې هاس ډر آكاش موئين يادشا هوټ، تو پسنه امي پڻ تمون پيزا يادشا ټي هيكټ. ⑨ كم تو مون ننه ام لاگنه جي پگهون امون مك شيلون ننه تماشو ناوين پوري دنيا هوما، آكاشي ډوتون ان منكون رڼه روپرو، ساوا ډيكاريا، زوئنه امي جيت كريا وازون را جلوس ډر موت رڼي سزا كاډا وازا قيدي ټين ټون وونهز وينا هوئون. ⑩ امي ايسو كريست ري كړي منكون ري نظر ډر پي عقل سون. پڻ تمې تو ايسو كريست ټي واسطو راكيا ري كړي آپ ننه كيوا عقل وازا هزموه! امي تو كمزور سون، پڻ تمې آپ ننه طاقت وازا هزموه! امارو كئين مون نټي، پڻ تمې آپ ننه گهڻا مون وازا هزموه! ⑪ امي تو آز هوډي پوكي مرونه ريا ان ترهي مرونه ريا، امون ننه لوگهزا نټي زرتا، منك امون ننه مارنه، امي ايل اول وينا

ريونه، ⑫ ان امي آپرون هاڻون ٿي مينت ڪرين آپري روزي ڪمائونھ. منڪ امارئہ ڪلاڦ پوندو ٻولئھ، تو امي اوئون مانھ آشپرواڏ مونڳونھ. منڪ امون نئھ تنڳ ڪرئھ، تو امي سپر ٿي سھونھ. ⑬ منڪ اماري ڳلا ڪرئھ، تو امي پريم ٿي ٻولونھ. امي آڙ ھوڏي منڪون ري نظر ۾ ڏنيا را اوکا را زم سون، پوري ڏنيا ۾ ٻڌون ٿي گھت سون.

⑭ ھون اي واتون تمون نئھ للزي ماريا ھارو نٿي لکتو، پڻ ھون تو تمون نئھ آڀا پريمي ٻار ھزمين تمون نئھ ھزماوونھ. ⑮ ڪم تو پلئھ ھزاري منڪ ھوئھ جيا تماري ايسو ڪريست ٿي واسطو راڪيا ۾ ھمپاڙ ڪرئھ، توئي پڻ روڳو ھيڪ ھون سون، جيو تمارا ٻاپ را زم سون. ڪم تو مئين تمون نئھ ايسو را پارام ڪشي ربي ڪبر ھمپاڙيا ٿي تمون نئھ نوئي حياتي ڏيورائي زم تمي ايسو ڪريست ٿي واسطو راڪو، ان ھيوئھ نمونئھ ھون تمارا ٻاپ را زم ٿيوھ. ⑯ تيام ھون تمون نئھ منٽ ڪرونھ، جي تمي مارا ڏيڪاڙل نمونا پرمونئھ وو. ⑰ ھايا ھارو مئين تيمٽيس نئھ تمون ڪن ميليوھ. او ماري واتون ھومپزين پريو ايسو مانھ وشواس اوٿيا ٿي مارا پريمي ڏيڪرا را زم سئھ، ان پريو ايسو ري شيوا ۾ ايموندار سئھ. او تمون نئھ مارو ووڏا رو نمونو ياڏ ڏيوروشي، جيا مانھ ھون ايسو ڪريست ٿي واسطو راڪين وونھ ريو، ان جيا را پارام ھون ٻڌيل ھر وشواسي منڌري ۾ شيڪاڙونھ.

⑱ تمون موئين ٿي ڪئينڪ منڪ مگھرور ٿياھ، ڪم تو اوئي سوچيو جي ھون تمون ڪن نئين آون. ⑲ پڻ جي پريو ربي مرضي ٿئي، تو ھون جلدي ۾ تمون ڪن آويھ. ان تمون موئين جيا مگھرور سئھ، اوئون ريون واتون ربي نئين پڻ اوئون ري ڪڙا ربي ڪبر پاڙيھ. ⑳ ڪم تو پڳوون رو راز نالي واتون ڪريا مانھ نٿي پڻ پڳوون ري ڪڙا مانھ سئھ. ㉑ تماري ڪيوئي مرضي سئھ؟ ھون تمون ڪن آوين سڪتي ٿي ھزماوون؟ ڪا پريم ان نرمي ٿي ھزماوون؟

جيو پُونڌو ڪوم ڪرڻه اُونئا ننه وشواسي منڌري ٿي ٻارو ڪايو ٻرو

5 ① مٿين تو اي حيروني رئي وات هومپڙيه، جي تمون موئين پُونڌو ڪوم تئھ ريو. ان هائي ايوو پُونڌو ڪوم سئھ، جيو اُونئون ڌاري قُوم واڙون موئين پڻ نٿي ٿيتو، جيا پڳوون ننه نٿي مونتا. تماري وشواسي منڌري موئين ڪوڪ منڪ ايوو سئھ جيئھ آڀرا ٻاپ ري ڏوشي ننه آڀري ڏوشي ناوئھ. ② ان توئي پڻ تمي مگھرور سو، ان هايا وات مانھ تمون ننه ڪئين ڌڪ نٿي ٿيتو. تمارئھ ايوو ڌڪي ٿيوو تو، جي تمارئھ هيوو ڪراپ ڪوم ڪريا واڙا ننه آڀري منڌري ٿي ٻارو ڪايو تو. ③ هُون تمون ڪن تو نٿي، توئي پڻ مارو جيو تمون ڪن سئھ. تيام، زوئھ هُون تمون پيرو سون، مٿين اڳي هيوو ڪوم ڪريا واڙا رو ڦينصلو ڪريوھ. ④ مارو ڦينصلو اي سئھ. تمي ٻڌائي وشواسي منڌري ۾ پيڙا ٿيو. مارو جيو تمون ڪن سئھ ان هُون تمارو سات ڏيھ، ان آڻو پريو ايسو آڀري ڪڙا ٿي تمون ننه هيئت ڏيشي. ان پسئھ تمي آڻا پريو ايسو رئي ڏيڌل اڪتيارئي واپراوتون ⑤ هيوو منڪ ننه وشواسي منڌري ٿي ٻارو ڪاڍين شيطون را قوضام ساڌو ٻرو، زم ڌڪ ڏوروڻ اُونئا مانھ پڙئھ. مون او آڀرا ڪراپ ڪيال ان ڪوم ساڌين توبونھ ڪرئھ، ان پسئھ پريو ايسو رئھ وڙي آيا رئھ ڏي پڳوون ري سزا ٿي پڇي زائھ.

⑥ اي ناوڪئي وات نٿي جي تمي ايوي حالت ۾ وڌائي ڪروھ. تمون ننه ايئا ڪيٽي رئي ڪهر نٿي ڪي؟ ”ٿوڙڪاڪ کاتا آتا ري ڪري، ٻڌو مونھڙل آتو ٿي زائھ کاتو.“ ⑦ زم پاشڪا پرپ مانھ يھودي ڌرم واڙا ٻڌوئي مونھڙل کاتو آتو گھر ٿي ٻارو ڪاڍين ڦڳوڙئھ ٻرو، زم اُونئون رو گھر پرپ ري ريت ٻروئھ پويتر تئھ، ان پسئھ تازي شيڪل روتي ڪائھ، هيوئھ نمونئھ تمي وشواسي منڌري موئين ٿي هر هيڪ پُونڌا منڪ ننه ٻارو ڪايو ٻرو، زم وشواسي منڌري پويتر

تڻه، ان پسنه تمې اڳلوكي حياتي رڼي ٻڌي پوندائي ساڌين نوا منڪ تين وو،
 ڪم تو تمې هونڌه ڏوهون ٿي آزاد تين نوا منڪ سو. ڪم تو ايسو ڪريست
 پاشڪا پرڀ را ساڙل گهيٽا را زم، پڳون را نوم مانڊه آڀرو جيو ڏيڏوه، زم
 آڀون نڻه ڏوهون را قوڙا ٿي پڇاوت. ⑧ تيام، زم يهودي ڌرم واڙا پاشڪا
 پرڀ منايا ري ڪري مونڙل کاتو اتو ساڌين تازي شيڪل روڻي ڪاڻه، هيونڌه
 نمونڌه آڀي ايسو رڻه جيو ڏيڏا ري ڪري ڏشمڻي ان پوندائي ساڌين صاف من
 ٿي هاسيون واتون مانڊه وون.

⑨ مڻين آڀرا ڪت ۾ تمون نڻه لکيو تو جي پوندو ڪوم ڪريا وازون ٿي
 واسطو مت راکو. ⑩ مارو مطلب اي نتو، جي تمارڻه ايٺا دنيا رون ٻڌون
 منڪون ٿي واسطو هاو ڪتد ڪروو جيا وشواسي نٿي ان پوندو ڪوم ڪرڻه،
 ڪا لالچ راکڻه ان نڳي ڪرڻه، ڪا مورتيون ان ڏيوڻون نڻه پوزڻه. هيون
 منڪون ٿي واسطو تو راکو پڙشي، نڪا تمارڻه ايٺا دنيا ٿي نيهررو پڙت.
 ⑪ پڻ مارو تمون نڻه لکيا رو مطلب اي هتو. جيو منڪ آڀ نڻه وشواسي
 ڪڻه، پڻ پوندو ڪوم ڪرڻه، ڪا لالچ راکڻه، ڪا مورتيون ان ڏيوڻون نڻه
 پوزڻه، ڪا پوندو ٻولڻه، ڪا شراپي سڻه، ڪا نڳي ڪرڻه، هيو منڪ نڻه
 وشواسي پاڻي مت هڙمو ان اوتا ٿي واسطو مت راکو. هيو منڪ پيڙا نڪو کائو
 نڪو پيو.

⑫ جيا منڪ وشواسي منڌري ٿي ٻارا سڻه، اوئون رو ڦينصلو ڪروو مارو
 ڪوم نٿي. پڻ جيا منڪ وشواسي منڌري موئين سڻه، اوئون رو ڦينصلو ڪروو،
 تو تمارو ڪوم سڻه. پسنه تمې ڪم نٿي ڪرتا؟ ⑬ جيا وشواسي منڌري ٿي ٻارا
 سڻه، اوئون رو ڦينصلو پڳون ڪرشي. پڻ تمې آڀرو ڪوم ڪرو، ان زم شاستر
 ۾ لکل سڻه:

”تمې آڀري منڌري موئين ٿي پونڌا منڪ نڻه ٻارو ڪاڍو پرو.“

وشواسيون رڻه آيت ۾ جي ڪوئي وات هون تو پيزيل نئين پن وشواسي منڌري ۾ ڦينصلو ڪروو ڪپه

6 ① زئيون تمون موئين ٿي پيئون وشواسيون رڻه آيت ۾ ڪئينڪ وات ٿه،
تئين تمي ڪم پڳوون رون سونيل منڪون ڪن نئين، پڻ پيزون ڪن ڦينصلو
ڪراووه؟ هائي تو پيعزتي رڻي وات سه. ② تمون نه اي ڪهر نٿي ڪي؟ نيا رڻه
ڏي آبي پڳوون را سونيل منڪ ڏنيا رون منڪون رو ڦينصلو ڪرشن. زئيون تمي
پوري ڏنيا را ڦينصلا ڪرشو، تو پسٺه تمي ايو نٿي ڪي، جي آيت ۾ هيويون
نونيون نونيون واتون رو ڦينصلو ڪري هيڪو؟ ③ تمون نه اي ڪهر نٿي ڪي،
جي آبي آڪاشي ڏوتون رو پڻ ڦينصلو ڪرشن؟ تو پسٺه ڏنيا ريون واتون را
ڦينصلا ڪم نئين ڪري هيڪون؟ ④ تيام، جي تمون موئين هيوي ڏنيا ري واتون
سه جيون رو ڦينصلو ڪراوو ڪپه، تو تمي ايوون منڪون ڪن ڪم ڦينصلو
ڪراووه، جيا وشواسي نٿي؟ ⑤ تماره هايا وات مانھ لڙي مروو ڪپه. تمون
موئين ٿي ڪوئي ايوو عقل وازو منڪ نٿي ڪي، جيو وشواسي پايون رو آيت
۾ ڦينصلو ڪري هيڪه؟ هيوو منڪ تو ضرور هوشي. ⑥ توئي پڻ تمون موئين
وشواسي آيون وشواسي پايون مانھ ڪيس ڪرھ، ان اوئون منڪون ڪن ڦينصلو
ڪراوھ، جيا وشواسي ئي نٿي!

⑦ تماره هڪا پيزا مانھ ڪيس ڪريا ٿي ڪهر پڙھ جي تمي وشواس ريون
واتون مانھ ماڳي نٿي ویتا. ڪيس ڪريا ٿي ام نائوڪو نٿي ڪي، جي تمي آيو
نقصون سهو؟ ڪيس ڪريا ٿي ام نائوڪو نٿي ڪي، جي تمي آيو حق ساڏو؟
⑧ پڻ تمي تو هڪا پيزا مانھ ڪيس ڪرين هڪا پيزا رو نقصون ڪروھ ریا،
ان هڪا پيزا رو حق ڪوهوھ ریا. ان او تمارا آيو وشواسي پائي سه، جيون ٿي
تمي ايوه نمونته ووه ریا.

⑨ تمون نه اي ڪهر نٿي ڪي؟ جيا منڪ پڳوون رڻه ڪلاڦ وھ، اوئون نه

وائيڏو ڪرل تارڻ نئين زڙڻه ان اُو پڳوونَ را راز موئين نئين زائي هيڪڻه. تمِي پُولائو مت! جيا منڪ پُونڌو ڪوم ڪرڻه، ڪا مورتيون ان ڏيوتونون نڻه پُونڌه، ڪا پرائي ڏوشي ٿي پُونڌو ڪوم ڪرڻه، ڪا آڏميون ٿي پُونڌو ڪوم ڪراوڻه، ڪا آڏميون ٿي پُونڌو ڪوم ڪرڻه، ⑩ ڪا سورڻي ڪرڻه، ڪا لالچ راکڻه، ڪا شراپي سڻه، ڪا پُونڌو ٻولڻه، ڪا ٺڳڻي ڪرڻه، هيو منڪ پڳوونَ را آڪاشي راز موئين نئين زائ. ⑪ اڳي تمون موئين ٿي پڻ ڪئينڪ منڪ هيو هتا. پڻ هونءِ تمِي پَوِتر سنون ليدوه ان ڏوهون ٿي صاف ٿيا. هونءِ تمِي پڳوونَ را سُونڍل منڪ ٿين پڳوونَ ري شيوا هارو پَوِتر ٿيا. هونءِ پريو ايسو ڪريست مانھ وشواس را ڪيا ٿي ان اپنا پڳوونَ را ڏيڏل پَوِتر آتما ري ڪڙا ٿي پڳوونَ تمون نڻه ماقئي ڏين ڏوهون ري سزا ٿي آزاد ڪريا.

پڳوونَ را سُونڍل منڪ ٿين پُونڌو ڪوم نه ڪرو

⑫ تمون موئين ڪوڪ ام ڪڻه: ”هُون ڏوهون ٿي آزاد ٿيو، تيام هونءِ مون نڻه ٻڌوئي ڪئين ڪريا رڻي موڪل سڻه.“ پڻ هاسي وات اي سڻه، تمون هارو ٻڌي واتون ڦاڙيڏا واري نٿي. منڪ پلڻه ام ڪڻه: ”هُون ڏوهون ٿي آزاد ٿيو، تيام هونءِ مون نڻه ٻڌوئي ڪئين ڪريا رڻي موڪل سڻه.“ پڻ هاسي وات اي سڻه، جي هون آزاد سون، تو هون آپ نڻه ڪياڪ ڏوه را قوضام نئين قتراوون. ⑬ تمون موئين ٿي ڪوڪ ام ڪڻه: ”ڪاڌو پيٽ هارو سڻه، ان پيٽ ڪاڌا هارو سڻه. تيام منڪ نڻه زم وڻڻه، تم ڪرڻه. ان پڳوونَ ڪاڌا ان پيٽ نڻه پيئون نڻه ڪتم ڪرشي. تيام پلڻه آپرون ڪراپ ڪيالون مانھ وون، تو ڪئين قرق نئين پڙڻه.“ پڻ هاسي وات اي سڻه، آپنو ڏيل پُونڌو ڪوم ڪريا هارو نٿي پڻ پريو ايسو رڻي شيوا ڪريا هارو سڻه، ان پريو ايسو آپون نڻه ڏيل هٽيلا پچايا هارو آپنو ڪيال ڪرڻه. ⑭ پڳوونَ پريو ايسو نڻه موت ٿي جيوي اوناڙيو، ان آپون نڻه پڻ آپري ڪڙا ٿي جيوي اوناڙشي.

⑮ تمون ننه اي کبر نټي کي؟ تمارو ڏيل ايسو کريست را ڏيل رون اوزپون را زم سټه. تو پسټه آبي کم کرين پوندو کوم کري هيکونه؟ آبي آښو ڏيل، جيو ايسو کريست رون اوزپون را زم سټه، ايسو ټي ډار کرون، ان کياک پوندې ډوشي پيزو کرون، کي؟ نا نا، ماگي نئين! ⑯ تمون ننه اي کبر نټي کي؟ جيو منک پوندې ډوشي پيزو اونگهائو، او پوندې ډوشي پيزو هيک ڏيل ټي زائو. کم تو آدمي ان ډوشي را پارام شاستر ۾ لکل سټه:

”بي ئي هيک ټيشي.“

⑰ پڻ جيو پريو ايسو ټي واسطو راکڻه، او ايسو پيزو هيک من ټه.

⑱ تمې پونډا کوم ټي شيتي پاگهو! تمون موئين ټي کوک ام کڻه: ”جيو پڻ ډوه منک کرڻه، اوڻا ټي ڏيل ۾ کڻن اثر نئين ټه.“ پڻ هاسي وات اي سټه، جيو منک پوندو کوم کرڻه، او آپ آږا ڏيل رو ډوه کرڻه. ⑲ تمون ننه اي کبر نټي، کي؟ تمارو ڏيل پويتر آتما رو منډر سټه، جيو پويتر آتما تمون موئين رڼه، ان پگهوون را پاها ټي تمون ننه زړيوه. ان تمې آږي مرضي را مالک نټي، ⑳ کم تو ايسو آږو جيو ڏيډا ټي تمون ننه پگهوون را منک نايه، ان هوڼه تمارڼه پگهوون ري مرضي مانه ويو. تيام تمې آږو ڏيل آږا قوضام راکين ايوڼه نمونڼه وو، زم پگهوون را وکوڻ ټه.

پرټيا را پارام

7 ① هوڼه، جيون واتون را پارام تمې کت ۾ پونسيوه، هايون را پارام هوڼ تمون ننه هزماوونډه. تماري وات هاسي سټه جي ”کونټارو ريوو نائوڪو سټه.“ ② توڻي پڻ نائوڪي وات سټه جي هر آدمي ربي ډوشي هوڼه، ان هر ډوشي رو آدمي هوڼه، کم تو پوندو کوم گهڻو ټه ريو ان هيوڼه نمونڼه تمې پونډا کوم ټي پچي هيکوه. ③ آدمي ان ډوشي پيئون موڻهون ننه پيڙا اونگهايا رو حق سټه. آدمي رڼه آږي ډوشي رو حق پورو کروو کڻه، ان هيوڼه

نمونہ ڏوشي رڻه آڏمي رو حق پورو ڪروو ڪپڻه. ④ ڪم تو ڏوشي رو حق نٿي جي او روڳڻي آپري مرضي مانھ وڻه، نڪو آڏمي رو حق سڻه جي او روڳو آپري مرضي مانھ وڻه. پڻ ڏوشي مانھ اوڻا را آڏمي رو حق سڻه، ان آڏمي مانھ اوڻا ري ڏوشي رو حق سڻه. ⑤ تمي هڪا پيزا رو حق ڪوهي مت ليو. جي تمي ٻي موٽهه آپري مرضي پرموٽه، توڙاڪ وڪت هوڏي، پراٽنا ڪريا ري ڪري پيزا نٿي اونگهاتا، تو ٺيڪ. پڻ پسنه تيا ڪيڙ وڙي پيزا اونگهائو، متون شيطون تمارو آزمو لين تمون ننه ڏوه ۾ پاڙڻه، ان تمي آپ مانھ قوضو نه راکيا ري ڪري پوندو ڪوم ڪرو.

⑥ هون تمون ننه هم ڪين پڙيا رو حڪم نئين، پڻ پڙيا رڻي موڪل ڏيونه. ⑦ مارا هزميام ڪيوو نائوڪو هوٽ، جي ٻڌائي منڪ مارا زم ڪوئارا رڻت. پڻ هر هڪ ننه آپري آپري پڳوون رڻي ڏيڏل هيئت سڻه، ڪياڪ ننه ڪوئارو ريا رڻي هيئت ڏيڏل سڻه، ان ڪياڪ ننه پڙل ريا رڻي هيئت ڏيڏل سڻه. ⑧ هوڻه هون تمون ننه ام ڪونه: تمون هارو اي نائوڪو سڻه جي تمي جيا ڪوئارا سو، تمي مارا زم پڙيا وڳر ريو، ان تمي جيون ري ڏوشي ڳڏاري ڳيھ، تمي گهرگهڻو ڪريا وڳر ريو، ان تمي ڏوشي جي رڏال سو، تمي پيزو گهر ڪريا وڳر ريو. ⑨ پڻ جي تمي آپ ننه قابو ۾ نٿي راکي هيڪتا، تو پلنه پڙو، ڪم تو پڙو پڙيا هارو هڪيا ٿي نائوڪو سڻه.

⑩ تمي جيا پڙل سو، تمون ننه هون حڪم ڏيونه. اي حڪم مارا طرف ٿي نٿي پڻ پڙو ايسو رو ڪيڏل سڻه. ڏوشي آپرا آڏمي ننه نه ساڏڻه. ⑪ پڻ جي او آپرا آڏمي ننه ساڏڻه، تو او پيزو گهر نه ڪرڻه ان آڏمي ووڻي رڻه، ڪا آپرا آڏمي ٿي منائي زائڻه. ان آڏمي رڻه آپري ڏوشي ننه نه ساڏو.

⑫ هوڻه تمي پيزا منڪ، جيا رو آڏمي ڪا ڏوشي وشواسي نٿي، تمون ننه هون ام ڪونه. اي پڙو ايسو رڻي ڪيڏل وات نٿي، پڻ هون آپ ڪونه ريو. جي ڪياڪ وشواسي پائي رڻي ڏوشي وشواسي نه هوڻه، ان او ڏوشي اوڻا پيزي

ريا ۾ ڪُش هونءَ، تو اُو اُوڻا ڏوشي نءَ نه ساڏنءَ. ⑬ ان جي ڪياڪ وشواسي ڏوشي رو آڏمي وشواسي نه هونءَ، ان اُو آڏمي اُوڻا پيڙو ريا ۾ ڪُش هونءَ، تو اُو اُوڻا آڏمي نءَ نه ساڏنءَ. ⑭ ڪم تو جيو آڏمي وشواسي نٿي، اُو آپري وشواسي ڏوشي ري ڪري زونءَ پوٽر ٿيو. ان جئي ڏوشي وشواسي نٿي، اُو آپرا وشواسي آڏمي ري ڪري زونءَ پوٽر ٿيو. هم نه ٿئ، تو تمارا ٻار زونءَ اڀڙال ٿئ، پڻ تمارا ٻار تو پوٽر سئ.

⑮ پڻ جي تمارو آڏمي ڪا ڏوشي وشواسي نٿي، ان اُو آپري مرضي ٿي ڌار ٿيو ڪرءَ، تو پلءَ ڌار ٿئ. تمي اُوڻا نءَ ڌار ٿيو ڏيو. هيوي حالت ۾ وشواسي پائي ڪا ٻين ڌار نه ٿيا را حڪم ٿي آزاده سئ. ڪم تو زوري پيڙا ريا ٿي روڳو جهيڙو جهيڙو ٿيشي، ان پڳوون تمارو آپ ٿي تيام واسطو رکايو، زم تمي ٻڌون ٿي هپ ۾ ريو. ⑯ زايا وارا نءَ زوري روڪيا رو ڪي ڦاڻيڏو؟ ام مت سوچو جي اُو ماري ڪري وشواسي ٿيشي. ڏوشيون، تمون نءَ ڪيوئي پڪ سئ جي تمي پيڙي ريا ٿي آپرا آڏمي نءَ پڳوون ري سزا ٿي پڇاوي هيڪشو؟ آڏميون، تمون نءَ ڪيوئي پڪ سئ جي تمي پيڙا ريا ٿي آپري ڏوشي نءَ پڳوون ري سزا ٿي پڇاوي هيڪشو؟

وشواسي ٿين اُوڻا حياتي را نمونا مانھ وينا ريوو جيو پڳوون تمون نءَ ٿيڏوھ

⑰ وات اي سئ. پڙيو ايسو هر هيڪ نءَ آپري آپري حياتي مانھ وُڍا رو نمونو ڏيڏو، ان پڳوون هر هيڪ رو آپ ٿي واسطو رکايو زم اُو آپري آپري حياتي را ڏيڏل نمونا مانھ وئ. تيام تمي آپري حياتي را ڏيڏل هيا نمونا مانھ وينا ريو. هون همروم هائي هاڳي نمونو ٻڌيون وشواسي منڌڙيون ۾ شيڪاڙونھ. ⑱ يهودي قوم رو منڪ، جيا رئي وشواسي ٿيا مور توهر ٿيل هئي، اُو وشواسي ٿين آپري ٿيل توهر رئي وات هٽاڙيا هارو ڪئين نه ڪرئ. ان ڌاري قوم رو

منڪ، جيا رڻي وشواسي ٿيا مور تهر ٿيل نٿي، اُو وشواسي ٿين آپري تهر نه ڪراوڻه. (19) تماري تهر ٿيل هوڻه، ڪا نه هوڻه، تو ڪئين وات نٿي. پڻ موڻي وات اي سڻه جي تمڀي پڳون رن حڪمون مانه وو. (20) هر هيڪ رڻه پڳون را ڏيڏل اونا حياتي را نمونا مانه ويوو، جيا نمونا ۾ پڳون تمارو آپ ٿي واسطو رکايوه. (21) جي وشواسي ٿيا رڻه ٿوڻه تمڀي ڳلوم هتا، تو ڪئين وات نٿي، تمڀي هايا را پارام ڦڪر مت ڪرو. پڻ جي تمون نڻه صحيح طريقا ٿي آزاد ٿيا رو موقعو زڙه، تو ڳلومي ساڏين تمڀي آزاد ٿيو. (22) ڪم تو جيو ڪياڪ منڪ رو ڳلوم هوتون وشواسي ٿيو، اُو پريو ايسو ٿي واسطو راڪيا ري ڪري ڏوهون ٿي آزاد ٿين پريو ايسو رو آزاد ڪرل منڪ سڻه. همروم جيو ڳلومي ٿي آزاد هوتون وشواسي ٿيو، اُو ايسو ڪريست رو شيواڌاري ٿين ڳلوم را زم سڻه. (23) ايسو آپرو جيو ڏين تمون نڻه زوڻه ڏوهون ري ڳلومي ٿي ويساتا ليڏاه را. هوڻه تمڀي ايسو را منڪ سو، تيام تمڀي منڪون رن ڪراپ ڪيالون مانه وين آپ نڻه منڪون را ڳلوم مت ٿاوو. (24) پايون ان پينون، جيا حياتي را نمونا ۾ تمڀي هتا، زئون پڳون تمارو آپ ٿي واسطو رکايو، اونا حياتي را نمونا ۾ پڳون ٿي واسطو راڪين ريو.

ڪونٿاريون سوڪريون را پارام ان رنڌال ڏوشيون را پارام

(25) تمڀي ڪت ۾ ڪونٿاري سوڪريون را پارام پونسيوه. هايا را پارام پريو ايسو رو ڏيڏل مون ڪن ڪئين حڪم نٿي، پڻ پريو ايسو ري ڏيا ٿي هون ايموندار هوتون صلاح ڏيونه. (26) مارا هزميام هموڪي مصيبت ري ڪري ٿاوڪي وات اي سڻه جي منڪ امروم رڻه زم همڻه سڻه. (27) جي تمڀي پرتل سو، تو آپري ڏوشي ساڏوا مت ڪرو. جي پرتل نٿي، تو پرتيا رڻي ڪوشش مت ڪرو. (28) پڻ جي تمڀي پرتوه، تو هايا ٿي تمڀي ڪئين ڏوه نٿي ڪرتا. ان جي ڪونٿاري سوڪري پرتوه، تو هايا ٿي اُو ڪئين ڏوه نٿي ڪرتي. وات اي سڻه،

پرٿلون نٿه ايٿا حياتي ۾ تڪليليون ٿئھ، ان ھون تمون نٿه ھايون تڪليليون ٿي پڇاؤا ڪرونھ.

②9 پايون ان پينون، مارو ڪيڏا رو مطلب اي سٺه جي وڪت ٿوڙو سٺه. تيام آڙ ٿي لين، جيا پرٿل سٺه، اوئون رٿه پورٿه نمونٿه پڳوون رٿي شيوا ڪرو، جيوٿه نمونٿه ان پرٿل منڪ پڳوون رٿي پورٿي شيوا ڪري هيڪٿه. ③0 جيا ڏکي ٿين روٿه ريا، اوئون رٿه پورٿه نمونٿه پڳوون رٿي شيوا ڪرو، زوٿه او ڏکي نٿي. جيا ڪش ٿين هاهٿه ريا، اوئون رٿه پورٿه نمونٿه پڳوون رٿي شيوا ڪرو، زوٿه او ڪشئي نٿي ڪرتا. جيا شينھون ويساتي لٿه، اوئون رٿه پورٿه نمونٿه پڳوون رٿي شيوا ڪرو، زوٿه او شينھون اوئون ري آپري نٿي. ③1 ان جيا ايٿا دنيا ري شينھون واپراوٿه، اوئون رٿه پورٿه نمونٿه پڳوون رٿي شيوا ڪرو، ان ھايون دنيا ريون شينھون مانھ پورو ڏيون نہ ڏيوو. ڪم تو اي همٿوڪئي دنيا ٻڌي ڪم ٿيا واڙي سٺه.

③2 مارئي مرضي اي سٺه، جي تمي گهٽيون ٿي آزاد ريو. جيو وشواسي پرٿل نٿي، او پريو ايسو ريون واتون را پارام ڪيال ڪرٿه، جي او ڪيوٿه نمونٿه پريو ايسو نٿه ڪش ڪري هيڪٿه. ③3 پڻ جيو وشواسي پرٿل سٺه، او دنيا ريون واتون را پارام ڪيال ڪرٿه، جي او ڪيوٿه نمونٿه آپري ڏوشي نٿه ڪش ڪري هيڪٿه. ③4 ان تيام او پريو ايسو نٿه ان آپري ڏوشي نٿه ڪش ڪريا هارو ٻئي پاھي قاتل سٺه. همريٿم جي وشواسي ڏوشي رنڌال سٺه ان جي ڪونٿاري سوڪري سٺه، جيون را آڌمي نٿي، او پريو ايسو ريون واتون را پارام ڪيال ڪرٿه، زم او پورٿه نمونٿه ان پورا من ٿي پريو ايسو رٿي شيوا ڪري هيڪٿه. پڻ جي وشواسي ڏوشي پرٿل سٺه، او دنيا ريون واتون را پارام ڪيال ڪرٿه، جي او ڪيوٿه نمونٿه آڌمي نٿه ڪش ڪري هيڪٿه.

③5 هائي واتون هون تمارا قائيڏا هارو ڪونھ ريو. مارو مطلب اي نٿي جي تمون نٿه آزادي ٿي روڪون، پڻ هون هائي واتون ايٿا هارو ڪونھ ريو زم تم

ٺاٺوڪڻه نمونئ وو، ان پورا من ٿي گهٽيون وڳر پريو ايسو رئي شيوا ڪرو.
 (36) جي ڪوڪ ام هزمئ، جي ”اي ٺاٺوڪڻي وات نٿي جي هون آپري سوڪري
 نئ ڪونٺاري راکون،“ ان جي سوڪري رئي پري رئي عمر زائو رئي، ان اي وات
 نيڪ لاڳئ جي سوڪري نئ پريو وڳر، تو او آپري مرضي پرموئ سوڪري
 نئ پلئ پريو. هم ڪريا ٿي او ڪئين ڏوھ نٿي ڪرتو. (37) پڻ جيئ منڪ من
 ۾ اي ڦينصلو ڪريوھ جي او آپري سوڪري نئ نئين پريوئ ان هميش هارو
 ڪونٺاري راکشي، ان اوئا نئ آپري ڦينصلا را پارام پڪي ڪاتري هوئ جي
 سوڪري هارو صحيح سئ، ڪوئي ايوي مجپوري نئ هوئ جيا ري ڪري سوڪري
 نئ پريو وڳر، ان اوئا منڪ رو پورو حق هوئ جي او آپري مرضي پوري
 ڪرئ، تو او ٺاٺوڪو ڪرئ جي آپري سوڪري ڪونٺاري راکئ. (38) تيام، جيو
 آپري سوڪري نئ پريو، او ٺاٺوڪو ڪرئ. ان جيو آپري سوڪري نئ نٿي
 پريو، او وڌيڪ ٺاٺوڪو ڪرئ.

(39) ڏوشي، زئون هوڏي اوئا رو آدمي حياتي سئ، تيون هوڏي اوئا رئ
 روڳي آپري آدمي پيري ريو. پڻ جي اوئا رو آدمي مري زائ، تو او آزاد سئ ان
 او آپري مرضي پرموئ پريو گهر ڪري هيڪئ. پڻ شرط اي سئ جي اوئا رو
 آدمي پريو ايسو مانھ وشواس راکتو هوئ. (40) توئي پڻ مارا هزمي جي رنڌال
 ڏوشي پريو گهر نئ ڪرئ، تو وڌائ ڪش ريشي. ان مون نئ يقين سئ جي مون
 نئ پڻ پگيون رو ڏيڌل پويتر آتما زريوھ جيا ري ڏيڌل هزم پرموئ هون هائي
 واتون ڪونھ ريو.

ڏيوئونون را نوم مانھ ساڙل مال رو مونھ کاڌا را پارام

8 ① تمي ڪت ۾ اوئا مونھ را پارام پونسيوھ، جيو ڏيوئونون را نوم مانھ
 ساڙل سئ. تمي ڪت ۾ لکيوھ جي ايوو مونھ ڪاوو ڪئين وات نٿي، ڪم
 تو ”امون ٻڌون ڪن گيون سئ ان امي پگيون ري واتون زوئونھ.“ امون نئ تو

ڪهر سٺه جي آيون ٻڌون وشواسيون ڪن ڳيون سٺه ان آبي ٻڌائي ڀڳوون ري واتون زوڻون. پڻ وات اي سٺه، جيو منڪ آڀ نٺه ڳيون واڙو هڙمٺه، او آڀ نٺه موٽو هڙمين مگهرور ٿڻه، پڻ جيو منڪ پڙون ٿي پريم ڪرڻه، او ايوئه نمونئ هڻه جيا ٿي پڙون رو وشواس پڪو ٿڻه. ② جي ڪوئي هڙمٺه جي او ڳيون واڙو سٺه ان ڀڳوون ري واتون زوڻه، تو او هڙون هُوڌي اتو نٿي زوڻتو، زتو اوئا رڻه زوڻو ڪپڻه. ③ پڻ جي ڪوئي ڀڳوون ٿي پريم راکڻه، تو ڀڳوون اوئا ٿي واسطو راکڻه.



④ هُوئه هُون او مونھ کاڌا را پارام هڙماونھ، جيو ڏيوٽونون را نوم مانھ ساڙل سٺه. تمی ڪت م لکيوھ جي ايوو مونھ ڪاوو ڪئين وات نٿي ڪم تو ”ڏيوٽونا، جيون ري مورتِي منڪ پُوڙه، او ماڳي سٺه ئي نئين“ ان ”ڀڳوون هيڪ

سٺه، پڙو ڪوئي نٿي.“ امون نٺه تو ڪهر سٺه جي تماري هائي واتون هاسي سٺه جي ڏيوٽونا ڪوڙا سٺه ان ڀڳوون هيڪ سٺه. ⑤ ان آيون نٺه ڪهر سٺه جي پلڻه آڪاش م ڪا ڌرتي مانھ ڏيوٽونا هُوئه، ان گهڻي ايوي شينھون تو سٺه جيون نٺه منڪ ڀڳوون ان پڙيو ڪڻه، ⑥ توڻي پڻ آيون وشواسيون هارو روڳو هيڪڻه ڀڳوون سٺه، جيو ڀڳوون ٻاپ سٺه، جيئڻه ٻڌوئي ڪئين پڌا ڪريو، ان جيا ري شيوا هارو آبي وشواسي جيوٽا سون. ان آيون وشواسيون هارو روڳو هيڪڻه پڙيو سٺه، جيو پڙيو ايسو ڪريست سٺه، جيا را هيللا ٿي ٻڌوئي ڪئين نھيو، ان جيا ري ڪري آيون وشواسيون نٺه تارڻ زڙيوھ.

⑦ آيون نٺه تو ڪهر سٺه جي هائي ٻڌي واتون هاسي سٺه. پڻ ٻڌون نٺه هايون واتون رڻي ڪهر نٿي. ڪوڪ وشواسي ايو سٺه جيا اڳي مورتِي پُوڙا ڪرتا، ان هڙون هُوڌي گهڻون سالون ٿي مورتِي پُوڙيا ري ڪري، زئون او مونھ ڪاڻھ جيو

ڏيوئونون را نوم مانھ ساڙل سئ، تئيون او ام ھزمئھ جي ھائي مونھ کاڌا ٿي او ڏيوئونون نئھ مونھ ريا. اوئون رو وشواس ريون واتون مانھ پڪو يقين نٿي ان او شڪ ڪرئھ جي ايوو مونھ ڪاوو ڏوھ سئ، تيام او صاف من ٿي ڪائي نٿي ھيڪتا. ⑧ پڻ ھاس ۾ کاڌو کاڌا ٿي آڻو پڳوون ٿي واسطو راکيا ۾ ڪئين فرق نئين پڙئ. تمي ڪوھ جي ”ڏيوئونون را نوم مانھ ساڙل مونھ ڪاوو ٺيڪ سئ.“ پڻ جي ايوو مونھ نہ ڪائون، تو آڀون نئھ پڳوون ٿي واسطو راکيا ۾ ڪئين نقصون نئين ٿئ. ان جي ايوو مونھ ڪائون، تو آڀون نئھ پڳوون ٿي واسطو راکيا ۾ ڪئين ڦاٽڻو نئين ٿئ.

⑨ تمي تو ھوشيار ريا. ام نہ ٿئ جي تماري آڌاڌي ري ڪري پيزا وشواسي ڏوھ ۾ پڙئ، جيون رو وشواس ريون واتون مانھ پڪو يقين نٿي. ⑩ ڪم تو جي تمي آپ نئھ گيون وازا ھزمين ڏيوئونون را منڌر موئين ڏيوئونون را نوم مانھ ساڙل مونھ کاتا ھوئو، ان ڪوئي ايوو وشواسي تمون نئھ ھم ڪرتون ڏيڪئ، تو اوئا رو وشواس ڪم ڪرين پڪو ٿيئي؟ او تمون نئھ زوئين تمارا زم ڏيوئونون را نوم مانھ ساڙل مونھ تو ڪاشي، پڻ صاف من ٿي نئين ڪائ. او تو اي شڪ ڪرشي جي اي مونھ کاڌا ٿي ھون ڏيوئونون رئي پوزا ڪرونھ ريو، ان ھم او پڳوون رو ڏوھ ڪرشي. ⑪ ھيوئھ نمونئھ تماري ھايا وات ري ڪري جيا نئھ تمي گيون رئي وات ھزموھ، او جيو وشواس راکيا ۾ ڪمزور سئ، جيو تمارو وشواسي پاڻي سئ جيا نئھ پڇايا ھارو ايسو ڪريست آڀرو جيو ڏيئو، او وڙي ڏيوئونون ري پوزا ۾ پڙشي، ان پڳوون رو ڏوھ ڪرين ھميش رئي سزا ڪاشي. ⑫ ھيوئھ نمونئھ، زئيون تمي آڀرون وشواسي پاڻون رو ڏوھ ڪروھ ان اوئون ٿي ايوو ڪوم ڪراوھ جيا نئھ او وشواس ري ڪمزوري ري ڪري ڪراپ ھزمئھ، تو تمي ايسو ڪريست رو ڏوھ ڪروھ ريا. ⑬ تيام جي مارئھ مونھ کاڌا ري ڪري مارو وشواسي پاڻي ڏوھ ۾ پڙئ، تو ھون ڪيڏي پڻ مونھ نئين ڪائون، متون ھون مارا وشواسي پاڻي ٿي ڏوھ ڪراوون.

پولوس آڀرو نمونو ڏيکارڻه جي ٻيزون را ڦاڻيڏا هارو آڀرو حق ساڏوو


9 ① هُون آڀرو حق ليڏا هارو آزاده نٿي، ڪي؟ هُون تو مُڪ شيلو نٿي، ڪي؟ آڀڻه پريو ايسو مون نه ڏيکارو نٿي ڏيڏو، ڪي؟ تمهي ماري ڪرل پريو ايسو ري شيوا ري ڪري وشواس نٿي اوڻيو، ڪي؟ ② ٻيزا منڪ مون نه مُڪ شيلو پلنه نه هزمه، پڻ گهٽ ۾ گهٽ تمهي نظر ۾ هُون تو مُڪ شيلو سون. ڪم تو تمهي ماري ڪري پريو ايسو ٿي واسطو راکوه، ان ايڻا ٿي ٿاڀڻي ٿه جي هُون پريو ايسو رو مُڪ شيلو سون. ③ زئون منڪ ماري ڳلا ڪرڻه جي هُون هاس ۾ مُڪ شيلو نٿي، تو اوئون هارو مون ڪن اي جواب سڻه جي ڪرڻس شهر را وشواسي مارا شيڪاريا ري ڪري وشواسي ٿيا.

④ امارو اي حق نٿي ڪي، جي امي شيڪاريا را ڀڏلا ۾ تمون ٿي کاڌو پيڏو ليون؟ ⑤ امارو اي حق نٿي ڪي، جي امي آڀري آڀري وشواسي ڏوشي نه پيڙي تيڙي آون؟ ٻيزا مُڪ شيلو، ان پريو ايسو را پاڻي، ان پطرس، او ٻڌائي همروم نٿي ڪرتا، ڪي؟ ⑥ ڪا روڳو مارو ان برنباس رو حق نٿي، جي آڀرو ڏنڌو ساڏين وشواسيون ٿي ڏون ليون؟ امارو ڏون ليڏا رو تو پورو حق سڻه. ⑦ ڪوئي ڦوجي ڪيڏي آڀرا ڪرڇ مانه ڦوج ۾ ڪوم ڪرڻه، ڪي؟ ڪوئي ٻاگه رو ڌڻي ڌراڪون رو ٻاگه پوکين اوڻا را ميوا نٿي کاتو، ڪي؟ ڪا ڪوئي ڌراڙ ريون سارڻه پڻ اوئون رو ڏوڏ نٿي پيتو، ڪي؟

⑧ هُون روڳو منڪون رون هايون مثالون ري ڪري هم نٿي ڪيتو. هائي هاڳي وات شاستر ۾ پڻ لڪل نٿي، ڪي؟ ⑨ ڪم تو شاستر ۾ موسيٰ رون لڪل حڪمون ۾ ام لڪل سڻه:

"زئون ڊڳو هلر ۾ ٻونڌل سڻه، تو مونشيون نه ساڙو.

تمهي ڪي سوچوه؟ ڀڳوون روڳو ڊڳون رو ڪيال راڪين هم لڪايو، ڪي؟ ⑩ ڪا



پڳوونَ آپون ٻڌون ھارُو ڊڳون رو مثال ڏيتو؟ ھاڻي شاستر رڻي وات آپون ھارُو لڪل سٺ. ڪم تو ام صحيح سٺ جي ھاڙي اي پروسو راڪين پٺڻي ڪيڙڻھ ان فصل نٺ ڳاھڻھ، جي فصل موئين ٿي اُٿا رو حصو زڙشي. ⁽¹¹⁾ ھاڙي نٺ فصل ٿي آپرو حصو ليڏا رو حق سٺ. ھيوڻھ نمونئھ زڻيون امي تمون نٺ پڳوون ري واتون شيڪاڙيھ، تو اي ڪوئي موٽڻي وات نٿي جي اُٿا را پڌلا ۾ امي تمون ٿي ڏنيا ري شينھون آپ ھارُو ڏون ۾ ليون. ⁽¹²⁾ زڻيون پڙا شيڪاڙيا واڙا ھايا حق پرمونئھ تمون ٿي ڏون لئھ، تو پسئھ امارو تمون ٿي ڏون ليڏا رو وڌارئھ حق نٿي ڪي، جيئي شُروع ۾ تمون نٺھ ايسو را پارام شيڪاڙيا؟

امارو ڏون ليڏا رو حق تو سٺ، پڻ امي آپرو حق نہ ليدو. امي تمون ٿي ڏون ماڳي نہ مونگيو پڻ ٻڌڻي ڏوروڻ سھڻي، متون ڏون مونگيا ٿي امي تمون نٺھ ايسو ڪريست را پارام ڪشي رڻي ڪٻر ھومپڙيا ٿي روڪون. ⁽¹³⁾ تمون نٺھ اي ڪٻر نٿي ڪي؟ جيا منڪ پڳوون را گھر ۾ شيوا ڪرئھ، اُو پڳوون را گھر موئين ڏيڌل ڏون موئين ٿي آپرو حصو لئھ. جيا پوزاري پڳوون را نوم مانھ مال ساڙئھ، اُو ساڙل مال را مونھ موئين ٿي آپرو حصو لئھ. ⁽¹⁴⁾ ھيوڻھ نمونئھ پريو ايسو پڻ شيڪاڙيو جي جيا منڪ ايسو را پارام ڪشي رڻي ڪٻر ھمپڙاڻھ، اُوئون رو ھاڻي


ڪُشي رڻي ڪُپر ھمڀڙاڀا ري ڪري آپ ھارو ڏون ليڏا رو حق سئھ.

⑮ توتئي پڻ مئين ھايون موئين ٿي ڪئين حق نہ ليدو. ھون ايئا ھارو ھائي واتون نٿي لکتو، زم تمي ھمئئھ مون نئھ ڏون ڏيو، جيوتھ نمونئھ تمي پيزون نئھ ڏيوھ ريا. نا نا، ڏون مونگيا ٿي مون ھارو ٺاٺوڪو اي سئھ جي ھون مري زائون. ھون ايئا وات مانھ گھڻو ڪُش سون جي ھون ڪيا ٿي ڏون نٿي ليتو. ام نہ تئھ جي ڪيا رئھ مون نئھ ڏون ڏيڏا ٿي مارئي ڪُشي ڪتھ ٿي زائھ. ⑯ ھوتھ زئين ھون ايسو را پارام ھمڀڙاوونھ، تو ڪم ڪرين ھايا وات مانھ وڌائي ڪري ھيڪونھ؟ ھم ڪروو تو مارو قرض سئھ. مون نئھ ڪتو ڏک زڙت، جي ھون ايسو را پارام ڪُشي رڻي ڪُپر نہ ھمڀڙاوت. ⑰ جي ھون ھائي ڪوم آپرا ڦينصلا پرموتھ ڪرونٽ، تو مون نئھ ڪوم رو ايوڙو زڙت. پڻ وات اي سئھ، ھون ھائي ڪوم آپرا ڦينصلا پرموتھ نٿي ڪرتو. ھائي ڪوم ڪريا ٿي ھون روڳي او زميواري پوري ڪرونھ، جي پگھون مون نئھ ڏيڏيھ. ⑱ تو پئسھ مارا ڪوم را ايوڙا ۾ مون نئھ ڪي زڙتھ؟ مارا ڪوم را ايوڙا ۾ مون نئھ اي موقعو زڙتھ جي ھون پئيھا ليڏا ووٺو ايسو را پارام ڪُشي رڻي ڪُپر ھمڀڙاوون، ان ڪُشي رڻي ڪُپر ھمڀڙاڀا ٿي جيو مارو ڏون ليڏا رو حق تئھ، او حق نہ ليون.

⑲ ھون آزاد سون ان ڪيا منڪ را قوضام نٿي، توتئي پڻ ھون ٻڌون منڪون رڻي شيوا ڪريا ھارو زوتھ ٻڌون رو ڳلوم ٿيو، زم وڌارئھ گھڻون منڪون نئھ وشواس رکاوون. ⑳ يھودي قوم وازون ڪن ھون اوئون را زم يھودي قوم را نمونا مانھ وويو، زم يھوديون نئھ وشواس رکاوون. ھون تو موسي رون لڪل حڪمون ٿي آزاد سون، توتئي پڻ جيا موسي رون لڪل حڪمون مانھ وويو واڙا سئھ، اوئون ڪن ھون اوئون را زم موسي رون لڪل حڪمون مانھ وويو، زم موسي رون لڪل حڪمون مانھ وويو وازون نئھ وشواس رکاوون. ㉑ ڌاري قوم واڙا جيا موسي رون لڪل حڪمون مانھ نٿي ویتا، اوئون ڪن ھون اوئون را زم موسي رون لڪل حڪمون مانھ نہ وويو، زم موسي رون لڪل حڪمون مانھ نہ وويو وازون

ننه وشواس رکاوون. هُون تو پڳوونَ رُون حُکمون رنه کِلَاف نه وُودو، پڻ ايسُو کريست را ڏيڏل پريم راکيا را حُکم مانه ويتو ريو. (22) جيا وشواس راکيا ۾ کمزور سته ان اڳلُوکا ڌرم ريون واتون مانه شڪ ڪرئ، اُوئون ڪن هُون اُوئون را زم اُوئون رو من صاف رکايا هارُو وونه، زم جيا وشواس راکيا ۾ کمزور سته، اُوئون ننه وشواس رکاوون. هُون ٻڌون منکون هارُو اُوئون ٻڌون را نمونا مانه وُودا وازو ٿيو، زم ڪيوئه پڻ نمونئه ڪيونڪ منکون ننه ڏوهون ري سزا ٿي پڇاوون. (23) هائي ٻڌوئي ڪئين هُون ايسُو را پارام کُشي ري کبر هارُو ڪرونه، زم هُون پيزون ننه هايا کُشي ري کبر مانه يقين رکاوون ان اُوئون پيزو هايا ۾ وائڏو ڪرل آکاشي هڪ ليون.

(24) تمون ننه اي کبر نٿي، ڪي؟ ڊوڙيا را مُقابلا ۾ ٻڌائي منک تو ڊوڙئ، پڻ انصاب رُوڳو هيڪا ننه زڙئ. تيام تمي پڻ وشواس راکيا ۾ ايوئه نمونئه وو، زم تمون ننه پڳوون رو ڏيڏل انصاب زڙئ. (25) هر منک جيو مُقابلو ڪرئ، اُو هر وات ۾ آپ ننه قابو ۾ راکئ. مُقابلا ۾ ڊوڙيا وازا هم ڪرئ، زم



انصاب ۾ پونڙون ٿي ناوُل جيت رو تاج زڙئ، جيو نيٺ ڪتم ٿيشي. پڻ آبي وشواس راکين آپ ننه قابو ۾ راکونه، زم آپون ننه انصاب ۾ تارڻ زڙئ، جيو ڪيڏي پڻ ڪتم نئين ٿئ.

(26) تيام هُون مارو هائي مقصد پورو ڪريا هارُو پُورئي ڪوشش ڪرونه. هُون ايو ڊوڙيا وازا را زم نٿي، جيو امهي ڊوڙئ ريو. نڪو ايو وڊيا وازا را زم سون، جيو وائيرا ۾ نالا نونشا هئئ. (27) پڻ هُون مارو مقصد پورو ڪريا هارُو آپرا ڏيل ننه تڪليب ۾ نوکونه ان آپرا قَوضام راکونه. ام نه ٿئ جي هُون پيزون ننه صحيح نمونئه وُودا رو همپزاوين آپ ڳلت نمونئه وون ان انصاب ليڏا جيوو نه ٿيون.

پڳوونَ ري سُونڊلِ اسرائيلي قوم را زم ٺوه نه ڪروو نڪا اوئون را زم پڳوونَ ٿي سزا زڙشي

10 ① پايون ان پينون، تمي اي وات ياڌ راڪو، جي پڳوونَ امون يهوديون رن ٻڌون ڏاڏون رئي واڌڙا ٿي آڳيوونئي ڪريي ان اوئون ٻڌون ننه سُمونڊ را وس موئين ٿي مٽاڙيا. ② ان اوئي ٻڌي واڌڙا وونهڙ ان سُمونڊ موئين زايا ٿي زوئنه موسيٰ ٿي پويتر سنون ليڏو ان هيون نموننه موسيٰ ننه آڀرو ڳرو مونيو. ③ ان او ٻڌائي هاڳي کاڌو کاتا، جيو پڳوونَ اوئون ننه پرسا ٿي ڏيتو، ④ ان ٻڌائي هاڳي پوئي پيتا، جيو پڳوونَ اوئون ننه پرسا ٿي ڏيتو. ڪم تو او پڳوونَ را ڏيڏل پٿر ٿي نيهرل پوئي پيتا. ان او پٿر پڳوونَ را سُونڊلِ پڇايا واڙا ڪريست رو مثال هتو، جيو پڇايا واڙو اوئون پيڙو هتو. ⑤ هائي ٻڌوئي ڪئين پڳوونَ اوئون هارو ڪريو، توئي پڻ پڳوونَ اوئون موئين ٿي گهڻون منڪون ٿي ڪُش نتو. تيام پڳوونَ اوئون ننه سزا ڏيڏئي، ان او رڻ ۾ ايل اول مري ڳيا.

⑥ هوئ هائي ٻڌي واتون جي ٿي، او آپون هارو هيڪ مثال سئ، زم آبي اوئون را زم ڪراپ ڪيالون مانھ آڀرو من نه لڳاڙون. ⑦ تمي مورتِي ان ڏيوئون مت پوزو، زم اوئون موئين ٿي ڪئينڪ منڪي مورتِي پوزا ڪريي. اوئون را پارام شاستر ۾ لڪل سئ:

”يهودي قوم ري منڪي بيهين مورتِي را مون ۾ کاڌو پيڏو،

ان اوئين مورتِي را مون ۾ شرم ساڏين رميا.“

⑧ آڀئنه پونڌو ڪوم نه ڪروو ڪپنه، زم اوئون موئين ٿي ڪئينڪ منڪي پونڌو ڪوم ڪريو، ان هيڪا ڏي ۾ ٽيوپھ هزار منڪ پڳوونَ ري سزا ري ڪري مري ڳيا. ⑨ آڀئنه پريو ايسور رنه ڪلاڦ وين اوئا ننه رينه نه سڙاوو ڪپنه، زم اوئون موئين ٿي ڪئينڪ منڪي پڳوونَ رنه ڪلاڦ وين اوئا ننه رينه سڙاوي، ان او پڳوونَ ري سزا ري ڪري هاپون رنه ڪرڙيا ٿي مري ڳيا. ⑩ ان تمي پڳوونَ

رئي ڳلا مت ڪرو، زم اُوئون موئين ٿي ڪئينڪ منڪي پڳوون رئي ڳلا ڪري،
ان پڳوون آڀرو ماريا واڙو ڏوت ميلين اُوئون نئه ماريا پرا.

⑪ هائي ٻڌي واتون جي ٿي، اُو هيڪ مثال سئه جي پڳوون ڪراپ منڪون نئه
سزا ڏئه. ان آڀون نئه هڙمايا هارو شاستر ۾ لڪل سئه، جيا ڏنيا را آڪري زمونا
۾ سون. ⑫ تيام جي تمى ام هڙموه جي ”هون آڀرا وشواس ۾ ڏاڍو سون ان
مون ٿي ڏوه نئين ٿئه،“ تو ڪيال راکو. ام نه ٿئه جي تمى آزمتا ۾ پڙي زائو ان
ڏوه ڪرو. ⑬ تمون مانھ ڪوئي ايوو ڏوه ڪريا رو آزمتو نٿي آيو، جيو اڳي
پيزون منڪون مانھ نه آيو هوئه. ان پڳوون هاسو سئه، اُو تمون مانھ ڪوئي ايوو
ڏوه ڪريا رو آزمتو نئين آوا ڏئه، جيا ۾ پورا اوتريا رئي هيئت تمون ۾ نئين
هوئه. پڻ آزمتو ليڏا رئه ٿوئئه اُو تمون هارو آزمتا ۾ پورا اوتريا رئي گهٽئي پڻ
ناوشي، زم تمى ڏوه ڪريا وڳر ڏوروڻ سهي هيڪو.

ڏيوئونون را آسنونا مانھ زائين

ڏيوئونون را نوم مانھ ساڙل مال رو مونھ نه ڪاوو

⑭ تيام، مارون پريمي پايون ان پينون، تمى مورتيون ان ڏيوئونون نئه پوزيا ٿي
شيتي پاڳو. ⑮ هون تمون نئه عقل واڙا هڙمين تمون ٿي وات ڪرونه ريو. تمى
آپ قينصلو ڪرو جي مارئي وات هاسئي سئه ڪا نا. ⑯ زئون پريو پوزن ليڏا
رئه ٿوئئه آڀي وشواسي پڳوون رو ٿورو مومين پيٿالا موئين ٿي پيئونھ، تئيون
آڀي هائي ڌراڪ رس پيڏا ٿي جيا نئه ايسو ڪريست آڀرو لوئي ڪيڏو، ٻڌائي
پيڙا ٿين ايسو ڪريست ٿي واسطو راکونھ، جيئنه آڀون هارو ڪرين آڀرو لوئي
ويوڙايو. هائي صحيح سئه نا؟ ان زئون آڀي روئي پونگين ڪائونھ، تئيون آڀي
هائي روئي ڪاڏا ٿي جيا نئه ايسو ڪريست آڀرو ڏيل ڪيڏو، ٻڌائي پيڙا ٿين
ايسو ڪريست ٿي واسطو راکونھ، جيئنه آڀون هارو ڪرين هوزي مانھ آڀرو جيو
ڏيڏو. هائي صحيح سئه نا؟ ⑰ ڪم تو اُو روئي هيڪ سئه، ان هيوئه نمونھ

آپي وشواسي جيا گهڻا سون هيڪا ڏيل را زم سون، ڪم تو آبي ٻڌائي هيڪ روٽي آيت ۾ وراوين کائونھ.

⑱ اسرائيلي قوم وازون ننه پڻ زوئو، جيا يهودي ڌرم پاڙھ. زئيون او پگھون را نوم مانھ ساڙل مال رو مونھ کائھ، تو او پگھون ٿي واسطو راکھ، جيا را نوم مانھ مال ساڙل سئھ. هائي صحيح سئھ نا؟ ⑲ تو پسنھ مارو ڪيڏا رو مطلب ڪي سئھ؟ مارو مطلب اي نٿي جي ڏيوٽونا را نوم مانھ ساڙل مونھ ڪاس مونھ سئھ، ڪا ڏيوٽونا هاسا سئھ. ⑳ نا نا، هم نٿي. پڻ منڪ جئين ڪئين ڏيوٽونون را نوم مانھ ساڙھ، او پگھون ري پوزا هارو نٿي، پڻ ڏيوٽونون ري پوزا هارو سئھ، جيا هاس ۾ پگھون رھ ڪلاڪ ٿيل شيطون را پاها را ڏوت سئھ. ان مارئي مرضي اي نٿي جي تمي شيطون را پاها رون ڏوتون ٿي واسطو راکو. ㉑ ام ٿي نٿي هيڪتو جي تمي پريو ايسو را نوم مانھ ڏيڏل پيٽالا ٿي پيئو، ان اوٽا پيٽالا ٿي پڻ پيئو، جيو شيطون را پاها رون ڏوتون را نوم مانھ ڏيڏل سئھ. ان اي پڻ نٿي ٿي هيڪتو، جي تمي پريو ايسو را مون ۾ پريو پوزن رئي روٽي کائو، ان شيطون را پاها رون ڏوتون را مون ۾ پڻ ڏيوٽونون را آستونا مانھ ساڙل مونھ کائو. ㉒ آپي وشواسي هم ڪريا ٿي پريو ايسو ننه ريشي بازوا ڪرونھ، ڪي؟ آپي آپ ننه پريو ٿي طاقت وازا هزمونھ، ڪي؟ ان او آپون ننه سزا نئين ڏئھ، ڪي؟

ڏيوٽونون را نوم مانھ ساڙل مونھ وشواسي ڪيون ڪائي هيڪھ

㉓ تمون موئين ڪوڪ ام ڪئھ: ”هون ڏوهون ٿي آزاد ٿيوھ، تيام هوءَ مون ننه ٻڌوئي ڪئين ڪريا رئي موڪل سئھ.“ پڻ هاسي وات اي سئھ، ٻڌي واتون قائيڏا واري نٿي. منڪ پلئھ ام ڪئھ: ”هون ڏوهون ٿي آزاد ٿيوھ، تيام هوءَ مون ننه ٻڌوئي ڪئين ڪريا رئي موڪل سئھ.“ پڻ هاسي وات اي سئھ، جي ٻڌي واتون ايوي نٿي جيون پرموئنه وودا ٿي پيزون رو وشواس پڪو ٿئھ. ㉔ تمي آپرا قائيڏا

هارو نئين، پڻ پيزون را ڦاڻيڏا هارو ڪوشش ڪرو.

25) جيو پڻ مونھ اڏي مانھ ويسائھ، اُو تمھي صاف من ٿي همروم ڪاڻو. اي وات پُونسيا رڻي ضرورت نٿي جي اُو مونھ ڏيوئونون را نوم مانھ ساڙل سڻھ ڪا نا. 26) ڪم تو ٻڌوئي ڪئين پڳوون رو سڻھ، زم شاستر ۾ لڪل سڻھ: ”ڌرتئي ان جئين ڪئين ايٺا مانھ سڻھ، اُو ٻڌوئي ايشور رو سڻھ.“

27) جي ڪوئي منڪ جيو وشواسي نٿي تمون نڻھ ڪاڏا رڻي ڏاوت ڏئھ، ان تماري ڏاوت مانھ زايا رڻي مرضي سڻھ، تو جئين ڪئين اُو تمون نڻھ ڪاڏا هارو ڏئھ، اُو تمھي صاف من ٿي همروم ڪاڻو. اي وات پُونسيا رڻي ضرورت نٿي جي مونھ ڏيوئونون را نوم مانھ ساڙل سڻھ ڪا نا. 28) پڻ جي اُوئڻھ تمون نڻھ ڪوڪ ڪئھ: ”تمارڻھ اي مونھ نہ ڪاوو ڪپڻھ، ڪم تو ڏيوئونون را نوم مانھ ساڙل سڻھ،“ تو تمھي هائي وات ڪيڏا واڙا ري ڪري ان من صاف راڪيا ري ڪري اُو مونھ مت ڪاڻو. 29) هُون تمارا من را پارام نٿي ڪيتو، پڻ اُوئا را من را پارام ڪونھ ريو، جيئڻھ تمون نڻھ هائي وات همپزاوئي هوئھ. ام نہ تڻھ جي تمھي آپري آزادي ري ڪري ايوو ڪوم ڪرو، جيا نڻھ پيزو منڪ آپرا من ۾ ڏوھ هڙمڻھ. هم ڪريا ٿي ڪي ڦاڻيڏو تڻھ؟ 30) هُون پڳوون رو ٿورو مونيَن ڏيوئونون را نوم مانھ ساڙل مونھ تو ڪاڻي هيڪونھ. پڻ جي پيزا منڪ هايا نڻھ ڏوھ هڙمين مارئي ڳلا ڪرڻھ، تو هم ڪريا ٿي هُون آپري پيعزتئي ڪم ڪراوون؟

31) تيام زئون تمھي ڪاڻوھ، ڪا پيئوھ، ڪا جئين ڪئين پڻ ڪروھ، تو تمھي ٻڌوئي ڪئين هيوئھ نمونئھ ڪرو، زم پڳوون را وڪوڻ تڻھ. 32) تمھي ايوئھ نمونئھ وو زم تمھي نہ يهودي ڌرم واڙون نڻھ، نڪو ڌاري قوم رون ڏيوئونون پوزيا واڙون نڻھ، ان نڪو پڳوون ري وشواسي منڌڙي رون منڪون نڻھ وشواس راڪيا ۾ ڏوروڻ پيڏا ڪرو. 33) هيوئھ نمونئھ هُون پڻ هر وات ۾ ٻڌون منڪون نڻھ ڪش راڪونھ. هُون آپرا ڦاڻيڏا هارو نٿي ڪرتو، پڻ گهڻون را ڦاڻيڏا هارو ڪرونھ، زم اُو پڳوون ري سزا ٿي پڇي زائھ ان اُوئون نڻھ تارڻ زڙڻھ.

11 ① تيام تمی مارا نمونا مانھ وو، زم ھون ايسو ڪريست را نمونا مانھ وونھ.

دوشيون رڻ پڳني رو مون راکو

② ھون ايٺا ھارو تمارا وڪوڻ ڪرونھ ڪم تو تمی ھر وات ۾ ماري واتون ياڌ راکيھ، ان وشواس ريون اصلي واتون مانھ ووھ ریا، جي واتون مٿين تمون نڻھ شيڪاڙي تي.

③ پڻ مارئي مرضي سڻھ جي تمون نڻھ ايٺا وات رئي ڪپر ھوئھ. زم ڏيل مانھ ماڻو سڻھ، تم ھز آدمي رو ايسو ڪريست ڏئي سڻھ، ان دوشي رو اوٺا رو آدمي ڏئي سڻھ، ان ايسو ڪريست رو پڳون ڏئي سڻھ. ④ جيو پڻ آدمي آڀرو ماڻو ڍونڪين پراٽنا ڪرڻھ ڪا پڳون رو نياپو ڏئھ، او آڀرو ماڻو زوئڻھ شرم واڙو ھزمين آڀرا ماڻا رئي پيعزتي ڪرڻھ. ان ھم ڪريا ٿي آڀرا ڏئي ايسو ڪريست رئي پيعزتي پڻ ڪرڻھ، جيو ماڻا رو مثال سڻھ. ⑤ ان جي پڻ دوشي اوگھاڙئھ ماڻھ پراٽنا ڪرڻھ ڪا پڳون رو نياپو ڏئھ، او آڀرا ماڻا مانھ ڪئين نہ اوڍيا ٿي آڀرا ماڻا رئي پيعزتي ڪرڻھ. ان ھم ڪريا ٿي آڀرا آدمي رئي پيعزتي پڻ ڪرڻھ، جيو ماڻا را مثال ڀرموئڻھ اوٺا رو ڏئي سڻھ. ڪم تو زئون دوشي آڀرو ماڻو اوگھاڙو راکڻھ، تو ايوي پيعزتي رئي وات سڻھ، زوئڻھ دوشي رو ماڻو ڪنٽر ھوئھ. ⑥ جي ڪوڪ دوشي آڀرا ماڻا مانھ ڪئين نٿي اوڍتي، تو پلئھ او آڀرا مٿوٺا پڻ ڪتراوئھ پرا. پڻ اي تو ھاو ڪراپ وات سڻھ جي دوشي آڀرا مٿوٺا ڪتراوئھ پرا ڪا روڏئي ٿئھ پري. تيام اوٺا رڻھ آڀرا ماڻا مانھ سونڙي اوڍو ڪپئھ. ⑦ پڻ آدمي رڻھ آڀرو ماڻو نہ ڍونڪو ڪپئھ، ڪم تو پڳون اوٺا نڻھ آپ جيو نايوھ ان اوٺا رڻھ پڳون رو مون ڏيکارو ڪپئھ. پڻ دوشي رڻھ آڀرا آدمي رو مون ڏيکارو ڪپئھ. ⑧ ڪم تو شروع ۾ جڳت نايا رڻھ ٿوئھ پڳون آدمي نڻھ دوشي ٿي نٿو نايو، پڻ دوشي نڻھ آدمي ٿي ناوي ٿي. ⑨ ان نڪو پڳون آدمي

نئ ڏوشي هارو نايو تو، پڻ ڏوشي نئ آڏمي هارو ناوئي ٿئي. ⑩ تيام ڏوشي رءُ آڀرو ماڻو ڊونڪين آڀرا حق ڀرموئڻه آڀرئي عزت راکوو، ڪم تو آڪاشي ڏوت ٻڌوئي ڪئين ڏيڪهه جي تماري ڀڳتي ۾ ڏوشي ڪيوئ نمونئ هئ.

⑪ توئي پڻ آڀون موئين جيا ڀرڻو ايسو ٿي واسطو راکونئ، ڏوشي ان آڏمي هيڪا ڀڙا ٿي ڌار نٿي، پڻ ٻڌون رءُ ڀڙا ٿين هڀ ۾ ريوو. ⑫ ڪم تو زم شروع ۾ پيرهيئن ڏوشي آڏمي ٿي ناول هئي، تم همئڻه آڏمي پڻ ڏوشي ٿي ڀڙا ٿهه. ان ٻڌوئي ڪئين ڀڳوون رو ناول سئ.

⑬ تمي آپ ڦينصلو ڪرو. اي نائوڪو سئ ڪي، جي ڏوشي اوگهاڙئ مائڻه ڀڳوون ٿي ڀرائنا ڪرئ؟ ⑭ منڪون ۾ اي وات ساوئي ڏيڪاڙل نٿي، ڪي؟ جي آڏمي آڀرا مٿوڙا لونبا راکهه، تو آڏمي هارو پيعزتي رئي وات سئ. ⑮ پڻ جي ڏوشي آڀرا مٿوڙا لونبا راکهه، تو ڏوشي هارو مون رئي وات سئ، نا؟ ڪم تو ڏوشيون نئ لونبا مٿوڙا ايئا هارو ڏيڏل سئ زم اوئون ٿي اوئون رو ماڻو ڊونڪل رءُ، زوئڻه سونڙي اوڍل هئ.

⑯ جي تمون موئين ڪوئي هيا وات را پارام پحث ڪروا ڪرئ، تو هون روڳو اتو ڪونئ، امون مڪ شيلون رو رواز نٿي جي ڏوشي ڀڳتي ۾ اوگهاڙو ماڻو راکهه، ان نڪو ڀڳوون ريون وشواسي منڌريون ۾ ايوو رواز سئ.

ڀرڻو ڀوزن ليڏا رءُ توئڻ ڪيوئ نمونئ ويوو



⑰ هوءَ ايئا وات ۾ هون تمارا وڪوڻ نٿي ڪرتو، پڻ هون تمون نئ حڪم ڏيونئ، ڪم تو زئيون تمي وشواسي منڌري ۾ ڀڙا ٿيوئ، تئين قائيڏو نٿي ٿيتو پڻ نقصون ٿهه.

⑱ پيرهيئن وات اي سئ. مئين هومپزيوه جي زئيون تمي وشواسي منڌري ۾ ڀڙا ٿيوئ، تئين تمي آپت ۾ هڀ نٿي راکتا پڻ تمون موئين ڌار ڌار پالتي

سٺ. ان مون نٿو يقين سٺ جي هيا ۾ ڪئينڪ تو هاسئي هوشي. (19) ڪم تو تمون موئين ڌار ڌار پالتي ضرور هوشي، پڻ گهٽ ۾ گهٽ هيا ٿي وات ساوئي ٿڻه جي تمون موئين ٿي ڪوڻ ڪوڻ هپ راکين پڳوون ري وات مانھ وٺ ريو. (20) تيام هيا پالتي واڙي وات ري ڪري، زئون تمي پريو پوزن ليڌا هارو پيڙا ٿين ڪاڻوھ، تئون تمي پريو ايسو نٿو ياڌ ڪرين ڪاڏو نٿي ڪاتا. (21) ڪم تو زئون تمي ڪاڻوھ، تئون هر هيڪ پيزون رئي وات زويا وڳر ڪاڏا ۾ پڙه پرا. ڪوڪ پوکا ري زائھ، ان ڪوڪ ڪائي پين مست ٿي زائھ. (22) ڪاڏا پيڌا هارو تمارو آڀرو آڀرو گهر نٿي ڪي؟ ڪا تمي پڳوون ري وشواسي منڌري نٿو گهٽ هزموه؟ ان گريبون رئي پيعزئي ڪروا ڪروھ؟ هون هيا را پارام تمون نٿو ڪي ڪون؟ هيا هارو هون تمارا وڪوڻ ڪريھ، ڪي؟ هيا وات هارو هون تمارا وڪوڻ ڪم ڪرين ڪرون؟

(23) ڪم تو پريو ايسو رئي اصلي وات جئي مئين شيڪي، او هاڳي وات مئين تمون نٿو پڻ شيڪاڙي، جي پريو ايسو، جئي رات زهلوٽو، اوٽه رات روٽي ليڌي، (24) ان اوٽا هارو پڳوون رو ٿورو مومين اوٽا نٿو پونگي، ان ڪيڏو: ”اي مارو شير سٺ، جيو تمون هارو سٺ. ماري همپار ۾ امروم ڪرتا ريا.“ (25) هيوٽه نمونٽه ڪاڏا ڪيڙ اوٽه ڌراڪ رس رو پيئالو ليڌو ان ڪيڏو: ”اي نوا وسن رو پيئالو سٺ، جيو وسن مارا لوئي ٿي ٻونڌل سٺ. ماري همپار ۾، زئون پڻ تمي پيئو، امروم ڪرتا ريا.“ (26) هوٽه زئون پڻ تمي هائي روٽي ڪاڻوھ ان هيا پيئالا ٿي پيئوھ، تو تمي پريو ايسو را موت رئي وات همپزاوتا ريوھ، زئون هوڏي او وڙي پاسو نه اوٽه.

(27) تيام جيو ڪوئي پريو ايسو رو مون نه راکين هائي روٽي ڪاڻه ڪا هيا پيئالا ٿي پيئوھ، او پريو ايسو را شير ان لوئي رئي پيعزئي ڪريا ٿي ڏوھ ڪرئھ. (28) تيام پريو پوزن ليڌا مور هر منڪ رٽھ آڀرا من ۾ زووو ان آڀرون ڏوهون ٿي توپونه ڪروو ڪپٽھ، ان پسٽھ او روٽي ٿي ڪاڻه ان پيئالا ٿي پيئھ. (29) ڪم تو

جيو ڪوئي امروم ڪاڻھ پيئھ، ان ايٺا وات رو ڪيال نٿي راکتو جي ڀرڻو ايسو هيا روتي نٿه آڀرو ڏيل ڪيڏوھ ان آبي ٻڌائي، جيا هائي روتئي ڪاڻوھ، ڀرڻو ايسو را ڏيل را زم هيڪ سون، تو او منڪ هم ڪريا ٿي آپ نٿه ڏوهاري ڪرين آپ مانھ سزا لئھ. (30) تيام تمون موئين ٿي گھڻا منڪ پيمار ان ڏوھڙا سئھ، ان ڪئينڪ مري پڻ گياھ. (31) پڻ جي آبي آپ آڀرا من ۾ زوين توبونھ ڪرونت، تو آبي آپ نٿه ڏوهاري ڪرين آپ مانھ سزا نه ليونت. (32) ڪم تو ايشور آپون نٿه ايٺا حياتي ۾ سزا تيام ڏئھ زم آپون نٿه هزماوئھ، متون نيا رٿه ڏي آپون مانھ ڏنيا رون ڪراپ منڪون را زم هميش رٿي سزا رو ڦينصلو نه ٿئھ.

(33) تيام، مارون پريمي پايون ان پينون، زئين تمي ڀرڻو ايسو نٿه ياد ڪريا هارو ڪاڌو ڪاوا پيزا ٿيوھ، تئين تمي هيڪا پيزا رٿي وات زوئو. (34) جي ڪيا نٿه ڀوک لاڳئي هوئھ، تو او پلئھ مور ٿي آڀري گھري ڪائي لئھ، متون تمارا پيزا ٿيا رٿه توتھ ڪوئي ايوني وات نه ٿئھ، جيا ٿي تمون نٿه پگھون ٿي سزا زڙئھ. باقي پيزي واتون، زئين هون تمون ڪن آويھ، تئين هون تمون نٿه هزماويھ.

پويتر آتما ري ڏيڏل ڪڙا را پارام

12 ① تمي ڪت ۾ پويتر آتما ري ڏيڏل قرق قرق ڪوم ڪريا ري ڪڙا را پارام پونسيوھ. هوئھ، پايون ان پينون، هون تمون نٿه هيا را پارام ڪبر ڏيوا ڪرونھ. ② تمون نٿه تو ڪبر سئھ جي اڳي، زئين تمي ڌاري قوم واڙا پگھون مانھ وشواس نٿا راکتا، تئين تمي مورتيون ان ڏيوئونون هوما تٿائين ڀولائي گيا ان مورتيون ري پوزا ۾ لاڳي گيا، جي ڀولي نٿي هيڪتي. ③ تيام هون تمون نٿه ايٺا رٿي ڪبر ڏيوا ڪرونھ جي ڪم ڪرين ڪبر پاڙو جي منڪ پويتر آتما ري ڪڙا ٿي ڀولئھ ريو ڪا نا. جي ڪوئي منڪ ام ڪئھ جي "ايسو پگھون رو پتل ٿئھ!" تو هيا ٿي ٿاڀئي ٿئھ جي او پگھون را ڏيڏل پويتر آتما ري ڪڙا ٿي نٿي ڀولتو. ان جي ڪوئي منڪ ام ڪئھ جي "ايسو ڀرڻو سئھ،" تو

هايا ٿي ٿاڀيئي ٿڻه جي اُو پَوِتر آتما ري ڪڙا ٿي ٻولڻه ريو.

④ آڀون وشواسيون نڻه ڦرڦ ڦرڦ نمونا رئي ڪڙا تو ڏيڏل سڻه، پڻ هيڪڻه پَوِتر آتما سڻه جيو ٻڌون نڻه هائي ڪڙا ڏڻه. ⑤ ان شيوا ڪريا را تو ڦرڦ ڦرڦ نمونا سڻه، پڻ هيڪڻه پريو ايسو سڻه جيا رئي شيوا آڀي ڪرونه. ⑥ ان پڳوون ري ڪڙا ٿي آڀي تو ڦرڦ ڦرڦ ڪوم ڪرونه، پڻ هيڪڻه پڳوون سڻه جيو آڀون ٻڌون نڻه هائي ٻڌائي ڪوم ڪريا رئي ڪڙا ڏڻه.

⑦ هر وشواسي ۾ پَوِتر آتما رئي ڪڙا ايٺا هارو ساوئي ٿڻه، زم اوٺا ري هر هيڪ نڻه ڏيڏل ڪڙا ٿي ٻڌون نڻه ڦاڻيڏو ٿڻه. ⑧ ڪم تو ڪياڪ نڻه پَوِتر آتما ٿي اي ڪڙا ڏيڏل سڻه جي اُو پڳوون را پاها ٿي عقل ري واتون همپڙاڻه، ان ڪياڪ نڻه هاڳي پَوِتر آتما ٿي اي ڪڙا ڏيڏل سڻه جي اُو پڳوون را پاها ٿي ڪبر پاڙين اُونڌي واتون همپڙاڻه. ⑨ ڪياڪ نڻه هاڳي پَوِتر آتما ٿي ايوو يقين ٿڻه جي اُو پڳوون ري ڪڙا ٿي ڪوم ڪرڻه. ڪياڪ نڻه هاڳي هيڪاه پَوِتر آتما ٿي منڪون نڻه هازا هورا ڪريا رئي ڪڙا زڙڻه. ⑩ ڪياڪ نڻه پرسا ڏيڪاڙيا رئي ڪڙا زڙڻه، ڪياڪ نڻه پڳوون رو نياپو ڏيڏا رئي ڪڙا زڙڻه، ان ڪياڪ نڻه اي زوٽيا رئي ڪڙا زڙڻه جي منڪ پَوِتر آتما ري ڪڙا ٿي ڪا شيطون ري ڪڙا ٿي ڪوم ڪرڻه ريا. ڪياڪ نڻه ڦرڦ ڦرڦ ٻولي ٻوليا رئي ڪڙا زڙڻه، ان ڪياڪ نڻه اي ڪڙا زڙڻه جي اُو ڪڙا ٿي زڙل ٻوليون رو مطلب هڙمڻه ان ڪيڏل وات همپڙاڻه. ⑪ هائي ٻڌائي ڪوم هيڪاه هاڳي پَوِتر آتما ري ڪڙا ٿي ٿڻه، جيو آڀري مرضي ڀرموڻه هر هيڪ وشواسي نڻه ڌار ڌار ڪوم ڪريا رئي ڪڙا وراوي ڏڻه.

وشواسي منڌڙي هيڪا ڏيل را زم سڻه

⑫ زم ڏيل هيڪ سڻه ان اوٺا را اُوڙيا گهڻا سڻه، توئي پڻ ڏيل را گهڻا اُوڙيا ٻڌائي پيڙا ٿين هيڪ ڏيل ٺاڻه، تم ايسو ڪريست هيڪ سڻه ان آڀي وشواسي

ٻڌائي پيڙا ٿين ايسو ڪريست را ڏيل را زم سون. ⑬ ڪم تو آبي ٻڌي هيڪاه پويتر آتما ري ڪڙا ٿي پويتر سنون ليدوه زم آبي هيڪي وشواسي منڌري ۾ پيڙا ٿين هيڪا ڏيل را زم ٿيون، پلئه يهودي قوم را هوئون ڪا ڌاريون قومون را هوئون، پلئه ڳلوم هوئون ڪا آزاده هوئون، ان آيون ٻڌون نئه پڳوون پويتر آتما ڏيدوه.


⑭ هوئه منڪ رو ڏيل روڳو هيڪا اوزيا رو نٿي هوتو، پڻ گهڻون اوزيون رو ٺاول سئه. ⑮ جي پڳ ام ڪئه: ”هون تو هاڻ نٿي، تيام هون ڏيل رو اوزيو نٿي،“ تو هايا ٿي پڳ ڏيل رو اوزيو نئين هوئه، ڪي؟ ⑯ ان جي ڪون ام ڪئه: ”هون تو اونڪ نٿي، تيام هون ڏيل رو اوزيو نٿي،“ تو هايا ٿي ڪون ڏيل رو اوزيو نئين هوئه، ڪي؟ ⑰ جي ٻڌو ڏيل اونڪ هوئت، تو ڪم ڪرين هومپوٽ؟ ان جي هومپوٽيا هارو ٻڌو ڏيل ڪون هوئت، تو ڪم ڪرين هونگهٽ؟ ⑱ پڻ هاس ۾ پڳوون آپري مرضي پرموئنه هر هيڪ اوزيا نئه آپرا آپرا ڪوم هارو آپري آپري جڳا ۾ ڏيل موئين راڪيوه. ⑲ جي ٻڌون اوزيون ري جڳا ۾ روڳو هيڪا قسم رو اوزيو هوئت، تو اوئا نئه ڏيل ڪم ڪرين ڪٿ؟ ⑳ پڻ هاس ۾ اوزيا تو گهڻا سئه، پڻ ڏيل هيڪ سئه.

㉑ اونڪ هاڻ نئه ام نٿي ڪي هيڪئي: ”مون نئه ٿارئي ضرورت نٿي.“ نڪو ماڻو پڳون نئه ڪي هيڪئ: ”مون نئه تمارئي ضرورت نٿي.“ ㉒ پڻ جيا ڏيل را اوزيا وڌارنه گهٽ لاڳئ، او پڻ گهڻا ضروري سئه. ㉓ ان جيا ڏيل را اوزيا آيون نئه ائمونيتا لاڳئ، اوئون رو آبي وڌارنه مون راڪونه. جيون اوزيون ري ڪري آبي لازي مروئه، اوئون را پارام آبي عزت رو وڌارنه ڪيال راڪونه. ㉔ پڻ او اوزيا جيون نئه آبي ڍونڪيا جيوا نٿي هزمتا، اوئون را پارام عزت رو ڪيال راڪيا رئي ضرورت نٿي. پڳوون ڏيل نئه ايوئه نمونئه نايو، جي جيو گهٽ مون وازو اوزيو سئه، اوئا نئه وڌارنه مون ڏيدوه، ㉕ زم ڏيل را اوزيا آپ نئه هيڪا پيڙا ٿي ڌار نه هزمت، پڻ ٻڌائي اوزيا هيڪا پيڙا نئه پراپر هزمين هيڪا

پڙا رو کيال راکڻه. ②6 جي هڪا اُوزيا نڻه تڪليپ ٿڻه، تو هيا ري ڪري ٻڌون اُوزيون نڻه ڏک ٿڻه. جي هڪا اُوزيا نڻه مون زڙڻه، تو هيا ري ڪري ٻڌائي اُوزيا کُش ٿڻه.

②7 هَوتُه تمِي وشواسِي ٻڌائي پڙا ٿين ايسُو ڪريست را ڏيل را زم سو، ان هر هڪ هڪوڪا اُوزيا را زم سو. ②8 ان زم پڳوون اُوزيون نڻه آڀرا آڀرا ڪوم هارُو ڏيل موئين پڙا ڪرياه، تم پڳوون وشواسِي منڌِي ۾ منڪون نڻه آڀرا آڀرا ڪوم هارُو پڙا ڪرياه. پيرهيان نمپر ۾ مُڪ شيلا، پڙا پڳوون رو نياپو ڏيڏا واڙا، ترٿما وشواس ري واتون شيڪاڙيا واڙا، ان پسڻه اُو منڪ جيا پڳوون ري ڏيڏل ڪڙا ٿي پرسا ڏيڪاڙڻه، پسڻه اُو منڪ جيا پڳوون ري ڏيڏل ڪڙا ٿي منڪون نڻه هاڙا هورا ڪرڻه، پڙون رڻي مڌت ڪرڻه، آڳيونئي ڪرڻه، ڪا ڪڙا ٿي زڙل قرق قرق ٻولي ڪرڻه. ②9 ڪي ٻڌائي وشواسِي مُڪ شيلا سڻه؟ ڪي ٻڌائي پڳوون رو نياپو ڏيڏا واڙا سڻه؟ ڪي ٻڌائي شيڪاڙيا واڙا سڻه؟ ڪي ٻڌائي پڳوون ري ڪڙا ٿي پرسا ڏيڪاڙڻه؟ ③0 ڪي ٻڌون نڻه اي ڪڙا ڏيڏل سڻه جي اُو منڪون نڻه هاڙا هورا ڪري هڪڻه؟ ڪي ٻڌائي ڪڙا ٿي زڙل ٻولي ڪرڻه؟ ڪي ٻڌائي هيوي ٻولي هزمين ڪيڏل وات همپڙاوي هڪڻه؟ نا نا، هر هڪ نڻه آڀرا آڀرا نمونا رڻي ڪڙا زڙل سڻه. ③1 توڻي پڻ تمِي آيو ڪوم ڪريا رڻي ڪڙا ليڏا هارُو هڪو، جيا ڪوم ٻڌون هارُو ٻڌون ٿي قائيڏا واڙا سڻه. ان هَوتُه هُون تمون نڻه ٻڌون ٿي ناڻوڪو وُڍا رو نمونو ڏيڪاڙونه.

پرِيم ٿي ويو ٻڌون ٿي ناڻوڪو وُڍا رو نمونو سڻ



13 ① پلڻه هُون پڳوون ري ڏيڏل ڪڙا ٿي منڪون ري ان آڪاشي ڏوتون ري ٻولي ڪرون، پڻ جي هُون پرِيم نٿي راکتو، تو هُون ڪستازون ان ڪونشيون را زم رُوگڻي نالئي

کاش کرونه. ② ان پلئه هُون پڳوونَ رو نياپو ډيون، ان هُون پڳوونَ ري ٻڌي اُونڌي واتون زوټون، ان مُون نئه پڳوونَ را پارام ٻڌي کبر هوئه، ان مُون نئه ايوو يقينَ هوئه جي ڏونگرون نئه هيڪل هٽاوون پرا، پڻ جي هُون پريم نٿي راکتو، تو هُون ڪئين نٿي. ③ ان پلئه هُون مارو ٻڌوئي ڪئين پڳوونَ را نوم مانه وراوين ڏيون پرو، ان وشواس نه ساڏيا ري ڪري هُون ٻڙيا هارو تيار سون، پڻ جي هُون پريم نٿي راکتو، تو مُون نئه ڪئين ڦاڻيڏو نٿي.

④ پريم رو مطلب سئه منڪون ٿي صبر ڪرو، ان ميرپونئي ڪرو. پريم رو مطلب سئه ريشي نه پڙو، وڏائي نه ڪرو، مگهرور نه ٿيو، ⑤ ڪراپ نمونئه نه ويو، روڳو آڀرا ڦاڻيڏا هارو نه ڪرو، رينهٽيٽار نه ٿيو، پيزون رون ڪرل ڏوهون ري ڪري آڀرا من ۾ رينه نه راکو، ⑥ ان ڪراپ ڪومون مانه ڪش نه ٿيو، پڻ ٿاڻوڪيون واتون مانه ڪش ٿيو. ⑦ پريم رو مطلب سئه هميش سهو، هميش يقينَ راکو، هميش اُميدَ راکو، ان هميش ڏوروڻ ۾ صبر ڪرو. ⑧ پريم ڪيڏي ڪتم نٿي ٿيتو. پڻ پڳوونَ را پاها ٿي زڙل نياپا، اُو نيٺ ڪيائي ڪوم را نئين رئه. ڪرا ٿي زڙل ٻولي، اُو نيٺ ڪتم ٿي زاشي. پڳوونَ را پارام کبر، اُو نيٺ ڪيائي ڪوم رئي نئين رئه. ⑨ ڪم تو زٽي آڀون نئه کبر سئه، اُو پوري کبر نٿي. ان زئون پڻ آڀي پڳوونَ رو نياپو ڏيونه، آڀي پڳوونَ ريون واتون رئي پوري کبر نٿي ڏيتا. ⑩ پڻ زئون دنيا ري پڇاڙي ۾ پڳوونَ رو مقصدَ پورو ٿيشي، ٿيون جئين ڪئين پورو نٿي، اُو ڪيائي ڪوم رو نئين رئه. ⑪ مثال، زئون هُون ٻار هتو، ٿيون هُون ٻار را زم ٻولتو، ٻار را زم ڪيال ڪرتو، ان ٻار را زم سوچتو. پڻ زئون هُون موتو ٿيوه، تو ٻارون ري واتون ڪيائي ڪوم ري نه ري، ان مئين اُوئون نئه ساڏيه پري. ⑫ هيوئه نمونئه همئنه آڀي زوئنه ٿڪ ۾ پڳوونَ نئه زوئنه ريا ان پڳوونَ آڀون نئه زوئنه زهونڪو ڏيڪيام آئنه. پڻ اُوئه ٿوئنه آڀي پڳوونَ نئه روپرو ڏيڪشون. همئنه مُون نئه روڳئي ٿوڙي کبر سئه. پڻ اُوئه ٿوئنه هُون پڳوونَ نئه پورئه نمونئه اوڙڪيه، جيوئه نمونئه پڳوونَ مُون نئه اوڙڪه.

⑬ تو پسئہ پوٽر آتما رٿي ڏيڌل ٻڌون نمونون رٿي ڪڙا ڪتم ٿيشي، ان روڳا وشواس، پروسو، ان پريم، اي ترڻ ئي هميش هُڏي ريشي. پڻ هاڻيون ترڻيون ۾ ٻڌون ٿي نائوڪو پريم سئہ.


پڳوونَ رو نياپو ڏيوو

ڪڙا ٿي زڙل ٻولي ڪريا ٿي وڌارءُ ڦاٽڻا وازو سئہ

14 ① پورا من ٿي پريم راڪيا رٿي ڪوشش ڪرو، ان پوٽر آتما رٿي ڏيڌل قرق قرق نمونا رٿي ڪڙا ليڌا هارو هڪو، ڪاس ڪرين پڳوونَ رو نياپو ڏيڌا رٿي ڪڙا ليڌا هارو هڪو. ② ڪم تو جيو منڪ ڪڙا ٿي زڙل ٻولي ٻولئہ، اُو منڪون ٿي نئين پڻ پڳوونَ ٿي واتون ڪرئہ ريو. ڪم تو ڪوئي پڻ اُوڻا رٿي وات نٿي هڙمتو، پڻ اُو پوٽر آتما ري ڪڙا ٿي پڳوونَ ري اُوڻڌي واتون آڀرا من ٿي ڪرئہ ريو. ③ پڻ جيو منڪ پڳوونَ رو نياپو ڏئہ، اُو منڪون ٿي واتون ڪرئہ ان هيوتہ نمونئہ اُوڻون رو وشواس پڪو ڪراوئہ، اُوڻون نئہ حوصلو ڏئہ، ان اُوڻون رٿي هيئت وڌاوئہ. ④ جيو ڪڙا ٿي زڙل ٻولي ٻولئہ، اُو آڀرو وشواس پڪو ڪرئہ، پڻ جيو پڳوونَ رو نياپو ڏئہ، اُو وشواسي منڌڙي رون منڪون رو وشواس پڪو ڪراوئہ.

⑤ مارئي مرضئي اي سئہ جي تمڻي ٻڌائي ڪڙا ٿي زڙل ٻولي ڪرو. پڻ هاڻي ٿي وڌارئہ نائوڪئي وات اي سئہ جي تمڻي پڳوونَ رو نياپو ڏيو. جيو پڳوونَ رو نياپو ڏئہ، اُو ڪڙا ٿي زڙل ٻولي ڪريا وازا ٿي وڌيڪ سئہ. ڪم تو جي ڪڙا ٿي زڙل ٻولي ڪريا وازو آڀري ڪيڌل واتون هڙمين نٿي همڙاوتو، تو هاڻي ٿي وشواسي منڌڙي رون منڪون رو وشواس وڌارئہ پڪو نئين ٿئہ.

⑥ تيام، پايون ان پينون، جي هُون تمون ڪن آوون ان تمون ٿي ڪڙا ٿي زڙل ٻولي ڪرون، پڻ نڪو ايوي وات همڙاوون جئي پڳوونَ مون ڪن ساوئي ڪرئہ، نڪو پڳوونَ رٿي ڪوڪ اُوڻڌي وات همڙاوون، نڪو پڳوونَ رو نياپو ڏيون، ان



نڪو ڪئينڪ شيڪاڙون، تو مارا ٻوليا ٿي
تمون ننه ڪي قائيدو ٿيشي؟ ⑦ سازون
رئي وات پڻ همريئم سته. ڪوئي پڻ ساز
هوئه، پلئه وونهڙي هوئه ڪا تنبورو
هوئه، جي ساز واڳتو هوئه، پڻ واڳيا ٿي
راڳ نه نهئه، تو راڳ رئي ڪم ڪرين
ڪبر پڙشي؟ ⑧ ان جي ڪوڪ جنگ ۾
وڊيا هارو هڙائي وڳاڙهه، پڻ هڙائي رو
آواز چٽو نٿي همپراتو، تو ڪوڻ مقابلو

ڪريا هارو تيار ٿيشي؟ ⑨ هيوه نمونه، جي تمي ايوئي ٻولي ڪرو جيا رو
مطلب هزميام نٿي آوتو، تو ڪم ڪرين ڪبر پڙشي جي تمي ڪي ڪوه ريا؟
تماري ڪيڏل واتون ڪيائي ڪوم ري نئين ته. ⑩ دنيا ۾ تو الاهي گهڻي قرق
قرق ٻولي سته، ان هر ٻولي رو آڀرو آڀرو مطلب سته. ⑪ توهي پڻ، جي مون نه
ڪياڪ ٻولي رو مطلب هزميام نٿي آوتو، تو ٻوليا وارا نه هون جت ان ڌاريو
لاڳيه، ان او پڻ مون نه جت ان ڌاريو لاڳشي. ⑫ ان زئون تمي ڪڙا ٿي زڙل
ٻولي ڪروه، تئيون تماري وات پڻ همريئم سته. تمي پويتر آتما رئي ڏيڏل قرق
قرق نمونا رئي ڪڙا ليڏا هارو هڪوه، تو پسته ايوا نمونا رئي ڪڙا ليڏا هارو من
لڳاڙو، جيا ٿي وشواسي منڌري رون منڪون رو وشواس پڪو ته.

⑬ تيام، جيو منڪ ڪڙا ٿي زڙل ٻولي ٻولئه، اوتا رنه پڳون ٿي اي پراٿنا
ڪرو، جي اوتا نه آڀري ڪيڏل وات هزميا رئي ان همپايا رئي ڪڙا زڙه.
⑭ جي هون ڪڙا ٿي زڙل ٻولي ۾ پراٿنا ڪرون، تو هون پويتر آتما ري ڪڙا
ٿي آڀرا من ٿي پراٿنا ڪرونه ريو، پڻ مارو ڏيماڳ پراٿنا ۾ ڪئين نٿي ڪرتو.
⑮ تو پسته مارنه ڪي ڪرو ڪپهه؟ هون آڀرا من ٿي پراٿنا ڪريه، ان هون آڀرا
ڏيماڳ ٿي پڻ پراٿنا ڪريه. هون آڀرا من ٿي پڙن ڳاويه، ان هون آڀرا ڏيماڳ

ٿي پڻ پزن ڳاويھ. ①٦ تيام تمی وشواسي منڌري ۾ ايوئي ٻولي ڪرو جيئي
 ٻڌائي هزمي هيڪڻھ، نڪا جي تمی پويتر آتما ري ڪڙا ٿي آڀرا من ٿي پڳوون
 رو ٿورو مونتا هوڻو، تو جيو منڪ هائي ٻولي هزمتو نٿي، او تمارئ ٿورو مونيا
 مانھ ڪم ڪرين ”آمين“ ڪيشي؟ او تو هزمتو نٿي جي تمی ڪي ڪوھ ريا.
 ①٧ تمی آپ پلئھ ٺاڻوڪئ نمونئ پڳوون رو ٿورو مونتا هوڻو، پڻ هم ڪريا ٿي
 پيزا رو وشواس وڌارئ پڪو نئين ٿئھ.

①٨ هُون پڳوون رو ٿورو مونونھ جي هُون ڪڙا ٿي زڙل ٻولي تمون ٻڌون ٿي
 وڌارئ ڪرونھ. ①٩ پڻ وشواسي منڌري ۾ جي هُون پيزون نئھ شيڪاڙيا هارو روڳا
 پونس ويڻ آڀرا ڏيماڳ ٿي ٻولون، توئي پڻ او ويڻ ڪڙا ٿي زڙل ٻولي ۾ هزارون
 ويئون ٿي ٺاڻوڪا سئھ، ڪم تو منڪ ماري واتون هزمي هيڪڻھ.

②٠ ڀايون ان پينون، تمی هيا وات ۾ ننڪون ٻاڙون جيوئي عقل مت راکو.
 تمی ننڪون ٻاڙون را زم ڪراپ ڪومون را پارام سوچوئي مت، پڻ موئون منڪون
 جيوئي عقل راکو. ②١ جي ٻولي هزميام نٿي آوتي، اوئون را پارام شاستر ۾ ام
 لڪل سئھ:

”ايشور ام ڪئھ:

هُون پيزيون ٻوليون ۾

ان ڌاري قومون رون منڪون هات

ايٿا اسرائيلي قوم نئھ ماري واتون همپڙاويھ.

توئي پڻ او مارئي وات نئين مونئھ.

②٢ هيا شاستر ري وات پرمونئھ پڳوون اسرائيلي قوم رون منڪون نئھ سزا ڏين
 ڌاريون رئھ حوالئھ ڪريا پرا، ڪم تو او پڳوون ري واتون نٿا مونتا، ان اوئون
 هارو پيزي ٻولي جي هزميام نٿي آوتي پڳوون ري سزا رو هيڪ نيشون هتي.
 هيونئ نمونئ ڪڙا ٿي زڙل ٻولي جي هزميام نٿي آوتي وشواس راکيا وڙون نئھ
 ڪئينڪ شيڪاڙيا هارو نٿي، پڻ وشواس نه راکيا وڙون هارو هيڪ نيشون سئھ

جي ڀڳوون اوتون نٿو سزا ڏيڻي. پڻ ڀڳوون را ڏيڻل نياپا اوتون منڪون هارو نٿي
جيا وشواس نئين راکڻ، پڻ اوتون منڪون هارو سٺه جيا وشواس راکيا وڙا سٺه.
(23) تيام، جي وشواسي منڌڙي را ٻڌائي منڪ هڪا ماڳ پيڙا ٿيل هوڻه ان او
ٻڌائي ڪڙا ٿي زڙل ٻولي ڪرڻ، ان ڪڻڪ ايو منڪ اوڻه جيا هيا وات
را پارام نٿي زوڻا ڪا وشواسي نٿي، تو او تمون نٿه ڳونڌا هڙمڻي. (24) پڻ جي
ٻڌائي ڀڳوون رو نياپو ڏيڻا هوڻ، ان ڪوڪ ايو منڪ اوڻه جيو وشواسي نه
هوڻه ڪا هيا وات را پارام نه زوڻو هوڻ، تو ٻڌون ري واتون هومپڙين اوڻا نٿه
ڪهر پڙشي جي او ڏوهاري سٺه ان او ڀڳوون رڻي سزا ڪاڏا جيوو سٺه. (25) اوڻا
را من ري هٿال واتون ساوي ٿيڻي. ٿيون او زمي مانھ پڙين ڀڳوون رڻي پوزا
ڪرشي ان ٻڌون نٿه همپڙاوشي جي ”هاس ۾ ڀڳوون تمون وسا سٺه.“

وشواسي منڌڙي ۾ ڀڳنڻي ڪيوڻ نمونءَ ڪرو

(26) تيام، پايون ان پينون، تمارڻه ام ويو. زئون تمي ڀڳنڻي هارو پيڙا ٿيو،
ٿيون هر هڪ تيار ٿين اوڻه زم ڪوڪ پڙن ڳاوڻ، ڪوڪ ڪڻڪ شيڪاڙڻ،
ڪوڪ ايوڻي وات همپڙاوڻه جي ڀڳوون اوڻا ڪن ساوڻي ڪرڻي هوڻ، ڪوڪ
ڪڙا ٿي زڙل ٻولي ڪرڻ، ڪوڪ ڪڙا ٿي زڙل ٻولي ۾ ڪيڏل وات رو مطلب
همپڙاوڻه. پڻ ٻڌي واتون ٻڌون رو وشواس پڪو ڪريا هارو هوڻ.

(27) جي ڪوڪ ڪڙا ٿي زڙل ٻولي ڪرڻ، تو روڳا ٻي ڪا وڌ ۾ وڌ ترڻ زڻا
وارا وارا ٿي ٻولڻ، ان هڪ زڻو ڪيڏل واتون رو مطلب همپڙاوڻه. (28) جي اوڻه
ڪوڻي ايو نٿي جيا ۾ ڪڙا ٿي زڙل ٻولي هڙميا رڻي ڪڙا سٺ، تو ڪڙا ٿي زڙل
ٻولي ڪريا وڙو وشواسي منڌڙي ۾ ماڻ رڻ، ان زئون او هڪلو هوڻه ٿيون
ڀڳوون ٿي هم ٻولڻ.

(29) جيا ڀڳوون رو نياپو ڏيڻا وڙا سٺ، اوتون موڻين ٿي ٻي ڪا ترڻ زڻا ٻولڻ،
ان پيڙا اوتون ريون ڪيڏل واتون رڻي جونچ ڪرڻ، جي او ڀڳوون را پاها ٿي سٺ

ڪا نا. ③① جي هيڪ ڀڳوونَ رو نياپو ڏيڏا واڙو ٻولتو هوئ، ان ڀڳوونَ پڙا پيئل منڪ ڪن آپريئي ڪئينڪ وات ساوئي ڪرئ، تو پيرهيون منڪ جيو ٻولئ ريو، او ماٺ ڪرئ، زم پڙا نئ ٻوليا رو موقعو زڙئ. ③② ٽمي تو ٻڌائي هيڪوڪو هيڪوڪو ٽين ڀڳوونَ رو نياپو ڏي هيڪو، زم ٻڌائي هوپڙين شيڪي هيڪئ، ان ٻڌون نئ حوصلو زڙئ. ③③ ڀڳوونَ رو نياپو ڏيڏا واڙا پويتر آتما ري ڪڙا ٿي ڀڳوونَ رو نياپو ڏئ، توئي پڻ او آپري مرضي پرموئئ ٻولي هيڪئ ان ماٺ ڪري هيڪئ. ③④ ڪم تو ڀڳوونَ ٿائي ان ڪاش ڪرايا واڙو نٿي، پڻ هپ ان شونتئي رکايا واڙو سئ.

زم ڀڳوونَ رون سونڊل منڪون ريون ٻڌيون وشواسي منڌڙيون ۾ رواز سئ، ③④ تم وشواسي منڌڙي ۾ ڀڳتي رئ توتئ ڏوشي شونتئي راکئ. ڪم تو اوئون نئ واتون ڪريا رئي آگيا نٿي، پڻ اوئون رئ وشواسي منڌڙي رون آگيونون را ڪيڏا هيٺ ريو، زم شاستر ۾ لڪل سئ. ③⑤ جي او ڪياڪ وات را پارام ڪبر پاڙوا ڪرئ، تو او گهري آٻرا آڌمي ٿي پونسئ. ڪم تو اي ناوڪئي وات نٿي جي ڏوشي وشواسي منڌڙي ۾ واتون ڪرئ.

③⑥ ٽمي اوپروٽ مت ٿيو! ڀڳوونَ رو وچن تمون ڪن ٿي پڪڙي گيو، ڪي؟ ڪا ڀڳوونَ رو وچن روگو تمون هوڏي پوگيو، ڪي؟ ③⑦ جي تمون موئين ٿي ڪوئي ام هڙمئ جي او ڀڳوونَ رو نياپو ڏيڏا واڙو سئ ڪا اوئا نئ پويتر آتما ٿي ڪڙا زڙل سئ، تو اوئا رئ اي زوٽو ڪپئ جي زئون هون تمون نئ اي واتون لڪونھ ريو، هون پريو ايسو ري اڪتباري ٿي حڪم ڏيونھ ريو. ③⑧ جي ڪوئي هائي وات هاسئي نه مونئ، تو ڀڳوونَ اوئا نئ پڻ هاسو نئين مونئ.

③⑨ تيام، مارون پايون ان بينون، ڀڳوونَ رو نياپو ڏيڏا رئي ڪڙا ليڏا هارو هڪو، ان ڪڙا ٿي زڙل ٻولي ڪريا رو مت روڪيا. ④① پڻ ٻڌوئي ڪئين ناوڪئ ڍاڙئ ان صحيح نمونئ ٿيو ڪپئ.

ايسو را جيوي اونيا رئي شاپنتي

15 ① هوه، پا يون ان بينون، هون تمون نئه ايسو ري كشي ري كبر را پارام ياد ذوراووننه، جي مئين تمون نئه همپراوئي تئي. تمي او مونئي تئي، ان اوتا مانه تمي ووه پڻ ريا. ② هايا ري كري تمون نئه تارڻ زڙشي. پڻ شرط اي سئه جي تمي پڪا يقين ٿي ماريون همپراول پگهون ريون واتون مانه وينا ريو، نڪا جيو وشواس تمي اوڻيو تو، او ڪيا ئي ڪوم رو نئي.

③ ڪم تو او وشواس ري اصلي واتون جي مئين پزون ٿي شيڪي تي، اوئون واتون نئه مئين ٻڌون ٿي ضروري واتون هزمين تمون نئه شيڪاڙي تي، جي پگهون رو سونڊل پچايا واڙو، ايسو ڪريست، شاستر ۾ اڳي لڪل واتون پرموئنه آڻيون ڏوهون نئه ماڻ ڪرايا هارو مري گيو، ④ اوتا نئه مقوم موئين پوريو، ان ترئمئه ڏي شاستر ۾ اڳي لڪل واتون پرموئنه پگهون اوتا نئه جيوي اوناڙيوه. ⑤ جيوي اونيا ڪيڙ اوئه پطرس نئه ڏيڪاڙو ڏيڏو، ان تيا ڪيڙ آڀرون ٻارون سونڊل شيلون نئه ڏيڪاڙو ڏيڏو. ⑥ تيا ڪيڙ هيڪئه توئنه پونسون هوئون ٿي وڌيڪ وشواسيون نئه ڏيڪاڙو ڏيڏو، جيون موئين ٿي گهڻا منڪ هزون هوڏي جيوئا سئه، پڻ ڪئينڪ تو مري گيا. ⑦ تيا ڪيڙ اوئه يعقوب نئه ڏيڪاڙو ڏيڏو، ان پسئه ٻڌون مڪ شيلون نئه ڏيڪاڙو ڏيڏو. ⑧ نيٺ ٻڌون ڪيڙ اوئه مون نئه پڻ ڏيڪاڙو ڏيڏو. هون ايو باڙ را زم سون جيو آڀرا صحيح ٿوئا مانه پيدا نئي ٿيو، ڪم تو هون آڀرا صحيح ٿوئا مانه نئين، پڻ ٻڌون مڪ شيلون ڪيڙ مڪ شيلو ٿيوه.

⑨ هون مڪ شيلون موئين ٻڌون ٿي گهٽ سون. هون ايو پڻ نئي جي هون مڪ شيلو ڪيورائون، ڪم تو مئين پگهون ري وشواسي منڌڙي رون منڪون نئه تنگ ڪريا تا. ⑩ توئي پڻ هون مڪ شيلو سون، ڪم تو پگهون مون مانه ڪريا ڪرين مون نئه مڪ شيلو نايو. ان پگهون ري ڪرل ڪريا ٿي گهڻو ڦاڻيڏو ٿيو. مئين اوئون ٻڌون مڪ شيلون ٿي وڌارئه مينت ڪرئي. هون آڀري هيمنت ٿي ڪئين

نه ڪري هيڪيو، پڻ پڳوونَ مون پيڙو هتو ان مون نئه هائي ڪوم ڪريا رئي هيئت ڏيتو ريو. ⑪ تيام ايئا ۾ ڪئين وات نئي جي مئين گهڻو ڪوم ڪريوه، ڪا پيڙي مڪ شيلي گهڻو ڪوم ڪريوه. امي مڪ شيلا تو ايسو را پارام هائي هاڳي واتون همپڙاوونه، ان تمي هايون هاڳي واتون مانه يقين ڪريو.

ايسو رءُ جيوِي اُونيا ٿي اي ٺاڀڻي تئھ جي پڳوونَ آپون نئه پڻ جيوِي اُوناڙشي

⑫ امي مڪ شيلا ٻڌون نئه ام همپڙاوونه جي پڳوونَ ايسو ڪريست نئه مرلون موئين ٿي جيوِي اُوناڙيوه. تو پسته تمون موئين ٿي ڪوڪ اي ڪم ڪئھ ريا، جي پڳوونَ مرل منڪون نئه جيوِي نئي اُوناڙتو؟ ⑬ جي پڳوونَ مرل منڪون نئه جيوِي نه اُوناڙت، تو پسته اونه ايسو ڪريست نئه نه جيوِي اُوناڙيو هوت. ⑭ ان جي پڳوونَ ايسو ڪريست نئه جيوِي نه اُوناڙيو هوت، تو پسته اماري همپڙاول واتون ڪيائي ڪوم ري نه تئ، ان تمارو وشواس پڻ ٺالو تئ. ⑮ ان امي پڳوونَ را پارام ڪوڙئي هاڪ پريا وڙا تئ. ڪم تو امي هاڪ پرين همپڙايو جي پڳوونَ ايسو ڪريست نئه جيوِي اُوناڙيوه. پڻ جي پڳوونَ مرلون نئه جيوِي نه اُوناڙت، تو اماري پرل هاڪ ڪوڙئي تئ. ⑯ ڪم تو جي پڳوونَ مرلون نئه جيوِي نه اُوناڙت، تو اونه ايسو ڪريست نئه پڻ جيوِي نه اُوناڙيو هوت.

⑰ جي پڳوونَ ايسو ڪريست نئه جيوِي نه اُوناڙيو هوت، تو تماره وشواس راکيا رو ڪئين ڦاڻيڏو نه تئ، تمي هزون هوڏي ڏوهون ۾ ڦاڻل هوت، ⑱ ان جيا منڪ ايسو ڪريست مانه وشواس راکين مري گياھ، اوتون نئه هميش رئي سزا زڙئي هوت. ⑲ جي آبي روڳا ايئا حياتي هارو ايسو ڪريست مانه پروسو راکونت ان مريا ڪيڙ آپون نئه ڪئين نه زڙت، تو ٻڌون منڪون موئين ٿي آپون مانه ٻڌون ٿي گهڻو قياس ڪروو ڪپت.

⑳ پڻ هاسئي وات تو اي سئ، پڳوونَ ايسو ڪريست نئه مرلون موئين ٿي

جيوي اوناڙيوھ. ان ڀڳوون ايسو ڪريست نٿو ٻڌون مور جيوي اوناڙيا ٿي اي
 ٿاڀي ڏيڏيھ جي او آڀرون ٻڌون منڪون نٿو موت ٿي ضرور جيوي اوناڙشي.
 ②1 ڪم تو زم هيڪا منڪ ري ڪري موت رٿي وات ٿي، تم هيڪا منڪ ري
 ڪري ڀڳوون مرل منڪون نٿو جيوي اوناڙشي. ②2 ڪم تو زم پيرهيان منڪ آدم
 ٿي واسطو راکيا ري ڪري ٻڌائي منڪ مري زائھ، تم زتا منڪ ايسو ڪريست
 ٿي واسطو راکئھ، اوئون ٻڌون نٿو ڀڳوون جيوي اوناڙشي. ②3 پڻ هر هيڪا آڀرا
 آڀرا وارا مانھ جيوي اونيھي. مور ٿي ايسو ڪريست جيوي اونيھي، ان تيا ڪيڙ
 ايسو ڪريست را پاسا آيا رٿو توتھ ايسو ڪريست را منڪ جيوي اونيھي. ②4 ان
 تئيون ڏنيا رٿي ڀڄاڙي ٿي، ان جيو پڻ ڀڳوون رٿو ڪلاڦ سٺھ، جيا رٿي پڻ
 آڳيووني، اڪتياري ان ڪڙا سٺھ، ايسو اوئون ٻڌون نٿو ڪتم ڪرشي ان پستھ
 راز ڀڳوون ٻاپ رٿو حوالھ ڪرشي. ②5 ڪم تو ام ضرور ٿي جي ايسو آپ
 تئيون هوڏي راز ڪرشي، زئيون هوڏي او آڀرون ٻڌون ڏشمئون نٿو هراوين آڀري
 ڀڳي نه لڳاڙتھ. ②6 نيٺ او آڪري ڏشمڻ نٿو پڻ ڪتم ڪرشي، ان او ڏشمڻ موت
 سٺھ. ②7 ڪم تو شاستر ۾ ام لڪل سٺھ:

”ڀڳوون ٻڌوئي ڪئين اونا رن ڀڳون هيٺ راکيوھ.“

هوئ، زئيون شاستر ۾ لڪل سٺھ جي ٻڌوئي ڪئين ايسو هيٺ راکل سٺھ، تو
 وات ساوئي سٺھ جي ڀڳوون، جيو ٻڌوئي ڪئين ايسو هيٺ راکيا وڙو سٺھ،
 او آپ ايسو هيٺ نٿي. ②8 تيام، زئيون ٻڌوئي ڪئين ايسو هيٺ راکل هوشي،
 تئيون ايسو آپ نٿو آڀرا ٻاپ ڀڳوون هيٺ راکشي، جيئھ اڳي ٻڌوئي ڪئين
 آڀرا ڏيڪرا ايسو هيٺ راکيو تو. هيوئ نمونھ ڀڳوون ٻڌيون واتون ۾ ٻڌون رو
 ڏي ٿي.

②9 ڀڳوون تو ضرور مرلون نٿو جيوي اوناڙشي. جي هم نه ٿت، تو جيا منڪ
 مرلون هارو پويتر سنون لئھ، او هم ڪيا هارو ڪرٽ؟ ③0 ان جي ڀڳوون مرلون
 نٿو جيوي نه اوناڙت، تو پستھ امي هر توتھ آڀرو جيو ڪترام ڪم نوڪت؟

③۱ پايون ان بينون، هُون تمون ننه هاس ڪونه جي هُون تو تاريخ موت را ڪترام سون. هُون تمون ٿي ڪوڙ نٿي ڪرتو، ڪم تو هُون تمون مانه ڪُش سون جيا ماري واتون هومپڙين آڻا پڙيو ايسو ڪريست ٿي واسطو را ڪوه. ③۲ ايتنه افسس شهر ۾ انا گهڻا منڪ مارنه ڪلاڦ سئه، جي هُون زوئنه جهنگلي زنا ورون ٿي مقابلو ڪرونه ريو. جي هُون ايتا دنيا ۾ قائيڏا هارو هم ڪرونه، تو مون ننه ڪيوو قائيڏو ٿئڻ؟ جي پڳوون مرلون ننه جيوي نه اوناڙئڻ، تو آبي ايتا ڪيٽي پرموئنه وٽ: ”ڪائي پي ليو، هَواري تو مري زاشون.“

③۳ پڻ ڀولائي مت زانو! هاسي ڪيٽي تو اي سئه:

”ڪراپ منڪون پيڙا ريا ٿي نائوڪا لڇڻ ڪراپ ٿي زائه.“

③۴ تيام تمي هونش راڪين پڳوون ري وات مانه وو، ان اي ڪوڙي وات مونيا رو ڏوه مت ڪرو، جي پڳوون مرلون ننه جيوي نٿي اوناڙتو. جيا هائي ڪوڙي وات موننه، اوئون ٿي پاھو ڪرو، ڪم تو تمون موئين ڪئينڪ ايوا منڪ سئه جي پڳوون را پارام ڪئين نٿي زوئتا. هُون تمون ننه ايتا هارو ڪونه زم تمي للزي مرين صحيح وات مانه وو.


جيوي اونيا ڪيڙ منڪون رو ڏيل ڪيوو هوشي

③۵ توئي پڻ تمون موئين ٿي ڪوڪ ام ڪيشي: ”پڳوون مرل منڪون ننه ڪم ڪرين جيوي اوناڙشي؟ اوئون رو ڏيل ڪيوو هوشي؟ او تو هڙين ڪتم ٿي گيوه.“

③۶ جيو هم سوچنه، او پوڙو سئه. تمون ننه اي ڪهر نٿي ڪي؟ زئون پيڙ پوڪنه، تو زئون هُوڏي پيڙ هڙي نٿي زاتو، تئين هُوڏي ڦصل نٿي اوگتو. ③۷ ان جيو پيڙ منڪ پوڪنه، اونا پيڙ رو روپ اونا پيڙ ٿي اوگل ڦصل را روپ جيوو نٿي، پڻ او روگو ڏوٽو سئه، پلئه او ڪٽڪ رو هوئه ڪا پيڙا ڪياڪ ڦصل رو هوئه. ③۸ پڳوون ننه زم وئنه، هم پيڙ ننه ناوئه، ان هر هيڪ پيڙ ري جنس ننه اونا را آڀرا آڀرا نمونا پرموئنه ناوئه.

③۹ پيزو مثال. ٻڌون را ڏيل هيڪ جيو نٿي هوتا. پڻ منڪون را ڏيل، زناوَرُون را ڏيل، پڪيون را ڏيل، ان مشيون را ڏيل، اُو ٻڌائي قرق قرق نمُونون را سٺه.

④۰ آڪاش ان ڌرتي رٿي وات پڻ زوئو. آڪاش مانھ شينھون سٺه، ان ڌرتي مانھ پڻ شينھون سٺه. پڻ جي شينھون آڪاش مانھ سٺه، ان جي شينھون ڌرتي مانھ سٺه، اُو هيڪ جيوي نٿي هوتي. آڪاش ري شينھون سوجھرا وڙي سٺه، پڻ ڌرتي ري شينھون سوجھرا وڙي نٿي. ④۱ ان آڪاش ريون شينھون ۾



قرق سٺه. ڏي رو سوجھرو هيڪ سٺه، تو انزوئاڙيا رو سوجھرو پيزو سٺه، ان تارون رو سوجھرو وڙي پيزو سٺه. ان تارون ۾ پڻ قرق سٺه. هر هيڪ تارا رو آڀرو آڀرو سوجھرو سٺه.

④۲ هوئ، مرلون رٿه جيوي اُونيا رٿي وات همريئم سٺه. زم پوڪل پيز رو رُوپ اُوڳل قصل را رُوپ جيوو نٿي، تم جيو ڏيل مقوم موئين پورائھ، اُو اُوئا ڏيل جيوو نٿي جيا نٿه پڳوون جيوي اوناڙشي. جيو ڏيل مقوم موئين پورائھ، اُو کتم ٿيا وازو سٺه، پڻ جيو ڏيل پڳوون جيوي اوناڙشي، اُو ڪيڏي کتم نئين ٿئ. ④۳ جيو ڏيل مقوم ۾ پورائھ، اُو مونوازو نٿي، پڻ جيو ڏيل پڳوون جيوي اوناڙشي، اُو مونوازو سٺه. جيو ڏيل مقوم ۾ پورائھ، اُو هيٺو سٺه، پڻ جيو ڏيل پڳوون جيوي اوناڙشي، اُو طاقت وازو سٺه. ④۴ جيو ڏيل مقوم ۾ پورائھ، اُو ايئا ڏنيا وازو سٺه، پڻ جيو ڏيل پڳوون جيوي اوناڙشي، اُو آڪاش وازو سٺه.

زم ڏنيا وازو ڏيل هوئ، تم آڪاش وازو ڏيل پڻ هوئ. ④۵ زم شاستر ۾ لڪل سٺه:

”پيرهون منڪ آدم جيوتو ٿيو.“

پڻ ڪيڙليو منڪ ايسو، جيو آدم ري پيڏي رون ٻڌون منڪون رو ڌڻي سٺه، اُوئھ آڪاشي ڏيل ليڌو ان هميش رو جيون ڏيڏا وازو ٿيو. ④۶ پڻ مور ۾ آڪاش وازو ڏيل نٿي هوتو، پڻ ڏنيا وازو ڏيل هوئ، ان پسٺه ٿيا ڪيڙ آڪاش وازو ڏيل

هوئھ. (47) پیرھیون منک آدم ایئا ڌرتي رو هتوان ماتي ٿي ناوُل هتو، پڻ ڪيڙليو منک ايسو آکاش رو هتو. (48) جيا منک ڌرتي مانھ رھ، اوئون رو ڏيل ڌرتي را منک آدم را زم ماتي رو سئھ. ان جيا منک آکاش ۾ رھ، اوئون رو ڏيل آکاش را منک ايسو را زم آکاشي سئھ. (49) زم آپون نئھ ڏنيا را منک آدم را زم ماتي رو ناوُل ڏيل زڙيوھ، تم آپون نئھ آکاش را منک ايسو را زم آکاشي ڏيل زڙشي.

(50) پايون ان پينون، هون تمون نئھ کاتري ٿي ڪونھ ريو، اي ڏيل جيو مونھ ان لويي رو سئھ، اي آکاش ۾ پگھون را راز ۾ ماڳي نئين زائي هيڪئھ. ان نڪو اي ڏيل جيو ڪئم ٿيا وازو سئھ، ڪئم ٿيا وڳر هميش هوڏي ريشي. (51) مارئي وات هوميڙو، هون تمون نئھ پگھون رئي هيڪ اونڌي وات هميڙاونه. آپون وشواسيون موئين ٿي ٻڌائي منک نئين مرئھ، پڻ پگھون آپون ٻڌون نئھ ڀڏالوشي. (52) هٿمارا جهٽ ۾ آپون نئھ ڀڏالوشي، زئيون اورڻ شينگڙو واڳشي، جيا ٿي پگھون اي کڀر ڏيشي جي ڏنيا ڪئم ٿيا مانھ سئھ. ڪم تورڻ شينگڙو واڳشي، ان پگھون مرل منڪون نئھ جيوي اونارشي زم او ڪيڏي نه مرئھ، ان اوئھ ئي



ٿوئئھ آپون نئھ ڀڏالوشي. (53) ڪم تو ضروري سئھ جي ايئا ڪئم ٿيا وازا ڏيل ري جڳا ۾، آپون نئھ ايوو ڏيل زڙشي جيو ڪيڏي ڪئم نئين ٿئھ، ان ايئا مريا وازا ڏيل ري جڳا ۾، آپون نئھ ايوو ڏيل زڙشي جيو ڪيڏي نئين مرئھ. (54) اوئھ ٿوئئھ، زئيون ڪئم ٿيا وازا ان مريا وازا ڏيل ري جڳا ۾ آپون نئھ ايوو ڏيل زڙشي جيو ڪيڏي ڪئم نئين ٿئھ ان ڪيڏي نئين مرئھ، تئيون شاستر ۾ لڪل اي وات پوري ٿيشي:

”پگھون رئي جيت ٿيھ ان موت رئي هار ٿيھ.“

(55) ”موت رو قوضو هوئھ ڪئم ٿي گيوھ.“

موت رئي پيڪ هوئھ ڪيل گئيھ؟“

⑤6 منڪ موت را قَوْضام پڙڻھ ان موت ٿي پيڻائھ ڪم تو اُو ڏوھ ڪرڻھ، ان منڪ ڏوھاري ٿڻھ، ڪم تو اُو شاستر ۾ لڪل پڳوون رون حُڪمون مانھ نٿي وِيتا. ⑤7 پڻ پڳوون رو شُڪر سڻھ، جي اُو آڀڻا پڙيو ايسو ڪريست ري ڪري آڀون نڻھ موت را قَوْضا ٿي سڏاوين تارڻ ڏڻھ.

⑤8 تيام، مارون پريمي پايون ان پينون، تمي پڪو وشواس راکو، منڪون ري ڪوڙي واتون مت مونو، ان هميش نائوڪئ نمونئ پڙيو ايسو رڻي شيوا ڪرتا ريو، ڪم تو تمون نڻھ ڪهر سڻھ جي جڻي مينت تمي پڙيو ايسو ري شيوا ۾ ڪروھ، اوثا رو ايوزو ضرور زڙشي.

يروشلم شهر رون يهودي قوم رون وشواسيون هارو اِمدَاة

16 ① تمي ڪت ۾ پڳوون رون سُونڊل منڪون هارو اِمدَاة را پارام پُونسيوه، جڻي يروشلم شهر رون گريپ وشواسيون نڻھ ڏيشون. زم مئين گلتيه صوپا رون وشواسي منڌريون رون منڪون نڻھ اِمدَاة ڏيڌا را پارام حُڪم ڏيڌو، هم تمي پڻ ڪرو. ② هر آچار رڻھ ڏي تمون موئين ٿي هر هيڪ آپري ڪمائي پرموئڻھ ڪئينڪ پڻيها اِمدَاة هارو پچاوين راکڻھ، زم مارڻھ تمون ڪن آيا رڻھ ٿوئڻھ پڻيها پيڙا ڪريا رڻي ضرورت نه پڙڻھ. ③ زئيون هُون تمون ڪن آويه، تئيون جيا منڪ تمي سُونڊيا هوشي، اُوئون نڻھ هُون چني ڏين تمارڻي ڏيڌل اِمدَاة ڏيوا يروشلم شهر ميليھ. ④ جي مارڻھ پڻ زايا رو ٺيڪ لاڳڻھ، تو هُون اُوئون پيڙو زائيھ.

پولوس، تيمٿئيس، ان اپلوس رڻھ گرتنيون ڪن زايا را پارام

⑤ هُون مڪڏنيھ صوپا ۾ تين پستھ تمون ڪن آويه، ڪم تو هُون مڪڏنيھ صوپا ۾ زائيھ. ⑥ هُون تمون ڪن ڪئينڪ وڪت هُوڏي ريھ، ڪا زويام پورو شيئازو تمون ڪن ريھ، زم تمي پنڌ هارو مارڻي مدت ڪرين مُون نڻھ آڳڙ ميلي هيڪو،

جيئن پڻ هون زائيه. ⑦ مارئي مرضي نٿي جي هون همٿه تمون ڪن آون ان روڳو ٿوريڪ وار ريون. پڻ مارئي اميد اي سٺ، جي پريو رئي مرضي هون، تو هون گهڻا ڏي تمون ڪن ريه. ⑧ پڻ هون پينتيڪوسٽ پرپ هوڏي ايتي افسس شهر ۾ ريه. ⑨ ڪم تو ايتي مون نٺه ايسو را پارام همپرايا رو گهڻو موقعو سٺه ان گهڻا منڪ وشواس اوئنه ريا، پڻ گهڻا منڪ مارنه ڪلاڦ پڻ سٺه. ⑩ جي تيمٽيس تمون ڪن آون، تو ڪيال راکيا جي تم اوتا ٿي ٺاٺوڪه نموننه وو، زم اوتا نٺه ڪئين پيڪ نه هون. ڪم تو او پڻ پريو رو ڪيڏل ڪوم ڪرڻه ريو، زم هون ڪرونه ريو. ⑪ تيام ڪوئي پڻ اوتا نٺه گهٽ نه هزمٺه. پڻ اوتا نٺه پريم ٿي ملين هپ ٿي ررونو ڪريا، زم او مون ڪن پاسو آون. ڪم تو هون ان مون پيرا وشواسي پائي اوتا رئي وات زوئونه ريا. ⑫ تمي ڪت ۾ پائي ايلوس را آيا را پارام پونسيوه. مٿين اوتا نٺه گهڻو گهڻو ڪيڏو تو جي او وشواسي پايون پيرو تمون ڪن آون. پڻ اوتا رئي مرضي نٿي جي او همٿه تمون ڪن آون. توي پڻ زئون اوتا نٺه موقعو زڙيو، تيون او ضرور آوشي.

اڪري وانون

⑬ هر هيڪ وات ۾ هوشيار ريو، پڪو وشواس راکين اوتا مانه وينا ريو، حوصلو راکو، ان هيٺ ٿي وو. ⑭ جئين ڪئين تمي ڪرو، او پريم ٿي ڪرو. ⑮ پايون ان پينون، هون تمون نٺه هيڪ منٽ ڪرونه. تمون نٺه ستفناس ري اڪائي را پارام ڪبر سٺ، جي يونان صوپا ۾ هائي پيرهيٺين اڪائي سٺه جيا را ٻڌائي پاتي وشواسي ٿيا، ان هائي پگهون رون سونڊل منڪون رئي شيوا ڪريا رئي زميوارئي آپ مانه ليڏي. ⑯ هون تمون ٿي اي منٽ ڪرونه جي تمي هيون منڪون رو ڪيڏو مونو، ان اوئون ٻڌون رو ڪيڏو مونو، جيا آپون پيرا پگهون ري شيوا ۾ ڪوم ڪرڻه ان مينٽ ڪرڻه. ⑰ هون گهڻو ڪش سون جي ستفناس،

فُرتُونائس، ان اخيڪس تمون ٿي مُون ڪن آيا، ڪم تو مارئي تمون ٿي مليا رئي
 سِڪ هٿي، پڻ ايئون رن آيا ٿي مارئي سِڪ پورئي ٿي. (18) ايئي مارئي هيٺ
 وڌاوي ان تمارئي هيٺ پڻ وڌاوي. تيام تم هيون منڪون رو مون راکو.

پولوس گرتيس شهر رن وشواسيون ٿي موگلاوڻه

(19) ايٺ ري آسيه صوپا ري وشواسي منڌري تمون ننه نمسڪار ڪن. اڪولہ ان
 اوٽا رئي ڏوشي پرسڪلہ، ان جي وشواسي منڌري اوئون ري گهري پيڙي ٿن،
 او تمون ننه پريو ايسو ٿي واسطو راکيا ري ڪري گهٽا گهٽا نمسڪار ڪن.
 (20) ايٺ را ٻڌائي وشواسي پائي ان پينون تمون ننه نمسڪار ڪن. تم هيڪا
 پيزا ٿي پويتر نموننه پريم ٿي ملو. (21) هون پولوس آپرون هاڻون ٿي تمون ننه
 نمسڪار لکونھ ريو.

(22) جي ڪوئي پريو ايسو ٿي پريم نٿي راکتو، تو او پگيون رو پتل ٿن!
 آپڻو پريو ايسو وڙي پاسو آيا وڙو سڻ.

(23) پريو ايسو تمون مانھ ڪڍا ڪن! (24) ايسو ڪريست ٿي واسطو راکيا
 ري ڪري هون تمون ٻڌون ٿي هميش پريم راکونھ.

گرنٽيون را نوم مانه لکل پيزا کت رئي هزموتئي

کت لکيا وازو

اي کت پولوس لکيو، ان کت لکيا رڻ توتڻه ٽيمٽيس پڻ اوتڻا پيزو هتو (2 گرنٽيون 1:1). پولوس اي کت آپرا ترڻما چکر مانه لکيو، زڻيون او گرنٽس شهر موئين ايسو را پارام همپزايا هارو گيو تو (مک شيلون را کوم 18-1:18)، ان تيا کيتر افسس شهر موئين زائين (1 گرنٽيون 8:16)، گرنٽيون را نوم رو پيرهئون کت لکيو تو ان طيطس هات مليو تو. تيا کيتر پولوس مڪدنيه صويا م طيطس ٽي ملوا گيو ان اوتڻه طيطس ٽي گرنٽيون را پارام کبر پاڙي (2 گرنٽيون 13:2، 7-5:7)، ان پست پيرهئون کت لکيا ٽي سوئونڪ مئينون کيتر، اندازم 55ع م سال ري پچاري م، اي پيزو کت لکيو.

کت کيون منكون هارو لکيو

پولوس اي کت گرنٽس شهر رون وشواسي منكون هارو ان يونان صويا رون پيزون بڏون وشواسيون هارو لکيو (2 گرنٽيون 1:1). گرنٽس شهر رون منكون نڻه گرنٽي کيتا. گرنٽس يونان ملڪ رو زونو شهر هتو، حيا نڻه رومي قوج اوين يونگيوت پرو ان پست هتو سالون کيتر روم رون قوجيون ان منكون هارو وڙي نايو. رومي حڪومت يونان ملڪ نڻه آپرو هيڪ صوبو نايو. گرنٽس شهر واپار ڪريا هارو نائوڪي جگا مانه هتو ان يونان صويا رو بڏون ٽي موتو شهر هتو. اوتڻه روميون پيزا گهڻا يوناني قوم را منڪ ان ڪئينڪ يهودي قوم را منڪ پڻ ريتا. گرنٽس شهر يونڊا کوم م مشور هتو. ان اوتڻه هيڪ افروڊيتي نومي ڏيو رو منڊر هتو، جيئن منڪ ڏيو رئي پوزا ڪريا م پونڊو کوم ڪرتا.

زڻيون پولوس اوتڻه ايسو را پارام همپزايو، تڻيون گهڻا منڪ وشواسي تيا (مک شيلون را کوم 8:18).

کت لکيا رو مطلب

پولوس اي کت لکيو ڪم تو طيطس پولوس رو پيرهئون کت گرنٽس شهر رون وشواسيون نڻه ڏين پاسو اوين ڪيڏو تو جي اوت ري گهڻي وشواسي پيرهيان کت ري واتون مونيه پڻ هزون ڪئينڪ منڪ سڌ حيا ڪوڙ هاڪلين آپ نڻه مک شيلا ڪهڻ ان پولوس رڻ ڪلاق بولڻه ريا. او ڪوڙا منڪ ڪيتات ريا جي پولوس ڪوڙ ڪرڻه، ڪم تو اوڻ شروع م بي وار آيا را پارام ڪيڏو تو پڻ تيا کيتر کت م رڳو هيڪ وار آيا را پارام لکيوه. او اي پڻ ڪيتات ريا

جي پولوس هاس م مُڪ شيلو نتي پن امداد هارو ڏيڏل پيها آب ڪانه ريو. تيام ايٿا ڪت م پولوس ڪُرتس شهر رون وشواسيون نه ٿايتي ڏٺه جي او هاسو ان ايموندار منڪ سء، ان اوئون نه هزمائوه جي اوئه آيرا آيا رو پروگروم ڪم پڌلوه (2 ڪُرتيون 12:1-16:7)، اوئون نه يروشلم شهر رون گريب وشواسيون هارو امداد را پيها تيار ڪريا رو ڪنه (2 ڪُرتيون 1:8-15:9)، ان اوئون نه همپزاوهه جي او ضرور اوئون ڪن اوشي ان او مُڪ شيلا رتي اڪتياري راکتون اوئون نه هزمایا هارو تيار سء (2 ڪُرتيون 10:1-11:12، 10:13-14:12).

ايٿا ڪتاب را شاستر تي پيزا حوالا:

2 ڪُرتيون 16:6 حزقي ايل 27:37	2 ڪُرتيون 1:1 ڪوم 19-1:9
2 ڪُرتيون 17:6 يسعياہ 11:52	2 ڪُرتيون 1:1 ڪوم 3-1:16
2 ڪُرتيون 17:6 حزقي ايل 41:20	2 ڪُرتيون 1:1 ڪوم 5:18
2 ڪُرتيون 18:6 2 سموئيل 14:7	2 ڪُرتيون 1:1 1 ڪُرتيون 17:4
2 ڪُرتيون 5:7 ڪوم 1:20	2 ڪُرتيون 8:1 ڪوم 1:20-1:19
2 ڪُرتيون 15:8 خُروج 18:16	2 ڪُرتيون 19:1 ڪوم 18-1:18
2 ڪُرتيون 1:9 1 ڪُرتيون 4-1:16	2 ڪُرتيون 3:2 1 ڪُرتيون 14:4
2 ڪُرتيون 9:9 زبور 9:112	2 ڪُرتيون 5:2-6 1 ڪُرتيون 5-1:5
2 ڪُرتيون 15:9 يوحنا 3:16	2 ڪُرتيون 13:2 ڪوم 1:20
2 ڪُرتيون 17:10 یرمياہ 24:9	2 ڪُرتيون 7:3 خُروج 30-28:34
2 ڪُرتيون 3:11 پيدائش 19-1:3	2 ڪُرتيون 13:3 خُروج 35-33:34
2 ڪُرتيون 24:11 استشنا 3-2:25	2 ڪُرتيون 6:4 پيدائش 3:1
2 ڪُرتيون 33-32:11 ڪوم 25-23:9	2 ڪُرتيون 13:4 زبور 10:116
2 ڪُرتيون 14:12 ڪوم 3-1:20	2 ڪُرتيون 2:6 يسعياہ 8:49
2 ڪُرتيون 1:13 ڪوم 3-1:20	2 ڪُرتيون 16:6 اخبار 12:26
2 ڪُرتيون 1:13 استشنا 15:19	2 ڪُرتيون 16:6 یرمياہ 38:32

ڪرنٿيون

را نوم مانھ پولوس رو لکل پيزو ڪت

1 ① ھون لکيا وازو پولوس سون، جيو پڳوون ري مرضي پرموئنه ايسو
ڪريست رو هيڪ مڪ شيلو سونيل سون. اي ڪت مارا پاها ٿي ان آڻا
وشواسي پائي تيمٽيس را پاها ٿي لکل سئ.
ڪرنٿس شهر ري پڳوون ري وشواسي منڌري رون پريمي پايون ان بينون، ان
يونان صويا رون ٻڌون پڳوون رون سونيل منڪون،
② آڻو ٻاپ پڳوون ان پريو ايسو ڪريست تمون مانھ ڪريا ڪرئ ان تمون
نئ هڪي راکئ!

پولوس پڳوون رو ٿورو مونئھ جي پڳوون اوئا مانھ ڏٺيا ڪريئھ
③ پڳوون را وڪوڻ ٿئ، جيو آڻا پريو ايسو ڪريست رو پڳوون ان ٻاپ سئ! او
هميش قياس ڪريا وازو ٻاپ سئ ان هر تڪليب ۾ حوصلو ڏيڏا وازو پڳوون
سئ. ④ او هر مصيبت ۾ آيون نئ حوصلو ڏئ، زم جيئو نمونئ پڳوون آيون
نئ مصيبت ۾ حوصلو ڏيڏوھ، هيئو نمونئ آبي پڻ اوئون نئ حوصلو ڏيون،
جيا هر نمونا ري مصيبت ۾ سئ. ⑤ ڪم تو زتا گھڻا ايسو ڪريست ري شيوا
ڪريا ري ڪري امون نئ ايسو را زم ڏڪ ٿئ، اتو گھڻو ايسو ڪريست مانھ
وشواس راکيا ري ڪري امون نئ حوصلو پڻ زڙئھ. ⑥ زئيون امي مصيبت

سهونھ، تئيون امي ايٺا هارو سهونھ زم اماري ڪري تمون نٿه حوصلو ان تارڻ زڙڻ. ان زئيون امون نٿه حوصلو زڙڻ، تئيون امون نٿه ايٺا هارو زڙڻ زم تمون نٿه پڻ حوصلو زڙڻ، ان هايا حوصلو ري ڪري تمي صير ٿي اُو ڏک سهي هيڪوھ، جيا ايسو مانھ وشواس راڪيا ري ڪري زڙڻ، جيا ڏک امي پڻ سهونھ ريا. ⑦ ان امون نٿه تمون مانھ پورو پروسو سٺه جي تمي هيٺ راڪين صير ٿي ڏک سھشو، ڪم تو امون نٿه ڪبر سٺه جي جيئو نمونٽه امارا زم تمون مانھ ڏک آوڻه ريا، هيئو نمونٽه امارا زم تمون نٿه حوصلو پڻ زڙشي.

⑧ پايون ان پينون، امي تمون نٿه ڪبر ڏيوا ڪرونھ جي امون مانھ آسيه صوپا ۾ ڪٿي موصيت آئي. امون مانھ اتي گھڻي موصيت آئي جي امارا سھيا ٿي ٻارئي هئي ان امون نٿه آسريو ئي نتو جي امي جيوتا ريشون. ⑨ امي تو ام سوچيو تو جي هوئھ امي ضرور مري زاشون. پڻ هائي موصيت ايٺا هارو ٿي، زم امي آپ مانھ پروسو نه راڪون پڻ روڳو پڳون مانھ پروسو راڪون، جيو مرلون نٿه جيوي اوناڙيا واڙو سٺه. ⑩ زئيون امون نٿه موت ٿي پچيا رو آسريو ئي نتو، تئيون پڳون امون نٿه موت ٿي پچايا، ان امون نٿه همٿه پڻ موت ٿي پچاوشي. امي پڳون مانھ پروسو راڪيوھ، جي اُو امون نٿه هزون پڻ هر ڪترا ان موت ٿي پچاوتو ريشي، ⑪ زئيون تمي ٻڌائي پيڙا ٿين امون هارو پراٽا ڪرتا ريشو. هيئو نمونٽه گھڻا منڪ امون هارو پڳون رو ٿورو مونشي، ڪم تو پڳون گھڻون منڪون رٿه پراٽا ڪريا ٿي امون مانھ ڪريا ڪرين امون نٿه ڪتون ان موت ٿي پچاوه.

ٻولوس ٿاينئي ڏٺھ جي اُو هاسو ان ايموندار سٺ.

⑫ امي آپ را پارام ايٺا وات مانھ ڪش سون: امي صاف من ٿي هاڪ پري هيڪونھ جي امي ڏنيا ۾، ان ڪاس ڪرين تمون ڪن، پڳون ري ڏيڏل هيٺ

پرموئنه هاسا من ٿي ان پويتر نموننه وُڍا. امي منڪون رون ڪيالون پرموئنه
 آپ ننه عقل واڙا هزمين نه وُڍا پڻ پڳوون ري ڪرپا پرموئنه صحيح نموننه
 وُڍا. ⑬ امي تمون ننه ڏوري ڪا ڪوڙي واتون نٿي لکتا، پڻ روڳي ايوي واتون
 لکونه جي پٽيا ٿي ساوئه نموننه تمارا هزميام آوئه، ان تمارا مونيام آوئه
 جي او هاسي سئه. ان مارئي اميد اي سئه جي تمي ٻڌائي پورئه نموننه اماري
 واتون مونشو، ⑭ زم تمون موئين ٿي ڪئينڪ منڪي امارو يقين راکيو، جي
 امي هاسا سون. ڪم تو آڻا پريو ايسورا پاسو آيا رئه ڏي، تمي امارا پارام
 ڪشي ٿي ڪي هيكشو جي تمي اماري واتون مونين وشواس اوٿيوه. ان هيوئه
 نموننه امي پڻ تيڏي تمارا پارام ڪشي ٿي ڪيشون جي تمي اماري واتون مونين
 وشواس اوٿيوه.

⑮ مور ٿي مون ننه پڪي ڪاتري هتي جي تمي مون ٿي ڪش سو، ان
 تيام مارو ڪيال هتو جي ايئنه مڪڏنيه صوپا ۾ آيا ٿي مور هون تمون ڪن
 آوون، زم تمون ڪن ٻي وار آيا ٿي تمون ننه پيئو آشيرواڏ زڙئه. ⑯ مارو ڪيال
 هتو جي هون تمون ڪن ٿين ايئنه مڪڏنيه صوپا ۾ آوون، ان پسئه مڪڏنيه
 صوپا ٿي زاتون تمون ڪن وڙي پيڙي وار آوون، زم تمي مون ننه آڳڙ يهوديه
 صوپا هومو روونو ڪري هڪو. ⑰ تمي ڪي سوچوه؟ مٿين امهي ايوو ڪيال
 ڪريو، ڪي؟ ڪا زئون هون ڦينصلو ڪرونه، تو هون ايئا دنيا رون منڪون را زم
 هيڪي وات مانھ نٿي اوپتو، ڪي؟ هون هيڪئ توتئه ”هوئه هوئه“ ڪرونه،
 ان پسئه وڙي ”نا نا“ ڪرونه، ڪي؟ ⑱ هون تو هاسا پڳوون رو هون ڪائين
 ڪونه، جي واتون امي تمون ٿي ڪرونه، او امي اوپريا من ٿي نٿي ڪرتا. زئون
 ”هوئه“ ڪونه، تو اوئا رو مطلب هاس ۾ ”هوئه“ سئه، ڪوڙ ۾ ”هوئه“
 نٿي. ⑲ ڪم تو پڳوون رو ڏيڪرو ايسو ڪريست، جيا را پارام مٿين، سلوانس،
 ان تيمٽيس تمون ننه همپرايو، او ايوو نتو جي اوپريا من ”هوئه“ ڪرئ، پڻ
 او هميش ”هوئه“ ڪرين پڳوون ري مرضي مانھ وُڍو. ⑳ ڪم تو زتا وايڏا

پڳوون ڪريا تا، اُو ٻڌائي وائڏا ايسو ري ڪري پورا ٿيا. ان تيام ايسو ري ڪري امارئہ تمون نئہ ايسو را پارام همپزيا ٿي تمي پڳوون نئہ هاسو مونين ”آمين“ ڪوه، ان هيونہ نمونئہ پڳوون را وكون ٿئہ. (21) اُو پڳوون آپ سئہ، جيو امون نئہ ان تمون نئہ ايسو ڪريست مانہ پڪو وشواس رکاوئہ، ان جيئئہ امون نئہ آپري شيوا ڪريا هارو سوندين راکياہ، (22) ان اوئہ زوئئہ ٺپو هئين امون نئہ آپرا منڪ ٺاياہ، ان زوئئہ هوٿئي ڏين امارا من ۾ پويتر آتما ڏيڏوه، جيا ٿي اي ٿايتئي سئہ، جي پڳوون آپرا وائڏا پرمونئہ امون نئہ آڪاش ۾ هڪ ڏيشي.

(23) پڳوون شائيڏ سئہ ان هون آپرو هون ڪائين ڪونہ، مارو تمون ڪن ڪرنٽس شهر موئين نہ آيا رو مطلب اي هتو، زم تمون نئہ سڪتي ٿي هزميا ٿي پچاوون. (24) ام نٿي جي تمارئہ وشواس راکيا ۾ امي تمون مانہ آپرا حڪم ويوراوا ڪرونہ، ڪم تو تمارو وشواس اڳي پڪو سئہ. پڻ امارو ڪوم تو اي سئہ، جي امي تمون پيڙا تمارئي وشواس راکيا رئي هيئت وڌاوونہ، زم تمي ڪش ريو.

2 (1) مئين آپرا من ۾ اي ڦينصلو ڪريو جي هون تمون ڪن ڏکي ٿيا وزي ٻيڙي وار نئين آون. (2) ڪم تو جي هون هزميا ٿي تمون نئہ ڏکي ڪرون، تو مون نئہ ڪون ڪش ڪشي؟ رُوگا تمي مون نئہ ڪش ڪري هيڪوه. پڻ جي هون تمون نئہ ڏکي ڪرون، تو تمي ڪم ڪرين مون نئہ ڪش ڪرشو؟ (3) ان تيام هون تمون ڪن نہ آيو، متون آيا ٿي مون نئہ تماري ڪري ڏک زڙئہ، جيون ٿي مون نئہ ڪشئي زڙو ڪيئہ. تيا ري ڪري مئين هائي ٻڌي واتون تمون نئہ موروڪا ڪت ۾ لکي. مون نئہ تو تمون ٻڌون مانہ يقين هتو جي مارئہ ڪش ريا ٿي تمي ٻڌائي ڪش هوشو. (4) مئين تمون نئہ گهڻا ڦڪر ۾ ان ڏکي من ٿي گهڻو روتون ڪت لکيو. مئين ايئا هارو نہ لکيو جي تمون نئہ ڏکي ڪرون، پڻ ايئا هارو لکيو زم تمون نئہ ڪهر پڙئہ جي هون تمون ٿي

کتو گهڼو پریم را کونه.

اَو منک حیثه آپرا ډوه ټي توبونه کړي اَوئا ننه ماقټي ډيوو ان وږي پریم ټي ملو

⑤ اَو منک حیثه ډوه کړیا ټي پیزون ننه ځکي کړیا، اَوته مُون ننه ځکي تو کړیوه، پښ هیا واته ننه ساډو! واته ای سته، ټوږا گهڼا اَوته تمون ټدون ننه ځکي کړیا. ⑥ تمی گهڼون منکون را قینصلا پرموئنه اَوئا منک ننه وشواسي منډږي ټي ټارو کاډیا ټي سزا ډیډیڼه، ان هیا منک هارو هائي سزا گهڼي سته. ⑦ هَوته زڼیون اَوته آپرا ډوه ټي توبونه کړي، تو تماره سزا ري جگا م اَوئا ننه ماقټي ډيوو ان وشواسي منډږي م پاسو ټیږاوین حوصلو ډيوو، متون اَو گهڼا ځک ري کړي هیمت هارنه. ⑧ تیام هُون تمون ټي منډ کړونه جي تمی اَوئا ننه پکټي کاترني ډيوو جي تمی اَوئا ټي پریم کړوه. ⑨ کم تو مټین تمون ننه ایښا هارو پښ موروکو کت لکیو، زم تمارو آزمتو لیون، ان زوئون جي تمی هر واته م مارو کیدو مونوه کا نا. ⑩ جیو پښ ډوه ټیو، جي تمی اَوئا منک ننه ماقټي ډيوو، تو هُون پښ اَوئا ننه ماقټي ډیونه. کم تو پلنه اَوته مارو کټین ډوه نه کړیو هَوته، توئي پښ مټین ایسو کریست هومني اَوئا ننه تمارو ډوه کړیا رني ماقټي ډیډیڼه. ⑪ آپته ماقټي ډيوو ضروري سته، متون آبي شیطون ري نځي ټي اَوئا را قوصام آوون را. کم تو آپون ننه چالاک شیطون رون کراب منصویون رني کهر سته.

منک شیلو پولوس آپرا کوم را پارام همپزاوئه


⑫ هَوته، زڼیون هُون ایسو کریست را پارام کشي رني کهر همپزایا هارو تروئاس شهر مټین گپو، ان اوتنه مُون هارو پړیو ایسو ري شیوا کړیا رو گهڼو موقعو هتو، ⑬ توئي پښ تماري فکر ري کړي مُون ننه کټین هک نه زږیو، کم تو

مارو وِشواسي پائي طيٽس تمارئي کبر ڏيڏا هارو اوتته نتو. تيام هون اوت رون منكون ٿي موڪلاوين ايته مڪڏنيه صوپا موئين آيو رو.

⑭ پڻ هون پڳوون رو ٿورو مونونه. او هميش امارنه ايسو کريست ٿي واسطو راڪيا ري ڪري امارئي آڳيوونئي ڪرين امارئي هيئت وڌاونه، جيونه نمونه قوچ رو ساب آڳيوونئي ڪرين جيتيا وازون رو جلوس ڪاڍين آپرون قوچيون نه آپ لار لار ويوراونه. ان امارنه ايسو را پارام همپزيا ٿي، او ايسو رئي کبر کُشبو را زم هر جگا پڪيڙه. ⑮ ڪم تو پڳوون ري نظر ۾ امي ٻڌون منكون ۾ ايسو کريست رئي کُشبو پڪيڙيا وازا سون، پلنه او منڪ هوئه جيون نه تارڻ زڙشي، ڪا او منڪ هوئه جيون نه هميش رو موت زڙشي. ⑯ ڪيونڪ منڪون هارو امي موت ري گهند را زم سون، ان امارئي وات نه مونيا ٿي اوئون نه هميش رو موت زڙشي. پڻ ڪيونڪ منڪون هارو امي جيوئا ڪريا ري کُشبو را زم سون، ان امارئي وات مونيا ٿي اوئون نه هميش رو جيون زڙشي. هوئه ڪوڻ ابو سئه، جي هائي موٽي زميوارئي آپ مانه لئه؟ ⑰ جيا گهئا منڪ آپرا قائيڏا هارو ڪوڙ ملاوين پڳوون رو وچن همپزاونه، زم واپاري ملاوت ڪرين نگي ٿي آپري شينهنون ويسه، او هايا زميوارِي رنه لائيق نٿي. پڻ امي اوئون منڪون را زم نٿي. امي تو صاف من ٿي پڳوون رو وچن همپزاونه. امي پڳوون را طرف ٿي پڳوون هوما ايسو کريست ٿي واسطو راڪين همپزاونه.

مڪ شيلا پڳوون را نوا وسن را پارام همپزيا هارو
پڳوون را سونڊل سئ

3 ① امي آپرا وڪوڻ ڪرونه ريا، ڪي؟ ڪا امون نه، پيزون را زم، تمون ڪن آيا هارو ان تمون ڪن ٿي پيزيل زيا هارو آپري پارت هارو چني ليوو پڙه، ڪي؟ نا نا، امون نه هيويون پارت ريون چنيون رئي ڪئين ضرورت نٿي.



② ٽمي آپ اماري پارت ري چني را زم سو. پارت رئي چني تو روگي ڪا گز مانھ لڪل هوڻ، پڻ ٽمي امارا من ۾ سو. ان چني پيا را زم، تمارو وودا رو نمونو زويا ٿي ٻڌائي منڪ هزمي هيڪڻھ

جي امي، جيئي تمون ننه شيڪاڙيا، ايمونڌار سون. ③ وات ساوئي سئھ جي ٽمي زوئھ ايسو ڪريست رئي چني سو، جيئي اوئھ امون ٿي لڪاوئي، ڪم تو اماري ڪرل شيوا ري ڪري تمون موئين ايسو ڪريست ري واتون سئھ. ايسو ري واتون تمون موئين مس ٿي لڪل نئي، پڻ جيوتا پگيون را ڏيڏل پويتر آتما ٿي لڪل سئھ، ان پوٽا ريون پتيون مانھ نئين، پڻ تمارون منون ۾ لڪل سئھ.

④ تيام ايسو ڪريست ري ڪري امي پگيون هوما هيونھ نمونھ يقين ٿي ڪونھ جي امي ايمونڌاري ٿي پگيون رئي شيوا ڪرونھ ريا. ⑤ امي آپ ننه ايووا نئي هزمتا جي امارا آپرا طرف ٿي امون موئين اي ڪوم ڪريا رئي هيئت سئھ. پڻ اي ڪوم ڪريا رئي هيئت پگيون امون ننه ڏيڏيھ. ⑥ پگيون امون ننه اي شيوا ڪريا رئي هيئت ڏيڏيھ جي امي اوٽا را نوا وسن را پارام منڪون ننه همپزاوون. اي نوو وسن لڪل حڪمون را پارام نئي، پڻ پويتر آتما را پارام سئھ. ڪم تو زونا وسن ۾ لڪل حڪمون مانھ نه وودا ري ڪري هميش رو موت زڙھ، پڻ نوا وسن ۾ پويتر آتما ري ڪري هميش رو جيون زڙھ.

⑦ زئيون پگيون موسي هات منڪون ننه زونو وسن ڏيڏو، جيو پوٽا ريون پتيون مانھ لڪل هتو ان جيا مانھ نه وودا ري ڪري هميش رو موت زڙھ، تنيون پگيون را پاها ٿي الاهي گهڻو زبڪتو سوجهرو ٿيو. موسي رو مونيڊو زبڪتا سوجهرا ٿي ايوو چلڪتوت ريو، جي پلئھ او سوجهرو گهٽ ٿيتو زاتو تو، تويي پڻ اسرائيلي قوم را منڪ موسي را مونيڊا هوما زويي نٿا هيڪتا. ⑧ زئيون پگيون رو زونو وسن ايوئي موتي وات هٽي جي اتو گهڻو سوجهرو ٿيو، تو

پسئ پڳوون رو نوو وسن، جيا ٿي منڪون نئ پويتر آتما زڙئھ، ڪوڙئي موٽئي وات هوشي. ⑨ زئيون زونو وسن ايوي موٽئي وات هٽئي، جيا وسن رون حڪمون مانھ نہ وويڊا ري ڪري منڪون هارو هميش را موت رو ڦينصلو ٿيو، تو پسئ نوو وسن هايا ٿي ڪٿي موٽئي وات سئھ، جيا وسن ٿي پڳوون منڪون نئھ ماقئي ڏين ڏوهون ري سزا ٿي آزا ڪرئھ. ⑩ ڪم تو زونا وسن رو اتو گهڻو مون هتو، جي زونو وسن ڏيڏا رئھ توئھ پڳوون زبڪتو سوجهرو ڪريو، پڻ نوا وسن رو اتو گهڻو مون سئھ، جي اوٽا را مقابلو ڀر زونا وسن رو مون هئھ ڪئين نٿي. ⑪ ڪم تو زئيون زونا وسن رو، جيو روڳو ڪئينڪ وڪت هُودي هتو، اتو گهڻو مون هتو جي ڏيڏا رئھ توئھ پڳوون زبڪتو سوجهرو ڪريو، تو پسئ نوا وسن رو، جيو هميش هُودي ريشي، ڪتو گهڻو مون نئين هئھ!

⑫ امون نئھ پڪو پروسو سئھ، جي پڳوون رو نوو وسن هميش هُودي ريشي. تيام امي پوري هيئت ٿي ايٺا نوا وسن را پارام ساوئھ نمونئھ هميڙاوئھ. ⑬ امي موسي را زم ڪئين نٿي هٽاڙتا. موسي آڀرو مونيڊو لوگهڙا ٿي ڊونڪتو زم اسرائيلي قوم را منڪ او زبڪتو سوجهرو پورئھ نمونئھ نہ ڏيڪئھ، جيو سوجهرو اوٽا را مونيڊا ٿي ڪئينڪ وڪت هُودي ڏيڪاتو تو. ⑭ توئي پڻ اسرائيلي قوم را منڪ پڳوون ري واتون نہ مونيڊا جيو ٿيا. ڪم تو آڙ هُودي پڻ زئيون موسي را لڪل شاستر ڀر زونا وسن ري واتون پئئھ، تئيون زوئھ او هاڳي لوگهڙو پڙڏا را زم آڏو ڏيڪاھ. ڪم تو هائي پڙڏو تئيون هُودي هيڪل نئين ٿئھ، زئيون هُودي منڪ ايسو ڪريست ٿي واسطو نہ راکئھ. ⑮ آڙ ڏي هُودي پڻ، زئيون اسرائيلي قوم را منڪ موسي رو لڪل شاستر پئئھ، تئيون زوئھ او پڙڏو آڏو ڏيڪاھ ان شاستر ري واتون اوٽون را هزميا ٿي ڊونڪل سئھ. ⑯ پڻ زئيون ڪوڪ پريو ايسو مانھ وشواس اوئھ، تئيون او پڙڏو اوٽا را من ٿي هيڪل ٿي زائھ. ⑰ هئھ پريو ايسو ان پويتر آتما هيڪ را هيڪ سئھ. ان جيا ڪن پريو رو ڏيڏل پويتر آتما سئھ، او آزا سئھ. ⑱ تيام آڀون وشواسيون هارو پڙڏو آڏو نٿي. آڀي

تو ٻڌائي پريو ايسو نئه زوئنه ٿڪ ۾ ڏيکونه، ان اوئا رو زبکتو سوجهرو ان گهڻو مون آيون نئه ساوئه نمونئه ڏيکيام آوئه. هيونء نمونئه پريو ايسو هومو زوئين پريو ايسو را ڏيڏل پويتر آتما ري ڪڙا ٿي آبي ڀڏلتا. ڀڏلتا نائوڪام نائوڪا ٿيونه ان ڏي ٿو ڏي پريو ايسو جيو ٿيئا زائونه.

ڀڳوون ايسو را پارام قيمتي ڪشي ري ڪبر همپزيا رو ڪوم منڪون مانه ساڏيوه

4 ① تيام امي هيئت نٿي هارتا، ڪم تو ڀڳوون امون مانه ڏيئا ڪرين امون نئه هائي ايسو را پارام همپزيا رو شيوا رو ڪوم ڏيڏوه. ② امي تو ڪئين ڪراب وات هٿاڙين نٿي راکتا پڻ امي هر پيعزتي ري وات ٿي پاهو ڏيڏوه. امي چالاڪي ٿي نٿي وينا ان نڪو ڀڳوون رو وچن همپزيا ۾ اوڙو نمونو شيڪاڙونه. پڻ امي ڀڳوون هوما صاف من راکين منڪون نئه هاسي واتون ساوئه نمونئه همپزاوونه، زم هر هيڪ منڪ هوما آپ نئه هاسا ڏيڪاڙون. ③ هوئه وات هاسي سئه جي ڪئينڪ منڪ ايوا سئه جيا امارئي همپزاوئل ايسو را پارام ڪشي ري ڪبر نٿي مونت. پڻ او ايئا هارو نٿي مونت، ڪم تو او هميش را موت ري سزا کاڌا واڙا سئه ان اوئون هارو زوئنه پڙڏو آڏو سئه. ④ او منڪ ايسو مانه وشواس نٿي راکتا، ڪم تو شيطون، جيا نئه ڏنيا را ڪراب منڪ زوئنه ڀڳوون را زم هزمئه ان جيا ريون واتون مانه او وئه، شيطون اوئون منڪون ري عقل ڪتم ڪريه پري. شيطون ري مرضي نٿي جي ايسو را پارام ڪشي ري ڪبر هومپزين منڪون را من ۾ سوجهرو ٿئه، متون او زوئه جي ايسو ڪريست رو ڪتو زبکتو سوجهرو ان مون سئه، جيو ڀڳوون جيو سئه ان جيا موئين ڀڳوون ري ٻڌي واتون ساوي ڏيکيام آوئه. ⑤ امي تو آپرا پارام منڪون نئه نٿي همپزاوتا، پڻ منڪون نئه ايسو ڪريست را پارام همپزاوونه جي او پريو سئه، ان آپ را پارام روگو اتو ڪونه جي امي ايسو ري ڪري تمارئي شيوا ڪريا واڙا سون. ⑥ ڪم تو ڀڳوون،

جيئن ته جڳت نايا رڻه ٿوئڻه ڪيڏو تو: ”انڌارا ۾ سوجهرو ٿڻه!“ اُوڻه امارا من موئين سوجهرو ڏيڏو، زم امون نڻه هزم پڙڻه ان ايسو ڪريست نڻه ڏيڪين امون نڻه ڪبر پڙڻه جي پڳوون ڪتو سوجهرا وازو ان مون وازو سڻه.

⑦ پڻ زم ملڳت ماتي رون نونپتون موئين راکل هوڻه، هم اي ايسو را پارام قيمتي ڪشي رڻي ڪبر پڳوون امارڻه حوالڻه ڪرڻه، جيا ماتي ٿي ناول سون، زم وات ساوئي ٿڻه جي ايسو را پارام همپڙيا رڻي هيئت امارا پاها ٿي نٿي، پڻ پڳوون آپري گهڻي ڪڙا ٿي امون نڻه هائي هيئت ڏڻه. ⑧ امون هارو ٻڌي وات ۾ مصيبت سڻه، پڻ امي هيئت نٿي هارتا. امي پريشون سون، پڻ امي اُميد نٿي ساڌتا. ⑨ منڪ امون نڻه تنگ ڪرڻه، پڻ پڳوون امون پيڙو سڻه. منڪ امون نڻه مارڻه، پڻ پڳوون امون نڻه موت ٿي پڇاوه. ⑩ جيوڻه نمونڻه ايسو موت هوڏي ڏڪ سميا، هيوڻه نمونڻه امي پڻ موت هوڏي هر ٿوئڻه ڏڪ سهون ريا، زم وات ساوئي ٿڻه جي جيوڻه نمونڻه ايسو پڳوون ري ڪڙا ٿي هميش جيوڻو سڻه، هيوڻه نمونڻه امي پڻ ايڻا حياتي ۾ جيوڻا ايسو ري ڪڙا ٿي وونه ريا. ⑪ ڪم تو ايڻا حياتي ۾ امي هميش ايسو ري ڪري موت را ڪترا ۾ سون، زم امارا ايڻا ماتي را ڏيل ۾ جيوڻا ايسو رڻي ڪڙا ساوئي ٿڻه. ⑫ هيوڻه نمونڻه امي ايسو را پارام همپڙيا ري ڪري ڏڪ سهون ان موت را ڪترام سون، پڻ امارڻه هم ڪريا ٿي تم ايسو مانه وشواس راڪين هميش را جيون را مارڳ مانه ووه ريا.

⑬ امي ايوو وشواس راڪونه، جيا را پارام شاستر ۾ ام لکل سڻه:

”مئين پريو مانه وشواس اوڻيو، ان تيام هون ام پوليو.“

هيوڻه نمونڻه امي پريو ايسو مانه وشواس راڪونه، ان تيام امي اوڻا را پارام همپڙاوونه ريا. ⑭ ڪم تو امون نڻه ڪبر سڻه جي پڳوون، جيئن پريو ايسو نڻه موت ٿي جيوي اوڻاڙيوه، او امون نڻه پڻ ايسو را زم جيوي اوڻاڙشي ان آپ ڪن تيزاوين تمون پيڙا آپ هوما اوڻاڙشي. ⑮ ڪم تو امي هائي ٻڌائي ڏڪ تمون هارو سهون ريا، زم امارڻه ايسو را پارام همپڙيا ري ڪري پڳوون الاهي

گهڻون منڪون مانھ ڪُريا ڪرڻ، ان هيون نمونن الھي گھڻا منڪ ڀڳوون ري ڪُريا رو ٿورو مونيڻ ڀڳوون را وڪوڻ ڪرڻ.

آپڻئ ھيمت راکوو ڪم تو ڀڳوون آڀون نئ ھميش رو جيون ڏيشي

①٦ تيام امي ھيمت نٿي ھارتا، ڪم تو پلئ امارا ڏيل رڻي وشيت گھت ٿيئي زائھ، توئي پڻ امارا من ۾ ھيمت ڏي ٿو ڏي وڌي زائھ. ①٧ ڪم تو زئي موصيت امي ھمئئ سھونھ ريا، امي ام ھزمونھ جي ٿوڙي ان ٿوڙاڪ وڪت ھارو سئ. ڪم تو ھايا ري ڪري امون نئ آڪاش ۾ ھميش ھوڏي اتو گھڻو مون زڙشي جيا را مقابل ۾ اي ھمئوڪي موصيت ڪئين نٿي. ①٨ تيام امي ايئا حياتي رون ڏڪون را پارام نٿي سوچتا، پڻ آڪاش را ھڪ را پارام سوچونھ، ڪم تو ايئا حياتي ري واتون جي ڏيڪيام آونھ، او ٿوڙاڪ وڪت ھارو سئ، پڻ آڪاش ري واتون جي ڏيڪيام نٿي آوتي، او ھميش ھارو سئ.

5 ① ڪم تو امون نئ ڪبر سئ جي زم منڪ ٿوڙاڪ وڪت ھارو تنبو ۾ رھ، تم ايئا ڌرتي مانھ ٿوڙاڪ وڪت ھارو اي ڏيل امارا جيو رو گھر سئ. ان زئون امارو اي ڏيل ڪم ٿيشي، تو ڀڳوون را پاھا ٿي امارا جيو نئ زوئئ پڪو گھر زڙشي. او ھاٿون ٿي ناڙل گھر نئين ھوئ، پڻ امون نئ آڪاش موئين ايوو ڏيل زڙشي جيو ھميش ھوڏي ريشي. ② ايئا ڏنيا را ڏيل ۾ امي ڏڪ ري ڪري ڪئسونھ، ان امي او آڪاشي ڏيل ليڏا ھارو نيھاڪا نوڪونھ، جي مون امون نئ ھمئئ مريا ٿي مور آڪاشي ڏيل زڙئ، زوئئ ايت را لوگھڙا اوتاريا. مور امي آڪاشي لوگھڙا پيرون. ③ ڪم تو جي ايسو رھ پاسو آيا رھ ٿوئئ امي جيوتا ھوشون، تو امارا زوئئ ايت را لوگھڙا اڳي پيرل ھوشي، پڻ جي امي ايسو را پاسو آيا مور مري زاشون، تو اي ڏيل ڪم ٿيشي، ان زئون ايسو پاسو آوشي، تيون امارو ڏيل نئين ھوئ، ان امارو جيو زوئئ اوگھاڙو ھوشي. ④ زئون ھوڏي امي ايئا ماتي را ڏيل ۾ سون، تيون ھوڏي امي زوئئ پار ھيٺ ڏپورائين

ڪٽسونه ان نيههڪا نوڪونه. امي ايٺا ڏيل نٿه ساڏوا نٿي ڪرتا، پڻ امي ايٺا هارو سڪونه جي امارهه مريا مور پڳوونَ امون نٿه آڪاشي ڏيل ڏيشي، ان هيون نئونئنه امي مرشون ئي نئين، پڻ مريا وگر امون نٿه هميش رو جيون زڙشي. ⑤ او پڳوونَ آپ سٺه جيئنه امون نٿه هائي هميش رو جيون ليڏا هارو نايهه، ان اوئنه هميش رو جيون ڏيڏا مور امون نٿه آپرا نيا هارو هوئي را زم پويتر آتما ڏيڏوه، جيا ٿي ٿاڀيئي ٿهه جي او آپرا وائيڏا پرمونئنه هائي هميش رو جيون پڻ ڏيشي.

⑥ تيام امي هميش هيمنت راکونه. امون نٿه تو ڪبر سٺه جي زبون هوڏي امي ايئنه ماتي را ڏيل ۾ سون، تئيون هوڏي امي پريو ايسو پيڙا پينل نٿي. ⑦ ڪم تو ايٺا حياتي ۾ امي ايسو نٿه روپرو نٿي پاڙتا، پڻ امي اوئا مانه وشواس راکين وونه. ⑧ پڻ امي تو هيمنت راکونه ان امون نٿه حياتي ريا ٿي اي نائوڪو لاڳهه جي امي ڏيل نٿه ساڏين مري زائون، ان پريو ايسو ڪن زائين ريون. ⑨ تيام امون هارو ٻڌون ٿي مونئي وات اي سٺه، جي پلنه جيوتا ريون، ڪا مري زائون، امي پريو ايسو نٿه ڪش ڪرون. ⑩ ڪم تو نيا رنه ڏي آبي ٻڌائي وشواسي ايسو ڪريست هوما قينصلا ري گهاڏي ڪن ضرور اوپشون، زم آپون مونن ٿي هر هيڪ نٿه آپتون ايٺا حياتي ۾ ڪرل ڪومون پرمونئنه ايوزو زڙنه، پلنه او ڪوم نائوڪو هوئه ڪا ڪراپ هوئه.

ايمونڌاري ٿي پڳوون ان منگون وسا منومئا را پارام هميڙاوو

⑪ تيام امي پريو ايسو ٿي پيڪ راکين منگون نٿه اي ٿاڀيئي ڏيونه جي امي ايمونڌار سون. پڳوون نٿه تو اماري ايمونڌاري رئي ڪبر سٺه، ان مارئي اي اُميد سٺه جي تمي پڻ وات مونئي هوشي جي امي ايمونڌار سون. ⑫ هم وزي ڪيڏا ٿي امي تمون ڪن آپرا وڪون نٿي ڪرتا، پڻ تمون نٿه اي موقعو ڏيونه ريا جي تمي ڪشي ٿي امارا پارام ڪي هيڪو، ان هيون نئونئنه تمي اوئون منگون نٿه

جواب ڏي هڪو، جيا مونڊا را مينا ان اندر را ڪارا سٺه ان آپ نٺه ٺاڻوڪا
 ڏيڪارڙيا هارو وڌائي ڪرڻه. (13) جي منڪ امون نٺه ڳونڌا هڙمڻه، تو ٺيڪ سٺه،
 امي ڀڳوون رڻي شيوا ڪريا هارو ڳونڌا تو سون. ان جي منڪ امون نٺه عقل
 واڙا هڙمڻه، توڻي پڻ ٺيڪ سٺه، امي تمارا ڦاڻيڏا هارو عقل واڙا سون. (14) ڪم
 تو جئين ڪئين امي ڪرونه، امي ايٺا هارو ڪرونه، ڪم تو ايسو ڪريست امون
 ٿي پريم ڪرڻه. امي اي هڙمونھ جي هڪ منڪ، ايسو، ٻڌون منڪون هارو مري
 ڳيو، ان جي موت رڻي سزا ٻڌون منڪون رڻه ڪاوو تو، او موت رڻي سزا ايسو
 آپ ڪاڏي. تيام ڀڳوون ري نظر ۾ ٻڌون منڪون هارو موت رڻي سزا ڪاڏل سٺه.
 (15) ان ايسو ٻڌون منڪون هارو ايٺا هارو مري ڳيو، زم ايٺا حياتي ۾ منڪ آپري
 مرضي مانھ وڙي نه وڻه، پڻ اوٺا ري مرضي مانھ وڻه، جيو اوٺون هارو مري
 ڳيو تو، ان جيا نٺه ڀڳوون جيوي اوٺاڙيوھ.

(16) تيام هوڻه امي دنيا رون منڪون ري ڪراپ سوچ پرموڻه ڪيا منڪ را
 پارام اي نٽي سوچتا جي او ڪيوو سٺه. اڳي امي ايسو ڪريست رڻي پڻ جونچ
 منڪون ري سوچ پرموڻه ڪرڻي ٿي، پڻ هوڻه امي هيوي سوچ پرموڻه ايسو
 را پارام نٽي سوچتا. (17) هوڻه، جي ڪوئي ايسو ڪريست ٿي واسطو راکڻه، تو
 اوٺا رڻي ٻڌي حياتي ڀڌلي ڳيھ، ان او زوڻه نوو منڪ سٺه. اڳلوڪي واتون
 تو ڪم ٿي ڳيھ. زوڻو، هوڻه ٻڌي واتون نوي ٿي ڳيھ! (18) هائي ٻڌوئي ڪئين
 ڀڳوون را پاها ٿي ٿيوھ. ايسو ڪريست را موت ٿي ڀڳوون آپ ان آپون وسا
 منومٿا ڪراياھ، ان اوڻه اي شيوا رو ڪوم اماره خواله ڪريوھ جي امي ڀڳوون
 ان منڪون وسا منومٿا ڪراوون. (19) مارو ڪيڏا رو مطلب اي سٺه، ڀڳوون منڪون
 رون ڪرل ڏوهون رڻي سزا منڪون نٺه نه ڏيڏي، پڻ هائي سزا آپرا سونڊل ڀڄايا
 واڙا ايسو ڪريست نٺه ڏيڏي، ان هيوڻه نموڻه ڀڳوون آپ وسا ان پوري دنيا
 رون منڪون وسا منومٿا ڪراياھ. ان ڀڳوون امون نٺه اي ڪوم ڏيڏوھ جي امي
 هايا منايا را پارام منڪون نٺه نياپو ڏيون. (20) تيام امي ايسو ڪريست را پاها

ٿي ميلل سون، ان ڀڳوونَ زوڻه اماري هاڻي منڪون ننه منٽ ڪرڻه. امي ايسو ڪريست را پاها ٿي منڪون ننه اي منٽ ڪرونه جي ”ڀڳوونَ ٿي منائي زانو! ②1 ڀڳوونَ آپون هارو آپتون ڏوهون رڻي سزا پيڏوهي ايسو ننه ڏيڏيڻه، زم آبي ايسو ٿي واسطو راکون ان هيا ري ڪري ڀڳوونَ آپون ننه ماڻهي ڏين ڏوهون ري سزا ٿي آزاد ڪرڻه ان آبي ڀڳوونَ ري وات مان وڍا وڙا ٿيون.“


6 ① امي ڀڳوونَ پڙا ڪوم ڪريا وڙا ٿين تمون ٿي اي منٽ پڻ ڪرونه جي جيوڻه نموننه ڀڳوونَ تمون مانھ ڪُريا ڪرين تمون ننه ڏوهون ري سزا ٿي پڇاياه، هيون نموننه تمي هاڻي وات پورا من ٿي مونو ان ڀڳوونَ ري مرضي مانھ وو، زم ڀڳوونَ ري ڪرل ڪُريا ٿي ڦاڻيڏو ٿنه. ② ڪم تو شاستر ۾ ڀڳوونَ ام ڪڻھ:

”مئين ڪُريا رڻه توڻه تارو هاڻ هومپڙيو

ان منڪون ننه پڇايا رڻه توڻه ٿارڻي مڌت ڪرڻي.“

هون زوڻو، ڀڳوونَ ري ڪُريا رو او توڻو همڻه سڻه. منڪون ننه پڇايا رو او توڻو همڻه سڻه.

③ امي ڪيا ٿي وات ۾ اوڙهه نموننه نٿي وڻا جيا ٿي امون مانھ ڪئين الزوم لاڳهه، متون اماري شيوا رڻي پڌنومڻي ٿنه ان منڪ اماريون واتون مانھ ننولڻي ڪرڻه. ④ پڻ امي ڀڳوونَ را شيواڌاري ٿين هر وات ۾ ٿاڻيڻي ڏيونه جي امي ايمونڌار سون. مڻيپتون ۾، مڇيوري ۾، ان تڪليپون ۾ امي گهڻا صير ٿي ڏوروڻ سهونھ. ⑤ گهڻي وار منڪي امون ننه چاڀڪون ٿي ماريا، امون



ننه جيلون موئين پوريا، ان اماره ڪلاق ڦشري ڪري. امي گهڻي مينت ڪرڻي، رات را اوزاڳرا ڪرين پڻ ڪوم ڪرتا ريا، ان روڻي کاڌا رو توڻوئي نه زڙيو. توڻي امي هاڻي ٻڌي ڏوروڻ صير ٿي

سهڻي. ⑥امي پَوِيتَر نمُونَه وونه، پڳوونَ ري اُونڌي واتون شيڪاڙونه، منڪون ٿي صير هُون وونه، پيزون مانھ مير يونئي ڪرونه، پَوِيتَر آتما ري مرضي مانھ وونه، هاسا پريم ٿي وونه، ⑦هاسو وڃن همڙاوونه، ان پڳوونَ ري ڏيڏل ڪڙا ٿي وونه. زم ڦوڇي ڏشمڻ ٿي مُقابلو ڪريا هارُو زمڻا هات ۾ تروُٺار ان ڏاوا هات ۾ ڍال زهائڻه، تم شيطونَ ٿي مُقابلو ڪريا هارُو امي پڳوونَ ري وات مانھ وونه، زم نائوڪا ڪوم ڪريا ۾ آڳڙ وڌون ان آپ ننه هر پُونڌائي ٿي پڇاوون. ⑧پلنه منڪ اماري عزت ڪرڻه ڪا اماري پيعزت ٿي ڪرڻه، پلنه اماري پدنومي ڪرڻه ڪا امارا وڪوڻ ڪرڻه، توڻي پڻ امي ايمونڌاري ٿي پڳوونَ رڻي شيوا ڪرونه. منڪ امون ننه ٺڳي ڪريا وازا ڪڻه، توڻي پڻ امي هاسا سون. ⑨منڪ امون ننه اشيندون را زم هڙمڻه، توڻي پڻ پڳوونَ امون ننه اوڙڪڻه. امي هميش موت را ڪترام سون، توڻي پڻ زوڻو، امي هزون جيوتا سون. پڳوونَ امون ننه شيڪاڙيا هارُو ڏک تڪليب سهوا ڏڻه، پڻ پڳوونَ امون ننه موت ٿي پڇاڻه. ⑩امي ڏک سهونه، توڻي پڻ امي هميش ڪُش ريونه. امي آپ گريپ سون، توڻي پڻ اماري ڪري گهڻا منڪ وشواس ۾ پاڳواڙا ٿڻه. امون ڪن ايٺا ڏنيا ۾ ڪئين نٿي، توڻي پڻ آڪاش ۾ امون ننه ٻڌوئي ڪئين زڙشي.

وشواسيون رڻ ڪراپ منڪون ٿي ان ڪراپ واتون ٿي پاهو ڏيو

⑪کُرتُس شهر رون پريمي پايون ان پينون، امي تمون ٿي ساوڻه نمُونه واتون ڪريه، ان پورا من ٿي تمون ٿي پريم راکونه. ⑫امي تمون ٿي پريم ان هپ ۾ ريو ڪرونه، پڻ تمي امون ٿي شيتي پاڳوه. ⑬هُون تمون ننه آپرا ٻار هڙمين ڪونه، زم امي تمون ٿي پريم راکونه، تم اوڻا را ڀڏلا ۾ تمي پڻ پورا من ٿي امون ٿي پريم راکو.

⑭جيا منڪ ايسو مانھ وشواس نٿي راکتا، تم اُونون پيڙا اوڙا مارڳ مانھ مت وو. ڪم تو پڳوونَ ري وات مانھ وُڍا وازا ان پڳوونَ را حُڪم ٿوڙيا

واڙا ڪم ڪرين پيڙا وي هيڪشي؟ سوجهرو ان اندارو ڪم ڪرين پيڙا ريشي؟
 ⑮ ايسو ڪريست ان شيطون هيڪي وات مانھ اُپي هيڪشي، ڪي؟ وشواس
 راکيا واڙا رو ان وشواس نہ راکيا واڙا رو آبت ۾ ڪي واسطو؟ ⑮ آبي تو
 وشواسي منڌڙي را منڪ سون، جئي زوئنه جيوتا پڳوون رو گهر سئھ. تيام آبي
 پڳوون را گهر را منڪ تين اوئون منڪون را زم ڪم ڪرين وي هيڪونه، جيا
 ڏيوئونون رئي پوزا ڪرئھ؟ ڪم تو پڳوون آپ آپرون منڪون را پارام شاستر
 ۾ ڪيڏو:

”هون اوئون ڪن ريھ ان اوئون پيڙو هوئھ.
 هون اوئون رو پڳوون ٿيھ، ان او مارا سونيل منڪ ٿيشي.“
 ⑰ تيام آپون هارو شاستر ۾ ام پڻ لڪل سئھ:
 ”ايشور ام ڪئھ:

تمي اوئون ڪراپ منڪون موئين ٿي نيھري آو،
 ان اوئون ٿي ڌار ٿيو،
 ان جئين ڪئين پويتر نٿي اوئا ٿي پاھو ڏيو،
 تو هون تمون نئھ قبول ڪريھ.
 ⑱ ”ان هون تمارا پاپ را زم ٿيھ،

ان تمي مارون ڏيڪرون ان ڏيڪريون را زم ٿيشو.
 ايشور، جيو ٻڌون مانھ سئھ، او هم ڪئھ.“

7 ① تيام، پريمي پايون ان بينون، زئون پڳوون آپون ٿي هائي وائڏا ڪريھ
 توليو، آبي هر ڪراپ ڪوم ان ڪيال ساڏون پرا، ان پڳوون رو مون راکين
 آپ نئھ پويتر راکيا رئي پوري ڪوشش ڪرتا ريون.

پولوس گرتيون ري ڪري گھڻو ڪش تئھ

② امون ٿي پورا من ٿي پريم راکو! امي ڪيا رو ڏوھ نٿي ڪريو، نڪو ڪيا نٿ

ٻڌايو، ان نڪو وڙي ڪيا ٿي نڳي ڪريو. ③ هُون تمون مانھ الزوم هئا هارُو هم نٿي ڪيتو. ڪم تو مٿين اڳي ڪيڏوھ جي امي تمون ٿي اتو گهڻو پريم راکونھ جي پلئھ مري زائون ڪا جيوتا ريون امي تمون پيڙا ريا هارُو تيار سون. ④ مارو تمون مانھ گهڻو يقين سئھ، ان هُون گهڻي ڪشي ٿي تمارا پارام ڪونھ. اماري ٻڌي موصيت ۾ تماري ڪري مون نئھ الاهي گهڻو حوصلو زڙيوھ ان الاهي گهڻي ڪشي ٿيئھ. ⑤ ڪم تو زئون امي ايتھ مڪڏنيھ صويا ۾ آيا تا، تيون امون نئھ ڪئين هڪ نہ زڙيو، پڻ هر وات ۾ امون نئھ موصيت ٿي. منڪ امارئھ ڪلاڦ هئا، ان امارا من ۾ تمارا پارام پيڪ ان ڦڪر هتي. ⑥ پڻ پڳوون، جيو نيموئون نئھ حوصلو ڏيڏا وازو سئھ، اُوئھ طيطس را آيا ٿي امون نئھ حوصلو ڏيڏو. ⑦ امون نئھ نہ رُوڳو اُوئا را آيا ٿي حوصلو زڙيو، پڻ ايئا وات ري ڪري پڻ حوصلو زڙيو، جي طيطس نئھ تمون ٿي حوصلو زڙيو. ڪم تو اُوئھ آوين امون نئھ همپڙايو جي تمون نئھ مون ٿي مليا رئي ڪتي گهڻي سيڪ سئھ، تمي ڳلت نمونا مانھ وُڍا ٿي توپونھ ڪرين اُوئا مانھ ڪتا گهڻا ڏکي ٿياھ، ان تمي مارو ڪتو گهڻو ڪيال راکوھ، ان تيام هُون الاهي گهڻو ڪش ٿيو.

⑧ مارا لڪل ڪت ٿي تمي ڏکي ٿياھ، پڻ هُون ام نٿي سوچتو جي مٿين تمون نئھ ڪت ڪم لکيو. ام نٿي جي هُون تمون نئھ ڏکي ڪريا ۾ ڪش ٿيو. مون نئھ تو کبر سئھ جي هيا ڪت ٿي تمون نئھ توڙي وار هوڏي ڏک ٿيو، ان تمارا هيا ڏک ري ڪري مون نئھ پڻ ڏک ٿيو. ⑨ پڻ هوئھ هُون ڪش سون. هُون ايئا وات مانھ ڪش نٿي جي تمي ڏکي ٿيا، پڻ ايئا وات مانھ ڪش سون جي تمي ڏکي ٿين آبرون ڪراپ ڪومون ٿي توپونھ ڪريوھ. ڪم تو تمي ڏکي ٿين ايوي سوچ راکئي جي پڳوون ري مرضي پرموئھ سئھ، ان هيوئھ نمونئھ تمون نئھ امارا پاها ٿي ڪئين نقصون نہ ٿيو. ⑩ ڪم تو زئون منڪ ڏکي ٿين ايوي سوچ راکئھ جي پڳوون ري مرضي پرموئھ سئھ، تو اُوئا رو نتيجو اي سئھ جي اُو

آپرون ڏوهون ٿي توبه ڪرڻ، ان هم ڪريا ٿي اُوئون نڻه تارڻ زڙشي. هايا ۾ ڪي ڏک رڻي وات سڻه؟ پڻ زئيون منڪ ڏکي ٿين رُوگو ڏنيا را نمونا پرموئنه ڪراپ سوچ راکڻه، تو اُو رينه ري ڪري توبه ڪرڻ، ان اُوئا رو نتيجو اي سڻه جي اُوئون نڻه هميش رو موت زڙشي. ⑪ ٽمي آپ نڻه زوئو! ٽمي ڏکي ٿين ايوي سوچ راکڻي جي پڳوون ري مرضي پرموئنه سڻه، تو هايا ٿي تمون نڻه پڳوون ري مرضي مانھ وُودا رو ڪتو گهڻو شونق ٿيو. ٽمي هائي آپ وسا ڪرل ڏوه موني، ٽمي هايا وات ري ڪري لازي مريا جي تمون وسا ٿي ٿي، ٽمي پڳوون ٿي پيئاوا مڏيا، تمون نڻه مُون ٿي مليا رڻي سِڪ ٿي، تمون موئين مارو مون راکيا رو شونق پيدا ٿيو، ان ٽمي هايا ڏوهاري منڪ نڻه سزا ڏيڏي. هيون نمونھ ٽمي ٿاڻي ڏيڏيھ جي ٽمي هايا وات ۾ هر نمونھ پويتر ٿين ووه ريا. ⑫ زئيون موئين تمون نڻه ڪت لکيو، تئين موئين رُوگو ايئا هارو نتو لکيو، جي هايا ڏوهاري منڪ نڻه سزا زڙه. نڪو رُوگو ايئا هارو لکيو تو، جي جيا منڪ رو ڏوه ٿيو، اُوئا نڻه اُوئا رو حق زڙه. پڻ مارا لکيا رو ڪاس مطلب اي هتو، جي تمون هومئي ان پڳوون هومئي وات ساوي ٿه جي ٽمي ڪتا شونق ٿي امارو ڪيال راکوه. ⑬ تيام هايا ٻڌي وات ري ڪري امون نڻه حوصلو زڙيوه.

امون نڻه نه رُوگو هايا ري ڪري حوصلو زڙيو، پڻ طيطس رڻه ڪش ٿيا ري ڪري، امي پڻ الاهي گهڻا ڪش ٿيا، ڪم تو تمون ٻڌون ٿي اُوئا را من ۾ گهڻو هڪ زڙيوه. ⑭ ڪم تو جيا پڻ وات ۾ موئين اُوئا ڪن تمارا وڪوڻ ڪريا تا، اُوئون موئين ٿي ٽمي ڪيائي وات ۾ مُون نڻه لازي نه ماريو. پڻ زم امي هميش تمون ٿي هاسي واتون ڪيڏيھ، تم جي واتون امي تمارا وڪوڻ ۾ طيطس نڻه ڪيڏي تي، اُو ٻڌي واتون پڻ هاسي ٿي. ⑮ طيطس تمون ٿي الاهي گهڻو پريم راکڻه، ڪم تو اُوئا نڻه ياد سڻه جي ٽمي ٻڌي اُوئا رو ڪيڏو موني ان اُوئا رو مون راکين هاسا من ٿي اُوئا نڻه ڪشي ٿي مليا. ⑯ هُون ڪش سون، ڪم تو هر وات ۾ مُون نڻه تمون مانھ يقين سڻه.

پولوس اِمدَا ڏيڏا را پارام شيڪاڙڻه

ان منڪون نڌ شونق ڏيورائوه

جي يروشلَم شهر رُون گُريپ وشواسيون نڌ اِمدَا ڏڻ

8 ① هُون، پاڻون ان پڻون، امي تمون نڌ ڪُڙ ڏيوا ڪرونه جي پڳوون ري ڪُڙا ٿي ايتڻه مڪڏيه صوپا ريون وشواسي منڌريون ۾ ڪي ٿيوه. ② ايت را وشواسي گهڻي مَصِيپت ۾ سڻه جيا ٿي ايئون را وشواس رو آزمتو ٿهه ريو، تويي پڻ اي الاهي گهڻا ڪُش سڻه، ان پلڻه اي هاو گُريپ سڻه، تويي پڻ ايئي ڪُشي ٿي پڙون ري مدت هارو گهڻي اِمدَا ڏيڏيه. ③ هُون ايئون رئي هاڪ پرين ڪونه جي ايئي نه رُوڳو آپري پوس پرموئڻه اِمدَا ڏيڏي، پڻ آپري پوس ٿي پڻ وڌيڪ ڏيڏي. ايئي آپري مرضي ٿي اِمدَا ڏيوا ڪري، ④ ان گهڻي منڌ ڪرين امون ٿي وينتي ڪري جي امي اوئون نڌ وشواسي پاڻون رئي شيوا ڪريا رو موقعو ڏيون، ان اوئون نڌ آگيا ڏيون جي او يروشلَم شهر رُون پڳوون رُون سونڍل منڪون نڌ اِمدَا ڏيڏا ۾ حصو لڻه. ⑤ اماري تو اُميد هتي جي اي اِمدَا تو ڏيشي، پڻ ايئي نه رُوڳي اِمدَا ڏيڏي پڻ ڪاس ڪرين اي مور ٿي پڳوون ري مرضي پرموئڻه پورڻه نمونڻه پريو ايسو رئي شيوا ڪريا هارو تيار ٿيا، ان هرات ۾ امارو ڪيڏو مونيا هارو تيار ٿي ڳيا.

⑥ تيام امي طيطس ٿي وينتي ڪري جي زم اوڻه اڳي تمون ڪن اِمدَا پيڙي ڪرايا رو ڪوم شروع ڪريو تو، تم او همڻه تمون ڪن آوين هائي پلائي رو ڪوم پورو ڪرڻه. ⑦ جيئو نمونڻه تمي هرات ۾ گهڻه ٺاڻوڪڻه نمونڻه ووه، وشواس راڪيا ۾، پڳوون ري واتون شيڪاڙيا ۾، پڳوون ري اونڌي واتون هزميا ۾، هايون ٻڌيون واتون ۾ گهڻو شونق راڪيا ۾، ان امون ٿي گهڻو پريم راڪيا ۾، هيئو نمونڻه اِمدَا پيڙي ڪرين هائي پلائي رو ڪوم پڻ ٺاڻوڪڻه نمونڻه پورو ڪرو.

⑧ هُون حُڪم نٿي ڏيتو جي تمڻي اِمدادَ ڏيو. پڻ مٿين تمون نٿه همڇڙايوه جي پيڙي منڪي ڪتا شونق ٿي اِمدادَ ڏيڏيڻه، زم هُون تمارا پريم رو آزمٽو ليون جي هاسو سٺه ڪا نا. ⑨ ڪم تو تمون نٿه ڪهر سٺه جي آڀڻه پريو ايسو ڪريست تمون مانه ڪرپا ڪرين تمون ٿي ڪٽڻي گهڻي پلائي ڪري. اوتڻا ڪن آڪاش ۾ ٻڌوئي ڪئين هتو، توڻي پڻ او آڪاشي هڪ ساڌين تمون هارو ڏنيا ۾ آوين گريپ ٿيو، زم اوتڻا رنه گريپ ٿيا ري ڪري تمون نٿه آڪاش ۾ هڪ زڙه.

⑩ هايا وات را پارام هُون تمون نٿه صلاح ڏيونه. تمڻي اڳي پور سال نه روڳو اِمدادَ پيڙي ڪريا رو ڪوم شروع ڪريو تو، پڻ هايا رو تمون نٿه شونق پڻ هتو. تيام نائوڪي وات سٺه جي تمڻي ام ڪرو، ⑪ جيو ڪوم تمڻي شروع ڪريو تو، او هوئه تمڻي پورو ڪرو، ان جيوئه نموننه تمڻي اِمدادَ ڏيڏا رو شونق راکوه، هيوه نموننه تمڻي آڀري پوس پرموننه اِمدادَ پيڙي ڪريا رو ڪوم پورو ڪرو. ⑫ ڪم تو جي ڪوئي اِمدادَ ڏيو ڪرڻه، ان او اٿي ڏهه زتڻي اوتڻا رڻي پوس سٺه، تو پڳوون هايا مانه ڪش سٺه. اي ضروري نٿي جي آڀري پوس ٿي وڌارڻه ڏهه. ⑬ ڪم تو اِمدادَ رو مطلب اي نٿي، جي پيڙون نٿه هڪ ڏيڏا هارو تمڻي آپ نٿه مصيبت ۾ نوکو. نا نا، اِمدادَ رو مطلب اي سٺه جي ٻڌائي هرکا هوئه. ⑭ همڻه زئون تمڻي هورا پيڻاه تماره اوتڻون رڻي مدت ڪروو جيون نٿه ضرورت سٺه، زم زئون او هورا هوشي، تڻيون او پڻ تماري ضرورت ۾ تمارڻي مدت ڪرڻه. ان هيوه نموننه ٻڌائي هيڪ جيو هوشي. ⑮ زم شاستر ۾ لکل سٺه:

”جيئنه گهڻو پيڙو ڪريو،

اوئه آپ هارو آڀري ضرورت ٿي وڌارڻه نه راکيو.

ان جيئنه گهٽ پيڙو ڪريو،

اوتڻا رڻي ضرورت پوري ٿي ڳڻي.”

پولوس ڪرنٽس شهر رون وشواسيون نٺ امڌاڌ اوٺيا واڙون ھارو ڀارت ڪرڻھ

①6 ھون ڀڳوون رو ٿورو مونونھ جي اُوڻھ طيطس نٺ ايوي ھيمت ڏيڏيھ جي اُو مارا زم پورا شونق ٿي تمارو گھڻو ڪيال راکڻھ. ①7 ڪم تو اُوڻھ نہ روڳو اماري وينتئي مونئھ، پڻ اُو آپ گھڻا شونق ان ڪشي ٿي تمون ڪن آوڻھ ريو.

①8 امي طيطس پيڙو ھيڪا پيڙا وشواسي پائي نٺ پڻ ميلونھ ريا، جيئھ ايسو را پارام ڪشي ربي ڪر ھمپڙا يا ڀر ايوو ڪوم ڪريوھ جي ٻڌيون وشواسي منڌڙيون ڀر منڪ اوٺا را وڪوڻ ڪرڻھ. ①9 نہ روڳو ٻڌائي وشواسي اوٺا را وڪوڻ ڪرڻھ، پڻ وشواسي منڌڙي اوٺا نٺ سونديوھ جي اُو امون پيڙو اي امڌاڌ ڏيڏا ھارو ھالڻھ، جي امي پيڙي ڪرونھ ريا، زم ايشور را وڪوڻ ٿھ ان وات ساوئي ٿھ جي امي شونق ٿي مڌت ڪروا ڪرونھ. ②0 ھيوڻھ نمونئھ امي پورا ڏيون ٿي اي امڌاڌ رو ڪوم ڪرونھ، زم امون مانھ ڪئين الزوم نہ لاڳتھ جي امي اي گھڻي امڌاڌ پيڙي ڪريا ڀر ان ڏيڏا ڀر صحيح نمونئھ ٽپي ویتا. ②1 ڪم تو امارو مقصد اي سٺھ جي امي نہ روڳو ايشور ري نظر ڀر ٺاؤڪڻھ نمونئھ وون، پڻ منڪون ري نظر ڀر پڻ ٺاؤڪڻھ نمونئھ وون.

②2 ان امي ھايون پيئون پيڙو امارا ھيڪا پيڙا وشواسي پائي نٺ پڻ ميلونھ ريا، جيا را امي گھڻي وار گھڻيون واتون ڀر آزمتا ليڏاھ ان اُوڻھ ٿاڀتي ڏيڏيھ جي اُو پورا شونق ٿي ڀڳوون ربي شيوا ڪرڻھ. ان ھمڻھ اُو تمون ڪن وڌارڻھ گھڻا شونق ٿي آوڻھ ريو، ڪم تو اوٺا رو تمون مانھ يقين سٺھ.

②3 ڪيال راکو، طيطس مون پيڙو پائي را زم ڪوم ڪرڻھ، ان شروع ٿي لين تمون وسا ڪرل ڪوم ڀر مون پيڙو پيڙو سٺھ. ان امارا جيا پيڙا وشواسي پائي امي ميلونھ ريا، اوئون نٺ وشواسي منڌڙي سوندين ملياھ، ان اُو ايوا

منڪ سٺه جيون ري ڪري ايسو ڪريست را وڪوڻ ٿهه. ②4 تيام هليون ٿي
 ٺاڻوڪڻه نمونئو وو. هيونئو نمونئو وشواسي منڌريون ڪن ٺاڻيئي ٿيشي جي
 تمڀي هاسو پريم راڪوه ان تمارا پارام اماري ڪشي ٿي ڪيڌل ٻڌي واتون
 هاسي سٺه.

پڳوون را نوم مانھ ڪشي ٿي ڏيوو

9 ① هوئو پڳوون رون سونڍل منڪون هارو امداد ڏيڌا را پارام مارئو تمون
 نئو لکيا رئي ڪئين ضرورت نئي. ② ڪم تو مون نئو ڪهر سٺه جي تمون
 نئو امداد ڏيڌا رو شونق سٺه، ان مئين ايئو مڪڏنيه صوپا ۾ منڪون ڪن تمارا
 وڪوڻ ڪرياه جي تمڀي يونان صوپا را وشواسي پوروڪا سال ٿي امداد ڏيڌا
 هارو تيار سو. ان تمارو امداد ڏيڌا رو شونق ڏيڪين ايٺ رون گهڻون منڪون ۾
 امداد ڏيڌا رو شونق پيڌا ٿيو. ③ تيام هوڻ ايئون وشواسي پاڻون نئو تمون ڪن
 ميلونھ ريو، زم جي واتون امي تمارا وڪوڻ ۾ ڪيڏيھ، او ايٺا امداد ري وات
 ۾ ڪوڙي نه ٿئو، ان تمون ڪن امداد را پئيها تيار هوئو، زم مئين اوئون نئو
 ڪيڏوھ. ④ ام نه ٿئو جي ايٺ را مڪڏنيه صوپا را ڪوڪ وشواسي مون پيڙا
 تمون ڪن اوئو ان تمون نئو تيار نه ڏيڪئو، تو نه روگا امي تمون مانھ يقين
 راڪيا ري ڪري لازي مرشون، پڻ تمڀي پڻ ڪتا لازي مرشو. ⑤ تيام مئين، اي
 وات ضروري هزمين، ايئون وشواسي پاڻون نئو وينتي ڪري، جي او امون مور
 تمون ڪن اوئو، ان امارا آيا ٿي مور او امداد را پئيها پيڙا ڪرين راڪئو، جيا رو
 تمڀي پڳوون را نوم مانھ ڏيڌا رو مور ٿي وائيڌو ڪريو تو. هيونئو نمونئو امداد
 را پئيها امارا آيا ٿي مور تيار هوشي، ان تمڀي مجپوري ٿي نئين، پڻ ڪشي ٿي
 پئيها ڏيڌا هوشي.

⑥ ياد راڪو، جيو ڪنجوس ٿين ٿوڙو پوڪئو، او ٿوڙو لشي، ان جيو ڪشي
 ٿي گهڻو پوڪئو، او گهڻو لشي. ⑦ هر هيڪ رٿو پڳوون را نوم مانھ ام ڏيوو

ڪپڻ، زم اُوڻه آڀرا من ۾ ڏيڌا رو ڦينصلو ڪريو هوڻ. مڃيوري ٿي نه ڏيوو، پڻ ڪُشي ٿي ڏيوو. ڪم تو جيو ڪُشي ٿي ڏڻه، اُوڻا ٿي پڳوون پريم ڪرڻه. ⑧ پڳوون تمون مانھ ڪُڙيا ڪرين تمون نڻه ٻڌوئي ڪئين ڏي هيڪڻه، زم هر توڻه هر وات ۾ تماري هر ضرورت پوري ٿڻه، ان تمون نڻه هيا ٿي وڌارڻه پڻ زڙڻه زم تم ٻيڙون رڻي مدت ڪريا ۾ هر نائوڪو ڪوم ڪري هيڪو. ⑨ زم شاستر ۾ لڪل سڻه:

”اُوڻه ڪُشي ٿي ڏين گريهون رڻي مدت ڪرڻي

ان او هميش هُوڌي پڳوون را نوم مانھ ڏيتو ريشي.“

⑩ پڳوون، جيو پوکيا هارو پيز ڏڻه، ان کاڌا هارو ڌون ڏڻه، زم تماره پيز پوکيا ٿي تمون نڻه گهڻو ڦصل ڏڻه، تم تماره پڳوون را نوم مانھ ڏيڌا ري ڪري تمون نڻه گهڻو آشيرواڌ ڏيشي. ⑪ پڳوون تمون نڻه هر وات ۾ گهڻو آشيرواڌ ڏيشي زم تم ٿي هر توڻه ڪُشي ٿي پڳوون را نوم مانھ ڏي هيڪو. ان هيون نمونھ اماره تماري ڏيڌل اِمڌا ورايا ري ڪري منڪ پڳوون رو ٿورو مونشي. ⑫ ڪم تو اي اِمڌا ورايا ري شيوا ري ڪري نه روڳو پڳوون رون سونڊل منڪون رڻي ضرورت پوري ٿيشي، پڻ الاهي گهڻا منڪ پڳوون رو گهڻو ٿورو پڻ مونشي. ⑬ تماري اِمڌا ڏيڌا ري شيوا ٿي منڪون نڻه اي ٿاڀي زڙڻه جي تم ٿي نه روڳو ايسو را پارام ڪُشي رڻي ڪهر مونوه، پڻ اُوڻا مانھ ووه. تيام او منڪ پڳوون را وڪوڻ ڪرشي جي تم ٿي وشواسي ڀائي هويا ري ڪري ڪُشي ٿي اوڻون رڻي مدت ڪروھ، ان ٻڌون رڻي مدت پڻ ڪُشي ٿي ڪروھ. ⑭ ان او تمون هارو گهڻا پريم ٿي پراٽنا ڪرشي؛ ڪم تو تماره ايسو مانھ وشواس راڪيا ري ڪري پڳوون تمون مانھ گهڻي ڪُڙيا ڪرڻه. ⑮ پڳوون را وڪوڻ ٿڻه، جي اُوڻه آڀرو ڏيڪرو ايسو ڏيڌوه زم او آڀون نڻه تارڻ ڏيڌا هارو آڀرو جيو ڏڻه. هائي ايوني موتي وات سوچيا ٿي ٻاري سڻه.

پولوس ايسنو رو منڪ شيلو ٿين منٽ ڪرڻه جي ٻڌائي اوتڻا رو ڪيڏو مونڻ

10 ① هُون آپ پولوس، ايسنو ڪريست را گريپي ان نرمي را نمونا مانه وين، تمون ٿي منٽ ڪرونه جي تمي مارو ڪيڏو مونو. تمي ام هزموه جي تماره رُوپرو هُون گريپي ٿي ٻولونھ، پڻ ڪتون ۾ هُون هيمنت را ڪين سڪتي ٿي لڪونھ. ② هُون تمون ننه منٽ ڪرونه جي تمي ٻڌائي مارو ڪيڏو مونو، زم تمون ڪن آوين ماره سڪتي ٿي ٻوليا رُئي ضرورت نه پڙهه. تمون موئين ٿي ڪئينڪ منڪ ام هزمهه جي امي رُوگا دنيا رُون منڪون را زم وودا واڙا سون. پڻ هُون پڪي ڪاتري ٿي ڪونه جي مون ۾ اوئون منڪون ننه سڪتي ٿي هزميا رُئي هيمنت سهه. ③ ڪم تو پلهه امي دنيا ۾ ريا واڙا منڪ سون، توي پڻ امي مقابلو ڪريا ۾ دنيا رُون منڪون را زم نٿي ویتا. ④ زئيون منڪ لڙائي ۾ دشمنون ٿي مقابلو ڪرڻه، تو او آپرون ناول هٿيارون ٿي ودين اوئون را گهڊ پونگهه پرا. پڻ زئيون امي ڪوڙ رو مقابلو ڪرونه، تئيون امي منڪون رُون طريقون ٿي نئين، پڻ پگهون ري ڏيڏل ڪڙا ٿي مقابلو ڪرونه، جيا ٿي امي ڪوڙون منڪون ننه هراوي هيڪونه. پگهون ري ڏيڏل ڪڙا ٿي امي ٿاپتي ڏيونه جي منڪون را ڪراپ ڪيال هاو نالا سهه، ⑤ ان منڪون رُئي ٻڌي وڌائي پڻ هاو نالئي سهه، جيا ري ڪري منڪ پگهون ننه پاھو ڏين مگهورري ۾ وهه. قوچي دشمنون ننه قيڏي ڪرين آپرا ڪيڏا ۾ راکهه، پڻ امي منڪون ننه پگهون ري هاسي واتون شيڪاڙين اوئون را من ري ٻڌي اوڙي واتون ڪتم ڪرونه، زم او ايسنو ڪريست رو ڪيڏو موننه. ⑥ ان امي ايٿا هارو پڻ تيار سون، جي زئيون تمي ٻڌي ايسنو ڪريست رو ڪيڏو مونيو هوشي، تئيون زتا منڪ ڪيڏو نئين موننه، اوئون ننه امي ڪيڏو نه مونيا واري هر وات رُئي

⑦ ٽمي اونڪيون ميشينَ ووه ريا ڪي؟ وات ساوئي سٺه جي امي هاس ۾ مُڪ شيلا سون. جي ڪياڪ نٺه اي يقينَ سٺه جي اُو ايسُو ڪريست رو سُونڊل سٺه، تو اُوئا رٽه سوچينَ ام هُرموو ڪپٽه جي جيوئه نمونئَه اُو ايسُو ڪريست رو سُونڊل سٺه، هيوئه نمونئَه امي پڻ سون. ⑧ پلئَه هُون اماري اِڪتِياري را پارام گهڻي ڪُشي ٿي ڪون، جئي اِڪتِياري تمارو وشواس ٻڳاڙيا هارُو نئين پڻ پڪو ڪرايا هارُو پريُو ايسُو امون نٺه ڏيڏيئَه. تويي پڻ هُون هم ڪريا ٿي لازي نٽي مرتو، ڪم تو هُون هاس ٻولونھ ريو. ⑨ پڻ هُون تمون نٺه مارون لڪل ڪتون ٿي پيوڙاوا نٽي ڪرتو. ⑩ ڪم تو تمون ڪن ڪوڪ مارا پارام اڳي ام ڪئھ ريا جي ”پولوس آڀرون ڪتون ۾ موتي واتون لڪئھ ان آڀرو روڀ ڏيڪاڙئَه، پڻ رُوپرو تو اُو ڪئين نٽي ان اُوئا رو ٻوليا رو نمونو ڪئين ڪاس نٽي.“ ⑪ هيون منڪون نٺه اي هُرموو ڪپٽه، زم امي شيئا ٿي ڪتون ۾ واتون لڪونھ، همروم تمون ڪن رُوپرو آوينَ ڪوم ڪرشون.

⑫ ڪم تو هائي منڪ آڀرا پارام ايوي ڏوقايون هئئَه، جي امون ۾ آڀرا پارام هيوي واتون ڪريا رئي هيئت ٿي نٽي. هيوا منڪ آڀري سوچ پرمونئَه آڀري جونچ ڪرينَ آڀ نٺه ٺاٺوڪا هُرمئَه، ان آڀ نٺه ٺاٺوڪا ڏيڪاڙيا هارُو هيڪا ٻيڙا ٿي مُقابلو ڪرئَه. هم ڪريا ٿي اُو آڀ نٺه پي عقل ڪرئَه. ⑬ پڻ امي اوئون را زم وڏائي نئين ڪرون. امي رُوڳا اُوئا شيوا را پارام ڪُشي ٿي ڪيشون جئي پڳوونَ امون نٺه ڪريا هارُو ڏيڏيئَه. ان پڳوونَ امارئَه حوالئَه اي شيوا رو ڪوم ڪريو تو جي امي تمون هُوڏي پُوڳينَ پڻ شيوا ڪرون. ⑭ جي امي تمون ڪن نه آوٽ، تو امارو حق نه ٿئَت جي امي تمارا پارام ڪُشي ٿي ڪون. پڻ اماري تمون مانھ زميوارئي سٺه، ڪم تو ٻڌون ٿي مور امي تمون ڪن آوينَ تمون نٺه ايسُو ڪريست را پارام ڪُشي رئي ڪٻر همپڙاوي ٿئي. ⑮ امي اُوئا ڪوم را پارام وڏائي نٽي ڪرتا، جيا ڪوم رئي زميوارئي پڳوونَ امون نٺه نٽي ڏيڏيئي، ان جيو ڪوم ٻيڙي منڪي مينت ٿي ڪريوه. پڻ امي اي اُميد را ڪونھ جي

تمارو وشواس پڪو ٿيتو زاشي ان امي آپ نئه ڏيڏل زميواري پرموئنه تمون ڪن وڌارنه گهڻو ڪوم ڪرئون. (16) هيونءِ نمونءِ امي تمون ٿي پرلير پڻ زائين پيزون ملڪون ۾ ايسو را پارام ڪشي رٿي ڪهر همپڙاي هيڪشون. ڪم تو امارئي مرضي اي نٿي جي امي اڳي ٿيل وشواسيون ڪن زائون جيا پيزون ري زميواري ۾ سٺ، ان پيزون را ڪرل ڪوم مانه آپري وڌائي ڪرون. (17) زم شاستر ۾ لڪل سٺ:

”آپري وڌائي مت ڪرو،


پڻ پريو را وڪوڻ ڪرو.“

(18) ڪم تو جيو آپرا وڪوڻ ڪرئ، اُو منڪ نائوڪو نٿي. پڻ جيا را وڪوڻ پريو ڪرئ، اُو منڪ نائوڪو سٺ.

پولوس هزماوئھ

جي هاسون ان ڪوڙون مڪ شيلون ۾ ڪيو قرق سٺ

11 ① پلئه تمون نئه ام لاڳشي جي هون عقل ٿي نٿي بولتو پڻ وڌائي ڪرونه ريو، توئي پڻ ميريوني ڪرين مارئي ٿوڙي وات صير ٿي هومپڙو. ان تمي تو اڳي مارئي وات صير ٿي سهو. (2) زتو پڳوون تمون ٿي پريم راڪين تمارو ڪيال راڪئ، اتو هون تمون ٿي پريم راڪين تمارو ڪيال راڪونه. ڪم تو جيوئه نمونءِ ڪوڪ منڪ آپري ڪوناري سوڪري رو هڪا سوڪرا ٿي هڳڻ ڪرئ ان آپري سوڪري نئه ويوا هارو پويتر راڪئ، هيونءِ نمونءِ مٿين تمون نئه ايسو ڪريست مانه وشواس رڪايوه، ان مارئي زميواري سٺ جي هون تمون نئه ايسو ڪريست هارو پويتر راڪون، زم اوتا رئه پاسو آيا رئه ڏي هون تمون نئه ايسو ڪريست نئه ڏيون. (3) پڻ مون نئه اي پيڪ سٺ جي جيوئه نمونءِ شيطون هاپ را روپ ۾ چالاڪي ٿي پيرهين ڏوشي خوا نئه شيرئي ٿي، هيونءِ نمونءِ متون ڪم ئي ڪرين ڪوڪ



تمارا من نئه ڪراپ ڪرئ ان تمون نئه پورا من ٿي پوٽر نمونئ ايسو ڪريست رئي شيوا ڪريا ٿي سڏاونه. ④ ڪم تو زئون ڪوڪ تمون ڪن آوين ايسو را پارام ايوي واتون همپزاونه جي اماريون همپزاوڻ واتون ٿي ڦرڪ سئ، ڪا تمارا

من ۾ ايوي سوچ نوڪئ، جيئي پوٽر آتما ري ڏيڏل سوچ ٿي ڦرڪ سئ، ڪا تمون نئه تارڻ ليڏا هارو ايوي نمونو شيڪاڙئ، جيو ايسو را پارام ڪشي ري ڪپر ٿي ڦرڪ سئ، جيا نئه تم ٿي اڳي ٿي مونو، توئي پڻ تم ٿي هيون منڪون ري واتون گهڻا صپر ٿي هومپزو. ⑤ پڻ هون آپ نئه هايون منڪون ٿي ڪيا ئي وات ۾ گهٽ نٿي هزمتو، جيا آپ نئه ٻڌون ٿي موتا مڪ شيلا هزمئ. ⑥ پلئ هون تقرير ڪريا را طريقا ۾ هوشيار نٿي، پڻ هون پڳوون ري اونڌي واتون همپزاوون. امي هر توئ هه وات ۾ تمون ڪن اي وات ساوي ڪريئ جي امون نئه پڳوون ريون اونڌيون واتون رئي ڪپر سئ.

⑦ زئون مئين تمون نئه پڳوون رئي ڪشي رئي ڪپر پئها ليڏا وگر امهي همپزاوي ٿي، تئيون آپرا مون رو ڪئين ڪيال نه راڪين هون آپرون هاڻون ٿي آپري روزي ڪموڻو تو، زم تمون نئه پڳوون ٿي مون زڙئ. هم ڪريا ۾ مئين تمارو ڏوه ڪريو، ڪي؟ ⑧ مئين آپرا ڪرچ هارو تمون ٿي ڪئين پئها نٿا ليڏا، پڻ پزيون وشواسي منڌريون را ڏيڏل پئها ليڏا تا، زم تماري شيوا ڪرون. ⑨ ان زئون هون تمون ڪن هتو، ان مون نئه ضرورت پڙي ٿي، توئي پڻ هون ڪيا مانه پار نٿو ٿيو، ڪم تو ايت ري مڪڏيه صوپا ري وشواسي پايي آوين مارئي ضرورت پوري ڪري ٿي. هون تمون مانه ڪيا ئي وات ۾ نڪو پار ٿيوه نڪو ٿيئ. ⑩ هون آپرا پارام ڪشي ٿي ڪونه جي هون پئها ليڏا وگر ايسو را پارام همپزاوون. ان هون ايسو ڪريست ري هاسي واتون مونين هاس ڪونه

جي هُون تمون ڪن پٺيها ليڏا وڳر ايسو را پارام همپڙاوتو ريه، ان تمارا يونان صوپا رون علاقون ۾ ڪوئي مون ننه هم ڪيڏا ٿي نئين روڪڻه. ⑪ هُون تمون ٿي پٺيها ڪم نٿي لیتو؟ ڪوڪ ام ڪڻه ریا جي هُون تمون ٿي پريم نٿي ڪرتو، تيام تمون ٿي پٺيها نٿي لیتو. تمی هائي وات مونوھ، ڪي؟ ڀڳوون زوئڻه جي هُون تمون ٿي ڪتو پريم را ڪونھ. ⑫ پڻ هُون اڳي شيڪاڙيا را پٺيها نٿي لیتو، ان هُون همروم ڪرتو ريه، زم او منڪ جيا آپرا ڪوم را پارام وڏائي ڪريا رو موقعو ڳوئڻه، اُونئون ننه اي وڏائي ڪريا رو موقعو نه زڙڻه جي او امارا نمونا پرموئڻه ڪوم ڪرڻه.

⑬ ڪم تو هيو منڪ هاس ۾ مُڪ شيلا نٿي پڻ ڪوڙ ڪرين آپ ننه مُڪ شيلا ڪڻه. او نڳي هارو شيڪاڙيا رو ڪوم ڪرڻه، ان ڪوڙا ٿين آپ ننه ايسو ڪريست را مُڪ شيلا ڏيڪاڙڻه. ⑭ هايا ۾ حيرون ٿيا رئي ڪئين وات نٿي، ڪم تو شيطون آپ، جيو ڀڳوون رو ڏشمڻ سڻه، آپ ننه ايوو ڏيڪاڙڻه زوئڻه او ڀڳوون را طرف ٿي سوجهر اوازو آڪاشي ڏوت هوئ. ⑮ تيام گهڻي حيروني رئي وات نٿي، جي شيطون را شيواڌاري منڪون ڪن آپ ننه ايوو ڏيڪاڙڻه، زوئڻه او ڀڳوون را شيواڌاري هوئ جيا تارڻ ليڏا رو مارڳ ڏيڪاڙڻه. پڻ نيٺ هايون ننه هايون رون ڪراپ ڪومون رو نتيجو زڙشي.

پولوس همپڙاوتو جي اوئ ايسو ري شيوا ۾ ڪتا ڏک سهياھ


⑯ هُون وڙي منٽ ڪرونھ جي تمی مون ننه آپ را پارام ٻوليا ري ڪري پي عقل مت هڙمو. پڻ جي تمی مون ننه پي عقل هڙموھ، توئي پڻ جيوئ نمونئھ تمی هايون پي عقل منڪون رئي وڏائي هومپڙيا هارو تيار سو، هيوئ نمونئھ مارئي وات هومپڙو، زم هُون پڻ آپرا پارام ڪئينڪ ڪون. ⑰ زئيون هُون همئڻه آپرا پارام هيمنت ٿي ڪونھ، تو هُون زوئڻه پي عقل منڪ را زم وڏائي ڪرونھ ريو، ان وڏائي ڪروو پڙيو ايسو را ڏيڪاڙل نمونا پرموئڻه نٿي. ⑱ پڻ پيزا گهڻا

منک دُنیا را نمونا پرموئنه وڌائي کرئ، تيام هُون پڻ اوئون را زم آپرا پارام کيځ. (19) کم تو تمی انا عقل واڙا سو، جي تمی کُشي ٿي پي عقل منکون ري واتون هومپڙوه. (20) پلئه کوک تمون نئه ڳلومون را زم ٺاوئ، پلئه تمون ٿي ڻڳي کرئ، پلئه تمون نئه آپريون واتون ۾ ڦٽراوئ، پلئه تمون مانه آپرو حُکم ويوراوئ، ان پلئه تمون نئه ٿپڙ هئئ، توي پڻ تمی اوئون ري سهو. (21) هُون تو لڙي مريَن کونه جي امي اوئون را زم روپ کرين طاقت ٿي نه وُڍا.

پڻ جيا پڻ وات را پارام کوک هيئت ٿي وڌائي کرئ، اوئون واتون را پارام مُون نئه پڻ وڌائي کريا ري هيئت سئ. هُون پي عقل را زم ام کونه ريو. (22) هائي منک عبراني قُوم را سئ، تو هُون پڻ عبراني قُوم رو سون. هائي منک اسرائيل ري پيڊي ٿي سئ، تو هُون پڻ اسرائيل ري پيڊي ٿي سون. هائي منک ابراهيم را اولاد سئ، تو هُون پڻ ابراهيم رو اولاد سون. (23) هائي منک آپ نئه ايسو کريست را شيواڌاري کئ. مئين ايسو کريست ري هايون ٿي الاهي گهڻي شيوا کرئ. آپرا پارام ام کيوو ٺيڪ نٿي، پڻ هُون ڳونڌا را زم ٻولتو ريه. مئين هايون ٿي گهڻي مينت کرئ، گهڻي وار جيل موئين پوروئوه، گهڻي وار چاڀکا کاڌا، ان گهڻي وار موت را کترام ريو. (24) مئين پونس وار آپري يهودي قُوم رون منکون ٿي اوڻيتاليه اوڻيتاليه چاڀکا کاڌا، (25) ترڻ وار ڌاري قُوم واڙون ٿي ڌوڪون ٿي مار کاڌئ، هيڪ وار مُون نئه پوٺا هئين ماريو، ترڻ وار ٻيڙو پڻڳايا ري کري موصيت ۾ ڦاٽي ڳيو، ان هيڪ وار ڏي ان رات سمونڊ ۾ ترتو ريو. (26) مئين گهڻي وار پنڌ کريو، هُون ڌريائون را کترا ۾ ريو، ڌاڙيلون را کترا ۾ ريو، آپري قُوم رون منکون را کترا ۾ ريو، ڌاري قُوم واڙون را کترا ۾ ريو، شهرون ۾ کترا ۾ ريو، رڻ ۾ کترا ۾ ريو، سمونڊ ۾ کترا ۾ ريو، ان اوئون را کترا ۾ ريو جيا کوڙ کرين آپ نئه وشواسي پائي کئ. (27) مئين

مينت مَورُئي ڪريه، گهڻي وار اوزا ڳرا ڪرين رات رو پڻ ڪوم ڪرتو ريوه،
 پوکو ان ترهو ريوه، گهڻي وار روڻي ڪاڏا رو ٿيم ئي نه زڙيو، ٿاڍي مريوه
 ان مارا پيريا را لُوگهڙا ئي نٿا. (28) پڙيون واتون شوا، اي وات مُون مانھ هر
 توڻه پار را زم سٺ، جي مُون نٺه ٻڙيون وشواسي منڌڙيون رڻي گهڻي سٺ.
 (29) جي ڪوئي وشواس را ڪيا ۾ ڪمزور سٺ، تو مُون نٺه ضرور اُٿا هارو ڏڪ
 ٿه. جي ڪياڪ ري ڪري ڪوئي وشواسي ڏوه ۾ پڙه، تو مُون نٺه ضرور
 ڏورو لاڳه.

(30) جي مارڻه آپرا پارام ڪڻڪ ڪيو پڙه، تو هُون آپرا پارام ايوي واتون
 ڪريه، جيون ٿي وات ساوئي ٿه جي مُون ۾ ڪڻن هيئت نٿي. (31) پڳوون، جيُو
 پريو ايسو رو پڳوون ان ٻاپ سٺ، جيا را وڪوڻ هميش هُوڏي ٿيتا ره، اُٿا نٺه
 ڪپر سٺ جي هُون ڪوڙ نٿي ڪيتو. (32) زڻيون هُون دمشق شهر ۾ هتو، ان ارتاس
 پاڌشا رو سُونڊل راز ڪريا واڙو مُون نٺه زهاليا هارو دمشق شهر رُون ڌروazon
 مانھ ٻاهرو ڏيوراوتوت ريو، (33) ٿيون شهر ري پڻت ري هيڪي ڌري ٿي منڪي



مُون نٺ ڏلا موئين ٻيهارين نيسو اوتاريو، ان هيونئ نمونئ هُون اُئا ٿي پڇين پاڳي ڳيو.

ٻولوس همپزاوئھ جي پريو ايسو اُئا نئ ڪيا ڏيکارا ڏيڏاھ

12 ① وڏائي ڪريا ٿي ڪئين ڦاڻيڏو نٿي، پڻ مارئ مجهوري ٿي آڀرا پارام ڪيو پڙئ. تيام هُون اينئون واتون را پارام پڻ ڪيھ جي پريو ايسو مُون نئ ڏرشن ڏيڏاھ ان مُون ڪن پڳوون ري واتون ساوي ڪريھ. ② هُون تو روڳو منڪ سون جيو ايسو ڪريست ٿي واسطو راکونھ، پڻ سوڏئ سال ٿيا، هُون آڀ ان تارون ٿي اونسو آڪاش مانھ پڳوون ڪن اوڙي ڳيو تو. مُون نئ ڪهر نٿي جي هُون ڏيل هٿيلو آڪاش ۾ ڳيو تو، ڪا ڏرشن ۾ آڪاش ۾ ڳيو تو. هايا وات رٿي پڳوون نئ ڪهر سئ. ③ پلئ مُون نئ ڪهر تو نٿي جي هُون ڏيل هٿيلو ڳيو تو، ڪا ڏرشن ۾ ڳيو تو، پڳوون نئ هايا وات رٿي ڪهر سئ. توئي پڻ مُون نئ ايئا وات رٿي پوري ڪهر سئ. ④ جي هُون آڪاش مانھ سرڳ ۾ تو اوڙي ڳيو تو، ان اوٽئ مئين ايوي نائوڪي واتون هومپري تي جي ڪيڏا ٿي ٻاري سئ، ان جيون را پارام منڪون نئ همپزيا رٿي مُون نئ آڳيا نٿي. ⑤ هُون هُون آڀرا پارام ڪشي ٿي ڪيھ جي مُون ٿي هم ٿيوھ. هُون تو وڏائي نئين ڪرون، پڻ روڳو آڀرا پارام ايوي واتون ڪشي ٿي ڪيھ، جيون ٿي وات ساوئي سئ جي مُون ۾ ڪئين هيست نٿي. ⑥ جي هُون هايا وات را پارام وڏائي ڪروا ڪرئ، تو هُون وڏائي ڪريا ٿي پي عقل نه ٿئ، ڪم تو ماري ڪيڏل ٻڌي واتون هاسي هوئ. پڻ هُون هايا وات را پارام وڏائي نئين ڪرون، متون ڪوڪ منڪ، جيو مارا ڪوم ڏيڪھ ان جيوي ماري واتون هومپڙئ، مُون نئ ايوي نئين پڻ اُئا ٿي وڌيڪ هڙمئ، ⑦ ڪم تو پريو ايسو مُون ڪن الاهي گهڻي موٽي واتون ساوي ڪريھ.

تيام، مُون نئ مگهورور ٿيا ٿي روڪيا هارو، پڳوون مُون نئ تڪليب ٿيا

ڏيڏئي، جيئي مون نئه ايويي ڏورئي لاڳهه زوئنه هون پالا ٿي ويندال سون، ان جيئي شيطون را پاها ٿي اول سئه، زم هيا تڪليپ ري ڪري هون تنگ ٿيون ان هيون نموننه مگهور نه ٿيون. ⑧ هيا تڪليپ را پارام ترن وار مئين پريو ٿي وينتي ڪري، جي او مون نئه هيا ٿي سڏاون. ⑨ پڻ اوئه مون نئه ام ڪيڏو: ”مارئي ڪرل ڪرپا تون هارو گهٽي سئه، ڪم تو زئون منڪ ۾ آپري هيئت نٿي، تئون مارئي ڪرا پورنه نموننه ساويي ٿهه.“ تيام هون گهٽي ڪشي ٿي آپرا پارام او واتون ڪيه جيون ٿي ٿايتي ٿهه جي مون ۾ آپري هيئت نٿي، زم ايسو ڪريست ربي ڪرا مون نئه همپاڙين راکهه. ⑩ تيام هون گهٽو ڪش سون زئون مون ۾ آپري هيئت نٿي، زئون ايسو ڪريست ري ڪري مارئي پيعزت ٿي ٿهه، مون نئه مجپوري ٿهه، منڪ مون نئه تنگ ڪرڻه ان مون مانه مصيبتون اوئه. ڪم تو زئون مون ۾ آپري هيئت نٿي، تئون مون نئه پگهون را پاها ٿي هيئت زڙهه.

پولوس ڪرنٽس شهر رون وشواسيون نئه هزماوئھ جي او اوئون رو ڪتو گهٽو ڪيال راکهه

⑪ هون پي عقل ٿين آپرا پارام هم بوليو، پڻ هيا هارو تمي مون نئه مجپور ڪريوه. مارنه تو آپرا وڪون نٿو ڪروو، پڻ مارا وڪون ڪروو تمارو قرض هتو. ڪم تو پلئه هون آپ ڪئين نٿي، توئي پڻ هون اوئون منڪون ٿي ڪيا پڻ وات ۾ گهٽ نٿي، جيا آپ نئه ٻڌون ٿي موتا مڪ شيلا هزمهه. ⑫ تمارنه روپرو مئين هر ڏوروڻ گهٽا صير ٿي سهئي، ان پگهون ماري هاڻي نيشون ان پرسا ڏيڪاڙيا ان مئين پگهون ري ڪرا ٿي منڪون نئه هازا هورا ڪريا، جيا ٿي ٿايتي ٿهه جي هون هاسو مڪ شيلو سون. ⑬ مئين تمون نئه ڪيا وات ۾ پزيون وشواسي منڌريون ٿي گهٽ هزما؟ مئين تمون مانه مارا ڪرچ رو پار نه نوڪيو، تو ڪي ٿيو؟ هيا ٿي مئين تمون نئه گهٽ

هزميا، ڪي؟ جي مائه ڪرڇ نه ليڌا رئي وات تمي ڏوه هزموه، تو مون نه ماڻي ڏيو!

(14) ڙوئو، هوئ هون ترئي وار تمون ڪن آيا هارو تيار سون، ان هون همئ هون پڻ تمون مانھ مارا ڪرڇ رو پار نئين ڏيون. ڪم تو هون تمون ٿي پئيها ليڌا رئي لالچ نئي راکتو، پڻ روگو تمارو ڪيال راکونه. هون تمون نه اپرون اولادون را زم هزمونه، ان اولادون رو قرض نئي جي او اپرا مان ٻاپ هارو مال ملڳت پيڙي ڪرئ، پڻ مان ٻاپ رو قرض سئ جي او اپرون اولادون هارو مال ملڳت پيڙي ڪرئ. (15) هون تمون هارو نه روگو گهڻي ڪشي ٿي اپرو ڪرڇ ڪريھ، پڻ اپرو جيو پڻ ڏيڌا هارو تيار سون. زئون هون تمون ٿي اتو گهڻو پريم راکونه، تو تمي ڪم مون ٿي گهٽ پريم راکوه؟ (16) نيك سئ، مئن تمون مانھ اپرا ڪرڇ رو پار نه نوڪيو. پڻ ڪوڪ ام ڪئ جي هون چالاڪ سون، ان پلئ مئن تمون ٿي ڏون نه ليڌو، توئي مئن نگي ٿي تمون نه شيترين تماري ڏيڌل امداد را پئيها کاڌاھ. (17) تمي آپ سوچو. جيا منڪ مئن تمون ڪن امداد ليڌا هارو ميليا تا، اوئون ري هاڻي مئن تمون ٿي نگي ڪراويھ، ڪي؟ (18) مئن طيٽس نه تمون ڪن آيا رئي وينتي ڪري تي، ان مئن اوئا پيڙو پيڙو ايموندار وشواسي پائي پڻ ميليو تو. طيٽس تمون ٿي نگي ڪري تي، ڪي؟ نا نا، طيٽس تو ايمونداري ٿي وڍو. هون طيٽس را زم ايمونداري ٿي نه وڍو، ڪي؟ امي تو ٻڌائي نائوڪئ نمونئ وڍا.

(19) تمي زويام ام هزمئا هوشو، جي امي آپ نه تمون هوما پيڙوهي ڏيڪاڙيا هارو هاڻي ٻڌي واتون اپرا پارام ڪونه ريا. پڻ هم نئي. امي ايسو ڪريست ٿي واسطو راکين پگھون نه آپ هومو هزمين ٻولونه ريا. پريمي پايون ان پينون، امي هاڻي ٻڌي واتون ايئا هارو ڪرونه ريا زم تمارو وشواس پڪو ٿئ. (20) ڪم تو مون نه پيڪ سئ جي زئون هون تمون ڪن آويھ، تئون متون تمي ايوئ ڪراپ نمونئ وينا هوئو، جي مون نه نائوڪو نئين لاڳئ، ان

مارئہ تمون ٿي ايوِي سڪتي ٿي ويو پڙئ، جي تمون نئہ نائوڪو نئين لاڳئہ. ام نہ تئہ جي تمِي جھيڙو جھڳڙو ڪرتا هوئو ان هيڪا پيزا مانہ ريشي ٻڙتا هوئو، تمون نئہ هيڪا پيزا مانہ رينہ سڙتئي هوئہ ان تمِي آپريي آپريي ڌار ڌار پالئيي ناوتا هوئو، هيڪا پيزا رئي ڳلا ڪرتا هوئو ان هيڪا پيزا را پارام ڪراپ واتون همپڙاوتا هوئو، آپ نئہ موتا هڙمين وڏائي ڪرتا هوئو ان تمارو آپت ۾ ڪئين هپ نہ هوئہ. ②1 ان ام پڻ نہ تئہ جي زئيون هون تمون ڪن وڙي آوون، تئيون پڳوون مون نئہ تماري ڪري لازي مارئہ، ان تمارئہ روپرو مارئہ گهئون منڪون ري ڪري ڏکي ٿين روو پڙئ، جيا اڳي ٿي لين ڏوھ ڪرئ ريا، ان جيئي هزون هوڏي آپري ڪرل پونڌائي، پونڌا ڪوم ان لوڦرائي ٿي توبونہ نئي ڪري.

پولوس اڪري وار ڪرنتس شهر رون وشواسيون نئہ هڙماوئہ

13 ① هون هوئہ ترئمي وار تمون ڪن آويہ. ان زم شاستر ۾ لڪل سئہ جي ”بيئون ڪا ترئون منڪون رئي هاڪ پريا ٿي وات رئي ٿايتئي ٿي زائہ،“ تم هون صحيح ڪبر پاڙيہ. ② اڳي، زئيون هون پيزي وار تمون ڪن هتو، تئيون مئين اوئون منڪون نئہ مور ٿي ڏوھ ساڏيا رو ڪيتو تو، جيا اڳي ٿي لين ڏوھ ڪرئ ريا. ان هيونہ نمونئہ همئئہ پڻ، زئيون هون تمون ڪن نئي، هون وڙي اوئون منڪون نئہ ان پيزون ٻڌون نئہ پڻ مور ٿي ڪونہ، جي زئيون هون وڙي آويہ، تئيون هون ڪيا نئہ نئين ساڏون، پڻ زتا ڏوھ ڪرتا هوشي، اوئون ٻڌون نئہ سزا ڏيہ. ③ هايا ٿي تمون نئہ او ٿايتئي زڙشي، جيئي تمِي ليوا ڪروھ ريا، جي هون ايسو ڪريست را پاها ٿي ٻولونہ ريو. ايسو ڪريست ڪمزور نئي. اوئا رئي تو پوريي طاقت سئہ، ان او ماري هاڻي تمون نئہ ضرور سزا ڏيوراوشي. ④ ڪم تو پلئہ ايسو ڪريست ڪمزور منڪ ٿين هوڙي مانہ مريو تو، تويي پڻ او هوئہ پڳوون ري طاقت ٿي جيوتو

سٺ. ان هيوٺه نمونٺه امي جيا ايسو ڪريست ٿي واسطو راکونه، امي پڻ ڪمزور سون. توڻي پڻ زم ايسو ڪريست پڳوون ري طاقت ٿي جيوي اونيوه، تم امي پڻ ايسو ڪريست ٿي واسطو راکين تمون ٿي پڳوون ري طاقت پرموٺه ويشون.

⑤ تمي آپ نٺه زوٽو جي تمي ايسو مانھ پڪو وشواس راکوه ڪا نا. تمي آپ آپرو آزمٽو ليو. تمون نٺه آپرا پارام اي ڪهر نٿي ڪي، جي ايسو ڪريست تمون پيڙو سٺه؟ جي تمي هاس ۾ وشواس راکوه، تو ايسو ڪريست ضرور تمون پيڙو هوشي. پڻ جي تمي ايسو مانھ وشواس نٿي راکتا ان آزمتا ۾ پورا نٿي اوترتا، تو ايسو ڪريست تمون پيڙو نئين هوٺه. ⑥ توڻي پڻ مون نٺه اُميد سٺه جي تمون نٺه آپرو وشواس ڏيڪين ڪهر پڙشي جي امي تمون نٺه وشواس رکيا ۾ پورا اوترياه، ان امي هاس ۾ ايسو ڪريست را مُڪ شيلا سون. ⑦ امي پڳوون ٿي پراٿنا ڪرونه، جي تمي ڪوئي ڪراپ ڪوم نه ڪرو. امارو هائي پراٿنا ڪريا رو مطلب اي نٿي، جي وات ساوئي تٺه جي امي تمون نٺه ايسو مانھ وشواس رکيا ۾ پورا اوترياه. نا نا، امارو هائي پراٿنا ڪريا رو مطلب اي سٺه جي تمي ناٽوڪا ڪوم ڪرو، يلٺه وات ساوئي نه تٺه جي امي هاسا مُڪ شيلا سون. ⑧ ڪم تو زئيون منڪ هاس مانھ وٺه، تو اماري ڪئين اِڪتيارئي نٿي جي امي اوئون نٺه آپري مُڪ شيلا هويا رئي طاقت ڏيڪارون. پڻ هائي طاقت ڏيڪاريا رئي اِڪتيارئي تئيون سٺه، زئيون منڪ هاس رٺه ڪلاڦ وٺه. ⑨ امي تو گهڻا ڪش ٿيونه، زئيون امارنه طاقت ڏيڪاريا رئي ڪئين ضرورت نٿي پڙئي، ان تمي آڻوڪا آپ ناٽوڪه نمونٺه ووھ. ان امي ايٺا هارو پڻ پراٿنا ڪرونه، جي تمي ٻڌائي پيڙا ٿين صحيح نمونٺه وو. ⑩ تيام هون اي ٻڌي واتون لکونه ريو زئيون هون تمون ٿي شيتي سون، زم تمون ڪن آوين مارنه آپري اِڪتيارِي پرموٺه تمون مانھ سڪتي نه ڪرو پڙه. ڪم تو پريو ايسو مون نٺه اي اِڪتيارئي ايٺا هارو نٿي ڏيڏئي

جي هُون تمارو وشواس ٻڌائون، پڻ ايتا هارو ڏيڏيھ جي هُون تمارو وشواس
پڪو رکاوون.

⑪ آڪر ۾، پريمي پايون ان ٻينون، تمڀي ڪش ريو، ٻڌائي پيڙا ٿين صحيح
نمُونه وو، ماري واتون مونو، هيڪ من ٿين ريو، ان آيت ۾ هپ راکو، تو پڳوون
جيو پريم ان هپ رڪايا واڙو سئ، او تمون پيڙو هوشي.

⑫ هيڪا پيڙا ٿي پويتر نمُونه پريم ٿي ملو. ⑬ پڳوون را ٻڌائي سُونڊل
منڪ تمون نئ نمسڪار ڪئ.

⑭ پڙو ايسو ڪريست رئي ڪڙيا، ان پڳوون رو پريم، ان پويتر آتما رو هپ
تمون ٻڌون پيڙو هوئ!

گلتیون را نوم مانه لکل کت رئي هزموئي

کت لکيا واژو

اي کت پولوس لکيو (گلتیون 1:1). ام لاڳهه جي اي کت اوت توتھ لکيو زنيون اوتھ اپرا پيرهيان چکر مانھ گلتیہ صويا ۾ زائين ايسو را پارام همپزابو تو، ان پسٺ سورب صويا را انطاکیہ شهر ۾ پاسو آيو، جيئون او روينو تيو تو (مک شيلون را کوم 13:14-14:28). تيا کيڙ يهودي قوم رن وشواسيون موئين ٿي کئينک منکي انطاکیہ شهر ۾ آوين اي وات اودارئي جي جيا ڌاري قوم واڙا وشواسي تياھ، اوئون رٺ موسي رن لکل حڪمون پرموتھ توھر پڻ ڪراوو. تيام اوت ري وشواسيئي پولوس ان برنباس نٺ يروشلم شهر ۾ هيا وات رو. ٿينصلو ڪراووا ميليا. يروشلم شهر ۾ مک شيلان وشواسي منڌري را پيزا آگيوون ٻڌائي پيزا تيا ان ٿينصلو ڪريو جي توھر ڪرايا رئي ان موسي رن ٻڌون لکل حڪمون مانھ وودا رئي ضرورت نئي (مک شيلون را کوم 15:29-1:10). گلتیون 2:10).

تيا کيڙ پولوس پاسو سورب صويا را انطاکیہ شهر ۾ آيو، ان ام لاڳهه جي اوتھ توتھ، اندازام 49ع ۾، اوتھ گلتیہ صويا رن وشواسيون نٺ اي کت ميلو.

کت کيون منکون هارو لکيو

پولوس اي کت گلتیہ صويا رن ٻڌون وشواسي منکون هارو لکيو (گلتیون 2:1). گلتیہ صويا رن منکون نٺ گلتیہ کيتا. گلتیہ رومي حڪومت رو هيڪ صوبو هتو، جيا ۾ پسديہ علاقا رو انطاکیہ شهر، اڪنيم شهر، ان لڪائنيہ علاقا را لستره ان ڊربي شهر هتا. گلتیہ صويا را منک يهودي نٺا پڻ ڌاريون قومون را هتا، پڻ اوتھ کئينک يهودي قوم را منک پڻ ريتا. گلتیہ صويا ۾ يهودي منکون نٺ پولوس رٺ ڪلاق ڪريا ان لستره شهر ۾ اوتي پولوس نٺ پوٽا هئين مرل هزمين ساڏيو. توئي پڻ پولوس اوئون نٺ ايسو را پارام شيڪازتو ريو (مک شيلون را کوم 13:14-14:23). گلتیہ صويا ۾ گهڻا منک وشواسي تيا ان هايون شهرون ۾ وشواسي منڌريي شروع ٿئي. (مک شيلون را کوم 14:23).

کت لکيا رو مطلب

زنيون پولوس گلتیہ صويا ٿي ڪيو پرو، تنيون يهودي قوم را کئينک وشواسي اوتھ ڪيا ان ڌاري قومون رن وشواسيون نٺ ڪيڏو جي پولوس هاسو مک شيلو نئي ان تارن ليڏا هارو اوئون رٺ نه روڳو ايسو مانھ وشواس راکوو، زم پولوس ڪيڏو تو، پڻ اوئون رٺ موسي رن لکل

حُڪمون پرموتہ تهر پڻ ڪراوَو. اي وات هومپڙين پوُلوس گلتبه صوِيا رون وشواسيون نٿه
 اي ڪت لکيو زم اوتون نٿه هائي ڪوڙي واتون مونيا ٿي روڪئ. ايٿا ڪت م پوُلوس همپڙاوتھ
 جي ايسو اوتا نٿه ڪم ڪرين مڪ شيلو نابوه، ان پڙي مڪ شيلي اوتا رٿي هر وات هاسي
 مونئي (گلتيون 11:1-21). پوُلوس اي هزماوتھ جي منڪ آپري ڪوشش ٿي تارڻ نٿي لي
 هيڪتا. تيام آپري تهر ڪرايا ٿي اوتون نٿه ڪئين ڦاٿڻو نئين نٿه پڻ نقصون ٿيشي، ڪم تو
 موسي رون لڪل حُڪمون مانھ وُڍا ٿي ڪيا نٿه تارڻ نٿي زرتو، پڻ روڳو ايسو مانھ وشواس
 راکيا ٿي تارڻ زرتھ (گلتيون 15:2-31). پوُلوس اي پڻ شيڪارٿھ جي وشواسي موسي رون
 لڪل حُڪمون ٿي آزاد تو سئ، پڻ اوتون رٿه آپري مرضي مانھ نئين، پڻ پوتتر آتما ري مرضي
 مانھ ويو ان ايسو را ڏيڏل حُڪم مانھ ويو جي ”هيڪا پڙا ٿي پريم راکو.“ ڪم تو پريم
 راکيا ٿي منڪ پڳوون رو هر حُڪم پورو ڪرٿه (گلتيون 1:5-10:6).

ايٿا ڪتاب را شاستر ٿي پڙا حوالا:

گلتيون 1:1 ڪوم 9:1-19	گلتيون 19:3 اِسْتِشنا 33:2
گلتيون 8:1 ڪوم 13:14-14:23	گلتيون 19:3 خُرُوج 19:3، 25
گلتيون 16:1 ڪوم 9:1-19	گلتيون 22:3 زبور 14:1-3
گلتيون 18:1-19 ڪوم 9:26-28	گلتيون 22:3 زبور 53:1-3
گلتيون 21:1 ڪوم 9:30	گلتيون 22:3 واعظ 7:20
گلتيون 10:1-2 ڪوم 15:4-21	گلتيون 10:4 احبار 23:1-44
گلتيون 6:3 پيدائش 15:6	گلتيون 10:4 احبار 25:1-7
گلتيون 8:3 پيدائش 12:3	گلتيون 13:4 ڪوم 13:14-14:23
گلتيون 8:3 پيدائش 22:18	گلتيون 22:4 پيدائش 16:1-16
گلتيون 10:3 اِسْتِشنا 27:26	گلتيون 22:4 پيدائش 21:1-5
گلتيون 11:3 حَبْقُوق 2:4	گلتيون 23:4 پيدائش 18:10
گلتيون 12:3 احبار 18:5	گلتيون 27:4 يسعياه 54:1
گلتيون 13:3 اِسْتِشنا 21:23	گلتيون 29:4 پيدائش 21:9
گلتيون 16:3 پيدائش 12:7	گلتيون 30:4 پيدائش 21:10
گلتيون 16:3 پيدائش 13:14-17	گلتيون 2:5-3 پيدائش 17:9-14
گلتيون 16:3 پيدائش 22:17-18	گلتيون 14:5 احبار 19:18
گلتيون 17:3 پيدائش 17:8-1	گلتيون 2:6 يوحنا 13:34
گلتيون 17:3 خُرُوج 12:40-41	گلتيون 17:6 ڪوم 14:19
گلتيون 17:3 خُرُوج 20:1-17	

گلتیون

را نوم مانھ پولوس رو لکل کت



1 ① هُون لکيا وازو پولوس سون، جيو ايسو رو هيک مُک شيلو سون. منکي مُون نئه مُک شيلو نتي سونديو، نکو پگوون مُون نئه سونديا هارو کياک منک نئه نياپو ڏيتو. پڻ ايسو کريست ان پگوون ٻاپ، جيئنه ايسو نئه مرلون موئين ٿي جيوي اوناڙيوه، اوئي مُون نئه مُک شيلو سونديوه. ② اي کت مارا پاها ٿي ان ٻڌون وشواسي پايون را پاها ٿي لکل سئه، جيا مُون پيڙا سئه.

گلتیه صوڀا ريون وشواسي منڌريون رون پريمي پايون ان بينون،
③ آپڻو ٻاپ پگوون ان پڙيو ايسو کريست تمون مانھ کڙپا کرئه ان تمون نئه هکي راکه!

④ آپون نئه ڏوهون رئي ماڻهي ڏيورايا هارو ايسو آپڻا ٻاپ پگوون ري مرضي پرموئنه آپرو جيو ڏيتو، زم آپون نئه ايئا کراپ زمونا ري پونڌائي را قوضا ٿي پچاوئه. ⑤ پگوون را وکوڻ هميش هوڏي ٿيتا رئه! آمين.

پولوس رئي همپزاوَل ايسو را پارام كُشي رئي كبر پگوون رئي ڏيڌل هاسئي كُشي رئي كبر سئ

⑥ هُونِ تمون مانھ حيرُون سون، جي تمی اِتا جلدِي ۾ ڪم ڪرين پگوون نئ ساڏوھ ریا، جيئئھ ايسو ڪريست ري ڪُريا ٿي تمارو آپ ٿي واسطو رکايوھ، ان هُونِ ڪياڪ پيزي وات نئ پگوون رئي ڏيڌل كُشي رئي كبر هُزمين اُئا وونھي ووھ ریا. ⑦ ايسو را پارام جئي كُشي رئي كبر مئين تمون نئ همپزاوئي، رُوگهي اُو هاسئي سئ، پيزي ڪوئي وات پگوون رئي ڏيڌل كُشي رئي كبر نئي. پڻ وات اي سئ، ڪئينڪ ايوا منڪ سئ جيا ايسو ڪريست را پارام كُشي رئي كبر آپرا نمونا پرموئئھ ڦيروا ڪرئھ، ان هم ڪرين تمون نئ پريشون ڪرئھ ریا. ⑧ جئي ايسو را پارام كُشي رئي كبر امي تمون نئ همپزاوئي، هايا ري جگا ۾ جي ڪوئي پڻ پگوون رئي ڏيڌل كُشي رئي كبر ڪين پيزي ڪوڪ وات همپزاوئ، اُو پلئھ امي آپ هوئون ڪا آڪاش ٿي اُول دُوت پڻ هوئ، تو اُو پگوون رو پتل ٿئ. ⑨ زم امي اگي تمون نئ همپزاو تو، تم هُونِ همئئھ وڙي پڻ تمون نئ ڪونھ: جي ڪوڪ منڪ تمون نئ هايا اماري همپزاوَل كُشي ري كبر شوا، جيا نئ تمی مونئي ٿئي، پگوون رئي ڏيڌل كُشي رئي كبر ڪين پيزي ڪوڪ وات همپزاوئ، تو اُو پگوون رو پتل ٿئ.

⑩ هُونِ تمی آپ سوچو، هُونِ ڪيا نئ ڪُش ڪروا ڪرونھ ريو؟ منڪون نئ، ڪا پگوون نئ؟ جي هُونِ هزون هُوڏي منڪون نئ ڪُش ڪروا ڪرئ، تو هُونِ ايسو ڪريست رو شيواڌاري ڪم ڪرين هوئ.

پگوون پولوس نئ سُونڊيو تو

زم اُو ايسو را پارام اي كُشي رئي كبر همپزاوئ

⑪ پريمي پايون ان پينون، هُونِ تمون نئ صاڦ صاڦ ڪونھ جي مارئي همپزاوَل

ڪُشي رڻي ڪبر منڪون را طرف ٿي نٿي. ⑫ ڪم تو مون نئه هائي ڪُشي رڻي ڪبر
 ڪيا منڪ ٿي نٿي زڙڻي، نڪو ڪيئنه مون نئه شيڪاڙڻيه. پڻ ايسو ڪريست آپ
 مون نئه ڏيکارو ڏين هائي وات مون ڪن ساوئي ڪريهه. ⑬ ٽمي تو هومپڙيوه
 جي زئيون هون اڳي يهودي ڌرم ۾ هتو، تڏيئون ماري حياتي رو وڍا رو نمونو
 ڪيو هتو. هون پڳوون ري وشواسي منڌڙي رن منڪون نئه الاهي گهڻو تنگ
 ڪرتو ان وشواسي منڌڙي نئه ڪتم ڪريا رڻي ڪوشش ڪرتو ريو. ⑭ هون يهودي
 ڌرم ري واتون اتي شيڪيو جي ماري يهودي قوم ۾ هون ماري عمر رن گهڻون
 منڪون ٿي آڳڙ وڌتوت ريو، ان هون آپرون ٻاپ ڏاڏون ريون شيڪاڙل واتون مانه
 پورا من ٿي ويتو. ⑮ پڻ پڳوون مارئه پيدا ٿيا ٿي مور، زئيون هون آپري مان را
 بيت موئين هتو، مون مانه ڪرپا ڪرين مون نئه ايئا ڪوم هارو سونديو. تيام
 زئيون پڳوون آپري مرضي پرموئنه ⑯ آپرو ڏيڪرو ايسو مون ڪن ساو ڪريو،
 زم هون ڌاريون قومون نئه ايسو را پارام همپڙاوون، تئه توتئه مئين ڪيا منڪ
 ٿي صلاح نه ليڌي، ⑰ ان نڪو هون يروشلم شهر ۾ اوئون مڪ شيلون ڪن ڳيو،
 جيا مون مور سونديل هتا. پڻ هون هتوڪو عرب ملڪ ڳيو پرو، ان تيا ڪيڙ اوئون
 دمشق شهر ۾ وڙي پاسو آيو.

⑱ پسئه ترثيون سالون ڪيڙ هون پطرس ٿي مليا هارو يروشلم ڳيو، ان ٻي
 هقتا اوئا ڪن ريو. ⑲ پڻ پيزا مڪ شيلامون نئه پيزا نه ٿيا، روڳو پريو ايسو
 رو پائي يعقوب پيزو ٿيو. ⑳ جي واتون هون تمون نئه لکونه ريو، پڳوون مارو
 شائيڌ سئه جي اي ٻڌي هاسي سئه. ㉑ پسئه تيا ڪيڙ هون سوريه ان ڪليڪه
 علاقون ۾ ڳيو. ㉒ پڻ اوئون ڏيئون ۾ يهوديه صوپا ۾ جيئنه پڻ وشواسي
 منڌڙي هتي، اوئنه جيا منڪ ايسو ڪريست مانه وشواس راکتا، او مون نئه
 اوڙڪتا ئي نتا. ㉓ پڻ او منڪ روڳو مارا پارام اتو هومپڙتات ريا جي ”او منڪ
 جيو اڳي آپون وشواسيون نئه تنگ ڪرتو، او هوئه اوئا هاڳي وشواس را پارام
 همپڙاوئه، جيا نئه اڳي او ڪتم ڪريا رڻي ڪوشش ڪرتو تو.“ ㉔ ان او ماري

ڪري پڳوونَ را وڪوڻ ڪرتا.

ٻيڙا مُڪَ شيڪا پوئوس نٺَ هاسو مُڪَ شيلو مونٺَ

2 ① پستھ نيٺ سئوڏون سالون ڪيڙ هونَ برنباس پيڙو وڙي يروشلم شهر ۾ گيو، ان طيطس نٺَ پڻ آپ پيڙو تيڙي گيو. ② هونَ ايٺا هارو يروشلم گيو تو، ڪم تو پڳوونَ مونَ مانھ وات ساوئي ڪري تي جي مارٺَ اوٺَ زاو. اوٺَ مٿين نوڪلائي ۾ پورٺَ نمونٺَ مُڪَ شيلون نٺَ هڙمايا، جيون نٺَ وشواسيون را موٽا آگيوونَ هڙمٺَ، جي هونَ ڌاري قومَ رُون منڪون نٺَ ايسو را پارام ڪيوئي ڪشي رئي ڪهر همپڙاوونھ. مٿين هم ڪريو زم او زوٺَ جي هونَ صحيح واتون شيڪاڙونھ، متون جئي شيوا هونَ ڪرونھ ريو، ان جيو ڪوم مٿين اگي ڪريوھ، اوٺا رو ڪئين قائيڏو نه ٿنھ. ③ اوٺَ توٺَ، طيطس، جيو آپ يهودي نٿي پڻ ڌاري قومَ رو وشواسي سٺَ، او مونَ پيڙو هتو. توئي پڻ اوٺا نٺَ ڪيٺَ ام نه ڪيڏو جي پڪو وشواسي ٿيا هارو اوٺا رٺَ توھر ڪراوون. ④ وشواسيون رئي توھر ڪرايا رئي وات يروشلم ري وشواسي آگيووني نٿي ڪيڏي. پڻ هائي وات او منڪ ڪرٺَ ريا، جيا آپ نٺَ وشواسي تو ڪٺَ پڻ هاس ۾ وشواسي نٿي. او جونچوسون را زم ايٺا رئي ڪهر پاڙيا هارو وشواسي پايون پيڙا ٿياھ، جي آپون نٺَ ايسو ڪريست مانھ وشواس راڪيا ري ڪري موسي رُون لڪل حڪمون تي ڪيوئي آزادي زڙيھ، زم آپون نٺَ موسي رُون لڪل حڪمون مانھ ويوراوين وڙي گلومي موئين نوڪٺَ. ⑤ پڻ امي هايون ري واتون ماڳي نه موني، زم ايسو را پارام هاسي ڪشي رئي ڪهر جئي تمي مونئي، او هاسي رٺَ، ان ڪوئي تمون نٺَ ڪوڙيون واتون مانھ نه ويوراوٺَ.

⑥ پڻ جيا يروشلم را وشواسي آگيوونَ سٺَ، جيون نٺَ موٽا آگيوونَ هڙمٺَ، هوٺَ مونَ هارو ڪئين وات نٿي جي او ڪوڻ ڪوڻ هتا ڪم تو پڳوونَ ڪيا رو پاھو نٿي ليتو، اوئي موتي آگيووني ماريون شيڪاڙل واتون مانھ مونَ نٺَ ڪئين

نه ڪيڏو. ⑦ اُوئي تو زويو جي پڳوونَ مونَ مانھ اي ڪوم راکيوھ، جي هُون ڌاري قُوم وازون ننه ايسُو را پارام ڪُشي رئي ڪبر همپزاوون، جيوئہ نمونئہ پڳوونَ پطرس مانھ يھودي قُوم وازون ننه ايسُو را پارام همپزايا رو ڪوم راکيوھ. ⑧ ڪم تو اُوئي اوڙڪيو جي جيوئہ نمونئہ پطرس مُڪ شيلو ٿين پڳوونَ ري ڪڙا ٿي يھودي قُوم وازون ننه ايسُو را پارام همپزاوئہ، هيوئہ نمونئہ هُون مُڪ شيلو ٿين پڳوونَ ري ڪڙا ٿي ڌاري قُوم وازون ننه ايسُو را پارام همپزاوونھ. ⑨ تيام يعقوب، پطرس، ان يوحنا، جيون ننه وشواسي منڌڙي را ڪاس آڳيوونَ هزمئھ، زئيون اوئون ننه ڪبر پڙئي جي پڳوونَ مونَ مانھ ڪُريا ڪرينَ مونَ ننه هم ڪريا رئي هيئت ڏيڏئيھ، تئيون اُوئي مونَ ٿي ان برنباس ٿي آپرا وشواسي پاڻي ڪينَ هاڻ ملايو، ان اي ڦينصلو ٿيو جي امي ڌاري قُوم وازون ڪن زاشون، ان او يھودي قُوم وازون ڪن. ⑩ اُوئي امون ننه روڳو اتو ڪيڏو: ”تمي يروشلَم شھر رون يھودي قُوم رون ڳريپ وشواسيون رو ڪيال راڪين اِمڌاڌا پيڙئي ڪرو.“ ان مونَ آپ ننه هائي ڪوم ڪريا رو گھڻو شونق هتو.


پولوس پطرس ننه ڌاري قُوم وازون ٿي شيپ نہ راڪيا را پارام هزماوئہ

⑪ پڻ زئيون پطرس انطاڪيہ شھر موئين آيو، تئيون مئين اوئا رنه روڀرو اوئا رو ڏوھ ڪاڍيو، ڪم تو او شيپ راڪين هاو ڳلت نمونئہ ويتو تو. ⑫ اوئنه آوين شروع ۾ او ڌاري قُوم رون وشواسيون پيڙو کاتو پيتو. پڻ زئيون يعقوب را ميلل يھودي قُوم را ڪئينڪ وشواسي آيا، تئيون او ڌاري قُوم وازون ٿي ڌار ٿيو مڏيو ان اوئون ٿي شيپ ڪروا مڏيو، ڪم تو اوئون رئي توھر ٿيل نتئي ان او اوئون يھوديون ٿي پڻاتوت ريو، جيا توھر ڪرايا واري وات مانھ زور ڏيتات ريا. ⑬ ان پيڙا يھودي قُوم را وشواسي هتا، او پڻ پطرس پيڙا هيا ڪوڙي شيپ واري وات مانھ ويوا مڏيا، ان اوئون ننه ڪبر هتئي جي هائي وات ڳلت سئہ.

هيوئه نمونئه نيٺ برنباس پڻ، اوتون رٿه هم ڪريا ري ڪري، آپ ڳلت وات مانھ وين شپپ راڪوا مڏيو. ⑭ پڻ زئيون مٿين زويو جي او ايسو را پارام ڪشي ري ڪبر پرموئنه هاس مانھ نٿي وينا پڻ ڳلت نمونئه وٺه ريا، تئيون مٿين ٻڌون رٿه روپرو پطرس نٿه ڪيڏو: ”تون يهودي قوم رو سٺه، توئي پڻ تون آپري قوم را ريت رواز ساڏين ايئنه ڌاري قوم واڙا را زم وٺه. پسٺه تون ڌاري قوم واڙون نٿه يهوديون را ريت رواز مانھ ڪم ڪرين زوري ويوراوا ڪرئھ؟“

موسيٰ رون لڪل حڪمون مانھ وُڍا ٿي نئين پڻ ايسو مانھ وشواس راڪيا ٿي تارڻ زڙئھ

⑮ هونء امي جيا يهودي قوم را سون، ان ڌاري قوم را نٿي جيون نٿه امي يهودي ڏوهاري هڙمونھ، ⑯ امون نٿه ڪبر سٺه جي موسيٰ رون لڪل حڪمون مانھ وُڍا ٿي ڪومون را ايوزا ڀر ڪوئي منڪ پيڏوهي ٿين پڳوون ري سزا ٿي نٿي پڇتو. پڻ ايسو ڪريست مانھ وشواس راڪيا ٿي پڳوون منڪون نٿه ماڦئي ڏين ڏوهون ري



سزا ٿي آزاد ڪرئھ. تيام امي يهودي پڻ ايسو مانھ وشواس اوٿيوھ، زم موسيٰ رون لڪل حڪمون مانھ وُڍا ٿي نئين، پڻ ايسو ڪريست مانھ وشواس راڪيا ٿي امون نٿه ماڦئي زڙئھ ان امي ڏوهون ري سزا ٿي آزاد ٿيون. ڪم تو موسيٰ رون لڪل حڪمون مانھ وُڍا را نمونا ٿي ڪوئي پڻ ڏوهون ري سزا ٿي آزاد نٿي ٿيتو.

⑰ زئيون امي يهودي ڏوهون ري سزا ٿي آزاد ٿيا هارو ايسو مانھ وشواس راڪونه، جي هم ڪريا ٿي امي يهودي پڻ ڌاري قوم واڙون را زم ڏوهاري ٿيون، تو پسٺه هايا رو مطلب ڪي ٿئٽ؟ ايسو ڪريست امون نٿه ڏوه ڪراوئھ، ڪي؟ نا نا، هم نٿي. ⑱ پڻ وات اي سٺه. زئيون مٿين موسيٰ رون لڪل حڪمون

مانه وُودا رو نمُونو ساڏيوه پرو، هَوَته وَزي جي هُون اُوئون مانه وُودا رو پار
 آپ مانه نوکون، تو هائي حُڪم توڙيا ٿي هُون آپرا آپ ننه ڏوهاري ڪرونه.
 ①۹ ڪم تو موسيٰ را لڪل حُڪم توڙيا ري ڪري مُون ننه هميش را موت رُئي
 سزا زڙيا واڙئي هتئي، ان هُون زوئنه مري گيو تو. ان تيام هُون زوئنه مَرينَ
 اُوئون موسيٰ رون لڪل حُڪمون ٿي آزاده ٿيو، زم هُون نَوِي حياتي لين پگهونَ
 رُئي شيوا ڪرون. ②۰ هُون ايسو ڪريست ٿي واسطو راکيا ري ڪري زوئنه اُوئا
 پيڙو هُوڙي مانه مري گيوه. هَوَته مارئي آپري مرضي مانه وُودا رُئي حياتي
 تو ڪم ٿي گئي، پڻ ايسو ڪريست مارا من ۾ رهه ان اُوئا ٿي واسطو راکيا
 ٿي مُون ننه نَوِي حياتي زڙي. هَوَته جئين ڪئين هُون ايئا حياتي ۾ ڪرونه،
 اُو هُون پگهونَ را ڏيڪرا ايسو مانه وشواس راکين ڪرونه، جيئن مُون ٿي
 پريم ڪريو ان مُون ننه پڇايا هارو آپرو جيو ڏيڏوه. ②۱ پگهونَ منڪون مانه
 ڪُريا ڪرين هائي تارڻ ليڏا رو موقعو ڏيڏوه. ان هُون پگهونَ ري ڪُريا ننه
 گهٽ نڀي هڙمتو، پڻ ايسو مانه وشواس راکيا ٿي پگهونَ را ڏيڏل موقعا
 ٿي ڦاڻيڏو ليونه. ڪم تو جي موسيٰ رون لڪل حُڪمون مانه وُودا ٿي ماقبي
 زڙت ان منڪ ڏوهون ري سزا ٿي آزاده ٿت، تو پسنه ايسو ڪريست رنه مريا
 رو ڪئين ڦاڻيڏو نه ٿت.

3 ① او گلتيه رون وشواسيون، تمي ڪيا پوڙا سو! ڪيئن زوئنه تمون مانه
 جادو ڪرين تمون ننه هاس ٿي ڦيرويا ه؟ امي تمون ٻڌون هومو ساوئه نموننه
 همپڙايو جي ايسو ڪريست تمون ننه ڏوهون ري سزا ٿي پڇايا هارو هُوڙي مانه
 مريو. ② هُون تمون ٿي رُوگي اي ڪهر پاڙوا ڪرونه جي تمون ننه ڪم ڪرين
 پوٽر آتما زڙيو؟ موسيٰ رون لڪل حُڪمون مانه وُودا ٿي؟ ڪا ايسو را پارام
 هومپڙين اُوئا مانه وشواس راکيا ٿي؟ ③ تمي هاو پوڙا سو، ڪي؟ شروع ۾ تمي
 تارڻ ليڏا هارو پوٽر آتما ري ڪڙا ٿي وشواسي ٿيا. ان هَوَته تمي رُوگا آپري
 ڪوشش ٿي تارڻ ليوا ڪروه، ڪي؟ ④ تمي وشواسي ٿين اڌا ڌڪ امهي سهيا،

ڪي؟ وشواس راڪيا ٿي تمون نئه ڪئين ڦاڻيڏو نه زڙيو، ڪي؟ ⑤ زئيون پڳوون تمون نئه پويتر آتما ڏهه، ان تمون نئه منڪون نئه هازا هورا ڪريا رئي ڪرا ڏين تماري هاڻي پرسا ڏيڪاڙهه، تو پڳوون هاڻي ٻڌو ڪوم ڪيا ري ڪري ڪرئ؟ تمارئ موسيٰ رون لڪل حڪمون مانھ وُڍا ري ڪري؟ ڪا تمارئ ايسو را پارام هومپڙين اوتا مانھ وشواس راڪيا ري ڪري؟

⑥ ابراهيم رو مثال ليو، جي تارڻ ليڏا هارو وشواس راڪو ضروري سئ. ابراهيم را پارام شاستر ۾ اي لڪل سئ:

”اوئ پڳوون مانھ پورا يقين ٿي وشواس راڪيو،

ان تيام پڳوون اوتا نئه آپري وات مانھ وُڍا واڙو ڪيڏو.“

⑦ تيام ام هزمو، جيا ابراهيم را زم وشواس راڪئ، هاس ۾ او ابراهيم رو اولاد سئ. ⑧ شاستر ۾ اڳي ٿي لڪل سئ، جي پڳوون ڌاري قوم وازون نئه وشواس راڪيا ري ڪري ماڻهي ڏيشي ان ڏوهون ري سزا ٿي آزاد ڪرشي. تيام اوئ اي ڪشي رئي ڪپر، جي ايسو مانھ پورئي ٿي، ابراهيم نئه اڳي همپڙاوي ٿي، زم شاستر ۾ لڪل سئ:

”تاري ڪري ٻڌيون قومون نئه آشيرواڌ زڙشي.“

⑨ تيام زم وشواس راڪيا واڙا ابراهيم نئه آشيرواڌ زڙيو، تم اوئون نئه پڻ آشيرواڌ زڙهه، جيا اوتا را زم وشواس راڪئ.

⑩ ڪم تو جيا پڻ موسيٰ رون لڪل حڪمون مانھ اي يقين راڪئ، جي ايئون مانھ وُڍا ٿي امون نئه تارڻ زڙشي، او ٻڌائي پڳوون را پتل سئ. ڪم تو او ضرور ڪياڪ وات ۾ ڏوهاري ٿي، ان شاستر ۾ لڪل سئ:

”جيو ڪوئي موسيٰ را لڪل شاستر موئين ٿي

هر هيڪ حڪم مانھ نٿي ویتو،

او پڳوون رو پتل سئ.“

⑪ اي وات ساوئي سئ جي ڪوئي منڪ موسيٰ رون لڪل حڪمون مانھ وُڍا ري

کري پڳوونَ ري نظر ۾ پيڏوهي نٿي ٿيتو، ڪم تو شاستر ۾ ام لکل سئھ:

”جيو منک پڳوونَ ري وات مانھ وئھ،

اُٺا نئھ وِشواس راڪيا ري ڪري جيونَ زڙشي.“

⑫ پڻ مُوسيٰ را لکل حُڪم وِشواس راڪيا را پارام نٿي. اُو تو هاوُ ڌار سئھ ڪم

تو شاستر ۾ اي پڻ لکل سئھ:

”جيو منک ايئون حُڪمون مانھ پُورئھ نمُونئھ وئھ،

اُٺا نئھ حُڪمون مانھ وُڍا ري ڪري جيونَ زڙشي.“

⑬ آبي پڳوونَ را پتل هتا ان ڏوهون رئي سزا کاڌا وازا هتا، ڪم تو آبي پُورئھ

نمُونئھ مُوسيٰ رون لکل حُڪمون مانھ نه وُڍا. پڻ ايسُو ڪريست آڀرو جيوُ ڏينَ

آپتون ڏوهون رو ايوَزو پريا ٿي آپون نئھ پڳوونَ ري سزا ٿي آزاد ڪريا. اُوئھ

آپون نئھ پڇايا هارُو هُوَري مانھ مريا ٿي آپتون ڏوهون رئي

سزا آڀ ڪائينَ آڀڻي پت آڀ مانھ ليڏي. ڪم تو شاستر ۾

ام لکل سئھ:

”جيو ڪوئي سزا ڪائينَ هُوَري مانھ ٽينگاڙ سئھ،

اُو پڳوونَ رو پتل سئھ.“

⑭ ايسُو ڪريست هم ڪريو، زم اُٺا ري ڪري ڌاري قُوم وازون نئھ اُو آشيرواڏ

زڙئھ، جيا را پارام پڳوونَ ابراهيم ٿي وائڏو ڪريو تو، زم آپون نئھ وِشواس

راڪيا ري ڪري وائڏو ڪرل پويتر آتما زڙئھ.


مُوسيٰ را لکل حُڪم ان ابراهيم ٿي ڪرل وائڏا

⑮ پريمي پايون ان بينون، هُون تمون نئھ ڏنيا رو هيڪ مِثال ڏيونھ. زئيون منڪي

آپت ۾ وسن صحيح نمُونئھ ٻونڌيو هئھ، تو تيا ڪيڙ ڪوئي اُٺا وسن نئھ ڪتم

ڪري نٿي هيڪتو، نڪو اُٺا ۾ وڌارئھ واتون نوڪي هيڪئھ. پڳوونَ را ابراهيم

ٿي ڪرل وائڏا پڻ همرام سئھ. ⑯ جيا وائڏا پڳوونَ ابراهيم ٿي ٻونڌيا تا، اُوئھ



ابراھیم ان اوتا را اولاد هارو ٻونڌيا تا. شاستر ۾ گهڻون منڪون را پارام نٿي لڪل جي ”تارا اولاد“ پڻ هڪا زڻا را پارام لڪل سٺه جي ”تارو اولاد“ مطلب ابراهيم رو وستار ايسو ڪريست. (17) مارو ڪيڏا رو مطلب اي سٺه. جيو وسن ڀڳوون صحيح نمونن ابراهيم ٿي ٻونڌيو تو، اوتا وسن نٺه موسيٰ را لڪل حڪم، جيا چار هو ٽيهون سالون ڪيڙ آيا، کتم نٿي ڪري هيڪتا، ان هيون نمونن ڀڳوون ري وائڏو ڪرل واتون کتم نٿي ٿي. (18) ڪم تو جي ڀڳوون ري وائڏو ڪرل واتون ليڏا هارو موسيٰ رون لڪل حڪمون مانھ ويو پڙت، تو اي وائڏا رٿي وات نه ٿت. پڻ ڀڳوون آڀري ڪريا ٿي ابراهيم ٿي وائڏو ڪريو جي او آڀرون سونڊل منڪون نٺه وائڏو ڪرل آشيرواڏ ڏيشي.

(19) تو پستھ ڀڳوون موسيٰ را لڪل حڪم ڪم ڏيڏا؟ ڀڳوون ابراهيم ٿي وسن ٻونڌيا ڪيڙ موسيٰ را لڪل حڪم تيام ڏيڏا، زم هايون حڪمون ٿي منڪون نٺه ڪٻر پڙتھ جي او ڏوهاري سٺه. ان ڀڳوون هائي حڪم روڳا اتي وار هوڏي ڏيڏا، زئيون هوڏي ابراهيم رو او وستار نه پيڏا ٿن، جيا را پارام وائڏو ڪرل هتو. ڀڳوون هائي حڪم آڪاشي ڏوتون هات موسيٰ نٺه ڏيڏا، ان ڀڳوون ان منڪون بيئون وسا موسيٰ ٻوليا وازو هتو. (20) هوٺه وسا ٻوليا وازو منڪ تئيون ڪپن، زئيون بيئون پالتيون وسا وات وٺ رٿي. پڻ ڀڳوون هڪ سٺه، ان اوٺه روڳو آڀرا پاها ٿي ابراهيم ٿي وائڏا ڪريا.

(21) تو پستھ موسيٰ را لڪل حڪم ڀڳوون رون ڪرل وائڏون رٺه ڪلاڦ سٺه، ڪي؟ نا نا، هم نٿي. ڪم تو جي ڀڳوون رون ڏيڏل موسيٰ رون لڪل حڪمون ٿي هميش رو جيون زڙي هيڪت، تو ضرور منڪ پورٺه نمونن اوٺون حڪمون مانھ وڍا ٿي پيڏوهي ٿت ان ڏوهون ري سزا ٿي پڇي زائت. (22) پڻ شاستر ۾ لڪل سٺه جي ڏنيا را ٻڌائي منڪ ڏوهون را قوضا ۾ ڦاٿل سٺه. ان تيام جئين ڪئين ڀڳوون اوٺون منڪون نٺه ڏيڏا رو وائڏو ڪريو، جيا ايسو ڪريست مانھ وشواس راکڻھ، او ٻڌوئي ڪئين ڀڳوون آڀرا وائڏا ڀرموٺنھ وشواس راکيا وازون نٺه ڏنھ.

②3 ايسُو را آيا ٿي مور، زئيون اُونا مانھ وشواس راڪيا رو موقعو نٿو، تئيون آبي مُوسي رون لڪل حُڪمون ري ڪري ڏوهون را قَوَضام قيدِيون را زم هٿا. زئيون هُودِي ايسُو نه آيو، ان آبي اُونا مانھ وشواس نه اوڻيو، تئيون هُودِي آبي همرام ڏوهون را قَوَضام ڦاٿل هٿا. ②4 هيُو نه نمُو نه مُوسي را لڪل حُڪم آيون نه ايسُو ڪريست مانھ وشواس اوڻيا رو مارڳ ڏيڪاڙيا هارُو آيون مانھ راڪل هٿا، زم آبي ايسُو مانھ وشواس راڪون، ان پڳوون آيون نه ماڦي ڏين ڏوهون ري سزا ٿي آزاد ڪرڻ. ②5 پڻ هُو نه ايسُو آيو، ان آبي اُونا مانھ وشواس راڪون، تو آبي همڻه مُوسي رون لڪل حُڪمون هيٺ نٿي.

جيا ايسُو مانھ وشواس راڪڻه، اُو پڳوون را باز سڻ

②6 هُو نه تمي ٻڌائي ايسُو ڪريست مانھ وشواس راڪيا ري ڪري پڳوون را باز سو. ②7 ڪم تو تمي جيئي ايسُو ڪريست ٿي واسطو راڪيا هارُو پويتر سنون ليدوه، تمي ٻڌائي ايسُو ڪريست جيوا ٿياھ. ②8 هُو نه ايٺا ٿي ڪئين قرق نٿي پڙتو جي تمي يهودي قوم را سو ڪا ڌاري قوم را، ڳلوم سو ڪا آزاد، آدمي سو ڪا ڏوشي، ڪم تو تمي ٻڌائي ايسُو ڪريست ٿي واسطو راڪيا ري ڪري هيڪ سو. ②9 ان زئيون تمي ايسُو ڪريست را سو، تئيون تمي ابراهيم را اولاد پڻ سو، ان جيا ڪيا رو پڳوون ابراهيم ٿي وائڏو ڪريو تو، اُو ٻڌوئي پڳوون آبرا وائڏا پرموڻه تمن نه ڏيشي.

④ ① مارو ڪيڏا رو مطلب اي سڻ، جيو ٻاپ را وائڏا پرموڻه ٻاپ ريون شينهن رو وارث سڻ، زئيون هُودِي اُو نونو سڻ، تئيون هُودِي، اُو پلڻه ٻڌيون شينهن رو ڌڻي سڻ، توڻي اُو ڳلوم را زم سڻ. ② زئيون هُودِي اُونا را ٻاپ رو راڪل ٿوڻو نه آئو جي اُو آپ موڻو ٿين آبرو حق لئ، تئيون هُودِي اُو تو ڳلوم را زم پيزون را ڪيڏا هيٺ سڻ، جيا اُونا رڻي ان مال ملڳت رڻي همپار ڪريا وازا سڻ. ③ امون يهودي قوم وازون رڻي وات پڻ همريئم سڻ. اڳي امي

نونون ٻاڙون را زم هتا. امي ڏنيا ري سوچ ان اصولون پرموئنه ویتا ان اوئون را قَوَضام قاتل هتا، زم ڳلوم ڏئي را قَوَضام قاتل هوئو. ④ پڻ زئيون پڳوون رو راکل توتو پورو ٿيو، تئيون پڳوون آپرو ڏيکرو ايسو ميليو، جيو منک ذات ٿيو ان هيڪي ڪوئاري ٿي پيدا ٿيو، ان جيو موسيٰ رون لکل حُڪمون هيٺ ريو، ⑤ زم يهوديون ننه ڳلومي ٿي آزاده ڪرئ، جيا موسيٰ رون لکل حُڪمون هيٺ زوئنه ڳلوم سئ، ان آپون ٻڌون ننه پڳوون را ٻاڙ ٿيا رو حق زڙئ. ⑥ ڪم تو تمي ڌاري قوم واڙا پڻ پڳوون را ٻاڙ سو. تيام پڳوون آڻا من ۾ پويتر آتما ڏيڏوه، جيو پويتر آتما پڳوون را آپرا ڏيکرا ايسو را من ۾ رئو. ان پويتر آتما ري ڪري آبي پڳوون ننه ٻاپ هزمين ڪونه ”او ٻا، امارا ٻاپ.“ ⑦ تيام هوئو تمي ڳلوم نٿي، پڻ پڳوون را ٻاڙ سو. ان زئيون تمي پڳوون را ٻاڙ سو، تو پڳوون ٿي تمون ننه اي حق زڙيوه جي جئين ڪئين پڳوون آپرون ٻاڙون ننه ڏيڏا رو وائڏو ڪريو، او ٻڌوئي تمون ننه زڙشي.

پولوس گلتیہ صنویا رون وشواسیون ننه منت ڪرئ جي او ڪوڙي وانئون ساڌين پڪو وشواس راکئ

⑧ اڳي تمون ننه پڳوون را پارام ڪئين ڪهر نٿي جي ڪوڻ سئ، ان تيام تمي ڏيو ڏيوئونون را قَوَضام قاتلين ڳلومون را زم اوئون ري شيوا ڪري، جيا پڳوون جيوا نٿي نڪو شيوا رئ لائق سئ. ⑨ پڻ هوئو تمي پڳوون ٿي واسطو راکوه، مارو مطلب سئ پڳوون تمون ٿي واسطو راکئ، تو پسئ هوئو تمي وڙي ڏنيا ري سوچ ان اصولون هوما ڪم زائوه ريا، جيا ڪيا ٿي ڪوم ان قائيڏا را نٿي؟ تمي وڙي اوئون ري ڳلومي ۾ ريو ڪرو، ڪي؟ ⑩ تمي هوئو ڪاس ڏيئون، مئينون، توتون ان سالون ننه مونوه ريا. هم ڪريا ٿي تارڻ زڙشي، ڪي؟ ⑪ مون ننه تماري ڪري اي پيڪ سئ، متون مارئي تمون مانھ ڪرل مينت ازائي نه زائو، ان اوئا رو قائيڏو ڪئين نه ٿئ.

⑫ پايون ان پينون، هُون تمون نئه منٺ ڪرونه جي تمِي ماري ڪيڏل وات مانھ رينھ مت ڪرو پڻ مُون نئه آڀرو پائي ھڙمو. ڪم تو هُون پڻ تمون نئه آڀرا پائي پينون ھڙمونھ. تمِي مارو ڪئين ڏوھ نٿي ڪريو. ⑬ تمون نئه تو ڪٻر سئھ جي زئيون پيرھين مئين ايسو را پارام ڪُشي رئي ڪٻر تمون نئه ھمپڙاويئي تئي، تو هُون تمون ڪن تيام آيو تو، ڪم تو هُون ٺيڪ نٿو. ⑭ مارئھ ٺيڪ نہ ھويا ري ڪري تمون نئه گھڻي تڪليب ھڻي. توئي پڻ تمِي مُون نئه نڪو گھٽ ھڙميونڪورڌ ڪريو، پڻ تمِي مارو اتو مُون راکيو، زتو پڳوون را ميلل آڪاشي ڏوت رو مُون راکوت، ڪا ايسو ڪريست رو مُون راکوت. ⑮ تيڏي تمِي آپ نئه پاڳواڙا ھڙمتا جي هُون تمون ڪن آيوھ. هَوئھ تمون نئه ڪي ٿيوھ؟ هُون شائيڏ سون جي تيڏي تمِي مُون ٿي اتو پريم ڪرتا، جي تمِي آڀري اونڪيون ڪاڍين مُون نئه ڏيڏا هارُو پڻ تيار ھتا. ⑯ هَوئھ هُون تمون نئه ھاسئي وات ڪيڏا ٿي تمارو ڏسمن ٿي گيوھ، ڪي؟

⑰ اُو منڪ جيا تمون نئه موسي رون لڪل حڪمون مانھ ويوراوا ڪرئھ، اُو تمارو تو گھڻو ڪيال راکئھ، پڻ اوئون رو من صاف نٿي. اُو تمون نئه مُون ٿي ڌار ڪرين آڀرا ڪيڏام راکوا ڪرئھ، زم تمِي رُوڳا اوئون رو ڪيال راکو. ⑱ هَوئھ صاف من ٿي منڪون رو ڪيال راکو نائوڪئي وات سئھ. ڪيوئي نائوڪئي وات ٿئٽ جي تمِي ھميش مارو ڪيال راکوت، نہ رُوڳو زئيون هُون تمون ڪن سون، پڻ ھمئئھ زئيون هُون تمون ٿي شيتي پڻ سون. ⑲ پريمي پايون ان پينون، هُون تمارو اتو ڪيال راکونھ، زوئئھ تمِي مارا آڀرا ٻاڙ ھوئو. زم ٻاڙ زلميا رئھ ٿوئئھ مان گھڻا ڏک ۾ ھوئھ زئيون ھوڏي ٻاڙ نہ زلمئھ، تم هُون پڻ پيرھين را زم وڙي پڙي وار تمون هارُو گھڻا ڏک ۾ سون، زئيون ھوڏي تمِي پورئھ نمونئھ ايسو ڪريست جيوا نٿي ٿي زاتا. ⑳ ڪيوئي نائوڪئي وات ٿئٽ، جي هُون تمون ڪن ھوئٽ، ان تمون ٿي پڙئھ نمونئھ تمارئھ رُوڀرو پريم ٿي ٻولي ھيڪٽ. ڪم تو هُون تمارا پارام گھڻو پريشون سون.

ابراھیم ري پارٿي ڏوشي ان اوتا ري پيزي ڏوشي رو مثال

②1 ٽمي جيا موسي رون لڪل حڪمون هيٺ ٿيا ڪروھ، ٽمي مون نٿه اي تو ھمپڙاوو، ٽمون نٿه ڪبر نٿي ڪي، جي موسي را لڪل شاستر ۾ ڪي لڪل سٺه؟

②2 اوتا ۾ ام لڪل سٺه، جي ابراهيم را پي ڏيڪرا هتا. هيڪ اوتا ري پيزي ڏوشي ٿي ٿيو، جي ٻوني هٿي ان ڳلوم هٿي. ان پيزو اوتا ري پارٿي ڏوشي ٿي ٿيو، جي آزادهٿي. ②3 جيو ڏيڪرو ٻوني ٿي ٿيو، او اڳي را زم ٿيو. پڻ جيو ڏيڪرو ابراهيم ري پارٿي ڏوشي ٿي ٿيو، جي آزادهٿي، او ڏيڪرو پڳوون را وائيدا پرموٿه ٿيو. ②4 هوٽه هايون واتون ٿي هيڪ مثال زڙهه. هائي ٻي ڏوشي پڳوون رون پيئون ٻونڌل وسنون رو مثال سٺه. هيڪ ڏوشي، هاجره نومي ٻوني جي ڳلوم هٿي، اوتا وسن رو مثال سٺه جيو پڳوون سينا نومي ڏونگر مانھ ٻونڌيو، زئون اوٽه موسي نٿه حڪم ڏيدا. هايا وسن ري ڪري منڪ ڳلوم تٽه.

②5 هاجره نومي ٻوني عرب ملڪ را سينا نومي ڏونگر رو مثال سٺه. ايٿا مثال ٿي آبي يروشلم شهر هزمونھ، ڪم تو يروشلم ان اوتا را يهودي ڌرم را ٻڌائي منڪ موسي رون لڪل حڪمون هيٺ زوٽه ڳلومي ۾ سٺه. ②6 پڻ جيو يروشلم شهر آڪاش ۾ سٺه، جيو پڳوون رون سونيل منڪون هارو سٺه، او ابراهيم ري آزادهٿي رو مثال سٺه، ان او زوٽه آٻئي مان سٺه، ان آبي وشواسي پڳوون را سونيل منڪ ٿين زوٽه اوتا را ٻار سون. ②7 ڪم تو شاستر ۾ هايا را پارام اي لڪل سٺه:

”ڪش تٽه، او وونزئي ڏوشي،

ئون جيا را ٻار نٿي ٿيا.

ڪشي ٿي زور هون ٻول،

ئون جيا نٿه ٻار زلميا رو ڌوڪ نٿي ٿيو.

ڪم تو ئون ساڌل ڏوشي نٿه

ٿارو ڏٺي آپ ڪن پاسي تي ٿاوشي

ان ٿارا ٻار الاهي گهڻا ٿيڻي.

اُٺا ڏوشي رون ٻارون ٿي پڻ گهڻا ٿيڻي

جيا رڻه آڏمي اُٺا نڻه نٽي ساڏي.

②8 هُوڻه، پايون ان پينون، جيوڻه نمونڻه اِصحاق پڳوون را وائيڏا پرموڻه ابراهيم

ري آزاد ڏوشي ٿي پيڏا ٿيو، هيوڻه نمونڻه ٽمي پڳوون را وائيڏا پرموڻه پڳوون

را ٻار سو. ②9 اُٺا وڪت ۾ ٻوني رو ڏيڪرو، جيو اڳي را زم پيڏا ٿيو تو، اُو آزاد

ڏوشي را ڏيڪرا نڻه تنگ ڪرتو، جيو پوٽر آتما ري ڪڙا ٿي پيڏا ٿيو تو. ان

همڻه پڻ همروم سڻه. جيا منڪ يهودي ڌرم رون موسيٰ رون لڪل حڪمون هيٺ

گُلمون را زم سڻه، اُو وشواسي منڌري رون منڪون نڻه تنگ ڪرڻه، جيا اُٺون

حڪمون ري گُلمو ٿي آزاد سڻه. ③0 پڻ شاستر ۾ هايا را پارام ڪي لڪل سڻه؟

شاستر ۾ ام لڪل سڻه:

”ٻوني نڻه ان اُٺا را ڏيڪرا نڻه ٻارا ڪاڍو پرا،

ڪم تو ٻوني را ڏيڪرا نڻه آزاد ڏوشي را ڏيڪرا پيرو

ٻاپ رو ٻار ٿيا رو حق ماڳي نئين زڙڻه.“

③1 تيام، پايون ان پينون، آبي ٻوني رون ٻارون را زم نٽي، جيا ٿي گُلمو ۾

ريون. پڻ آزاد ڏوشي رون ٻارون را زم سون، ان آزاد سون.

ايسو ڪريست آپون نڻه آزاد ڪراياھ، تيام آبي آزاد ٿين ريون

5 ① هُوڻه آبي آزاد سون، ڪم تو ايسو ڪريست آپون نڻه آزاد ڪراياھ. تيام

ٽمي آزاد ٿين وِيتا ريو، ان آپ نڻه موسيٰ رون لڪل حڪمون را قَوَضام

را ڪين وڙي گُلمو مت ٿيو.

② مارئي وات ڏيون ٿي هومپڙو. هُون پولوس ٽمون نڻه ڪونه ريو، جي ٽمي

آپري تهر ڪراوشو، تو موسيٰ رون لڪل حڪمون هيٺ ويو ٽمون مانھ قرض

ٿيڻي، ان ايسو ڪريست ٿي تمون نئه ڪئين ڦاٽيدو نئين زڙئه. ③ هون وڙي هر هيڪ منڪ نئه پڪي ڪاتري ٿي ڪونه، جيو منڪ آپري تهر ڪراونه، او آپ مانه اي قرض لئه، جي تارن ليدا هارو اوتا رئه موسي رن لڪل حڪمون ري هر هيڪ وات مانه ويو پڙشي. ④ تمي زتا منڪ موسي رن لڪل حڪمون مانه وودا ٿي آپ نئه ڏوهون ري سزا ٿي پچاوا ڪروه، هم ڪرين تمي ايسو ڪريست ٿي آپ نئه ڌار ڪرياه، ان پڳوون رئي ڪڙپا ساڏيھ پري. ⑤ ڪم تو آبي اي پروسو راکونه، جي پويتر آتما ري ڪڙا ٿي ايسو مانه وشواس راکيا ري ڪري پڳوون آپون نئه ماقئي ڏين ڏوهون ري سزا ٿي آزا ڪشي. ان آبي اي پروسو راکين تارن ليدا را اوتا توتا رئي وات ڪشي ٿي زوونه. ⑥ ڪم تو زئون آبي ايسو ڪريست ٿي واسطو راکونه، تئون ڪئين وات نٿي جي آڀئي تهر ڪرل سئه ڪا نٿي. پڻ موٽي وات اي سئه جي آبي ايسو مانه وشواس راکونه، ان وشواس راکيا ري ڪري ٻڌون ٿي پريم هون وونه.

⑦ اڳي تمي وشواس راکين ڪيوئه ناوڪئه نمونه ویتا. ڪيئنه تمون نئه آپري وات مناوين هاس مانه وودا ٿي روکيا؟ ⑧ جي وات تمي همئنه مونوه ريا، او پڳوون را پاها رئي نٿي، جيو تمارو آپ ٿي واسطو رکاوو ڪرئه. ⑨ اي ڪيئي ياد راکو:

”ٿوڙڪا ڪاٿا آتا ري ڪري

ٻڌوني مونهل آتو ٿي زانه ڪاتو.“

⑩ آڀئنه پريو ايسو ٿي واسطو راکيا ري ڪري مون نئه پڪي ڪاتري سئه جي تمي مارئي وات مونشو. جيو ڪوئي تمون نئه تهر ڪرايا هارو پريشون ڪرئه، او ڪوئي پڻ هوئه، پڳوون اوتا نئه سزا ڏيڻي.

⑪ پڻ هون، پايون ان پينون، هون تو تهر ڪرايا رو نٿي شيڪاڙتو. جي هون ام شيڪاڙونت جي تارن هارو تهر ڪراوو لازمي سئه، تو مون نئه هيو منڪ تنگ نه ڪرئت. جي هون هم شيڪاڙونت، تو هيو منڪ هوڙي ري وات مانه

رِيشي نه ٻڙت. اُو تيام رِيشي ٻڙه، ڪم تو هُون ٻڙون ننه همپڙاونه جي تارڻ ايسو ڪريست رنه هُوڙي مانه مريا ٿي زڙه. ⁽¹²⁾ اُو منڪ جيا تمون ننه توهر ڪرايا هارو پريشون ڪرڻ، مون اُو آپ ٿي هائي ڪوم ڪرين آپ ننه ڪڏڙا ڪرڻ!

⁽¹³⁾ ڪم تو تمي جيا سو، پايون ان پينون، پڳوون تمون ننه آزادا راکيا هارو آپ ٿي واسطو رکايوه. تمي آزادا سو، پڻ ام مت سوچو جي ”هونه آزادي ٿي آپرون ڪراپ ڪيالون مانه وون.“ پڻ هڪا پيزا ٿي پريم راکين هڪا پيزا رڻي شيوا ڪرو. ⁽¹⁴⁾ ڪم تو موسي را لڪل ٻڌائي حڪم ايٺا هڪي وات ۾ آوي زائ، جي ”پيزون منڪون ٿي آپرا زم پريم راکو.“ ⁽¹⁵⁾ پڻ جي تمي جهنگلي زناورون را زم هڪا پيزا ٿي جهيڙو جهڳڙو ڪروه ان هڪا پيزا رو نقصون ڪروه، تو ڪيال راکيا، متون تمي هڪا پيزا ننه ڪتم نه ڪرو پرا.

آپرون ڪراپ ڪيالون مانه نئين پڻ پويتر آتما ري مرضي مانه ويو

⁽¹⁶⁾ هُون تمون ننه ڪونه جي پويتر آتما ري مرضي مانه وو، ان پسنه تمي آپرون ڪراپ ڪيالون مانه نئين وو. ⁽¹⁷⁾ ڪم تو منڪون را ڪراپ ڪيال پويتر آتما ري مرضي رنه ڪلاڦ سڻ. ان پويتر آتما رڻي مرضي منڪون رن ڪراپ ڪيالون رنه ڪلاڦ سڻ. هائي بي ٿي هڪا پيزا را ڏشمن سڻ. تيام جيا نائوڪا ڪوم تمي ڪروا ڪروه، اُو تمي آپري ڪوشش ٿي ڪري نٿي هڪتا. ⁽¹⁸⁾ پڻ جي تمي پويتر آتما ري مرضي مانه وو، تو تمي موسي رن لڪل حڪمون هيٺ نٿي.

⁽¹⁹⁾ هونه وات ساوئي سڻ جي منڪون رن ڪراپ ڪيالون ٿي ڪيا ڪوم ٿهه. هايون ڪراپ ڪيالون ٿي ام ٿهه جي منڪ پونڌو ڪوم ڪرڻ، پونڌائي ڪرڻ، ان لوڦرائي ڪرڻ. ⁽²⁰⁾ اُو مورتِي ان ڏيو ڏيوٽونا پوزه، ان هر قسم رو جادو ڪرڻ. اُو ڏشمڻي راکه، ان جهيڙو جهڳڙو ڪرڻ. اُو هڪا پيزا مانه ريشي

ٻڙه، ان اُونئون نئه رينه سڙه. اُو آڀرو مونَ وڌاونه، هڪا ٻيڙا ٿي ڌار ٿه، ان آڀرئي آڀرئي پالڻي ٺاوه. (21) اُو رينه راکه، اُو نشو پينَ مست ٿي زاه، اُو عيش عشرت ڪر، ان هيو هر قسم را ڪوم ڪر. هيا را پارام زم مئين اڳي تمون نئه ڪيڏو تو، تم هُون همئنه پڻ ڪونه ريو جي تمي هوشيار ريا، ڪم تو جيا هيو ڪوم ڪر، اُو ڀڳوون را راز ۾ نئين زاه، نڪو ڀڳوون رو وائڏو ڪرل آڪاشي هڪ اُونئون نئه زڙشي.

(22) پڻ پوٽر آتما رئه من موئين هيا ٿي منڪ پريم راکه، ڪش ٿه، هپ راکه، صير ڪر، ميريوني ڪر، پلاڻي ڪر، ايمونڌاري ٿي وه، (23) نرمي ٿي وه، ان آڀرا من نئه آڀرا قوضام راکه. هيو ڪوم ڪريا رئه ڪلاڻ ڪوئي حڪم نٿي. (24) جيا منڪ ايسو ڪريست را سئه، اُوئي زوئنه ايسو ٻيڙا هوري مانه مريا ٿي آڀرئي اڳلوڪئي حياتي ڪتم ڪريه پري، جيا ۾ اُو آڀرون ڪراپ ڪيالون مانه وين آڀري مرضي پرموئنه زم وٽو ام وينا. (25) هوه آڀون نئه پوٽر آتما ٿي نويي حياتي زڙيه، تيام ليو، آبي پوٽر آتما ري مرضي مانه وون. (26) آبي وڌائي نه ڪرون، ان نڪو هڪا ٻيڙا نئه ريشي ٻاڙون نڪو هڪا ٻيڙا مانه ريشي ٻڙون.

هڪا ٻيڙا رئي مدت ڪرو

6 (1) ڀايون ان پينون، جي ڪوڪ ڏوه ڪر، تو تمي جيا پوٽر آتما ري مرضي مانه وُڍا واڙا سو، تمي نرمي ٿي اُوئا نئه هڙماوو. ان آڀرو پڻ ڪيال راکو، متون ڏوه ڪريا را آزمتا ۾ تمي آپ پڻ پڙي نه زانو. (2) زم منڪ هڪا ٻيڙا رو پار اوڀڙاوه، تم تمي هر وات ۾ هڪا ٻيڙا رئي مدت ڪرو. ان هيوئه نموننه تمي ايسو ڪريست رو حڪم پورو ڪرشو، جي ”هڪا ٻيڙا ٿي پريم ڪرو.“ (3) ڪم تو جي ڪوڪ منڪ آپ نئه موٽو هڙمه، ان اُو آپ ڪئين نٿي، تو اُو آڀرا ڪوڙ ٿي آپ شيتراوه. (4) هر هڪ منڪ رئه آڀرون ڪومون رئي جونچ ڪرو ڪپنه،

جي اُو ڪيوا سئ. ان پسئ جي اُوئ نائوڪا ڪوم ڪريا هوئ، تو اُو من ۾ آپرون ڪومون مانھ ڪُش ٿي هيڪئھ. پڻ اُوئا رئھ پيزون را ڪوم زوئين وڌائي نہ ڪروو جي ”هُون پيزون ٿي نائوڪو سون.“⁽⁵⁾ ڪم تو نيا رئھ ڏي هر هيڪ منڪ نہ آپرون آپرون ڪرل ڪومون رو ايوزو زڙشي.

⁽⁶⁾ جيو پڳوون را وچن ري واتون شيڪئھ ريو، اُوئا رئھ آپريون ٻڌيون نائوڪيون شينھون موئن ٿي شيڪاڙيا وازا نہ ڪشي ٿي ڏيوو.

⁽⁷⁾ پُولائو مت! پڳوون ٻڌوئي ڪئين زوئھ. اُو ٻڌون نہ اُوئون رون ڪومون رو ايوزو ڏيشي، ڪم تو ”منڪ جي پوڪئھ، اُو لئھ.“⁽⁸⁾ جي منڪ آپرون ڪراپ ڪيالون مانھ وئھ، تو آپرون ڪراپ ڪيالون را پاھا ٿي اُوئا نہ هميش رو موت زڙشي. ان جي منڪ پوئتر آتما ري مرضي مانھ وئھ، تو پوئتر آتما را پاھا ٿي اُوئا نہ هميش رو جيون زڙشي.⁽⁹⁾ تيام آبي نائوڪا ڪوم ڪريا ۾ هيئت نہ هارون. ڪم تو جي هيئت نہ هارون، تو آپون نہ صحيح ٿوئا مانھ آپتون ڪومون رو ايوزو زڙشي.⁽¹⁰⁾ تو پسئ هوئ، زئون آپون نہ موقعو زڙئ، تئون آبي ٻڌون منڪون ٿي نائوڪئ نمونئ وون، ڪاس ڪرين اُوئون ٿي جيا وشواس راڪيا ري ڪري آپون پيزا هيڪي اڪائي را زم سئ.

آڪري واتون

⁽¹¹⁾ زوئو، هُون آپري هاڻي ڪيوون موتون موئون آڪرون ٿي تمون نہ لکونھ ريو.
⁽¹²⁾ جيا منڪ زوري تماري توھر ڪراووا ڪرئھ، اُو ٻڌائي آپ نہ منڪون ري نظر ۾ نائوڪا ڏيڪاڙوا ان آپرون ڪرل ڪومون رئي وڌائي ڪروا ڪرئھ. اُو منڪون رئي روڳي ايئا هارو توھر ڪراووا ڪرئھ، زم يھودي ڌرم وازا اُوئون نہ تنڳ نہ ڪرئھ. ڪم تو جي اُو ام شيڪاڙت جي توھر ڪرايا ٿي نئين، پڻ ايسو ڪريست رئھ هُوري مانھ مريا ٿي تارڻ زڙئھ، تو يھودي ڌرم وازا اُوئون نہ تنڳ ڪرئھ.
⁽¹³⁾ يھودي قوم وازا جيا توھر ڪراوئھ، اُو آپ موسيٰ رون لڪل حڪمون مانھ

پورئہ نمونئہ نٿي ویتا. توئي پڻ اُو تمون ڌاري قوم واڙون رئي تهر ڪراوئا ڪرئ، زم اُو اي وڌائي ڪري هيڪئ جي اوئي تمارئي تهر ڪراوئيه. (14) ام نه تئ جي هون ڪياڪ وات رئي وڌائي ڪرون. هون روڳو ٻڌون نئ ڪشي ٿي اي همپڙاونئ جي آڀئ پريو ايسو ڪريست هوزي مانھ آڀرو جيو ڏيڌو. ايسو رئ هوزي مانھ مريا ري ڪري هون زوئئ ايسو پيڙو هوزي مانھ مريوه، ان هئ مارو ڪراپ ڏنيا ٿي واسطو ٿول سئ، ان ڪراپ ڏنيا رو مون ٿي واسطو ٿول سئ. (15) هئ ڪئين وات نٿي جي منڪ رئي تهر ٿيل سئ ڪا نٿي. پڻ موئي وات اي سئ جي آڀون نئ نوئي حياتي زڙئيه. (16) زتا منڪ هائي وات مونين وئ، مطلب پڳوون را ٻڌائي سونڊل منڪ جيا پڳوون ري نظر ۾ اسرائيل رو هاسو اولاد سئ، پڳوون اوئون نئ هڪي راڪئ ان اوئون مانھ ڪڍا ڪرئ! (17) هئ آڙ ٿي لين ڪوئي مون نئ تڪليپ نه ڏئ، ڪم تو مارا ڏيل مانھ ڌڪون را نيشون سئ جيون ٿي ٿاڀئي تئ جي هون ايسو رو شيواڌاري سون. (18) پاڻون ان پينون، آڀو پريو ايسو ڪريست تمون مانھ ڪڍا ڪرئ! آمين.

افسيون را نوم مانه لكل كت رئي هزموتئي

كت لكيا وازو

اي كت پولوس لکيو (افسيون 1:1). ام لاگنه جي پولوس اي كت اوت توتنه لکيو زئون پيرهين وار روم شهر موئين روميون رو قيدي هتو (افسيون 1:3, 1:4, 20:6). اوتنه بيئون سالون هوڏي او مسوا مانه ليدل گهر موئين قوج را پاهرام ريتو (مک شيلون را کوم 16:28, 30). پولوس اي كت تخکس نومي منک هات ذي ميلو (افسيون 21:6-22), ان کلسيون رو كت پڻ هاڳي منک هات ذي ميلو (کلسيون 7:4-8). ايتا ئي ام لاگنه جي پولوس هائي بي كت هيڪه توتنه، اندازام 60ع ۾، لکيا.

کت کيون منکون هارو لکيو

پولوس اي كت افسس شهر رون وشواسي منکون هارو لکيو (افسيون 1:1). افسس شهر رون منکون نه افسسي کيتا. افسس اسيه صويا رو بدون ٿي موتو شهر هتو. اوتنه کئينک يهودي منک هتا (مک شيلون را کوم 19:18), پڻ گهڻا منک ڌاريون قومون را هتا. افسس شهر موئين ارتمس ڏيوي رو موتو مندر هتو، ان گهڻا منک اوتا ڏيوي ري مورتِي رئي پوزا کرتا (مک شيلون را کوم 23:19-41). پولوس آپرا پيزا چکر ۾ افسس شهر ٿي متيو، ان بيئون وشواسيون نه، اڪول ان اوتا ري ڏوشي پرسڪل نه، اوتنه ساڌيا (مک شيلون را کوم 19:18-21). تيا ڪيڙ ايلوس نومي وشواسي افسس ۾ آوين کئينک وکت هوڏي ايسو را يارام منکون نه شيڪاريا (مک شيلون را کوم 24:18-26). پولوس آپرا ترثما چکر مانه افسس شهر موئين وڙي زائين ترثک سال ريو ان اوت رون منکون نه ايسو را يارام شيڪاريا (مک شيلون را کوم 19:1-20:1, 31:20). ان هاڳي چکر مانه پاسو اوتون افسس ري وشواسي منڌري رون اڳيونون ٿي مليو. اوت توتنه پولوس نه کبر هئي جي او يروشلم شهر ۾ زهلاشي ان اوتا رو کيال هتو جي او افسيون کن وڙي ڪيڏي نئين اوي هيڪه (مک شيلون را کوم 16:20-38).

تيا ڪيڙ پولوس زهلوتو ان روم شهر موئين قيدي ٿيو. ان اوت توتنه زويا ۾ اي كت لکيو. ام لاگنه جي اي كت لکيا ڪيڙ نيٺ او قيد ٿي سوتيو ان آپرا چارما چکر مانه افسس شهر ۾ وڙي آيو، ان اوتنه اوت تيمئيس نه وشواسيون نه شيڪاريا هارو ساڌيو (1 تيمئيس 3:1). اوت رئي وشواسي منڌري وڏي گئي ان گهڻي ناڻوڪئي ٿئي. تيا ڪيڙ ايسو يوحنا نه ڏرشن ڏين اوتون را وشواس نه وکوڻيو ان اوتون نه اڳي را زم هيڪا پيزا ٿي پريم ڪريا رو ڪيتو (ڏرشن 7:1-2).

ايتا كت را آکر ۾ پولوس افسس شهر را ڪيا پڻ منک رو نوم لين نمسڪار ٿئي ڪيتو.

تيام ام ٿي هيڪڙهه جي پولوس نه روڳو افسس شهر رن وشواسيون نه، پڻ گهڻون ٻيرون شهرن رن وشواسيون نه پڻ اي ڪت ڏي ميلو. ام لاڳهه جي پولوس کاس ڪرين آسيه صويا رن ٻيرون هيرائلس، لويڪي ان ڪلسي شهرن رن وشواسيون نه پڻ اي ڪت ڏي ميلو (ڪلسيون 13:4، 16، 2 پطرس 15:3).

ڪت لکيا رو مطلب

پولوس اي ڪت ايتا هارو لکيو زم وشواسي منڪون نه ڀڳوون را منصوبا را پارام ڪبر پڙهه جي ٻڌائي منڪ ان ٻڌائي آڪاشي ڏوت ايسو ڪريست نه آيرو ڌڻي مونين اوتا ري مرضي مانهه وٺ. هائي منصوبو پورو ڪريا هارو ڀڳوون ايسو ڪريست را هيلائي ڌار ڌار قومون رن منڪون نه ماڻهي ڏيڏيهه ان هڪا پيرا ٿي مناوين هڪي وشواسي منڌري م پيرا ڪرياهه. هيون نموننه وشواسي منڌري هڪ من ٿين ايرا ڌڻي ايسو ري مرضي مانهه وين ايسو رو ڪوم ڪرتي ريشي ان ڀڳوون رو منصوبو ساوو ڪرين ڏيڪارشي، زم ٻڌائي منڪ ڏيڪين ڀڳوون را وڪوڻ ڪرڻ (افسيون 3:1-21). پولوس اي پڻ شيڪارڙهه جي وشواسيون رڻ ڪيون نموننه ويو (افسيون 14-20:6).

ايتا ڪتاب را شاستر ٿي پيرا حوالا:

افسيون 1:1	ڪوم 19-9	افسيون 7:3-9	ڪوم 19-9
افسيون 13:1	ڪوم 19-18	افسيون 1:4	ڪوم 16:28، 31
افسيون 13:1	ڪوم 26-24	افسيون 8:4	زبور 18:68
افسيون 13:1	ڪوم 19-20	افسيون 26:4	زبور 4:4
افسيون 12-11:2	پيدائش 17-14	افسيون 31:5	پيدائش 2:2
افسيون 15:2	احبار 1-34	افسيون 3-2:6	استشنا 5:16
افسيون 15:2	عبرانيون 8-13	افسيون 20:6	ڪوم 16:28، 31
افسيون 15:2	غيرانيون 10-18	افسيون 21:6	ڪوم 20:4
افسيون 1:3	ڪوم 16:28، 31	افسيون 21:6	ڪلسيون 7:4

اِفسيون

را نوم مانه پولوس رو لكل كت



1 ① هُون لکيا وازو پولوس سون، جيو پڳوون ري مرضي پرموئنه ايسو کريست رو هيک مک شيلو سون.

اِفْسُس شهر رون پريمي وشواسي پايون ان بينون، تمې جيا پڳوون را سونډل منک سو، ان ايسو کريست ټي واسطو راکين پکو وشواس راکوه،
2 ② آپتو پاپ پڳوون ان پريو ايسو کريست تمون مانه کړپا کرئه ان تمون ننه هکي راکئه!

ايسو کريست ټي واسطو راکيا ري کري
پڳوون آپون مانه کتي گهڼي ميريوني کرئه

3 ③ پڳوون را وکون ټنه، جيو آپتا پريو ايسو کريست رو پڳوون ان پاپ سئه؛
اونه آپون ننه ايسو کريست ټي واسطو راکيا ري کري او ټډائي آشپرواډ ډيډاه
جيا پويتر آتما ټي آکاش هون زرئه. 4 ④ اونه جگت ننه نايا ټي مور آپون ننه

سُونڊيا تا، زم ايسو ٿي واسطو راکيا ري ڪري آبي اوتا هوما پوٽر ان پڏوهي ريون. اونه آيون ٿي پريم راکين ⑤ آڀري ڪشي ان مرضي پرموٽه مور ٿي اي ڦينصلو ڪريو تو جي او ايسو ڪريست ري ڪري آيون نه آڀرا ٻار ڪرين راکنه، ⑥ زم اوتا را وکوڻ ته جي او ڪٽي گهٽي ڪرپا ڪرڻ. پڳوڻ آڀرا پريمي ڏيڪرا ايسو نه ميليا ٿي آيون مانھ آڀري گهٽي ڪرپا ڪرڻ. ⑦ ايسو ٿي واسطو راکيا ري ڪري آبي ايسو رڻه آڀرو جيو ڏيڏا ٿي ڏوهون را قوضا ٿي آڙا ٿياھ، مطلب آيون نه آڀتون ڏوهون رڻي ماڦي زڙيھ. هائي ٻڌي وات پڳوڻ ري موتي ڪرپا پرموٽه ٿيھ.

⑧ ان هائي گهٽي ڪرپا پڳوڻ آڀري ٻڌي عقل ان هزم ٿي آيون مانھ ڪرڻي، ⑨ زئون اونه آڀري ڪشي پرموٽه آڀرا من رڻي اونڌي وات ساوڻي ڪرڻي جي اوتا رڻي مرضي ڪيوئي سڻه. اونه مور ٿي ڦينصلو ڪريو تو جي هائي وات ايسو ٿي پوري ڪراوشي. ⑩ هائي وات پڳوڻ رو ناول منصوپو سڻه، جيو او آڀرا صحيح توتا مانھ پورو ڪرشي. ان هائي منصوپو اي سڻه جي جئين ڪئين آڪاش مانھ سڻه، ان جئين ڪئين ڌرتي مانھ سڻه، اوئون ٻڌون نه پڳوڻ پڙا ڪرشي، ان آڀرا سونڊل پڇايا واڙا ڪريست نه اوئون مانھ ڌي ڪرين راکشي.

⑪ پڳوڻ ٻڌي واتون آڀري مرضي ان مقصد پرموٽه ڪرڻ. اونه امون يهودي قوم واڙون نه پڻ ايسو ٿي واسطو راکيا ري ڪري آڀرا سونڊل منڪ نايا. هم ڪريا رو ڦينصلو اونه آڀرا مطلب پرموٽه مور ٿي ڪريو تو، ⑫ زم اوتا رو مون ان وکوڻ امون يهوديون ري ڪري ته، جيئي ڌاري قوم واڙون ٿي مور ايسو ڪريست مانھ پروسو راکيو تو.

⑬ ان پڳوڻ تمون ڌاري قوم واڙون نه پڻ ايسو ٿي واسطو راکيا ري ڪري آڀرا سونڊل منڪ نايا، زئون تمي هاسو وچن هومڀيو، جيو تمون نه تارڻ زڙيا را پارام ڪشي رڻي ڪبر سڻه. ان زئون تمي پڻ ايسو مانھ وشواس اوڻيو، ٿيون

پڳوونَ آپرا وائڏا پرموئڻه تمون نڻه پوٽر آتما ڏيتو. ان زم ٺپا ٿي ٿاڀي ٿڻه جي ڪيا رڻي شينھ سڻه، تم پوٽر آتما ڏيڏا ٿي پڳوونَ ٿاڀي ڏيڏي جي ٽمي اُٺا را منڪ سو. ⁽¹⁴⁾ زڻيون پڳوونَ آپون نڻه پوٽر آتما ڏيتو، اُوڻه زوئڻه آپون نڻه آپرا منڪ نايا هارو هوڻي ڏيڏي. ايٺا ٿي پڪي ڪاٽري سڻه جي پڳوونَ آپون نڻه آڪري ۾ پورڻه نمونڻه آپرا منڪ ناوين ڏوهون را قوضا ٿي آزاد ڪراوشي، زم اُٺا رو مون ان وڪوڻ ٿڻه.

پولوس افسس شهر رن وشواسيون هارو پراٺنا ڪرڻه

⁽¹⁵⁾ تيام، زڻيون مڻين هومپڙيو جي ٽمي پڙيو ايسو مانھ وشواس راڪوھ ان پڳوونَ رن سونڍل ٻڌون منڪون ٿي پريم ڪروھ، ⁽¹⁶⁾ ٽيون ٿي لين هون تمون هارو پڳوونَ رو ٿورو مونتو ريونھ ان تمون هارو پراٺنا ڪرتو ريونھ. ⁽¹⁷⁾ ماري اي پراٺنا سڻه جي آڀا پڙيو ايسو ڪريست رو پڳوونَ، جيو مونوازو ٻاپ سڻه، تمون نڻه پوٽر آتما ٿي عقل ڏڻه ان آپ نڻه تمون ڪن ساوو ڪرڻه، زم ٽمي پورڻه نمونڻه اُٺا نڻه اوڙڪو. ⁽¹⁸⁾ پڳوونَ تمون نڻه من موئين سوچهرو ڏڻه، زم تمون نڻه ڪبر پڙڻه، جي تمارو پڳوونَ مانھ ڪيو پروسو سڻه، جيئڻه تمون نڻه آپرا ڪوم هارو سونڍياھ. ان تمون نڻه ڪبر پڙڻه جي پڳوونَ را وائڏا پرموئڻه اُٺا رن پيزون ٻڌون سونڍل منڪون پيڙو تمون نڻه آڪاش ۾ ڪتو مون ان هڪ زڙشي. ⁽¹⁹⁾ ان تمون نڻه اي پڻ ڪبر پڙڻه جي پڳوونَ آپري گهڻي طاقت ان ڪڙا ٿي آپون وشواس راڪيا وازون مانھ ڪٽي ميرپونڻي ڪرڻه. اي طاقت ان ڪڙا جي پڳوونَ آپري ڦڌرت ٿي آپون هارو واپراوڻه، اُو رڻي اُو هاڳي ڪڙا سڻه ⁽²⁰⁾ جيا ٿي اُوڻه ايسو ڪريست نڻه مرلون موئين ٿي جيوي اوناڙيو، ان آڪاش موئين آپرڻه زمڻه پاهڻه مون ۾ بيهاريو. ⁽²¹⁾ ان جيا رڻي پڻ آگيوونڻي، اڪتياري، ڪڙا ڪا راز سڻه، اُو پلڻه آڪاشي ڏوت ڪا پوت، ڪا ڏيو ڏيوٽونا هوڻه، ان جيا نڻه پڻ منڪ مونڻه، نه روڳو ايٺا حياتي ۾ پڻ آيا واري حياتي ۾ پڻ، هايون ٻڌون ٿي پڳوونَ ايسو

کريست ننه گهڻو مون ڏيډوه، ان اونا ننه هايون ٻڌون مانھ را کيوھ. ② پگھون ٻڌوئي کئين ايسو کريست هيٺ را کيوھ ان اونا ننه ٻڌون رو ڌڻي کرين وشواسي منڌڙي ننه ڏيډو. ③ ايسو وشواسي منڌڙي مانھ ٿين ماٿا را زم سئ، ان وشواسي منڌڙي اونا را ڏيل را زم سئ. ايسو کريست ٻڌون ننه ٻڌوئي کئين ڏئ، ان وشواسي منڌڙي موئين او آپري ٻڌي واتون ساوي کرين ڏيکارڻه.

ايسو ڏوهون ري سزا ٿي پچاوين هميش رو جيون ڏئھ

2 ① اڳي تم پگھون را حڪم توڙيا ان ڏوه ڪريا ري ڪري مرلون را زم هٿا، ڪم تو تمارو پگھون ٿي کئين واسطو نتو ان تمون ننه هميش را موت. ڀي سزا زڙيا واڙي هٿي. ② تيڏي تم اينا ڏنيا را ڪراپ نمونا پرموئنه شيطون ري مرضي مانھ وينا، جيو پوتون ان ڏيوئونون رو آڳيون سئ ان ڏنيا مانھ ٻڌيل راز ڪرڻه. شيطون او آڪاشي ڏوت سئ جيو پگھون رنه ڪلاڦ ٿين همئنه اوئون منڪون ٿي آپرو ڪوم ڪراوئھ جيا پگھون رو ڪيڏو نٿي موتا. ③ اڳي امي يهودي قوم واڙا پڻ ٻڌائي هيون منڪون جيوا هٿا. امي آپرون ڪراپ ڪيالون مانھ وينا، ان آپري مرضي پرموئنه زم جيو ڪيتو ان زم من موئين ڪيال آوتو، تم ڪرتا. امي يهودي قوم واڙا، ڌاري قوم واڙون را زم، ڏوهاري هٿا ان پگھون ري سزا کاڏا واڙا هٿا.

④ پڻ پگھون هميش ڏيا ڪرڻه، ان اوئھ آپون ٿي اتو گهڻو پريم ڪريو، ⑤ جي زئون آبي آپتون ڏوهون ري ڪري مرلون را زم هٿا، تئيون اوئھ آپون ننه ايسو پيڙا جيوتا ڪرياه. پگھون ري ڪراپ ري ڪري تم هميش را موت ٿي پچي گياھ ان تمون ننه هميش رو جيون زڙيوھ. ⑥ ان آپئنه ايسو کريست ٿي واسطو راڪيا ري ڪري، پگھون آپون ننه نوو جيون ڏيډوه ان آپ ٿي واسطو راڪيوھ، ان هيوئھ نمونئھ زوئنه ايسو پيڙا جيوي اوناڙياھ ان اونا پيڙا آڪاش موئين بيهاريھ، ⑦ زم آيا واڙي حياتي م آپئنه ايسو کريست ٿي واسطو راڪيا

ري ڪري اُو آڀون نئه تارڻ ڏينَ آڀون مانھ ميرپونئي ڪرئہ ان آڀرئي ڪُرپا ساوئي ڏيکارئہ. ⑧ ڪم تو ڀڳوون ري ڪُرپا ري ڪري ايسو مانھ وشواس راڪيا ٿي تمي هميش را موت ٿي پڇي گياھ ان تمون نئه هميش رو جيون زڙيوھ. تمي آڀ نئه پڇايم ڪئين نٿي ڪريو، پڻ ڀڳوون تمون نئه امھي پڇاياھ. ⑨ ڀڳوون آڀون نئه اينا وات ري ڪري نٿي پڇاياھ، جي آڀي نائوڪا ڪوم ڪرياھ. تيام آڀي اينا وات رئي وڌائي نٿي ڪري هيڪتا، جي مئين آڀ نئه پڇايوھ. ⑩ ڪم تو آڀون نئه ڀڳوون ناياه، زم آڀي ايسو ڪريست ٿي واسطو راڪين اُو نائوڪا ڪوم ڪرون، جيا ڀڳوون اڳي ٿي آڀئنه ڪريا هارو تيار ڪرين راڪياھ.

ايسو ڪريست ري ڪري يهودي ان ڌاري قوم واڌا هيڪ ٿي زائھ

⑪ تيام تمي جيا ذات پرموئنه ڌاري قوم را سو، جيون نئه اماري يهودي قوم واڌا گهت هزمين توهر نه ڪراول ڪئھ، ان رُوگو آڀرا ڏيل رو توڙڪوڪ ٽڪرو وڌايا ري ڪري آڀ نئه توهر ڪراول ڪئھ، تمي ياد راڪو ⑫ جي اڳي ايسو مانھ وشواس راڪيا ٿي مور، تمون نئه ڀڳوون را سونڊل پڇايا واڌا ڪريست را پارام ڪئين ڪبر نٿي، اماري ڀڳوون ري سونڊل اسرائيلي قوم ٿي تمارو ڪئين واسطو نتو، ان جيا وسن ڀڳوون آڀرا وائڏا پرموئنه ٻونڌيا تا، اُو تمون هارو نتا. اينا ڏنيا ۾ تمارئي ڪئين اُميد نٿي ان تمي ڀڳوون ٿي هاو ڌار هتا. ⑬ پڻ هونء ايسو ڪريست ٿي واسطو راڪيا ري ڪري تمي جيا اڳي شيتي هتا، ايسو ڪريست رء آڀرو جيو ڏيڏا ٿي ڏوڪڙا ٿي گياھ. ⑭ ڪم تو ايسو آڀون وسا هڀ راڪايا واڌو سئہ. اُوئہ امون يهودي قوم واڌون ان تمون ڌاري قوم واڌون نئه هيڪ ڪرياھ پرا. ان اُو شپ جيو پينت را زم آڀون نئه هيڪا پيزا ٿي ڌار راڪتو، مطلب آيت ۾ جيو وير هتو، اُوئا نئه ايسو ڪتم ڪريوھ پرو. ايسو آڀرا موت ٿي ⑮ يهوديون رو موسي رون لڪل ٻڌون حڪمون ان ريت رواڙون رو نمونو ڪتم ڪريو، زم اُوئا ٿي واسطو راڪيا ري ڪري يهودي قوم واڌون ان ڌاري قوم واڌون موئين ٿي

هيك نَوَيِ منڌڙي ناوئه، ان هيوئه نمونئه اوئون رو آيت ۾ هپ رکاوئه. ①۶ هُوڙي مانه مريا ٿي ايسو يهوديون ان ڌاري قوم وازون رو آيت ۾ وير کتمه گريو، ان هيوئه نمونئه آپون نئه هيڪي منڌڙي ۾ پيڙا ڪرين هڪا ڏيل را زم ناوين آپون نئه ان پڳوون نئه آيت ۾ منايه. ①۷ ايسو آوين تمون ڌاري قوم وازون نئه، جيا پڳوون ٿي شيئي هتا، ان امون يهوديون نئه، جيا اوئا ڏوڪڙا هتا، ٻڌون نئه هپ رکايا را پارام ڪشي رئي ڪبر ڏيڏي. ①۸ ڪم تو ايسو ري ڪري آبي ٻڌائي پويتر آتما ٿي اپنا ٻاپ پڳوون هون واسطو راڪي هڪونه.

①۹ تيام هوئه تم ڌاري قوم وازا ڌاريا ان اشيندا نٿي، پڻ تم ڀي پڳوون رون سونڊل منڪون پيڙا هيڪي منڌڙي را سو، ان پڳوون را گهر را پاتي سو.

②۰ وشواسي منڌڙي هڪا گهر را زم سئه. زم پُنياءَ مانه پتر سٿيا ٿي گهر نهئ، تم مڪ شيلون ان پڳوون رو نياپو ڏيڏا وازون ريون شروع ڪرل واتون مانه تم ڀي وشواسي منڌڙي موئين پيڙا ٿيا. ان ايسو ڪريست آب زوئنه پُنياءَ رو ڪاس صحيح ان هرڪو پتر سئه. ②۱ زم پُنياءَ را ڪاس پتر پرموئنه سٿائين پورو گهر نهئ، تم پريو ايسو مانه وشواس راڪين آبي ٻڌائي پيڙا ٿيونه ان وشواسي منڌڙي وڌين پريو ٿي واسطو راڪيا ري ڪري پويتر منڌر ٿئ. ②۲ ان تم ڌاري قوم وازا پڻ پريو ٿي واسطو راڪيا ري ڪري وشواسي منڌڙي موئين امون پيڙا ٿيا، ان هيوئه نمونئه پويتر آتما رهه آپون موئين ريا ٿي وشواسي منڌڙي پڳوون رو گهر ٿئ.

پڳوون پولوس نئه سئونڊيو

زم او ڌاري قوم وازون نئه ايسو را پارام همپڙاوءَ

① تيام هون پولوس تمون ڌاري قوم وازون هارو ايسو ڪريست رئي شيوا ڪريا ري ڪري قيڌي سون. ② تمون نئه تو ڪبر هوشي جي پڳوون مون

مانه ڪُڙيا ڪرينَ مونَ ننه آڀرو منصُويو پُورو ڪرايا هارُو اي زميوارئي ڏيڏئي جي هُون تمون ننه پڳوونَ ري ڪُڙيا را پارام همپڙاوون. ③ هائي اُو اُونڌئي وات سئهِ جئي پڳوونَ مونَ ننه ساوئي ڪرينَ ڏيڪاڙئيه. هايا را پارام مئين مائنه پڻ ڪئينڪ لکيوه، ④ ان اُوئا ننه پٽيا ٿي تمِي هڙمي هيڪوه جي هُون ايسُو ڪريست را پارام هائي اُونڌئي وات ڪٽئي هڙمونه. ⑤ هايا اُونڌي وات رئي ڪهر پڳوونَ اڳلوڪا زمونا م ڪيا منڪ ننه نٽئي ڏيڏئي، پڻ همئنه آڀرون پوئتر مُڪ شيلون ننه ان آڀرو نياپو ڏيڏا واڙون ننه پوئتر آتما ٿي هائي وات ساوئي ڪرينَ ڏيڪاڙئيه. ⑥ پڳوونَ رئي اُونڌئي وات اي سئهِ، جي ايسُو را پارام ڪُشي رئي ڪهر مونيا ري ڪري ڌاري قوم واڙون ننه پڻ يهوديون پيڙو اُو هڪ زڙشي، جيو پڳوونَ رون سُونڊل منڪون هارُو راڪل سئهِ. ڌاري قوم واڙا يهوديون پيڙا هيڪي منڌڙي موئين هيڪا ڏيل را زم تيشي. ان ڌاري قوم واڙون ننه يهوديون پيڙو پڳوونَ رو وائڏو ڪرل آشيرواڏ زڙشي، جيو وائڏو ايسُو ڪريست ري ڪري پُورو ٿيوه.

⑦ پڳوونَ آڀري ڪڙا ويوراوينَ مونَ مانه ايوي ڪُڙيا ڪري ان هيمنت ڏيڏئي جي هُون هائي ايسُو را پارام ڪُشي رئي ڪهر همپڙايا رئي شيوا ڪرون. ⑧ هُون پڳوونَ رون ٻڌون سُونڊل منڪون موئين ٿي ٻڌون ٿي گهٽ سون، توئي پڻ پڳوونَ مونَ مانه اي ڪُڙيا ڪري ان اي هيمنت ڏيڏئي، جي هُون ڌاريون قومون ننه اي ڪُشي رئي ڪهر همپڙاوون جي ايسُو ايوآ آشيرواڏ ان هڪ ڏه جيا منڪون را هڙميا ٿي ٻارا سئهِ، ⑨ ان هُون پڳوونَ رئي اُونڌئي وات منڪون ڪن ساوئي ڪرينَ ڏيڪاڙون. هائي اُونڌئي وات پڳوونَ رو منصُويو سئهِ. پڳوونَ، جيئنه ٻڌوئي ڪئين نايوه، جڳت نايا ٿي مور هائي منصُويو نايو تو، ان اُوئا وڪت ٿي لين هٿاڙين راڪيو تو. ⑩ پڳوونَ آڀرو منصُويو تيام هٿاڙين راڪيو تو، زم آڪاشي ڏوتون ننه، جيون ننه آڪاش م آڳيونئي ان اڪتياري پڳوونَ را طرق ٿي زڙل سئهِ، همئنه ايئا زمونا م وشواسي منڌڙي ننه زويا ٿي اي ڪهر

پڙه، جي ڀڳوون هر وات ۾ ڪٿي گهڻي عقل ٿي ڪوم ڪرڻ. ⑪ ڀڳوون جڳت نايا ٿي مور اڳي اي ڦينصلو ڪريو تو جي اُو آڀا پريو ايسو ڪريست ٿي هائي منصوبو پورو ڪراوشي. ⑫ ايسو ڪريست ٿي واسطو راکيا ري ڪري ان اونا مانھ وشواس اوڻيا ٿي آبي پوري هيٺ ان پڪي ڪاتري ٿي ڀڳوون ٿي واسطو راکونه. ⑬ تيام هون تمون ٿي منٽ ڪرونھ، جي تمون نٽھ ايسو را پارام همپرايا ري ڪري زتي تڪليپون مون مانھ آوھ، اوئون ري ڪري تمي هيٺ مت هارو، پڻ هيٺ راکو ڪم تو ڀڳوون تمون ڌاري قوم وازون رو مون اتو گهڻو راکيوھ جي هون تمون هارو اي تڪليپون سهونھ.

ايسو ڪريست رو پريم الاهي گهڻو سٺ

⑭ تيام هون ڀڳوون آڀا باپ هومو نمين پراٿا ڪرونھ، ⑮ جيا ٿي پوري وشواسي منڌڙي آڪاش ان ڌرتي مانھ ڀڳوون رڻي اڪائي ڪيوراھ. ⑯ مارئي پراٿا اي سٺھ جي ڀڳوون آڀا گهڻا مون پرموئٽھ تمون هارو ام ڪرڻ، جي اونا را پويتر آتما ري ڪرا ٿي تمي من ۾ هيٺ راکو، ⑰ ان تمارئ وشواس راکيا ٿي ايسو ڪريست تمارا من موئين رٽھ، ان زم وڻ اونڌيون پاڙون ري ڪري ڏاڍو رٽھ، ان زم گهر پڪي پُنياد ري ڪري ڏاڍو رٽھ، تم تمي هميش پريم هون وِتا ريو، ⑱ زم تمون نٽھ ان پيزون ٻڌون ڀڳوون رون سونڍل منڪون نٽھ اوڙڪيا رڻي هيٺ زڙھ، جي ايسو ڪريست رو پريم ڪتو گهڻو سٺھ، ڪتو ويڪرو، ڪتو لونبو، ڪتو اونسو ان ڪتو اونڌو سٺھ. ⑲ ان تمون نٽھ ايسو ڪريست را هيا پريم رڻي پوري ڪهر پڙھ، جيو پريم هزميا ٿي ٻارو سٺھ، زم هيا پريم ٿي پرائين تمي پورٽھ نمونٽھ ڀڳوون جيو ٿيو.

⑳ ڀڳوون، جيو آپري ڪرا آڀون موئين ويورايا ٿي آڀا مونگيا ڪا سوچيا ٿي پڻ الاهي گهڻو ڪري هيڪڻھ، ㉑ اونا را وڪوڻ وشواسي منڌڙي ري ڪري ان ايسو ڪريست ري ڪري هر زمونا ۾ هميش هوڏي ٿي ٿي رٽھ! آمين.

وشواسي منڌري ۾ هيڪ من ٿين هپ ٿي ريوو

4 ① تيام هُون، جيو پريو ايسو ري ڪري قيدي سون، تمون نئه منٿ ڪرونه، جي ٽمي ايوئه نمونئه وو، جيوئه نمونئه وُڍا هارو پڳوون تمون نئه سُوندياه. ② مطلب گهڻي گريبي ان نرمي هُون وو، ان صپر ڪرين پريم ٿي هڪا پيزا رئي سهو. ③ ٽمي پوري ڪوشش ٿي هڪا پيزا ٿي هپ راڪين پويتر آتما ٿي زڙل هپ موئين هيڪ من ٿين ريو. ④ ٽمي ٻڌائي وشواسي منڌري ۾ هيڪا ڏيل را زم سو، ان تمون نئه هيڪ پويتر آتما ڏيڌل سئه. هيوئه نمونئه پڳوون تمون نئه هيڪ پروسو راڪيا هارو سُوندياه. ⑤ هيڪ پريو سئه، هيڪ وشواس سئه، هيڪ پويتر سنون سئه. ⑥ هيڪ پڳوون سئه، جيو تمون ٻڌون رو ٻاپ سئه. اُو تمون ٻڌون مانه سئه، تمون ٻڌون ٿي آپرو ڪوم ويوراوئھ، ان تمون ٻڌون موئين رئه.

⑦ پڻ آپون موئين ٿي هر هيڪ نئه ايسو ڪريست آپري ڪُريا پرموئنه ڌار ڌار هيٺ ڏيڏيھ. ⑧ ايٺا را پارام شاستر ۾ لڪل سئه جي ”زئبون اُو اونسو سڙي گيو تو اُوئه آپرون ڏشمئون نئه قيدي ڪريا ان آپرون منڪون نئه توقا ڏيڏا.“

⑨ هُوئه زئبون ام ڪيڏل سئه جي ”اُو اونسو سڙي گيو،“ تو هايا رو مطلب اي سئه جي اُو اڳي نيسو ڌرتي مانھ پڻ اوتريو تو. ⑩ جيو نيسو اوتريو تو اُو رو اُو هاڳي ايسو ڪريست سئه جيو آڪاش مانھ گهڻو اونسو سڙي گيو، زم اُو ٻڌون مانھ ڏئي ٿئ. ⑪ ان اُوئه ”منڪون نئه توقا ڏيڏا،“ مطلب اُوئون نئه ڌار ڌار هيٺ ڏيڏي. اُوئه منڪون نئه ڌار ڌار هيٺ ڏين ڪيونڪ نئه مُڪ شيلا راڪيا، ڪيونڪ نئه پڳوون رو نياپو ڏيڏا واڙا، ڪيونڪ نئه ايسو را پارام ڪشي رئي ڪبر همپزيا واڙا، ان ڪيونڪ نئه وشواسيون رئي همپياز ڪريا واڙا ان شيڪاڙيا

۱۲) زم او پڳوون رون سونډل منکون ننه پڳوون رڼي شيوا کريا هارو تيار کړه، ان اوئون رنه شيوا کريا ټي وشواسي منډرې رڼي هيمنت وډنه، جڼي ايسو کريست را ډيل را زم سته. ۱۳) ان هيوته نمونه وشواس را کيا م ان پڳوون را ډيکرا ننه اوکيا م آبي نيټ هيک من تيشون، ان آبي ننکون ټاژون جيو نئين، پښ زوټه موټا تين پورته نمونه هر وات م ايسو کريست جيو نائوکا منک تيشون.

۱۴) تيون آبي ټاژون را زم نئين ريون، ان اوئون را زم منکون ري نځي، چالاکي ان ډوکا وازي واتون هومپرين ايل اول اوئون ريون شيکارل کوډيون واتون مانه نئين زائون. ۱۵) پښ اپنه پريم ټي هاس مانه ويو، ان هيوته نمونه آبي هر وات م اپنا ډي ايسو کريست جيو تيشون. ايسو کريست وشواسي منډرې مانه ډي سته، زم ماتو ډيل مانه سته. ۱۶) ماتا را کيدا هيټ پورو ډيل هيک تين آپ ننه ډيډل هر جوړ ټي ملل هوته، ان هر اوزيا رنه آپرو آپرو کوم کريا ټي ډيل وډنه. ان هيوته نمونه ايسو کريست را کيدا هيټ پورې وشواسي منډرې هيک تين آپ ننه ډيډل هر شيواډاري ټي هيمنت لته، ان هر وشواسي رنه آپرو آپرو کوم کريا ټي منډرې وډنه ان پريم ټي پکي تته.

ايسو مانه وشواس را کين نوا نمونا ټي ويو

۱۷) تيام هون پريو ايسو ري کري تمون ننه گهټو گهټو کونه جي تمې ډاري قومون رون پيزون منکون را زم مت وو، جيا پڳوون ري وات مانه نتي وينا پښ آبريون ناليون واتون مانه وته. ۱۸) اوئون را من م کئين سوجهرو نتي ان او اندارام سته. او پڳوون ټي ډار ټي گياھ ان پڳوون ټي اوئون رو کئين واسطو نتي، کم تو پڳوون رنه کلاډ ضد کريا ري کري اوئون م کئين عقل نتي رڼي. ۱۹) او آبري عزت رو کيال ساډين لوڅرائي موئين لاگي گياھ زم آبري مرضي

پرموئنه هر قسم رڼي پوندائي ڪريا ۾ وڌتا زائ.

②0 پڻ ايسو ڪريست رو نمونو جيو ٿمي شيڪيوه، اُو هيوو نٿي. ②1 ٿمي تو اوتا را پارام هومپڙيو هوشي، ان وشواسي ٿيا ڪيڙ ٿمي هاسي واتون شيڪي هوشي جي ايسو آپرو ڪيوو نمونو ڏيڪاڙيوه. ②2 ايسو تمارا اڳلوڪا وودا را نمونا را پارام اي شيڪاڙيو جي ٿمي آپرا اڳلوڪا ڪوم ان ڪيال ساڏو پرا، جيا ڪوڙيون واتون مانھ وودا ٿي ان ڪراپ ڪيال راکيا ٿي پونڌا ٿيتا زائ. ②3 ٿمي من ۾ نوا ڪيال راکو، ②4 ان ٿمي نوا منڪ ٿيو. زم پڳوون منڪون ننه آپ جيوئا نايا تا، ته ٿمي پڳوون جيوئا ٿيو، زم هاس ۾ پڳوون ري وات مانھ وو ان پويتر ٿيو.

②5 تيام ٿمي ڪوڙ ننه ساڏين هر هيڪ هيڪا پيزا ٿي هاس ٻولنه، ڪم تو آبي وشواسي منڌڙي موئين پيزا ٿين هيڪا ڏيل رون اوزيون را زم سون. ②6 رينه پلنه سڙنه، پڻ ڏوه مت ڪرو. ڏي آتيا ٿي مور آپري رينه ننه ڪتم ڪرو ان رينه مت راکو. ②7 ان شيطون ننه موقعو مت ڏيو جي تماري رينه ري ڪري تمون ٿي ڏوه ڪراوئ. ②8 جيو سورئي ڪرتو هوئ، اُو وڙي سورئي



ماڳي نه ڪرئ، پڻ مينت ڪرين آپرون هاتون ٿي نائوڪو ڏندو ڪرئ، زم اوتا ڪن ڪئينڪ هوئ جيا ٿي ضرورت وازون رڼي مدت ڪرئ. ②9 ٿمي ڪئين ڪراپ وات مت ڪو، پڻ روڳي ايوي واتون ڪرو جي نائوڪي هوئ ان ضرورت پرموئنه ڦاٽيڏا وازي هوئ، زم هومپڙيا وازون ننه هيئت زڙنه. ③0 ٿمي پڳوون ري مرضي مانھ نه وودا ٿي پڳوون را ڏيڏل پويتر آتما ننه ڏکي مت ڪرو، ڪم تو پڳوون تمون ننه پويتر آتما تيام ڏيڏوه

زم ٿا پئڻي ٿي جي ٽمي پڳوونَ را منڪ سو ان آڪر ۾ اُو تمون نٿو ڏوهون را
 قَوْضَا ٿي آزاڌ ڪراوشي. (31) ٽمي هر نمونا را وير، ڪاوڙ، رينه، جهيڙا جهڳڙا،
 ڳلا ان ٻڌي پونڌائي ٿي پاھو ڪرو. (32) ان ٽمي هيڪا پيڙا مانھ ميرپونئي ڪرو،
 نرم من راکو، ان زم پڳوونَ ايسو ڪريست ري ڪري تمون نٿو ماڻئي ڏيڏيھ،
 تم ٽمي هيڪا پيڙا نٿو ماڻئي ڏيو.

پڳوونَ را ڏيڏل سوجھرا ۾ وينَ ناٿوڪا ڪوم ڪرو

5 ① پڳوونَ تمون نٿو آڀرا ٻارَ ھزمينَ تمون ٿي پريم ڪرھ، تيام زم پريمي
 ٻارَ آڀرا ٻاپ را نمونا مانھ وئھ، تم ٽمي پڳوونَ را نمونا مانھ وو. (2) ان
 ٽمي پريم ڪرتا ريو، زم ايسو ڪريست تمون ٿي پريم ڪريو. اُوئھ آڀون ھارو
 آڀرو جيو پڳوونَ را نوم مانھ ڏيڏو، ان پڳوونَ نٿو ڪُش ڪريا ھارو ڪُشبو
 وازو ڏونپ ساڙيا را زم آپ نٿو پڳوونَ را نوم مانھ سڙايو. (3) پونڌو ڪوم،
 هر نمونا رئي پونڌائي ان لالچ، تمون موئين ھايون رو نوم پڻ نہ ھووو ڪپئھ،
 ڪم تو ھيوي واتون پڳوونَ رون سونڍل منڪون ھارو ٺيڪ نٿي. (4) ٽمي ڪراپ
 واتون، ازائي واتون ڪا پونڌي واتون مت ڪرو، ڪم تو ھائي صحيح نٿي، پڻ
 پڳوونَ رو ٿورو مونو. (5) ٽمي ايٿا وات رو يقين ڪري ليو، جي جيو ڪوئي پونڌو
 ڪوم ڪرھ، پونڌائي ڪرھ ڪا لالچي سئھ، ان لالچ را ڪوو مورتئي پوزيا جيوو
 سئھ ڪم تو لالچي منڪ پڳوونَ مانھ نئين پڻ شينھون مانھ ڏيون ڏئھ، ھيو
 منڪ ايسو ڪريست ان پڳوونَ را راز موئين پڳوونَ رون سونڍل منڪون پيڙا نٿي
 آوي ھيڪتا. (6) ٽمي ھوشيار ريا جي ڪوئي منڪ نالي واتون ڪرين تمون نٿو
 ايئون ڪوڙيون واتون مانھ نہ ويوراوئھ جي ھيو ڪراپ ڪوم ڪروو ڪئين وات
 نٿي. ھيو ڪوم ڪريا ري ڪري پڳوونَ رئي سزا اوئون نٿو ضرور زڙشي جيا
 پڳوونَ رو ڪيڏو نٿي مونتا. (7) تيام ٽمي ھايون منڪون پيڙا ھيو ڪراپ ڪوم
 مت ڪريا.

⑧ ڪم تو اڳي تمي اندارا را زم هتا، پڻ همئنه پريو ايسو ٿي واسطو را ڪيا ري ڪري تمي سوجهرا را زم سو. تيام سوجهرا رون منڪون را زم وو، ⑨ ڪم تو سوجهرا رو ڦل اي سئنه جي تمي هر نمونا را نائوڪا ڪوم ڪرو، پڳوون ري وات مانھ وو، ان هاس مانھ پڻ وو. ⑩ هيونھ نمونھ وودا ٿي تمي ڪبر پاڙشو جي پريو ڪيوون واتون ۾ ڪُش سئنه.

⑪ اندارا رون نالون ان ڪراپ ڪومون ٿي شيتي ريو، ان آپرا صحيح وودا را نمونا ٿي اي وات ساوئي ڪرين ڏيڪاڙو جي او ڪوم ڪتا ڪراپ سئنه. ⑫ ڪم تو جيا ڪوم منڪ هتائين ڪرئھ، او ايوا ڪراپ سئنه جي اوئون را پارام واتون ڪروو پڻ شرم جيوئي وات سئنه. ⑬ پڻ ٻڌي واتون سوجهرا ٿي ساوي تئھ ان سوجهرا ٿي ڪبر پڙئھ جي او واتون ڪراپ سئنه، ⑭ ڪم تو سوجهرو او سئنه جيا ٿي ٻڌوئي ڪئين ساوو ڏيڪائھ. تيام هڪا پزن ۾ ام لڪل سئنه:

”او اونگھال، اوئي!

مرلون موئين ٿي جيوتو تئھ!

ايسو ڪريست تون نئھ سوجهرو ڏيشي.

⑮ تيام هوشيار ٿيو جي تمي ڪيونھ نمونھ ووھ ريا. تمي پوڙون منڪون را زم نئين پڻ عقل وازون را زم وو. ⑯ پلائي ڪريا رو موقعو زئون پڻ زڙئھ، تئين اوئا ٿي قائيدو ليو، ڪم تو اي زمونو ڪراپ سئنه. ⑰ تيام تمي پوڙا مت ريو، پڻ هزمي زائو جي پريو رئي مرضي ڪيوئي سئنه. ⑱ ڌارو پين مست مت ٿيو، جيا ٿي منڪ هر نمونا ري پوندائي ۾ پڙي زائھ، پڻ تمي پويتر آتما ري ڪڙا ٿي پرائي زائو ان پورئھ نمونھ اوئا ري مرضي مانھ وو. ⑲ تمي هڪا پيزا ڪن شاستر را پزن، پيزا پزن ان وشواسي گيت ڳاوتا ريو، ان آپرا من ٿي پريو را وڪوڻ ۾ ڳاوتا ريو. ⑳ ان هميش هر وات هارو آپتا پريو ايسو ڪريست ري ڪري پڳوون را ٿورا مونتا ريو. ㉑ ان ايسو ڪريست رو مون را ڪين هڪا پيزا ري مرضي مانھ وو.

آڏمي ان ڏوشي رڻ ۾ آيت ۾ ڪيوئ نمونئ ويو

②2 ڏوشيون، تم ۾ آڏمي ري مرضي مانھ ام وو، زم تم ۾ پڙو ايسو ري مرضي مانھ ووھ. ②3 ڪم تو آڏمي آڀري ڏوشي رو ام ڏئي سئھ، زم ايسو ڪريست وشواسي منڌري رو ڏئي سئھ، مطلب او آپ وشواسي منڌري نئھ پڇايا وازو سئھ، جيا نئھ او آڀرو ڏيل هزمئھ. ②4 پڻ زم وشواسي منڌري ايسو ڪريست ري مرضي مانھ وئھ، تم ڏوشيون رڻھ هر وات ۾ آڀرا آڏمي ري مرضي مانھ ويو.

②5 آڏميون، تم ۾ آڀري ڏوشي ٿي ايوو پريم راکو، جيوو ايسو ڪريست وشواسي منڌري ٿي پريم راکيو. ايسو اوئا هارو آڀرو جيو ڏيتو، ②6 زم وشواسي منڌري نئھ پوئي ٿي پويتر سنون ڏين ان پڳوون را وچن ٿي صاف ڪرين پويتر ڪرئھ، ②7 ان او آپ ايوئي نائوڪئي وشواسي منڌري تيار ڪرين آپ ڪن تيڙاوتھ، جي پويتر ان پيڏوھي هوئھ، روياري لڏي را زم جيا را موندا مانھ نڪو ڏاڳ نڪو لاتر ان نڪو پيڙي ڪئين ڪراهي هوئھ. ②8 هيوتھ نمونئ آڏميون رڻھ پڻ آڀري ڏوشي ٿي آڀرا ڏيل را زم پريم ڪروو. جيو آڀري ڏوشي ٿي پريم ڪرئھ، او زوئھ آپ ٿي پريم ڪرئھ ريو، ڪم تو آڏمي ان ڏوشي ٻي ئي هيڪ سئھ. ②9 وات اي سئھ جي ڪوئي پڻ منڪ آڀرا ڏيل ٿي وير نٿي راکتو، پڻ اوئا رئي همپار ڪرئھ ان اوئا رو ڪيال راکئھ، زم ايسو ڪريست وشواسي منڌري رئي همپار ڪرئھ، ③0 ڪم تو آڀي وشواسي اوئا را ڏيل رون اوزيون را زم سون. ③1 تيام شاستر ۾ ام لڪل سئھ:

”آڏمي آڀرا مان ٻاپ نئھ ساڏشي،

ان آڀري ڏوشي پيڙو ريشي،

ان ٻي ئي هيڪ ٿيشي.”

③2 هائي اُونڌڻي وات گهڻي موٽڻي وات سٺه. هون تو کاس ڪرين ايسو ڪريست ان وشواسي منڌڙي رڻه هيڪ هويا را پارام ڪونه ريو. ③3 پڻ هائي وات آدمي ان ڏوشي را پارام پڻ سٺه. تيام تمڻي هر هيڪ آپري ڏوشي ٿي آپ را زم پريم راکو. ان ڏوشي رڻه آپرا آدمي رو مون راکو ڪپڻه.

مان ٻاپ ان ٻارون رڻه آپت ۾ ڪيوڻ نمونن ويو

6 ① ٻارون، تمڻي آپرا مان ٻاپ رو ڪيڏو مونو، ڪم تو تمڻي پريو ايسو مانه وشواس راکوه، ان هم ڪروو نيڪ سٺه. ② شاستر ۾ لڪل سٺه جي ”آپرا مان ٻاپ رو مون راکو.“ اي پڳوون رو ايرو پيرهون حڪم سٺه جيا مانه وودا وازون ٿي اوڻه وائڏو ڪريو. ③ او وائڏو اي سٺه جي ”هم ڪريا ٿي تمارو پلو ٿيشي، ان تماري حياتي گهڻي ٿيشي.“

④ ان مان ٻاپ، تمڻي آپرون ٻارون ننه مت رينهڙاوو، پڻ اوئون ننه پريو ايسو را نمونا پرموڻه هزماوين ان شڪارڙين اوئون رڻي همپار ڪرو.

ڏٺيون ان گُلمون رڻه آپت ۾ ڪيوڻ نمونن ويو

⑤ گُلمون، تمڻي هاسا من ٿي آپرون ڏٺيون رو مون راکين اوئون رو ڪيڏو مونو، زم تمڻي ايسو ڪريست رو ڪيڏو مونوه. ⑥ روڳو آپرون ڏٺيون ننه ڏيڪارڙيا هارو ان ڪش ڪريا هارو ڪوم مت ڪرو، پڻ ايسو ڪريست را شيواڌاري ٿين پورا من ٿي پڳوون ري مرضي مانه وين ڪوم ڪرو. ⑦ ڪشي ٿي اوئون رڻي شيوا ڪرو، ان ام هزمو جي منڪون رڻي نئين پڻ پريو رڻي شيوا ڪرو ريا. ⑧ تمڻي اي وات ياد راکو جي ڪوئي پڻ منڪ ڪيو پڻ ناوڪو ڪوم ڪرشي، او گُلمو هوڻه ڪا آزاد، توڻي پڻ پريو اوڻا ننه اوڻا ناوڪا ڪوم رو ايوزو ڏيشي.

⑨ ان ڏٺيون، تمڻي آپرون گُلمون ننه ڌڙڪا مت ڏيو، پڻ اوئون ٿي هاڳي

نمونته نائوڪئڻه ڏاڙهه وو. ان اي وات ياد راکو جي اوئون رو ان تمارو هيڪ ڏئي آڪاش مانھ سئھ، ان او ڪيا رو پاھو نٿي ليتو.

شيطون را مقابلہ ھارو پڳوون ٿي ھر نمونا رٿي ھيمنت ليوو


⑩ پڇاڙي ۾ هون تمون ننه ام ڪونه، جي تمي پريو ايسو ٿي واسطو راکيا ٿي ان اوئا ري ڏيڏل طاقت ان ڪڙا ٿي هيمنت راکو. ⑪ زم قوچي آپرا دشمن ٿي مقابلو ڪريا هارو ٻڌائي ٻڌي پيرھ ان هٿيار لئھ، تم تمي پڳوون رٿي ڏيڏل ھر هيمنت ليو، زم تمي آپرا چالاک دشمن شيطون ٿي مقابلو ڪرين جيتي هيڪو. ⑫ ڪم تو جيو مقابلو آبي ڪرونھ، او منڪون رٿه ڪلاڦ نئين، پڻ شيطون ان اوئا را پاها رون ڏوتون رٿه ڪلاڦ سئھ، جيا آڪاش ۾ پڳوون رٿه ڪلاڦ آگيوونئي ان اڪتيرئي راکئھ، جيا ايٿا اندارا واري دنيا مانھ راز ڪرئھ، ان جيا پونڌائي را پاها را ڏوت سئھ. ⑬ تيام تمي پڳوون رٿي ڏيڏل ھر هيمنت ليو، زم سڪت



مُقابلا رُئِ تُوئِئِ تمي پُونڌائي رو مُقابلو ڪري هيڪو، ان پڳوون رو ڪيڏل ڪوم پورو ڪرين جيتي هيڪو.

⑭ تيام تمي ايوئِ نمونئِ تيار تين اُويو. زم قوچي وڊيا ري تيارِ هارو ڪريون مانھ پتو ٻونڌئ، تم تمي هاس مانھ وو. زم قوچي آپ نئ پچايا هارو هيئا مانھ لو رو ٻگتر پيرئ، تم تمي پڳوون ري وات مانھ وو. ⑮ زم قوچي آڳڙ وڊيا هارو زوڙا پيرئ، تم تمي ايسو را ڏيڏل هڪ را پارام ڪشي رئي ڪٻر همپڙايا هارو تيار ريو. ⑯ زم قوچي ايئون ٻڌون پيرئي ڍال پڻ لئھ زم ڏشمڻ را ٻڙتا هر آپ نئ نه لاڳئ پڻ آڦوڪا اوزهمائي زائ، تم تمي وشواس راڪو زم تمي پُونڌا شيطون را هر ڏوھ ڪرايا واڙا حملا ٿي پچي زائو. ⑰ زم قوچي آپ نئ موت ٿي پچايا هارو لو رو توپلو پيرئ، تم تمي پڳوون مانھ پورو پروسو راڪو جي اُو تمون نئ تارڻ ڏيشي. ان زم قوچي مُقابلا هارو آپري تروٿار لئھ، تم تمي پڳوون را وچن مانھ يقين راڪو، جيو شيطون ٿي مُقابلو ڪريا هارو پويتر آتما رو ڏيڏل سئ. ⑱ هر وات هارو پرائنا ان وينتئي ڪرين هر تُوئِ پويتر آتما ري مرضي پرموئِ پڳوون ٿي پرائنا ڪرتا ريو. پرائنا ڪريا ۾ سجاڳ ريو ان پرائنا ڪريا رو مت ساڏو، پڻ پڳوون رون ٻڌون سونڊل منڪون هارو پڳوون ٿي منٿ ڪرين پرائنا ڪرتا ريو.

⑲ ان مون هارو پڻ پرائنا ڪرتا ريو جي پڳوون مون نئ وچن همپڙايا رئي هيئت ڏئ، زم هون ايسو را پارام ڪشي ري ڪٻر رئي اُونڌي وات پيڪ وگر ساوئي ڪرين همپڙاوون. ⑳ اي ڪشي رئي ڪٻر همپڙايا هارو پڳوون مون نئ



سونڊين ميليوه، ان ايئا هارو هون قيڏي سون. تيام تمي پرائنا ڪرو جي هون اي ڪشي رئي ڪٻر پوري هيئت ٿي همپڙاوون، جيوئِ نمونئِ مارئ همپڙاوو ڪپئ.

اڪري واتون

②1 آڀڻو پريمي پائي تڏيڪس، جيو ايمونڌاري ٿي پريو رڻي شيوا ڪرڻ، اُو تمون نٽه ٻڌي واتون همپڙاوشي، زم تمون نٽه پڻ مارڻي ڪهر پڙڻه جي هُون ڪم سون. ②2 هُون ايٿا نٽه تمون ڪن ايٿا هارُو ميلونه ريو، زم مارا پارام تمون نٽه ڪهر پڙڻه ان اُو تمون نٽه حوصلو ڏڻ.

②3 ڀڳوون ٻاپ ان پريو ايسُو ڪريست تمون وشواسي پايون ان ٻينون نٽه هڪ ڏڻه ان پريم ان وشواس رکاوڻه. ②4 ڀڳوون تمون ٻڌون مانه ڪُريا ڪرڻ، جيا آڀڻا پريو ايسُو ڪريست ٿي ايوو پريم راکوه جيو ڪيڏي ڪٿم نئين ٿڻ.

فلیپون را نوم مانه کت رئي هزموئئي

کت لکيا وازو

اي کت پولوس لکيو، ان ٽيمٽيس اوتا پيڙو هتو (فلیپون 1:1). کت لکيا رٺ توتڻه پولوس قيڏي هتو ان اوتا مانه کيس ويتوت ريو (فلیپون 7:1)، ان پولوس نٺ کبر نتئي جي اوتا مانه موت رو ٿيندو ٿيسي کا نئين (فلیپون 20:1، 17:2). ام لاڳهه جي اي کت اوت توتڻه لکيو زئون ايسو را پارام همپايا هارو ترئمو چکر کرين يروشلم شهر موئين گيو تو، يهودي منکي اوتا مانه ڪوڙو کيس ڪريو تو، ان پسٺ او رومي حڪومت رو قيڏي ٿيو تو (مڪ شيلون را ڪوم 11:23-27:21). پولوس بي سال قيصره شهر م قيڏي هتو (مڪ شيلون را ڪوم 12:23-32:26، 27:24)، ان تيا ڪيڙ بي سال روم شهر م قيڏي هتو (مڪ شيلون را ڪوم 16:28، 30). نيٺ، اندازام 62ع م، او قيڏ ٿي سوتي گيو. تيام گهڻا منک ام هزمئنه جي پولوس اي کت قيصره شهر م اندازام 57-59ع م لکيو، کا روم شهر م اندازام 61ع م لکيو.

کت ڪيون منڪون هارو لکيو

پولوس اي کت فليبي شهر رون وشواسي منڪون هارو لکيو (فلیپون 1:1). فليبي شهر رون منڪون نٺ پڻ فليبي ڪيتا. فليبي شهر مڪڏنيه صوبا رو هيڪ موتو شهر هتو، جيئنه روم شهر را گهڻا منک ريتا، ان تيام اوت رون منڪون نٺ او هاڳي حق هتو جيو روم رون منڪون نٺ هتو (مڪ شيلون را ڪوم 12:16). پولوس ايرا پيرا چکر مانه فليبي شهر م ايسو را پارام همپاوا گيو. اوتنه گهڻا منک وشواسي ٿيا، پڻ ڪلاف منکي پولوس نٺ زهلايو ان جيل م پورايو. پڻ پيرٺ ڏي شهر ري اگيووني اوتا نٺ ساڏيو پرو (مڪ شيلون را ڪوم 12:16-40). تيا ڪيڙ پولوس ايرا ترئما چکر مانه زاتون ان پاسو اوتون بي وار فليبي شهر رون وشواسيون رئي هيمنت وڌاريا هارو گيو (مڪ شيلون را ڪوم 1:20-2، 6).

فليبي شهر را وشواسي پولوس ٿي گهڻو پريم راکتا، تيام زئون اوتون نٺ کبر پڙئي جي پولوس قيڏ م سٺ، تيون اوئي ايفرڊئس نومي منک نٺ امداد لين پولوس ڪن ميلو (فلیپون 25:2).

ام لاڳهه جي پولوس ايفرڊئس نٺ پاسو ايرا فليبي شهر موئين ميلين اوتا هات اي کت ڏي ميلو (فلیپون 25:2-30).

ڪِت لڪيا رو مطلب


پولوس اي ڪت لڪيو زم فِلِپِي شهر رون وشواسيون رو اِمَداذ ڏيڏا هارُو تورو مونئ (فِلِپِيُون 5:1, 19-10:4), آپرا پارام ڪهر ڏئ (فِلِپِيُون 12:1-26, 19-10:4), ان اوئون نئ ڏڪ تڪليب م حوصلو ڏئ زم او وشواس راڪتا رء ان ڪش رء (فِلِپِيُون 27:1-30, 4:4), ان آيت م ڳريبي ٿي هپ راڪين وئ (فِلِپِيُون 11-12:1, 5-2:4). ايٿا ڪت م پولوس ڪوڙي واتون شيڪاريا واڙون ٿي هوشيار ڪرئ (فِلِپِيُون 21-13:1), تيمٿيس ان ايفرڏس را وڪون ڪرئ (فِلِپِيُون 19:2-30), ان آيرو نائوڪو نمونو ڏيکارئ جي پلئ ڦيڙي سئ ان اوئا نئ موت رئي سزا رڙي هيڪئ. توئي پڻ او ايسو ٿي واسطو راڪيا ري ڪري ڪش سئ (فِلِپِيُون 18-17:2).

ايٿا ڪتاب را شاستر ٿي پيرا حوالا:

فِلِپِيُون 1:1	ڪوم 3-1:16	فِلِپِيُون 19:2	ڪوم 3-1:16
فِلِپِيُون 1:1	ڪوم 4:20	فِلِپِيُون 19:2	ڪوم 4:20
فِلِپِيُون 5:1	ڪوم 40-12:16	فِلِپِيُون 6:3	ڪوم 1:8, 3
فِلِپِيُون 7:1	ڪوم 31, 16:28	فِلِپِيُون 6:3	ڪوم 2-1:9
فِلِپِيُون 12:1	ڪوم 33-27:21	فِلِپِيُون 15:4	ڪوم 15-13:17
فِلِپِيُون 12:1	ڪوم 1:27	فِلِپِيُون 16:4	ڪوم 10-1:17
فِلِپِيُون 12:1	ڪوم 31, 16:28		

فَلِپِيُون

را نوم مانِه پولوس رو لکل کت



1 ① هُون لکيا واژو پولوس سون. اي کت مارا پاها ٿي ان تيمٽيس را پاها ٿي لکل سٺه، جيا ايسو کريست را شيواڌاري سون.

فَلِپِي شهر ري وشواسي منڌري رون پريمي آگيوونون ان شيواڌاريون ان ٻڌون پريمي وشواسي پايون ان بينون، تمې جيا پگھون را سونڊل منک سو ان ايسو کريست ٿي واسطو راکوه،

② آپڻو ٻاپ پگھون ان پريو ايسو کريست تمون مانِه کُريا کرئه ان تمون نٺه هکي راکئه!

پولوس فَلِپِي شهر رون وشواسيون هارو
ٿورو مونئھ ان پراٽنا کرئه

③ زئيون هُون تمون نٺه ياڌ کرونه، تو هُون مارا پگھون رو ٿورو مونونه. ④ ان زئيون هُون تمون ٻڌون هارو پراٽنا کرونه، تئيون هُون هميش کُشي ٿي پراٽنا


ڪروڻه، ⑤ ڪم تو ٽمي شروع ٿي لينَ آڙ هُوڏي مارا پاڻي ٿينَ ڪرچ ۾ ان پڙيون ٻڏيون واتون ۾ مارئي مدت ڪروڻه ريا، زم هُون پڙون منڪون نٿه ايسُو را پارام ڪُشي رئي ڪهر همپڙاوي هيڪون. ⑥ مُون نٿه ايئا وات رئي پڪي ڪاتري سٺه جي پڳوڻ، جيئنه تمارون منون ۾ آڀرو ٺاڻوڪو ڪوم شروع ڪريوه، اُو تمون ۾ تارڻ را مارڳ مانھ ويوڙايا رو ڪوم ڪرتو ريشي، ان نيٺ ايسُو ڪريست رٿه وڙي پاسو آيا رٿه ان نيا ڪريا رٿه ڏي پڳوڻ رو شروع ڪرل هائي ڪوم پورو ٿيشي.

⑦ اي ٺاڻوڪي وات سٺه جي هُون تمون ٻڏون را پارام هيوا ڪيال راڪونه، ڪم تو ٽمي مُون ٿي گهڻو پريم راڪوه ان مارو گهڻو ڪيال راڪوه، ان زئون هُون ايئنه قيڏي سون ان ڪورٺ ۾ آڀرا پارام ٻوليا رٿه توڻه ايسُو ڪريست ري ڪُشي ري ڪهر را پارام ٻولونه ريو ان ٿاڀتي ڏيونه ريو جي هائي ٻڏي واتون هاسي سٺه، تئيون ٽمي ٻڏائي مارا پاڻي ٿينَ اِمڏا ۾ ان پڙيون واتون ۾ مارئي مدت ڪروڻه ريا زم هُون مارئي ايسُو را پارام همپڙايا رئي زميواري پوري ڪرون، جي پڳوڻ مُون مانھ ڪُريا ڪرين مُون مانھ راڪيئھ. ⑧ پڳوڻ مارو شائيڏ سٺه جي ايسُو ڪريست مُون نٿه تمون ٿي اتو پريم رڪايوه، جي هُون تمون ٻڏون ٿي ايسُو را زم پريم ڪروڻه.

⑨ ان مارئي پراٿنا اي سٺه جي تمارو پريم گهڻام گهڻو وڌتو زائ، ان تمارئي هاسي واتون هزميا رئي ان اوڙڪيا رئي هيٺ پڻ وڌتي زائ، ⑩ زم هم وڍا ٿي تمون نٿه ڪهر پڙهه جي ڪي ٺاڻوڪو سٺه ان ڪي پُونڌو سٺه، ان هيوه مُونه ايسُو ڪريست رٿه وڙي پاسو آيا را ان نيا ڪريا را ڏي هُوڏي ٽمي صاق من را ٿيو ان ايو ڪوم نه ڪرو جيا ٿي تمون مانھ ڪوئي الزوم لاڳئھ. ⑪ پڻ ٽمي پڳوڻ ري وات مانھ وينَ اُو ٺاڻوڪا ڪوم ڪرو جيا ايسُو ڪريست ٿي واسطو راڪيا ري ڪري ٿئھ، زم پڳوڻ رو مُون ان وڪوڻ ٿئھ.

پولوس رٺ قيتي تيا ٿي ايسو رٺي وات همپزيا ۾ گهڻو قائيدو ٿئھ

⑫ پايون ان پينون، هونءُ هونءُ تمون نٺه ڪهر ڏيا ڪرونه جي جئين ڪئين ڏورون مون نٺه قيتي هويا ري ڪري زڙيئھ، هايا ٿي ايسو را پارام ڪشي رٺي ڪهر همپزيا ۾ نقصون نئين پڻ قائيدو ٿيوھ. ⑬ اتو گهڻو قائيدو ٿيوھ جي ايئنه رومي قوج را گهڏ رون ٻڌون منڪون نٺه ان پيزون ٻڌون منڪون نٺه، ايئا وات رٺي ڪهر پڙي گهيھ جي هون ايسو ڪريست را پارام همپزيا ري ڪري قيتي سون. ⑭ ان اي قائيدو پڻ ٿيوھ، جي وشواسي پايون ۾ گهڻا منڪ مارٺه قيتي تيا ري ڪري پريو ايسو مانھ پڪو يقين ڪرين وڌيڪ هيٺ ٿي پڪ وڳر پڳوون رو وچن منڪون نٺه همپزاووا مڏياھ. ⑮ ڪئينڪ تو مون مانھ ريشي ٻڙين آڀري پالٽي نايا هارو هم ڪرھ ريا، توئي پڻ ڪئينڪ ايوا سٺه جيا پلائي ري ڪري ايسو ڪريست را پارام همپزاووه ريا. ⑯ اي منڪ مون ٿي پريم راڪين ايسو را پارام همپزاووه، ڪم تو اوئون نٺه ڪهر سٺه جي پڳوون مون نٺه سوندين راڪيوھ زم هون ڪورٺ ۾ آڀرا پارام ٻوليا رٺه توئنه ايسو ري ڪشي ري ڪهر را



پارام ٻولون. ⑰ پڻ او پيزا منڪ صاق من ٿي نئين پڻ آڀرو مون وڌاريا هارو ايسو ڪريست را پارام همپزاووه، ڪم تو او ام هڙمٺھ جي هيون نمونئھ او مون نٺه قيت ۾ وڌيڪ ڏک ڏئھ. ⑱ پڻ

هائي تو ڪئين وات ٿئي. موتي وات تو اي سٺه جي هر نمونئھ، پلٺھ آڀرا مقصد هارو پلٺھ ايسو ري شيوا هارو، منڪ ايسو ڪريست را پارام همپزاووه، ان هايا ٿي هون ڪش سون.

ان هون ڪش ريه، ⑲ ڪم تو مون نٺه پڪو يقين سٺه جي تماريون پراڻائون

ري ڪري، ان ايسو ڪريست را ميلل پويتر آتما ري مدت ٿي ايٺا مارا ڪيس رو نتيجو اي ٿيشي جي هون قيد ٿي سوتي زائيه. (20) ماري اُميد ان پروسو اي سٺه جي هون ڪيا ئي وات ۾ هيمنت هارين لازي نئين مرون، پڻ هميش را زم همئنه ايٺا ڪيس ۾ پڻ پوري هيمنت ٿي همپزاوين پورا من ٿي ايسو ڪريست رو مون وڌاؤون، پلئه حياتي هوئون ڪا مري زائون. (21) ڪم تو ماري حياتي رو مطلب سٺه ايسو ڪريست رٿي شيوا ڪروو. ان جي مري زائون، تو مارو آپرو ڦاٽيڏو سٺه. (22) پڻ جي حياتي ريون، تو اي ڦاٽيڏو سٺه جي هون شيوا ڪري هيڪون. مون نٺه ڪهر نٿي پڙتي جي پيئون موئين ڪي وڌارٺه ٺاڻوڪو سٺه. (23) هون تو پيئون وسا ڦاٽل سون. مارو جيو ڪڙه جي هون مري زائون ان آڪاش ۾ زائين ايسو ڪريست پيڙو ريون، ڪم تو اي مون هارو گهڻو ٺاڻوڪو سٺه. (24) پڻ تمون هارو مارٺه حياتي ريوو گهڻو ضروري سٺه. (25) هايا را پارام مون نٺه پڪي ڪاٿري سٺه، تيام مون نٺه ڪهر سٺه جي هون حياتي ريه ان تمون ٻڌون نٺه هيڪلا نئين ساڌون، زم ماري ڪري تمي وشواس راکيا ۾ وڌيڪ پڪا ٿيو ان وڌيڪ ڪشي ٿي وشواس راکو، (26) ان مارٺه تمون ڪن وڙي آيا ري ڪري تمي ايسو ڪريست را گهڻا وڪوڻ ڪرو.

(27) ٻڌون ٿي ضروري وات اي سٺه جي تمي ايوٺه نمونٺه وو جي ايسو ڪريست را پارام ڪشي ري ڪهر پرمونٺه ٺيڪ سٺه، زم هون تمون ڪن آوين اونڪيئي پاڙون، ڪا شينٺه رين تمارا پارام هومپزون جي تمي آيت ۾ هپ راکين ووه، ان هيڪ من ٿين ايسو را پارام ڪشي ري ڪهر پرمونٺه پوري ڪوشش ٿي وشواس راکتا ريوه، (28) ان تمي ڪيا ئي وات ۾ آپرٺه ڪلاڦ منڪون ٿي نٿي پيئاتا. هائي هيڪ ٿاڀتي سٺه جي جيا منڪ تمارٺه ڪلاڦ سٺه، اوئون نٺه هميش رٿي سزا زڙشي، پڻ تمون نٺه تارڻ زڙشي، ان هائي ٻڌوني ڪئين پگهون آپ ڪرشي. (29) ڪم تو پگهون تمون نٺه ايسو ڪريست ري ڪري اي موقعو ڏيڏوه جي تمي نه رُوگو ايسو مانه وشواس راکو، پڻ اوٺا هارو ڏک پڻ سهو. (30) هيونٺه نمونٺه

تمی همڙیم تکلیب سهوہ ریا، زم مٿن تمارئہ روپرو سھڻي ان همٿئہ پڻ
سھونہ ريو، زم تمی ھومپزوہ ریا.

ايسو را زم گريبي ٿي ويو

2 ① ھوئہ ايسو کريست ري ڪري تمون نئہ حوصلو زڙيوھ، اوتا را پريم
ٿي تمون نئہ ھيمت زڙئيھ، پويتر آتما ري ڪري تمی آپت ۾ ھپ راکوھ، ان
تمی ڏٺيا ان قياس ڪروھ. ② تيام تمی مون نئہ پورئہ نمونئہ ڪش راکو ان آپت
۾ ھيڪ من ٿين ريو. آپت ۾ پريم راکو، آپت ۾ ھپ راکو، ان ھيڪ من ٿين ريو.
③ تمی آپرو مون وڌاريا ھارو ڪا آپري وڌائي ڪريا ھارو ڪئين مت ڪرو، پڻ
ھيڪا پڙا ٿي گريبي ھون وو، ان پڙون رو آپ ٿي گھڻو مون راکو. ④ تمون
موٽين ٿي ھر ھيڪ روگو آپرا پارام نہ سوچئہ، پڻ ھر ھيڪ پڙون رو کيال پڻ
راڪئہ. ⑤ تمی ايوي سوچ راکو جيوي ايسو کريست رٿي ھتئي.

⑥ او پگھون جيو ھتو، پڻ اوئہ ام نہ ھزميو

جي ھون پگھون ھرکو ٿين آپرو قائيدو زويھ.

⑦ پڻ اوئہ آپرو قائيدو ھاو ساڏيو،

ان منڪ ذات ٿين شيواڌاري جيو ٿيو.

⑧ ان منڪ هوتون او گريبي ٿي ووڊو،

ان موت ھوڏي، ھوڙي مانھ مريا ھوڏي پڻ،

پگھون را ڪيڏام ريو.


⑨ ان تيام پگھون اوتا نئہ

بتون ٿي اونسليا درجا مانھ راکيو،

ان اوتا نئہ ايو مون ڏيڏو

جيو پڙون بتون را مون ٿي وڌارئہ سئہ،

⑩ زم ايسو را مون ۾



آڪاش ۾، ڌرتي مانھ، ان ڌرتي هيٺ پڻ جيو ڪوئي ھوئ،
 او ٻڌائي ايسو ري پڳي پڙين اُٿا رئي پوزا ڪرئ،
 ⑪ ان ٻڌائي اي وات مونھ
 جي ايسو ڪريست پريو سئ،
 زم پڳوون ٻاپ را وڪوڻ ٿئ.

وشواسيون رءُ ايو اناٿوڪا ٿيو جيوا رات را تارا ناٿوڪا ڏيڪاڻھ

⑫ ھيوئ نمونئ، مارون پريمي پايون ان بينون، زم ٽمي اڳي ھميش پڳوون
 را ڪيڏام رياھ، تم نہ روڳو مارا آيا رئي وات زوئين پڻ ھمئھ پڻ زئيون
 ھون تمون ڪن نٿي، ٽمي اڳي ٿي وڌارئ پڳوون را ڪيڏام ريتا ريو، ان
 ھاسا من ٿي پڳوون رو مون راڪين تارڻ را مارڳ مانھ ویتا ريو. ⑬ ڪم
 تو او پڳوون آپ سئ جيو تمارا من ۾ آپرو ڪوم ڪرين آپري مرضي مانھ
 وُڍا رو شونق پيڏا ڪرئ ان ھم ڪريا رئي ھيمت ڏئھ. ⑭ ٻڌوئي ڪئين
 جھيڙا جھڳڙا ان ڳلا ڪريا وڳر ڪرو، ⑮ زم تمون مانھ ڪوئي الزوم نہ
 ھئئ ان ٽمي ڪيا رو نقصون نہ ڪرو، ان ٽمي ايٿا زمونا رون پُونڌون ان



ڪراپ ٿيل منڪون وسا
 پڳوون را پيڏوھي ٻاڙ
 ٿين وو. ٽمي ايٿا ڏنيا
 رون منڪون نئھ سوجھرو
 ڏيو، زم تارا اندارام

سوجھرو ڏئھ، ⑯ ان پڳوون را وچن مانھ ویتا ريو، جيا نئھ مونين ھميش
 رو جيون زڙئھ. ھيوئ نمونئ ايسو ڪريست رئ وڙي پاسو آيا رئ ان نيا ڪريا
 رئ ڏي ھون تماري ڪري آپرا پارام ڪشي ٿي ڪي ھيڪيھ جي مارئي حياتي

ڪياڪ ڪوم رڻي ٿيڻ، ان مارڻي شيوا ڪريا رڻي مينت ڦاڻيڏا واڙي ٿيڻ. (17) زئيون تمي وشواس راڪين آب نڻه پڳوون را نوم مانھ ڏين پڳوون رڻي شيوا ڪروھ ريا، تو پلڻه مون نڻه موت رڻي سزا زڙڻه ان هون آڀرو جيو پڳوون را نوم مانھ ڏيون، توئي پڻ تماري ڪري مارا من ۾ ڪشي سڻه ان هون تمون ٻڌون پيڙو ڪش سون. (18) هايا وات ري ڪري تمارون منون ۾ پڻ ڪشي ٿڻه ان تمي پڻ مون پيڙا ڪش ٿيو.

پولوس ٽيمٽيس ان ايفرڊئس نڻه ميلبا را پارام همپزاوڻه

(19) پڙيو ايسو مانھ پروسو راڪيا ري ڪري مارڻي اُميد سڻه جي هون جلدِي ۾ ٽيمٽيس نڻه تمون ڪن ميليھ، زم تمارا پارام ڪهر پاڙيا ٿي مارڻي هيٺ وڌڻ. (20) ڪم تو مون ڪن ٽيمٽيس جيوو پيڙو ڪوئي نٿي جيو هاس ۾ تمارو ڪيال راکڻه. (21) ٻڌائي منڪ ايسو ڪريست ريون واتون مانھ نئين، پڻ آڀريون آڀريون واتون مانھ ڏيون ڏڻه. (22) پڻ تمون نڻه پوري ڪهر سڻه جي ٽيمٽيس ڪيو منڪ سڻه، زم ڏيڪرو آڀرا ٻاپ پيڙو ڪوم ڪرڻه، تم اوڻه ايسو را پارام ڪشي رڻي ڪهر همپزيا ۾ مون پيڙي شيوا ڪريڻه. (23) تيام مارڻي اُميد سڻه جي، زئيون مون نڻه ڪهر پڙڻه جي مون مانھ ڪورٿ رو ڦينصلو ڪيو ٿيڻي، تئيون هون جهت ۾ ايڻا نڻه تمون ڪن ميليھ. (24) مون نڻه پڙيو ايسو مانھ پڪو يقين سڻه جي هون پڻ جلدِي ۾ تمون ڪن آويھ.

(25) پڻ مٿين اي ضروري هزميو جي هون ايفرڊئس نڻه تمون ڪن پاسو ميلون. اي مارو وشواسي پاڻي سڻه، مون پيڙو شيوا ڪريا واڙو ان مون پيڙو پڳوون را ڪيڏا مانھ وڍا واڙو سڻه، ان تمي ايڻا نڻه سوندين مون ڪن ميليو تو، زم اي ماري همٿوڪي ضرورت رڻه ٿوڻه مارڻي شيوا ڪرڻه. توئي پڻ هون ايڻا نڻه تمون ڪن پاسو ميلونھ ريو، (26) ڪم تو ايڻا نڻه تمون ٻڌون ٿي مليا رڻي سڪ سڻه، ان اي گڻتيون ۾ سڻه ڪم تو تمي هومپڙيوھ جي او مونڏو سڻه.

27) اي هاسي وات سٺه جي اي مونڌو هتو، ان اي تو ايوو مونڌو هتو جي مريا مانھ هتو. پڻ پڳوون ايتا مانھ ڏٺا ڪري. پڳوون نه رڳو ايتا مانھ ڏٺا ڪري، پڻ مون مانھ پڻ ڏٺا ڪري، زم مون نٺه قيد را ڏک ۾ پيزو ڏک نه ٿئ. 28) تيام مون نٺه گهڻو ڪيال ٿيو جي ايتا نٺه جلد تي تمون ڪن ميلون، زم ايتا نٺه وڙي ڏيڪين تمي ڪش ٿيو، ان مارو ڏک پڻ گهٽ ٿئ. 29) تيام تمي وشواسي پائي ان بينون ايتا ٿي پوري ڪشي ٿي مليا، ان هيون منڪون رو گهڻو مون راکو، 30) ڪم تو اي ايسو ڪريست ري شيوا هارو آڀرو جيئو ڪترام نوڪين مريا وازو هتو، زم مارئي شيوا جيئو تمون ٿي پوري نه ٿئي، اي آپ آوين پوري ڪرئ.

آپ مانھ نئين پڻ ايسو مانھ پروسو راکو

3 ① هوءَ، پايون ان بينون، پريو ايسو ٿي واسطو راکيا ري ڪري ڪش ريو. هون هائي هاڳي وات وڙي وڙي گهڻا شونق ٿي لڪونه، ان تمون هارو قائدا واري سٺه، ڪم تو هم ڪريا ٿي تمي نقصون ٿي پڇي زاشو. ② اوتون يهودي منڪون ٿي هوشيار ريو، جيا ام شيڪار ٿي جي تارن ليڏا هارو توهر ڪراوو ضروري سٺه. او تو ڪوترون جيوا ڪراپ سٺه، ان اوتون را ڪوم پڻ پونڌا سٺه. او ريت پرموئنه توهر ڪرايا ٿي آپ نٺه پڳوون ري مرضي مانھ وڏا وازا هڙمئھ، پڻ هاس ۾ او رڳا ڏيل نٺه واديا وازا سٺه. تيام تمي اوتون ٿي هوشيار ريو. ③ ڪم تو او نئين، پڻ آبي پڳوون ري مرضي مانھ وڏا وازا سون ان پڳوون ري نظر ۾ زوئنه توهر ٿيل سون، جيا پڳوون را ڏيڏل پويتر آتما ٿي پڳوون رئي شيوا ڪرونھ ان ايسو ڪريست مانھ پروسو راکين اوتا را وڪوڻ ڪرونھ، ان آپ مانھ ڪئين پروسو نٿي راکتا.

④ جي منڪ تارن ليڏا هارو آپ مانھ پروسو راکي هيڪٽ، تو مارو آپ مانھ پروسو راکيا رو گهڻو حق هوئ. جي ڪوڪ ام سوچئ جي او آپ مانھ

پروسو راڪي هيڪڻه، تو هُون آپ مانھ اُونا ٿي گهڻو پروسو راڪي هيڪونٽ.
 ⑤ زلميا رڻه اَنَمَہ ڏي مارئي توهڙي، هُون اسرائيلي قوم رو سون، بنيامين
 ري ذات ٿي سون، ٻاپ ڏاڏون ٿي پڪو عبراني سون، فريسي پالتي رو منڪ ٿين
 موسي رون لڪل حڪمون مانھ سڪتي ٿي وُڍا واڙو هتو، ⑥ هُون آپرا يهودي
 ڌرم مانھ اتا شونق ٿي ويتو جي هُون وشواسي منڌري نڻه تنگ ڪرتو، ان
 هُون موسي رون لڪل حڪمون مانھ ايوڻه نمونڻه وُڍو جي مُون مانھ ڪيڻه
 ڏوه ڪريا رو الزوم نه هڻيو. ⑦ پڻ هائي ٻڌي واتون جيا نڻه اڳي هُون ڦاڻيڏا
 واڙي هڙمتو، ايسو ڪريست ري ڪري هايون نڻه مئين نقصون واڙي هڙمي.
 ⑧ جي پڻ واتون مُون نڻه ايسو ڪريست نڻه اوڙڪيا ٿي روڪڻه، هُون او ٻڌي
 واتون نقصون واڙي هڙمونه، ڪم تو مارڻه پڙيو ايسو ڪريست ٿي واسطو
 راڪو ٻڌيون واتون ٿي موٽي وات سڻه. ايسو ڪريست ٿي واسطو راڪيا ري
 ڪري مارو هيويون ٻڌيون واتون ۾ نقصون ٿيوه. پڻ هُون هايون ٻڌيون واتون
 نڻه گهنڌڳي را زم هڙمونه زم مُون نڻه ايسو ڪريست ري ڪري اي ڦاڻيڏو
 زڙڻه، ⑨ جي هُون اُونا ٿي واسطو راڪي هيڪون. هُون موسي رون لڪل حڪمون
 مانھ وُڍا ٿي پيڏوهي نئين ٿيون، پڻ مُون نڻه. تارڻ تيام زڙشي، ڪم تو هُون
 ايسو ڪريست مانھ وشواس راڪونه ان پڳوون مُون نڻه وشواس راڪيا ري ڪري
 ماڦي ڏين ڏوهون ري سزا ٿي آزاد ڪرشي. ⑩ مارو روڳو اي مطلب سڻه
 جي هُون ايسو ٿي پورڻه نمونڻه واسطو راڪون، اُونا رڻه جيوي اُونيا رڻي ڪڙا
 زوئين پورڻه نمونڻه اُونا را زم وون، ان اُونا ري ڪري پورڻه نمونڻه اُونا را زم
 ڏڪ سهون. مارو مطلب اي سڻه جي زم ايسو پڳوون رو ڪيڏو موين ڏڪ
 سهين مريو، تم هُون پڻ ايسو ٿي واسطو راڪين موت هُڏي پڳوون رو ڪيڏو
 مونتو ريون، ⑪ زم ڪيوڻه پڻ نمونڻه آپرو مقصد پورو ڪرين هُون موت ٿي
 جيوي اُونون.

تارن ليذا هارو پوري ڪوشش ٿي وينا ريوو

⑫ هونءُ ام نٿي جي مارو مقصد پورو ٿي گيهو ڪا هون هاڻي واتون ۾ پڪو سون، پڻ هون پوري ڪوشش ٿي آڳڙ وڌونءِ زم هون او مقصد پورو ڪرون، جيا هارو ايسو ڪريست مون نئه سونديوه. ⑬ پايون ان پينون، هون ام نٿي هزمتو جي مٿين مارو مقصد پورو ڪري ليدوه، پڻ هون روڳو ام ڪرونه، هون ٿيل واتون نئه ويهارين آيا واريون واتون هارو پوري ڪوشش ٿي آڳڙ وڌونءِ. ⑭ زم مقابلام انصاف ليذا هارو ڊوڙيا وازو وونهر لمتو نه وارين هومو زوئين ڌنگ هوڏي ڊوڙهه، تم هون مرتون هوڏي پوري ڪوشش ٿي آڳڙ وڌو ريونه، زم مون نئه آڪاش موئين ريا رو انصاف زڙهه، جيا نئه ليذا هارو پڳوون مون نئه ايسو ڪريست ري ڪري آپ ٿي واسطو رکايوه.

⑮ تيام آبي جيا پڪو وشواس راکونه، آپئنه هيويي سوچ راکوو. پڻ جي تم ڪياڪ وات ۾ پيزنه نموننه هزموه جي تم ٻيڏوهي سو، تو پڳوون تمون نئه هائي وات پڻ ساويي ڪرين هزماوشي. ⑯ پڻ ڪاس وات اي سئه، زتي واتون آبي هزمنه، اوئون واتون مانه آپئنه ويو ڪپنه.

⑰ پايون ان پينون، تم ٻڌائي پيزا ٿين مارا نمونا پرموئنه وو، ان اوئون منڪون نئه زوئين اوئون را زم وو، جيا امارا ڏيڪاڙل نمونا پرموئنه وه. ⑱ ڪم تو گهڻا ايوا منڪ سئه، جيون را پارام مٿين اڳي گهڻي وار تمون نئه ڪيتو تو، ان همئنه پڻ روتو روتو ڪونه ريو، جيا ايسو ڪريست را دشمن سئه ان اوئا مانه وشواس نٿي راکتا جي اوئا رئه هوڙي مانه مريا ٿي تارن زڙهه. ⑲ هيوون منڪون نئه هميش رو موت زڙشي. او ڏنيا رون منڪون رون ڪيالون مانه وين پڳوون ري جڳا ۾ آپرا پيت را پارام سوچئه، ان جيا را پارام اوئون رئه شرم ڪرو ڪپنه، اوئا را پارام آپرا وڪوڻ ڪرئه.

⑳ پڻ آبي ايذا ڏنيا را منڪ نٿي، آبي آڪاش را منڪ سون ان آپو آڪاش

۾ ریا رو حق سئ. ان آپی تارڻ ڏیڌا واڙا پریو ايسو کريست رئي وات زوئونه ریا، جیو آکاش ٿي آوشي. ②۱ اُو آڻا ماتي را ڏیل یدلاوشي، ان اُوئا را آپرا مون واڙا ڏیل جیوا ناوشي. هائي کوم اُو آپري اُوئا هاڳي کڙا ٿي کرشي، جیا ٿي اُو ٻڌوئي کئن آپرا کيڌام راکي هيڪئ.

هميش ناٿو کيون واتون مانھ ويو

4 ① تيام، مارون پايون ان پينون، تمی جیا ماري کري وشواسي ٿياھ، تمی جيون ٿي هُون پريم را کونھ ان جيون نئھ مليا هارُو هُون سِڪونھ، جيون ري کري مارا من ۾ کُشي سئ ان جیا ماري شيوا رو انصاڀ سو، مارون پريمي پايون ان پينون، همروم پریو ايسو ٿي واسطو را کين وشواس مانھ ویتا ريو.

② ٻائي يُوئوديم، ان ٻائي سُنخي، هُون تمون پيئون نئھ منٿ کرونھ جي تمی پریو ايسو ٿي واسطو را کيا ري کري آڀت ۾ نهي زائو. ③ ان سُرگس، تُون جيو آپرا نوم را مطلب پرموئئھ مُون پيڙو پڳوون رئي شيوا کريام ايمونڌار سئ، تُون هايون پيئون نئھ منايا ۾ هايون رئي مڌت کر. هايي ٻي زئيئي ايسو را پارام کُشي رئي کهر همپڙايا ۾ مُون پيڙي ڏوروڻ ۾ مينت کڙي، زم کليمينس ان پيڙي مُون پيڙو کوم کريا وازي پڻ مينت کڙي. هايون ٻڌون را نوم پڳوون کن جيون را ڪتاب ۾ لکل سئ، جیا موئين هميش رو جيون ليڌا واڙون را نوم لکل سئ.

④ پریو ايسو ٿي واسطو را کيا ري کري هميش کُش ريو. هُون وڙي کونھ، کُش ريو. ⑤ تمی نرم طبيعت ٿي ايوئھ نمونئھ وو، زم ٻڌون منکون نئھ تماري نرمي رئي کهر پڙئ. پریو ايسو آيا واڙو سئ. ⑥ کيا پڻ وات رئي گئئي مت کرو، پڻ هر هيڪ وات ۾ پراٿنا ان منٿ کرين ٿورو موين تمی پڳوون ٿي وينئي کرو. ⑦ ان پڳوون ٿي زڙل شونتئي، جي منکون رون ٻڌون کيالون ٿي قائيڌا وازي سئ، تمارئھ ايسو کريست ٿي واسطو را کيا ري کري تمارا من ان

تمارا کيال هر کراپ وات ٿي پڇاوين راکشي.

⑧ آکر ۾، پايون ان پينون، زتي واتون هاسي سئ، زتي مون واري سئ، زتي انصاف واري سئ، زتي پويتر سئ، زتي نائوڪي سئ، زتي ميني سئ، جيوي پڻ پلائي هوئ، ان جئين ڪئين وڪوڻ ڪريا جيوو هوئ، ⑨ هايون واتون مانھ ٽمي ڏيون ڏيو. جي واتون ٽمي مون ٿي شيڪيھ، ان هزميھ، ان هومپزيھ، ان مون ۾ ڏيڪيھ، هايون ٻڌيون واتون مانھ وو. ان پگھون، جيو من ۾ شونتئي ڏيڏا وازو سئ، او تمون پيڙو هوشي.

پولوس اِمڌا ھارو فليپي شهر رون وشواسيون رو ٿورو مونئھ

⑩ هون پريو ايسو ٿي واسطو راڪين گھڻو ڪش ٿيوھ، جي ٽمي نيٺ وري مارو کيال راکيوھ. ٽمي تو اڳي مارو کيال راکتا ٿي تا، پڻ تمون نئھ مارئي مدت ڪريا رو ڪئين موقعو نہ زڙيو. ⑪ هون هم نئي ڪيتو ڪم تو مون نئھ اِمڌا رئي ضرورت سئ. ڪم تو مئين شيڪيوھ جي جيوي پڻ مارئي حالت هوئ، پلئھ نائوڪي هوئ ڪا کراپ هوئ، هون اوٽا ۾ ڪش ريونھ. ⑫ مون نئھ کبر سئ جي گريبي ۾ ريوو ڪي سئ، ان موج ۾ ريوو ڪي سئ. مئين ڌرم رئي اي اونڌي وات شيڪيھ، جي هر وات ۾ ان هر حالت ۾، پلئھ ڪائين ڍاپون ڪا پوکي مرون، پلئھ موج ۾ هوئون ڪا مون ڪن ڪئين نہ هوئ، توئي پڻ هون ڪش ريونھ. ⑬ هون ايسو ڪريست ٿي واسطو راکيا ٿي ٻڌوئي ڪئين سھي هيڪونھ، ڪم تو او آپري ڪڙا ٿي مون نئھ هيئت ڏئھ.

⑭ توئي پڻ ٽمي نائوڪو ڪريو، جي ٽمي مارا پائي ٿين ماري تڪليپ ۾ اِمڌا ڏين مارئي مدت ڪريھ. ⑮ ان تمون نئھ تو کبر سئ، فليپي شهر رون وشواسيون، جي زئون شروع ۾ ٽمي ايسو را پارام ڪشي رئي کبر مون ٿي هومپزين مونئي ٿي، ان تيا ڪيڙ هون تمارا مڪڏنيھ صوپا ٿي گيوت پرو، تئين پيڙي ڪئي وشواسي منڌري مارئ شيڪاڙيا را هاٿا ۾ مارئي مدت نئي ڪري،

پڻ روڳڻي ٿي مارا پائي ٿين مارئي مڌت ڪرئي ٿي. ①6 زئيون هون تمون ڪن ٿين ٿسليڪي شهر ۾ هتو، تئيون ٿي وڙي وڙي مارئي ڪپ پوري ڪريا هارو مون ڪن اڻڌا ميلئي. ①7 ام نٿي جي هون اڻڌا ليڌا هارو ڪرونه ريو. پڻ هون ايٺا هارو ڪرونه ريو، جي زم وياز مانھ پٺيھا ڏيڌا ٿي پٺيھون ۾ ڦاڻيڏو ٿئھ، تم تمارئھ اڻڌا ڏيڌا ٿي تمون نئھ پڳوون رو آشيرواڏ زڙيا رو ڦاڻيڏو ٿئھ. ①8 مون ڪن ٻڌوئي ڪئين سئھ ان هون موج ۾ سون. مارئي ڪاپئي پوري ٿي گڻيھ، ڪم تو مون نئھ اڀرڏئس ٿي تماري ميلل شينھون زڙيھ. هائي تمارئي ڪرل شيوا پڳوون را نوم مانھ ساڙل ڪشبو واڙا ڏونپ را زم سئھ، ان پڳوون هايا ٿي ڪش ٿين قبول ڪرئھ. ①9 ان پڳوون، جيا رئي شيوا هون ڪرونھ، او آڀرا آڪاشي هڪ پرموئھ تمارئھ ايسو ڪريست ٿي واسطو راکيا ٿي تمارئي هر ڪاپئي پوري ڪري. ②0 آڀا ٻاپ پڳوون را وڪوڻ هميش هوڏي ٿيٽا رئھ! آمين.

پولوس فليپي شهر رون وشواسيون ٿي موڪلاوئھ

②1 ٿي اوئون ٻڌون نئھ نمسڪار ڪيا، جيا ايسو ڪريست ٿي واسطو راکين پڳوون را سونڊل منڪ سئھ. جيا وشواسي پائي مون پيڙا سئھ، او تمون نئھ نمسڪار ڪئھ. ②2 ٻڌائي پڳوون را سونڊل منڪ، ڪاس ڪرين او جيا رومي حڪومت ري نوڪري ۾ سئھ، او تمون نئھ نمسڪار ڪئھ. ②3 پريو ايسو ڪريست تمون ٻڌون مانھ ڪريا ڪرئھ!

ڪلسيون را نوم مانھ لکل کت رئي ھزموئي

کت لکيا وازو

اي کت پولوس لکيو، ان ٽيمٽس اوتا پيڙو هتو (ڪلسيون 1:1). ام لاڳهه جي اوت توتھ لکيو زئون او پرهين وار روم شهر موئين رومي حڪومت رو قيدي هتو (ڪلسيون 3:4). اوتھ پئون سالون هودي مسواڙ مانھ ليدل گهر موئين قوج را پاهرام ريتو (مڪ شيلون را ڪوم 16:28، 30). زئون پولوس نھ ڪبر پڙئي جي ڪلسي شهر رون وشواسيون نھ ڪئينڪ منڪ ڪوڙي واتون شيڪاڙهه ريا، تئين اوتھ اي کت، اندازم 60ع م. اوتون نھ لکيو. ايتا کت پيڙو پولوس فليمون نھ پڻ کت مليو، جيو اوت ري وشواسي منڌري رو منڪ هتو.

کت ڪيون منڪون ھارو لکيو

پولوس اي کت ڪلسي شهر رون وشواسي منڪون ھارو لکيو (ڪلسيون 2:1). ڪلسي شهر رون منڪون نھ ڪلسي ڪيتا، ڪلسي اسد صويا رو هيڪ شهر هتو. اوتا شهر موئين ڪئينڪ يهودي قوم را منڪ هئا، پڻ گهڻا منڪ ڌاري قوم را هئا، پولوس آپ ڪلسي شهر موئين نه ڳيو، پڻ اوت ترڻ سال اوتا صويا را افسس شهر موئين ايسو را پارام همپزابو (مڪ شيلون را ڪوم 1:19-1:20). اوتھ ايفراس نومي منڪ وشواسي ٿيو، ان اوتھ ڪلسي شهر موئين زائين اوت رون منڪون نھ ايسو را پارام همپزابو (ڪلسيون 7:1). ان او ايفراس آپ هتو. جيئھ پولوس ڪن زائين ڪلسي شهر رون وشواسيون را پارام همپزابو (ڪلسيون 8:1). پولوس اي کت لويڪه شهر رون وشواسون نھ پڻ پڻ همپزابا رو ڪيڏو (ڪلسيون 16:4).

کت لکيا رو مطلب

پولوس اي کت ايتا ھارو لکيو، ڪم تو منڪ وشواسيون نھ اي ڪوڙي واتون همپزواتات ريا، جي روڳو ايسو مانھ وشواس راڪيا ٿي تارڻ نئين زڙهه، پڻ وشواسيون رھ موسي رون لکل حڪمون مانھ پڻ ويو (مثال ڪاڏا، پربون، ان توهر وازيون واتون مانھ ويو)، آڪاشي ڏوتون رئي پوزا ڪروو، ان ڪئينڪ ڪاس ڳيون پڻ شيڪوو. پولوس ھزماوتھ جي ھايون واتون مانھ نه ويو پڻ روڳا ايسو ريون واتون مانھ ويو. ڪم تو ايسو ٻڌون ٿي موتو سڏھ ان روڳو ايسو ٿي واسطو راڪيا ٿي ڳيون ان تارڻ زڙهه.

اینا کتاب را شاستر ٲی بیزا حوالا:

کُلسیون 7:4 افسیون 21:6	کُلسیون 1:1 کوم 19-1:9
کُلسیون 9:4 فلیمون 16-8:1	کُلسیون 1:1 کوم 3-1:16
کُلسیون 10:4 کوم 29:19	کُلسیون 1:1 کوم 4:20
کُلسیون 10:4 کوم 4:20	کُلسیون 7:1 فلیمون 23:1
کُلسیون 10:4 کوم 2:27	کُلسیون 24:1 کوم 16:28
کُلسیون 10:4 کوم 25:12	کُلسیون 25:1 کوم 19-1:9
کُلسیون 10:4 کوم 13:13	کُلسیون 11:2 پیدایش 14-9:17
کُلسیون 10:4 کوم 39-37:15	کُلسیون 14:2 احبار 34:27-1:1
کُلسیون 10:4 فلیمون 24:1	کُلسیون 14:2 عبرانیون 13-7:8
کُلسیون 12:4 کُلسیون 8-7:1	کُلسیون 14:2 عبرانیون 18-1:10
کُلسیون 12:4 فلیمون 23:1	کُلسیون 16:2 احبار 47-1:11
کُلسیون 14:4 کوم 2:27	کُلسیون 16:2 مرقس 19-18:7
کُلسیون 14:4 کوم 16:28	کُلسیون 16:2 احبار 44-1:23
کُلسیون 14:4 فلیمون 24:1	کُلسیون 16:2 ا تواریخ 31:23
کُلسیون 17:4 فلیمون 2:1	کُلسیون 16:2 متی 8-1:12
کُلسیون 18:4 کوم 16:28	کُلسیون 3:4 کوم 31, 16:28
	کُلسیون 7:4 کوم 4:20

کُلسیون

را نوم مانه پولوس رو لکل کت



1 ① هُون لکيا واژو پولوس سون، جيو پگوون ري مرضي پرموئنه ايسو
کريست رو هيک مک شيلو سون. اي کت مارا پاها ٿي ان آڀا وشواسي
پائي تيمٽيس را پاها ٿي لکل سئ.

2 ② کلسي شهر رون پريمي وشواسي پايون ان بينون، تمی جيا پگوون را
سُونڊل منک سو ان ايسو کريست ٿي واسطو راکين پکو وشواس راکوه،
پگوون آڀو ٻاپ تمون مانه کُريا کرئه ان تمون ننه هکي راکنه!

پولوس ڪلسي شهر رون وشواسيون هارو پڳوون رو ٿورو مونڻه ان پراڻا ڪرڻه

③امي هميش اپڻا پريو ايسو ڪريست را ٻاپ پڳوون رو ٿورو مونونھ زئيون امي تمون هارو پراڻا ڪرونھ، ④ڪم تو امي هومپڙيوھ جي تمې ايسو ڪريست مانھ ڪيوو پڪو وشواس راکوھ، ان پڳوون رون ٻڌون سونڊل منڪون ٿي ڪيوو نائوڪو پريم راکوھ. ⑤امي ايوو وشواس ان ايوو پريم ايڻا هارو راکوھ ڪم تو تمارو پروسو سڻھ جي تمون هارو آڪاش موئين هڪ تيار سڻھ. هيا آڪاشي هڪ را پارام تمې هاسا وڃن ۾ هومپڙيو، زئيون ايسو را پارام ڪشي رڻي ڪهر پيرهين تمون ڪن پوگهي. ⑥زم ٻيز ٿي فصل ٿئھ، تم اي ڪشي رڻي ڪهر پوري دنيا ۾ نائوڪو اثر ڪرڻھ رڻي ان پڪڙڻھ رڻي، جيوئھ نمونئھ اوتا ڏي ٿي لين تمون ڪن پڻ اثر ڪرڻھ رڻي ان پڪڙڻھ رڻي، جيڏي تمې هومپڙيو ان تمون نئھ پوري ڪهر پڙي جي هاس ۾ پڳوون منڪون مانھ ڪيوئي ڪرپا ڪرڻھ. ⑦اي ڪشي رڻي ڪهر تمې امارا پريمي پائي ايفراس ٿي شيڪئي، جيو امون پيزو پڳوون رڻي شيوا ڪرڻھ. او ايمونڌاري ٿي تمون هارو ايسو ڪريست رو شيواڌاري سڻھ، ⑧ان اوئھ امون نئھ تمارا پريم را پارام همپڙيو، جيو پريم پويتر آتما تمون نئھ ڏيڏوھ.

⑨تيا، زئيون امي تمارا پارام هومپڙيو، اوتا ڏي ٿي لين امي تمون هارو هميش پراڻا ڪرتا ريونھ، ان پڳوون ٿي وينتي ڪرونھ جي او پويتر آتما ري ڪرا ٿي تمون نئھ پوري عقل ان هزم ڏئھ زم تمون نئھ پڳوون ري مرضي رڻي پوري ڪهر پڙئھ. ⑩امي ايڻا هارو وينتي ڪرونھ، جي زم پريو نئھ وئھ هم تمې وو، ان هر وات ۾ اوتا نئھ ڪش ڪرو. زم ٻيز ٿي فصل ٿئھ، تم تمارو وشواس تمون موئين نائوڪو اثر ڪرڻھ ان وڌئھ، ان تمې هر نائوڪو ڪوم ڪرو ان پڳوون ٿي پورئھ نمونئھ واسطو راکيا ۾

آڳڙ وڌو. ⑪ ڀڳوونَ آپري عجيبَ ڦڌرت پرموئنه تمون ننه ٻڌي ڪڙا ٿي هيئت ڏٺ، زم تمي هر ڏوروڻ سهو ان منڪون ٿي صبر راکو، ان ڪشي ٿي ⑫ تمي ڀڳوونَ ٻاپ رو ٿورو مونو، جيئنه تمون ننه ايٺا رنه لائيڪ ڪرياه جي تمي ڀڳوونَ رون پيزون سُونڍل منڪون پيڙا آڪاشي سوجهرا موئين اُونا رو وائيڌو ڪرل هڪ ليو. ⑬ اُونه آپون ننه شيطونَ را انڌارا واڙا قَوْضا ٿي سڏايه، ان آپرا پريمي ڏيڪرا ايسو را راز موئين اوڻياه. ⑭ ايسو ري ڪري آبي ڏوهون را قَوْضا ٿي آزاده ٿياه، مطلب آپون ننه ڏوهون رئي ماقئي زڙيه.

ڀڳوونَ ايسو ننه ٻڌون ٿي گهڻو مون ڏيڏوه

⑮ ايسو ان ڀڳوونَ ٻي ٿي هيڪ را هيڪ سئه،

ان جي واتون ان ڏيڪل ڀڳوونَ موئين سئه

اُو واتون ايسو موئين ساوي ڏيڪاڙل سئه.

جئين ڪئين ڀڳوونَ رو ناوُل سئه،

ايسو اُوئون ٻڌون ٿي موٽو سئه

ان اُونا رو حق ٻڌون مانه سئه.

⑯ ڪم تو ڀڳوونَ ٻڌوئي ڪئين ايسو ري ڪري نايو،

جئين ڪئين آڪاش مانه سئه ان جئين ڪئين ڌرتي مانه سئه،

جئين ڪئين ڏيڪل سئه ان جئين ڪئين ان ڏيڪل سئه،

جيا رو پڻ راز، ڪڙا، آڳيونئي، ڪا اِڪتيارئي سئه،

پلئه آڪاشي ڏوت، ڪا پُوت، ڪا ڏيو ڏيوٽونا هوئه.

ڀڳوونَ ايسو رنه هيلئه ايسو هارو ٻڌوئي ڪئين نايو.

⑰ ايسو آپ ٻڌون ٿي مور هتو،

ان ايسو ري ڪري ٻڌوئي ڪئين ويتو ره.

⑱ ان ايسو آپ وشواسي منڌري مانھ سئھ،
زم ماڻو ڏيل مانھ سئھ.

ايسو وشواسي منڌري نئھ ٺاڻا وازو سئھ.
اُو ٻڌون ٿي موٽو سئھ ان اُوڻا رو حق ٻڌون مانھ سئھ،
ڪم تو اُو ٻڌون ٿي مور مرلون موئين ٿي جيوي اوليو،
زم اُو هر وات ۾ آڳڙ هوئھ.
⑲ ڪم تو پڳوون آپري ڪشي ٿي اي ڦينصلو ڪريو

جي ٻڌي واتون جي آپ موئين سئھ،
اُو ٻڌي ايسو موئين هوئھ،
⑳ زم اُو ايسو رُھ هيلئھ ٻڌون ٿي منومئا ڪرئھ.
ايسو آپرو جيو هُوزي مانھ ڏين آپرا لويي ٿي
پڳوون را ان منڪون را آپت ۾ منومئا ڪريا.
ان هيئھ نمونئھ جئين ڪئين ڌرتي مانھ سئھ،
ان جئين ڪئين آڪاش مانھ سئھ،
پڳوون ايسو رُھ هيلئھ اوئون ٻڌون ٿي منومئا ڪريا.

㉑ اڳي تمي پڻ تمارون ڪراپ ڪومون ري ڪري پڳوون ٿي رينھال هئا،
ان آپرا من ۾ اُوڻا ٿي وير راکتا. ㉒ پڻ هوئھ پڳوون ايسو رُھ منڪ ٿين مريا
ٿي تمون ٿي منومئا ڪرياھ، زم تمون نئھ پويتر، پيڏوهي ان الزوم ووڻا آپ
هو ما اوپاڙئھ، ㉓ جي تمي پڪو وشواس راکين پوري هيئت ٿي وشواس مانھ
ويتا ريو، ان آڪاشي هڪ ليڏا رو پروسو راکتا ريو، جيا را پارام تمي ايسو
ري ڪشي ري ڪبر ۾ هومپڙيوھ. اي ايسو را پارام ڪشي رئي ڪبر پوري ڏنيا ۾
ٻڌون منڪون ۾ همپڙاول سئھ، ان هُون پولوس هائي ڪشي رئي ڪبر همپڙايا هارو
شيواڌاري راکل سون.

ڏک ٽڪليپون سهينَ

ايسو را پارام ڪشي رڻي ڪپر ٻڌون نڻ هَمپڙاوو

24) همڻه هُون ايتون ڏڪون مانھ ڪُش سون، جيا هُون تمون هارو سھونھ ريو، ان زم ايسو ڪريست ٽڪليپون سھي، تم هُون آپ وشواسي منڌڙي هارو، جي ايسو را ڏيل را زم سڻ، مارا آپرا ڏيل مانھ اُو ٻڌي ٽڪليپون سھونھ ريو، جي ايسو ري ڪري سھو پڙشي. 25) هُون وشواسي منڌڙي رو شيواڌاري ٿيوھ، ڪم تو پڳوون مُون نڻه آپرا ايڻا ڪوم مانھ تمون هارو راکيوھ، جي هُون پڳوون رو وچن ٻڌون منڪون نڻه پورڻه نمونڻه هَمپڙاوون. 26) مطلب، هُون پڳوون رڻي اي اُونڌي وات هَمپڙاوون جي پڳوون ڏنيا را شروع ٿي لين هر زمونا رون ٻڌون منڪون ٿي هٿاڙين راکڻي ٿي، پڻ همڻه آپرون سُونڍل منڪون ڪن ساوڻي ڪريھ. 27) پڳوون رڻي مرضي هٿي جي اُو آپرون سُونڍل منڪون نڻه ڪپر ڏڻه جي اي اُونڌي وات ڌاريون قومون هارو ڪيوڻي موڻي ان مون واڙي وات سڻ. ان اُو وات اي سڻ، جي ايسو ڪريست تمون ڌاري قوم واڙون را من موڻين رڻه، جيا ٿي پروسو ٿڻه جي تمون نڻه آڪاش موڻين مون زڙشي. 28) امي ايسو ڪريست را پارام هر هيڪ منڪ نڻه هَمپڙاوونھ، ان پوري عقل ٿي هر هيڪ منڪ نڻه هَمپڙاوونھ، زم امي هر هيڪ منڪ نڻه پڳوون هومو ايسو ڪريست ٿي واسطو راکيا ٿي وشواس ۾ پڪو اُپاڙون. 29) ايڻا هارو هُون پڻ گهڻي ڪوشش ٿي پڳوون ري ڏيڏل هيٺ پرموڻه مينت ڪرونھ، جي هيٺ پڳوون آپري ڪڙا ٿي مُون نڻه ڏيتو رڻه.

2 1) مارڻي مرضي سڻه جي تمون نڻه ايڻا وات رڻي ڪپر هوڻه، جي هُون تمون هارو، ان لوديڪيه شهر واڙون هارو، ان اُونڻ ٻڌون وشواسيون هارو جيڻي مُون نڻه ڪيڏي نه ڏيڪيو، ڪٿي ڪوشش ڪرونھ، 2) زم پريم ان هپ موڻين ريا ٿي تمون ٻڌون نڻه حوصلو زڙڻه، ان تمي پورڻه نمونڻه پڪي ڪاتري ٿي پڳوون

رئي مونَ واڙئي اُونڌئي وات هڙمو ان اُونا رئي پوري ڪهر پاڙو. اي اُونڌئي وات ايسو ڪريست آپ سٺه. ③ زم منڪ ڪيٽڪ ملڳت هٿاڙين راکهه، تم پڳوون هڙم ان ڳيون ري ٻڌي واتون ايسو موئين هٿاڙين راکهه، ان ايسو نئه اوڙڪيا ٿي او ٻڌي ساوي ٿهه.

④ هون هائي واتون ايٺا هارو ڪونه ريو جي ڪوئي منڪ تمون نئه ناٿوڪي ناٿوڪي واتون همپڙاوين تمون نئه ڌوڪو ڌين ڪوڙيون واتون مانه نه ويوراوئه. ⑤ پلئه هون تمون پيڙو نٿي، توئي پڻ مارو جيو تمون پيڙو سٺه، ان هون ڪش سون ڪم تو مون نئه ڪهر سٺه جي تمي جهيڙا وگر هپ ۾ ريوه ان ايسو ڪريست مانه پڪو وشواس راکوه.

منڪون ري ڪوڙي واتون ساڌين رُوڳو ايسو ڪريست ريون واتون مانه ويوو


⑥ تمي ايسو ڪريست نئه آڀرو پريو ڪرين اونا مانه وشواس اوڻيوه، تيام تمي ايسو ٿي واسطو راکين وو. ⑦ زم وڻ زمي موئين پاڍون هئين وڌهه، ان زم گهر پڻياڌ مانه نههه، تم تمي ايسو ڪريست ٿي واسطو راکين آڳڙ وڌو ان پوري هيئت ٿي اونا وشواس مانه وينا ريو، جيا را پارام تمون نئه شيڪاڙيوه، ان هميش پڳوون رو ٿورو مونتا ريو.



⑧ ڌيون راکيا جي ڪوئي منڪ تمون نئه منڪون ري سوچ ري نالي ان ڪوڙي واتون شيڪاڙين تمون ٿي ڌوڪو ڪرين آڀري وات ۾ نه ڦٽراوئه. هيوي واتون منڪون ريون ريتون روازون پرموئنه سٺه. او ايٺا ڏنيا ري سوچ ان اصولون پرموئنه سٺه، پڻ ايسو ڪريست را پارام شيڪاڙل هاسيون واتون پرموئنه نٿي. ⑨ ڪم تو جي واتون پڳوون موئين سٺه، او ٻڌي واتون ايسو ڪريست موئين منڪ را رُوپ ۾ سٺه، ⑩ ان ايسو ٿي واسطو راکيا ٿي تمون نئه پيڙي ڪيا پڻ

وات رڻي ضرورت نٿي، ڪم تو جيو پڻ آڳيوونئي ان اِڪتيارڻي راکڻه، ايسو
 اوئون ٻڌون مانھ ڌڻي سئھ، پلئھ آڪاشي ڏوت، ڪا پوت، ڪا ڏيو ڏيوٽونا هوئھ.
 ⑪ ايسو ٿي واسطو راکيا ٿي تمي پڳوون را سونڍل منڪ ٿياھ، ان زوئھ
 تمارڻي توھر ٿيھ. هُون ايوي توھر را پارام نٿي ڪيتو زئيون منڪ ڏيل رو
 توڙڪوڪ ٽڪرو وادين ڪتم ڪرھ. پڻ ايٿا را پارام ڪونھ ريو، جي ايسو
 ڪريست توھر را مثال پرموئھ تمارا ڪراپ ڪيال ان ڪراپ ڪوم ڪتم ڪرياھ، ان
 زوئھ توھر ڪرين تمون نئھ پڳوون را سونڍل منڪ ٿياھ. ⑫ هاڻي وات ٿيون
 ٿئي، زئيون تمي پويتر سنون ليدو. اوئھ ٿوئھ پڳوون تمارو زونو وُڍا رو نمونو
 ڪتم ڪرين زوئھ تمون نئھ ايسو پيڙا مقوم ۾ پورياھ، ان تمون نئھ نوا نمونا را
 منڪ ناوين زوئھ تمون نئھ ايسو پيڙا جيوي اوناڙياھ، ڪم تو تمي پڳوون ري
 اوئا ڪڙا مانھ يقين راکيو تو، جيا ڪڙا ٿي پڳوون ايسو نئھ مرلون موئين ٿي
 جيوي اوناڙيو تو.

⑬ اڳي تمارو پڳوون ٿي واسطو نه هويا ري ڪري تمي ڌاري قوم واڙا مرل
 را زم هتا، ڪم تو تمي پڳوون رون حڪمون مانھ نه ويتا ان تمي پڳوون ري
 سونڍل اسرائيلي قوم را ان توھر ڪرل نٿا. توئي پڻ پڳوون تمون نئھ زوئھ ايسو
 پيڙا جيوتا ڪرين نوئي حياتي ڏيڏئي. پڳوون آپون نئھ اوئا رون حڪمون مانھ
 نه وُڍا رڻي ماڻهي ڏيڏئي. ⑭ ام هڙموو جي او ڪاڳڙ جيا مانھ آپڻا ڏوھ لڪل
 هتا، مطلب سڀ را ٻڌائي لڪل حڪم جيا آپڻا ڏوھ ڪاڍتا،



اوئا ڪاڳڙ مانھ لڪل ڏوھ پڳوون ڏوڙيا پرا، ان او ڪاڳڙ
 ايسو ري هُڙي مانھ ميڪ ٿي هئين آپون ٿي هيڪل ڪريو
 پرو. ⑮ پڳوون آپرئھ ڪِلاَق ٿيل آڪاشي ڏوتون ٿي جيتيو، جيا
 شيطون ان اوئا را پاها را پوت سئھ، ان هايون رڻي ڪڙا آپ ٿي

هيٺ راکڻي. ان اي وات اوئھ ٻڌون نئھ ساوئي ڏيڪاڙڻي زئيون ايسو رڻھ هُڙي
 مانھ آپرو جيو ڏيڏا ٿي هايون نئھ هرايا ان زوئھ قيڏي ٿيل ٻڌون هوما ڏيڪاڙيا.

16) تيام، جي ڪوئي تمون مانھ الزوم ھئڻه جي تمڻي ڦلوتڻي شينھ ڪم ڪاڻوھ ان ڦلوتڻي شينھ ڪم پڻوھ، ڪا تمڻي پرھون، سنڌر رو ڏي، ڪا پوٽر ڏي ڪم نڻي راڪتا، تو اوتا ري وات مانھ ڏيون مت ڏيا. 17) ڪم تو جيا ڪم ھايون واتون را پارام لڪل ھتا، او آيا واڙا وڪت رڻي ڪپر پاڙيا ھارو ھتا، پڻ ھمئڻھ او وڪت آيوھ رو. او واتون سونڻيا را زم ھتي، پڻ جيا رو سونڻيو ھتو، او ايسو ڪريست آپ سئھ. 18) جيا منڪ رو شونق اي سئھ، جي او آپ نئھ ڳريپي ٿي ووڍا واڙو ڏيڪاڙئھ ان آڪاشي ڏوتون رڻي پوزا ڪرئھ، جي او تمارئھ ھم نہ ڪريا رو ڏوھ ڪاڍئھ، تو اوتا ري وات مانھ ڏيون مت ڏيا، ڪم تو ايوو منڪ آپري وات رڻي اي ٿايتڻي ڏئھ جي پڳوون ڪا آڪاشي ڏوتي اوتا نئھ ڏيڪاڙا ڏيڏاھ، پڻ ھاس ۾ او آپرون ڪراپ سوچون ان ڪيالون پرموئڻھ امھي آپري وڌائي ڪرئھ. 19) ايوو منڪ ماتا ووٽا ڏيل را زم سئھ، ڪم تو او آپرا ڏئي ايسو ڪريست را ھاسا وشواس مانھ نڻي ويتو. زم ماتا را ڪيڏا پرموئڻھ پورو ڏيل جوڙون ان نوزون ٿي ملين ڏاڍو ٿين وڌئھ، تم ايسو ڪريست را ڪيڏا پرموئڻھ پوري وشواسي منڌڙي پڳوون ري مرضي پرموئڻھ وڌتي زاشي.

ڏنيا را ڪيال ساڌين پڳوون را ڪيال راڪو

20) زڻيون تمڻي ايسو ڪريست ٿي واسطو راڪيو تو، جيو مري گيو تو، تڻيون تمڻي پڻ زوئڻھ ايسو پيڙا مري گيا تا، ان ايٺا ڏنيا ري سوچ ان اصولون ٿي سوتي گيا تا. تيام تمڻي ڏنيا رون پيزون منڪون را زم ھايون اصولون مانھ ڪم ووھ ريا؟ 21) ڏنيا را اصول ايوا سئھ، ”ڦلوتڻي شينھ نئھ مت سڀيا،“ ”ڦلوتڻي شينھ مت ڪايا،“ ”ڦلوتڻي شينھ مت ليا.“ 22) پڻ ھاڻي ٻڌي شينھون ڪئم ٿيا واڙي سئھ ان منڪون را واپرايا ھارو سئھ. ان ھاڻي ٻڌائي ڪم روڳا منڪون را ٽاول سئھ ان منڪون ري شيڪاڙل واتون سئھ. 23) منڪ ام ھزمشي تو ڪري، جي ھاڻي واتون عقل واڙي سئھ، ڪم تو ھايون واتون مانھ وين منڪ آپرا ٽاول نمونا پرموئڻھ

پُوزا ڪرڻ، آپ ننه ڳريبي ٿي وُڍا واڙا ڏيکارڻ، ان آپرا ڏيل ننه تڪليل ڏهه. پڻ هاس ۾ هايون واتون مانھ وُڍا ٿي آپرا ڪراپ ڪيال قابوم راکيا ۾ ڪئين ڦاڻيڏو نٿي ٿيتو.

3 ① زنيون تمي ايسو ڪريست ٿي واسطو راکيو تو، جيو جيوي اُڻيوھ، تنيون پڳوون اُڻا پيڙا تمون ننه پڻ زوڻه جيوي اُڻاڙيا. تيام تمي پڳوون ريون آڪاشي واتون مانھ ڏيون ڏيتا ريو، ڪم تو ايسو ڪريست اُڻهه آڪاش موئين پڳوون رنه زمڻه پاهنه مون ۾ پينل سئ. ② تمي ڏنيا ريون واتون مانھ نئين، پڻ پڳوون ريون آڪاشي واتون مانھ ڏيون ڏيو. ③ ڪم تو وات ام سئ، تمي تو زوڻه مري گياھ ان تماري ڪراپ حياتي ڪتم ٿي گئيھ، ان هوه تمي ايسو پيڙا پڳوون ٿي واسطو راکوه، ڪم تو پڳوون تمون ننه زوڻه جيوي اُڻاڙين آپ ڪن ايسو پيڙا آڪاش ۾ راکياھ. پڻ هائي تماري نوي حياتي همڻه هٿال سئ. ④ پڻ زنيون پڳوون ايسو ڪريست ننه ايڻا جگت ۾ پاسو ميلين ساوو ڪرشي، جيا ٿي واسطو راکيا ري ڪري آپون ننه اي نوي حياتي زڙه، تنيون اُو تمون ننه پڻ ايسو پيڙا زبڪتا سوجھرا ۾ ساوا ڪرشي.

⑤ تيام تمي آپري ايڻا ڏنيا ري ڪراپ واتون ڪتم ڪرو پري. پُونڌو ڪوم، لوقرائي، پُونڌي نظر، ڪراپ ڪيال، ان لالچ جئي مورتِي پُوزا جيوي ڪراپ سئ، ڪم تو لالچي منڪ پڳوون رو ڪيال ساڏهه ان رُوڳو شينھون رو ڪيال ڪرڻ، هائي ٻڌي واتون تمي ساڏو پري. ⑥ ڪم تو جيا منڪ هايون واتون ۾ سئ، پڳوون اُڻون ننه سزا ڏيشي. ⑦ اڳي تمي پڻ هائي ڪوم ڪرتا، زنيون تمي هيوي حياتي گذارتا. ⑧ پڻ هوه تمي پڻ وير، رينه، ڏشمئي، ڳلا، ان ڳازيون، ايئون ٻڌيون واتون ننه ساڏو پري. ⑨ تمي هڪا پيڙا ٿي ڪوڙ مت ڪرو، ڪم تو تمي آپرا زونا ڪيال ان ڪوم ساڏياھ پرا، ⑩ ان تمي نوا منڪ ٿياھ. ان پڳوون جيڻه تمون ننه نوا ڪرياھ، اُو تمون ننه آپ جيو نائوڪون ۾ نائوڪا ڪرتو رڻ، زم تمي اُڻا ننه پورنه نموننه اوزڪو. ⑪ زنيون منڪ نوو ٿيل سئ، تنيون ڪئين

وات ئي نٿي جي اُو يهُودِي قُوم رو سٺه ڪا ڌاري قُوم رو سٺه، توهَر ڪرل سٺه ڪا توهَر نٿي ڪرل، جهنگلي قُوم رو سٺه، ظلمي قُوم رو سٺه، گُلمو سٺه، ڪا آڙا سٺه. هُئِه هاڻي واتون موتي نٿي. رُوگهو ايسُو ڪريست موتو سٺه، ان اُو ٻڌون وشواس راکيا وازون را من موئين رٿه.

⑫ پڳوون تمون نٺه آپرا پويتر منڪ نايا هارُو سُوندياه ان تمون ٿي پريم ڪريوه، تيام تمِي قياس ڪرو، ميرپونئي ڪرو، گريبي ٿي وو، نرمي ٿي وو، منڪون ٿي صير ڪرو، ⑬ ان جي ڪوڪ تمارو ڏوه ڪرئ، تو اُونا ٿي مت وڙگائو، پڻ هڪا پيزا را ڏوه ماڦ ڪرو. زم پريو ايسُو تمارا ڏوه ماڦ ڪرياه، تم تمِي پڻ هڪا پيزا را ڏوه ماڦ ڪرو. ⑭ ان هاڻيون ٻڌيون واتون پيڙو هڪا پيزا ٿي پريم پڻ راکو، زم پورئ نمونئه آپت موئين ٻڌئي راکين ريو. ⑮ ايسُو ڪريست تمون نٺه آپت موئين هپ راکيوه، تيام تمِي هڪا پيزا ٿي هپ راکتا ريو، ڪم تو پڳوون تمون نٺه ايئا هارُو سُوندياه جي تمِي هڪا ڏيل را زم وشواسي منڌڙي ۾ هڪا پيزا ٿي هپ ۾ ريو. ان تمِي پڳوون رو ٿورو مونتا ريو. ⑯ تمِي ايسُو ڪريست رو وچن پورئ نمونئه آپرا من موئين راکين مونتا ريو، ان هڪا پيزا نٺه پوري عقل ٿي هڙماوتا ان شيڪاڙتا ريو، ان آپرا من موئين پڳوون رو ٿورو مونيَن شاستر را پزن، پيزا پزن، ان وشواسي گيت گاتا ريو.

⑰ جيئن ڪئين ڪوم ان وات تمِي ڪرو، اُو ٻڌو ڪئين تمِي پريو ايسُو را نوم مانه ڪرو، ان اُوئ توتئه ايسُو رٿه هيلئ پڳوون ٻاپ رو ٿورو مونتا ريو.

وشواسيون رٿه آپرا گهر رون منڪون ٿي ڪيوئ نمونئه ويوو

⑱ ڏوشيون، تمِي آپرا آڌمي ري مرضي مانه وو، زم پريو ايسُو مانه وشواس راکيا وازيون هارُو نيڪ سٺه.

⑲ آڌميون، تمِي آپري ڏوشي ٿي پريم راکو، ان اُونا ٿي سڪتي هُون مت وو.

⑳ ٻاڙون، تمِي هر وات ۾ آپرا مان ٻاپ رو ڪيڏو مونو، ڪم تو تمِي پريو


ايسو مانھ وِشواس راکوھ ان مان ٻاڻ رو ڪيڏو مونيا ٿي پڳوون کُش سئھ.
 (21) مائيترون، تمي آڀرون ٻاڙون نئھ ٿوڙي وات مانھ گھڻا مت وڙڳائو، نڪا
 ٻاڙ هيئت هارشي.

(22) ڳلومون، تمي هر وات ۾ آڀرون ڏٿيون رو ڪيڏو مونو. رُوڳو آڀرون ڏٿيون
 نئھ ڏيڪاڙيا هارُو ان کُش ڪريا هارُو ڪوم مت ڪرو، پڻ تمي آڀرا ڏٿي پڙيو
 ايسو رو مون راکين هاسا من ٿي اوئون رئي شيوا ڪرو. (23) جيو ڪوم تمي
 ڪروھ، او ڏل ٿي ڪرو. ام هڙمو جي تمي منڪون رئي نئين، پڻ پڙيو ايسو رئي
 شيوا ڪروھ ريا، (24) ڪم تو تمون نئھ ڪبر سئھ جي پڙيو ايسو تماري ڪرل شيوا
 را ايوزا ۾ تمون نئھ آڪاش موئين وائڏو ڪرل هڪ ڏيشي. هاس ۾ تمارو ڏٿي
 پڙيو ايسو ڪريست سئھ، ان تمي اوئا رئي شيوا ڪروھ ريا. (25) هايون واتون مانھ
 وو، ڪم تو جيو ڏوھ ڪرئھ، اوئا نئھ آڀرا ڏوھ رو ايوزو زڙشي، ڪم تو پڳوون
 ڪيا رو پاھو نٿي ليتو.

4 (1) ڏٿيون، تمي آڀرون ڳلومون ٿي انصاف هُون صحيح نمونئھ وو، ڪم تو
 تمون نئھ ڪبر سئھ جي آڪاش مانھ تمارو پڻ هيڪ ڏٿي سئھ.

ايسو رئي وات پڪيڙوو

(2) تمي هميش پراٽنا ڪرتا ريو، ان پراٽنا ڪريام سجاڳ ريو ان پڳوون رو
 ٿورو مونو. (3) ان امون هارُو پڻ پراٽنا ڪرتا ريو، جي پڳوون امون نئھ وچن



هميڙايا رو گھڻو موقعو ڏئھ، زم هُون
 ايسو ڪريست را پارام اُونڏي وات
 هميڙاوون، جيا نئھ هميڙايا ري ڪري
 هُون قيڏي ٿيوھ، (4) مطلب ايسو رئي
 اُونڏي وات ٻڌون ڪن ساوئي ڪرون،
 زم مارئھ ٻولوو ڪپئھ.

⑤ جيا منڪ ايسو مانھ وشواس نٿي راکتا، تمڀي اُوئون ٿي عقل هُون وو،
ان هم ڪريا ٿي هر موقعا مانھ ڦائيدو ليو. ⑥ تمڀي اُوئون ٿي هميش نائوڪئ
نمونئ نائوڪي واتون ڪرو، ان هم تمون نئ ڪبر پڙشي جي هر هيڪ منڪ نئ
ڪيوئ نمونئ وشواس را پارام وڙندڙي ڏيوو ڪپئ.

اڪري واتون

⑦ مارا پارام ٻڌي واتون مارو پريمي پاڻي ٽُخڪس تمون نئ همپڙاوشي، جيو
ايمونڌار شيواڌاري سئ ان مُون پيڙو پريو ايسو هارو ڪوم ڪرئ. ⑧ هُون ايئا
نئ تمون ڪن ايئا هارو ميلونھ ريو، جي تمون نئ امارا پارام ٻڌڻي ڪبر ڏئ. ان
تمون نئ حوصلو ڏئ. ⑨ ايئا پيڙو هُون مارو ايمونڌار ان پريمي وشواسي پاڻي
اُنيسمُس نئ پڻ ميلونھ ريو، جيو تمارا آڀرا شهر رو منڪ سئ. هائي ٻي زئا
تمون نئ ايت رڻي ٻڌڻي ڪبر همپڙاوشي.

⑩ ارسترخس، جيو مُون پيڙو قيڌ ۾ سئ، تمون نئ نمسڪار ڪئ. ان
مرقس، جيو برنباس رو هونڌام پاڻي سئ، تمون نئ نمسڪار ڪئ. مرقس
را پارام تمون نئ ڪيڏو تو، جي اُو تمون ڪن آوئ، تو اُوئا ٿي نائوڪئ نمونئ
مڙو. ⑪ ان يشوع جيا نئ يوسُتس پڻ ڪئ، اُو پڻ تمون نئ نمسڪار ڪئ.
يهوڊي قوم رون وشواسيون موئين ٿي رُوگا هائي ترڻ زئا سئ جيا مُون پيڙا
منڪون نئ پڳوون را راز موئين ليڏا هارو ڪوم ڪرئ. ان هائي مُون نئ گهٽو
حوصلو ڏيڏوھ.

⑫ ايفراس، جيو تمارا شهر ري وشواسي منڌڙي رو سئ، ان ايسو ڪريست رو
شيواڌاري سئ، اُو تمون نئ نمسڪار ڪئ. اُو هميش تمون هارو گهٽا ڏيون ٿي
پراٽنا ڪرئ، زم تمڀي پڪو وشواس راڪين پڪي ڪاتري ٿي پڳوون ري مرضي
پرموئ وِيتا ريو. ⑬ هُون اُوئا رڻي هاڪ پروھ جي اُو تمارو، ان لوديڪيه ان
هيراپلس شهرن رون وشواسيون رو پڻ ڪتو گهٽو ڪيال راکئھ.

⑭ امارو پريمي پائي لُوقا، جيو حڪيم سٺ، ان ديماس پڻ تمون نٺه
نمسڪار ڪٺ.

⑮ امارا طرف ٿي تمي لوديڪيه شهر رون وشواسي پايون نٺه، ان پائي
نمفاس نٺه، ان اُوتا ري گهري جيئي وشواسي منڌڙي پيڙئي ٿٺه، اُئون ٻڌون نٺه
نمسڪار ڪيا. ⑯ زئيون تمي اي ڪت ٻڌون هومو پٿين همپڙاوي ليو، تئيون ام
ڪريا جي ڪوڪ لوديڪيه ري وشواسي منڌڙي نٺه پڻ اي ڪت پٿين همپڙاوت. ان
مارو جيو ڪت لوديڪيه شهر ٿي تمون ڪن آوٺه، تمي پڻ اُو ڪت پٿين همپڙايا.
⑰ ان ارخپس نٺه ام ڪيا: ”جيو پرپو رئي شيوا ڪريا رو ڪوم پڳوون ٿون نٺه
ڏيڏوه، اُو ٿون ڏيون ٿي پورو ڪر!“

⑱ هُون پولوس مارا آپرا هاڻ ٿي تمون نٺه نمسڪار لکونه ريو. مُون نٺه
ياڌ راکتا ريا جي هُون قيڌي سون.
پڳوون تمون مانھ ڪُريا ڪرئ!

تِسلْنِيڪيون را نوم مانھ لکل پيرھيان ڪت رئي ھزموئي

ڪت لکيا وازو

اي ڪت پولوس لکيو، ان لکيا رٿ توتھ اوتا را ساٿي سلوانس ان تيمٿيس پڻ اوتا پيڙا هتا (1 تِسلْنِيڪيون 1:1). سلوانس رو پيزو نوم سيلاس هتو (مڪ شيلون را ڪوم 1:17-4). ام لاڳتھ جي پولوس اي ڪت ڪرنٿس شهر ٿي لکيو، ڪم تو ايٿا ڪت م اُو اُپرئ تِسلْنِيڪي ان اٿيني شهرن م اڳي زايا را پارام لکته (1 تِسلْنِيڪيون 5:1، 1:3). ان اُپون نٿ اي پڻ ڪبر سٺ جي اٿيني شهر ٿي پولوس ڪرنٿس شهر موٽين گيو (مڪ شيلون را ڪوم 1:18). پولوس اي ڪت اوتھ توتھ لکيو زئون تِسلْنِيڪي شهر ٿي پاڳيو تو، تيمٿيس نٿ اوتھ وشواسيون را پارام ڪبر پاڙوا ميلو تو (1 تِسلْنِيڪيون 2:3)، ان اوتھ پاسو اوين وشواسيون را پارام ڪبر ڏيڏي (مڪ شيلون را ڪوم 5:18، 1 تِسلْنِيڪيون 6:3). پولوس اي ڪت اندازام 5ع م لکيو.

ڪت ڪيون منڪون ھارو لکيو

پولوس اي ڪت تِسلْنِيڪي شهر رون وشواسي منڪون ھارو لکيو (1 تِسلْنِيڪيون 1:1). تِسلْنِيڪي شهر رون منڪون نٿ تِسلْنِيڪي ڪيتا. تِسلْنِيڪي شهر مڪڏيه صوبا رو ٻڌون ٿي موتو شهر هتو. پولوس اُپرا پيزا چڪر مانھ سلوانس پيڙو تِسلْنِيڪي م گيو ان اوتھ ڪئينڪ يهودي منڪ ان گھڻا ڌاري قوم وازا وشواسي ٿيا. پڻ اوت ري يهوديني وشواسيون رٿ ڪلاق ٿسري ڪراوئي، ان پسٽ وشواسيئي پولوس ان سلوانس نٿ پڇايا ھارو اوتون نٿ رات را روونا ڪريا (مڪ شيلون را ڪوم 10:17-10).

ڪت لکيا رو مطلب

پولوس اي ڪت ايٿا ھارو لکيو، ڪم تو اوتا نٿ ڪبر هئي جي اوت رون نوون وشواسي ٿيل منڪون ھارو ڪئي ڏورو هتي. تيام پولوس اوتون را پريم ان وشواس ري ڪري پڳوون رو تورو مونته، اُپرو ان سلوانس رو ڏيڪارل نمونو ياد ڏيوراوتھ، ڏورو سھيا م اوتون رئي هيمنت وڌارھ، پوندائي ساڌيا رو شيڪارٿھ، اُپري روزي ڪمايا را پارام ھزماوتھ، ان اي وات پڻ شيڪارٿھ جي اوتون وشواسيون ٿي ڪي ٿيشي، جيا پريو ايسو رٿ ڏنيا م پاسو آيا مور مري زاشي.

اِيئَا كِتَاب رَا شَاسْتَر ٿِي پِيْزَا حَوَالَا:

1 تِسْلِيْڪِيُون 1:3 ڪوم 16:17-1:18	1 تِسْلِيْڪِيُون 1:1 ڪوم 22:15
1 تِسْلِيْڪِيُون 6:3 ڪوم 5:18	1 تِسْلِيْڪِيُون 1:1 ڪوم 3:16-40:15
1 تِسْلِيْڪِيُون 7:3 ڪوم 6:18	1 تِسْلِيْڪِيُون 6-4:1 ڪوم 9-1:17
1 تِسْلِيْڪِيُون 1:5 مَتِي 36:24	1 تِسْلِيْڪِيُون 2:2 ڪوم 40-16:16
1 تِسْلِيْڪِيُون 2:5 مَتِي 44-42:24	1 تِسْلِيْڪِيُون 16-14:2 .. ڪوم 9-5:17
	1 تِسْلِيْڪِيُون 17:2 ڪوم 10:17

ٿِسلُنِيڪِيُون

را نوم مانھ پولوس رو لڪل

پيرھيُون ڪت



1 ① هُون لڪيا واڙو پولوس سون. اي ڪت مارا پاها ٿي، سلوانس را پاها ٿي
ان ٿيمٿيس را پاها ٿي لڪل سٺ.

ٿِسلُنِيڪِي شھر ري وِشواسِي منڌڙي رون پريمي پايون ان پينون، تمِي جيا
پڳوونَ ٻاپ ان پريو ايسو ڪريست ٿي واسطو راکوه،
اُو تمون مانھ ڪُريا ڪرئ ان تمون نٺھ هڪي راکئھ!

پولوس ٿِسلُنِيڪِي شھر رون وِشواسِيُون هارُو
پڳوونَ رو ٿورو مونئھ

② امي هميش تمون ٻڌون هارُو پڳوونَ رو ٿورو مونونھ، ان پراٿنا ڪريا رٺھ
ٿوئٺه تمون هارُو پراٿنا ڪرونھ. ③ آڀٽا ٻاپ پڳوونَ ٿي پراٿنا ڪرتون امون
نٺھ تماري اي واتون هر ٿوئٺه ياد رٺھ، جي تمِي وِشواس راکيا ري ڪري ڪيوا

ٺاٽوڪا ڪوم ڪريا، تمي پريم راڪيا ري ڪري ڪٿي مينت ڪري، ان آڀا پريو ايسو ڪريست مانھ پروسو راڪيا ري ڪري ڪتا صير ٿي ڏوروڻ سهي.

④ پايون ان پينون، پڳوڻَ تمون ٿي پريم ڪرڻ، ان امون نڻ ڪبر سڻ جي اُوڻه تمون نڻ آڀرا منڪ نايا هارو سوندياھ، ⑤ ڪم تو زئون امي تمون نڻ ايسو را پارام ڪشي رڻي ڪبر همپزاوئي تي، تيون تمي اماري واتون روڳي نالي واتون نه هزمي، پڻ تمي پويتر آتما ري ڪرا ٿي هائي واتون پڪي ڪاتري ٿي موني. تمون نڻ ڪبر سڻ جي امي تمون هارو ڪرين تمون وسا ڪيوڻه نمونڻه وُڍا. ⑥ ان تمي پڻ امارا ڏيڪارل پريو ايسو را نمونا مانھ وُڍا. ايشور رو وچن مونيا ري ڪري تمون مانھ الاهي گهڻي مَصِيَّت آوئي، توئي پڻ تمي پويتر آتما ري ڏيڍل ڪشي ٿي وچن مانھ وِتا رِيا.

⑦ هيونڻه نمونڻه تمي آڀرا مڪڏنيه صوپا رون ان يونان صوپا رون پڻ ٻڌون وشواسيون هارو هيڪ نمونو ڏيڪاريو. ⑧ ڪم تو تماري ڪري نه روڳو مڪڏنيه ان يونان صوپون ۾ ايشور رو وچن پڪڙيو، پڻ تمارا پارام هائي وات ٻڌيل پڪڙي گڻيھ جي تمي پڳوڻَ مانھ ڪتو وشواس راڪوه. تيام امارڻه منڪون نڻ همپزايا رڻي ضرورت ٿي نٿي، ⑨ ڪم تو او آپ امارا پارام واتون ڪرڻ جي زئون امي تمون ڪن آيا، تيون تمي امون ٿي ڪيوڻه نمونڻه وُڍا، ان تمي ڪيوڻه نمونڻه ڏيون رڻي پوزا ساڏين پڳوڻَ مانھ وشواس اوڻيو، زم تمي جيوتا ان هاسا



پڳوونَ رُئي شيوا ڪرو، ⑩ ان اُونڻا را ڏيڪرا ايسُو رُئ آڪاش ٿي پاسو آيا رُئي واٽ زوتا ريو، جيا ننه پڳوونَ مرلون موئين ٿي جيوي اوناڙيو، ان جيو آپون ننه پڳوونَ ري آيا واڙي سزا ٿي پڇايا واڙو سته.

پولوس رو تِسلْنِيڪي شهر ۾ ڪوم ڪريا رو ڏيڪاڙل نمونو

2 ① پايون ان پينون، تمون ننه تو ڪبر سته جي زئون امي تمون ڪن آيا تا، تئيون امارا آيا رو مطلب پورو ٿيو. ② تمون ننه اي پڻ ڪبر سته جي تمون ڪن آيا ٿي مور فلپي شهر ۾ امون ننه ڪتئي مُصِيپت ٿئي تئي ان امارئي ڪتئي پيعزتئي ٿئي تئي، تويي پڻ زئون امي تمون ڪن آيا ان گهڻا منڪ امارنه ڪلاڦ ٿيا، تئيون امي هيمنت نه هاريا، پڻ امارنه پڳوونَ مانه وشواس راڪيا ري ڪري پوري هيمنت ٿي امي پڳوونَ رُئي ڪُشي رُئي ڪبر تمون ننه همپراوئي. ③ ڪم تو زئون امي منڪون ننه هزماوونھ، امي ڪوڙي واتون نئي ڪرتا، نڪو امارو ڪوئي پوندو مقصد سته، ان نڪو امي ٺڳي ڪرونه، ④ پڻ پڳوونَ امون ننه ايمونڌار هزمين ڪُشي رُئي ڪبر همپرايا رو ڪوم امارنه حواله ڪريوه، ان تيام امي ايمونڌاري ٿي همپراوونھ. امي منڪون ننه ڪُش ڪريا هارو نئين، پڻ پڳوونَ ننه ڪُش ڪريا هارو هم ڪرونه، جيو امون ننه آزماونھ جي امارا من ۾ ڪي سته. ⑤ تمون ننه تو ڪبر سته جي زئون امي تمون ڪن هتا، تئيون امي آپرنه پاهنه ڪريا هارو ڪيا را نالا وڪون نه ڪريا، نڪو امي نائوڪو مقصد ڏيڪاڙين من ۾ لالچ راڪئي، هايا وات رو پڳوونَ شائيد سته، ⑥ ان نڪو امي منڪون ۾ آپرو مون وڌاوا ڪريو. امي نڪو تمون ڪن هم ڪريو، نڪو پزون ڪن.

⑦ ايسُو ڪريست را مُڪ شيلا هويا ري ڪري امي آپرو حُڪم ويوراوي هيڪتا تا ان آپري شيوا ڪراوي هيڪتا تا. تويي پڻ امي تمون موئين ايوي نرمي ٿي وُڍا، زم مان آپرون ٻاڙون ننه همپاڙهه. ⑧ امي تمون ٿي اتو پريم راڪتا

جي امي ڪُشي ٿي نه رُوڳڻي پڳوونَ رُئي ڪُشي رُئي ڪهر تمون ننه همپزاوئي، پڻ تمون هارو آپرو جيو ڏيڏا هارو پڻ تيار هتا، ڪم تو امارو تمون ٿي گهڻو پريم هتو. ⑨ پايون ان پينون، تمون ننه اي وات ياد هوشي جي امي ڪشي مينت مزورئي ڪري. امي ڏي رات آپرو ڌنڌو ڪرين پڳوونَ رُئي ڪُشي رُئي ڪهر تمون ننه همپزاوئي، زم تمون موئين ٿي ڪيا مانه پڻ امارا ڪرچ رو پار نه پڙه.

⑩ تمي آپ هاڪ ڏي هيڪوه، ان پڳوونَ پڻ شائيڌ سئه، جي امي ڪيوئه پوٽر نمونئہ انصاف ٿي ان ڏوه ڪريا وگر تمون وشواس راکيا وازون ٿي وُڍا. ⑪ تمون ننه اي پڻ ڪهر سئه جي زم ٻاپ آپرون ٻاڙون ٿي وئہ، تم امي تمون موئين ٿي هر هيڪ ٿي وُڍا. امي تمارئي هيئت وڌاوتا، تمون ننه حوصلو ڏيتا، ان تمون ننه هزماوتا ⑫ جي تمي ايوئه نمونئہ وو زم پڳوونَ رون منڪون رئه ويو ڪپئہ، ڪم تو پڳوونَ تمارو آپ ٿي واسطو رکاوئہ زم تمي اوئا را راز موئين آوو ان تمارو مون تئہ ڪم تو تمي مونواڙا پڳوونَ را منڪ سو.

⑬ امي ايئا وات هارو پڻ پڳوونَ رو ٿورو هميش مونتا ريونہ، جي زئيون تمي امون ٿي پڳوونَ رو وچن هومپزين اوئا ننه مونيو، تيون تمي اوئا ننه منڪون را طرف ٿي نئين، پڻ پڳوونَ را طرف ٿي هزمين ڪُشي ٿي مونيو. ان او وچن هاس ۾ پڳوونَ رو وچن سئه، ان پڳوونَ رئه آپري ڪڙا ويورايا ري ڪري اوئا وچن رو اثر تمون موئين تئہ جيا وشواس راکوه. ⑭ ايئا وات ري ڪري، تمي پڻ، پايون ان پينون، پڳوونَ رون اوئون وشواسي منڌزيون را نمونا مانه وُڍا، جيا يهوديه ملڪ ۾ سئه ان ايسو ڪريست ٿي واسطو راکئہ. ڪم تو تمي همريم تماري آپري قوم ٿي تڪليپون سهي، زم اوئي اوئون ري آپري يهودي قوم ٿي تڪليپون سهي. ⑮ يهودي قوم ري منڪي پريو ايسو ننه مرايوت پرو ان پڳوونَ رو نياپو ڏيڏا وازون ننه ماريات پرا، ان هوئه امون ننه پڻ تنگ ڪرياه ان پڳڙاياه. او پڳوونَ ري مرضي رئه ڪلاڦ وئہ، ان ٻڌون منڪون رئه

ڪَلِافَ سَئِه، ①⑥ ڪم تو زئيون امي ڌاري قُومَ وازون نئِه وچن هَمپِڙاونِه زم اُو پِگَڙونَ رِي سزا ٿِي پِچَئِه ان پِگَڙونَ رِي وات مانِه وئِه، تئيون يهُودِي قُومَ وَاڙا امون نئِه روڪوا ڪرئِه. هيوئِه نُمُونَنه هَميش گَهڙِي گَهڙِي ڏوه ڪرين نيٺ اُوئي هاڻي ٻڌون ٿِي موٽو ڏوه ڪريوه. پڻ هُوئِه آڪر ۾ پِگَڙونَ اُوئون نئِه ضرور سزا ڏيشي.

پولوس نئِه تِسلْنِيڪي شهر رون وشواسيون ٿِي مڙيا رئي سيڪ تئِه

①⑦ ڀايون ان بينون، زئيون امارئِه تمون نئِه ٿوڙِيڪ وار مَجپُوري ٿِي ساڌين زاوو تو، ان امي تمون ڪن نٿا پڻ امارو جيو تمون ڪن هتو، تئيون امون نئِه تمارئي گَهڻئي سيڪ هتئي ان تمون ٿِي وڙي مڙيا رو الاهي گَهڻو شونق هتو. ①⑧ تيام امي تمون ڪن آوا ڪرتا تا. مئين پولوس آپ گَهڙِي گَهڙِي تمون ڪن آيا رئي ڪوشش ڪرئي. پڻ شيطون امون نئِه روڪيا. ①⑨ ڪم تو تمي اُو سو، جيا را پارام امي اُميدَ راڪونِه، جيا مانِه امي کُش ٿيونِه، ان جيا ري ڪري امارو مون تئِه. زئيون آڀڻا پڙيو ايسو رئِه پاسا آيا رئِه ٿوئِه اُوئا هوما اُوپشون، تئيون امي تمارا پارام کُشي ٿِي ڪيشون جي تمي امارا ڪرل وشواسي سو، ②⑩ ڪم تو تماري ڪري امارو مون سئِه ان امون نئِه کُشي تئِه.

3 ① تمون ٿِي ڌار ٿين امون نئِه تمارئي اتئي گَهڻئي ٿئي جي امي وڌارئِه سهي نه هيڪيا. تيام امي ڦينصلو ڪريو جي پلئِه تيمٽيس امون نئِه ائيني شهر ۾ هيڪلا ساڌئِه پرا. ② ان پسئِه امي آڀڻا پائي تيمٽيس نئِه تمون ڪن ميليو، جيو ايسو ڪريست را پارام کُشي رئي ڪهر هَمپِڙايا ۾ امون پيڙو پِگَڙونَ رو ڪوم ڪرئِه، زم اُو تمون نئِه هيست رڪاوئِه ان وشواس راڪيا ۾ تمون نئِه حونصلو ڏئِه، ③ زم تڪليبون ري ڪري تمون موئين ٿِي ڪوئي وشواس نه ساڌئِه. تمون نئِه تو اڳي ڪهر سئِه جي آڀڻئِه پِگَڙونَ رِي وات مانِه وُڍا ري ڪري منڪ آپون نئِه ضرور تنگ ڪرشي. ④ ڪم تو زئيون امي تمون ڪن هتا،

تئون امي مور ٿي تمون نئه ڪيڏو تو جي منڪ آڀون نئه تنڳ ڪرشي. ان همروم ٿيو، جيا رئي تمون نئه ٻڌئي ڪبر سئ. ⑤ تيام زئون مون نئه پڻ تمارئي اتئي گهٽئي ٿي جي هون وڌارئ سهي نه هيڪيو، تئون تمارا وشواس رئي ڪبر پاڙيا هارو مئين تيمٽيس نئه ميليو، جي متون آزمايا وارئ شيطون تمون نئه آزماوين ڪم ئي ڪرين وشواس سڏايو هوئ، ان اماري مينت رو ڪئين قائيدو نه ٿيو هوئ.

تِسلُنِيڪي شهر رون وشواسيون رئي ڪبر هومپزين پولوس ڪش تئھ

⑥ هوئ همئئ زئون تيمٽيس تمون ڪن ٿين امون ڪن آيوھ، تو ايئ امون نئه اي ڪشي رئي ڪبر همپزاوئھ جي تمارو وشواس پڪو سئ، تمي پريم راکوھ، ان تمي امون نئه هميش ياد ڪروھ جي آبي ڪيوئ نائوڪئ نمونئ پيزا ريا، ان زم امون نئه تمون ٿي مڙيا رئي سڪ سئ، تم تمون نئه پڻ امارئي سڪ سئ. ⑦ تيام، پايون ان پينون، تمارئ وشواس راکيا ري ڪري، امارون ٻڌون ڏڪون ان تڪليبون ۾ امون نئه حوصلو زڙيوھ. ⑧ ان هوئ امون نئه پورئي هيئت سئ ڪم تو تمارو وشواس پريو ايسو مانھ پڪو سئ. ⑨ تماري ڪري امون نئه اتئي ڪشي ٿيھ جي امي ڪشي ٿي تمون هارو آڀا پگھون رو ٿورو مونونھ، توئي پڻ امي زتو پڻ ٿورو مونونھ او پگھون ري ايئا ميريوني را مقابلا ۾ ڪئين نٿي. ⑩ امي ڏي رات پورا من ٿي پگھون ٿي منٿ ڪرونھ جي امي وڙي پاسا تمون ڪن آون، ان جيون واتون ۾ تمارو وشواس پڪو نه هوئ، اوئون ۾ تمارو وشواس پڪو ڪراون.

⑪ هوئ آڀو ٻاپ پگھون ان آڀو پريو ايسو امون نئه تمون ڪن آيا رو موقعو ڏئ. ⑫ پريو تمون نئه هڪا پيزا ٿي ان ٻڌون منڪون ٿي پڻ الاهي گهٽو پريم رکاوئ، جيئ نمونئ امي پڻ تمون ٿي الاهي گهٽو پريم راکونھ. ⑬ ان

هيوئہ نمونئہ اُو تمون نئہ ايوئي هيئت ڏئہ جي زئيون آڻڻو ڀرڻو ايسو پاسو
اوشي ان آڀرون ٻڌون پويتر آڪاشي ڏوتون پيڙو ساوو ٿيشي، تئيون تمي آڻڻا
ٻاپ ڀڳوون هوما پيڏوهي ان پويتر هوئو.

ڀڳوون ري مرضي مانھ ڪيوئ نمونئ ويو

4 ① آکر ڀر، ڀايون ان ٻينون، امي تمون نئہ ڀرڻو ايسو را نوم ٿي اي وينتئي
ڪرين منٿ ڪرونه، زم امي تمون نئہ شيڪاڙيو جي ڀڳوون نئہ ڪُش ڪريا
هارو ڪيوئ نمونئہ ويو ڪپئہ، ان زم تمي همئئہ ووہ ريا، هم تمي ٺاڻوڪون م
ٺاڻوڪئ نمونئہ هميش ويتا ريو. ② ڪم تو تمون نئہ ڪبر سئہ جي امي تمون
نئہ ڀرڻو ايسو را طرف ٿي ڪيويون واتون مانھ وُڍا رو ڪيڏو.

③ ڀڳوون رئي مرضي اي سئہ جي تمي پويتر ٿيو ان پُونڌو ڪوم ڪريا ٿي
پاهو ڪرو. ④ تمون موئين هر هيڪ رئہ آڀرا ڏيل نئہ قابوم راکيا رو شيڪوو
ڪپئہ، ان پويتر نمونئہ آڀري عزت رو ڪيال راکين ويو ڪپئہ. ⑤ تمي پُونڌي نظر
مت راکيا، زم پيڙا ڌاري قوم واڙا، جيا ڀڳوون نئہ نٿي مونتا، پُونڌي نظر راکين
وئہ. ⑥ ڪياڪ ري ڏوشي ڪا سوڪري ري وات ڀر، تمي پُونڌو ڪوم ڪريا هُون
آڀرا پائي رو ڏوھ ان اُٺا ٿي ٺڳي مت ڪريا. ايشور آپ هايون ٻڌيون واتون را
پڌلام سزا ڏيشي، زم اڳي پڻ امي تمون نئہ هزمايو تو. ⑦ ڪم تو ڀڳوون آڻڻو
آپ ٿي ايٺا هارو واسطو نٿي رکايو جي آڀي پُونڌا ڪوم ڪرون، پڻ ايٺا هارو
واسطو رکايوھ جي آڀي پويتر ريون. ⑧ تيام جيو هيا وات نئہ نٿي مونتو، اُو
منڪ ري وات نئہ نئين، پڻ ڀڳوون ري وات نئہ نٿي مونتو، جيو تمون نئہ آڀرو
پويتر آتما ڏئہ.

⑨ هَوئہ، آڀرون وشواسي ڀايون ان ٻينون ٿي پريم راکيا را پارام مارئہ
تمون نئہ لکيا رئي ڪئين ضرورت نٿي، ڪم تو ڀڳوون آپ تمون نئہ هڪا پيڙا
ٿي پريم راکيا را پارام شيڪاڙياھ. ⑩ تمي تو اڳي پورا مڪڏنيہ صوپا رون

ٻڌون وِشواسِي پايون ٿي پريم راکوھ. پڻ امي تمون نٿو منڻ ڪرونھ، پايون ان پينون، جي تمي هميش گھڻام گھڻو پريم راکتا ريو. ⑪ زم اڳي امي تمون

نٿو ڪيڏو، هم پُورئي ڪوشش ڪرو جي تمي آيت موئين شونتي ٿي ريو، پيزون ري واتون جيا تيا نٿو مت همپزاو پڻ آڀرو آڀرو ڪوم ڪرو، ان آڀرون هاڻون ٿي ڏنڌو ڪرين آڀري روزي ڪمائو. ⑫ هم ڪريا ٿي جيا وِشواسِي نٿي اوئون ۾ تمارو مون ٿيشي، ان تمي ڪيا را موڻاڳ نئين ٿيو.



پولوس پريو ايسو را پاسا آيا را يارام شيڪارڙه

⑬ پايون ان پينون، امارئي مرضي سٺه جي تمون نٿو پُورئي ڪبر هوڻه جي اوئون وِشواسيون ٿي ڪي ٿيشي جيا مري گياھ. ام نه ٿه جي تمي اوئون هارو اُميد وڳر روڻو، زم پيزا منڪ مرلون هارو روڻو، جيون رئي مرلون هارو ڪئين اُميد نٿي. ⑭ آڀو يقين سٺه جي ايسو مري گيو تو ان وڙي جيوي اوڻيوھ. ان تيام آڀو اي پڻ يقين سٺه جي جيا منڪ ايسو مانھ وِشواس راکين مري گياھ ان همٿه زوڻه اُونگھال سٺه، ايسو رٿه ڏنيا ۾ پاسا آيا رٿه ٿوڻه پڳوون اوئون ٻڌون نٿو جيوي اوناڙشي ان ايسو پيزا آپ ڪن آڪاش ۾ تيراوشي. ⑮ اي وات امي پريو ايسو را ڪيڏا ڀرموڻه تمون نٿو ڪونھ ريا، جي آڀي وِشواسي جيا اوڻا وڪٽ ۾ جيوتا هوشون، مطلب جيا پريو ايسو رٿه پاسا آيا هُوڏي جيوتا ريشون، آڀي مرل وِشواسيون مور ايسو ڪن نئين زائون. ⑯ ڪم تو اوڻه ٿوڻه پريو ايسو آپ آڪاش ٿي اوترشي. او حڪم ڏيشي، موڻا آڪاشي ڏوت رو هاڏ هومپڙيام اوشي، پڳوون را پاها ٿي رڻ شينگڙو واڳشي، ان تيون جيا منڪ ايسو ڪريست

مانھ وِشواس راڪين مري گياھ، اُو مور ٿي جيوي اُوڻشي، (17) ان تيا ڪيڙ آبي وِشواسي جيا دُنيا ۾ جيوتا هوشون، اُوئون پيڙا واڌڙون موئين اُوپڙي زاشون، ان آپ ۾ پڙو ايسو ٿي مڙشون. ان هيون نمونن آبي هميش پڙو پيڙا ريشون. (18) تيام هايون واتون ٿي هڪا پيڙا ننه حوصلو ڏيئا ريا.

پڙو ايسو رءُ پاسو آيا هارو تيار ريوو

5 (1) هون، پايون ان پينون، امارن تمون ننه اي وات لکيا رئي ضرورت نٿي جي پڙو ايسو ڪيڙي ان ڪيون اوشي. (2) ڪم تو تمون ننه اگي پوري ڪهر سٺه جي پڙو ايسو را آيا رو ڏي ام اوچتو اوشي، زم رات رو سور اوئ. (3) اوئ توئ منڪ تو ڪيتا هوشي جي ”هون آبي هڪ ۾ سون ان آپون ننه ڪئين ڪترو نٿي“ ان تيون زم پاري پڳ ڏوشي ننه اوچتو زلميا رو ڏوڪ ٿئ، تم اوئون مانھ اوچتي سزا اوشي، ان او ماگي نئين پڇن.

(4) پڻ تم، پايون ان پينون، اندارام نٿي جي هائي ڏي تمون مانھ سور را زم اوچتو اوئ، ان تم تيار نه هون. (5) ڪم تو تمون ننه پڳون رو سوجهرو زڙيوھ، ان تم تمي ٻڌائي سوجهرا را منڪ سو، ان ڏي را منڪ سو، جيا سوجهرام وئ. آبي رات را منڪ نٿي جيا اندارام وئ. (6) تيام آبي پزون منڪون را زم اُونگهال نه ريون، پڻ زاگل منڪون را زم هوشيار ريون، ان عقل ٿي ڪوم ڪرون. (7) ڪم تو رات رون منڪون رو ڪوم اي سٺ، جي او اُونگهال رئ، ان ڌارو پين مست ٿئ. (8) پڻ آبي جيا ڏي را منڪ سون، آبي عقل ٿي ڪوم ڪرون. زم ڦوڄي آپ ننه همپاڙيا هارو هيئا مانھ ڍال جيوي لو رئي شينھ پيرئ، تم آبي آپ ننه همپاڙيا هارو وِشواس ان پريم راڪتا ريون، ان زم ڦوڄي آپ ننه موت ٿي پڇايا هارو لو رو توپلو پيرئ، تم آبي آپ ننه هميش را موت ٿي پڇايا هارو پڳون مانھ اي پروسو راڪون جي او آپون ننه تارڻ ڏيشي. (9) ڪم تو پڳون آپون ننه ايئا هارو نٿي سونديا جي آپون ننه سزا زڙئ، پڻ ايئا هارو سوندياھ

جي آڻا پڙيو ايسو ڪريست ري ڪري آيون نئه تارڻ زڙئه. ⑩ ايسو آيون هارو آڀرو جيو ڏيتو، زم آڀي ٻڌائي پيڙا ٿين هميش هُودِي اُونا پيڙا جيوتا ريون، پلئه آڀي اُونا را پاسا آيا را ٿوئا هُودِي جيوتا ريون ڪا تيا مور مري زائون. ⑪ تيام، زم تمي اڳي ڪروھ ريا، تم تمي هڪا پيڙا نئه حوصلو ڏيتا ريو ان هڪا پيڙا رو وشواس پڪو رکاوٽا ريو.

اڪري واتون

⑫ پاڻون ان پينون، امي تمون نئه منٿ ڪرونه جي تمي اُئون منڪون رو مون راکو، جيا تمون ڪن پڙيو رئي شيوا ڪريا رئي مينت ڪرئه، وشواسي منڌري رئي اڳيونئي ڪرئه، ان تمون نئه هزماوئه ان شيڪاڙئه. ⑬ اُئون را ڪرل ڪوم ري ڪري تمي اُئون ٿي پريم راکو ان اُئون نئه الاهي گهڻو مون ڏيو. ان آڀت ۾ هپ راکين وو.

⑭ پاڻون ان پينون، امي تمون نئه منٿ ڪرونه، جيا منڪ سست سئه اُئون نئه هزماوو، جيا هيمنت نئي راکتا اُئون نئه هيمنت راکاوو، جيا وشواس راکيا ۾ ڪمزور سئه اُئون نئه پڪو وشواس راکيا هارو حوصلو ڏيو، ان ٻڌون هون گهڻا صير ٿي وو. ⑮ ايئا وات رو ڏيون راکيا، جي تمي ڪيا ٿي پڌلو مت ليو، پڻ هميش آڀت موئين هڪا پيڙا ٿي ان ٻڌون منڪون ٿي پڻ پلائي ڪريا رئي ڪوشش ڪرتا ريو.

⑯ هميش ڪُش ريو، ⑰ هر ٿوئنه پراڻا ڪرتا ريو، ⑱ هر وات ۾ پڳوون رو ٿورو مونتا ريو. ڪم تو پڳوون رئي مرضي سئه جي تمي ايسو ڪريست ٿي واسطو راکيا ري ڪري هم ڪرتا ريو.

⑲ هميش پَوِتر آتما ري مرضي پرموئنه وو، ان جيو پڻ ڪوم پَوِتر آتما ري مرضي پرموئنه ٿئه، اُونا نئه تمي مت روڪو. ⑳ زئون ڪوڪ ڪنه جي ”اي پڳوون رو ڏيڌل نياپو سئه“ تو تمي اُونا را ڏيڌل نياپا ريون واتون مانھ

ڏيون ڏيو. ②1 پڻ هر وات رو آڙمتو ليو جي اُو پڳوونَ را طرف ٿي سٺه ڪا نا. جڻي وات ٺاٺوڪئي سٺه، اُوڻا نٺه مونو. ②2 پڻ هر نمونا ري پونڌائي ٿي شيئي پاڳو.

②3 پڳوونَ آپ، جيو هڪ ڏيڏا وازو سٺه، تمون نٺه هر وات ۾ پويتر ڪرڻه، ان آڻا پريو ايسو رڻه پاسو آيا هُودِي تمون نٺه پورڻه نمونڻه، تمارا جيو نٺه من نٺه ان ڏيل نٺه، پيڏوهي راکڻه. ②4 پڳوونَ جيڻڻه تمارو آپ ٿي واسطو رکايوه، اُو آپرا وائيڏا پرموڻڻه هاسو سٺه ان اُو ضرور هم ڪرشي.

②5 پايون ان بينون، امون هارو پراڻا ڪرو. ②6 امارا طرف ٿي ٻڌون وشواسي پايون ان بينون نٺه پويتر نمونڻه پريم ٿي ملو. ②7 هُون تمون نٺه هُون ڏين ڪونه جي اي ڪت تم ٻڌون وشواسيون نٺه پڻين همڇايا.

②8 آپڻو پريو ايسو ڪريست تمون مانھ ڪُپا ڪرڻه!

ٽِسلْنِيڪيون را نوم مانھ لکل پيزا کت رئي ھزموئي

کت لکيا وازو

اي کت پولوس لکيو، ان لکيا رٿه ٿوئڻه اوتا را ساٿي سيلوانس ان ٽيمٽيس پڻ اوتا پيزا هئا (2 ٽِسلْنِيڪيون 1:1). سيلوانس رو پيزو نوم سيلاس هتو (مڪ شيلون را کوم 1:17-4). جيون واتون را پارام پولوس ٽِسلْنِيڪيون نه پيرهيان ڪت م لکيو، ان جيون واتون را پارام ايتا پيزا ڪت م لکيو، او گهڻو ڪرين هيڪ جيوي سٺ. تيام ام لاڳهه جي پولوس اي ڪت پيرهيان ڪت ٿي ڪئينڪ مئينون ڪي ڪرٽس شهر ٿي لکيو، زئون ٽيمٽيس پيرهيون ڪت ڏين سيلوانس پيزو پاسو پولوس ڪن آيو تو. هيا ڪيال پرموئڻه پولوس اي ڪت اندازام 51-52ع م لکيو.

کت ڪيون منڪون ھارو لکيو

پولوس اي ڪت ٽِسلْنِيڪي شهر رون وشواسي منڪون ھارو لکيو (2 ٽِسلْنِيڪيون 1:1). ٽِسلْنِيڪي شهر رون منڪون نه ٽِسلْنِيڪي ڪيتا. ٽِسلْنِيڪي شهر مڪدين صوبا رو ٻڌون ٿي موٽو شهر هتو. پولوس آبرا پيزا چڪر مانھ سيلوانس پيزو ٽِسلْنِيڪي م گيو ان اوئڻه ڪئينڪ يهودي منڪ ان گهڻا ڌاري قوم وازا وشواسي ٿيا. پڻ اوٽ ري يهودي وشواسيون رٿه ڪلاڦ ڦسري ڪراوئي، ان پسٽ وشواسيئي پولوس ان سيلوانس نه پچايا ھارو اوئون نه رات را روونا ڪريا (مڪ شيلون را کوم 1:17-10).

کت لکيا رو مطلب

پولوس اي ڪت ايتا ھارو لکيو، ڪم تو اوتا نه ڪبر پڙئي جي اوٽ ري وشواسيئي اوتا رو پيرهيون ڪت ٻڌو تو، توئي پڻ او پريو ايسو رٿه پاسو آيا را پارام، ان آبرئي روزئي ڪمايا را پارام ڳلت ڪيال راکتا. تيام پولوس اوئون نه وڙي اي پيزو ڪت لکين اوئون رٿه وشواس ان بربر راکيا ري ڪري ان ڏورون سهيا ري ڪري اوئون ھارو پڳوون رو ٿورو مونيو، اوئون نه شيڪاڙيا جي پريو ايسو رٿه پاسو آيا مور ڪي ڪي ٿيشي. ان اوئون نه ام پڻ وڙي ھزمايا جي او مينت ڪرين آبرون ھائون ٿي آبرئي روزئي ڪمائ.

ايتا ڪت م پولوس ٽِسلْنِيڪي شهر رون وشواسيون نه پڳوون ري مرضي رٿه ڪلاڦ وودا وازا منڪ را پارام ام لکيو جي ”تمون نه ڪبر سٺ جي او ڪئي وات سٺ جي هيا پڳوون ري مرضي رٿه ڪلاڦ وودا وازا منڪ نه روڪهه رئي، زم او آبرا ٿوئا مانھ ساوو ته“ (2 ٽِسلْنِيڪيون 6:2). ام لاڳهه جي پولوس اوئون نه هيا وات را پارام اڳي شيڪاڙيو تو، پڻ همٿ ڪيا نه

ڪهر نٿي جي اُوڻ ڪئي وات شيڪارڙي ٿئي. ٿي هيڪڻه جي اُوڻ اي وات شيڪارڙي ٿئي جي
 دُنيا ۾ هر حڪومت پڳوون را پاها ٿي سڻ ان ڪراپ منڪون نڻه سزا ڏنهن (رُوميون 13:1-5)، ان
 زئيون هُوڏي دُنيا ۾ ناڻوڪئي حڪومت سڻ. تئيون هُوڏي هيوو پڳوون ري مرضي رڻ ڪِلاف
 وُڍا واڙو منڪ آبرو ڪراپ ڪوم پُورو نٿي ڪري هيڪڻو، ڪم تو حڪومت آڏئي اُوڻه.

ايٺا ڪتاب را شاستر ٿي بيزا حوالا:

2 تِسْلُنِيڪيون 3:2 مٽي 24:10-12, 24	2 تِسْلُنِيڪيون 1:1 ڪوم 22:15
2 تِسْلُنِيڪيون 8-3:2 داني ايل 45-36:11	2 تِسْلُنِيڪيون 1:1 ڪوم 3:16-40:15
2 تِسْلُنِيڪيون 2-1:3 ڪوم 8-5:18	2 تِسْلُنِيڪيون 4:1 ڪوم 9-1:17
	2 تِسْلُنِيڪيون 3:2 داني ايل 25:7

تسلنيڪيون

را نوم مانھ پولوس رو لکل

پيزو ڪت

1 ① هُون لکيا واڙو پولوس سون. اي ڪت مارا پاها ٿي، سلوانس را پاها ٿي
ان تيمٽيس را پاها ٿي لکل سئ.


تسلنيڪي شهر ري وشواسي منڌڙي رون پريمي پايون ان بينون، تمى جيا
آپتا ٻاپ پڳوون ان پرڻو ايسو ڪريست ٿي واسطو راکوه،
② پڳوون ٻاپ ان پرڻو ايسو ڪريست تمون مانھ ڪرڻا ڪرڻه ان تمون نئ
هڪي راکنه!

پولوس تسلنيڪي شهر رون وشواسيون هارو پراٽنا ڪرڻه

③ پايون ان بينون، امارئ تمون هارو هميش پڳوون رو ٿورو مونوو ڪپئ. هم
ڪروو صحيح سئ ڪم تو ڏي ٿو ڏي تمى وشواس ۾ پڪا ٿيتا زائوه ريا، ان
تمى ٻڌائي آيت ۾ هڪا پيزا ٿي پريم راکيا ۾ وڌتا زائوه ريا. ④ تيام امي آپ
پڳوون ريون وشواسي منڌڙيون ۾ تمارا وڪوڻ ڪرونه، جيا امارا ڪرل وشواسي
سو، ڪم تو منڪ تمون نئ تنگ ڪرڻه ان تمون مانھ تڪليپون آوئ، توئي پڻ
تمى هايون ٻڌيون موصيتون نئ صير ٿي سهوه ان وشواس راکتا ريوه.

⑤ هايا ٿي وات ساوئي سئ جي پڳوون انصاف ٿي نيا ڪرشي، ان تمون
نئ آپرا راز ۾ آيا جيوا هزمشي، جيا راز هارو تمى ڏک سهوه ريا. ⑥ ڪم تو

پڳوونَ انصافَ ڪريا وازو سٺ. تيام جيا تمون نٺه تڪليبَ ڏٺه، پڳوونَ اوئون نٺه پڻ پڌلام تڪليبَ ڏيشي، ⑦ ان تمي جيا تڪليبَ سهوھ ريا، تمون نٺه امون پيڙو هڪ ڏيشي. هائي واتون اوئھ توئھ ٿيشي، زئون پريو ايسو آپرون ڪڙا وازون آڪاشي ڏوتون پيڙو آڪاش ٿي آوين ڏيوتا ريون زهراڙون ۾ ساوو ٿيشي.



⑧ ان جيا پڳوونَ ري وات مانھ نٿي وِتا ان جيا آڀا پريو ايسو رٿي ڪشي رٿي ڪبر نٿي مونتا، اوئون نٺه اوئا را پڌلام سزا ڏيشي. ⑨ هيون منڪون نٺه هميش رٿي سزا زڙشي، ان او هميش هوڏي پريو ٿي شيتي ريشي، ان اوئا را زبڪتا سوجھرا ان ڪڙا ٿي ڌار ريشي. ⑩ هائي وات اوئھ ڏي ٿيشي، زئون پريو ايسو آوشي زم آپرون ٻڌون سونڍل منڪون ري ڪري، جيئي اوئا مانھ وشواس اوٿيوھ، ايسو رو مون ٿم ان ٻڌائي اوئا ري ڪڙا مانھ حيرون ٿم. ان تمي پڻ اوئون سونڍل منڪون موئين هوشو، ڪم تو جي واتون امي تمون نٺه هاڪ پرين همپڙاي تي، اوئون مانھ تمي يقين ڪريوھ.

⑪ تيام امي هميش تمون هارو پراٿنا ڪرونھ، جي تمي ايوئھ نمونئھ وو، زم آڀو پڳوون، جيئھ تمارو آڀ ٿي واسطو رکايوھ، تمون نٺه آڀ ڪن آيا جيوا هزمئھ. ان امارئي اي پڻ پراٿنا سٺھ جي جيا ٺاٺوڪا ڪوم تمي ڪروا ڪروھ، ان جيا ڪوم تمي وشواس راڪين ڪروھ ريا، اوئون ٻڌون نٺه پڳوون آڀري ڪڙا ٿي

پُورا ڪرڻ، ⑫ زم آڻڻا ڀڳوون ري ان ڀرڻو ايسو ڪريست ري ڪرڻا ٿي تماري ڪري آڻڻا ڀرڻو ايسو رو مون ٿم، ان اوڻا ري ڪري تمارو پڻ مون ٿم.

ڀڳوون ري مرضي رڻ ڪِلاڦ وُڍا واڙو منڪ

① هُوڻه ڀايون ان ٻينون، ڀرڻو ايسو رڻه پاسو آيا ان آڻڻه اوڻا ڪن ڀيڙا ٿيا 2 را ڀارام هيڪ وات سڻه. امي تمون نڻه منٿ ڪرونه ② جي تمڀي ايڻا وات مانھ ڏيون ڏين اتو جلدي شڪ مت ڪرو ان گهڻيون ۾ مت پڙو، جي ڀرڻو ايسو رڻه آيا رو ٿوڻو همڻه آيوھ رو. هائي وات ڪوڙڻي سڻه. منڪ ڀلڻه ڪڻه جي امي ڀڳوون را طرف ٿي هايا وات رڻي ڪهر پاڙيھ، ڪا امي آپ هم ڪيڏوھ، ڪا امي ڪت ۾ هم لکيوھ، پڻ امون ٿي هيوڻي ڪڻين وات نٿي ٿئي. ③ تمڀي ڪيوڻه پڻ نمونڻه ڪيا ٿي منڪ رڻي ڪوڙڻي وات مونين ڀولائي مت زايا، ڪم تو ڀرڻو ايسو رڻه آيا ٿي مور گهڻا منڪ ضرور ڀڳوون رڻه ڪِلاڦ ٿيشي، ان ڀڳوون ري مرضي رڻه ڪِلاڦ وُڍا واڙو منڪ ساوو ٿيشي، جيو هميش رڻي سزا ڪاڏا واڙو سڻه. ④ ان جيا رڻي پڻ منڪ پوزا ڪرڻه ڪا جيا نڻه پڻ منڪ ڀڳوون هڙمڻه، ڀڳوون ري مرضي رڻه ڪِلاڦ وُڍا واڙو منڪ اوڻون ٻڌون رڻه ڪِلاڦ ٿيشي، ان آپ نڻه اوڻون ٻڌون مانھ هڙمڻي. او ڀڳوون را گهر موڻين زائين منڊر ۾ ڀڳوون ري جڳا ۾ بيهشي، ان آپ نڻه ڀڳوون را زم ڏيڪاڙشي.

⑤ تمون نڻه ياڏ نٿي ڪي؟ زڻيون هُون تمون ڪن هتو، تڻيون هُون هائي واتون تمون نڻه همڀڙاوتو. ⑥ ان همڻه پڻ تمون نڻه ڪهر سڻه جي او ڪڻي وات سڻه جي هايا ڀڳوون ري مرضي رڻه ڪِلاڦ وُڍا واڙا منڪ نڻه روڪڻه رڻي، زم او آپرا ٿوڻا مانھ ساوو ٿم. ⑦ ڪم تو او طاقت جي منڪون نڻه ڀڳوون ري مرضي رڻه ڪِلاڦ ويوراوڻه، او هزون ماڻ ۾ ڏنيا ۾ آپرو اثر ڪرڻه رڻي. پڻ جيو هايا منڪ نڻه روڪڻه ريو، او تڻيون هُوڏي هايا نڻه روڪين راکشي، زڻيون هُوڏي ڀڳوون روڪيا واڙا نڻه هيڪڻه ڀاهڻه نه ڪرڻه. ⑧ ان تڻيون ڀڳوون ري مرضي

رئہ ڪِلاڻ وُڍا وازو منڪ ساوو ٿيڻي، جيا نئہ پڙيو ايسو آپ آپرئہ پاسو آيا
 رئہ ٿوئئہ آوين ڦُونڪ ڏين مارشي پرو، ان آپرا آيا را زبڪتا سوجھرا ٿي اُوئا
 نئہ ھاو ڪتم ڪرشي پرو. ⑨ اُو منڪ پڳوون را ڏشمن شيطون را ڪوم را طريقا
 پرموئئہ آوشي. شيطون اُوئا نئہ گھڻي ڪڙا ڏيڻي ان اُو ڪوڙا نيشون ان پرسا
 ڏيڪارشي. ⑩ ان اُو هر نمونا ري پُونڌائي ٿي اُوئون منڪون نئہ پُولوشي، جيا
 هميش را موت رئي سزا ڪاڏا واڙا سئہ. اُوئون نئہ سزا ايئا ھارو زڙشي، ڪم
 تو اُوئي ھاسيون واتون ٿي پاھو ڏيڏو جيون ري ڪري اُوئون نئہ تارڻ زڙت.
 ⑪ تيام پڳوون اُوئون نئہ پُول ريوا ڏئہ زم اُو ڪوڙيون واتون مانھ يقين ڪرئہ.
 ⑫ ھيوئہ نمونئہ جيا ھاس نئہ نئي مونتا ان ڪراپ ڪومون ۾ شونق راڪئہ، اُوئون
 ٻڌون نئہ هميش رئي سزا ڏيڏا رو ڦينصلو ٿيڻي.

ھيمت راڪو ڪم تو پڳوون آپرون سُونڍل منڪون نئہ تارڻ ڏيڻي

⑬ پڻ امارئہ، پايون ان ٻينون، تمون ھارو جيا پڙيو را پريمي منڪ سو، هميش
 پڳوون رو ٿورو مونوو ڪپئہ. ڪم تو پڳوون جڳت نايا ٿي مور تمون نئہ ايئا
 ھارو سُونڍيا، زم پويتر آتما ٿي پويتر ٿيا ري ڪري ان ھاسا وچن مانھ وشواس
 اوٿيا ري ڪري تمون نئہ تارڻ زڙئہ. ⑭ ان امارئہ ڪشي رئي ڪبر ھمپڙيا ٿي
 پڳوون ھايا تارڻ ھارو تمارو آپ ٿي واسطو رکايوھ، زم آپتا پڙيو ايسو ڪريست
 را مون ري ڪري تمون نئہ پڻ مون زڙئہ. ⑮ تيام، پايون ان ٻينون، ھيمت راڪين
 وشواس راڪتا ريو، ان جي اصلي ھاسي واتون امي رُوپرو ڪين ڪا ڪت ۾ لڪين
 تمون نئہ شيڪارئيھ، اُوئون مانھ ٽمي وِيتا ريو.

⑯ ھوئہ آپتو پڙيو ايسو ڪريست ان آپتو ٻاپ پڳوون، جيئئہ آپون ٿي پريم
 راڪيو، ان آپري ڪُريا ري ڪري آپون نئہ هميش ھارو حوصلو ڏيڏو، ان آپون
 نئہ ھڪ ليڏا رو پڪو پروسو ڏيڏو، ⑰ اُو تمارا من ۾ حوصلو ڏئہ ان هر نائوڪو
 ڪوم ان نائوڪي وات ڪريا رئي ھيمت ڏئہ!

ايشور رو وچن پگڙيا هارو پراڻا ڪرو

3 ① آڪر ۾، پايون ان بينون، امون هارو پراڻا ڪرتا ريو، جي ايشور رو وچن پڪڙئ ان منڪ اوڻا رو مون صحيح نمونئ راکئ، زم تمي پڻ اوڻا رو مون راکوه. ② ان ايڻا هارو پڻ پراڻا ڪرو، جي پڳوون امون نئ پونڌون ان ڪراپ منڪون ٿي پڇاوه، ڪم تو ٻڌائي منڪ وشواس نٿي راکئا.

③ پڻ پريو آڀرا وائيڏا رو هاسو سئ، او تمون نئ هيئت ڏيشي ان آڀرا ڏشمڻ پونڌا شيطون ٿي پڇاوشي. ④ امارو پريو ري ڪري تمون مانھ پڪو يقين سئ جي جيا حڪم امي تمون نئ ڏيونھ، تمي اوئون مانھ ووه ريا، ان ويتا ريشو. ⑤ پريو تمارا من ايوا ڪرئ جي تمي پڳوون را زم پريم راکو، ان ايسو ڪريست را زم ڏوروڻ صير ٿي سھو.

سُسٽئي نه ڪروو پڻ آپري روزئي آپ ڪماو

⑥ هوئ، پايون ان بينون، امي پريو ايسو ڪريست را نوم ٿي تمون نئ حڪم ڏيونھ، جي تمي ايون وشواسي پايون پيڙا مت وو جيا سُسٽي ري ڪري ڪوم نٿي ڪرتا، ان اوئون اصلي واتون مانھ نٿي ويتا جي تمي امون ٿي شيڪيھ.

⑦ تمون آپ نئ ڪهر سئ جي تمارئ امارا نمونا پرموئئ ڪم ڪرين ويو ڪپئ، ڪم تو امي تمون ۾ سُسٽي ٿي نه وُڍا. ⑧ امي ڪيا پڻ منڪ ڪن امهي روئئي نه کاڌئي، پڻ ڏي رات مينت مزورئي ڪرين آپري روزئي ڪموڻا زم تمون موئين ڪيا مانھ اماري روئي رو پار نه ٿئ. ⑨ امارو تو حق هتو جي امي تمون ٿي کاڌو ليون، پڻ امي آپرو حق نه ليڌو زم تمون نئ مينت ڪريا رو نمونو ڏيکارون جيا مانھ تمي پڻ وي هيكو. ⑩ زئيون امي تمون ڪن هتا، تئيون پڻ امي تمون نئ اي حڪم ڏيڌو تو: ”جي ڪوڪ منڪ ڪوم نٿي ڪروا ڪرتو، تو او روئئي پڻ نه ڪائھ.“



⑪ هُوَ اَمي تو هومپڙونه ريا جي تمون موئين ڪئينڪ منڪ سُستي ٿي وئو ريا. اُو ڪئين ڪوم نٿي ڪرتا پڻ جيون واتون ۾ اوئون رو ڪئين ڪوم نٿي، اوئون واتون ۾ شونق راکڻه. ⑫ ايوون منڪون نٿه اَمي حُڪم ڏيونه، ان پڙپو ايسو ڪريست ٿي واسطو راکيا ري ڪري منٿ ڪرونه، جي اُو شونتئي راکين آڀرو ڪوم ڪرڻه ان آڀرئي روزئي ڪمائو. ⑬ پڻ ٿمي، پايون ان پينون، هيٺ نه هارين ٿاڻوڪا ڪوم ڪرتا ريو.

⑭ جي ڪوئي منڪ اماري ايٿا ڪت ۾ لڪل واتون نٿي مونتو، تو اوٿا منڪ نٿه ڏيون ۾ راکو ان اوٿا ٿي گهڻو واسطو مت راکو، زم او آڀري سُستي ري ڪري لازي مرئو. ⑮ توئي اوٿا نٿه آڀرو ڏشمڻ مت هڙمو، پڻ پائي را زم اوٿا نٿه هڙماوو.

پولوس تِسلنيڪيون هارو آشيرواڌ مونڳڻه

⑯ هُوَ پڙپو، جيو منڪون نٿه هڪ ڏيڏا وازو سئو، اُو تمون نٿه هميش هر وات ۾ هڪي راکڻه! پڙپو تمون ٻڌون پيڙو هئو!

⑰ هُون پولوس آڀري هاڻي تمون نٿه نمسڪار لڪونه. مارا لڪل هر ڪت ۾ مارئي هاڻي نيشونئي سئو، ان هُون همروم لڪونه.

⑱ آڀڻو پڙپو ايسو ڪريست تمون ٻڌون مانھ ڪڍا ڪرڻه!

تيمٿيس را نوم مانھ لکل پيرھيان ڪت رئي ھرموٿئي

ڪت لکيا وازو

اي ڪت پولوس لکيو (تيمٿيس 1:1). پولوس اي ڪت اوت توتھ لکيو. زئون پيرھين وار روم شهر موئين روميون رو قيدي ٿيو تو. ان پست آزاد ٿيو تو (مڪ شيلون را ڪوم 16:28، 30). ام لاڳھه جي آزاد ٿيا ڪيتر پولوس ايسو را پارام همپزيا رو چارمو چڪر ڪريو. ايتا چارما چڪر مانھ پولوس وڙي افسس شهر م ڳيو ان زئون او اوت ٿي مڪڏيه صويا موئين ڳيو. تيون اوت تيمٿيس نھ افسس شهر موئين وشواسيون نھ شيڪاريا هارو ساڏيو (1 تيمٿيس 3:1). ان پست مڪڏيه صويا ٿي اندازم 66ع م اي ڪت تيمٿيس نھ لکيو.

ڪت ڪيا منڪ هارو لکيو

پولوس اي ڪت تيمٿيس هارو لکيو (1 تيمٿيس 2:1). تيمٿيس گلتيه صويا را لستره شهر رو هتو. اوتا رئي مان يهودي قوم ٿي هئي ان وشواسي هئي. پڻ اوتا رو باپ ڌاري قوم رو هتو. تيمٿيس آپ نائوڪو وشواسي هتو. (مڪ شيلون را ڪوم 2-1:16). پولوس اپرا پيرھيان چڪر مانھ لستره شهر م ڳيو تو. (مڪ شيلون را ڪوم 14:6-21) ان زئون پيرا چڪر مانھ وڙي لستره شهر م ڳيو. تيون اوت تيمٿيس نھ آپ پيرو زايا هارو سونديو (مڪ شيلون را ڪوم 3:16). تيمٿيس گهڻي وار پولوس پيرو ايسو را پارام همپزاوا زاتو ريتو (مڪ شيلون را ڪوم 15-14:17، 18:5، 19:22، 20:4). ان زئون پولوس پيرھين وار روم شهر موئين قيدي هتو. ان اپرا گهر موئين پاهرام ريتو. تيون تيمٿيس پڻ اوتا پيرو ريتو (فليپون 1:1).

ڪت لکيا رو مطلب

زئون پولوس سوچيو جي زويام تيمٿيس ڪن افسس شهر موئين پاسو زايام ڏير تيشي (1 تيمٿيس 15-14:3). تيون اوت اي ڪت لکيو. زم تيمٿيس ڪوڙي واتون شيڪاريا وازون نھ روڪھ. ڀڳتي ڪريا رو صحيح نمونو شيڪارڙه ان وشواسي منڌري هارو نائوڪا اڳيون ان شيواڌاري سونڊھ. ان وشواسي منڌري هارو اڀري زميواري پوري ڪرھ.


ايٺا ڪتاب را شاستر ٿي پڙا حوالا:

1 تيمثيئس 7:2 ڪوم 9:1-19	1 تيمثيئس 1:1 ڪوم 9:1-19
1 تيمثيئس 13:2 پيدائش 2:7, 18-24	1 تيمثيئس 2:1 ڪوم 16:1-3
1 تيمثيئس 14:2 پيدائش 3:1-19	1 تيمثيئس 2:1 ڪوم 20:4
1 تيمثيئس 6:3 ڏرشن 20:10	1 تيمثيئس 3:1 ڪوم 18:19-21
1 تيمثيئس 1:4 مرقس 13:5-6	1 تيمثيئس 3:1 ڪوم 18:24-26
1 تيمثيئس 3:4 پيدائش 2:22-24	1 تيمثيئس 3:1 ڪوم 19:1-20:1
1 تيمثيئس 3:4 پيدائش 9:3	1 تيمثيئس 3:1 ڪوم 20:17-38
1 تيمثيئس 4:4 پيدائش 1:31	1 تيمثيئس 7:1-8 خُروج 17-1:20
1 تيمثيئس 4:5 خُروج 20:12	1 تيمثيئس 7:1-8 احبار 1:27-34
1 تيمثيئس 18:5 استشنا 25:4	1 تيمثيئس 12:1 ڪوم 9:1-19
1 تيمثيئس 18:5 لوقا 10:7	1 تيمثيئس 13:1 ڪوم 8:3
1 تيمثيئس 19:5 استشنا 19:15	1 تيمثيئس 13:1 ڪوم 22:4-5, 19-20
1 تيمثيئس 13:6 يوحنا 18:36-37	1 تيمثيئس 13:1 ڪوم 26:9-11
	1 تيمثيئس 15:1 يوحنا 3:17

تيمٽيس

را نوم مانھ پولوس رو لکل

پيرھيون ڪت




1 ① ھون لکيا واڙو پولوس سون، جيو ايسو ڪريست رو هيڪ مڪ شيلو سون. ھون پڳوون را حڪم پرموئٽھ، جيو آپون نٽھ پڇايا واڙو سٽھ، ان ايسو ڪريست را حڪم پرموئٽھ، جيا مانھ آبي پروسو را ڪونھ، مڪ شيلو سونڊل سون. ② پريمي پاڻي تيمٽيس، تون جيو مارا ھاسا ڏيڪرا جيوو سٽھ، ڪم تو تئين مون ٿي ايسو را پارام ھومپڙين وشواس اوٿيوھ، آپو ٻاپ پڳوون ان آپو پڙو ايسو ڪريست تون مانھ ڪڙيا ان ڏيا ڪرئ، ان تون نٽھ ھڪي راکئھ!

ڪوڙي واتون شيڪاڙيا واڙون نٽھ روڪو

③ زم مئين مڪڏنيھ زايا رٽھ توئٽھ تون نٽھ منٿ ڪرين ڪيڏو تو، تم تون افسس شھر موئين رين ڪئينڪ منڪون نٽھ حڪم ڏي جي او اوڙي واتون نه شيڪاڙئھ

جي صحيح وشواس پرموٽه نٿي، ④ ان نڪو امهي ٺاڙ وارتائون ان منڪون ريون لونبيون لونبيون پيڊيون مانھ ڏيون ڏٺو. ايوون واتون ٿي روڳي پڇڻ ٿي، ان پڳوون را ڏيڏل ڪوم ۾ ڪئين ڦاڻيڏو نٿي ٿيتو، ڪم تو پڳوون رو ڪوم وشواس راڪيا ٿي آڳڙ وڌو. ⑤ هائي حڪم ڏيڏا رو مطلب اي سٺه جي منڪ پويتر ان صاف من ٿي هاسو وشواس راڪين پريم ڪرڻ. ⑥ پڻ ڪئينڪ منڪ هائي واتون ساڏين هاس ٿي ڦرين روڳي ٺالي واتون ڪرڻ. ⑦ او آپ ننه شاستر زوٽيا واڙا هزمين موسيٰ رون لڪل حڪمون مانھ وڍا رو نمونو شيڪاڙوا ڪرڻ. پڻ جي واتون او آپ ڪڻھ، ان جيون واتون را پارام او پورا يقين ٿي شيڪاڙو، اوٿون ننه او آپ تو هزمتا ٿي نٿي.



⑧ هوٺه آپون ننه ڪبر سٺه جي موسيٰ را لڪل حڪم ٺاڻوڪا سٺه. پڻ ضروري سٺه جي منڪ پڳوون رڻه هائي حڪم ڏيڏا رو مطلب هزمين اوٺا مطلب پرموٽه وٺو. ⑨ منڪون رڻه اي هزمو، جي پڳوون موسيٰ را لڪل حڪم منڪون را ڏوھ ساوا ڪريا هارو ڏيڏاھ. او پڳوون ري وات مانھ وڍا واڙون هارو نئين، پڻ ايوون منڪون هارو

ڏيڏل سٺه، جيا حڪمون مانھ نٿي وٺا ان ڪيا رو ڪيڏو نٿي مونٽا، پڳوون ري مرضي مانھ نٿي وٺا پڻ ڏوھ ڪرڻ، پڳوون رڻي شيوا نٿي ڪرتا پڻ اوٺا رڻه ڪلاڦ وٺو، مان ٻاپ ننه ماريا واڙا، ڪون ڪريا واڙا، ⑩ پونڌو ڪوم ڪريا واڙا، آڏميون ٿي پونڌو ڪوم ڪريا واڙا، منڪون ننه زوري اوٻاڙيا واڙا، ڪوڙ ڪريا واڙا، ڪوڙي هاڪ پريا واڙا، ڪا پيزو ڪوئي ايوو ڪوم ڪريا واڙا جيو وشواس ريون هاسيون شيڪاڙل واتون رڻه ڪلاڦ هوٺو. ⑪ هائي وشواس ري هاسي واتون ايسو را پارام ڪشي ري ڪبر ۾ سٺه. ان پڳوون جيو وڪوڻ واڙو سٺه، اوٺه اي مون واڙي ڪشي ري ڪبر همڇاڙيا رو ڪوم مارڻه حواله ڪريوھ.

پولوس پريو ايسو رو ٿورو مونئھ

⑫ ھون اپنا پريو ايسو ڪريست رو ٿورو مونونھ، جيئنھ مون نھ اي ڪوم ڪريا رئي هيئت ڏيڏئيھ، ڪم تو اوئھ مون نھ ايموندار ھزمينَ اپريئي شيوا ڪريا ھارو راکيوھ. ⑬ ھون تو اڳي اوتا رنھ ڪلاڦ ٻوليا واڙو، اوتا نھ تنگ ڪريا واڙو، ان اوتا رئي پيغزئي ڪريا واڙو ھتو. توئي پڻ مون مانھ ڏيا ٿئي، ڪم تو زئيون ھون ھائي ڪوم ڪرتوت ريو، تئيون مون نھ ڪبر نئي جي ايسو آپ پريو سھ ان ھون اوتا مانھ وشواس نتو راکتو. ⑭ پڻ آپئھ پريو مون مانھ الاهي گھڻي ڪريا ڪري ان مارنھ ايسو ڪريست ٿي واسطو راکيا ٿي مارا من ۾ وشواس ان پريم رکايو، جي ھوئھ ھون اوتا مانھ وشواس راکونھ ان منڪون ٿي پريم راکونھ. ⑮ اي وات ھاسئي سھ ان پورنھ نمونئھ مونيا جيويي سھ جي

”ايسو ڪريست ڏوھاريون نھ پچايا ھارو ايئا جڳت ۾ آيو.“

ان ھون ڏوھاريون ۾ ٻڌون ٿي موتو ڏوھاري سون. ⑯ توئي پڻ مون مانھ ڏيا ايئا ھارو ٿئي، جي ايسو ڪريست مون ٻڌون ٿي موتا ڏوھاري نھ ماڦ ڪرين اي وات ساوئي ڏيکارئھ جي او ڏوھاريون ھارو ڪتو صير ڪرئھ، زم او منڪ مارو مثال لئھ، جيا اوتا مانھ وشواس اوئشي ان ھميش رو جيون ليشي. ⑰ پڳوون را وڪوڻ ٿئھ! او هيڪئھ پڳوون سھ، جيو ھميش ٿي لين ھميش ھوڏي ٻڌون مانھ پاڌشا سھ، جيو ھميش ھوڏي جيوتو سھ ان منڪون را ڏيڪيا ٿي ٻارو سھ. اوتا رو مون ان وڪوڻ ھميش ھوڏي ٿيئا رنھ! آمين.

⑱ مارا پريمي ڏيڪرا تيمٽيس، ھون تون نھ ھائي ڪوڙي واتون روڪيا رو حڪم ڏيونھ ان ھائي ڪوم ٿارنھ حوالئھ ڪرونھ. جيوتھ نمونئھ پڳوون رو نياپو ڏيڏا واڙي ٿارنھ ھائي ڪوم ڪريا را پارام اڳي ھمپڙايو تو، ھيوئھ نمونئھ تون پڳوون رون ڏيڏل ھايون نياپون ٿي ھيئت راکين ڪوڙيون واتون رو مقابلو ڪرتو

رئ، زم قوچي هٿيار لين پوري هيمنت ٿي دشمن رو مقابلو ڪرئ. ①9 ان تون وشواس راڪتو رئ ان آپرو من صاف راڪ. ڪئينڪ منڪ صاف من ٿي نه وودا ان هيون نمونئ آپرو وشواس ڪراپ ڪريوه پرو. ②0 هايون موئين ٿي همٽس ان سڪندر سئ، جيون نئ مٿين وشواسي منڌري ٿي بارا ڪاڍين شيطون را قوضام ساڏياھ، زم اوئون نئ شيطون تنگ ڪرئ، ان او شيڪئ جي پگھون ريون هاسيون واتون رئ ڪلاڦ نه بولوو ان اوئون نئ صحيح ڪيال اوئ.

ڪيوئ نمونئ پگھئي ڪروو

2 ① تيام ٻڌون ٿي مور هون وشواسيون نئ منٿ ڪرونھ جي او ٻڌون منڪون ھارو پگھون ٿي وينتي ڪرئ، پراٿنا ڪرئ، منٿون ڪرئ، ان پگھون رو ٿورو مونئ، ② ڪاس ڪرين پاڏشائون ان ٻڌون آگيونون هارو، زم آبي هڪ ان شونتي ٿي آپري حياتي گڏارون، ان آبي پگھون ري پوري مرضي مانھ وين ايون نمونئ وون جي منڪ آڀو مون راڪئ. ③ هائي واتون نائوڪي سئ ان آپون نئ تارڻ ڏيڏا واڙا پگھون نئ وئھ. ④ اوئا رئي مرضي سئ جي ٻڌائي منڪ پچي زائ، ان اوئون نئ هاس رئي پورئي ڪبر پڙئ. ⑤ ڪم تو پگھون هيڪئ سئ، ان پگھون ان منڪون وسا نمونئ ڪرايا واڙو پڻ هيڪئ سئ، ان او ايسو ڪريست سئ جيو منڪ ٿيو. ⑥ اوئ آپرو جيو ٻڌون منڪون نئ سڏايا هارو ايوزام ڏيڏو. هيون نمونئ اوئ صحيح توئا مانھ ھاڪ پري جي پگھون ٻڌون منڪون نئ تارڻ ڏيوا ڪرئ. ⑦ هايا وات رئي ھاڪ پريا هارو پگھون مون نئ همپڙايا واڙو ان مڪ شيلو سوندين راڪيوھ، هون هاس ڪونھ ريو ان ڪوڙ نتي ڪرتو، زم هون ڌاريون قومون نئ وشواس ري هاسي واتون شيڪارون.

⑧ تيام مارئي مرضي سئ جي پگھئي ڪريا ري هر جگا م آڌمي ڪراپ ڪوم ساڏين صاف من ٿي رينھ ان جهيڙا جهگڙا وگر پراٿنا ڪرئ. ⑨ هيون

نمونئ ڏوشي پڻ عقل ٿي آپري عزت رو کيال راکين صحيح نمونئ لوگهڙا پيرئ. اُو آپ نئ نائوڪي ڏيڪاڙيا هارو آپرا مٿوئاڙ نه شڳارئ، ان نڪو هيم را گهڻا هُوت، موتي ان قيمتي لوگهڙا پيرئ. ⑩ پڻ زم اوئون ڏوشيون هارو نيڪ سئ جي آپ نئ پڳوون ري مرضي مانھ وُڍا وڙي ڪئ، تم اُو نائوڪا ڪوم ڪريا ٿي آپ نئ نائوڪي ڏيڪاڙئ. ⑪ ڏوشيون رئ شونتئي راکين منڌڙي رون آڳيوونون رو ڪيڏو مونين پڳوون ري واتون شيڪو ڪئ. ⑫ هون ڪيا پڻ ڏوشي نئ اي موڪل نتي ڏيتو جي اُو شيڪاڙيا رو ڪوم ڪرئ، ڪا آدميون مانھ آپرا حڪم ويوراوئ، پڻ اُو شونتئي راکين رئ. ⑬ ڪم تو پڳوون مور ٿي آدم نومي پيرهيون منڪ نايو تو، ان پسئ حوا نومي پيرهين ڏوشي ناوئي ٿي. ⑭ ان شيطون آدم ٿي نتو ڏڳو ڪريو، پڻ ڏوشي ٿي ڪريو تو، ان ڏوشي شيطون رئي وات مونين پڳوون رو حڪم توڙيو پرو. ⑮ توئي پڻ ڏوشيون نئ تارڻ تو زڙشي، جي اُو آپرو ٻاڙون نئ همپاڙيا رو ڪوم ڪرين وشواس راکتي رئ، پريم ڪرتي رئ، ان آپري عزت رو کيال راکين آپ نئ پويتر راکئ.

وشواسي منڌڙي را آڳيوون ڪيا هوو ڪپئ

3 ① اي وات هاسئي سئ جي جيو منڪ آڳيوونئي ڪروا ڪرئ، اُو هيڪ نائوڪو ڪوم ڪروا ڪرئ. ② تيام جيو منڪ آڳيوون ٿين وشواسي منڌڙي نئ همپاڙيا واڙو هوئ، اُوئا مانھ ڪئين الزوم نه هوئ. اُو هيڪ ڏوشي راکئ ان پيزيل نه زائ، آپرو من آپرا ڪيڏام راکئ، عقل راکئ، اشراپ هوئ، ميزمونون رو مون راکئ، ان شيڪاڙيا رو هوشيار هوئ. ③ اُو نڪو شراپي، نڪو ماري واڙو هوئ، پڻ نرم طبيعت رو هوئ، جهيڙو ڪريا واڙو نه هوئ، ان نڪو پئيهون رو لالچي هوئ. ④ اُو آپرا گهر رئي همپاڙ نائوڪئ نمونئ ڪرئ، آپرون ٻاڙون نئ آپرا ڪيڏام راکئ، ان ايوئ نمونئ وئ جي ٻاڙ هر وات ۾ اُوئا رو مون

راڪڻه. ⑤ پڻ جي ڪوڪ. منڪ آڀرا گهر رڻي همپاڙ نه ڪري هيڪڻه، تو اُو ڪم ڪرين پڳوون ري وشواسي منڌڙي رڻي همپاڙ ڪري هيڪشي؟ ⑥ اُو نوو ٿيل وشواسي نه هوڻه، متون اُو آپ نئه موتو هڙمئه، ان پڳوون اُوئا نئه ايوئي سزا ڏيڏا رو ڦينصلو ڪرڻه، جيوي سزا اُوئه شيطون نئه ڏيڏا رو ڦينصلو ڪريوه. ⑦ ام پڻ هووو ڪپڻه، جي جيا منڪ وشواسي نٿي، اُو پڻ اُوئا رو مون راکتا هوڻه، متون ڪوڪ اُوئا رڻي ڳلا ڪرڻه، ان اُو ڦاٽي زائ، ان شيطون رو مقصد پورو ٿئ.


وشواسي منڌڙي ۾ شيواڌاري ڪيا هووو ڪپڻ

⑧ هيوڻه نمونئ جيا وشواسي منڌڙي ۾ شيواڌاري هوڻه، اُو ايوڻه نمونئ وڻه جي منڪ اُوئون رو مون راکڻه. اُو هي پڙا نه هوڻه، اُو شراپي نه هوڻه، نڪو پئيهون رڻي لالچ راکڻه، ⑨ پڻ صاف من ٿي وشواس ريون اُونڌيون واتون مانھ پڪو يقين راکڻه جي همئنه ساوي ڪرل سئ. ⑩ اُوئون رو مور ٿي آڙمتو ليوو، ان جي اُوئون مانھ ڪئين الزوم نه آوڻه، تو پسئ پلئ اُو شيوا رو ڪوم ڪرڻه. ⑪ هيوڻه نمونئ شيوا ڪريا واري ڏوشي پڻ ايوڻه نمونئ وڻه جي منڪ اُوئون رو مون راکڻه. اُو ڳلا ڪريا واري نه هوڻه، پڻ آڀرو من آڀرا ڪيڏام راکڻه، ان ٻڌيون واتون ۾ ايمونڌار هوڻه. ⑫ شيواڌاري هيڪوڪي ڏوشي راکڻه ان پيزيل نه زائ، ان اُو آپرون ٻاڙون رڻي ان آڀرا گهر رڻي نائوڪئ نمونئ همپاڙ ڪرڻه. ⑬ شيواڌاريون رڻه هيا هووو ڪپڻه، ڪم تو جيا منڪ نائوڪئ نمونئ شيوا ڪرڻه، اُوئون رو مون منڪون موئين وڌئ، ان اُو گهڻي هيمنت ٿي ايسو ڪريست مانھ وشواس راکيا را پارام همپاڙوي هيڪڻه.

آڀا وشواس رڻي اُونڌي وات

⑭ مارئي اُميد سئ جي هُون تون ڪن جلدِي آويھ. توئي پڻ هُون هائي واتون

لڪونه ريو (15) زم، جي مون نئه آيام ڏير ٿئ، تو تون نئه ڪبر هوئه جي



وشواسيون رئه ڪيوئه نمونئه ويو ڪپئه.
وشواسي پڳوون را نوم رئي اڪائي سئه،
جئي جيوئا پڳوون رئي وشواسي منڌڙي
سئه. ان زم پيلر ان پُنياد گهر نئه صحيح
راڪئه، تم وشواسي منڌڙي هاس مانھ
وين ان هاس شيڪارڙين وشواس ري هاسي
واتون صحيح راڪئه. (16) ايئا ۾ ڪئين شڪ
نتي جي آپئا وشواس رئي اونڌي وات جيا
ري ڪري آبي پڳوون ري مرضي مانھ
وونه، او گهڻي موٽي وات سئه. ان او
اونڌي وات اي سئه:

”ايسو منڪ ٿين

ايئا دنيا ۾ ساوو ٿيو،

ان پويتر آتما ري ڪڙا ٿي

پيڏوهي ٿايت ٿيو.

آڪاشي ڏوتي اوئا نئه ڏيڪيو،

ان ڌاري قومون نئه اوئا را پارام منڪي همپڙايو.

دنيا ۾ منڪي اوئا مانھ وشواس اوٿيو،

ان آڪاش ۾ پڳوون اوئا نئه اوپارڙين مون ۾ پيهاريو.“

ڪوڙي واتون شيڪارڙيا واڙون ٿي هوشيار ريوو

① هوئه پويتر آتما صاف ڪئھ جي دنيا رن پڇاڙي واڙون ڏيئون ۾ ڪئينڪ
منڪ وشواس ري هاسي واتون ساڏشي، ان پوتون ان ڏيوٽونون ريون ڪوڙيون

شِيڪاڙل واتون مانھ ڏيون ڏيشي. 2. جيا منڪ هيوي واتون شِيڪاڙڻ، پلئ اُو
 آپ نئ ھاسا ڏيڪاڙڻ، توڻي پڻ اُو ڪوڙ ٻولئھ ريا. اُوئون را من ڪراپ ٿي ڳياھ
 ان اُوئون نئ ڪئين شرم نٿي ٿيڻي. 3. اُو ام شِيڪاڙڻ جي پڙو نه ڪپئ، ان
 ڪئينڪ کاڌا ري شينھون پڻ نه ڪاوو ڪپئ. پڻ ھائي شينھون پڳوون ايٺا ھارو
 پيدا ڪري زم جيا منڪ وشواس راکئھ ان جيون نئ ھاس رئي پوري ڪپر سئ،
 اُو ھايون ھارو پڳوون رو ٿورو مونئھ ان ھايون نئ ڪائھ. 4. ڪم تو پڳوون ري
 پيدا ڪرل ٻڌي شينھون ٺاڻوڪي سئ. تيام ام نه ھزمو ڪپئ جي ڦلوتئي شينھ
 پويتر نٿي، ان اُو نه ڪاوو ڪپئ. پڻ پڳوون رو ٿورو مونين تمي ڪوئي پڻ کاڌا
 رئي شينھ پلئ ڪاڻو. 5. ڪم تو پڳوون را وڃن ان منڪ ري پراٺنا ٿي اُو شينھ
 پويتر ٿئھ.

ايسو ڪريست رو ٺاڻوڪو شيواڌاري ڪم ڪرين ٿيو

6. جي ٽون وشواسي پايون نئ ھائي واتون شِيڪاڙو ريھ، تو ٽون ايسو ڪريست
 رو ٺاڻوڪو شيواڌاري ٿيھ، ان وشواس ريون ٺاڻوڪيون شِيڪاڙل واتون ٿي، جيون
 مانھ ٽون آز ھوڏي ويتو آيوھ، ٽون نئ ھيمت زڙشي. 7. پڻ منڪون ري امھي
 ناڙل وارٿائون، جي پڳوون رئ ڪلاڦ سئھ ان روڳي پرم واري واتون سئھ،
 اُوئون ٿي پاھو ڪري. ٽون پڳوون ري مرضي مانھ وُڍا رئي گھڻي ڪوشش
 ڪري. 8. ورزش ڪريا ري ڪوشش ٿي ڏيل نئ ڪئينڪ ڦاڻيڏو ٿئھ، پڻ پڳوون
 ري مرضي مانھ وُڍا ري ڪوشش ٿي ٻڌيون واتون م ڦاڻيڏو ٿئھ، ڪم تو
 پڳوون اي وائڏو ڪريو تو جي پڳوون ري مرضي مانھ وُڍا وڙون نئھ ايٺا
 حياتي م نوا نمونا رو جيون زڙشي، ان مريا ڪيڙ آيا واري حياتي م ھميش
 رو جيون زڙشي. 9. ھائي وات ھاسئي سئھ ان پورئھ نمونئھ مونيا جيويي
 سئھ. 10. تيام آبي ھايا مقصد ھارو مينت ڪرونھ ان ڏوروڻ سھين ڪوشش
 ڪرونھ، ڪم تو آبي جيوتا پڳوون مانھ پروسو راکيوھ، جيو ٻڌون منڪون

هارو پڇايا وڙو سٺ، کاس ڪرين وشواس راکيا وڙون هارو، جيون نٺ اُو تارڻ ڏيشي.

⑪ هايون واتون مانھ وُڍا رو حُڪم ڏي ان هايون را پارام شيڪاڙي. ⑫ پلٺ تون جوڻ سٺ، توئي پڻ ٻڌون منڪون رٺ تارئي وات مونو ڪپٺ. تون واتون ڪريا ۾، وُڍا ۾، پريم ڪريا ۾، وشواس راکيا ۾ ان آپ نٺ پوٽر راکيا ۾ وشواسيون نٺ ايوو نمونو ڏيڪاڙ جيا مانھ اُو وٺ. ⑬ زئيون هُڏي هُون نه آوون، تئيون هُڏي تون ڏيون ٿي شاستر پٿين همپڙاوتو رٺ، هزماوتو رٺ ان شيڪاڙو رٺ. ⑭ تون پگهون ري ڏيڏل پوري هيٺ ٿي هائي ڪوم ڪرتو رٺ، جي هيٺ پگهون تون نٺ تئيون ڏيڏي، زئيون وشواسيئي تارا پارام پگهون رو نياپو ڏيڏو، ان وشواسي منڌري ري آڳيون تون مانھ هات ميلين هيا ڪوم مانھ راکيو. ⑮ هايون واتون مانھ ڏيون ڏي، ان هايون مانھ ويتوري، زم ٻڌون منڪون هومئي وات ساوئي تٺ جي تون وشواس ۾ آڳڙ وڌھ ريو. ⑯ هوشيار ري جي تون آپ هايون واتون مانھ ويتو رٺ، ان هائي واتون شيڪاڙو رٺ. ڪم تو تارٺ هم ڪريا ٿي تون آپ نٺ تارڻ زڙشي، ان تاري واتون هومپڙيا وڙون نٺ پڻ تارڻ زڙشي.

وشواسي منڌري رون منڪون ٿي ڪيو نمونئ ويوو

5 ① ڪيا ڏوڪرا نٺ مت وڙگي، پڻ اُونا نٺ آپرا پاپ را زم هزماو. جوڻ منڪون نٺ پايون را زم هزم، ② ڏوڪريون نٺ مان را زم هزم، ان جوڻ ڏوشيون ان سوڪريون نٺ آپرو من پوٽر راکين پينون را زم هزم.

رنڌال ڏوشيون را پارام

③ اُو رنڌال ڏوشي جي هاس ۾ هيڪلي سٺ، اُوئون رو مون راک ان اُوئون رئي همپڙ ڪر. ④ پڻ جي ڪياڪ رنڌال ڏوشي را ٻاڙ ڪا پوترا ڏوئيترا هوٺ، تو

مور ٿي اُئون رٿه اُونا رٿي همپاڙ ڪروو ڪپڻه. اُئون رٿه آپري زميوار ٿي هزمو ڪپڻه جي اُو آپرون گهر وازون رٿي شيوا ساڪري ڪرڻه، ان آپرون مائيترون ري ڪرل همپاڙ رو ايوزو پرڻه، ڪم تو اي پڳوون نٿه نائوڪو لاڳڻه. ⑤ ايوي رنڌال ڏوشي رٿي همپاڙ ڪر جئي هاس ۾ هيڪلي سٺه ان جيا رو پيزو ڪوئي نٿي، جيا رو پروسو پڳوون مانھ سٺه، ان جئي ڏي رات پڳوون ٿي وينتي ان پراٿنا ڪرتي رٿه. ⑥ پڻ جئي رنڌال ڏوشي عيش عشرت ۾ پڙل سٺه، اُو پلڻه جيوت ٿي هوڻه، توڻي پڻ اُو زوڻه مرل سٺه ڪم تو پڳوون ٿي ڪئين واسطو نٿي راکڻي. ⑦ منڪون نٿه هايون واتون مانھ وُڍا رو حڪم پڻ ڏڻه، زم اُئون مانھ ڪئين الزوم نه آوڻه. ⑧ پڻ جي ڪوئي آپرون عزيزون رٿي، ان ڪاس ڪرين آپرون گهر وازون رٿي، همپاڙ نٿي ڪرتو، تو اُوڻه آپرا وشواس مانھ نه وُڍا ٿي وشواس نٿه ساڏيوه پرو. ان اُو وشواس نه راکيا وازون ٿي پڻ ڪراپ سٺه، ڪم تو اُو پلڻه وشواس نٿي راکڻا، توڻي پڻ اُو آپرون گهر وازون رٿي همپاڙ تو ڪرڻه.

⑨ اُو رنڌال ڏوشي جي وشواسي منڌري ۾ ايسو ڪريست رٿي شيوا ڪريا وازي ٿيا ڪرڻه، اُئون موئين ٿي رُوڳو اُئون رنڌال ڏوشيون را نوم لڪ، جي هائين سالون ٿي وڌارڻه عُمَر ري هوڻه، ان آپرا هڪا آڏمي ري گهري ري هوڻه ان پيزيل نه ڳي هوڻه. ⑩ اُئون رو نائوڪا ڪوم ڪريا ري ڪري مون هوڻه، اُوڻي آپرون ٻازون رٿي همپاڙ ڪرڻي هوڻه، ميزمونون رٿي شيوا ڪرڻي هوڻه، پڳوون رون سُونڍل منڪون رٿي شيوا ساڪري ڪرڻي هوڻه، مَصِيَّت ۾ پڙل منڪون رٿي مڌت ڪرڻي هوڻه، ان ٻڌائي نائوڪا ڪوم ڪريا هارو تيار ريتي هوڻه.

⑪ پڻ جون رنڌال ڏوشيون را نوم مت لڪ، ڪم تو زئون اُئون نٿه آڏمي رو ڪيال آوڻه، تئين اُو آپرو اڳلوڪو اي ڪيال ساڏڻه، جي ”هُن رُوڳڻي ايسو ڪريست رٿي شيوا ڪريه،“ ان اُو گهر ڪروا ڪرڻه. ⑫ ان هيوڻه نمونڻه اُو ايسو رٿي شيوا ڪريا رو آپرو وائڻو توڙين پڳوون رو ڏوه ڪرڻه. ⑬ ان پيزي وات

اي سٺه، گهر ٿو گهر زايا ٿي اُئون رو نالي پينا رو ڍون پڙي زائو. اُو اُوتو نه رُوگي نالي پيهه، پڻ پزون ري واتون آگهي پاسي ڪرڻ، پزون رئي ڳلا ڪرڻ، ان ايوي واتون ڪرڻ جي نه ڪروو ڪپڻ. ⑭ تيام مارئي مرضي اي سٺه جي جوڻ رنڊال ڏوشي گهر ڪرڻ، اُئون را اولاد ٿڻ، ان اُو گهر رئي همپار ڪرڻ، زم جيو آپڻه ڪلاڦ سٺه، اُوتا نٺه ڪئين ڳلا ڪريا رو وجه نه زڙڻ. ⑮ هون اينا هارو ڪونه ريو، ڪم تو ڪئينڪ هيوي ڏوشي آگهي پڳوون ري وات ٿي ڦري گيه، ان شيطون ري وات مانھ وُڍا وازي ٿي گيه.

⑯ جي ڪياڪ وشواسي ڏوشي رون عزيزون موئين رنڊال ڏوشي هوڻ، تو اُو وشواسي ڏوشي اُئون رئي مدت ڪرڻ، ان اُئون رئي همپار ڪريا رو پار وشواسي منڌري مانھ نه نوڪڻ، زم وشواسي منڌري اُئون رنڊال ڏوشيون رئي مدت ڪري هيڪڻ، جيون رو ڪوئي نٿي.

آگيوونون را پارام

⑰ جيا آگيوون وشواسي منڌري رئي همپار ٺاڻوڪڻ نمونڻه ڪرڻ، ڪاس ڪزين جيا وچن همپاريا ان شيڪاريا ۾ مينت ڪرڻ، اُئون رو پڻو مون راڪوون ان اُئون نٺه اُئون ري همپار هارو پورو ڪرچ ڏيوو. ⑱ ڪم تو شاستر ۾ ام لڪل سٺه جي ”زئون ڍڳو هلر ۾ ٻوندل سٺه،



تو مونشيون نه ساڙوو.

ان شاستر ۾ اي پڻ لڪل سٺه جي

”ڪوم ڪريا وازا نٺه

آپريئي مزورئي ليڏا رو حق سٺه.“

⑲ جي ڪوڪ منڪ ڪياڪ آگيوون مانھ الزوم هڻڻ، تو اُوتا منڪ رئي وات تيون هوڏي مت موني، زئون هوڏي ٻي ڪا ترڻ منڪ هاڪ پريا وازا نه هوڻ. ⑳ جيا آگيوون ڏوه ڪرڻ، اُئون نٺه ٻڌون وشواسيون رڻه رُوپرو هزماوي، زم

ٻڌا پڻ ڏوه ڪريا ٿي پيڻا. (21) هُون تُون نٿو ڀڳوون، ايسو ڪريست، ان ڀڳوونَ رُون سُونڊل آڪاشي ڏوتون هومو هون ڏيونه، جي تُون هاڻيون واتون مان هون، ان نڪو صحيح ڪهر پاڙيا وڳر ڪيا رو ڦينصلو ڪري، نڪو ڪيا رو پا هو لي.

(22) تُون جلدي ۾ سوچيا وڳر ڪيا منڪ نٿو آڳيوون راکيا هارو اونا مان هات مت ميلي. ان ڏوهاري منڪون نٿو سونڊيا ٿي تُون اوئون رو ڏوه آپ مان ه مت لي. تُون آپ نٿو ڏوه ٿي شيتي راکي. (23) تُون روڳو پوئي مت پي، پڻ ڪينڪ ڌراڪون رو رس پڻ پيتو ري، ڪم تو تارو پيٽ اڳي ڪراپ رٿه ان تارئي طبيعت ٺيڪ نٿي ريتي. (24) جلدي ۾ آڳيونون نٿو مت سونڊي، ڪم تو ڪينڪ منڪ ايو سٺه جيون را ڏوه اڳي ساوا سٺه، ان جونچ ڪريا مور اوئون رُون ڏوهون رٿي ڪهر سٺه، پڻ ڪينڪ ايو سٺه جيون را ڏوه روڳا جونچ ڪريا ڪيڙ ساوا ٿه. (25) هيون نمونن منڪون را ناوڪا ڪوم پڻ گهڻو ڪرين اڳي ساوا سٺه، پڻ جي ساوا نٿي، تو جونچ ڪريا ڪيڙ ضرور ساوا ٿي.

وشواسي ڳلومون نٿو ڪيو وائون شيڪاڙو

6 ① زتا وِشواسي منڪ ڳلوم سٺه، اوئون رٿه ام هزمو جي او آپرا ڏي رو گهڻو مون راکه، زم منڪ ڀڳوون رٿه ان آپرا وِشواس ريون شيڪاڙل واتون رٿه ڪلاڦ نه هون. ② جي اوئون را ڏي وِشواسي سٺه، تو او آپرا وِشواسي پائي هويا ري ڪري ڏيون نٿو گهٽ نه هزمه، پڻ اوئون رو مون راکين وڌارنه گهڻي شيوا ڪر، ڪم تو جيون رٿي شيوا او ڪر رٿه رٿا، او وِشواسي سٺه ان پريمي پائي سٺه.

ڪوڙي واتون شيڪاڙيا وازا آپرو نتيجو پرشي

تُون هائي واتون شيڪاڙو ري ان هزماو تو ري. ③ پڻ جي ڪوئي منڪ اوڙي واتون شيڪاڙهه ان آپرا پريو ايسو ڪريست ري صحيح واتون نٿي مونتو، ان نڪو

وشواس ري شيڪاڙل واتون مونھه جيا ٿي پڳوون ري مرضي مانھ وُڍا را پارام
 ڪبر پڙھ، ④ تو اُوڻھ منڪ آپ نئھ موٽو ھزمين آپري عقل ساڏيھ پري ان او
 ڪئين نتي ھزمتو. او رُوگهي پحت ڪرھ ان وات وات مانھ تڪرار ڪرھ، ڪم
 تو او منڪ آپ صحيح نتي. ھم پحت ان تڪرار ڪريا ٿي منڪ ھيڪا پيزا مانھ
 ريشي پڙھ، آيت موئين وزگاھ، ھيڪا پيزا رئي ڳلا ڪرھ، پيزون مانھ شڪ
 ڪرھ ان اوئون نئھ ڪراپ ھزمتھ، ⑤ ان ھميش آيت موئين واڌ ڪرتا رھ، ڪم
 تو اوئون را من ڪراپ ٿي ڳياھ ان اوئي ھاس نئھ ساڏيوھ پرو. او لالچ راکين ام
 ھزمتھ جي ڌرم پاڙيا ٿي آپ نئھ قائيڏو تھ.

⑥ ھوڻھ ڌرم پاڙيا ٿي قائيڏو تو گھڻو سئھ، جي منڪ پڳوون ري مرضي
 مانھ وئھ ان زتو اوئا ڪن سئھ اوئام ڪش رھ. ⑦ ڪم تو آبي ايئا ڏيا ۾
 نالي ھاڻي آياھ، ان وات ساوئي سئھ جي ايئون نالي ھاڻي زاشون. ⑧ تيام،
 جي آپون ڪن کاڌو پيڏو ان لوگھڙا ھوئھ، تو ڪش ريشون. ⑨ پڻ جيا منڪ
 شائوڪار ٿيو ڪرھ، او آزمتا ۾ پڙي زائھ، ان زم پکي گھٽ ۾ قائيڏو، تم او
 گھڻون ڪراپ ڪيالون ۾ قاتي زائھ. ھيو ڪيال عقل ۾ موئھ نتي ان نقصون ڏيڏا
 واڙا سئھ، ان ھايون ري ڪري منڪون رئي زندگي پريآ ٿي زائھ، ان اوئون نئھ
 تارڻ پڻ نئين زڙھ. ⑩ ڪم تو پيھون رئي لالچ ھر قسم ري پونڌائي رئي پاڍ

سئھ. پيھون ري لالچ ۾ ڪئينڪ منڪي
 آپرو وشواس ساڏيوھ پرو ان آپرا آپ نئھ
 گھڻا ڏک ڏيڏاھ.



وشواس ريون ھاسيون واتون مانھ ويو
 زم انصاف ۾ ھميش رو جيون زڙھ

⑪ پڻ ٽون ھايون واتون ٿي شيتي پاڳ، ڪم تو ٽون پڳوون رو سونيل منڪ
 سئھ. ان ايئون واتون مانھ وُڍا رئي ڪوشش ڪر جي ٽون منڪون ھون انصاف

ٽي وٽ، ڀڳوونَ ري مرضيَ مانھ وٽ، وشواس راکڻ، پريم ڪرڻ، ڏوروڻ صير ٿي سھڻ، ان گريبي هُون وٽ. (12) زم ملي انصاب ليڏا هارُو پوري ڪوشش ٿي مل وڌو، تم تون پوري ڪوشش ٿي وشواس مانھ نائوڪڻ نمونئ وٽ، زم انصاب ۾ تون نئ هميش رو جيون زڙڻ. ٿارڻ هائي هميش رو جيون ليڏا هارُو ڀڳوونَ تارو واسطو آپ ٿي رکايو، ان تئين گهڻون شائيدون هومو آپرو ايسو مانھ وشواس پاسيو. (13) هُون ڀڳوونَ هومو، جيو ٻڌون نئ جيو ڏو، ان ايسو ڪريست هومو، جيئڻ پينطس پيلاطس رون ڏيئون ۾ آپڻا وشواس ري واتون هاسي ڏيڪاري تي، تون نئ حڪم ڏيونھ (14) جي تون ڀڳوونَ را ڏيڏل حڪم مانھ وين هاسو وشواس شيڪارٽو ري، زم ڪوئي ڪلاڦ نه ٻولي هيڪڻ، زئون هُڏي آپڻو پريو ايسو ڪريست پاسو آوين ساوون نه ٿڻ.

(15) ڀڳوونَ را وڪوڻ ٿڻ! او آپرا صحيح ٿوڻا مانھ پريو ايسونئ ساوون ڪرشي. او وڪوڻ رڻ لائيڪ هيڪڻ راز ڪريا واڙو سڻ، او پاڏاشائون رو پاڏاشا ان ڏئون رو ڏئي سڻ. (16) روڳو او شروع ٿي لين هميش هُڏي سڻ. او ايوا سوجھرا ۾ رڻ جيا ڪن ڪوئي نئي پوڳي هيڪڻ، اوڻا نئ ڪيئڻ ئي منڪ نئي ڏيڪيو، ان نڪو ڏيڪي هيڪڻ. اوڻا رو مون ان راز هميش هُڏي رڻ! آمين.

شائوڪار وشواسيون نئ ڪيو وائون شيڪارو

(17) جيا وشواسي ايڻا دنيا ۾ شائوڪار سڻ، تون اوئون نئ حڪم ڏو، جي او مگھروڻ نه ٿڻ، ان آپري ملڳت مانھ پروسو نه راکڻ، جيا مانھ پروسو نالو سڻ، پڻ او ڀڳوونَ مانھ پروسو راکڻ، جيو آپڻي ڪشي هارُو ٻڌوئي ڪئين امهي ڏو. (18) اوئون نئ اي پڻ حڪم ڏو جي او ٻيزون ٿي پلائي ڪرڻ، ان گهڻي ملڳت پيڙي نه ڪرڻ پڻ گهڻا نائوڪا ڪوم ڪرڻ. او آپري ملڳت ٿي ٻيزون نئ ڏيڏا هارُو تيار رڻ ان سڪي هوڻ. (19) هيونئ نمونئ او آيا واڙا وڪت هارُو ملڳت پيڙي نه ڪرڻ، پڻ آپري ملڳت ٿي ايوا نائوڪا ڪوم ڪرڻ جيون رو

انصاب مريا ڪيڙ آيا واري حياتي ۾ زڙشي، زم اوئون نٿه هميش رو جيون زڙڻ،
جيا را مقابل ۾ اي حياتي ڪئين نٿي.

آڪري واتون

②0 پريمي پائي تيمٽيس، ايسو را پارام ڪشي رڻي ڪهر جي پڳوون امونت را زم
تارڻه خوائه ڪرڻه، هيا نٿه ٿون ڀڏليا وڳر صحيح راکتو رڻه، ان اوئون واتون
ٿي پاھو ڏڻه جيون نٿه منڪ ڪوڙ هاڪلين ”گيون“ ڪڻه، پڻ هاس ۾ او نالي
واتون سڻه جي پڳوون رڻه ان هاسا وشواس رڻه ڪلاق سڻه. ②1 هايون ڪوڙيون
واتون ٿي پاھو ڏڻه، ڪم تو ڪئينڪ منڪ هائي واتون موين هاسا وشواس ٿي
قري گياھ.

پڳوون تمون ٻڌون مانھ ڪرپا ڪرڻه!

تیمئیس را نوم مانه لکل پیزا کت رئی هزموتئی

کت لکيا واژو

اي کت پولوس لکيو (2 تیمئیس 1:1). ام لاگنه جي پولوس اي کت اوئه توتنه لکيو. زئيون اوئه ايسو را پارام همپزايا هارو چارمو چکر کريو، ان تيا کيتر پيزي وار روم شهر موئين روميون رو قيدي هتو. پيرهين وار او اپرا گهر م پاهرام قيدي هتو. پڻ کت لکيا رنه توتنه او دوهاري را زم هتکزي لاکل جيل موئين پورل هتو (2 تیمئیس 9:2). پولوس نه کبر هتئي جي اوئه آپ نه پگورون رو ڏيڏل کوم پورو کريوه. ان اوتا نه اي پڻ کبر هتئي جي روم رو پادشا نرو ابوو ظلمي سه ان وشواسيون رنه کلاق سه جي اوتا نه ضرور موت رئي سزا ڏيشي (2 تیمئیس 8:4-6). تيامر اوئه مريا ٿي مور، اندازام 67-68ع م، اي کت تیمئیس نه لکيو.

کت کيا منک هارو لکيو

پولوس اي کت تیمئیس هارو لکيو (2 تیمئیس 2:1). تیمئیس گلننه صويا را لستره شهر رو هتو. اوتا رئي مان يهودي قوم رئي هتئي ان وشواسي هتئي، پڻ اوتا رو باپ ڌاري قوم رو هتو. تیمئیس آپ نائوڪو وشواسي هتو. (مک شيلون را کوم 1:16-2). پولوس اپرا پيرهيان چکر مانه لستره شهر م گيو تو، (مک شيلون را کوم 14:6-21) ان زئيون او پيزا چکر مانه وزي لستره شهر م گيو، تئيون اوئه تیمئیس نه آپ پيزو زايا هارو سونديو (مک شيلون را کوم 3:16). تیمئیس گهڻي وار پولوس پيزو ايسو را پارام همپزاووا زانو ريتو (مک شيلون را کوم 15:14-17، 18:5، 19:22، 20:4). ان زئيون پولوس پيرهين وار روم شهر موئين قيدي هتو، ان اپرا گهر موئين پاهرام ريتو، تئيون تیمئیس پڻ اوتا پيزو ريتو (فليپون 1:1).

کت لکيا رو مطلب

پولوس موت رئي سزا کاڌا واژو هتو، ان تیمئیس هزون افسس شهر موئين وشواسيون نه شيڪارتوت ريو. تيامر پولوس اي کت لکيو زم تیمئیس رئي هيمنت وڌه ان او پولوس رو نمونو زوئين اوتا را زم نرو پادشا رو ظلم سهه ان وشواس ري هاسي وانون شيڪارتو رنه، او پولوس ٿي جيل موئين مزو اوئه (2 تیمئیس 21:4)، ان او اي کت پئين همپزايا ٿي افسس شهر رون ٻڌون وشواسيون نه پولوس ري وانون همپزاوئه (2 تیمئیس 22:4).

ايئا كتاب را شاستر تي بيزا حوالا:

2 تيمثيس 10:4 ... 2 كرتيون 13:2	2 تيمثيس 1:1 19-1:9 كوم
2 تيمثيس 10:4 ... 2 كرتيون 6:7, 13-15	2 تيمثيس 2:1 3-1:16 كوم
2 تيمثيس 10:4 ... 2 كرتيون 6:8	2 تيمثيس 2:1 4:20 كوم
2 تيمثيس 10:4 ... 2 كرتيون 16:8-17, 23	2 تيمثيس 4:1 3:1 تيمثيس
2 تيمثيس 10:4 ... 2 كرتيون 18:12	2 تيمثيس 5:1 1:16 كوم
2 تيمثيس 10:4 ... طيطس 5-4:1	2 تيمثيس 6:1 18:1 تيمثيس
2 تيمثيس 11:4 ... 14:4 كلسيون	2 تيمثيس 6:1 14:4 تيمثيس
2 تيمثيس 11:4 ... 24:1 فليمون	2 تيمثيس 11:1 ... 19-1:9 كوم
2 تيمثيس 11:4 ... 25:12 كوم	2 تيمثيس 8:2 11-10:16 زبور
2 تيمثيس 11:4 ... 13:13 كوم	2 تيمثيس 8:2 11-10:53 يسعياه
2 تيمثيس 11:4 ... 39-37:15 كوم	2 تيمثيس 8:2 53-1:24 لوقا
2 تيمثيس 11:4 ... 10:4 كلسيون	2 تيمثيس 8:2 10-1:11 يسعياه
2 تيمثيس 11:4 ... 24:1 فليمون	2 تيمثيس 8:2 متي 16-6:1
2 تيمثيس 12:4 ... 4:20 كوم	2 تيمثيس 17:2 ... 20:1 تيمثيس
2 تيمثيس 12:4 ... 21:6 افسيون	2 تيمثيس 19:2 ... 15:3 تيمثيس
2 تيمثيس 12:4 ... 7:4 كلسيون	2 تيمثيس 19:2 ... 5:16 گنتي
2 تيمثيس 12:4 ... 12:3 طيطس	2 تيمثيس 19:2 ... 11:52 يسعياه
2 تيمثيس 14:4 ... 20:1 تيمثيس	2 تيمثيس 1-3:5 ... 12-10:24 متي
2 تيمثيس 19:4 ... 3-1:18 كوم	2 تيمثيس 8:3 13-8:7 خروج
2 تيمثيس 19:4 ... 26 كوم 19:18	2 تيمثيس 11:3 ... 51-44:13 كوم
2 تيمثيس 19:4 ... 1 كرتيون 19:16	2 تيمثيس 11:3 ... 7-1:14 كوم
2 تيمثيس 19:4 ... 3:16 روميون	2 تيمثيس 11:3 ... 20-19:14 كوم
2 تيمثيس 19:4 ... 16:1 تيمثيس	2 تيمثيس 14-15:3 ... 1:16 كوم
2 تيمثيس 20:4 ... 22:19 كوم	2 تيمثيس 14-15:3 ... 5:1 تيمثيس
2 تيمثيس 20:4 ... 4:20 كوم	2 تيمثيس 10:4 ... 14:4 كلسيون
2 تيمثيس 20:4 ... 29:21 كوم	2 تيمثيس 10:4 ... 24:1 فليمون
	2 تيمثيس 10:4 ... 3-1:2 گلتيون

تيمٽيس

را نوم مانھ پولوس رو لکل پيزو کٽ

1 ① هُون لکيا واڙو پولوس سون، جيو ايسو کريست رو هيڪ مُک شيلو سون.
هُون پڳوون ري مرضي پرموئٽه مُک شيلو سُونڊل سون زم هُون منڪون نٽه
پڳوون را وائڏا را پارام همپزاوون جي ايسو کريست ٿي واسطو راکيا ري ڪري
هميش رو جيون زڙشي.

② پريمي پائي تيمٽيس، تُون جيو مارا ڏيڪرا را زم سٺه،
آپتو باپ پڳوون ان آپتو پريو ايسو کريست تُون مانھ ڪُريا ان ڏٿيا ڪرئ،
ان تُون نٽه هڪي راکئھ!

پولوس پڳوون رو ٿورو مونئھ ان تيمٽيس نٽه حوصلو ڏئھ

③ هُون پڳوون رو ٿورو مونونھ، جيا رئي شيوا هُون آپرون باپ ڏاڏون را زم
صاف من ٿي ڪرونھ. ڏي رات زئيون هُون پراٿنا ڪرونھ، تئيون هُون هميش تُون
نٽه ياڏ ڪرين تُون هارو پڳوون رو ٿورو مونونھ. ④ مارو جيو تُون ٿي مڙيا
هارو ڪرئ، زم تُون ٿي مڙيا ٿي مُون نٽه گهٽئي ڪشي زڙئ، ڪم تو مُون
نٽه ياڏ سٺه جي مارئ تُون ٿي زايا رٽه توئٽه تُون ڪتو رويو تو. ⑤ هُون ايٿا
وات را پارام پڻ سوچونھ جي تُون هاسا من ٿي ايسو مانھ وشواس راکئھ،
زم پيرھين ٿاري نوٽي لوئس ان ٿئي مان يونيڪي پڪو وشواس اوٿيو. ان مُون

نٽه يقينَ سٺه جي ٿون پڻ هيون پڪو وشواس راکڻو. ⑥ تيام هون ٿون نٽه ياڌ ڏيوراونه جي ٿون پورا من ٿي اڳي را زم ڀڳوون ري ڏيڏل هيمنت ٿي ڪوم ڪر. هائي هيمنت ٿون نٽه تٿيون زڙييه، زٿيون ٿون نٽه هيا ڪوم مانه راکيا هارو مٿين ٿون مانه هات ميليا. ⑦ ٿون هيمنت ٿي ڪوم ڪر، ڪم تو ڀڳوون آيون نٽه پويتر آتما ايٺا هارو نٿي ڏيڏو زم آبي پيٺائون، پڻ ايٺا هارو ڏيڏو زم آيون نٽه ڪڙا زڙه، آبي پريم ڪرون، ان عقل ٿي آبري مرضي قابوم راکون.

⑧ تيام ٿون آڻا پريو ايسو را پارام همپڙايا ٿي لڙي مت مري، ان ماري ڪري پڻ لڙي مت مري، جيو پريو ايسو ري ڪري ڦيڙي سون. پڻ ايسو را پارام ڪشي رٿي ڪهر همپڙايا ري ڪري ٿون مارا زم ڀڳوون ري ڏيڏل ڪڙا ٿي ڏک ان تڪليبون سهتو رٿه. ⑨ ڀڳوون آيون نٽه ڀڄاياھ ان آيون نٽه پويتر ڪريا هارو آڻو آڻ ٿي واسطو رکايوھ. آبي ايوا ٺاڻوڪا ڪوم نٿي ڪريا جيا ري ڪري ڀڳوون آيون نٽه ڀڄاياھ، پڻ اونه آڻا ڪاس مقصد پرموٽه آيون مانه ڪرپا ڪرين آيون نٽه ڀڄاياھ. هائي ڪرپا ڪريا رو ڦينصلو اونه جڳت نايا ٿي مور ڪريو تو، جي او آيون مانه ڪرپا ڪرڻه جيا ايسو ڪريست ٿي واسطو راکونه. ⑩ پڻ اونه هائي ڪرپا ايٺا وڪت ۾ ساوئي ڪريه، زٿيون اونه آيون نٽه ڀڄايا وڙا ايسو ڪريست نٽه ايٺا جڳت ۾ ميلين ساوو ڪريوھ. ايسو ڪريست موت ٿي جيوي اوليا ٿي موت رو قوضو ڪتم ڪريوھ، ان آڻ را پارام ڪشي رٿي ڪهر ڏيڏا ٿي وات ساوئي ڏيڪاڙيھ جي آيون نٽه هميش رو جيون زڙشي، ان آبي ڪيڙي ڪتم نئين ٿيون.

پولوس آڻو نمونو ڏيڪاڙين تيمٽيس رو حونصلو وڌاوه

⑪ ڀڳوون مون نٽه ايٺا هارو مک شيلو سوندين راکيوھ جي هون هائي ڪشي رٿي ڪهر منڪون نٽه همپڙاون ان هيا را پارام شيڪاڙون. ⑫ تيا ري ڪري هون

اي ڏک پڻ سهونھ ريو، توڻي پڻ هُون ايسُو را پارام ڪُشي رڻي ڪبر همپڙايا ٿي
 للڙي نٽي مرتو، ڪم تو پڳوونَ جيا مانھ مارو يقينَ سئ، اُوڻا رڻي مُون نئ ڪبر
 سئ، ان مُون نئ پڪڙي ڪاترڻي سئ جي اُو آپري ڪڙا ٿي هائي ايسُو را پارام
 ڪُشي رڻي ڪبر، جيئي اُوئ امونت را زم مارئ حوالئ ڪريئ، آڪري نيا را ڏي
 هُوڏي پڌليا وڳر صحيح راڪي هيڪئ.

⑬ جي صحيح واتون تئين مُون ٿي هومپڙيھ، اُو واتون مارا نمونا مانھ وين
 شيڪاڙتو رئ، ان ايسُو ڪريست ٿي واسطو راڪين وشواس راڪتو ان پريم ڪرتو
 رئ. ⑭ هائي ايسُو را پارام ڪُشي رڻي ڪبر جيئي پڳوونَ نائوڪي امونت را زم
 تارئ حوالئ ڪريئ، هيا نئ تُون پوٽر آتما ري ڪڙا ٿي، جيو آپون موئين سئ،
 پڌليا وڳر صحيح راڪتو رئ.

⑮ تُون نئ تو ڪبر سئ جي آسيه صوپا ري ٻڌي وشواسيئي مُون نئ ساڏيوھ
 پرو، جيون موئين فوگلس ان هرْمُگنيس سئ. ⑯ پڻ اُنيسِفُرس را گهر مانھ پريُو
 ڏٺا ڪرئ، ڪم تو اُوئ مُون نئ گهڻي وار حوصلو ڏيڏو ان اُو للڙي نه مريو
 جي هُون قيڏي سون، ⑰ پڻ اُوئ ايٿئ روم شهر ۾ آوين گهڻي ڪوشش ٿي
 مارئي گوت ڪريي ان مُون نئ گوتي لڏو. ⑱ پريُو ايسُو ام ڪرئ جي آڪري
 نيا رئ ڏي ايشور اُوڻا مانھ ڏٺا ڪرئ. ان افسُس شهر ۾ اُنيسِفُرس پڳوونَ ري
 شيوا هارو جئين ڪئين ڪريو، اُوڻا رڻي تو تُون نئ ٻڌي ڪبر سئ.


زم نائوڪو ڦوجي آپرا ساب را حڪم مانھ وئھ

تم ايسُو ڪريست را حڪم مانھ وينا ريوو

2 ① تيام تُون، مارا ڏيڪرا، اُو هيٺ راڪ، جيئي پڳوونَ تُون مانھ ڪرپا
 ڪرين تُون نئ ڏئھ، ڪم تو تُون ايسُو ڪريست ٿي واسطو راڪئھ. ② ان جي
 واتون تئين مُون ٿي گهڻون شائيتون هومي هومپڙي، اُوئون نئ ايون ايمونڌار
 منڪون رئ حوالئ ڪر، جيا پيزون نئ پڻ شيڪاڙيا جيوا هوئ.

③ زم نائوڪو ڦوڄي آڀرا ساڀ را حڪم مانھ وُڍا ھارُو ڏڪ ان تڪليھون سھڻھ، تم تون مارا زم ايسو ڪريست را حڪم مانھ وُڍا ھارُو ڏڪ ان تڪليھون سھڻو رڻھ. ④ جيو ڦوڄي ڪوم مانھ سڻھ، اُو ايوو ڪوم نٿي ڪرتو جيو ڦوڄيون رو نٿي زم اُو آڀرا ساڀ نڻھ ڪُش ڪرڻھ. ⑤ ان جيو مل وِڌھ، جي مل را اصول پرموڻھ نئين وڻھ، تو اُٿا نڻھ انصاڀ نئين زڙھ. ⑥ جيو ھاري مينت ڪرڻھ، اُٿا رو حق سڻھ جي مور ٿي آڀاڏي رو حصو اُٿا نڻھ زڙھ. ⑦ ھايون مثالون مانھ ويچار ڪرتو رڻھ، ڪم تو پريو تون نڻھ ٻڌيون واتون نڻھ ھزميا رڻي ھيمت ڏيشي.

⑧ ايسو ڪريست رڻي ياڏ راکتو رڻھ، جيا نڻھ پڳوون مرلون موئين ٿي جيوي اُٿاڙيو، جيو دائود ڀاڏشا ري پيڊي رو ھتو. ھائي اُٿا ڪشي ري ڪٻر رڻي وات سڻھ، جئي ھون شيڪاڙونھ.



⑨ ايٿا ڪشي رڻي ڪٻر ھمڙيا ڀر ھون اٿا ڏڪ ان تڪليھون سھونھ ريو جي ھون ڏوھاري را زم ھٽڪڙي لاڳل ڦيڏي سون. ھون تو ڦيڏي سون پڻ پڳوون رو وچن آزادي ٿي پڪڙھ ريو. ⑩ تيام ھون ٻڌي ڏوروڻ اُٿون منڪون ھارُو

صير ٿي سھونھ، جيون نڻھ پڳوون وشواس راڪيا ھارُو سُونڊياھ، زم اُٿون نڻھ پڻ ايسو ڪريست ٿي واسطو راڪيا ٿي تارڻ زڙھ، ان اُو آڪاش موئين ھميش ھوڏي مون ڀر رڻھ. ⑪ اي وات ھاسئي سڻھ:

”جي آڀي ايسو مانھ وشواس راڪين زوڻھ ايسو پيڙا مريا،

تو آڀي ايسو پيڙا آڪاش موئين جيوتا ريشون.

⑫ جي آڀي ڏوروڻ سھين وشواس راڪتا ريون،

تو آڀي ايسو پيڙا راز ڪرڻون.

جي آبي ايسو رو انڪار ڪرڻ،
 تو ايسو پڻ آڻو انڪار ڪري.
 (13) جي آبي آڻا وائڏا مانھ نه وون،
 توئي پڻ ايسو آڻا وائڏا مانھ ویتو ريشي،
 ڪم تو او آڻا وائڏا ۾ ڪوڙو نتي ٿي هيڪتو."

پڳوون رو شيواڌاري ٿين هر وات ۾ ناٿوڪٽ نمونئ ويو

(14) هائي واتون منڪون نئھ ياد ڏيوراوتو رٿ، ان پڳوون هومو اوئون نئھ ڪئھ جي
 او نالئي پڇڻ نه ڪرئ، ڪم تو هيا ٿي ڪئين ڦاڻڏو نتي، ان هومپڙيا وازون
 نئھ ڪراپ ڪرئ. (15) ٿون ڪوشش ڪر جي پڳوون رو هاسو وڃن صحيح نمونئ
 شيڪاڙين ٿون پڳوون ري نظر ۾ آڻ نئھ ايموندار ڏيڪاڙئ، زم هيڪ هاري آڻرو
 ٻني رو ڪوم صحيح نمونئ ڪرين آڻا زميڏار هومو لازي نتي مرتو. (16) پڻ
 پڳوون رٿ ڪلاڦ ناليون واتون ٿي پاھو ڏئ، ڪم تو هيويون واتون ٿي منڪ
 پڳوون ري مرضي رٿ ڪلاڦ ڪومون ۾ آڳڙ وڌتا رٿ. (17) ان جيا منڪ هيوي
 واتون ڪرئ، اوئون رٿي وات ڪينسر ري پيماري را زم پڪڙين ٻيزون منڪون
 نئھ پڻ ڪتم ڪرئ. هيوي واتون شيڪاڙيا وازون موئين همنيس ان فليٽس سئ.
 (18) اوئي هاس نئھ ساڏيوھ پرو ان ام ڪئھ جي پڳوون منڪون نئھ مريا ڪيڙ
 جيوي نئين اوناڙئ، پڻ جيوي اوناڙيا رٿي وات روڳئي مثالي وات سئ ان اڳي
 ٿي گئيھ، زئيون ايسو مانھ وشواس راڪيا ٿي زوئھ نوئي حياتي زڙئيھ. ان او
 هيوئ نمونئ ڪئينڪ منڪون را پڪا وشواس ۾ شڪ نوڪئھ. (19) توئي پڻ پڳوون
 رٿي ناول وشواسي منڌڙي زوئھ پڪي پٺياڌ مانھ ناول سئ، ان اوئا مانھ زوئھ
 ٺپو هٿل سئ جيا مانھ اي واتون لڪل سئ:
 "پرو آڻون منڪون نئھ اوڙڪئھ."

ان ٻيزو لڪل سئ:

”جيو ڪوئي پريو رو نوم لئه، اونا رئه پوندائي ٿي پاھو ڏيو.“

②0 هونءَ ڪياڪ موتا گهر ۾ نه رڳو هيم ان چونڌي را نونپڙا هونءَ، پڻ لاکڙي ان ماتي را نونپڙا پڻ هونءَ. ڪئينڪ نائوڪا ان مون واڙا سئ، ان ڪئينڪ ڪراپ ان مون واڙا نٿي. ②1 هيونءَ نمونءَ جيو ڪوئي آپرو صاف من راکين ڪراپ منڪون ٿي ڌار رئه، اُو مون واڙا نونپڙا را زم ٿيشي، ڪم تو اُو پويتر ڪرل سئ، آپرا ڌڻي هارو ڪوم واڙو سئ، ان هر نائوڪا ڪوم هارو تيار سئ.



②2 تيام تون اونون ڪراپ ڪيالون ٿي شيتي پاڳ جيا جوڻي ۾ آونءَ، پڻ اي ڪوشش ڪر جي تون پڳوون ري وات مانءِ وٺ، وشواس راکئ، پريم ڪرئ، ان اونون ٻڌون ٿي هپ راکئ جيا صاف من ٿي پريو رو نوم لئه. ②3 پڻ جي واتون منڪ عقل وٺي ان شيڪيا وگر ڪئ، اونون واتون ٿي پاھو ڏئ، ڪم تو تون نئ ڪبر سئ جي هايون واتون ٿي جهيڙا جهڳڙا ٿئ. ②4 اي وات نائوڪي نٿي جي پڳوون رو شيواڌاري جهيڙو جهڳڙو ڪرئ، پڻ اونا رئه نرمي ٿي ويو، شيڪاڙيا ۾ هوشيار ريو، ان زليون منڪ اونا ٿي ڪراپ نمونءَ وٺ، تو اونا رئه اونون هون صير ٿي ويو ڪپئ. ②5 ان جيا ڪلاڦ سئ، اونون نئ نرمي ٿي هزماوو ڪپئ. مون پڳوون اونون نئ هيئت ڏئ جي اُو ڪوڙي واتون ساڌين توپونءِ ڪرئ ان هاس نئ اوزڪئ، ②6 ان شيطون را قوضا ٿي سوتين، جيا ۾

شيطونَ اُئون نئه ڦٽراوينَ راڪيا تا، اُو وڙي حوصلام آوئه، ان پڳوونَ ري مرضي مانه وئه.

دُنيا را ايٺا پڇاڙي واڙا وڪت ۾ ڪراپ منڪون ٿي هوشيار ريوو

3 ① پڻ تون اي وات يادَ راڪ، جي دُنيا را ايٺا پڇاڙي واڙا وڪت ۾ ڏورا ڏي آوشي. ② ڪم تو منڪ ايوا هوشي جي رُوگا آپ را پارام سوچشي، پئيهون رئي لالچ راڪشي، آپرئي موتائي ڪرشي، آپ نئه موتا هڙمشي، ان زم تم ٻولشي. اُو مان ٻاپ رو ڪيڏو نئين مونئه، ڪيا رو ٿورو نئين مونئه، پڳوونَ ريون واتون مانه نئين وئه، ③ ڪيا ٿي پريم نئين راڪئه، ان ڪيا ٿي نئين نهئه. اُو پيزون رئي ڳلا ڪرشي، آپرئي مرضي آپرا قوضام نئين راڪئه، ظلمي هوشي، پلائي رئه ڪلاڦ هوشي، ④ آپرون منڪون رئه ڪلاڦ ويشي، سوچيا وڳر ڪوم ڪرشي، آپرئي وات ٻڌون ٿي موتي هڙمشي، ان پڳوونَ ٿي پريم نئين ڪرئه، پڻ عيش عشرت ٿي پريم ڪرشي. ⑤ اُو آپ نئه ڌرم مانه وُڍا واڙا ڏيڪاڙشي، پڻ اُو پڳوونَ رئي ڏيڏل ڪڙا ليڏا ٿي نا پاڙشي، ان اُوئا ري مرضي مانه نئين وئه. هيون منڪون ٿي پاھو ڪر، ⑥ ڪم تو هايون موئين اُو منڪ سئه جيا چالاڪي ٿي منڪون ري گهري زائينَ ايويون پي عقل ڏوشيون نئه آپرئي وات مناوئه، جي آپ نئه گهڻي ڏوهاري هڙمئه ان قرق قرق ڪراپ ڪيالون ۾ ڦاٿل سئه. ⑦ هيوي ڏوشي هميش نوي نوي واتون شيڪتي رئه، پڻ هاس نئه ڪيڏي نئين اوڙڪي هيڪئه. ⑧ زم مصر ملڪ را جاڏو ڪريا واڙا ينيس ان يمبريس موسي رئه ڪلاڦ ٿيا تا، تم هائي منڪ هاس رئه ڪلاڦ ٿئه. هايون منڪون را من ڪراپ ٿي ڳياھ، ان هائي پڳوونَ را ڪوم را نٿي، ڪم تو پڪو وشواس نٿي راکتا. ⑨ پڻ هائي منڪ آڳڙ نئين وڌئه، ڪم تو زم موسي رئه ڪلاڦ ٿيا واڙون رئي وات ساوئي ٿئي، تم هايون رئي وات پڻ ٻڌون هومئي ساوئي ٿيشي جي اُو ڪيا پي عقل سئه.

ڏک تڪليلپون سهين هاسو وشواس راکو

⑩ پڻ تئين مارو ٻڌو نمونو زويو، جي هون ڪي شيڪاڙون، هون ڪيوئه نمونئ وون، مارو حياتي رو مقصد ڪي سئ، هون ڪيوو وشواس راکون، منڪون ٿي ڪيوو سپر ڪرون، ڪيوو پريم راکون، ڪيوئه نمونئ ڏوروڻ سهون، ⑪ منڪ مون نئ ڪتو تنگ ڪرئ، ان مون نئ ڪتو ڏک زڙئ. تون نئ ڪپر سئ جي انطاڪيم، اڪنيم، ان لستره شهرن موئين مون ٿي ڪي ٿيو تو، منڪي مون نئ ڪتو تنگ ڪريو تو ان مئين ڪتو ڏک سهيو تو. پڻ هايون ٻڌيون واتون موئين ٿي پريو مون نئ پچايوه. ⑫ هوئ زتا منڪ ايسو ڪريست ٿي واسطو راکين پڳوون ري مرضي مانھ ويوا ڪرئ، اوئون ٻڌون نئ منڪ تنگ ڪرشي. ⑬ پڻ ڪراپ منڪ جيا ڪوڙ ڪرين آپ نئ نائوڪا ڏيڪاڙئ، او وڌيڪ ڪراپ ٿيا ۾ آڳڙ وڌشي، او پيزون نئ ڪوڙي واتون مناوشي ان آپ ڪوڙيون واتون مانھ ويشي. ⑭ پڻ تون اوئون هاسيون واتون مانھ ويتو رئ جي تئين شيڪي تي ان



جيا را پارام تون نئ پڪئي ڪاتري سئ. ڪم تو تون نئ ڪپر سئ جي هائي واتون تئين ڪيوون منڪون ٿي شيڪي تي، ⑮ ان تون ننڪو ٿڪو پويتر شاستر زوئئ، جيو تون نئ ايوي هزم ڏي هيڪئ جي ايسو ڪريست مانھ وشواس راکيا ٿي تون نئ تارن زڙئ. ⑯ پويتر شاستر رئي هر هيڪ وات پڳوون را طرف ٿي سئ، ان ايئا هارو ڦاڻيڏا واري سئ جي منڪون نئ شيڪاڙئ، اوئون رو

کرل ڏوه کايڻه، اوتون ننه صحيح وات هزماوڻه، ان پڳوون ري وات مانھ وُڍا رو نمونو ڏيکارڻه، ⑰ زم پڳوون را شيواڌاري پکا ٿي زائھ ان هر نائوڪو کوم ڪريا هارو تيار ٿئھ.

هيمت نه هارين پڳوون رو وچن همپزاوَوو

4 ① هون پڳوون هومو ان ايسو ڪريست هومو، جيو جيوتون ان مرلون رو نيا ڪرشي، اوتا رنه پاسو آيا ان راز ڪريا ري ڪري تون ننه اي حڪم ڏيونھ، ② جي تون پڳوون رو وچن همپزاوتو رنه، هر توتنه همپزيا هارو تيار رنه پلنه نائوڪو موقعو هوڻه ڪا نه هوڻه، ان پورا صير ٿي منڪون ننه شيڪارڙين اوتون را ڪرل ڏوه کاي، اوتون ننه هزماو، ان اوتون ننه صحيح واتون مانھ وُڍا رو حوصلو ڏئھ. ③ ڪم تو ايرو وڪت آوشي زئون منڪ آپني صحيح شيڪارل واتون نئين موننه، پڻ او آپرون ڪراپ ڪيالون مانھ وين آپ هارو گهڻا ايوا شيڪارڙيا واڙا راکشي، جيا اوتون ننه ايوي واتون شيڪارشي جيوي او هومپزاو ڪرئھ. ④ ان او هاس مانھ ڪون نئين ڏئھ، پڻ منڪون ريون امهي ناول وارتائون مانھ ڏيون ڏيشي.


⑤ پڻ تون ٻڌيون واتون ۾ عقل راکين وئھ. زئون منڪ تون ٿي ڪراپ نموننه وئھ تو اوتون ٿي صير راک، ايسو را پارام ڪشي رئي ڪبر همپزيا واڙا رو کوم ڪر، ان جئي شيوا پڳوون تون ننه ڪريا هارو ڏيڏيھ، او تون پوري ڪر. ⑥ ڪم تو هون هوڻه موت رئي سزا کائين پڳوون را نوم مانھ آپرو جيو ڏيڏا مانھ سون، ان مارئھ ايٿا ڏيا ٿي زايا رو توتو آيوھ رو. ⑦ زم ملي پوري ڪوشش ٿي مل وڌئھ، تم مئين پوري ڪوشش ٿي پڳوون رو نائوڪو کوم ڪريوھ. زم ڊوڙيا واڙو ڌنگ هوڏي ڊوڙئھ، تم مئين پڇاڙي هوڏي پڳوون رئي شيوا ڪريھ. ان مئين پورو وشواس راکيوھ. ⑧ هوڻه مون هارو او انصاف تيار راکل سئھ، جيو پڳوون ري وات مانھ وُڍا واڙون ننه زڙشي. پريو، جيو انصاف ٿي ڦينصلا ڪريا

واڙو سٺ، اُو ٻڌون منڪون رو نيا ڪريا رٿه ڏي مُون نٿه هائي تارڻ رو انصاف ڏيشي. ان هائي تارڻ اُو نه رُوڳو مُون نٿه ڏيشي، پڻ اُوئون ٻڌون نٿه ڏيشي، جيا اُوئا رٿه پاسو آيا رٿي واٽ ڪشي ٿي زوڻه ريا.

اڪري واتون

⑨ مُون ڪن جلتي آيا رٿي ڪوشش ڪر. ⑩ ڪم تو ديماس ايٿا همٿوڪي ڏنيا ريون واتون ۾ پڙين مُون نٿه ساڏيوه پرو، ان ٽسليڪي شهر موئين گيوه پرو. ڪريسينس گلتيه صوپا موئين گيوه، ان طيطس دلمتيه صوپا موئين گيوه. ⑪ رُوڳو لوقا مُون ڪن سٺ. تُون مرقس نٿه پڻ آپ پيڙو تيڙو آوي، ڪم تو اُو پگهون رٿي شيوا ڪريام مارئي گهڻي مدت ڪرڻه. ⑫ مئين تخڪس نٿه افسس

شهر موئين تُون ڪن ميليوه. ⑬ جيئي چال هُون تروئاس شهر موئين ڪرپس ڪن ساڏي آيو تو، زئون تُون آوڻه تو اُو چال ليتو آوي، ان ماري ڪتابون پڻ، ڪاس ڪرين سونڀڙا ٿي ناوَل ڪتابون، ليتو آوي.



⑭ سيڪندر پيٽر رو ڪوم ڪريا واڙو مُون ٿي الاهي ڪراپ نمونئو وُڍو تو. پرپُو اُوئا نٿه اُوئا رون ڪومون پرمونئو ايوزو ڏيشي. ⑮ هايا ٿي تُون پڻ هوشيار ري، ڪم تو اُو آپتيون واتون رٿه گهڻو ڪلاڦ ٻوليو تو.

⑯ زئون مئين ڪورٿ ۾ پيرهيڻ وار آپرا پارام ڪيڏو تو، تئين ڪيئنه مارو ساٿ نتو ڏيڏو، ان ٻڌي منڪي مُون نٿه ساڏيوٽ پرو. مُون پگهون اُوئون نٿه هايا ڏوه رٿي سزا نه ڏئ! ⑰ پڻ پرپُو مارئي مدت ڪرئي ٿي، ان مُون نٿه ايوي هيمنت ڏيڏي ٿي، جي مئين ڪورٿ ۾ پورئو نمونئو ايسو را پارام همپڙايو تو، ان ڌاري قومون ري ٻڌي منڪي ايسو را پارام هومپڙيو تو، ان پرپُو مُون نٿه

موت ري سزا ٿي سڏايو تو. ⑱ پرڀو مون نٽه هر ڪراپ ڪوهر ٿي سڏاوشي، ان پلٽه مري زائون، توئي پڻ پرڀو مون نٽه تارڻ ڏين آڪاش موئين آپرا راز موئين راکشي. اوتا را وڪوڻ هميش هوڏي ٿيتا رٽه! آمين.

پولوس ٻڌون نٽه نمسڪار ڪٺه

⑲ مارا طرف ٿي ٻائي پرسڪله ان اوتا را آڏمي اڪوله، ان اُنيسفرس ري اڪائي نٽه نمسڪار ڪي. ⑳ اراستس ڪرنٽس شهر موئين ريو، ان ترفمس نٽه مئين ميليتس شهر موئين ساڏيو، ڪم تو او مونڏو هتو. ㉑ شيئاڙا ٿي مور تون مون ڪن آيا رئي ڪوشش ڪري. يوبولس، پودينس، لينس ان ٻائي ڪلوديه ان پيزا ٻڌائي وشواسي تون نٽه نمسڪار ڪٺه.

㉒ پرڀو تون پيزو هوٽه!

پڳوون تمون ٻڌون مانھ ڪرپا ڪرٽه!

طِيطُس را نوم مانه لکل کت رئي هزموئتي

کت لکيا وازو

اي کت پولوس لکيو (طيطس 1:1). پولوس اي کت اوتئ توتئ لکيو، زئيون پيرھين وار روم شهر موئين روميون رو قيدي تيو تو، ان پستئ آزاد تيو تو (مک شيلون را کوم 16:28، 30). ام لاگئھ جي آزاد تيا کيژ پولوس ايسو را پارام هميژايا هارو چارمو چکر کريو. اينا چکر مانه پولوس طيطس نئ تيزين کريتي بيت مانه گيو، ان اوتئ طيطس نئ ساڏين پيزيل گيو. ان پستئ اي کت طيطس نئ اندازام 65ع م لکيو.

کت کيا منک هارو لکيو

پولوس اي کت طيطس هارو لکيو (طيطس 4:1). طيطس يهودي قوم رو نتو، پڻ ڌاري قوم رو هتو (گلتيون 3:2). او گهڻي وار پولوس پيژو زاتو ريتو. پولوس اوتا نئ برنباس پيژو يروشلم شهر م اندازام 49ع م تيزي گيو تو (گلتيون 2:1-2، مک شيلون را کوم 4-2:15). پولوس اوتا نئ کرتئش شهر م پڻ اندازام 55ع م ميلو تو (2 کرتيئون 18:12). تيا کيژ پولوس اوتا نئ کريتي بيت مانه وشواسي منکون نئ صحيح واتون مانه ويورايا هارو اندازام 65ع ٿي لين 66ع هودي راکيو (طيطس 4:1-5). پولوس اي کت تيون لکيو، زئيون طيطس کريتي بيت مانه هتو. تيا کيژ پولوس اوتا نئ وڙي دلمتيه صوبا م اندازام 66ع ٿي لين 67ع هودي ميلو پرو (2 تيمونيئس 10:4).

کت لکيا رو مطلب


پولوس اي کت اينا هارو لکيو، کم تو کريتي بيت مانه منک وشواسيون نئ کوڙي واتون شيڪاڙتات ربا. تيام پولوس طيطس نئ اڪتياري ٿيڌي، زم او وشواسي منڌڙيون مانه ناٿوڪا آڳيون راکئ، کوڙي واتون شيڪاڙيا وازون نئ روڪئ، ان وشواس ري هاسي واتون شيڪاڙئ.

ایټا کتاب را شاستر ټي پيزا حوالا:

طیطس 1:1	کوم 9:1-19
طیطس 4:1	گلتيون 2:1-3
طیطس 4:1	2 کُرنتيون 2:13
طیطس 4:1	2 کُرنتيون 6:7, 13-15
طیطس 4:1	2 کُرنتيون 8:6
طیطس 4:1	2 کُرنتيون 8:16-17, 23
طیطس 4:1	2 کُرنتيون 12:18
طیطس 5:1	کوم 2:11
طیطس 10:1	پيدایش 17:9-14
طیطس 14:1	احبار 11:1-47
طیطس 15:1	مرقس 7:14-23
طیطس 15:1	لوقا 11:41
طیطس 9:3	احبار 1:1-34
طیطس 12:3	کوم 20:4
طیطس 12:3	افسيون 6:21
طیطس 12:3	کلسيون 4:7
طیطس 13:3	کوم 18:24-19:1
طیطس 13:3	1 کُرنتيون 1:12
طیطس 13:3	1 کُرنتيون 3:4-6
طیطس 13:3	1 کُرنتيون 16:12

طيطس

را نوم مانھ پولوس رو لکل کت



1 ① هُون لکيا وازو پولوس سون، جيو پڳوون رو شيواڌاري ان ايسو کريست رو هيک مک شيلو سون. ايسو کريست مون ننه ايٿا هارو سوندين را کيوه جي هُون پڳوون رون سونديل منکون ننه صحيح وشواس رکاوون، ان اوئون ننه هاس رئي پورئي کبر ڏيون جي کم کرين پڳوون ري مرضي مانھ ويو، ② زم او پروسو راکنه جي اوئون ننه هميش رو جيون زڙشي. پڳوون جيو کيڏي کوڙ نتي ڪرتو، جڳت ننه نايا مور هميش رو جيون ڏيڏا رو وائڏو ڪريو تو، ③ ان هونھ آپرا توتا مانھ آپرو هميش را جيون رو وچن منکون ننه همپزيا ٿي ساوو ڪريوه. اي وچن همپزيا رو ڪوم آپون ننه پچايا وازا پڳوون را حکم پرموتنه مارنه حواله ٿيوه. ④ پريمي پاڻي طيطس، تون جيو مارا هاسا ڏيڪرا جيوو سته، کم تو تئين مون ٿي ايسو را پارام هومپزين مارا زم وشواس اوٿيوه، آپتو باپ پڳوون ان آپون ننه پچايا وازو ايسو کريست تون مانھ ڪرپا ڪرته

ان تون ننه هڪي راکنه!

طيطس رو ڪريتي بيت مانھ ڪوم

⑤ هون تون ننه ايٺا ڪوم هارو ڪريتي مانھ ساڏين گيوھ، جي زتي واتون هزون ريل سئ، او تون صحيح نمونھ پوري ڪرئ پري، ان هر شهر موئين منڪون ننه وشواسي منڌري مانھ آگيوون ڪرين راکنه، زم مئين تون ننه ڪيڌو تو.

⑥ او آگيوون ايوا هوئ، جيون مانھ ڪئين الزوم نه هوئ. او روگهي هڪ ڏوشي راکنه ان پيزيل نه زائ. اوئون را پاڙ وشواس راکتا هوئ، ان ايوا نه هوئ جيون مانھ عيش عشرت رو الزوم هوئ ان ڪيا رو ڪيڌو نه مونتا هوئ. ⑦ وشواسي منڌري ننه همپازيا وازون مانھ ڪوئي الزوم نه هوو ڪپئ، ڪم تو پگهون اوئون ننه آپرون منڪون مانھ آپرا ڪوم هارو سوندين راکياھ. تيام او آپري مرضي مانھ وودا وازا نه هوئ، رينهٽيٽار نه هوئ، شراپي نه هوئ، ماري وازا نه هوئ، ان لالچ نه راکتا هوئ. ⑧ پڻ او مزمونون رو مون راکيا وازا



هوئ، پلائي ڪريا وازا هوئ، عقل راکتا هوئ، انصاف ٿي وودا وازا هوئ، پويتر نمونھ وودا وازا هوئ، آپري مرضي ننه قابوم راکيا وازا هوئ، ⑨ ان اوٺا هاسا وچن مانھ يقين ڪرتا هوئ، جيو اصلي شيڪاڙل واتون پرموئنه سئ، زم وشواس ري صحيح واتون شيڪاڙيا ٿي منڪون ننه حوصلو ڏي هيڪئ، ان هاسا وچن رئ ڪلاف ٻوليا وازون ننه هزماوي هيڪئ.

⑩ اي ضروري سٺ، ڪم تو ڪريتي ۾ ايو ا گهڻا منڪ سٺ، ڪاس ڪرين
 يهودي قوم رون وشواسيون موئين ٿي، جيا ڪيا رو ڪيڏو نٿي مونت، ان اُو نالي
 واتون ڪرڻ، ان منڪون نٺ ڪوڙي واتون شيڪارڙين هاس ٿي ڦيروڻ. ⑪ اُوئون
 نٺ ماڻ ڪراوو ڪپڻ، ڪم تو اُو پڙهيون رڻي لالچ راڪين آپرا ڦاڻيڏا هارو ايوي
 آڏي اُوپتي واتون شيڪارڙه جي نه شيڪارڙو ڪپڻ، ان هيون نمونٺ اُو گهر گهر
 رون ٻڌون منڪون نٺ بگاڙه پرا. ⑫ ڪريتي پٺ رو اُوئون رو آپرو هيڪ منڪ،
 جيا نٺ اُو پڳوون رو نياپو ڏيڏا واڙو هڙمڻ، اُوڻه آپ ڪيڏو جي
 ”ڪريتي را منڪ هميش ڪوڙا،
 جهنگلي زناورون جيوا ڳولا،
 لپڙا ان سُست پڻ سٺ.“

⑬ هائي وات تو هاسي سٺ. تيام هايون نٺ سڪتي هون هڙماوتو رڻ، زم اُو
 صحيح وشواس راڪڻ، ⑭ ان يهوديون ريون امهي ٺاؤل وارتائون مانھ ڏيون
 نه ڏڻ، نڪو اُوئون منڪون رون ٺاؤل حڪمون مانھ ڏيون ڏڻ، جيئي هاس نٺ
 ساڏيوه پرو. اُو ايو ا حڪم همپڙاوه جي ”قلوئي شينھ پويتر نٿي، اُوڻا ٿي پاھو
 ڪرو.“ ⑮ پڻ هاس ۾ جيا رو من پويتر سٺ، اُوڻا هارو ٻڌي شينھون پويتر سٺ.
 ان جيا رو من ڪراپ سٺ ان وشواس نٿي راڪتو، اُوڻا هارو ڪئين پڻ شينھ پويتر
 نٿي. پڻ هايون منڪون رڻي عقل ان من ٻي ئي ڪراپ ٿي ڳياھ. ⑯ اُو اي وڏائي
 ڪرڻ ”امي پڳوون ٿي واسطو راڪونھ،“ پڻ اُوئون را ڪوم زوين ڪبر پڙڻ جي
 پڳوون ٿي ڪئين واسطو نٿي راڪتا، ڪم تو اُو هاو پونڌا سٺ، پڳوون رو ڪيڏو
 نٿي مونت ان ڪئين ٺاؤڪو ڪوم ڪريا جيوا نٿي.

وشواسيون رڻ آپرون منڪون ٿي ڪيوڻ نمونٺ ويو

① پڻ ٽون اُو واتون شيڪارڙ جي وشواس ريون صحيح شيڪارڙ واتون
 2 پرمونٺ سٺ.

② ڏوڪرون منڪون نٿه ام شيڪاڙ جي او آڀرو من آڀرا ڪيڏام راکڻه، ايوئ
نمونئ وئ جي منڪون ۾ آڀرو مون هوئ، عقل راکڻه، ان صحيح نمونا ٿي وشواس
راکڻه، پريم ڪرئ ان ڏوروڻ صير هون سهئ.

③ هيوئ نمونئ ڏوڪريون نٿه پڻ ام شيڪاڙ جي او ڀڳوون رو مون راکين ام
وئ زم ڀڳوون رئي شيوا ڪريا واريون رئ ويو ڪپئ. او نڪو ڳلا ڪريا واري
هوئ، نڪو اوئون رو ڌارو پيڏا رو ڍوڻ پڙل هوئ، پڻ نائوڪي واتون شيڪاڙيا
واري هوئ. ④ هيوئ نمونئ او جوڻ ڏوشيون نٿه هڙماوي هيڪئ جي او آڀرا
آڏمي ٿي پريم راکڻه، آڀرون ٻاڙون ٿي پريم ڪرئ، ⑤ عقل راکڻه، پوندو ڪوم
نه ڪرئ، آڀرا گهر رو ڪوم نائوڪئ نمونئ ڪرئ، ٻيڙون مانھ ميرپونئي ڪرئ،
ان آڀرا آڏمي ري مرضي مانھ وئ، زم ڪوئي ڀڳوون را وڃن رئ ڪلاڦ نه ٻولئ.

⑥ هيوئ نمونئ تون جوڻ آڏميون نٿه پڻ هيئت ڏين شيڪاڙ جي او عقل
راکڻه. ⑦ هر وات ۾ تون آڀ نائوڪا ڪوم ڪرين اوئون نٿه نائوڪا ڪوم ڪريا
رو نمونو ڏيڪاڙ. هاسا من ٿي ايوئ نمونئ شيڪاڙ زم منڪ تارو مون راکڻه،
⑧ ان ايوي صحيح واتون ڪر جيون نٿه ڪوئي ڪراپ نه هڙمئ، زم او منڪ جيا
آپئئ ڪلاڦ سئ، او آپئي ڪيا وات رئي ڳلا نه ڪري هيڪئ ان او لازي مرئ.
⑨ ڳلومون نٿه ام شيڪاڙ جي او آڀرون ڏٿيون ري مرضي مانھ وئ، هر وات
۾ اوئون نٿه ڪش راکڻه، ڪوم رو جواپ نه ڏئ، ⑩ گهر ۾ سورئي نه ڪرئ،
پڻ نائوڪئي شيوا ڪريا ٿي اي ڏيڪاڙئ جي او آڀر نٿه ٻڌيون واتون ۾ ايمونڌار
راکڻه، زم او هر وات ۾ آڀون نٿه ڀڄايا وارا ڀڳوون ريون شيڪاڙل واتون رو
مون وڌاوئ.

⑪ وات اي سئ، زئيون ايسو اينا جڳت ۾ آيو، تئيون ڀڳوون رئي ڪرپا
ساوئي ٿئي، جيا ري ڪري ٻڌائي منڪ ڀڄي هيڪئ. ⑫ ان ڀڳوون آڀري اينا
ڪرپا ٿي آڀون نٿه شيڪاڙئ زم آڀي ڀڳوون ري مرضي رئ ڪلاڦ ان اينا ڏنيا
رون ڪراپ ڪيالون مانھ وڍا رو ساڏون، ان همئئ اينا همٿوڪا زمونا ۾ عقل

راکتا ريون، منڪون هُون انصاف ٿي وون، ان پڳوونَ ري مرضي مانھ وِيتا ريون،
 ⑬ ان آبي اُونڀا پاڳواڙا توڻا رڻي وات زوتا ريون، جيا مانھ پروسو راکونھ، زئيون
 آڀڻو مونواڙو پڳوونَ ان پڇايا واڙو ايسو ڪريست پاسو آوينَ زبڪتا سوجھرا
 ۾ ساو وِيشي. ⑭ اُوڻھ آڀرو جيوَ آڀون ھارو ڏيڏو، زم آڀون نڻھ ھر قسم ري
 پُونڌائي ٿي سڏاوڻھ ان آڀون نڻھ پوِتر ڪرينَ آڀ ھارو ايوي ھيڪ منڌڙي ٺاوڻھ،
 جيا را منڪ پورا شونق ٿي ٺاُوڪا ڪوم ڪرتا رڻھ.
 ⑮ ھوڻھ تُون پوري اِڪتياڙي ٿي ھائي واتون شيڪاڙتو ري، ھايون مانھ وُڍا
 رڻي ھيمت ڏيتو ري، ان ھايون مانھ نہ وُڍا واڙون نڻھ ھزماوتو ري. ٻڌون منڪون
 رڻھ تارڻي وات مونو ڪپڻھ.

وشواسيون رڻ پيزون ٿي ڪيوڻ نمونئ ويو

3 ① منڪون نڻھ يادَ ڏيوراوتو ري جي اُو راز ڪريا واڙون ان آڳيونون ري
 مرضي مانھ وڻھ، اُوئون رو ڪيڏو مونڻھ، ان ھر ٺاُوڪو ڪوم ڪريا ھارو
 تيار رڻھ. ② اُو ڪيا رڻي ڳلا نہ ڪرڻھ، جھيڙو ڪريا واڙا نہ ٿڻھ، نرم طبيعت را
 ٿڻھ، ان ٻڌون منڪون ٿي ھر وات ۾ ڳريپ ٿين وڻھ.
 ③ آڀڻھ يادَ راکو جي آبي وشواسي پڻ اڳي پيزون منڪون را زم ھتا. آبي
 پڻ عقل ووڻا، ڪيا رو ڪيڏو نہ مونيا واڙا، ان ڪوڙيون واتون مانھ وُڍا واڙا
 ھتا. آبي ھر نمونا رون ڪراپ ڪيالون ان عيش عشرتون ۾ ڦاڻل ھتا. آبي منڪون
 ٿي وير راکتا ان اُوئون مانھ ريشي ٻڙتا. آبي آڀ ھاو پُونڌا ھتا ان ھيڪا پيزا ٿي
 دُشمنڻي راکتا. ④ پڻ زئيون آڀون نڻھ پڇايا واڙھ پڳوونَ آڀڙي ميرپونڻي ان
 پريم ساو ڪريو، ⑤ تو اُوڻھ آڀون نڻھ پڇايا. ام نڻي جي آبي پڳوونَ ري وات
 مانھ وينَ ٺاُوڪا ڪوم ڪريا تا، تيام پڳوونَ آڀون نڻھ پڇايا. پڻ اُوڻھ آڀ آڀون
 مانھ ڏيا ڪريھ، تيام آڀون نڻھ پڇاياھ. زئيون آبي پوِتر سنون ليڏو، تئيون
 پڳوونَ آڀون نڻھ ماڦي ڏينَ نوو جيوَن ڏيڏو ان پوِتر آتما ري ڪڙا ٿي آڀون نڻھ

نوا نايا. ⑥ اي پويتر آتما پڳوونَ آپون ننه پچايا واڙا ايسو ڪريست هات آپون ننه ڪشي ٿي ڏيڻو، ⑦ زم آپون ننه پڳوونَ ري ڪرپا ري ڪري آپون ڏوهون رهي ماقئي زڙئه، ان آپون ننه پڳوونَ رو وائيڏو ڪرل هميش رو جيون ليڏا رو حق زڙئه، جيا رهي آبي پروسو راڪين واٽ زوئونه ريا.

⑧ هائي ٻڌي واتون هاسي سئه، ان مارئي مرضي سئه جي تون هايون واتون مانه زور ڏئه، زم او منڪ جيئي پڳوونَ مانه وشواس اوڻيوه، او نائوڪا ڪوم ڪريا رو ڪيال راڪئه. هائي واتون نائوڪي سئه ان منڪون هارو ڦاڻيڏا واري سئه. ⑨ پڻ ازايا پحت ٿي، منڪون رئه پيڊيون ريون واتون ٿي، ان موسي رون لڪل حڪمون را پارام جهيڙا جهيڙا ٿي تون پاھو ڪري، ڪم تو ايئون ۾ ڪئين ڦاڻيڏو نٿي ان نالي واتون سئه. ⑩ جيو منڪ هيوي واتون ڪرئه جي صحيح وشواس پرموئنه نٿي، تو اوئا ننه هزماو. ان جي ٻي وار هزمايا ڪيڙ پڻ نٿي مونتو، تو اوئا ٿي واسطو ڪتم ڪر، ⑪ ڪم تو ٿارئه ام هزموو ڪپئه جي ايوو منڪ هاس ٿي ڦري گيوه، ان او زوئي ڪرين ڏوه ڪريا ٿي آپ ننه ڏوهي ڪرئه.

⑫ هون تون ڪن ڪياڪ منڪ ننه ميلي، ارتماس ڪا تخڪس ننه. زئون او تون ڪن آوئه، تو تون مون ڪننه نيڪپلس شهر موئين تاڪڙو آوي، ڪم تو مئين ڦينصلو ڪريوه جي شيئازام اوئنه ريون.

⑬ زيناس وڪيل ان اڀلوس رئه اوئون رونا ٿيا ۾ گهڻي مدت ڪر زم هايون ننه پنڌ ۾ ڪيا شينه رهي ڪپ نه پڙئه. ⑭ آپتون وشواسي پايون رئه پڻ شيڪوو ڪپئه جي ضرورت وازون رهي ڪپ پوري ڪريا هارو او هميش نائوڪا ڪوم ڪرتا رئه، زم اوئون ري حياتي ٿي پيزون ننه ڦاڻيڏو ٿئه.

⑮ مون پيڙا جيا منڪ سئه، او ٻڌائي تون ننه نمسڪار ڪئه. امون ٿي پريم راڪيا وازون وشواسي پايون ننه امارا طرف ٿي نمسڪار ڪي. پڳوونَ تمون ٻڌون مانه ڪرپا ڪرئه!

فليمونَ را نوم مانه لکل کت رئي هزموئتي

کت لکيا وازو

اي کت پولوس لکيو، ان کت لکيا رڻه توتڻه تيمٽيس پڻ اوتا پيڙو هتو (فليمونَ 1:1). کلسيون نڌ کت لکيا رڻه توتڻه اوتڻه اندازا م اي کت پڻ لکيو، ڪم تو انيسمس پيئون ڪتون نڌ پوڳاڙيا وازو هتو (فليمونَ 12:1، کلسيون 9:4). ام لاڳڻه جي اوتڻه توتڻه پولوس پيرهين وار روم شهر م روميون رو قيڙي هتو (فليمونَ 9:1، 13، 23). اوتڻه پيئون سالون هوڏي مسواڙ مانه ليڏل گهر موئين ڦوج را پاهرام ريتو (مڪ شيلون را ڪوم 16:28، 30). رڙيون پولوس انيسمس نڌ آپرا ڏئي فليمونَ ڪن پاسو ميلتوت ريو، تيون اوتڻه اي کت فليمونَ نڌ اندازام 60ع م لکيو.

کت ڪيا منڪ هارو لکيو

پولوس اي کت فليمونَ هارو لکيو (فليمونَ 1:1). فليمونَ کلسي شهر رو هيڪ وشواسي هتو، جيا ري گهري وشواسي منڌڙي پيڙي ٿينتي (فليمونَ 2:1). اوتا وڪت م گهڻون منڪون ڪن ڳلوم هتا (کلسيون 22:3-1:4). فليمونَ رو هيڪ ڳلوم هتو جيا رو نوم انيسمس هتو. ام لاڳڻه جي او ڳلوم انيسمس آپرا ڏئي فليمونَ رئي سورئي ڪرئي (فليمونَ 18:1)، ان پس هتائين پاڳي ڳيو. تيا ڪيڙ او شيتي شيتي زائين پولوس ڪن پوڳيو، جيو قيد م هتو. اوتڻه پولوس ٿي ايسو را پارام واتون هوميزين وشواسي ٿيو (فليمونَ 10:1).

کت لکيا رو مطلب


اوتڻه رومي قانون هتو، ان اوتا قانون پرموتڻه ڏئي رو حق هتو جي پاڳل ڳلوم نڌ مارڻه پرو. تيام پولوس ايتا کت م پاڳل ڳلوم انيسمس هارو فليمونَ ٿي اي وينتي ڪرڻه جي او آپرا ڳلوم انيسمس نڌ نه مارڻه پڻ اوتا نڌ مائتي ڏڻه، آپرو وشواسي پائي هزمين اوتا هون پريم ٿي ملڻه، ان اوتا نڌ پولوس رئي شيوا ڪريا هارو پاسو ميلڻه.

ايثا كتاب را شاستر تي پيزا حوالا:

فَلِيمُونَ 24:1 کوم 25:12	فَلِيمُونَ 1:1 کوم 16:28
فَلِيمُونَ 24:1 کوم 13:13	فَلِيمُونَ 1:1 کوم 3-1:16
فَلِيمُونَ 24:1 کوم 39-37:15	فَلِيمُونَ 1:1 کوم 4:20
فَلِيمُونَ 24:1 کُلسيون 10:4	فَلِيمُونَ 2:1 کُلسيون 17:4
فَلِيمُونَ 24:1 کوم 29:19	فَلِيمُونَ 9:1 کوم 16:28
فَلِيمُونَ 24:1 کوم 4:20	فَلِيمُونَ 10:1 کُلسيون 9:4
فَلِيمُونَ 24:1 کوم 2:27	فَلِيمُونَ 13:1 کوم 16:28
فَلِيمُونَ 24:1 کُلسيون 10:4	فَلِيمُونَ 23:1 کُلسيون 8-7:1
فَلِيمُونَ 24:1 کُلسيون 14:4	فَلِيمُونَ 23:1 کُلسيون 12:4

فليمونَ

را نوم مانه پولوس رو لكل كت



1 ① هُون لکيا وازو پولوس سون، جيو ايسو کريست رئي شيوا کريا ري کري قيدي سون. اي کت مارا پاها ٿي ان آڀنا وشواسي پائي تيمٽيس را پاها ٿي لكل سئ.

پريمي پائي فليمون، تون جيو امارا زم پگهون رو کوم کريا وازو سئ، ② ان بائي افيه، تون جيئي امارئي وشواسي بين سئ، ان ارخيس، تون جيو امارا زم پگهون رو حکم مونيا وازو سئ، ان وشواسي منڌري رون ٻڌون منکون، تمي جيا فليمون ري گهري پيڙا ٿيوه،

③ آڀنو ٻاپ پگهون ان پريو ايسو کريست تمون مانه کريا کرئ ان تمون نئ هکي راکئ!

پولوس فليمون هارو پگهون رو ٿورو مونئ

④ زئون هون پراٽنا کرونه، تئون هون هميش تون هارو پراٽنا کرين مارا پگهون رو ٿورو مونونه، ⑤ کم تو مئين هومپڙيوه جي تون پريو ايسو مانه کتو وشواس راکئ، ان پگهون رون ٻڌون سونڊل منکون ٿي کتو پريم کرئ.

⑥ مارئي پراڻا اي سٺه جي جيو هپ تون وشواس ري ڪري راکڻه، اُو هپ وڌتو زائ، ان هيون نمونئ تون نٺ هر نائوڪو ڪوم ڪريا رئي پوريي کبر پڙهه جي آپون وشواسيون رهه آيت ۾ ڪيون نمونئ ويو، زم ايسو ڪريست را وڪوڻ ٿهه. ⑦ پريمي پائي، تارا پريم ري ڪري مون نٺ گهڻي ڪشي ٿيھ ان گهڻو حوصلو زڙيوھ، ڪم تو تئين پڳوون رون سونڊل منڪون رئي هيئت وڌاويھ.

پولوس اُنيسمس نومي ڳلوم را پارام اوترا را ڌڻي فليمون ٿي منت ڪرڻه

⑧ آبي ايسو ڪريست ٿي واسطو راکونه، تيام هون پوري هيئت ٿي تون نٺ حڪم ڏي هيڪونه جي تون ايٺا وات ۾ صحيح نمونئ وهه. ⑨ پڻ تارا پريم ري ڪري هون تون ٿي پريم هون منت ڪرونه. هون تو پولوس سون، ڏوڪرو سون، ان همٿه ايسو ڪريست رئي شيوا ڪريا ري ڪري قيڏي پڻ سون. ⑩ توئي پڻ هون تون نٺ ايٺا منڪ هارو منت ڪرونه، جيو مارا پريمي ڏيڪرا را زم سٺه، ان زليون هون ايٿه قيد ۾ سون، تو اي ماري واتون هومپڙين وشواسي ٿيو. هائي واتون اُنيسمس را پارام ڪونه ريو. ⑪ ايٺا را نوم رو مطلب ”قائيدا واڙو“ سٺه، توئي اڳي اُو تارا ڪيا ٿي ڪوم رو نتو. پڻ هوه اُو نه روڳو تارا ڪوم رو سٺه، پڻ مارا ڪوم رو پڻ سٺه.

⑫ اي مون نٺ آپرا جيو ٿي گهڻو پريمي سٺه، توئي پڻ هون ايٺا نٺ تون ڪن پاسو ميلونه ريو. ⑬ مارئي مرضي اي هٿي جي هون ايٺا نٺ آپ ڪن راکون، زم اُو تارا طرف ٿي ايٿه قيد موئين مارئي شيوا ڪرڻه، جيٿه هون ايسو رئي ڪشي رئي کبر همپڙايا ري ڪري قيڏي سون. ⑭ پڻ مئين سوچيو جي تارئي صلاح ليڏا ووڻو هون ڪئين نئين ڪرون، زم جيو نائوڪو ڪوم تون ايٺا اُنيسمس ري وات ۾ ڪريه، اُو تون مجپوري ٿي نئين پڻ ڪشي ٿي ڪرڻه. ⑮ ٿي هيڪنه جي اُنيسمس ايٺا هارو تون ڪن ٿي ٿوريڪ وار ڳيو پرو، زم

زئون پاسو آوئ تون ايئا نئه ڪشي ٿي مڙئ ان او تون پيڙو هميش هودِي رئه. ①6 تون هوئ ايئا نئه ڳلوم مت هزمي، پڻ ڳلوم ٿي وڌيڪ ايئا نئه پريمي پائي هزمي. اي مون هارو گهڻو پريمي سئ، تو پستئ تون هارو ڪتو پريمي هوشي، ڪم تو او نه روڳو تارو آڀرو منڪ سئ پڻ پڙو ايسو مانھ وشواس راکيا ٿي تارو پريمي وشواسي پائي پڻ ٿيوھ.

①7 تيام، جي تون مون نئه آڀرو پائي هزمين هپ راکھ، تو ايئا ٿي ام ملي، زم مون ٿي ملئت. ①8 ان جي ايئه تارو ڪئين نقصون ڪريو هوئ ڪا تارو ايئا مانھ قرض هوئ، تو او مون مانھ لڪ. ①9 هون پولوس آڀرون هاتون ٿي لکونه ريو، ”جئين ڪئين تارو حساب ايئا مانھ ٿئ، او هون پري ڏيھ.“ مارو تو هومو تون مانھ قرض سئ جي مئين ايسو را پارام شيڪاڙين تون نئه تارن رو مارڳ ڏيڪاڙيوھ. پڻ هائي ٿيو. ②0 وات اي سئ، پائي، پڙو ايسو ٿي واسطو راکيا ري ڪري تون مون هارو ڪئينڪ ڪر. آڀي تو ايسو ڪريست ري ڪري پائي سون، تيام تون ائيسمس ٿي نائوڪئ نمونئ وين مارئي هيئت وڌاو.

②1 هون تون نئه ايئا هارو لکونه ريو، ڪم تو مارو يقين سئ جي تون مارئي وات مونيھ، ان مون نئه ڪهر سئ جي جئين مئين تون نئه ڪيڏوھ، تون اوئا ٿي پڻ وڌيڪ ڪريھ. ②2 ان پيڙي وات اي سئ جي تون آڀري گهري مون هارو ٽڪيا رئي جڳا تيار ڪر، ڪم تو مارو ڀروسو سئ جي تماريون پرائنائون ٿي هون قيت ٿي سوتين تمون ڪن آويھ.

آڳري واتون

②3 اڀراس تون نئه نمسڪار ڪئ، جيو ايسو ڪريست رئي شيوا ڪريا ري ڪري مون پيڙو قيت ڀر سئ. ②4 ان مرقس، ارسترخس، ديماس، ان لوقا پڻ، جيا مون پيڙا ڀڳوون رو ڪوم ڪرئ، تون نئه نمسڪار ڪئ ريا. ②5 آڀو پڙو ايسو ڪريست تمون ٻڌون مانھ ڪڍا ڪرئ!

عبرانيون را نوم مانه لکل کت رئي هزموئتي

کت لکيا واژو

کيا نځه کبر نټي جي اي کت کيئڻه لکيو کم تو اينا کت ۾ لکيا واژا رو نوم لکل نټي. وات ساوئي سڻه جي لکيا واژو يهودي قوم رو وشواسي هتو جيو شاستر ري واتون گهڻي زوئو، ان اوڻه ايسو رن اصلي شيلون ٿي ايسو را پارام شيڪيو تو (عبرانيون 3:2). تيام گهڻا منک هزمتي جي لکيا واژو کا پولوس هتو (مک شيلون را کوم 3:22)، کا برنباس هتو (مک شيلون را کوم 36:4، 24-22:11، 3-1:13)، کا ايلوس هتو (مک شيلون را کوم 24:18). اي کت 70ع ٿي مور لکوئو، انتازام 56ع ۾، کم تو 70ع ۾ رومي قوج پگوون رو گهر پونگيو پرو ان يهودي ذرم رو ٻڌو پوزا رو نمونو کتم ٿي گيو.

کت کيون منکون هارو لکيو

اينا کت ۾ لکل نټي جي کت کيون منکون هارو سڻه. پڻ لکل واتون ٿي وات ساوئي سڻه جي اوئون وشواسيون هارو لکل هتو جيا يهودي قوم را هتا ان اڳي يهودي ذرم مانه وينا. يهودي قوم نځه عبراني پڻ ڪڻه. تيام اينا کت نځه عبرانيون را نوم مانه لکل کت ڪڻه. اوڻا وکت ۾ يهودي قوم را منک گهڻون ملڪون موئين زائين ريتا ان وشواسي ذرم گهڻون ملڪون موئين پکڙي گيو تو. تيام ڪئين کبر نټي جي اي کت کيا شهر کا ملڪ رن وشواسيون هارو لکل هتو.

کت لکيا رو مطلب

اوڻا وکت ۾ گهڻون ملڪون مانه رومي حڪومت هئي. رومي منک مورتيون ان ڏيوئونون نځه پوزتا. رومي قانون پرموئڻه يهودي ذرم پڻ ٿيڪ هتو. وشواسي ذرم هيڪ نوو دار ذرم هتو، تيا ري ڪري گهڻا منک وشواسيون نځه تنگ ڪرتا. ان ايو حالت ري ڪري جيا وشواسي يهودي قوم را هتا ان اڳي يهودي ذرم پاڙتا، اوئون هارو وشواسي ربوو گهڻو ڏورو هتو. تيام لکيا واڙه اي کت لکيو زم يهودي قوم رن وشواسيون نځه ٿايتي ٿه جي يهودي ذرم پرموئڻه پگوون را نوم مانه مال ساڙيا ٿي نئين، پڻ ايسو مانه وشواس راکيا ٿي ماڻي ان تارڻ زڙڻه. او اي پڻ شيڪارڙه جي يهودي قوم را وشواسي آيرو جيو پڇايا هارو پاسا اوئون را اصلي يهودي ذرم موئين نه زائ، پڻ ڏورو ۾ وشواس نه ساڏين ايسو مانه پڪو وشواس راکتا رڻه.

ايئا ڪتاب را شاستر ٿي پيزا حوالا:

عبرانيون 5:1 زبور 7:2	عبرانيون 4:4 پيدائش 2:2
عبرانيون 5:1 2 سموئيل 14:7	عبرانيون 5:4 زبور 11:95
عبرانيون 5:1 1 تواريخ 13:17	عبرانيون 7:4 زبور 8-7:95
عبرانيون 6:1 زبور 7:97	عبرانيون 8:4 يشوع 1:1-24:33
عبرانيون 7:1 زبور 4:104	عبرانيون 14:4 ڪوم 11-9:1
عبرانيون 9-8:1 زبور 7-6:45	عبرانيون 3:5 احبار 7:9
عبرانيون 12-10:1 زبور 27-25:102	عبرانيون 4:5 خُروج 1:28
عبرانيون 13:1 زبور 1:110	عبرانيون 5:5 زبور 7:2
عبرانيون 2:2 خُروج 17-1:20	عبرانيون 6:5 زبور 4:110
عبرانيون 2:2 استيشنا 2:33	عبرانيون 7:5 متي 44-36:26
عبرانيون 2:2 خُروج 12:21	عبرانيون 7:5 مرقس 39-32:14
عبرانيون 2:2 خُروج 17, 15:21	عبرانيون 7:5 لوقا 44-39:22
عبرانيون 2:2 خُروج 1:22	عبرانيون 10:5 زبور 4:110
عبرانيون 2:2 خُروج 20:22	عبرانيون 13:6 پيدائش 16:22
عبرانيون 4:2 ڪوم 10-1:3	عبرانيون 14:6 پيدائش 17:22
عبرانيون 4:2 ڪوم 16-12:5	عبرانيون 15:6 پيدائش 4-1:12
عبرانيون 4:2 ڪوم 12-11:19	عبرانيون 15:6 پيدائش 5:21
عبرانيون 4:2 1 ڪرنتيون 11-4:12	عبرانيون 19:6 احبار 3-2:16
عبرانيون 8-6:2 زبور 6-4:8	عبرانيون 20:6 زبور 4:110
عبرانيون 12:2 زبور 22:22	عبرانيون 3-1:7 پيدائش 20-18:14
عبرانيون 13:2 يسعياه 17:8	عبرانيون 3-2:7 يسعياه 7-6:9
عبرانيون 13:2 يسعياه 18:8	عبرانيون 3-2:7 یرمياہ 6-5:23
عبرانيون 2:3 گنتي 7:12	عبرانيون 5:7 گنتي 21:18
عبرانيون 5:3 استيشنا 19-15:18	عبرانيون 11:7 گنتي 7-1:18
عبرانيون 11-7:3 زبور 11-7:95	عبرانيون 14:7 متي 16, 3:1
عبرانيون 15:3 زبور 8-7:95	عبرانيون 14:7 لوقا 33, 23:3
عبرانيون 16:3 خُروج 35:16-1:12	عبرانيون 17:7 زبور 4:110
عبرانيون 18-17:3 گنتي 35-21:14	عبرانيون 21:7 زبور 4:110
عبرانيون 3:4 زبور 11:95	عبرانيون 1:8 مرقس 19:16

عبرانیون 20:10 متي 51-50:27	عبرانیون 1:8 کوم 11-10:1
عبرانیون 20:10 مرقس 38-37:15	عبرانیون 5:8 خُرُوج 40:25
عبرانیون 20:10 لُوقا 46-45:23	عبرانیون 8:8-12 یرمیاہ 34-31:31
عبرانیون 28:10 اِسْتِشْنا 7-2:17	عبرانیون 1:9 احبار 38:7-1:1
عبرانیون 30:10 اِسْتِشْنا 35:32	عبرانیون 1:9 خُرُوج 38:30-1:25
عبرانیون 30:10 اِسْتِشْنا 36:32	عبرانیون 2:9 خُرُوج 37-1:26
عبرانیون 30:10 زُبُور 14:135	عبرانیون 2:9 خُرُوج 40-31:25
عبرانیون 38-37:10 حَبْقُوق 4-3:2	عبرانیون 2:9 خُرُوج 30-23:25
عبرانیون 3:11 پیدایش 31-1:1	عبرانیون 4:9 خُرُوج 10-1:30
عبرانیون 4:11 پیدایش 12-2:4	عبرانیون 4:9-5 خُرُوج 22-10:25
عبرانیون 5:11 پیدایش 24-18:5	عبرانیون 4:9-5 خُرُوج 34-33:16
عبرانیون 7:11 پیدایش 29:9-28:5	عبرانیون 4:9-5 گِنتي 11-8:17
عبرانیون 8:11 پیدایش 4-1:12	عبرانیون 4:9-5 خُرُوج 28-27, 5-1:34
عبرانیون 9:11 پیدایش 3:13	عبرانیون 7:9 احبار 34-2:16
عبرانیون 11:11 پیدایش 11-10:18	عبرانیون 9:10 احبار 10-8:10
عبرانیون 11:11 پیدایش 2-1:21	عبرانیون 9:10 احبار 47-1:11
عبرانیون 12:11 پیدایش 17:22	عبرانیون 9:10 احبار 24:16
عبرانیون 19-17:11 پیدایش 18-1:22	عبرانیون 9:10 احبار 16-15:17
عبرانیون 18:11 پیدایش 12:21	عبرانیون 9:12 احبار 34-2:16
عبرانیون 20:11 پیدایش 40-27:27	عبرانیون 9:13 احبار 16-14:16
عبرانیون 21:11 پیدایش 31-29:47	عبرانیون 9:13 گِنتي 22-1:19
عبرانیون 21:11 پیدایش 20-8:48	عبرانیون 9:18-21 خُرُوج 8-3:24
عبرانیون 22:11 پیدایش 25-24:50	عبرانیون 9:20 خُرُوج 8:24
عبرانیون 23:11 خُرُوج 10-1:2	عبرانیون 9:22 احبار 30, 15:8
عبرانیون 28-24:11 خُرُوج 51:12-11:2	عبرانیون 9:22 احبار 11:17
عبرانیون 29:11 خُرُوج 31-1:14	عبرانیون 9:25 احبار 34-2:16
عبرانیون 30:11 یَشُوع 21-1:6	عبرانیون 10:5-7 زُبُور 8-6:40
عبرانیون 31:11 یَشُوع 24-1:2	عبرانیون 10:12 مرقس 19:16
عبرانیون 31:11 یَشُوع 25-22:6	عبرانیون 10:13 زُبُور 1:110
عبرانیون 32:11 قُضات 35:8-11:6	عبرانیون 10:16 یرمیاہ 33:31
عبرانیون 32:11 قُضات 31:5-6:4	عبرانیون 10:17 یرمیاہ 34:31

عبرانیون 32:11 قُضات 31:16-24:13	عبرانیون 24:12 پیدایش 10-8:4
عبرانیون 32:11 قُضات 7:12-1:11	عبرانیون 25:12 خُرُوج 35-1:32
عبرانیون 32:11 1 سموئیل 31:30-1:16	عبرانیون 26:12 خُرُوج 18:19
عبرانیون 32:11 2 سموئیل 25:24-1:1	عبرانیون 26:12 حجی 6:2
عبرانیون 32:11 1 سلاطین 11:2-1:1	عبرانیون 29:12 استیشنا 24:4
عبرانیون 32:11 1 سموئیل 1:25-1:1	عبرانیون 2:13 پیدایش 3:19-1:18
عبرانیون 33:11 دانی ایل 28-1:6	عبرانیون 5:13 استیشنا 6:31
عبرانیون 34:11 دانی ایل 30-1:3	عبرانیون 5:13 یشوع 5:1
عبرانیون 35:11 1 سلاطین 24-17:17	عبرانیون 6:13 زبور 7-6:118
عبرانیون 35:11 2 سلاطین 37-8:4	عبرانیون 9:13 احبار 47-1:11
عبرانیون 37:11 2 تواریخ 22-20:24	عبرانیون 10:13 احبار 27:16
عبرانیون 6-5:12 امثال 12-11:3	عبرانیون 11:13 احبار 15-14:16
عبرانیون 13:12 امثال 26:4	عبرانیون 11:13 احبار 27:16
عبرانیون 16:12 پیدایش 34-29:25	عبرانیون 13-12:13 متی 50-31:27
عبرانیون 17:12 پیدایش 40-30:27	عبرانیون 13-12:13 مرقس 37-20:15
عبرانیون 18:12 خُرُوج 19-16:19	عبرانیون 13-12:13 لوقا 46-32:23
عبرانیون 19:12 خُرُوج 19-18:20	عبرانیون 13-12:13 یوحنا 30-17:19
عبرانیون 20:12 خُرُوج 13-12:19	عبرانیون 20:13 متی 28:26
عبرانیون 21:12 استیشنا 19:9	عبرانیون 20:13 مرقس 24:14
عبرانیون 22:12 ڈرشن 4-2:21	عبرانیون 20:13 لوقا 20:22
عبرانیون 24:12 متی 28:26	عبرانیون 20:13 یوحنا 11:10

عبرانيون

را نوم مانھ لکل کت



پڳوونَ آپرا ڏيکرا ايسو ري هاڻي
آپري واتون آپون ڪن ساوي ڪريه

1 ① اڳلوڪا زمونا ۾ قرق قرق تونون مانھ ان قرق قرق ڍاڙھ پڳوونَ آپرو
نياپو ڏيڏا واڙون هات آپتون ڏاڏون ڪن آپري واتون ساوي ڪري. ② پڻ
همئنه ڏنيا ري پڇاڙي رون ڏيئون ۾ پڳوونَ آپون ڪن آپرا ڏيکرا هات آپري
واتون ساوي ڪريه. پڳوونَ آپرا ڏيکرا ايسو رنه هيلنه ٻڌوئي ڪئين نايو، ان
اوتا ننه اي حق ڏيڏو جي راکل توڻا مانھ جي ڪئين ناوڻ سئھ اوتا ٻڌا رو او ڏئي
ٿه. ③ زم پڳوونَ سوجهرو ئي سوجهرو سئھ تم ايسو موئين پڳوونَ رو زبکتو
سوجهرو ساوو ڏيڪاڻه. ان زم نپا رو نيشون نپا جيوو سئھ، تم ايسو پڳوونَ جيوو
سئھ، ڪم تو جي واتون پڳوونَ موئين سئھ او هاڳي واتون ايسو موئين سئھ.
ايسو آپري ڪڙا پرموئنه آپرا ڪيڏا ٿي ٻڌوئي ڪئين همپاڙهه. آپرو جيو پڳوونَ
را نوم مانھ ڏين اونه منڪون رون ڏوهون رئي ماڻهي ڪراوئي ان تيا ڪيڙ آڪاش
موئين ٻڌون را ڏئي پڳوونَ رنه زمئنه پاهنه مون ۾ پينوه.

پڳوونَ رو ڏيکرو هويا ري ڪري ايسو رو آڪاشي ڏوتون ٿي وڌارءُ گهڻو مون سءُ

④ هيونءَ نمونءَ زم پڳوونَ ايسو نءِ آڪاشي ڏوتون ٿي الاهي گهڻو مون ڏين
اُٿا نءِ آڀرو ڏيکرو ڪيڏو، تم پڳوونَ ايسو نءِ آڪاشي ڏوتون ٿي الاهي گهڻو
مون ڏين آڀ ڪن مون ۾ پڻ پيهاريو. ⑤ ڪم تو پڳوونَ ڪيڏي ڪيائي آڪاشي
ڏوت نءِ ام نٿي ڪيڏو:

”تون مارو ڏيکرو سءُ،

آز مئين وات ساوڻي ڪرين ڏيڪاڙيئھ جي هون ٿارو ٻاپ سون.“
ان وڙي پڳوونَ ڪيڏي ڪيا ٿي آڪاشي ڏوت را پارام ام نٿي ڪيڏو:
”هون اُٿا رو ٻاپ ٿيھ،

ان او مارو ڏيکرو ٿيشي.“

⑥ پڻ شاستر ۾ پيزا ماڳ، زليون پڳوونَ آڀرا ڏيڪرا ايسو نءِ ڏنيا رون منڪون
ان آڪاشي ڏوتون هومو ساوو ڪريو، جيو ڏنيا ٺهيا مور هتو ان پوئيني را ڏيڪرا
را زم اوئون ٻڌون ٿي موتو سءُ، اوڻءِ ايسو را پارام ام لڪل سءُ:
”پڳوونَ را ٻڌائي آڪاشي ڏوت اُٿا رٿي پوزا ڪرءُ.“

⑦ آڪاشي ڏوتون را پارام شاستر ۾ ام لڪل سءُ:

”پڳوونَ آڀرئي شيوا ڪريا واڙون آڪاشي ڏوتون نءِ
آڀرا ڪوم هارو وائيرا ان ڏيوتا را روپ ۾ ميلءُھ.“

⑧ پڻ پڳوونَ را ڏيڪرا را پارام شاستر ۾ ام لڪل سءُ:

”او ٻڌون را ڏٺي، تمي گهاڙي مانھ پيهين هميش هُوڏي راز ڪرشو،
ان پاڌشا رو گيڏيو لين انصاقي ٿي راز ڪرشو.

⑨ تمي پورا من ٿي پڳوونَ ري وات مانھ وُوڏاھ،

ان پونڌائي ٿي پاھو ڪريوھ،

تيام، او ٻڌون را ڌڻي، تمارئ پڳوون تمون نئ پادشا نايه
ان تمون نئ تمارون ساڻيون ٿي وڌارئ ڪشي ڏيڏيھ.

⑩ ان پڳوون را ڏيڪرا را پارام شاستر ۾ ام پڻ لڪل سئ:

”او پڙيو، تمي شروع ۾ ڌرتي ناوئي
ان آڪاش تمارو ناوڻ سئ.

⑪ آڪاش ان ڌرتي تو ڪتم ٿيسي، پڻ تمي هميش هوڏي ريشو.

او لوگهڙون را زم زونا ٿين ٻڳڙي زاشي،

⑫ ان تمي اوئون نئ توال را زم وينتورشو،

ان زم منڪ زونا لوگهڙا اوتارين نوا لوگهڙا پيرئھ

تم تمي ايئا جڳت ري جڳا ۾ نوو جڳت ناوشو.

پڻ تمي ڪيڏي نئين پڌلو ان هميش هوڏي جيوتا ريشو.

⑬ پڻ پڳوون ڪيڏي ڪيا ئي آڪاشي ڏوت نئ ام نئي ڪيڏو:

”ئون مارئ زمئئ پاهئ مون ۾ پيھ،

زئون هوڏي هون ٿارون ڏشمئون نئ هراوين ٿاري ٻڳي نه لڳاڙون.

⑭ ڪم تو آڪاشي ڏوت ٻڌائي پڳوون رئي شيوا ڪريا وڙا سئ، ان پڳوون

اوئون نئ ايوون منڪون رئي شيوا ڪريا هارو ميلئھ، جيون نئ پڳوون را وائيڏا

پرموئئ تارڻ زڙشي.

پڳوون را ڏيڪرا ايسو ري ڪيڏل واتون پورا من ٿي مونتا ريوو

① تيام آڻئئ اوئون واتون مانھ وڌارئ ڏيون ڏيوو، جي واتون آبي ايسو را

2 پاها ٿي هومپڙيھ، متون آبي هنيون هنڱيون ڪوڙيون واتون ٿي ٺيلائين هاس

ٿي شيتي ٿي زائون، ان تارڻ را ڪپ مانھ نه پوگون. ② ڪم تو زئون پڳوون

آڪاشي ڏوتون هات آڻئون ڏاڏون نئ حڪم ڏيڏا، تنيون آڪاشي ڏوتون ري ڪري

ٿاڻي ٿي جي هائي حڪم پڳوون را پاها را سئ. تيا ري ڪري هايون حڪمون

مانه ويو ضروري هتو، ان جي ڪيٽه ئي ڪوڪ حُڪم ٿوڙيو ان ڪيڏل وات نه موٽي، تو اُٿا ننه انصاف پرموٽه ڏوهه را ايوزا ۾ سزا زڙئي. ③ تيام جي آبي پڙيو ايسو رو ڏيڏل تارڻ رو اوڙو موٽو نياپو نه مونون، تو آبي پڳوون ري سزا ٿي ڪم ڪرين پڇي زاشون؟ اي تارڻ رو نياپو پيرھين پڙيو ايسو آپ منڪون ننه همپڙايو تو، ان تيا ڪيڙ او منڪ جيئي پڙيو ايسو ري واتون ڪوني هومپڙي، اُٿي آپون ننه اي نياپو پڪي ٿايتي ٿي همپڙايوه. ④ ان پڳوون اُٿون ايسو رئي هاڪ پريا واڙون منڪون ري هاڻي نيشون، پرسا ان نمونا نمونا را موٽا ڪوم ڪريا، ان اُٿه آپري مرضي پرموٽه منڪون ننه پويتر آتما ري ڪڙا ٿي قرق قرق ڪوم ڪريا رئي هيٺ پڻ ڏيڏئي، ان هيٺ نمونه پڳوون آپ پڻ ٿايتي ڏيڏئي جي اي نياپو هاسو تارڻ رو سٺه.

ايسو آپ منڪ ٿيو زم او منڪون ننه تارڻ ڏئ

⑤ هُوٺه او آيا واڙو نوو جڳت، جيا رئي وات وٺه رئي، پڳوون اُٿا جڳت ننه آڪاشي ڏوتون را ڪيڏا هيٺ نئي راڪيو. ⑥ ڪم تو ڪيٽڪ شاستر ۾ ڪيٽڪ اي هاسي وات ڪريه:

”او پڳوون، منڪ ڪي سٺه،

جي تم اُٿا رو ڪيال راڪوه؟

ان منڪ ذات رو ڏيڪرو تمون ننه ڪتو پريمي سٺه،

جي تم اُٿا رئي همپڙا ڪروه؟

⑦ تم اُٿا ننه منڪ ناوين آڪاشي ڏوتون ٿي ٿوڙو گهٽ ڪريوه.

تم اُٿا ننه گهڻو مون ان عزت ڏيڏئي،

⑧ ان تم ٻڌوئي ڪئين اُٿا را ڪيڏا هيٺ ڪريوه.

زئون پڳوون ٻڌوئي ڪئين منڪ را ڪيڏا هيٺ ڪريو تو، تئون اُٿه ايوو ڪئين نتو ساڏيو، جي اُٿا را ڪيڏا هيٺ نه ڪريو هوٺه. همٺه تو آپون ننه هم ڏيڪيام

نٿي آتو جي ٻڌوئي ڪئين منڪ را ڪيڏا هيٺ سٺه. ⑨ پڻ آبي ايسو نٺه زوئونھ. ڀڳوون منڪون مانھ ڪرپا ڪرين ايسو نٺه منڪ ناوين آڪاشي ڏوتون ٿي توڙو گهٽ ڪريو تو، زم ايسو ٻڌون منڪون نٺه ڀڄايا هارو آڀرو جيو ڏٺه. پڻ هونھ، ايسو رٺه ڏک وينين مريا ري ڪري، ڀڳوون اوٺا نٺه آڪاش ۾ مون ان عزت ڏيڏيھ. ⑩ ڀڳوون ٻڌوئي ڪئين آڀري ڪرا ٿي آپ هارو نايوھ. ان ڀڳوون رٺي مرضي هٿي جي او گهٽون منڪون نٺه آڀرا ٻار ناوين آڪاشي مون ۾ تيراوٺھ. تيام صحيح هتو، جي ايسو ڀڳوون ري مرضي ڀرموٺھ موت هوڏي ڏک وينين ڀڳوون رٺي مرضي پوري ڪرھ. هيوٺ نمونھ ڀڳوون ايسو نٺه ايوو ڪريو جي او منڪون هارو تارڻ را مارڳ رٺي آڳيونئي ڪريا واڙو ٿھ. ⑪ هيوٺ نمونھ ڀڳوون رو ڏيڪرو ايسو، جيو منڪون نٺه ڏوهون ٿي پويتر ڪرھ، او پڻ منڪ ٿيو، ان جيا منڪ ڏوهون ٿي پويتر ٿھ، او پڻ ڀڳوون را ٻار ٿھ. ان هونھ ٻي ئي هيڪي اڪائي را پاتي سٺه. تيام ايسو هايون ري ڪري لزي نٿي مرتو پڻ اوئون نٺه آڀرا پائي ان پينون ڪھ. ⑫ زم شاستر ۾ لڪل سٺه:

”او ڀڳوون، هون آڀرون پايون ڪن تمارا وڪوڻ ڪريھ،

ان هون منڌري وسا تمارا نوم را پزن گاويھ.“

⑬ ان ايسو را پارام اي وات پڻ شاستر ۾ لڪل سٺه:

”هون ڀڳوون مانھ ڀروسو را ڪتو ريھ.“

ان وڙي ايسو ان اوٺا مانھ وشواس راڪيا واڙون را پارام اي پڻ لڪل سٺه:

”زوئو، هون سون ان او ٻار پڻ سٺه جيا ڀڳوون مون نٺه ڏيڏاھ.“

⑭ هونھ هائي جيون نٺه شاستر ۾ ٻار ڪھ، جيا ڀڳوون ايسو نٺه ڏيڏاھ، او تو منڪ سٺه ان لوئي ان مونھ را ناول سٺه. تيام ايسو آپ پڻ اوئون را زم منڪ ٿيو، زم او آڀرا موت ٿي شيطون نٺه ڪتم ڪرھ، جيو منڪون نٺه موت را قوضام راڪھ، ⑮ ان اوئون نٺه موت را قوضا ٿي سڏاوٺھ، جيا پوري حياتي موت ري پيڪ ۾ شيطون ري گلومي ۾ ڦاٿل هتا. ⑯ وات تو ساوئي سٺه جي

ايسُو آكاشي دُوتون رُئي نئين، پڻ آپون منڪون رُئي مَدَت ڪرڻ، جيا ابراهيم را اولاد سون. (17) تيام ضروري هتو جي ايسُو منڪ ٿين ٻڌيون واتون ۾ آڀرون پايون جيوو ٿڻ، زم ڀڳوون رون سُونڍل منڪون نٿه ڏوهون رُئي ماڻهي ڏيورايا هارُو اُو ڏييارُو ان ڀڳوون ريون واتون ۾ ايموندار مُڪ پُوزاري ٿڻ، ان آڀرو جيو ڀڳوون را نوم مانھ ڏڻ. (18) هيُوٿه نمُونٿه اُوٿه آپ آزمتون ۾ پورو اوتريا هارُو ڏڪ ويٺيا، تيام اُوئون رُئي مَدَت ڪري هيڪڻ، جيا آزما ۾ سڻ.

ڀڳوون رو ٺيڪرو هويا ري ڪري ايسُو رو مُوسي ٿي وڌارڻ گهڻو مون سڻ

3 ① تيام، پريمي پايون ان پينون، تمي جيا ڀڳوون را سُونڍل منڪ سو، جيون رو ڀڳوون آپ ٿي واسطو رکايوه زم تمي ڀڳوون رون ٻڌون سُونڍل منڪون پيڙا آڪاش ۾ ڀڳوون ڪن ريو، ايسُو مانھ ڏيون ڏيو، جيو ٻڌون ٿي موٽو ڀڳوون رو ميلل آڳوون ان مُڪ پُوزاري سڻ، جيا نٿه آڀي مونونھ. ② اُو ڀڳوون ري شيوا ۾ ايموندار ريو جيئڻه اُوٿا نٿه ميليو تو، زم مُوسي پڻ اسرائيلي قوم ري



همڀار ۾ ايموندار ريو، جيئي قوم ڀڳوون رون گهر رون پاتيون را زم هڻي. ③ زم گهر نايا واڙا رو مون گهر را مون ٿي گهڻو وڌارڻ سڻ، هيُوٿه نمُونٿه ڀڳوون ايسُو رو مون مُوسي را مون ٿي گهڻو وڌارڻ راڪيوھ. ④ ڪم توهر گهر ڪياڪ رو ٺاڍل سڻ، پڻ ڀڳوون تو ٻڌوئي ڪئين ٺايوه. ⑤ مُوسي ڀڳوون رو شيواڌاري هتو، ان زم نوڪر ڌڻي را گهر ۾ شيوا ڪرڻ، تم اُو ڀڳوون ري سُونڍل ٻڌي اسرائيلي قوم ري شيوا ۾ ايموندار هتو، ان اُوٿه ڀڳوون را سُونڍل ڀڄايا واڙا را پارام مور ٿي هاڪ ڀري جي مارا زم پيزو آوين

پڳوونَ رو نياپو ڏيشي. ⑥ پڻ ايسو ڪريست پڳوونَ رو ڏيکرو سٺ، ان زم ڌڻي رو ڏيکرو ڌڻي را گهر ۾ راز ڪرڻ، تم اُو پڳوونَ رون سُونڍل منڪون مانھ راز ڪريا ۾ ايمونڌار سٺ. ان آبي پڳوونَ را سُونڍل پڳوونَ را گهر را پاڻي سون، جي آبي هيٺ نه هارون ان پوري حياتي پڪو وشواس راڪين تارڻ رو پروسو راڪون، جيا تارڻ را پارام آبي ڪشي ٿي ڪونه.

وشواس راڪتا ريوو نڪا پڳوونَ رو وائيندو ڪرل تارڻ نئين زڙ.

⑦ تيام پڳوونَ ري واتون مونو، زم دائود پويتر آتما ري ڪڙا ٿي شاستر ۾ ڪيڏو:
 ”آز تمي پڳوونَ ري واتون هومپڙو ان من ٿي مونو!
 ⑧ پڳوونَ ام ڪئھ:

تمي ٺاهڙا مت ٿيو زم تمارا ڏاڏا ٺاهڙا هتا،
 زئيون اُو رڻ موئين مارئ ڪلاڦ وُڍا
 ان مارا صپر رو آزمتو ليدو.

⑨ اوتئھ تماري ڏاڏي چاليهون سالون هُڏي
 مارا ڪرل ڪوم پاڙيا،

توئي پڻ اُو وڙي وڙين مارا صپر رو آزمتو ليتا ريا.

⑩ تيام مُون نئھ اوتھ توتھ ري پيڊي مانھ رينھ سڙئي،

ان مئين زويو جي اوتون را من ري واتون هميش اوڙي سٺ
 ان اُو مارا ڪيڏا مانھ ماڳي نٿي وِيتا.

⑪ تيام مئين رينھ ۾ هون ڪائين ڪيڏو

جي مارو وائيدو ڪرل آروم ان هڪ هايون نئھ ڪيڏي نئين زڙ.

⑫ تيام، پايون ان پينون، هُوشييار ريا، متون تمون موئين ٿي ڪوئي من ۾

ڪراپ ڪيال راڪين وشواس ساڏئھ ان جيوتا پڳوونَ رٿ ڪلاڦ وئ. ⑬ زم مئين شاستر رٿي وات همپڙاويھ جي آز پڳوونَ ري واتون مونو، تم تمي روز روز

پڳوونَ ري واتون مونيا ۾ هڪا پڙا نٿو حوصلو ڏيئا ريو، زم تمون موئين ٿي
ڪوئي نه شيرائو ان ڏوه نه ڪرڻه ان پڳوونَ رڻه ڪلاڻ ٺاهڻو نه ٿئ. (14) ڪم
تو آبي ايسو ڪريست ٿي واسطو راکيوه ان آڀون نٿو اُٿا پڙو آڪاش ۾ هڪ
زڙشي، جي آبي پوري حياتي پڪي ڪاتري ٿي اُو وشواس راکتا ريون جيو آبي
شروع ۾ اوڻيو تو. (15) شاستر ري ايٺا وات مانھ وڙي ڏيون ڏيو:

”آز تمي پڳوونَ ري واتون هومپڙو ان من ٿي مونو!

پڳوونَ ام ڪئھ:

تمي ٺاهڻا مت ٿيو زم تمارا ڏاڏا ٺاهڻا هتا،

زئون اُو رڻ موئين مارڻه ڪلاڻ وُڍا.“

(16) هَئو هيا وات پرموئڻه اُو منڪ ڪوڻ هتا جيا پڳوونَ ري واتون هومپڙين
پڳوونَ رڻه ڪلاڻ وُڍا؟ اُو تو اُو ٻڌائي منڪ هتا جيون نٿو پڳوونَ ڳلومي ٿي
سڏاوين موسيٰ ري هاڻي مصر ملڪ ٿي ٻارا ڪاڍيا تا. (17) ان پڳوونَ نٿو چاليھ
سالون هُڏي ڪيون منڪون مانھ رينھ سڙئي؟ اُوئون هاڳي منڪون مانھ رينھ
سڙئي جيئي ڏوه ڪريا، ان تيام اُو رڻ موئين را موئين مري ڳيا. (18) ان پڳوونَ
ڪيون منڪون را پارام هون ڪائين ڪيڏو جي مارو وائڏو ڪرل آروم ان هڪ
هايون نٿو ڪيڏي نئين زڙڻه؟ اُو تو اُو هاڳي منڪ هتا جيئي پڳوونَ مانھ وشواس
نه راکيو. (19) آڀون نٿو وات ساوئي ڏيڪيام آئھ جي اُو منڪ پڳوونَ را وائڏا
ڪرل ملڪ موئين زائي نه هڪيا ڪم تو اُوئي پڳوونَ مانھ وشواس نه راکيو،
ان تيام وشواس نه راکيا ري ڪري اُوئون نٿو پڳوونَ رو وائڏو ڪرل آروم ان
هڪ نه زڙيو.

جيا پڳوونَ مانھ وشواس راکئھ اُوئون، نٿو آروم ان هڪ زڙشي

(1) هَئو پڳوونَ رو وائڏو ڪرل سئھ جي جيا منڪ پڳوونَ مانھ وشواس
راڪئھ اُوئون منڪون نٿو آروم ان هڪ زڙشي. تيام آڀنئھ پڳوونَ رئي پڪ

راکين وشواس راکوو، متون تمون موئين ٿي ڪوڪ پڳوون رو وائيدو ڪرل آروم ان هڪ ليذا جيون نه هون. ② ڪم تو آبي پڻ آڻئون ڏاڏون را زم پڳوون را پاها ٿي ڪشي رڻي ڪبر هومپڙيه. پڻ اوئي پڳوون رو نياپو روڳو هومپڙيو تو ان اوئا ٿي ڪئين ڦاڻيدو نٿو ليدو، ڪم تو نياپو هومپڙين اوئي پڳوون مانھ وشواس نٿو اوڻيو. ③ ان هون پڳوون رو وائيدو ڪرل آروم ان هڪ آڀون ننه زڙشي، جيئي وشواس اوڻيوھ. ڪم تو پڳوون وشواس نه راڪيا وازون را پارام ام ڪيدو:

"تيام مئين رينه ۾ هون ڪائين ڪيدو

جي مارو وائيدو ڪرل آروم ان هڪ هايون ننه ڪيڏي نئين زڙنه."

هون جهگت نهيا را ٿوئا ٿي لين منڪون ننه پڳوون را زم آروم ان هڪ ليذا رو موقعو تو سئ، ڪم تو پڳوون جهگت نيا رو ڪوم پورو ڪرين آروم ڪريو تو.

④ ڪم تو شاستر ۾ هاتما ڏي را پارام ڪيٽڪ ام لکل سئ:

"پڳوون آڀرو جهگت نيا رو ڪوم پورو ڪرين

هاتمنه ڏي آروم ڪريو."

⑤ توئي پڻ شاستر ري هيا وات ۾ وشواس نه راڪيا وازون را پارام ام لکل سئ:

"مارو وائيدو ڪرل آروم ان هڪ هايون ننه ڪيڏي نئين زڙنه."


⑥ تيام پيزون منڪون هارو هزون هوڏي موقعو سئ، جي اوئون ننه پڳوون رو وائيدو ڪرل آروم ان هڪ زڙنه. مور ۾ اي ڪشي رڻي ڪبر آڻئون ڏاڏون ننه ڏيڏل هئي، پڻ اوئون ننه پڳوون رو وائيدو ڪرل آروم ان هڪ نٿو زڙيو، ڪم تو اوئي پڳوون مانھ وشواس نٿو راڪيو. ⑦ تيا ري ڪري پڳوون آروم ان هڪ ليذا رو وڙي پيزو موقعو ڏيدو، ان او موقعو آڙ سئ. ڪم تو آڻئون ڏاڏون را ٿوئا ٿي الاهي گهڻون سالون ڪيڙ داڻو پڳوون را پاها ٿي اي وات ڪيڏي، زم ماتنه پڻ ڪيڏل سئ:

"آڙ تمڀي پڳوون ري واتون هومپڙو ان من ٿي مونو!"

⑧ هون جي پڳوون رو وائيدو ڪرل آروم ان هڪ تڻيون زڙيو هوٽ، زڻيون

يشوع آپتون ڏاڏون نه پڳوون را وائيدا ڪرل ملڪ موئين لي ڳيو تو، تو تيا ڪيڙ پڳوون پيڙا آروم ان هڪ ليڏا را موقعا را پارام نه ڪئت. ⑨ تيام هائي وائيدو ڪرل آروم ان هڪ پڳوون رون سونڊل منڪون نه هزون هوئ زڙشي. ان هائي آروم ان هڪ هاتما ڏي را آروم را زم سئ، جيو پويتر ڏي سئ. ⑩ ڪم تو جيا منڪ نه هائي پڳوون رو وائيدو ڪرل آروم ان هڪ آڪاش ۾ زڙئ، او پڳوون رو ڏيڏل ڪوم پورو ڪرين آروم ڪرئ، زم پڳوون آپرو جڳت نايا رو ڪوم پورو ڪرين هاتمه ڏي آروم ڪريو.

⑪ تيام آبي پڳوون ري واتون موين پوري ڪوشش ڪرون جي آپون نه آڪاش ۾ هائي آروم ان هڪ زڙئ، متون آپون موئين ٿي ڪوڪ آپتون ڏاڏون را ڏيڪاڙل نمونا پرموئو وشواس نه راکئ ان اوئا نه پڳوون رو وائيدو ڪرل آروم ان هڪ نه زڙئ. ⑫ ڪم تو پڳوون رو وچن زوئو جيو تو سئ، ان اوئا ٿي پڳوون ري ڪڙا رو اثر ٿئ. ٻي ڌارئي تروئار تو گهڻي ٽڪئي سئ، ان هيا نه هئا ٿي ڏيل رو هوند ٿو هوند وڌائي زائھ ان هائي هاڏو پونگين پيڙا هوڏي پڻ پوگي زائھ. پڻ پڳوون رو وچن منڪ را جيو ان من هوڏي پوگي زائھ، ان اوئا ري ڪري من رون ڪيالون ان سوچ رئي جونچ ٿئ. ⑬ پڳوون ٿي ڪئين هٿال نٿي، ان ٻڌوئي ڪئين پڳوون هومو هاو ساوو سئ، جيا نه آڀئ حساب ڏيو پڙشي.



ايسو ٻڌون ٿي موتو مڪ پوزاري ٿين

منڪون نه تارن ڏيڏا هارو پڳوون را نوم مانھ آپرو جيو ڏيڏو

⑭ تيام، زئون پڳوون رو ڏيڪرو ايسو آپو موتو مڪ پوزاري سئ جيو پڳوون ڪن آڪاش ۾ ڳيو، تو آبي ايسو مانھ وشواس راکتا ريون ان آپرا وشواس ۾ اڏڳ ريون. ⑮ ڪم تو آپو مڪ پوزاري ايوو نٿي جيو آپون هيئون منڪون

مانه قياس نئين ڪرڻ، ڪم تو آڀنا زم اوڻا مانه پڻ هر نمونا را ڏوه ڪريا را آزمتا آيا. او آڀون جيوو سڻ، روگو اوڻه ڪيڏي ڏوه نه ڪريو. ①6 تيام آڀي هيئت را ڪين زوڻه پڳوون ري گهاڏي ڪن زائون ان ڪريا ڪريا وازا پڳوون ٿي پراڻا ڪرون، زم پڳوون آڀون مانه ڏيئا ڪرڻ ان آڀون مانه ڪريا ڪرين آڀي ضرورت ۾ آڀيئي مدت ڪرڻ.



5 ① هوڻ، هر مڪ پوزاري منڪون موئين ٿي سونڊاڻه، ان منڪون را پاها ٿي پڳوون ري پوزا ڪريا هارو راکل هوڻ، زم او ڏوهون ري ماڻي هارو پڳوون را نوم مانه ڏونپ ان مال ساڙڻ. ② او اوڻون منڪون ٿي نرمي هون وي هيڪڻ، جيا پولائي زائ ان ڏوه ۾ پڙڻ، ڪم تو او آپ بيزون را زم هيٺو هوڻ. ③ تيا ري ڪري مڪ پوزاري رڻ نه روگو اسرائيلي قوم رون ڏوهون ري ماڻي هارو، پڻ آڀون ڏوهون ري ماڻي هارو پڻ پڳوون را نوم مانه مال ساڙو

ڪپڻ. ④ مڪ پوزاري ٿيوو مون ان عزت ري وات سڻ، ان ڪوئي منڪ آڀرا پاها ٿي هائي مون ان عزت نٿي لي هيڪڻو. پڻ پڳوون اوڻا نڻه هيا ڪوم هارو سونڊاڻه، زم پڳوون هارون نومي پيرهيان مڪ پوزاري نڻه سونڊيو تو.

⑤ هيوڻه نمونڻه ايسو ڪريست مڪ پوزاري ٿيا رو مون آڀرا پاها ٿي نه ليدو. پڻ پڳوون آڀ اوڻا نڻه هائي مون ڏيدو، زئين اوڻه ايسو نڻه ام ڪيدو: ”تون مارو ڏيڪرو سڻ،

از مئين وات ساوئي ڪرين ڏيڪارڻيه جي هون ٿارو ڀاپ سون.“

⑥ ان شاستر ۾ پڙا ماڳ ايسو را پارام ڀڳوون رڻي اي وات پڻ لڪل سڻه:
 "تون ملڪِ صِدقِ پاڌشا را نمونا پرموئڻه
 هميش هُوڌي پوزاري سڻه."

⑦ زڻيون ايسو دُنيا ۾ حَيَاتِي هتو، تڻيون اُوڻه ڏڪ ۾ رڙيون ڪري ڪرين ان روڻي
 روڻين ڀڳوون ٿي وينتي ان پراڻنائون ڪري. ايسو نڻه ڪبر هڻي جي ڀڳوون اُوڻا
 نڻه موت ٿي پڇاوي هيڪڻه، توڻي اُوڻه آپرڻي مرضي نه سُونڊي پڻ پراڻا
 ڪرڻي جي ڀڳوون رڻي مرضي پوري ٿڻه. ان ڀڳوون اُوڻا رڻي پراڻا هومپڙي،
 ڪم تو اُو پورا من ٿي ڀڳوون ري مرضي مان ه ویتو. ⑧ ايسو ڀڳوون رو ڏيڪرو
 هتو، توڻي پڻ اُوڻه ڀڳوون ري مرضي پرموئڻه ڏڪ وينيا ان هيون نمونڻه شيڪيو
 جي ڀڳوون رو ڪيڏو مونو ڪي سڻه. ⑨ ان اُو موت هُوڌي ڀڳوون رڻي مرضي
 پوري ڪرين اُوڻون ٻڌون منڪون نڻه هميش رو تارڻ ڏيڏا واڙو ٿيو، جيا اُوڻا رو
 ڪيڏو مونڻه، ⑩ ڪم تو ڀڳوون اُوڻا نڻه ملڪِ صِدقِ پاڌشا را نمونا پرموئڻه
 مڪ پوزاري را ڪيو تو.

ايسو مان ه ڀڳو وشواس راڪتا ريوو نڪا تارڻ نئين زڙه

⑪ هايا ملڪِ صِدقِ ري وات را پارام امارڻه تمون نڻه گهڻي واتون ڪيووه، پڻ
 هيوي واتون تمون نڻه هڙمايام ڏوري سڻه، ڪم تو تمڻي پوزون را زم ٿي ڳياھ.
 ⑫ تمڻي اتا گهڻا وڪت ٿي وشواسي سو، تمارڻه تو شيڪاڙيا واڙا هووو ڪپڻت.
 پڻ تمون نڻه هزون هُوڌي ڀڳوون را وچن ري پُنيادي واتون شيڪيا رڻي ضرورت
 سڻه. تمڻي وشواس را ڪيا ۾ هزون ننڪون ٻاڙون را زم سو، جيا ڏوڏ پيڻه ان روڻي
 ڪاڻي نڻي هيڪتا. ⑬ ڏوڏ پيوو تو ننڪون ٻاڙون هارو سڻه، جيون نڻه ڪبر نڻي
 هوڻي جي ڀڳوون ري وات مان ه ڪيوه نمونڻه ويو. ⑭ پڻ موتا منڪ جيا
 آپرا تجريا ٿي شيڪل سڻه ان جونچ ڪري هيڪڻه جي نائوڪو ڪي سڻه ان پُونڌو
 ڪي سڻه، اُوڻون هارو ٻاڙون رو ڪاڏو نئين پڻ موتون رو ڪاڏو ڪپڻه.

6 ① تيام آبي ايسو ڪريست را نياپا ريون شروعاتي واتون مانھ اُپيا نہ ريون، پڻ موتا ٿين آڳڙ وڌون. زئيون پُنياڌ هيڪ وار نوڪل سئھ تو وڙي وڙي پُنياڌ نوڪيا رو ڪي ڪوم؟ هيونئھ نمونئھ آپئئھ ايئون شروعاتي واتون را پارام وڙي شيڪيا رئي ضرورت نٿي. آپون نئھ تو اڳي ڪبر سئھ جي ڪراپ ڪوم ساڏين توبونھ ڪرو، جيون ڪومون ٿي هميش رو موت زڙئھ، ان پڳوون مانھ وشواس راکو. ② پويتر سنون ليڏا را پارام، هاٿ ميلين پراٿنا ڪريا را پارام، مرلون رئھ جيوي اُونيا را پارام، ان نيا را ڏي را پارام زئيون پڳوون منڪون نئھ هميش رو موت ڪا هميش رو جيون ڏيشي، هايون ٻڌيون واتون را پارام آبي تو اڳي شيڪل سون. ③ تيام، پڳوون ڪرئھ، آبي آڳڙ وڌين ايسو ريون ٻڌيون واتون مانھ پورئھ نمونئھ وون.

④ ڪم تو زئيون منڪون نئھ پڳوون را پاها ٿي اڳي سوجهرو زڙيوھ، زئيون اوئون نئھ پڳوون را آشيرواڏ ري ڪري من ۾ هڪ زڙيوھ، زئيون اوئون نئھ پويتر آتما زڙيوھ، ⑤ ان زئيون اوئون نئھ ڪبر پڙئھ جي پڳوون ري واتون نائوڪي سئھ، ان اوئون ڪن پڳوون رئي ڪڙا ساوئي ٿيھ جي ڪڙا آيا وازا جڳت ۾ هميش ساوئي هوشي، ⑥ جي هيو منڪ توئي پڻ وشواس ساڏئھ، تو ڪم ڪرين اوئون نئھ وڙي ڪراپ ڪوم سڏاوو ان پڳوون ري وات مانھ ويوراوو؟ هيو منڪ ڪم ڪرين توبونھ ڪرشي؟ هائي تو ٿي نٿي هيڪتو. ڪم تو جي منڪ زوئي ڪرين ايسو مانھ وشواس ساڏئھ، تو او پڳوون را ڏيڪرا ايسو نئھ تارڻ ڏيڏا واڙو نہ مونين ٻڌون رئھ روپرو اوئا رئي پيعزئي ڪرئھ. ان هيونئھ نمونئھ او زوئھ ايسو نئھ پيزي وارڪو هوڙي مانھ ساڙئھ.

⑦ مثال، ڪيتر ۾ گهڻو مي ورهئھ، ان زمئي مي رو پوئي پيئھ. هوئھ جي اوئا زمي موئين ڏئي هارو گهڻو ڦصل ٿئھ، تو اوئا زمي نئھ پڳوون رو آشيرواڏ زڙئھ. ⑧ پڻ جي اوئا زمي موئين ٿي روڳا ڪنديرا ان ڌيوي اوڳئھ، تو ٿايتي سئھ جي زمئي ڪيائي ڪوم رئي نٿي، نيٺ منڪ اوئا نئھ پتشي ان ڏئي ڪرشي.



هيونئو نمونئو جيون منكون نئو پگيون ٻڌوئي ڪئين ڏيتوھ، توئي پڻ او وشواس ساڏئھ، تو اوئون نئو پگيون هميش رئي سزا ڏيشي.

⑨ پريمي پايون ان پينون، پلئو امي هائي واتون ڪرونھ، توئي پڻ امون نئو پڪئي ڪاتريئي سئو جي تمارئي هيويي ڪراپ حالت نئي. پڻ تمي تارڻ ليڏا وازون را زم نائوڪئو نمونئو ووھ ريا. ⑩ هوئو پگيون پي انصاف نئي. تمي پگيون رون سونڊل منكون رئي شيوا ڪريھ ان همئو پڻ ڪروھ ريا، ان هائي ڪوم ڪريا ٿي تمي وات ساوئي ڏيڪارئيھ جي تمي پگيون ٿي پريم راکوھ، ان پگيون تمارو هائي ڪوم ان پريم نئين ويهارئو. ⑪ امارئي انچا اي سئو جي تمون موئين ٿي هر هيڪ اوئا هاگي شونق ٿي پگيون ري وات مانھ پچاري هوڏي ويتو رئو. هم ڪريا ٿي تمون نئو او ٻڌوئي ڪئين زڙشي جيا رو تمي پروسو راکيوھ. ⑫ تمي سست مت ٿيو، پڻ اوئون منكون را ڏيڪارل نمونا مانھ وو، جيئي وشواس راکيو تو ان ڏوروڻ صير ٿي سھڻي ٿي، ان تيام هوئو اوئون نئو آڪاشي هڪ زڙيوھ جيا را پارام پگيون وائڏا ڪريا تا.

پگيون آپرا وائڏا رو هاسو سئو

⑬ پگيون زئون ابراهيم ٿي وائڏو ڪريو تو، تئين اوئو آپرو هون ڪائين وائڏو ڪريو تو، ڪم تو آپ ٿي موٽو ايوو ڪوئي نتو جيا رو او هون ڪائي هيڪئو. ⑭ پگيون ابراهيم ٿي اي وائڏو ڪريو: "هون تون نئو ضرور گھڻو آشيرواڏ ڏيھ، ان تاريي ويل الاهي گھڻي وڌشي." ⑮ ان هيونئو نمونئو ابراهيم وائڏا

مانه پروسو راكينَ ڏوروڻ صير ٿي سهڻي، ان اوثا ننه پڳوونَ رو وائڏو ڪرل ٻڌوئي ڪئين زڙيو.

①6 هُوَ زئيون منڪ هون ڪاڻه، اُو آپ ٿي ڪياڪ موٽا رو هون ڪاڻه. ان اُو هون تيام ڪاڻه، زم ڪيڏل وات رٿي ٿاڀي ٿي ٿي ان هايا را پارام منڪون ۾ شڪ نه رڻ. ①7 هيوَ نمونَ پڳوونَ نه رُوڳو وائڏو ڪريو، پڻ هون پڻ ڪاڌو، ڪم تو جيون منڪون ننه وائڏو ڪرل ٻڌوئي ڪئين زڙيا وازو سڻ، اُوئون منڪون ننه اُو پڪي ڪاتري ڏيوا ڪرتو تو جي پڳوونَ رٿي مرضي نئين پڌلڻ. ①8 پڳوونَ وائڏو ٿي ڪريو ان هون ٿي ڪاڌو، جيون ۾ پڳوونَ ڪوڙ ڪري نٿي هيڪتو، زم ايئون پيئون پڪيون واتون ٿي آپون ننه گهڻو خوصلو زڙڻ، جيئي وائڏو ڪرل تارڻ ليڏا هارو پڳوونَ را وائڏا مانه پروسو را ڪيوه. ①9 پڳوونَ را وائڏا مانه پروسو را ڪيا ٿي آپو وشواس اڏڳ رڻه ان تيام آپون ننه ڪاتري ٿي تارڻ زڙشي. اڳي رُوڳو مُڪ پوزاري پڳوونَ را گهر ۾ آڏا لاڳل پڙڏا ٿي متين پويٽرون ۾ پويٽر جڳا موئين پڳوونَ ڪن زائي هيڪتو. پڻ هُوَ آبي پڳوونَ را وائڏا مانه پروسو را ڪيا ٿي تارڻ لينَ اُوڻه پڳوونَ ڪن زائي هيڪون، ②0 جيئڻه ايسو اڳي گيل سڻ. اُو ملڪِ صِدقِ يادشا را نمونا پرموڻه هميش هُوڏي مُڪ پوزاري ٿين آپون مور آڪاش ۾ پڳوونَ ڪن گيوه، زم آپون ننه آپ پيڙا آڪاش موئين پڳوونَ ڪن تيراوڻه.

ملڪِ صِدقِ يادشا پڳوونَ رو مُڪ پوزاري

7 ① هُوَ هائي ملڪِ صِدقِ نومي منڪ، سالم شهر رو يادشا هتو، ان پرپو پرميشور رو پوزاري پڻ هتو. زئيون ابراهيم يادشائون مانه جيت ڪرين پاسو آوتوت ريو، ٽئين اُو ابراهيم ننه پيرو ٿيو، ان ابراهيم ننه آشيرواڏ ڏيڏو. ② ان ابراهيم اُوئون شينهنون موئين ٿي، جي يادشائي لوتي تي، ڏهو حصو اوثا ننه ڏيڏو. هُوَ پيرهيڻين وات سڻه جي اوثا رو نوم ملڪِ صِدقِ سڻه،

جيا رو مطلب سٺه انصاف مانه وُودا واڙو پادشا. ان پڙي وات سٺه جيا
 اُو سالم رو پادشا پڻ سٺه، جيا رو مطلب سٺه هڪ رو پادشا. ③ شاستر ۾
 نڪو اُٿا را باپ، نڪو اُٿا ري مان، نڪو اُٿا ري پيڊي، نڪو اُٿا ري حياتي
 را شروع، ان نڪو اُٿا ري حياتي را ڌنگ را پارام لڪل سٺه. هيونئ نمونئ
 ملڪِ صِدق پڳوون را ڏيڪرا ايسو رو مثال سٺه، جيو هميش هُودِي پڳوون رو
 يوزاري سٺه.

④ زوئو، هائي ملڪِ صِدق ڪيوو موٽو منڪ هتو. اُو ايوو موٽو هتو جيا
 آڀئئ موٽئ ڏاڏئ ابراهيم جنگ ۾ پاسي ليڏل شينهنون موٽين ٿي ڏهمو حصو
 اُٿا نئ ڏون ۾ ڏيڏو. ⑤ هونئ ابراهيم را پوترا لاوي ري ذات موٽين ٿي جيا
 منڪ پڳوون ربي پوزا ڪريا را ڪوم مانه راکل سٺه، اُٿون رو موسيٰ رون
 لڪل حڪمون پرموئئ اي حق سٺه جيا اُو اسرائيلي قوم رون منڪون ٿي ڏهمو
 حصو ڏون ۾ لئ. مطلب اُو آپرون اسرائيلي پايون ٿي ڏون لئ، جيا اُٿون را
 زم ابراهيم ري پيڊي را سٺه. ⑥ پڻ ملڪِ صِدق لاوي ري پيڊي ٿي نئو، توئي
 پڻ اُٿئ ابراهيم ٿي ڏهمو حصو ڏون ۾ ليڏو. ان ابراهيم اُو رو اُو منڪ هتو جيا
 ٿي پڳوون وائڏا ڪريا تا، توئي پڻ ملڪِ صِدق ابراهيم نئ آشيرواڏ پڻ ڏيڏو.
 ⑦ هونئ ٻڌون نئ ڪبر سٺه جيا نونو موٽا نئ نئين، پڻ موٽو نونا نئ آشيرواڏ
 ڏئ. ⑧ هونئ لاوي ري ذات را پوزاري جيا ڏهمو حصو ڏون ۾ لئ، اُو رُوگا
 مريا واڙا منڪ سٺه. پڻ ملڪِ صِدق جيئئ ڏهمو حصو ڏون ۾ ليڏو، شاستر ۾
 اُٿا ري موت را پارام لڪل نئي پڻ رُوگو اُٿا رئ جيوتو ريا را پارام لڪل
 سٺه. ⑨ آبي ام پڻ ڪي هيڪونه جيا لاوي، جيا رو ڏهمو حصو ڏون ۾ ليڏا
 رو حق هتو، زوئئ آڀ آڀا ڏاڏا ابراهيم ري هائي ملڪِ صِدق نئ ڏهمو حصو
 ڏيڏو. ⑩ ڪم تو زئيون ملڪِ صِدق ابراهيم نئ پڙو ٿيو، تئيون لاوي هزون زلميو
 ٿي نئو، پڻ ابراهيم لاوي رو ڏاڏو ٿين زوئئ لاوي را پاها ٿي ملڪِ صِدق نئ
 ڏون ڏيڏو.

ايسو پڳوونَ رو وائيدو كرل مڱ پوزاري سئ جيو هميش هُودِي جيوَتو ريشي



⑪ هَوَئِه زئيون پڳوونَ مُوسي ري هاڻي اسرائيلِي قوم نئه حُڪم ڏيڏا، تئہ تَوَئِه پڳوونَ اِي حُڪم پڻ ڏيڏو جي پوزا رو ڪوم ڪريا واڙا لاوي ري ذات ٿي ان هارُون ري پيڊي ٿي هَوَئِه. پڻ جي لاوي ري ذات واڙون پوزاريون ٿي پڳوونَ رو مقصد پورو ٿي هيڪُت، تو پيزا نمونا را پوزاري رئه آيا رو ڪي ڪوم ٿئت، جيو ملڪِ صِدق پاڌشا را نمونا پرموئِه سئ، ان هارُون پوزاري را نمونا پرموئِه نٿي.

⑫ وات اِي سئ، زئيون پوزاري رو نمونو پڌلئ، تئيون ضروري سئ جي اُو حُڪم پڻ پڌلئ جيون پرموئِه پوزاري اڳي سونڊاتا. ⑬ ڪم تو اِي نوا نمونا رو پوزاري ايسو، جيا را پارام شاستر م لڪل سئ، اُو لاوي ري ذات رو نتو، پڻ پيزي ذات رو هتو جيا ذات موئين ٿي ڪيئِه پوزاري ٿين پڳوونَ را نوم مانِه ڏونپ ان مال ڪيڏي نٿي ساڙيو. ⑭ ڪم تو وات ساوئي سئ جي آڀڻو پريو ايسو پيڊي پرموئِه يهوداه ري ذات رو هتو، ان زئيون مُوسي پوزاريون را پارام حُڪم ڏيڏا، تئيون اُوئِه هيا ذات موئين ٿي پوزاري ٿيا را پارام ڪئين نتو ڪيڏو.

⑮ ان هيڪ پيزي وات پڻ سئ جيا ٿي وات وڌارئ ساوئي تئہ جي پڳوونَ هَوَئِه مُوسي را لڪل حُڪم پڌياھ. اِي پيزو پوزاري جيا را پارام شاستر م لڪل سئ، اُو ملڪِ صِدق جيوو سئ. ⑯ مطلب ايسو مُوسي رون لڪل حُڪمون پرموئِه پوزاري نه ٿيو، ڪم تو اُو لاوي ري ذات ان هارُون ري پيڊي رو نتو. پڻ اُو پوزاري تيام ٿيو ڪم تو اُو پڳوونَ ري ڪڙا ٿي هميش هُودِي جيوَتو ريشي. ⑰ ڪم تو پڳوونَ شاستر م ايسو رئي هاڪ پرين ام ڪيڏو:

"تُون ملڪِ صِدقِ پادشا را نمونا پرموئنه
هميش هُوڌِي پُوزاري سئه."

⑱ زئيون پڳوون هم ڪيڏو، تئيون اونه پُوزاري ٿيا رو اڳلوڪو حُڪم ڪتم ڪريو، ڪم تو هيون پُوزاريون ري پُوزا ٿي ڪئين قائيڏو نتو، ان اوتا ٿي منڪ پڳوون ٿي واسطو نتا راڪي هيڪتا. ⑲ ڪم تو موسي رن لڪل حُڪمون ٿي پڳوون رو مقصد ڪيا ئي وات ۾ پورو نه ٿيو. تيام پڳوون تارڻ ليڏا هارو نوو وسن بونڌيو جيا مانه آبي پروسو راڪي هيڪونه. اي نوو وسن موسي رن لڪل حُڪمون ٿي وڌارنه نائوڪو سئه، ڪم تو ايئا وسن ري ڪري آبي پڳوون ٿي واسطو راڪي هيڪونه.

⑳ ان اي نوو وسن ايئا وات ري ڪري پڻ وڌارنه نائوڪو سئه، جي پڳوون هون ڪائين اي وسن بونڌيو. ڪم تو جيا پُوزاري موسي رن لڪل حُڪمون پرموئنه ٿيا، پڳوون اوئون ننه پُوزاري نايا هارو هون نتو ڪاڌو. ㉑ پڻ اي نوا نمونا رو پُوزاري نايا هارو پڳوون هون پڻ ڪاڌو، زم شاستر ۾ لڪل سئه:


"ايشور آپرو قينصلو نئين پڌله
ان اونه هون ڪائين ام ڪيڏوه:
تُون هميش هُوڌِي پُوزاري سئه."

㉒ هيون نموننه ايسو ايئا نوا وسن رو زومن ٿيو، جيو وسن پڳوون را ڪاڌل هون ري ڪري موسي ٿي بونڌل زونا وسن ٿي وڌارنه نائوڪو سئه.

㉓ ان زونا وسن رن پُوزاريون ان ايسو ۾ پيزو قرق اي سئه. زونا وسن پرموئنه گهڻا پُوزاري ٿيا، ڪم تو موت ري ڪري او هميش هُوڌِي پُوزا رو ڪوم ڪري نٿي هيڪتا. ㉔ پڻ ايسو هميش هُوڌِي جيوتو ره، ان تيام او هميش هُوڌِي پُوزاري سئه ان پيزو ڪوئي اوتا ري جڳا ۾ پُوزاري نئين ٿه. ㉕ تيام جيا منڪ اوتا ري ڪري پڳوون هوما اوئه، ايسو پورنه نموننه اوئون ننه تارڻ ڏي هيڪنه، ڪم تو او هميش هُوڌِي جيوتو سئه زم اوئون هارو پڳوون ٿي پراٿنا ڪرئ.

②⑥ ايسو هيوو مُک پوزاري سئه، ان آپون نئه هيوو مُک پوزاري رئي ضرورت هتئي. او پوتر سئه، اوئا ډ کئين پوندائي نئي ان کئين ڏوه نئي. او ڏوهاريون تي هاو ڌار سئه، ان پگهون اوئا نئه آکاش مانه ٻڌون تي گهڻو مون ڏيتوه.

②⑦ تيام پيزون پوزاريون را زم، ايسو نئه ام کريا رئي کئين ضرورت نئي جي او روز روز، مور تي آپون کرل ڏوهون ري ماڻي هارو، ان تيا کيڙ منکون رون ڏوهون ري ماڻي هارو، پگهون را نوم مانه مال ساڙئه. کم تو ايسو آپ پيدوهي سئه ان اوئه هيڪڻه وار پگهون را نوم مانه آپرو جيو ڏيتو زم هميش هودي منکون رون کرل ڏوهون رئي ماڻي زڙئه. ②⑧ موسي رون لکل حکمون پرموئنه ڏوهاري ان هيئا منک مُک پوزاري راکل سئه. پڻ پگهون هائي هون موسي رون لکل حکمون کيڙ کاڌو ان هون کائين ايسو نئه مُک پوزاري راکيو، جيو پگهون رو ڏيکرو سئه ان هميش هودي پگهون رئي مرضي پوري کره.



ايسو نوا وسن پرموئنه پگهون رو سونديل مُک پوزاري سئه


① 8 هايون واتون رو کاس مطلب اي سئه. آپتو مُک پوزاري ايسو ايوو سئه، جي او آکاش موئين پرميشور ري گهاڌي مانه اوئا رئه زمئنه پاهنه مون ډ

٢) ان مُڪ پُوزاري ٿين پوِتر جڳا موئين شيوا ڪرڻ. هائي پوِتر جڳا اُو تنبو نٿي جيا ننه منڪي پڳوون رڻه ريا هارو ڪوڙيو تو، پڻ پڳوون رڻي هاسئي ريا رڻي جڳا آڪاش سڻه جيا ننه ايشور پڳوون آپ ٺايوه.

٣) هوڻه هر مُڪ پُوزاري پڳوون را نوم مانه دُونپ ان مال ساڙيا هارو راکل سڻه. تيام ايسو رڻه پڻ مُڪ پُوزاري ٿين پڳوون را نوم مانه ڪئينڪ ساڙو تو. ٤) جي ايسو ڌرتي مانه هوڻ، تو اُو موسي رون لڪل حڪمون پرموڻه پُوزاري نه ٿئ، ڪم تو ڌرتي مانه پيزا منڪ اڳي راکل سڻه جيا پُوزاري ٿين موسي رون لڪل حڪمون پرموڻه پڳوون را نوم مانه دُونپ ان مال ساڙه. ٥) ايڻا ڌرتي رڻي پوِترون ۾ پوِتر جڳا جيڻه پُوزاري شيوا ڪرڻ، اُو آڪاش واري پوِترون ۾ پوِتر جڳا را نمونا پرموڻه ٺاؤل سڻه، ان آڪاش را نمونا رو زوڻه نقل ان سوڻيو سڻه. هائي وات شاستر ۾ پڻ لڪل سڻه، ڪم تو زئون موسي پڳوون را ڪيڏا پرموڻه پڳوون رو تنبو ٺوراي وازو هتو، تئين پڳوون موسي ننه ام هزميو:

”مارئي وات هومپڙ، تون ٻڌوئي ڪئين ايڻا نمونا پرموڻه ٺوراوي جيا نمونا را پارام هون تون ننه همڻه ڏونگر مانه ڪونه ريو.“

٦) تيام جي شيوا پڳوون ايسو ننه ڪريا هارو ڏيڏيڻه، اُو ايت رون پوزاريون ري ڪرل شيوا ٿي گهڻي ٺاؤڪئي سڻه. ان هيوڻه نمونن جيو نوو وسن پڳوون ايسو



هات منكون ٿي ٻونديوه، اُو زونا وسن ٿي گهڻو ٺاڻوڪو سئ، ان جيون وائيدون ٿي پڳوونَ نوو وسن ٻونديوه، اُو پڻ زونون وائيدون ٿي گهڻا ٺاڻوڪا سئ.

⑦ ڪم تو جي پيرهيان وسن ٿي پڳوونَ رو مقصد پورو ٿئي، تو پيزو وسن ٻونديا رٿي ضرورت ٿي نه پڙت. ⑧ پڻ پڳوونَ منڪون رو ڏوه ڪاڍين نوو وسن ٻونديا را پارام ڪيڏو، زم شاستر ۾ لڪل سئ:

”ايشور ام ڪئھ:

زوئو، ايوا ڏي آوشي

زئيون هون اسرائيل ري پيڊي ٿي

ان يهوداه ري پيڊي ٿي نوو وسن ٻونديھ.

⑨ اي نوو وسن اوڻا زونا وسن جيوو نئين هوئ،

جي مئين اوئون رون ڏاڏون ٿي ٻونديو تو،

زئيون مئين اوئون رٿي آڳيوونئي ڪرين

مصر ملڪ ري ڳلومي ٿي ٻارا ڪاڍيا تا.

ڪم تو او مارا اوڻا وسن مانھ نه وودا،

تيام مئين اوئون نئھ ساڏيا پرا.

ايشور هم ڪئھ.

⑩ ان ايشور ام پڻ ڪئھ:

پڻ جيو وسن هون تيا ڪيڙ

اسرائيل ري پيڊي رون منڪون ٿي ٻونديھ،

او مارو وسن ايوو سئ.

هون آپرا حڪم اوئون را ڌيماڳ ۾ نوڪيھ

ان زوئئھ اوئون رون منون ۾ لڪيھ.

ان هون اوئون رو پڳوون ٿيھ

ان او مارا منڪ ٿيشي.

⑪ اُونَا وِڪَت ۾ ڪوئي آپرا پاڙا واڙا نئه ام نئين شيڪاڙه

نڪو ڪوئي آپرا پائي نئه ام ڪيشي

جي 'ايشور ٿي واسطو راڪ!'

ڪم تو اُونون موئين ٿي نونا موتا ٻڌائي

آڦوڪا پڳوون ٿي واسطو راڪشي.

⑫ ڪم تو هُون اُونون مانھ ڏيا ڪرين

اُونون رون ڪراپ ڪومون رڻي ماڦي ڏيه،

ان اُونون رون ڪرل ڏوهون نئه وڙي نئين همپارون."


⑬ زئيون پڳوون هيا وسن نئه نوو ڪيڏو، تئيون پيرهيون وسن زُونو ٿي گيوھ.

ان جئين ڪئين زُونو ٿي زائھ، اُو ڪتم ٿيا مانھ سئھ.


زُونا وسن پرموئٽ مال ساڙيا ٿي منڪون نئه ماڦي نئي زڙتئي

9 ① هَوَ پڳوون را پيرهيان وسن پرموئٽ پُوزا ڪريا را پارام حُڪم هتا،
ان پَوِتر جڳا هتئي جي ڌرتي مانھ هتئي. ② هايا وسن پرموئٽ هيك تنهُو

ڪوڙوٿو، جيا ري پيرهيان ڪوئي موئين ڏيو ميليا رڻي شينھ هتئي، ان اُو ميز هتو
جيا مانھ پُوزاري پڳوون را نوم ري روٽي ميلتا. هايا پيرهيان ڪوئي نئه پَوِتر
جڳا ڪيتا. ③ هايا ڪوئي رئه موئينليئھ وڙ هيك پيزو پڙڏو لاڳل هتو، ان تيا ڪيڙ



هڪ پيزي ڪوئي هئي جيا نٿ پويترون ۾ پويتر جڳا ڪيتا. ④ اوتڻه ڏونپ ساڙيا هارو هيم رئي هڪ ويڙهي هئي، ان وسن رئي پيئي پڻ هئي، جيا مانھ



ٻڌيل هيم رو پترو ساڙل هتو. اوتا پيئي موئين هيم رو هڪ ٺونڀرو هتو جيا ۾ منا نومي روئي راکل هئي، هارون پوزاري رئي او لاکڙي هئي جيا ٿي

ڪونڀر ٺهريا تا، ان وسن ري پاڻي هتي جي پوڻا ري هتي ان جيون مانھ پڳوون را حڪم لکل هتا. ⑤ اوتا پيئي را ڍڪ مانھ پاهرو ڏيڍا واڙون آڪاشي ڏوتون را ٻي پوترا ٺاول هتا، جيون وسا پڳوون زبڪتا سوجھرا را روپ ۾ ڏيکارا ڏيتو. هايا وسلپا ماڳ نٿه منومئا رئي جڳا ڪيتا، ان هائي آڪاشي ڏوت منومئا ري جڳا مانھ سونڀو ڪرتا. پڻ همٿه هايون موئين ٿي هر هڪ شينھ را پارام ٻوليا رو توئون ٿي.

⑥ زئيون هائي ٻڌي شينھون هم تيار ٿي گي تي، تئيون پوزاري پڳوون رئي شيوا ڪريا هارو پيرھين ڪوئي ۾ هميش زاتا ريتا. ⑦ پڻ پيزي ڪوئي ۾ روڳو مک پوزاري سال ۾ هڪ وار زاتو. اوتڻه زايا هارو اوتا رٿه پڳوون را نوم مانھ مال ساڙو تو، ان پسٽه اوتا رو لوئي لين موئين زاتو ان آپري ماڳي هارو ان آپري اسرائيلي قوم رون منڪون رون ان زوٿيا ۾ ڪرل ڏوهون ري ماڳي هارو پڳوون را نوم مانھ او لوئي چنڊتو. ⑧ هايا ٿي پويتر آتما وات ساوئي ڪرين ڏيکارڻھ جي جيونھ نمونھ پيرھيان وسن را تنھو ۾ پويترون ۾ پويتر جڳا موئين زايا رو رستو ڪلون تو، هيونھ نمونھ زئيون هوڏي پيرھيان وسن رو نمونو ويتو ريو، تئيون هوڏي پڳوون ٿي واسطو راکيا رو ان تارڻ ليڏا رو رستو ڪلون تو. ⑨ هائي آپون هارو همٿوڪا زمونا ۾ هڪ مثال سٺھ، جي ام ٿي ٿي هيڪتو جي ڏونپ ان مال

ساڙيا ٿي پوزيا واڙون را من پويتر ٿئ. ⑩ زونا وسن را پوزا ڪريا را حڪم
کاڌا پيڌا را پارام ان نمونا نمونا ري سونت ان سنون ليڌا را پارام سئ، ان او
ٻڌائي حڪم من نئ پويتر ڪريا هارو نئا، پڻ روگا منڪون نئ اڙايا ٿي پويتر
ڪريا هارو هئا. ان هائي حڪم نوا وسن را وڪت هوڏي ڏيڌل هئا.

نوا وسن پرموئئ ايسو رءُ آڀرو جيو پڳوون را نوم مانھ ڏيڏا ٿي
منڪون نئ ماڦئي زڙئھ

⑪ پڻ همئئ ايسو ڪريست مڪ پوزاري ٿين آيوھ، ان جيون نائوڪيون واتون
را پارام پڳوون وائيدو ڪريو تو، او واتون ايسو ري ڪري همئئ زڙئھ ري.
ايسو مڪ پوزاري ٿين تيدوڪا هات ٿي ناول تنهو موئين نئي گيو، پڻ اوئا
ٿي موٽي ان نائوڪي جگا موئين گيوھ، جيئي اينئا ڌرتي مانھ نئي. ⑫ ان
ايسو پڳوون را نوم مانھ ساڙل ٻاڪرون ان واسڙون رو لوئي لين نئي گيو.



پڻ آڀرو جيو هيڪئھ وار پڳوون را نوم
مانھ ساڙين آڀرا لوئي ٿي هميش هارو
منڪون نئ ڏوهون را قوضا ٿي آڙا
ڪريا، ان پسئ پويترن ۾ پويتر جگا
آڪاش موئين گيوھ. ⑬ زئيون پڳوون
را نوم مانھ ساڙل ٻاڪرون ان آڪون رو
لوئي منڪون مانھ چنيدھ، ان زئيون منڪ
پڳوون را نوم مانھ ڏونپ ڪرل واسڙي
ري شيلي را پوئي ٿي سونت لئھ، ٿيون

اڙال منڪ اڙايا ٿي پويتر ٿئ. ⑭ تيام وات ساوئي سئھ جي زئيون ايسو
ڪريست امر پويتر آتما ري ڪڙا ٿي آپ نئ پيڏوھي راڪين آڀرو جيو پڳوون را
نوم مانھ ڏيڏوھ، تو او ضرور هيا ٿي گھڻو وڌارئھ ڪرشي، ان آڀرا لوئي ٿي

آپڻو من پوٽر ان صاف ڪرشي، زم آبي او ڪراپ ڪوم ساڏون جيون ٿي هميش رو موت زڙڻ، ان جيوتا پڳوون رڻي شيوا ڪرون.

⑮ تيام ايسو پڳوون ان منڪون وسا نوو وسن ٻونڊيا ۾ وسليو منڪ سڻ، زم او آڀرا موت ٿي منڪون نڻه ڏوهون را قوضا ٿي آزاڌ ڪراوڻ، جيا پڳوون را پيرهيان وسن رون حڪمون مانھ نه وڍا ري ڪري ڏوهون ۾ ڦاٿل هئا. ان هيون نمونن جيون منڪون نڻه پڳوون آب ٿي واسطو راڪيا هارو سوندياھ، اوئون نڻه وارئون را زم او ٻڌوئي ڪئين هميش هارو زڙشي، جيا را پارام پڳوون وائڌو ڪريو تو.

⑯ هوڻه زئيون منڪ مريا مور آڀرون ٻاڙون ۾ مال ملڳت ورايا رو وسن ٻونڌڻ، تڻيون وائڌو ڪرل شينھون تڻيون هوڏي نئين زڙڻ، زئيون هوڏي وسن ٻونڊيا واڙو نه مرڻ. ⑰ ڪم تو ايوو وسن موت ڪيڙ ڪوم رو ٿڻ، ان زئيون هوڏي وسن ٻونڊيا واڙو جيوتو سڻ، تڻيون هوڏي اوئا ٻونڌل وسن ري ڪري ڪئين نئين ٿڻ. ⑱ هيون نمونن زئيون پڳوون حڪم ڏيڌا رڻه ٿوڻه پيرهيون وسن ٻونڌيو تو، تڻيون پڻ موت ٿيو ان وسن لوئي ٿي ٻنڌوڻو. ⑲ ڪم تو زئيون موسي پڳوون رون ڏيڌل حڪمون ڀرموڻه ٻڌائي حڪم پوري اسرائيلي قوم نڻه همپڙايا، تڻيون اوڻه پڳوون را نوم مانھ ساڙل واسڙون ان ٻاڪرون رو لوئي لين پوڻي موئين پيڙيوو. ان پسڻه راتا رنگ ڪرل اون ان زوفا نومي وڻ ري ڏاڙڪي ٿي او لوئي اوئا ڪتاب مانھ چنڊيو، جيا مانھ پڳوون را حڪم لڪل هئا، ان ٻڌون منڪون مانھ پڻ چنڊيو. ⑳ ان لوئي چنڊتون موسي ام ڪيتوت ريو: ”اي او لوئي سڻه جيا ٿي پڳوون تمون ٿي وسن ٻونڌيوھ. تمارڻه ايئا وسن رون حڪمون مانھ ويو.“ ㉑ ان هاڳي نمونن موسي پڳوون را تنبو مانھ ان پوزا ڪريا ريون ٻڌيون شينھون مانھ لوئي چنڊيو. ㉒ ان موسي رون لڪل حڪمون ڀرموڻه لوئي ٿي لڳ پڳ هر شينھ اپڙايا ٿي پوٽر ٿڻ، ان لوئي ويورايا وڳر ماڦي نٿي ٿيڻي.

ايسو رڻ هڪڙو وار آڀرو جيو پڳوون را نوم مانه ڏيڏا ٿي
منكون نڻ هميش هارو ڏوهون رڻي ماڦي زڙڻه

23) تيام ضروري هتو جي ايت ري پوزا ري شينهنون، جي آڪاش م پوزا ڪريا
را نمونا پرموڻه ٺاڙ سڻ، اُو هيوڻه نمونڻه مال ساڙيا ٿي اڀڙايا هون پويتر ٿڻه.
ان اي پڻ ضروري هتو جي هايا ٿي پڻ وڌارڻه ٺاڙوڪو ڪڙينڪ پڳوون را نوم
مانه سڙائڻه زم منڪ آڪاش م پڳوون رڻي پوزا ڪريا جيوا ٿڻه. 24) ڪم تو
ايسو ڪريست ايت ري هاڻون ري ٺاڙ پويتر جڳا موئين نڻي گيو، جڻي پڳوون
ري هاسي پويتر جڳا رو هڪ نمونو سڻ. پڻ اُو سڌو هاسي پويتر جڳا آڪاش
موئين گيو، ان همڻه آڀون هارو پڳوون رڻه روڀرو سڻ. 25) مڪ پوزاري سال




ٺو سال مال رو لوڻي لين پويترون م
پويتر جڳا موئين زائڻه. پڻ ايسو هم
وڙي وڙين آڀ نڻه پڳوون را نوم مانه
ساڙيا هارو آڪاش موئين نڻي گيو.
26) جي وات هم هوڻ، تو ايسو رڻه

جڳت نهيا ٿي لين وڙي وڙين ڏڪ سهين مروو پڙڻ. پڻ هاسي وات اي سڻ
جي ايسو همڻه هڪڙو وار ايڻا پڇاڙي واڙا زمونا م ساوو ٿيوه زم اُو آڀرو جيو
پڳوون را نوم مانه ڏڻ، ان هيوڻه نمونڻه هميش هارو منڪون رون ڏوهون رڻي
ماڦي ٿڻه. 27) زم پڳوون ري مرضي پرموڻه منڪ روڳا هڪ وار مري زائڻه ان
تيا ڪيڙ اوئون رو نيا ٿڻه، 28) تم ايسو ڪريست هڪڙو وار آڀرو جيو پڳوون را
نوم مانه ڏيڏو، زم منڪون رون ڏوهون رڻي سڙا آڀ ڪائين الاهي گهڻون منڪون
نڻه ماڦي ڏيوراوڻه. ان اُو وڙي پيڙي وار ڏنيا م آوين ساوو ٿيشي. اُو ڏوهون
رڻي ماڦي هارو نئين، پڻ اوئون نڻه تارڻ ڏيڏا هارو آوشي، جيا اوئا را آيا رڻي
وات زوتا هوشي.

10 ① مُوسِي را لڪل حُڪم آيا واريون واتون رو زوڻه سونڻيو هتا، جيا ٿي
ڪڙينڪ ڪهر پڙي جي پڳوونَ ري وائڻو ڪرل ٺاڻوڪي واتون ڪيوي
ٿيشي. پڻ هائي حُڪم آيا واريون واتون جيوا نٿا. تيام مُوسِي رون لڪل حُڪمون
پرموڻه پوزاريون رڻه سال ٿو سال وڙي وڙين هاڳي نمونڻه پڳوونَ را نوم مانھ
مال ساڙيا ٿي اوڻون منڪون نڻه پوريي ماڻي ڪيڙي زڙي نٿي هيڪڙي، جيا
پڳوونَ رڻي پوزا ڪريا هارو آوڻه. ② ڪم تو جي مال ساڙيا ٿي مال ساڙيا
واڙون منڪون نڻه پوريي ماڻي زڙت، تو پسڻه منڪ مال ساڙيا رو نمونو پڻڌ
ڪرڻ، ڪم تو هيڪڻه وار ماڻي لينَ او هوڻه هميش هارو پويتر هوڻ، ان وڙي
ڏوهون رڻي ماڻي مونڳيا رڻي ضرورت نه پڙت. ③ پڻ هاس ۾ وات ام سڻه،
پڳوونَ را نوم مانھ مال ساڙيا رڻي وات منڪون نڻه سال ٿو سال ياد ڏيوراوڻه
جي اوڻون رون ڪرل ڏوهون رڻي ماڻي نٿي زڙي. ④ ڪم تو آڪون ان ٻاڪرون
را لوڻي ٿي ڏوهون رڻي ماڻي ٿي نٿي هيڪڙي.
⑤ تيام ايسو رڻه ڏنيا ۾ آيا رڻه توڻه شاستر رڻي اي وات ايسو مانھ
پوري ٿيڻه:

”او پڳوون، تماري مرضي اي نٿي
جي منڪ تمارا نوم مانھ مال ان ڏونپ ساڙه،
پڻ تمي مون هارو ڏيل تيار ڪريوه.
⑥ تمون نڻه اي نٿو وڻتو جي تمارا نوم مانھ
منڪ مال ٻاڙين ڏونپ ڪرڻه ان ماڻي هارو مال ساڙه.
⑦ تڻيون مڻين ڪيڏو: زوڻو، او پڳوون،
زم شاستر ۾ مارا پارام لڪل سڻه،
تم هون تماري مرضي پوري ڪرو آيوه.“

⑧ شاستر ري هايا وات ۾ پيرھين اي لڪل سڻه جي پڳوونَ رڻي مرضي اي
نٿي نڪو پڳوونَ نڻه اي وڻتو جي منڪ اوڻا را نوم مانھ مال ان ڏونپ



ساڙڻ، مال بازين ڏوٺ ڪرڻ ان ماڻهي هارو مال ساڙڻ، پلڻ هائي ٻڌوئي ڪئين منڪ موسيٰ رون لڪل حڪمون ڀرموڻه ڪرڻ. ⑨ ان تيا ڪيڙ لڪل سڻه جي ايسو ڀڳوون رڻي مرضي پوري ڪرو آيو. هيوڻه نمونڻه ايسو مال ساڙيا رڻي پيرهيڻن وات کڻه ڪريه، زم ڀڳوون رڻي مرضي پوري ڪريا رڻي پيڙي وات شروع ڪرڻ. ⑩ ڀڳوون ري مرضي ڀرموڻه ايسو ڪريست هيڪڻه وار آڀرو جيو ڀڳوون را نوم مانه ڏيڌو، ان هيوڻه نمونڻه آڀون نڻه هميش هارو ڏوهون رڻي ماڻهي زڙيه ان آڀي ڀڳوون رڻي شيوا ڪريا هارو پويتر ٿيا.

⑪ هر پوزاري ڀڳوون را گهر موئين اوڀو رين روز روز ڀڳوون رڻي شيوا ڪرڻه ان وڙي وڙين هاڳي نمونڻه ڀڳوون را نوم مانه مال ساڙڻ، جيا ٿي ڏوهون رڻي ماڻهي ڪيڏي ٿي نڻي هيڪڻي. ⑫ پڻ ايسو پوزاري هوتون هيڪڻه وار آڀرو جيو ڀڳوون را نوم مانه ڏيڌو، زم هميش هارو ڏوهون رڻي ماڻهي زڙه، ان تيا ڪيڙ ڀڳوون رڻه زمڻه پاهڻه مون ۾ زائين پينو. ⑬ اوڻا توڻا ٿي لين او وات زوڻه ريو، زڻيون هوڏي ڀڳوون اوڻا رون ڏشمڻون نڻه هراوين اوڻا ري پڳي نه لڳاڙه. ⑭ ڪم تو اوڻه هيڪڻه وار آڀرو جيو ڀڳوون را نوم مانه ڏيڌا ٿي هميش هارو اوڻون منڪون نڻه ڏوهون رڻي ماڻهي ڏيوراوڻيه، جيون نڻه ڀڳوون آڀري شيوا ڪريا هارو پويتر ڪرڻ.

⑮ ان پويتر آتما پڻ هيا ماڻهي را پارام آڀون هارو شاستر ۾ هاڪ ڀرڻ.

ڪم تو پويتر آتما ري ڪڙا ٿي شاستر ۾ پيرهيڻ اي وات لڪل سڻه:

①6 "ايشور ام كئھ:

جيو وسن هون تيا كيژ اوئون ٿي بوندِيه،
او مارو وسن ايوس سئھ.

هون آپرا حُکم اوئون رون منون ۾ نوکيه
ان زوئنه اوئون را ڏيماگ ۾ لکيه.

①7 ان تيا كيژ شاستر ۾ پگهون رئي اي وات پڻ لکل سئھ:

"هون اوئون رون ڏوهون رئي ماڻهي ڏيه،

ان مارا حُکم توڙيا رئي وات وڙي نئين همپارون.

①8 هوءَ زئيون ڏوهون رئي ماڻهي ٿي گهيھ، تئيون ڏوهون ري ماڻهي هارو مال

ساڙيا رو ڪا پيزو ڪوئي جيو ڏيڏا رو ڪئين ڪوم ئي نٿي.

پوري هيئت ٿي ايسو مانھ وشواس راڪتا ريوو

①9 هوءَ، پايون ان پينون، ايسو آپرو جيو پگهون را نوم مانھ ڏين آپرا لوئي

ٿي پگهون ڪن زايا رو مارگ ڪوليوھ. تيام آبي پوري هيئت ٿي زوئنه پويترون



۾ پويتر جگا ۾ زائين پگهون ٿي

واسطو راڪي هيڪونه. ②0 اڳي

پويترون ۾ پويتر جگا ۾ زايا هارو

آڏا لاڳل پڙڏا ٿي متوو تو، پڻ

هوءَ ايسو آپرو جيو پگهون را

نوم مانھ ڏين آپون هارو پگهون

ڪن زايا رو نوو مارگ ڪوليوھ. ان

او مارگ ايسو آپ سئھ جيو هميش

هوڏي جيو تو سئھ. ②1 ان هوءَ

آپون پگهون رون سونيل منڪون

هارو ايسو ٻڌون ٿي موتو پوزاري سٺه. (22) تيام آبي هاسا من ٿي پوري کاتري ٿي وشواس راڪين پڳوون ڪن آون. ڪم تو ايسو رٿه پڳوون را نوم مانه آڀرو جيو ڏيڏا ري ڪري، زوئنه آڀا من مانه آڀرو لوئي چنڊيا ٿي، آڀون ننه ڏوهون رٿي ماڻهي زڙييه ان آڀا من صاف سٺه، ان آڀا ڏيل پويتر سنون را پوئي ٿي ڌوئل سٺه. (23) آبي پڳوون را وائڏا ڪرل تارن مانه پروسو راڪين آڀو وشواس اڏڳ راڪون، ڪم تو پڳوون هاسو سٺه جيئنه وائڏو ڪريوه. (24) ان آبي هڪا پيزا رو ڪيال راڪون ان هيئنه نموننه پريم راڪيا رو ان ناٿوڪا ڪوم ڪريا رو هڪا پيزا رو شونق وڌارون. (25) ان آبي وشواسي منڌي ۾ پيزا ٿيوو نه ساڌون، زم ڪئينڪ منڪون رو ڍوڻ سٺه جي او منڌي ۾ پيزا نٿي ٿيتا. پڻ آبي هڪا پيزا ننه حوصلو ڏيڏا ريون. زم زم تمون ننه ڪهر پڙهه جي ايسو رٿه پاسا آيا رو ڏي ڍوڪڙو آهه ريو، تم تم تم هڪا پيزا رو حوصلو وڌارتا ريو.

(26) جي آبي زوئي ڪرين ايسو مانه وشواس ساڏيا ٿي پڳوون رو ڏوه ڪرون، زئون آڀون ننه پوري ڪهر سٺه جي هاس ڪي سٺه، تو پيزو ايوو ڪئين نٿي ريتو، جيا ننه پڳوون را نوم مانه ساڙيا ٿي آڀون ننه ڏوهون رٿي ماڻهي زڙي هڪنه. (27) هيوي حالت ۾ آڀنه روگي گهڻي پيڪ ۾ پڳوون را نيا رٿي وات زووو پڙشي، زئون گهڻي پاهي آڀون ننه پڳوون رون پيزون ڏشمٽون پيزا ٻاڙي نوڪشي. (28) موسي رون لڪل حڪمون پرموئنه جيو پڻ منڪ موسي رون لڪل حڪمون مانه نٿي ويتو، اوتا مانه ڏيا نٿي ٿيتي، پڻ پيئون ڪا ترئون منڪون ري پرل هاڪ ري ڪري اوتا منڪ ننه موت رٿي سزا زڙهه. (29) تو پسنه تم آڀ سوچو، جيئنه منڪ ايسو مانه وشواس ساڏيوه، او منڪ هيا ٿي ڪئي گهڻي موٽي سزا کاڌا جيوو سٺه؟ هم ڪريا ٿي اونه پڳوون را ڏيڪرا ايسو ننه ڪئين نه هزميو. ان اونه ايسو را لوئي ننه هاو گهٽ هزميو، جيا لوئي ٿي ايسو نوو وسن ٻونڌين اوتا ننه پويتر ڪريو تو. ان اونه پويتر آتما رٿي پيعرتي

پڻ ڪرئي، جيئن اُونا مانھ ڪرپا ڪرئي ٿئي. (30) آپون ننه تو پڳوون رئي ڪهر سئ، جيئن ام ڪيڏو:

"يڏلو ليڏا واڙو هون سون،

هون آپ ڏوهون را ايوزام منڪون ننه سزا ڏيه."

ان شاستر ۾ اي پڻ لڪل سئ:

"ايشور آپرون سونيل منڪون رو نيا ڪرشي."

(31) جيوتا پڳوون ري سزا ٿي پياو ڪهن.

(32) تيدوڪا ڏي همپارو، زئون تمون ننه شروع ۾ پڳوون را پاها ٿي سوجهرو

زڙيو تو. تيدي منڪي تمون ننه ايسو مانھ وشواس سڏاوا ڪريو، پڻ تمي گهڻو مقابلو ڪرين آپرو وشواس اڏڳ راڪيو ان صير ٿي گهڻا ڏڪ وينيا.

(33) ڪيڪ ٿوئن ٻڌون رنه روپرو تماري پيعزتي ٿيئي ان منڪون ري هاڻي

تمون ننه تڪيل ٿيئي، ان ڪيڪ ٿوئن تمي پائي ٿين پيزون وشواسيون ننه

سات ڏيتا جيا هيوي حالت ۾ هئا. (34) زئون تمارا وشواسي پائي جيل ۾

پوروٽا، تنيون تمي اوئون هارو ڏڪي ٿين اوئون رئي مدت ڪري. ان زئون

تمارنه وشواس راڪيا ري ڪري منڪي تماري شينهنون ڪوهي، تنيون تمي

ڪشي ٿي اوئون ننه ڪوها ڏيڏي، ڪم تو تمون ننه ڪهر هتي جي تمون

ننه پڳوون را اشيرواڏ ري ڪري من ۾ هڪ زڙيوه، ان آڪاش ۾ ايوو

هڪ زڙشي، جيو ايت ريون شينهنون ٿي گهڻو نائوڪو هوشي ان جيو هميش

هوڏي ريشي.

(35) تيام، زم تمي اڳي هيمنت راڪين وشواس نتو ساڏيو، تم همئن پڻ هيمنت

مت هاريا، ڪم تو وشواس راڪيا رو گهڻو موتو ايوزو سئ. (36) اي ضروري سئ

جي تمي ڏوروڻ صير ٿي سهو، زم پڳوون رئي مرضي پوري ڪرين تمون ننه

او ايوزو زڙنه جيا را پارام پڳوون وائيڏو ڪريوه. (37) پڳوون شاستر ۾ ايسو را

آيا را ٿوٽا را پارام ام ڪيڏو:

”رُوڳيئي ٿوڙيڪ وار هزون ڀاڳي سٺه.

جيو آيا وازو سٺه، اُو آوشي ان ڌير نئين ڪرڻه.

③8 جيو منڪ ماري وات مانھ وئھ،

اُوئا نئھ وِشواس راڪيا ري ڪري جيون زڙشي.

پڻ جي اُو وِشواس ساڏشي،

تو اُوئا ٿي هُون ڪُش نئين ٿيون.

③9 پڻ آبي وِشواس ساڏيا وازا نٿي، جيون نئھ هميش ربي سزا زڙشي. آبي تو

وِشواس راڪيا وازا سون، جيون نئھ تارڻ زڙشي.

زونا زمونا رون منڪون رو وِشواس راڪيا رو مثال

11 ① وِشواس راڪيا رو مطلب سٺه يقين راڪو جي اُو واتون پوري ٿيشي
جيون مانھ آبي ڀروسو راڪونھ، ان اُوئون واتون ربي پڪي ڪاتري راڪو
جي آبي نٿي ڏيڪي. ② هيو وِشواس راڪيا ري ڪري زونا زمونا رون منڪون رو
ڀڳوون ري نظر ۾ مون ٿيو.

③ وِشواس راڪيا ري ڪري آبي مونونھ جي جڳت مور ڪئين نٿو، ان
جڳت ري ٻڌي شينھون جي آبي ڏيڪونھ ريا، اُوئون نئھ ڀڳوون آڀرا ڪيڏا
ٿي ناويھ.



④ وِشواس راڪيا ري ڪري

هاڀل آڀرا ڀائي قائن ٿي وڌارڻه

نائوڪي شينھون ڀڳوون را نوم

مانھ ڏيڏي. وِشواس راڪيا ري

ڪري هاڀل رو مون ٿيو جي اُو

ڀڳوون ري وات مانھ وُڍا وازو

سٺه، ڪم تو ڀڳوون هاڀل ريون ڏيڏل شينھون ري ڪري اُوئا نئھ مون ڏيڏو. ان

پلئ هابل مرل سئ، توي پڻ وشواس راڪيا ري ڪري هزون اونا رئي مونگئي سئ جي پڳوون اونا رو انصاف ڪرئ.

⑤ وشواس راڪيا ري ڪري حنوك مريا وگر دنيا ٿي اوڀرائي گيو. ان او زريو ئي نئين، ڪم تو پڳوون اونا نئ آپ ڪن اوڀاري ليدو. ڪم تو دنيا ٿي اوڀريا مور ايئا وات ري ڪري اونا رو مون ٿيو جي پڳوون اونا ٿي ڪش سئ. ⑥ ام ٿي نئي هيڪتو جي منڪ وشواس راڪيا وگر پڳوون نئ ڪش ڪرئ. ڪم تو جيو پڳوون ڪن آوا ڪرئ، اونا رئ پڳوون را هويا را پارام وشواس راڪو ڪپئ ان اي پڻ وشواس راڪو ڪپئ جي پڳوون اوئون نئ ايوزو ڏئ جيا اونا ٿي واسطو راڪو ڪرئ.



⑦ وشواس راڪيا ري ڪري نوح پڳوون رئي وات مونئي، زئون پڳوون اونا نئ آيا وازا مي ان بوڏ را پارام هوشيار ڪريو، پلئ اوئ توتئ مي ان بوڏ ڏيڪيام نتا آوتا. پڳوون ري مرضي مانھ وين اوئ ٻيڙو نايو، جيا مويين او آپ ان اونا رئي اڪائي بوڏ ٿي پڇي گيا. دنيا

رون پيزون منڪون نئ، جيا وشواس نتا راڪتا، پڳوون رئي سزا زريي ان او ٻڌائي بوڏي گيا. پڻ وشواس راڪيا ري ڪري نوح تارڻ ليدا وازو ٿيو، ڪم تو وشواس راڪيا ري ڪري پڳوون منڪون نئ ماقئي ڏين ڏوهون ري سزا ٿي آزاد ڪرئ.

⑧ وشواس راڪيا ري ڪري ابراهيم پڳوون رو ڪيڏو مونيو، زئون پڳوون اونا نئ اونا ملڪ ۾ زايا رو ڪيڏو جيو پڳوون را وائيڏا پرموتئ اونا نئ زريا وازو هتو. اونا نئ تو ڪهر ئي نتئي جي ڪيال زاووه، توي پڻ پڳوون رو ڪيڏو مونيون روونو ٿيو. ⑨ وشواس راڪيا ري ڪري او پڳوون را وائيڏو ڪرل ملڪ مويين زائين اوئ پريڏيشي ٿين ريو. او لڏا پيڙو تنهون ۾ رين ايل اول لڏتو ريو. ان اونا رو ڏيڪرو احقاق ان اونا رو پوترو يعقوب، جيون نئ پڳوون را وائيڏا پرموتئ او ملڪ زريا وازو هتو، او پڻ همرا م تنهون ۾ ريتا ريا ان لڏتا



ريا. ⑩ ڪم تو ابراهيم اوتا شهر ۾ ريا رڻي وات زوتوت ريو جيو آڪاش ۾ سٺ، جيا رڻي زوئٽه پڪئي پٽياڌ نوڪل سٺ ان جي هميش هوڏي ريشي، ان جيا نٺ پڳوون آب آڀا ڪيال پرموئٽه ٿايوه.

⑪ وشواس راڪيا ري ڪري ابراهيم ري ڏوشي ساره نٺ پڻ ٻار پيدا ڪريا رڻي هيئت زڙڻي، پلٺه او وونزڻي هٽي ان ٻار پيدا ڪريا ري عمر ٿي مٽي گڻي ٿي، ڪم تو اوئه يقين ڪريو جي پڳوون هاسو سٺ، جيئٺه ٻار ٿيا را پارام وائڏو ڪريوه. ⑫ هيوئ نئونٺه، پلٺه ابراهيم ايوو ڏوڪرو هتو جي مرل را زم هتو، توئي هيا هڪا زئا رڻي ويل اتڻي گهڻي وڌي جي اوتا را اولاد گڻيا ٿي بارا سٺ، زتا آڪاش ۾ تارا سٺ، ان زڻي سمونڊ را ڪپ مانه وارڻي سٺ.

⑬ هائي ٻڌائي منڪ وشواس راڪين مري گيا. اوئون ري حياتي ۾ پڳوون را ڪرل وائڏا پورا نه ٿيا. پڻ وائڏا پورا ٿيا ٿي مور، او زوئٽه شيتا ٿي زوئين اوڙڪي گيا جي نيٺ او ڪرل وائڏا ضرور پورا ٿيشي، ان او هيا وات مانه ڪش ٿيا. ان اوئي ام هزمين ڪيڏو جي او دنيا ۾ زوئٽه پرڏيشي سٺ ان لڏيا وازا

سٺه. ⑭ هونءَ زئيون منڀڪ هم ڪئھ، تو وات ساوئي سٺه جي اُو آڀرا ملڪ ري گوت ۾ سٺه. ⑮ جي اُو روڳا اونا ملڪ ري ياد ڪرئ جيا ٿي اُو نيهر يا تا، تو اُون نئھ پاسا زايا رو موقعو هتو. ⑯ پڻ اُو تو هيا ٿي وڌارءَ نائوڪا ملڪ هارو هڪتا تا، جيو ملڪ آڪاش ۾ سٺه. تيام پڳوون اُونون رو پڳوون ڪيور يا ٿي لازي نئي مرتو، ڪم تو اونه آڪاش ۾ اُونون هارو هيڪ شھر تيار ڪريوھ. ⑰ وشواس راڪيا ري ڪري ابراهيم آڀرا ڏيڪرا اِضحاق نئھ پڳوون را نوم مانھ ساڙيا هارو تيار ٿيو، زئيون پڳوون اونا را وشواس رو آزمٽو ليتو. پڳوون ابراهيم ٿي اونا ري ويل وڌار يا را وائيدا ڪريا تا، ان اِضحاق ابراهيم رو پار ٿي ڏوشي ٿي هيڪھ ڏيڪرو هتو، توي پڻ ابراهيم اونا نئھ پڳوون را نوم مانھ ساڙيا هارو تيار هتو. ⑱ پڳوون اونا نئھ ڪيڏو تو جي ”روڳو اُو اولاد تارو اولاد ڪيور اشي، جيو تارا ڏيڪرا اِضحاق ٿي ٿيشي.“ ⑲ پڻ ابراهيم ام هزميو جي پڳوون مرل نئھ جيوتو ڪري هيڪھ. ان زئيون پڳوون ابراهيم نئھ اِضحاق نئھ ماري رو نا پاڙيو، تئيون مثال پرموئھ اِضحاق زوئھ موت ٿي جيوتو ٿين وڙي ابراهيم نئھ پاسو زڙيو.


⑳ وشواس راڪيا ري ڪري اِضحاق آڀرون ڏيڪرون يعقوب ان عيسو مانھ آيا واڙا توڻا را پارام پڳوون ٿي آشيرواڌ مونڳيو.

㉑ وشواس راڪيا ري ڪري يعقوب مريا رءَ توئھ آڀرا ڏيڪرا يوسف رون پئون ڏيڪرون مانھ پڳوون ٿي آشيرواڌ مونڳيو، ان آڀرا گيڏيا مانھ پار ڏين پڳوون ري پوزا ڪري.

㉒ وشواس راڪيا ري ڪري يوسف مريا رءَ توئھ اي وات ڪري جي پڳوون اسرائيل قومن نئھ مصر ملڪ موئين ٿي ٻارئي ڪاڏشي، ان اي پڻ ڪيڏو جي اوت ٿي زايا رءَ توئھ اونا رو لاش پڻ پيڙو ليتا زائھ.

㉓ وشواس راڪيا ري ڪري موسي رءَ مان ٻاپ اونا نئھ زلم ٿي لين ترثيون مئينون هوڏي هٽاڙين راڪيو، ڪم تو اُو اوڙڪي ڳيا تا جي اي سوڪرو ڪاس

سوڪرو سٺم. ان اُو مصر ملڪ را پادشا را حُڪم ٿي نه پيٺوٺا، جي اسرائيلي قوم رٿه نوون زلمل ٻڌون سوڪرون نٿه نمُو ماروو ڪپڻه.




②4 وشواس راڪيا ري ڪري مُوسي موٽو ٿين آپ نٿه مصر را پادشا رو ڏوئيترو ڪيورايا ٿي نا پاڙيو، پلٽه مصر ملڪ را پادشا ري ڏيڪري اُٺا نٿه آپرٿه ڪوڙڻه لين موٽو ڪريو تو. ②5 اُوڻه ٿوڙيڪ وار رو موج مزو پڳوون رو ڏوه هزمين ساڏيو، ان آپري پڳوون ري سُونڊل اسرائيلي قوم پيڙو مصر رون منڪون ري هاڻي ظلم وينو سُونڊيو. ②6 اُوڻه مصر ملڪ ري مال ملڳت گهٽ هزمي، ان پڳوون را سُونڊل پڇايا واڙا ڪريست را پاها رو ٿين پيغزتي سهُو وڌارڻه ٺاڻوڪو هزميو. ڪم تو اُوڻه اي وات ديون م راڪڻي جي پڳوون اُٺا نٿه ايوڙو ڏيشي. ②7 وشواس راڪيا ري ڪري اُو مصر ملڪ ٿي گيو پرو. اُو مصر را پادشا ري رينھ ٿي نه پيٺوٺو، ڪم تو اُو اڻ ڏيڪل پڳوون مانھ ام يقين راکتو، زم پڳوون هوم هومو هوڻه، ان تيام هيٺ نه هارئي. ②8 وشواس راڪيا ري ڪري اُوڻه آپري اسرائيلي قوم رون منڪون نٿه ڪيڏو جي اُو پاشڪا نومي پرپ ڪروا مڏڻه ان پڳوون را نوم مانھ گهيتا ساڙين گهيتون رو لوئي آپرون

گهرون را دروازا مانه چنډئه، زم پگهون رو ميلل آكاشي دوت اسرائيلي قوم
رون پوئيني رون ديكرون نئه دلا كرنه پڻ مصري قوم رون پوئيني رون ديكرون
نئه مارتھ پرا.



29 وشواس را كيا ري كري اسرائيلي قوم را منك قلزم نومي سمونيد موئين
هوكي زمي مانه تين متيا. پڻ زتيون مصر ملك را منك اوئون لار تيا ان همريم
متيا رئي كوشش كرئي، تتيون پوئي اوئون مانه وزي آيو ان او بوڏين مري گيا.
30 وشواس را كيا ري كري اسرائيلي قوم ري منكي هات ڏي يريخو شهر
رئه بيوريني چكر كريا، تو شهر را گهيد رئي پينت پڙي گئي.



③۱ وشواس راکیا ري کري پوندو کوم کريا وازئي راحب نومي پاترن یريخو شهر رون پیزون منکون پیژئي نه مروثئي، جیا وشواس نتا راکتا، کم تو اوئه اسرائيلي قوم رون جونچوسون ننه آپري گهري تگارین پچایا تا.

③۲ هون وذارئه کي کون؟ مون کن اتو وکت ئي نتي جي هون جدعون، برق، سمسون، افتاه، داود، سيموئیل، ان پگهون رو نیاپو دیدا وازون را پارام همپزاوون. ③۳ وشواس راکیا ري کري اوئي پاڌشائون ننه هراوین ملکون مانه قوضو کریو، اوئي انصاف کریو، اوئون هارو پگهون را وائیدا پورا تیا، اوئي شینهون را موندا پند کریا، ③۴ او پاهي م پزیا نئین، تروئار را مون ئي پچي گیا، او هیئا هتا پئ اوئون ننه هیمت زژئي، او جنگ م طاقت وازا تیا ان ڌاریون ڌشمئون ریون قوزون ننه هراوین پگژاوي پري، ③۵ ان اوئي ڌوشیون ننه اوئون رون مرلون ننه جیوتا کرین پاسا دیدا.

پئ هاگي وشواس راکیا ري کري اوئون موئینلیا پیزا منک پوندي هاڙي تین مروئا. او جي آپرو وشواس ساڌتت تو موت ئي پچي زائت، پئ اوئي آپرو وشواس ساڌیا رو نا پاڙیو، زما پگهون اوئون ننه موت ئي جیوي اونازئه، ان او



همیش را موت ئي پچي زائت. ③۶ کیونک مانه منکي نئولي کري، ان کیونک ننه هاپکون ئي ماریا، ان پیزون ننه بوندین جیل موئین پوریا. ③۷ اوئون ننه پوئا هئین ماریا پرا، اوئون ننه کروٽ ئي بیئون تکرور م شیریا پرا، ان اوئون ننه تروئار ئي ماریا پرا. او ریون ان پاکریون ري کلون پیرین ویتا ان هاو موټاگ

هئا. اُو گهڻي مُصِييت ۾ هئا ان منڪ اُوئون ننه تنگ ڪرڻا. (38) دُنيا ايوئي لائيق نٿي جي هيو نائوڪا منڪ ايڻا دُنيا ۾ رهن. اُو رئون ۾ ان دُونگرون ۾ ايل اُول رلتا ريا، ان پونئرون موئين ان زمي ۾ ڪوڏل ڌڙون موئين ريتا.

(39) هايون ٻڌون منڪون رو، وشواس راڪيا ري ڪري، پگهون ري نظر ۾ مون ٿيو، پڻ پگهون رو وائيدو ڪرل ايوو اُوئون ننه نه زڙيو. (40) ڪم تو پگهون رو منصوپو اي نتو جي اُوئون ننه وشواس راڪيا رو ايوو اُوئه توتنه زڙه، پڻ پگهون آڻو ڪيال راڪين هيا ٿي وڌارنه نائوڪو منصوپو نايو تو، جي آڀون وگر نئين، پڻ آڀون پيرو اُوئون ننه اُو ٻڌوئي هڪ زڙه جيا را پارام پگهون وائيدو ڪريو تو.

ٻڌئي نوروڻ پگهون رئي ڏيڏل شيڪت هزمين صير ٿي سهو

12 ① هون، هائي اتا گهڻا منڪ جيئي وشواس رئي هاڪ ڀريه، آڀون ننه حوصلو ڏيڏا هارو آڻنه پيوڙيئي سته. تيام آڀي پڪو وشواس راڪون، ان زم مقابلا ۾ ڊوڙيا واڙا ٻڌو پار اوتارين آپ هارو راڪل مارگ مانھ ڊوڙه، تم آڀي پڻ ٻڌائي ڏوه ساڏين، جيا ۾ منڪ ڦاٽي زائھ، ڊوروڻ صير ٿي سهين آڀون هارو راڪل پگهون را مارگ مانھ وون. ② ان زم ڊوڙيا واڙا انصاب رو ڪيال راڪين ڊوڙ را ڌنگ هوما تاڪي رنه، تم آڀي ايسو مانھ ڏيون ڏيتا ريون، جيو وشواس راڪيا ۾ آڳيونئي ڪريا واڙو سته، ان جيئنه پڪو وشواس راڪين پگهون رئي مرضي پوري ڪرين وشواس راڪيا رو انصاب ڪتيوه. ايڻا ڪشي رو ڪيال راڪين جي آڀا موت ٿي منڪون ننه تارڻ زڙشي، ايسو آڀري پيعزتي ڪئين نه هزمين هوري مانھ زهڙوائِي زهڙوائين مريا رو ڏڪ صير ٿي سهيو، ان تيا ڪيڙ پگهون ري گهاڏي ڪن پگهون رنه زمئنه پاھنه مون ۾ پيو هئو. ③ ڏوهاري منڪي اونا رنه ڪلاڦ اتو گهڻو ڪئين ڪريو، توئي پڻ اونه ٻڌئي ڊوروڻ صير ٿي سهي. تيام تم ايسو را پارام ويچارو، متون تم هيئت هارو

ان وشواس مانه وُودا رو سادو.

④ تمی دوه نه کریا ری کوشش کرتون زوئته مُقابلا ۾ سو، ان دوهاري منک تماره کلاڦ سته. هزون هُودِي هيا مُقابلا ۾ تمون موئين ٿي ڪوئي نٿي مروئو. ⑤ ان تمی شاستر ری اي حوصلو ڏيڏا واڙي وات ويهارِيه پري، جي تمون پڳوون رون ٻارون هارو لکل سته:

”او مارا ڏيڪرا، زئيون ايشور تون نته شيڪت ڏه، تو گهت مت هزم.

ان زئيون او تون نته هزماوئه، تو هيئت مت هار.

⑥ ڪم تو جيا ٿي ايشور پريم ڪرئه، اوتا نته شيڪت ڏه،

ان جيا نته پڻ آڀرو ٻار هزمئه، اوتا نته سزا ڏه.“

⑦ تيام ام هزمين ڏوروڻ صير ٿي سهو، جي پڳوون تمون نته شيڪت ڏه ريو. پڳوون تمون نته آڀرا ٻار هزمئه، تيام او تمون ٿي هم ورتئه. ڪم تو ايوو ڪيو ٻار سته، جيا رو ٻاپ اوتا نته شيڪت نٿي ڏيتو؟ ⑧ پڳوون آڀرون ٻڌون ٻارون نته شيڪت ڏه، ان جي پڳوون تمون نته شيڪت نه ڏت، تو تمی پڳوون را هانسا ٻار نه ٿيوت پڻ حروم را ٻار ٿيوت. ⑨ آڀا ايت را ٻاپ جيون رو آڀي پيز سون، اوئي آڀون نته شيڪت ڏيڏي، تو آڀي اوئون رو مون راکيو. تو پسئه آڀئه اوئون ٿي ڪتو گهڻو وڌارئه آڀا ٻاپ پڳوون را ڪيڏام ريوو، جيئنه آڀون نته جيو ڏيڏوه؟ هم کریا ٿي آڀون نته هميش رو جيون زڙشي. ⑩ ڪم تو آڀا ايت را ٻاپ ٿوڙيڪ وار هُودِي آڀون نته آڀري هزم پرموئنه شيڪت ڏه، پڻ پڳوون آڀون نته هميش آڀا ڦاڻيڏا هارو شيڪت ڏه، زم آڀي اوتا را زم پويتر ٿيون. ⑪ زئيون ڪوڪ آڀون نته شيڪت ڏه، تو تته توئنه هميش ڏورو لاڳئه. پڻ نيٺ اوتا رو نتيجو اي ٿه جي جيا نته شيڪت زڙيئه او منک هڪي ره ان صحيح نموننه وئه.

⑫ تيام هيئت راکو. زم مُقابلا ۾ ڊوڙيا وازون را هات پڳ ڪرئه، توئي پڻ

او هيئت راکين ڊوڙتا ره، تم تمی تڪليهن ۾ هيئت مت هارو، پڻ پوري هيئت

ٿي ايسو مانھ وشواس راڪتا ريو. (13) زم شاستر ۾ لڪل سئھ ”تمي سڌا مارڳ مانھ وو.“ ھوئھ ڊوڙيام، جيون را پڳ مرڙائي زائھ، اوتون رئھ ڪاڌرازا مارڳ مانھ نہ ويوو، متون اُو ھاو مڌا نہ ٿي زائھ، پڻ سڌا مارڳ مانھ ويوو زم اُو ھازا ھورا ٿي زائھ. تيام ھيوئھ نمونئھ تمي سڌا مارڳ مانھ وو، زم تمي وشواس نہ ساڌو پڻ وشواس راڪيا ۾ پڪا ٿي زائو.

پورا من ٿي ڀڳوون رو ڪيتو مونوو نڪا تارڻ نئين زڙئ

(14) تمي پوري ڪوشش ڪرين ٻڌون منڪون ٿي ھپ راڪو، ان پويتر نمونئھ وو، ڪم تو پويتر نمونئھ وُڍا وڳر ڪوئي منڪ ايشور نئھ نئين پاڙئھ. (15) ڪيال راڪو متون تمون موئين ٿي ڪوڪ ڀڳوون رئي ڪُريا ساڌئھ ان اوتا نئھ تارڻ نہ زڙئھ. ان اي ڪيال پڻ راڪو جي تمون موئين ڪوئي ڪراپ وات شروع نہ ٿئھ، نڪا اُو جھيريلي ويل را زم پڪڙين ڪراپو ڪرشي، ان ھم گھئون منڪون رو ٻڳاڙ ٿيشي. (16) ان اي پڻ ڪيال راڪو جي تمون موئين ڪوئي پُونڌو ڪوم ڪريا واڙو نہ ھوئھ، نڪو ڪوئي ايوو منڪ ھوئھ جيو عيسو را زم ڀڳوون ري واتون گھٽ ھڙمئھ. ڪم تو عيسو ڀڳوون ري واتون گھٽ ھڙمين ھيڪا ٿوئا را ڪاڌا ھاٿئھ آپرو پُوئيني رو حق آپرا نونا پائي نئھ ڏيڌو پرو. (17) ان تيا ڪيڙ، زم تمون نئھ ڪبر سئھ، زئيون اوتھ پُوئيني رو ھويا را حق پرمونئھ آپرا ٻاپ ٿي ڀڳوون رو آشيرواڌ مونگيو، تئيون اوتا رئھ ٻاپ اوتا مانھ پُوئيني رو آشيرواڌ مونگيا رو نا پاڙيو. ڪم تو عيسو پلئھ آشيرواڌ ليڌا ھارو گھڻو رويو، تويي اوتھ آپرا ڪرل ڏوھ ٿي توبونھ ڪريا رو ڪئين ڪيال نہ ڪريو.

(18) تمون ھارو ڀڳوون را ٻونڌل زونا وسن رئي وات نٿي. تمي تو ايوا ڏونگر ڪن نٿي آيا، جيو سبيا ۾ اوتھ، زم آپئي اسرائيلي قوم را ڏاڏا ڀڳوون رئھ حُڪم ڏيڌا رئھ ٿوئھ سينا نومي ڏونگر ڪن آيا تا. تيڏي ڏونگر پاھي ٿي ٻڙتوت ريو، اندارو گھش ھتو، ان گھڻي واڙ ھٿي. (19) تيڏي رڻ شينگڙو ٻڙم ٻڙم



واڳتوت ريو، ان پڳوون رو آواز آيو تو. پڳوون ري ڪيڏل واتون هومپڙين منڪي موسيٰ ننه پڳوون ٿي اي وينتي ڪريا ربي منٿ ڪري، جي او اوئون ٿي وڌار نه هون. ②٠ ڪم تو او اي حڪم سهي

نتا هيڪيا جيو پڳوون اوئون ننه ڏيڏو تو، جي ”منڪ هون ڪا پلنه جهنگلي زناور هون، جي ڪوئي ايٿا ڏونگر مانه پڳ ميله، تو اوٿا ننه پوٿا هٿين نمو مارو.“ ②١ ٻڌوئي ڪئين ايوو پيئونڪڻو هتو، جي موسيٰ آپ ڪيڏو: ”مون ننه اتي گهٽي پيڪ لاڳهه ربي جي هون ڏڪونه ريو.“

②٢ پڻ تمون هارو زونا وسن ربي وات نئين، پڻ پڳوون را هونڌل نوا وسن ربي وات سئ. تمي تو صيهون نومي ڏونگر ڪن آيا، اوٿا يروشلم شهر ڪن آيا، جيو آڪاش موئين سئ ان جيوٿا پڳوون رو شهر سئ. تمي لاڪي ڪروڙي آڪاشي ڏوتون ڪن آيا، جيا ڪشي ۾ پيڙا ٿيل سئ. ②٣ تمي اوئون منڪون ري منڌري ڪن آيا، جيون ننه پڳوون آڀرا ٻار ٺاوين آڀرا پوئيني را ڏيڪرا ٿيا رو حق ڏيڏوه، ان جيون را نوم تارن ليڏا هارو آڪاش ۾ لڪل سئ. تمي پڳوون ڪن آيا، جيو ٻڌون رو نيا ڪريا واڙو سئ. تمي اوئون منڪون رون جيوون ڪن آيا، جيا پڳوون ري وات مانه وڍا تا، ان جيا پڳوون ربي مرضي پوري ڪرين آڪاش ۾ سئ. ②٤ ان تمي ايسو ڪن آيا، جيو نوو وسن هونڌيا ۾ پڳوون ان منڪون وسا ولسيو منڪ سئ. اوٿه آڀرو جيو پڳوون را نوم مانه ڏين زوٿه آڀرو لوئي آڀون مانه چنڊيوه. هيون نموننه هابل را موت ري وات ٿي ايسو را موت ربي وات گهٽي وڌار نه ٺاؤڪئي سئ، ڪم تو هابل رو لوئي ڏوهون ربي سزا مونگه، پڻ ايسو را لوئي ٿي ڏوهون ربي ماڻهي زڙه.

②٥ هوشيار ريو، متون تمي پڳوون ري واتون مونيا رو نا پاڙو. زئون پڳوون ڌرتي مانه موسيٰ هات منڪون ننه حڪم ڏين هوشيار ڪريا تا، تيون جيئي

منڪي پڳوونَ ري واتون مونيا رو نا پاڙيو، اُو سزا ٿي نه ڀڄيا. پڻ هَوَئ پڳوونَ آڪاش ٿي ايسُو هات نياپو ميليوه. تيام جي آبي ايٺا نياپا مانه نٿي وِيتا، تو آبي ڪم ڪرين سزا ٿي ڀڄي هيڪشون؟ (26) تيڏي پڳوونَ را آواز ري ڪري زمئي ڏهڻي ٿئي، پڻ هَوَئ پڳوونَ اي وائڏو ڪريوه:

”هُون هزون وڙي هيڪ وار

رُوگي ڌرتي نئه نئين، پڻ آڪاش نئه پڻ ڏگاويه.“

(27) زئيون پڳوونَ ام ڪئھ جي اُو هزون وڙي هيڪ وار ڏگاوشي، تو هايا ٿي وات ساوئي سئھ جي ٻڌي ٺاول شينھون وڙي هيڪ وار ڏگين ڪتم ٿيشي، زم رُوگي اُو ري زائھ جي اڏگ سئھ.

(28) تيام آبي پڳوونَ رو ٿورو مونون، جي آبي آڪاش ۾ پڳوونَ را راز موئين ريشون، جيو اڏگ سئھ ان ڪيڏي ڪتم نئين ٿئھ. ان ھم آبي پڳوونَ ري مرضي مانھ وين، اُوئا رو مونَ راڪين، پڳوونَ رئي ايوي شيوا ڪرون جيا ٿي اُو ڪُش ٿئھ. (29) ڪم تو آڻڻو پڳوونَ پاھي را زم سئھ، ان زم پاھي ٻڌوئي ڪئين ٻاڙھ پرو، تم پڳوونَ اُوئون نئه سزا ڏين ڪتم ڪشي پرا، جيا اُوئا رو ڪيڏو نٿي مونتا.

ھميش پڳوونَ ريون واتون مانھ وِيتا ريوو

13 ① آيت ۾ هيڪا پڙا نئه آڀرو پاڻي ٻين هزمين ايوو پريم راکتا ريوو، جيوو هيڪا گھر را پاتي آيت ۾ راکئھ. ② اُوئون رئي مزموني ڪريا رئي وات مت ويهارو، جيا اوڙڪيندا نٿي ان پنڌ ڪريا وازا سئھ. ڪم تو هيوون رئي مزموني ڪريا ٿي ڪيڏيڪ ڪيڏيڪ منڪي زوٽيا وگر آڪاشي ڏوتون رئي مزموني ڪريھ. ③ جيا وشواس ري ڪري جيل موئين پورل سئھ، اُوئون رو ام ڪيال راڪين مدت ڪرو، زم تمي آپ اُوئون پيڙا پورل هوئو. ان اُوئون رو ڪيال پڻ راکو جيون ٿي منڪ پونڌي هازي ورتئھ، ڪم تو تمي آپ پڻ منڪ سو ان تمون نئه ڏڪون رئي ڪبر سئھ.

④ ٻڌون منڪون رڻه ام هڙموو جي پڙيا رڻي وات مونَ رڻي وات سڻه. ان ڪوئي آڌمي ڪا ڏوشي پوندو ڪوم نه ڪرڻه. ڪم تو نيا رڻه ڏي پڳوون اُئون ٻڌون نڻه سزا ڏيشي، جيا پوندو ڪوم ڪرڻه، پلڻه پڙل هوڻه ڪا ان پڙل هوڻه. ⑤ ٽمي پڙيهون رڻي لالچ مت راکو، پڻ جي ڪئين تمون ڪن سڻه، اُونا مانه ڪُش ريو. ڪم تو پڳوون ام ڪيڏوه:

”هُون هميش تُون پيڙو ريه،

ان تُون نڻه ڪيڏي نئين ساڏون.“


⑥ تيام آبي پورڻي هيئت راکينَ شاستر رڻي اي وات ڪي هيڪونه: ”ايشور مارڻي مڌت ڪريا واڙو سڻه. تيام هُون نئين پيڻاڻون.

منڪ مونَ نڻه ڪي ڪري هيڪڻه؟“

⑦ تمارون آڳيونون نڻه همپارو، جيئي شُروع ۾ تمون نڻه ايسو را پارام پڳوون رو وچن همپڙايو تو. ٽمي اي ويچارو جي اُئون ري حياتي را نمونا ٿي ڪيو نتيجو ٺيهريو، ان اُئون را نمونا پرموڻه ٽمي پڻ همرام ايسو مانه وشواس راکو. ⑧ ايسو ڪريست، جيوو اڳي هتو، هيوو رو هيوو همڻه پڻ سڻه، ان هميش هوڏي ريشي.

⑨ ٽمي قسم قسم ريون شيڪاڙل عجيب واتون ٿي پولاڻين هاس ٿي مت ڦرو! ڪم تو ڌرم پرموڻه ڪيڏل کاڌو کاڌا ٿي نئين، پڻ پڳوون ري ڪرل ڪرپا ٿي تمون نڻه من ۾ ڪاترڻي ٿئو. کاڌا را حُڪم مونيا ٿي ڪيڏي ڪيا نڻه ڪئين ڦاڻيڏو نه ٿيو. ⑩ هوڻه آپون وشواسيون رو هيڪ ايوو حق سڻه، جيو يهوڏي ڌرم رون پوزاريون رو ئي نتو. آبي جيا ايسو مانه وشواس راکونه، جيئنه منڪون ري ماڻي هارو پڳوون را نوم مانه آپرو جيو ڏيڏو، آپون نڻه ايسو ٿي ماڻي زڙه. پڻ جيا پوزاري پڳوون را تنهو ۾ شيوا ڪرتا، زئيون او منڪون ري ماڻي هارو مال ساڙيا ري جڳا مانه پڳوون را نوم مانه مال ساڙتا، تئيون اُئون نڻه ماڻي هارو

ساڙل مال رو مونھ ڪاڏا رو حق نتو، ان نڪو اوئون ننه ماڻهي زرتئي. ⑪ ڪم تو مڪ پوزاري ساڙل مال رو لويي ماڻهي ليڏا هارو پويترون ۾ پويتر جڳا ۾ لي زاتا، پڻ مال رو مونھ اوئا پاڙا تي بارو لي زاتا، جيئن اسرائيلي قوم را منڪ



تنئون ۾ پيڙا ريتا، ان اوئن بارو ٻارڙا پرو. ⑫ هيئن نمونن ايسو پڻ يروشلم شهر تي بارو ڏک سھين مروئو، زم او آپرو جيو پڳون را نوم مانھ ڏين آپرا لويي تي پڳون رون سونيل منڪون نھ پويتر ڪرئ.

⑬ تيام هوئن آبي پڻ، زوئن آبي اسرائيلي قوم را توڙا تي ٻارا نيھرين ايسو ڪن آون، ان آپو موروڪو يھودي ڌرم ساڏين ايسو مانھ پڪو وشواس راکون. ان زم ايسو يروشلم شهر تي ٻارئي منڪون ري هاتي پيعزئي سھي، تم آبي پڻ ايسو مانھ وشواس راکيا ري ڪري پيعزئي سھون. ⑭ ڪم تو ايئن ڏنيا ۾ آپون هارو ڪوئي ايو شهر نتي جيو هميش ريشي، پڻ آبي اوئا شهر ۾ زيا رئي ڪوش ڪرونه ريا، جيو آپون نھ آڪاش ۾ زرتشي ان هميش هوڏي ريشي.

⑮ هوئن پڳون را وڪون ۾ مال ساڙيا ري جڳا ۾ آبي ايسو ري ڪري هميش پڳون را وڪون ڪرون. ڪم تو زئون آبي ايسو نھ آپو پڙو مونونھ، تو آبي ضرور پڳون را وڪون ڪرشون. ⑯ ان تم نائوڪا ڪوم ڪريا رو، ان پائي تين هڪا پيڙا رتي مڌت ڪريا رو مت ويهارو. ڪم تو پڳون ساڙل مال تي نين، پڻ هيون ڪومون تي ڪش ٿئھ.

⑰ تمارون وشواسي منڌري رون آڳيونون رتي وات مونو ان اوئون را ڪيڏام ريو، ڪم تو اي زوئن جي اوئون رنھ پڳون ڪن حساب ڏيو پرتشي، او ڏي رات تماري همپار ڪرئ. اوئون رو ڪيڏو مونو، زم او ڪشي تي هائي ڪوم

ڪرڻ، ان هيا نٿه ڀار نه هڙمڻه. ڪم تو جي اُو آڀرا ڪوم نٿه آڀ مانھ ڀار
هڙمڻي، تو تمارو ڪئين ڦاڻيڏو نئين ٿڻه.

⑱ امون هارو پراڻا ڪرو. امون نٿه تو ڪا ترئي سڻه جي امارو من صاڦ سڻه
ان امي هر وات ۾ ناڻو ڪڻه نمونڻه ويوا ڪرونه. ⑲ هون تمون ٿي گهڻام گهڻي
منٿ ڪرونه جي تمي مون هارو اي پراڻا ڪرو، جي هون جلدِي ۾ تمون ڪن
وڙي آوي هيڪون.

آڪري واتون

⑳ پڳوون، جيو هڀ رکايا وازو سڻه، اونه ايسو را لويي ٿي ٻونڌل آڀرا هميش را
وسن پرمونڻه آڀرا پريو ايسو نٿه مرلون موئين ٿي جيوي اوناڙيوه، جيو ٻڌون ٿي
موتو آڳيوون ٿين آڀرون منڪون رئي همپار ڪرڻه، زم ڌراڙ آڀريون ريديون رئي



همپاڙ ڪرڻ. ②1 ايسو ڪريست ري ڪري پڳوونَ تمون ۾ ايو ا ڪوم ڪرڻ، جيا ٿي اُو ڪُش ٿئ. ان هيوئہ نمونئہ تمون نئہ تيار ڪرڻ، زم تمڻي هر نائوڪو ڪوم ڪرين اُوئا ري مرضي مانھ وو. اُوئا را وڪوڻ هميش ھوڏي ٿيتا رڻ! آمين.

②2 پايون ان پينون، ھون تمون ٿي منٽ ڪرونھ جي تمڻي ماري لڪل حوصللا واري واتون صير ٿي ھومپزو، ڪم تو مئين تمون نئہ گھڻو موٽو ڪت نٿي لکيو. ②3 ھون تمون نئہ ڪُشي ٿي ڪپر ڏيونھ جي آڀڻو وشواسي پائي تيمٿيس جيل ٿي سوتي گيوھ. ان جي اُو مون ڪن جلدِي آيو، تو ھون اُوئا پيڙو ٿين تمون نئہ مڙوا آويھ.

②4 تمڻي تمارون وشواسي منڌري رون آگيوونون نئہ ان پڳوونَ رون ٻڌون سونڊل منڪون نئہ نمسڪار ڪيا. جيا وشواسي اٿلي ملڪ را سئ، اُو تمون نئہ نمسڪار ڪئ.

②5 پڳوونَ تمون ٻڌون مانھ ڪرپا ڪرڻ! آمين.

يعقوب را لكل كت رئي هزموتئي

کت لکيا وازو

اي کت يعقوب لکيو (يعقوب 1:1). اي يعقوب ايسو رو يعقوب نومي مک شيلو نتو، کم تو هيروديس پادشا اوتا نه 44ع ۾ مرايوت پرو (مک شيلون را کوم 2:12). پڻ اي يعقوب ايسو رو پائي هتو (متي 55:13). شروع ۾ او ايسو مانه وشواس نتو راکتو (يوحنا 5-2:7). پڻ تيا کيڙ او وشواسي ٿيو (مک شيلون را کوم 14:1)، ان پس ۾ يروشلم شهر ۾ وشواسي منڊڙي رو موٽو آڳيوون ٿيو (مک شيلون را کوم 13:15، گلتيون 9:2). ان نيٺ او ايسو مانه وشواس راکيا ري ڪري اندازام 62ع ۾ مروٿو. ام لاڳهه جي يعقوب اي کت 50ع ٿي مور لکيو.

کت کيون منکون هارو لکيو

يعقوب اي کت اوئون وشواسيون هارو لکيو، جيا يهودي قوم را هتا ان ڌاريون قومون رون ملڪون ۾ ريتا (يعقوب 1:1). ام لاڳهه جي اي او را او وشواسي سڌ جيا يروشلم شهر ٿي پاڳي ڳيا تا، زليون يهودي ڌرم ري منڪي استيفنس نه ايسو مانه وشواس راکيا ري ڪري ماريوت پرو ان پس وشواسيون نه گهڻا تنگ ڪروا مڌيا تا. او وشواسي ايل اول زائين پيزون نه ايسو را پارام شيڪارٽا ريا (مک شيلون را کوم 4-1:8، 19-20:11).

کت لکيا رو مطلب

منک اوئون يهودي قوم رون وشواسيون نه تنگ ڪرتا ريا، تيام يعقوب اوئون نه ايٿا کت ۾ حوصلو ڏيڻ جي او ڏوروڻ ۾ پڪو وشواس راکڻ، ان ناٿوڪا کوم ڪريا ٿي ڏيکارڻ جي او هاس ۾ ايسو مانه وشواس راکڻ.


ايٿا ڪتاب را شاستر ٿي پيزا حوالا:

يعقوب 1:1 متي 55:13	يعقوب 8:2 يوحنا 34:13
يعقوب 1:1 کوم 17:12	يعقوب 11:2 خروج 14:20
يعقوب 1:1 کوم 13:15	يعقوب 11:2 استيشنا 18:5
يعقوب 1:1 کوم 4، 1:8	يعقوب 11:2 خروج 13:20
يعقوب 25:1 يوحنا 34:13	يعقوب 11:2 استيشنا 17:5
يعقوب 8:2 احبار 18:19	يعقوب 12:2 يوحنا 34:13

يعقوب 6:4 امثال 34:3	يعقوب 21:2 پيدائش 18-1:22
يعقوب 11:4 احبار 18:19	يعقوب 23:2 پيدائش 6:15
يعقوب 11:4 يوحنا 34:13	يعقوب 23:2 2 توارينخ 7:20
يعقوب 11:5 ايوب 10:2-1:1	يعقوب 23:2 يسعياه 8:41
يعقوب 11:5 ايوب 17-10:42	يعقوب 25:2 يشوع 21-1:2
يعقوب 12:5 متي 37-34:5	يعقوب 25:2 يشوع 25:6
يعقوب 17:5 1 سلاطين 7, 1:17	يعقوب 9:3 پيدائش 27:1
يعقوب 18:5 1 سلاطين 45, 41, 1:18	يعقوب 5:4 پيدائش 7:2
	يعقوب 5:4 خروج 5:20

يعقوب

رو لكل كت



1 ① هُون لکيا وَاو يعقوب سون، جيو پڳوونَ ان پڙيو ايسو کريست رو شيوآڌاري سون.

پريمي وشواسي پايون ان بينون، تمی جيا اسرائيلي قوم ريون ٻارون ذاتون را سو، ان ڌاريون قومون ۾ پکڙل سو، ٻڌون نٽه نمسکار.


نورون ڏيئون ۾ پڻ وشواس راکتا ريوو

ان ٺوه کريا را آزمتا ۾ پورا اوتريا هارو پڳوون تي عقل مونڳوو

② مارون پريمي پايون ان بينون، زئون قرق قرق ڏوروڻ ري کري تمارو وشواس راکيا رو آزمتو ٿئو، تو هيا نٽه گهڻي کشي رئي وات هڙمو. ③ ڪم تو تمون نٽه کهر سٽه جي وشواس را آزمتا ۾ پورا اوتريا تي تماري هيئت وڌئو، زم تمی صير تي ڏوروڻ سهو. ④ ڏوروڻ هميش صير تي سهو زم تمی صير کريا ۾ پکا تي زائو ان کيا ئي پڻ ڏوروڻ ۾ پڳوون ري وات مانھ وُڍا رو نه ساڏو. هيوئھ

نمونئہ تمی پڳوونَ ري مرضي مانھ وُودا مِ پڪا تيشو ان هر وات مِ نائوڪا تيشو، ان تمون موئين ڪيا ئي نائوڪي وات رئي گهٽتائي نئين هوئ.

⑤ جي تمون موئين ٿي ڪوڪ ايوو هوئ، جيا نئ ڪهر نٿي پڙتئي جي ڪياڪ ڏوروڻ مِ ڪيوئ نمونئہ پڳوونَ ري مرضي مانھ ويوو، تو اُو پڳوونَ ٿي عقل مونگئ، ان پڳوونَ، جيو ٻڌون منڪون نئ تونا ڏيڏا وڳر ڪُشي ٿي ڏئ، اُوئا نئ عقل ڏيشي. ⑥ پڻ اُوئا رئ پڳوونَ مانھ يقينَ راڪينَ اُوئا ٿي مونگيو، ان پڳوونَ مانھ ڪئين شڪ نہ ڪروو. ڪم تو جيو منڪ پڳوونَ مانھ شڪ ڪرئ،



اُو سُمونڊ ري هيڪي چولي را زم سئ،
جئي وائيرا ٿي ايل اُوئل پاتل ٿئ.
⑦ هيوو منڪ ام نہ هزمئ جي اُوئا نئ
ايشور ٿي ڪئينڪ زڙشي، ⑧ ڪم تو

ايوو منڪ پڳوونَ مانھ شڪ ڪرين هيڪي وات مانھ اُوپتو نٿي، ان هر وات مِ ڦرتو رئ.

لالچ نہ راڪوو

پڻ پڳوونَ مانھ ڀروسو راڪينَ ڳريبي ٿي ويوو

⑨ جيو وشواسي پائي ڳريپ سئ، اُوئا رئ ايئا وات مانھ ڪُش ٿيوو ڪپئ جي پلئ ڳريپ سئ، توئي پڻ پڳوونَ ري نظر مِ اُوئا رو گهڻو مون سئ. ⑩ ان جيو وشواسي پائي شائوڪار سئ، اُوئا رئ آپري مال ملڳت مانھ وڏائي نہ ڪروو، پڻ ام هزموو جي پڳوونَ ري نظر مِ شائوڪار هووو ڪئين نٿي. ڪم تو نيٺ اُو مري زاشي، زم ويلڙي رو ڦولڙو ڪرمائين ڪئم ٿئ. ⑪ ڪم تو ڏي اُوگئ، تڙڪو ٿئ، ان لُو لاگئ، تو ويلڙي هُوڪائي زائھ ان اُوئا را ڦولڙا ڪري زائھ، ان اُوئا رئي ٻڌي ڪوپصورتئي ڪئم ٿئ. هيوئ نمونئہ شائوڪار منڪ پڻ آپرا ڪوم مِ ويتو ويتو ڪئم ٿي زاشي.

زئبون ڏوه ڪريا رو ڪيال آوڻه تئبون آزمتا ۾ پورا اوتروو

⑫ پاڳواڙا اُو سئ، جيا وشواس را آزمتا ۾ ڏوروڻ صير ٿي سئھ. ڪم تو وشواس را آزمتا ۾ پورا اوتريا ٿي اُو پڳوون ري نظر ۾ ھاسا وشواسي ٿيشي، ان زم مقابلا ۾ ڊوڙيا وازا نئھ انصاڀ ۾ جيت رو تاز زڙھ، تم اوتون نئھ هميش رو جيون زڙشي، جيا رو پڳوون اوتون نئھ ڏيڏا رو وائڏو ڪريوھ جيا اوتئا ٿي پريم ڪرھ. ⑬ زئبون وشواس را آزمتا ۾ ڪياڪ نئھ ڏوه ڪريا رو ڪيال آوڻه، تو اوتئا رئھ ام نه سوچوو جي ”پڳوون مارو آزمتا لڏا ھارو مارا من ۾ ڏوه ڪريا رو ڪيال نوڪيوھ.“ ڪم تو پڳوون را من ۾ ڪراڀ ڪيال ڪيڏي نٿي اوتا، ان نڪو اُو ڪيا رو آزمتا لڏا ھارو ڪيا را من ۾ ڪراڀ ڪيال نوڪھ. ⑭ پڻ آزمتون ۾ ڏوه ڪريا رو ڪيال ايئا ري ڪري آوڻه، ڪم تو هر هڪ منڪ آپرون ڪراڀ ڪيالون ۾ ڦاٿي زائھ، ان آپرون ڪراڀ ڪيالون ھوما تٿائي زائھ. ⑮ تئبون، جيوئھ نمونئھ ڏوشي ٿي ٻار پڏا ٿئھ، ان اُو ٻار موتو ٿئھ، ان نيٺ اُو ٻار مري زائھ، ھيوئھ نمونئھ ڪراڀ ڪيالون ٿي ڏوه پڏا ٿئھ، ان اُو ڏوه وڌتو زائھ، ان نيٺ ھايا ڏوه ٿي هميش رو موت زڙھ.

⑯ مارون پريمي پاڻون ان پڻون، تمي مت پُولايا! ⑰ جيئن ڪئين نائوڪو سئھ ان جيئن پڻ پَوِتر سئھ، ھاڻي ٻڌوئي اُو سئھ جي پڳوون را طرف ٿي ڏيڏل سئھ. آڻو ٻاڀ پڳوون، جيئھ ڏي سنڌر ان تارا نايھ، اُو آپ سوجهرو ئي سوجهرو سئھ. ڏي ان رات تو پڏلتا رھ، ان ڏي سنڌر ان تارون رئھ ڦريا ري ڪري سوجهرو ٿئھ ان اندارو پڻ ٿئھ. پڻ پڳوون ڪيڏي نٿي پڏلتو ان اوتئا ۾ ڪئين ڪراڀ وات نٿي. ⑱ اوتھ آپري مرضي پرمونئھ آپرا ھاسا وچن ٿي آپون نئھ نوو جيون ڏين آپرا ٻار نايھ. ھيوئھ نمونئھ، پڳوون ٻڌيون ناول شينھون ان منڪون ٿي مور آپون نئھ سونديھ، زم آبي پڙون مور پڳوون را نوم مانھ پَوِتر ٿيون.

نه رُوڳو ايسو را پارام هاسو وچن هومپزو پن اوتا مانه پورئ نمونئ ويوو

①۹ مارون پريمي پا يون ان پينون، مارئي وات ڪونَ ڏينَ هومپزو. هر منڪ رءُ هميش پيزا رئي وات هومپزيا هارو تيار ريوو، مور ٿي سوچينَ ٻولوو ان جلدي ۾ رينھ ۾ نه آوو. ②۰ ڪم تو رينھ ۾ منڪ پڳوونَ ري مرضي پرموئنه نئين وئ. ②۱ تيام زم منڪ گڏ ڪاڊينَ واول پيز نئ وڌيا رو موقعو ڏئھ، تم تمي ٻڌئي پونڌائي ان ٻڌي گهڻي ڪراپ واتون ساڏينَ گريبي ٿي پڳوونَ رو وچن مونو، جيو زوئنه تمارون منون ۾ واول سئ. ڪم تو پڳوونَ را وچن مانھ وُڍا ٿي تمي پڳوونَ ري سزا ٿي پچي هيڪوه، ان تمون نئ تارن زڙشي. ②۲ نه رُوڳو پڳوونَ رو وچن هومپزو، پن پڳوونَ را وچن مانھ پن وو. جي تمي ام هزموه جي رُوڳو پڳوونَ رو وچن هومپزيا ٿي تمون نئ تارن زڙشي، تو تمي پُولل سو. ②۳ ڪم تو جي ڪوڪ رُوڳو پڳوونَ رو وچن هومپزنه، ان اوتا مانھ ويتو نٿي، تو هايا رو ڪئين قائيدو نٿي. او ايوا منڪ جيوو سئ، جيو ٽڪ ۾ آپرو مونيڊو زوئھ، ②۴ ان پسئ آپرو مونيڊو زوئينَ زائھ پرو، ان جهت ۾ اوتا نئھ وات ويھري زائھ جي او ڪيوو سئ. ②۵ پن جيو منڪ ايسو ريون واتون مانھ ڏيونَ ڏئھ، جيون ۾ پڳوونَ را حڪم ٻڌائي آوي زائھ، ان جيون ٿي ڏوهون را قَوضا ٿي آزاد ٿي زڙھ، ان اوئون واتون مانھ ڏيونَ ڏيتو رئھ، ان هومپزينَ نٿي ويھارتو پن اوئون واتون مانھ وئھ، او منڪ پاڳوازو ٿيشي ڪم تو هم ڪريا ٿي اوتا نئ تارن زڙشي.

②۶ جي ڪوڪ ام هزمئھ جي او ڌرم مانھ صحيح نمونئ وئھ، پن او آپري ٻوليي آپرا قَوضام نٿي راکتو ان ڪراپ نمونئ ٻولئھ، تو او پُولل سئ، ان اوتا رءُ ڌرم پاڙيا رو ڪئين قائيدو نٿي. ②۷ پڳوونَ ري نظر ۾ پويتر ان ڏوه وگر ڌرم پاڙيا رو نمونو اي سئ، جي سوريون ٻاڙون ان رنڌال ڏوشيون رئي مصيبت ۾ همپاز ڪروو، ان آپ نئ ڏنيا ري هر پونڌائي ٿي پويتر راکوو.

شائوڪارون ان گريپون ۾ ڦرڻ نه راکو پڻ ٻڌون رو مون راکو

2 ① مارون پايون ان پينون، تم ۾ آڻا پريو مون واڙا ايسو ڪريست مانھ وِشواس راکوھ، تيام تم ۾ ڦرڻ راکين ڪيا رو پاھو مت ليو.



② مثال، جي تم ۾ وِشواسي پيڙا ٿياھ، ان اوتھ ھيڪ ايوو منڪ آوھ ڄا رھ ھيم رئي مڏيئي نوڪل ھوھ، ان ڄا رھ نائوڪا لوگھڙا پيرل ھوھ، ان پيرو ھيڪ گريپ منڪ آوھ ڄا رھ ڦاٿل ان ڪاٿاڙا لوگھڙا پيرل ھوھ، ③ جي تم ۾ نائوڪا

لوگھڙا پيرل منڪ نھ زوئين ام ڪو: ”تم ۾ ايتھ نائوڪي ڄڳا ۾ بيهو!“ پڻ گريپ نھ ام ڪو: ”تون ايتھ اوڀو رھ!“ ڪا ”تون مارون پڳون ڪن نيسو بيه!“ ④ تو تم ۾ وِشواسي پايون ۾ ڦرڻ نٿي راکيو، ڪي؟ ھم ڪريا ٿي تم ۾ صاف من ٿي نئين، پڻ ڪراپ ڪيالون پرموئھ منڪون رو ڦينصلو ڪروھ.

⑤ مارون پريمي پايون ان پينون، تم ۾ مارئي وات ڏيون ٿي ھومپڙو. پڳون ايتا ڏنيا رون گريپ منڪون نھ سوندياھ، زم او ايسو مانھ وِشواس راکيا ٿي پاڳواڙا تھ ان پڳون را وائڏا پرموئھ تارڻ ليڏا ھارو پڳون را راز موئين زائھ، ڪم تو پڳون وائڏو ڪريوھ جي جيو اوتا ٿي پريم راکشي او پڳون را راز موئين زاشي. ⑥ پڻ تم ۾ شائوڪارون ان گريپون ۾ ڦرڻ راکين گريپون رئي پيعزئي ڪريھ. او تو شائوڪار منڪ نٿي ڪي، ڄا تمون مانھ ظلم ڪرھ، ان تمون مانھ ڪيس ڪرھ؟ ⑦ او شائوڪار منڪ نٿي ڪي، ڄا ايسو را پارام پونڌو ٻولھ، ڄا را منڪ تم ۾ ڪيوراھو؟

⑧ جي تم ۾ شاستر ۾ لڪل پڳون را راز را ڪاس حڪم مانھ ووه، جي

”پيزون ٿي آپ را زم پريم راڪو،“ تو تمڻي نائوڪو ڪروھ. ⑨ پڻ جي تمڻي منڪون ۾ قرق راڪين ڪياڪ رو پاھو ليوھ، تو تمڻي پڳوون رو ڏوھ ڪروھ رڻا، ان مٿس رڻ لڪل پڳوون رڻ حڪمون پرموئڻه تمڻي حڪم توڙيا ري ڪري ڏوھاري ٿياھ. ⑩ ڪم تو جي ڪوڪ پڳوون رڻ پيزون ٻڌون حڪمون مانھ وئھ، پڻ روڳو پڳوون را هيڪا حڪم مانھ نٿي ويتو، تو پلئھ اوئھ روڳو هيڪ حڪم توڙيوھ، توئي پڻ او پڳوون رڻ حڪمون پرموئڻه ڏوھاري ٿيوھ. ⑪ ڪم تو پڳوون جيئڻه ڪيڏوھ جي ”پونڌو ڪوم نه ڪرو“ اوئھ ام پڻ ڪيڏوھ جي ”ڪون نه ڪرو.“ تيام جي تمڻي پونڌو ڪوم نٿي ڪرتا، پڻ روڳو ڪون ڪروھ، توئي پڻ تمڻي پڳوون رڻ حڪمون پرموئڻه ڏوھاري ٿياھ.

⑫ پريم ٿي ٻولو ان پريم ٿي وو، ڪم تو پڳوون ايٺا حڪم پرموئڻه تمارو نيا ڪرشي، جي ”پيزون ٿي آپ را زم پريم راڪو.“ ايٺا حڪم مانھ وُڍا ٿي ڏوھون را قَوضا ٿي آزادي زڙھ. ⑬ ڪم تو جيو منڪ پيزون مانھ ڏيا نٿي ڪرتو، پڳوون اوئا مانھ ڏيا نئين ڪرئ، پڻ ڏوھون رڻي سزا ڏيشي. پڻ جيو پيزون مانھ ڏيا ڪرئ، پڳوون اوئا مانھ پڻ ڏيا ڪرشي ان اوئا نئھ ماڦ ڪرين ڏوھون رڻي سزا نئين ڏئھ.

جيو ايسو مانھ ھاسو وشواس راڪئھ

او نائوڪا ڪوم پڻ ڪرئھ

⑭ مارون پايون ان بينون، جي ڪوڪ ام ڪئھ جي ”ھون ايسو مانھ وشواس راڪنھ“ پڻ او نائوڪا ڪوم نٿي ڪرتو، تو ھم ڪيڏا ٿي ڪيوو ڦاڻيڏو سئھ؟ ھيوو وشواس راڪيا ٿي او ڪم ڪرين پڳوون ري سزا ٿي پڇي هيڪشي؟ ⑮ مثال، جي تمارو ڪوئي وشواسي پاڻي ڪا پين ھوئھ، جيا ڪن پيريا را لوگھڙا نه ھوئھ، ان جيا ڪن روز روز کاڌو نه ھوئھ، ⑯ ان ھوئھ جي تمون موئين ٿي ڪوڪ اوئون نئھ ام ڪئھ: ”زائو ان ھڪي ريو. ٿاڍ ٿي پڇو ان ڪائين ڍاپو.“ پڻ

تامي اوتون نئه لوگهڙا ان کاڌو نٿي ڏيتا جيون رئي اوتون نئه ضرورت سئه، تو هم ڪيڏا ٿي ڪيوو ڦاٽيڏو سئه؟ (17) هيون نمونئ وشواس پڻ سئه. جي ڪوڪ روڳو وشواس راکهه، پڻ هيا پرمونئ ڪئين ناٿوڪو ڪوم نٿي ڪرتو، تو هيوو وشواس ڪيا ئي ڪوم رو نٿي ان هاس ۾ وشواس پڻ نٿي.

(18) پڻ ڪوڪ وشواسي هڪا ٻيڙا نئه ام ڪيشي: ”تون وشواس راکيا ٿي ايسو ري وات مانھ وئھ، ان هون ناٿوڪا ڪوم ڪريا ٿي ايسو ري وات مانھ وئھ.“ پڻ ڪي ٿاڀٽي سئه جي تمي وشواس راکوه؟ جي تمي ناٿوڪا ڪوم نٿي ڪرتا، تو تمي ڪم ڪرين ٿاڀٽي ڏي هيڪوه جي تمي وشواس راکوه؟ پڻ هون مارون ناٿوڪون ڪومون ٿي تمون نئه ٿاڀٽي ڏيھ جي هون وشواس راکونه. (19) تمي وشواس راکوه جي پڳون هڪ سئه، تو نيڪ سئه. پڻ شيطون را پاها را ڏوت ئي هيا وات مانھ وشواس راکهه، ان او سزا ري پيڪ ۾ ڏڪهه.

(20) جي تمي ام هزموه جي روڳو هيوو نالو وشواس راکوو گهڻو سئه، تو تمون ۾ ڪئين عقل نٿي. تمون نئه ايٿا وات رئي ٿاڀٽي ڪپه ڪي، جي ناٿوڪا ڪوم ڪريا وڳر وشواس ڪيا ئي ڪوم رو نٿي؟ (21) آڀٽا ڏاڏا ابراهيم نئه زوئو. زئون ابراهيم آڀرا ڏيڪرا اِضحاق نئه پڳون را نوم مانھ ساڙيا ري جڳا مانھ راکيو، تئون ابراهيم رئه هيو ڪوم ڪريا ري ڪري پڳون ابراهيم نئه آڀري وات مانھ وُڍا واڙو ڪيڏو. (22) ايٿا ٿي وات ساوئي سئه جي ابراهيم روڳو وشواس نه راکيو، پڻ وشواس راکيا ري ڪري اوئه ناٿوڪا ڪوم پڻ ڪريا، ان ناٿوڪا ڪوم ڪريا ري ڪري اوٿا رو وشواس پورو ٿيو. (23) هيون نمونئ شاستر ۾ لکل اي وات هاسي ٿي:

”ابراهيم پڳون مانھ پورا يقين ٿي وشواس راکيو،

ان تيام پڳون اوٿا نئه آڀري وات مانھ وُڍا واڙو ڪيڏو.“

تيام او پڳون رو ڏوست ڪيوروئو. (24) هوئه هيا ٿي وات ساوئي سئه جي منڪ روڳو وشواس راکيا ٿي نئين، پڻ وشواس پرمونئ ناٿوڪا ڪوم ڪريا ٿي پڳون


ري وات مانھ وُودا واڙو ٿئھ.

②۵ ھيوئہ نمُونئہ پُوندو ڪوم ڪريا واڙئي راحب نومي پاترن پڻ ھٽئي. اُونئہ اسرائيلي قُوم رون ميلل جونچوسون نئہ آپري گھري ٽڪاڙيا، ان اُونئون نئہ پڇايا ھارو ڳوتيا واڙون نئہ ھيڪئہ پاھئہ رَوونا ڪريا ان جونچوسون نئہ پيزئہ شيرڙئہ رَوونا ڪريا پرا. تيام جونچوسون نئہ پڇايا ري ڪري اُو پڳوون ري وات مانھ وُودا واڙئي ٿئي. ②۶ ڪم تو زم جيئو وڳر منڪ مرل ھوئھ، تم نائوڪون ڪومون وڳر وشواس پڻ زوئئہ مرل سئہ ان ڪيا ئي ڪوم رو نئي.

ٻڌون وشواسيون رءُ ان ڪاس ڪرين شيڪاڙيا واڙون رءُ آپري بولي آپرا قَوَضام راکو

3 ① مارون پايون ان پينون، تمون موئين ٿي گھڻا منڪ وشواس ري واتون شيڪاڙيا واڙا نہ ٿئہ، ڪم تو تمون نئہ کبر سئہ جي پڳوون امون شيڪاڙيا واڙون رو پيزون ٿي وڌيڪ سڪتي ٿي نيا ڪشي. ② ڪم تو آبي ٻڌائي گھڻيون واتون ۾ ڳلت وين ڏوھ ڪرونھ.

جي ڪوڪ منڪ ڪراپ وات ڪيڏي نہ ڪئٽ، تو اُو منڪ پورئہ نمُونئہ پڳوون ري وات مانھ وُودا واڙو ٿئٽ ان آپرا پورا ڏيل نئہ آپرا قَوَضام راکي



ھيڪئٽ. ③ ھوئہ زئيون آبي گھوڙون نئہ آپرا قَوَضام راکيا ھارو اُونئون را ڪاها موئين لڳوم نوڪونھ، تئيون آبي اُونئون را پورا ڏيل نئہ آپرا قَوَضام راکي ھيڪونھ. ④ ھيوئہ نمُونئہ ٻيڙا پڻ سئہ. ٻيڙا الاهي موٽا سئہ، ان وائيرا را زور ٿي

ٺيلائي زائھ، توئي پڻ ھيڪي نوني لاکري ٿي ٻيڙو ھاڪليا واڙو جيل وئھ اُول ٻيڙا نئہ واڙئھ. ⑤ ان ھيوئہ نمُونئہ جيپ پڻ سئہ. جيپ ڏيل رون اُوزيون موئين

ٿي هاو ننگي سئ، پڻ الاهي گهڻو ڪئين ڪري هيڪڻه.

زوڻو، هڪا ننڪيا پٽينگا ٿي ڪوڙو موٽو پيلو پاھي ٿي ٻڙي زائھ. ⑥ ان هاس ۾ جيپ پاھي را زم سئ. جيپ آڀا ڏيل رون اوزپون موئين ڪراپ ڏنيا را زم سئ. جيپ ري پونڌي واتون پورا منڪ نئ ڪراپ ڪرڻه پرو. ايٿا ريون ڪراپ واتون ٿي منڪ رئي پورئي حياتي زوڻئ پاھي ۾ ٻڙين ڪراپ ٿي زائھ، ان او پاھي جيوي ڪراپ واتون شيطون را پاھا ٿي سئ. ⑦ ڪم تو منڪ هر نمونا را زناور، پڪي، ھاپ ان مشي آڀرا قوضام راڪڻھ ان اڳي پڻ راڪتا، ⑧ پڻ ڪوئي منڪ نئي جيو آڀرئي جيپ آڀرا قوضام راڪي هيڪڻھ. منڪون رئي جيپ ڪراپ سئ ان ڪيا را قوضام نئي ريتي. او زوڻئ موت را جھير ٿي پرال سئ. ⑨ ايٿا هاڳي جيپ ٿي آبي ايشور ٻاپ را وڪوڻ ڪرونھ، ان ايٿا هاڳي جيپ ٿي آبي منڪون نئ پڻ پتونھ، جيون نئ پڳوون آب جيو نايھ. ⑩ هاڳي موندا ٿي منڪ وڪوڻ ڪرڻھ، ان وڙي هاڳي موندا ٿي پٽھ. مارون پايون ان پينون، ھم نہ ٿيوو ڪپئ. ⑪ هيڪڻھ ماڳ پٽاڙ ٿي مينو ان ڪارو پوڻي بي ٿي نيھرڻھ، ڪي؟ ⑫ مارون پايون ان پينون، جيوو وڻ ٿيوو ميوو. انجير را وڻ موئين زيتون را ميوو ٿي هيڪڻھ، ڪي؟ ڪا ڌراڪون ري ويل موئين انجير را ميوو ٿي هيڪڻھ، ڪي؟ ان هيون نمونئ ڪارا پوڻي را پٽاڙ ٿي مينو پوڻي نئي نيھري هيڪتو.

ٻٽون وشواسيون رءُ ان ڪاس ڪرين شيڪاڙيا واڙون رءُ

آپ نئ موننا نہ ھڙموو

⑬ جي تمون موئين ٿي ڪوڪ عقل واڙو ان ھڙمو سئ، تو او عقل ڀرمونئ ڳريبي ٿي نائوڪئ نمونئ وين آڀرون نائوڪون ڪومون ٿي ھايا وات رئي ٿاڀتي ڏئ. ⑭ پڻ جي تمي هڪا ٻيڙا مانھ ريشي ٻڙين رينھ راڪوھ، ان آڀرئي آڀرئي ڌار ڌار پالٽئي ناوا ڪروھ، تو ڪوڙ ڪرين وڏائي مت ڪرو جي "ھون عقل واڙو سون" پڻ اي وات مونو جي تمي هاس ۾ پي عقل سو. ⑮ هيونئي وڏائي واڙي

سوچ پڳوونَ را پاها ٿي ڏيڏل عقل نٿي، پڻ ڪراپ ڏنيا رٿي سوچ سٺ، منڪون رٿي سوچ سٺ، ان شيطونَ را پاها ٿي آوڻ. (16) ڪم تو جيئن منڪ هڪا پيزا مانھ ريشي ٻڙين رينھ راکھ ان آڀرئي آڀرئي ڌار ڌار پالتئي ناووا ڪرڻ، اوتڻ هٻ نٿي، پڻ هر نمونا را ڪراپ ڪوم ٿڻ.

(17) پڻ جيا نٺ پڳوونَ را پاها ٿي عقل زڙيھ، اُو پوئتر سٺ، اُو هٻ راکھ، نرمي ٿي وڻ، هاسئي وات مونيا هارو تيار سٺ، هميش ڏيا ڪرڻ، ان زم نائوڪا وڻ موئين نائوڪا ميوا ٿڻ تم اُو هميش پيزون هارو نائوڪا ڪوم ڪرڻ، اُو ڪيا رو پاھو نٿي ليتو، ان صاف من راکين وڻ. (18) زئيون منڪ نائوڪو پيز نائوڪڻ نمونئ واوڻ، تو نائوڪو قصل ٿيشي. هيون نمونئ جي هٻ رکايا وڙا منڪ آڀت ۾ هٻ راکين وڻ، تو پيزا منڪ پڳوونَ ري وات مانھ ويشي.

ڪراپ ڪيال ان ڪوم ساڏو ان هاسا من ٿي ٺوهون ٿي ٺوبونھ ڪروو

4 ① تمارو آڀت ۾ جهيڙو جهڳڙو ڪم ٿڻ؟ اُو ايٺا هارو نٿي ٿيتو، ڪي؟ جي تمارا آڀري مرضي مانھ وُڍا را ڪيال تمارا آڀرا ڏيل موئين زوئڻ پڳوونَ رڻ ڪلاف ڦسري ڪرڻ. ② ٽمي ڪياڪ وات هارو هڪوھ، پڻ اُو تمون نٺ نٿي زڙئي. ٽمي ڪون ڪروھ ان لالچ راکوھ، پڻ جيو ٽمي ليوا ڪروھ، اُو ٽمي لي نٿي هيڪتا. ٽمي واڌ ڪروھ ان جهيڙو جهڳڙو ڪروھ، پڻ جيو ٽمي ليوا ڪروھ، اُو تمون نٺ نٿي زڙتو، ڪم تو ٽمي هائي پڳوونَ ٿي نٿي مونگتا. ③ ٽمي هائي پڳوونَ ٿي مونگھو، پڻ توئي تمون نٺ نٿي زڙتو، ڪم تو ٽمي صاف من ٿي نٿي مونگتا، پڻ ايٺا هارو مونگھو زم ٽمي هايا ٿي آڀرون ڪراپ ڪيالون ڀرمونئ عيش عشرت ڪري هيڪو.

④ پُونڌون منڪون! زم پُونڌئي ڏوشي آڀرو آڌمي ساڏين پيزا آڌمي ٿي پُونڌو ڪوم ڪرڻ، تم ٽمي پڳوونَ را منڪ ٿين پڳوونَ نٺ ساڏين ڏنيا ري پُونڌائي ۾

شونق راكين ووه. تمون نئه ايئا وات رئي كهر نئي، كي؟ كراب دُنيا تي دوستي پگهون تي دشمني سئه. تيام جيو كراب دُنيا رو دوست تينا كرئه، او پگهون رو دشمن تئه. ⑤ كا تمى ايئا شاستر ري وات نئه نالئي هزموه، كي؟ جي پگهون آپون نئه جيو ديتوه، ان آپون تي اتو گهڻو پريم راكئه جي زئون آبي اوتا ري وات مانه نئي ویتا، تيون اوتا نئه گهڻو دورو لاگئه. ⑥ پڻ پگهون رينه تي وڌارن منكون مانه گهڻي ڪرپا ڪرئه. تيام شاستر ۾ ام لکل سئه: ”پگهون وڌائو ڪريا وڌون رئه ڪلاڦ سئه، پڻ گريبي تي وڌا وڌون مانه ڪرپا ڪرئه.“

⑦ تيام پگهون را ڪيڏام ريو. شيطون تي مقابلو ڪرو، ان او تمون تي پاڳي زاشي. ⑧ پگهون ڪن ڏوڪڙا آوو، ان او تمون ڏوڪڙو پڻ آوشي. ڏوهاري منكون، زم هات صاف ڪريا هارو هات ڏووو ڪپئه، تم تمى ڪراب ڪوم ساڏو ان نائوڪا ڪوم ڪرو. تمى جيا ڪيڏيڪ دُنيا رئي ان ڪيڏيڪ پگهون رئي بيئون رئي سوچ راڪوه، تمى ڪراب ڪيال من تي ڪاڍو ان آپرا من پويتر راڪو. ⑨ آپرون ڪرل ڏوهون تي توپونه ڪرو، ان اوئون ري ڪري ڏکي ٿين روئو. آپرون ڏوهون مانه هاهو مت پڻ روئو، هايون مانه ڪش مت ٿيو پڻ ڏکي ٿيو. ⑩ ايشور هوما گريپ ريو، تو او تمون نئه مون ڏيشي.

هیکا پيزا رئي ڳلا نه ڪروو

⑪ پايون ان بينون، تمى هیکا پيزا رئي ڳلا مت ڪرو. جيو آپرا وشواسي پائي رئي ڳلا ڪرئه ڪا وشواسي پائي نئه ڏوهاري ڪرين اوتا رئه ڪلاڦ بولئه، او پريم ڪريا رو حڪم ٽوڙين پگهون رون حڪمون رئي ڳلا ڪرئه ريو ان پگهون رون حڪمون رئه ڪلاڦ بولئه ريو. جي تمى پگهون رون حڪمون رئه ڪلاڦ بولو، تو تمى پگهون رون حڪمون مانه وڌا وڌا نئي، پڻ اوئون رو ڦينصلو ڪريا وڌا ٿيا. ⑫ روڳو هيڪه پگهون سئه جيو حڪم ڏيڌا وڌو سئه ان

ڦينصلو ڪريا وائڙو سئ. روڳو اُو منڪون نئ ڏوهون ري سزا ٿي پڇاوي هيڪئ.
ان هميش را موت رئي سزا ڏي هيڪئ. تمي آپ نئ ڪي هزموه جي تمي هڪا
پيزا رو ڏوه ڪاڍوه؟


مال ملڳت مانھ ڀروسو نہ راکو پڻ پڳوون مانھ ڀروسو راکين نائوڪا ڪوم ڪرو

⑬ هَوَئ مارئي وات هومپڙو، تمي جيا ام ڪوه: ”آز ڪا هَواري امي ڦلوثا شهر
م زاشون، ان اوئنه هڪ سال ريشون، ان واپار ڪرين گهڻا پئيها ڪماشون.“



⑭ تمي تو هم ڪوه ريا، پڻ تمون نئ اتئي پڻ
ڪهر نئي جي هَواري ڪي ٿيشي. تمارئي حياتئي
ڪتون ڏيئون رئي سئ؟ تمي تو نار را زم سو، جيو ٿوڙيڪ وار ڏيڪيام اوئ
ان پسئ ڪئم ٿي زائو. ⑮ هم ڪيڏا ري جگا م، تمارئ ام ڪيوو ڪپئ:
”جي ايشور رئي مرضي ٿئي، تو امي جيوتا ريشون ان ڦلوثو ڦلوثو ڪوم
ڪرشون.“ ⑯ پڻ تمي تو آپ نئ موتا هزمين وڏائي ڪروه. هيويي ٻڌئي وڏائي
ڪراپ سئ.

⑰ تيام، جي ڪيا نئ ڪهر سئ جي ام ڪروو نائوڪو سئ، پڻ هم نئي ڪرتو،
تو اُو نائوڪو ڪوم نه ڪريا ٿي ڏوه ڪرئ.



شاؤوڪارون رڻ هوشيار ريوو جي پڳوون منڪون نڻ ڏوهون رڻي سزا ڏيشي

5 ① هونءَ شاؤوڪار منڪون، تمي مارئي وات هومپڙو. روڻو ان رڙيون ڪرو ڪم تو پڳوون تمون نڻ گهڻي تڪليهن ڏيشي. ② نيا رڻ ڏي تمارو مال ملڳت ڪيا ئي ڪوم رو نئين هونءَ. تمارو ٻڌوئي ڪئين ڪتم ٿي زاشي. تمارا لوگهڙا ڪونهاري ڪترشي پرا، ③ ان تمارا هيم ان چونڊي نڻ زوڻه زنگ لاڳي زاشي. ان او زنگ تمارو ڏوه ڪاڏشي، ڪم تو اوڻا ٿي ٿايتي ٿيشي جي تمي آپري ٻڌي مال ملڳت آپ هارو پيڙي ڪرين راکيڻه. ان جيوڻه نمونءَ زنگ شينهنون نڻ ڪائي زائ، هيوڻه نمونءَ او زنگ پاھي را زم تمون نڻ ڪتم ڪرشي، ڪم تو مال ملڳت پيڙي ڪرين راکيا ري ڪري تمي پاھي ۾ هميش رڻي سزا ڪاشو. ڏنيا ري پڇاڙي واڙو توڻو آيوھ رو، ان تمي آپ هارو مال ملڳت پيڙي ڪرين راکيڻه. ④ زوڻو، جيئي منڪي مزوري مانھ تماري ٻئي لڻيھ، اوڻون نڻ تمي مزوري نڻي ڏيڏي ان آپ ڪن راکيڻه. ان هونءَ او مزوري را پڻيھا زوڻه زور ٿي پڌلو مونگھ ريا. لڻيارا تمارا ظلم ري ڪري رڙيون ڪرھ ريا. پڻ پڙيو پرميشور اوڻون رو هاڏ هومپڙيوھ ان تمون نڻ سزا ڏيشي. ⑤ ايڻا حياتي ۾ تمي موج ۾ رياھ ان عيش عشرت ڪرڻھ. زم مال نڻ هلاليا هارو سونڊھ، تم تمي جئين وڻھ او ڪائي پڻ زوڻه آپ نڻ سونڊوھ ريا، ان نيڻ نيا رڻ ڏي تمون

نٺه هميش رو موت زڙشي. ⑥ ټمي پيڏوهي منكون نٺه ڏوهاري ڪرياه، ان اُوئي پلٺه تمارٺه ڪلاڦ ڪئين نه ڪريو هوٺه، توئي پڻ ټمي اُوئون نٺه مراياھ پرا.

ڏگ ان ڏوروڻ صير ٿي سهو

⑦ تيام، پايون ان پينون، ټمي پڙيو ايسو رٺه پاسا آيا رٺي وات صير ٿي زوئو. هاڙي نٺه زوئو. اُو پني را قيمتي قصل رٺي ڪٽي گهٽي وات زوئو! اُو قصل رٺي وات صير ٿي زوئو زئون هوڏي ورهاڙا رو ان اوناڙا رو مي نه ورهٺه. ⑧ ټمي پڻ همريٺ صير ٿي وات زوئو، ان هيٺ راکو، ڪم تو پڙيو ايسو رٺه پاسو آيا رو توئو ڏوڪڙو سٺه. ⑨ پايون ان پينون، هڪا پيزا رٺي پڙوٺ ڳلا مت ڪرو، متون پڙيو ايسو تمون نٺه سزا ڏيڏا رو ڦينصلو ڪرٺه. زوئو، تمارو نيا ڪريا واڙو پڙيو ايسو جلدِي آيا واڙو سٺه، هاو زوئو ڌرواڙا مانھ اوپل سٺه.

⑩ پايون ان پينون، پڳوون رو نياپو ڏيڏا واڙون را ڏيڪاڙل نمونا مانھ وو. منڪ اُوئون ٿي ڪراپ نمونٺه وڍا ڏم تو اُو ايشور را پاها ٿي ٻوليا، توئي پڻ اُوئي صير ڪريو. ⑪ زوئو، آبي اُوئو منڪون نٺه پاڳواڙا هڙمونھ، جيا ڏوروڻ صير ٿي سهٺه. ټمي تو هوپڙيوھ جي ايوب ڪٽي ڏوروڻ صير ٿي سهٺي، ان تمون نٺه اي پڻ ڪٻر سٺه جي پڇاڙي ۾ ايشور اُوئا نٺه ڪتو گهٽو اشيرواڏ ڏيڏو، ڪم تو ايشور گهٽو ڏيڏاڙو سٺه ان منڪون مانھ قياس ڪرٺه.

هميش هاس ٻولو

⑫ مارون پايون ان پينون، ٻڌون ٿي موٽي وات اي سٺه، ټمي آپري وات هاسي ڏيڪاڙيا هارو هون مت کائو، پڻ هميش هاس ٻولو. ټمي نڪو آڪاش رو، نڪو ڌرتي رو ان نڪو پيزا ڪيا رو هون کائو، پڻ جي وات هاسي سٺه تو اُوئا نٺه هاسي ڪو، ان جي وات ڪوڙي سٺه تو اُوئا نٺه ڪوڙي ڪو، متون پڳوون تمون نٺه ڪوڙ ڪريا ري ڪري سزا ڏيڏا رو ڦينصلو ڪرٺه.

مونڊون ھارو پراٽنا ڪرو ان ٺوھ ڪريا وازون نٺ ھزماوون

⑬ جي تمون موئين ٿي ڪوڪ تڪليب ۾ سٺ، تو او پڳوون ٿي پراٽنا ڪرڻ. جي ڪوڪ ڪُش سٺ، تو او پڳوون را وڪوڻ ۾ پزن ڳاوڻ. ⑭ جي تمون موئين ٿي ڪوڪ مونڊو سٺ، تو او وشواسي منڌري رون آڳيوونون نٺ تيزاوڻ، ان او مونڊا مانھ تيل ھٿين پريو ايسو را نوم ٿي اوڻا ھارو پراٽنا ڪرڻ. ⑮ پڪا يقين ٿي پراٽنا ڪريا ري ڪري مونڊو ھازو ھورو ٿي زاشي، ان او پريو ري ڪرا ٿي وڙي اوئين ويشي. ان جي مونڊئو ڏوھ ڪريا ھوشي، تو اوڻا نٺ ڏوھون رئي ماقئي زڙشي. ⑯ تيام ھيڪا پيزا ھوما آپرا ڪرل ڏوھ مونو ان ھيڪا پيزا ھارو پراٽنا ڪرو زم ٽمي ھازا ھورا ٿيو.

زئون پڳوون ري وات مانھ وودا وازو منڪ پراٽنا ڪرڻ، تئون پڳوون آپري ڪرا ويوراوڻ ان اوڻا پراٽنا رو گھڻو اثر ٿئھ. ⑰ مثال، ايلياه اپڻا زم منڪ ھتو، ان اوڻھ پورا من ٿي پڳوون ٿي پراٽنا ڪري جي مي نه ورھئ، تو ھاڍون ترئون سالون ھوڏي مي نه ورھيو. ⑱ ان تيا ڪيڙ اوڻھ وڙي مي ھارو پراٽنا ڪري، تو مي ورھيو ان اوڻھ ڌرتي مانھ قصل ٿيو.

⑲ مارون پايون ان پينون، جي تمون موئين ٿي ڪوڪ وشواس ري ھاسي واتون ساڏين اوڙئ نمونئ وئ، ان پيزو ڪوڪ اوڻا نٺ ھزماوين وڙي پڳوون ري وات مانھ ويوراوڻ، ⑳ تو اوڻا نٺ ايٺا وات رئي ڪبر ھووو ڪپئھ جي جيو منڪ ڏوھ ڪريا وازا نٺ اوڙا مارڳ مانھ وودا ٿي قيروين ھاس مانھ ويوراوڻ، تو اوڻا ري ڪري ڏوھاري منڪ پڳوون ري سزا ٿي پجي زاشي ان ڏوھاري را ٻڌائي ڪرل ڏوھ ماڦ ٿي زاشي.

پطرس را لکل پيرهيان کت رئي هزموئي

کت لکيا واژو

اي کت پطرس لکيو (1 پطرس 1:1). پطرس رو اصلي نوم شمعون هتو ان تيا کيژ ايسو اوتا رو نوم پطرس را کيو. تيام اوتا ننه شمعون کا شمعون پطرس پڻ کئنه (متي 16:17-18). پطرس ان اوتا رو پائي اندرياس ايسو رون بارون سونديل شيلون موئين ٿي هتا، جيون ننه ايسو اپرا مک شيل پڻ کيدا (لوقا 13:6-14، 1 پطرس 1:1). پطرس پڳوون رو آواز ام کيتون هومپزيو جي ايسو پڳوون رو سونديل سڏ (لوقا 9:28-36، 1 پطرس 4:2)، ان اوتھ اونکيني ڏيکيو جي ايسو پيڏوهي ٿين ڏک سهيو ان کيوي نرمي ان صپر ٿي وڍو (يوحنا 4:11، لوقا 23:49، 1 پطرس 2:21-24). ايسو هوري مانھ مريا کيژ جيوي اونين پطرس ننه ان پيزون مک شيلون ننه ڏيکارا ڏيڏا ان پطرس ننه وشواسي منڌري مانھ اڳيوون را کيو (يوحنا 15:17، 1 پطرس 1:5). پطرس اي کت سلوانس ري هاتي لکايو (1 پطرس 5:12)، جيا رو پيزو نوم سيلاس هتو ان پولوس پيڙو کوم ڪرتو (مک شيلون را کوم 15:40، 1 ٿسلنيڪيون 1:1، 2 ٿسلنيڪيون 1:1). پطرس اي کت اندازام 60-64ع ۾ لکيو.

ام لاڳئھ جي پطرس روم شهر ۾ هتو زئيون اي کت لکيو، پڻ اوتھ اي وات ساوڻه ڍاڙه نھ لکئي، پڻ وات ڊونڪين لکئنه. تيام زئيون ام لکل سڏ 'ايت رئي وشواسي منڌري، جي ڏنيا ۾ پرڏيشي را زم زوئنه بابل شهر ۾ رئه، ان تمارا زم پڳوون رئي سونديل سڏ،' هيا رو مطلب سڏ روم شهر رئي وشواسي منڌري (1 پطرس 5:13).

يوحنا پڻ هاڳي نموننه وشواسي منڌري ننه 'باڻي' ان 'بين' کين 'پڳوون رئي سونديل' کئنه (2 يوحنا 1:1، 13)، ان روم شهر ننه بابل پڻ کئنه، ڪم تو بي ٿي شهر ڪراب کومون ري ڪري مشور هتا (ڌرشن 17:5، 9).

پطرس روم شهر ۾ ايسو مانھ وشواس را کيا ري ڪري رومي پاڏشا نيرو را راز ۾، اندازام 68ع ۾، هوري مانھ مروئو (يوحنا 18:21-19).

کت کيون منڪون هارو لکيو

پطرس اي کت گھڻون علاقون رون وشواسيون هارو لکيو جيا رومي حڪومت رون پُٺس، گلتيه، ڪپڏڪيه، آسيه ان پٽونيہ نومي صوبيون موئين ريتا (1 پطرس 1:1). هائي علاقا هميشه ترڪي نومي ملڪ ۾ سڏ. اوت را ڪئينڪ وشواسي يهودي قوم را هتا، پڻ گھڻا ڌاريون قومون را هتا.

ڪٽ لکيا رو مطلب

پطرس اي ڪٽ رومي حڪومت را نيرو نومي پادشا را راز م لکيو، جيئن 54ع ٿي لين 68ع هُوڏي راز ڪريو. نيٺ نيرو پادشا وشواسيون رٿ هَاوَ ڪلاٽ ٿيو ان پطرس نه مرايو، پڻ ڪٽ لکيا رٿ ٿوئڻ رومي حڪومت وشواسيون نه تنگ نتقي ڪرتي. توڻي پڻ اوتا وڪٽ م گهڻا منڪ، جيا ڏيوٽونا پوزتا، وشواسيون نه تنگ ڪرتا، اوئون نه پونڌا ڪيتا ان اوئون ٿي ڪراپ نمونئ وينا.

تيام پطرس اي ڪٽ لکيو زم وشواسيون نه ياد ڪراوئ جي زم پريو ايسو ڏڪ سهيا، تم وشواسيون رٿ پڻ ايسو مانھ وشواس راڪيا ري ڪري ڏڪ سهو پڙشي. ان تيام پڻ لکيو زم اوئون نه حوصلو ڏئ جي زم پڳوون ايسو نه آڪاش م مون ڏيڏوه، تم او ايسو مانھ وشواس راڪيا واڙون نه پڻ تارڻ ڏين آڪاش م مون ڏيشي. تيام وشواسيون رٿ ڏورون ڏيئون م وشواس نه ساڏوو، پڻ هر وات م ناٿوڪئ نمونئ ويوو، زم پريو ايسو رٿي ان وشواسي ڌرم رٿي پڌنومئي نه ٿئ.

ايئا ڪتاب را شاستر ٿي پيزا حوالا:

1 پطرس 1:1	متي 10:2	1 پطرس 24:2	متي 26:28
1 پطرس 1:1	مرقس 14:3-16	1 پطرس 24:2	لوقا 23:33
1 پطرس 1:1	لوقا 13:6-14	1 پطرس 24:2	يسعياہ 5:53
1 پطرس 2:1	خروج 7:24-8	1 پطرس 25:2	يسعياہ 6:53
1 پطرس 2:1	عبرانيون 9:11-28	1 پطرس 6:3	پيدائش 18:12
1 پطرس 16:1	احبار 11:44-45	1 پطرس 10:3-12	زبور 34:12-16
1 پطرس 16:1	احبار 19:2	1 پطرس 14:3	يسعياہ 8:12
1 پطرس 19:1	خروج 12:5	1 پطرس 19:3	2 پطرس 4:2
1 پطرس 19:1	يوحنا 1:29	1 پطرس 19:3	يهوداه 6:1
1 پطرس 24:1-25	يسعياہ 40:6-8	1 پطرس 20:3	پيدائش 6:5-8-18
1 پطرس 6:2	يسعياہ 28:16	1 پطرس 14:4	متي 5:11-12
1 پطرس 7:2	زبور 118:22	1 پطرس 17:4	يرمياہ 25:29
1 پطرس 8:2	يسعياہ 8:14	1 پطرس 17:4	عاموس 3:2
1 پطرس 10:2	هوسيع 1:9-10	1 پطرس 18:4	امثال 11:31
1 پطرس 10:2	هوسيع 23:2	1 پطرس 5:5	امثال 3:34
1 پطرس 22:2	يسعياہ 53:9	1 پطرس 12:5	ڪوم 15:22، 32
1 پطرس 23:2	متي 27:12-14	1 پطرس 12:5	ڪوم 15:40-17-15
1 پطرس 23:2	متي 27:39-44		

پطرس

رو لکل پيرهیون کت



1 ① هُون لکيا وَاڙو پطرس سون، جيو ايسُو کريست رو هيڪ مُک شيلو سون. پريمي وشواسي پايون ان پينون، تمی جيا پگھون را سُونڊل منک سو، جيا ايتا کراب دُنيا ۾ پرڏيشيون را زم سو، ان پُنطُس، گلتيه، کپدُکيه، آسيه ان بَتُونيه صُوپون ۾ پکڙل سو، ② جيون نئه پگھون باپ جگت نايا ٿي مور آپ هارُو سُونڊيا تا، ان جيا پَوِتر آتما ري کڙا ٿي پَوِتر ٿياھ، زم تمی وشواس ري واتون مونو ان ايسُو کريست مانھ وشواس راکو، جيئھ آپرو جيو پگھون را نوم مانھ ڏين زوئھ آپرو لوئي تمون مانھ چنڊيا ٿي تمون نئه ڏوهون رئي ماڦئي ڏيوراويھ. پگھون تمون مانھ گھڻي کُڙپا کرئھ ان تمون نئه گھڻا هڪي راکئھ!

پطرس پگھون رو ٿورو مونئھ جي پگھون

ايسُو مانھ وشواس راکيا وَاڙون نئه ضرور تارڻ ڏيشي

③ پگھون را وکوڻ ٿئھ، جيو آڻا پريو ايسُو کريست رو پگھون ان باپ سئھ!

اُوڻه آپري گهڻي ڪُريا پرموڻه ايسو ڪريست رڻه مرلون موئين ٿي جيوي اُوڻيا ٿي آپون نڻه آپرا ٻارَ ناوينَ نوو جيونَ ڏيڏوه، ان آپون نڻه پڪو پروسو ڏيڏوه جي اُو آپرو وائڏو پورو ڪرشي. ④ ٽمي هونءِ پڳوونَ را ٻارَ ٿيا، ان پڳوونَ تمون نڻه اُو ٻڌوئي ڪئين ڏيشي جيا را پارام اُوڻه وائڏو ڪريوه. اُو تمون نڻه ايوو هڪ ڏيشي جيو ڪيڏي ڪٽم نئين ٿم، ڪيڏي ڪراپ نئين ٿم، ان ڪيڏي گهٽ نئين ٿم. ان هائي هڪ تمون هارو آڪاش ۾ راکل سٺ. ⑤ پڳوونَ زوڻه تمون مانھ پاهرو ڏينَ آپري ڪڙا ٿي تماري همپاڙ ڪرڻه، زم تمون نڻه ايسو مانھ وشواس راکيا ري ڪري تارڻ زڙڻه. ان هائي تارڻ ڏنيا ري پڇاڙي را توڻا مانھ ساوو ڪريا هارو پڳوونَ تيار راکيوه.

⑥ هايا وات ري ڪري ٽمي گهڻا ڪُش ٿيئا ريوه، پلڻه همڻه ٿوڙيڪ وار هُوڏي تمارڻه نمونا نمونا ري تڪليهن ري ڪري ڏک سهو پڙڻه. هايون ٿي تمارو آزمتو ٿڻه. ⑦ هائي تڪليهن تيام ٿڻه ري زم ٿاڀتي ٿڻه جي تمارو وشواس هاسو سٺه ان هيم ٿي پڻ قيمتي سٺه. ڪم تو هيم ڏمڻ ٿي ڏيو تا ۾ گڙين هاسو ٿڻه، توڻي پڻ نيٺ اُو ڪٽم ٿيشي. پڻ تمارڻه هاسو وشواس راکيا ري ڪري، زڻيون ايسو ڪريست وڙي پاسو آوين ساوو ٿيشي، تنيون پڳوونَ را پاها ٿي تمون نڻه آڪاش ۾ هميش هُوڏي وڪوڻ، مون، ان عزت زڙشي. ⑧ ٽمي ايسو نڻه ڪيڏي نٿي ڏيڪيو، توڻي پڻ ٽمي اُوڻا ٿي پريم ڪروه. ان ايسو همڻه تمارا ڏيڪيام نٿي اوتو، توڻي پڻ ٽمي اُوڻا مانھ وشواس راکين اڻا گهڻا ڪُش ٿيوه جي وات ڪيڏا ٿي ٻارڻي سٺه. ⑨ ڪم تو وشواس راکيا رو مقصد پورو ٿڻه ريو، جي پڳوونَ ري سزا ٿي پڇين تمون نڻه تارڻ زڙشي.

⑩ هايا تارڻ را پارام، پڳوونَ رو نياپو ڏيڏا وازي گهڻي ڪوشش ٿي ڪهر پاڙوا ڪرڻي. اُوڻي مور ٿي همپاڙيو جي پڳوونَ تمون مانھ ڪُريا ڪرين تارڻ ڏيشي. ⑪ پڳوونَ را سونڊل پڇايا وازا ڪريست را پاها ٿي اُوڻون نڻه پويتر آتما ري ڪڙا ٿي مور ٿي ڪهر پڙڻي، جي پڳوونَ رو سونڊل پڇايا وازو ڪريست ضرور

ڏک سھينَ مرشي، ان تيا ڪيڙ اُٿا رو مونَ ساوو ٿيشي. ان اُو اي پڻ ڪهر پاڙوا ڪرتا جي هاڻي ٻڌوئي ڪئين ڪيون ان ڪيو وڪت ۾ ٿيشي. ⑫ ڀڳوون اُٿون مانھ اي وات ساوئي ڪرئي، جي هاڻي ٻڌي واتون جيون را پارام اُو ھمپڙاوتات ريا، اُو اُٿون را آڀرا زمونا ۾ پوري نئين ٿئ، پڻ آيا وازا زمونا ۾ پوري ٿيشي. ھيوئہ نمونئہ ڀڳوون رو نياپو ڏيڏا واري تمارا ڦاٿيڏا ھارو ھاڻي ھاڳي واتون مور ٿي ھمپڙاوي تي، جي واتون تمي ھمئئہ اُٿون ھمئوڪون منڪون ٿي ھومپڙيھ، جيئي آڪاش ٿي ميلل پويتر آتما ري ڪڙا ٿي تمون نئہ ايسو را پارام ڪشي رئي ڪهر ھمپڙاويئہ. ھاڻي واتون ايوي نائوڪي سئ، جي آڪاشي ڏوت پڻ ھايون واتون نئہ زوئيا ھارو ھڪئہ.

زم ڀڳوون پويتر سئ تم آڀئئہ ڀڳوون را ٻار ٿين پويتر نمونئہ ويو

⑬ تيام من ۾ تيار ٿين عقل ٿي ڪوم ڪرين تمي پورا من ٿي ايئا وات مانھ پروسو راڪو جي ڀڳوون تمون مانھ ڪيوئي گھڻي ڪريا ڪرشي، زئون ايسو ڪريست وڙي پاسو آوين ساوو ٿيشي. ⑭ تمي ڀڳوون را ٻار ٿين اُٿا رو ڪيڏو مونتا ريو. تمي اُٿہ ڏاڙھ وڙي مت وو، جيوئہ ڏاڙھ تمي اڳي آپرون ڪراپ ڪيالون مانھ ویتا، زئون تمي ڀڳوون نئہ نئا اوڙڪتا. ⑮ پڻ زم ڀڳوون پويتر سئ، جيئہ تمارو آپ ٿي واسطو رکايوھ، تم تمي پڻ ھر وات ۾ پويتر نمونئہ وو. ⑯ ڪم تو شاستر ۾ ڀڳوون رئي اي وات لڪل سئ:

”تمي پويتر ٿيو، ڪم تو ھون پويتر سون.“

⑰ ڀڳوون، جيا نئہ تمي آڀرو ٻاپ ڪوھ، اُو ڪيا رو پاھو نٿي ليتو، پڻ ھر ھيڪ منڪ رو ڦينصلو اُٿا رون ڪرل ڪومون پرموئئہ ڪرئہ. تيام، زئون تمي ايئا ڏنيا ۾ پرڏيشيون را زم ٿوڙيڪ وار را سو، تئيون تمي پوري حياتي ڀڳوون رئي پيڪ راڪين اُٿا رو مونَ راڪتا ريو. ⑱ ڪم تو تمون نئہ ڪهر سئ جي زئون

تمې آپرون ډاډون ريون شيکارل ناليون واتون مانه وودا را نمونا ټي سوتيا،
تثيون تمې سونډي، کا هيم، کا پيزي ايوي کتم ټيا واژي شينه ډيدا ټي
نټي سوتيا. (19) پښ پيدوهي ايسو کريست، جيو پگوون را نوم مانه ساژيا هارو
کراپا ووټا ان عيپ ووټا گهيټا رو مثال سټه، اوټه آپرو جيو پگوون را نوم مانه
ډين آپرا قيمتي لويي ټي تمون نټه هايون ناليون واتون ټي سډايا. (20) پگوون
جگت نيا ټي مور ايسو نټه هاي هارو سونډيو تو، پښ همټه ډنيا ري پچاژي م
اوټه ايسو نټه تمون هارو جگت م ميلين ساوو کريوه. (21) ايسو ري کري تمې
پگوون مانه وشواس راکوه، جيټه ايسو نټه مرلون موئين ټي جيوي اوټاژيوه
ان آکاش م مون ډيدوه. ان تيام تمارو وشواس ان پروسو پگوون مانه سټه.

(22) هوټه تمې پگوون ري هاسي واتون موئين آپرا من پويتر کرياه زم تمې
آپرون وشواسي پايون ان پينون ټي هاسو پريم راکو. تيام تمې صاق من ټي ان
پورا جيو ټي هیکا پيزا ټي پريم راکو. (23) کم تو تمون نټه نوو جيون زژيوه
ان هوټه تمې روگا منکون را باز نټي، جيا کتم ټيا واژا سټه، پښ پگوون را باز
پښ ټيا، جيا کيډي کتم نئين ټه. هائي نوو جيون تمون نټه پگوون را وچن ټي
زژيوه، جيا نټه مونيا ټي هميش رو جيون زژټه، ان جيو هميش هوډي هاسو رټه.
(24) زم شاستر م لکل سټه:



"هر منک رټي حياتي کتر را زم سټه.
منک رو ټو مون ان شون
اوټا را قولټا را زم سټه.
کتر تو هوکائي زائه
ان قولټو تو کري زائه.

(25) پښ ايشور رټي وات هميش هوډي رټه.

ان هائي ايشور رټي وات ايسو را پارام او رټي او کشي رټي کبر سټه، جټي
منکي تمون نټه همپزاويټه.

آپڻه پڳوونَ را سُونڍل منگ ٿين پَوِيتَر نمُونَه ويو

2 ① تيام، تمِي ڪيا ٿي وِير مت راکو، ڪيا ٿي ٺڳيِي مت ڪرو، مونڊا را مينا ان من را ڪارا مت ٿيو، هڪا پيڙا مانِه ريشي مت پڙو، ان ڪيا رئي ڳلا مت ڪرو. تمِي هائي ٻڌئي پُونڌائي ساڌو. ② زم ننڪون ٻاڙون رو جيو مان رو اصلي دُوڌ ڏايا هارُو ڪرئ، تم تمِي نوا وشواسي ٿين پورا جيو ٿي پڳوونَ را هاسا وچن ري واتون زوڻيا رئي ڪوشش ڪرو، زم هيا نئه مونيا ٿي تمِي وشواس ۾ آڳڙ وڌو، ان نيٺ تمون نئه تارڻ زڙئ. ③ ڪم تو زم دُوڌ ساڪيا ٿي ٻاڙ نئه ڪهر پڙئ جي دُوڌ ڪتو نائوڪو سئ، تم ايسو ٿي واسطو راکيا ري ڪري تمون نئه ڪهر پڙئ جي پريو ايسو ڪتو نائوڪو سئ.

④ پريو ايسو مانِه وشواس راکو. اُو جيوتو سئ ان اُو رو اُو پڳوونَ رو سُونڍل پڇايا واڙو ڪريست سئ جيا نئه شاستر ۾ ”پتر“ ڪيڏوه. منڪي اُونا نئه گهٽ هزميو، پڻ اُو پڳوونَ رو سُونڍل ان مون واڙو هتو. ⑤ ايسو مانِه وشواس راکيا ٿي تمِي پڻ زوڻئ جيوڻا پتر ٿيو، ان زم پترون ٿي گهر سٿائ، تم تمِي پڻ ٻڌائي پيڙا ٿيا ٿي پڳوونَ رو گهر ٿيوه جيا موئين پَوِيتَر آتما رئ. ان هم تمِي پَوِيتَر پُوڙاري ٿيوه، زم تمِي پَوِيتَر آتما ري ڪڙا ٿي پڳوونَ رئي ايوئي



پُوزا ان شيوا ڪرو، جيا ٿي ايسو ڪريست ري ڪري پڳوون ڪُش ٿئ. ⑥ ڪم تو شاستر ۾ ايسو را پارام پڳوون رئي اي وات لڪل سئ:

”زوئو، هون صيهون نومي يروشلم را ڏونگر مانھ
هيك پتر ميلونھ،

جيو مارو سونديل ان مون واڙو

پُنياڌ رو ڪاس صحيح ان هرڪو پتر سئ.

ان جيو ڪوئي اوئا مانھ وشواس راکھ،

اوهيا ري ڪري ڪيڏي لاسار نئين ٿئ.

⑦ تيام تمي جيا ايسو مانھ وشواس راکھ، تمون نئ مون زڙشي. پڻ جيا ايسو مانھ وشواس نئين راکھ، اوئون نئ سزا زڙشي. ڪم تو شاستر ۾ ايسو نئ ”پتر“ ڪين ام لڪل سئ:

”جيا پتر نئ رازي گهٽ هزمين ڦڳوڙيوت پرو،

اوهانگي پتر ٻڌون ٿي ضرورت واڙو ٿيوھ.

⑧ ان ام پڻ لڪل سئ:

”او آڪڙايا واڙو پتر سئ، جيا ٿي منڪ پڙي زاشي.“

تيام، جيا منڪ ايسو ري واتون نئين مونئ، او زوئئ هيا پتر مانھ آڪڙين پڙي زاشي ان اوئون نئ هميش رئي سزا زڙشي، زم پڳوون اوئون هارو اڳي ڦينصلو ڪريوھ.

⑨ پڻ تمي تو پڳوون را سونديل منڪ سو. تمي پڳوون را راز را پوزاري سو جيا اوئا رئي پوزا ان شيوا ڪروھ. تمي زوئئ هيك ڪاس پويتر قوم را منڪ سو جيون نئ پڳوون آپري شيوا ڪريا هارو سوندين راکياھ. ان تمي هيك منڌري را منڪ سو جي پڳوون آپ هارو ناويھ. پڳوون تمون نئ سوندياھ زم تمي منڪون نئ پڳوون رون موئون ڪومون را پارام همپڙاوو، جيئئ تمارو آپ ٿي واسطو رکايوھ، ان هم تمون نئ اندارا موئين ٿي ڪاڊين آپرا الاهي نائوڪا

سوجهرا موئين لايوه. ⑩ اڳي تمې پڳوون ري سونډل قوم را منک نټا، پښ هوه تمې پڳوون را سونډل منک ټيا. اڳي پڳوون تمون مانه دټيا نټي کړي، پښ هوه پڳوون تمون مانه دټيا کړي.

پڳوون را شيواډاري ټين ټون منکون ټي ناټوک ټي نمون ټي ويو

⑪ پريمي پاڼون ان ټينون، هون تماري منټ کرونه، جي تمې آپ ننه ايټا کراب دنيا ۾ پرديشون را زم ان ټوټيک وار را هزمين، دنيا رون منکون را زم آپرون کراب کيالون مانه مت وو. کم تو هائي کيال تماري پلاټي رنه کلاک سټه، ان هايون مانه وودا ټي تمارو نقصون ټيشي. ⑫ تماره وشواس نه راکيا واژون منکون وسا رين ايوته ناټوک ټي نمون ټي ويو کپنه، جي پلنه او همټه تمون ننه کراب هزمين تماري ځلا کړه، توئي پښ او تمارا ناټوکا کوم زويا ري کري وشواس اوټين پڳوون رنه نيا رنه ځي پڳوون را وکون کړه.

⑬ جيا پښ منک تمون مانه اکتياږي راکنه، تمې پريو ري کري اوټون ټون رو کيدو مونو. پاڅا رو کيدو مونو، جيو ټون مانه راز کريا واژو سټه. ⑭ ان آځيونون رو کيدو پښ مونو، جيون ننه پاڅا راز کريا رڼي اکتياږي ځيځي، زم او کراب کوم کريا واژون ننه سزا ځي، ان ناټوکا کوم کريا واژون را وکون کړه. ⑮ کم تو پڳوون رڼي مرضي سټه، جي تمې هيوته نمون ټي ناټوکا کوم کريا ټي هايون پي عقل منکون ننه ماټ کراوو، جيا زوټيا وگر آپون وشواسيون مانه کوڙا الزوم هټه. ⑯ ايسو مانه وشواس راکيا ري کري تمې آزاده ټيا. تيام تمې آپ ننه آزاده هزمين وو. توئي اي پونهونو مت کرو جي "امي آزاده سون، تيام کراب کوم کري هيکونه." پښ آزادي ټي پڳوون را شيواډاري ټين وو. ⑰ ټون منکون رو مون راکو. وشواسي پاڼون ان ټينون ټي پريم راکو، پڳوون ټي پټاټو، ان پاڅا رو مون راکو.

گُلمون رءِ ايسُو را نمونا مانه وينَ گريبي ٿي ويو

⑱ گُلمون، تمی آپرون ڏٿيون رو پُورو مونَ را کينَ اوئون رو کيڏو مونو. تمارئ نه رُوگُو اوئون ڏٿيون رو کيڏو مونو جيا نائوڪا سئ ان نرمي هُون وئ، پڻ اوئون رو کيڏو پڻ مونو جيا گولا سئ. ⑲ ڪم تو جي تمی پگهون ري ڪري صاف من را کيا هارُو پي انصافي ٿي ڏک سهو، تو اي ٿورا جيوي وات سئ. ⑳ هَوئ جي تمی ڏوه ڪريا ري ڪري صير ٿي مار کائو، تو تمی ٿورا جيوو ڪي ڪرو؟ پڻ جي تمی نائوڪا ڪوم ڪرو ان توئي ڏک وينو، تو پگهون ري نظر ۾ اي ٿورا جيوي وات سئ. ㉑ هم وُڍا هارُو پگهون تمارو آپ ٿي واسطو رکايو. ڪم تو ايسو ڪريست تمون هارُو ڏک سهيا، ان هم ڪرينَ اوئ تمون نئ نمونو ڏيکارو، زم تمی پڻ اوئا را نمونا مانه وو. ㉒ زم شاستر ۾ لکل سئ:

”اوئ ڪئين ئي ڏوه نه ڪريو،

نڪو اوئ ڪوئي نڳي رئي وات ڪري.

㉓ زئون منکي ايسو رئي پيعزتي ڪري، تيون اوئ پڌلا ۾ پيعزتي نه ڪري. زئون اوئ ڏک سهيا، تيون اوئ ڪيا نئ ڌمڪايو نين، پڻ اوئ پگهون مانه پروسو را کيو جيو انصاف ٿي ڦينصلو ڪريا واڙو سئ. ㉔ ايسو منک تينَ آپتون ڪرل ڏوهون رئي سزا آپ هوري مانه کاڌي، زم آبي ڏوهون ٿي سوتينَ پوري حياتي هُڏي پگهون ري وات مانه وون. اوئا رءِ مار کاڌا ٿي تمی پچي گيا. ㉕ ڪم تو اڳي تمی مارگ ساڌين ريون را زم ايل اول وينکاتا، پڻ هَوئ تمی ايسو ڪن پاسا آيا، جيو ڌراڙ را زم تمون نئ همپازيا واڙو سئ.

آڌمي ان ڏوشي رءِ هیکا بيزا ٿي ڪيو نمونءِ ويو

① ڏوشيون، تمی همريم آڌمي ري مرضي مانه وو، زم تمارون آڌميون 3 موئين ٿي جي ڪوئي پگهون رو وچن نه مونتو هئ، تو او آپري ڏوشي رو

وُودا رو نمونو زوئين وشواس اوئنه. هيونهُ نمونهُ تمارهُ آپرا آڏمي ٿي وشواس اوٿيا را پارام وات ڪريا رئي ضرورت نئين پڙهه، ② ڪم تو او آب زوشي جي تمى پڳوون رو مون راکين پويتر نمونهُ ووه ري. ③ تمى آپرا مٿوٿار شڳارين، هيم را گهڻا هونٿ پيرين، ان نائوڪام نائوڪا لوگهڙا پيرين آب ننه منڪون هومي نائوڪي مت ڏيڪارو. ④ پڻ تمى آپريون من ريون واتون مانهُ ڏيون ڏيو جي او نائوڪي هونهُ. هيوي واتون تو ڏيڪيام نٿي آوتي، پڻ او شڳار ريون شينهنون را زم ڪتم نئين ٿنه. تيام تمى نرمي ٿي وو ان شونتي ٿي ريو، ڪم تو هيوي واتون پڳوون ري نظر ۾ گهڻي نائوڪي سئ. ⑤ ڪم تو اڳلوڪا زمونا ري پويتر ڏوشي، جي پڳوون مانهُ پروسو راکتي، اوئي هم وودا ٿي ٿاپتي ڏيڏي جي او نائوڪي ڏوشي سئ. او آپرون آڏميون ري مرضي مانهُ ويتي، ⑥ زم ساره آپرا آڏمي ابراهيم رو ڪيڏو مونتي ان اوئا ننه آپرو ڏي ڪيتي. هونهُ جي تمى اوئا را زم نائوڪا ڪوم ڪروه ان ڪيا ئي پيڪ ۾ هيمنت نٿي هارتي، تو تمى زوئنه ساره ري ڏيڪري سو.

⑦ آڏميون، تمى پڻ هيونهُ نمونهُ ياد راکو جي ڏوشي رئي طاقت آڏمي ٿي گهٽ سئ، ان تيام تمى پيڙا رين هر وات ۾ آپري ڏوشي رو ڪيال راکو. ان تمى آپري ڏوشي رو مون پڻ راکو، ڪم تو پڳوون ري ڪڙپا ري ڪري تمون پئون موٽهون ننه پڳوون را وائيدا پرمونهُ هميش رو جيون زڙشي. ان هم وودا ٿي تمون ننه پراٿنا ڪريا ۾ ڪئين ڏوروڻ نئين ٿنه.

ايسئو مانهُ وشواس راکين ٻڌون منڪون ٿي نائوڪهُ نمونهُ ويو

⑧ مارو ڪيڏا رو مطلب اي سئ، تمى ٻڌائي هيڪ من ٿين ريو، هڪا پيڙا را هڪ ڏڪ ۾ پيڙا ٿيو، وشواسيون ٿي پايون بينون جيوو پريم راکو، قياس ڪرو، ان من را گريپ ٿين وو. ⑨ زئيون منڪ تمون ٿي ڪراپ نمونهُ وه، تو پڌلام تمى اوئون ٿي ڪراپ نمونهُ مت وو. ان زئيون منڪ تمارئي پيغزتي ڪرئ، تو

پڌلام تمي اُوئون رُئي پيِعزَتِي مت ڪرو. پڻ پڌلو ليڌا ري جڳا ۾ تمي اُوئون مانھ پڳوون رو آشيرواڌ مونڳو. ڪم تو پڳوون تمارو آپ ٿي واسطو ايٺا هارو رکايوھ، زم تمون نئھ پڳوون رو وائيڌو ڪرل آشيرواڌ زڙئھ. ⑩ زم شاستر ۾ لڪل سئھ:

”جيا ڪيا نئھ جيوتو ريا رُئي سڪ سئھ

ان او هڪي ريو ڪرئھ،

تو او ڪراپ واتون ڪريا ٿي پاھو ڏئھ

ان ڏڳا واري واتون ڪريا ٿي شيئي پاڳئھ.

⑪ او ڪراپ ڪوم ساڌين نائوڪو ڪوم ڪرئھ،

ان پورا من ٿي هپ ۾ رين هپ رکايا رُئي ڪوشش ڪرئھ.

⑫ ڪم تو جيا منڪ ايشور ري وات مانھ وئھ

ايشور اُوئون رُئي همپار ڪرئھ ان اُوئون رو هاڌ هومپڙئھ.


پڻ جيا منڪ ڪراپ ڪوم ڪرئھ،

ايشور اُوئون رُئھ ڪلاڦ سئھ.”

⑬ تيام، جي تمي پورا جيوت ٿي نائوڪا ڪوم ڪروھ، تو ڪوڻ تمارو ايوو نقصون ڪري هيڪئھ، جيا ٿي پڳوون رو وائيڌو ڪرل هڪ نئين زڙئھ؟ ⑭ پلئھ تمارئھ پڳوون ري وات مانھ وُڍا ري ڪري منڪ تمون نئھ ڏک ڏئھ، توئي پڻ تمي پاڳواڙا سو. تمي اُوئون منڪون ٿي مت پيٺايا، نڪو پيڪ ري ڪري گٽئي ڪريا. ⑮ پڻ تمي آپرا من ۾ پريو ايسو ڪريست نئھ پويتر مونو. ان زئيون ڪئيون منڪ تمون ٿي پڙا پونس ڪرئھ جي تمي ايسو مانھ ڪم پروسو راکوھ، تو تمي هميش آپرا وشواس را پارام هر منڪ نئھ هڙمايا هارو تيار ريو، ⑯ پڻ نمڙت ٿي پڳوون رو مون راکين وو. ان آپرو من صاف راکو، زم زئيون منڪ تمارئي ڳلا ڪرئھ، تو او منڪ لازي مرئھ، ڪم تو تمي تو ايسو ڪريست ٿي واسطو راکيا ري ڪري نائوڪئھ نمونئھ ووھ ريا، ان او تمارا وُڍا را نمونا رُئي ڳلا ڪرئھ

ريا. ⑰ ڪم تو ڪراپ ڪوم ڪريا ري ڪري ڏک سهيا ٿي ٺاڻوڪو اي سئ، جي آبي ٺاڻوڪا ڪوم ڪريا ري ڪري ڏک سهون، جي پڳوون رڻي هيوي مرضي هوئ، تو.

⑱ ڪم تو ايسو ڪريست پڻ پيڙهي ٿين ڏوهاري منڪون هارو ڏک سهين مريو. ائو ڏوهون ري ماڻهي ڏيورايا هارو آڀرو جيو ڏيڏو، زم هيڪه وار مريا ٿي او هميش هوڏي پڳوون ٿي تمارو واسطو رڪاوئ. او منڪ ٿين مروئو، ان پويتر آتما ري ڪرا ٿي جيوي اوئو. ⑲ ان پويتر آتما ري ڪرا ٿي جيوي اوئين اوئ زائين پڳوون رڻ ڪلاڦ وڍا واڙون آڪاشي ڏوتون نئ همپڙايو، جيا سزا ۾ زوئ جيل موئين راکل هتا، جي هوئ تمارو وجه ڪتم ٿي گيوه. ⑳ هائي او را او آڪاشي ڏوت سئ، جيئي اڳلوڪا زمونا ۾ پڳوون رو ڪيڏو مونيا ٿي نا پاڙيو تو. تيڏي نوح رون ڏيئون ۾، پڳوون منڪون رون ڪرل ڏوهون ٿي صير ڪريو، ان زئون هوڏي نوح پيڙو ناوي نه ريو، تنيون هوڏي پڳوون منڪون نئ سزا نه ڏيڏي. ان پسئ اوئ بوڏ ميلين منڪون نئ ڪتم ڪريا پرا. پڻ پڳوون اوئا پيڙا



موتين ڪئينڪ منڪون نٿه پوئِي ٿِي ڇڏيا، ٻڌائي پيڙا ٿين مُورڳا آڻ ڙڻا ڇڄي ڳيا. (21) زئيون ڀڳوون هيون نمونن منڪون نٿه پوئِي ٿِي ڇڏيا، تو اونه زوئنه پوئتر سنون رو نمونو مور ٿِي ڏيکارڻو، ڪم تو همئن ڀڳوون پوئتر سنون را پوئِي ٿِي تمون نٿه ڏوهون ري سزا ٿِي ڇڏا. پوئتر سنون ڏيل رو ڪا اوتاريا هارو نٿي. پڻ پوئتر سنون ليڏا رو مطلب اي سٺ، جي آبي وائڏو ڪريو جي آبي ڀڳوون هوما صاف من ٿِي وون. ان هيون نمونن ڀڳوون ايسو ڪريست رٿه جيوي اونيا ري ڪري آيون نٿه ڇڏا. (22) ڪم تو ايسو آڪاش ۾ زائين ڀڳوون رٿه زمئن پاهن مون ۾ پئو. ان آڪاشي ڏوت، ان جيا رٿي پڻ اڪتيرائي سٺ، ان جيا رٿي پڻ ڪڙا سٺ، ڀڳوون اوئون ٻڌون نٿه اوئا هيٺ راڪيا.

آيون ڪراپ ڪيالون مانه نه ويو پڻ ڀڳوون ري مرضي مانه ويو

4 ① هون ايسو ڪريست منڪ ٿين ڏک سهين مريو. تيام، زم قوچي هٿيار لين مقابل هارو تيار ٿئ، تم تم پڻ ايسو جيوي سوچ راڪين ڏک وينا هارو تيار ٿيو. ڪم تو جيئن پڻ منڪ ڀڳوون ري مرضي مانه وڍا ري ڪري ڏک وينا، اونه ڏوه ساڏيا پرا. ② تيام هيوي سوچ راڪين تم آڀري پوري حياتي ۾ وڙي آيون ڪراپ ڪيالون مانه مت وو، پڻ ڀڳوون ري مرضي مانه وينا ريو. ③ ڪم تو اڳي وشواسي ٿيا مور، زئيون تم ڀڳوون نٿه نتا مونتا، تيڏي تم گهڻا وڪت هوندي ام وڍا زم ڀڳوون نٿه نه مونيا وازون نٿه وٺئ. تيڏي تم لوڙائي ڪرتا، آيون ڪراپ ڪيالون مانه وينا، ڌارو پيتا، عيش عشرت ڪرتا، نشو پين مست ٿيتا، ان ڀڳوون را حڪم رٿه ڪلاڦ مورتيون ان ڏيو ڏيوئون رٿي پوزا ڪرتا. ④ ان هون تمارا اڳوڪا ساڻي حيرون سٺ جي تم وڙي هر نمونا رٿي پونڌائي ڪريا هارو اوئون پيڙا نٿي وينا، ان هيا وات ري ڪري او تماره ڪلاڦ ٻولئ. ⑤ هائي منڪ ڀڳوون نٿه حساب ڏيشي، جيو همئن پڻ جيوتون ان ملون رو نيا ڪريا هارو تيار سٺ. ⑥ ڪم تو ڀڳوون رٿي ڏيڏل

ڪُشي رڻي ڪهر ايٺا هارو اُئون منڪون نٿه همپڙاوي ڳڻي ٿي، جيئي وشواس اوڻيو پڻ همٿه مري ڳياھ، زم منڪ پلٽه آڀري سوچ پرموڻه ام هڙمٽه جي ”او تو مري ڳياھ، اُئون رو وشواس راڪيا رو ڪئين ڦاڻيڏو نٿي ٿيو.“ توڻي پڻ پڳوون آڀري سوچ پرموڻه پويتر آتما ري ڪڙا ٿي اُئون نٿه هميش رو جيون ڏيشي.

نيا رو ڏي ڏوڪڙو سٺ، نيام پورا من ٿي پڳوون ري وات مانھ ويو

⑦ پڻ ڏنيا ري پڇاڙي رو توڻو هوڻه ڏوڪڙو سٺ. تيام تمي عقل راڪو، ان آڀرو من آڀرا ڪيڏام راڪو زم تمي پراڻا ڪري هيڪو. ⑧ ڪاس ڪرين تمي هيڪا پيزا ٿي پورا من ٿي پريم راڪو، ڪم تو پريم ري ڪري منڪون رون گهڻون ڏوهون رڻي ماڻهي زڙڻه. ⑨ هيڪا پيزا رڻي مزمونئي ڪرو، ان مزمونون را پارام مت ٻرڙو. ⑩ جيا ڪيا رڻي هيڪا پڳوون تمنون نٿه ڏيڏيڻه، تمي هر هيڪا هيا هيڪا پرموڻه هيڪا پيزا رڻي شيوا ڪرو. ڪم تو پڳوون آڀري ڪڙا ٿي تمنون نٿه ڌار ڌار ڪوم ڪريا رڻي هيڪا ڏيڏيڻه، ان تمنون مانھ اي ڦرض نوڪيوھ، جي تمي آڀري آڀري هيڪا پرموڻه اوڻا رون منڪون رڻي شيوا ڪرو. ⑪ جي ڪياڪ نٿه پڳوون را پاها ٿي ٻوليا رڻي هيڪا زڙڻه، تو او پڳوون ري واتون شيڪاڙڻه. جي ڪياڪ نٿه شيوا ڪريا رڻي هيڪا زڙڻه، تو او پڳوون ري ڏيڏل پوري طاقت ٿي شيوا ڪرڻه، زم هر وات ۾ ايسو ڪريست ري ڪري پڳوون را وڪوڻ ٿه. پڳوون را وڪوڻ ان ڪڙا هميش هوڏي هوڻه! آمين.

ايسو مانھ وشواس راڪيا ري ڪري ڏک سهو

ڪشي رڻي وات سٺ

⑫ پريمي پاڻون ان پڻون، ايٺا وات مانھ حيرون مت ٿيو جي تمنون مانھ ڏوروڻ ان ڏک سٺ. اي تيام اوڻه زم آزمو ٿه جي تمي هاسو وشواس راڪوھ ڪا نا. ايٺا



۾ حيروني رڻي ڪئين وات نٿي. (13) پڻ تمي
ڪُش ٿيو جي تمي ايسو ڪريست را زم ڏک
سهوھ ريا، زم تمي اُوڻه ڏي پڻ الاهي گهڻا
ڪُش ٿيو زئيون ايسو ڪريست وڙي پاسو آوين
زبڪتا سوجهرا ۾ ساو وڻي. (14) جي منڪ
ايئا وات ري ڪري تمارڻي پيغزتي ڪرڻ،

جي تمي ايسو ڪريست مانھ وڻواس راڪوھ، تو تمي پاڳواڙا سو، ڪم تو هائي
ٿاڀتي سڻه جي پڳوون رو ڏيڏل مون وازو پويتر آتما تمون ۾ رڻه. (15) ام نه ٿه
جي تمون موئين ٿي ڪوئي تيام ڏک سهڻه، جي اُو ڪوني، ڪا سور، ڪا ايوا
پيزا نمونا رو ڏوهاري سڻه، ڪا وڙي واتون آگهي پاسي ڪريا وازو سڻه. (16) پڻ
جي تمي وڻواسي هويا ري ڪري ڏک سهوھ، تو تمارڻه ام نه هڙموو جي اي
پيغزتي رڻي وات سڻه، پڻ تمارڻه پڳوون را وڪوڻ ڪروو جي تمي ايسو ڪريست
رڻي ڪري ڏک سهوھ ريا. (17) ڪم تو اُو توڻو آيوھ رو زئيون پڳوون نيا ڪرين
منڪون نڻه سزا ڏيڻي. ان اُو هائي ڪوم آپرون منڪون ٿي شروع ڪرڻي. تيام
اي ڏک ڏوروڻ پڳوون را پاها ٿي شيڪت سڻه. زئيون همڻه آپون وڻواسيون نڻه
ايوئي شيڪت زڙڻه رڻي، تو پسڻه آڪر ۾ اوڻون منڪون نڻه ڪٽي گهڻي سزا
نئين زڙڻه، جيا پڳوون رڻي ڏيڏل ڪشي رڻي ڪهر نٿي مونتا؟ (18) ڪم تو شاستر
۾ ام لڪل سڻه:

”جي پڳوون ري وات مانھ وُڍا وازا مس مس پچي زاشي،

تو پڳوون رڻه ڪلاڦ وُڍا وازون ان ڏوهاري منڪون را ڪيو هار ٿيڻي؟“

(19) تيام جيا منڪ پڳوون ري مرضي پرموڻه ڏک ويڻه، اوڻون رڻه آپ نڻه
پڳوون ري همپاڙ ۾ راڪوو، جيو آپرا وائيڏا رو هاسو سڻه، ان جيڻه اوڻون نڻه
ناياھ، ان هم ڪرين نائوڪا ڪوم ڪرتا ريوو.

وشواسي منڌڙي رون آڳيوونون رڻ ڳريبي ٿي ويو


5 ① تيام، تمون موئين ٿي جيا منڪ وشواسي منڌڙيون مانھ آڳيوون سڻ، مارئي تمون ٿي وينئي سڻ. هُون پڻ تمارا زم آڳيوون سون، ان ايسو ڪريست رئي هاڪ پريا هارو ڏک وينونھ. ان مون نڻه پڻ تمون پيڙو او آڪاشي مون زڙشي، جيو ايسو رڻه پاسو آيا رڻه ڏي ساوو ٿيا واڙو سڻ. ② هُون تمارئي منٿ ڪرونھ جي تمي پڳوون رون منڪون رئي همپاڙ ڪرو جيا تمارنه حواله سڻ، زم ڌراڙ آڀرا ڏئي ريون ريون رئي همپاڙ ڪرھ. تمي مجپوري ٿي نئين، پڻ پڳوون ري مرضي پرموئنه ڪشي ٿي اونون رئي همپاڙ ڪرو. تمي لالچ ٿي نئين، پڻ شونق ٿي هائي ڪوم ڪرو. ③ ان جيا منڪ تمارنه حواله ڪرل سڻ، اونون مانھ موتون ساپون را زم آڀرا حڪم مت ويوراوو، پڻ وشواسي منڌڙي رون منڪون نڻه نائوڪو نمونو ڏيڪاڙو. ④ هيون نمونھ زئون ايسو پاسو اوين ساوو ٿيشي، جيو وشواسي منڌڙي رو موٽو آڳيوون سڻ، تئيون تمون نڻه انصاب ۾ هميش رو آڪاشي مون زڙشي، زوئنه جيت رو تاج جيو ڪيڏي ڪتم نئين ٿنھ.

⑤ هيون نمونھ، تمي جيا جون سو، تمي گهرديون رو ڪيڏو مونو. ان تمي ٻڌائي ڳريبي ٿي هڪا پڙا رئي شيوا ڪرو، ڪم تو شاستر ۾ ام لڪل سڻ:

”پڳوون وڏائو ڪريا واڙون رڻه ڪلاڦ سڻ،
پڻ ڳريبي ٿي وڏيا واڙون مانھ ڪريا ڪرھ.“

پڳوون هوما ڳريبي ٿي ويو ان شيطون ٿي هوشيار ريو

⑥ تيام ڪڙا واڙا پڳوون هوما ڳريبي ٿي وو، زم او تمون نڻه دنيا ري پڇاڙي را توٿا مانھ مون ڏنھ. ⑦ ان آڀري هر هڪ گهٽئي پڳوون مانھ ساڏو، ڪم تو او تمارو ڪيال ڪرھ. ⑧ عقل راڪو، ان هوشيار ريو. زم شينھ هونگر ڪرتون شڪار



ري ڳوت ۾ آهڻ پاهڻ ڦرتو رهڻ، تم تمارو دشمن شيطونَ تمون نڻه وشواس سڏايا رو وجه ڳوتڻه ريو. ⑨ تم پڪو وشواس راڪين شيطونَ رو مقابلو ڪرو، ڪم تو تمون نڻه ڪبر سڻه جي پوري دنيا ۾ تمارا وشواسي پائي تمارا زم هاڳي نمونڻه ڏک ويڻه ريا.

⑩ پڳوونَ جيو هميش ڪرپا ڪرڻه، اونه تمارو آپ ٿي واسطو رکايوه، زم تم اوتا پيڙا ايسو ڪريست ٿي واسطو راڪيا ري ڪري هميش هوڏي آڪاشي مون ۾ ريو. ان زئون تم اوتا وڪ وڪ هارو ڏک سهيا، تئون پڳوونَ تمون نڻه هڪ ڏيشي، تمارو وشواس پڪو ڪرشي، تماري هيٺ وڌارشي، ان تمون نڻه وشواس ۾ اڏڳ راڪشي. ⑪ اوتا رڻي ڪرا هميش هوڏي سڻه. آمين.

پطرس وشواسيون نڻه آڪري واتون ڪڻه

⑫ مٿين اي نونو ڪت سلوانس ري هاڻي لڪايوه، جيا نڻه هون ايموندار وشواسي پائي هڙمونڻه، زم هون تمون نڻه حوصلو ڏيون ان هاڪ پرين ٿا پتئي ڏيون جي

پڳوونَ هاس ۾ تمون مانھ ڪُڙيا ڪرئيه ان تمون نئه تارڻ ڏيشي. ان تمی ھایا
وات مانھ پڪو وشواس راکتا ريو.

⑬ ايٺ رئي وشواسي منڌڙئي، جئي ڏنيا ۾ پرڏيشي را زم زوئنه بابل شهر
۾ ره، ان تمارا زم پڳوونَ رئي سونڊل سئ، اُو تمون نئه نمسڪار ڪئھ. ان مارو
پریمي مرقس، جيو مون هارو آڀرا ڏيڪرا جيوو سئ، اُو پڻ تمون نئه نمسڪار
ڪئھ. ⑭ تمی ھيڪا پيزا هُون پریم ٿي مڙو.

پڳوونَ تمون ٻڌون نئه هڪي راکئھ، جيا ايسو ڪريست ٿي واسطو راکوه!

پطرس را لکل پيزا کت رښي هزموئښي

کت لکيا واژو

اي کت پطرس لکيو (2 پطرس 1:1). پطرس رو اصلي نوم شمعون هتو ان تيا کيڙ ايسو اوټا رو نوم پطرس راکيو، تيام اوټا ننه شمعون کا شمعون پطرس پښ کئنه (متي 16:17-18). پطرس ان اوټا رو پائي اندرياس ايسو رون بارون سونډل شيلون موئين ٿي هتا، جيون ننه ايسو آپرا مک شيل پښ کيدا (لوقا 13:6-14، 2 پطرس 1:1). پطرس ايسو ننه اونکيڙي ڏيکيو زئيون ايسو زبکتا سوجهره جيوو ٿيو، ان اوټه توئنه پطرس پڳوون رو آواز ام کيتون هومپڙيو جي ايسو پڳوون رو ڏيکرو سٺ (متي 17:5، 2 پطرس 1:16-18). ايسو هوزي مانه مريا کيڙ جيوي اونين پطرس ننه ان پزون مک شيلون ننه ڏيکارا ڏيڏا، ان پطرس ننه وشواسي منڌري مانه اڳيون راکيو (يوحنا 15:21-17). اوټه توئنه ايسو پطرس ننه مور ٿي همپڙيو جي او وشواس راکيا ري کري راشي (يوحنا 18:21-19، 2 پطرس 1:14).

پطرس اي کت روم شهر ٿي اندازام 65-68ع ۾ لکيو، زئيون ڏوڪرو هتو ان اوټا ننه کبر هتي جي اوټا رو موت رو توٽو ڏوڪرو آيوه رو. پطرس روم شهر ۾ ايسو مانه وشواس راکيا ري کري، اندازام 68ع ۾، رومي پادشا نيرو را راز ۾ هوزي مانه مروٽو (يوحنا 18:21-19).

کت کيون منگون هارو لکيو

اين کت ۾ نئي لکل جي پطرس کيا ملڪ کا شهر رون وشواسيون هارو اي کت لکته ريو، پښ ام لکل سٺه جي همٿه اي پيزو کت سٺه جيو پطرس اوٽون منگون ننه لکته ريو (2 پطرس 1:3). تيام اپون ننه پطرس را پيرهيان کت ٿي کبر پڙئه جي اوټه اي کت گهٽون علاقون رون وشواسيون ننه لکيو جيا رومي حڪومت رون پطرس، گلتيه، کپڌڪه، آسيه ان بڻونه نومي صوبيون موئين ريتا (1 پطرس 1:1). هاڻي علاقا همٿه ترڪي نومي ملڪ ۾ سٺه اوٽ را کئينڪ وشواسي يهودي قوم را هتا، پښ گهٽا ڌاريون قومون را هتا.

کت لکيا رو مطلب

پطرس ڏوڪرو ٿيو تو، ان پريو ايسو رون اصلي شيلون موئين ٿي گهٽا منک مري گيا تا. پطرس ننه کبر هتي جي کراب منک وشواسي منڌريون ۾ آوين کوزي واتون شيڪارشي. اوٽا وکت ۾ کئينڪ منک اي کوزي واتون شيڪارڙيات ريا جي پريو ايسو منگون رو نيا کرو پاسو نئين اوٽه، ان منک پلڻه پونڌا کوم ڪرڻ، تو اوٽون ننه پڳوون رښي سزا نئين زڙڻ. تيام پطرس

مریا مور اي کت لکيو زم ايسو رټي څاک پرته ان وشواسيون نه ټاپنځي څه جي ايسو څاس م
پڳوون رو ڏيکرو سئ، ان پڳوون را وائيدا پرمونځ نيا کروا ضرور اوشي. تيام وشواسيون
رته کراب منکون ري کوزي واتون نه مونوو، پڻ پکو وشواس راکين پوتير نمونځ پڳوون ري
مريضي مانځه وينا ريوو.

ايئا ڪتاب را شاستر تي پيرا حوالا:

2 پطرس 1:1 مٽي 2:10	2 پطرس 6:2 پيدائش 19:1-28
2 پطرس 1:1 مرقس 14:3-16	2 پطرس 7:2 پيدائش 19:12-26
2 پطرس 1:1 لوقا 13:6-14	2 پطرس 8:2 پيدائش 19:4-9
2 پطرس 14:1 يوحنا 18:21-19	2 پطرس 15:2 گيتي 22:4-22
2 پطرس 16:1-18 مٽي 17:1-8	2 پطرس 15:2 استشنا 23:4-5
2 پطرس 16:1-18 مرقس 9:2-8	2 پطرس 15:2 گيتي 31:16
2 پطرس 16:1-18 لوقا 9:36-28	2 پطرس 16:2 گيتي 22:35-21
2 پطرس 17:1 مٽي 17:5	2 پطرس 22:2 امثال 26:11
2 پطرس 17:1 مرقس 9:7	2 پطرس 3:5 پيدائش 1:6-10
2 پطرس 17:1 لوقا 9:35	2 پطرس 3:6 پيدائش 7:23
2 پطرس 1:2 يرميا 14:14	2 پطرس 3:8 زبور 90:4
2 پطرس 4:2 1 پطرس 3:19	2 پطرس 3:12 يسعيا 34:4
2 پطرس 4:2 يهوداه 1:6	2 پطرس 3:13 يسعيا 65:17
2 پطرس 5:2 پيدائش 5:6-18	2 پطرس 3:15 روميون 2:4

پطرس

رو لکل پیزو کت

1 ① هُون لکيا وَاژو شمعُون پطرس سون، جيو ايسُو کريست رو شيوآډاري ان هيک مُک شيلو سون.

پريمي وشواسي پايون ان بينون، تمې جيون نئه آپئا پگهون ان پچايا وَاژا ايسُو کريست ري انصاقي ري کري امارا زم هاگي وشواس راکيا رو موقعو زږيوه، جيا رو کوئي مول نټي،

② پگهون نئه ان آپئا پريو ايسُو نئه اوږکيا ري کري، تمون نئه گهڼي کړيا ان هک زږئه.

ناٹوکټ نمونئ ويوو زم وائيدو کرل تارن زږئ

③ ايسُو آپري حياتي ۾ آبرو زېکتو سوجهرو ډيکاريا ټي ان ناٹوکا کوم کړيا ټي آپنو واسطو آپ ټي رکايو. ان آپنئ ايسُو نئه اوږکيا ټي، پگهون آپري کڙا ټي ايئا حياتي ۾ اوئا ري مرضي مانده وُږدا هارو ان هميش رو جيون ليډا هارو آپون نئه ټډوئي کڼين ډيدوه. ④ هيونئ نمونئ ايسُو آپون ټي قيمتي ان گهڻا موټا وائيدا کړيا، زم هايون وائيدون پرمونئ تمې پگهون جيو ټين ناٹوکټ نمونئ وو ان هميش هُوډي پگهون را زېکتا سوجهرا ۾ جيوتا ريو، ان ډنيا ري پوندائي ټي ان پريادي ټي پچي زاتو، جي منکون رون کراپ کيالون ري کري ډنيا ۾ ټيټي ره.

⑤ تيام تمی پُورئي ڪوشش ڪرو جي تمی وشواس راکين نائوڪا ڪوم پڻ ڪرو، ان نائوڪا ڪوم ڪرين عقل پڻ راکو، ⑥ ان عقل راکين آپرو من آپرا قوضام پڻ راکو، ان آپرو من آپرا قوضام راکين ڏوروڻ پڻ صير ٿي سهو، ان ڏوروڻ صير ٿي سهين پڳوون ري مرضي مانھ پڻ وو، ⑦ ان پڳوون ري مرضي مانھ وين آپرون وشواسي پايون ان پينون ٿي هپ پڻ راکو، ان آپرون وشواسي پايون ان پينون ٿي هپ راکين پريم پڻ راکو. ⑧ ڪم تو جي تمون ۾ هائي ٻڌي واتون هوئە ان وڌتي زائە، تو تمارئە آڀا پريو ايسوئە اوڙڪو نالو ان نڪومو نئين ٿئە، پڻ هيا ٿي نائوڪا ڪوم ان پيزون رو ڦائيدو ٿيشي. ⑨ پڻ جيا منڪ ۾ هائي واتون نٿي، او زوئئە اونڌو سئە ان گهٽ نظر واڙا را زم پُولل سئە، ڪم تو اوئە وات ويهارئيه پري جي پويتر سنون ليڏا ري ڪري اوئا نئە اڳلوڪون ڪرل ڏوهون ربي ماڻهي زڙئي ٿئي.

⑩ پايون ان پينون، پڳوون تمارو آپ ٿي واسطورڪايوه ان تمون نئە سوندياه زم تمون نئە تارڻ زڙئە. تيام تمی نائوڪئە نمونئە ووڏا ربي وڌارئە گهٽئي ڪوشش ڪرو، زم ٿايتي ٿئە جي تمی تارڻ ليڏا واڙا سو. ڪم تو جي تمی هيئە نمونئە ويشو، تو تمی ڪيڏي نئين پڙو. ⑪ ڪم تو هيئە نمونئە ووڏا ري ڪري پڳوون آپري ڪرپا ٿي تمون نئە آڪاش ۾ اوڪار ڏيشي، جيئئە تمی آڀا پريو ان پچايا واڙا ايسو ڪريست را راز ۾ هميش هُودِي ريشو.

پطرس مريا مور ايسو ربي هاڪ پرين هاسي واتون ياد ڏيورائوئە

⑫ تيام هُون اي ڪت لکونھ ريو، زم تمون نئە هميش هُودِي هايون واتون ربي ياد رئە. تمون نئە تو اڳي هايون واتون ربي ڪبر سئە، ان تمی همئئە هايون هاسيون واتون پرموئئە ايسو مانھ پڪو وشواس راکوه. ⑬ توئي پڻ مئين نائوڪو هزميوھ جي زئيون هُودِي هُون حياتي سون، تنيون هُودِي هُون تمون نئە ياد ڏيوراوون. ⑭ ڪم تو مون نئە ڪبر سئە جي مارو مريا رو توڻو ڏوڪڙو آيوھ رو، زم آپئئە

پريو ايسو پڻ هائي وات ساوئي ڪرين مون نٿو ڪيڏو تو. (15) ان هون اي پڻ ڪوشش ڪريه جي مارا مريا ڪيڙ تم هائي واتون هميش ياد راکو.

پطرس هاڪ پريه جي شاستر ۾ اڳي لکل واتون پرموئڻ ايسو ضرور زبڪتا سوجهرا ۾ وڙي پاسو اوشي

(16) زئيون امي تمون نٿو ڪهر ڏيڏئي تي جي آيتو پريو ايسو ڪريست آپري ڪڙا ساوئي ڪرين وڙي پاسو اوشي، تيون امي منڪون ري عقل تي ناول نالي وارتائون مونين هم نٿو ڪيڏو. پڻ امي تو اونڪيئي ڏيڪيو تو، جي ايسو ڪيوو



موتو ان مون وازو سٺ. (17) ڪم تو پڳوون پاپ را پاها
تي اوتا نٿو مون زڙيو ان او زبڪتا سوجهرا ۾ ڏيڪوئو.
اوتو توتو پڳوون را پاها تي، جيو ٻڌون تي موتو ان

مون وازو سٺ، ايسو نٿو ام آواز آيو: ”اي مارو ڏيڪرو سٺ جيا تي هون پريم ڪرونه، ان ايٿا تي هون گهڻو ڪش سون.“ (18) ان هائي آواز امي آپري ڪوني آڪاش تي آتون هومپڙيو، زئيون امي ايسو پيرا پويرت ڏونگر مانه هتا.

(19) ان تيام امون نٿو ايٿا رٿي پڪئي ڪاتري سٺ، جي پڳوون رو نياپو ڏيڏا وازون ري شاستر ۾ اڳي لکل واتون پوري ٿيشي. ان تم نائوڪو ڪرشو، جي تم هائون شاستر ريون واتون مانه ڏيون ڏيشو. هائي شاستر ري واتون ڏيو را زم سٺ جيو اندارا ۾ سوجهرو ڏهه، زئيون هوڏي تارڻ رو ڏي نه اوڳهه ان ايسو پاسو آوين پروڙيا تارا را زم ساو نه ٿه. تيڏي تمارا من ۾ پڳوون رو پورو سوجهرو ٿيشي ان تم پورته نمونته پڳوون نٿو اوڙڪشو. (20) تماره اي موتي وات زوٽو ڪپهه، جي پڳوون رو نياپو ڏيڏا وازون ري ٻڌي ڪيڏل واتون جي شاستر ۾ لکل سٺ، او ٻڌي واتون منڪي آپري سوچ تي نٿي ڪيڏي. (21) ڪم تو پڳوون رو نياپو منڪي آپرا پاها تي ڪيڏي نٿي ڏيڏو، پڻ منڪي پويرت آتما ري ڪڙا تي پڳوون را پاها تي واتون ڪريه.

ڪُوڙي واتون شيڪاڙيا وازون نٿ پڳوون سزا ڏيشي

2 ① تيدُوڪا زمونا ۾ اسرائيلي قوم موئين ڪئينڪ ايوامنڪ پڻ هتا جيا آپ نٿ پڳوون رو نياپو ڏيڌا وازا ڪين ڪُوڙي واتون شيڪاڙتا. ان هيونئ نمونئ تمون موئين پڻ هيوا منڪ ٿيشي جيا ڪُوڙي واتون شيڪاڙشي. هائي منڪ وشواسي منڌڙي ۾ ڪُوڙي واتون پڪيڙشي، جيون نٿ مونيا ٿي منڪون نٿ هميش ربي سزا زڙشي. ان او ايسونئ آپرو ڌڻي نئين مونئ، جيئئ آپرو جيو ڏيڌا ٿي اوئون نٿ زوئئ ويساتا لين آپرا منڪ ناياه. هائي منڪ هميش ري سزا ۾ آپ نٿ نوڪشي، ان او سزا هايون نٿ جلدي زڙشي. ② ان گهئا منڪ اوئون لار وين اوئون را زم پوندائي ڪرشي، ان اوئون ري ڪري وشواسي ڌرم را هاسا مارگ ربي پيعرئي ٿيشي. ③ ان او ڪُوڙي واتون شيڪاڙيا وازا لالچ راڪين آپري ناول واتون شيڪاڙيا ٿي تمون ٿي نڳي ڪرين آپرو قائيدو ڪاڏشي.

پڻ اوئون نٿ سزا ڏيڌا رو ڦينصلو پڳوون را پاها ٿي زونا وڪت ٿي ٿيل سئ، ان او ڦينصلو نالو نٿي. پڳوون اوئون نٿ هميش را موت ربي سزا ڏيشي، ان سزا ڏيڌا ۾ ڌير نئين ڪرئ.

④ پڳوون آڪاشي ڏوتون نٿ سزا ڏيڌا ٿي پاھو نه ڪريو، زئيون اوئي ڏوه ڪريو، پڻ اوئون نٿ سزا ري جگا رن پونثيرون ۾ اندارا گهش ۾ راڪيا، زم نيا رٿ ڏي اوئون نٿ سزا ڏئ.

⑤ ان پڳوون اڳلوكي ڏنيا رن منڪون نٿ سزا ڏيڌا ٿي پاھو نه ڪريو، پڻ ڏنيا ۾ بوڌ ميلئي. پڳوون نوح نٿ پچايو، جيو منڪون نٿ پڳوون ري وات مانھ وُڍا رو همپراوتو، ان نوح پيڙا پيرون هات منڪون نٿ پڻ پچايا. پڻ جيا منڪ پڳوون رٿ ڪلاڦ وُڍا وازا هتا، پڳوون اوئون نٿ بوڌ ٿي ماريا پرا.

⑥ ان پڳوون سدوم ان عموره نومي شهرون نٿ سزا ڏيڌي، ان اوئون مانھ آقت ميلين بازيا پرا، زم اوئون ٿي وات ساوئي ڏيڪائ جي پڳوون رٿ ڪلاڦ

وُودا واڙون نٿه سزا زڙشي. ⑦ پڻ اُوتھ لُوط نٿه ڀڄايو، جيو ڀڳوونَ ري وات مانھ وُودا واڙو ھتو، ان ڀڳوونَ رو ڪيڏو نہ مونيا واڙون ري پُونڌائي ان پُونڌا ڪُوم ري ڪري گھڻو ڏکي ھتو. ⑧ ڪم تو ڀڳوونَ ري وات مانھ وُودا واڙو لُوط اُوت رون منڪون وسا ريتو، ان روز روز ڏيڪتو ان ھومپڙتو جي اُو منڪ ڀڳوونَ رو ڪيڏو نہ مونين ڪيوا ڪراپ ڪوم ڪرئھ. ان اُوتا نٿه گھڻو ڏورو لاڳتو، ڪم تو اُو صاف من رو ھتو.

⑨ تيام وات ساوئي سئھ جي ايشور زوئئھ جي جيا منڪ اُوتا ري مرضي مانھ وئھ، اُوتون نٿه ڏوروڻ ٿي ڪم ڪرين ڀڄاوو، ان جيا منڪ اُوتا ري وات مانھ نٿي وِيتا، اُوتون نٿه سزا ڏيتون نيا را ڏي ري سزا ھارو ڪم ڪرين راکو. ⑩ ان ڀڳوونَ ڪاس ڪرين اُوتون منڪون نٿه سزا ڏيشي، جيا آپرون ڪراپ ڪيالون مانھ وين پُونڌو ڪوم ڪرتا رئھ، ان پڙيو ايسو رو ڪيڏو نہ مونين اُوتا نٿه ڪئين نٿي ھڙمتا.

ھائي ڪوڙي واتون شيڪاڙيا واڙا اُپروٽ ٿين ڪيا ٿي نٿي ڀيڻاتا ان ڪيا رئي وات نٿي مونتا. اُو مون واڙون آڪاشي ڏوتون رئھ ڪِلاڦ ٻوليا ٿي پڻ نٿي ڀيڻاتا، پڻ شيطونَ را پاھا رون ڏوتون نٿه آپ ٿي گھٽ ھڙمين اُوتون رئي پيغڙتي ڪرئھ. ⑪ پڻ ڀڳوونَ را پاھا را آڪاشي ڏوت آپ، جيا اُوتون شيطونَ را پاھا رون ڏوتون ٿي طاقت واڙا ان ڪڙا واڙا سئھ، اُو پڻ ايشور رئھ رُوپرو ھايون ڏوتون رئھ ڪِلاڦ ٻولين اُوتون نٿه سزا ڏيڏا رو ڦينصلو نٿي ڪرتا. ⑫ پڻ ھائي منڪ پي عقل زناورون را زم سئھ، جيا ڪئين نہ ھڙمين رُوگا آپرون ڪيالون مانھ وئھ، ان رُوگا زھلایا ھارو ان ڪتم ٿيا ھارو پيڏا ٿئھ. ڪم تو ھائي منڪ اُوتون رئھ ڪِلاڦ ٻولئھ، جيون را پارام ھايون نٿه ڪئين ڪبر نٿي، ان زم زناور شڪار ٿين ڪتم ٿئھ، تم ھائي منڪ پڻ ھميش را موت رئي سزا ڪائين ڪتم ٿيشي. ⑬ اُو ٻيزون رو پُونڌو ڪرئھ، ان ھايا را ايوزام ڀڳوونَ اُوتون نٿه پُونڌي ھازي سزا ڏيشي. ڪم تو اُوتون رو شونق اي سئھ جي اُو ڏي را ساوئھ ڍاڙئھ عيش عشرت ڪرئھ.

زئيون تمي ٻڌائي پيڙا ٿين ڪاڻوھ، تو اُو تمون پيڙا ڪائين ڏڳو ڪرتون رُوڳا موج
مزو ڪرڻھ، ان تماري وشواسي منڌڙي ۾ اُو زوئڻھ ڪرايو ان عيپ سڻھ. (14) اُو
رُوڳي پُونڌڙي نظر راکڻھ ان ڏوھ ڪريا رو وجه هميش گوتتا رڻھ. اُو ايون
منڪون نڻھ چڪين ڦٽراوڻھ، جيا پڪو وشواس نٿي راکتا. اُو من ۾ لالچ راڪي
راڪين لالچ راڪيا ۾ پڪا ٿياھ. اُو پڳوون را پتل سڻھ. (15) اُو سڌو مارڳ ساڌين



اوڙڻھ پاهڻھ ڳياھ، ان بعور را ڏيڪرا بلعام را زم لالچ را
مارڳ مانھ وڻھ ريا، جيئڻھ اٿئي لالچ راڪي جي ڏوھ ڪريا
را ايوزام پاسل پڙيھون ھارو ڪرين اُو پڳوون رڻھ ڪلاڦ
وُڍا ھارو تيار ھتو. (16) پڻ ڪيڏو نہ مونيا ري ڪري پڳوون
اُٿا رو ڏوھ ڪاڍيو. پڳوون پي زيون گڏيڙي نڻھ منڪ را
گھوڙ ٻوليا رڻي ھيمت ڏيڏي، ان گڏيڙي ٻولين پڳوون رو
نياپو ڏيڏا واڙا بلعام نڻھ آپري گونڌائي ٿي روڪيو.

(17) ھائي منڪ ناليون ويرون را زم سڻھ، جيون ۾ پوڻي سڻھ ئي نئين. ان ڏنڌ
را زم پي ڦاٽيڏا سڻھ، جيا نڻھ واوڙ اُوڌاڙي زائھ. تيام پڳوون ھايون نڻھ سزا
ڏين اندارا گھڻ ۾ راکشي. (18) ڪم تو اُو موٽي موٽي نالي واتون ڪرڻھ، ان
ھم منڪون نڻھ اُوئون رون ڪراپ ڪيالون ري ڪري پُونڌائي ھوما توئڻھ. ھيوئھ
نمونئھ اُو اُوئون منڪون نڻھ ڦٽراوڻھ، جيا اڳي ڪوڙيون واتون مانھ وِيتا ان
ھمئڻھ رُوڳا توڙيڪ وار ھارو ھم وُڍا ٿي پچي ڳياھ. (19) اُو منڪون نڻھ آزادئي
ٿورڻھ، پڻ اُو آپ زوئڻھ ڳلوم ٿين پُونڌائي ۾ ڦاٿل سڻھ، ان پڳوون ري سزا ٿي
پرياد ٿيا واڙا سڻھ. زم ڪيٽئي سڻھ: ”جيا را قَوضام ڦاٽيوھ، اُٿا رو ڳلوم
ٿيوھ.“ (20) ڪم تو زئيون اُو آڻا پڙو ان پچايا واڙا ايسو ڪريست نڻھ اوڙڪيا
ٿي ڏنيا ري ٻڌي پُونڌائي ٿي پچي ڳيا تا، پڻ وڙي ھايا پُونڌائي ۾ ڦاٿين اُٿا
را قَوضام آياھ، تئيون اُوئون رڻي ھمُوڪئي حالت اڳلوڪي حالت ٿي گھڻي
ڪراپ ٿي ڳئھ. (21) زئيون اُوئون نڻھ پڳوون ري وات مانھ وُڍا را مارڳ رڻي

ڪبر هٿي، ان توڻي اُوڻي زوڻي ڪرين اُوڻا پَوِيتَر حُڪم مانھ وُڍا رو ساڏيوھ پرو، جيو اُوڻون نئھ پيزون ٿي ڏيڏل هتو، تونائوڪو ام ٿٽت جي اُوڻون نئھ پڳوون ري وات مانھ وُڍا را مارڳ رڻي ڪبر ٿي نه پڙت. (22) اي ڪيٽيئي اُوڻون مانھ هاسي ٿيھ:

”ڪوترو اُوگرزين وڙي پاسو اُو ڪاھ.
پُونڌن جھيلين وڙي پاسي ڳپ ۾ آريئھ.“

پريو ايسو ضرور پاسو آوشي، نيام اُوڻا رو ڪيتو موننا ريوو

3 ① پريمي پاڻون ان پينون، اي مارو تمون نئھ لڪل پيزو ڪت سئھ، ان زم مئين پيرھيان ڪت ۾ لکيو تو، تم ايٿا ڪت ۾ پڻ هُون تمون نئھ ياد ڏيوراوين تمارو شونق وڌارو ڪرونھ زم تمي صاف من ٿي سوچو. ② تمي پڳوون رو نياپو ڏيڏا وڙون پَوِيتَر منڪون ري واتون ياد راکيا، جي واتون اُوڻي مور ٿي همپڙاوي تي، ان آڻا پريو ان پڇايا واڙا ايسو رو حُڪم ياد راکيا، جيو حُڪم اُوڻا ري تمون ڪن آول مُڪ شيلي تمون نئھ همپڙايوھ.

③ تمارئھ اي موٽي وات زوڻو ڪپئھ، جي ڏنيا ري پڇاڙي رون ڏيئون ۾ ايوو منڪ آوشي جيا آپرون ڪراپ ڪيالون مانھ وين هاسيون واتون مانھ رُوگي نئولي ڪرشي. ④ اُو تو ام ڪيشي: ”باپ ڏاڏون زا وڪت ۾ ايسو وائيتو ڪريو تو جي اُو وڙي پاسو آوشي، پڻ باپ ڏاڏا تو مري ڳياھ، ان ايسو پاسو ڪيھ آيوھ؟ جڳت را شروع ٿي لين ٻڌوئي ڪئين امروم وئھ ريو، زم مور ۾ هتو.“ ⑤ هم ڪيتون، اُو منڪ اي وات زوڻي ڪرين ويهارئھ پري جي شروع ۾ پڳوون آپرا ڪيڏا ٿي آڪاش ان ڌرتي پوڻي موئين ٿي ان پوڻي را هيل ٿي نايا تا. ⑥ ان پسئھ هاڳي نمونئھ پڳوون آپرا ڪيڏا ٿي تيڏوڪي ڏنيا مانھ ٻوڏ ميلين ڏنيا رون منڪون نئھ پوڻي ٿي ڪتم ڪريا پرا. ⑦ ان همئھ پڻ پڳوون هاڳي نمونئھ آپرا ڪيڏا ٿي آڪاش ان ڌرتي ايٿا هارو همرام وينا راکئھ، زم نيا رئھ ڏي اُوڻون

نٿه پاهي ۾ ٻاڙهه پرا، ان جيا منڪ اُٿا رٿه ڪِلاڦ وٺه، اُوئون نٿه هميش رٿي سزا ڏين ڪٽم ڪرڻه پرا.

⑧ پڻ ٽمي، پريمي پايون ان پينون، اي وات مت ويهارو، جي پڙيو ري نظر ۾ هيڪ ڏي هزار ورهون را زم سٺه، ان هزار ورهٽه هيڪا ڏي را زم سٺه. ⑨ پڙيو ايسو وائيدو تو ڪريوه جي اُو وڙي پاسو آوشي. ان پلٽه ڪئينڪ منڪ هڙمٽه جي اُو آڀرو وائيدو پورو ڪريا ۾ گهڻي ڏير ڪرڻه ريو، توئي هاس ۾ اُو ڏير نٿي ڪرتو. پڻ اُو تو تمون نٿه توپونه ڪريا رو موقعو ڏيڏا هارو صير ڪرڻه ريو. ڪم تو اُٿا رٿي مرضي اي نٿي جي ڪوئي پڻ هميش رٿي سزا ڪائين ڪٽم ٿه. پڻ اُٿا رٿي مرضي اي سٺه جي ٻڌائي آڀرا ڪراڀ ڪوم ساڏين توپونه ڪرڻه ان پڳوون ري وات مانھ وٺه.

⑩ پڻ پڙيو ايسو رٿه آيا رو ڏي سور را زم اوچتو آوشي. اُوٿه ڏي آڪاش ٻڙم ٻڙم آواز ۾ ڪٽم ٿيشي، ڏي سنڌر ان تارا پاهي ۾ گڙين ڪٽم ٿيشي، ان ڌرتي ان جئين ڪئين منڪي ڌرتي مانھ نايوه، اُو ٻڌوئي ٻڙي زاشي.

⑪ زئيون ٻڌوئي ڪئين هيوٺه نمونٽه پڳوون ري سزا ٿي ڪٽم ٿيشي، تئيون تمارٺه هر وات ۾ پويتر نمونٽه ان پڳوون ري مرضي پرمونٽه وين ڪياوا ناوڪا هوو ڪپٽه. ⑫ ان تمارٺه اُٿا ڏي را آيا رٿي وات زووو، ان تمارٺه پڳوون ري مرضي مانھ وُڍا ٿي اُٿا ڏي نٿه جلدي آوا ڏيوو، جيئھ ڏي پڳوون نيا ڪرشي. اُوٿه ڏي آڪاش تو پاهي ۾ ڪٽم ٿيشي، ان ڏي سنڌر ان تارا تو ٻڙين گڙي زاشي. ⑬ پڻ آبي پڳوون رو وائيدو مونين اُٿا توٿا رٿي وات ڪُشي ٿي زوئونھ ريا، زئيون پڳوون نوو آڪاش ان نوئي ڌرتي ناوشي، جيئھ ٻڌوئي ڪئين پڳوون ري وات مانھ ويشي.

⑭ تيام، پريمي پايون ان پينون، زئيون ٽمي هيا نوا ٿيل جڳت رٿي وات زوئونھ ريا، تو ٽمي پوري ڪوشش ڪرو جي زئيون پڙيو ايسو وڙي پاسو آوشي، تئيون ٽمي اُٿا ري نظر ۾ ڏوهاري ان ڪراڀ نه هوٺو، پڻ تمارا پڳوون ٿي

منومثا ٿيل هوئو. ⑮ ان تمی ام هڙمو جي آڀڻو ڀرڻو نيا ڪريا ۾ ايٿا هارو ڇڏي ڪرڻ، زم منڪون نٿو توبونھ ڪريا رو ان تارڻ لڏيا رو موقعو زڙئو. امارئو ڀريمي وشواسي ڀائي پولوس پڻ ڀڳوون ري ڏيڏل عقل ڀرموئئو تمون نٿو همروم لکيوھ. ⑯ ان او آڀرون ٻڌون ڪتون ۾ هايون واتون را پارام ٻولين همروم لکئوھ. اوٿا رون لڪل ڪتون ۾ ڪئينڪ واتون ايو سيئو جي هڙميام ڏوري سئو. ان جيا منڪ وشواس را پارام هاوڙ نٿي شيڪيا ان پڪو وشواس نٿي راکتا، او هايون لڪل واتون ٿي آڀرو اوڙو مطلب ڪاڍئو، زم او شاستر ريون ڀڙيون لڪل واتون ٿي اوڙو مطلب ڪاڍئو. هيئو نمونئو او آپ مانھ هميش را موت رئي سزا نوڪئوھ.

⑰ تيام تمی، ڀريمي ڀايون ان ٻينون، جيون نٿو هايون واتون را پارام مور ٿي ڪٻر پڙئيوھ، تمی هوشيار ریا، متون هائي منڪ جيا ڀڳوون رو ڪيڏو نٿي مونتا، تمون نٿو ڪوڙيون واتون ٿي شيتروھ، ان تمی وشواس ساڏو ان پڙي زائو، ان جيو تارڻ همئئو تمون نٿو پڪو وشواس راکيا ري ڪري زڙيا واڙو سئو، او تمون ٿي ڪوهرائي زائو. ⑱ پڻ تمی ڀڳوون ري ڪريا ري ڪري ڀڳوون ري مرضي مانھ وڍيا ۾ آڳڙ وڌو، ان آڀڻا ڀرڻو ان ڀڄايا واڙا ايسو ڪريست ٿي وڌارئو گهڻو واسطو راکتا ريو. اوٿا را وڪوڻ همئئو ان هميش هوڏي ٿيئا رئو! آمين!

يُوحنا را لکل پيرهيان کت رښي هزمونځي

کت لکيا واړو

ايفاکت م لکيا واړا رو نوم نځي لکل، پښ واک ساوځي سځه جي لکيا واړو ايسو رون اصلي شيلون موئين ټي هيک سځه (1 يوحنا 1:2-2). شروع ټي لين منک هزمځه جي اي کت يوحنا رو لکل سځه. يوحنا پريو ايسو رون پيرهيون شيلون موئين ټي هيک هتو. او زيري رو ډيکرو ان يعقوب رو پايي هتو، ان ايسو رو شيلو ټيا مور مشي ماريا واړو هتو (مرقس 1:19-20، لوقا 10:5). او ايسو رو ماشايي پايي پښ هتو، کم تو اوڅا رښي مان، جيا رو نوم سلومي هتو، پريو ايسو ري مان ماريون رښي هڅي بين هڅي (متي 27:56، مرقس 16:1، يوحنا 19:25). يوحنا ايسو رو بډون ټي پريمي شيلو پښ هتو (يوحنا 13:23). ايفه يوحنا، شاستر را ترڅ کت، يوحنا نومي شاستر، ان درشن نومي کتاب لکيا. ام لاځهه جي يوحنا اي کت اندازا م 85-95ع م لکيو زښون او ډوکرو هتو.

کت کيون منکون هارو لکيو

ايفاکت م نځي لکل جي کيون منکون هارو سځه، جيا ټي واک ساوځي سځه جي اي کت روځي هيکي وشواسي منځري هارو ننو. زښون يوحنا ډوکرو هتو، او آسيه صويا را افسس شهر م ريتو، ان آسيه صويا ريون وشواسي منځريون رښي اځيووني ان همپار کړتو. تيام ام لاځهه جي اوڼه اي کت آسيه صويا رون بډيون وشواسي منځريون هارو لکيو. اوڅ رون وشواسيون موئين يهودي قوم را ان ډاري قومون را منک پښ هتا. هايون قومون را زتا منک وشواسي نن او هيکا پيزا ټي شپ کړتا.


اوڼه کينک ايوا منک پښ هتا جيا آپ نه وشواسي کيتا پښ وشواس ريون اځلوکيون اصلي ان هاسيون واتون مانه نن وينا. اوڼون کوڙون منکون موئين بي نمونا را منک هتا. کينک يهودي قوم را هتا، جيا اځي يهودي درم پاڙتا ان هيکا پځوون نه مونتا. تيام او ايسو نه روځو ناڅو منک هزمنا، ان نن مونتا جي ايسو پځوون رو ډيکرو ان پځوون رو سونډل پچايا واړو کريست پښ سځه. ان پيزا کينک منک هتا جيا ډاري قوم واړا هتا، ان اځي مورتې پوزا ان پرم واړو درم پاڙتا. تيام او هيا درم پرموځه ام مونتا، جي منک رو ډيل ان جيو هاو ډار سځه، ډيل کراب سځه پښ جيو پوير سځه. هائي اوڙو کيال راکين او کيتا جي ايسو پځوون رو ډيکرو تو هتو، پښ هاس م منک ننو ټيو، کم تو ټي نځي هيکتو جي ايسو پوير ټين منک رو کراب ډيل له. ان او ام پښ هزمنا: ډوه روځو ډيل هون ټهه، تيام پځه ډوه کړتا ريون تو کعين واک نځي، کم تو ډوه کړيا ټي منک را جيو مانهه کعين اثر نځين ټه.

آسيہ صُویا ۾ گهڻا منک شپ راکتا ان ڪُوڙي واتون شيڪاڙتا. تيام يُوحنَا وشواسيون تَه گهڻو گهڻو ڪيڏو جي اُو شپ ان وير نہ راکه پڻ هيڪا پِڙا تي پريم ڪرئ، اُو ڪُوڙون منڪون ري واتون نہ مونئ پڻ هاسو وشواس راکتا رئ، اُو مونئ جي ايسُو پڳوون رو ڏيڪرو سئ ان منک تينَ ڏنيا ۾ آيو تو، ان اُو ڏوه ڪروو ساڏئ ان جي توئي اُوئون ٿي ڏوه تئ، تو اُو پڳوون ٿي ماڻي مونجئ.

34:13	يُوحنا	23:3	1 يُوحنا	14	يُوحنا	2-1:1	1 يُوحنا
15:7	متي	1:4	1 يُوحنا	20:7	واعظ	8:1	1 يُوحنا
11:24	متي	1:4	1 يُوحنا	29:1	يُوحنا	2:2	1 يُوحنا
47:8	يُوحنا	6:4	1 يُوحنا	17-16:3	يُوحنا	2:2	1 يُوحنا
16:3	يُوحنا	9:4	1 يُوحنا	12:15	يُوحنا	6:2	1 يُوحنا
27:15	يُوحنا	14:4	1 يُوحنا	18:19	احبار	7:2	1 يُوحنا
39-36:22	متي	21:4	1 يُوحنا	34:13	يُوحنا	8:2	1 يُوحنا
31-29:12	مرقس	21:4	1 يُوحنا	24:6	متي	15:2	1 يُوحنا
5:6	إِسْتِشْنا	21:4	1 يُوحنا	11	متي	18:2	1 يُوحنا
18:19	احبار	21:4	1 يُوحنا	13:16	يُوحنا	20:2	1 يُوحنا
23:14	يُوحنا	3:5	1 يُوحنا	19:8	يُوحنا	23:2	1 يُوحنا
17-16:3	متي	6:5	1 يُوحنا	23:14	يُوحنا	24:2	1 يُوحنا
34-32:1	يُوحنا	6:5	1 يُوحنا	15:3	يُوحنا	25:2	1 يُوحنا
35-34:19	يُوحنا	6:5	1 يُوحنا	26:14	يُوحنا	27:2	1 يُوحنا
15:19	إِسْتِشْنا	7:5	1 يُوحنا	12:1	يُوحنا	1:3	1 يُوحنا
37-36	يُوحنا	9:5	1 يُوحنا	15-1:3	پيدایش	8:3	1 يُوحنا
16:3	يُوحنا	11:5	1 يُوحنا	44:8	يُوحنا	8:3	1 يُوحنا
4:1	يُوحنا	11:5	1 يُوحنا	18:19	احبار	11:3	1 يُوحنا
36:3	يُوحنا	12:5	1 يُوحنا	34:13	يُوحنا	11:3	1 يُوحنا
23:16	يُوحنا	14:5	1 يُوحنا	8-3:4	پيدایش	12:3	1 يُوحنا
32-31:12	متي	16:5	1 يُوحنا	18:15	يُوحنا	13:3	1 يُوحنا
30-28:3	مرقس	16:5	1 يُوحنا	24:5	يُوحنا	14:3	1 يُوحنا
10:12	لُوقا	16:5	1 يُوحنا	5:17	متي	23:3	1 يُوحنا
6-1:20	خُرُوج	21:5	1 يُوحنا	7:9	مرقس	23:3	1 يُوحنا
				35:9	لُوقا	23:3	1 يُوحنا

يُوحنا

رو لکل پيرهيون ڪت



ايسنو پڳوونَ رو وچن سئُ ان هميش رو جيونَ ڏيڏا واڙو سئُ

1 ①امي تمون نئُ ايسنو را پارام لكونه ريا، جيو ڏنيا ٺهيا ٿي مور شروع ٿي لينَ جيو تو سئُ. امي اوئا ري واتون ڪوني هومپڙيه ان اوئا نئُ اونڪيئي پاڙيوه. امي اوئا نئُ زويوه ان اوئا نئُ آپرا هات سڀاڙياھ. او جيونَ ڏيڏا واڙو پڳوونَ رو وچن سئُ. ②او جيونَ ڏيڏا واڙو ٿين ساوو ٿيوھ، ان امي اوئا نئُ پاڙيوه ان اوئا رئي ھاڪ پرينَ تمون نئُ اوئا را پارام همپڙاوونھ، جي او هميش رو جيونَ ڏيڏا واڙو سئُ، جيو شروع ۾ پڳوونَ ٻاپ ڪن هتو، ان ڏنيا ۾ آوين امون ڪن ساوو ٿيوھ. ③جي ڪئين امي پاڙيوه ان هومپڙيوھ، او امي تمون نئُ پڻ همپڙاوونھ، زم تمی پڻ امون پڙا پائي ٿين هپ ۾ ريو، ان جيون ٿي امي واسطو راکونھ اوئون ٿي تمی پڻ واسطو راکو. امي نه روگو آيت ۾ واسطو راکونھ، پڻ امي کاس ڪرين پڳوونَ ٻاپ ٿي واسطو راکونھ ان اوئا را ڏيڪرا ايسنو ڪريست

ٿي پڻ واسطو راڪونه. ④ ان امي اي واتون تمون ننه تيام لڪونه ريا، زم آيون ننه پوري ڪشي ٿئي.

پڳوون سوجهرو سئ

ان آڀڻ پڳوون را سوجهرا ۾ وين نائوڪا ڪوم ڪرو



⑤ جيو نيا پو امي ايسو ٿي هومپريوه ان تمون ننه همپراونه، او اي سئ: پڳوون سوجهرو ٿي سوجهرو سئ، ان اوئا موئن ماڳي اندارو نٿي. ⑥ جي آبي پيزون هوما ام ڪونه: ”امي پڳوون ٿي واسطو راڪونه،“ پڻ آبي اندارا ۾ وين ڪراپ ڪوم ڪرونه، تو آبي ڪوڙ ڪرونه ريا ان هاس مانھ نٿي وينا. ⑦ پڻ جي آبي سوجهرا ۾ وين نائوڪا ڪوم ڪرونه، جيوئه نمونئ پڳوون سوجهرو ٿين هميش نائوڪو ڪرئ، ۽ آبي هڪا پيزا ٿي هپ ان واسطو راڪونه، ان اوئا رو ڏيڪرو ايسو آڀرو جيو پڳوون را نوم مانھ ڏين آڀون ننه آڀئون ٻڌون ڏوهون ٿي ماقئي ڏيوراونه.

پڳوون را سوجهرا ۾ وودا هارو

آڀڻ پونڌا ڪوم ساڌو ان ڏوه نه ڪرو

⑧ جي آبي ام ڪونه: ”امي پيڏوهي سون،“ تو آبي آڀرا ڪوڙ ٿي آپ شيتراونه، ان آبي هاسا نٿي. ⑨ پڻ جي آبي آڀرا ڪرل ڏوه مونونه، تو پڳوون آڀرا وائڏا رو هاسو ان انصاف ٿي وودا واڙو سئ، تيام او آڀون ننه ڏوهون ربي ماقئي ڏيشي، ان هر پونڌائي ٿي پويتر ڪشي. ⑩ جي آبي پيزون هوما ام ڪونه: ”امي ڪئين ئي ڏوه نٿي ڪريو،“ تو آبي پڳوون ننه ڪوڙو ڪرونه ان اوئا رو وچن مونتا نٿي.

① مارون پريمي ٻاڙون، هون تمون ننه هائي واتون ايئا هارو لڪونه ريو، 2 جي تم ڏوه نه ڪرو. پڻ جي ڪيا ٿي ڏوه ٿئي، تو ايسو ڪريست، جيو

پيدوهي سئ، اَو آپئي مدت ڪريا وارو سئ ان پڳوون ٻاپ ڪن آپئي ڀارت ڪرڻ. ② ان اونه آپتون ڏوهون ري ماڻي هارو آڀرو جيو پڳوون را نوم مانه ڏيڏو. اونه آڀرو جيو نه روڳو آپتون ڏوهون ري ماڻي هارو، پڻ پوري دنيا رون منڪون رون ڏوهون ري ماڻي هارو پڻ ڏيڏو.

پڳوون را سوجھرا ۾ وڍا هارو آڀئڻ پڳوون رو ڪيڏو مونوو

③ جي آڀي پڳوون رون حڪمون مانه وونه، تو اينا وات ٿي آڀون ننه ڪهر پڙه جي آڀي پڳوون ننه اوزڪونه ان اونا ٿي واسطو راکونه. ④ جيو ام ڪئڻ: ”هون پڳوون ننه اوزڪونه،“ پڻ اونا رون حڪمون مانه نٿي ويتو، تو اَو ڪوڙو سئ ان هاس اونا موئين نٿي. ⑤ پڻ جيو ڪوئي پڳوون را وچن مانه وئ، اَو هاس ۾ پورا من ٿي پڳوون ٿي پريم ڪرڻ. اينا ٿي آڀون ننه ڪهر پڙه جي آڀي پڳوون ٿي واسطو راکونه. ⑥ جيو ام ڪئڻ: ”هون پڳوون ٿي واسطو راکونه،“ تو اونا رو قرض سئ، جي زم ايسو وڍو، تم اَو آپ پڻ وئ.

⑦ پريمي پايون ان بينون، هائي پريم را پارام جيو حڪم هون تمون ننه لڪونه ريو، هائي نوو حڪم نٿي. هائي تو موروڪو زونو حڪم سئ، جيو شروع ٿي لين تمون ننه ڏيڏل سئ. هائي زونو حڪم اَو رو اَو وچن سئ جي تمي هومپڙيوه. ⑧ توڻي پڻ هائي حڪم هيڪ نمونا رو نوو حڪم پڻ سئ، جيو ايسو آڀري حياتي ۾ پورو ڪريو، ان همئنه تمي پڻ پورو ڪروه ريا، ڪم تو اندارو ڪتم ٿئ ريو ان پڳوون رو هاسو سوجھرو هئنه ساوو ٿئ ريو.

⑨ جيو ام ڪئڻ: ”پڳوون رو سوجھرو مون ۾ سئ،“ پڻ اَو آڀرا پاڻي ٿي وير راکئڻ، تو اَو هزون هڏي اندارا ۾ سئ. ⑩ جيو آڀرا پاڻي ٿي پريم ڪرڻ، اَو پڳوون را سوجھرا ۾ رئ ان اونا موئين ايوو ڪئين نٿي جيا ري ڪري اَو زوئنه نيڏو ڪائين ڏوه ۾ پڙه. ⑪ پڻ جيو آڀرا پاڻي ٿي وير راکئڻ، اَو اندارا ۾ سئ ان اَو اندارا ۾ وئ. اونا ننه ڪهر نٿي پڙئي جي اَو ڪيال زائڻ ريو، ڪم تو اندارا

ري ڪري اُو زوڻته اونڌو ٿي ڳيوھ.

پڳوونَ را سوجھرا ۾ وُڍا ھارُو
آپڻئ ھر ھيڪ ڪراپ وات ٿي پاھو ڪروو

⑫ مارون پريمي ٻاڙون، ھون تمون نئ تيام لڪونھ ريو

ڪم تو تمارا ڏوھ ايسو ري ڪري ماڦ ٿي ڳياھ.

⑬ گھريون، ھون تمون نئ تيام لڪونھ ريو

ڪم تو تمي ايسو نئ اوڙڪوھ، جيو شروع ٿي لين جيوتو سئ.

جوئون، ھون تمون نئ تيام لڪونھ ريو

ڪم تو تمي ايسو را پاھا را ٿين پُونڌا شيطونَ مانھ جيت ڪريھ.

⑭ مارون پريمي ٻاڙون، مٿين تمون نئ تيام لڪيوھ

ڪم تو تمي پڳوونَ ٻاپ نئ اوڙڪوھ.

گھريون، مٿين تمون نئ تيام لڪيوھ

ڪم تو تمي ايسو نئ اوڙڪوھ جيو شروع ٿي لين جيوتو سئ.

جوئون، مٿين تمون نئ تيام لڪيوھ

ڪم تو تمي طاقت واڙا سو، تمي پڳوونَ رو وچن من موئين راڪوھ،

ان تمي پُونڌا شيطونَ مانھ جيت ڪريھ.

⑮ ڏنيا ري پُونڌائي ھوما مت تٿائو، پڻ ڏنيا ري ڪراپ واتون ٿي شيتي پاڳو.

جي ڪوئي ڏنيا ري پُونڌائي ۾ ڪُش رھ، تو اُو پڳوونَ ٻاپ ٿي پريم نٿي ڪرتو.

⑯ ڪم تو ڏنيا رئي ھر ڪراپ وات، منڪون را ڪراپ ڪيال، پُونڌي نظر ان لوپ

لالچ، ان ايٺا حياتي ريون واتون ۾ وڌائي، اُو ٻڌائي پڳوونَ ٻاپ را پاھا ٿي نٿي،

پڻ ڪراپ ڏنيا را پاھا ٿي ٿئھ. ⑰ ان اي ڪراپ ڏنيا ان ڏنيا رو ھر ڪراپ ڪيال

ڪتم ٿيتو زائھ، پڻ جيو منڪ پڳوونَ ري مرضي مانھ وئھ، اُو ھميش ھوڏي

جيوتو رھ.

پڳوونَ را سوجھرا ۾ وُڊا ھارُو آڀئڻ ھاسو وشواس راکتا ريوو

⑱ مارون پريمي ھارون، اي ڏنيا ري پڇاڙي رو ٿوئو سئ، ان زم تمي ھومپڙيوھ جي اُو منڪ اوشي جيو ايسو ڪريست رڻ ڪلاڦ وُڊا واڙو سئ، تم ھمئڻ ڳھڻا ايوا منڪ ٿياھ جيا ايسو ڪريست رڻ ڪلاڦ وئھ. تيام آپون نئ ڪبر سئ جي اي ڏنيا ري پڇاڙي رو ٿوئو سئ. ⑲ اُو منڪ آپون موئين ٿي ڳياھ پرا، پڻ ھاس ۾ اُو آپون موئينليا نٿا. جي اُو آپون موئينليا ھوئ، تو آپون ڪن رڻ. پڻ اُو آپون نئ ساڏين ڳياھ پرا زم وات ساوئي نئ جي اُو ٻڌائي آپون موئينليا نٿا.

⑳ پڻ تمي پڳوونَ را سُونڊل منڪ سو ڪم تو تمون نئ پڳوونَ را پَوِتر شيواڌاري ايسو را پاھا ٿي پَوِتر آتما زڙيوھ، ان تمون ٻڌون نئ ڪبر سئ جي ھاس ڪي سئ. ㉑ مئين تمون نئ تيام نٿي لکيو، جي تمون نئ ھاس رڻي ڪبر نٿي. پڻ مئين تيام لکيوھ، ڪم تو تمون نئ ھاس رڻي ڪبر تو سئ، ان تمي زوئوھ جي ڪوئي ڪوڙ ھاس را پاھا ٿي نٿي آتو. ㉒ ٻڌون ٿي موٽو ڪوڙ ٻوليا واڙو ڪوڻ سئ؟ اُو ايوو منڪ سئ جيو ام ڪئھ: ”ايسو پڳوونَ رو سُونڊل پڇايا واڙو ڪريست نٿي.“ ايوو منڪ ايسو ڪريست رڻ ڪلاڦ سئ، اُو پڳوونَ ٻاپ نئ نٿي مونتو، ان پڳوونَ را ڏيڪرا ايسو نئ پڻ نٿي مونتو. ㉓ جيو ڪوئي پڳوونَ را ڏيڪرا ايسو نئ نٿي مونتو، اُو نہ رُوڳو ايسو ٿي ڌار سئ پڻ پڳوونَ ٻاپ ٿي پڻ ڌار سئ. ان جيو ڪوئي پڳوونَ را ڏيڪرا ايسو نئ مونتھ، اُو نہ رُوڳو ايسو ٿي واسطو راکئھ پڻ پڳوونَ ٻاپ ٿي پڻ واسطو راکئھ.

㉔ جي واتون تمي شروع ۾ ھومپڙي، اُو تمي من موئين راکو، ان اوئون مانھ وو. جي تمي ھاڻي واتون من موئين راکشو، جي تمي شروع ۾ ھومپڙي، ان اوئون مانھ وِتا ريشو، تو تمي نہ رُوڳو پڳوونَ را ڏيڪرا ايسو ٿي واسطو راکتا ريشو، پڻ پڳوونَ ٻاپ ٿي پڻ واسطو راکتا ريشو. ㉕ ان اي اُو وائڊو سئ، جيو وائڊو ايسو آپون ٿي ڪريوھ، جي آپون نئ ھميش رو جيون زڙشي.

②⑥ مٿين تمون نٿه هائي واتون لکيه زم تمي هايون منكون ٿي هوشيار ريو، جيا ڪوڙي واتون شيڪاڙين تمون نٿه هاس ٿي ڦيروا ڪرڻ. ②⑦ پڻ تمي جي سو، تمون موئين ايسو رو ڏيڏل پويتر آتما رڻ. ان تمون نٿه ايٿا رڻي ڪئين ڪا پئي نٿي جي ڪوڪ منڪ تمون نٿه شيڪاڙڻ. پڻ زم ايسو رو ڏيڏل پويتر آتما تمون نٿه ٻڌيون واتون را پارام شيڪاڙڻ، ان او ڪوڙو نٿي پڻ هاسو سڻ، ان زم ايسو آپ تمون نٿه شيڪاڙيا، تم تمي ايسو ٿي واسطو راکتا ريو.

②⑧ هونءَ، مارون پريمي ٻارون، ايسو ٿي واسطو راکتا ريو. هم ڪريا ٿي زئيون ايسو پاسو آوين ساوو ٿيشي، تئيون آپون نٿه تارڻ ليڏا رڻي پڪي ڪا ترئي هوشي ان آبي اوٿا هوما لاسار نئين ٿيون. ②⑨ تمون نٿه ڪهر سڻ جي ايسو پڳوون ري وات مانھ وڍا وڙو سڻ، تيام تمون نٿه ايٿا رڻي پڻ ڪهر سڻ جي هر منڪ جيو پڳوون ري وات مانھ وڻ، او ايسو را پاها ٿي پڳوون رو ٻار ٿيوھ.

پڳوون آپڻو ٻاپ سڻ

ان آپڻ پڳوون را ٻار ٿين ناٿوڪڻ نمونءَ ويو

3 ① زوئو، پڳوون ٻاپ آپون ٿي ڪتو گهڻو پريم ڪريوھ، جي آبي پڳوون را ٻار ڪيوارئونھ. ان آبي نه روگو هم ڪيوارئونھ، پڻ آبي پڳوون را ٻار تو سون. ڏنيا را منڪ آپڻا پارام اي وات تيام نٿي اوڙڪتا، ڪم تو اوڻي پڳوون نٿه پڻ نه اوڙڪيو. ② پريمي پايون ان بينون، آبي همڻه پڳوون را ٻار تو سون، پڻ نيٺ آپون نٿه ڪيوو ڪيوو هڪ ان مون زڙشي، او وات هزون هوڻي ساوئي نٿي ٿئي. توڻي پڻ آپون نٿه ڪهر سڻ جي زئيون ايسو پاسو آوين ساوو ٿيشي، تئيون او وات پڻ ساوئي ٿيشي، ان آبي پڳوون جيو تيشون، ڪم تو آبي اوٿا نٿه روڀرو ساوڻ نمونءَ پاڙشون. ③ ان جيو ڪوئي پڳوون مانھ هائي پروسو راکڻھ، او آپ نٿه پويتر راکڻھ، زم ايسو پويتر سڻ.

پڳوونَ را ٻارَ ٿينَ آڀڻُ ڏوهَ نہ ڪروو

④ جيو ڪوئي ڏوه ڪرڻ، اُو پڳوونَ رون حُڪمون رڻہ ڪِلَاف وڻہ، صم تو ڏوه ڪريا رو مطلب سڻہ پڳوونَ رون حُڪمون رڻہ ڪِلَاف ويو. ⑤ ان تمون نڻہ کبر سڻہ جي ايسُو اينا هارُو ڏنِيا ۾ آوينَ ساوو ٿيو، زم اُوئا ري ڪري منڪون نڻہ ڏوهون رڻي ماڻِئي زڙڻہ ان اُو وڙي ڏوه نہ ڪرڻہ. ان تمون نڻہ اي پڻ کبر سڻہ جي ايسُو موڻين ڪڻين ڏوه نڻي. ⑥ جي ڪوئي ايسُو ٿي واسطو راکڻہ، تو ٿي نڻي هڪتو جي اُو ڏوه ڪرتو رڻہ. جي ڪوئي ڏوه ڪرتو رڻہ، تو اُو نڪو ايسُو را پارام ڪڻين هزميوه ان نڪو اُو ايسُو نڻہ اوڙڪڻہ. ⑦ پريمي ٻارون، ٻيڙون ري ڪوڙي واتون مت مونو. پڳوونَ ري نظر ۾ رُوگو اُو منڪ پڳوونَ ري وات مانہ وُڍا وازو سڻہ، جيو ڏوه ٿي پاھو ڪرينَ پڳوونَ ري وات مانہ وڻہ،



زم ايسُو پڳوونَ ري وات مانہ وُڍا وازو سڻہ. ⑧ جيو ڏوه ڪريا وازو سڻہ، اُو پڳوونَ را ڏشمڻ شيطونَ را پاها رو سڻہ، ڪم تو شروع ٿي لينَ شيطونَ ڏوه ڪرتو آيوه. پڳوونَ رو ڏيڪرو ايسُو اينا هارُو ڏنِيا ۾ آوينَ ساوو ٿيو، زم شيطونَ را

ڪوم ڪتم ڪرڻہ پرا. ⑨ جيو ڪوئي پڳوونَ رو ٻارَ ٿيوه، اُو ڏوه نڻين ڪرتو رڻہ، ڪم تو پڳوونَ اُوئا موڻين آپ جيو ٿيا رڻي هيمنت نوڪڻيہ، ان تيام ٿي نڻي هڪتو جي اُو ڏوه ڪرتو رڻہ، ڪم تو اُو پڳوونَ را پاها ٿي نُوئي حياتي لينَ پڳوونَ رو ٻارَ ٿيوه.

پڳوونَ را ٻارَ ٿينَ آڀڻُ پڳوونَ رو ڪيتو مونو

⑩ اينا ٿي وات ساوئي تڻہ جي ڪيا منڪ پڳوونَ را ٻارَ سڻہ، ان ڪيا منڪ شيطونَ را ٻارَ سڻہ. جيو ڪوئي پڳوونَ ري وات مانہ نڻي ويتو ڪا آپرا پائي ٿي

پريم نٿي ڪرتو، اُو پڳوونَ را پاها رو نٿي. ⑪ ڪم تو جيو نياپو تمي شروع ٿي
لين هومپڙيوه، اُو اي سئ: آڀئنه هڪا پڙا ٿي پريم راڪو. ⑫ آڀئنه ڦاٽن را
زم نه ويو. اُو پُونڌا شيطونَ را پاها رو هتو ان آڀرا پائي رو ڪُون ڪريو. اُوئ
آڀرا پائي رو ڪُون ڪم ڪريو؟ ڪم تو اُوئا را آڀرا ڪوم پُونڌا هتا، ان اُوئا را
پائي را ڪوم نائوڪا هتا، تيام اُو ريشي پڙيو. ⑬ تيام، پايون ان پينون، جي
ڏنيا را منڪ تمون ٿي وير راڪئ، تو تمي حيرون مت ٿيو.

⑭ آڀون نئ ڪهر سئ جي آڀي هميش را موت ٿي پڇي گياها ان آڀون نئ
هميش رو جيون زڙيوه، ڪم تو آڀي وشواسي پايون ان پينون ٿي پريم ڪرونه.
جيو پريم نٿي ڪرتو، اُو هميش را موت را قوضام رئ. ⑮ جيو ڪوئي آڀرا پائي
ٿي وير راڪئ، اُو آڀرا من ۾ ڪُون ڪريا وازو سئ، ان تمون نئ ڪهر سئ جي جيو
ڪوئي ڪُون ڪريا وازو سئ، اُو هميش رو جيون ليڏا جيوو نٿي. ⑯ آڀون نئ ايئا
ٿي ڪهر پڙئيه جي پريم ڪي سئ، ڪم تو ايسو آڀون هارو آڀرو جيو ڏيڏوه.
ان آڀو پڻ اي قرض سئ جي آڀي آڀرون وشواسي پايون ان پينون هارو آڀرو
جيو پڻ ڏيڏا هارو تيار ريون. ⑰ جي ڪياڪ ڪن پئيهو پنڄڙ، لوگهڙو لتو، ان
کاڌا پيڏا ري شينهنون سئ، ان اُو زوئ جي آڀرا پائي رئي ضرورت سئ، پڻ اُو
قياس نه ڪرين اُوئا رئي مڌت نٿي ڪرتو، تو پڳوونَ رو پريم ڪم ڪرين اُوئا
موئين سئ؟ ⑱ پريمي ٻاڙون، آڀي روڳا مونڊا ٿي پريم ري واتون نه ڪرون، پڻ
پريم را ڪوم ڪرين هاس ۾ پريم ڪرون. ⑲ هم ڪريا ٿي آڀون نئ ڪهر پڙشي
جي آڀي هاس را پاها را سون، ان آڀون نئ پڳوونَ هومو من ۾ حوصلو زڙشي،
⑳ ڪم تو پلئ آڀو من آڀون مانه ڏوه ڏئ، توئي پڻ پڳوونَ آڀا من ٿي موتو
سئ، ان اُو ٻڌوئي ڪئين زوئئ.

㉑ پريمي پايون ان پينون، جي آڀو من صاڦ سئ، تو آڀي پوري هيئت ٿي
ٻيڪ وگر پڳوونَ ٿي واسطو راڪي هڪونه، ㉒ ان جيا ڪيا وات هارو آڀي پراٽنا
ڪرون، اُو آڀون هارو پڳوونَ را پاها ٿي پوري ٿيشي، ڪم تو آڀي اُوئا رون

حُڪمون مانھ وونھ، ان ايووا ڪوم ڪرونھ جيا ٿي اُو کُش سئھ. ②③ ان پڳوونَ رو ڏيڏل حُڪم اي سئھ، جي آبي اُوئا را ڏيڪرا ايسو ڪريست مانھ وشواس راکون، ان هيڪا پيزا ٿي پريم راکون، زم ايسو آپون نئھ حُڪم ڏيڏوھ. ②④ ان جيو ڪوئي پڳوونَ رون حُڪمون مانھ وئھ، اُو پڳوونَ ٿي واسطو راکئھ، ان پڳوونَ اُوئا ٿي واسطو راکئھ. ان آپون نئھ ڪبر سئھ جي پڳوونَ آپون ٿي واسطو راکئھ، ڪم تو پڳوونَ را پاھا ٿي آپون نئھ پويتر آتما زڙيوھ.

پڳوونَ را باز ٿينَ آپئئھ ڏنيا ري هر ڪراپ ان ڪوڙي وات ٿي پاھو ڪرو

4 ① پريمي پايون ان بينون، زئيون منڪ ڪئھ جي اُو پويتر آتما ري ڪڙا ٿي ٻولئھ ريا، تو اُوئون ٻڌون ريون واتون مانھ تمي امزام يقين مت ڪرو. پڻ تمي اُوئون ري واتون آزماوين جونچ ڪرو، جي اُو پڳوونَ را پاھا ٿي پويتر آتما ري ڪڙا ٿي ٻولئھ ريا ڪا نا. ڪم تو ايووا گھڻا منڪ سئھ جيا ڪوڙ ھاڪلينَ آپ نئھ پڳوونَ رو نياپو ڏيڏا واڙا ڪئھ ان اُو آپون نئھ ساڏين ڏنيا رون ڪراپ منڪون موئين پڙي گياھ. ② تمي ايئا وات ٿي ڪبر پاڙي هڪوھ جي منڪ پڳوونَ را پاھا ٿي پويتر آتما ري ڪڙا ٿي ٻولئھ ريو، ڪا نا. جيو ڪوئي مونئھ جي ايسو پڳوونَ رو سونڊل پچايا واڙو ڪريست سئھ ان منڪ ٿين ڏنيا ۾ آيو تو، اُو پڳوونَ را پاھا ٿي پويتر آتما ري ڪڙا ٿي ٻولئھ ريو. ③ پڻ جيو ڪوئي ايسو نئھ ناڪارين ٻولئھ، تو اُو پڳوونَ را پاھا ٿي پويتر آتما ري ڪڙا ٿي نٿي ٻولتو. پڻ اُو اُوئا ري ڪڙا ٿي ٻولئھ جيو ايسو ڪريست رئھ ڪلاڦ وُڊا واڙو سئھ. تمي تو هومپڙيوھ جي ايسو ڪريست رئھ ڪلاڦ وُڊا واڙو آوشي، ان اُو همئھ پڻ ڏنيا ۾ آول سئھ. ④ پڻ تمي جيا سو، مارون پريمي ٻاڙون، تمي تو پڳوونَ را پاھا را سو. ان تمارئي هايون منڪون مانھ جيت ٿيھ جيا ڪوڙو نياپو ڏيڏا واڙا سئھ، ڪم تو پڳوونَ جيو تمون موئين رئھ، اُو شيطون ٿي موتو سئھ، جيو ڏنيا رون

ڪراڻ منڪون موئين رھ. ⑤ ھاڻي منڪ ڏنيا ري پونڌائي را پاھا را سئھ. تيام او ڏنيا رون ڪراڻ منڪون ري سوچ پرموئھ ٻولھ، ان ڏنيا را ڪراڻ منڪ اون ري واتون مونھ. ⑥ پڻ آبي تو پڳوون را پاھا را سون. جيو پڳوون نھ اوڙڪھ، او آبي واتون مونھ. پڻ جيو پڳوون را پاھا رو نتي، او آبي واتون نتي مونھ. ھايا ٿي آيون نھ ڪٻر پڙھ جي منڪ پويتر آتما ري ڪڙا ٿي ھاس ٻولھ ريو، ڪا شيطون را پاھا ٿي ڪوڙ ٻولھ ريو.

پڳوون را ٻار ٿين آيئھ ھيڪا پيزا ٿي پريم ڪرون

⑦ پريمي پايون ان پينون، آبي ھيڪا پيزا ٿي پريم ڪرون، ڪم تو پريم پڳوون را پاھا ٿي سئھ، ان جيو ڪوئي پريم ڪرھ، او پڳوون را پاھا ٿي نوئي حياتي لين پڳوون رو ٻار ٿيوھ ان او پڳوون نھ اوڙڪھ. ⑧ جيو پريم نتي ڪرتو، اوئھ پڳوون نھ ھ اوڙڪيو، ڪم تو پڳوون آڀ پريم سئھ. ⑨ ايئا ٿي وات ساوئي ٿيھ جي پڳوون آڀون ٿي پريم ڪرھ، ڪم تو پڳوون آڀرو ڏيڪرو ڏنيا ۾ ميليھ، جيو اوئا رو ھيڪھ ڏيڪرو ھتو، زم اوئا ري ڪري آڀون نھ ھميش رو جيون زڙھ. ⑩ پريم ايئا ۾ نتي، جي آبي پڳوون ٿي پريم ڪريھ. پڻ پريم اي سئھ، جي پڳوون آڀون ٿي پريم ڪريھ ان آڀرو ڏيڪرو ميليھ زم او آڀون ڏوھون ري ماڻي ھارو آڀرو جيو پڳوون را نوم مانھ ڏھ. ⑪ پريمي پايون ان پينون، زئون پڳوون آڀون ٿي اتو گھڻو پريم ڪريھ، تو آڀو قرض سئھ جي آبي پڻ ھيڪا پيزا ٿي پريم ڪرون. ⑫ پڳوون نھ ڪيئھ ٿي ڪيڏي نتي ڏيڪيو. توئي جي آبي ھيڪا پيزا ٿي پريم ڪرونھ، تو وات ساوئي سئھ جي پڳوون آڀون موئين رھ، ان پڳوون را پريم ري ڪري آبي پڳوون را زم ھاسو پريم ڪرونھ. ⑬ آڀون نھ ايئا ٿي ڪٻر پڙھ جي آبي پڳوون ٿي واسطو را ڪونھ ان پڳوون آڀون ٿي واسطو را ڪنھ، ڪم تو پڳوون آڀون موئين ٿي ھر ھيڪ نھ آڀرو پويتر آتما ڏيڏوھ. ⑭ ان امي ڏيڪيوھ ان ھاڪ پرين ھمپڙاونھ جي پڳوون ٻاڀ آڀرو

ڏيکرو ڏنيا رن منڪون نٿه ڀڄايا هارو ميليوه. (15) جيو ڪوئي مونڻه جي "ايسو پڳوون رو ڏيکرو سٺه،" تو پڳوون اوتا ٿي واسطو راکڻه، ان او پڳوون ٿي واسطو راکڻه. (16) ان آيون نٿه تو کهر پڙڻه ان پڪڻي ڪاٿڙي ٿيھ جي پڳوون آيون ٿي پريم ڪرڻه.

پڳوون آپ پريم سٺه، ان جيو ڪوئي پريم ڪرڻه، او پڳوون ٿي واسطو راکڻه، ان پڳوون اوتا ٿي واسطو راکڻه. (17) هيون نمونن پڳوون را پريم ري ڪري آبي پڳوون را زم هاسو پريم ڪرونه، ان تيام آيون نٿه نيا رڻه ڏي ڪڍن پڪ نئين لاڳڻه، پڻ آبي هيٺ راکشون ڪم تو آبي ايتا ڏنيا ۾ ام پڳوون را پريم ۾ ٻنڌال سون، زم ايسو آپ پڳوون را پريم ۾ ٻنڌال سٺه. (18) زئون آيت ۾ پريم سٺه، تو پڪ نٿي هوڻيٿي. جي منڪ هاسا پريم ۾ ٻنڌال سٺه، تو هڪا ٻنڌال رڻي پڪ ڪم ڪرين هوشي؟ ڪم تو پڪ ٿيون ٿڻه، زئون سزا رو ڪيال اوڻه. جيو منڪ پڪ راکڻه، او هاسا پريم ۾ ٻنڌال نٿي.

(19) آبي تو تيام پريم ڪرونه، ڪم تو پڳوون آپ پيرھين آيون ٿي پريم ڪريوه. (20) جي ڪوئي ام ڪڻه: "هون پڳوون ٿي پريم ڪرونه،" ان او آپرا پاڻي ٿي وير راکڻو هوڻه، تو او ڪوڙو سٺه. ڪم تو جي او آپرا پاڻي ٿي پريم نٿي ڪرتو، جيا نٿه اوڻه ڏيکيوھ، تو پسڻه او ڪم ڪرين پڳوون ٿي پريم ڪري هڪڻه، جيا نٿه اوڻه ڏيکيو پڻ نٿي؟ (21) ان آيون نٿه اي حڪم پڳوون ٿي زڙل سٺه، جي جيو منڪ پڳوون ٿي پريم ڪرڻه، اوتا رڻه آپرا پاڻي ٿي پڻ پريم ڪروو ڪپڻه.

5 (1) جيو ڪوئي وشواس راکڻه جي ايسو پڳوون رو سونڍل ڀڄايا وازو ڪريست سٺه، او پڳوون را پاها ٿي نوي حياتي لين پڳوون رو ٻار ٿيوھ. ان جيو ڪوئي ٻاپ ٿي پريم ڪرڻه، او اوتا ٿي پڻ پريم ڪرڻه، جيو ٻاپ رو ٻار سٺه. (2) آيون نٿه ايتا ٿي کهر پڙڻه جي آبي پڳوون رن ٻارون ٿي پريم ڪرونه، زئون آبي پڳوون ٿي پريم ڪرونه ان اوتا رن حڪمون مانھ وونھ. (3) پڳوون

ٿي پريم ڪروو اي سٺ، جي آبي اُٿا رون حُڪمون مانھ وون. ان اُٿا را حُڪم آڪرا نٿي ان آبي ھورئہ نمونئہ اُٿون مانھ وي ھڪونھ، ④ ڪم تو جيو ڪوئي پڳوون را پاھا ٿي نوئي حياتي لين پڳوون رو ٻار ٿيوھ، اُٿا رئي دنيا ري ھر پُونڌائي مانھ جيت سٺ. ان اُو طاقت جيا ٿي دنيا ري ھر پُونڌائي مانھ جيت ٿيھ، اُو آڻو وشواس سٺ.

پڳوون را ٻار ٿين آڻئ ھاسو وشواس راڪو

⑤ اُو ڪوڻ سٺ، جيون رئي دنيا ري ھر پُونڌائي مانھ جيت سٺ؟ اُو رُوڳا ايوا منڪ سٺ، جيا وشواس راڪئھ جي ايسو پڳوون رو ڏيڪرو سٺ. ⑥ ايسو اُو رو اُو پڳوون رو سونيل پڇايا وازو ڪريست سٺ جيئئہ دنيا ۾ آوين پويتر سنون ليڏو ان منڪون نئہ پڇايا ھارو آڀرو جيو پڳوون را نوم مانھ ڏيڏو. اُوئہ نہ رُوڳو پوئي ٿي پويتر سنون ليڏو، پڻ آڀرو لوئي ويوراوين پڳوون را نوم مانھ آڀرو جيو ڏيڏو. ان پويتر آتما آڀ ھاڪ پريا وازو سٺ جي ھائي ٻڌي وات ھاسي سٺ، ڪم تو پويتر آتما آڀ ھاسو سٺ ان ھميش ھاس ٻولئہ. ⑦ ھايا وات رئي ترڻ ھاڪ پريا وازا سٺ، جيون ٿي ٿاڀيئي ٿئھ جي ھائي وات ھاسي سٺ. ⑧ پيرھيون ھاڪ پريا وازو سٺ پويتر آتما، پيزو سٺ ايسو را پويتر سنون رو پوئي، ان ترئمو سٺ ايسو را موت رو لوئي. ھائي ترڻ ٿي، ھاڪ پريا وازون را زم، ھاڳي وات رئي ٿاڀيئي ڏئہ. ⑨ آبي تو منڪون ري پرل ھاڪ مانھ يقين ڪرونھ، پڻ پڳوون رئي پرل ھاڪ ھايا ٿي گھڻي موتي سٺ. ان ھائي پويتر آتما رئي، پوئي رئي، ان لوئي رئي پرل ھاڪ پڳوون رئي پرل ھاڪ سٺ، ڪم تو ھيوئہ نمونئہ پڳوون آڀ آڀرا ڏيڪرا را پارام ھاڪ پريئہ. ⑩ جيو ڪوئي پڳوون را ڏيڪرا مانھ وشواس راڪئھ، اُو پڳوون ري پرل ھاڪ مانھ يقين ڪرئہ. پڻ جيو ڪوئي پڳوون ري وات مانھ يقين نٿي ڪرتو، اُوئہ پڳوون نئہ ڪوڙو ڪريوھ، ڪم تو اُوئہ پڳوون ري پرل ھاڪ مانھ يقين نٿي ڪريو، جئي ھاڪ

پڳوونَ آپرا ڏيکرا را پارام پريئھ. ⑪ ان پڳوونَ رڻي پرل ھاڪ اي سئھ: پڳوونَ آپون نئھ هميش رو جيونَ ڏيڏوھ، ان اي هميش رو جيونَ اوتا را ڏيکرا ايسو ٿي زڙئھ. ⑫ جيو ڪوئي پڳوونَ را ڏيکرا ٿي واسطو راکئھ، اوتا نئھ هميش رو جيونَ زڙئھ. پڻ جيو ڪوئي پڳوونَ را ڏيکرا ٿي واسطو نٿي راکتو، اوتا نئھ هميش رو جيونَ نٿي زڙتو. ⑬ تمي جيا پڳوونَ را ڏيکرا مانھ وشواس راکوھ، مٿين تمون نئھ ھاڻي ٻڌي واتون ايٺا ھارو لکيھ، زم تمون نئھ کبر ھوئھ جي تمون نئھ هميش رو جيونَ زڙل سئھ.

پڳوونَ را باز تينَ آپئھ پڪئي ڪاترئي راکو جي پڳوونَ آپئي پرائئائون ھومپڙشي

⑭ ان آبي پڳوونَ مانھ پروسو راکين پوري هيئت ٿي پڳوونَ ٿي پرائئا ڪري ھڪونھ، ڪم تو آپون نئھ پڪئي ڪاترئي سئھ جي جيا پڻ وات را پارام آبي پڳوونَ ري مرضي پرموئھ اوتا ٿي پرائئا ڪرون، او آپئي وات ھومپڙئھ. ⑮ ان زئيون آپون نئھ کبر سئھ جي ڪيا پڻ وات را پارام آبي پرائئا ڪرون، تو پڳوونَ آپئي وات ھومپڙئھ، تئيون آپون نئھ اي پڻ کبر سئھ، جي جيا ھارو آبي پرائئا ڪري ھوشي، او پوري ٿيشي.

⑯ جي ڪوئي آپري وشواسي بين نئھ ڪا آپرا وشواسي پائي نئھ ڏوھ ڪرتو پاڙئھ، تو او پڳوونَ ٿي اوتا ري ماڻي ھارو پرائئا ڪرئھ، ان پڳوونَ اوتا نئھ ماڻي ڏين هميش رو جيونَ ڏيشي. ٻيڙون ٻڌون ڏوھون رڻي ماڻي ٿي ھڪئھ، پڻ اي ھيڪ ڏوھ ايوو سئھ، زئيون منڪ زوئي ڪرين پڳوونَ رئھ ڪلاڦ ويوا ڪرئھ، جيا ري ڪري اوئون نئھ هميش را موت رڻي سزا ضرور زڙشي. ھون ھيو ڏوھ را پارام نٿي ڪيتو جي تمي ھيوو ڏوھ ڪريا واڙون ري ماڻي ھارو پڳوونَ ٿي پرائئا ڪرو. ⑰ ھوئھ جيئي پڻ وات پڳوونَ رئھ ڪلاڦ سئھ، او ڏوھ سئھ. توئي پڻ ٻڌائي ڏوھ ايوا نٿي جيون ٿي هميش رو موت ضرور زڙشي.

⑱ آپون نئه کهر سئه جي جيو ڪوئي پڳوونَ را پاها ٿي نوئي حياتي لين پڳوونَ رو ٻار ٿيوه، اُو ڏوه نئي ڪرتو ريتو. پڻ ايسو، جيو پڳوونَ رو ڏيڪرو سئه، اُو هايا نئه همپاڙينَ راڪئه، ان پُونڌو شيطونَ هايا نئه سبتوئي نئي. ⑲ آپون نئه کهر سئه جي آبي پڳوونَ را پاها را سون، ان ڏنيا را پيزا ٻڌائي منڪ پُونڌا شيطونَ را قَوَضامَ ڦاٿل سئه. ⑳ ان آپون نئه ايٿا رئي کهر پڻ سئه، جي پڳوونَ رو ڏيڪرو ڏنيا ۾ آيوه ان آپون نئه ايوي هزم ڏيڏيھ جيا ٿي آبي پڳوونَ نئه اوڙكونه، جيو هاسو پڳوونَ سئه. ان آبي هاسا پڳوونَ ٿي واسطو راکونه، ڪم تو آبي اوتا را ڏيڪرا ايسو ڪريست ٿي واسطو راکونه. اُو هاسو پڳوونَ ان هميش رو جيون ڏيڏا وازو سئه.

㉑ مارون پريمي ٻارون، مورتئي پوزا ان جئي پڻ وات پڳوونَ ري هاسي شيوا پرموئنه نئي، هايون ٻڌيون واتون ٿي تمي آپ نئه پڇاوينَ راکو.

يُوحنا را لکل پيزا کت رښي هزمونځي

کت لکيا واژو

ايڅا کت م لکيا واژا رو نوم نځي لکل، پښ لکيا واژو آپ نه منډري رو اگيونو کښه (2 يُوحنا 1:1). شروع ټي لين منک هزمځه جي اي کت يُوحنا رو لکل سځ. يُوحنا پريو ايسو رو پيرهيون شيلون موئين ټي هيک هتو، ان ايسو رو پريمي شيلو هتو. زښيون يُوحنا ډوکرو هتو، او اسيه صوپا را افسس شهر م ريتو، ان اسيه صوپا ربون وشواسي منډريون رښي اگيونوځي ان همپار کړتو. امر لاځځه جي يُوحنا اي کت اندازا م 85-95 م لکيو زښيون او ډوکرو هتو.

کت کيون منکون هارو لکيو

ايڅا کت م لکل سځ جي اي کت پځوون ري سونډل باڻي ان اوڅا رو باژون هارو سځ (2 يُوحنا 1:1). هيا ټي امر لاځځه جي اي کت اسيه صوپا ري هيکي وشواسي ډوشي ان اوڅا ري اکائي هارو سځ. پښ گهڻا منک هزمځه جي اي مثالي ټولي سځ، ان کت هيکي وشواسي منډري هارو ان اوڅا منډري رو منکون هارو سځ. هيوځ نمونځ 'تاري پښ را باز' پيزي وشواسي منډري را منک سځ (2 يُوحنا 13:1). زويامر يُوحنا تيار وات هتارښ لکځي، کم تو اوڅا وکت م روځي حکومت وشواسيون نه تنگ کړتي ان ټي هيکځو جي زهڙي م اي کت روم رو قوځيون نه زڙځ.

کت لکيا رو مطلب

يُوحنا اي کت هيکي وشواسي منډري رو منکون نه لکيو، زم او هاسو وشواس راکتا رځ ان هيکا پيزا ټي پريم کړتا رځ، او ايون منکون ري واتون نه مونځ، جيا آپ نه وشواسي کين ايسو را پارام کوڙي واتون شيکارځه، ان نکو ايون کوڙون منکون نه ايزي گهري اوکار ځ. يُوحنا ايڅا کت م اوڅون کن آيا را پارام مور ټي کبر پښ ځځه.

ايڅا کتاب را شاستر ټي پيزا حوالا:

2 يُوحنا 4:1-5 اڅار 18:19	2 يُوحنا 6:1 1 يُوحنا 5:5
2 يُوحنا 4:1-5 يُوحنا 34:13	2 يُوحنا 7:1 1 يُوحنا 11:24
2 يُوحنا 5:1 1 يُوحنا 7:2	2 يُوحنا 7:1 1 يُوحنا 3-2:4
2 يُوحنا 6:1 يُوحنا 23:14	2 يُوحنا 12:1 1 يُوحنا 4:1

يُوحنا

رو لكل پيزو كت

1 ① هُون لکيا وازو منڌري رو آڳيوون سون.
 پریمی پڳوون رئي سُونڊل ٻائي ان ٻائي رون ٻارون، هُون تمون ٿي هاس
 ۾ پریم ڪرونه. ان نه رُوگو هُون تمون ٿي پریم ڪرونه، پڻ اُو ٻڌائي تمون ٿي
 پریم ڪرڻ، جيون ننه هاس رئي کبر پڙيڻه. ②امي تمون ٿي تيام پریم ڪرونه،
 ڪم تو آڻئون منون موئين هاس سڻه ان اي هاس آڻون پيڙو هميش هُوڌي ريشي.
 ③پڳوون ٻاپ ان ايسو ڪريست جيو پڳوون ٻاپ رو ڏيڪرو سڻه، آڻون مانه
 ڪرپا ان ڏٺيا ڪرشي، ان آڻون ننه هڪي راکشي، زم آڻي هاس مانه وون ان
 پریم ڪرتا ريون.

④هُون الاهي گهڻو ڪش ٿيو، ڪم تو مُون ننه کبر پڙيڻه جي ٿارون ٻارون
 موئين ٿي ڪوڪ هاس مانه وڻه ريا، زم پڳوون ٻاپ را پاها ٿي آڻون ننه حُڪم
 زڙيو تو. ⑤ان هُونه، پڳوون رئي سُونڊل ٻائي، مارئي تُون ٿي وينتي سڻه. هُون
 تُون ننه پيزو ڪوئي نوو حُڪم نٿي لکتو، پڻ اُو هاڳي حُڪم لکونه ريو جيو
 شروع ٿي لين آڻون ننه ڏيڏل سڻه. مارئي وينتي اي سڻه جي آڻي هڪا پيزا ٿي
 پریم ڪرون. ⑥ان پریم اي سڻه، جي آڻي پڳوون رون حُڪمون مانه وون. هائي
 اُو حُڪم سڻه، جيو تمي شروع ٿي هومپڙوه ريا، جي تمي پریم مانه وو.

⑦ڪم تو گهڻا شيتريا وازا منک آڻون ننه ساڏين. ڏٺيا ۾ نيهری پڙياھ،
 جيا ام نٿي مونتا جي ايسو پڳوون رو سُونڊل پچايا وازو ڪريست سڻه ان منک

ٽين ڏنڊا ۾ آيو. جيو ڪوئي هيو سٺ، اُو شيتريا وازو ان ايسو ڪريست رٿ
 ڪلاڦ وُڍا وازو سٺ. ⑧ ٽمي هوشيار ريو، متون وشواس راڪيا ۾ جيو پڻ ڦاٿيڏو
 اماري مينت ٿي تمون نٿ ٿيو، اُو ڪٽم ٿي زائ، ان تمون نٿ پڳوون را پاها ٿي
 پورو انصاف نه زڙ. ⑨ جيو ڪوئي آپ نٿ گهڻو زوڻو هزمين ايسو ڪريست را
 پارام اڳلوڪي اصلي ان هاسي شيڪاڙل واتون نٿي مونتو، اُو پڳوون ٿي واسطو
 نٿي راکتو. پڻ جيو ڪوئي اڳلوڪي اصلي ان هاسي شيڪاڙل واتون مونتو، اُو
 پڳوون ٻاپ ٿي واسطو راکتو، ان پڳوون را ڏيڪرا ايسو ٿي پڻ واسطو راکتو.
 ⑩ جي ڪوئي تمون ڪن شيڪاڙوا آڻ، ان اُو هائي اڳلوڪي اصلي ان هاسي
 شيڪاڙل واتون نٿي شيڪاڙتو، تو ٽمي اُوڻا نٿ ڪو آوڪار ڏيو ڪو گهر موئين
 آوڻا ڏيو، پڻ اُوڻا نٿ ٽمي هڪي ريا رو ڪيڏا وگر همروم پاسو روونو ڪرو
 پرو. ⑪ ڪم تو جيو هيو منڪ نٿ هڪي ريا رو ڪتو، اُو زوڻه هيا رون ڪراپ
 ڪومون موئين حصو لئ.

⑫ تمون نٿ لکيا هارو مون ڪن گهڻي پيزي واتون سٺ، پڻ مارئي مرضي
 نٿي جي هون هائي واتون ڪت ۾ لڪون. پڻ مارئي اميد سٺ جي هون تمون ڪن
 آوون ان تمون ٿي روپرو واتون ڪرون، زم آيون ٻڌون نٿ پوري ڪشي ٿي.
 ⑬ ٿاري پڳوون ري سونڊل پين را ٻار ٿون نٿ نمسڪار ڪت.

يُوحنا را لکل ترثما کت رئي هزموتئي

کت لکيا وازو

ايئا کت م لکيا وازا رو نوم نئي لکل. پڻ لکيا وازو آپ نڌ منڌري رو اڳيوون ڪڏھ (3 يُوحنا 1:1). شروع ٿي لين منک هُزمتهه جي اي کت يُوحنا رو لکل سڌ. يُوحنا پريو ايسو رون پيرهيون شيلون موئين ٿي هيڪ هتو، ان ايسو رو پريمي شيلو هتو. زئيون يُوحنا ڏوڪرو هتو، او آسيه صويا را افسس شهر م ريتو، ان آسيه صويا ريون وشواسي منڌريون رئي اڳيوونئي ان همياڙ ڪرتو. ام لاڳهه جي يُوحنا اي کت اندازا م 85-95ع م لکيو زئيون او ڏوڪرو هتو.

کت کيا منک هارو لکيو

يُوحنا اي کت هيڪا گائس نومي وشواسي هارو لکيو (3 يُوحنا 1:1). گائس آسيه صويا ري هيڪي وشواسي منڌري رو منک هتو. زئيون يُوحنا آپرون منکون نڌ اوئا وشواسي منڌري م شيڪاڙيا هارو ميليا، تو اوٽ رڌ هيڪڌ ڊيٽرفيس نومي وشواسي يُوحنا ٿي اوپروت تين اوئون منکون نڌ اووا نه ڏيڏا (3 يُوحنا 9:1-10). پڻ گائس يُوحنا رون ميلل منکون نڌ اوڪار ڪريو ان آپري گهري تڪاڙيا (3 يُوحنا 1:3-6). ام لاڳهه جي ڊيميٽريس نومي منک جيا را وڪوڻ يُوحنا ڪرڻه ريو (3 يُوحنا 1:12)، او منک سڌ جيا ري هاڻي يُوحنا اي کت ڏي ميليو.

کت لکيا رو مطلب

يُوحنا اي کت لکيو زم او گائس نڌ شاپاش ڏڌ جي او ناٿوڪڌ نمونڌ وشواس مانه وڻه، ڪم تو اوڻه يُوحنا رون ميلل منکون نڌ اوڪار ڏيڏو تو، جيا وشواسيون نڌ شيڪاڙيا هارو ميلل هئا. يُوحنا اي کت تيام پڻ لکيو زم او گائس نڌ آپرون ميلل منکون رئي وڙي پارت ڪرڻ. ايئا کت م يُوحنا اي پڻ ڪڏھ جي او آپ اوين ڊيٽرفيس نومي منک نڌ هزماوشي.

ايئا ڪتاب را شاستر ٿي پيزا حوالا:

3 يُوحنا 9:1 مرقس 14:3, 17
3 يُوحنا 9:1 لوقا 13:6-14
3 يُوحنا 9:1 متي 18:18
3 يُوحنا 12:1 يُوحنا 24:21

3 يُوحنا 5:1 روميون 13:12
3 يُوحنا 6:1 احبار 18:19
3 يُوحنا 6:1 يُوحنا 34:13
3 يُوحنا 9:1 متي 2:10

يُوحنا

رو لکل ترڻمو ڪت

1

① هُون لکيا وازو منڌڙي رو آڳيوون سون.

پريمي پائي، تُون جيا ٿي هُون هاس ۾ پريم ڪرونه، نمسڪار.

② پريمي پائي، مارئي پرائنا سئ ۾ جي زم تُون وشواس راکيا ۾ نيڪ سئ،

تم تُون هر وات ۾ نيڪ هوئ ۾ ان هازو هورو ٻينو هوئ. ③ ڪم تو هُون ايڻا وات

مانه گهڻو ڪش ٿيو، زئون ڪئينڪ وشواسي پائي تُون ڪن ٿي مُون ڪن آيا، ان

ٿارا پارام هاک پرين ڪيتات ريا جي تُون هاس مانه وئ ريو، جيئو نمونئ

تُون هميش هاس مانه ويتو رئ. ④ مُون هارو هيا ٿي موٽي ڪشي رئي وات

سئ ئي نئين، جي هُون هومپزونه جي مارا ٻاڙ هاس مانه وئ ريا.

⑤ پريمي پائي، جيا ڪوم تُون وشواسي پايون ري شيوا هارو ڪرئ، ڪاس

ڪرين اُون تُون رئي مزمونئي ڪريام جيون نئ تُون اوڙڪتو ئي نئي، اُو ڪوم ڪريا

۾ تُون ايمونڌاري ٿي وئ. ⑥ اُوئي منڪي ايت ري وشواسي منڌڙي هومئي ٿارا

پريم را پارام هاک پري. هوئ تُون اُون تُون رئي ڪاپئي پورئي ڪرين اُون تُون نئ

ايوئ ناوڪئ نمونئ آڳڙ زايا هارو ميلي، جيئو نمونئ پڳوون ري نظر ۾ هوو

ڪپئ، تو تُون ناوڪو ڪريه. ⑦ ڪم تو اُو ايسو ري شيوا هارو ايت ٿي رونا

ٿيا، ان جيا منڪ وشواسي نئي، اُون تُون ٿي اُو ڪئين نئي ليتا. ⑧ تيام آپون

وشواسيون رو قرض سئ جي آبي هيون منڪون رئي مدت ڪرون، زم آبي پڻ

پڳوون ري هاسي واتون همپڙايا ۾ اُون تُون پيڙو حصو ليون.

⑨ مٿين ٿارا پاها ري وشواسي منڌري نئه ڪئينڪ لکيو تو ان پايون ري هاڻي ڏي ميليو تو. پڻ ديترفيس، جيو آپ منڪون مانھ موتو ٿيوا ڪرئھ، او اوپروٽ ٿين امون ٿي واسطو راڪيا (دنا پائڙھ ⑩ تيام، زئمن هون اوئھ آويھ، تئيون هون اوئا نئه هاين واتون را پارام هزماويھ ڪم تر او امون مانھ نالا الزوم هٿين گهڻي ڪراپ واتون ڪرئھ. او روگو هم ڪريا ٿي ڪش نٿي ٿيتو، پڻ او وشواسي پايون نئه آپ آوڪار نٿي ڏيتو، ان جيا منڪ اوئون نئه آوڪار ڏيوا ڪرئھ، اوئون منڪون نئه پڻ او روڪئھ ان وشواسي منڌري ٿي ٻارا ڪاڏھ پرا. ⑪ پريمي پائي، تون هيو ڪراپ نمونا مانھ مت وي، پڻ ٺاٺوڪا نمونا مانھ ويتو ري. جيو منڪ ٺاٺوڪا ڪوم ڪرئھ، او پڳوون را پاها رو سئھ. جيو منڪ ڪراپ ڪوم ڪرئھ، اوئھ پڳوون نئه اوڙڪيو ئي نٿي.

⑫ هونءَ ديميتريس را پارام ٻڌي منڪي هاڪ پريئھ جي او ٺاٺوڪو منڪ سئھ، ان اوئا رئه هاس مانھ وودا ٿي پڻ هايا وات رئي ٿاڀٽي ٿيئھ. ان امي پڻ هايا را پارام هاڳي هاڪ پرونھ، ان تون نئه ڪبر سئھ جي اماري پرل هاڪ هاسي سئھ.

⑬ مون ڪن گهڻي ايوي واتون سئھ جيون را پارام تون نئه لڪوو تو، پڻ مارئي مرضي اي نٿي جي هاڻي واتون تون نئه ڪت ڇر لڪون. ⑭ پڻ مون نئه اميد سئھ جي هون جلدي تون ڪن آويھ، ان تئيون آبي روپرز واتون ڪرئون. ⑮ تون هڪي رئه! ايت را پريمي وشواسي پائي ان پينون تون نئه نمسڪار ڪئھ. اوٽ رون پريمي پايون ان پينون نئه مارا پاها ٿي هر هيڪ نئه نمسڪار ڪي پرو.

يهوداه را لکل کت رئي هزموتئي

کت لکيا واژو

اي کت يهو ۱۰ دکبو، جيو يعقوب رو پائي هتو (يهوداه ۱:۱). اي يهوداه ايسو رو مک شيلو نتو. بن ايسو رون پايون موئين تي هيک هتو (متي ۵۵:۱۳). يهوداه رو پائي يعقوب يروشلم شهر ري وشو. ي منڌري م هيک آگيوون هتو (مک شيلون را کوم ۱۳:۱۵). يهوداه اي کت اندازام ۶۵ع م کا تيا کيڙ لکيو.

کت کيون منکون هارو لکيو

ايٿا کت م کيا شهر کا صويا رو نوم نئي لکل جيا تي کبر پڙڻ جي يهوداه اي کت کيون منکون هارو لکيو. آپون نه روگي اتئي کبر سٺ جي او وشواسي هتا (يهوداه ۱:۱)، ان اوئون ري وشواسي منڌري م کئينک منک اول هتا جيا ايسو نه پريو نه مونتا ان ڀڳوون ره کلاڻ وين کوري واتون شيڪاڙتات ريا (يهوداه ۴:۱).

کت لکيا رو مطلب


يهوداه اي کت لکيو کم تو اوٿا نه کبر پڙڻ جي کراب منک وشواسي منڌري م اول سٺ جيا پوندو کوم کرئھ ان ايسو نه پريو نئي مونتا (يهوداه ۴:۱). ان پئيهون رئي لالچ کرين وشواسيون نه کوري واتون شيڪاڙئھ ريا (يهوداه ۱۱:۱). يهوداه وشواسيون نه ياد ڏيوراوئھ جي ڀڳوون ايون کراب منکون نه سزا ڏيشي (يهوداه ۱۵:۱)، ان اوئون نه کئھ جي او ايسو مانھ پکو وشواس راکتا ره ان ڏوھ کريا واژون نه هزماوئ (يهوداه ۲۰:۱-۲۳).

ايٿا کتاب را شاستر تي پيزا حوالا:

يهوداه ۱:۱	متي ۵۵:۱۳	يهوداه ۱۱:۱	استشنا ۲۳:۴-۵
يهوداه ۴:۱	يسعياه ۱۱:۱۳	يهوداه ۱۱:۱	گنتي ۱۶:۳۱
يهوداه ۵:۱	خروج ۱۲:۱-۱۴:۳۰	يهوداه ۱۱:۱	گنتي ۱۶:۱-۵۰
يهوداه ۵:۱	استشنا ۲۰:۱-۳۶	يهوداه ۱۴:۱	پيدائش ۵:۲۸-۱۴
يهوداه ۵:۱	استشنا ۱۴:۲-۱۵	يهوداه ۱۴:۱	۱ تواربخ ۱:۳-۳
يهوداه ۶:۱	۱ پطرس ۱۹:۳	يهوداه ۱۷:۱-۱۸	متي ۲۴:۱۱
يهوداه ۶:۱	۲ پطرس ۲:۴	يهوداه ۱۷:۱-۱۸	کوم ۲۰:۲۹-۳۰
يهوداه ۷:۱	پيدائش ۱۹:۱-۲۸	يهوداه ۱۷:۱-۱۸	۲ تيمتيس ۳:۱-۵
يهوداه ۱۱:۱	پيدائش ۳:۴-۸	يهوداه ۱۷:۱-۱۸	۲ پطرس ۳:۳
يهوداه ۱۱:۱	گنتي ۲۲:۴-۲۲	يهوداه ۱۷:۱-۱۸	۱ يوحنا ۴:۱

يهوداه

رو لكل كت



1 ① هُون لکيا وازو يهوداه سون، جيو ايسو کريست رو شيواداري سون، ان يعقوب رو پائي سون.

پريمي وشواسي پايون ان پينون، تمی جيون رو پگوون آپ ٿي واسطو رکايوه، جيون ٿي پگوون پاپ پريم راکڻه، ان جيون رٿي ايسو کريست همپار کرڻه، ② پگوون تمون مانھ گهڻي ڏيا کرڻه، تمون نٽه گهڻا هڪي راکڻه، ان تمارون منون ۾ گهڻو پريم ڏڻه!

پگوون کوزي واتون شيڪازيا وازون نٽه
هميش رٿي سزا ڏيشي

③ پريمي پايون ان پينون، مون نٽه گهڻو شونق هتو جي هُون تمون نٽه اونا تارڻ را پارام لکون، جيو تارڻ آپون نٽه پگوون ٿي زڙيوھ. پڻ مٿين اي ضروري هزميو

جي تمون نئه حونصلو ڏيڏا هارو لڪون جي تمڻي آڀرا وڍا ٿي ان ڪيڏا ٿي پوري ڪوشش ٿي ٿاڀيڻي ڏيو جي وشواس ري اصلي واتون هاسي سئه، جي واتون آڀون پڳوون رون سونڍل منڪون نئه هميش هارو ڏيڏل سئه. ④ هون ايٺا هارو لڪونه ريو، ڪم تو ڪئينڪ ايو منڪ آڀرا من ري واتون هٽاڙين وشواسي منڌڙي ۾ آيا ه را، جيا پڳوون رئه ڪلاڦ وئ. آڀو پڳوون اوئون مان ه ڪڙپا ڪرئ، پڻ هايا ٿي او ام هزمئ ه جي ”امون نئه پونڌائي ڪريا رو موقعو زڙيو ه،“ ان او ايسو ڪريست نئه نئي مونتا جيو آڀو هيڪئ ڏئي ان پڙيو سئه. هيون منڪون را پارام اڳلوڪا زمونا ٿي شاستر ۾ لڪل سئه جي اوئون نئه پڳوون را طرف ٿي سزا زڙشي.

⑤ تمون نئه تو ايئون ٻڌيون واتون رئي اڳي ڪهر سئه، توئي پڻ هون تمون نئه ياد ڏيوراون ه جي ايشور اڳي آڀري سونڍل قوم نئه مصر ملڪ ۾ ڳلومي ٿي سڏاوين پڇاوي ٿي، توئي پڻ تيا ڪيڙ اوئ آڀري هاڳي سونڍل قوم موئين ٿي اوئون منڪون نئه سزا ڏين ڪم ڪريا پرا جيا اوئا مان ه وشواس نه راکتا. ⑥ ان زتي آڪاشي ڏوتي پڳوون رئي ڏيڏل آڳيونئي ڪريا رئي زميوارئي ساڌين آڀري آڪاش ۾ ريا رئي جڳا ساڌي پڙي، پڳوون اوئون نئه همريئم سزا ڏيڏي ه، ان هميش هارو زوئئ اندارا گهش ۾ هونڪڙون ٿي پونڌين آڀرا سوجهر ٿي شيتي راکيا ه، زم نيا رئه ڏي اوئون نئه سزا ڏئ. ⑦ ان هاڳي نمونئ سڏوم، عموره، ان اوئون رئه آهئ پاهئ شهر، جيون را منڪ لوڦرائي ۾ لاڳيات پرا ان آڌمي آڌمي ٿي پونڌو ڪوم ڪرتا، پڳوون اوئون شهرون نئه همريئم سزا ڏين ٻاريا پرا، زم اوئون ٿي وات ساويي ڏيڪائ ه جي ڪراپ ڪومون را پڌلا ۾ پڙي پاهي ۾ هميش هوڏي سزا زڙشي.

⑧ هاڳي نمونئ هائي ڪراپ منڪ جيا وشواسي منڌڙي ۾ آيا ه را، او پڻ آڀرون شپنون ري ڪري آڀ نئه موتا هزمئ ه، ان پونڌو ڪوم ڪريا ٿي آڀ نئه ڪراپ ڪرئ پرا، او پڙيو ايسو ٿي اوڀرو ٿين اوئا رو ڪيڏو ڪئين نئي هزمئا،

ان مونَ واڙون آڪاشي دُوتون نئه گهٽ هزمينَ اُونون رئه ڪِلاڦ ٻولئه. ⑨ مونَ آڪاشي دُوت ميڪائيل آپ، زئيون اُو مُوسيٰ رو لاش ليڏا هارُو شيطونَ ٿي تڪرار ڪرتوت ريو، تئيون اُوئه آپ نئه ايوو مونَ نه هزميو جي اُو شيطونَ رئه ڪِلاڦ ٻولين آپ سزا ڏيڏا رو ڦينصلو ڪرئه. پڻ اُوئه رُوگو ام ڪيڏو: ”ايشور تارو ڏوه ڪاڏيه!“ ⑩ پڻ هائي ڪراپ منڪ، جيون پڻ واتون رئي هايون نئه ڪُپرتي، هائي اُونون رئه ڪِلاڦ ٻولئه. ان جي پڻ واتون هائي پي عقل زناورون را زم هزمئه، اُونون ڪراپ واتون ٿي آپ نئه ڪتم ڪرئه ريا.

⑪ ڏک سئه هايون هارُو، ڪم تو هائي منڪ ڦاڻن را زم ڏشمڻي راکيا را مارڳ مانه وُڍاه پرا، ان بلعام را زم لالچ هارُو ڪُوڙ ڪروا مڏيا، ان قورح را زم پڳوونَ رون آڳيوونون رئه ڪِلاڦ ٻولين پڳوونَ رئي سزا ڪاڏا واڙا ٿي ڳيا. ⑫ زئيون تمي پريم ٿي ٻڌائي پيڙا ٿين ڪاڻوه، تئيون هائي منڪ پڳوونَ ٿي پيڻايا وڳر تمون پيڙا ڪاڻه پيئه، ان هيوتُه نمونئه وشواسي منڌري ۾ نقصونَ ڪرئه، زم پوڻي ۾ هٿال پٿر پيڙيون رو نقصونَ ڪرئه. هائي پيڙون رو نئين پڻ رُوگو آڀرو ڪيال راکئه، زم ايوا ڌراڙ جيا مال نئه نٿي سارتا، پڻ رُوگو آڀرو پيٽ پريئه. هائي منڪ نالي واتون شيڪاڙين نالون واڏزون را زم نڪوما سئه، جيون ۾ پوڻي نٿي هوتو ان وائيو اُوڏاڙي زائ. هائي هاو ڪتم ٿيل وٿون را زم سئه جيون موئين ميوات ري موسم ۾ ڪئين ميوات نٿي، ان جيا پاڙون ٿي اُوڪڙل سئه، ڪم تو هائي منڪ ڪئين ناڻوڪا ڪوم نٿي ڪرتا ان هميش رو موت ڪاڏا واڙا سئه. ⑬ هائي منڪ سُمونڊ ريون چوليون را زم سئه. زم سُمونڊ ري چولي ڪيا را قَوضام نٿي ان ڪپ مانه ڪسرا ڦڳوڙئه، تم هائي منڪ ڪيا رئي وات نٿي مونتا ان ڪراپ ڪوم ڪرين آڀري پيڙئي ڪرئه. ان هائي منڪ ڪرل تارون را زم پڻ سئه. زم تارا ڪرين اُونسا ٿي پڙئه ان اندارو ٿي زائ، تم هايون منڪون نئه سوجهرو نه ڏيڏا ري ڪري سزا زڙشي ان هميش هُوڏي اندارا گهَش ۾ راکل هوشي.

⑭ هيوون منكون را پارام حنوك پڻ، جيو هاتمي پيڏي مانھ آدم رو پوترو هتو، پڳوون رو نياپو ڏين مور ٿي ڪيڏو تو:

”زوئو، پرڻو آپرون هزارون پوئتر ڏوتون پيڙو آوشي،
⑮ زم او ٻڌون منكون رو نيا ڪرئ،

ان ٻڌون پڳوون رڻه ڪلاڦ وُڍا واڙون منكون رو

هر ڪراپ ڪوم رو ڏوه ڪاڍئ

جيا اوئي پڳوون رڻه ڪلاڦ ڪرياه،

ان هر ڪراپ وات رو ڏوه ڪاڍئ

جي اوئي ڏوهاريئي پڳوون رڻه ڪلاڦ ڪريه.“

⑯ هائي منڪ هميش پڳوون رڻي ڳلا ڪرئ ان پڙون رڻه ڪلاڦ ٻولئھ، آپرون

ڪراپ ڪيالون مانھ وئھ، آپرئي وڏائي ڪرئ، ان آپرا ڦاڻيڏا هارو منكون را نالا

وڪوڻ ڪرئ ان اوئون ٿي نائوڪئ نمونئ ٻولئھ.

آپئڻ وِشواس ريون هاسيون واتون مانھ وينا ريوو

⑰ پڻ تمي، پريمي پايون ان بينون، تمي اي واتون ياڌ راکيا، جي آپڻا پرڻو

ايسو ڪريست ري مُڪ شيلي مور ٿي همپڙاويھ. ⑱ ڪم تو او تمون نئھ ام

ڪيتا ريا جي ڏنيا ري پڇاڙي ۾ ايوا منڪ آوشي جيا هاسيون واتون مانھ

نئولي ڪرشي، ان آپرون ڪراپ ڪيالون مانھ وين پڳوون رڻه ڪلاڦ وِشي.

⑲ هائي منڪ او را او سئھ جيا آپرئي پالڻئي ناوين وِشواسيون نئھ هڪا پڙا

ٿي ڌار ڪرئ، هائي روڳا آپرون ڪراپ ڪيالون مانھ وئھ، ان هايون ۾ پوئتر

آتما نٿي.

⑳ پڻ تمي، پريمي پايون ان بينون، آپرا پوئتر وِشواس مانھ وُڍا ٿي آپرئي

وِشواس راکيا رڻي هيئت وڌارو. پوئتر آتما ري مرضي پرموئھ پراڻا ڪرو.

㉑ ان پڳوون را پريم نئھ مت ساڏيا پڻ پڳوون ٿي پريم راکتا ريو، ان اوئا توتا

رئي واٽ زوتا ريو زئيون آپٽو پريو ايسو كريست آپون مانھ ڏٺيا ڪرين آپون
نٽھ هميش رو جيون ڏيشي.

22) جيا منڪ وشواس را پارام شڪ راکئھ، اوتون مانھ ڏٺيا ڪرين اوتون
نٽھ ھزماوو. 23) جيا ڏوهون ري ڪري هميش رئي سزا کاڌا واڙا سئھ، اوتون نٽھ
ھزماوين هميش ري پاھي ٿي پچاوو. ان جيا آپرا ڪراپ ڪيالون پرموتئھ پوندائي
ڪرئھ، اوتون مانھ ڏٺيا ڪرين اوتون نٽھ ھزماوو. پڻ جي ڪئين پڻ اوتون ري
پوندائي ري ڪري ڪراپ ٿيل سئھ اوتھ ٿي پاھو ڪرو، ان آپرا پارام پيئاتا ريو
متون تمي پڻ ھاڳي ڪراپ ڪومون ۾ ڦاٿي نہ زائو.

يهوداه پڳوون رو ٿورو مونئھ

24) پڳوون را وڪوڻ ٿئھ! او آپون نٽھ ھمپاڙين راڪي ھيڪئھ، زم آبي ڏوھ ڪريا
را آزمتا ۾ نہ پڙون، ان نيا رٽھ ڏي مون واڙا پڳوون رٽھ روپرو آبي الزوم ووٽا
ڪشي ٿي اوپي ھيڪون. 25) او ھيڪئھ پڳوون سئھ. او آپٽا پريو ايسو كريست
رٽھ ھيلئھ آپون نٽھ پچايا واڙو سئھ. ان اوتھ رو مون، شون، طاقت ان اڪتيارئي
شروع ٿي لين ھٽئي، ھمئئھ سئھ، ان هميش ھوڏي ريشي. آمين.

ايسُو را يوحنا نڌ ڏيکارڻ ڏرشن رڻي هزموتڻي

ڪتاب لکيا واڙو

يوحنا اي ڪتاب لکيو (ڏرشن 1:1، 4، 9، 8:22). زونا وڪت ٿي لين منڪ هزمتهه جي لکيا واڙو او هاڳي يوحنا سڌ، جيو ايسُو رو هيڪ مڪ شيلو هتو ان ايسُو رو پريمي شيلو هتو (لوقا 14:6). يوحنا اي ڪتاب لکيو زئون او ڏوڪرو هتو ان ايسُو را پارام همپزيا ري ڪري پتمس نومي بيت مانھ باروتا م هتو (ڏرشن 9:1). ايتا ڪتاب م وات ساوڻي سڌ جي اوتا وڪت م منڪ وشواسيون نڌ گهڻا تنگ ڪرنا تا (ڏرشن 13:2، 9:6). تيام گهڻا منڪ هزمتهه جي يوحنا رومي حڪومت را دوميتيان نومي پادشا را راز م، اندازام 95ع م، اي ڪتاب لکيو.

ڪتاب ڪيون منڪون هارو لکيو

يوحنا اي ڪتاب آسبه صويا ربون هات وشواسي منڌڙيون هارو لکيو (ڏرشن 11:1). آسبه صوپو رومي حڪومت هيڪ هيڪ صوپو هتو. اوتا وڪت م رومي حڪومت رو پادشا گهڻون ملڪون نڌ آيري حڪومت را صويا ڪرين اوئون مانھ راز ڪرتو، ان آب نڌ ٻڌون رو ڏئي ان پريو ڪيوراوتو. آسبه صويا م منڪ رومي پادشا رڻي پوزا پڻ ڪرنا، ان پرگمن شهر اوتا ري پوزا رو مرڪز هتو، تيام ايسُو ڪنھ جي هيا شهر م شيطون رڻي گهاڙي سڌ (ڏرشن 13:2). تيام رومي حڪومت ان پيزا منڪ آسبه صويا رون وشواسيون نڌ گهڻا تنگ ڪرنا، ڪم تو او ايسُو نڌ آيرو ڏئي ان پريو مونين رومي پادشا رڻي پوزا ڪريا رو نا پاڙتا.

ڪتاب لکيا رو مطلب

يوحنا اي ڪتاب لکيو ڪم تو ايسُو اوتا نڌ لکيا رو ڪيڏو (ڏرشن 11:1، 19). ايسُو اي ڪتاب تيام لکايو، زم آسبه صويا رون وشواسيون نڌ هزماوڻ ان حوصلو ڏڻ جي او ڏورون ڏيئون م وشواس نڌ ساڌڻ نڪو ڪوڙيون واتون مانھ وڻ، پڻ پڪو وشواس راکتا رڻ، تو اوئون نڌ هميش رو جيون رڙشي (ڏرشن 1:2-22:3). اوتا وڪت م منڪ وشواسيون نڌ ابوا تنگ ڪرنا جي وشواسيون نڌ ام لاڳيو هوشي جي شيطون ڪنھ ريو ان پڳون هارڻه ريو. تيام ايسُو ڏرشن ڏين ان نيشون ڏيکارين اي پڻ شيڪاريو، جي ڪراب دنيا مانھ گهڻي آفتون اوشي، ان شيطون حڪومتون ٿي، ڌرمون ٿي ان منڪون ٿي وشواسيون رڻ ڪلاڻ گهڻو ڪئين ڪراوشي، پڻ نيٺ پڳون هايون ٻڌون نڌ هميش رڻي سزا ڏيڻي. تيام وشواسيون رڻ مريا هارو پڻ تيار ربو ان موت ري پيڪ م وشواس نڌ ساڌو، ڪم تو پڳون اوئون نڌ تارڻ ڏيڏا هارو پڇاوين راکياه، ان پلڻ او مراڻي زاء، توتي پڻ آکر م اوئون نڌ آڪاش م هميش هوڏي هڪ ٿي هڪ رڙشي.

اینا کتاب را شاستر تي پيزا حوالا:

دُرشن 17:2 خُروج 31-1:16	دُرشن 1:1 متي 22-21:4
دُرشن 17:2 یوحنا 51-49:6	دُرشن 1:1 متي 2-1:10
دُرشن 17:2 یسعياه 2:62	دُرشن 4:1 دُرشن 11:1
دُرشن 18:2 کوم 14:16	دُرشن 7:1 داني ایل 13:7
دُرشن 18:2 دُرشن 15-14:1	دُرشن 7:1 یوحنا 37, 34:19
دُرشن 20:2 1 سلاطين 31:16	دُرشن 7:1 زکریاه 10:12
دُرشن 20:2 1 سلاطين 2:19-1:18	دُرشن 11:1 دُرشن 4:1
دُرشن 20:2 1 سلاطين 26-1:21	دُرشن 12:1 دُرشن 20:1
دُرشن 20:2 2 سلاطين 37-6:9	دُرشن 13:1 داني ایل 13:7
دُرشن 27:2 زبور 9:2	دُرشن 16:1 دُرشن 20:1
دُرشن 1:3 دُرشن 4:1	دُرشن 16:1 دُرشن 21, 15:19
دُرشن 1:3 دُرشن 20, 16:1	دُرشن 1:2 کوم 21-19:18
دُرشن 4:3 زکریاه 4-3:3	دُرشن 1:2 کوم 26-24:18
دُرشن 5:3 خُروج 33:32	دُرشن 1:2 کوم 1:20-1:19
دُرشن 5:3 زبور 28-27:69	دُرشن 1:2 افسیون 1:1
دُرشن 5:3 داني ایل 1:12	دُرشن 1:2 1 تیمتیس 3:1
دُرشن 7:3 دُرشن 18:1	دُرشن 1:2 دُرشن 16, 13:1
دُرشن 14:3 کُلسیون 1:2	دُرشن 1:2 دُرشن 20:1
دُرشن 14:3 کُلسیون 16-13:4	دُرشن 2:2 کوم 31-29:20
دُرشن 14:3 دُرشن 5:1	دُرشن 4:2 افسیون 16-15:1
دُرشن 18:3 1 پطرس 7:1	دُرشن 5:2 دُرشن 20:1
دُرشن 18:3 زکریاه 4-3:3	دُرشن 7:2 پیدایش 9:2
دُرشن 19:3 امثال 12:3	دُرشن 7:2 پیدایش 24-22:3
دُرشن 21:3 متي 28:19	دُرشن 7:2 دُرشن 14, 2:22
دُرشن 1:4 دُرشن 10:1	دُرشن 8:2 دُرشن 18-17:1
دُرشن 2:4 یسعياه 1:6	دُرشن 11:2 دُرشن 14:20
دُرشن 3-2:4 حزقي ایل 28-26:1	دُرشن 12:2 دُرشن 16:1
دُرشن 5:4 زکریاه 2:4	دُرشن 14:2 گنتي 3-1:25
دُرشن 8-6:4 یسعياه 3-2:6	دُرشن 14:2 گنتي 16:31

دُرشن 15:11 زُبور 13:145	دُرشن 5:5 پيدائش 10-9:49
دُرشن 15:11 داني ايل 44:2	دُرشن 5:5 يسهياه 10-1:11
دُرشن 15:11 داني ايل 14-13:7	دُرشن 5:5 متي 3:1, 6, 16
دُرشن 18-17:11 زُبور 6-1:2	دُرشن 6:5 يسهياه 7:53
دُرشن 19:11 خُروج 22-10:25	دُرشن 6:5 يوحنا 29:1
دُرشن 19:11 خُروج 9-1:37	دُرشن 11:6 زكرياه 4-3:3
دُرشن 3:12 دُرشن 9:12	دُرشن 17:6 صفيياه 18-14:1
دُرشن 5:12 زُبور 9, 7:2	دُرشن 3:7 حزقي ايل 4:9
دُرشن 5:12 لُوقا 33-31:1	دُرشن 8-5:7 1 تواربخ 2-1:2
دُرشن 5:12 لُوقا 51:24	دُرشن 8-5:7 قُضات 31-30:18
دُرشن 7:12 داني ايل 1:12	دُرشن 6:7 پيدائش 51:41
دُرشن 9:12 پيدائش 15-1:3	دُرشن 9:7 زكرياه 4-3:3
دُرشن 14:12 خُروج 5-4:19	دُرشن 14:7 متي 14-9:24
دُرشن 4-1:13 دُرشن 7:11	دُرشن 14:7 زكرياه 4-3:3
دُرشن 4-1:13 دُرشن 3:17, 14-8	دُرشن 4:9 دُرشن 3:7
دُرشن 8:13 دُرشن 5:3	دُرشن 14:9 پيدائش 14:2
دُرشن 11:13 متي 15:7	دُرشن 6:10 پيدائش 1:2-1:1
دُرشن 11:13 متي 24:24	دُرشن 6:10 دُرشن 11-9:6
دُرشن 1:14 دُرشن 9-4:7	دُرشن 7:10 دُرشن 18-15:11
دُرشن 8:14 دُرشن 10-8:11	دُرشن 7:10 زُبور 20:145
دُرشن 8:14 يرمياه 10-6:51	دُرشن 7:10 داني ايل 44:2
دُرشن 10:14 زُبور 8-7:75	دُرشن 7:10 داني ايل 14-13:7
دُرشن 10:14 يرمياه 31-15:25	دُرشن 2:11 داني ايل 25:7
دُرشن 14:14 دُرشن 13:1	دُرشن 2:11 لُوقا 24:21
دُرشن 14:14 داني ايل 14-13:7	دُرشن 4-3:11 زكرياه 14-11, 3:4
دُرشن 15:14 متي 30-24:13	دُرشن 7:11 دُرشن 4-1:13
دُرشن 15:14 متي 43-36:13	دُرشن 7:11 دُرشن 14-8, 3:17
دُرشن 15:14 متي 12:3	دُرشن 8:11 دُرشن 4:19-19:16
دُرشن 18:14 يُو ايل 13:3	دُرشن 8:11 پيدائش 28-1:19
دُرشن 3:15 خُروج 18-1:15	دُرشن 8:11 خُروج 22-8:1
دُرشن 5:15 خُروج 19:27-8:25	دُرشن 8:11 لُوقا 46-26:23

ڏرشن 6:20 ڏرشن 14:20	ڏرشن 5:15 خُروج 31:38-8:36
ڏرشن 8:20 حِزقي ايل 1:38-6:39	ڏرشن 12:16 ڏرشن 14:9
ڏرشن 12-11:20 داني ايل 7-10	ڏرشن 12:16 پيدائش 14:2
ڏرشن 12:20, 15 ڏرشن 5:3	ڏرشن 12:16 يسعياہ 15:11
ڏرشن 13-12:21 حِزقي ايل 35-30:48	ڏرشن 19:16 ڏرشن 8:11
ڏرشن 21-18:21 يسعياہ 12-11:54	ڏرشن 19:16 زبور 8-7:75
ڏرشن 23:21 يسعياہ 20-19:60	ڏرشن 19:16 یرمياہ 31-15:25
ڏرشن 24:21 يسعياہ 5-3:60	ڏرشن 2:17 یرمياہ 7:51
ڏرشن 27:21 ڏرشن 5:3	ڏرشن 3:17 ڏرشن 7:11
ڏرشن 1:22 يوحنا 10:4, 14	ڏرشن 3:17 ڏرشن 4-1:13
ڏرشن 2-1:22 حِزقي ايل 12-1:47	ڏرشن 8:17 ڏرشن 5:3
ڏرشن 2:22 پيدائش 9:2	ڏرشن 2:18 يسعياہ 22-19:13
ڏرشن 2:22 پيدائش 24-22:3	ڏرشن 3-2:18 یرمياہ 8-7:51
ڏرشن 3:22 پيدائش 19-14:3	ڏرشن 8-4:18 یرمياہ 58-45:51
ڏرشن 4:22 مٽي 8:5	ڏرشن 13:19 يسعياہ 3-2:63
ڏرشن 5:22 يسعياہ 20-19:60	ڏرشن 13:19 يوحنا 1:1, 14
ڏرشن 5:22 داني ايل 18:7, 27	ڏرشن 15:19 ڏرشن 16:1
ڏرشن 16:22 گِنٽي 17:24	ڏرشن 15:19 زبور 9:2
ڏرشن 18:22 ڏرشن 21:16-6:15	ڏرشن 17:19 حِزقي ايل 21-17:39
ڏرشن 19:22 ڏرشن 5:22-2:21	ڏرشن 2:20 پيدائش 15-1:3
	ڏرشن 4:20 مٽي 28:19

ڏرشن را مِثال

زعيون پريو ايسو يوحنا نه اي ڏرشن ڏيڏو، تعيون اوڻو يوحنا نه شينا جيوي واتون ان نيشون ڏيڪاريا، جيون رو مطلب آيون هارو ڪئينڪ اونڌو سڏ. ڪيونڪ واتون رو مطلب ايتا ڪتاب مر هزماول سڏ (ڏرشن 20:1, 4:5, 5:4, 6:5, 8:5, 7:14-13, 9:18, 8:19, 20:2). پيري ڪئينڪ واتون سڏ. جي ايتا ڪتاب مر هزماول نٿي، پڻ اوڻا وڪٽ مر اوڻ رون منڪون هارو هزماير هوري هتي، ڪم تو اڳي شاستر مر لڪل هتي ڪا هومر هومي هتي. گهڻي واتون زوڻي ڪرين ڊونڪل سڏ. ڪم تو گهڻي ايوي واتون لڪل سڏ جي رومي حڪومت رڻ ڪلاڦ ان رومي پادشا رڻي پوزا ڪريا رڻ ڪلاڦ سڏ. هيوي واتون ساوڻ ڊازڻ لڪل هوڻ، تو وشواسيون هارو گهڻو ڪنرو ٿئڻ.

نیشون

مطلب

شاستر را حوالا

منګون را نیشون

ډرشن 2:4, یسعیاہ 1:6	پېګوون	ګهاډي مانه پينا واړو
ډرشن 13:1, 14:14, داني ايل 13:7-14, لوقا 24:5	ايسو	منک ذات را ډيکرا جيوو کوک
ډرشن 11:19	ايسو	دوړا ګهوړا مانه سړيا واړو
ډرشن 16:22, متي 1:1, لوقا 31:1, 33-31	ايسو	داتود پادشا ري پيدې رو وستار
ډرشن 2-1:12, یسعیاہ 1:54, ګلتيون 27-26:4	اسرائيلي قوم م وشواس راکيا واړون رښي منډرځي	پاري پېګ ډوشي
ډرشن 5-4:12, پيدايش 15:3	ايسو	ډوشي رو بار
ډرشن 17:12, یسعیاہ 1:54, ګلتيون 27-26:4	بدائي وشوابي	ډوشي را پيزا بار
ډرشن 14-13:7, زکرياہ 4-3:3	پکا وشواسي	دوړا لوګهزا پيرل منک
ډرشن 2:21, افسيون 27:5, ډرشن 1:17	پورځي وشواسي منډرځي کراپ ډنيا	لاډي پونډي ډوشي

زناوړون را نیشون

ډرشن 6:5, یوحنا 29:1	ايسو	پېګوون را نوم مانه ساړل ګهيتو
ډرشن 7:19, 9:19, 2:21, 9:21	وشواسيون رښ تارن لين ايسو پيزو ريوو	ګهيتا ان لاډي رو وپوا
ډرشن 14:22, 14:7	ايسو را موت ري کري ماځي ليوو	ګهيتا را لوځي م ګهنگها ډووو
ډرشن 8-6:4, جزقي ايل 14-5:1	بدون ځي موتا ډوت	چار جيو

دُرشن 3:12, 9:12, 2:20,
پيدايښ 15-1:3

شيطونَ

پورنگ ناگ، زونا وکت رو هاپ

دُرشن 7:11, 1:13, 3:17

پښوونَ رښۀ کِلَاف
حکومت

جهنگلي زناوَر

دُرشن 11:13, 13:16

پښوونَ رښۀ کِلَاف دَرم

گهښتا جيوو زناوَر،
جيو کُوَر هاکلينَ آپ نښه
پښوونَ رو نياپو ډيډا واڙو کښه

شينهون را نيشون

دُرشن 16:22, گڼتي 17:24

ايسو

پروڙيو تارو

دُرشن 20:1

هات آکاشي دُوت

هات تارا

دُرشن 5:4, لُوقا 16:3,

پويتِر آتما

هات بڙتا ډيو

مک شيلون را کوم 4-3:2

دُرشن 20:1, 5:2

هات وشواسي منډڙي

ډيوو ميليا ري
هات هيم ري شينهون

دُرشن 4-3:11,

ايسو رښي هاک پريا واڙا،

زيتون را وډ،

زکرياه 3:4, 14-11

وشواسي دَرم ان
وشواسي حکومت

ډيوو ميليا ري شينهون

دُرشن 2:10

پويتِر شاستر،

ننکو کِتاب

پښوونَ رو وچن

دُرشن 1:11, 1 کُرنثيون
16:3, افسيون 21:2

پورځي وشواسي منډڙي

پښوونَ رو گهر

دُرشن 2:21, عبرانيون 22:12

آکاش

پويتِر شهر، نوو ټيل يروشلم شهر

دُرشن 8:11, 18:17

کراپ دُنيا

موتو شهر

دُرشن 8:11

کراپ دُنيا

سدوم شهر، مصر ملک

دُرشن 5:17

کراپ دُنيا

بابل شهر

دُرشن 9:17

رُوم شهر، کراپ دُنيا

هانون دُونگرون مانه شهر

نمپرون را نيشون

دُرشن 1:16, 1:15, 2:8, 5:4

بوتير نمپر

هات

بدو

هات

دُرشن 1:5

بدوئي پنډ كرل

هات نپون ټي موهر پنډ كرل

دُرشن 6:5

بدئي طاقت

هات شينگزا

دُرشن 6:5

بدوئي كعين زوئښ

هات اونكيون

دُرشن 3:12

پڌيل راز كرښ

هات ماټا ان هات تاج

گهڻا

ڏه

دُرشن 10:2

گهڻا ڏي، پڻ هميش نئين

ڏه ڏي

دُرشن 3:12

گهڻي طاقت

ڏه شينگزا

دُرشن 1:13

گهڻي طاقت ان گهڻو راز

ڏه شينگزا ان ڏه تاج

دُرشن 9-4:7

دُنيا ري بدتي قومون

بارئ اسرائيلې ذاتون

دُرشن 9-5:7

پگوون را بدائي سونډل

بارئ هزار

منک

دُرشن 1:14, 9-4:7

دُنيا ربون بدتون قومون

هيك لك چوتاليه هزار

رؤميون 8-6:9

موئين ټي پگوون را

بدائي سونډل منک

دُرشن 4:4

موتا آکاشي دوت

چوويه اگيوون

دُرشن 18:13

هاو پونډو، بوتير نئين

سو هو چياهن، 666

(هات هو ستر، 777، رو مطلب سئ "بوترون م بوتير" دُرشن 8:4)

دُرشن 6:12, 3:11

پگوون رو راکل توټو،

هيك هزار بي هو هائيت ڏي،

دُرشن 2:11

جيا توټا هوڏي شيطون

پيتاليه مينا،

دُرشن 14:12

پگوون رون سونډل

هادا ترځ سال،

داني ايل 7:12, 25:7

منکون نئ تنگ کرشي

هيك زمونو، بي زمونا ان اڌ زمونو

ايسو رو يوحنا نئه ديكارل درشن



پتس نومي پيت

1 ① ايتا ڪتاب ۾ اُو واتون لڪل سٺه جي ايسو ڪريست درشن دين ساوي
 ڏيکارڻهه. هائي واتون ايسو نئه پڳوون را پاها ٿي زڙي زم اُو آپرون
 شيواڌاريون نئه ساوي ڏيکارڻهه، جي ڪي ڪي واتون ضرور جلدي ۾ ٿيسي.
 هائي واتون ايسو آپرا آڪاشي دوت نئه ميلين مون آپرا شيواڌاري يوحنا نئه
 نيشونون ٿي ساوي ڏيکارڻي. ② ان پڳوون را وچن ان ايسو ڪريست را پارام
 زتي واتون مئين ڏيکيه، اوئون ٻڌيون واتون را پارام هون هاڪ پرونه.
 ③ پاڳواڙو اُو سٺه جي پڳوون را ايتا نياپا ري واتون پئين همپڙاوئنه، ان
 پاڳواڙا اُو سٺه جي اي واتون هومپڙهه، ان ايتا نياپا ريون لڪل واتون مانه وئنه.
 ڪم تو ايسو رئه پاسا آيا رو توئو ڏوڪڙو سٺه.

يُوحنا وشواسيون نٺ نمسڪار ڪٺ ان ايسو رو ٿورو مونٺھ

④ ھون لکيا وازو يوحنا آپرا پاھا ٿي آسيه صوپا ريون ھاٿ رِشواسي منڌزون
رون منڪون نٺ نمسڪار ڪونھ.

پڳوون، جيو جيوتو سٺ، جيو شروع ۾ ھتو، ان جيو ھميش ھوڏي : یشي، اُو
تمون مانھ ڪرپا ڪرئ ان تمون نٺ ھڪي راکٺ.

ان پويتر آتما، جيو پڳوون رو ڪيڏو پورو ڪريا ھارو اوتا ري گھاڏي ھومو
ھوئھ، اُو تمون مانھ ڪرپا ڪرئ ان تمون نٺ ھڪي راکٺ.

⑤ ان ايسو ڪريست، جيو ھاسو ھاڪ پريا وازو سٺ، ان مرلون موئين ٿي
پيرھيون جيوي اونيا وازو سٺ، ان دنيا رون پاڌشائون مانھ پڻ راز ڪريا وازو
سٺ، اُو تمون مانھ ڪرپا ڪرئ ان تمون نٺ ھڪي راکٺ.

ايسو را وڪوڻ ٿئ! اُو آپون ٿي پريم ڪرئھ ان اوتھ پڳوون را نوم مانھ آپرو
جيو ڏين آپرا لوئي ٿي آپون نٺ آپتون ڏوهون ٿي آزاد ڪراياھ. ⑥ ان آپون نٺ
پڳوون را راز را منڪ ناياه ان آپرا ٻاپ پڳوون رئي شيوا ڪريا ھارو پوزاري
ناياھ. اوتا را وڪوڻ ان ڪڙا ھميش ھوڏي ٿيتي رئ! آمين.

⑦ زوئو، اُو واڌزون پيڙو آيا وازو سٺ،

ان ھر ھيڪ منڪ اوتا نٺ اونڪيئي پاڙشي.

اُو منڪ پڻ پاڙشي جيئي اوتا نٺ وينڌيوھ،

ان دنيا ريون ٻڌيون قومون را منڪ

اوتا ري ڪري ڏکي ٿين روشي.


ھم ٿيشي ان پلئھ ھم ٿئ! آمين.

⑧ پريو پرميشور ام ڪئھ: ”ھون پيرھيون ان آڪري سون، ھون جيوتو سون،

ھون شروع ۾ ھتو، ان ھون ھميش ھوڏي ريھ. ھون ٻڌون رو ڏئي سون.“

ايسُو زبکتا سوجھرا ۾ يوحنا نٺ ڏرشن ڏٺھ


⑨ ھُن يُوحنّا، تمارو ڀائي، جيو ايسُو ٿي واسطو راکيا ري تمارا زم تڪڀيل وينونھ، پڳوونَ را راز رو سون ان ڏوروڻ صير ٿي سھونھ، ھُن پتمُس نومي ٻيٽ مانھ ٻاروڻا ۾ ھتو، ڪم تو ھُن پڳوونَ رو وچن ان ايسُو رئي ڀرل ھاڪ مونونھ. ⑩ آچار رٺ ڏي ڀرڻو را ڏي مانھ، مارو پورو ڏيون پويتر آتما ري ڪڙا ٿي پڳوونَ ريون واتون ھومو تٽال ھتو. تڏيون مٿين آپ وونھڙ رڻ شينگڙا را آواز جيوو موٽو ھاڏ ھومڙيو. ⑪ ھاڏ ام ھومڙيام آيو: ”جي ڪئين تُون زوئھ، اُو تُون ھيڪا ڪاڳڙ مانھ لکين ايئون ھاٽ وشواسي منڌريون نٺ ميل. افسُس شھر ري منڌري نٺ، سمرنھ شھر ري منڌري نٺ، پرگمن شھر ري منڌري نٺ، ٿوٽا تيرھ شھر ري منڌري نٺ، سرديس شھر ري منڌري نٺ، فلڊلفيه شھر ري منڌري نٺ، ان لوديڪيه شھر ري منڌري نٺ ميل.“ ⑫ تڏيون ھُن وونھڙ زويا ھارو پاسو ڦريو جي مُون ٿي ٻوليا وارو ڪوڻ سٺ. ان ڦرين مٿين ڏيوا ميليا ري ھاٽ ھيم ري شينھون پاڙي جيون مانھ ھيڪوڪو ھيڪوڪو ڏيوو ميلل ھتو. ⑬ ان ڏيوا ميليا ريون شينھون وسا مٿين ھيڪا زڻا نٺ پاڙيو جيو منڪ ذات را ڏيڪرا جيوو ھتو. اُوٽا رٺ پڳون ھوڏي گھنگھو پيرل ھتو، ان اُوٽا را ھيٺا مانھ



هيم رو لُوگهڙو ٻوندل هتو. ⑭ اُوئا را ماٿا را مٿوئاڙ ڌوڙا شيتر هتا، ان اُوئا ري اونڪيون ڏيوئا ري زهراڙ جيوي هتي. ⑮ ان اُوئا را پڳ ڌمڻ ٿي تپاول پيتو را زم هتا. ان اُوئا رو هاڏ گهوگهاٿ ڪرتا پوٽي را پور جيوو هتو. ⑯ اُوئا را زمٿا هاٿ ۾ هات تارا هتا. ان اُوئا را مونڊا موئين ٿي ٻي ڌارئي تڪئي تروئاڙ نيهرتئي ٿي. اُوئا رو مونڊو ايوو زبڪتو تو جيوو ڏي آڀري پوري تيجي زبڪتو هوئ.

⑰ اُوئا نئه زوئين هون مرل را زم اُوئا ري پڳي پڙيو هئو. تئين اوئه آڀرو زمٿو هاٿ مون نئه سٻاڙيو ان ڪيڏو: ”پيئا مت، هون پيرهئون ان آڀري سون. ⑱ هون جيوتو سون. هون مري تو گيو تو، پڻ هوئه هون جيوتو سون ان هميش هوڏي جيوتو ريھ. موت ان مرلون را جڳت ري ڪونسي مون ڪن سئه ان مون نئه موت را قوضا ٿي ان مرلون را جڳت موئين ٿي منڪون نئه سڏايا رئي اڪتياڙي سئه.

⑲ تيام تون اي واتون لک جي تئين زوئيه، همٿوڪي واتون ان



تيا ڪيڙ ٿيا واري واتون. ⑳ جيا هاٿ تارا تئين مارا زمٿا هاٿ ۾ ڏيڪياھ ان جي ڏيوئا ميليا ري هاٿ هيم ري شينھون سئه، هايون رو اونڌو مطلب اي سئه: هاٿ تارا، هاٿ وشواسي منڌريون رئي همپاڙ ڪريا واڙا آڪاشي ڏوت سئه. ان ڏيوئا ميليا ري هاٿ شينھون، هاٿ وشواسي منڌري سئه.

ايسٽو افسس شهر ري وشواسي منڌري نٺ نياپو ڏٺھ


2 ① ”ايسس ري وشواسي منڌري ھارو، اوتا را نياپو ڏيڏا واڙا ڏوت ھات، اي نياپو لکي ميل:

جيا ري زمڻي ھاڻي ھات تارا سٺ، جيو ڏيو ميليا ري ھات ھيم ري شينھون وسا وٺ، او ام ڪٺ: ② مون نٺ تو ڪبر سٺ جي تمي ڪيو نائوڪا ڪوم ڪروھ، ڪيوئي مينت ڪروھ ان ڪيو صير ٿي ڏورو سھوھ. ان مون نٺ اي پڻ ڪبر سٺ جي تمي ڪراپ منڪون نٺ نٿي سھي ھڪتا، ان جيا منڪ آپ نٺ مڪ شिला ڪٺ ريا پڻ ھاس ۾ او مڪ شिला نٿي، اوئون را تمي آزمتا ليڏا ان تمي زويو جي او ڪوڙا سٺ. ③ تمي ڏورو صير ٿي سھوھ ان ماري ڪري تمي ٻڌوئي ڪئين ويٺيوھ، ان تمي ھيمت نه ھارئي.

④ توئي پڻ مارٺ تمارٺ ڪلاڦ اي ڪيوھ: جيوو پريم تمي شروع ۾ راکتا، ايوو پريم تمي ھمٺ نٿي راکتا. ⑤ تيام ھمپارو، جي تمي اڳي ڪيوو گھڻو پريم راکتا ان ھمٺ تمي ڪتو گھٽ پريم راکوھ. توھونھ ڪرو ان ايوو ڪوم ڪرو جيوو تمي شروع ۾ ڪرتا. جي تمي توھونھ نئين ڪرو، توھونھ تمون ڪن آويھ ان تمارئي ڏيوو ميليا رئي شينھ آڀرا ماڳ ٿي ڪاڍي ليھ ان تمارئي وشواسي منڌري ڪتم ڪريھ پري. ⑥ پڻ تمون ۾ اي وات نائوڪي سٺ، جي جيا ڪوم نيڪلي ڌرم ري پالتي را منڪ ڪرٺ، اوئون ڪومون نٺ تمي ڪراپ ھڙموھ، زم ھون ڪراپ ھڙموھ.

⑦ ھومپريا واڙون، تمي ايئا وات مانھ ڏيون ڏيو جي پويتر آتما وشواسي منڌريون نٺ ڪي ڪٺ.


جيو اڏڳ وشواس راکين پونڌائي مانھ جيت ڪرٺ، اوتا نٺ ھون اي حق ڏيھ جي او ھميش رو جيون ڏيڏا واڙا وڻ ٿي ميوا ڪاٺ، جيو وڻ پڳوون را آڪاشي ٻاگھ ۾ سٺ.



ايسټو سمرنه شهر ري وشواسي منڌري ننه نياپو ڏٺه

⑧ "سمرنه ري وشواسي منڌري هارو، اوتا را نياپو ڏيڏا واڙا ڏوت هات، اي نياپو لکي ميل:

جيو پيرهون ان آکري سٺه، جيو مريو تو ان همٺه جيوتو ٿيوه، او ام ڪٺه:
 ⑨ مون ننه تو کبر سٺه تمون مانه ڪٽئي تڪليب ٿه رئي ان تمي هاو گريپ سو. توي پڻ پگيون ريون ميرپونيون ري ڪري تمي ڪتا گهٽا پاگواڙا سو. ان مون ننه اي پڻ کبر سٺه جي يهودي قوم واڙا تمارئي ڪيوي ڳلا ڪرڻ ريا. او ذات پرموٺه يهودي ٿين آپ ننه پگيون ري سونيل قوم را تو ڪٺه ريا، پڻ او پگيون را سونيل منک نٿي. او پگيون را مندر موئين پگهتي تو ڪرڻ، پڻ شيوا شيطون رئي ڪرڻ. ⑩ تمارنه تو الاهي گهٽو ڏک سهوو پڙشي، پڻ




ايٺا ٿي تمي مت پٽايا. زوٽو، شيطون تمون موئين ٿي ڪيونڪ ننه جيل موئين پوراوشي زم تمارا وشواس رو آزمتو ٿه، ان تمون مانه ڏهون ڏيئون هوڏي تڪپيل ٿيئي ريشي. تمي موت هوڏي وشواس مانه اڏڳ ريو، تو هون تمون ننه انصاف ۾ هميش رو جيون ڏيه.

⑪ ھومپڙيا واڙون، تمی ایٺا وات مانھ ڏيون ڏيو جي پوٽر آتما وشواسي منڌڙيون نٺ ڪي ڪڻھ.

جيو اڌڳ وشواس راڪين پوندائي مانھ جيت ڪرڻھ، اُو هميش را موت ٿي ٻڃي زاشي، ان اوٺا نٺ ڪئين نقصون نئين ٿئھ.

ايسنو پرگمن شهر ري وشواسي منڌڙي نٺ نياپو ڏئھ

⑫ ”پرگمن ري وشواسي منڌڙي ھارو، اوٺا را نياپو ڏيڏا واڙا ڏوت ھات، اي نياپو لڪي ميل:



جيا ڪن ٻي ڌارئي ٽڪئي تروٺار سئھ، اُو ام ڪڻھ: ⑬ مون نٺ تو ڪٻر سئھ جي تمی ڪيٺھ ٻيٺھ. تمی اوٺھ ٻيٺھ جيٺھ شيطون آڀري گھاڏي مانھ راز ڪرڻھ. توئي پڻ تمی مارو نوم ليتا ريوھ ان تمی مون مانھ وشواس نہ ساڏيو. زئون انتپاس، جيو پڪو وشواس راڪين مارئي ھاڪ ڀرتو، تمارا شهر موئين مروٽو جيٺھ شيطون آڀري گھاڏي مانھ ٻيٺھ، تئيون پڻ تمی مون مانھ وشواس نہ ساڏيو.

⑭ توئي پڻ مارئھ تمارئھ ڪلاڦ ڪئينڪ واتون ڪيووھ: تمون موئين ايوا منڪ سئھ جيا بلعام ريون شيڪاڙل جيويون واتون مانھ وئھ. اوٺھ منڪ بلق پاڏشا نٺ ڏش ڏيڏو جي ڪم ڪرين

اسرائيلي قوم نٺ ڦيروين اوئون ٿي پڳوون رو ڏوھ ڪراوئھ. ان هيوئھ نمونئھ اُو ڏيوئونون ري پوزا ۾ ڏيوئونون را نوم مانھ ساڙل مونھ کاوا مڌيا ان پوندو ڪوم ڪروا مڌيا. ⑮ ان ھمرام تمون موئين ايوا منڪ سئھ، جيا نيڪلي ڌرم ري پالتي ريون شيڪاڙل ڪراپ واتون مانھ وئھ. ⑯ تيام تمی آڀرا ايٺا ڏوھ ٿي توپونھ ڪرو، نڪا ھون جلدتي تمون ڪن آوين مارا وڃن ٿي ٽڪي تروٺار را زم اوئون منڪون رو مقابلو ڪريھ.

①7 ھومپڙيا واڙون، تمڀي اينڙا وات مانھ ڏيون ڏيو جي پڙيتر آتما وشواسي منڌڙيون نئھ ڪئھ.

جيو اڌڳ وشواس راڪين پونڌائي مانھ جيت ڪرئھ، اوتا نئھ ھون ايوئي منا نومي روئي ڏيھ، جي آڪاش ۾ ھٿال سئھ ان جيا ٿي ھميش رو جيون زڙئھ. ان اوتا نئھ آڪاش ۾ زيا ھارو ڌوڙو پوٿو پڻ ڏيھ جيا مانھ نوو نوم لڪل ھوشي، جيا نوم رئي ڪبر، پوٿو ليڌا واڙا منڪ شوا، پڙا ڪيا منڪ نئھ ٿئي.

ايسنو ٿوئاتيڙھ شھر ري وشواسي منڌڙي نئھ نياپو ڏئھ

①8 ”ٿوئاتيڙھ ري وشواسي منڌڙي ھارو، اوتا را نياپو ڏيڌا واڙا ڌوت ھات، اي نياپو لڪي ميل:

پڳوون رو ڏيڪرو جيا ري اونڪيون ڏيوتا ري زھراڙ جيوي سئھ ان جيا را پڳ ڌمڻ ٿي تپاول پيتر را زم سئھ، او ام ڪئھ: ①9 مون نئھ تو ڪبر سئھ جي تمڀي ڪيا ناٿوڪا ڪوم ڪروھ، ڪيو پريم راڪوھ، ڪيو وشواس راڪوھ، ڪيوئي شيوا ڪروھ، ان ڪيا صير ٿي ڌوروڻ سھوھ. ان مون نئھ اي پڻ ڪبر سئھ جي تمڀي ھمئھ اڳي ٿي گھڻو ڪئين ڪروھ ريا.

②0 توئي پڻ مارئھ تمارئھ ڪلاڦ اي ڪيوھ: تمڀي اوتا ڏوشي نئھ منڌڙي ٿي ھارئي نئي ڪاڍتا، جيئي آپ نئھ پڳوون رو نياپو ڏيڌا واڙي ڪئھ، پڻ او ايزبل روئي جيوي ڪراپ سئھ. او اوڙي واتون شيڪاڙين مارون شيواڌاريون نئھ پولوئھ، زم او پونڌو ڪوم ڪرئھ ان ڏيوٿونون را نوم مانھ ساڙل مونھ ڪائھ، ان ھيوئھ نمونئھ ڏيوٿونون رئي پوزا ڪرئھ. ②1 مئين ڏيرج راڪين اوتا نئھ آپري پونڌائي ٿي توھونھ ڪريا رو موقعو ڏيتو، پڻ او آپري پونڌائي ساڌيا ٿي نا پاڙئھ. ②2 زوئو، ھوئھ ھون اوتا نئھ پيمار ڪريھ زم او ڪاٿلا مانھ پڙئي ھوئھ. ان جيا اوتا رئي وات مونين اوتا ري پونڌائي ۾ اوتا پڙا سئھ، جي او اوتا ڏوشي را ڪيڌل ڪوم ساڌين توھونھ نئين ڪرئھ، تو اوئون نئھ ھون گھڻي تڪليپ ڏيھ.

23) ان جيا اُوتا ڏوشي را ٻارڪ سئ، اُوتون نئ هون پيمار ڪرين نمو ماريه پرا. ان هيون نمونئ ٻڌيون وشواسي منڌريون نئ ڪپ پڙشي جي هون او سون جيو منڪون را من ري هتال واتون زوئون، ان هون تمون موئين ٿي هر هيڪ نئ آپرون ڪرل ڪومون پرموتئ ايوزو ڏيه.

24) پڻ تمي ٿوتائيره ري منڌري را پيزا منڪ، جيئي هائي شيڪاڙل واتون نئي موني، ان شيطون را پاها رو ڳيت ڳيون نئي شيڪيو، هون تمون مانھ وڌارئ پار نئين نوڪون، 25) پڻ هون تمون نئ روڳو ام ڪونھ: جيو وشواس تمي را ڪوه، مارا پاسا آيا هوڏي تمي اُوتا وشواس مانھ وينا ريو.

26) جيو اڏڳ وشواس راڪين پونڌائي مانھ جيت ڪرھ، ان پڇاڙي هوڏي مارا ڪيڏل ڪوم ڪرتو رھ، اُوتا نئ هون دنيا ريون قومون مانھ اڪتياري ڏيه. 27) او لو رو ڳيڏيو لين پوري طاقت



ٿي اُوتون مانھ راز ڪرشي، ان پڳوون نئ نه مونيا وازون نئ ام سزا ڏيشي زم ماتي را ٿونڀڙا نئ پونڳين اڙي اڙي ڪرھ پرو.

28) زم مارئ ٻاپ پڳوون مون نئ راز ڪريا رو حق ڏيڏوه، تم هون اُوتا منڪ نئ پڻ راز ڪريا رو حق ڏيه. ان هون اُوتا نئ پروڙيو تارو پڻ ڏيه جيو جيت ان راز رو نيشون سئ.

29) هومپريا وازون، تمي ايئا وات مانھ ڏيون ڏيو جي پويتر آتما وشواسي منڌريون نئ ڪي ڪھ.

ايسئو سرديس شهر ري وشواسي منڌري نئ نياپو ڏئھ

3) ① "سرديس ري وشواسي منڌري هارو، اُوتا را نياپو ڏيڏا وازا ڏوت هات، اي نياپو لڪي ميل:

جيا ري هاتي پڳوون رو ڏيڏل پويتر آتما ان هات تارا سئ، او ام ڪھ: مون

نٿه تو کهر سٺه جي تمڻي ڪيو ڪوم ڪروھ. تمارڻي اي نوموش وٺه رڻي جي تمڻي پڳوون ٿي واسطو راکين جيوٽا سو، پڻ هاس ۾ تمڻي تو مرل را زم سو ان پڳوون ٿي ڪئين واسطو نٿي راکتا. ② زاڳو! جي واتون تمون موئين هزون سٺه پڻ ڪتم ٿيا واري سٺه، آڀرڻي وشيت پيڙڻي ڪرين هائي واتون وڙي جيوٽي ڪرو. ڪم تو مئين زويوه جي تمارا ڪرل ڪوم مارا پڳوون ري نظر ۾ پورا ڪرل نٿي. ③ تيام همپارو، جي تمڻي ڪيوٺه ڍاڙهه وشواس ري واتون هومپڙي تي ان موني ليڏي تي، ان هونءَ هايون واتون مانھ وو ان توپونھ ڪرو. جي تمڻي هم ڪرين نٿي زاڳتا، تو هون تمون نٿه سزا ڏيڏا هارو سور را زم اوچتو آويه، ان تمون نٿه ڪئين کهر نئين هونءَ جي هون ڪئين آويه.

④ توڻي پڻ تمون موئينليا سرديس شهر ۾ ڪئينگ ايوا منڪ سٺه جيئي ڏوه ڪرين آڀرا لوگهڙا ڪراب نٿي ڪريا. ان او مون پيڙا ڏوڙا لوگهڙا پيرين ويشي، ڪم تو او هيا رٿه لائيق سٺه.

⑤ جيو اڏڳ وشواس راکين پونڌائي مانھ جيت ڪرڻه، اوٿا نٿه هون هيون نمونءَ ڏوڙا لوگهڙا پيراويه. ان اوٿا رو نوم جيون را ڪتاب موئين لڪل ريشي، جيا موئين هميش رو جيون ليڏا وازون را نوم لڪل سٺه، ان هون اوٿا را نوم نٿه ڪيڏي نئين ڏوهزون. ان هون مارا ٻاپ هومو ان اوٿا رون آڪاشي ڏوتون هومو هاڪ پيرين ڪيه جي اي مارو شيواڌاري سٺه.



⑥ هومپڙيا وازون، تمڻي ايٿا وات مانھ ڏيون ڏيو جي پويتر آتما وشواسي منڌريون نٿه ڪي ڪڻه.

ايسٽو فلڊلفيه شهر ري وشواسي منڌري نٿه نياپو ڏٺه

⑦ ”فلڊلفيه ري وشواسي منڌري هارو، اوٿا را نياپو ڏيڏا واڙا ڏوت هات، اي

نيا پو لکي ميل:

جيو پو پتر ان هاسو سئ، جيا ڪن آڪاشي پو پتر شهر ۾ زايا هارو داؤد پاڌشا رئي ڪونسئي سئ، ان زئون او دروازو اوگهاڙئ تو اوئا نئ ڪوئي پند نئي ڪري هڪتو، ان زئون دروازو پند ڪرئ تو اوئا نئ ڪوئي اوگهاڙي نئي هڪتو، او ام ڪئ: ⑧ مون نئ تو ڪپر سئ تمي ڪيا نائوڪا ڪوم ڪروھ. زوئو، مئين تمون هومو دروازو اوگهاڙل راڪيوھ جيا نئ ڪوئي پند نئي ڪري هڪتو. تمارئي تو گهڻي طاقت نئي، توئي پڻ تمي مارا وچن مانھ وينا رياھ، ان مون مانھ وشواس نئي ساڏيو. ⑨ هوئ زوئو، او يهودي قوم وازا جيا پگھون را مندر موئين پگهئي تو ڪرئ، پڻ شيوا شيطون رئي ڪرئ، جيا ذات پرموئئ يهودي تين آپ نئ پگھون را سونڊل منڪ تو ڪئ، پڻ او ڪوڙ هاڪئھ ڪم تو او پگھون را سونڊل منڪ نئي، هون اوئون نئ تمون ڪن لي آويه ان تماري پگي پاڙيھ ان اوئون نئ ڪپر پڙشي جي مئين تمون ٿي پريم راڪيوھ. ⑩ تمي مارو ڪيڏو ڪرين ڏوروڻ صير ٿي سهئيھ، تيام هون تمون نئ اوئا آزمتا را وڪت ٿي پچاويه جيو پوري دنيا مانھ آيا وازو سئ، زم ايئا ڌرتي مانھ ريا وازون رو آزمتو ٿئ.



⑪ هون جلدي آويه. جيو وشواس تمي راڪوھ، اوئا وشواس مانھ تمي وينا ريو، زم ڪوئي تمون ٿي جيت رو تاج ڪوهي نه لئ، پڻ تمون نئ وشواس راڪيا رو انصاب زڙئ.

⑫ جيو اڏڳ وشواس راڪين پونڌائي مانھ جيت ڪرئ، هون اوئا نئ مارا ٻاپ پگھون را گهر موئين پيلپايا را زم راڪيھ، ان او هميش اوئئ ريشي. ان اوئا مانھ هون مارا ٻاپ پگھون رو نوم لڪيھ، ان مارا ٻاپ پگھون را شهر رو نوم لڪيھ، جيو شهر نوو يروشلم سئ جيو آڪاش ٿي

مارا ٻاپ ڀڳوونَ را پاها ٿي اوترشي. ان اونا مانه مارو آڀرو نوو نوم پڻ لکيه.


⑬ هومپڙيا واڙون، تمڀي ايٺا وات مانه ڏيون ڏيو جي پوٽر آتما وشواسي منڌريون ننه ڪي ڪڻه.

ايسو لوديڪي شهر ري وشواسي منڌري ننه نياپو ڏٺو

⑭ ”لوديڪي ري وشواسي منڌري هارو، اونا را نياپو ڏيڏا واڙا ڏوت هات، اي نياپو لکي ميل:

جيو آمين را زم هاس سئ، جيو ايمونڌار ان هاسو هاڪ پريا واڙو سئ، جيو ڀڳوون ري ٻڌيون ناوڻ شينهون مانه ڏٺي سئ، او ام ڪڻه: ⑮ مون ننه تو ڪهر سئ تمڀي ڪيو ڪوم ڪرو، جي تمڀي نڪو ٿاڍا سو نڪو اونا. مون تمڀي ٿاڍا ٿين وشواس ماڳي نه راکوت، ڪا تمڀي اونا ٿين پورا من ٿي وشواس راکوت! ⑯ پڻ تمڀي نڪو اونا نڪو ٿاڍا پڻ روڳا ڪوئا سو. تيام هون تمون ننه آڀرا موني ٿي ٻارا ڦڳوڙيا مانه سون. ⑰ ڪم تو تمڀي ڪو: ’هون شائوڪار سون، مئين گهڻي ملڳت پيڙي ڪريه ان مون ننه ڪيا شينه رئي ڪاپي نئي.‘ پڻ تمڀي هزمتا نئي جي ڀڳوون ري نظر ۾ تمڀي هاو مسڪين، لاچار، گريپ، اونڌا ان ناڳا سو. ⑱ هون تمون ننه صلاح ڏيونه: تمڀي مون ٿي ايوو هيم ويساتو ليو، جيو ڏيوٽا موئين ڳاڙل هاسو سئ، زم تمڀي هاس ۾ شائوڪار ٿي زائو. ان تمڀي مون ٿي ڌوڙا لوڳهڙا ليو، جيا ٿي تمارو اوگهاڙيو ڍڪائڻ ان تمڀي لازي نه مرو. ان تمڀي مون ٿي اونڪيون موئين نوڪيا هارو ڌواڻي واڙو هوڻيرو پڻ ليو، جيا ٿي تمڀي پاڙي هڪو.

⑲ هون زتون منڪون ٿي پريم راکونه، اوئون منڪون را ڏوه ڪاڍونه ان اوئون ننه هزماوونه. تيام تمڀي اونا ٿين پورا من ٿي وشواس مانه وو، ان توپونه ڪرو. ⑳ زوئو، هون ٻارو اوپين دروازو وڳاڙونه ريو. جي ڪوئي مارو هاڏ هومپڙه



ان ڌروازو اُوگهاڙئ، تو هُون اُونَا ڪن
موئين آويه، ان هُون اُونَا پيڙو ان اُو مُون
پيڙو روئي ڪاشي.

②1 جيو اڏڳ وشواس راڪين پُونڌائي
مانه جيت ڪرئ، هُون اُونَا نئه آپري
گهاڌي مانه آپ پيڙو پينا رو حق ڏيه،
زم مئين اڏڳ وشواس راڪين پُونڌائي
مانه جيت ڪريئ، ان مارا ٻاپ پڳوون
ري گهاڌي مانه اُونَا پيڙو پينوه.

②2 هومپڙيا واڙون، تمي اينَا وات

مانه ڌيون ڏيو جي پوٽر آتما وشواسي منڌريون نئه ڪي ڪئ.

پڳوون آڪاش ۾ آپري گهاڌي مانه پينل يوحنا نئه ڏرشن ڏئھ

4 ① تيا ڪيڙ مئين زويو، ان زوئو، آڪاش رو ڌروازو ڪُلل پڙيوھ. ان مئين
اُو رڻ شينگڙا را آواز جيوو هاڏ هومپڙيو، جيا نئه مئين اڳي آپ نئه واتون
ڪيتون هومپڙيو تو. اُو مُون نئه ام ڪيتوت ريو: ”ايئنه سڙي آو! ان هُون تُون
نئه ڏيڪاڙيھ جي اينَا ڪيڙ ڪي ڪي ضرور ٿيشي.“ ② هتمارو، پوٽر آتما
ري ڪڙا ٿي مارو پورو ڌيون آڪاش ۾ تڏائي ڳيو. ان زوئو، آڪاش ۾ مُون
هوم هومڻي هيڪ گهاڌي سئ، ان اُونَا گهاڌي مانه ڪوڪ پينوه. ③ ان جيو
پينل هتو، اُو يشب نومي ان عقيق نومي هيرون جيوو ڏيڪاتوت ريو. ان گهاڌي
رئ بيوڙيئي زمرد نومي هيرا جيوو ميگھ ڌنور تڏال هتو. ④ ان اُونَا گهاڌي
رئ چوڌاري پڙي چوويه گهاڌي هتي. اُوئون گهاڌيون مانه چوويه آڳيوون
ڌوڙا لوگهڙا پيرين پينل هتا، ان اُوئون را ماڻا مانه هيم را تاج پيرل هتا.
⑤ اُونَا گهاڌي ٿي ويزي را زباڪا ان ٻڙم ٻڙم ڳاز ٿيتوت ريو. ان هات ڏيو



گهاڌي رڻه رُوپرو پڙتات ريا. هايون هاتون ڏيوون رو مطلب پويتر آتما سڻه.
 ⑥ ان گهاڌي هومو زوڻه ڪاوا رو سمندي هتو، جيو ڪاس جيو هيرا را زم
 اوزرو هتو.

گهاڌي ڪن وس ۾ گهاڌي ري چاري پاھي چار جيو هتا، جيون ري آڳڙ
 وونهڙ ٻڌيل اونڪيون ئي اونڪيون هتي. ⑦ پيرهئون جيو شينھ جيوو هتو، پيزو جيو
 آکا جيوو هتو، ترڻا جيو رو مونيڊ منڪ را مونيڊا جيوو هتو، ان چارمو جيو اُوڌتا
 ڳرڙ پڪي جيوو هتو. ⑧ چارون جيوون ري هر هيڪ ري سو سو پونڪون هتي، ان
 اوئون را ٻڌا ڏيل مانھ آڳڙ وونهڙ ان پونڪون هيٺ پڻ اونڪيون ئي اونڪيون هتي.
 او ڏي رات ويھوما وڳر ام ڪيتا رڻه:

”پويترون م پويتر

پريو پرميشور ٻڌون رو ڏئي،

جيو جيو تو سڻه،

جيو شروع ۾ هتو،

ان جيو هميش هُوڌي ريشي.“

⑨ زئيون زئيون او چار جيو اوئا را مون ان وڪوڻ ڪرڻه ان اوئا رو ٿورو مونڻه،
 جيو گهاڌي مانھ ٻينوھ ان جيو هميش هُوڌي جيو تو سڻه، ⑩ تنيون تنيون چوويه
 آڳيون اوئا ري پڳي پڙين اوئا رڻي پوزا ڪرڻه، جيو گهاڌي مانھ ٻينوھ ان
 هميش هُوڌي جيو تو سڻه. او آپرا تاج اوتارين گهاڌي هوما ميلڻه ان ام ڪڻه:

⑪ ”او امارا ايشور، او امارا پڳيون،

تمي وڪوڻ، عزت، ان ڪڙا رڻه لائيڪ سو،

ڪم تو ٽمي ٻڌوئي ڪئين نايوه،
ان ٽماري مرضي ڀرموئڻه اُو ٺهيوه ان همئڻه سئ.

ڀڳوونَ را نوم مانھ ساڙل گھيٽا را رُوپ ۾ ايسو ڏرشن ڏئھ

5 ① پئڻه گهاڙي مانھ پينل را زمڻا هات ۾ مئين هيڪ وينٽوزل ڪاڳڙ پاڙيو،
جيا مانھ ٻي پاھي لڪل هتو، ان جيو هات ٺپون ٿي موهر پند ڪرل هتو.
② ان مئين هيڪا طاقت واڙا آڪاشي ڏوت نئ ڏيڪيو، جيو پڙو ڏين اوتومئو ام
ڪيتوت ريو:

”ڪوڻ ايئا رڻه لائيڪ سئ

جي اُو موهرن توڙڻه ان ڪاڳڙ ڪولئ؟“

③ پڻ ڪوئي ايوو نتو، نڪو آڪاش موئين، نڪو ڌرتي مانھ، ان نڪو ڌرتي هيٺ،
جيو وينٽوزل ڪاڳڙ ڪولي هڪئ ان لڪل واتون زوئي هڪئ.

④ تيام هُون گھڻو رويو، ڪم تو ڪوئي ايئا رڻه لائيڪ نه زڙيو جي اُو
وينٽوزل ڪاڳڙ ڪولئ ان لڪل واتون زوئ. ⑤ تئيون آڳيوونون موئين ٿي هيڪئ
زڻم هُون نئ ڪيٽو:

”رو مت!“

اُو جيا نئ يهوداه ري ذات رو ڪيهر شينھ ڪئھ

جيو دائود پاڌشا رو وستار سئ


اُوئ جيت ڪرئھ.

اُو ڪاڳڙ مانھ هٽل هات موهرن توڙي هڪئ

ان وينٽوزل ڪاڳڙ ڪولي هڪئ.

⑥ تئيون گهاڙي را وس ۾، چارون جيوون را وس ان آڳيوونون را وس ۾، مئين
هيڪا جوڻ گھيٽا نئ اوڀل ڏيڪيو. ام ڏيڪاتو تو جي اُو ڀڳوونَ را نوم مانھ
سڙوئو تو. اُوئا را هات شينگڙا هتا. ان اُوئا ري هات اونڪيون هتي، جيون رو

مطلب سټه پښتون رو ډيډل پوټر آتما، جيو پوري دُنيا ۾ ميلل سټه. ⑦ ان اونه گهيټه آوين گهاډي مانځ پينل را زمنا هات ټي وينتوزل ڪاڅر ليدو رو. ⑧ زئين اونه ڪاڅر ليدو، تئين او چار جيو ان چويو آگيوون گهيټا ري پڳي پڙيا هئا. هر هيك ڪن هيك وينا هتي ان لوږون را ڏونپ ټي پرل هيم را پيٽالا هئا. هيا ڏونپ رو مطلب سټه پښتون رون سونڍل منكون ري پراٽنائون. ⑨ ان او اي نوو پزن ڳاوتات ريا:



”تمي وينتوزل ڪاڅر ليدا رټه
ان اونا ري موهرن توڙيا رټه لائيڪ سو،
ڪم تو تمي پښتون را نوم مانځ سڙوڻاڻ
ان آږو جيو ڏين آږا لوي ټي
هر ذات، ٻولي، نات ان قوم موئين ټي
پښتون هارو منكون نٽه ويساتا ليداڻ.
⑩ ان اوئون نٽه تمي امارا پښتون را راز را منڪ ناياه
ان اونا رٽي پوزا ڪريا واڙا ناياه،
ان او ڌرتي مانځ راز ڪشي.“

⑪ تئين مئين زيو، ان مئين گهڻون آڪاشي ڏوتون رو آواز هومپڙيو. او گهاډي ان جيوون ان آگيوونون رٽه پيوڙي لاکي ڪروڙي هئا. ⑫ ان او اوتومنا ام ڳاوتات ريا:

”پښتون را نوم مانځ ساڙل گهيٽو
ڪڙا ان اڪتار ان عقل ان طاقت
ان عزت ان مون ان وڪوڻ رٽه لائيڪ سټه.“

⑬ ان جي ڪئين آڪاش موئين، ڌرتي مانځ، ڌرتي هيٺ ان سمونڍ موئين سټه، ٻڌوئي ڪئين جي اوئون موئين سټه، مئين اوئون ٻڌون نٽه ام ڳاوتون هومپڙيا:
”گهاډي مانځ پينل پښتون را“

ان اُونَا را نوم مانه ساژل گهيتا را

وکون ان عزت ان مون ان طاقت

هميش هُوډي ٿيتي رڻ!

⑭ ان چاري جيوِي ڪيڏو: ”آمين.“ ان آڳيونِي گهاڙِي هوما پڳي پڙين پُوزا ڪري.

ايسو پڳونَ را نوم مانه ساژل گهيتا را رُوپ ۾ موهرُون توڙين

دُنيا مانه ٿيا واري آفتون ري سزا را پارام نيشون ڏيکارڻه

① ٽيون مٿين پڳونَ را نوم مانه ساژل گهيتا نڻه هاتون موهرُون موٽين 6 ٿي پيرهيئن موهر توڙتون پاڙيو. ان مٿين چارون جيوون موٽين ٿي هڪا نڻه ڳاز جيو هاءِ



ٿي ام ڪيتون هومپڙيو: ”آو!“ ② ٽيون مٿين زويو، ان زوئو، هڪ ڏوڙو گهوڙو ڏيڪيام آيو. گهوڙا مانه ڪوڪ سڙل هتو، جيا ڪن هڪ ڏنوڙ هتو. ان پڳونَ اُونَا نڻه جيت رو تاج ڏيڏو ان اُو جيت ڪريا هارُو روونو ٿيو، ان جيتوت ريو.

③ ان زئون پڳونَ را نوم مانه ساژل گهيتن پيڙي موهر توڙي، ٽيون مٿين پيڙا جيو نڻه ام ڪيتون هومپڙيو: ”آو!“ ④ ان پيڙو گهوڙو نيھري آيو. اي گهوڙو راتا رنگ رو هتو. اُونَا مانه سڙل نڻه پڳونَ اي حق ڏيڏو جي اُو دُنيا موٽين ٿي هڪ ڪوهي لڻه، زم منڪ هڪا پيڙا نڻه مارڻه پرا. ان پڳونَ اُونَا نڻه موٽي تروٿار ڏيڏي.



⑤ ان زئون پڳونَ را نوم مانه ساژل

گهيتن ترٿمي موهر توڙي، ٽيون مٿين ترٿما جيو نڻه ام ڪيتون هومپڙيو: ”آو!“ ان مٿين زويو، ان زوئو، هڪ ڪارو گهوڙو ڏيڪيام آيو. گهوڙا مانه سڙل را هات ۾ هڪ تراڪڙي هئي.


⑥ ٽئين مٿين چارون جيوون را وس موئين ٿي زوئنه هاڏ هومپڙيو جيو ام ڪيتو تو: ”ڏڪار ۾ ڪٽڪ رو اگه اي راڪ، پنجاه رُوپيا هيڪ شير. ان زوون رو اگه پڻ اي راڪ، پنجاه رُوپيا ترڻ شير. ان تيل ان ڌراڪون ري ڦصلون رو نقصون مت ڪري، زم تيل ان ڌراڪ رس زڙتا رنه.“

⑦ ان زئين پڳوون را نوم مانھ ساڙل گهٽيٽه چارمئي موهر توڙئي، ٽئين مٿين چارما جيو ننه ام ڪيتون هومپڙيو: ”آو!“ ⑧ ان مٿين زويو، ان زوئو، هيڪ نيٺو گهوڙو ڏيڪيام آيو. گهوڙا مانھ سڙل رو نوم موت هتو، ان اوٽا وونهڙ وونهڙ مرلون رو جڳت هتو. پڳوون اوئون ننه ڌرتي رون منڪون را چارما حصا مانھ حق ڏيڏو جي او ترؤٿار ٿي، ڏڪار ٿي، پيماريون ٿي، ان جهنگلي زناوون ٿي اوئون ننه مراوئه پرا.

⑨ ان زئين پڳوون را نوم مانھ ساڙل گهٽيٽه پونسيمي موهر توڙئي، ٽئين مٿين ڏونپ ساڙيا ري ويڏي هيٺ اوئون منڪون را جيو ڏيڪيا، جيا پڳوون رو وچن ان ايسو رئي پرل هاڪ مونيا ري ڪري مروٽا تا. ⑩ ان اوئي اوٽومٽا هاڏ ٿي پڙ ۾ ڪيڏو: ”او پويتر ان هاسا ڌڻي، هزون ڪٽي وار هوڏي تم ڌرتي رون ڪراپ منڪون رو نيا نئين ڪرو، ان امارا ڪون را ايوزا ۾ اوئون ننه سزا نئين ڏيو؟“ ⑪ ٽئين پڳوون اوئون موئين ٿي هر هيڪ ننه هيڪ هيڪ ڌوڙو گهنگهو ڏيڏو، ان اوئون ننه ڪيڏو: ”هزون توڙيڪ وار هوڏي وات زوئو، زئين هوڏي تمارون وشواسي پايون موئين ٿي جي تمارا زم مارا شيواڌاري سئ، زتا پيزا مرايا واڙا سئ، او ٻڌائي نه مرائه.“

⑫ ان زئين پڳوون را نوم مانھ ساڙل گهٽيٽه سمئي موهر توڙئي، ٽئين مٿين زويو جي زمئي گهٽي ڏهڻي، ان ڏي ايوو ڪاڙو مش ٿي گيو، جيوو ٻاڪريون ري ذات رو ٺاول ڪاڙو ڪتو، ان ٻڌوئي انزوٿاريو لوئي جيوو راتو سوڙ ٿي گيو. ⑬ ان تارا ام آڪاش ٿي ڪرين ڌرتي مانھ پڙي گيا، زم زيتون را وڻ ٿي مڌ را آڪري ميوا واوڙ را لوڏا ڪائين پڙي زائھ. ⑭ ان آپ وينٽوڙائي گيو زم منڪ ڪاڳڙ

نٺه وينٺوڙه، ان هر ڏونگر ان ٻيٽ آپرا ماڳ ٿي ڪهڪي ڳيا. ⑮ ان ڌرتي را
 پاڌشا، ان موتا منڪ، ان قوز را موتا ساڀ، ان ملهڪت واڙا، ان طاقت واڙا، ان
 هر ڳلوم، ان هر آزاده، او ٻڌائي منڪ پونئرون موئين ان ڏونگرون ريون شيپرون
 وسا هٽائي ڳيا. ⑯ او ڏونگرون ان شيپرون هوما اوپين زور ٿي ام ڪيتات ريا:
 ”ڏونگر ان شيپرون امون مانھ پڙي آوٺه ان امون نٺه هٽاڙه تو ٺيڪ، زم گهاڏي
 مانھ ٻيٺل پڳوون امون نٺه نه پاڙه، ان اوٺا را نوم مانھ ساڙل گهيتو امون نٺه
 سزا نه ڏه! ⑰ ڪم تو اوئون رٺه سزا ڏيڏا رو موتو ڏي آيوھ رو، ان ڪوئي ايوو
 نٽي جي اوئون را نيا ۾ پيڏوهي ٿين سزا ٿي پڇي زائھ.“



ايسٽو يوحنا نڌ ڏيکارڻ جي دنيا ري هر قوم موئين ٿي پڳوون تارن ڏيڏا هارو اپرا منڪ سئونڊه

7 ① تيا ڪيڙ مئين چارون آڪاشي ڏوتون نڌ پاڙيا، جي هيڪوڪو هيڪوڪو چارون ڏشون مانھ ڌرتي را ڌنگ مانھ اوپل هتا. او چارون ڏشون را وائيرا نڌ ٿونپين اوپا تا، زم وائرو نڪو ڌرتي مانھ، نڪو سمونڊ مانھ ان نڪو وٿون مانھ وائ. ② تئيون مئين پيزا هڪا آڪاشي ڏوت نڌ اڳوٺليا پاها ٿي اونسو سرتون پاڙيو. اوٺا ڪن جيوتا پڳوون رو ٺپو هتو، ان اوٺ هايون چارون آڪاشي ڏوتون نڌ اوتومٺو هاڏ ڏيڏو، جيون نڌ پڳوون ڌرتي ان سمونڊ مانھ نقصون ڪريا ربي اڪتياري ڏيڏي ٿي. ③ ايتھ ڏوت اوٺون نڌ ام ڪيڏو: ”ڌرتي، سمونڊ ان وٿون رو ڪئين نقصون مت ڪريا، زئيون هوڏي امي اپتا پڳوون رون شيواڌاريون را نلاڙ مانھ ٺپو نه هتون.“ ④ ان مئين هومپڙيو جي ڪتون منڪون مانھ پڳوون رو ٺپو هئوٺو. هڪ لاک چوتاليھ هزار منڪون مانھ پڳوون رو ٺپو هئوٺو، ان او اسرائيلي قوم ريون ٻڌيون ذاتون موئين ٿي هتا.

- ⑤ يهوداه ري ذات موئين ٿي ٻارڻ هزار منڪون مانھ پڳوون رو ٺپو هئوٺو.
روبن ري ذات موئين ٿي ٻارڻ هزار منڪون مانھ پڳوون رو ٺپو هئوٺو.
جد ري ذات موئين ٿي ٻارڻ هزار منڪون مانھ پڳوون رو ٺپو هئوٺو.
⑥ آشر ري ذات موئين ٿي ٻارڻ هزار منڪون مانھ پڳوون رو ٺپو هئوٺو.
نفتالي ري ذات موئين ٿي ٻارڻ هزار منڪون مانھ پڳوون رو ٺپو هئوٺو.
منسي ري ذات موئين ٿي ٻارڻ هزار منڪون مانھ پڳوون رو ٺپو هئوٺو.
⑦ شمعون ري ذات موئين ٿي ٻارڻ هزار منڪون مانھ پڳوون رو ٺپو هئوٺو.
لاوي ري ذات موئين ٿي ٻارڻ هزار منڪون مانھ پڳوون رو ٺپو هئوٺو.
اشڪار ري ذات موئين ٿي ٻارڻ هزار منڪون مانھ پڳوون رو ٺپو هئوٺو.

⑧ زبُولُون رِي ذات موئين ٿِي ٻارُءَ هزار منڪون مانھ پڳوونَ رو ٺِپو هئوٿو.
يُوسف رِي ذات موئين ٿِي ٻارُءَ هزار منڪون مانھ پڳوونَ رو ٺِپو هئوٿو.
بنيامينَ رِي ذات موئين ٿِي ٻارُءَ هزار منڪون مانھ پڳوونَ رو ٺِپو هئوٿو.

ايسُو يُوحنّا نَءُ آيا واڙو ٿوٿو مور ٿِي ڏيڪاڙُءَ
جي پڳوونَ رو ٺِپو هئوٿو سُونِڊل منڪون نَءُ تارڻ زڙشي

⑨ تيا ڪيڙ مئين زويو، ان زوئو، اٿا گهڻا منڪ ڏيڪيام آيا، جي گهڻا ٿِي
ٻارا هئا. اُو هر قوم، ذات، نات ان ٻولي موئين ٿِي هئا. ان اُو ٻڌائي ڏوڙا
گهنگها پيرينَ ڪڙي رِي ڏاڙڪي هاڻون ۾ زهالين گهاڙي هوما ان پڳوونَ را
نوم مانھ ساڙل گهيٽا هوما اوڀل هئا. ⑩ ان اُو اوتومئا هاڙ ٿِي ام جئي
ٻولائوت ريا:

”تارڻ ڏيڏا واڙا آڀنا پڳوونَ رئي جئي

جيو گهاڙي مانھ پينوه!

ان تارڻ ڏيڏا واڙا گهيٽا رئي جئي

جيو پڳوونَ را نوم مانھ سڙوٿوه!”

⑪ ان ٻڌائي آڪاشي ڏوت گهاڙي ان آڳيوونون ان چارون جيوون رءُ ٻيوڙيئي
اوپا تا، ان اُوئي گهاڙي هوما پڳي پڙين پڳوونَ رئي پوزا ڪري. ⑫ اُو ام
ڪيتات ريا:

”آمين!”

وڪوڻ، ان مون، ان عقل، ان ٿورو،

ان عزت، ان ڪڙا، ان طاقت،

آڀنا پڳوونَ رئي هميش هُوڏي ٿيئي رءُ!

”آمين!”

⑬ تئيون آڳيوونون موئين ٿِي هيڪئ زئءَ مون ٿِي پونسيو: ”هائي جيا ڏوڙا

گهنگها پيرل منک سئ، هائي کون سئ ان کيٽ ٿي آياھ؟" ⑭ تو مئين اوئا
نئ ورندي ڏيڏي: "تمي تو وڌارئ زوٽوھ."

پسئ اوئ مئون نئ ڪيڏو:

"هائي او منک سئ

جيا آيا واڙي گهڻي تڪليپ وينين آياھ.

اوئي پگھون را نوم مانھ ساڙل گھيٽا را لوئي ۾

آپرا گهنگها ڌوئين ڌوڙا شيتو ڪرياه.

⑮ تيام او پگھون ري گهاڏي هوما رھ

ان ڏي رات اوئا را مندر موئين اوئا رئي پوزا ڪرھ.

ان گهاڏي مانھ پينل اوئون نئ آب پيڙا راکين

اوئون رئي همپار ڪرشي.

⑯ هوءَ اوئون نئ وڙي ڪيڏي پوک نئين لاڳئ

ان ڪيڏي ترهئ نئين لاڳئ.

اوئون نئ ڪيڏي تڙڪو نئين لاڳئ،

ان نڪو گرمي لاڳشي.

⑰ ڪم تو پگھون را نوم مانھ ساڙل گھيٽو

جيو گهاڏي را وس ۾ سئ

او ڌراڙ را زم اوئون رئي همپار ڪرشي

ان آڳيووني ڪرين اوئون نئ اوئ تيري زاشي

جيئھ هميش را جيون رو پوئي پتار ٿي نيھرتو رھ.

ان پگھون اوئون ري اونڪيون ٿي

ٻڌائي هونھوڙا پونھشي پرا."

ايسو پڳوونَ را نوم مانھ ساڙل گھيٽا را رُوپ ۾
هاتميئي ان آکري موھر توڙينَ ڏنيا مانھ ٿيا واري
آکري آفتون ري سزا را پارام نيشونَ ڏيکارڻھ

8 ① ان زئيون پڳوونَ را نوم مانھ ساڙل گھيٽھ هاتميئي موھر توڙئي، تئيون
آڪاش ۾ اڌڪ ڪلاڪ هُڏي ماڻ ئي ماڻ ٿي گهيئي. ② ان مٿين اُو هات
آڪاشي دُوت ڏيکيا جيا پڳوونَ ري شيوا هارُو اُوئا هوما اُوپل هوئھ، ان پڳوونَ
اُوئون نئھ هيڪ هيڪ رڻ شينگڙو ڏيڏو. ③ تئيون هيڪ پيزو آڪاشي دُوت، جيا ڪن



دُونپ ساڙيا رو هيم رو ٺونڀرو هتو، ويڏي
ڪن آيو. اُوئا نئھ گھڻو لوڀونَ ڏيوروڻو،
زم اُو گهاڏي هومي دُونپ ساڙيا ري هيم
ري ويڏي مانھ، پڳوونَ رُون ٻڌون سُونڊل
منڪون ري پراڻنائون پيزو اُوئا رو دُونپ
ساڙئھ. ④ ان لوڀونَ رو دُونپ پڳوونَ رُون

سُونڊل منڪون ري پراڻنائون پيزو آڪاشي دُوت ري هاڻي پڳوونَ هومو سڙوڻو.
⑤ ٿيا ڪيڙ آڪاشي دُوت دُونپ ساڙيا رو ٺونڀرو لين، دُونپ ساڙيا ري ويڏي
ٿي ڏيوڻا رو پرو پرينَ نيسو ڌرتي مانھ ڦڳوڙيو پرو. تئيون ٻڙم ٻڙم ڳاز ٿيو،
ويڙي را زبا ڪا ٿيا، ان زمئي ڏهئي.

هات آڪاشي دُوت رڻ شينگڙا وڳاڙڻھ
ان آيا واري تڪليبونَ ڏيڪيام اُوئھ

⑥ تئيون اُو هات آڪاشي دُوت جيون ڪن هات رڻ شينگڙا هتا، اُو وڳاڙيا هارُو
ٿيار ٿيا.

⑦ پيرھيئن آڪاشي دُوت رڻ شينگڙو وڳاڙيو، تئيون لوئي پيڙول ڪرا ان



ڏيوتا ٿيو، ان هائي زمي مان هيت ڦڳوڙوئا. ان زمي رو ترٿمو حصو ٻڙي ڳيو، ان وٽون رو ترٿمو حصو ٻڙي ڳيو، ان ٻڌوئي نيلو ڪڙ پڻ ٻڙي ڳيو.

⑧ پڙنه آڪاشي ڏوت رڻ شينگڙو وگاڙيو، تئيون هيك موتا ڏونگر جيوئي ٻڙئي شينه سمونڊ موئين هيت ڦڳوڙوئي. ان سمونڊ رو ترٿمو حصو لوئي ٿي ڳيو، ⑨ ان سمونڊ موئين مشيون ان پڙيون جيوٽيون شينهون رو ترٿمو حصو مري ڳيو، ان پڙون رو ترٿمو حصو ڪتم ٿي ڳيو.

⑩ ترٿمئ آڪاشي ڏوت رڻ شينگڙو وگاڙيو، تئيون هيك موتو تارو، جيو مٽا را زم ٻڙتوت ريو، آڪاش ٿي ڪرين ڌريائون را ترٿما حصا مانھ ان پٽار ٿي نيهرل پوئي را ترٿما حصا مانھ ٻڙي ڳيو. ⑪ اوئا تارا رو نوم ڌورو سئ. ان پوئي رو ترٿمو حصو ڌورا جيوو ڪارو ٿي ڳيو، ان گهٽا منڪ او پوئي پيدا ري ڪري مري ڳيا، ڪم تو پوئي هاو ڪارو جهير ٿي ڳيو تو.

⑫ چارمئ آڪاشي ڏوت رڻ شينگڙو وگاڙيو، تئيون ڏي را ترٿما حصا رو، ان انڙوئاڙيا را ترٿما حصا رو، ان تارون را ترٿما حصا رو نقصون ٿيو، جيا ٿي اوئون را ترٿما حصا رو سوجهرو ڪتم ٿي ڳيو. ان تيام ڏي رءُ توئنه سوجهرا رو ترٿمو حصو اندارو ٿي ڳيو، ان همروم رات رءُ توئنه انڙوئاڙيا ان تارون را سوجهرا رو ترٿمو حصو اندارو ٿي ڳيو. ⑬ تئيون مئين هيك ڳرڙ پڪي نئھ آپ ڀر اونسو اوڌتون پاڙيو، ان اوئا نئھ مئين ام اوتموئو ٻولتون هومپڙيو: ”آقت! آقت! پڙا ترڻ آڪاشي ڏوت رڻ شينگڙا وگاڙيا مانھ سئ، ان اوئون رءُ وگاڙيا ٿي ڏنيا رون ڪراپ منڪون مانھ ترڻ آقتون ٿيشي.“

9 ① پونسمنه آكاشي دُوت رڻ شينگڙو وگاڙيو، تڻيون مڻين هڪا تارا ننه
 ڏيکيو جيو آكاش ٿي ڌرتي مانھ پڙي گيو تو، ان پگھون اُونا تارا ننه پُوتون
 را اُونڌا پونئيرا رڻي کونسئي ڏيڏئي، جيئن پگھون رڻه ڪلاف ٿيل آكاشي دُوت
 پُوتون را رُوپ ۾ راڪل سڻه. ② تڻيون تارڻه کونسئي لين پُوتون را اُونڌا پونئيرا
 رو مونڊو کوليو، ان پونئيرا موڻين ٿي موٽا کُرا را جيوو دُونهاڙو سڙي آيو.
 پونئيرا ٿي نيهرل دُونهاڙا ري ڪري ڏي ڍڪائي گيو ان اندارو گهڻش ٿي گيو.
 ③ ان دُونهاڙا موڻين ٿي ٿيڏ ڌرتي مانھ نيھري آيا، ان پگھون اُونون ننه ايوي
 آگيا ڏيڏئي جيوي ڌرتي مانھ ويسُونون ننه آگيا ڏيڏل سڻه. ④ ان پگھون اُونون
 ننه ڪيڏو جي اُو ڌرتي مانھ نڪو ڪڙ رو، نڪو ڦصل رو، نڪو وڻون رو نقصون
 ڪرڻه، پڻ اُو رُوگهو ايون منڪون ننه پيڙا ڏنه جيون را نلاڙ مانھ پگھون رو ٺپو
 هٿل نه هوڻه. ⑤ ان پگھون اُونون ننه هيون منڪون ننه نمُو ماريا رڻي آگيا نه
 ڏيڏئي، پڻ اي آگيا ڏيڏئي جي پونسون مڻيون هُودي اُونون ننه پيڙا ڏيتا رڻه.
 اُونون ٿيڏون رڻه ڪرڙيا ٿي ايوي ڏورڻي پيڙا ٿڻه، جيوي پيڙا ويسو را ڪرڙيا
 ٿي منڪون ننه ٿڻه. ⑥ اُونون ڏيئون موڻين هڪ مريا هارو ڪرشي، پڻ اُونون
 ننه موت نئين زڙڻه. اُو مريا هارو هڪشي، پڻ موت اُونون ٿي شيتي پاگشي.




⑦ اُوئون ٿيڏون رو روپ ايوو هتو، جيوا جنگ ۾ مقابلو ڪريا هارو تيار ڪرل گهوڙا. اُوئون را ماڻا مانھ زوئنه هيم را تاج هتا، ان اُوئون رو مونيو منڪون را مونيا جيوو هتو. ⑧ اُوئون را مٿوٽار ڏوشي رون مٿوٽارون جيوا هتا، ان اُوئون را ڏونت شينھ رون ڏونتون جيوا هتا. ⑨ اُوئون را ڏيل ايوو ڏاڍا هتا، زوئنه لو رو ٻگٽر پيرل هوئ، ان اُوئون ري پونڪون رو آواز ايوو هتو، زوئنه گهڻا گهوڙا رت توئين جنگ ۾ مقابلو ڪريا هارو ڊوڙتا هوئ. ⑩ اُوئون رو پونسٽو ان ڏنگ ويسو را جيوو هتو، ان اُوئون را پونسٽا ۾ ايوئي طاقت سنھ جي او پونسون مئينون هوڏي منڪون نئھ پيڙا ڏي هڪئ. ⑪ اُوئون رو پاڌشا او پگھون رنھ ڪلاڦ ٿيل آڪاشي ڏوت سنھ جيو پوتون را پونئيرا مانھ مڪ سنھ. اوتا رو نوم عبراني ٻولي ۾ ابدون سنھ، ان يوناني ٻولي ۾ ايليون سنھ، جيا رو مطلب سنھ ”پرياد ڪريا وازو.“ ⑫ هائي هيك آفت تو تي گهيھ، پيڙي ٻي آفتون هزون ٿيا واري سنھ.

⑬ سمئھ آڪاشي ڏوت رن شينگڙو وگاڙيو، تئين مئين هيك هاڏ هومپريو، جيو پگھون هومي ڏونپ ساڙيا ري هيم ري ويڏي رون ڪرونگھون ٿي آتوت ريو. ⑭ اوئھ هاڏ سما آڪاشي ڏوت نئھ جيا ڪن رن شينگڙو هتو ام ڪيتو: ”جيا چار آڪاشي ڏوت فرات نومي موتا ڏريا ڪن ٻوندل سنھ، اُوئون نئھ سوڙ پرا.“ ⑮ تئين اوئھ هايون چارون آڪاشي ڏوتون نئھ سوڙيا پرا، جيا ايئا سال را ايئا مئينا را ايئا ڏي را ايئا توئا هارو تيار ڪرين راکل هتا، زم او منڪون رو ترئمو حصو مارئھ پرو. ⑯ ان اُوئون پيڙا جيا ڦوڙي گهوڙون مانھ سڙل هتا او ويھ ڪروڙ هتا. مئين هومپريو جي او اتا هتا. ⑰ او گهوڙا ان اُوئون مانھ سڙل ڦوڙي جيون نئھ مئين ڌرشن ۾ ڏيڪيا، او ايوو هتا. ڦوڙيون را هيئا را ٻگٽر رو رنگ ڏيوتا جيوو راتو سوڙ، ڏونهارو جيوو ڪازو ان گھنڌڪ جيوو پيڙو هڙڪ هتو. ان گهوڙون را ماڻا شينھون رون ماڻون جيوا هتا، ان اُوئون رون مونيدون ٿي ڏيوتا، ڏونهارو ان گھنڌڪ نيهرتات ريا. ⑱ جيو ڏيوتا، ڏونهارو ان گھنڌڪ گهوڙون رون مونيدون ٿي نيهرتوت ريو، هايون ترئين ڪتم ڪريا واريون شينھون ٿي


منکون رو ترئمو حصو مري ڳيو. ①٩ کم تو هايون گهوژون رئي طاقت اوئون را مونډا پر سئ، ان اوئون را پونسٽا پر پڻ سئ. کم تو اوئون را پونسٽا هاپون جيو سئ ان پونسٽون را ڌنگ مانه هاپون را پوڌکا سئ، جيون ٿي کرڙين نقصون کرئ.

②٠ توتي پڻ پيزا منک، جيا هايون کتم کريا وازيون شينهنون ٿي نتا مروٽا، اوئي آپرون هاٽون ٿي ناول مورتيون رئي پوزا کريا ٿي توبونه نه کري. اوئي ڏيوٽونون نئ ان هيم، سونڊي، پيٽر، پوٽون، ان لاکري ري ناول مورتيون نئ پوزو نه ساڏيو، جي نڪو پاڙي هکنه، نڪو هومپڙي هکنه، ان نڪو وي هکنه. ②١ ان اوئي نڪو کون کريا ٿي، نڪو جادو ان کارو علم کريا ٿي، نڪو پوندو کوم کريا ٿي، ان نڪو سورئي کريا ٿي توبونه کري، پڻ همرام آپرا هائي کراب کوم کرتا ريا.



ڀڳوون يوحنا نئ شيڪارڙه جي ڀڳوون را وچن را ننکا ڪتاب نئ
کشي ٿي مونو ان ڌک وينين ٻڌون نئ همپڙاوو

① تيون مئين هڪا پيزا طاقت واڙا آکاشي ڏوت نئ آکاش ٿي اوترتون 10 پاڙيو. اوٽا را لوگهڙا واڙا را هٽا، ان اوٽا را ماتا رٽه پيڙيئي ميگه ڏنوڙ هٽو. اوٽا رو مونيڊو ڏي را زم زبکتوت ريو، ان اوٽا را پڳ پٿر را پيلپايا



جیوا ڏاڏا هتا، ان ڏيوتا ري زهراون جیوا
ڏيکاتا تا. ② اوتا را هات ۾ هيڪ ننڪو
ڪتاب کُلل هتو. اوتھ آپرو زمڻو پڳ سُمونڊ
مانھ ميليو هئو، ان آپرو ڏاوو پڳ زمي مانھ
میلیو هئو. ③ ان اوتھ اوتومئا هاڏ ٿي شينھ


را زم هُونڳر ڪري، ان زئيون اوتھ هُونڳر ڪري، تئيون هات ئي ڳاز ڳازيا.
④ زئيون هات ئي ڳاز ڳازتون ٻوليا، تو هُون اوتون ري ڪيڏل واتون لکيا مانھ
هتو. پڻ آڪاش ٿي مئين هيڪ هاڏ هومپڙيو جيو ڪيتوت ريو: ”جي واتون هاتي
ڳازي ڪريھ، اُو تو سوني راک ان مت لڪ.“ ⑤ تئيون آڪاشي ڏوت، جيا
نئھ مئين سُمونڊ مانھ ان زمي مانھ اوپل ڏيڪيو، اوتھ آپرو زمڻو هات آڪاش
هومو اونسو ڪرين ⑥ پڳوون رو هون کاڌو، جيو هميش هُوڏي جيو تو رھ، ان
جيئھ آڪاش ان اوتا موئين ٻڌوئي ڪئين، ان زمي ان اوتا مانھ ٻڌوئي ڪئين،
ان سُمونڊ ان اوتا موئين ٻڌوئي ڪئين نايوھ. اوتھ هون ڪائين ام ڪيڏو: ”هوئھ
وڌارئھ ڏير نئين ٿئھ. ⑦ پڻ زئيون هاتمو آڪاشي ڏوت رڻ شينڳڙو وڳاڙشي،
تئيون اوتون ڏيئون موئين پڳوون رو مقصد، جيو اوتا ري اوندئي وات سئھ، اُو
مقصد پورو ٿيشي، زم اوتھ اڳي آپرون شيواڌاريون آپرو نياپو ڏيڏا واڙون نئھ
همپڙاوي ٿئي.“

⑧ تئيون جيو هاڏ مئين آڪاش ٿي مورمئھ ٻولتون هومپڙيو تو، اُو وڙي مون
ٿي ٻوليو ان ڪيڏو: ”زا، اُو ننڪو ڪتاب لئھ، جيو سُمونڊ ان زمي مانھ اوپل
آڪاشي ڏوت را هات ۾ کُلل سئھ.“ ⑨ تيام مئين آڪاشي ڏوت ڪن زائين اُو
ننڪو ڪتاب مونڳيو. تو اوتھ مون نئھ ڪيڏو: ”اي لئھ ان ايئا نئھ ڪائي زا!
ايئا نئھ کاڌا ٿي ٿارو پيت تو ڪارو ٿيشي، پڻ ٿارا مونڊا ۾ اي مڌ جيوو مينو
لاڳشي.“ ⑩ تئيون مئين اُو ننڪو ڪتاب آڪاشي ڏوت را هات ٿي ليڏو رو ان
اوتا نئھ ڪائي ڳيو. اُو مارا مونڊا ۾ مڌ جيوو مينو لاڳيو، پڻ زئيون هُون ڪائي

گپو، تئيون مارو پيت کارو ٿي گپو. ⑪ تئيون مُون نئه ام ڪيوروٿو: ”تارئه وڙي پيزي وار گهڻيون ناتون، قومون، ٻوليون ان پاڌشائون را پارام پڳوون رو نياپو ڏيووه.“

پڳوون رون ٻيئون هاڪ پريا وازون منڪون رو مثال
ڪراپ ڏنيا وشواسي منڌري رون منڪون نئه ڪتم ڪروا ڪرشي
توئي پڳوون اوئون نئه هميش رو جيون ڏيشي

⑪ تئيون ڪيئنڪ مُون نئه وال جيويي هيڪ سر رئي ڏونڪڙي ڏيڏي ان
هيڪ هاڏ هومپريام آيو جيئن مُون نئه ڪيڏو: ”زا، پڳوون را منڌر رو ان



ڏونپ ساڙيا ري ويڏي رو
ماپ ڪر، ان منڌر موئين
پڳوون رئي پوزا ڪريا
وازون نئه گڻ! ② پڻ منڌر
رو ٻارليو اونگڻو حساب ۾
مت اوڻ ان اوئا رو ماپ

مت لئه، ڪم تو او ڌاري قوم رون منڪون نئه ڏيڏل سئه جيا پڳوون نئه نئي
موتئا. او پويتر شهر نئه ٻيٽاليه مئينون هوڏي لتاڙشي. ③ ان هون مارون ٻيئون
هاڪ پريا وازون نئه ڪڙا ڏيه ان او منڪون هارو ڏڪي ٿين ٻاڪريون ري زات ٿي
ناول لوگهڙا پيرين هيڪ هزار ٻي هو هائيٿ ڏي پڳوون رو نياپو ڏيشي.“

④ هايون ٻيئون هاڪ پريا وازون رو ارت سئه شاستر ۾ لڪل او ٻي زيتون
را وڻ ان او ٻي ڏيوو ميليا ري شينهنون، جي جڳت را ڏئي هومي اوپل سئه.
⑤ ان جي ڪوئي منڪ هايون ٻيئون هاڪ پريا وازون رو نقصون ڪروا ڪرئه،
تو اوئون را مونڊا ٿي ڏيوتا نيهرئه ان اوئون رون ڏشمئون نئه ٻاڙئه پرا. جيو
اوئون رو نقصون ڪروا ڪرئه، او هم ضرور مراشي. ⑥ هايون نئه مي پنڌ راڪيا

رئي اِکتیارئي سٺه، زم زتي وار او پڳوون رو نياپو ڏيتا رټ، اتي وار هوڏي مي نه ورهټه. ان هايون نټه اي اِکتیارئي پڻ سٺه جي او پوڻي نټه لوڻي ۾ پڌلاوټه، ان ڌرتي مان هـر نمونا ري آقتون زتي وار او ميلوا ڪرټه، اتي وار او ميلي هڪٿه. ⑦ پڻ زئيون او پڳوون رئي هاڪ پريا رو ڪوم پورو ڪرشي، تئيون او جهنگلي زناور، جيو پوتون را پونئيرا ٿي نيهرشي، اوئون ٿي جنڳ وڌشي ان اوئون مان هـ جيت ڪرشي ان اوئون نټه مارشي پرا. ⑧ اوئون را لاش موتا شهر را وسليا پکا مان هـ پڙيا ريشي. اوٿا شهر نټه مثال پرموٽه ڪراپ ڪومون ري ڪري سدوم شهر ڪٿه، ان پڳوون رټه ڪلاف هـويا ري ڪري مصر ملڪ ڪٿه، ان هائي او شهر سٺه جيٽه اوئون رو پريو پڻ هوڏي مان هـ مروٿو تو. ⑨ ان هر نات، هر ذات، هر ٻولي، ان هر قوم را منڪ هاڏون ترٿيون ڏيئون هوڏي اوئون را لاش امرام پڙل پاڙشي، ان اوئون را لاش پوريا رئي موڪل نئين زرٽه. ⑩ تيام ڏنيا را منڪ اوئون مان هـ ڪش ٿيشي ان ڪشي ڪرشي ان او هـيڪا پيزا نټه توقا پڻ ڏيشي، ڪم تو ڏنيا را منڪ اوئون بيئون پڳوون رو نياپو ڏيڏا واڙون ٿي ڪڪ هٿا.

⑪ پڻ هاڏون ترٿيون ڏيئون ڪيڙ پڳوون اوئون نټه وڙي جيوتا ڪريا، اوئون رو ها هـ پاسو آيو رو، ان او اوئين اويا ٿيا. ان جيئي اوئون نټه پاڙيا، او گهٽا پيٽائي گيا. ⑫ تئيون پئي پڳوون رو نياپو ڏيڏا واڙي آڪاش موئين ٿي هـيڪ موتو هاڏ هـومپڙيو جيٽه اوئون نټه ڪيڏو: "ايتنه سڙي آوو." ان او واڏا موئين آڪاش مان هـ سڙي گيا، ان اوئون را ڏشمڻ اوئون هوما زوتا ري گيا. ⑬ ان تته توٽه زمئي گهٽي ڏهي، ان شهر رو ڏهو حصو پوه ڏين پڙي گيو. ان زمئي ڏيا ري ڪري هات هزار منڪ مري گيا، ان پيزا ٻڌائي زتا پچي گيا او گهٽا پيٽائي گيا، ان اوئي آڪاش ۾ ريا واڙا. پڳوون را وڪوڻ ڪريا. ⑭ هائي پيزي آقت تو ٿي گهي، ترٿمي آقت هـوٽه جلدي ۾ ٿيا واڙئي سٺه.

هاٽمو آڪاشي ڏوت رڻ شينڳڙو وگاڙڻه
ان ڏنيا را اکر ري واتون ساوي ڪرڻه

⑮ هاتمئ آڪاشي ڏوت رڻ شينڳڙو وگاڙيو، تئيون آڪاش موئين ٿي اوتومڻا
هاڏ ام هومپريام آيا:

”ڏنيا مانھ منڪون رو راز هونھ ڪتم ٿيوھ

ان آڀنا ايشور رو راز

ان اوڻا را سونڊل پڇايا واڙا ڪريست رو راز

هونھ منڪون مانھ شروع ٿيوھ

ان او هميش هوندي راز ڪرشي.

⑯ تئيون چوويه آڳيون جيا پڳيون هوما آريون گهاڏيون مانھ پينل هتا، او
پڳيون ري پڳي پڙيا ان ام ڪيتون پڳيون رڻي پوزا ڪرڻي:

⑰ ”او پريو پرميشور ٻڌون را ڏئي،

جيا جيوتا سو ان شروع ۾ هتا،

امي تمارو ٿورو مونونھ

ڪم تو تمي آپري گهڻي طاقت ڏيکارڻيھ

ان آپرو راز ڪروا مڏياھ.

⑱ ڏنيا ريون قومون را منڪ تمون مانھ ريشي ٻڙتا

پڻ همئ تمي اوئون نئ سزا ڏيشو.

همئ او توڻو آيوھ رو زئيون تمي مرلون رو نيا ڪرشو.


تمارون شيواڌاريون نئ،

تمارو نياپو ڏيڏا واڙون نئ،

ان تمارون ٻڌون سونڊل منڪون نئ،

جيا پڻ تمارو مون راکڻھ، پلئ نونا ڪا موتا،

اُوئون ٻڌون ننه اُوئون ري ڪرل شيوا رو ايوزو ڏيشو.
پڻ جيا ڏنيا ننه پريآ ڪرڻ، اُوئون ننه تمڻي پريآ ڪرڻو.



① تئيون پڳوون رو منڌر جي آڪاش
موئين سڻ، اُو ڪلي گيو. ان پڳوون را
منڌر موئين اُو پيئڻي ڏيڪيام آوئي جيا
موئين پڳوون را منڪون ٿي ٻونڌل وسن
ري لڪل واتون راکل سڻ. تئيون ويزڙي را
زباڪا ٿيا، ٻزم ٻزم ڳاز ٿيو، زمڻي ڏهڻي،
ان گهاٽا ڪرا پڙيا.

ڏوشي، ٻار، ان پورنگ ناڳ رو مثال
وشواس راڪيا وازون ري منڌري را، ايسو را، ان شيطون را پارام

12 ① تئيون هيڪ موٽو نيشون آڪاش موئين ڏيڪيام آيو. هيڪ ڏوشي
ڏيڪيام آوئي جيا رو پيرڻ زبڪتا ڏي جيوو هتو، ان اوٽا رون پڳون هيٺ
سندر هتو، ان اوٽا را ماتا مانه هيڪ جيت رو تاج هتو جيا موئين ٻارڻه تارا لاڳل
هتا. ② اُو پارڻي پڳ هتڻي ان ٻار زلميا را ڏوڪ ري پيڙا ۾ رڙيون ڪرتيٽ رڻي.
③ تئيون هيڪ پيزو نيشون آڪاش ۾ ڏيڪيام آيو. ان زوٽو، هيڪ موٽو راتا رنگ
رو پورنگ ناڳ، جيا را هات ماتا ان ڏه شينگڙا هتا، ان هر هيڪ ماتا مانه هيڪ
هيڪ تاج هتو. ④ اوٽه آپرا پونسڙا ٿي آڪاش رون تارون رو ترڻمو حصو نيلين
ڌرتي مانه هيٺ ڦڳوڙيو پرو. تئيون پورنگ ناڳ پارڻي پڳ ڏوشي هومو زائين
اوپو، جي ٻار زلميا مانه هتڻي. اُو ٻار زلميا رڻي وات زوتوت ريو، زم ٻار ننه
ڪائي زائ. ⑤ تئيون ڏوشي سوڪرو زلميو، جيو لو رو گيڏيو لين پوري طاقت
ٿي ٻڌيون قومون مانه راز ڪرشي. ان ڏوشي رو ٻار پڳوون ڪن ان اوٽا ري
گهاڏي ڪن آڪاش ۾ اوڀروٽو. ⑥ تئيون ڏوشي رڻ ۾ پاڳي گڻي جيئڻه پڳوون

اُونَا هَارُو ماڳ تيار ڪرين راکيو تو، زم هيڪ هزار ٻي هو هائيٺ ڏيئون هُودِي
اُو اوتته اونا رئي همپار ڪرڻه.

⑦ تئيون آڪاش ۾ جنگ لاڳئي پري. پڳوون رو ميڪائيل نومي موتو
آڪاشي ڏوت ان اونا را پاها را آڪاشي ڏوت، پورنگ ناڳ رڻه ڪلاڦ وڊيا. ان
پورنگ ناڳ ان اونا را پاها ري ڏوتي مقابلو ڪريو. ⑧ پڻ پورنگ ناڳ هاري
گيو، ان اونا هارو ان اونا را پاها رڻ ڏوتون هارو آڪاش ۾ ڪيٽه ئي ماڳ
نه ريو. ⑨ اُو موتو پورنگ ناڳ آڪاش ٿي بارو تڳڙوٿو. اُو هاڳي زونا وڪ
رو هاپ سڻه جيا نڻه ڏوه ڏيڏا واڙو شيطون ڪڻه، جيو پوري ڏنيا رڻ منڪون
نڻه شيتڙه. اونا نڻه آڪاش ٿي بارو تڳڙين ڌرتي مانھ ڦڳوڙيو پرو، ان اونا را
پاها رڻ ڏوتون نڻه پڻ اونا پيڙا بارا ڦڳوڙيا پرا. ⑩ تئيون مڻين آڪاش ۾ هيڪ
اوتومٿو هاڏ ام ڪيتون هومپڙيو:

”هوتھ آڀنا پڳوون را پاها ٿي منڪون نڻه تارڻ زڙيوھ،

اونا رئي ڪڙا پورڻه نمونڻه ساوئي ٿيھ،

ان اونا رو راز پورڻه نمونڻه آيوھ.

ان پڳوون را سونڊل پڇايا واڙا ڪريست رئي

پوري اڪتيارئي ٿيھ.

ڪم تو آڀتون وشواسي پايون مانھ ڏوه ڏيڏا واڙو

بارو تڳڙوٿوھ،

جيو ڏي رات آڀنا پڳوون هومو اوتون مانھ ڏوه ڏيتو.

⑪ پڳوون را نوم مانھ ساڙل گهيتا را لوئي ري ڪري

ان اوتون رڻه ايسو رئي هاڪ پريا ري ڪري

اُو ڏوه ڏيڏا واڙا شيطون مانھ ڪٽياھ.

اوتئي آڀرو جيو والو نه راکيو

ان وشواس نه ساڏين مريا هارو تيار هتا.

⑫ تيام تمې جيا آكاش ۾ سو، تمې كُشي كرو.
پڻ ډرتي ان سُمونډ، تمون هارو ډك سئ،
كم تو شيطون تمون كن اوتري آيوه.
او گهڻي رينه ۾ سئ كم تو اوتا نئ كهر سئ
جي هوئ اوتا كن ټوڙو ټوڙو سئ.

⑬ زئون پورنگ ناگ زويو جي او آكاش ٿي بارو ډرتي مانھ ڦڳوڙل سئ،
تئون او اوتا ڏوشي لار ٿيو جيئئ سوڪرو زلميو تو. ⑭ تئون پڳوون ڏوشي نئ
موتا ڳرڙ پکي جيو ٻي پونكون ڏيتي، زم او رڻ ۾ آپرا ماڳ ۾ اوڏي زائئ،
جيئئ پڳوون اوتا نئ هيڪ زمونا، ٻي زمونون ان اڌ زمونا هوڏي هاپ را قوضا
ٿي پچاوين اوتا رڻي همپار ڪرشي، مثال پرموئئ هاڏا ترڻ سال. ⑮ تئون هاپ
آپرا مونڊا ٿي پوڻي رو ڌريا ڏوشي لار ڦڳوڙيو، زم ڏوشي نئ پوڻي ۾ تيروئ
پرڻي. ⑯ پڻ زمي ڦاٽي گڻي ان ڏوشي رڻي مڌت ڪرڻي، ان او ٻڌوئي ڌريا
رو پوڻي پي گڻي جيو پوڻي پورنگ ناگ آپرا مونڊا ٿي ڦڳوڙيو تو. ⑰ پسئ
پورنگ ناگ ڏوشي مانھ ريشي ٻڙيو، ان ڏوشي رون پيزون ٻاڙون ٿي، او جيا
پڳوون رون حڪمون مانھ وئ ان ايسو رڻي پرل هاڪ مونئ، جنڳ ڪروا روونو
ٿيو. ⑱ ان پورنگ ناگ سُمونڊ را ڪپ مانھ زائين اوپو.

سُمونڊ ٿي نيهل جهنگلي زناور رو مثال پڳوون رڻ ڪلاڦ حڪومت را پارام

① تئون مئين هيڪا جهنگلي زناور نئ سُمونڊ موئين ٿي نيهرتون ڏيڪيو.
13 اوتا را ڏھ شينڳڙا ان هات ماڻا هئا. ان اوتا رون ڏهون شينڳڙون مانھ
هيڪ هيڪ تاج هتو، ان اوتا را هر هيڪ ماڻا مانھ آپرا راکل ايوا نوم لکل هتا
جيا ٿي پڳوون رڻي پيعزتئي ٿئ. ② او جهنگلي زناور جيا نئ مئين ڏيڪيو، او
شيترا جيوو هتو، ان اوتا را پڳ رچ رون پڳون جيوا هتا، ان اوتا رو ڪاٻو شينھ

را ڪاٻا جيوو هتو. تئين پورنگ ناگ اُٺا جهنگلي زناور نٿه آڀري ڪڙا، راز ان گهڻي اڪتياري ڏيڻي. ③ جهنگلي زناور را هڪا ماڻا مانه ايوو ڌڪ لاڳل هتو جيا ٿي پچيا رو ڪئين آسريو ٿي نٿو، پڻ اُو ڌڪ رُوڙهائي گيو تو. پوري ڏنيا را منڪ جهنگلي زناور مانه حيرون تين اُٺا لار لار ويا مڏيا. ④ ان منڪي پورنگ ناگ رڻي پوزا ڪري ڪم تو اُوڻه جهنگلي زناور نٿه اڪتياري ڏيڻي، ان جهنگلي زناور رڻي پوزا پڻ ام ڪيتون ڪري: ”جهنگلي زناور جيوو ڪوڻ سٺه؟ اُٺا رو ڪوڻ مقابلو ڪري هڪه؟“

⑤ پورنگ ناگ اُٺا جهنگلي زناور نٿه وڌائي ڪريا رڻي هيٺ ڏيڻي، ان ايوو واتون ڪريا رڻي هيٺ ڏيڻي جيا ٿي پگهون رڻي پيعزتي ٿه، ان آڀري اڪتياري واپرايا رڻي هيٺ ڏيڻي. پڻ پگهون پيتاليه مئينون هُڏي هم ڪريا رو ڌنگ راڪيو. ⑥ جهنگلي زناور پگهون رڻه ڪلاڦ ٻولوا مڏيو، ان ايوو واتون ڪروا مڏيو جيا ٿي پگهون رڻي، آڪاش رڻي، ان آڪاش موئين ريا وازون رڻي پيعزتي ٿه. ⑦ ان پورنگ ناگ اُٺا نٿه پگهون رون سُونڍل منڪون ٿي جنڪ ڪريا رڻي، ان اُوڻون مانه جيتيا رڻي هيٺ ڏيڻي، ان اُٺا نٿه هر ذات، نات، ٻولي ان قوم مانه اڪتياري ڏيڻي. ⑧ ان ڌرتي را زتا منڪ پگهون را نٿي جيون را نوم پگهون را نوم مانه ساڙل گهيتا را ڪتاب ۾ لڪل نٿي، جيا جيون را ڪتاب ۾ ڏنيا ٺهيا ٿي مور هميش رو جيون ليڏا وازون را نوم لڪوڻا تا، اُو ٻڌائي جهنگلي زناور رڻي پوزا ڪري.

⑨ هومپڙيا وازون، تمڻي ڪون ڏين هومپڙو.

⑩ جي پگهون رڻي مرضي هوڻ

جي وشواس راڪيا ري ڪري ڪوئي قيڏي ٿه،

تو اُو ضرور قيڏي ٿيشي.

ان جي پگهون رڻي مرضي هوڻ

جي وشواس راڪيا ري ڪري ڪوئي تروٺار ٿي مراه،

تو اُو ضرور ترؤنار ٿي مِراشي.

تِيام پڳوونَ رون سُونِڊل منڪون رڻه ڏوروڻ صير ٿي سهوو ڪپڻه ان وشواس نه ساڏوو ڪپڻه.

گهيتا جيو زناور رو مثال پڳوونَ رڻه ڪِلاڦ ڌرم را پارام

⑪ تئيون مئين هيڪ پيزو زناور زمي موئين ٿي نيهرتون پاڙيو. اُوڻا را گهيتا را زم ٻي شينگڙا هتا، پڻ اُو پورنگ ناگ را زم ٻولتو. ⑫ ان اي پيزو زناور پيرهيان جهنگلي زناور را ڪيڏا پرموڻه اُوڻا رڻي اڪتياري واپراوڻه، ان ڏنيا رون ٻڌون منڪون نڻه پيرهيان جهنگلي زناور رڻي پوزا ڪراوڻه، جيا نڻه ايوو ڌڪ لاڳل هتو جيا ٿي پچيا رو ڪئين آسريو ٿي نٿو، پڻ اُو ڌڪ رُوڙهائي گيو تو. ⑬ ان اي پيزو زناور موٽا موٽا پرسا ڏيڪاڙڻه، جيا ٿي منڪون هومئي آڪاش ٿي ڌرتي مانھ پاھي پڻ ڪيرڻه. ⑭ جيا پرسا اي پيزو زناور جهنگلي زناور ري ڏيڏل ڪڙا ٿي ان ڪيڏا ٿي ڪرڻه، اُوڻون پرسون ٿي اي ڏنيا رون منڪون نڻه شيترڻه. اي ڏنيا رون منڪون نڻه حُڪم ڏڻه جي اُو جهنگلي زناور رڻي مُورتي ٺاوڻه، جيا نڻه ترؤنار رو ڌڪ لاڳيو تو توڻي پڻ اُو جيو تو ريو. ⑮ ان ايڻا پيزا زناور نڻه اي ڪڙا پڻ زڙي جي اي جهنگلي زناور ري مُورتي ۾ ھاھ نوڪڻه، جيا ٿي جهنگلي زناور رڻي مُورتي ٻولي پڻ هڪٿي، ان جيا منڪ اُوڻا ري پوزا رو نا پاڙتا اُوڻون نڻه نمُو پڻ ماري هڪٿي. ⑯ ان اي پيزو زناور ٻڌون منڪون نڻه، نونون موتون نڻه، شائوڪارون ان گريهون نڻه، گُلمون ان آزادون نڻه، ٻڌون نڻه زمڻا هاٿ مانھ ڪا نلاڙ مانھ نيشون هئاوڻه. ⑰ ان جيا منڪ مانھ اي نيشون نٿو هٽل، اُو نڪو شينھون ويسِي هڪڻه، نڪو ويساتي لي هڪڻه. اي نيشون جهنگلي زناور رو نوم سڻه، مطلب ايوو نمپر سڻه جيا ٿي کبر پڙڻه جي جهنگلي زناور ڪيوو سڻه. ⑱ هايا وات را پارام عقل ٿي ويچارو. جيو هڙمو سڻه، اُو جهنگلي زناور را

نمپر رو مطلب کایدنه، کم تو اوئا رو نمپر روگا منک رو سئه. ان نمپر اي سئه:
سو هو چيا هت.

پڳوون را بڌائي سونيل منک ايسنو پيزا هميش هوڌي پڳوون کن ريشي

14 ① تئيون مئين زويو، ان زوئو، يروشلم شهر را صيهون نومي دُونگر
مانه پڳوون را نوم مانه ساڙل گهيٽو اوپل سئه. ان اوئا پيزا هيک لاک
چوتاليه هزار منک سئه، جيون را نلاڙ مانه پڳوون را نوم مانه ساڙل گهيٽا
رو نوم ان پڳوون را نوم مانه ساڙل گهيٽا را ٻاپ پڳوون رو نوم لکل سئه.
② تئيون مئين آکاش موئين ٿي هيک آواز هومپڙيو. او آواز پوٽي را گهوگهات،
ان گرا گاز جيوو اوتومٿو هتو، ان ايوو مينو هتو جيوو گهٽا منک پيزا ٿين وينا
وگاڙتا هئو. ③ او آواز هايون ٻڌون منکون رو آواز هتو. او پڳوون ري گهاڌي
هوما، ان چارون جيوون هوما، ان آگيوونون هوما هيک نوو پزن گاتوات ريا. ان
پيزو کوئي او پزن نتو شيکي هکتو. روگا او هيک لاک چوتاليه هزار منک او
پزن گاوي هکٿه، جيا دنيا موئين ٿي ايوڙو پرين پچاول سئه. ④ او ايوو منک
سئه جيا پڳوون ري شيوا ۾ آپ نئه پوٽر را کٿه، زم کونٿارا جيا پوندو کوم
نه کرين آپ نئه پوٽر را کٿه. او پڳوون را نوم مانه ساڙل گهيٽا وونهڙ وونهڙ
وئو. او منکون موئين ٿي ايوڙو پرين پچاول سئه، زم او آپ نئه پڳوون را ان
پڳوون را نوم مانه ساڙل گهيٽا را نوم مانه دين اوئون رئي شيوا کرئو. ⑤ ان
اوئي کوڙئي وات ماڳي نٿي کرئي. اوئون موئين کئين پوندائي نٿي.

بابل شهر رو مثال

پڳوون کراب دنيا رون منکون نئه سزا ڏئو

⑥ تئيون مئين هيڪا پيزا آکاشي دوت نئه آپ ۾ اونسو اوڌتون ڏيکيو، جيا رو

کوم اي هتو جي اُو کُشي رُئي کبر، جئي هر زمونا رون منکون هارو هميش هُودي سئ، ڌرتي رون منکون نئ، هر قوم، ذات، ٻولي، ان نات رون منکون نئ همپراوئ. ⑦ اُو اوتومئا هاڏ ۾ ام کيتوت ريو:

”پڳوون ٿي پيئائو ان اوتا رو مون راکو،
کم تو اوتا رو سزا ڏيڌا رو توڻو آيوه رو.

ان پڳوون رُئي پوزا ڪرو

جيئئ آڪاش ان ڌرتي، سُمونڊ ان پتار پڻ ٺاياه.

⑧ ان هيڪ پيزو آڪاشي دُوت اوتا وونهڙ وونهڙ اُودتون ام کيتوت ريو:

”پڙي گيوه، بابل نومي موتو شهر پڙي گيوه!

اُوئ پُونڌي ڏوشي را زم

ٻڌيون قومون رون منکون نئ ڌراکون رو ڌارو پيئارين

اوتون نئ آپرا پُونڌا کوم ۾ ڦٽايا،

ان آپ نئ ان اوتون نئ پڻ پڳوون ري سزا هيٺ اوڻيا.

⑨ ان هيڪ ترئمو آڪاشي دُوت اوتون وونهڙ وونهڙ اُودتون اوتومئئ هاڏ ام

کيتوت ريو:

”جي ڪوئي منک جهنگلي زناور ان اوتا رُئي مورتئي پوزئ

ان آپرا نلاڙ ڪا هاٿ مانھ اوتا رو نيشون هئاوئ،

⑩ تو اُو پڻ ضرور پڳوون ري سزا را پيئالا ٿي

پڳوون ري رينھ رو ڌراکون رو ڌارو پيشي،

جيا موئين پيڙي ڪئين شينھ پيڙول نئي.

ان پويتر آڪاشي دُوتون ان پڳوون را نوم مانھ ساڙل گهيٽا هومو

اُو پاھي ان گھنڌڪ ۾ پُونڌي هاڙي ڌڪ وينشي.

⑪ جيا پاھي ان گھنڌڪ ۾ اُو پُونڌي هاڙي سئ

اوتا رو ڏونھاڙو هميش سڙتو رئ.

جيا جهنگلي زناور ان اوتا رښي مورتښي پوزښ
ان جهنگلي زناور را نوم رو نيشون آپ مانه هئاوښه،
اوئون ننه ډي رات كښن هك نښي هوښتو.

⑫ تيام پگوون را سونډل منك، جيا پگوون رون حُكمون مانه وښه ان ايسو
مانه وشواس راكښه، اوئون رښه ډوروښ سپر ښي سهوو كيښه.

⑬ تښيون مښين آكاش موښين ښي هيك هاډ هومپزيو جيښه مون ننه كيډو:
"تون اي لك:

هوښه ښي لين او مرل منك يا گوازا سښه،
جيا پريو ايسو مانه وشواس راكين مري گياښه."
پويتر آتما كښه:

"هوښه، او هاس پر يا گوازا سښه.
اوښي مينت كرښي ان هوښه آروم كرښي
كم تو اوئون رون كرل كومون رو ايزو زښي."

تون را لبارا رو ان تراكون ري پتايي رو مثال
وشواس راكيا واژون منكون نښه ايسو ښي تارښ زښي
ان پگوون رښه كلاف وښا واژون منكون نښه سزا زښي



⑭ تښيون مښين زويو، ان زوښو، هيك ډوژو واډرو
ډيكيام آيو. ان اوتا مانه كوڪ پينل هتو، جيو منك
ذات را ډيگرا جيوو هتو. اوتا را ماتا مانه جيت رو
هيك تاج هتو جيو هيم رو هتو، ان اوتا را هات پر هيك
تكو ډاترو هتو. ⑮ ان هيك پيزو آكاشي ډوت منډر
موښين ښي نيهريو، ان واډزا مانه پينا واڙا ننه اوتومښا
هاډ پر كيډو: "تمارو ډاترو هاكلو ان ډون لښو، كم


تو ڌرتي مانھ ڦصل پاڪيوھ پرو ان ھوئہ لہارا رو توڻو آيوھ رو.“⁽¹⁶⁾ تنيون جيو واڌا مانھ ٻيٺل ھتو، اُوئہ آپرو ڌاترو ڌرتي مانھ ھاڪليو ان ڌرتي مانھ لہارو ٿي ڳيو.

⁽¹⁷⁾ تنيون ھيڪ ٻيزو آڪاشي ڏوت اُوئا منڊر ٿي نيھريو جيو آڪاش ۾ سئہ، ان اُوئا ڪن پڻ تڪو ڌاترو ھتو. ⁽¹⁸⁾ ان وڙي ھيڪ ٻيزو آڪاشي ڏوت، جيا را ڪيڏام ڏيوتا راکل ھتو، اُو ڏونپ ساڙيا ري ويڏي ٿي نيھريو. ان اوتومئا ھاڏ




ٿي اُوئا ڏوت نئہ ڪيڏو جيا ڪن تڪو ڌاترو ھتو: ”ٿارو تڪو ڌاترو ھاڪل، ان ڌرتي مانھ جئي ڌراڪون رئي ويل سئہ، اُوئا را زھوڙڪا واڍين پيڙا ڪر، ڪم تو اُوئا ري ڌراڪون پاڪيھ پري.“

⁽¹⁹⁾ تنيون اُوئہ آڪاشي ڏوت آپرو ڌاترو ڌرتي مانھ ھاڪليو، ان ڌرتي مانھ ري ويل موئين ٿي ڌراڪون پيڙي ڪري، ان ڌراڪون ڦيھليا ري موتي ھوڏي موئين ڦڳوڙي پري، جئي پڳوون رئہ منڪون نئہ سزا ڏيڏا رو مثال سئہ. ⁽²⁰⁾ اُو ھوڏي شھر ٿي ٻارئي ھتئي، ان اوتئہ ھوڏي موئين ڌراڪون لتاڙين ڦيھلي پري. ھوڏي موئين ٿي اتو گھڻو لوئي نيھريو جي ھو ڳاڻو شيتي پڻ لوئي اتو پرا ڪريو جي گھوڙون رون لڳومون ھوڏي اونسو پوڳي آيو.



يُجَوِّونَ أَكْرِي أَقْت رِي هَات مُصَيِّتون تَرِي مانِه ميلئِه

15 ① تئىئون مئىن آكاش م پىزو هيگ مو تو ان حىرون كريا واژو اي نيشون
 ڏيكيو. مئىن هات آكاشي ڏوت ڏيكيو، جيا آكري هات موصيتون ميليا
 واژا هتا. اي موصيتون تيام آكري سته، كم تو ايئون نئه ميليا كيڙ پڳوون رئي
 منكون مانھ سزا پوري تيشي. ② تئىئون مئىن زوئته پاهي پيڙول كاوا رو سمونڊ
 ڏيكيو. ان جيئي منكي جهنگلي زناور مانھ، ان اوئا ري مورتِي مانھ، ان اوئا را
 نوم را نمپر مانھ جيت كرئھ، مئىن اوئون ٻڌون نئه كاوا را سمونڊ را ڪپ مانھ
 اوپل ڏيكيو. اوئون ڪن پڳوون ري ڏيڌل وينائون هتي، ③ ان او پڳوون را نوم



کیوا موتا ان حیرون کریا وازا سئہ تمارا کوم!

او ٻڌيون قُومون را يادشا،

تمی انصاف تھی ان ہاس مانہ ووہ۔

④ او ایشور، تمون تئی کُوں نئین پیئائے؟

ان تمارا نوم را وکوٹ کُوٹ نئین کرئہ؟

کم تو تمی هیگئہ پووتر سو،

ان ہدی قومون تمون کن آوین

یہی پڑین تمارئی پوزا کرشی،

کم تو تمارا انصاف تھی کرل کوم

بەتون ھوما ساوا تياھ.

⑤ ان تيا ڪيترن مٿين زويو، ان آڪاش ۾ ڀڳوون رو مندر، اُو تنهُ جيا ٿي ڀڳوون ڀيڙا ريا رڻي هاڪ ڀرتو، اُو کُلي گيو. ⑥ ان مندر موئين ٿي اُو هات آڪاشي دُوت نيهري آيا، جيا هات مُصَييتون ميليا وازا سٺه. اُوئون را لُوگهڙا سُوٽي ان صاف دُورا شيتو سوجهرا وازا هتا، ان اُوئون را هر هيڪ را هيٺا مانه هيم رو لُوگهڙو ٻوندل هتو. ⑦ تئيون چارون جيوون موئين ٿي هيڪه زئنه اُوئون هات آڪاشي دُوتون ننه هات هيم را نونڀڙا ڏيڏا، جيا ڀڳوون ري سزا ٿي پرل هتا، جيو هميش هُودِي جيوَتو رهه. ⑧ ان مندر موئين ڀڳوون را زبڪتا سوجهرا ري ڪري ان اُوئا ري ڪڙا ري ڪري اتو گهڻو دُونهاڙو ٿيتوت ريو جي مندر دُونهاڙا ٿي پرائي گيو، ان ڪوئي مندر موئين زائي نتو هڪتو، زئيون هُودِي اُو هات مُصَييتون پوري نه ٿي، جي هات آڪاشي دُوتون رهه ڏيوو تو.

هات آڪاشي دُوت دُنيا مانه هات مُصَييتون ميله

16 ① تئيون مٿين هيڪ اُتومئو هاڏ هومڙيو، جيو ڀڳوون را مندر موئين ٿي هات آڪاشي دُوتون ننه ام ڪيتو تو: "زائو، ان آپرون هاتون نونڀڙون موئين ٿي دُنيا مانه ڀڳوون رڻي سزا ايڙو پريي."



② تئيون پيرهئون آڪاشي دُوت گيو، ان آپرا نونڀڙا موئين ٿي ڀڳوون رڻي سزا ڌرتي مانه ايڙي پريي. ان جيون منڪون مانه جهنگلي زناور رو نيشون هٽل هتو ان جيا جهنگلي زناور رڻي مورتئي پوزتا، اُوئون رهه ڪراپ ان پُونڌا گُونڀڙا ٿيا. ③ تئيون ٻيڙهه آڪاشي دُوت آپرا نونڀڙا موئين ٿي ڀڳوون رڻي سزا سُمونڊ مانه ايڙي پريي. ان سُمونڊ مرل منڪ را لوئي جيوو لوئي ٿي گيو، ان زتي مشي ان ٻيڙي جيوَتِي شينهنون سُمونڊ موئين ريتي، اُو ٻڌي مري گي.

④ تئيون ترئمئہ آکاشي دُوت آپرا نونہڙا موئين ٿي پڳوون رئي سزا دُريائون ان پتار را پوٽي مانھ ايڙئي پرئي. ان او ٻڌوئي پوٽي لوئي ٿي ڳيو. ⑤ تئيون مئين اوئا آکاشي دُوت نئم ام ڪيتون ھومپڙيو، جيا را ڪيڏام پوٽي راڪل ھتو: ”او پويتر پڳوون، تمي جيا جيوتا سو ان شروع ۾ ھتا،

تمي انصاف ڪريا وازا سو

ڪم تو تمي ھائي ڦينصلا ڪرياه.

⑥ اوئي منڪي تمارون سُونيل منڪون رو ڪُون

ان تمارو نياپو ڏيڏا وازون رو ڪُون ڪريوھ،

ان ھوئہ تمي اوئون نئم پيڏا ھارو لوئي ڏيتوھ.

ان او ھايا سزا رئہ لائيق سئہ.

⑦ ان مئين دُونپ ساريا ري ويڏي ٿي اي ھاڏ ھومپڙيو:

”ھوئہ، پرپو پرميشور ٻڌون را ڏئي،

تمارا ڦينصلا ھاسا ان انصاف وازا سئہ.”

⑧ تئيون چارئمئہ آکاشي دُوت آپرا نونہڙا موئين ٿي پڳوون رئي سزا ڏي

مانھ ايڙئي پرئي. ان ڏي رئي طاقت وڌي ڳئي ان ڏي پاھي ٿي منڪون نئم

شيڪوا مڏيو. ⑨ ان منڪ ڏي را گھڻا ترڪا ٿي ٻڙي ڳيا. توئي پڻ اوئي توہونھ

ڪريا رو نا پاڙيو، ان پڳوون رو مون نہ راڪيو، ان پڳوون نئم پُونڌو ٻوليا جيا را

ڪيڏام ھائي ٻڌي مَصيبتون ھتي.

⑩ تئيون پونسئمئہ آکاشي دُوت آپرا نونہڙا موئين ٿي پڳوون رئي سزا

جھنگلي زناور ري گھاڏي مانھ ايڙئي پرئي. ان جيئئہ جھنگلي زناور رو راز

ھتو، اوئئہ اندارو گھش ٿي ڳيو، ان اوئا را راز ري منڪي گھڻي پيڙا ري ڪري

آپري جيپون سڳري پري. ⑪ توئي پڻ اوئي آپرون ڪراپ ڪومون ٿي توہونھ

ڪريا رو نا پاڙيو، ان آپرون ڏوڪون ان ڳونہڙون ري ڪري پڳوون نئم پُونڌو ٻوليا

جيو آڪاش ۾ رئہ.

⑫ تئيون سمئه آكاشيي دُوت آپرا نونېڙا موئين ٿي پڳوون ربي سزا فرات نومي موتا دريا مانھ ايرٿي پرئي. ان اوتا رو پوئي هوكائي گيو، زم اڳوٺليا پاھا رون پادشائون رھ حملو ڪريا هارو رستو ٿئ. ⑬ تئيون پورنگ ناڳ را موندا



موئين ٿي، ان جهنگلي زناور را موندا موئين ٿي، ان اوتا پيزا زناور را موندا موئين ٿي، جيو ڪوڙ هاكلين آپ نئ پڳوون رو نياپو ڏيڏا وازو ڪئھ، مئين پاڏون جيو ترڻ ڪراپ پوت نيهرتون پاڙيا. ⑭ هائي پوت شيطون را پاھا را دُوت سئ. او پرسا ڏيڪاڙئھ ان پوري

دُنيا رون پادشائون ڪن زائھ، زم دُنيا ري آڪري جنڳ هارو، جيو ٻڌون را دُئي پڳوون را موتا ڏي مانھ ٿيشي، اوتون نئ پڳوون رھ ڪلاڦ وڊيا هارو پيزا ڪرئ. ⑮ تئيون ايسو رو آواز ام آيو:

”زوئو، هون سور را زم اوچتو آوونھ ريو.

پاڳوازو او سئھ

جيو نائوڪا ڪوم ڪرين مارا آيا ربي وات زوئھ،

زم ڪوڪ منڪ سور را آيا رو ڪيال راڪين

لوگھڙا پيرين زاگتو رھ.

جيو مارا آيا هارو تيار نه هوئھ

تو اوتا را ڪراپ ڪوم ساوا ٿيشي ان او ٻڌون هومو لازي مرشي،

زم سور را آيا مانھ ڪوڪ لوگھڙا پيريا وڳر اوئين ويشي

ان ٻڌون هومو لازي مرشي.”

⑯ تئيون هائي پوتي دُنيا رون پادشائون نئ اوتا ماڳ جنڳ هارو پيزا ڪريا،

جيا نئھ عبراني ٻولي ۾ هرمجدون ڪئھ.

①٧ تئيون هاتمه آكاشي دوت آپرا نونېزا موئين ٿي پڳوون رئي سزا آپ ۾ ايڙي پري. ان مندر موئين ٿي گهاڙي را پاها ٿي اوتومو هاڏ ام هومپريام آيو: ”سزا پوري ٿي.“ ①٨ تئيون ويزي را زباڪا ٿيا، بزم بزم گاز ٿيو، ان زمي گهڻي ڏهي. زمي ايوي گهڻي ڏهي، جيوي منڪون رٿ ڌرتي مانھ آيا ٿي لين ڪيڏي نه ڏهي. ①٩ تئيون موتو شهر ترڻ ٽڪرون ۾ ڦاتي گيو ان ٻڌوي ڏهي گيو، ان پوري دنيا ريون قومون را شهر ٻڌاي پري گيا. پڳوون بابل نومي موتا شهر رئي پونڌاي نه ويھاري، ان آپري سزا ٿي پرل پيٽالا موئين ٿي ڌراڪون رو ڌارو پيٽارين اوتا نه رينھ ۾ سزا ڏيڏي. ②٠ ان هر پيٽ تري گيو، ان ڏونگر ڏهي گيا. ②١ ان هيڪ هيڪ مڻ زوڙا موتا موتا ڪرا آڪاش ٿي منڪون مانھ پري آيا. ان ڪرون ري مصيبت ري ڪري منڪ پڳوون نه پونڌو ٻوليا، ڪم تو هائي مصيبت ايوي موتي هتي.

پونڌي دوشي رو ان جهنگلي زناور رو مثال ڪراب دنيا ان پڳوون رٿ ڪلاڪ حڪومت را پارام


17 ① تئيون اوتون هاتون آڪاشي دوتون موئين ٿي، جيون ڪن هات نونېزا هتا، هيڪ زڻو مون ڪن آيو ان مون نه ام ڪيڏو: ”هال! هون تون نه ڏيڪاريھ جي پڳوون اوتا گهڻي پونڌي دوشي نه ڪيوي سزا ڏيشي، جي دوشي گهڻون ڌريائون را وس ۾ پيئيھ، ② ان جيا ڪن دنيا را پاڌشا آوھ، ان جيا را پونڌا ڪوم رو ڌراڪون رو ڌارو پين دنيا را منڪ مست ٿي گياھ.“ ③ تئيون آڪاشي دوت پويتر آما ري ڪرا ٿي مون نه رڻ ۾ اوپاري گيو. ان مئين هيڪ دوشي ڏيڪي، جي راتا سور جهنگلي زناور مانھ سڙل هتي. جهنگلي زناور را پورا ڏيل مانھ ايو نوم لڪل هتا جيا ٿي پڳوون رئي پيعزتي ٿئو، ان اوتا را هات ماتا ان ڏھ شينگڙا هتا. ④ ان دوشي رٿ وونگڻائي ان ڪرمشي رنگ را مونگھام مونگھا لوگھڙا پيرل هتا، ان اوتا رٿ هيم، هيرون، ان

موتيون را هُونت پيرل هُوڙئ شڱار كرل هتا. اُوئا را هات ۾ هيم رو هيڪ پيئالو هتو، جيو مُورتي پُوزا ري گهندگي ٿي ان آڀرا كرل پُونڌا ڪوم ري پُونڌائي ٿي پيرل هتو. ⑤ ان اُوئا را نلاڙ مانھ اُونڌي وات ۾ اُوئا رو نوم ام لڪل هتو:

”بابل نومي موتو شهر،

پُونڌيون ڏوشيون رئي مان

ان ڏنڀا ريون مُورتيون رئي مان.“



⑥ ان مٿين زويو جي هائي ڏوشي پڳوون رون سُونڊل منڪون رو ان ايسو رئي هاڪ پريا وازون رو لوئي پين مست هئي. هايا ننه ڏيڪين هون گهڻو حيروني پڙي ڳيو.

⑦ تئيون آڪاشي دُوت مون ننه ڪيڏو: ”تون ڪم حيرون ٿيوه؟ هون تون ننه هائي اُونڌي وات هڙماويه جي هايا ڏوشي رو مطلب ڪي سئ، ان هايا

جهنگلي زناور رو مطلب کي سئ، جيا مانه او سړل سئ، ان جيا را هات ماما ان ذه شينگړا سئ.

⑧ جيو جهنگلي زناور تئين ديكوه، او اگي هتو، ان همئته نتي، ان ايئا كيړ پوتون را پونئيرا موئين ټي بارو نيهرين هميش را موت ربي سزا كاشي. ان دنيا را او بدائي منک، جيون را نوم جيون را كتاب پر نتي لکل، جيا پر هميش رو جيون ليذا واژون را نوم دنيا نهيا ټي مور لکوتا، او جهنگلي زناور ننه زوئين حيرون ټيشي، کم تو او اگي هتو، ان همئته نتي، ان وزي آيا واژو سئ.

⑨ هيا وات را پارام عقل ټي ويچاروو کپنه. هات ماثون رو مطلب هات دُونگر سئ، جيون مانه دوشي پينئيه. ⑩ ان اوئون رو مطلب هات پادشا پښ سئ. پونس پادشا اگي پږي گيا، هيك پادشا همئته سئ، ان هاتمو پادشا هزون نتي آيو. پښ زيون او اوشي، تو او ضرور ټورټيک وار ريشي. ⑪ ان او جهنگلي زناور، جيو اگي هتو ان همئته نتي، اوئا رو مطلب هيك آئمو پادشا سئ. او پيزون هاتون پادشائون را پاها رو سئ، ان او هميش را موت ربي سزا كاشي. ⑫ ان جيا ذه شينگړا تئين ديكيا، اوئون رو مطلب ذه پيزا پادشا سئ، جيا هزون پادشا نتي ثيا، پښ اوئون ننه اي اکتياربي زږشي جي او ټورټيک وار هوډي جهنگلي زناور پيزو راز كږشي. ⑬ اوئون ټدون ذهون پادشائون ربي سوچ هيك سئ. ان او آپري طاق ان اکتياربي جهنگلي زناور را كيذا پرموئته واپراوئ. ⑭ او پگوون را نوم مانه ساړل گهيتا ټي جنګ كږشي. پښ پگوون را نوم مانه ساړل گهيتو اوئون مانه جيت كږشي، کم تو او دټيون رو دټي ان پادشائون رو پادشا سئ. ان اوئا پيزا اوئا را تيراوړل، سونډل ان ايموندار منک هوشي.

⑮ تئيون آكاشي دوت مون ننه وزي كيډو: "جيا دريا تئين ديكيا، جيون وسا پونډي دوشي پينل هتبي، اوئون دريائون رو مطلب دار دار نات، منكون را توږا، قومون ان ټولي سئ. ⑯ ان جيا ذه شينگړا تئين ديكيا، جيون رو مطلب ذه پادشا سئ، او ذه پادشا ان جهنگلي زناور پونډي دوشي ټي وير راكشي. او

پُونڌي ڏوشي رو ٻڌوئي ڪئين ڪوهين اُٿا ننه اُگهاڙي ڪرشي پري، اُٿا رو مونھ ڪائي زاشي، ان اُٿا ننه ڏيوتا ۾ ٻاڙشي پري. (17) ڪم تو پڳوون اُٿون رن منون ۾ ايوا ڪوم ڪريا رو ڪيال نوڪيوھ، جيا ٿي اُ پڳوون رو مقصد پورو ڪرڻ. ان هيون نمونھ اُ هيڪ من ٿين آڀرو راز جهنگلي زناور ري اڪتياري هيٺ ڏيشي، زئون هوڏي پڳوون ري ڪيڏل واتون پوري نه ٿن.

(18) ان جي ڏوشي ٿين ڏيڪيھ، اُٿا رو مطلب اُ موتو شهر سڻ، جيو ڌرتي رن پادشاهون مانھ راز ڪرڻ.

بابل نومي موتا شهر را ڪنم ٿيا رو مثال نيا رڻ ڏي پڳوون ڪراپ ڏنيا نڻ سزا ڏيشي

18 (1) ٿيا ڪيڙ مئين هيڪ ٻيزو آڪاشي ڏوت آڪاش ٿي اُوترتون ڏيڪيو. اُٿا رڻي گهڻي اڪتياري هئي، ان اُٿا را زبڪتا سوجها ٿي پوري ڏنيا مانھ روشني ٿي گهي. (2) اُنھ موتا هاڏ ٿي اُوتومو ڪيڏو:

”پڙي گيوھ،



بابل نومي موتو شهر پڙي گيوھ!
هوئھ هُونو ٿين پُوتون رو گهر ٿيوھ
ان ٻڌون ڪراپ پُوتون رو آستونو ٿيوھ
ان ٻڌون اپڙال ان پُونڌون پڪيون رو
آستونو ٿيوھ.

(3) ڪم تو ٻڌيون قومون ري منڪي
اُٿا را پُونڌا ڪوم رو ڌراڪون رو ڌارو پيڏوھ
ان آڀ مانھ پڳوون رڻي سزا ليڏيھ.
ڌرتي ري پادشاهي اُٿا رن پُونڌون ڪومون ۾ حصو ليڏوھ،
ان اُٿا ري گهڻي عيش عشرت ري سڪ ري ڪري

ڌرتي را واپاري شائوڪار ٿيا.

④ ٿيون مٿين آڪاش ٿي هيڪ پيزو هاڏ ام ڪيتون هومپڙيو:
”نيهري آو، مارون منڪون، اُوئا شهر موئين ٿي نيهرِي آو!

متون تمِي پڻ اُوئا پيڙا ڏوه نه ڪرو
ان اُو مُصِيتون تمون مانھ پڻ نه پڙئ،
جي اُوئا مانھ پڙشي.

⑤ ڪم تو اُوئھ اتا گھڻا ڏوه ڪرياه
جي اُوئا رون ڏوهون رو ڍڳ آڪاش هُڏي پُوگي گيوھ،
ان پُگُون اُوئا را ڪراپ ڪوم همپارين اُوئا نئھ سزا ڏيشي.

⑥ او سزا ڏيڏا وازون آڪاشي ڏوتون،
زم اُوئھ ڪراپ ڪوم ڪرياه، تم تمِي اُوئا نئھ سزا ڏيو!
اُوئا رون ڪومون را ايوزا مِ اُوئا نئھ پيئي سزا ڏيو!
اُوئھ آپرا پيئالا موئين ٿي منڪون نئھ نقصون پيئاريوھ
تمِي هاگي پيئالا موئين ٿي اُوئا نئھ پيڻ مانھ سزا پيئارو!
⑦ زتو اُوئھ آپرو مون وڌاريوھ ان عيش عشرت ڪريھ،
اتو اُوئا نئھ پُونڌي هاڙي ڪرو ان ڌڪ تڪليب ڏيو!

ڪم تو اُو آپرا من مِ ام ويچارئھ:
’هُون تو روئي سون، هُون رونڌي رونڌ تو نئي،
ان مون نئھ ڪيڏي پڻ ڪئين ڌڪ نئين ٿئھ.’

⑧ تيام هِيڪا ئي ڏي مِ اُوئا مانھ اي مُصِيتون آوشي،
پيماري ان موت، ڌڪ ان ڌڪار،
ان اُو پاهي مِ پڙين ڪتم ٿيشي،
ڪم تو پڙيو پرميشور اُوئا رو نيا ڪريا وازو سئھ،
ان اُو طاقت وازو سئھ.

⑨ ډرتي را پاډشا، جيئي اوتا روڻ پوندون ڪومون ۾ ان عيش عشرت ۾ حصو ليدو، زئين اوتا را ٻريا روڻوهارو زوشي، تئين اوڙي تين اوتا را پار لين روشي. ⑩ اوتا ربي پوندئي حالت زوين اوڙي پيشي ان پيڪ ۾ شيئي شيئي اوين ڪيشي:

”اڦسوس، اڦسوس، موتا شهر مانھ اڦسوس!

طاقت واڙا بابل نومي شهر مانھ اڦسوس!

ڪم تو سزا پڙ ۾ اوتا مانھ آوي پڙيھ.



⑪ ډرتي را واپاري ڙي تين اوتا

را پار لين روڻ، ڪم تو هوڻه ڪوئي
اوتون رو شيمون ويساتو نئين لئ.

⑫ او اڳي اي ويست: هيم، چونڊئي،

هيرا ان موتي، سوتي ان وونگنائڻ رنگ را لوگهڙا، ريشمي ان ڪرمشي رنگ را لوگهڙا، هر قسم ربي ڪشبو واڙي لاکڙي، هاڻي را ڏونت ري ٻڌي شينهنون، قيمتي لاکڙي ري، پيتر ان لوري، ان سنگي مرمر ري ٻڌي شينهنون، ⑬ ڌالچنئي ان وڪروونو، ڏونپ ساڙيا واڙو ڳونڊ، ملم ان لوپون، ڌراڪون رو رس ان زيتون رو تيل، ميدو ان ڪڪ، ڳاڻو مال ان ريو مال، گهوڙا ان ڳاڙي، ان منڪ پن، جيون نئ ڳلوم ڪرين ويست. ⑭ او واپاري شهر نئ زوين ڪئھ:

"شهر ري منكي زتي شينهنون لالچ راكين ليدي تي،
 او بدتي اوئون ٿي ڪوهرائي گيه.
 شهر رئي مال ملڳت، مون ان شون،
 او بدوئي ڪتم ٿي گيوه.
 او هوئه وڙي ڪيڏي نئين زڙه."

15) جيا واپاري هائي شينهنون ويستا ان هايا شهر ري ڪري شائوڪار ٿيا تا،
 او شهر رئي پونڌڙي حالت زوئين پيئاشي ان پيڪ ۾ شيئي شيئي اُپيا ريشي. ان
 او ڏکي ٿين اوئا را پار لين روشي، 16) ان ام ڪيشي:
 "اڦسوس، اڦسوس، موتا شهر مانھ اڦسوس!
 اوئا را لوگهڙا نائوڪام نائوڪا سوئي هتا،
 ان مونگهام مونگها وونگنائِي ان ڪرمشي رنگ را هتا،
 ان اوئا رو شنگار هيم، هيرون، ان موتيون رو هتو.
 17) پڻ اتيي گهڻي مال ملڳت پڙ ۾ ڪتم ٿي گيهه."

تئين هر پيڙو هاڪليا وازو، هر منڪ جيو پيڙا مانھ پنڌ ڪرھ، ان پيڙا وازا،
 ان زتا منڪ سمونڊ مانھ ڪوم ڪرھ، او بدائي شيئي اُپي ريا. 18) ان اوئي شهر
 را ٻڙيا رو ڏونهارو زوئين ڪيڏو: "ايئا موتا شهر جيو پيڙو ڪوئي نٿي." 19) ان
 اوئي آپرا ماڻا مانھ ڏوڙ نوڪئي، ان ڏکي ٿين اوتومئا هاڏ ٿي ام پار لين رويا:
 "اڦسوس، اڦسوس، موتا شهر مانھ اڦسوس!

زتون منڪون را پيڙا سمونڊ مانھ وئھ،
 او ايئا شهر ري ملڳت ري ڪري شائوڪار ٿياھ.
 پڻ بدوئي ڪئين پڙ ۾ ڪتم ٿي گيوه."

20) او آڪاش ۾ ريا وازون، ڪشي ڪرو! او پڳوون رون سونڊل منڪون، مڪ
 شيلون، ان پڳوون رو نياپو ڏيڏا وازون، ڪشي ڪرو! ڪم تو او شهر تمون ٿي
 پونڌه نمونھ وُڍوھ، تيام پڳوون نيا ڪرين اوئا نھ سزا ڏيڏيھ.



②1 تئيون هيڪڻه طاقت واڙهه آڪاشي دُوت موتا گهرت را پڙ زوڙو موتو
پوٽو اُوپاڙين سُمونيد موئين گهڻا زور ٿي ڦڳوڙيو پرو ان ڪيڏو:
”بابل نومي موتو شهر

هيو زور ٿي ڊهاشي

ان اُوتا رو نوم نيشون نئين رڻه.

②2 وينا ان گايا واڙا، وونهڙي ان هرثايون
وڙي اُوتا شهر ۾ ڪيڏي هومپڙيام نئين آوڻه.

ان ڪيا ٿي پڻ ڏنڌا رو ڪوئي پڻ ڪاريگر
وڙي اُوتا شهر ۾ ڪيڏي نئين زڙڻه.

ان گهرتي رو آواز پڻ

وڙي اُوتا شهر ۾ ڪيڏي هومپڙيام نئين آوڻه.

②3 ان ڏيو رو سوجهرو پڻ

وڙي اُوتا شهر ۾ ڪيڏي نئين زبڪڻه.

ان لاڏا ان لاڏي ري ڪشي رو آواز پڻ

وڙي اُوتا شهر ۾ ڪيڏي هومپڙيام نئين آوڻه.

ڪم تو اُوتا شهر را واپاري ڏنيا را موتا منڪ هتا،

ان اُوتا شهر ري ڪري ٻڌي قومون زوڻه جاڏو ٿي شيترائي گهي،

②۴ ان پښتون رو نياپو ډيډا وازون رو
ان پښتون رو سونډل منكون رو
ان پورې دنيا ۾ زتون منكون رو ګون ټيوه،
اوتون ټون رو ګون اوتا شهر ري منكي كړيوه.

آكاش ۾ ريا وازا ټډائي پښتون را وكون كړه

19 ① تيا كيژ مئين آكاش ۾ زوتنه الاهي گهتون منكون رو هيك موتو
آواز ام كيتون هومپړيو:

”هليلويا! پښتون را وكون ته!

تارن، مون ان كڙا اپتا پښتون رڼي سته،

② كم تو اوتا را قينصلا هاسا ان انصاف وازا سته.

كم تو اوتنه هيا گهڼي پونډي ډوشي ننه سزا ډيډيه

جيته پونډو كوم كړي كرين ډرتي ننه كراب كرښت پري،

ان هيا ننه سزا ډين اپرون شيواډاريون را ګون رو پډلو ليدوه.

③ ان اوتي گهڼي زني وڙي كيدو:

”هليلويا! پښتون را وكون ته!

هيا پونډا شهر را بريا رو ډونهاتو

هميش هوډي اونسو سرتو ريشي.

④ ان آكاش ۾ چوويه آگيوون ان چار جيو پښتون ري پښي پريا، جيو گهاډي

مانه پينل هتو، ان ام كيتون اوتا رڼي پوزا كړي:

”آمين! هائي وات هاسي سته.

هليلويا! پښتون را وكون ته!

⑤ تيون گهاډي ټي هيك آواز ام هومپريام آيو:

”اپتا پښتون را وكون كړو،

تمي ٻڌائي جيا اُوتا را شيواڌاري سو

ان جيا اُوتا رو مون راکوه،

نونا موٽا ٻڌائي اُوتا را وڪوٽ ڪرو؛

⑥ تئيون مئين ايوو آواز هومپڙيو، جيوو الاهي گهڻون منڪون رو آواز، ان

جيوو گهڻا پوٽي را گهوگهات ان گهڻا گرا گاز رو آواز. اُوتھ آواز ام ڪيڏو:

”هليلويا! پڳوون را وڪوٽ تھ!

ڪم تو آڀڻو پڙيو پرميشور ٻڌون رو ڌڻي

پاڌشا تين راز ڪرھ.

⑦ آڀي ڪش تيون ان ڪشي ڪرون

ان اُوتا را وڪوٽ ڪرون؛

ڪم تو او توڻو آيوھ رو

زئون پڳوون را نوم مانھ ساڙل گهيتو

وشواسي منڌڙي نھ آڀ پيڙي راڪشي،

ان وشواسي منڌڙي آڀڙي تيارڻي ڪريھ،

زوئھ لاڏا رو ويوا رو توڻو آيو هوئھ

ان لاڏي آڀڙي تيارڻي ڪريھ هوئھ.

⑧ پڳوون اُوتا نھ پيريا هارو نائوڪا نائوڪا

سوٽي، ڌوڙا شيتراڻ صاڦ لوگهڙا ڏيڏاھ.

هايون سوٽي لوگهڙون رو مطلب او نائوڪا ڪوم سئھ، جيا پڳوون ري سونڊل

منڪي ڪريھ.

⑨ تئيون آڪاشي ڏوت مون نھ ڪيڏو:

”ام لڪ!

پاڳواڙا او سئھ جيا ايٺا ڪشي ۾ تيزاڙل سئھ

زئون پڳوون را نوم مانھ ساڙل گهيتو

وشواسي منڌڙي نٿه آپ پيڙئي راڪشي،
زوتڻه او ويوا ري ڌاوت ۾ تيڙاول هوڻه.

ان پسڻه اوڻه مون نٿه وڙي ڪيڏو:

”هائي ٻڌي واتون پڳوون ري هاسي واتون سڻه.“

⑩ تئين هون اوڻا آڪاشي ڏوت رڻي پوزا ڪريا هارو اوڻا ري پڳي پڙيو.
پڻ اوڻه مون نٿه ڪيڏو: ”هم مت ڪر! هون پڻ ٿارا زم، ان ٿارون پايون را زم
جيا ايسو رڻي پرل هاڪ مونڻه، پڳوون رو شيواڌاري سون. تون مارئي نئين، پڻ
پڳوون رڻي پوزا ڪر! ڪم تو تمي منڪ جيا ايسو رڻي پرل هاڪ مونوھ ريا،
ان هون جيو پڳوون رو نياپو ڏيونھ ريو، آبي ٻڌائي هيڪ جيو سون.“

توڙا گهوڙا مانھ سڙل منڪ رو مثال

ايسو جيت ڪرين

پڳوون رڻ ڪلاڦ وڍيا واڙون منڪون نٿه سزا ڏيشي

⑪ تئين مئين آڪاش ڪلل ڏيڪيو. ان زوڻو، هيڪ ڌوڙو گهوڙو ڏيڪيام آيو ان اوڻا
مانھ ڪوڪ سڙل هتو، جيا نٿه ”ايمونڌار“ ان ”هاسو“ ڪڻه. او انصاف پرموڻه
ڦينصلا ڪرڻه ان جنگ وڏه. ⑫ اوڻا ري اونڪيون ڏيوڻا ري زهراڙ جيوي هتي، ان



اوڻا را ماتا مانھ گهڻا تاج هتا.
اوڻا مانھ اوڻا رو آپرو هيڪ نوم
لڪل هتو. اوڻا نوم رڻي اوڻا آپ
شوا ڪيا نٿه ڪبر نٿي. ⑬ اوڻا رو
پيرل گهنڱهو لوڻي ۾ ڪرڙل هتو،
ان اوڻا رو راڪل نوم ”پڳوون رو
وچن“ سڻه. ⑭ آڪاشي ڏوتون ري
ڦوز را توڙا ڌوڙون گهوڙون مانھ

سڙين نائوڪا سوٽي، ڌوڙا ان صاف لوگهڙا پيرين اُوٽا وونهڙ وونهڙ ويتات ريا. (15) اُوٽا را مونڊا ٿي هيڪ ٽڪئي ترؤٽار نيهڙه، زم اُوٽا ٿي پگهوون رڻي وات نه مونڊا واڙي قومون رون منڪون ننه مارنه. اُو لو رو گيڏيو لين پوري طاقت ٿي اُوتون مانھ راز ڪرشي. اُو ٻڌون را ڌڻي پگهوون ري سزا ري موتي هوڌي موئين ڌراڪون ننه لتاڙين ڦيهلنه ان پگهوون رنه ڪلاڦ وُڍا واڙون منڪون ننه سزا ڏنه. (16) ان اُوٽا را گهنگها مانھ ان اُوٽا ري هائڙ مانھ اُوٽا رو اي نوم لڪل سئھ:

”پادشائون رو پادشا ان ڌڻيون رو ڌڻي.“

(17) ڌڻيون مئين هيڪ آڪاشي ڏوت ڌي موئين اوڀل ڏيڪيو. اُوتھ ٻڌون پڪيون ننه، جيا اُنسا آپ ۾ اُودتات ريا، موتا هاڙ ٿي اُوتومڻو ڪيڏو: ”وو را! پگهوون ري موتي ڌاوت مانھ پيڙا ٿيو، (18) زم تمڻي پادشائون رو مونھ، قوزون رون موتون سابون رو مونھ، طاقت واڙون رو مونھ، گهوڙون رو مونھ ان گهوڙون مانھ سڙل قوزيون رو مونھ، ان ڳلومون رو ان آڙاڏون رو، نونون موتون ٻڌون رو مونھ ڪائو!“



(19) ڌڻيون مئين جهنگلي زناور ان اُوٽا پيڙا ڌرتي را پادشا ان اُوتون ري قوزون ڏيڪي. اُو ٻڌائي پيڙا ٿيل هتا، زم اُو گهوڙا مانھ سڙل منڪ ان اُوٽا ري قوز ٿي جنگ ڪرھ. (20) پڻ جهنگلي زناور زهلائي ڳيو، ان اُو پيزو زناور پڻ زهلائي ڳيو

جيو ڪوڙ هاڪلينَ آپ ننه پڳوونَ رو نيا پو ڏيڏا واڙو ڪئڻ، جيئن جهنگلي زناور را ڪيڏا ٿي پر سا ڏيکاريا تا، ان آڀرون پرسون ٿي اُوئون منڪون ننه شيتريا تا، جيئي جهنگلي زناور رو نيشونَ آپ مانه هٿايو تو، ان جيا جهنگلي زناور رئي مُورتي پوزتا. اُوئون بيئون ننه اُوئا ڍنڍ موئين جيو تا ڦڳوڙيا پرا جيئي گهندڪ ري پاهي ٿي ٻڙتي رڻ. ②1 ان اُوئون را پاها را پيزا ٻڌائي اُوئا تروٺار ٿي مروٺا، جيئي گهوڙا مانه سڙل را مونڊا ٿي نيهرتي ٿي. ان ٻڌائي پڪي اُوئون رو مونھ ڪائي ڪائينَ ڌراپيا پرا.

پورنگ ناڳ رڻ ڦيڙي ٿيا رو مثال شيطونَ پڳوونَ را راز هيٺ رڪائڻ

20 ① تيون مئين هڪا آڪاشي دُوت ننه آڪاش ٿي اُوترتون ڏيڪيو. اُوئا ڪن پُوتون را پونئيرا رئي ڪُونسي هتي ان اُوئا را هاٿ ۾ هڪ موٽي هونڪر هتي. ② اُوئه پورنگ ناڳ ننه زهاليو، جيو هاڳي زونا وڪت رو هاڳ، ڏوه ڏيڏا واڙو شيطونَ سڻ، ان اُوئا ننه هزار سالون هُڏي ٻونڊيو پرو. ③ ان پسڻ اُوئا ننه پُوتون را پونئيرا موئين هيٺ ڦڳوڙيو پرو، ان ڌروازو تازا ٿي پنڌ ڪرين ڌروازو سيل موهر ڪريو ان پڳوونَ رو ٺپو هٿيو، زم اُو ڏنيا ريون قومون ننه نه شيترڻ، زيون هُڏي هزار سال پورا نه ٿڻ. تيا ڪيڙ ٿوڙيڪ وار هُڏي اُوئا ننه ضرور سوڙشي.

④ تيون مئين گهاڏي ڏيڪي، ان اُوئون مانه منڪ پينا، ان پڳوونَ اُوئون ننه ڦينصلو ڪريا رئي اِڪتباري ڏيڏي. ان مئين هايون منڪون را جيو ڏيڪيا. اُوئون رو ماٿو ايسو رئي پرل هاڪ ان پڳوونَ رو وچن مونڊا ري ڪري ويو تو، ڪم تو اُوئي جهنگلي زناور رئي پوزا نتي ڪري، نڪو اُوئا ري مُورتي رئي پوزا ڪري ٿي، ان نڪو آپرا نلاڙ ان هاٿ مانه اُوئا رو نيشونَ هٿايو تو. ان اُو جيو تا ٿيا، ان ايسو ڪريست پيزا اُو هزار سالون هُڏي راز ڪرتا ريا. ⑤ هايا ننه پيرهيڻ وار


جیوی اُونو کئھ. پڻ پیزا منک جیا مری گپا تا، پگھون اُونون نئہ تئیون هُودَی جیوتا نہ کریا، زئیون هُودَی هائی هزار سال پورا نہ ٿیا. ⑥ پاگوازا ان پویتر اُو سئہ، جیا پیرھین وار جیوی اُونیا رئہ توتئہ جیوتا تئہ. اُونون رو پیزو موت ماگي نئین تئہ، پڻ اُو پگھون ان ایسو کریست را پوزاری ٿیسی، ان اُو ایسو کریست پیزا هزار سالون هُودَی راز کرشی.

نیٹ شیطون ان اُونا را پاها را منک ہمیش را موت رئی سزا کاشی

⑦ زئیون هزار سال پورا ٿیسی، تئیون پگھون شیطون نئہ قید ٿی سوڙشی. ⑧ ان پسئہ شیطون دُنیا را دنگ هُودَی پوری دُنیا ریون ٻڌیون قومون نئہ شیتريا هارو ٻڌیل زاشی، زم جوج نومی آگهیون نئہ ان اُونا ری ماجوج نومی قوم نئہ، جیا پڻ پگھون رئہ کلاڦ سئہ، اُونون ٻڌون نئہ اُو جنگ هارو پیزا کرئہ. اتا گهڻا منک پیزا ٿیسی، زتی سُمونڊ را کپ مانھ وارئی سئہ.

⑨ هائی ٻڌائی گهڻا منک پوری دُنیا ٿی آیا ان اُونا شهر نئہ ڦری آیا، جیئہ پگھون را سونڊل منک پیزا رئہ، جیا شهر ٿی پگھون پریم کرئہ. پڻ پاھی آکاش ٿی کرئی ان حملو کریا وازون نئہ کتم کریا پرا. ⑩ ان شیطون، جیئہ اُونون ٻڌون نئہ شیتريا تا، اُو پاھی ان گهندک ری ڍنڍ موئن ڦگوزوئو، جیئہ

جهنگلی زناور ان اُو پیزو
زناور پڻ اگي ڦگوزوئو تو،
جیو کوڙ هاڪلین آپ نئہ
پگھون رو نیاپو ڏیدا وازو
کیتو. اوتئہ اُو ٻڌائی ڏي
رات همیش هُودَی پونڌي
هاڙي سزا کاشي.



پڳوونَ اوئون منڪون رو نيا ڪرشي جيا مري ڳياھ

⑪ ٽئين مٿين هيڪ موٽي ڏورڻي گهاڙي ان اوئا مانھ پنا واڙو ڏيڪيو. اوئا ڪن ٿي آڪاش ان ڌرتي پاڳي ڳيا، ان اوئون ھارو ڪيٽھ ٿي ماڳ نہ ريو. ⑫ ان مٿين اوئون منڪون نئھ ڏيڪيا، جيا مري ڳيا تا. او نونا موتا ٻڌائي گهاڙي ھوما اوپل ھتا. ان او ڪتاب ڪولوئا، جيون ۾ منڪون را ڪرل ڪوم لڪل سئھ. ان هيڪ پيزو ڪتاب ڪولوئا، جيو جيون رو ڪتاب سئھ، جيا ۾ اوئون منڪون را نوم لڪل سئھ جيون نئھ ھميش رو جيون زڙشي. ان مرل منڪون رو نيا اوئون رون ڪرل ڪومون پرموئھ ٿيو، زم ھايون ڪتابون ۾ لڪل ھتو. ⑬ زتا منڪ سمونڊ موئين ٻوڏي ڳيا تا، سمونڊ اوئون مرل منڪون نئھ آڀرا قوضا ٿي ساڏيا پرا ان پاسا ڏيڏا. ان زتا منڪ موت را قوضا ۾ مرلون را جڳت موئين ھتا، موت ان مرلون رئھ جڳت پڻ اوئون مرل منڪون نئھ آڀرا قوضا ٿي ساڏيا پرا ان پاسا ڏيڏا. ان پسئھ هر هيڪ رو ڦينصلو اوئا رون آڀرون ڪرل ڪومون پرموئھ ٿيو. ⑭ ٽئين موت ان مرلون رو جڳت پاھي ري ٻڙتي ڍنڍ موئين ڦڳوڙوئا. پاھي ري ٻڙتي ڍنڍ پيزو موت سئھ. ⑮ ان جيون پڻ منڪون را نوم جيون را ڪتاب ۾ لڪل نٿا، او منڪ پاھي ري ٻڙتي ڍنڍ موئين ڦڳوڙوئا.

پڳوونَ نوو آڪاش ان نوئي ڌرتي ناوشي

21 ① ٽئين مٿين نوو آڪاش ان نوئي ڌرتي ڏيڪي، ڪم تو پريھيون آڪاش ان پريھين ڌرتي ڪتم ٿي ڳيا تا، ان ھايا ۾ سمونڊ ھتو ئي نئين. ② ان مٿين يروشلم نومي پريتر شھر نوو ٿيل ڏيڪيو. او پڳوون ڪن ٿي آڪاش موئين ٿي اوترتوت ريو، ان او ايوو تيار ڪرل ھتو، جيوي لاڏي آڀرا لاڏا ھارو شنگارل ھوئھ. ③ ان مٿين گهاڙي ٿي اوتومئو ھاڏ ام ڪيتون ھومپريو: ”زوئو، ھوئھ پڳوون منڪون وسا رئھ،

ان اوتون پيڙو هميش هُودِي ريشي.
 ڌار ڌار قومون را منک اوتا را سُونيل منک تيشي،
 ان پڳوون آب اوتون پيڙو هوشي ان اوتون رو پڳوون تيشي.
 ④ اوتون منکون ريون اونکيون ٿي ٻڌائي هونهُوڙا پونهشي پرا،
 ان هونهُو موت نئين ٿي،

ان نڪو ڌک، نڪو رُونڳو، نڪو ڌوک ريشي،
 ڪم تو پيرهيان جڳت ري واتون ڪم ٿي گيه.

⑤ تيون گهاڙي مانهُ پينا واڙه ڪيڏو:
 ”زوئو، هون ٻڌوئي ڪئين نوو ڪرونه ريو.“

ان پسنه وڙي مون ننه ڪيڏو:

”اي لک، ڪم تو اي واتون مونيا جيوي ان هاسي سئ.“

⑥ تيون اوتنه مون ننه ڪيڏو: ”ٻڌي واتون پوري ٿي گيه. هون پيرهون ان
 آڪري سون، شروع واڙو ان پڇاڙي واڙو سون. جيو ترهو سئ، اوتا ننه هون آب
 هميش را جيون ري ويرِي ٿي امهي پوئي پيئاريه. ⑦ جيو اڏڳ وشواس راڪين
 پونڌائي مانهُ جيت ڪرئ، اوتا ننه هائي ٻڌوئي ڪئين زڙشي، ان هون اوتا رو
 پڳوون هويئ، ان او مارو ٻار هوشي. ⑧ پڻ هيئت نه راڪيا واڙا، وشواس ساڌيا
 واڙا، پڳوون رنه ڪلاڦ ڌرم مانهُ وُڍا واڙا، کون ڪريا واڙا، پونڌو ڪوم ڪريا
 واڙا، جاڏو ڪريا واڙا، مورتيون ان ڏيوئونون ننه پوزيا واڙا، ان ٻڌائي ڪوڙ
 هاڪليا واڙا، اوتون رو پاڳ اي سئ جي او پاهي ان گهندڪ ٿي ٻڙتي ڍنڍ موئين
 ڦڳوراشي، جيو پيڙو موت سئ.“

نوا ٿيل يروشلم شهر رو مثال


اڪر ۾ پڳوون را سُونيل منک پڳوون ڪن هڪ ۾ ريشي

⑨ تيون او هات آڪاشي ڏوت، جيون ڪن اڳي آڪري مُصيتون ٿي پرل هات

نُونېږا هتا، اُونون موئين ٿي هيڪ زڻو مُون ڪن آيو ان مُون ننه ڪيڏو: ”هال! هُون تُون ننه اُو جڳا ڏيکارِيه، جيئنه وشواسِي منڌڙِي هميش هُوڏِي پڳوون را نوم مانه ساڙل گهيٽا پيڙِي ريشي، زم لاڏِي هميش هُوڏِي لاڏا پيڙِي رنه.“⁽¹⁰⁾ ان اُوئه پَوِتر آتما ري ڪڙا ٿي مُون ننه هيڪا موتا ان اُونسا ڏونگر مانه اُوپاڙِي لِيڏو، ان مُون ننه يروُسلم نومي پَوِتر شهر پڳوون ڪن ٿي آڪاش موئين ٿي اوترتون ڏيکارِيو.⁽¹¹⁾ پڳوون رو زبڪتو سوجهرو اُوئا شهر موئين چلڪتوت ريو. شهر ايوو چلڪتوت ريو، جيوو مونگهام مونگهو ڪاس جيوو اوزرو يشب نومي هيرو چلڪه.⁽¹²⁾ شهر رنه چوڌاري موتِي ان اُونسِي پينت هتِي. ان شهر را ٻارنه دروازا هتا، ان دروازون مانه ٻارنه آڪاشي ڏوت اُوپل هتا. ان دروازون مانه اِسراييلي قوم رن ٻارون ذاتون را نوم پڻ لڪل هتا.⁽¹³⁾ ترڻ دروازا اڳوڻيئه ٻاهنه هتا، ترڻ اوتراڏليئه ٻاهنه، ترڻ ڏکڻاڏليئه ٻاهنه، ان ترڻ دروازا اڻوڻيئه ٻاهنه هتا.⁽¹⁴⁾ شهر ري پينت ري پُٽياڏ ۾ ٻارنه شيپرون هتي، ان اُونون مانه پڳوون را نوم مانه ساڙل گهيٽا رن ٻارون مُڪ شيلون را نوم لڪل هتا.

⁽¹⁵⁾ جيو آڪاشي ڏوت مُون ٿي ٻولتوت ريو، اُوئا ڪن ماپيا هارو هيم رو وال هتو، زم اُو شهر رو، اُوئا رن دروازون رو، ان اُوئا ري پينت رو ماپ ڪرئ.

⁽¹⁶⁾ شهر چوڪنڊو هتو. زتو لونبو هتو، اتو ويڪرو هتو. ان آڪاشي ڏوت آپرا وال ٿي شهر رو ماپ ڪريو، تو شهر هاڏا هات هو گائو لونبو هتو. ان زتو لونبو هتو، اتو ويڪرو هتو، ان اتو اُونسو پڻ هتو.



①7 تئيون اُوته شهر ري پينت رو ماپ ليدو ان اونا رئي ويكراي هيك هو چوتاليه نزي هتي. هائي ماپ منكون ري نزي پرموئته هتو. ①8 پينت يشب نومي هيرا رئي ناوَل هتي، ان شهر اوززا كاس جيوا هاسا هيم رو ناوَل هتو. ①9 پينت رئي پيادا قسم قسم رون هيرون ٿي ناوَل ان شنگارل هتي. پيادا رئي پيرهين شپير يشب نومي هيرا رئي هتي، پيزي نيلم نومي هيرا رئي، ترئمئي شب چراغ نومي هيرا رئي، چارمئي زمرد نومي هيرا رئي، ②0 پونسمني عقيق نومي هيرا رئي، سمئي لعل نومي هيرا رئي، هاتمئي پُكراج نومي هيرا رئي، ائمئي فيروزه نومي هيرا رئي، نومئي زبرجد نومي هيرا رئي، دهمئي يمئي نومي هيرا رئي، اگيارمئي سنگي سنبلي نومي هيرا رئي، ان هارمئي ياقوت نومي هيرا رئي هتي. ②1 ان هارنه دروازا هارنه موتي هتا، هر هيك دروازو هيكو كا موتي رو هتو. ان شهر رو وسليو موتو پكو اوززا كاس جيوا هاسا هيم رو هتو.

②2 ان مئين شهر موئين پگيون رو كوئي مندر نه ڏيكيو، ڪم تو ٻڌون رو ڌئي پريو پرميشور ان پگيون را نوم مانه ساڙل گهيتو، او آپ اونا ماڳ سئ. ②3 ان شهر نه نڪو ڏي را سوجهرا رئي نڪو انزوئاڙيا را سوجهرا رئي ضرورت سئ، ڪم تو پگيون رو زبڪتو سوجهرو شهر نه سوجهرو ڏه، ان پگيون را نوم مانه ساڙل گهيتو اونا شهر هارو زوئنه ڏيو سئ. ②4 ڏنيا ري ٻڌي قومون اونا شهر را سوجهرا م ويسي، ان ڌرتي را پادشا آڀرو مال ملگت اوئنه لي آوين پگيون را نوم مانه ڏيشي. ②5 اونا را دروازا ڪيڏي پنڌ نئين ٿنه، ڪم تو اوئنه رات ماڳي نئين پڙنه. ②6 ان ٻڌي قومون آڀرو مال ملگت، مون ان شون اونا موئين لي آوشي ان پگيون را نوم مانه ڏيشي. ②7 ان اونا موئين ڪوئي پونڌي شينه ڪيڏي نئين اوئنه، ان نڪو مورتيون ان ڏيوئونون نه پوزيا وازو، ان نڪو ڪوڙو منڪ اونا موئين آوشي. پڻ روڳا او منڪ موئين آوشي، جيون را نوم هميش رو جيون ليڏا وازون را ڪتاب م لڪل سئ، جيو جيون رو ڪتاب پگيون را نوم مانه ساڙل گهيتا ڪن سئ.

هميش را جيون را ذريا رو مثال آکاش م پڳوون کن هميش هوډي هک ئي هک هوشي

22 ① تئيون آکاشي دوت مون ننه هميش را جيون را پوئي رو ذريا
ډيکارڼو، جيو کاس جيو هيرا را زم اوززو هتو. ذريا اوتا گهاډي
ټي نيهرتوت ريو، جئي پڳوون رئي ان اوتا را نوم مانه ساڙل گهيټا رئي سئ،
② ان شهر را موټا پکا را وس م ويتوت ريو. ان ذريا رون پئون کچون مانه
هميش را جيون را وڻ هتا. اوتون وټون مانه سال م بارئ وار مئينئ مئينئ ميو
تئ، ان اوتون وټون را پونڙا ٻڌيون قومون ننه هازي هوري راکيا هارو سئ.
③ اوتئ کوي شينه پتل نئين هوئ. ان پڳوون رئي ان اوتا را نوم مانه ساڙل
گهيټا رئي گهاډي اوتا شهر م هوشي، ان پڳوون را شيواډاري اوتا رئي شيوا
کرشي. ④ ان او پڳوون ننه روپرو پاڙشي، ان اوتا رو نوم اوتون را نلاڙ مانه
لکل هوشي. ⑤ اوتئ رات نئين هوئ، ان اوت رون منکون ننه نکو ډيو رئي
نکو ډي را سوجهر رئي ضرورت هوشي، کم تو پريو پرميشور آب اوتون مانه
سوجهر کرشي. ان او منک هميش هوډي پاډشا ٿين راز کرشي.
⑥ تئيون آکاشي دوت مون ننه کيڌو: ”هائي ٻڌي واتون مونيا جيوي ان
هاسي سئ. پريو پرميشور، جيو آپرو نياپو ڏيڏا واڙون ننه واتون همپراوئ، اوتئ
مون آپرا آکاشي دوت ننه آپرون شيواډاريون ننه هائي واتون ډيکارڼا هارو
ميليوه، جي واتون جلڌي م ضرور ٿيشي.“

هيئت راکوو کم نو ايسو جلڌي پاسو آيا واڙو سئ

⑦ تئيون ايسو کيڌو:

”زوئو، هون جلڌي آوونھ ريو.

پاڳواڙو او سئ

جيو پڳوونَ را نياپا ري واتون مونځه
جي ايټا ڪتاب موئين لکل سئ.

⑧ مئين يوحنا هائي ٻڌي واتون هومپزيه ان ڏيکيه. ان زئين مئين هائي واتون هومپزي ان ڏيکي، تنيون هون اوٽا آڪاشي ڏوت رئي پوزا ڪريا هارو اوٽا ري پڳي پڙيو، جيئن مون ننه هائي واتون ڏيکاري تي. ⑨ پڻ اوٽه مون ننه ڪيڏو: ”هم مت ڪر! هون پڻ ٿارا زم، ان ٿارون پايون را زم جيا پڳوون رو نياپو ڏيڏا واڙا سئ، ان اوٽون را زم جيا ايټا ڪتاب ۾ لکل واتون مونځه، پڳوون رو شيواڌاري سون. تون مارئي نئين، پڻ پڳوون رئي پوزا ڪر!“

⑩ تنيون اوٽه وڙي مون ننه ڪيڏو: ”ايٽا ڪتاب ۾ لکل پڳوون را نياپا ري واتون تون ڪتاب پنڌ ڪرين موهر مان هئين هٿارين مت راڪي. ڪم تو ايسو رنه وڙي پاسو آيا رو توڻو ڏوڪرو سئ.“

⑪ جيو منڪ پڳوون رنه ڪلاڦ وٺه، او پلنه پڙيو پڳوون رنه ڪلاڦ وٺه. ان جيو ڪراپ سئ، او پلنه پڙيو ڪراپ نموننه وٺه. پڻ جيو منڪ پڳوون ري وات مان وٺه، او پڳوون ري وات مان وٺو رنه! ان جيو پوٽر سئ، او پوٽر نموننه وٺو رنه!“

⑫ تنيون ايسو وڙي ڪيڏو: ”زوٽو، هون جلدِي آوون رهيو. ان مارا آيا رنه توڻه هون منڪون ننه انصاف ڏيه، ان هر هيڪ ننه آپرون ڪرل ڪومون پرموننه ايوزو ڏيه. ⑬ هون پيرهين ان آڪري سون، شروع واڙو ان پڇاڙي واڙو سون، هون هميش ٿي سون ان هميش هوڏي ريه.“

⑭ پاڳواڙا او سئ جيا آپرا گهنڱها ڏوئين آپ ننه پوٽر راڪه، زم اوٽون ننه هميش را جيون را وڻ ٿي کاڌا رو حق زڙه، ان او ڌروازون ٿي شهر موئين زائ. ⑮ پڻ ڪوترا جيو ڪراپ منڪ،



جاڏو ڪريا واڙا، پُونڌو ڪوم ڪريا واڙا، ڪُون ڪريا واڙا، مُورتيون ننه ان ڏيوتونون ننه پُونيا واڙا، ان اُو ٻڌائي منڪ جيون ننه ڪُوڙي واتون وڻهه ان جيا ڪُوڙ هاڪلئه، اُو ٻڌائي ٻارا ريشي.

①6 مٿين ايسو، آڀرو آڪاشي ڏوت ميلو، زم اُو تمون ننه وشواسي منڌريون هارو هايون واتون را پارام هاڪ پرين همپزاوئه. هُون دائود پاڌشا ري پيڊي رو وستار سون، ان هُون چلڪيا واڙا پروڙيا تارا را زم جيت ان راز ڪريا واڙو سون.

①7 پويتر آتما ان وشواسي منڌري، جئي لاڏي را زم آڀرا ڌڻي را آيا رئي وات زوئه رئي، ٻي ئي ڪئه: ”آو!“ ان جيو اي واتون هومپڙه، اُو پڻ ڪئه: ”آو!“ ان جيو ڪوئي ترهو سئه، اُو آوئه، ان جيا ننه وڻهه اُو هميش را جيون رو پوڻي امهي پيئه.

①8 هُون اوئون ٻڌون منڪون ننه هوشيار ڪرونه، جيا ايئا ڪتاب ۾ لکل پڳوون را نياپا ري واتون هومپڙه. جي ڪوئي ايئون واتون ننه وڌارئه، تو پڳوون اوئا منڪ مانه هائي مصيبتون ميلشي، جيون را پارام ايئا ڪتاب ۾ لکل سئه. ①9 ان جي ڪوئي ايئا ڪتاب ۾ لکل پڳوون را نياپا ري واتون گهٽ ڪرئه، تو پڳوون اوئا ٿي اوئا رو حق ڪوهي ليشي، زم اُو پيزون پيزو هميش را جيون را وڻ ٿي نه ڪائه، ان پويتر شهر موئين نه پيهئه، جيون را پارام ايئا ڪتاب ۾ لکل سئه.

②0 ايسو، جيئنه اي ٻڌي واتون هاڪ پرين همپزاويه، ام ڪئه: ”هوئه، هُون جلڏي آونه ريو.“

آمين! آو، پڙو ايسو.

②1 پڙو ايسو تمون ٻڌون مانه ڪڙپا ڪرئه! آمين!

پَوِيتَر انجِيل را کاس وين

ابراهيم

ابراهيم هيك ايوو منک هتو جيا نئه پگوونَ نَوِي قُوم نايا هارُو سُونديو. زئيون اُو ان اُوئا رُئي دوشي ساره بي ئي دُوكرا هتا، تنيون پگوونَ ابراهيم تي وائيدو كُريو جي اُوئا را اولادَ تي موتئي قُوم تيشي، جيا قُوم ري كُري پوري دُنيا نئه آشيرواڏ زَرشي (پيدائش 2:12-3).

هايا وائيدا پرموتئه ابراهيم رو ديكرو اِضحاق تيو، ان اِضحاق رو ديكرو يعقوب تيو، جيا رو پيزو نوم پگوونَ اسرائيل راكيو. اسرائيل رُئي پيديي موتئي اسرائيلي قُوم تي گهي. هايا قُوم موئين پريو ايسو پيدا تيو، ان اُو پوري دُنيا رُون منكون نئه دوهون رُئي ماقيي ديدا هارُو ان شيطونَ را قَوضا تي سڏايا هارُو آيو. ان هيوئه نمونئه پگوونَ رو ابراهيم تي كرل وائيدو پورو تيو.

اسرائيلي

يهودي قُوم نئه اسرائيلي پڻ ڪئه، ڪم تو پوريي يهودي قُوم هيك اسرائيل نومي منک ري پيديي تي سئه. اسرائيل رو نوم شُروع ۾ يعقوب هتو، پڻ پگوونَ اُوئا رو پيزو نوم اسرائيل راكيو. اسرائيل را ٻارئه ديكرا هتا، جيون نئه اسرائيلي قُوم را ڏاڏا ڪئه. ايئون ٻارون منكون تي اسرائيلي قُوم ري ٻارئه ذاتون تي.

ايلياه

ايلياه هيك پگوونَ رو نياپو ديدا واڙو هتو، جيا ري هاڻي پگوونَ گهڻا پرسا ڏيکاريا، ان جيئئه گهڻون منكون نئه پگوونَ هوما واڙيا. تيا ڪيڙ پگوونَ وائيدو كُريو جي اُو پريو رئه آيا مور ايلياه جيوو پيزو منک ميلشي

جيو منکون ننه پښتون هوما اوښي (ملاکي 4: 5-6). اي وائيدو يوحنا پوټر
سنون ډيدا وازا مانه پورو ټيو (لوقا 17: 1).

پښتون را حکم

پښتون را حکم او کاس حکم سته جيا پښتون اسرائيلي قوم وازون ننه
ډيدا، زم او اوښون پرموښته وئ. اوښون ننه موسي را لکل حکم پښ کښه، کم
تو موسي پښتون را کيدا پرموښته او حکم لکيا.

پښتون رو راز

پښتون رو راز ټيون ټنه، زټيون منک پښتون ننه آپرو پادشا مونين اوښا را
کيدا پرموښته وئ. ايسو آپ اوين پښتون ري مرضي مانه پورته نمونته وين
پښتون رو راز ساوو کريو. زټيون منک ايسو مانه وشواس اوښه ان پښتون
ري وات مانه ويوا مډه، ټيون او پښتون را راز مړ اوښه. زټيون هيوا منک
مري زانه، ټيون اوښون ننه آکاش مړ پښتون کن هميش رو جيون زږشي، جيا
ننه تارښ پښ کښه. هيا تارښ ننه پښتون رو راز پښ کښه، کم تو اوښه آکاش
مړ پښتون رو راز پورته نمونته وئ.

پښتون رو گهر

پښتون رو گهر هيک موټام موټو مندر هتو، جيو يروشلم شهر موئين ناول
هتو. يهودي قوم را زاترو اوښه زائين پښتون را نوم مانه مال سڙاوتا. تيام
پښتون را گهر ننه دوم مندر پښ کښه. اوښه پوزاري پښتون رڼي پوزا کرتا
ان مال ان ډونپ پښتون را نوم مانه ساڙتا.

70ع م رومي قوج يروشلم شهر مانه حملو کرين پښتون را گهر ننه کتم
کريو پرو. هيا وات را پارام پريو ايسو مور ټي همپڙايو تو (لوقا 21: 6). آز
هوډي پښتون رو گهر وزي ټي نوروښو.

پښتون را گهر را شيواداري

اي منک پښتون را گهر موئين پوزاريون رڼي مدت کرتا ان پښتون را گهر رڼي همپار کرتا. او بدائي لوي ري ذات ټي هتا.

پښتون را مندر

پښتون را مندر گهڻا هتا. جيئن جيئن يهودي منک ريتا، اوئن او پښتون را مندر نوراوتا. پښتون رون مندرون موئين منک پښتي کرتا، پراڻا کرتا، شاستر هومپرتا ان پښتون ري واتون شيکتا. پڻ اوئن نکو پوزاري هتا، نکو مال سرتاوتا. پښتون رون مندرون ننه يهوديون را مندر پڻ کڻه، کم تو يهودي قوم را منک اوئن پښتي کرڻه.

پښتون رو نياپو ڏيڏا واڙا

پښتون رو نياپو ڏيڏا واڙا او منک سڻه جيون کن پښتون آپري وات ساوئي کرڻه، زم او بيزون منکون ننه همپراوڻه. پوټر شاستر را زونا قرار ډ پښتون رو نياپو ڏيڏا واڙي ايسو را آيا را پارام گهڻو اڳي همپرايو تو. پښتون رو نياپو ڏيڏا واڙون ننه اڳم گپوني پڻ کڻه.

پوت

وشواسيون را شاستر پرموئن، جيا پوت منکون ننه سونتڻه، او مرل منکون را جيو نتي، پڻ آکاشي ډوت سڻه، جيا پښتون رڼه کلاڻ ټيا، ان هوڻه شيطون ري وات مانه وڻه. پوت منکون ننه تنگ کرڻه ان کوڙ کرين آپ ننه پيزا کياک رو جيو ڏيکارڻه.

پاشکا پرې

پاشکا پرې او پرې سڻه، جيا ننه يهودي ايئا وات ري ياد ډر مناوڻه،

جي پڳوون يهودي قوم ننه ڳلومي ٿي آزاڌ ڪراوين مصر ملڪ موئين ٿي ٻارئي ڪاڍي. پاشڪا پرڀ کاس ڪرين هڪا ڏي رئي پرڀ سئ، پڻ پورو هڪ هفتو هيا ننه مناوئ. پاشڪا پرڀ را هفتا ننه روٽيون رئي پرڀ پڻ ڪئ.

ايسو پاشڪا پرڀ رنه ٿوئنه آڀرو جيو پڳوون را نوم مانھ ڏين هوڙي مانھ مريو، ان ترئمئ ڏي وڙي جيوي اوئيو. آڀرا هوڙي مانھ مريا مور اوئ پاشڪا پرڀ رو نوو مطلب راکيو جي او آڀرو جيو پڳوون را نوم مانھ ڏيڏا ٿي هر قوم موئين ٿي منڪون ننه شيطون را قوضا ٿي سڏاوين اوئون ننه پچاوئ، زم او پڳوون ري وات مانھ وئ ان اوئون ننه هميش رو جيون زڙئ. تيام وشواسي منڪ پاشڪا پرڀ مانھ ايسو رنه جيوي اوئيا رو ڏي مناوئ.

پوزاري

شاستر موئين ايٺا ويڻ رو کاس مطلب سئ او منڪ جيا پڳوون را گهر موئين پوزا رو ڪوم ڪرتا، پڳوون را نوم مانھ مال ان ڏونپ ساڙتا، ان پوري اسرائيلي قوم هارو پراٽنا ڪرتا. ٻڌائي پوزاري لوي ري ذات ٿي هتا، ان او موسي را پائي هارون ري پيڍي را هتا.

پوٽر جگا

پوٽر جگا پڳوون را گهر موئين هڪ ڪوئي هتي. اوئا موئين پوزاري پڳوون را نوم مانھ ڏونپ ساڙتا، ان اوئا را اونگئا مانھ پوزاري پڳوون را نوم مانھ مال ساڙتا.

پوٽرون م پوٽر جگا

پوٽرون م پوٽر جگا پڳوون را گهر رئي ٻڌون ٿي پوٽر جگا هتي. او پوٽر جگا رو هارو موئينليو حصو هتو، جيا آڏو پڙڏو لاڳل هتو. پوٽرون م پوٽر جگا موئين او کاس پيٽي هتي، جيا موئين او پتر راڪل هتا جيا مانھ

پڳوونَ را ڏه حُڪم لکل هتا. رُوڳو مُک پُوڙاري سال ۾ هيڪ وار اُوڻم زائي هيڪتو، زم اُو ٻڌي اسرائيلي قوم رُون ڏوهون رِي ماقِيي مونڳنه.

پَوِيتَر ڏي

يهوديون موئين پَوِيتَر ڏي چنچر رو ڏي سئه. پَوِيتَر شاستر پرموڻم پڳوونَ جڳت نايا رو کوم آچار را ڏي مانه شروع ڪريو، ان پسئ سوئون ڏيئون ۾ ٻڌوئي ڪئين ناوين هاتمنه ڏي، مطلب چنچر رنه ڏي آروم ڪريو. پڳوونَ اُوڻا هاتما ڏي ننه پَوِيتَر راڪيو، زم منڪ پڻ پَوِيتَر ڏي را آروم ڪرئ ان پڳوونَ رِي پڳتِي ڪرئ. تيام پَوِيتَر ڏي ننه ويهوما رو ڏي پڻ ڪئ. يهودي منڪ نه رُوڳو پڳوونَ رو اي حُڪم مونتا جي پَوِيتَر ڏي رو آروم ڪروو، پڻ اُوئي آڀرو رَواز پڻ نايو جي پَوِيتَر ڏي رو ڪئين ئي پڻ کوم نه ڪروو. وشواسي همئنه آچار را ڏي ننه پَوِيتَر ڏي راڪئ، ڪم تو آچار را ڏي رو پڙپو ايسو موت ٿي جيوي اُوڻيو تو.

پَوِيتَر سنون

پَوِيتَر سنون اُو ريت سئه جيا ٿي منڪ پاسئ جي اُو آڀرا ڪراپ کوم ساڏين پڳوونَ ري وات مانه وِشي. يوحنا پَوِيتَر سنون ڏيڏا واڙنه ڪيڏو جي منڪون رنه آڀرا ڪراپ کوم ساڏين توبونه ڪروو ان پڳوونَ ري وات مانه ويو ان پَوِيتَر سنون ليوو، تو پڳوونَ اُوڻون را ٻڌائي ڏوه ماق ڪرشي. ان اُوڻه منڪون ننه پڙپو ايسو مانه وشواس راڪيا رو پڻ ڪيڏو. وشواسيون موئين، منڪ ايشور ٻاپ، ڏيڪرا ان پَوِيتَر آتما را نوم ٿي پَوِيتَر سنون لئ. ايتا ريت ننه سنون سنسڪار پڻ ڪئ، ان گروڏارڻا پڻ ڪئ، جيا ٿي منڪ پڙپو ايسو را شيل تئ، ان وشواسي منڌڙي موئين آئنه. شروع شروع ۾ پَوِيتَر سنون ليڏا ري ريت ۾ منڪ پوڻي ۾ ٿئي هتا. همئنه ڪوڪ هم ڪرئ ان ڪوڪ ماما مانه پوڻي نومين پَوِيتَر سنون ڏئ.

پینتیکوست پرې

یهودی پینتیکوست پرې کڼک رو قصل اوتريا مانه مناوئ. پینتیکوست یوناني ټولي رو وین سټه جیا رو مطلب سټه پنجاه. یهودي منک پینتیکوست پرې نټه پاشکا پرې ټي پنجاه ډیئون کيټ مناوئ. پرېو ایسو پاشکا پرې رټه توئنه هوزي مانه مري گېو، ترئمه ډي وزي جيوي اونیو، چالیهون ډیئون هودی شیلون نټه ډیکارټا ډیتوریو، ان آکاش مانه سټي گېو. هیکا هقتا کيټ، پینتیکوست پرې رټه توئنه، پوئتر آتما وشواسي منډري رون منکون نټه زړیو. پوئتر آتما رټه قصل اوتريا واري پرې مانه آوو هیک نیشون سټه جي زم منک قصل لټین پیزو کرئ، تم پوئتر آتما ري کري منک ایسو مانه وشواس راکین پگوون ري منډري موئین پیزا ټیشي.

جیوي اونیو

جیوي اونیو یر ان جیوتو ټیا یر قرق سټه. زئیون ایسو مرل منکون نټه جیوتا کریا، تئیون ټیا کيټ او منک وزي پیزون منکون را زم آپرا توئا مانه مري گيا. پښ زئیون ایسو موت ټي جیوي اونیو، تئیون اوتا رو ډیل مریا وازو نتو. هیوته نمونته زئیون نیا رټه ډي پگوون مرل منکون نټه جیوي اوناژشي، تئیون اوتون نټه ایثا ډنیا وازو ماتي رو ډیل نئین زړه، پښ ایسو را زم ایوو ډیل زړشي جیو کيډي نئین مره (1 کرنتیون 15: 35-55).

ډوت

ډوت پگوون را ناوَل جیو سټه، جیون نټه پگوون آپري شيوا کریا هارو نایا. او پگوون را کیدا ټي منکون نټه نیایا ډه، منکون رټي همپار کرئ، ان کيډیک کيډیک کراب منکون نټه پگوون را طرف ټي سزا پښ ډه. ډوت وایرا را زم سټه، ان گهڼو کرین او ډیکيام نټي اوتا، پښ زئیون او منکون نټه ډیکارټا ډه، تئیون گهڼو کرین او منکون جیوا ډیکائ.

شيطون پڳوون رو هيڪ دُوت هتو، پڻ اُو پڳوون ٿي اُوپروت ٿين پڳوون رڻه ڪِلاڦ ٿيو ان پيزا ڪئينڪ دُوت پڻ شيطون را پاها وازا ٿيا. شيطون ان اُوٿا را پاها را دُوت منڪون رون منون ۾ گلت ڪيال نوڪين پُوتون، زمرون، ان ڏيوٿونون را رُوپ لين منڪون نڻه نَقصون ڏڻه، پيوڙاوهڻ، اُوئون نڻه شيتريه، ان منڪون ٿي هر قسم را پُونڌا ان ڪراپ ڪوم ڪراوهڻ، زم اُو پڳوون رڻي شيوا ان پوزا نه ڪرڻه پڻ ڏوه ڪرڻه ان ڀرم ۾ پڙڻه.

دائود

دائود يهودي قوم رو هيڪ سوڪرو هتو، جيا نڻه پڳوون پاڌشا نايا هارو سُونديو، ڪم تو اُو پڳوون ري مرضي مانھ ويتو. اُو موٽو پاڌشا ٿيو ان پڳوون وائيدو ڪريو جي اُوٿا ري پيڊي موئين ٿي هيڪ ايوو پاڌشا آوشي جيا رو راز ڪيڏي ڪتم نئين ٿڻه (2 سموئيل 16:7، زبور 3:89-4).
ايٿا وائيدا پرموٿڻه پڳوون دائود پاڌشا ري پيڊي ٿي پريو ايسو ميليو، جيا رو راز پوري دنيا مانھ هميش ريشي (لوقا 1:33).

روتيون رڻي پرڀ

يهودي پاشڪا پرڀ را پورا هڻتا نڻه روتيون رڻي پرڀ ڪڻه، ڪم تو اُوٿا هڻتا موئين اُوئون نڻه ڊيل روتئي کاڌا رو نا پاڙل سڻه، ان رُوگي شيڪل روتي کاوو، جي جلدِي ۾ تيار ٿڻه. هيوڻه نموٿڻه يهودي منڪ ياد ڪرڻه جي مصر ملڪ ري گُلومي ٿي نيهر يا رڻه ٿوٿڻه اُوئون نڻه جلدِي ۾ ڀاڳوو پڙيو، ان جلدِي ۾ روتئي کاوئي پڙئي.

شاستر

شاستر اُو ڪتابون سڻه جيون نڻه پڳوون آپرون منڪون ٿي لڪاويھ. شاستر را ٻي حصا سڻه. شاستر را پيرهيان حصا نڻه زُونو قرار ڪڻه جيا رو مطلب سڻه زُونو وسن، ڪم تو اُوٿا ۾ پڳوون را اڳلوڪا وسن را پارام لڪل سڻه،

جيو پڳوونَ موسي را وکت ۾ اسرائيلي قوم ٿي ٻونڌيو تو (خروج 3:19-8، 17:1-20، 28:34). زُونو قرار زونا زمونا موئين، پريو ايسو را آيا مور، لڪيام آيو. زونا قرار موئين موسي را لڪل حُڪم، پڳوونَ رو نياپو ڏيڏا وازون را ڪتاب، ان پزنون رو ڪتاب زبور پڻ سئ.

شاستر را پيزا حصا نئ نوو قرار ڪئ جيا رو مطلب سئ نوو وسن، ڪم تو ايئا ۾ پڳوونَ را نوو وسن را پارام لڪل سئ جيو پڳوونَ ايسو هات ٻڌون منڪون ٿي ٻونڌيوه، جي جيو ڪوئي ايسو مانه وشواس را ڪئم، اوئا نئ ڏوهون رئي ماقئي ان هميش رو جيون زڙشي (يرميا 31:31-34، متي 28:26). نوو قرار ايسو را آيا ڪيڙ لڪيام آيو. نوو قرار ايسو را پارام سئ ان ايئا موئين ايسو ري حياتي، وشواسي منڌري ري شروعات ان وشواسي ڌرم را پارام لڪل سئ. نوو قرار نئ انجيل پڻ ڪئ.

شاستر زوٿيا واڙا

شاستر زوٿيا واڙا او منڪ هتا جيا شاستر را زوٿو هتا. او پيزون منڪون نئ پڳوونَ را پارام شيڪاڙتا، ان ڪورئون موئين پڻ پڳوونَ رون حُڪمون رو مطلب هزماوتا. اوئون نئ شاستري پڻ ڪئ.

شيطون

شيطون پڳوونَ رو دشمن سئ، جيو هميش پڳوونَ رٿ ڪلاڦ ڪوم ڪرئ. او پڳوونَ رو آڪاشي ڏوت هتو، پڻ آپ نئ موتو هزمين پڳوونَ رئي مرضي ساڏين آپري مرضي مانه ويا مڏيو. او هميش ڪوڙ ڪرئ، منڪون نئ تنگ ڪرئ ان اوئون ٿي ڏوه ڪراوا ڪرئ. او پوتون رو مک پڻ سئ، جيا نئ يهودي منڪ بعزبول، ايليس ان بليعال پڻ ڪيتا.

صدوقي

صدوقي يهودي ڌرم ري هيڪي پالتي رو نوم سئ. صدوقي پالتي را منڪ

زونا قرار را رُوگا موسي را لکل شاستر ننه مونتا. او ايئا وات مانه يقين راکتا جي مريا کيتر منک وري جيوٽا نئين تته. صدوقي پالتي را گهڻا منک پوزاري هتا، جيا پگهون را گهر موئين پوزا رو کوم کرتا.

فريسي

فريسي يهودي ڌرم ري هيڪي پالتي رو نوم سته. فريسي پالتي را منک زونا قرار را پورا شاستر ننه مونتا. او ايئا وات مانه يقين راکتا جي مريا کيتر منک وري جيوي اوئشي. فريسي پالتي را منک سکتِي ٿي آڀرا ڌرم مانه ویتا، ان پگهون رون حڪمون ٿي وڌيڪ آڀرا طرف ٿي حڪم ناوين اوئون مانه پڻ ویتا.

کريست

کريست او منک سته جيا ننه پگهون منکون ننه پچايا هارو سونديو. پگهون اي وائيدو کريو تو جي او هيوو منک ميلشي، ان آڀرا وائيدا پرموتته ايسو ننه ميليو، زم آڀون ننه ڏوهون رئي ماقئي زڙته، ان آڀي پگهون ري سزا ٿي پچي زائون.

کريست يوناني ٻولي رو وين سته، جيا رو مطلب سته "جيا مانه تيل نومل سته." پگهون را سونڍل منک ننه کريست تيام کڻه ڪم تو اوئون ڏيئون موئين زئون منک پاڌا سونڍا، تئين اوئا را ماما مانه تيل نومتا. کريست ننه مسيح پڻ ڪڻه.

لاوي

لاوي يعقوب رو هيڪ ڏيکرو هتو. پگهون لاوي ري ذات ننه سونڍي، زم او پگهون ري پوزا ان شيوا رو کوم ڪرته. جيا لاوي ري ذات ٿي هارون ري پيڊي را هتا، او پوزاري هتا، ان جيا لاوي ري ذات ٿي پزيون پيڊيون را هتا، او شيواڌاري هتا. اڳي زئون يهودي قوم را منک رڻ موئين ريتا، تئين

لاوي ري ذات را منک پڳوون را تنبو موئين پوزا ان شيوا ڪرتا. سليمون
پادشا را وڪت ٿي لين او يروشلم شهر م پڳوون را گهر موئين پوزا ان شيوا
ڪروا مڌيا.

مسيح

مسيح او منک سئہ جيا نئہ پڳوون منکون نئہ پڇايا هارو سونديو. پڳوون
اي وائيدو ڪريو تو جي او هيو منک ميلشي، ان آپرا وائيدا پرموئہ ايسو
نئہ ميليو، زم آپون نئہ ڏوهون رئي ماڦئي زڙئہ، ان آبي پڳوون ري سزا ٿي
پڇي زائون.

مسيح عبراني ٻولي رو ويٺ سئہ، جيا رو مطلب سئہ ”جيا مانہ تيل نومل
سئہ.“ پڳوون را سونڊل منک نئہ مسيح تيام ڪئہ ڪم تو اوئون ڏيئون
موئين زئون منک پادشا سونڊتا، تئيون اوئا را ماتا مانہ تيل نومتا. مسيح
نئہ ڪريست پڻ ڪئہ.

مک پوزاري

پوزاريون موئين ٿي هيڪ منک سونڊل هتو، جيا نئہ مک پوزاري ڪيتا.
او ڌرمي پنچائيت رو آڳيوون هتو، ان اوئا رو کاس ڪوم اي هتو، جي سال
موئين هيڪ وار او پڳوون را گهر ري پوٽرون م پوٽر جگا موئين زائين پوري
اسرائيلي قوم رون ڏوهون رئي ماڦئي مونگتو.

مک شيلا

مک شيلا او شيلا سئہ جيون نئہ پريو ايسو سونڊيا، زم او منکون نئہ ايسو
را پارام شيڪاڙئہ. شروع م ايسو ٻارون زئون نئہ مک شيلا سونڊيا. اوئي ايسو
پيرا رين اوئا ري واتون هومپزي ان اوئا را ڪوم ڏيڪيا. زئون ايسو موت ٿي
جيوي اوئيو، تئيون اوئہ مک شيلون نئہ ڏيڪاڙا ڏيڏا ان اوئون نئہ اي حڪم
ڏيڏو جي او پريو ايسو را پارام هاڪ پرين منکون نئہ همپزاوئہ.

پيزون کيونک کاس وشواسيون ننه پښ مځ شپلا کيتا، جيا اي هاگي کوم کرتا، مثال پولوس ان برنباس.

منک ذات رو ډيکرو

ايسو آپ ننه منک ذات رو ډيکرو کيتو. اينا را ټي مطلب سته. هیک مطلب سته روگو منک، کوټي پښ هوته، جيا ټي ايسو رنه منک ټيا رټي وات ساوټي ډيکارل سته. پيزو مطلب سته، او کاس آکاشي منک جيو پگهون را طرف ټي بدون منکون مانه راز کريا وازو سته. اي مطلب داني ايل را لکل شاستر را کتاب موئين ساو ډيکارل سته (داني ايل 13:7-14). "رات رو پگهون مون ننه شپنو ډيکارو. مئين منک ذات را ډيکرا جيوو کياک ننه ډيکيو. او آکاش رون واډزون پيزو اتوت ريو. او پگهون کن آيو، جيو هميش ټي جيوټو سته، ان اوټا ننه پگهون ډوکټو تيزي گيو. پگهون اوټا ننه اکتيارټي، مون ان راز ډيدو، زم هر قوم، ملک ان ټولي را منک اوټا رټي پوزا کرته. اوټا رو راز هميش ريشي، ان کيډي کتم نئين تته." منک ذات را ډيکرا ننه منک ډيکرو پښ کته.

موسي

موسي او منک هتو، جيا ننه پگهون سونديو، زم اسرائيلي قوم ننه گلومي ټي آزاده کراوين مصر ملک ټي ټاري کايته، ان اوټون رټي اگپوونټي کرته. پگهون موسي ننه حکم ډيدا، زم او اسرائيلي قوم ننه پگهون را طرف ټي همپراوته.

موسي را لکل حکم

موسي را لکل حکم پگهون را حکم سته، جيا پگهون موسي ننه منکون ننه همپرايا هارو ډيدا. موسي اي ټدائي حکم لکيا. موسي را لکل پونس کتاب سته، جيا شاستر رو هیک حصو سته. ايتون پونسون کتابون ننه موسي

را لکل حکم کا موسيٰ رو لکل شاستر کڻه. ان ايئون ننه نيئم شاستر پڻ کڻه.

ناکو ليذا وازا

يهودي منک ناکو ليذا وازون ننه گهت هزمتا، کم تو او ڌاري رومي حکومت هارو اپرون منکون ٿي ناکو ليتا، ان اپرون ڌاري قوم وازون ساہون ري گهري زيا ٿي ايتائي زاتا. تيام پيزا يهودي اوئون ننه موتا ڏوهاري هزمتا، ان اوئون ٿي شپ راکتا.

وشواسي

پريو ايسو ننه مونيا وازون ننه وشواسي کڻه، کم تو او پريو ايسو مانھ وشواس راکڻه. وشواسيون ننه مسيحي، عيسائي، ان کرسچن پڻ کڻه. وشواسيون ۾ کيٽڪ ٽوڙا سٺ، مثال کيٽڪ ان پروٽسٽنٽ، پڻ ٻڌون رو شاستر ان وشواس نومو هيڪ رو هيڪ سٺ.

هارون

هارون موسيٰ رو هڳو پائي هتو. پڳوون هارون ننه سونديو، زم او ان اوئا را اولاد پوزاري ٿين پڳوون رڻي پوزا کرڻه ان اپري قوم ري ماڻي هارو پڳوون را نوم مانھ مال ان ڏونپ ساڙڻه. ٻڌائي پوزاري هارون ري پيڊي ٿي هتا.

هميش رو جيون

زيون منک ايسو مانھ وشواس اوڻه، تيون اوئا رڻي اڳلوڪي حياتي کتم ٿه، ان پريو ايسو ٿي واسطو راکين نوي حياتي شروع ٿه، ان مريا ڪيڙ اوئا ننه تارڻ زڙه ان پڳوون ڪن آکاش ۾ ره. هايا نوي حياتي ان تارڻ ننه هميش رو جيون کڻه.

يعقوب

يعقوب ابراهيم رو هڅو پوترو هتو جيا رو پيزو نوم پځوون اسرائيل راكيو.
اسرائيلي قوم، جيا ننه يهودي پښ كنه، يعقوب ري پيډي ټي سته.

يهودي

يهودي هيك قوم سته، جيا ننه اسرائيلی قوم پښ كنه. پځوون اوټا قوم
ننه سونډي، اوټا رڼي همپار كرڼي، ان اوټا ننه اپرا حڪم ډيډا، زم او پځوون
ري مرضي مانه وټه ان ډاريون قومون ننه نمونو ډيکارين پځوون هومي واژه.
هايا يهودي قوم موئين پځوون آږو ډيکرو پږو ايسو پيدا كړيو.

پَوِتر انجیل را کاس مزمون ان حوالا

آدمي ان توشي رٔ آبت ۾ کيوئ نمونئ ويوو

متي 6-4:6, 1 کُرتيون 16-1:7, افسيون 33-21:5, کُليون 19-18:3, طيطس 5-3:2, عبرانيون 4:13, 1 پطرس 7-1:3

آکاشي هک

لوقا 34-32:12, يوحنا 3-1:14, 2 کُرتيون 8-1:5, فليپون 23:1, کُليون 1:3, 1 پطرس 5-4:1, ٿرشن 11-1:4, 4-1:21, 5-22-22:21, 15-14:22

ايسو پڳون رو ٽيڪرو سٺ

متي 30-27:11, 17-13:16, لوقا 35:1, يوحنا 18-1:1, 29-19:5, 40-35:6, 58:8, 27-25:11, 11-5:14, 5-1:17, 31-26:20, مڪ شيلون را کوم 16-13:3, 12-10:4, روميون 4-3:1, 1 کُرتيون 11:3, 2 کُرتيون 6-4:4, 21:5, گلتيون 5-4:4, فليپون 11-5:2, کُليون 20-15:1, 10-9:2, عبرانيون 14-1:1, 28-26:7, 1 يوحنا 2-1:2, 20:5, ٿرشن 18-12:1, 16-11:19

ايسو رو زلم

متي 25-18:1, 23-1:2, لوقا 38-26:1, 20-1:2, يوحنا 14:1, گلتيون 5-4:4, فليپون 7-6:2, عبرانيون 18-14:2

ايسو منكون نٺ شيڪارڙه ان مونڊون نٺ هازا هورا ڪرڻه

متي 25-23:4, 29-28:7, 36-35:9, 6-1:11, لوقا 44-14:4, مڪ شيلون را کوم 38-36:10, يوحنا 31-30:20

ايسو گهڻا پرسا ٽيڪارڙه

متي 15-1:8, 33-28:8, 7-1:9, 33-18:9, 14-9:12, 22:12, 32-15:14, 28-22:15, 38-32:15, 18-14:17, 34-29:20, 22-18:21, مرقس 28-21:1, 37-32:7, 25-22:8, لوقا 8-4:5, 15-11:7, 13-10:13, 4-1:14, 14-12:17, 51-50:22, يوحنا 11-1:2, 54-46:4, 9-5:5, 7-1:9, 44-11:11, 6-4:21, مڪ شيلون را کوم 22:2

ايسُو زهلاڻه ان اوتا نڌ موت رڻي سزا ڏيڌا رو ڦينصلو تڻه

متي 26:47-68, 27:1-2, 27:11-31, مرقس 14:43-65, 15:1-20, لوقا 22:47-53, 22:63-71,
23:1-25, يوحنا 18:14, 18:19-24, 18:28-19:16

ايسُو هُوڙي مانه مرائه

متي 27:32-56, مرقس 15:21-41, لوقا 23:26-49, يوحنا 19:17-37

ايسُو مقوم موئين پورائه

متي 27:57-66, مرقس 15:42-47, لوقا 23:50-56, يوحنا 19:38-42

ايسُو موت ٿي جيوي اونهه ان ڏيکارڙا ڏنه

متي 28:1-20, مرقس 16:1-8, لوقا 24:1-49, يوحنا 20:1-14, مڪ شيلون را ڪوم 3:8-8,
2:24-32, 3:15, 4:10, 4:33, 10:43, 13:39, 17:3-31, روميون 4:25, 4:24-25,
1 ڪرنتيون 15:3-8, 15:12-21, ڌرشن 1:18

ايسُو آڪاش مانه سڙي زائھ

لوقا 24:50-51, مڪ شيلون را ڪوم 9:11, 2:36, 5:30-31, روميون 8:34, افسيون
1:20-23, 2:9-11, عبرانيون 1:3-11, 2:9, 4:16, 7:26, 10:12-14, 1 پطرس 3:22

ايسُو وڙي دنيا ۾ پاسو آوشي

متي 24:29-44, يوحنا 14:1-3, مڪ شيلون را ڪوم 10:11, 3:21-19, 3:21-20, 3:21-20,
ڪلسيون 4:3, 1 ٿسلنيڪيون 9:10, 13:13, 11:5, 2 ٿسلنيڪيون 1:6-10, 2:4-1,
1 تيمٿيئس 6:13-15, 2 تيمٿيئس 4:8, عبرانيون 9:28, 2 پطرس 1:18, 1 يوحنا 3:1-3, ڌرشن
7:1, 12-13

پڳوون

مرقس 10:27, 12:29-30, لوقا 37:1, 36:35-36, يوحنا 4:24, مڪ شيلون را ڪوم 14:14-17,
17:31, 22:31, روميون 18:23, 11:36, 1 ڪرنتيون 4:6, 2 ڪرنتيون 1:3, 1 تيمٿيئس 1:17,
6:16, عبرانيون 4:13, 10:31, يعقوب 1:17, 1 پطرس 14:17, 1 يوحنا 5:1, 4:12-7,
4:16, يهوداه 1:25-24, ڌرشن 4:8-11, 15:3-4

يڳوون منگون مانه يلائي کرئ ان اوئون رئي همياز کرئ

متي 34-25:6, 31-29:10, مُک شيلون را کوم 17-15:14, روميون 28:8, 36:11, کلسيون 17:1, عبرانيون 3:1, يعقوب 16-13:4

يڳوون را باز

يوحنا 13-12:1, روميون 17-14:8, گلتيون 7-6:4, عبرانيون 11-5:12, 1 يوحنا 3-1:3

يڳوون را نوم مانه مال سازيا رئي ضرورت نقي

متي 13:9, مرقس 33:12, روميون 1:12, عبرانيون 18:10-6:9

يڳوون ريون واتون مانه ويوو

يوحنا 15:14, 21:14, 24-23:14, 17-10:15, روميون 10-8:13, 1 پطرس 16-14:1, 1 يوحنا 8-3:2, 24-22:3, 2 يوحنا 5-1:6

يوندو کوم نه کروو

متي 30-27:5, يوحنا 11-2:8, روميون 10-8:13, 1 کُرنتيون 11-9:5, 20-9:6, گلتيون 19:5, افسيون 3:5, کلسيون 6-5:3, 1 تسلانيکيون 8-1:4, عبرانيون 4:13, يهوداه 7:1

تارن

يوحنا 17-16:3, مُک شيلون را کوم 39-37:2, 12-11:4, روميون 11-1:5, 13-9:10, افسيون 10-1:2, 1 تيمتيئس 16-15:1, 7-3:2, 1 پطرس 5-3:1

تنگ - منک وشواسيون نئ تنگ کرشي

متي 12-10:5, مرقس 13-9:13, لوقا 9-4:12, يوحنا 21-18:15, 4-1:16, مُک شيلون را کوم 41:5, روميون 37-35:8, 14-12:12, 21-17:12, 1 کُرنتيون 13-11:4, 2 کُرنتيون 11-8:4, 10:12, فليپون 29-28:1, 2 تسلانيکيون 8-4:1, 4-2:3, 2 تيمتيئس 13-10:3, عبرانيون 39-32:10, 4-3:12, 1 پطرس 17-13:3, 19-12:4, ڏرشن 10:2

توبونه

متي 17:4, مرقس 12:6, لوقا 5-1:13, 31-1:15, 47-45:24, مُک شيلون را کوم 40-37:2, 20-19:3, 31-29:17, 21-20, 20-19:26, 2 کُرنتيون 11-8:7, 2 پطرس 9:3, ڏرشن 21-20:9

پَوِتر آتما

مَتي 19:28, مرقس 11:9-11, 30-28:3, لُوقا 35:1, 16:3, 1:4, 13:11, 12:12, یُوحنا 34-32:1, 8-5:3, 39-37:7, 17-15:14, 26:14, 26:15, 15-7:16, 23-19:20, مُک شیلون را کوم 5-4:1, 8:1, 18-1:2, 39-38:2, 31:4, 5-3:5, 17-14:8, 48-44:10, 4-2:13, 28:15, 10-7:16, 7-1:19, رُومیون 5:5, 6:7, 16-9:8, 27-26:8, 1 کُرنتیون 4:2, 16-9:2, 16:3, 11:6, 19:6, 13-1:12, 2 کُرنتیون 22-21:1, 5:5, 14:13, گلتیون 5-2:3, 6:4, 18-16:5, 25-22:5, افسیون 14-13:1, 17:1, 16:3, 4-3:4, 30:4, 20-18:5, 18-17:6, 1 تِسلُنیکِیون 6-5:1, 19:5, 2 تِسلُنیکِیون 13:2, طِیطس 6-5:3, عِبرانیون 4:2, 14:9, 1 پطرس 2:1, 11:1, 2 پطرس 20-21:1, 1 یُوحنا 20:2, 24:3, 8-6:5, 13:4

پَوِتر سنون

مَتي 20-18:28, یُوحنا 22:3, 2-1:4, مُک شیلون را کوم 42-37:2, 12:8, 38-36:8, 48-44:10, 15-14:16, 33-31:16, 7-1:19, 16-12:22, رُومیون 4-1:6, گلتیون 27-26:3, کُلسیون 12:2, 1 پطرس 22-20:3

جَگَت رو ناهو

مَتي 4:19, یُوحنا 3:1, مُک شیلون را کوم 15:14, 26-24:17, 1 کُرنتیون 6:8, کُلسیون 16-15:1, عِبرانیون 2:1, 3:11, 11:4

حکومت

مَتي 22-15:22, مُک شیلون را کوم 29-27:5, رُومیون 7-1:13, 1 تِیمِثِیُس 4-1:2, طِیطس 1:3, 1 پطرس 17-13:2

نک سهو

رُومیون 25-18:8, 28:8, 2 کُرنتیون 4:1, 18-16:4, یعقوب 4-2:1, 1 پطرس 9-6:1, 21-19:2, 10-8:5

نوه - نوه کي سئ

رُومیون 32-18:1, 8-5:8, گلتیون 21-19:5, افسیون 3-1:2, 5-3:5, کُلسیون 10-5:3, یعقوب 17:4, 1 پطرس 3:4, 1 یُوحنا 5-4:3

نوه - بتائي منک نوه کرئه

يُوحنا 7:9, رُوميون 9:3-20, 23:3, 12:5, گلتيون 22:3, 1 يُوحنا 8:1-10

نوه - نوهون ري سزا تي کم کرين پچو

متي 28:10, 42-41:13, يُوحنا 20-18:3, 36:3, مُک شيلون را کوم 31-30:17, رُوميون 19-18:1, 23:6, گلتيون 8-7:6, کُلسيون 6-5:3, 2 تِسلنيکيون 9-7:1, عبرانيون 27:9, 31-26:10, 1 پطرس 17:1, 5-3:4, يهُوداه 7:1, دُرشن 15-11:20

نوشي ننه ساندو

متي 32-31:5, 9-3:19, لُوقا 18:16, رُوميون 3-2:7, 1 کُرتنيون 16-10:7

رنڌال نوشي

مُک شيلون را کوم 1:6, رُوميون 3-2:7, 1 کُرتنيون 40-39:7, 1 تيمثيُس 16-3:5, يعقوب 27:1

شاستر

متي 4-1:4, 20-17:5, 29:22, يُوحنا 32-31:8, 31:20, مُک شيلون را کوم 32:20, رُوميون 4:15, 26:16, کُلسيون 16:3, 1 تِسلنيکيون 13:2, 13:4, 2 تيمثيُس 17-14:3, عبرانيون 12:4, 1 پطرس 25-22:1, 2 پطرس 21-19:1, 2 يُوحنا 10-9:1, دُرشن 3:1

شراب نه پيو

رُوميون 13:13, 1 کُرتنيون 11:5, 11-9:6, گلتيون 21-19:5, افسيون 18:5, 1 تيمثيُس 3-1:3, طيطُس 7:1, 1 پطرس 5-3:4

شيطون

متي 19:13, 41:25, لُوقا 13-1:4, 4-3:22, يُوحنا 44-42:8, 2 کُرتنيون 11-10:2, 4:4, 15-13:11, افسيون 2:2, 1 تِسلنيکيون 18:2, 2 تِسلنيکيون 12-9:2, 1 پطرس 9-8:5, 1 يُوحنا 10-8:3, دُرشن 12-7:12, 3-1:20, 10:20

شيطون مانه جيتو ان نورون صير تي سهو

متي 11-1:4, 13:6, لُوقا 32-31:22, يُوحنا 19-14:17, رُوميون 39-31:8, 12:12, 20-19:16, 1 کُرتنيون 13-12:10, 13:16, 2 کُرتنيون 10-7:12, افسيون 21-20:3, 18-10:6, فليپيون 13:4

1 ٿسلنيڪيون 3:5-8, 2 ٿسلنيڪيون 3:3, 2 ٿيمٿيس 1:7-8, 8 عبرانيون 2:18, 4:14-16, 12:1-2,
يعقوب 4:7, 1 پطرس 1:5, 5:8-11, 1 يوحنا 4:4, 5:3-5, ڏرشن 12:7-12

کيس - ٻيزون مانھ کيس نہ ڪروو

مٽي 5:25-26, 5:38-42, 17:15-18, روميون 12:14-21, 1 ڪرنٿيون 6:1-8

کشي رئي کير

مڪ شيلون را ڪوم 20:24, روميون 1:2-4, 17:16-17, 1 ڪرنٿيون 1:17-25, 7:1-7, گلتيون
1:6-12, افسيون 1:13, فليپيون 1:27, ڪلسيون 1:5-6, 1 ٿسلنيڪيون 1:5, 2 ٿسلنيڪيون 2:14,
2 ٿيمٿيس 1:8-11, 2:10-8

گريبي ٿي ويو

مٽي 5:12, 1:18-5, 1:14-7, 18:9-14, افسيون 4:2, فليپيون 2:3-11, ڪلسيون
13:12-13, يعقوب 4:5-10, 1 پطرس 5:7

ماڻهي - پريو ايسو را موت ري ڪري ٺوهون رئي ماڻهي زڙه

مٽي 26:29, روميون 3:25, 5:9-10, افسيون 1:7, عبرانيون 9:11-14, 1 يوحنا 1:6-7,
ڏرشن 7:14-17

ماڻهي - يگيون ماڻهي ڏيڏا هارو تيار سئ

مٽي 26:28, مرقس 11:25-26, مڪ شيلون را ڪوم 5:31, 10:43, 26:18, افسيون 7:1, ڪلسيون
14:13-14, 2:13-14, عبرانيون 10:17-18, 1 يوحنا 1:8-2

ماڻهي - يگيون وشواس راڪيا وازون نئ ماڻهي ڏين ٺوهون ري سزا ٿي آزاد ڪرئ

مڪ شيلون را ڪوم 13:38-39, روميون 1:16-17, 3:21-26, 5:1, 5:9-10, 5:18-19, گلتيون
2:16, 3:6-9, طيطس 3:7

ماڻهي - ٻيزون نئ ماڻهي ڏيوو

مٽي 6:12-15, 18:21-35, مرقس 11:25, 1:6-37, 17:3-4, 2 ڪرنٿيون 2:5-11, افسيون
4:31-32, ڪلسيون 3:13

مائيترون ان بازون رٽ ٻيٽ ۾ ڪيوئ نمونءَ ويوو

مٽي 6-3:15, لُوقا 51:2, اِفسيون 4-1:6, ڪُلسيون 21-20:3, 1 تيمٿيئس 5-4:3, 4:5, 8:5,
عبرانيون 11-7:12

مَدَت - پيزون رٽي مَدَت ڪروو

مٽي 4-1:6, 12:7, 46-31:25, لُوقا 11-10:3, 38:6, مڪ شيلو را ڪوم 30-27:11, 1 ڪُرنتيون
24:10, 2 ڪُرنتيون 15-1:8, 15-9:1, 10-9:6, 10-9:6, 19-14:4, 19-14:4, 24:10, 3-1:13,
16:13, يعقوب 27:1, 16-15:2, 1 يوحنا 18-16:3

مِلِگَت

مٽي 21-19:6, 34-24:6, لُوقا 21-13:12, 34-32:12, مڪ شيلون را ڪوم 35-20:35, 1 تيمٿيئس
10-6:6, 19-17:6, 6-5:13, يعقوب 9-1:2, 9-1:5

موت

يوحنا 40-39:6, 27-17:11, 4-1:14, رُوميون 11-10:8, 39-38:8, 9-7:14, 1 ڪُرنتيون
58-12:15, 2 ڪُرنتيون 10-1:5, 10-1:5, 24-20:1, 1 تِسلنيڪيون 18-13:4, 18-13:4, 15-14:2,
ٿرشن 13:14, 4-1:21, 5-1:22

مُورَتِي پُوزا ان جاتو

مٽي 10:4, مڪ شيلون را ڪوم 12-4:13, 31-22:17, 20-11:19, 1 ڪُرنتيون 11:5, 11-9:6,
13-1:8, 22-1:10, 2 ڪُرنتيون 18-14:6, 18-14:6, 21-19:5, 1 تِسلنيڪيون 10-9:1, 10-9:1, 21:5,
ٿرشن 8:21, 15:22

نرڳ رٽي سزا

مٽي 28:10, 42-41:13, 50-47:13, 41:25, لُوقا 26-23:16, 2 تِسلنيڪيون 9:1, ٿرشن 15-10:20.

8:21

نيا - پڳوون ايسو را هِيلا ٿي منڪون رو نيا ڪرشي

مٽي 23-21:7, 27-24:16, 46-31:25, يوحنا 21-18:3, 29-24:5, مڪ شيلون را ڪوم 31-30:17,
رُوميون 11-1:2, 12-10:14, 1 ڪُرنتيون 15-10:3, 5:4, 2 ڪُرنتيون 10-9:5, 2 تِسلنيڪيون
10-5:1, 10-5:1, 28-27:9, 31-26:10, 1 پطرس 17:1, 5-3:4, ٿرشن 15-11:20

ورت کیوئ نمُونئ راکوو

متی 6:16-18، مرقس 2:18-20، مَک شیلون را کوم 13:1-3، 14:23

وشواس

رُومیون 5:1-2، 1 کُرنتیون 13:13، 2 کُرنتیون 5:6-7، گلتیون 5:6، عبرانیون 11:1-40، یعقوب 1:2-8، 2:14-26، 1 پطرس 1:3-9

وشواس راکیا تِی تارن زَرَّه

یوحنا 1:12، 3:15-18، 3:36، 6:47، 14:6، 20:31، مَک شیلون را کوم 4:12، 16:30-31، رُومیون 3:20-22، 10:9-10، گلتیون 2:16، افسیون 2:8-9

وشواسیون رء آیت یر هپ راکوو

متی 18:19-20، مَک شیلون را کوم 2:41-47، رُومیون 12:4-8، افسیون 1:22-23، 4:11-16، کُلسیون 3:15-17، 1 تیمتیس 4:13، عبرانیون 10:24-25

وشواسیون رء کیوا هووو کپئ

یوحنا 13:34-35، 14:27، رُومیون 12:9-13، گلتیون 5:22-26، کُلسیون 3:12-17، 1 تسلیونیون 5:16-18

وشواسی منڈرئی

متی 16:13-20، مَک شیلون را کوم 2:41-42، رُومیون 12:4-8، 1 کُرنتیون 12:30-31، افسیون 1:22-23، 2:19-22، 4:16، کُلسیون 1:18، عبرانیون 10:24-25، 1 پطرس 2:4-10، 19:5-10

وشواسی منڈرئی هارو کیوا اگیوون ان شیواتاری سُونیوو کپئ

مَک شیلون را کوم 6:1-6، 14:23، 1 تیمتیس 3:1-13، طیطس 1:5-9

وشواسی منڈرئی رون اگیوونون رء کی کروو ان کیوئ نمُونئ ویوو

متی 28:18-20، لُوقا 22:24-27، مَک شیلون را کوم 20:35، 1 تسلیونیون 2:1-12، 1 تیمتیس 4:1-16، 2 تیمتیس 2:1-26، 3:10-17، 4:1-5، طیطس 2:7-8، 1 پطرس 5:1-4

وَشَوَاسِي مَنْدَرِي رُون اَڳِيُونُون رُو مَوْن رَاكُو

1 کُرنتيون 14:9, گلتيون 6:6, 1 تِسْلُونِيڪيون 5:12-13, 1 تِيْمُثِيُس 5:17-22, عِبرانيون 7:13,

17:13

هميش رُو جِيَوْن اِن نَوِي حَيَاتِي

مَتِي 30-16:19, لُوقَا 28-25:10, يُوْحَنَّا 16-1:3, 29-19:5, 10:10, 26-25:11, 6:14, 3-2:17, 31:20, رُومِيُون 21:5, 14-5:6, 17-10:8, 2 کُرنتيون 17:5, گلتيون 20:2, اِنْسِيُون 6-1:2, ڪَلْسِيُون 13:2, 4-1:3, 2 تِيْمُثِيُس 10:1, طِيطُس 7-4:3, 1 پطرس 23:1, 1 يُوْحَنَّا 13-11:5

هَازَا هُورَا - ايسُو رَا نُوْم ٿِي مَنڪُون نَن هَازَا هُورَا ڪَرُو

مَتِي 25-23:4, 35:9, 5-2:11, مَڪ شيلون رَا ڪُوْم 6-1:3, 8-4:8, 16-11:19, 9-8:28, 1 کُرنتيون 9:12, 30-29:12, 2 کُرنتيون 10-7:12, 1 تِيْمُثِيُس 23:5, 2 تِيْمُثِيُس 20:4, يَعْقُوب

15-14:5

يَقِينَ

مَرَقَس 25-22:11, لُوقَا 6-5:17, يُوْحَنَّا 1:14, رُومِيُون 23-22:14

زونا قرار رون کتابون را نوم

English	پروتستنت	کیتلک	English	پروتستنت	کیتلک
Ecclesiastes	واعظ	جامع	Genesis	پیدایش	تکوین
Song of Songs	غزل الغزلات	نشد الاناشید	Exodus	خروج	خروج
Isaiah	یسعیا	اشعیا	Leviticus	احبار	احبار
Jeremiah	یرمیاہ	ارمیا	Numbers	گنتی	عدد
Lamentations	نوم	مرثیے	Deuteronomy	استینا	تشدیه شرع
Ezekiel	حزقی ایل	حزقیال	Joshua	یشوع	یوشع
Daniel	دانی ایل	دانیال	Judges	قضات	قضات
Hosea	ہوسع	ہوشع	Ruth	روت	راعوت
Joel	یوئیل	یوئیل	1 Samuel	۱- سموئیل	۱- سموئیل
Amos	عاموس	عاموس	2 Samuel	۲- سموئیل	۲- سموئیل
Obadiah	عوبدیاہ	عوبدیاہ	1 Kings	۱- ملوک	۱- سلاطین
Jonah	یونہ	یونس	2 Kings	۲- ملوک	۲- سلاطین
Micah	میکاہ	میکا	1 Chronicles	۱- اخبار	۱- تواریخ
Nahum	ناحوم	نحوم	2 Chronicles	۲- اخبار	۲- تواریخ
Habakkuk	حبقوق	حبقوق	Ezra	عزرا	عزرا
Zephaniah	صفنیاہ	صفنیاہ	Nehemiah	نحمیاہ	نحمیاہ
Haggai	حجی	حجائی	Esther	استیر	آستر
Zechariah	زکریاہ	زکریا	Job	ایوب	ایوب
Malachi	ملاکی	ملاکی	Psalms	مزامیر	زبور
			Proverbs	امثال	امثال